


Nacom Pejume Diwesi po diwesi pena jume diwesi

xua Jesucristo yabara tinatsi



New Testament in Cuiba

Nacom Pejume Diwesi po diwesi pena jume diwesi xua Jesucristo yabara tinatsi
New Testament in Cuiba

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 4 Mar 2019 from source files dated 22 Sep 2018
e9c4c3a0-6dec-54a4-aaba-fb395e5eddc7

Contents

SAN MATEO	1
SAN MARCOS	93
SAN LUCAS	143
SAN JUAN	227
HECHOS	287
ROMANOS	357
1 CORINTIOS	396
2 CORINTIOS	431
GÁLATAS	454
EFESIOS	467
FILIPENSES	480
COLOSENSES	489
1 TESALONICENSES	497
2 TESALONICENSES	504
1 TIMOTEO	508
2 TIMOTEO	518
TITO	525
FILEMÓN	530
HEBREOS	532
SANTIAGO	564
1 SAN PEDRO	573
2 SAN PEDRO	583
1 SAN JUAN	589
2 SAN JUAN	597
3 SAN JUAN	599
SAN JUDAS	601
APOCALIPSIS	605

Jesucristo Pia Pexeinya Diwesi Jume Tatsi Mateo Petinae Diwesi

*Meje yabara pomonae Jesucristo pia pamo susatopiwi tatsi
(Lc 3.23-38)*

¹ Meje barapo diwese Jesucristo pia pamo susatopiwi tatsi yabara. Jesucristo pon Nacom itoroba itaboco wetsica xua jiwi pecapanenebiyaenexatsi. Bapon Abraham pia pemomoxi susato jiwanapin tatsi. Barapon Abraham pon bayatha caena tupa, pon copiya naebopa po cae pin nacuatha xua israelmonae pomonae judiomonaexae beya pinmonae tsoponae. Matautano Jesucristo David pia pemomoxi susato jiwanapin tatsi. Barapon David pon bayatha caena tupa, pon caena bayatha Israel nacuapiwi itorobiya pia pepa peewatsinchi.

² Abraham Isaac paxa tatsi. Bapon Isaac Jacob paxa tatsi. Bapon Jacob, Judá paxa tatsi yawa Judá peweicho jiwi, bapontha cae axaba. ³ Bapon Judá Fares iru Zara paxa tatsi. Tamar Fares pena tatsi iru Zara pena tatsi. Bapon Fares Esrom paxa tatsi. Bapon Esrom Aram paxa tatsi. ⁴ Bapon Aram Aminadab paxa tatsi. Bapon Aminadab Naasón paxa tatsi. Bapon Naasón Salmón paxa tatsi. ⁵ Bapon Salmón Booz paxa tatsi. Booz pena tatsi pewun Rahab. Bapon Booz Obed paxa tatsi. Obed pena tatsi pewun Rut. Bapon Obed Isaí paxa tatsi. ⁶ Bapon Isaí David paxa tatsi, po David caena bayatha Israel nacuamonae itorobiya pia pepa peewatsinchi. Matautano David pexanto tatsi pewun Salomón. Bapon Salomón pena tatsi pewun Betsabé, powa copiya bayatha Urías xeina.

⁷ Bapon Salomón Roboam paxa tatsi. Bapon Roboam Abías paxa tatsi. Bapon Abías Asa paxa tatsi. ⁸ Bapon Asa Josafat paxa tatsi. Bapon Josafat Joram paxa tatsi. Bapon Joram Uzías paxa tatsi. ⁹ Bapon Uzías Jotam paxa tatsi. Bapon Jotam Acaz paxa tatsi. Bapon Acaz Ezequías paxa tatsi. ¹⁰ Bapon Ezequías Manasés paxa tatsi. Bapon Manasés Amón paxa tatsi. Bapon Amón Josías paxa tatsi. ¹¹ Bapon Josías Jeconías paxa tatsi, iru Jeconías peweicho jiwi bapontha cae axaba. Bapon Jeconías poxonae israelmonae teicaeya capoinchi Babilonia nacua beya, barapo jinaebotha Jeconías naexana epatotha.

¹² Bapoxonae pirapae Jeconías tanaexanatsi pexanto Babilonia nacuatha. Jeconías Salatiel paxa tatsi. Bapon Salatiel Zorobabel paxa tatsi. ¹³ Bapon Zorobabel Abiud paxa tatsi. Bapon Abiud Eliaquim paxa tatsi. Bapon Eliaquim Azor paxa tatsi. ¹⁴ Bapon Azor Sadoc paxa tatsi. Bapon Sadoc Aquim paxa tatsi. Bapon Aquim Eliud paxa tatsi. ¹⁵ Bapon Eliud Eleazar paxa tatsi. Bapon Eleazar Matán paxa tatsi. Bapon Matán Jacob paxa tatsi. ¹⁶ Bapon Jacob José paxa tatsi. Bapon José piowa tatsi pewun María. Barapowa María Jesús pena tatsi. Bapon Jesús icha wun wun dutatsi, po wun “Mesías”, jei, po wun xua jei: “Pon Nacom itoroba itaboco wetsica xua jiwi pecapanenebiyaenexa tsainchi”, jei.

¹⁷ Abraham pia xainya weya tatsi trece poyobe pebiwi naexana xua Abraham muxunano daxota daxita catorce poyobe naexana, beya pu ducua poxonae David naexana. Bapon iru Salomón pia xainya weya tatsi trece poyobe pebiwi naexana xua Salomón muxunano daxota daxita catorce poyobe pebiwi naexana beya pu ducua poxonae Israel nacuamonae teicaeya capoinchi Babilonia nacua beya, beya pu ducua poxonae Jeconías naexana. Salatiel pia xainya weya tatsi trece poyobe pebiwi naexanapona xua Jeconías muxunano. Daxota daxita catorce poyobe naexana, beya pu ducua poxonae Mesías naexana.

*Meje yabara poxonae Jesucristo nowaeuncua pebin wuto barapo cae pin nacuathe
(Lc 2.1-7)*

¹⁸ Poxonae Jesucristo naexana bara iche: María Jesucristo pena tatsi, poxonae barowa muxu pepichi pecotsiwa pon pewun José, poxonae abu cataunxuae jopa peru nacoyabiyo, bapoxonae María pexuyo bupana taecatsi. Barapo pexuyo Nacom pia Pejumope tunaxu tatsi María tsiperu weeca exanatsi. Barapo pexuyo pewun Jesús.

¹⁹ José, María pia pebin tatsi tsane, poxonae pichina pon pejuñtu coyene xanepanaein. Daxota bapon José, María jopa beyabara paebichi xua catsa pexuyo pecapoponaexae xua bupana taecatsi xua María aura peexanaenexa tsainchi jiwi peitutha tatsi. Bapoxonae José namicha moyiya najuntú cui coyene baraxuba xua jopa pepichiwa tsane, xua jiwi jopa cataunxuae pecui yabara yaputaenexa. ²⁰ Poxonae came cataunxuae baxua yabara nanta xeina, José maituncuataba. Bapoxonae José amachinae tsita naitutatsi matatsunpin po matatsunpin Nacom itoroba. Matatsunpin namchiya jeye: “José, David pia pemomoxi susato jiwanaein tatsim, jopa junuwinde xua nepichiwa tsane María xua jinseuri neexanaewa tsane. Tsipei barapo pexuyo, po pexuyo naexanaena, apara Nacom pia Pejumope tñaxu tatsi pia pexuyo tatsi. ²¹ Bapowa tanaexanaeinchi pexanto. Bapon wun dutsiname, po wun ‘Jesús’, jei. Barapo wun, wun dutsiname tsipei bapon pijimona capanepaena xua abe pia peexanae cuiru coyenein weya tatsi, xua daxota Nacom jopa petsitanexatsi xua barapomona pexeinaewa penatsicuentiwa”, jei matatsunpin.

²² Daxita baraxua exana penacui yabara jume wetsinexa pocotsiwa bayatha Nacom pia peitorobi jume pepaebin caena bayatha yabara tsiwuna muxu duta Nacom nexa, xua jeye:

²³ “Matha taema, yabuyoy pexuyo bupana taecatsi powa jopa peru nacoyabiyo pebin. Yawa tanaexanatsi pexanto, po pexuyo wun dutatsi, po wun ‘Emanuel’, jei”, jei Nacom pia peitorobi jume pepaebin.

(Barapo wun jei: “Nacom naca baru popona”, jei.)

²⁴ Poxonae José nacosataxuba, bapon exana pocotsiwa matatsunpin itoroba po matatsunpin Nacom itoroba. José María pitatsi. ²⁵ Bequein cae botha nabaru poponabe daichitha jopa came imoxoyo naperu cuicuinaeyobe beya poxonae pexanto tanaexanatsi. José pexuyo wun duta, po wun “Jesús”, jei.

2

Meje yabara poxonae pomona opitei pecayabara wuna yaputaewi barapomona Jesús siwa poinchi xua petaenexatsi

¹ Jesús naexana Belén tomaratha, Judea nacuatha. Barapoxonaeru Herodes pon Judea nacuapiwi pia peyanacua ewatsinchi popona barapo Judea nacuatha. Poxonae Jesús naexana pebiwi pata Jerusalén tomaratha. Barapomona opitei pecayabara wuna yaputaewi. Barapomona pia tomara tajú taenatsi ichaxota pocotsiwa xometo weecoina.

² Barapomona ichawa beya yayainyaba tsiniya, jeye:

—¿Exota naexana pexuyo, po pexuyo judiomona itorobiya pia pepa peewatsinchi exanaeinchi poxonae pinyo tsane? Paxan payaputan xua bapon naexana xote tsipei bapon pia opiteito tatsi panaitomatsiya punaenaponan pata nacua werena, po nacuatha ichaxota pocotsiwa xometo weecoina. Papatan xua pata wuna jainchiwa tsane barapo pexuyo, jei.

³ Herodes, pon Judea nacuapiwi pia peyanacua ewatsinchi poxonae bapon yabara jume tane xua ichun naexana pon jiwi itorobiya pia pepa peewatsinchi, bapoxonae bapon bichocono unthuthu deideije Iruru Jerusalén tomarapiwino daxita bichocono unthuthu deideije pejume taexae baxua. ⁴ Nexata Herodes waba sacerdotemona pia pentacaponawewi tatsi xua pia petanacaetsinexa tsainchi pia botha. Matautano wabano pomona jiwi pecuidubiwi Moisés pia peitorobi coyenewa tatsi. Daxita barapomonaetha Herodes yainyaba, jeye:

—¿Exota naexanaena Mesías, pon bepa pinae Nacom itorobei? jei Herodes.

⁵ Barapomona jume nota, jeye:

—Bapon naexanaena Belén tomaratha, po tomara Judea nacuatha eca. Bapon naexanaena barapo tomaratha, tsipei Nacom pia peitorobi jume pepaebin caena bayatha tsiwunaeya yabara muxu dutsiya tina xua Mesías yabara, Nacom nexa. Nacom jeye:

⁶ ‘Belén tomara bequein po tomariyo tsiqui tomariyo
 jiwana tomara xua Judea nacuatha, daichitha
 Judea nacua pentacaponae wi yabara nanta xeinaena
 xua Belén tomara peainya cui tomariyo tsane.
 Baxua nanta xeinaena tsipei barapo
 tomariyotha naexanaena, pon jiwi
 pia Pecanamataxeinaeinchi tatsi.
 Xan Nacom bapon itorobin tamonaetha,
 pomonae Israel nacuapiwixae,
 xua bapon barapo israelmonae itorobiya
 pia pepa Peewatsinchi tsainchi’, jei Nacom,
 xua Nacom tatinatsi pon Nacom peitorobi jume
 pepaebin, jei sacerdotemonae iru pomonae jiwi
 pecuidubiwi Moisés pia peitorobi coyenewa tatsi.

⁷ Nexata Herodes namicha moyiya waba pomonae opitei pecayabara wunaeyaputaewi. Herodes yainyaba barapomonaetha: “¿Eta poxonae yatsicaewa barapo opiteito paca tsita naituta?” jei bapon. ⁸ Poxonae barapomonaeyume nota bapontha bapoxonae Herodes itoroba barapo pebiwi Belén tomara beya. Herodes jeye barapomonaetha:

—Paponare Belén tomara beya. Beta xanepanaya pajeire barapo pexuyo. Poxonae pataebiname barapo pexuyo, nexata pana netsipaebare, tsipei xan iru ponaein wunaeyatajainchinexa tsaneru barapo pexuyo, jei Herodes.

⁹ Poxonae Herodes najume weta, barapo pebiwi bara ponarucupa, pomonae opitei pecayabara wunaeyaputaewi. Bapoxonae po opiteito bayatha tane pia nacuatha, barapo opiteito jemeicha caewa naitutaba. Yawa barapomonaey matakacaponinchi. Barapo opiteito ducuacona beya matapainya matatsun ducuatibica ichaxota barapo pexuyo boca. ¹⁰ Poxonae barapo pebiwi tane barapo opiteito, barapo pebiwi bichocono juntu coyene weiweina. ¹¹ Barapomonaey bo jojoniya ichaxota tane barapo pexuyo xua pena baru ecatsi, barapowa María. Bapoxonae barapo pebiwi pentabocotontha ena xua barapo pexuyo wunaeyapejainchinexa tsainchi, tsipei barapoyo pon Pecanamataxeinaein peexanaexae tsainchi poxonae pinyo tsane. Bapoxonae barapomonaey piawan coibo isacapenta xua cajjinca. Barapo pexuyo catsibatsi xuan pocotsiwa pewun oro nain. Catsibatsino xua pocotsiwa pewun incienso xua pocotsiwa tuxusi tuxuei benata poxonae tauta exana. Matautano muxuna catsibatsi icha petuxueiwa pocotsiwa pewun mirra xua pocotsiwa anaincuito. ¹² Bapoxonae pirapae barapo pebiwi maitumenaeya amachinae xua jopa bewa equeicha patsi tsane ichaxota Herodes eca. Daxota barapomonaey pia nacua be-iyiya, icha namto iyiya.

Meje yabara poxonae Jesusbaru panenebiya Egipto nacua beya

¹³ Poxonae barapo pebiwi ponarucupa bapoxonae Nacom itoroba matatsunpin Josetha. Matatsunpin tsita naituta poxonae José amachinae. Matatsunpin José baraichi, jeye: “Asiya uncuare. Pexuyo pire yawa coxiwano. Egipto nacua bebaru naetsiriwiyama. Ecare barapo nacuatha, beya abu poxonae equeicha catsipaebinchi baxota. Tsipei Herodes pexuyo jeitsina pebexubinexa tsainchi pexuyo”, jeichichi José matatsunpin.

¹⁴ Poxonae cataunxuae merawi, José nacosataxuba. José pexuyo pita, yawano José pita yabuyo María xua pexuyo pena tatsi. Daxita barapoyobe warapa Egipto nacua beya poxonae cataunxuae quirei tsuncuae. ¹⁵ Barapo nacuatha, Egipto nacuatha, barapoyobe ecabe beya poxonae juinya Herodes tupa. Baxua José cana exanatsi xua bayatha Nacom pia peitorobi jume pepaebin petsiwunaey yabara paebixae Nacom nexa xua jeye: “Waban Taxanto Egipto nacua weya”, jei Nacom pon pia peitorobi jume pepaebin Nacom nexa pon jiwi Pecanamataxeinaeinchi.

Meje yabara poxonae Herodes itoroba, ichamonae itorobatsi xua pejutebinexatsi pexui

¹⁶ Poxonae Herodes yaputane xua pomonae opitei pecayabara w̄nae yaputaewi muxujainyabiya tsipaeba bapontha xua itara patapaeba, bapoxonae Herodes anaya bichocono anaepana. Nexata bapon itoroba, ichamonae itorobatsi xua pejutebinexatsi daxita pexui pebiwi w̄tixi, po pexui cataunxuae pencuetixi, po pencuetixi cataunxuae jopa yapu othopaeyo dos po weibe, ir̄a po pexui xua bayatha yapu othopa dos po weibe. Barapon Herodes itoroba xua pejutebinexatsi barapo pexui pebiwi w̄tixi daxita poxi Belén tomara cuariya beya. Herodes baxua exana yaitama bayatha pomonae opitei pecayabara w̄nae yaputaewi yopita xua pinae tane pexuyo pia opiteito tatsi barapo dos po weibetha poxonae peputha tapona, opiteito peputha tatsi xua jinaebotha, poxonae Judea nacua beya pona. ¹⁷ Baxua Herodes cana cui wetsiya exanatsi, xua bayatha Jeremías pon Nacom pia peitorobi jume pepaebin petsiw̄nae yabara paebixae, xua jeye:

¹⁸ “Jume tan xua wecoyei Ramá tomaratha,
po tomara eca imoxoyo Belén tomaratha.

Powa xua wecoyei, bapowa Raquel,
powa bayatha t̄upa.

Bapowa Raquel pia pemomoxi susatopiwi siwa

wecoyei, tsipei daxita tajutebatsi.

Barapowa jopa naitawanae copatsiyo tsipei

pexui bayatha werapa bequein ichamonae jume
matawenta”, jei Jeremías.

¹⁹ Herodes bapoxonae pirapae t̄upa. Bapoxonae matatsunpin pon Nacom itoroba, José tsita nait̄utatsi poxonae José amachinae Egipto nacuatha. Matatsunpin jeye Josetha:

²⁰ “Natsixitabare. Pire barapo pexuyo yawa coxiwa María, pexuyo pena tatsi. Israel nacua beya caibe nawiya. Tsipei bayatha werapa pomonae ichichipa xua barapo pexuyo pebexubiwatsi”, jei matatsunpin.

²¹ Bapoxonae José natsixitaba. José pita pexuyo yawa coxiwa. Israel nacua beya caibe nawiya. ²² José jume tane xua juinya pinae Arquelao naexana Judea nacuapiwi pia peyanacua ewatsin tatsi. Arquelao Herodes pexanto tatsi. Arquelao xuya peyanacua ewatsin naexana ichaxota bayatha coxiyan peyanacua ewatsin naexana bapon Herodes. Tsipei Arquelao eca Judea nacuatha daxota José junuwa xua peponaewa barapo nacuatha. Daxota José pona Galilea nacua beya, tsipei poxonae amachinae matatsunpin itoroba xua bewa pinae ponaena barapo nacuatha. ²³ Poxonae José patopa barapo nacuatha, bapoxonae popona po tomaratha, po tomara pew̄n Nazaret tomara. Baxua José cana cui wetsiya exanatsi, xua bayatha Nacom pia peitorobi jume pepaebiwi Jesús cayabara tsiw̄nae muxu dutsiya jeye: “Bapon w̄n dutinchi po w̄n jei: ‘Nazaret tomarapin’, jei”, jei barapo Nacom pia peitorobi jume pepaebiwi.

3

Meje yabara poxonae Juan, pon Pebautisabin jiw̄i, cuiduba ira xuepana susato tsurucuae nacuatha

(Mr 1.1-8; Lc 3.1-9, 15-17; Jn 1.19-28)

¹ Pirapae poxonae ainya wei yapucaewa, poxonae ab̄u cataunxuae Jesús eca Nazaret tomaratha, bapoxonae Juan pon jiw̄i Pebautisabin patopa ira xuepana susato tsurucuae nacua beya xua Judea nacuatha. Bapon Juan Nacom Pejume Diwesi paeba ducuaeabiya.

² Juan namchi: “¡Icha j̄unt̄u coyene paxeinare Nacomtha painya neuraxae xua abe paexaname! Tsipei Nacom paca waba painya nenaexanaenexa piamonae tatsi jiwana pomonae Nacom itorobiya peewatsixae”, jei Juan.

³ Barapo Juan apara bapon pon caena bayatha peyabara tinaexaetsi. Isaías pon Nacom pia peitorobi jume pepaebin, bapon caena bayatha yabara jume w̄naeya tina, xua caena bayatha Juan yabara jume w̄naeya tinatsi. Isaías jeye:

“Jume tan pon wawai ira xuepana
susato tsurucuae nacuatha.

Bapon wawaya jeye: ‘Patsi najuntũ cui coyene wũnaere pon jiwi pia pepa Pecanamataxeinaeinchi pia pepatopae wũnaeya tsane’, jei pon wawai”, jei Isaías petinae diwesitha.

⁴ Juan jumaina duwein nabocoto, po duwein pewũn camello. Coreinya bocoto maraina. Juan xane pocotsiwan yapupuna, pocotsiwan be sure, mataũtano bana daebano. ⁵ Jiwi pata Jerusalén tomara weya, irũrũ pata xua daxita tomaranpiwi xua Judea nacua weya, irũrũ pata po tomaranpiwi xua imoxoyo Jordán mene weya. Barapomona pata Juan pejume taenexatsi. ⁶ Poxona barapomona nayopita Nacomtha xua bepa pinae Nacom tsita auratsi, xua abe peexanaexae, barapoxona Juan bautisaba barapomona Jordán mentha.

⁷ Ichitha poxona Juan tane xua nawita pata fariseomona jiwana irũrũ xua saduceomona jiwana pata ichaxota Juan bautisaba, Juan jeye barapomonaetha: “¡Paxam pomona pemuxitorobi jiwi pam! ¡Paxam be bara jomomona pam, tsipei jomo ba cuitaya dũcũpa nawa! Bara paichim anoxuae, paichichipame Nacom pacuitaya dũcũpame xua abe paca exanaeyainwa. Jopa papanenebiyaem tsane bequein bara paca bautisabinchi tsipei jopa pajuntũ coyene xanepanaem Nacomtha. ⁸⁻⁹ Xaniwaicha pajinompore xain ichamona paca cui tane, xua icha juntũ coyene painya nexainaewa Nacomtha xua painya neauraxae xua abe paexaname. Tsipei bequein paxam pajam: ‘Waxainchi Abraham pia pemomoxi susato jiwichixaetsi Nacom naca capanenebiya exanaena’, pajam, daichitha paxam jopa xaniwaicha pajume cowũntsim Nacom. Daxota Nacom itacũpatsi xua paca cui matawenta pia jopa paca nepaca capanenebiyaenexa tsane. Mataũtano barichino Nacom itacũpatsi xua jiwi forotsinchi barapo ibotixi weya, po ibotixi xote Jordán mene itapatha bobena. Barapo jiwi naexanaena, po jiwi yatsicaewa Abraham pia pemomoxi susato jiwi tatsi, pomona pejume cowũntsiwixaetsi Nacom. ¹⁰ Poxona pebin naein ũba sipari ba canacui wũnaeta xua pecaucubobinexa po naein jopa nacoichiyo. Poxona barapo naein ucuboba nantatsun eta xua petautsinexa isototha. Paxam bara paca jũta ichiya paca cana exanaena. Nacom paca yabara nacui wũnaeta xua paca bebai tsane isototha, ichaxota po isototha jopa cuinaya itacounayiyo tsipei Nacom jopa xanepanaya pata exanaem. ¹¹ Xan xaniwaicha paca bautisabatsi meratha painya neauraxae xua abe paexaname xua daxota icha juntũ coyene painya nexainaewa tsane Nacomtha. Paca bautisabatsi meratha, ichitha nama pon tsiwanaya patopan, apara bapon Mesías. Bapon paca bautisabina Nacom pia Pejumope tũnaxũtha tatsi poxona Nacom paca najumope catsibina. Bapon paca jiwana cui copatsinchi xua atene tsane Cristo pejume cowũntsixaetsi xua ichamona atene exanaena. Bapon bichocono peayapusũ itorobi coyenewa xeina beyacaincha xan. Bapon pon jiwi pia Pecanamataxeinaeinchi. Daxota bapon bichocono tsita pin ura xeinan xua tataxu mũ isanaxubiwa tsane pia penataxu xatatsiwa tatsi. Tsipei xan bichocono tapawin, beyacaincha pomona amanaya petanacuichiwi pia pentacaponawewi poxona barũ cui itura jina pia pentacaponawewichi. ¹² Bapon pon patopaena bapon bayatha tsinacobenata po paparato xua trigo xu nexa. Bapon trigo xu tsanaya seicaya matapepe jehebapona. Trigo xu jehebapona trigo xu matabohta. Matapepe jehebapona petautsinexa isototha, ichaxota po isoto jopa cuinaya itacounayiyo. Bapon bara jũta cana ichi tsane jiwitha icha trigo xu cana ichiya ichi. Jiwi Nacom tsana nobina pomona pejume cowũntsixaetsi pia nacuatha nexa. Ichamona tsana nobinchi pomona jopa pejume cowũntsiwichi, petautsinexa isototha ichaxota xua jopa itacounayiyo”, jei Juan.

*Meje yabara poxona Jesús bautisabatsi
(Mr 1.9-11; Lc 3.21-22)*

¹³ Nexata Jesús patopa ichaxota Juan uncua Jordán mentha xua Galilea nacuatha. Jesús patopa xua Juan pebautisabinexa tsane. ¹⁴ Copiya Juan juntucuru jume matawenta xua Jesús pebautisabiwatsi tsainchi tsipei anacuicaura. Juan jeye Jesthatha:

—Xan apara pon xua tanantawenonaewa xua xam bewa jame tana nebautisabiwam tsane. Nama xan jopa bewa cabautisabi tsainchi, jei Juan.

¹⁵ Ichitha Jesús jume nota:

—Anoxuae bara ‘je’ jande pocotsiwa xua xanepana, pocotsiwa ichichipan pocotsiwa xua xanepanaya exanatsi pocotsiwa xua Nacom naca itoroba, jei Jesús.

Bapoxonae Juan jume jejei xua Jesús bautisabatsi. ¹⁶ Nexata poxonae Jesús bautisabatsi, Jesús nainya mene wejuina. Bapoxonae nainya peitaboco nayausanaxuba. Jesús tane xua Nacom pia Pejumope tñaxu tatsi Jesús tapatopeicatsi, be topiboto yaruneica. ¹⁷ Bapoxonae Jesús jume tane pocotsiwa peitaboco wetsipaebicatsi, jechichi: “Bapon apara Taxanto, pon bichocono antobein pon itapetan. Bapon nejuntũ coyene weiweina exana”, jei Nacom.

4

Meje yabara poxonae Jesús juntũ coyene jũjutatsi caurimonae pia pentacaponaein tatsi xua Jesús abe coyeneya petaexanaenexa tsane

(Mr 1.12-13; Lc 4.1-13)

¹ Nexata Nacom pia Pejumope tñaxu tatsi Jesús matacayatsi ira xuepana susato tsurucuae nacia beya. Baxotiya caurimonae pia pentacaponaein tatsi Jesús piraichi juntũ coyene jũjutatsi xua Jesús abe coyeneya petaexanaenexa tsane.

² Jesús jopa nabanaeyo baraxotiya cuarenta po matacabibetha matautano cuarenta po merawibetha. Poxonae barapo matacabin yapucaewaba bapoxonae Jesús bichocono jainpa. ³ Caurimonae pia pentacaponaein tatsi imoxoyo patopa Jesthã. Bapon Jesús piraichi juntũ coyene jũjutatsi xua Jesús abe coyeneya petaexanaenexa tsane. Bapon Jesús baraichi:

—Icha xam yatsicaya Nacom Pexantom, netsita itũre. Barapo iboton itorobare xain pan naexanapenta, jei caurimonae pia pentacaponaein tatsi.

⁴ Ichitha Jesús jume nota:

—Nacom Pejume Diwesitha namchi: ‘Jopa metha bepa meisa jiwi betiya una jinompaetsipae pan. Bara irũ yawano Nacom Pejume Diwesi jiwi betiya yajuntũ cui coyeneya jũntemiya jinompa’, jei Nacom Pejume Diwesitha, jei Jesús.

⁵ Nexata caurimonae pia pentacaponaein tatsi Jesús matacapoinchi Jerusalén tomara beya. Baxotiya Jesús Nacom pin pia botha pentatupa beicha capoinchi. ⁶ Caurimonae pia pentacaponaein tatsi Jesús baraichi, jeye:

—Icha bara xaniwaicha Nacom Pexanto tatsim, wenaxoreinque. Yaitama tsipei Nacom Pejume Diwesitha namchi, jeye:

‘Nacom itorobina pia matatsunpiwi necayanabinexa.

Barapo matatsunpiwi asiya cawaetaboutsina pecobetha, xua jopa necataxu tsaquituncuaenexa tsane ibototha, poxonae wenaxorecame’, jei Nacom Pejume Diwesitha, jei caurimonae pia pentacaponaein tatsi.

⁷ Jesús jume nota, jeye:

—Barichi Nacom Pejume Diwesitha namchi, jeye: ‘Jopa juntũ coyene jũjũtsiya wũcaeiinde Nacom pon jinya Necanamataxeinaein, xua necajume jejeiwa tsane xua necayawenaewa tsane poxonae jopa xapain exanaem’, jei Nacom Pejume Diwesitha, jei Jesús.

⁸ Equeicha caurimonae pia pentacaponaein tatsi Jesús matacapoinchi ichaxota po demxuwa bichocono atororo. Baraxotiya Jesús tsita itũtatsi daxita nacuan xua barapo cae pin nacuathe. Matautano Jesús tsita itũtatsi daxita nacuan pia peitũpanae coyenewan. ⁹ Caurimonae pia pentacaponaein tatsi Jesús baraichi, jeye:

—Ichaunxuae nentabocototha uncuaename taitabaratha, xua matautano ichaunxuae newũnae jaintsiname xua nenanta xeinaewaxae xua xan jinya tacacanamataxeinaeinchi.

Bapoxonae barapo nacuan yawa muxuna nacuan pia peitupanae coyenewan, baxuan cacatsinchi xua jinya necanamataxeinaenexa barapo nacuan, jei caurimonae pia pentacaponaein tatsi.

¹⁰ Nexata Jesús jume nota:

—Xam pon caurimonae pia pentacaponaein, bara nexubiriware. Yaitama Nacom Pejume Diwesitha namchi, jeye: ‘Meisa wūnae jainde jinya Necanamataxeinaein Nacom. Meisa bapon yatsicaewa taexande pocotsiwa caitoroba’, jei Nacom Pejume Diwesitha, jei Jesús.

¹¹ Bapoxonae caurimonae pia pentacaponaein tatsi Jesús pia xainya weya tatsi nap-itaba. Matatsunpiwi pata Jesustha xua Jesús pecui matateicaenexa tsainchi, matautano xua peapatsinexa tsainchi.

*Meje yabara poxonae Jesús tamropata pitaba pia penacuichiwa Galilea nacuattha
(Mr 1.14-15; Lc 4.14-15)*

¹² Poxonae Jesús jume tane xua Juan jiwi pecubi botha eca, bapoxonae Jesús pona Galilea nacua beya. ¹³ Ichitha Jesús jopa ecaeyo Nazaret tomaratha, jame saya pona Capernaum tomara beya xua baxotiya pepoponaenexa. Barapo tomara eca, Galilea pucua itapatha ichaxota ainya nacuabe nacaquita ecabe po nacuiyo pewun Zabulón nacuiyo, yawa po nacuiyo iru pewun Neftalí nacuiyo. ¹⁴ Pocotsiwa Jesús exana poxonae Capernaum tomaratha popona, baxua Jesús yabara nacui wetatsi xua caena bayatha Nacom pia peitorobi jume pepaebin, pon Isaías, pecayabara cui wūnae tsiwūnaeya tinaexae poxonae jeye:

¹⁵ “Po ainya nacuabe pewun Zabulón nacuiyo matautano Neftalí nacuiyo, barapo nacuabe ecabe ichaxota po namtotha pucua imoxoyo caquita ducuiya.

Barapo nacuabe ecabe ichaxota po pin nacua, pewun Galilea nacua.

Barapo Galilea nacua icha muxunenetha eca xua Jordán mentha.

Barapo Galilea nacua weya jinompa pomonae jopa judiomonae naexanaeyo.

¹⁶ Barapomonae caena bayatha jopa yaputaeyo Nacom, matautano caena bayatha jopa nayabara yaputaeyo xua muxu bara nama pewerapaeba abe peexanaexae.

Daxita barapomonae be pocotsi jiwimonae poxonae pona pequireiwatha xua poxonae matautano jopa xeinaeyo xua penatsiwana itiyobiwa.

Daichitha daxita barapomonae nama jume cowantsina, xua jume cowantsinchi pon Nacom itoroba.

Bapon barapomonae juntu cui coyene babatsiya xanepanaya jinompaeya exanaeinchi ichi be jiwi ichi xua poxonae pin peicoichatha jinompa”, jei Isaías, pon Nacom pia peitorobi jume pepaebin.

¹⁷ Bapoxonae Capernaum tomaratha Jesús tamropata pitaba xua jiwi cuidubatsi. Jesús namchi, jeye: “Icha juntu coyene paxeinare Nacomtha, painya neuraxae xua abe paexaname. Tsipei Nacom paca waba painya nenaexanaenexa piamonae tatsi pomonae Nacom itorobiya peewatsixae”, jei Jesús.

*Meje yabara poxonae Jesús waba cuatro poyobe pebiwi, pomonae duwei peyamaewi
(Mr 1.16-20; Lc 5.1-11)*

¹⁸ Jesús pona Galilea pucua itapatha. Jesús tane ponbe ainya caepipeweichobe. Ichün pewün Simón pon icha wüño Pedro. Ichün pewün Andrés. Baponbe duwei peyamonaeinbe. Baponbe mentha yamonauyabe duwei pocotsiwatha xua peyamonaeawa.

¹⁹ Nexata Jesús baraibe baponbe, jeye:

—Anetha, pana nepuna pondebe. Paca cuidubinchibe. Anoxuae nama xan paca exanaeinchibe xua pinmonae payawenaenamebe xua barapomonae pejume cowüntsüwa tsane Nacom icha bayatha paichimbe poxonae payamonamebe duwei nawita, jei Jesús.

²⁰ Nainya caena baraponbe peyamonaeawan xubotabe. Napuna ponabe Jesustha.

²¹ Bapoxonae pirapae Jesús tane ichünbe, ponbe ainya caepipeweichobe. Ichün pewün Santiago. Ichün pewün Juan. Baponbe Zebedeo pexantobe tatsi. Baponbe jeratha paxa barü ecabe. Baponbe peyamonaeawan wünaetauyabe. Jesús waba, baponbe wabatsibe.

²² Caena nainya jera xubotabe mataütano paxa cuenta ponabe. Baponbe Jesús puna poinchibe.

*Meje yabara poxonae Jesús pin bicheitomonea cuiduba
(Lc 6.17-19)*

²³ Jesús popona ducuaeta daxita Galilea nacua beya. Bapon cuiduba ducuaeta daxita judiomonea pia penacaetutsi bontha tatsi. Jesús paeba ducuaeta Nacom pia pexeinya jume diwesi tatsi, po diwesi yabara xua Nacom waba jiwi, petanaexanaenexatsi piamonea pomonea Nacom jüntü coyene itorobiya ewata. Mataütano Jesús axaibi exana jiwi xua daxita carepaya xoxi atene barapomonae yawa xua faefaena peatenexae. ²⁴ Pin bicheitomonea jiwi jume tane xua juinya Jesús exana daxita carepaya Siria nacua. Barapomonae pomonea pejume taexae xua Jesús exana, barapomonae capona daxita pomonea domaebatsi, yawa pomonea peatenexae, mataütano pomonea caurimonea xeina, mataütano pomonea amameibatsi, mataütano pomonea mübatsi. Jesús axaibi exana daxita barapomonae. ²⁵ Pin bicheitomonea jiwi Jesús puna poinchi pomonea Galilea nacua weya pona. Irürü Jesús puna poinchi pomonea Decápolis nacua tomaran weya pona, irürü pomonea Jerusalén tomara weya pona, irürü pomonea Judea nacua weya pona. Irürü Jesús puna poinchi pomonea jinompa ichaxota po nacua eca imoxoyo Jordán mentha xua icha muxunenetha xua tajüthiya.

5

Meje yabara poxonae Jesús cuiduba jiwi demxuwatheicha

¹ Poxonae Jesús tane barapo pin bicheitomonea, bapoxonae Jesús pona demxuwatheicha. Mataütano Jesús baxoteicha eca. Bapoxonae Jesús pijimonea matawacaicha nacaetutarücupatsi pomonea pia pepuna ponaewichi. ² Jesús tamropata pitaba xua diwesi cuiduba barapo pin bicheitomonea.

*Meje poxonae Jesús yabara cuiduba pomonea pejüntü coyene weiweinae jiwi
(Lc 6.20-23)*

³ Jesús barai barapo pin bicheitomonea pomonea pijimonaexae tatsi, jeye: “Maisa bichocono jüntü coyene weiweina pomonea yaputane xua Nacom pecanantawenonae-watsi xua xanepanaya pejinompaewa tsane. Tsipei barapomonae naexanaena Nacom piamonea pomonea Nacom jüntü coyene itorobiya ewata.

⁴ “Maisa bichocono jüntü coyene weiweina pomonea bequein anthüthürewewe xua siwa wecoyei petaexae xua ichamonea abe cana exana jiwitha. Daichitha barapomonae Nacom cui matateicaena, barapomonae cui matateicaeinchi xua anthüthürewewe, xua ichamonea siwa wecoyeichi.

⁵ “Maisa bichocono jüntü coyene weiweina pomonea Nacom bichocono pebarü cui itura jinaewatsi xua jopa Nacom yabara ajüntücoyenetsacatsi. Barapomonae nama patsina pena iratha po ira Nacom bayatha yabara paeba.

⁶ “Maisa bichocono jüntü coyene weiweina pomonea ichichipa nawita xua exaneiba xua Nacom ichichipa, pexeinaenexa tsane pejüntü coyene xanepanaewa Nacomtha xua

Nacom jopa petsitanexatsi xua barapomonae pexeinaewa penatsicuentsiwa xua abe peexanaexae bapontha. Barapomonae yawenatsi, Nacom yawena xua barapomonae pexeinaenexa tsane barapo coyene.

⁷ “Maisa bichocono jũntũ coyene weiweina pomonae nantanuweya pecayabara cui cananta xeinaewi xua ichamonae peyawenaenexatsi. Barapomonae xuya Nacom nantanuweya cayabara cui nanta xeinaena xua peyawenaenexa tsane.

⁸ “Maisa bichocono jũntũ coyene weiweina pomonae pejũntũ xeicae jiwi xua pomonae jopa pecayabara nanta xeinaexae abe peexanae cuiru coyene. Barapomonae Nacom necotsinchi.

⁹ “Maisa bichocono jũntũ coyene weiweina pomonae jũntema pejinompaexae xua peyawenaexae xua irũ ichamonae jũntema jinompa peexanaexaetsi pomonae copiya abe nata exaneiba. Barapomonae pomonae jũntema pejinompaexae Nacom unuta ‘Tapexui’, jei Nacom.

¹⁰ “Maisa bichocono jũntũ coyene weiweina pomonae bequein bara aperũtane exainchi matautano bequein bara anthũthũtane exainchi, xua amsiya xaniwaicha peexanaexae pocotsiwa Nacom itoroba. Barapomonae nama Nacom pijimonae tatsi naexanaena pomonae Nacom jũntũ coyene itorobiya ewata.

¹¹ “Maisa bichocono pajũntũ coyene weiweiname poxonae bequein bara ichamonae abeya paca yabara paeba, poxonae bequeinno abe pacata exana, matautano poxonae bequeinno canaerabiya paca yabara paeba tapaneantobemxaem. ¹² Pajũntũ coyene weiweinare. Matautano jũntema painompare tsipei Nacom paca catsina pia pexeinya peitũpanaewan pocotsiwan Nacom paca jũntana jeba pia nacuatheicha. Icha ichamonae abe pacata exana payabara nanta xeinare, matha caena barichi poxonae ichamonae abe exana pomonaetha pomonae Nacom pia peitorobi jume pepaebiwi. Barapomonae caena bayatha jinompa poxonae paxam cataunxuae jopa pajinompaem”, jei Jesús.

Meje yabara poxonae Jesús diwesi paeba xua sare yabara yawa xua pecoicha yabarano (Mr 9.50; Lc 14.34-35)

¹³ Equeicha Jesús barai barapo pin bicheitomona, pomonae pijimonaexae tatsi jeye: “Sare beno bara beno wũnae. Ichitha icha barapo sare beno jopa abenataeyo bapoxonae jopa peitacũpaewatsi xua equeicha peabenataewa. Bapoxonae jiwi barapo sare beno xuba iratha. Matauta beno taxunaunaba iratha. Paxam pomonae tamona pam be bara jũtiya ichiya pam, icha sare beno cana ichichi. Paxam payawende jiwi pomonae jinompa barapo cae pin nacuathe xua daxita jiwi jopa abe peexanaewa tsane. Ichitha icha barapomonae jopa xapain payawenaem tsane, Nacom bara paca bebai tsane. Tsipei jopa wũnae pam, Nacom bara paca bebai tsane icha jiwi ichi poxonae bebai sare beno matauta xua beno taxunaunaba, tsipei jopa abenataeyo.

¹⁴ “Icha pecoicha ichi poxonae pentha xua poxonae baxota jiwi yawenatsi, paxam bara jũta ichiya paichim poxonae beta painompame. Barapocotsi coyenewatha jiwi payawenama xua beta jinompa. Po tomara ba demxuwatha eca, barapo tomara ba jiwi tajũ tane. Bara paca yabara jũta coyene ichi, jiwi paca tane xua poxonae beta painya nejinompaewa. ¹⁵ Jiton dapon ba aibi xua pon pecoicha coicha exana xua pecoicha matacatetsinexa corototha. Jame, asiya coicha exanatsi xua pecoicha taenexa pomonae bomũxũtha ena. ¹⁶ Bara paca yabara jũta coyene ichi xua jiwi peitabaratha tatsi. Beta painompare xua jiwi painya nepaca cataenexa xua xanepanaya paexaname painya neantobemxae Nacom. Bapoxonae barapo jiwi Nacom wũnae jainchinch, pon painya Axa, pon itabocotha eca”, jei Jesús.

Meje yabara poxonae Jesús jiwi yabara cuidubatsi Moisés pia peitorobi diwesi jume

¹⁷ Equeicha Jesús barai barapo pin bicheitomona, pomonae pijimonaexae tatsi, jeye: “Jopa pananta xeinaeinde xua xan patopeican xua apara Moisés pia peitorobi diwesi jume tacana exanaewa tsane xua jiwi jopa equeicha pecanantawenonaewa tsane barapo Moisés pia peitorobi diwesi jume xuano irũ bara cana ichin tsane pomonae Nacom pia peitorobi jume pepaebiwi pia pecuidubiwan tatsi. Jame apara patopeican tanayabara

jume cui yabara wetsinexan tsane pocotsiwa caena bayatha neyabara tsiwuna nae paeba po diwesi ntha Moisés pia peitorobi coyenewa tatsi, irano Nacom pia peitorobi jume pepaebiwi pia penacuidubiwan jumeintha. ¹⁸ Bara xaniyeya paca tsipaebatsi poxona e cataunxuae barapo itaboco ducue, matautano poxona e cataunxuae barapo ira ducue, Moisés pia peitorobi diwesi jopa weraweracae tsane. Matautano jopa cae itanetiyo aichurucuae tsane beya poxona e wetsina pocotsiwa bayatha Nacom tsiwuna nae yabara paeba xua wetapaeba. ¹⁹ Pon yabara nanta xeina pecuidubinexa ichamonaetha xua tsita jume ita xexenatsi Nacom pia peitorobi coyenewa bequein saya po peitorobi coyenewiyo peya itorobi coyenewiyo, bapon xuya, Nacom pia nacuatheicha cana juntu cui ita xexenecaeinchi. Ichitha nama pomona e cuiduba ichamonaetha Nacom pia peitorobi coyenewan, matautano xua exana pocotsiwa Nacom itoroba, barapomona e painya cui jiji tsane Nacom pia peitorobi nacuatheicha tatsi. ²⁰ Paca tsipaebatsi jame bewa juntu coyene xanepanaya paexaneibiname ichamonaetha be pocotsi coyeneya xua Nacom paca itoroba, beyacaincha poxona e exana pomona e pecuidubiwi Moisés pia peitorobi coyenewa tatsi, matautano xua poxona e beyacaincha jinompa fariseomona e. Icha jopa yatsicaewa beta juntu coyene xanepanaya paexanaem tsane beyacaincha xua poxona e barapomona e itara mexeya wunaeya exana, jopa papatsim tsane Nacom pia peitorobi nacua beicha tatsi”, jei Jesús.

Meje yabara poxona e Jesús yabara cuiduba xua peanaepana e cui coyene (Lc 12.57-59)

²¹ Equeicha Jesús barai barapo pin bicheitomona e, pomona e pijimonaexae tatsi, jeye: “Paxam pajume taneme pocotsiwa Moisés namchi painya amo susato jiwitha, jeye: ‘Jopa ichun anaya bexubinde. Tsipei pon xua ichun bexotsi, ichamona e yabara paebina xua bapon natsicuenta xua abe peexanaexae’, jei. ²² Ichitha nama seicaya paca tsipaebatsi xua pon caseba ichuntha ichamona e yabara paebina xua bapon natsicuenta xua abe peexanaexae. Iruru pon biatane ichuntha ichamona e yabara paebina xua bapon natsicuenta xua abe peexanaexae. Pomona e pecanamata caitorobi bicheito bapon yabara paebinchi xua bapon natsicuenta tsipei bapon bichocono unthathu anaepana. Matautano iruru pon namchi xua ichun jeichichi: ‘Xam nabene came’, jei pon, bapon xubinchi po nacua beya ichaxota isoto bapana jopa itacounayiyo.

²³⁻²⁴ “Equeicha paca tsipaebatsi. Ichacuitha ichun duwein becapona ichaxota xua be pexaethopaewa xua tuxusi exana Nacom nexa poxona e tauta. Poxona e cataunxuae jopa exanaeyo baxua, matha copiya tsiwanaya yabara nanta xeinaena pocotsiwa icha metha bayatha abe exana ichuntha. Matha be ichi tsane meje xuaje: Bu abu cataunxuae bota pocotsiwa pia pecatuxusi exanaewanexa xua Nacom nexa. Matha copiya bewa ponaena ichun beya xua pia penaita coxone exanaewa tsanebe. Bapoxona e bapon caibeya bewa ponaena xua duwein petuxusi exanaewa tsane Nacom nexa poxona e tauta.

²⁵ “Icha ichamona e be paca itoroba paca necacaponanexa pontha pon jiji peyabara paebin penatsicuentsiwa, nexata patsipaebare barapomona e, poxona e cataunxuae namtotha paca baru pona xua painya nenaita coxone exanaewa tsanebe. Xain bapoxona e barapomona e jopa paca caponaebe tsane pontha pon jiji peyabara paebin penatsicuentsiwa. Tsipei icha barapomona e bara beya paca caponaetsipa, bapoxona e pon jiji peyabara paebin penatsicuentsiwa equeicha dabeya policiamona e beya paca itorobichipa. Bapoxona e nama policiamona e jiji pecubi bo beya paca itorobichipa. ²⁶ Bara xaniyeya paca tsipaebatsi. Paxam jopa paca pu copabi tsane jiji pecubi bo weya, beya abu poxona e pana pu matomacaename daxita paratixi cuntha po paratixi xua paxeiname”, jei Jesús.

Meje yabara poxona e Jesús yabara cuiduba xua jiton pita, powa ichun piowa tatsi, powa bequein piseuri xeina taetha

²⁷ Equeicha Jesús barai barapo pin bicheitomona e, pomona e pijimonaexae tatsi, jeye: “Paxam pajume taneme xua Moisés pia peitorobi coyenewan xua jeye caena bayatha:

‘Jopa ichowa pichinde powa ichun piowa tatsi, powa piseuri xeina taetham’, jei Moisés. ²⁸ Ichitha nama xan paca tsipaebatsi. Icha pebin tane petsiriwa, yawa nanta xeinaeya jeye: ‘Barapowa ichichipan taisa maituncuaewa tsane, bequein bapowa jopa taseuriyo’, jei, bapoxonae barapara abe exana Nacomtha, icha be pocotsi coyene ichi, poxonae pita yabuyotha powa jopa bequein piseuriyo tatsi.

²⁹ “Bara xaniyeya paca tsipaebatsi. Icha po itamaiqueito painya necoxa werena ducua icha barapo itamaiqueito paca exana xua abe painya neexanaewa tsane panaitamaiquei jucua, barapo itamaiqueiton yawa tajū beya pabebande. Metha wūnae xua painya nebebeiwa tsane cae itamaiqueitoxi xua Nacom pia nacua beicha cae itamaiqueitoxi painya neyawa patsinexa. Baxua jame wūnae yatsicaewa, beyacaincha xua poxonae painya pepon ompin paca bebai tsane ichaxota po nacuatha isoto bapana jopa itacounaiyo. ³⁰ Barichi icha painya necobe, po cobe painya necoxa weya, icha barapo cobe paca exana xua abe painya neexanaewa tsane panacobe ucubobare, yawa tajū beya pabebande. Metha wūnae xua cae cobexi painya nebebeiwa tsane, xua cae cobexi painya neyawa patsinexa Nacom pia nacua beicha. Baxua jame wūnae beyacaincha xua poxonae painya pepon ompin paca bebai tsane ichaxota po nacuatha isoto bapana jopa itacounaiyo”, jei Jesús.

Meje yabara poxonae Jesús yabara cuiduba xua jiwi piseurixi pepunapenteibiyainwa (Mt 19.9; Mr 10.11-12; Lc 16.18)

³¹ Equeicha Jesús barai barapo pin bicheitomona, pomona pijimonaexae tatsi jeye: “Caena bayatha Moisés pia peitorobi jume diwesitha namchiya jeye: ‘Pon punaxuba piowa peichaxaibixae xua pocotsiwa bapowa exana, bapon barabū piowa catsina papera, po paperatha tina xua pexubiwa tsane piseuri’, jei barapo Moisés pia peitorobi coyenetha. ³² Ichitha nama seicaya icha coyeneya paca tsipaebatsi. Icha pebin piowa punaxuba xua saya peichaxaibixae poxonae bequein bapowa jopa nasi cui coyene exanaeyo bapoxonae Nacom tsita abetsi xua bapon cana exana piseuritha. Tsipei bapon cana exana piowa xua piseuri tatsi nasi cui matacaeta xua weiweina pebiwitha. Barichi pon pita petsiriwa, powa piseuri pepunaxubixae, bapon barichi pia coutha abe natsiexana, tsipei Nacom ichowa yabara nanta xeina xua bapowa cataunxuae ichun piowa tatsi bequein punaxuba”, jei Jesús.

Meje yabara poxonae Jesús yabara cuiduba xua jiwi xainyeya penacui wūnae tsiwūnaeya yabara paebiwa xua peexanaewa pocotsiwa exanapaeba

³³ Equeicha Jesús barai barapo pin bicheitomona, pomona pijimonaexae tatsi, jeye: “Bayatha pajume taneme xua painya amo susato jiwi tsipaebatsi, xua Moisés tsipaeba. Moisés jeye: ‘Paxam jopa bewa naerabiya pana cui wūnae tsiwūnaeya yabara paebim tsane xua painya neexanaewa pocotsiwa paexanapaebame xua Nacom peitabaratha tatsi. Ichitha jame bewa bara xainyeya paexaneibiname pocotsiwa papaebame xua Nacom peitabaratha tatsi’, jei Moisés pijimonaetha. ³⁴ Ichitha xan seicaya icha coyeneya paca tsipaebatsi. Poxonae jiwi peitabaratha tatsi pana nacui wūnae tsiwūnaeya xainyeya yabara paebiname pocotsiwa xua paexanapaebame bara moya baxua paexande, xua jiwi pia painya nepaca cajume cowuntsinexa. Jopa yawa muxuna icha jumein papaebinde. Jopa pajande ichuntha: ‘Bara xaniyan xua exanaein. Nacui wūnae tsiwūnaeya xaniyeya yabara paeban Nacom peitabaratha xua exanaein’, jopa pajande. Matautano jopa pajande: ‘Bara xaniyan. Baraxua paeban po wuntha xua Nacom pia nacua wuntheicha tatsi’, jopa pajande baxua, tsipei Nacom bara xoteicha eca pia pexeinya equeibithopeibiwa tatsi ichaxota bapon ewatsiya itorobeibeca jiwi. ³⁵ Matautano barapocotsi coyenewa jopa bewa pana cui wūnae tsiwūnaeya yabara paebim ichuntha xua ira yabara. Tsipei barapo ira apara Nacom pia ira. Barapo iratha nataxu uyuteca. Barichi matautano barapocotsi coyenewa jopa bewa pana cui wūnae tsiwūnaeya yabara paebim ichuntha xua Jerusalén tomara yabara, tsipei barapo tomara, po tomaratha ichaxota Nacom pozona pon jiwi itorobiya pia pepa Peewatsinchi.

³⁶ Matautano barapocotsi coyene jopa bewa pana nacui wūnae tsiwūnaeya yabara paebim ichūntha xua painya nentasiya yabara. Saya meisa Nacom paca yabara matasiya yaputane. Pomonaē pam xua pewowi pam xua pantana tsaebiam jopa paca itacūpaeyo xua equeicha pantana inyapaname. Matautano pomonaē pam pomonaē amomonaē pam xua pantana inyapaname jopa itacūpaetsi xua equeicha pantana tsaebiam. Matautano jopa baxua daichiyo xua caentanatoxitha. Saya meisa Nacom itacūpatsi xua cana exana baxua. ³⁷ Saya meisa barapo jumethabe patsipaebare ichūntha ichaxota po jumetha jei ‘Je, bara exanaein’, jei, matautano ichaxota po jumetha jei ‘Jume jopa exanaein tsane’, jei. Tsipei poxonaē pamuxuna paebame poxonaē pana tsiwūnae yabara paebame ichamonaetha Nacom pia wūntha tatsi xua painya neexanaewa pocotsiwa paexanapaebame baraxua apara caurimonaē pia pentacaponaein tatsi paca tsimuxu duba xua painya nepaebiwa baxua”, jei Jesús.

*Meje yabara poxonaē Jesús yabara cuiduba xua penayantomocae coyene
(Lc 6.29-30)*

³⁸ Equeicha Jesús barai barapo pin bicheitomonaē, pomonaē pijimonaexae tatsi, jeye: “Paxam pajume taneme xua bayatha Moisés paeba xua jeye: ‘Pon itamaiquei esanopa ichūn peitamaiqueito, bapon xuya bewa itamaiquei esanopaeinchi. Matautano pon xua wano teranopa, xua ichūn wano teranopatsi, bapon xuya wano teranopaeinchi’, jei. ³⁹ Ichitha nama icha coyeneya paca tsipaebatsi: Jopa xuya pebin pacaitacueinchinde poxonaē paca caitacueinta, pon peaitabein. Matautano icha ichūn paca jumata tsaquinopa pecobetha, moya equeicha icha jumata pana najumata caeware xua painya necajumata tsaquinopaenexa. ⁴⁰ Icha ichūn paca yabara yopichiya paeba pontha pon jiwī peyabara paebin xua penatsicuentisiwa xua painya nentoma amanayabixae bapon, bapoxonaē bara pacare xua paca itoroba. Icha painya camisa pacata pita bara yawa muxuna pacare camisa po camisa peamūtiyū camisa, po camisa xua athawe peruyaewa. ⁴¹ Icha soldadomonaē paca itoroba xua jeye: ‘Painta caponde pocotsiwa arewe xua saya cae kilómetro beya’, jei, bara moya pacaponde pocotsiwa arewe xua equeicha icha cae kilómetrono pantaropatabare. ⁴² Daxita coyenexi pocotsiwa ichamonaē paca wūca, moya bara pacaichabeibare. Pon paca nacowaeta painyawa moya bara patsicobe copabare. Jopa paasiwinde painyawan”, jei Jesús.

*Meje yabara poxonaē Jesús yabara cuiduba xua jiwī bewa antobe pomonaetha pomonaē pia peaitafaetabi jiwichi
(Lc 6.27-28, 32-36)*

⁴³ Equeicha Jesús barai barapo pin bicheitomonaē, pomonaē pijimonaexae tatsi, jeye: “Matautano pajume taneme xua caena bayatha Moisés namchi, xua jeye: ‘Paantobeinde pomonaē painya jiwī. Matautano pacasebare pomonaē painya nepaca caaitafaetabi jiwī’, jei xua Moisés paeba. ⁴⁴ Ichitha icha coyeneya paca tsipaebatsi: Paantobeinde pomonaē bequein painya nepaca caaitafaetabi jiwī. Matautano Nacomtha patawūcare pomonaē bequein abe pacata exana. ⁴⁵ Icha paexanaename daxita barapo coyenexi bapoxonaē yatsicaewa Nacom piamonaē tatsi pam tsane. Bara paichim tsane icha be painya Axa ichi pon Nacom, pon peitabocotha peecaexae xua daxita jiwī antobetsi. Nacom xometo pentha taexana daxita jiwī pomonaē pejūntū coyene xanepanaē jiwī nexa irūru pomonaē peajūntūcoyenebe jiwī nexa. Matautano Nacom ema taitorobicano daxita jiwī pomonaē xaniwaicha pejūntū coyene xeicaē jiwī nexa irūru pomonaē peajūntūcoyenebe jiwī nexano. ⁴⁶ Icha saya meisa paantobem pomonaē painya nepaca antobexae, Nacom jopa paca cui yabara matomacae tsane. Tsipei irūru barapo coyene exana pomonaē paratixi pentoma noteibiwi po paratixi jiwī bewa catsibina pon romanomonaē itorobiya pia pepa peewatsinchi nexa, bequein jiwī yabara nanta xeina xua bapomonaē peajūntūcoyenebewi. Barapomonaē antobe pomonaē xua pia peantobewixaetsi. ⁴⁷ Matautano icha saya meisa painyamonae pajacobame pomonaē irū pejume cowūntsiwi poxonaē paca siwa pona, xuano xua jopa pajacobim ichamonaē,

pomonaē jopa pejume cowũntsiwi, barapo coyene jopa xanepanaeyo. Tsipei pomonaē Nacom jopa peyaputae jiwi, barapomonaē irũ ba jacobā piamonaē. Ichitha nama bewa toxeinchiya pananta xeinaem beyacaincha barapomonaē poxonaē nanta xeina.⁴⁸ Daxota paxam bewa bichocono xaniwaichiya beta painompaem. Mataũtano xua caewiyo jopa bewa paexanaem tsane xua peabe coyenewa. Barapocotsi jũta coyeneya paichim tsane icha painya Axa ichi pon Nacom, pon peitabocotha peecaexae xua bichocono xaniwaichiya beta popona. Mataũtano bapon caewiyo jopa exanaeyo peabe coyenewa”, jei Jesús.

6

Meje yabara poxonaē Jesús jiwi yabara cuidubatsi xua jiwi xanepanaya peexanaewan

¹ Equeicha Jesús barai barapo pin bicheitomonaē, pomonaē pijimonaexae tatsi, jeye: “Poxonaē paxam paexaname pocotsiwan xua ichamonaē tsita xanepanatsi xua Nacom paca itoroba, bapocotsiwan paexande xua Nacom painya nepaca cacuitaenexa. Saya meisa jopa paexanaēinde xua jiwi ũ painya nepaca cacuitaenexa xanepanaeya painya nepaca cayabara paebinexa. Icha bapocotsi coyeneya paexanaetsipame nexata painya Axa Nacom pon itabocotha peecaexae jopa paca catsitsipae pocotsiwa paca yabara cui coyene matomacaewa tsipei jopa paexanaetsipaem Nacom nexa.

² “Daxota poxonaē peacopeibiwi xoxi pacatsibeibame jopa ichamonaē patsipaebinde xua baxua painya neexanaexae. Jopa barapocotsi coyeneya bara paichinde icha be pomonaē pemuxitorobiwi ichi, poxonaē itara mexeya pomonaē xanepanaya pepaebiwi. Tsipei barapocotsimonaē saya ichawa beya paeba xua pinae yawena nawita peacopeibi jiwitha. Barapomonaē matha jiwi wabeibatsi xua barapomonaē pejume taenexa tsainchi, bapoxonaē judiomonaē pia penacaetutsi botha yawa namtontha baxua yabara paeba nawita xua pinae yawena nawita pomonaētha pomonaē peacopeibi jiwi. Barapomonaē baxua exana pia xua jiwi beta yabara nanta xeinaetsi, pia xua jeichi jiwi: Maisa barapomonaē betiya exana, xua pejeinexa jiwi. Ichitha xaniwaicha paca tsipaebatsi, barapomonaē xeina pia pecui yabara matomacaewatsi poxonaē jiwi baxua caunuta tsipei jopa moicha exanaeyo Nacom nexa. ³⁻⁴ Ichitha poxonaē paxam payaweneme peacopeibiwi namicha moicha pacare barapomonaētha xua painya jiwimonaē jopa paca necacui taenexa. Mataũtano poxonaē Nacom painya Axa paca tane poxonaē namicha moicha paexaname baxua bapoxonaē bapon Nacom paca catsina pocotsiwa pia pecui yabara matomacaewa”, jei Jesús.

Meje yabara poxonaē Jesús jiwi yabara cuidubatsi po coyene xua Nacom pewũcaewatsi (Lc 11.2-4)

⁵ Equeicha Jesús barai barapo pin bicheitomonaē, pomonaē pijimonaexae tatsi, jeye: “Poxonaē Nacom pawũcame, jopa barapocotsi coyeneya paexanaēinde icha be pomonaē pemuxitorobiwi ichi, pomonaē itara mexeya beta pepaebiwi. Barapomonaē saya ichichipa xua jiwi pecui taenexa poxonaē barapomonaē Nacom wũcatsi. Barapomonaē ichichipa umena pewũcaenexa Nacomtha judiomonaē pia penacaetutsi bontha tatsi xua mataũtano barichino namtontha. Barapomonaē baxua exana xua pecui taenexatsi xua ichamonaē pecui taenexa. Bara xaniyei paca tsipaebatsi. Barapomonaē barompaya xeina pia pecui yabara matomatsiwatsi poxonaē jiwi yabara paeba xua barapomonaē pinae bara xanepanaeya exana. Nama bapoxonaē Nacom jopa catsiyo pia pematomatsiwa barapomonaētha tsipei barapomonaē jopa moicha exanaeyo Nacom nexa. ⁶ Ichitha poxonaē Nacom pawũcame, barompaya painya tutu beya paponde yawa bomũxũ tutu pacoibo xatababare. Bapoxonaē painya Axa Nacom baraxotiya patsipaebare. Painya Axa paca yanta compa yawa daxita paca cui tane pocotsiwa namicha paexaname. Bapoxonaē bapon Nacom paca catsina pocotsiwa pia paca yabara cui matomacaewa, xua beta painya neexanaexae poxonaē Nacom patsipaebame.

⁷ “Poxonaē Nacom patsipaebame, jopa equeicha matowa patsipaebinde po jumetha xua po jume jopa paca yawenaeyo. Jopa bara paichinde icha be pocotsimonaē ichi

pomonaē jopa peyaputaewi Nacom. Barapomonaē nanta xeina xua bara Nacom jume tane pocotsiwa barapomonaē tsipaeba xua matowa pepaebixae. ⁸ Nexata jopa barapocotsi coyeneya bara paichinde icha be poxonaē barapomonaē icha ichi. Tsipei painya Axa Nacom bara yaputane pocotsiwa painya nenantawenonaewam, xua beya poxonaē pawucame Nacom. ⁹ Daxota Nacom patsipaebare, paichinde:

‘Pata Taxam, xam ponxaem peitabocotha athabeicha neecaein.

Barabū daxita jiwi cabarū cui itura jina nejūntū coyene xanepanaeinxae.

¹⁰ Barabū jopaena matacabi, po matacabitha poxonaē xam jiwi itorobiya ewatsiname barapo cae pin nacuathe.

Barabū jiwi exanaena pocotsiwa jinya neichichipae coyenewa xua barapo cae pin nacuathe tsique.

Barabū jiwi exanaena icha peitabocotha ichi xua exana pocotsiwa jinya neichichipae coyenewa.

¹¹ Daxita matacabin pexaewa pana catsibeibare xua po pexaewa daxita matacabin pata canantawenonaewa tsaibi tsane.

¹² Pana neyabara cui cana jūntemainare xua abe pata catsita exanaewatsi.

Baroxonaē pana neyabara cui cana exaname xua jopa equeicha pata catsita natsicuentisiwatsi xua abe pata catsita exanaexaetsi.

Baraxua painta exande icha paichin ichamonaetha. Tsipei paxan copiya payabara cui cana exanan xua ichamonaē jopa pana netsita natsicuentisiyo xua abe pata tanetsita exanaexae.

¹³ Jopa pana copatsinde xua abe pata exanaewa tsane poxonaē jiwi pana nejūntū coyene jūjūta, xua abe pata exanaewa tsane.

Ichitha pana necapanenebiya exande barapo abe peexanaē coyene weya’, pajande poxonaē Nacomtha patsipaebame”, jei Jesús.

¹⁴ Equeicha Jesús barai barapo pin bicheitomonaē, pomonaē pijimonaexae tatsi, jeye: “Tsipei icha paxam pacui yabara jūntemainame pocotsiwa ichamonaē pacata abe exana, nexata xuya painya Axa Nacom pon peitabocotha peecaexae, xuya paca cui yabara jūntemainaena pocotsiwa abe paexaname. ¹⁵ Ichitha icha paxam jopa pacui yabara jūntemainaem pocotsiwa ichamonaē abe pacata exana, nexata xuya painya Axa Nacom jopa paca cui yabara jūntemainaē tsane pocotsiwa abe paexaname”, jei Jesús barapo pin bicheitomonaetha pomonaē pijimonaexae tatsi.

Meje yabara poxonaē Jesús yabara cuiduba po coyene peyabara nainbotsi cui coyenewa

¹⁶ Equeicha Jesús barai barapo pin bicheitomonaē pomonaē pijimonaexae tatsi, jeye: “Poxonaē paxam payabara nainbotame xua Nacom beta painya newucaenexa tsane, jopa bara jūta ichiya coyeneya paexanaēinde icha be pomonaē ichi pomonaē itara mexeya betiya peexanaewi daichitha abe exana. Barapomonaē piyain itabara aenaenaca xua poxonaē bequein peyabara nainbotiwatha Nacom. Barapomonaē jopa nanta cachetsiyo yawa jopa naitabara quiatsiyo. Barapomonaē ichipa xua ichamonaē yaputane xua barapomonaē cou bara nainbota. Bara xainyeya paca tsipaebatsi xua barapomonaē bayatha xeina barompaya pia peyabara cui matomacaewatsi xua poxonaē jiwi yabara wūnaē jainta xua barapomonaē cou bara nainbota. ¹⁷ Ichitha paxam poxonaē payabara

nainbotame, xua Nacom betiya painya newucaenexa tsane, pana naitabara iquicare yawa beta pananta caichere. ¹⁸ Bapoxonae jiwí jopa paca cui yaputae tsane xua paxam bara cou payabara nainbotame. Namicha painya netsita exanaexae Nacom barapo coyene. Meisa saya painya Axa Nacom paca cui yaputane, tsipei daxita yaputane pocotsiwa namicha paexaname. Bapon paca catsina pocotsiwa pia paca yabara cui matomacaewa”, jei Jesús.

Meje yabara poxonae Jesús yabara cuiduba xua pocotsiwa Nacom jiwí pejuntana jebiwatsi pia nacuatheicha

(Lc 12.33-34)

¹⁹ Equeicha Jesús barai barapo pin bicheitomona, pomona, pijimonaexae tatsi, jeye: “Barapo cae pin nacuathe copei jopa pacaetubinde xua painya nexenaewa tsane nawita barapo cae pin nacuathe. Tsipei bocobocowaton abe exanaena poxonae xane pocotsiwan xua paxename. Ichacuiitha abe exanaena poxonae painyawan axumainbatsi. Ichacuiitha painyawan pocotsiwa paxename baxuan pomona, pecaibiwi paca caibina. ²⁰ Ichitha jame paexande barapo pejuntũ coyene xanepanaewa po pejuntũ coyene xanepanaewa Nacom ichichipa. Bapoxonae Nacom paca catsibina pocotsiwa painya nepaca juntana jebiwa pia nacuatheicha. Baraxoteicha bapocotsiwa bocobocowaton jopa xaeyo. Yawa jopa axumainbichi. Matautano pomona, pecaibiwi jopa paca caibiyo baxuan xuan Nacom paca necayabara cui matomacaewan. ²¹ Ichaxota ba pajebame xua painya neichichipaewan baxota ba payabara nanta xename nawita”, jei Jesús pijimonaetha.

Meje yabara poxonae Jesús yabara cuiduba jiwí po coyene xanepanaeya peexanaewa pejuntũ coyene wetsina

(Lc 11.34-36)

²² Equeicha Jesús barai barapo pin bicheitomona, pomona, pijimonaexae tatsi, jeye: “Pecoicha ba yonoyonei merawi painya nepaca cayawenaenexa xua beta painya netaewa tsane quireitha. Barichi painya itamaiqueiton paca yawena xua beta painya netaewa tsane. Icha painya itamaiqueiton wũnae, bara beta pataneme. ²³ Ichitha icha painya itamaiqueiton abe, jopa beta pataetsipaem. Barichirũ painya juntũ coyenewan xua painya nenanta xenaewan. Icha painya juntũ coyenewan xanepanaetsipa bara beta Nacom payabara najuntũ coyene xenaetsipame. Ichitha icha painya juntũ coyenewan jopa xanepanaetsipae jopa beta Nacom payabara najuntũ coyene xenaetsipaem. Painya juntũ coyenewan paca cana exanaetsipa xua bichocono abe paexanaetsipame”, jei Jesús.

Meje yabara poxonae Jesús yabara cuiduba jiwí, xua pon nantaũta ainya pia pecanamataxeinaeinchibe tatsi

(Lc 16.13)

²⁴ Equeicha Jesús barai barapo pin bicheitomona, pomona, pijimonaexae tatsi, jeye: “Jiton dapon aibi pon xena ainya pia pecanamataxeinaeinchibe tatsi xua pon beta tanacuita barapo pia ainya pecanamataxeinaeinchibe tatsi. Tsipei barapo petanacuichin meisa antobeya taexana caeintha pon pia pecanamataxeinaeinchi poxonae itorobatsi. Icha pia pecanamataxeinaeinchi jopa taraichiyo. Cae pia pecanamataxeinaeinchi xanepanaeya taexana. Icha pia pecanamataxeinaeinchi abeya taexana. Barichi jiton pon bichocono antobe Nacom jopa itacũpaetsi xua bichocono peantobewa paratixi poxonae yawa bichocono antobetsi Nacom”, jei Jesús barapo pin bicheitonaetha, pomona, pijimonaexae tatsi.

Meje yabara poxonae Jesús yabara cuiduba po coyene xua Nacom eena pijimona

(Lc 12.22-31)

²⁵ Equeicha Jesús barai barapo pin bicheitomona, pomona, pijimonaexae tatsi, jeye: “Paca tsipaebatsi, jopa bichocono payabara najuntũ coyene exabinde pexaewa xua painya neuna jinompaewa tsane yawano xua painya neapaewanno tsane. Barichi jopa bichocono payabara najuntũ coyene exabinde papabũrũ xua painya pepon nexa. Po coyene xua asũ pejinompaewa xua Nacom naca cata jame baxua ainya cui, beyacaincha pexaewa xua peuna jinompaewa. Pepon ainya cui irũ, beyacaincha parabũrũ xua

pepon nexa. ²⁶ Pataema peyapupunaewi. Barapoxi jopa ꞥbiyo pabitha. Yawa xua penawetsiwa jopa notsiyo. Yawa jopa xeinaeyo bomꞥxꞥn xua pejebinexa pexaewan. Ichitha Nacom apata peyapupunaewi pexaewa. ꞥPaxam nama bichocono Nacom patsita ainya cuim, beyacaincha peyapupunaewi xua Nacom tsita ainya cuichi, po Nacom painya Axa pon itabocotha eca! ²⁷ Dapon aibi pon paxam jiwana pon itacꞥpatsi xua xeinaena icha matabi xua po matabitha pepoponaewa tsane poxonae tꞥpaena. Bequein bapon bichocono nayabara najꞥntꞥ exaba baxua, ichitha jopa itacꞥpaetsi xua xeinaena caentacabi equeicha.

²⁸ “Paxam bichocono payabara najꞥntꞥ exabame parabꞥrꞥ. Jame pacayabara nanta xeinare pentonon, po pentonon wexotha xuwa, xua matono itꞥpana. Pentonon jopa nacuichiyo yawa jopa natsiexanaeyo parabꞥrꞥ penama xatabinexa. ²⁹ Ichitha paca tsipaebatsi xua pentonon matono itꞥpana bichocono beyacaincha pocotsi paparuwa Salomón nama xatata xua pexeinya paparuwa. Bapon Salomón pon caena bayatha judiomona itorobiya pia pepa peewatsinchi pon bayatha tꞥpa. ³⁰ Pentonon po matonon wexotha anoxuae xuwa, Nacom cana exana xua matono itꞥpana. Ichitha pebiwi baya matono tautsina ichaxota pocotsiwatha pan seba, tsipei saya pentono. Nacom cana exana xua pentonon bichocono wꞥnae bara bequein saya pentonon. Barichi Nacom itacꞥpatsi xua beta paca neca-eenaewa xua beta painya nejinompaenexa. Matautano Nacom paca catsina paparuwan. ꞥMaisa pebiwi pam tsobenae, be conotha pajume cowꞥntame Nacom! ³¹ Jopa paꞥnthꞥthꞥ deideijeya jinompaeinde xua ichawa painya neyabara nanta xeinaexae. Jopa pajan tsaibinde: ‘ꞥEta xua xaeinchi jane? ꞥEta xua apaeinchi jane? ꞥEta xua nama xatabinchi jane?’ jopa pajan tsaibinde. ³² Tsipei barapo cae pin nacuathe jiwana saya ꞥ baxua pecayabara najꞥntꞥ coyene exabi pocotsiwa nantawenona. Ichitha nama paxam painya Axa Nacom panantautame. Barapon Nacom pon peitabocopin, pon yaputane daxita pocotsiwa xua xoxi panantawenoname. ³³ Saya meisa jame bichocono copiya payabara nanta xeinare xua painya neexanaewa xua pocotsiwa Nacom ichichipa pon jiwana itorobiya pia pepa peewatsinchi. Matautano jame bichocono payabara nanta xeinare painya nexeinaenexa peꞥntꞥ coyene xanepanaewa Nacomtha. Icha paexanaename barapo coyenewan nexata bapoxona Nacom paca catsibina xua daxita pocotsiwa panantawenoname. ³⁴ Jopa payabara muxuna najꞥntꞥ exabinde anoxuae pocotsiwa baya tsane pocotsiwa painya neexanaewa tsane, tsipei barapo matabi nama xeina pocotsiwa bichocono pacata ayapube. Daxita matabi tsoponeibi pocotsiwa xua pacata ayapube xua pocotsiwa painya neexanaewan”, jei Jesús.

7

Meje yabara poxonae Jesús cuiduba xua jiwana bewa yabara paebi xua ichamona penatsicuentisiwa

(Lc 6.37-38, 41-42)

¹ Equeicha Jesús barai barapo pin bicheitomona, pomona pijimonaexae tatsi, jeye: “Jopa ichamona payabara paebinde xua penatsicuentisiwa xua abe peexanaexae. Nexata bapoxona Nacom jopa paca yabara paebi tsane painya nenatsicuentisiwa xua abe painya neexanaexae. ² Nacom pia coya paca yabara paebina xua painya nenatsicuentisiwa xua abe painya neexanaewa icha po coyeneya paichim poxonae ichamona payabara paebame xua penatsicuentisiwa xua abe peexanaexae. Icha daunweya payabara paebina xua penatsicuentisiwa ichamona xua abe peexanaexae, Nacom barichi daunweya paca yabara paebina xua painya nenatsicuentisiwa xua abe painya neexanaexae”, jei Jesús. ³ Equeicha Jesús paeba caeintha pomona pijimona jiwana pecayabara jꞥta pepaebi diwesiyo jeye: “Xam ba jinya jiton itata taneme poxonae itata jopiyatsi naepꞥtiyo, ichitha jopa taem xua irꞥrꞥ xam nama pin naepꞥto neitamaiqueitha ducua. Barapocotsi jꞥta coyeneya ichi, xam ba jinya jiton cui taneme xua poxonae abe exana, ichitha jopa nayaputaem xua irꞥrꞥ xam baraichim nama bichocono abe exaname. ⁴ Icha jopa taem pin naepꞥto xua neitamaiqueitha ducua jopa caitacꞥpaeyo xua nejeiwa jinya

jitontha: ‘Tajiton, cata jutinchi naeputiyo xua ducua neitamaiqueittha’, xua nejeiwa.
⁵ Xam nepaebim xua ichun exana xua baxua neexanaewatha iru. Xam copiya nata jure barapo pin naeputo xua neitamaiqueittha ducua. Bapoxonae beta taename nejutsinexa tsane naeputiyo xua jinya jiton peitamaiqueittha tarucuatsi.

⁶ “Jopa patsipaebinde Nacom Pejume Diwesi pomonae anaya paca aeba, xuano anaya aeba Nacom Pejume Diwesi pomonae jopa pejume cowantsiwi Nacom. Tsipei barapomonae peajuntucoyenebe jiwi bichocono. Barapomonae bara abe exana be barapocotsi juta coyeneya ichiya exana icha be auri ichi xua poxonae anaepanaya nawano webaba pocotsiwa pacatame. Matautano barapomonae bara abe exana be barapocotsi juta coyeneya ichiya exana icha be marrano ichi, xua poxonae petaxutha taxunaunaba xua irainyaba po pexaewa paapatame”, jei Jesús.

Meje yabara poxonae Jesús yabara paeba xua jiwi bewa matowa wunqueibi Nacomtha (Lc 11.9-13; 6.31)

⁷ Equeicha Jesús barai barapo pin bicheitomona, pomonae pijimonaexae tatsi, jeye: “Matowa Nacom pawucare, bapoxonae paca catsibina pocotsiwa xua pawucame. Baraxua matowa paexande icha paichim poxonae matowa pajeiteibame beya poxonae pataebame yawa icha paichim poxonae matowa pawawam bomuxutha beya poxonae ichun paca jume nota. ⁸ Tsipei pon matowa wuca ichun bara catatsi. Tsipei pon matowa necoba, bara taeba. Tsipei pon bomuxu pecoibottha matowa wawai, bara tacoibo sarana xorenatsi, matauta jume notatsino.

⁹ “Paxam pomonae pexui paxeiname paca muxuwetatsi. Poxonae painya pexui paca wuca pan, ¿pacatsipame iboto? ¡Jume! ¹⁰ Ichacuitha tsipae, poxonae painya pexui paca wuca duwei, ¿pacatsipame jomo wito? ¡Jume! Jopa baxua paraichim tsane. ¹¹ Bara bequein peajuntucoyenebe jiwi pam, ichitha paxam payaputaneme xua xanepanaeya painya pexui pacatsibeibame. Ichitha nama Nacom painya Axa pon itabocottha peecaein bichocono jopa juniya paca catsiyo pejuntu coyene xanepanaewan poxonae pawucame beyacaincha poxonae painya pexui pacatsibeibame poxonae paca wunqueiba.

¹² “Paexande ichamonaetha xua po coyene painya neichichipaewa xua barapomonae beta painya nepacata exanaewa tsane. Tsipei barapo coyenewa bayatha Moisés pia peitorobi coyenewatha paca itoroba, matautano Nacom pia peitorobi jume pepaebiwi bayatha paca cui itoroba”, jei Jesús.

Meje yabara poxonae Jesús yabara cuiduba po boupayo tsica boupayo dena (Lc 13.24)

¹³⁻¹⁴ Nexata equeicha Jesús barai barapo pin bicheitomona, pomonae pijimonaexae tatsi, jeye: “Poxonae jiwi pona tomara beya, pomonae itapeta pin namto iya pona, barapo jiwi pinmonae, tsipei barapo tomara namto boupa iya xua jopa ayapubeyo. Pomonae nama itapeta, po namto tsica namtiyo iya pona, barapo jiwi tsiquimonaeyo tsipei barapo tsica boupayo ayapube iya. Barichi poxonae jiwi patsina Nacom pia nacua beicha saya tsiquimonaeyo patsina tsipei ichamona jopa tsita juntu cui coyene xanepanaetsi xua xanepanaeya pejinompaewa Nacomtha. Daxota pomonae Satanás pia nacua beya patsina pinmonae tsane tsipei jopa taayapubetsi xua barapo Satanás pia juntu coyeneyatha tatsi jinompa. Nama itapeta pacananta xeinaeya jinompare Nacom pia juntu coyenewa tatsi xua icha jiwi ichi poxonae seicaya iruru barompaya pona tomara tsica namtiyo boupayo iya”, jei Jesús.

Meje yabara poxonae Jesús yabara cuiduba xua jiwi yaputane nae, penacoichixae (Lc 6.43-44)

¹⁵ Equeicha Jesús barai barapo pin bicheitomona, pomonae pijimonaexae tatsi, jeye: “Dota pam, dota pomonae penaerabiwi, pomonae xua jeye: ‘Paxan papaeban Nacom nexa’, jei. Barapomonae painya xainya beya pata itara mexeya jopa juntu coyene anaepanaeyo icha be ichi pomonae xua Nacom pejume jejei jiwichi xua peexanaewa pocotsiwa Nacom itoroba xua matautano icha be ovejamonae ichi xua pia cui coyene

xaina xua jopa anaepanaeyo. Daichitha barapomonaе bichocono antucucoyeneyapube xua anaepana, icha be neuthu ichi poxonaе bichocono anaepana. ¹⁶ Ichitha paxam pacayabara ita coxonaе barapomonaе poxonaе pataneme pocotsiwa barapomonaе exana, icha be jiwi ichi xua poxonaе yaputane nae, po nae penacoichixae. Matautano jiwi jopa yaputaeyo xua bapana jiwi jopa teracae uva cuei po naetha sojei, tsipei apara uva cuei xuwa unbototha po unbo jopa e dubenaeyo. Matautano jiwi jopa bapana teracae higo thei naexitha, tsipei apara higo thei xuwa higo naetha. ¹⁷ Tsipei daxita naein, po naein pexeinya naein bara nacoita po pethei pexeinya thei. Matautano daxita naein, po naein camatsa naein bara nacoita po pethei camatsa thei. ¹⁸ Po nae pexeinya nae jopa bapana nacoichi po pethei camatsa thei. Barichi po nae camatsa nae jopa bapana nacoichi po pethei pexeinya thei. ¹⁹ Daxita naein, po naein jopa nacoichiyo po pethei pexeinya thei, jiwi barapo naein uncata. Bapoxonaе jiwi barapo naein tauta isototha. ²⁰ Icha naein cana ichichi xua poxonaе jopa penacoichiyoxaera, bara cana ichi tsainchi jiwi xua poxoru xanepanaeya jopa peexanaexaera tsane. Icha ichi xua payaputaneme naein poxonaе pia pethei pataneme, barichi jiwi pantu cui coyene yaputaneme poxonaе pataneme pocotsiwa barapomonaе exana”, jei Jesús.

Meje yabara poxonaе Jesús pinae paeba xua pinae daxita jiwi jopa patsi tsane Nacom pia peitorobi nacua beicha
(Lc 13.25-27)

²¹ Equeicha Jesús barai barapo pin bicheitomonaе, pomonaе pijimonaexae tatsi, jeye: “Pinmonaе jiwi neyabara caunutsiya jei tsane: ‘Tanecanamataxeinaem’, jei tsane. Daichitha barapomonaе jiwana tsicamonaeyo patsina Nacom pia peitorobi nacua beicha. Saya meisa patsina pomonaе exana xua pocotsiwa Taxa ichichipa. Barapomonaе patsina ichaxota Taxa po nacuatheicha ewatsiya itorobeibeca. ²² Poxonaе barapo matabi jopaena, po matabitha poxonaе Nacom yabara paebina xua jiwi penatsicuentaе siwa pinmonaе jiwi pijunuwi neyabara caunutsiya jei tsane: ‘Pata Tanecanamataxeinaem, paxan pacueicueijan nejume diwesi xam nexa. Matautano cauri paitawetan newuntha. Matautano jinya newuntha papaeban poxonaе pexeinya petsita itatsi coyenewa paexanan’, nejei tsane. ²³ Daichitha barapomonaе jume notsin. Jan tsane: ‘Bu canta bapana jopa paca yaitaetsi. ¡Taxainya weya pana natsixibarucupare pomonaе abe painya neexanae jiwi pamxaem!’ jan tsane”, jei Jesús.

Meje yabara poxonaе Jesús ainya bomuxube yabara paeba
(Mr 1.22; Lc 6.47-49)

²⁴ Equeicha Jesús barai barapo pin bicheitomonaе, pomonaе pijimonaexae tatsi, jeye: “Pon nejume naitomata pocotsiwa paeban matautano exanano pocotsiwa ichichipan barapon beta popona Nacom nexa. Bara barapon barapocotsi juta coyeneya nacana exana icha be pocotsin peyaputaе in ichi, pon bo acabanota peira matatsucaewatha xua ichaxota ira daunwei. Meje jeye: Copiya muthun tajun exanareca pecuaranobinexa bomuxu naeton. ²⁵ Poxonaе ema duneica yawa mene matabaewaxuba yawa joibo bomuxu daunweya capubabanota, barapo bomuxu jopa joparenaeyo, poxoru naeton tajun umenareca xuano poxoru barapo bomuxu peira matatsucaewatha uncua ichaxota ira daunwei. ²⁶ Ichitha nama pon nejume taetha xuano jopa exanaeyo pocotsiwa ichichipan jopa beta poponaeyo Nacom nexa. Bara barapon barapocotsi juta coyeneya nacana exana icha be pocotsin amameibatsi ichi. Bapon be meje: Bapon be pocotsin bo acabanota ichaxota ira matafatsana xuano naeton jopa tajun umenarecaeyo poxoru taetowa. Baraxota mene pateiba poxonaе awubo tsaibi. ²⁷ Poxonaе ema duneica, yawa mene matabaewaxuba, yawa pin joibo capubabanota barapo bo, bapoxonaе barapo bomuxu joparena poxoru naeton jopa tajun umenarecaeyo xuano poxoru bomuxu uncua ichaxota ira matafatsana. ¡Maisa bomuxu bichocono abe!” jei Jesús barapo pin bicheitomonaetha, pomonaе pijimonaexae tatsi.

²⁸ Poxonae Jesús barapo diwesin najume weta, pomonae Jesús jume tainchi, barapomonae yabara najuntũ coyene cabenaeca xua Jesús pia pecuidubiwani tatsi. ²⁹ Tsipei Jesús ba cuiduba be peyaputaen pia peyapusu itorobi coyeneya tatsi. Jesús jopa cuidubiyo be judiomonae pia pecuidubiwi pia picoyeneya tatsi.

8

Meje yabara poxonae Jesús axaibi exana pon peperũ sawinchi

(Mr 1.40-45; Lc 5.12-16)

¹ Poxonae Jesús peitapatororo wejuinca, pin bicheitomonae Jesús puna poinchi. ² Jesús imoxoyo caquita poinchi pebin, pon peperũ sawinchi. Bapon pentabocototha uncua Jesús peitabaratha tatsi xua Jesús pebarũ cui itura jinaexaetsi. Bapon namchi Jesús beya, jeye:

—Pon Necanamataxeinaem jiwi, icha bara ichichipame bara caitacũpa xua axaibi tana neexanaewam, tsipei jinya neayapusu itorobi coyenewa nexenaem, jei bapon.

³ Nexata Jesús nacobe yota yawa mata jayaba barapo pebin. Jesús barai, jeye:

—Bara ichichipan. ¡Bara axaibinde! ¡Bara caaperũxaibi exanatsi! jei Jesús.

Bapoxonae bapon nainya taachurucuaetsi xua peperũ sawiwatsi. ⁴ Nexata Jesús barai peperũ sawinchi:

—Taema, jopa yabara tsipaebinde ichamonaetha xua neaxaibiwam. Saya jame meisa ponde sacerdotemonaepintha xua nenaitũtsinexa xua bapon necataenexa xua bayatha nejumewa. Bapontha care pocotsiwa xua pecatsiwa Nacomtha, pocotsiwa xua bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita ita peinya xeinatsi xua xam bara jumem yawa xua peru wũnaem, jei Jesús.

Meje yabara poxonae Jesús axaibi exana pon soldadomonae romanomonae pia pentacaponaein tatsi tanacuitatsi

(Lc 7.1-10)

⁵ Poxonae Jesús joniya Capernaum tomaratha, bapoxonae pebin Jesús imoxoyo caquita poinchi. Bapon romanomonae soldadomonae pia pentacaponaein tatsi. Bapon nantaũta pon tanacuiteibatsi pia botha. ⁶ Barapo pentacaponaein Jesús jume daunweya baraichi, jeye:

—Tanecanamataxeinaem, pon inta nacuiteiba camatha boca tabohta. Bapon mũbatsi yawa bichocono atene, jei barapo pentacaponaein.

⁷ Jesús namchi:

—Bara beya tha ponaetsi taaxaibi exanaenexa bapon, jei Jesús.

⁸ Barapo soldadomonae pia pentacaponaein tatsi jume nota:

—Tanecanamataxeinaem, xan saya tacui pawin. Auran xua xam nepatopaewa tsane tabohta tsipei xam ainya cuim. Icha saya paebiname xua bapon pia peatenewatha tatsi, bapoxonae bara axaibi tsane pon inta nacuiteiba. ⁹ Xan barichi xeinan tananecanamataxeinaein pon neitoroba. Barichirũ xeinan soldadomonae pomonae itorobeiban. Poxonae ichũn itoroban: ‘ponde’, jan, bara bapon pona. Poxonae ichũn waban: ‘antha’, jan, bara bapon patopa. Pon inta nacuita itoroban: ‘inta exande’, jan. Bara inta exana, jei barapon pon pentacaponaein.

¹⁰ Poxonae Jesús baxua jume taeba, jume cui yabara cananthũthũ nanta xeinanaya cabenaeca, beta pepaebixae romanomonae soldadomonae pia pentacaponaein tatsi. Jesús necotaba pomonae puna poinchi, barai, jeye:

—Xaniyeya paca tsipaebatsi, Israel nacuatha irũ dapocotsin jopa caxinaeinyo pocotsin icha pon iche pon tana necui yabara jume cowũntsin xua bara neitacũpa xua axaibi taexanaewa jiwi. ¹¹ Paca tsipaebatsi, pinmonae patsina Nacom pia peitorobi nacuatha penabanaenexa tsane. Ichamonae pomonae ichaxota xometo ecoina, barapomonaepiwi patsinano. Ichamonae pomonae ichaxota xometo jopeica, barapomonaepiwi patsinano. Daxita carepaya barapomonae Abraham barũ equiyaena, irũ Isaac barũ

equiyaena iru Jacob baru equiyaena. Daxita carepaya barapo nacuanmonaepiwi baru nabanaeinchi peitaboco beicha. Abraham, baru nabanaena barapomonaechaxoteicha Nacom itorobiya ewateiba jiwí. ¹² Ichamonaenanta xeina xua bepa pinae patsina Nacom pia peitorobi nacua beicha tatsi, bara bequein jopa xanepanaeya peexanaewi. Daxota barapomonaebesai tsainchi ichawatha waxainya weya ichaxota pequireiwatha. Baraxota barapomonaebichocono wecoyei tsane yawa nantanuweya nantu jayabina, jei Jesús.

¹³ Nexata Jesús barai pentacaponaein, jeye:

—Ponde jinya bo beya. Bara cata exanatsi tanecui yabara jume cowantsimxae xua baraneitacupaewa xua tacata exanaewatsi, jei Jesús.

Bapoxonae barapo pentacaponaein pia petanacuichin tatsi bara caena taaxaibi exanatsi.

Meje yabara poxonae Jesús axaibi exana Pedro pamiyo tatsi

(Mr 1.29-31; Lc 4.38-39)

¹⁴ Jesús joniya Simón Pedro pia botha tatsi. Baraxota Jesús tane Pedro pamiyo tatsi xua camatha boca yawa xua domaebatsi. ¹⁵ Jesús cobe pita, barapowa cobe pitatsi. Domaetaaichurucuaetsi bapowa. Nainya barapowa nanta cotaxuba. Bapoxonae bapowapexaewa apata barapomonaetha.

Meje yabara poxonae Jesús axaibi exana pin bicheitomonae

(Mr 1.32-34; Lc 4.40-41)

¹⁶ Poxonae tabopiya tsanaicha, ichamonaepomonaecauri xeina barapomonaechaxoteicha Jesús becarendenatsi. Jesús pia jumetha itaweta caurimonae. Barichi Jesús axaibi exana daxita pomonaepeatenewi. ¹⁷ Poxonae Jesús barapo coyenein exana, bara nayabara jume cui weta exana caena bayatha Isaías peyabara cui tsiwunaeya paebixae. Bapon Isaías Nacom peitorobi jume pepaebin. Bapon jeye Cristo yabara: “Bapon naca wenota wajuntu coyene bojeiwa. Matautano bapon naca wenota waatene coyenewan”, jei Isaías pejume diwesitha.

Meje yabara poxonae Jesús yabara paeba pomonaechichipa xua pepuna ponaewatsi

(Lc 9.57-62)

¹⁸ Poxonae Jesús tane xua pin bicheitomonae nacaetuta bapontha, bapoxonae bapon pijimonaechaxoteicha xua icha muxunene beya peponaenexa tsane xua pucua epatauta iya.

¹⁹ Poxonae cataunxae Jesusbaru jopa torobabiyaeyo xua icha muxunene beya nexa, bapoxonae Jesús imoxoyo caquita uncuatabutsi pon jiwí pecuidubin Moisés pia peitorobi coyene. Jesús baraichi:

—Pon jiwí Necuidubim, capuna ponaeinchi daxita jupaeyantha xua ichaxotan neponaewa tsane, jei.

²⁰ Jesús jume nota:

—Namomonaeba pia muthun xeina ichaxota pemaitathopeibiwa. Iru peyapupunaewiba cotton xeina, ichaxota peyamaitathopeibiwa. Ichitha nama xan ponxaein Nacom Tananeitapetsin nama jopa daichinyo. Nama jopa xeinaeyo bo xua tabo xua xota nafifinacaecan, jei Jesús.

²¹ Bapoxonae ichun pon iru Jesús pijimonaechaxoteicha jiwana bapon Jesustha namchi, jeye:

—Tanecanamataxeinaem, bara nepu copare tha taxa matha muthutha xubichi copiya xua bapoxonae tacapuna ponaewatsi tsainchi, jei.

²² Jesús jume nota:

—Maisa jame nepuna ponde. Bara copare xua petupaewi bara muthucaeinchi, pomonaeba pewerapaewi, jopa be tana nejume cowantsiwixae, barapomonaemuthucaena, jei Jesús.

Meje yabara poxonae Jesús xainya ducuanaya exana joibo yawa maratsacano xainya menceducuanaya exanano

(Mr 4.35-41; Lc 8.22-25)

²³ Nexata Jesús jeratha nontabiya. Jesús pijimonae barꝝ pona jeratha. ²⁴ Bapoxonae jemeicha pin joibo naetaba mentha. Maratsacan jeratha mene othopa muxu pebunarecae. Daichitha Jesús maituncua. ²⁵ Bapoxonae Jesús pijimonae yaubaxotsi, jeichichi Jesús:

—¡Pata Necanamataxeinaem, pana capanepare! ¡Yanabunarecatsi! jei Jesús pijimonae tatsi.

²⁶ Jesús jume nota:

—¿Eta pocotsiwa metha bichocono pajunuwame? ¿Cataunxuae jopa pana neyabara jume cowuntsim xua bara tana neitacꝝpaewa xua tapaca yawenaewatsi? jei Jesús.

Nexata Jesús asiya uncua. Bapoxonae Jesús itawetaxuba joibo, maratsacano. Daxita caewanaya joibo yawa maratsacano. ²⁷ Bapoxonae barapo pebiwi yabara najũntũ coyene cabenaecarũcꝝpa xua pocotsiwa Jesús peexanaexae. Barapomonae najei:

—¿Metha jintamda baponda? ¡Jamaisa bapon itawetaxuba joibo yawa maratsacan xua daxita xainya dubenanaya! najei barapomonae.

*Meje yabara poxonae pebinbe ponbe caurimonae pexeinaeinbe, ponbe Gadara nacuapinbe
(Mr 5.1-20; Lc 8.26-39)*

²⁸ Poxonae Jesús patopa pucua icha muxunene beya xua po nacuatha Gadara nacua, bapoxonae pebinbe Jesús imoxoyo caquita uncuatabũtsibe. Baponbe ibo wountha poponeibabe. Caena bayatha baponbe xeinabe caurimonae. Barapo caurimonae baponbe anaepana cana exanatsibe daxota daxita jiwi junuwa xua peponaewa barapo namtotha ichaxota baponbe poponabe. ²⁹ Bapoxonae jemeicha caurimonae baponbe wawai exanatsibe, jeibe:

—Nacom Pexantom tatsim, ¿eta pocotsiwa metha patopame pata xantha? ¿Patopame jinya painya neperaxa exanaetsibe pewũnaeya xua po matacabitha xua poxonae Nacom atene pana exanaena xua abe pata exanaexae? jei baponbe xua caurimonae wawaya exana.

³⁰ Tsiwiyo tajũyo beya pin marrano duweimonae xayompa. ³¹ Caurimonae Jesús jeichi: —Icha pana itawetame, moya pana nepu copabare marrano duweimonaetha, jei caurimonae.

³² Nexata Jesús jume nota caurimonaetha, jeye:

—Moya pataema, jei.

Nexata caurimonae pebinbe wepu ponatsibe, yawa marrano duweimonaetha pata. Barapo marrano duweimonae dũcꝝpa, pin pitapatororo othopareca. Pucuatha bunothopa. Caurimonae cabunothopatsi.

³³ Pomonae yapu eena barapo marrano duweimonae, junuwiya cuinaenouta peyabara paebinexa tomarapiwitha. Barapomonae yabara paeba daxita pocotsiwa Jesús cana exana marrano duweimonaetha yawano pocotsiwa Jesús cana exana ponbetha ponbe xua cauri pexeinaeinbe. ³⁴ Bapoxonae daxita tomarapiwi pona ichaxota Jesús eca. Poxonae Jesús tainchi, barapomonae Jesús jeichichi: “Maisa bewa warapaename Gadara nacua weya, po nacua pata nacua weya”, jei daxita barapomonae.

9

*Meje yabara poxonae Jesús axaibi exana pon pecuenobinchi
(Mr 2.1-12; Lc 5.17-26)*

¹ Nexata Jesús jeratha nontabiya. Jeratha pona icha muxunene beya xua pucua epataũta iya. Jesús pia tomara beya patopa, barapo tomara icha muxunenetha eca. ² Baraxota pebiwi pata. Barapo pebiwi Jesús tacarendenatsi pon pecuenobinchi. Xua xota pocotsiwatha pemaiteibiwa, barapomonae barapocotsiwatha pecuenobinchi carendenatsi. Poxonae Jesús tane xua barapomonae yabara jume cowũnta xua bara Jesús peitacꝝpaewatsi xua axaibi peexanaewatsi pon pecuenobinchi, bapoxonae Jesús barai pecuenobinchi:

—Tajiton, najũntũ coyene tsacatabare. Cacui yabara jũntemainaya jũntũ puxana exanatsiba jinya abe neexanae cuiru coyenein, jei Jesús.

³ Bapoxonae pomonae jiwi pecuidubiwi Moisés pia peitorobi coyenewa tatsi, barapomonae daxita carepaya pia coutha nanta xeina. Najei: “Maisa bapon bichocono abe tsipei pocotsiwa bapon paeba bichocono Nacom tsita ajumebetsi. Jiton dapocotsin aibi pon xua jiwi cacui yabara jüntemainaya jüntu puxana exanatsi abe pia peexanae cuiru coyenein tatsi”, najei barapomonae. ⁴ Daichitha Jesús yaputane xua barapomonae pijüntu coyeneintha natsipaeba. Jesús barai barapomonae, jeye:

—¿Eta xua metha baxua abeya pana neyabara cananta xeiname? ⁵ ¿Eta po jumetha baran tsane pecuenobinchi? ¿Metha jan tsane: ‘Jinya abe neexanae cuiru coyenein cata jüntemainatsi’, jan tsane? Ichacuitha ¿metha jan tsane: ‘Nontaponare, yawa bara ponare’, jan tsane? ⁶ Daxota aunxuae paca tsita itapeinya xeinaeinchi xua xan ponxaein Nacom Tananeitapetsin, xua xeinan taayapusu itorobi coyenewa xua bara tana neitacupaewa xua jiwi tayabara cacui jüntemainaya jüntu puxana exanaewa abe pia peexanae cuiru coyenein tatsi pomonae jinompa barapo cae pin nacuathe, jei Jesús.

Bara nexata pecuenobinchi Jesús barai, jeye:

—Catsipaebatsi nontaponde. Jinya nemaituncuaewa pire. Jinya bo be-iyande, jei Jesús.

⁷ Bapoxonae pon pecuenobinchi caena nainya nontapona barapomonae peitutha tatsi, yawa pita xua pemaituncuaewa. Bapoxonae pia bo be-ya. ⁸ Poxonae jiwi tane baxua, barapomonae yabara najüntu coyene cabenaeca yawa Nacom wuna jaintatsi. Barapomonae nabarai:

—Anoxuae waxainchi tainchi pocotsiwa pewunaewa pocotsiwa jopa yaputaetsi, yawa wuna jaintatsi xua Nacom barapo jitontha pecatsixae pia peayapusu itorobi coyenewa, jei barapomonae.

Meje yabara poxonae Mateo wabatsi, Jesús waba

(Mr 2.13-17; Lc 5.27-32)

⁹ Jesús bara weya pontaba ichaxota axaibi exana pon pecuenobinchi. Bapoxonae Jesús tane pebin pon pewun Mateo. Bapon eca ichaxota bapon paratixi matoma noteibeca po paratixi jiwi bewa catsibina pon romanomonae itorobiya pia pepa peewatsinchi nexa. Jesús Mateo baraichi:

—Nepuna ponde, jei Jesús.

Bapoxonae Mateo caena nainya nontapona yawa napuna pona Jesustha.

¹⁰ Pirapaeyo Jesús baru ecatsi, Mateo baru eca pia botha pexaethopeibiwatha xua Jesús pebaru xaenexatsi. Barichi Jesús baru eca pinmonae barapo pexaethopeibiwatha pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. Iruru Jesús baru eca ichamonae pomonae abe peexanae cuiru coyenein peexanaewi. Daxita barapomonae Jesús baru eca pexaethopeibiwatha yawa Jesús pijimonae baru ecano penabanaenexa. ¹¹ Ichitha poxonae fariseomonae tane xua Jesús dacotsiwa baru eca, barapomonae namchi. Jesús pijimonae tatsi baraichi:

—Maisa Jesús abe exana poxoru baru xayeca pomonae paratixi pentoma noteibiwi. Matautano, baru xayeca pomonae abe peexanae cuiru coyene peexanaewi, jeichichi Jesús pijimonae tatsi barapo fariseomonae.

¹² Poxonae Jesús baxua jume tane, bapon Jesús namchi barapomonaetha:

—Pomonae ba xaniwaicha jinompa xua jopa ateneyo barapomonae ba jopa canantawenonaeyo pon jiwi peyawubin. Saya jame meisa pomonae ba atene barapomonae jame canantawenona pon jiwi peyawubin. Bara juta coyene ichi barapomonae pomonae nebaru xane. Barapomonae nenantawenona xua tayabara cui jüntemainenexa abe pia peexanae cuiru coyenein tatsi. ¹³ Panacuidubaponde xua Nacom Pejume Diwesi paeba. Meje xua Nacom namchi, jeye: ‘Ichichipan xua jiwi nantanuweya peyabara nanta xeinaewa ichamonaetha xua peyawenaewa tsane. Baxua jame ichichipan beyacaincha xua ichichipan po cui coyene xua jiwi duwei petautsiwa xua tuxusi exana xan nexa’, jei Nacom. Barichinno xan patopan apara tha jopa tawabinexa tsane pomonae pejüntu coyene xanepanaewi. Apara jame patopan tha meisa

tawabinexa tsane pomonae peajuntucoyenebe jiwi, xua barapomonae icha juntucoyene pexeinaenexa tsane peauraxae xua abe exana, jei Jesús.

Meje yabara poxonae Jesús yabara yainyabatsi po coyene xua Nacom peyabara nainbotsiwatsi (Mr 2.18-22; Lc 5.33-39)

¹⁴ Nexata Juan pon jiwi Pebautisabin, bapon pia pepuna jinompaewichi barapomonae pata Jesús pia xantha tatsi. Barapomonae Jesús yainyabatsi, jeye:

—Apara paxan iru fariseomonaeru jopa juniya Nacom payabara nainboteibinyo poxonae Nacom pawuequeiban. ¿Eta xua metha jinyamonae daxua jopa cou daichiyo, saya cou u penabaneibi? jei barapomonae pomonae Juan pia pepuna jinompaewichi tatsi.

¹⁵ Jesús jume nota barapomonae:

—Jiwi ba jopa bewa wecoyeya yabara nainbotsi poxonae ichamonae pexaewa tsinacaetuta penabanaenexa xua poxonae pebin pecotsiwa pita. Poxonae cataunxuae awiya bapon eca pexaewa penabanaewatha, bapoxonae jiwi ba peburuya nabane, jopa bewa yabara nainbotsi tsane. Ichitha icha pon aena piowa pita, caena nainya waetabatsi, ichamonae waetaba xua bapon tajue pecaponaenexatsi, bapoxonae jame jiwi ba bewa wecoyeya yabara nainbotsi xua equeicha bapon caewa pepatopaewa tsane.

¹⁶ “Jiwi ba jopa exanaeyo xua pena paparuwa tsiwiyo jiwana caxinaxubeta po paparuwa cataunxuae jopa matanaxubiyo, xua barapo paparuwa pewan botsinexa peru dorouto. Icha baxua exanaetsipa xua pena paparuwatha wan bota peru doroutotha, bapoxonae barapo dorouto abe tsipae. Tsipei poxonae barapo dorouto matanaxuba barapo pena paparuwa natsaquetabiya. Poxonae barapo pena paparuwa natsaquetabiya equeicha wan tsitsipanarena barapo dorouto. Bapoxonae equeicha nama bichocono pin wan tsanaya beyacaincha xua poxonae copiya. ¹⁷ Matautano jiwi ba pena vino mera jopa eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto. Tsipei barapo bocoto jopa nayeyetaponaeyo poxonae barapo vino mera atsaxa. Barapo pena vino mera naxuba yawa barapo bocoto naxuba poxonae barapo bocoto tsitsica. Daxota bewa jame pena vino mera eparecae pena bocototha. Bapoxonae pena vino mera jopa naxubiyo, yawa pena bocoto jopa naxubiyo poxoru boco yeyena yawa poxoru pena bocoto”, jei Jesús.

Meje yabara xua poxonae Jairo pexantiyo taaxaibi exanatsi, yawa yabara xua bapoxonae icha yabuyo iru axaibi exanatsi poxonae Jesús pia paparuwa tajayabatsiru (Mr 5.21-43; Lc 8.40-56)

¹⁸ Poxonae cataunxuae Jesús cueicueijei barapomonaetha, bapoxonae pebin patopa. Bapon judiomonae pia penacaetutsi bo pia pecanamataxeinaein tatsi. Bapon pewun Jairo. Jesús petaxutha irabe tatayecarecatsi. Bapon baxua exana tsipei Jesús pon ainya cui peexanaeinchi. Bapon namchi Jestutha:

—Taxantiyo anoxuaetha inta tupa. Icha xam ponaename yawa necobetha mata jayabiname, bapoxonae barapowa equeicha asu tsane xua equeicha nacosatsina, jei Jairo.

¹⁹ Jesús bapoxonae nontapona. Jairo puna poinchi. Iru Jesús pijimonae puna poinchi.

²⁰ Poxonae Jesús iya iru yabuyo Jesús imoxoyo caquita poinchi. Barapowa caena bayatha be yadoce po weiyobe jopa xua pentabu janatha boca xua be nantawane. Barapowa Jesús pia paparuwa xainyowa tajayabapoinyatsi. Bapowa paparuwa tajayaba xua peopirawa xua Jesús pia penamaxatatsiwa tatsi. ²¹⁻²² Baxua exana tsipei bapowa nanta xeina, jeye: “Icha pia paparuwa tajayabin bapoxonae axaibin tsane”, jei bapowa.

Poxonae bapowa Jesús tajayabatsi pia paparuwa, bapoxonae caena juntubu jana naruntaba.

Nexata Jesús napatomeicha necota, yawa yabuyo tainchi. Jesús namchi bapowatha:

—Yabuyo, najuntemiya xore. Caaxaibi exanatsi jinya tana neyabara jume cowuntsix-aem xua bara tana neitacupaewa xua tacaaxaibi exanaewatsi, jei Jesús.

²³ Jesús equeicha pona. Poxonae Jesús patopa pecanamataxeinaein pia bo tatsitha, bapoxonae Jesús tane xua pebiwi oba tsipei yabuyo bayatha tupa. Barapo pebiwi

pomonae pecapu obiwi pewerapeibiwi. Matautano Jesús tane pomonae pesiwa namt-sebiya wecoyei jiwi. ²⁴ Jesús namchi jiwitha:

—Tutu weya paponde. Yabũyo apara jopa tũpaeyo, maituncua apara, jei Jesús.

Poxonae Jesús baxua paeba, jiwi Jesús jume cui caponatsi. ²⁵ Ichitha Jesús itoroba xua barapomonae tutu wejojoniya pesato beya. Bapoxonae Jesús bo tutu joniya. Jesús cobe pita, yabũyo cobe pitatsi yawano asiya cuaranotatsino penacosatsixae. ²⁶ Xua Jesús yabũyo axaibi exanatsi, barapo diwesi daxita jiwi jume taetaepona pomonae barapo nacuatha jinompa.

Meje yabara poxonae Jesús axaibi exana ponbe nantiyabe itata nacutabe

²⁷ Poxonae Jesús bara weya pona ichaxota yabũyo caewa asũ exanatsi, pebinbe Jesús puna poinchi. Baponbe peitata nacutsinbe. Baponbe wawaya jeibe:

—Xam Jesús, David pia pemomoxi susatopin jiwanam ponxaem Nacom necaitapetsin pana neyabara najũntũ coyene xeinarebe xua pata tana neyawenaenexamebe, jeibe baponbe ponbe peitata nacutsinbe.

²⁸ Poxonae Jesús bomũxũ bejoniya, ponbe peitata nacutsinbe Jesús imoxoyo caquita poinchibe. Jesús yainyaba baponbetha:

—¿Bara pana neyabara jume cowũntamebe xua bara tana neitacũpaewa xua axaibi tapaca caexanaewatsibe? jei.

Jume notabe:

—Aja, pata Tanecanamataxeinaem, bara paca cui yabara jume cui cowũntatsibe, jeibe.

²⁹ Bapoxonae Jesús itamaiquei jayababe baponbe. Jesús namchi baponbetha, jeye:

—Icha pana necui yabara jume cowũntamebe xua bara tana neitacũpaewa xua axaibi tapaca exanaewatsibe bara baxua pacata exanaeinchibe xua axaibi paca exanaeinchibe, jei Jesús.

³⁰ Bapoxonae caena nainya aitamaiqueixaibibe. Jesús jume daunweya baraibe baponbe, jeye:

—Jopa pana necui yopichindebe ichamonaetha xua pacata exainchibe baxua, jei Jesús baponbetha.

³¹ Daichitha poxonae Jesús weya ponabe, pejume taewathabe xua Jesús paeba, tsipaebabe ichamonaetha pomonae barapo nacuatha jinompa, daxita pocotsiwa xua Jesús cana exana baponbetha.

Meje yabara poxonae Jesús axaibi exana pon pemuxusipanaein

³² Poxonae Jesús bo wejoniya irũrũ ponbe aitamaiqueixaibi exanatsibe, bapoxonae ichamonae Jesththa pata. Barapomonae capona pebin, pon muxusipana, matautano jopa paebiyo, tsipei cauri xeina. ³³ Bapoxonae Jesús itaweta cauri xua barapo pebin muxusipana exainchi. Caena nainya bapon cueicueijei. Nexata pomonae xua tane xua Jesús exana, barapomonae yabara najũntũ coyene benaeca. Barapomonae namchi, jeye:

—Jopa bapana taetsi Israel nacuatha icha be ichi pocotsiwa Jesús exana, jei barapomonae.

³⁴ Ichitha poxonae fariseomonae jume tane baxua, barapomonae namchi Jesús yabara, jeye:

—Barapon caurimonae itawetatsi tsipei xeina caurimonae pia pentacaponaein tatsi pia peayapusũ itorobi coyene tatsi, jei fariseomonae.

Meje yabara poxonae Jesús nantanuweya yabara cui nanta xeina jiwi xua peyawenaewa tsane

³⁵ Jesús pona daxita pin tomarantha yawa po tomaraxi tsiqui tomaraxitha. Bapon cuiduba ducuaeta judiomonae pia penacætutsi bontha tatsi. Matautano bapon paeba ducuaeta Nacom pia pexeinya jume diwesi tatsi po diwesi yabara xua Nacom waba jiwi petanaexanaenexatsi piamonae pomonae Nacom jũntũ coyene itorobiya ewata. Matauta bapon jiwi axaibi exana ducuaeta pomonae xua atene yawa xua cuenecuenona. ³⁶ Poxonae Jesús jiwi tainchi, Jesús yabara nanta xeina barapomonae xua peyawenaewa tsane. Tsipei barapomonae natsepa matautano jopa itacũpaetsi xua pia

coutha penayawenaewa. Barapomonaе bara be juta coyeneya ichi, icha be ovejamonaе ichi xua poxonaе iratha bobena tsipei natsepa matautano tsipei dapon aibi, pon pe-enaеin ovejamonaе xua peyawenaenexa. ³⁷ Nexata Jesús namchi pijimonaetha:

—Bara xainyeya paca tsipaebatsi. Pabitha ba pocotsiwa peubiwan naweta nawita, daichitha ba penacuichiwi pomonaе jota pinmonaе aibi. Bara juta ichi barapo cae pin nacuathe. Jiwi pinmonaе jinompa pomonaе nantawenona xua pejume taewa tsane Nacom pia pexeinya jume diwesi tatsi. Daichitha pomonaе Nacom Pejume Diwesi cueicueijeі tsurubenanaebiya ichamonaetha, barapomonaе pinmonaе aibi, saya tsiquimonaeyo. ³⁸ Daxota Nacom pawucare xua pecaitorobinexa tsane ichamonaе xua petacamuxu tsipaebinexa tsainchi pia pejume diwesi pomonaetha pomonaе barapo cae pin nacuathe pejinompaewi, jei Jesús.

10

*Meje yabara poxonaе Jesús itapetsiya waba pia peitorobiwi tatsi xua doce poyobe
(Mr 3.13-19; Lc 6.12-16)*

¹ Nexata Jesús pijimonaе waba. Barapomonaе jiwana itapetatsi doce poyobe, pomonaе baraichi: “Jesús pia peitorobi jiwi tatsi”, jeichichi. Jesús barapomonaе cata pia peayapusu itorobi coyenewa xua cauri ichamonaе petaitawetsinexatsi pomonaе xua cauri xeina. Matautano Jesús cata pia peayapusu itorobi coyenewa xua pijimonaе tatsi axaibi peexanaenexa pomonaе xua atene, xuano xua cuenecuenona.

² Barapomonaе pomonaе doce poyobe pomonaе peitorobiwichi, ichun pewun Simón, pon icha wunno “Pedro” baraichi. Iru ichun pewun Andrés, pon Simón peweicho tatsi. Iru ichun pewun Santiago. Iru ichun pewun Juan, pon Santiago peweicho tatsi. Baponbe Zebedeo pexantobe tatsi. ³⁻⁴ Iru ichun pewun Felipe, iru ichun pewun Bartolomé, iru ichun pewun Tomás, iru ichun pewun Mateo. Barapon Mateo pon paratixi pentoma notebin po paratixi jiwi bewa catsibina pon romanomonaе itorobiya pia pepa peewatsinchi nexa. Iru ichun pewun Santiago, pon Alfeo pexanto tatsi. Iru ichun pewun Tadeo. Iru ichun pewun Simón, pon celotemonaepin. Iru ichun pewun Judas Iscariote, pon Jesús caenaetaxubatsi ichamonaetha xua pebexubinexatsi.

*Meje yabara poxonaе Jesús itoroba pijimonaе xua barapomonaе peyabara cueicueijeinexa
jiwitha po coyene xua Nacom waba jiwi xua petanaexanaenexatsi pijimonaе tatsi
(Mr 6.7-13; Lc 9.1-6)*

⁵ Barapo doce poyobe Jesús itoroba, Jesús jeye:

—Jopa paponaeinde po nacua ichaxota jinompa pomonaе jopa judiomonaе naexanaeyo. Jopa paponaeinde po tomaran ena Samaria nacuathe. ⁶ Meisa saya paponde pomonaе Israel nacuamonaepiwitha. Barapomonaе payawende tsipei barapomonaе Nacom taju wepu jinompatsi xua pipato jinompa. Icha be pocotsi juta coyeneya ichi oveja, barapo ovejamonaе napuxana poxoru wepu pona taju beya, xua pon pe-enaеin barapo ovejamonaе bapon taju wepu poinchi icha xua poxonaе napuxana. ⁷ Poxonaе papaeba dubenanaebiyame, papaebare barapomonaetha po coyene xua anoxuae Nacom waba jiwi xua petanaexanaenexatsi piamonaе pomonaе itorobiya peewatsixae. ⁸ Matautano Nacom pia peayapusu itorobi coyenewatha po coyenewe meje baxua paexande: Axaibi paexande pomonaе peatenewi; equeicha asu paexande pomonaе werapeibina; axaibi paexande pomonaе xua peperu sawichimonaе; matautano caurimonaе pata taitawere pomonaе caurimonaе pexeinaewi. Nacom amanaya paca cata barapo pia peayapusu itorobi coyene, daxota poxonaе jiwi payawename Nacom pia peayapusuwatha, jopa jiwi paratixi pawucaеinde.

⁹ “Jopa pacaponaeinde paratixi xua poxonaе painya newarapaenexa. ¹⁰ Jopa pacaponaeinde cote xua painya nejeyaenexa paparuwan poxonaе pawarapame. Saya cae camisa panama xatabare, jopa icha camisa pacaponaeinde. Matauta jopa pacaponaeinde ichawan xua painya nenataxu xatabiwan, yawa icha iwaton jopa pacaponaeinde. Painya

xoba paauram xua poxonaē jiwī paca catsibeibina tsipei baraxua pocotsiwa paca cata apara bara painya matoma painya netanacuichixaemxae Nacom.

¹¹ “Poxonaē papanenebiyam pin tomaratha, ichacuitha tsiqui tomariyotha, pajaire pon jiwī barū cui itura jina xuano xua paca tsiwaba pia botha tatsi pia paca apatsinexa tsane. Bapon pia botha tatsi painya nepu enaeinde beya tsane poxonaē barapo tomara weya pawarapaename. ¹² Poxonaē bomūxūtha pajojonyame, barapo bopiwi pajacobare, pajande: ‘Barabū Nacom jūntema jinompa paca cana exanaena’, pajande. ¹³ Icha baxota jinompa pomonaē pomonaetha jiwī barū cui itura jina, bara baxua Nacom barapomonaē taexanaeinchi pocotsiwa papaebame. Ichitha icha baxota jinompa pomonaē pomonaetha jopa jiwī barū cui itura jinaeyo, baxua Nacom jopa taexanaē tsane pocotsiwa papaebame barapomonaetha. Equeicha caewa pacata parenana xua pocotsiwa papaebame. ¹⁴ Ichitha icha icha tomarapiwi jopa paca matenta weyataeya wabiyo yawano icha jopa xapain paca jume naitaewatsiyo, nexata bapoxonaē panatsixibare. Namto beya paponde xua bomūxū weya xua ichacuitha icha tomara weya. Po tsorobo painya taxutha dubena pana nataxu wenūnūbabare barapo tomaratha. Poxonaē baxua paexaname patsita itapeinya xeinaename, apara xua barapomonaē abe exana painya xainya berena xua poxonaē barapomonaē paca jume itaweta. ¹⁵ Bara xainyeya paca tsipaebatsi matabi patopaena, po matabitha Nacom yabara paebina jiwī petsita natsicuentisaxaetsi xua abe petsita exanaexaetsi. Barapo matabitha jopa juniya bichocono atene tsane pomonaē paca jume itaweta. Caena bayatha Sodoma tomarapiwi irū Gomorra tomarapiwi bichocono abe exana. Daxota Nacom atene exanaena barapo tomaramonaēbe. Bara bequein Sodoma tomarapiwi atene matauta irū Gomorra tomarapiwi bequein atene tsipei bichocono abe exana barapomonaē. Ichitha nama pomonaē barapo tomaratha jinompa, pomonaē paca jume itaweta, jopa juniya peraxa jūbebi tsainchi, beyacaincha poxonaē Sodoma tomarapiwi yawa Gomorra tomarapiwi peraxa jūbebatsi”, jei Jesús.

Meje yabara poxonaē Jesús yabara paeba xua ichamonaē abe exanaena Jesús pijimonaetha tatsi

¹⁶ Equeicha Jesús jeye: “Paponde ichaxota paca itorobatsi. Paca caitorobatsi pia xainya beya pomonaē jopa pejume cowūntsiwi, pomonaē itacūpatsi xua abe painya nepaca exanaewa, icha ovejan ichi xua poxonaē pona ichaxota neuthū jinompa xua itacūpatsi xua abe peexanaewatsi. Paxam pananthūthū cui wūnaetsiya tsaquiya jinompare, tsipei ichamonaē beya paca pepeichipa. Baxua bara paichinde icha jomo ichi xua peita coxonaēin poxonaē waxouto cuitaya naetsiriwatsi. Paxam bara jūtiya jopa paichim tsane jopa ichamonaetha abe paexanaeinde, icha topiboto ichi xua anaepana jopa nanta xeinecaeyo xua jūntema yapoponeca. ¹⁷ Paxam dota pam, dota pomonaē peajūntūcoyenebe jiwī. Barapomonaē paca teicaena pepaca caponaenexa tsane pomonaetha pomonaē tomaran pentacaponaei. Bapoxonaē barapomonaē paca cuainchina judiomonaē pia penacaeutsi bontha tatsi. ¹⁸ Matauta barapomonaē paca caponaena pomonaē peyanacua ewatsi jiwī peitabaratha tatsi. Matauta paca caponaena pomonaē jiwī itorobiya pia pepa peewatsiwichi pia peitabaratha tatsi. Baxua paca cana exanaena painya tana nejume cowūntsixaemxae. Daichitha barapo pentacaponaei peitabaratha tatsi paca itacūpaena xua pata neyabara paebiwān pocotsiwa bayatha tapacata exanaewatsi paxam. Matautano paca itacūpaena xua pata neyabara paebiwān pomonaē jopa judiomonaē naexanaeyo peitabaratha tatsi. ¹⁹ Ichitha poxonaē paca caponaena pentacaponaei beya, jopa payabara najūntū coyene exabinde pocotsiwa xua painya nejume notsiwa tsane barapomonaetha. Nama Nacom paca tsijume dubina po jume xua painya nacaunutsiwam tsane. ²⁰ Tsipei beta jopa papaebimchipae painya coutha, ichitha Nacom pia Pejumo pe tūnaxū tatsi paca tsimuxu cueicueije tsane. Bapon paca catsina po jumetha xua patsipaebiname.

²¹ “Jiwī caenaetsina barompaya peweicho jiwī ichamonaetha xua ichamonaē pejutebinexa tsane. Irū coxiyeiwi ichamonaetha caenaetsina pia pexui xua ichamonaē

pejutebinexa tsane. Iru pexui paxeiwi caenaetsina ichamonaetha xua ichamona pe-
jutebinexa tsainchi. ²² Daxita nacuanpiwi paca casebina painya tana nejume cowuntsix-
aemxae. Ichitha icha awiya paantuyapusuya nejume cowuntsiya jinompaename xua
beya payacuiya werapaeya othopaename, poxona bequein abe pacata exana ichamona
Nacom napaeba paca cana exanaena. ²³ Icha cae tomarapiwi paca abe exanaena,
parucupare icha tomara beya. Bara xainyeya paca tsipaebatsi xua xan ponxaein Nacom
Tananeitapetsin, equeicha patopeicaein beya abu poxona cataunxuae jopa panacui
wetsim tsane xua paponame daxita israelmonae pia nacua tomarantha tatsi, xua
papaeba dubenanaebiyame Nacom Pejume Diwesi.

²⁴ “Pon ba aena nacuiduba xua peyaputaenexa, bapon jopa be bapocotsinyo, pon
pecuidubin jiwi, pon peyaputaein. Matauta pon ba petanacuichin jopa ainya cuiyo,
jopa be bapocotsinyo pon xua peitorobixaetsi pon pia pecanamataxeinaeinchi tatsi.
²⁵ Pon ba penacuidubin bewa nanta xeinae, bewa najei: ‘Maisa ichamona inta abe
exanatsi pon tana necuidubin. Metha bara neichi tsane’, bewa najei. Iru pon ba
tanacuita pia pecanamataxeinaeinchi bewa najei: ‘Maisa ichamona inta abe exanatsi
pon tanecanamataxeinaein. Metha bara neichi tsane’, bewa najei. Icha pocotsi coyeneya
baponbe ichi poxona baxua nayabara nanta xeinabe, bara pocotsi coyeneya paca cana
ichiya exana jiwi icha poxona neyabara ichiya namchi. Tsipei jiwi abe neyabara paeba
xua jeye: ‘Maisa bapon Beelzebú tsecae pon caurimonae pia pentacaponaein tatsi’,
jei. Matauta paca yabara jei tsane: ‘Maisa barapomona Beelzebú pijimonae tatsi po
Beelzebú caurimonae pia pentacaponaein tatsi’, paca yabara jei tsane”, jei Jesús.

*Meje yabara poxona Jesús yabara paeba xua pontha bewa ba jiwi cuitaya cunuwina
(Lc 12.2-7)*

²⁶ Equeicha Jesús jeye: “Jopa jiwi pacunuwinde xua tapana neyabara paebiwam. Tsipei
daxita diwesi, xua po diwesi bequein anoxuae jiwi jopa yaputaeyo, bexa yaputaena.
Pocotsiwa jiwi abe nameicha exana daichitha ichamona bexa yaputaeponaena baxua.
²⁷ Tsipei daxita baxua xua nameicha paca tsipaebatsi, baxua xuya patsipaebare jiwi.
Po diwesi xua merawi paca tsipaebatsi, barapo diwesi xuya ichamona mataquei-
tha patsipaebare. Po diwesi xua paxapaxeya paca tsipaebatsi, barapo diwesi xuya
panatha pana nejume canawabiya wawande. ²⁸ Tamona pam, paca tsipaebatsi, jopa
pacunuwinde pomonae itacupatsi xua paca jutebina xua saya meisa painya pepontha.
Ichitha barapomona jopa itacupaetsi xua equeicha paca jumopein tñaxu jutebina.
Jame paca tsipaebatsi pon jame bewa pajume cuitaya cunuwim bapon apara jame Nacom.
Tsipei barapon Nacom itacupatsi xua paca bebai pin isototha po pin isototha jopa bapana
itacounayiyoy xua weraweraca painya nepaca exanaenexa painya pepon yawa painya
nejumope tñaxun.

²⁹ “Jiwi ba caenaeta sito dos poyobe, saya cae paratiyotha nantomata. Bequein barapo
sitobe caenaeta jiwi xua jopa matoma nautsiyo, poxoru saya sito, ichitha painya Axa
Nacom yaputane yawa copata poxona barapo sitobe jiwana iratha yajopeica xua yatupa.
³⁰ Nacom daxita carepaya jopa juniya paca yabara yaputaeyo, daxota paca matana
yaputane xua pontanatiyobe painya nexainaewa. ³¹ Jopa pajunuwinde tsipei paxam
bichocono Nacom patsita ainya cuim, beyacaincha siri”, jei Jesús pijimonaetha.

*Meje yabara poxona Jesucristo yabara paeba xua pomona peyabara paebiwichi ichamona
peitabaratha tatsi
(Lc 12.8-9)*

³² Equeicha Jesús namchi: “Yabara paca tsipaebatsi pomona xua nayopita ichamon-
aetha pomona xua najei: ‘Apara paxan Jesús pijimona tatsi pan’, najei. Barichi xan
xuya jan tsane Nacomtha: ‘Barapomona apara tana nejume cowuntsiwi’, jan tsane xuya
barapo Nacom peitabaratha pon Taxa, pon peitabocotha pecaexae. ³³ Ichitha pomona
xua neyabara jei ichamonaetha: ‘Jopa bapon yaitaeyo’, jei, xan xuya barapomona

yabara jan tsane: ‘Apara barapomonae jopa yaitaeinyo’, jan tsane xuya Taxa beicha, pon peitabocotha peecaexae”, jei Jesús.

Meje yabara poxonae Jesús yabara paeba xua jiwi ainya bicheiton naexanaena xua Jesús pejume cowuntsixaetsi xua ichamonae jopa pejume cowuntsixaetsiru

(Lc 12.51-53; 14.26-27)

³⁴ Equeicha Jesús namchi: “Jopa pananta xeinaeinde xua patopeican saya meisa xua jiwi junte ma jinompa tacana exanaewa tsane. Jopa baxua tsipatopeinyo. Apara jame tsipatopeican taexanaenexa po coyene jiwi naba exanatsi xua daxota ainya bicheiton penaexanaenexa. Pomonae jopa nejume cowuntsiyo ita aenae-aenei pomonaetha pomonae tana nejume cowuntsiwi. ³⁵ Coxian pexanto ita aenae-aenei tsainchi. Iru coxiwa pexantiyo ita aenae-aenei tsainchi. Iru ichowayo pecopeinyo ita aenae-aenei tsainchi. ³⁶ Daxota pebin barompaya piamonae penaitafaetabi jiwi nacana exanatsi.

³⁷ “Pon antobe paxa yawa pena beyacaincha xua neantobe bapon jopa naexanae tsane pon tajiwimonae jiwana pin. Pon antobe pexanto beyacaincha xua neantobe, bapon jopa naexanae tsane pon tajiwimonae jiwana pin. Yawa pon antobe pexantiyo beyacaincha xua neantobe bapon jopa naexanae tsane pon tajiwimonae jiwana pin. ³⁸ Matautano pon jopa awiya exana ducua nebiyaeyo pocotsiwa itoroban, tsipei jopa be peraxa exanaetsi icha be xua poxonae neichi nexata bapon jopa tajiwimonaepinyo. ³⁹ Pon naantobeya nata exana pocotsiwa bapon ichichipa bapon jopa xeinaeyo peajuntuyapuswa, po peajuntuyapuswa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan taneantobexae bapon xeinaena peajuntuyapuswa, po peajuntuyapuswa ataya tsiteca xua Nacom pia nacua beicha”, jei Jesús.

Meje yabara poxonae Jesús yabara paeba xua pocotsiwan peyabara cui matomatsiwa

(Mr 9.41)

⁴⁰ Equeicha Jesús namchi: “Pon xua paca matenta weyatane pia tana neyabara jume taenexa tsane pocotsiwa papaebiname, barapara bapon yawa neweyataneru. Barapon pon xua neweyatane, barapara matautano weyataenaru xua weyatainchi pon xua tana neitorobixae, bapon Nacom. ⁴¹ Pon cueicueijejei Nacom pia peitorobi jume diwesi, Nacom bapontha catsina pia peyabara cui matomatsiwa tsipei barapon pon barapo peitorobi jume pepaebin Nacom tanacuitatsi. Po peyabara cui matomatsiwa catatsi pon Nacom peitorobi jume pepaebin Nacom barichi tsane jupa catsina pontha pon matenta weyatane, xua matenta weyatainchi pon Nacom pia peitorobi jume pepaebin. Matauta iru pon xua pejuntu coyene xeicaein bapontha Nacom catsina peyabara cui matomatsiwa tsipei bapon xanepanaya popona Nacom nexa. Nacom barichi tsane jupa catsina pontha pon matenta weyatane xua matenta weyatainchi pon pejuntu coyene xeicaein. ⁴² Pon xua apatsina tajiwimonae jiwana pintha bequein jopa matowa apatsiyo mera xua bequein cae corotiyo xua ameneque, daichitha Nacom bapontha catsina pia peyabara cui matomatsiwa tsipei bapon tajiwimonae jiwana pin yawenatsi”, jei Jesús.

11

Meje yabara poxonae Juan pon jiwi Pebautisabin itoroba pijimonae Jesús beya, peyainyabinexa tsainchi Jesús

(Lc 7.18-35)

¹ Jesús najume weta xua pijimonae muxuwetsiya cuiduba, po jiwimonae tatsi xua doce poyobe tatsi. Bapoxonae Jesús bara weya natsixitaba xua tomarantha peponaenexa po tomaran ena barapo nacua xua jiwitha pecuidubinexa Nacom pia pexeinya jume diwesi tatsi.

² Juan pon jiwi Pebautisabin, bapon jiwi pecubi botha etatsi. Poxonae cataunxuae jiwi pecubi botha eca, bapon jume tane xua juinya Cristo exana. Bapoxonae Juan itorobabe Jesús beya ponbe pia pepuna jinompaewichi jiwana be tatsibe xua petayainyabinexatsibe Jesús beya. ³ Barapomonae Jesús yainyabatsi xua Juan najume caruta, xua jei:

—¿Metha bara xaniwaicha xam baponda, pon bewa patopaena pon Mesías? ¿Ichacuitha metha bara ichun pawunaewatan jampa? jei baraponbe xua Juan najume caruta.

⁴ Jesus jume nota baraponbe, jeye: “Papondebe, matauta Juan patsipaebarebe xuaunxuae pocotsiwa pana necui tanemebe, matautano xuaunxuae pocotsiwa pana nejume tanemebeno. ⁵ Matautano patsipaebarebe xua pomonae peitata nacutsi jiwi equeicha tane, matauta xua pomonae pejayujayujeiwi beta pona equeicha, matautano xua pomonae peperu sawichimonae equeicha peru wunaewatan, matauta pomonae xua pemuxusipanaewi equeicha muxu nasaba, matauta pomonae xua pewerapaewi equeicha asu tsane. Matauta pomonae xua peacopeibi jiwi jume tane Nacom pia pexeinya pecapanenebiyae diwesi jume. ⁶ Patsipaebarebe Juan xua xan janje: ‘Juntu coyene weiweinaena pon jopa ainya unthuthuno, pon xaniwaicha neyabara jume cowanta’, xua jan”, jei Jesús.

⁷ Poxonae Juan pia penacana jume caitorobinbe tatsi ponatababe, bapoxonae Jesús tamropata pitaba xua yabara paeba jiwitha xua Juan yabara paebatsi, jeye: “Ira xuepana susato tsurucuae nacuatha paponame. Poxonae bara beya poponame, ¿eta xua painyatsi, painya jume taetsi pebin pon ainya unthuthuto cui xeina icha be naepanaewa ichi xua saya joibo ba jubabiya caya tsaibi? Jume apara. ⁸ Bara paichim. Paponame ¿painya nejumetaenexa pebin pon peitupanae paparuwa nama xatata? Jume apara. Payaputaneme pomonae peitupanae paparuwan nama xataba, barapomonae ba jinompa pexeinya bontha pomonae jiwi itorobiya pia pepa peewatsiwixaetsi. ⁹ Jume. Jopa baxua patsiponaem xua jopa painya jume taenexa pebin pon ainya unthuthuto cui xeina, matautano xua jopa painya jume taenexa pebin pon peitupanae paparuwa nama xatata. Apra jame baxua patsiponame xua painya nejume taenexa pon Nacom peitorobi jume pepaebin. Bapon Juan bichocono peainya cuin pon Nacom pia peitorobi jume pepaebiwi jiwana pin beyacaincha ichun pon Nacom peitorobi jume pepaebin. ¹⁰ Juan bapon apra, pon yabara paebatsi Nacom Pejume Diwesitha poxonae Nacom netsipaeba, nejei: ‘Catsiwanae itorobinchi copiya pon tana nacajume carutsin.

Barapon juntu cui wunaetsina jiwi xua daxita jiwi najuntu cui wunaetsina xam nexa, xua necantenta weyataeya wabinexa poxonae patopaename’, nejei Nacom Pejume Diwesitha.

¹¹ Bara xaniyeya paca tsipaebatsi xua daxita Nacom peitorobi jume pepaebiwi pomonae Juan tsiwanaya jinompatsi bayatha, dapocotsin aibi barapomonae jiwana pon yatsicaewa peainya cuin beyacaincha pon Juan, pon jiwi Pebautisabin. Juan peainya cui diwesi yabara cueicueije po coyene xua Nacom itorobina jiwi. Ichitha po diwesi xua tamonae anoxuae paeba barapo diwesi bichocono ainya cui diwesi beyacaincha xua Juan cueicueije, bequein jiwi nanta xeina xua tamonae jopa ainya cui jiwi.

¹² “Juan pon jiwi Pebautisabin, poxonae bapon tamropata pitaba xua cueicueije Nacom Pejume Diwesi xua beya anoxuae pin bicheitomonae nejume cowanta pia penaexanaenexa Nacom piamonae tatsi. Barapomonae pichichi xua penaexanaewa Nacom piamonae tatsi pomonae Nacom itorobiya peewatsixae bequein ichamonae ayapube taexana barapomonaetha. ¹³ Daxita po petinae diwesi Nacom peitorobi jume pepaebiwi tina iruru Moisés pia peitorobi coyenewa tatsi barapo naxobe peitorobi coyenewathabe yabara tsiwunaewatan muxu dutsiya paeba. Barapo peitorobi coyenewabe yabara paeba xua bexa tsane jopaena matabi po mataqueitha xua Nacom juntu coyene itorobiya canamataxeinaena jiwi. Matapainya Juan patopa. Bapoxonae iru Nacom tamropata pitaba xua exana pocotsiwa bayatha yabara tsiwunaewatan muxu duta.

¹⁴ Icha paxam xaniwaicha paichichipame xua payabara jume cowantame xua pocotsiwa barapomonae bayatha yabara paeba, bapoxonae bara panejume cowantsiname xua paeban, xua jan: ‘Apra Juan bapon Elías pon caena bayatha tupa. Barapon apra pon

Nacom peitorobi jume pepaebin, pon bayatha Nacom yabara paeba xua bepa pinae equeicha patopaena', jan. ¹⁵ Icha pamuxu dubename moya pana nejume naitaeware pocotsiwa tapaca tsipaebiwatsi.

¹⁶ “¿Eta pocotsimonae cui jupatsi barapomonae pomonae xote jinompe pomonae Nacom jume itawetatsi? ¿Etabe juta ichi barapomonae? Barapomonae be pexui, pocotsixi panatha nabaru jinompa. Nabaru wawai tsurubenanaebiya. ¹⁷ Barapoxi nabarai, jeye: ‘Bayatha oibo paca tsimuxu obatsiba ichitha jopa panawirabim. Bayatha paca tsimuxu wecoyeichiba icha be ichi poxonae ichun tatupatsi ichitha jopa pana itanuwe jume notsim xua painya newecoyeinexaru’, jei barapoxi. ¹⁸ Juan patopa pon jiwi Pebautisabin. Bapon jopa xaeyo pan, yawa jopa apaeyo vino mera. Ichitha paxam pajam: ‘Apara Juan xeina cauri’, pajam. ¹⁹ Bapoxonae xan ponxaein Nacom Tananeitapetsin patopan. Xan pan taxaein yawa vino mera taapaein. Paxam pana neyabara paebame pajam: ‘Bapon maisa jopa juniya nabanaeyo, yawa jopa juniya apaeyo. Peatsacaewi abe peexanae jiwi pia jiton tatsi, iru pomonae paratixi pentoma notebiwi, barapomonae pia jiton tatsi’, pana neyabara jam. Nacom piamonae tatsi barapomonae tsita exana xua jiwi tsita exanatsi Nacom pia peyaputae coyeneintha tatsi. Po coyene barapomonae exana, baxua Nacom tsita pexainyei coyenetsi”, jei Jesús.

Meje yabara poxonae Jesús yabara paeba po tomaranpiwi jopa pejume cowantsiwichi (Lc 10.13-15)

²⁰ Nexata Jesús tamropata pitaba xua biatane ainya tomaranpiwi, ichaxota bayatha copiya matha matowa exana pia petsita itutsi coyenewan. Bequein Jesús baxua matowa exana, ichitha barapomonae jopa icha juntu coyene xeinaeyo xua peuraxae xua abe exana. ²¹ Daxota barapo tomaranpiwi beya, jeye: “¡Pai jaibo, Corazín tomarapiwi tsobenae! ¡Iru Betsaida tomarapiwi tsobenae! Po tsita itutsi coyenewan exanan Corazín tomaratha iru Betsaida tomarathano, ichun jopa bapana exanaeyo barapo tsita itutsi coyenewan Tiro tomaratha yawa Sidón tomaratha. Icha barapo tsita itutsi coyenewan exanaetsipa Tiro tomaratha Sidón tomarathano, barapo tomarabepiwi icha penanta xeinae coyenewatha yabara nanta pentsipa Nacomtha. Barapomonae iratha enaetsipa yawa paparuwan nama xatabichipa xua pocotsiwa be peru mapaton xua axun, yawa ipuna nacaxuebichipa pia pepontha. Barapomonae baxua exanaetsipa xua ichamonae petsita itapeinya xeinaewa tsainchi xua icha juntu coyenein Nacom petsita xeinaewatsi peuraxae abe peexanaexae bapontha. ²² Paxam pomonae Corazín tomarapiwi pam iru Betsaida tomarapiwi pam, bara xaniyeya paca tsipaebatsi. Poxonae barapo matacabi patopeicaena po mataqueitha Nacom yabara paebina daxita jiwi petsita natsicuentisix-aetsi abe petsita exanaexaetsi, Tiro tomarapiwi iru Sidón tomarapiwi daxita barapo tomarabepiwi bichocono peraxa jubebinchi. Ichitha nama paxam pomonae Corazín tomarapiwi pam, iruru Betsaida tomarapiwi pamdu, daxita paxam jopa juniya paca peraxa jubebi tsane, beyacaincha xua peraxa jubebinchi Tiro tomarapiwi iru Sidón tomarapiwi. ²³ ¡Incane iru Capernaum tomarapiwi pamdu! ¿Bara pana nanta xeiname xua paca capanenebiya tsane peitaboco beicha? Jume, apara paca itorobina petupae coyene cuiru bereca. Po petsita itutsi coyenewan painya tomaratha exanan icha bayatha barapo petsita itutsi coyenewan exanaetsipa Sodoma tomaratha, bara cataunx-uae barapo tomara ecaetsipa, xua beya anxuae tsipae. Tsipei barapomonae metha bayatha xeinaetsipa icha juntu coyene xua peuraxae xua abe exana Nacomtha. Metha bapoxonae Nacom jopa jutebichipae barapo tomarapiwi. ²⁴ Ichitha paca tsipaebatsi paxam Capernaum tomarapiwi pam, matacabi patopeicaena po mataqueitha Nacom yabara paebina daxita jiwi petsita natsicuentisix-aetsi abe petsita exanaexaetsi. Barapo mataqueitha bichocono paca peraxa jubebina, beyacaincha xua Sodoma tomarapiwi peraxa jubebinchi bichocono”, jei Jesús.

Meje yabara poxonae Jesús waba jiwi: “Anetha xan berena tapaca yawenaewa tsainchi”, jei (Lc 10.21-22)

²⁵ Bara caena bapoxonae Jesús jüntu coyene weiweina exanatsi Nacom pia Pejumope tūnaxu tatsi. Jesús namchi, jeye: “Axa peitaboco Necanamataxeinaem, yawa ira Necanamataxeinaem. Wūnae cajaintatsi tsipei jopa tsita itūbim pocotsiwa pexainyei coyenewa xan yabara pomonaetha pomonae bichocono penacuidubiwi pomonae be pinyon penatsicotaewi tsipei nanta xeina xua bichocono peyaputaewi daxita. Jame tsita itūtame barapo pexainyei coyenewa xua xan yabara pomonaetha pomonae jopa bichocono penacuidubiwi, pomonae be pexui penatsicotaewi tsipei jopa nanta xeinaeyo xua bichocono peyaputae jiwi daxita. ²⁶ Axa, baxua exaname necatsita xanepanaexae baxua”, jei Jesús Paxatha.

²⁷ Equeicha Jesús namchi pijimonaetha, jeye: “Taxa daxita necata xua pia peitorobi coyenewa tatsi, matautano xua pia peyaputae coyenewa tatsi. Dapon aibi pon xaniwaicha nejüntu cui coyene yaputane. Jame saya meisa Taxa Nacom, nejüntu cui coyene yaputane. Dapon aibi pon Taxa jüntu cui coyene yaputainchi. Saya jame meisa Taxaxae jüntu cui coyene yaputan. Matautano barichi Taxa meisa jüntu coyene yaputainchi pon saya bara copatan xua bara Taxa pejüntu cui coyene yaputaewa tsainchi. ²⁸ Anetha xan berena daxita paxam xua tapaca yawenaewa tsainchi. Daxita paxam xua pocotsiwa paca jüntu coyene natsepa exana painya abe neexanae cuiru coyene baxua paca jüntu cui coyene canapuxanaeya yabara jünteminaeinchi xua painya nenafinacaewatsinexa. Equeicha pena jüntu coyene paca cana exanaeinchi, xua painya nejüntu coyene weiweinaeya jinompaewa tsane. ²⁹ Pana necui coyene xeinare tacuidubi coyene painya nenacuidubinexam tsane yawa painya neyawenaenexa tsane xua painya necuidubiwa tsane ichamonae. Baxuan paexande tsipei xan jopa bapana jüntu cui coyene anaepanaeya tacuidubin jiwi. Matauta bapana jopa tajüntu cui coyene atsacaein. Matautano jopa pajüntu coyene deideijeya jinompaem tsane. Saya jame xanepanaeya painompaename tsipei paexanaename tacuidubi cui coyenein. ³⁰ Barapo tacuidubi cui coyenewan jopa ayapubeyo painya jüntu cui coyenetha. Bara paca itacupa xua painya neexanaewa tsane barapo tacuidubi cui coyenewan”, jei Jesús.

12

Meje yabara poxonae Jesús pijimonaetha tatsi yaboto nota trigo xu judiomonaetha barompaya pia pentaquei seicae mataqueitha tatsi

(Mr 2.23-28; Lc 6.1-5)

¹ Caentacabi poxonae judiomonaetha barompaya pia pentaquei seicae matabitha tatsi barapo mataqueitha Jesús iru pijimonaetha tatsino pabi iyiya. Jesús pijimonaetha tatsi jainpa. Barapomonaetha tamropata notarucupa xua yaboto xunumenapona trigo xu, bapoxonae pecobetha xu mata pepeta yawa xu xane. ² Poxonae fariseomonaetha cui tane xua Jesús pijimonaetha tatsi exana, bapoxonae barapomonaetha Jesús tsipaebatsi, jeye:

—Jamaisa jinya jiwimonaetha nacuita barapo matabithe poxonae yaboto nota trigo xu. Apra jiwi jopa yabara copatichi xua penacuichiwa po mataqueithe xua judiomonaetha barompaya pia pentaquei seicae matabi tatsi, jei fariseomonaetha. ³ Jesús jume nota, jeye:

—Barapo tajiwiwimonaetha jopa apra abe exanaeyo. Jopa payabara yorobim pocotsiwa bayatha David exana poxonae jainpa, poxonae iru pijimonaetha tajainpatsiru. Bapon David, pon caena bayatha israelmonaetha itorobiya pia pepa Peewatsinchi. ⁴ Bapon David iru pijimonaetha tatsi barapomonaetha Nacom pin pia botha tatsi jojoniya. David xane pan, po pan ichamonae cana exana xua Nacomtha pecatsiwatsi. Iru barapo pan David pijimonaetha cata xua pexaenexaru. Barapomonaetha xane bequein bara Nacom pia peitorobi coyenewatha copata xua saya meisa sacerdotemonaetha itacupatsi xua pexaewa tsane barapo pan. ⁵ Matautano bequein payabara yorobame Moisés pia peitorobi coyenewatha ichaxota jei: ‘Sacerdotemonaepiwi nacuita judiomonaetha barompaya pia pentaquei seicae matabitha tatsi poxonae Nacom pin pia botha tatsi duwei tauta xua petuxusi exanaenexa Nacom nexa’, jei. Apra barapo coyene jopa peabe coyenewiyo. Jiwi bara copata. Jopa cui matawentsiyo bequein bara barapo judiomonaetha barompaya

pia pentaquei seicae matabitha tatsi exana taetha. ⁶ Ichitha paca tsipaebatsi xua nama taayapusu itorobi coyenewa ainya cui beyacaincha Moisés pia peitorobi coyenewan tatsi, xuano beyacaincha barapo coyene po coyene poxonae Nacom pin pia botha exana. ⁷ Paxam jopa xanepanaeya payaputaem xua Nacom jei pejume diwesitha: ‘Ichichipan xua painya nexeinaewa tsane nantanuweya peyabara nanta xeinae unthuto xua ichamonae painya neyawenaewa tsane. Baxua jame bichocono ichichipan beyacaincha xua duwei petautsiwa xua petuxusi exanaewa xan nexa’, jei Nacom Pejume Diwesitha. Icha bayatha payaputaetsipame pocotsiwa Nacom Pejume Diwesitha paeba, bapoxonae barapo tamona jopa abe payabara paebimchipae pomona bequein bara jopa abe exanaeyo. ⁸ Xan ponxaein Nacom Tananeitapetsixae taitorobi coyene xeinan xua jiwi tacoya taitorobiwa pentaquei seicae matabitha, jei Jesús, fariseomonaetha.

Meje yabara poxonae Jesús cobe wuna exana pon pecobe mubinchi
(Mr 3.1-6; Lc 6.6-11)

⁹ Poxonae Jesús najume weta xua fariseomona tsipaebatsi, bapoxonae Jesús bara weya natsixitabiya ponataba trigo pabi weya. Bapoxonae pona judiomona pia penacae-tutsi bo tatsi beya, bapoxonaeno joniya barapo botha. ¹⁰ Barapo botha pebin eca pon pecobe mubinchi. Baxotarū fariseomona ena. Barapo fariseomona ichipa piraichi Jesús yainyabatsi xua icha Jesús jume notsina icha jumetha xua bapoxonae Jesús pecui yabara paebinxatsi jiwitha xua Jesús abe exana. Barapo fariseomonae Jesús jeichichi:

—¿Bara Moisés pia peitorobi coyene jumewatha yabara copata jampa xua pon atene bara axaibi peexanaewatsi pentaquei seicae matabitha jampa? jei.

¹¹ Jesús jume nota, jeye:

—¿Jintam metha pon paxam jiwana, pon xeina cae oveja, xua poxona jopa jutsipae icha barapo oveja muthutha tajoparecatsi? Apra bara awiya jutsipa pia ovejae bara bequein pentaquei seicae matabitha. ¹² Nama apra bichocono jiwi yabara Nacom tsita ainya cuichi beyacaincha xua oveja yabara Nacom tsita ainya cuichi. Daxota Nacom copata xua bara jiwi pexanepanae coyene exaneibina, bara bequein xua poxona pentaquei seicae matabitha taetha, jei Jesús fariseomonaetha.

¹³ Nexata Jesús barai pontha pon pecobe mubinchi jeye:

—Nacobe doire, jei.

Poxonae bapon nacobe doita, bapoxonae nainya cobe wuna tsanaya icha icha cobe ichi. ¹⁴ Bapoxonae fariseomonae Jesús weya ponarucupa xua Jesús pecui yabara paebinxatsi xua po cui coyenewatha Jesús pebexubiwa tsainchi.

Meje yabara xua Jesús peyabara tsiwuna cui paebiwatsi

¹⁵ Poxonae Jesús yaputane xua yabara cui paebatsi xua abe exana matautano xua bejubapaebatsi, bapoxonae Jesús bara weya ponataba. Matautano Jesús pinmonaeno puna poinchi. Jesús axaibi exana ducuaeibiya daxita pomona peatenewi. ¹⁶ Matauta Jesús barapomonaetha itoroba, jei: “Jopa baxua ichamonaetha pana necui yopichinde xua jiwi axaibi taexanaewa”, jei Jesús. ¹⁷ Jesús itoroba pomona xua axaibi peexanaexae xua jopa peyabara cueicueijeinexa tsainchi ichamonaetha. Baxua exana xua penayabara jume cui wetsinexa xua Isaías pejume diwesitha bayatha yabara tsiwunaeya tina Nacom nexa pon Nacom peitorobi jume pepaebin. Nacom jeye, Jesús yabara:

¹⁸ “Bapon apra pon inta nacuita, pon itapetan,
pon bichocono antobein yawa xua nejuntū
coyene weiweina exana pon.

Taitorobicaein tajumope tñaxū xua
bapon peyantsiwa tsainchi.

Bapon daxita nacuanpiwitha capona exanaena
tapexeinya jume diwesi pomonaetha pomona
jopa judiomona naexanaeyo.

Barapon barapo pexeinya jume diwesi caponaena,

xua pejume cowuntsinexa tsane pomonae poxonae
jume taibina barapo pexeinya jume diwesi xua
bapoxonae barapomonae tayabara jantemainaenexa
abe pia peexanae cuiru coyenein tatsi.

¹⁹ Matauta bapon jopa jume matsontsonobeibi tsane.

Bapon jopa namtsebiya wawai tsaibi tsane namtotha
xua jiwi bapon pejume taenexa tsaibi tsainchi, xua
bapon pejume naitawatsinexa tsaibi tsainchi.

²⁰ Pomonae jopa peajuntucoyenesuwi xua tana nejume
cowuntsiwa, bapon jopa bebai tsaibi tsane.

Barapomonae capanenebiya tsainchi.

Matautano pijimonae tatsi poxonae juntu

coyene faefaenena, jopa anaya jutebi tsane.

Bara bapon yawenaena barapomonae.

Bapon baxua exanaena xua pijimonae

yayawenaponaena beya tsane xua cui
amanayabina pia peaitafaetabi jiwichi.

²¹ Matauta daxita nacuanpiwi jiwanamonae

pomonae jopa judiomonae naexanaeyo barapomonae

bapon wnae ewatatsi xua bara bapon

barapomonae pecapanenebiwa tsainchi Nacom

beicha”, jei Nacom Jesús yabara Isaías pejume

diwesitha.

*Meje yabara poxonae Jesús baraichi xua pinae xeina Beelzebú pia peayapusu itorobi
coyenewa tatsi*

(Mr 3.20-30; Lc 11.14-23; 12.10)

²² Bapoxonae jiwi Jesús tacapatutsi pebin pon muxusipana exainchi cauri, matautano
xua itata nacuta exainchino. Bapon Jesús axaibi exana. Bapoxonae pebin muxu nasaba,
beta necota, matautano paebano. ²³ Daxita pomonae cui tane baxua, pocotsiwa Jesús
exana, daxita barapomonae yabara najuntu coyene benaecaeya najei: “Jina, ¿bapon
apara David pia pemomoxi susato jiwi jiwanapin tatsi jampa, pon Nacom yabara wnae
tsiwnaeya paeba xua pinae patopeicaena jampa?” jei.

²⁴ Poxonae baxua fariseomonae jume tane, jeye: “Bapon caurimonae itawetatsi apara
pexeinaexae Beelzebú pia peayapusu itorobi coyenewa tatsi pon caurimonae pia pe
ntacaponaein tatsi”, jei fariseomonae.

²⁵ Jesús yaputane xua fariseomonae nanta xeina poxonae natsipaeba baxua, daxota
jei fariseomonaetha: “Icha cae nacuapiwi nawepu tsatabe matauta nababe, bapoxonae
jopa xaexaenaecaeyo. Matauta iruru icha cae tomarapiwi nababe, bapoxonae jopa
xapain jinompaeyo barapo tomarapiwi. Matauta iruru icha cae bo matabuxuyomon-
aebe nababe, yawa nawepu tsatajopabe bapoxonae jopa xaexaenaecaeyo. ²⁶ Barichi
icha Satanás pijimonae tatsi nawepu tsatajopabe, matautano nababe, bapoxonae jopa
xaexaenaecaeyo. Satanás jopa itacupaetsi xua itoroba pijimonae, tsipei amsiya exana.

²⁷ Paxam pana neyabara jam: ‘Apara bapon itaweta cauri tsipei bapon xeina Beelzebú
pia peayapusu itorobi coyenewa tatsi, pon Beelzebú caurimonae pia pentacaponaein
tatsi’, pana neyabara jam. Icha baxua bara xainyei, ¿nexata eta po peayapusu itorobi
coyeneya tatsi painyamonaie itaweta cauri? ¿Iruru barapomonae itaweta cauri Beelzebú
pia peayapusu itorobi coyenewatha tatsi? Daxota painyamonaie paca yaputane xua
apara paxam panaerabame. ²⁸ Ichitha nama xan cauri itawetan Nacom pia pejumope
tunaxu tatsi pia peayapusu itorobi coyenewatha tatsi, xua barapo pejumope tunaxu
tana necatsixae pia peayapusu itorobi coyenewa. Baxua apara paca tsipaebatsi painya
neyaputaenexa xua painya xantha patopan ponxaein Nacom Tananeitapetsin.

²⁹“Dapon aibi pon itacupatsi xua botha joniya po botha pon bichocono maxu daunwei pia bo tatsi xua daxita penotsiwa tsane pocotsiwa bapon xeina pon maxu daunwei, icha jopa copiya matha maxu cutanotsiyo. Barapocotsi juta coyeneya ichin. Xan cui amanayaban Satanás daxota neitacupa xua torotsiya itawetan bapon pijimonaе tatsi pomonaе caurimonaе.

³⁰“Pomonaе jopa neyawenaeyo, barapomonaе apara inta abe exana. Barapomonaе exana xua ichamonaе jopa tana nejume cowantsiwa tsane. Barapomonaе jopa yawenaeyo xua ichamonaе nenacaetutsina tajiwiwimonaexae tsane.

³¹“Daxota paca tsipaebatsi xua pocotsiwa jiwi abe peexanae cuiru coyenein exana matautano pocotsiwa xua jiwi abe paeba, barapo coyene Nacom itacupatsi xua yabara junteinaena daxita barapo coyenein. Pon abe yabara paeba Nacom pia Pejumope tunaxu tatsi Nacom bapana jopa yabara junteinae tsane xua bapon paeba. ³²Matautano xan ponxaein Nacom Tananeitapetsin pon abe neyabara paeba Nacom itacupatsi xua bapon peyabara junteinaewatsi pocotsiwa bapon abe neyabara paeba. Ichitha pon nama bichocono abe yabara paeba Nacom pia Pejumope tunaxu tatsi, Nacom jopa bapana yabara junteinae tsane bapon, anoxuae matautano xua bexa tsane”, jei Jesús.

Meje yabara poxonaе Jesús yabara cuiduba xua pinae jiwi yaputane nae penacoichixae (Lc 6.43-45)

³³Equeicha Jesús jeye: “Icha nae po nae pexeinya nae bara nacoita po pethei pexeinya thei. Icha nae po nae peabe nae bara nacoita po pethei camatsa thei. Jiwi ba nae yaputane tsipei po nae penacoichixae. ³⁴¡Paxam pomonaе bichocono abe peexanaewi pam! Icha jomomonaе ichi xua abe exana jiwitha bara paichim, abe paexaname jiwitha. Paxam jopa paca itacupaeyo xua xanepanaeya painya nepaebiwa, tsipei pocotsiwa painya coibototha papaebame barapara baxua painya juntu coyenetha pacayabara nanta xeiname. ³⁵Pon ba pejuntu coyene xanepanaein bapon ba xua xanepana paeba, tsipei ba pejuntu coyene xeicaein. Pon ba peajuntucoyenebein bapon ba xua abe paeba tsipei ba peajuntucoyenebein. ³⁶Ichitha paca tsipaebatsi xua matabi patopeicaena po mataqueitha Nacom yabara paebina daxita jiwi penatsicuentisiwa abe peexanaexae bapontha. Barapo matabitha daxita jiwi bewa atene tsane pepaebixae po jumein jopa xanepanaeyo. ³⁷Poxonaе Nacom yabara paebina daxita jiwi penatsicuentisiwa abe peexanaexae bapontha, Nacom tsanaya tsabina pia pepaebixae jumeintha tsane. Pomonaе paxam xanepanaya papaebame ichamonaetha poxonaе cataunxae pajinompame po irathe, Nacom xuya paca yabara jei tsane: ‘Barapomonaе bara jopa abe exanaeyo’, paca yabara jei tsane. Paxam pomonaе bayatha abe papaebame poxonaе cataunxae pajinompame po irathe Nacom xuya paca yabara jei tsane: ‘Maisa barapomonaе abe pepaebiwi’, paca yabara jei tsane”, jei Jesús.

Meje yabara poxonaе pomonaе peajuntucoyenebe jiwi Jesús cui itorobatsi xua peexanaewa tsane pexeinya petsita itutsi coyenewa (Mr 8.12; Lc 11.29-32)

³⁸Nexata fariseomonaе jiwanaмonaе iruru pomonaе jiwi pecuidubiwi Moisés pia peitorobi coyene tatsi jiwanaмonaе, daxita barapomonaе Jesús cui itorobatsi, jeichichi:

—Pon jiwi Pecuidubim, paichichipan xua pata taewa tsane xua tapana netsita itutsiwam tsane cae jinya pexeinya netsita itutsi coyenewa pocotsiwa Nacom cacatsina pia peayapusu itorobi coyenewatha. Bapoxonaе paca jume cowantsinchi, jei.

³⁹Daxita barapomonaetha Jesús barai, jeye:

—Pomonaе peajuntucoyenebe jiwi iruru pomonaе jopa tana nejume cowantsi jiwi barapomonaе necui itoroba xua taexanaewa cae coyenewa tapexeinya tsita itutsi coyenewa. Ichitha jopa tsita itutsin tsane icha tapexeinya tsita itutsi coyenewa. Saya meisa exanaein icha bayatha juta coyene cana ichichi Jonás pon Nacom peitorobi jume pepaebin, pon caena bayatha tupa. ⁴⁰Nacom Jonás itorobatsi Nínive tomarapiwi beya petsipaebinexa Nacom Pejume Diwesi barapomonaetha. Jonás jopa baxua peexanaexae daxota Nacom exana xua Jonás quianaxorecatsi duwein pon pinyo. Bapon barapo pin

duwein tsijuntutha eca acoibi po matacabiyobe, matautano acoibi po merawiyobe, beya poxona equeicha yacabaxotsi xua asu popona. Barichi tsane xan ponxaein Nacom Tananeitapetsin tupaen. Bapoxonae muthutha nebotsina acoibi po matacabiyobe nexa tsane, matautano acoibi po merawiyobe nexa tsane, beya poxona equeicha Nacom asu juina neexanaena. ⁴¹ Matacabi patopeicaena po matacabitha Nacom yabara paebina daxita jiwi peperaxa exanaenexatsi penatsicuentsexae abe peexanaexae. Barapo mataqueitha Nínive tomarapiwi pomona caena bayatha jinompa barapomona abeya paca yabara paebina poxonae umenaena Nacom peitabaratha. Baxua exanaena tsipei barapo Nínive tomarapiwi icha juntu coyene xeina Nacomtha peuraxae xua abe exana caena bayatha poxonae Jonás muxuwetsiya tsipaeba barapomonaetha Nacom pia pexeinya jume diwesi tatsi. Ichitha paxam jopa bara paichim, jopa icha juntu coyene paxeinaem. Nama apara xote uncuanje ponxaein taexanaein po coyenewa pepa peainya cui coyenewa xua tacaponaewa Nacom Pejume Diwesi daxita jiwitha. Bara pocotsi coyenewa toxechiya ainya cui coyenewa beyacaincha Jonás po cui coyene exana poxonae Nacom Pejume Diwesi capona Nínive tomarapiwitha. ⁴² Matauta barapo matcabitha tsane petsiriwa, powa caena bayatha tupa, bapowa asiya uncuaena Nacom peitabaratha tatsi. Barapowa pia nacuapiwayo, po nacua pocotsiwa parowa bereca taju bereca eca. Barapowa pia nacuapiwi tatsi itorobiya pia pepa peewatsiwayo. Barapowa yabara cueicueijeji tsane pomona xua anoxuae jinompa poxonae uncuaena Nacom peitabaratha tatsi. Jei tsane bapowa: ‘Maisa pomona xua jinompa poxonae Mesías popona po irathe deque, barapomona abe bichocono peexanaewi, tsipei ajuntucoyene-faetabiya jume tane pocotsiwa Mesías cuiduba bequein Mesías bichocono peyaputaein’, jei tsane barapowa. Barapowa baxua paebina tsipei bapowa bayatha taju werena pona, pesiwa ponaenexatsi Salomón, pon caena bayatha Israel nacuapiwi itorobiya pia pepa peewatsinchi. Bapowa yaputane xua Salomón bichocono peyaputaein Nacom yabara. Daxota bapowa ichichipa xua pecuidubiwatsi xua Salomón pecuidubinexa Nacom yabara. Nama apara xote uncuanje ponxaein taexanaein pocotsiwa pepa peainya cui coyenewa xua tacuidubin Nacom yabara daxita jiwitha. Barapocotsi coyenewa toxechiya ainya cui coyenewa beyacaincha Salomón po cui coyene exana poxonae cuiduba Nacom yabara barapo petsiriwatha, jei Jesús.

Meje yabara poxonae Jesús yabara paeba cauri xua caewa nauyata pebintha
(Lc 11.24-26)

⁴³⁻⁴⁴ Equeicha Jesús jeye: “Poxona pebin wepu poinchi cauri, bapoxona cauri pona wexotha ichaxota ira tsewa pepoponaenexa tsane baxota. Ichitha poxona jopa caxinaeyo xua ichaxota pepoponaenexa bapoxonae bapon nabarai: ‘Tha caibeya ponaetsi pebin beya ichaxota bayatha wepu ponan’, jei cauri. Poxona caibeya pona cauri caxina, pebin caxinatsi xua xanepanaeya popona. ⁴⁵ Nexata equeicha cauri pona pebin weya. Pirapaeyo bapon baru patopa siete poyobe cauri pomona bichocono abe beyacaincha bapon pon copiya. Daxita barapo caurimona pebin puna jinompatsi. Anoxuae bapon nama yatsicaya bichocono abe cana exainchi beyacaincha poxonae copiya abe cana exainchi poxonae saya caein. Barichi tsane caurimona abe cana exanaena pomonaetha pomona anoxuae jinompa, pomonaetha pomona peajuntucoyenebe jiwi, icha barapo caurimona ichi poxona pebin abe cana exainchi”, jei Jesús.

Meje yabara xua Jesús pena tatsi iruru peyapin jiwi tatsino
(Mr 3.31-35; Lc 8.19-21)

⁴⁶ Jesús cataunxuae cueicueijeji tsuncuae poxona beya iru pena tatsi peyapin jiwi tatsino pata. Daxita barapomonaeyobe pesato beya umena bequein ichichipa Jesús baru cueicueijeichi canta pin bicheito. ⁴⁷ Ichun Jesús baraichi, jeye:

—Ena, iruru neyapin jiwino pesato beya umena. Bepara bequein cataei, necatsipae-binexa tsane, jei bapon.

⁴⁸ Ichitha Jesús jopa bara jume jejeyo, saya jame yainyaba bapontha, jeye:

—¿Jintam powa be taena natsicotanera? ¿Jintam pomonae be tayapin jiwi natsicotanera? jei Jesús bapontha.

Baxua Jesús caunuta pia pecuidubinexa xua peyabara caunutsinexa pomonae pia pepuna jinompaewichi.

⁴⁹ Nexata Jesús pijimonae cowai yawa jei jiwitha:

—Pomonae xua cowan apara barapomonae be taena tsicotan matautano iru be tayapin jiwi tsicotanno. ⁵⁰ Pomonae xua exana pocotsiwa Taxa Nacom itoroba, pon peitabocotha peecaenxae, barapomonae be tayapin jiwi tsicotan, matautano iru be tayapixi tsicotanno, matautano iru be taena tsicotanno, jei Jesús.

13

Meje yabara poxonae Jesús cuiduba jiwi pecayabara juta pepaebi diwesiyo xua pon peubin yabara

(Mr 4.1-9; Lc 8.4-8)

¹ Barapo mataqueitha caena Jesús bo weya pona, bapoxonae pucua itapatha ecora. ² Tsipei pin bicheito nacaetuta Jesustha daxota Jesús jeratha nontabiya yawa tsiwiyo nayana toroya bapoxonae ecoundeca. Daxita barapo pin bicheito taetabo mene itapatha umena. ³ Jesús barapo pin bicheito cuiduba pecayabara juta pepaebi diwesintha.

Cae diwesiyotha Jesús namchi, jeye: “Pebin pon peubin pontaba pia ubichi pabitha. ⁴ Poxonae pon peubin ubauya, icha xu namtotha xu othopeica. Peyapurunaewi yapata yawa xu xane. ⁵ Icha xu, xu othopeica ibowantha ichaxota ira itafafana. Barapoxonae barapo xu caena nainya xu xuwa tsipei jopa tajü xu xuwarecaeyo. ⁶ Ichitha poxonae xometo atsa tsina bapoxonae yaboto tsaquiwa yawa tupa tsipei jopa tajü tabü opina xuwarecaeyo. ⁷ Icha xu, xu othopeica ichaxota pesoiwan xuwinaena. Barapo xu yaboto nanta capanaba poxoru yawa muxuna xuwina pesoiwan. ⁸ Icha xu, xu othopeica ichaxota ira wünae. Poxonae barapo xu, xu xuwa, xu nawünaeta. Icha xun, xu nanacoitapona cien po xu matabuxyobe tsiniya. Icha xun, xu nanacoitapona sesenta po xu matabuxyobe tsiniya. Icha xun, xu nanacoitapona treinta po xu matabuxyobe tsiniya. ⁹ Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús.

Meje yabara poxonae Jesús namchi xua exua metha pecayabara juta pepaebi diwesiyo yabara jane, jei

(Mr 4.10-12; Lc 8.9-10)

¹⁰ Nexata Jesús pijimonae imoxoyo caquita umenarucupatsi yawa yainyabatsi, je-ichichi:

—¿Eta xua metha jiwitha paebame pecayabara juta pepaebi diwesin? jei Jesús pijimonae tatsi.

¹¹ Jesús jume nota barapomonaetha, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawün xeinaewa. Barapo moya peyawün xeinaewa xua jiwi jopa peyaputaewa apara xua Nacom paca cana exana xua painya nepaca itacupaewa xua painya nenaexanaewa Nacom piamonae tatsi pam, pomonae pamxaem Nacom itorobiya paca ewata. Ichitha jame ichamonae pomonae jopa nejume cowuntsiyo jopa daichichi. Nacom jopa copatsiyo xua barapomonae peyabara yaputaewa baxua. Daxota barapomonae cuiduban pecayabara juta pepaebi diwesintha xua Nacom peyabara yaputaenexatsi. ¹² Pon ba be conotha Nacom yabara yaputainchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi. ¹³ Daxota jiwitha paeban pecayabara juta pepaebi diwesintha. Baxua paeban barapomonaetha xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane. ¹⁴ Barapomonae baxua exana bayatha petsiwünae cui yabara

paebixaetsi, xua bayatha Isaías pon Nacom peitorobi jume pepaebin, petsiwuna cui yabara paebixae pejume diwesitha pocotsiwa barapomona poxona baxua exanaena.

Isaías Mesías nexa jeye barapomonaetha:

‘Xaniwaicha pana nejume taename ichitha

jopa bepayaputaem tsane xua jopa painya tana nejume cowuntsinexam tsane.

Pana necui taename ichitha xaniwaicha jopa

bepayaputaem tsane xua painya tana necui

yabara jume cowuntsinexam tsane.

¹⁵ Paxam bichocono paainya unthutom, xua

jopa painya tana neyaputaexae jiwim.

Matautano jopa xanepanaeya pajume taem tsane,

be pomona penamuxujematsi jiwi pam tsane.

Panaichaquetsiname icha be pomona peitata

nacutsi jiwi pam tsane.

Baxua paexanaename tsipei jopa bepainya tana

nejume taewam tsane, xua jopa painya

tana nejume cowuntsinexa tsane.

Yawano matauta, baxua paexanaename tsipei

jopa bepainya tana necui taewam tsane xua

jopa painya tana nejume cowuntsinexam tsane.

Matauta baxua paexanaename tsipei jopa bepainya

tana neyaputaewam tsane painya itamaiqueitontha.

Matautano jopa painya neauraxae xua abe

paexaname daxota jopa paca juntu coyene

xanepana exanaetsi’, jei Isaías barapomonaetha

xua Mesías nexa”, jei Jesús.

¹⁶ Nexata Jesús pijimonaetha jeye: “Paxam pajuntu coyene weiweiname tsipei poxona pana necui taneme pocotsiwa exanan bapoxona pana necui yaputaneme.

Matautano pajuntu coyene weiweiname tsipei poxona pana nejume taneme pocotsiwa paeban bapoxona pana nejume cowuntame. ¹⁷ Xaniwaicha paca tsipaebatsi pin

bicheitomona, pomona Nacom peitorobi jume pepaebiwi, matautano iruru pomona

pejuntu coyene xicae jiwi, pomona caena bayatha jinompa barapomona newuna

ewata xua tapatopeicaewa. Daxita barapomona bequein bichocono betaena pocotsiwa

pana necui taneme, daichitha jopa baxua taeyo. Matautano bequein bejume taena

pocotsiwa pana nejume taneme daichitha baxuan jopa nejume taeyo”, jei Jesús.

Meje yabara poxona Jesús pijimona muxu yaputane exana po diwesi xua pecayabara juta
pepaebi diwesiyo pon peubin yabara

(Mr 4.13-20; Lc 8.11-15)

¹⁸ Equeicha Jesús jeye: “Pajume taema xua paca tsipaebatsi pecayabara juta pepaebi diwesiyo xua pon peubin yabara: ¹⁹ Pomona bequein jume tane po pecuidubi coyenewa

xua Nacom tamropata pitaba xua ewatsiya itoroba jiwi, barapomona daichitha jopa

yaputaeyo barapo coyenewa. Daxota barapomona jopa xanepanaya exanaeyo icha

be pocotsi juta coyeneya ichi xua pexuton xua po xuton namto othopeica. Bara

juta coyeneya cana ichichi pomona jopa yaputaeyo tacuidubiwa. Caurimona pia

pentacaponaein tatsi barapomona omeicha bara juntu coyene weichichi tacuidubi

coyenewa daxota barapomona jopa nejume cowuntsiyo. ²⁰⁻²¹ Po xuton xua xu othopa

ibowantha, barapo xuton yabara caunuta po jiwi xanepanaya jume tane Nacom Pejume

Diwesi xuano juntu coyene weiweinaya Nacom jume cowuntatsi. Ichitha bara caeto jume

cowunta poxoru barapomona antufaetabiya jume jeba Nacom pejume diwesi pejuntu

coyeneintha. Poxona yaitama barapomona bichocono peatenexae, matautano poxona

barapomona yaitama abe petaexanaexaetsi ichamona xua pejume cowuntsixae

Nacom, bapoxona caurimona abe exana barapomonaetha xua barapomona juntu

coyene wejuntemaina exanatsi xua Nacom pecayabara juntemainawatsi. ²² Po xuton xua xu othopa pesoiwantha, barapo xuton caunuta xua pomonae Nacom Pejume Diwesi jume tane ichitha saya barompaya pia juntu coyenetha jinompa. Matautano saya u copei cayabara nanta xeina. Matautano saya exana pocotsiwa juntu coyene weiweina cana exainchi. Po coyene pebiwi exana baxuan barapocotsi juta coyene exana icha ichi xua po xuton be pesoiwantha xu othopiya. Barapo xuton jopa thei dubenaeyo. Barapocotsi juta coyeneya ichi barapo jiwi. Jopa xanepanaya Nacom tsita jinompaetsi. ²³ Po xuton xua xu othopeica peira wunaewatha, bara nacoita. Barapo xuton yabara caunuta pomonae jume tane Nacom Pejume Diwesi, matautano jume cowantano poxoru juntu coyene xanepanaeya jume tane. Matautano beta exana dubenanaebiya beya matapainya jiwi cui tane xua barapomonae bara juntu coyene xanepana Nacom peitabaratha tatsi. Bapoxonae ichamonae barapomonae jiwana beta yawena ichamonaetha icha barapo xuto ichi xua cien po xu matabuxyobe tsiniya tsopona. Matautano ichamonae barapomonae jiwana beta yawena ichamonaetha icha barapo xuto ichi xua sesenta po xu matabuxyobe tsiniya tsopona xua jume cowanta. Matautano ichamonae barapomonae jiwana beta yawena ichamonaetha icha barapo xuto ichi xua treinta po xu matabuxyobe tsiniya tsopona”, jei Jesús.

Meje yabara poxonae Jesús cuiduba pecayabara juto pepaebi diwesiyo xua trigo xu yabara xua iru baxoyo xuwina ayabo xu

²⁴ Bapoxonae Jesús equeicha cuiduba jiwi icha pecayabara juta pepaebi diwesiyo, jeye: “Yabara paca tsipaebatsi po coyene xua Nacom exanaena pon jiwi ewatsiya peitorobixaetsi. Bapon yabara paebina daxita jiwi penatsicuentisixae abe peexanaexae. Barapo coyenewa jupa, icha be pocotsi coyeneya juta ichi poxonae pebin ba ubapona pabitha peubi xuton po peubi xuton pexeinya xuton. ²⁵ Ichitha poxonae cataunxuae jiwi maitumena, bapoxonae pon pabi pexeinaein pia peitafaetabi jitontsi tapatopatsi pia pabitha tatsi. Bapoxonae bapon ayabo xu taubarecatsi ichaxoyo ubareca po pexu pexeinya xu. Poxonae nacobe weta xua uba ayabo xu, bapoxonae napitabiya ponataba. ²⁶ Poxonae trigo xu yaothopa bapoxonae iru ayabo xuwina. ²⁷ Bapoxonae pon pabi pexeinaein baraichi pomonae pia petanacuichixaetsi: ‘Pata Tanecanamataxeinaem, icha bara metha ubame po xu pexeinya xu, ¿nexata eta werena metha ayabo pona xua xuwa?’ jei. ²⁸ Pon pabi pexeinaein jume nota pomonae pia petanacuichiwiwixaetsi jeye: ‘Apara baxua inta exana pon tana neitafaetabi jiton’, jei. Bapoxonae bapon baraichi pomonae pia petanacuichiwichi, jeye: ‘¿Ichichipame xua pata ponaewa tsane bara beya pata xunaenexa barapo ayabo?’ jei. ²⁹ Ichitha bapon jume nota jeye: ‘Bara tsane itompaena tsipei icha barapo ayabo paxunaetsipame payawa xunaetsipame trigo xu. ³⁰ Bara saya yawa umenaena barapo ayabo beya abu poxonae yawa nawetsina trigo xu. Tha nexata bapoxonae itorobichi penacuichiwi xua copiya pexunaenexa barapo ayabo xua pepa cunton peexanaenexa, xua petautsinexa tsane, xua bapoxonae trigo xu pejebinexa tabohta xua trigo xu matabohta’, jei pon pabi pexeinaein”, jei Jesús.

Meje yabara poxonae Jesús cuiduba pecayabara juta pepaebi diwesiyo po peubi xutiyo pewun mostaza xutiyo

(Mr 4.30-32; Lc 13.18-19)

³¹⁻³² Equeicha Jesús jiwi cuiduba icha pecayabara juta pepaebi diwesiyo, jeye: “Nacom waba jiwi xua petanaexanaenexatsi pijimonae tatsi, pomonae itorobiya peewatsixae beya pinmonae tsopona xua pomonae jume cowantapona Nacom. Barapo coyene jupa icha be poxonae pebin ichi poxonae ubanota pabitha po peubi xuto tsica xutiyo. Barapo xuto xuwa beya pin nae tsopona. Barapo nae pepinnaexae daxota siri pemaxuranantha coton exana”, jei Jesús.

Meje yabara poxonae Jesús cuiduba pecayabara juta pepaebi diwesiyo xua levadura yabara xua pan cotowa exana

(Lc 13.20-21)

³³ Jesús equeicha cuiduba jiwi icha pecayabara jũta pepaebi diwesiyo, jeye: “Poxonae Nacom waba jiwi petanaexanaenexatsi pijimonae tatsi pomonae itorobiya peewatsixae barapomonae pin bicheitomonae naenaexanapona. Barapo coyene bara jũta ichi, icha levadura matawũn ichi pocotsiwa cotowa exana poxonae pan exana. Petsiriwa tres po tsoropabe trigo xu beno muxuna cauyentaba levadura matawũn pocotsiwa xua cotowa exana pan. Bapoxonae pentũbũ naexananaya cocotowapona tsipei levadura matawũn muxunaxuba”, jei Jesús.

Meje yabara poxonae Jesús cuiduba jiwi pecayabara jũta pepaebi diwesixitha (Mr 4.33-34)

³⁴ Jesús cuiduba jiwi daxita barapo coyenein xua xuan saya Ʃ pecayabara jũta pepaebi diwesixitha. Jesús jopa cuidubeibiyo poxonae jopa paebeibiyo pecayabara jũta pepaebi diwesixitha. ³⁵ Bara barapo coyeneintha Jesús cueicueijeji xua penayabara jume wetsinexa xua bayatha pon Nacom peitorobi jume pepaebin pecui yabara wũnae tsiwũnaeya paebixae, xua jeye:

“Jiwitha tsipaebin pecayabara jũta pepaebi diwesintha. Mataũtano muxuna yabara tsipaebin pocotsiwa moya yawũn xeina xua jiwi jopa peyaputaewa, po coyene caena bayatha moya yawũn xeina xua poxonae aena Nacom forota po cae pin nacuathe xua pocotsiwa beya anoxuae tsoponae”, jei bapon xua saya Jesús tapaebatsi.

Meje yabara poxonae Jesús pijimonae yaputane exana po pecayabara jũta pepaebi diwesiyo xua ayabo yabara

³⁶ Nexata Jesús napeyaba pin bicheito jiwimonae. Bapoxonae botha joniya. Irũ baxota Jesús pijimonae tatsi barapo botha najojoniyarũ. Jesús pijimonae baraichi, jeye:

—Yabara pana neyaputane exande po diwesiyo xua ayabo po ayabo xuwa trigo pabitha, jei.

³⁷ Nexata Jesús namchi, jeye: “Pon Ʃba po xuton pexeinya xuton, trigo xuton jan, bapon apara bara xan ponxaein Nacom Tananeitapetsin. ³⁸ Mataũtano po pabitha ichaxota Ʃba jan, apara jiwi pia jũntũ coyenein yabara caunutan. Pocotsi xuton xua yabara caunutan xua pexeinya xuton jan, apara yabara caunutan pocotsi jiwimonae xua patsina Nacom pia peitorobi nacua beicha tatsi. Po xuto peabe xuton, po xuton ayabo xu jan, apara yabara caunutan pocotsi jiwimonae caurimonae pia pentacaponaein tatsi pijimonae tatsi. ³⁹ Pon Ʃba po xuton abe xua ayabo xu jan, apara bapon caurimonae pia pentacaponaein tatsi yabara caunutan. Xua bayatha xu naweta jan, apara yabara caunutan, po mataqueitha xua Nacom daxita nacui wetsina. Mataũtano barapo matabitha Nacom yabara paebina jiwi penatsicuentiwa abe peexanaexae bapontha. Pomonae xua trigo xu, xu siraca jan, apara yabara caunutan matatsunpiwimonae. ⁴⁰ Copiya matha xuexuetapona ayabo petautsinexa isototha. Jiwi bara jũtiya ichainchi po matabitha tsane Nacom daxita yabara paebina jiwi penatsicuentiwa abe peexanaexae bapontha. Mataũtano barapo cae pin nacue weraweracaena. ⁴¹ Xan ponxaein Nacom Tananeitapetsin itorobin tamatatsunpiwi xua jiwi penotsinexa tsainchi pomonae abe peexanaewi, pomonae xua cana exana ichamonaetha xua ichamona xuya irũ abe peexanaenexarũ. Barapo matatsunpiwi wenotsina pomonae abe peexanaewi pomonae tajiwiwimonae barũ jinompatzi. Barapo abe peexanaewi jopa tamonaeyo pomonae itorobiya taewatsixae. ⁴² Daxita barapo jiwi pomonae abe peexanaewixae bebai tsainchi, matatsunpiwi bebai tsane ichaxota isoto jopa itacounayiyo ataya. Baxota daxita jiwi wecoyei tsane mataũta baxota nantanuweya nantũ jayabina, poxoru bichocono atene tsane. ⁴³ Bapoxonae pomonae exana pocotsiwa Nacom ichichipa barapomonae bichocono pexeinya coicha xeinaena po nacuathe ichaxota Nacom itorobiya ewata piamonae pon barapomonae pia paxaxae tatsi. Po pexeinya coicha xua barapomonae

xeinaena, bichocono itupana icha be xometo ichi xua poxonae pentha. Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús.

Meje yabara poxonae Jesús pecayabara juta pepaebi diwesiyo paeba xua po peitupanaewa pocotsiwa bichocono ainya matoma xua ira buxupanatha boca panatha

⁴⁴ Equeicha Jesús namchi, jeye: “Yabara paca tsipaebatsi po coyene xua Nacom exana, pomonaetha pomonae pejuntũ coyene canamataxeinaexae pon jiwi itorobiya pia pepa peewatsinchi. Barapo coyene bara juta ichi, icha be pocotsiwa peitupanaewa ichi pocotsiwa ainya matoma xua ira buxupanatha boca pabitha. Poxonae pebin barapo peitupanaewa jemeicha ira buxupanatha namicha taebota, bichocono tsorobotha matatsaebota, bichocono peichichipaexae baxua. Jopa muxu tsipaebiyo ichamonaetha. Bichocono juntũ coyene weiweina. Bapoxonae pia botha pona pecaenaetsinexa daxita xua xuan pocotsiwan xeina. Bapoxonae barapo paratixitha comota barapo pabi, po pabitha boca barapo peitupanaewa. Bewa barichi jiwi. Bewa jiwi bichocono beita cui jichatsi xua pexeinaewanexa tsane barapo peajuntuyapusuwa, icha poxonae pebin ichi xua pitapeitupanaewatsi piraichi daxita caenaeta pocotsiwan xeina”, jei Jesús.

Meje yabara poxonae Jesús cuiduba jiwi pecayabara juta pepaebi diwesiyo xua po warowa pewun perla

⁴⁵ Equeicha Jesús namchi, jeye: “Barichiru yabara paca tsipaebatsi po coyene xua Nacom exanaena pon jiwi ewatsiya peitorobixaetsi po coyene bichocono wanae. Barapo coyene bara juta icha be ichi poxonae jiton warowan matowa jeita. Barapo warowan xua bapon jeita, pewun perla. Bapon jeita pecomotsinexa tsane barapo warowan, po warowan ainya matoman. ⁴⁶ Poxonae bapon cae warowaxuto taebota, po warowaxuto perla matawun xua bichocono ainya matoma, bapoxonae bapon pia botha pona matauta bapoxonae caenaeta daxita xua xuan pocotsiwa xeina. Bapoxonae comota po warowa bichocono ainya matoma, po warowa pewun perla. Bewa barichi jiwi. Bewa jiwi bichocono beita cui jichatsi xua pexeinaenexa peajuntuyapusuwa po peajuntuyapusuwa ataya tsiteca, icha poxonae pebin ichi xua pitaperlatsi piraichi daxita caenaeta pocotsiwan xeina”, jei Jesús.

Meje yabara poxonae Jesús cuiduba jiwi pecayabara juta pepaebi diwesiyo xua pecayamonaewa yabara

⁴⁷ Equeicha Jesús namchi, jeye: “Yabara paca tsipaebatsi po coyene xua Nacom exana pon jiwi ewatsiya peitorobixaetsi xua poxonae yabara paebina jiwi penatsicuentisixae abe peexanaexae. Barapo coyene bara juta ichi, icha be pocotsiwa xua xota jiwi yacamona duwei ichi. Jiwi peyacamonaewa xoya pepa mar mentha xua daxita duweimonaein tunto pecapirenaenexa. ⁴⁸ Poxonae bichocono wuncaxuba xua peyacamonaewa pomonae peyaxunubiwi taetabo bejutaboreca. Bapoxonae enoundeca, xua naitaubiya tsana pejehebaponaenexa. Po duwei pepa duwei tsana naitaubiya jehebapona corotontha. Po duwei pocotsiwa camatsawan bebai tsoponae. ⁴⁹ Barapocotsi juta coyeneya ichi tsane poxonae matabi patopeicaena, po mataqueitha xua poxonae nacua weraweracaena, matautano Nacom daxita yabara paebina jiwi penatsicuentisixae abe peexanaexae bapontha. Bapo mataqueitha matatsunpiwi patsicaena xua daxita jiwi petsabinexa tsainchi, pomonae abe peexanae cuiru coyenein peexanae jiwi tsana nobinchi xua pomonae xanapanaya peexanae jiwi pia xainya weya tatsi. ⁵⁰ Pomonae abe peexanae cuiru coyene peexanae jiwi bebai tsainchi isototha ichaxota jopa ataya itacounayiyu. Baraxota wecoyeyi tsane matautano baxota nantanuweya nantũ jayabina”, jei Jesús.

Meje yabara poxonae Jesús cuiduba jiwi pecayabara juta pepaebi diwesiyo xua pena peitupanaewa yawa xua peru peitupanaewa yabara

⁵¹ Nexata Jesús pijimonaenexa yainyaba, jeye:

—¿Bara daxita baxuan payaputaneme xuaunxuae paca tsipaebatsi? jei.

Barapomonaē Jesús jume notatsi:

—Aa, bara payaputan pocotsiwa xuaunxuae pana netsipaebame pon pata Tanecana-mataxeinaemxaem, jei barapomonaē.

⁵² Bapoxonaē Jesús pijimonaetha namchi, jeye:

—Pomonaē pecuidubiwi Nacom pia peitorobi diwesi pomonaē tamonaexae bara-pomonaē yabara cuiduba ichamonaetha xua po coyene Nacom exana pon itorobiya peewatsin jiwi. Barapomonaē xeina ainya diwesi coyenewabe, po diwesi xua xan yabara, peru diwesi poxonaē cataunxuae aibin tsica po cae pin nacuathe tsique yabara. Matautano xeina pena diwesi poxonaē xua anoxuae poponan yabara. Barapo ainya diwesi coyenewabe barapomonaē paeba jiwitha. Barapomonaē bara be jūta ichi icha be poxonaē pon bo pexeinaein ichi. Poxonaē piamonaē tatsi nantawenona paparuwa yawa pexaewa, bapon baxua bara cata pijimonaetha, poxoru bapon jeba xua peruwa yawa xua penawa piamonaē nexa, jei Jesús.

Meje yabara poxonaē Jesús Nazaret tomaratha popona
(Mr 6.1-6; Lc 4.16-30)

⁵³ Poxonaē Jesús najume weta xua cuiduba jiwi barapo pecayabara jūta pepaebi diwesixi bapoxonaē Jesús tomara weya pontaba. ⁵⁴ Bapoxonaē Jesús patopa pia tomaratha, po tomara pewun Nazaret tomara. Baraxota Jesús cuiduba jiwi, judiomonaē pia penacaeutsi botha tatsi. Pomonaē jinompa Nazaret tomaratha yabara najuntū coyene cabenaeca xua pocotsiwa Jesús cuiduba. Barapomonaē natsipaeba, najei:

—¿Exota metha bapon nacuiduba jane, xua daxota bapon daxita peyaputaēin? ¿Jintam metha pia peayapusuwatha tatsi jane, poxonaē po petsita itutsi coyene bapon exana?

⁵⁵ Aparā saya bapon pexanto tatsi pon xua pecobe coxonaēin xua naepan pematabobiwa. Aparā bapon pena tatsi María. Aparā bapon Santiago pentapin tatsi, irū José pentapin tatsi, irū Simón pentapin tatsi, irū Judas pentapin tatsitū irū. ⁵⁶ Matautano irū pamcho jiwi tatsi aparā jinompa barapo tomarathe. ¿Exota metha bapon nacuiduba jane, pocotsiwa xua beta naca cuiduba? jei barapomonaē.

⁵⁷ Daxota barapomonaē Jesús casebatsi pecui uwixaetsi. Barapomonaē uwa tsipei Jesús bichocono peyaputaēin. Jesús namchi jiwitha, xua nayabara paeba, jeye:

—Daxita jiwi ba barū cui itura jina pontha pon Nacom peitorobi jume pepaēbin. Nama pia nacuapiwi tatsi irū pia bomonaē matabuxuyomonaēpiwi tatsi barapomonaē ba jopa bapon barū cui itura jinaetsi, jei Jesús, xua nayabara paeba.

⁵⁸ Nazaret tomaratha, barapo tomaratha Jesús saya be conotha exana pexeinya petsita itutsi coyenewan tsipei barapo tomarapiwi Jesús jopa jume cowuntichi.

14

Meje yabara poxonaē Juan bexotsi
(Mr 6.14-29; Lc 9.7-9)

¹ Bapoxonaē caena Herodes pon Galilea nacuapiwi, pia peyanacua ewatsinchi, bapon jume tane daxita pocotsiwa juinya xua Jesús exana. ² Herodes tsipaeba pomonaē petanacuichi-wixaetsi pia botha tatsi, xua Jesús yabara paebatsi. Herodes Jesús catsawiya yabara paebatsi, jeye: “Aparā bapon Juan, pon jiw i Pebautisabin, pon bequein bayatha tūpa, pon equeicha asū juina. Tsipei bapon peayapusū itorobi coyenewa xeina daxota petsita itutsi coyenewa exana”, jei Herodes.

³ Baxua Herodes paeba tsipei caena bayatha Herodes cui itoroba xua Juan pe-waetabinexatsi, matautano xua pemaxū cabinexatsi, matautano xua jiwi pecūbi botha peetsinexatsi. Baxua Herodes exana tsipei piowa tatsi powa pewun Herodías, pia coutha baxua peichichipaexae. Barapowa copiya Felipe xeina pon Herodes peweicho tatsi. Herodes peweicho yacaiba yabūyo. ⁴ Juan bayatha paeba Herodestha, jeye: “Nacom pia peitorobi coyenewa jopa copatsiyo xua nexainaewa bapowa tsipei ichan piowa tatsi”, jei Juan.

⁵ Daxota Herodes bichocono anaepana. Herodes ichichipa xua Juan pebexubiwatsi. Daichitha Herodes jopa baxua exanaeyo tsipei junuwa, jiwi cunuwatsi. Tsipei daxita jiwi nanta xeina xua Juan apara pon Nacom pia peitorobi jume pepaebin. ⁶ Ichitha poxona Herodes yantacabi jopa po matabitha poxona caena bayatha nowaeuncua, barapo mataqueitha pinmonae nacaetuta xua pexaewa yabara nacaetuta pia xaetsi. Barapo penacaetutsiwi peitutha tatsi Herodías pexantiyo tatsi nawiraba. Herodes baxua bichocono ita cui xanepanatsi. ⁷ Herodes barapowa beya paeba, jeye:

—Nacom peitutha cata tsiwūnae yabara paebatsi xua pocotsiwa tacacatsiwa tsainchi pocotsiwa xua tana newūcaewam tsane tsipei inta pexeinya penawirabi coyene exaname, jei Herodes.

⁸ Bapoxona pocotsiwa pena itorobatsi barapowa Herodes wūcatsi baxua. Bapowa namchi, jeye:

—Necare Juan pentasipa xua yūtabore paratontha, pon jiwi Pebautisabin matasipa, jei Herodías pexantiyo tatsi.

⁹ Ichitha baxua Herodes jume taya wecoyei tsanareca poxoru jopa ichipaeyo xua Juan petūpaewa tsane. Tsipei mexeya poxoru bayatha Nacom peitutha peyabara tsiwūnae paebixae xua bepa pinae catsina xua pocotsiwa pewūcaewaxae tsainchi, matautano mexeya poxoru barapo pin bicheitha peitutha pepaebixae baxua, daxota itoroba xua bapowa bara catinchi baxua. ¹⁰ Daxota Herodes pomona petanacuichiwiwaetsi, barapomona Herodes cui itoroba xua Juan pewisi ucuibinexatsi jiwi pecūbi botha iya. ¹¹ Bapoxona barapomona paratontha matasipa yūtabota yawa carendena. Bapoxona Herodías pexantiyo tatsi catatsi, equeicha barapowayo xuya pena cata, Herodías catatsi, xua peyaputaenexa xua bara cou Juan bayatha tūpa.

¹² Nexata pomona Juan pia pepuna jinompaewichi, barapomona pata jiwi pecūbi botha. Juan petūpaein pitatsi. Barapoxona barapomona Juan mūthūtha xotsi. Barapoxona barapomona pona Jesús beya xua baxua Jesús peyabara tsipaebinexatsi.

Meje yabara poxona Jesús apata pexaewa cinco mil pebiwi

(Mr 6.30-44; Lc 9.10-17; Jn 6.1-14)

¹³ Poxona Jesús yaputane xua Juan tūpa, bapoxona compa jeratha pona icha muxunene beya ichaxota jiwi ajibi. Ichitha jiwi yaputane xua ichaxota Jesús pona. Daxota pinmonae xua carepaya tomanpiwi pecae iya pona, ichaxota Jesús ponaena jeratha. ¹⁴ Poxona Jesús jera wenontounya, bapoxona Jesús pin bicheito tane. Jesús yabara nanta xeina barapomona xua peyawenaewa tsane. Bapoxona Jesús axaibi exana peatenewi. ¹⁵ Tsipei yaitama bayatha tabopiya tsanaichaba, daxota Jesús imoxoyo caquita umenarūcupatsi pijimona. Barapomona Jesús baraichichi, jeye:

—Apara bayatha tabopiya tsanaicha. Apara xote bomūxūn ajibi. Barapo jiwi itorobare bū tsiqui tomaraxi beya ponaena xua pecomocaenexa pexaewa xua pexaenexa, jei.

¹⁶ Jesús jume nota pijimona, jeye:

—Apara jopa bewa pona barapomona, paxam jame maisa paapare pexaewa, jei.

¹⁷ Jesús jume notatsi pijimona, jeye:

—Xote jopa pexaewa paxeinaeyo. Saya apara cinco po panyobe paxeinan matautā saya ainyobe paxeinan duweiyobe, jei.

¹⁸ Jesús jume nota:

—Painta xawena baxua, jei. ¹⁹ Bapoxona Jesús najume caitoroba xua bepa daxita barapo jiwi iratha taenaetsei. Bapoxona Jesús pecobetha pita cinco po panyobe yawa xua barapo duweiyobe xua ainyobe. Jesús peitaboco benecoicha yawa Nacomtha tsipaeba, jeye: “Axa, jūntū coyene weiweinan xua pexaewa pata tanecatxiwaxaem”, jei. Poxona Jesús najume weta xua Paxatha tsipaeba, bapoxona pan epa janaca, yawano duwei epa janaqueba. Bapoxona Jesús pijimona caitoroba pexaewa xua pijimona tatsi xuya pecatataponaenexa barapo jiwi. ²⁰ Daxita barapo jiwi nabane beya barapo jiwi jain cowūntarūcupatsi. Bapoxona Jesús pijimona tatsi doce po cote

matabuxuyobe wunba xua bayatha nacopaba pocotsiwa xua bayatha barapo jiwi jopa xaeyo petonsanaexae. ²¹ Pomonae xua pexaewa nabane barapomonae cinco mil pebiwi. Yabuxino iru nanabane. Matautano pexuino iru nabane. Daichitha jopa ununaetsi pexui matauta yabuxi jopa ununaetsi.

Meje yabara poxonae Jesús mene matatsun jumatha pona
(Mr 6.45-52; Jn 6.16-21)

²² Nexata bapoxonae Jesús jera beitorobiya pijimonae, xua pijimonae copiya pet-siwana warapaenexa tsainchi icha muxunene beya xua pucua iya. Poxonae barapomonae ponarucupaba bapoxonae Jesús barapo jiwi pu itoroba xua penawibiyaenexa pia tomaran beya. ²³ Bapoxonae Jesús demxuwa beicha pona xua baxota compa petsipaebinexa Nacomtha. Poxonae quirei tsuxubi Jesús demxuwatha compa eca. ²⁴ Poxonae Jesús Paxa tsipaebauya, bapoxonae caena iruru Jesús pijimonae tatsi cataunxuae tuwutha yana pona. Jera maratsaca caewa carena tsaibi tsipei joibo dawerena daunwei. ²⁵ Mataquei wunaeyo Jesús mene matatsun jumatha pona, pijimonae itiya pona. ²⁶ Poxonae Jesús pijimonae taerucupatsi, barapomonae nanthuthu cui coyene nabenaeca. Junuwiya wawaya jeye:

—¡Pai jaibo, jina! ¡Apara dowatsi! jei barapomonae.

²⁷ Jesús pijimonaetha caena nainya tsipaeba, jeye:

—¡Apara xan! ¡Jopa pajunuwinde! ¡Maisa pajuntu coyene weiweinare! jei Jesús.

²⁸ Bapoxonae nexata Pedro Jesús baraichichi, jeye:

—Tanecanamataxeinaem, icha bara metha xam yatsicaewa bapom, moya neitorobare xua mene matatsun juma ta-iyenexa nexainya beya, jei Pedro.

²⁹ Jesús jume nota, jeye:

—¡Moya anetha denande! jei Jesús.

Nexata Pedro mene matatsun juma nontabiya dunareca jera wereca. Bara Pedro mene matatsun juma iya pona pepatopaenexa Jesús pia xainya beya tatsi. ³⁰ Daichitha poxonae Pedro yabara nanta xeinanareca pin joibo, bapoxonae bichocono junuwanareca. Daxota bapoxonae Pedro yamene jopareca. Bapoxonae Pedro jume daunweya wawaya jeye:

—¡Tanecanamataxeinaem, necapanepare, nepitaxuina! jei.

³¹ Bapoxonae Jesús nainya cobe pitaxuina. Jesús namchi, jeye:

—¡Maisa be conotha neyabara jume cowantame xua bara tana neitacupaewa xua tacayawenaewa tsainchi! ¿Eta xua metha ainya juntu coyeneintha nanta xename? jei Jesús.

³² Poxonae Jesús iru Pedro nontabiyabe jeratha, Jesús bapoxonae joibo yainjei tsanaya exana. ³³ Daxita pomonae jeratha ena, barapomonae Jesús wnae jaintatsi. Barapomonae Jesús baraichi, jeye:

—Bara yatsicaya apara xam Nacom Pexantom tatsim, jei barapomonae.

Meje yabara poxonae Jesús axaibi exana pomonae peatenewi, pomonae Genesaret nacuapiwi
(Mr 6.53-56)

³⁴ Bapoxonae Jesús iru pijimonae tatsi jeratha yana enapona beya poxonae Genesaret nacua beya pata. ³⁵ Pomonae baxota jinompa, barapomonae Jesús caena yaitainchi. Daxota barapomonae najume caitoroba ichamonaetha daxita barapo Genesaret nacuapi-witha beya, xua Jesús pepatopaexae. Bapoxonae daxita jiwi carendena peatenewi ichaxota Jesús pucua itapatha uncua. ³⁶ Barapomonae pomonae peatenewi Jesús jume daunweya wucatsi, xua Jesús bara pecui copatsinexa xua bara petajayabinexatsi pia paparuwa tatsi xua peopirawa. Bapoxonae daxita barapomonae axaibi tsane. Pomonae Jesús pia paparuwa tajayabatsi daxita barapomonae equeicha axaibi exanatsi pocotsiwa bayatha atene.

15

Meje yabara poxonae Jesús yabara paeba xua pebin abe pia peexanae cuiru coyene juntu
coyene webocatsi

(Mr 7.1-23)

¹ Fariseomonaе iru pomonaе jiwi pecuidubiwi Moisés pia peitorobi coyene tatsi, barapomonaе jiwana Jerusalén tomara werendena. Barapomonaе Jesús imoxoyo caquita umenarucupiya yainyabatsi, jeye:

² —¿Eta xua metha jinyamonaе jopa exanaeyo xua pocotsiwa wamo susato jiwi pia peitorobi cui coyenewatha itoroba? Barapomonaе pomonaе jinyamonaе barapo cui jopa exanaeyo. Barapomonaе jopa matha tsiwanaya nacobe quiateibiyo poxonaе beya xaiba xua jopa penataxobinexa tsane pia juntu coyenewantha, jei daxita fariseomonaе, iruru pomonaе jiwi pecuidubiwi Moisés pia peitorobi coyene tatsi.

³ Nexata Jesús xuya yainyaba, jeye:

—Iruru paxamdu, ¿eta xua metha jopa paexanaem pocotsiwa Nacom Pejume Diwesitha itoroba? ¿Eta xua metha saya meisa paexaname pocotsiwa painya amo susato jiwi pia peitorobi cui coyenewantha tatsi itoroba? ⁴ Jopa bewa paexanaem tsane painya amo susato jiwi pia peitorobi coyenewa tatsi po peitorobi coyenewa paca tsita ainya cui bichocono beyacaincha xua Nacom Pejume Diwesi. Tsipei Nacom Pejume Diwesitha jeye: ‘Axatha baru cui itura jinare, iruru enatha baru cui itura jinare’, jei Nacom. Yawa equeicha Nacom jeye: ‘Pon paxa abe yabara paeba matautano xua pena abe yabara paeba, bapon bewa tupaena’, jei Nacom Pejume Diwesitha. ⁵⁻⁶ Ichitha paxam ba papaebame xua pinae pebin ba itacupatsi xua pepaebiwa xua pejeiwa paxatha yawa penatha: ‘Jopa neitacupaeyo xua tapaca cayawenaewatsi bara bequein paacopeibim, tsipei daxita pocotsiwa xeinan baxua yabara tsiwunaе paeban xua Nacomtha bexa catsin’, xua pejeiwa. Matautano ba pajam: ‘Pon bapocotsiwa paeba, jopa nantawenonaeyo xua paxa yawenaena. Matauta jopa nantawenonaeyo xua pena yawenaena bara bequein acopeibi taetha’, ba pajam. Poxonaе baxua pacaunutsiya paebame paxam pacana exaname xua painya amo susato jiwi pia peitorobi cui coyenewa tatsi bichocono ainya cui coyene, beyacaincha xua Nacom Pejume Diwesi xua ainya cui coyene. ⁷ Itara mexeya pomonaе xanepanaeya pepaebi jiwi pam, daichitha apara peajuntucoyenebe jiwi pam! Bara apara Isaías caena bayatha xaniwaicha paca yabara paeba pon Nacom peitorobi jume pepaebin. Bapon paca yabara jeye poxonaе tina pejume diwesitha:

⁸ ‘Barapomonaе itara be xanepanaeya neyabara
paebina jiwitha xua pinae neyabara
baru cui itura jina.

Daichitha barapomonaе pia juntu
coyenewatha jopa xaniwaicha neyabara
baru cui itura jinae tsane.

⁹ Bequein barapomonaе newunaе jainteibina
poxonaе nacaetuteibina, daichitha baxua jopa
yawenaе tsaibi tsainchi tsipei barapomonaе
peajuntucoyenebewi.

Matautano tsipei po peitorobi coyenewa
cuidubina jiwitha, apara jopa taitorobi
coyenewiyo tsane, apara xua saya jiwi
barompaya pia peitorobi coyenewa tatsi tsane’,
jei Isaías xua paca yabara paeba, jei Jesús.

¹⁰ Nexata bapoxonaе Jesús waba daxita jiwi xua imoxoyo peumendenaenexa. Yawa namchi barapo jiwitha, jeye:

—Pana nejume naitaware, painya neyaputaenexa pocotsiwa paca tsipaebatsi.

¹¹ Pocotsiwa ba pebin pecoiboto deca tsijain jojonecatsi pexaewan, bequein jopa tsiwunaeya matha nacobe quiatsiyo poxonaе xaiba, barapo coyene apara ba jopa bapana

pebin jũntũ coyene taxobichi xua poxonae pocotsiwa pexaexae. Jame pocotsiwa ba pebin peçoibototha caunuta, xua peabe jume barapo jume coyene apara pebin jũntũ coyene taxobatsi xua poxonae pecueicueijeixae baxua, jei Jesús.

¹² Nexata Jesús imoxoyo caquita umenarũcupatsi pijimonae. Jesús pijimonae yainya-batsi, jeichichi:

—¿Bara yaputaneme xua fariseomonaе cayabara muxu coniquiya anaepana, xua nepaebixae baxuan? jei.

¹³ Jesús jume nota pijimonae, jeye:

—Taxa pon peitabocotha peecaexae xubina pon jopa pejume cowũntsinchi. Taxa barapocotsi jũta coyeneya cana ichi tsane jiwitha icha pebin ichi xua poxonae pabitha pona, mataũta poxonae naeyo tabũ opina jonta daxita, pexubinexa. ¹⁴ Bara barabũ neyabara muxuconacaena, fariseomonaе. Jopa payabara jume naitaewatsinde pocotsiwa barapomonaе paeba. Tsipei barapomonaе jopa xanepanaya peyawenaе jiwi ichamonaetha. Barapomonaе barapocotsi jũta coyeneya exana, icha be pon peitata nacũtsin ichi, xua poxonaе matacapona ichũn xua pon peitata nacũtsin matacapoinchi. Bapoxonaе barapo cae peitata nacũtsinbe napuna joparecabe mũthũtha deca, jei Jesús.

¹⁵ Nexata Pedro Jesús baraichi, jeye:

—Yabara pana yaputane exande po pecayabara jũta pepaebi diwesiyo xua pexaewa yabara, jei Pedro.

¹⁶ Jesús biataeya jume nota pijimonae, jeye:

—¿Paxam bara paichimdũ icha jiwi ichi? ¿Cataunxuae jopa painya yaputae jiwi pamdũ? ¹⁷ Bayatha paxam payaputaneme pocotsiwa pebin tsijain jojonecatsi pexaewa peçoiboto deca baraxua jopa jũntũ coyene taxobichi, tsipei barapo pexaewa jopa ponaeyo pia jũntũ coyenewatha. Jame barapo pexaewa peçotsorotha pona, bapoxonaе nawexacaeca. ¹⁸ Ichitha pocotsiwa peçoiboto tsina caunuta peabe jume, baxua apara seicaya pejũntũ coyene wetsina jume pichapa. Tsipei baxua penanta xeinae coyenewa, daxota pebin abeya paeba. Daxota Nacom tsitatsi xua bapon peajũntũcuicoyenebein Nacomtha. ¹⁹ Tsipei pejũntũ coyene wetsina jume pichapa pocotsiwa abeya penanta xeinae coyenewan, pocotsiwe meje: Ichũn anaya pebexotsi coyenewa, irũ ichũn piseuri tatsi pepichi coyene, irũ peita coxanae coyenewatsi coyene xua poxonaе penayaputae jiwi naperũ nacoyoba, irũ ichũn piawa tatsi pecaibi coyene, irũ ichũn yabara penaerabiwatsi coyene, irũ ichũn yabara peaebi watsi coyene. ²⁰ Nacom tsitatsi xua daxita barapocotsi coyenein pebin ajũntũcoyenebe exanatsi xua jũntũ coyene taxobatsi xua daxota jopa itacũpaetsi xua beta exana. Ichitha pocotsiwa pebin nabane mataũtano xua poxonaе bequein tsiwanaya matha jopa nacobe quiatsiyo, barapocotsi coyenein pebin jopa jũntũ coyene taxobichi Nacom peitũtha tatsi, jei Jesús.

Meje yabara poxonaе yabũyo powayo penanapaincha poponaewayo Jesús jume cowũnt-tatsi

(Mr 7.24-30)

²¹ Nexata bapoxonaе Jesús barapo ira weya warapa Genesaret nacua weya. Mataũtano pona icha nacua beya po nacuatha ichaxota Tiro tomara eca yawa Sidón tomara ecano.

²² Yabũyo, powayo barapo cananeamonaewayo patopa Jesús pia xantha tatsi. Bapoxonaе barapowa wawaya Jesustha jeye:

—¿Tanecanamataxeinaem, David pia pemomoxi susato jiwi jiwanam! Neyabara najũntũ cui coyene cananta xeinare, xua tana neyawenaenexam tsane. Taxantiyo inta cauri xeina; inta bichocono atene exanatsi, jei bapowa.

²³ Daichitha Jesús jopa jume notsiyo, saya moya uncua. Nexata bapoxonaе Jesús imoxoyo caquita umenarũcupatsi pijimonae. Mataũtano jume daunweya baraichichi pijimonae, jeye:

—Barapowa itawere, tsipei barapowa waputha jume daunweya wawai, jei.

²⁴ Nexata Jesús jume nota pijimonae, jeye:

—Nacom meisa saya neitoroba Israel piamonae susato saineiwitha pomonae judiomonae xua tayawenaenexa barapomonae, tsipei barapomonae Nacom tsitatsi xua barapomonae nacabeta icha be ovejan ichi xua poxonae pipato napuxanompa, jei.

²⁵ Ichitha barapowa pentabocotha uncua yawa irabe taeuncuareca Jesús peitabaratha tatsi tsipei bapowa barũ cui itura jina peauraxae, yaitama tsipei Jesús pon jiwi pepa Pecanamataxeinaein. Bapowa namchi, jeye:

—¡Pon Tanecanamataxeinaem, neyawende! jei.

²⁶ Jesús jume nota barapowa, jeye:

—Jopa xanepanaeyo icha matha cayawenatsi powayo nenanapaincha poponaewayom poxonae cataunxuae matha jopa yawenaeyo pepa tamonae judiomonae. Icha baxua exanaetsipan, bapoxonae be pitan pexui pia pexaewa taapatsinexa aurimonae, jei.

²⁷ Barapowa Jesús jume notatsi, jeye:

—Aa, bara barichi xuaunxuae netsipaebame ponxaem Tanecanamataxeinaem. Jopa bewa auri catsibi pexui pia pexaewa tatsi, yaitama auri irũ xane pocotsiwa pexui sorobaba barapo pepũrũwixi pocotsiwa pexaethopaewa pebũxũpana tsica. Daxota bara ichiya neichinde: Neyawende, tsipei bara neayapusũ itorobi coyenewa nawita xeiname jinya axaibi exanaenexa judiomonae. Po neayapusũ itorobi coyenewa judiomonae jopa canantawenonaeyo barapo neayapusũ itorobi coyenewatha inta axaibi exande taxantiyo, jei.

²⁸ Nexata Jesús jume nota, jeye:

—¡Yabũyo, maisa bichocono neyabara jume cowũntame xua bara tana neitacũpaewa xua tacayawenaewatsi tsainchi! Bara cata exainchi pocotsiwa aunxuae newũcame, jei Jesús.

Poxonae Jesús baxua paeba, bapoxonae nainya barapo yabũyo pexantiyo tatsi taaxaibi tsuxubichi.

Meje yabara poxonae Jesús axaibi exana pin bicheitomonae peatenewi

²⁹ Nexata bapoxonae Jesús bara weya pona. Galilea pucua itapa iya pona. Bapoxonae demxuwa icha juinya, baxota ecopa. ³⁰ Ichaxota Jesús eca baxota pin bicheito jiwi ayei pata. Barapo bicheito jiwi carendena pejayujayujeiwi, irũ peitata nacũtsi jiwino, irũ pemuxusipanaewino, mataũta pomonae irũ peacowaebi jiwi xua pomonae jopa xeinaeyo xua xota nacowaeba. Mataũtano irũ icha bicheitomonaeno, pomonae peatenewi. Pomonae peatenewi Jesús pexainya tajebarecatsi. Daxita barapomonae Jesús axaibi exana. ³¹ Poxonae daxita jiwi baxua cui tane, pomonae jopa judiomonae naexanaeyo daxita barapo jiwi yabara cui coyene nanthũthũ cabenaeca. Bapoxonae Jesús xanepanaya peexanaexae, barapomonae Nacom wũnae jaintatsi, po Nacom Israel nacuapiwi pia Nacom tatsi. Daxota barapomonae baxua exana, tsipei Jesús equeicha paeba cana exanaeya exana pomonae pemuxusipanaewi. Mataũta tsipei Jesús taduba exana pomonae bayatha jopa xeinaeyo xua xota nacowaeba. Mataũtano tsipei pomonae pejayujayujei jiwi equeicha beta pona. Mataũtano tsipei pomonae peitata nacũtsi jiwi equeicha beta tane.

*Meje yabara poxonae Jesús pexaewa apata cuatro mil pebiwi
(Mr 8.1-10)*

³² Nexata Jesús waba pijimonae, jeye:

—Yabara cui cananta xeinan barapo pin bicheitomonae tayawenaenexa, tsipei barapomonae acoibi po matacabiyobe jinompa taxantha, maisa ajibi xua barapomonae penabanaewa tsane. Jopa jainbotha bepu itorobinyo pia bon beya tatsi, tsipei icha barapomonae jainbotha pu itorobichipan, metha piyain namtotha xuirabathopaetsipa, jei Jesús.

³³ Jesús baraichi pijimonae, jeye:

—Xote ira xuepana susato tsurucuae nacua ichaxota jiwi ajibi. ¿Eta beya tsijeitinchi pexaewa barapomonae pomonae pinmonaexae? jei.

³⁴ Jesús yainyaba pijimonae jeye:

—¿Eta po panyobe paxeiname? jei.

Barapomonaes Jesús jume notatsi, jeye:

—Siete po panyobe paxeinan yawa be conothano duweixi, poxi tsiquirixi, jei.

³⁵ Nexata Jesús pijimonae najume caitoroba xua bepa pinae barapo pin bicheito jiwi iratha taenaetsei. ³⁶ Jesús pecobetha pita barapo siete panyobe yawa duweixino. Bapoxonaes Jesús Paxatha tsipaeba: “Axa, jüntu coyene weiweinan xua pexaewa pata tanecatxiwaxaem”, jei Jesús. Bapoxonaes Jesús pijimonae tsicobe epa nantarubiya jajanaquiya catsibapona xua xuya pijimonae tatsi pecatsibaponaenexa barapo jiwitha. ³⁷ Daxita barapomonaes nabane, beya barapomonaes bichocono jain cowuntarucupatsi. Bapoxonaes Jesús pijimonae tatsi siete po cotebe wunba pocotsiwa xua barapo jiwi jopa xaeyo petonsanaexae. ³⁸ Pomonaes xua nabane pexaewa barapomonaes cuatro mil pebiwi. Matautano iru yabuxi nanabane matautano iru pexui nanabane, daichitha daxita jopa ununaeyo. ³⁹ Bapoxonaes Jesús pu itoroba xua barapo jiwi penawibiyaenexa pia tomaran beya. Bapoxonaes Jesús jeratha nontabiya, peponaenexa Magadán nacua beya.

16

Meje yabara poxonaes fariseomonaes iru saduceomonaes Jesús cui itorobatsi pia pexeinya petsita itutsi coyene xua peitabocotha

(Mr 8.11-13; Lc 12.54-56)

¹ Fariseomonaes iru saduceomonaes, barapomonaes pona Jesús beya xua Jesús pejuntu coyene jujutsinexatsi. Barapomonaes Jesús cui itorobatsi pia petsita itutsi coyenewa pocotsi coyenewa xua cana exana itaboco wetsica. Icha Jesús jopa itacupaetsi xua exana baxua, barapomonaes pepaebinexa tsane xua deta cou Jesús jopa apara Nacom Pexanto tatsi. ² Daichitha Jesús jume nota barapomonaetha, jeye: “Poxonaes tabopiya paxam ba pajam: ‘Baya tsane pexeinya matabi tsane tsipei anoxuae quiripitha itaboco tsobia’, ba pajam. ³ Ichacuitha tsipae poxonaes baya, paxam ba pajam: ‘Anoxuae ema duneicaena tsipei itaboco tsaebia yawa ituruna’, ba pajam. Itara mexeya pomonaes xanepanaya pepaebiwu pam, daichitha abe painya neexanaewu pam! Paxam peitaboco payabara yaputaneme. Ema ba payabara wunaes yaputaneme. Matautano pexeinya matabibino ba payabara wunaes yaputaneme, deta meisa paxam jopa pana neyabara yaputaem matautano jopa payabara yaputaem pocotsiwa exanan tapexeinya tsita itutsi coyenewan. ⁴ Barapo peajuntucoyenebe jiwi iru pomonaes jopa tana nejume cowuntsi jiwi, barapomonaes necui itoroba tapexeinya tsita itutsi coyenewa pocotsi coyene cana exanan itaboco wetsica daichitha jopa baxua beexanaeinyo pocotsiwa barapomonaes necui itoroba. Saya meisa barapo petsita itutsi coyene exanaein, icha be pocotsi coyeneya Jonás cana ichichi pon Nacom peitorobi jume pepaebin xua poxonaes pin duweintha tsijuntutha eca acoibi po matabibibe beya equeicha poxonaes yacabaxotsi xua asu popona”, jei Jesús xua nayabara paeba xua tupaena xua equeicha Nacom asu exanaena acoibi po merawithabe.

Bapoxonaes Jesús ponataba, yawa cuenta pona barapomonaes.

Meje yabara poxonaes Jesús pijimonae yabara yaputane exana, pocotsiwa pan cotowa exana
(Mr 8.14-21)

⁵ Poxonaes Jesús pijimonae tatsi icha muxunene beya pona jeratha xua pucua iya, barapomonaes junteina xua pan capana. ⁶ Nexata Jesús pewunaeya muxuweta pijimonae xua jopa pejume cowuntsinexa tsane fariseomonaes iru saduceomonaes pia pecuidubiwa coyenewa tatsi po pecuidubi coyenewa jopa Jesús pia pecuidubi coyenewa tatsi. Jesús jeye:

—Dota pam jopa pajume naitaewatsinde fariseomonaes pia pecuidubi coyenewa tatsi xua painya nejume cowuntsiyainwa. Matauta dota pam xua saduceomonaes pia pecuidubi coyenewa tatsi xua painya nejume cowuntsiyainwa. Barapo pecuidubi

coyenewan jiwi ichawa beya ajuntucicoyenyapube cana exanapoinchi icha be pocotsi coyene ichi xua levadura matawun xua pan cotowa exanapona beya poxona pin pan, jei Jesús.

⁷ Poxona Jesús yabara paeba pocotsiwa xua pan cotowa exana, bapoxona Jesús pijimona tatsi catsawiya nanta xeinaeya natsipaeba caemona, najei:

—Metha Jesús daxota baxua paeba metha poxoru yaitama jopa caponaetsi pan, najei barapomona.

⁸ Jesús yaputane pocotsiwa barapomona natsipaeba, daxota Jesús barai, jeye:

—Pocotsiwa pana natsipaebame xua jopa painya necaponaexae pan, apara poxoru jopa pana nejume cowuntsim. ⁹ ¡Cataunxuae jopa pana necui yabara yaputaem! Paxam pana necui yabara junte-mainame poxona cinco mil pebiwi apatan pexaewa xua yabara junte-mainame poxona saya cinco po panbe. Matautano pana necui yabara junte-mainame poxona equeicha doce po cotebe pawunbapona pocotsiwa jiwi jopa xaeyo. ¹⁰ Matautano paxam pana necui yabara junte-mainame xua poxona cuatro mil pebiwi apatan pexaewa xua poxona saya siete po panbe. Matautano pana necui yabara junte-mainame poxona equeicha siete po cotebe pawunbapona pocotsiwa jiwi jopa xaeyo. ¹¹ Matautano jopa payaputaem xua poxona yabara paca tsipaebatsi fariseomona pia pecuidubi coyenewa tatsi, iru saduceomona pia pecuidubi coyenewa tatsi, apara jopa pan yabara paca tsipaebichi xua jopa painya necaponaexae, jei Jesús.

¹² Bapoxona matapainya Jesús jume yaputaerucupatsi pijimona, xua apara yabara paeba fariseomona pia pecuidubi coyenewan yainwa tatsi, iruru saduceomona pia pecuidubi coyenewan yainwa tatsi. Matautano matapainya yaputaerucupa xua apara Jesús jopa yabara paebiyo pocotsiwa pan cotowa exana.

Meje yabara poxona Pedro namchi Jesustha jeye: “Xam apara Mesías Nacom caitorobica”, jei

(Mr 8.27-30; Lc 9.18-21)

¹³ Bapoxona pirapae Jesús pona. Poxona Jesús patopa Cesarea de Filipo tomara pecuariya xua pepa tomaratha, bapoxona Jesús yainyaba pijimona, jeye:

—¿Eta po jiton, po jiton xua jiwi yabara paeba xua pinae bapon Nacom pia Peitapetsin tatsi? jei Jesús.

¹⁴ Jesús jume notatsi pijimona, jeye:

—Ichamona cayabara jeye: ‘Apara bapon Juan pon jiwi Pebautisabin, pon equeicha petupaen asu juina’, jei. Iru ichamona cayabara jeye: ‘Apara bapon Elías pon equeicha petupaen asu juina’, jei. Iruru ichamona cayabara jeye: ‘Apara bapon Jeremías pon equeicha petupaen asu juina’, jei. Iruru ichamona cayabara jeye: ‘Apara bapon jiwana pomona Nacom peitorobi jume pepaebiwi’, jei, jei Jesús pijimona tatsi.

¹⁵ Nexata Jesús pijimona barai, jeye:

—¿Incane iru paxamdu? ¿Eta pana neyabara jumichimdu xua xan eta pondun? jei Jesús.

¹⁶ Simón Pedro Jesús jume notatsi, jeye:

—Xam apara Mesías. Nacom caitorobica, pon asu popona. Xam apara Nacom Pexanto tatsim, jei Simón Pedro.

¹⁷ Jesús barai, Simón Pedro baraichi, jeye:

—Simón, Jonás pexantom, maisa Nacom cajuntu coyene weiweina exana, tsipei bapana jiton bapocotsiwa jopa cacuidubi pocotsiwa xua tana neyabara paebiwam. Saya apara meisa Nacom, Taxa, cacuiduba baxua pocotsiwa tana neyabara paebiwam, pon itabocotha eca. ¹⁸ Pocotsiwa xua tana neyabara paebiwam baxua natsita jume itapeinya xeiname xua bichocono tana necui yabara jume cowuntsiwam. Daxota cawun dutatsi po wun xua jei: ‘Pedro’, jei, po wun caunuta xua jei: ‘iboto’, jei, tsipei ba iboto bichocono mata daunwei. Pocotsiwa xua xainyeya neyabara paebame baxua be iboto coyene jutiya paebame poxona jam: ‘Xam apara Mesías. Nacom caitoroba, pon asu popona. Xam apara Nacom Pexanto tatsim’, jam. Daxita pomona xua neyabara jume

cowanta barapo pexainyeya jume tana neyabara paebiwathaxaemxae, barapomonaе tajiwiwimonaе exanaein. Tajiwiwimonaе catsin taayapusu itorobi coyenewa xua barapo tajiwiwimonaе jopa peamanayabinexa tsainchi pia peaitafaetabi jiwichi pomonaе petupaе cuiru nacua beya ponaena. ¹⁹ Xam Pedrom, cacatinchi taayapusu itorobi coyenewa xua copiyam tsane caponaename tajume diwesi xua xan yabara ponxaein Mesías, ponxaein Nacom Pexanton. Barapo tajume diwesi caponaename judiomonaetha matautano caponaename pomonaetha pomonaе jopa judiomonaе naexanaeyo. Matautano xam pon tajitonxae, pocotsiwa xam jopa copatsim barapo cae pin nacuathe, xua pocotsiwa tamonaе exana, baxuan bara iru Nacom jopa copatsiyo pia peitorobi nacua beicha xua barapomonaе bara peexanaenexa baraxua. Pocotsiwa copatame xua tajiwiwimonaе peexanaenexa barapo cae pin nacuathe, bapocotsiwa iru Nacom copata pia peitorobi nacua beicha xua barapomonaе bara peexanaenexa baxua, jei Jesús.

²⁰ Nexata Jesús pijimonaе muxu barai xua pijimonaе jopa peyabara pepaebinxatsi ichamonaetha baxua xua po coyene bapon apara Mesías.

Meje yabara poxonaе Jesús nayabara diwesi paeba po coyene xua petupaewa tsane (Mr 8.31–9.1; Lc 9.22–27)

²¹ Bapoxonaе barapo matakabi weya Jesús tamropata pitaba xua pijimonaetha tsi-paeba pocotsi coyene Jesús cana exanaeinchi ichamonaе, jeye:

—Bewa ponaein Jerusalén tomara beya ichaxota pitiri jiwí, iruru sacerdotemonaе pia pentacaponaewi tatsi, iruru pomonaе jiwí pecuidubiwi Moisés pia peitorobi coyene tatsi, daxita barapomonaе bichocono neperaxa jubina. Matautano barapomonaе nebexubina. Daichitha poxonaе acoibi po matakabiyobe tsuxubi tsane equeicha Nacom tatupaеin asu neexanaena, jei Jesús.

²² Ichitha bapoxonaе Pedro, Jesús baru natsixitabatsi aisowa beya. Pedro Jesús baraichichi, jeye:

—Xam pon Necanamataxeinaem. ¡Jamaisa daxua paebameno, bara! Nacom jopa copatsi tsane xua jiwí cata exanaena baxua, jei Pedro.

²³ Nexata Pedro peitabara beya tatsi Jesús napatomeicha cauncuatabiya namchi, jeye:

—¡Xam newepu natsixitabare, tsipei be Satanám! ¡Nejuntu coyene jujutame xua jopa xanepanaya taexanaewa tsane neaichaxaibixae xua tatsitupaewa tsane jiwí! Xam saya abe nanta xeiname icha pebiwi ichi. Saya jopa nanta xeinaem pocotsiwa Nacom necayabara nanta xeina xua tatsitupaewa tsane jiwí, jei Jesús.

²⁴ Nexata Jesús barai pijimonaе, jeye:

—Icha pebin ichichipa xua tajiwiwimonaе jiwana pin penaexanaewa tsane, bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonaе jame bapon bewa eexanaponaе pocotsiwa itoroban, bequein bara bapon bexotsi ichamonaе, tajiwiwimonaе jitonxae. ²⁵ Pon naantobeya nata exana pocotsiwa bapon ichichipa, bapon jopa xeinaeyo peajuntu yapuswa, po peajuntu yapuswa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan tana neantobexae bapon xeinaena peajuntu yapuswa, po peajuntu yapuswa ataya tsiteca xua Nacom pia nacua beicha. ²⁶ Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntu coyeneswa po peajuntu coyeneswa ataya tsiteca, bapoxonaе bapon jopa itacupaetsi xua penajuntu coyene capanepaewa xua jopa peweraweracaewa. Tsipei pebin jopa itacupaetsi xua barapo copeitha matomatsina Nacomtha xua bapon pecatsinexa tsainchi peajuntu coyeneswa xua barapoxonaе pepatopaewanexa tsane Nacom pia nacua beicha tatsi. ²⁷ Tsipei xan ponxaein Nacom Tananeitapetsin bewa yawa muxuna patopeicaein Nacom pia peitupanaewa tatsi. Matauta matatsunpiwi baru patopeicaein. Daxita carepaya jiwitha catsibin pocotsiwa peyabara cui matomatsiwatsi. Pomonaе jopa xapain exanaeyo ichamonaetha xuya barapocotsi coyeneya exanaein xua antomabeya catsin. Pomonaе xua

xanepanaya exana ichamonaetha pocotsiwa cui itoroban xuya barapocotsi coyeneya exanaein matoma xanepanaya catsibin. ²⁸ Bara xaniwaicha paca tsipaebatsi xua pomonae xote umene barapomonae jiwana abũ, copiya matha yabara yaputaena poxonae xan ponxaein Nacom Tananeitapetsin tamropata pitabin xua itorobiya taewatsiwa tsane pomonae tana nejume cowũntsiwi, jei Jesús.

17

*Meje yabara poxonae Jesús pijimonae peitũ*tha pexeinya itũpanae coicha tsanaya naexana

(Mr 9.2-13; Lc 9.28-36)

¹ Poxonae seis po matabibibe jopa, po matabin weya poxonae Jesús paeba baxua, bapoxonae icha matabitha Jesús pona demxuwa beicha. Pedro Jesús barũ pona, irũno Santiago Jesús barũ pona, irũno Juan Jesús barũ pona, pon Santiago peweicho tatsi. Barapo acoibi poyobe Jesús matabapona demxuwatha, po demxuwatha bichocono taũcha ichaxota jiwaibi. ² Baxoteicha daxita Pedrobarũ peitũtha tatsi Jesús pexeinya itũpanae coicha tsanaya. Bichocono itabara daedaena icha be xometo ichi poxonae pentha. Matautano pocotsiwa penama xatatsiwa bichocono inyapana tsanaya icha pecoicha ichi. ³ Bapoxonae Pedrobarũ taerũcũpa Moisés irũ Elías xua baponbe Jesús barũ cueicueijeichibe. ⁴ Bapoxonae Pedro namchi Jesustha, jeye:

—Pata Tanecanamataxeinaem, maisa wũnae xua xote pata umenaewa. Icha ichichipame, bapoxonae pacata acabinchi acoibi po boutiyobe, cae bouto xam nexa, icha bouto Moisés nexa, icha bouto Elías nexa, jei Pedro.

⁵ Poxonae cataunxuae Pedro cueicueijeji, xua Jesús barũ cueicueijeichi, bapoxonae daxita barapomonae bematawacaicha taruneicatsi tsaquinaebowa po tsaquinaebowa bichocono pentha. Nexata barapomonae tsaquinaebowatha pejume jume tane xua Nacom namchi, jeye: “Bapon apara Taxanto, pon bichocono antobein, pon itapetan. Bapon bichocono nejũntũ coyene weiweina exana. Bapon beta pajume taema pocotsiwa paca tsipaeba”, jei Nacom.

⁶ Poxonae Jesús pijimonae tatsi jume taerũcũpa baxua, bapoxonae barapomonae pia coutha iratha nabebeya, irabe taebobendeca. Barapomonae bichocono pijunuwi.

⁷ Bapoxonae Jesús pijimonae imoxoyo caquita uncuataba yawa pijimonae warũba, jeye:

—Panonobaponde, painya xoba pajunuwame, jei Jesús.

⁸ Poxonae barapomonae necobarũcũpa beya meisa Jesús compa uncua, ichamonae aichurubena.

⁹ Poxonae Jesús pijimonae barũ duneica demxuwa wetsica, pijimonae barai, jeye:

—Ichamonaetha jopa baxua patsipaebinde pocotsiwa aunxuae pataneme xuaunxuae paca tsita itutatsi, beya abũ poxonae xan ponxaein Nacom Tananeitapetsin equeicha asũn poponaein tatũpae coyene weya, jei Jesús.

¹⁰ Nexata Jesús yainyabatsi pijimonae, jeye:

—Pomonae jiwi pecuidubiwi Moisés pia peitorobi coyene jeye: ‘Mesías matha tsiwanaya patopaeinchi Elías’, jei. ¿Eta pocotsiwa metha jane? jei Jesús pijimonae tatsi.

¹¹ Jesús jume nota, jeye:

—Bara xainyei, copiya matha netsiwanaya patopa pon icha be Elías ichi. Matautano bapon cana exana jiwitha xua jiwi cana jũntũ coyene weta exanaya exanatsi xua tana nejume cowũntsiwa tsane xua tapatopaewa tsane. ¹² Ichitha xan paca tsipaebatsi xua bayatha apara patopa pon copiya matha netsiwanaya patopa pocotsin xua icha Elías ichi. Poxonae bapon bayatha patopeica jiwi jopa yaitaeyo bapontha pon icha Elías ichi. Saya barapo jiwi bapon abe cana exanatsi be pocotsi coyeneya ichichipa beya poxonae bapon yatsicaya bexotsi. Icha bapon ichichi xua poxonae cana exanatsi, barapomonae bara neichi tsane ponxaein Nacom Tananeitapetsin. Barapomonae irũ nebexubina, jei Jesús.

¹³ Jesús pijimonae tatsi matapainya yaputane xua poxonae Jesús pijimonae tsipaeba Elías yabara, apara xua Juan yabara paebatsi pon jiwi Pebautisabin.

*Meje yabara poxonae Jesús cauri taitaweta xua pewowin xeina
(Mr 9.14-29; Lc 9.37-43)*

¹⁴ Poxonae demxuwa weya pona, bapoxonae Jesús pijimonae baru patopa ichaxota pin bicheito jiwi jinompa. Bapoxonae pebin Jesús imoxoyo caquita uncatabatsi. Bapon pentabocototha uncua Jesús peitabaratha tatsi. Bapon Jesús baraichi, jeye:

¹⁵ —Tanecanamataxeinaem, inta taxanto yabara najuntu coyene xeinare xua jinya neyawenaenexa. Taxanto inta waetabatsi cauri. Inta papai exanatsi. Inta coibo thamthamei exanatsi. Matayaiba exanatsino. Matauta isototha inta bebai tsaibichino. Matautano mentha inta bebai tsaibichino. ¹⁶ Bequein barapo taxanto xote caponanje jinyamonaetha yawa janje: ‘Painta taxanto taitawere cauri’, jan, daichitha jopa itacupaetsi xua taxanto petaitawetsinexatsi cauri, jei bapon.

¹⁷ Jesús namchi daxita barapomonaetha, jeye:

—¡Paxam barapomonaе pam pomonaе jopa xapain cataunxuae pana nejume cowuntsim! ¡Paxam barapomonaе pam, peajuntucoyenebe jiwi pam! ¿Eta po weibe nantawenonan xua bewa tapaca baru ecaewatsi tsainchi xua beya poxonaе tapana nejume cowuntsiwam tsane? Matautano ¿eta po weibe equeicha nantawenonan xua tapaca cayawenaewatsi tsainchi? Inta xawena pewowin, jei Jesús.

¹⁸ Bapoxonae Jesús itaweta cauri, matautano pewowin wepu ponatsi exanatsi. Barapo pewowin nainya axaibi tsuxubi.

¹⁹ Bapoxonae pirapaeyo Jesús compa tsipaebatsi pijimonae. Jesús jeichichi:

—¿Eta pocotsiwa metha jopa pana neitacupaeyo xua pata taitawetsiwa cauri? jei Jesús pijimonaе tatsi.

²⁰ Jesús jume barai pijimonaе jeye:

—Jopa paca itacupaeyo xua painya itawetsiwa cauri tsipei jopa beta payabara jume cowuntsim xua Nacom painya nepaca cayawenaewa. Bara xaniyeya paca tsipaebatsi. Icha paxeinaetsipame xua be peya pejume cowuntsi coyenewiyo xua bequein, icha mostaza xutiyo jata ichi xua tsica xutiyo, ichitha bara paca itacupa xua urutotha painya nejeiwa: ‘Uruto bara jincoutha natabu jonde, icha ira beya naxore’, xua painya nejeiwa. Bara jopa bayathiyo tsipae barapo uruto. Dapocotsiwa apara pacata aibi, pocotsiwa peayapubeya daunweiwa icha paxeiname tapana nejume cowuntsiwam xua peya jume cowuntsiwiyo. ²¹ Barapo cauri saya paca itacupa xua painya neitawetsiwa poxonaе matha payabara nainbotame matautano poxonaе matha Nacomtha matowa pawucame, jei Jesús.

*Meje yabara poxonae equeicha Jesús nayabara paeba xua poxonae tupaena
(Mr 9.30-32; Lc 9.43-45)*

²² Poxonae cataunxuae Jesús pijimonaе baru popona Galilea nacuatha, pijimonaе tsipaeba, jeye:

—Xan ponxaein Nacom Tananeitapetsin, jiwi necaenaetsina ichamonaetha.

²³ Bapoxonaе bequein nebexubina, ichitha poxonaе acoibi po maticabiyobe yapucaewina Nacom equeicha tatupaеin asu neexanaena, jei Jesús.

Bichocono Jesús pijimonaе tatsi anthuthutane, xua poxonaе Jesús pejume taexaetsi poxonaе baxua paeba.

Meje yabara poxonae Jesús cata paratiyo xua Nacom pin pia bo nexa

²⁴ Jesús baru patopa pijimonaе Capernaum tomaratha. Bapoxonaе pomonaе paratixi penoteibiwi po paratixi judiomonaе bewa catsibeibina xua Nacom pin pia bo nexa, barapomonaе Pedro pexainya beya taponatsi. Barapomonaе Pedro yainyabatsi, jeichichi:

—¿Pon painya nepaca cuidubin, bapon bepa pana catsei paratixi xua Nacom pin pia bo nexa? jei.

²⁵ Pedro jume nota, jeye:

—Aa, bepa paca catsei, jei Pedro.

Poxonaе Pedro botha joniya, Jesús copiya barai bapon, jeye:

—Simón, ¿eta be caita cui jicha? Barapo cae pin nacuathe, ¿eta po jiwi wucatsi paratixi, po paratixi xua jiwi bewa catsibeibina pomonaetha pomonae jiwi itorobiya pia pepa peewatsiwichi poxonae pomonae jiwi itorobiya pia pepa peewatsiwichi wuca? ¿Metha bara piamonae matabuxu wuca? Ichacuitha, ¿metha bara ichamonae wucatsi pomonae penanapaincha jinompaewi xua icha nacua werena peponaewi? ¿Eta pomonae cuita wucatsi? jei Jesús.

²⁶ Pedro Jesús jume notatsi, jeye:

—¡Apara jame wucaetsipa ichamonaetha! jei Pedro.

Equeicha Jesús jume nota, jeye:

—Nexata barapomonae jopa wucaeyo piamonae matabuxu. ²⁷ Barichin jopa bewa Taxa catsin tsane paratixi, yaitama tsipei apara Taxa Pexanton tatsin. Ichitha xua barapomonae jopa wanaca casebinexa, matha mene beya ponde. Curupobo xoyama mentha bapoxonae po duwein copiya wana pichina curupobo, pire barapo duwein. Bapoxonae barapo duwein coiboto tsina paratiyo taename po paratiyo xua naca yajurabe xua wamatomatsiwabe tsane Nacom pin pia bo nexa. Bapoxonae barapo paratiyo caponde pomonae paratixi penoteibiwi beya bara careno, jei Jesús.

18

Meje yabara poxonae Jesús yabara yainyabatsi pijimonae xua pon peainya cui peexanaeinchi (Mr 9.33-37; Lc 9.46-48)

¹ Nexata bapoxonae Jesús imoxoyo caquita umenarucupatsi pijimonae, yawa pijimonae yainyabatsi, jeichichi:

—¿Jintam paxan jiwana pan pon bichocono ainya cui cana exanaeinchi po mataqueitha poxonae Nacom wabina jiwi xua petanaexanaenexatsi pijimonae pomonae itorobiya pecanamataxeinaexae? jei Jesús pijimonae tatsi.

² Nexata Jesús waba pexuyo, yawa pijimonae tatsi peitabarayo deca tatsi tacuara-noreca. ³ Jesús namchi pijimonaetha, jeye:

—Bara xainyeya paca tsipaebatsi bewa paxeinaem icha jantx coyenewa xua jopa pananta xeinaem peainya cui coyenewa yabara. Barapocotsi jantx coyenewa pexui ba xeina xua jopa taayapubetsi poxonae nejume cowanta. Bewa pananta xeinaem icha pexui ichi poxonae nanta xeina, icha paichichipame xua Nacom painya nepaca wabiwa xua pijimonae tatsi painya nepaca exanaewa pomonae pamxaem Nacom itorobiya paca ewata. ⁴ Po jiton pon najantx coyene acaura, xua daxota bichocono Nacom canantawenonatsi xua pejume cowantsiwatsi, bapon jame ainya cui xua pecana exanaewatsi Nacom pijimonae tatsi jiwana pin pomonae pejume cowantsiwichi pomonae Nacom itorobiya peewatsixae. ⁵ Pon matenta weyataeya waba peyawenaenexa pontha pon tana nejume cowantsixae xua pocotsin icha be barapocotsi pexuyo ichi, barapon apara bara nententa weyataeya waba. Xan jopa meisa nententa weyataeya wabiyo apara bara iru matenta weyataeya wabatsi pon tana neitorobixae, xua pon bara Nacom, jei Jesús.

Meje yabara poxonae Jesús paeba xua jiton jopa bewa cana exanae ichantha xua iru abe peexanaewa tsane

(Mr 9.42-48; Lc 17.1-2)

⁶ “Nacom tsitatsi xua pebin bichocono abe exana poxonae ichan cana exanatsi xua abe peexanae cuiru coyene exana, po barapo ichan pon cataunxuae aena tana nejume cowantsixae. Metha jame wuna tsipae xua barapo pebin pon abeya cana exanaeya taexana ichantha, barapon pin iboto wisi cutsipatsi yawa xua tuwatha xua pin mar mentha barapo iboto cayawa cabutabachipatsino. Tsipei jopa wuna tsipae xua bapon cana exana xua ichamonae abe peexanae cuiru coyene exana pomonae cataunxuae aena nejume cowanta. ⁷ Maisa bichocono jopa xanepanaeyo barapo cae pin nacuathe nexa pomonae abe exaneiba. Barapo cae pin nacuathepiwi ataya xeineiba po jiwi pecana exanaexaetsi xua ichamonae cana exana xua barapo jiwi pecana exanaexaetsi

xua ichamonaē cana exana xua barapo jiwi abe peexanae cuiru coyene peexaneibinexa xua daxota jopa nejume cowunteibiyo. Ichitha pebin tsocuae xua bapon abe taexana xua ichun abe exanaeya taexanaetsi.

⁸ “Daxota paca tsipaebatsi icha painya cobe paca exana xua abe painya neexanaewa tsane maisa pana nacobe ucubobare yawa tajū beya pana nacobe bebande abe painya jopa neexanaenexa. Tsipei baxua xanepana xua cae cobexi pabebam tsane, xua saya cae cobexi painya neyawa patsiwa tsane Nacom pia nacua beicha tatsi. Baxua jame yatsicaewa xanepana beyacaincha xua ainya cobebe painya necayawa bebai tsane ichaxota po nacuatha isoto jopa itacounayiyo. Matautano icha painya taxu paca exana xua abe painya neexanaewa tsane maisa pana nataxu ucubobare yawa tajū beya pana nataxu bebande xua abe painya neexanaeyainwa. Tsipei baxua xanepana xua cae taxuxi pabebam tsane, xua cae taxuxi painya neyawa patsinexa Nacom pia nacua beicha tatsi. Baxua jame yatsicaewa xanepana beyacaincha xua ainya taxube painya necayawa bebai tsane ichaxota po nacuatha isoto jopa itacounayiyo. ⁹ Matautano icha pocotsiwa pataneme painya itamaiqueitha xua icha baxua paca exana xua abe painya neexanaewa tsane painya netaexae painya itamaiqueitha, maisa pana naitamaiquei jucuare. Yawa tajū beya pana naitamaiquei bebande abe painya neexanaeyainwa. Tsipei baxua xanepana xua cae itamaiqueitoxi pabebam tsane, xua cae itamaiqueitoxi painya neyawa patsiwa tsane Nacom pia nacua beicha tatsi. Baxua jame yatsicaewa xanepana beyacaincha xua poxonaē ainya itamaiqueitobe painya necayawa bebai tsane ichaxota isoto jopa itacounayiyo”, jei Jesús.

Meje yabara poxonaē Jesús tsipaeba pijimonaē pecayabara jūta pepaebi diwesiyo xua oveja yabara pon penapuxanaein

(Lc 15.3-7)

¹⁰ Equeicha Jesús jeye: “Barapocotsi pexuyo jopa catsa jumeya pacayabara jande: ‘Maisa barapo pexuyo jopa peainya cuiyiyo’, jopa pajande. Matauta pomonaē aena pejume cowuntsiwi Nacom jopa pacayabara jande: ‘Maisa barapomonaē jopa peainya cuimonaeyo’, jopa pajande. Paca tsipaebatsi pomonaē Nacom pejume cowuntsiwi barapomonaē nantauta pia matatsunpiwi po matatsunpiwi barapomonaē yawenatsi. Barapo matatsunpiwi, Taxa Nacom peitabaratha tatsi tajinompeibatsi pia nacuatheicha, xua barapo pejume cowuntsiwi peyawenaenexa tsaibi tsainchi. ¹¹ Tsipei xan, ponxaein Nacom Tananeitapetsin patopeican tayawenaenexa pomonaē jopa pejume cowuntsiwi xua barapomonaē napaeba tacana exanaewa tsane.

¹² “Pana nejume naitaware po pecayabara jūta pepaebi diwesiyo xua paca tsipaebinchī. Barapo diwesiyo jeye: Jiton ba xaina oveja cien poyobe. Caein tanapuxanatsi. Jiton demxuwatha cuenta pona noventa y nueve poyobe oveja, pewenaweneinexa oveja, pon catsawa jopa, beya matapainya taeba. ¹³ Xaniwaicha paca tsipaebatsi poxonaē jiton oveja taeba, bapon bichocono weiweina petaebixae oveja pon catsawa jopa, beyacaincha xua poxonaē weiweina poxonaē saya noventa y nueve poyobe po ovejamonaē jopa catsawa othopaeyo. ¹⁴ Barichi barapocotsi jūta coyeneya ichi, Nacom pon Taxa, pon peitabocotha eca, bapon jopa ichichipaeyo xua pebarapentsiwatsi pijiwimonaē xua pejume cowuntsiwatsi matautano xua bara caeinno irū, pomonaē aena pejume cowuntsiwixaetsi”, jei Jesús.

Meje yabara poxonaē Jesús yabara paeba xua jiton eta bichi tsane poxonaē cayabara jūntemainaena pontha pon abe petaexanaexaetsi

(Lc 17.3)

¹⁵ Equeicha Jesús barai pijimonaē, jeye: “Icha ichun pon irū pejume cowuntsindū, icha bapon pacata abe exana, bapon baxua yabara patsipaebare xua bapon peyaputaewa tsane xua deta cou abe exana. Icha barapon paca jume taeya jejei tsane pocotsiwa xua bapon abe exana bara bapoxonaē paca itacoxonaena. ¹⁶ Ichacuihtha icha ichun pon pejume cowuntsindū, icha bapon jopa paca jume cowuntsiya jejeyo, bara nexata

equeicha pawabare pebinbe nacueyatabe xua yoroba painya netsipaebinexa bapon xua abe peexanaexae. ¹⁷ Ichitha icha awiya bapon jopa cataunxuae paca jume cowantsiya jejeyo, bara nexata barapon pacaponde pomonaetha pomonae Nacom pejume cowantsiwichi, xua barapomonae bapon peyabara paebinexatsi. Icha bapon awiya cataunxuae jopa came jume cowantsiya jejeyo barapomonaetha barapoxonae barapomonae bewa yabara nanta xeinae xua bapon bara be pocotsi jiton pon jopa bapana pejume cowantsin Nacom. Ichacuitha bewa yabara nanta xeinae xua bapon bara be pocotsi jiton jiwana, pomonae peajuntacoyenebewi, pomonae paratixi pentoma notebiwi, po paratixi jiwi bewa catsibeibina pon romanomonae itorobiya pia pepa peewatsinchi nexa.

¹⁸ “Xainyeya paca tsipaebatsi. Pocotsiwa paxam jopa pacopatsim barapo cae pin nacuathe xua pocotsiwa exana pomonae tana nejume cowantsiwi, bapocotsiwa bara iru Nacom jopa copatsiyo pia peitorobi nacua beicha xua barapomonae peexanaewa tsane baxua. Pocotsiwa pacopatame xua tajiwimonae peexanaenexa barapo cae pin nacuathe bapocotsiwa iru Nacom copata pia peitorobi nacua beicha xua barapomonae bara peexanaewa tsane baxua.

¹⁹ “Matautano paca tsipaebatsi icha paxam jiwana nacueyatabe barapo cae pin nacuathe icha baponbe peburu ya juraya yabara nanta xeinabe xua Nacomtha pewucaewabe, baponbe bara baxua taexanaeinchibe pocotsiwa pewucaexaebe xua Taxa Nacom bara taexanaena pon peitabocotha eca. ²⁰ Tsipei ichaxota ba nayantabe xua nacueyatabe poyobe, xua poxonae pewucaenexabe Nacom xua ichacuitha ichaxota acoibi poyobe, xua pomonae taneantobe jiwixae, bara bequein saya caeyobe daichitha xan baxota ba uncueiban iru”, jei Jesús.

²¹ Nexata Pedro Jesús yainyabatsi, jeye:

—Tanecanamataxeinaem, icha inta abe exana pon iruru jume cowanta, ¿eta po cuiyobe tsipaebocuaein xua bewa tacui yabara juntemainawa tsane pocotsiwa inta abe exana? ¿Metha saya beya poxonae siete po jume cuiyobe tsipae? jei Pedro.

²² Jesús jume nota, jeye:

—Ichitha jopa catsipaebichi xua saya siete po cuiyobetham netsipaebiwa tsane xua jinya necui yabara juntemainawa tsane pocotsiwa cata abe exana. Seicaya apara jame catsipaebatsi, xua jopa cuinaya najume baraxubim tsane xua jinya necui yabara juntemainawa tsane pon cata abe exana xua beya bequein jame cuatrocientos noventa po cuiyobetham tsane xua netsipaebiwa tsane, jei Jesús.

Meje yabara poxonae Jesús cuiduba pecayabara jata pepaebi diwesiyo xua pon jopa yabara juntemainawo ichantha

²³ Equeicha Jesús pijimonae barai pecayabara jata pepaebi diwesiyo, jeye: “Anoxuae paca cuidubatsi xua Nacom yabara. Nacom pijimonae bichocono yabara juntemainawa po abe peexanae coyenein pijimonae tatsi exana. Nacom baxua exana icha pebin ichi pon jiwi itorobiya pia pepa peewatsinchi. Bapon wuca xua caewa equeicha pematomsinexatsi xua po matoman caena bayatha penacowaebixaetsi. ²⁴ Pon jiwi itorobiya pia pepa peewatsinchi tamropata pitaba xua waba pia petanacuichiwichi. Pon copiya, bapon pon jiwi itorobiya pia pepa peewatsinchi jopa equeicha caewa tacanawitichi diez millones po paratiximonaebe. ²⁵ Barapon pon copiya pon petanacuichinxae pon jiwi itorobiya pia pepa peewatsinchi nexa jopa xeinaeyo paratiximonae xua pon jiwi itorobiya pia pepa peewatsinchi caewa petacanawichinexa tsainchi. Daxota pon jiwi itorobiya pia pepa peewatsinchi itoroba ichantha xua barapo petanacuichinchi caenaetaxubinchi ichantha xua ichan pecomotsinexa tsane xua pon pebusi cui taetaeinchi pecanaexanaenexa tsainchi. Barapon pon jiwi itorobiya pia pepa peewatsinchi matauta cui itoroba xua yabuyo pecaenaetsinexa tsainchino, powa barapo petanacuichin piowa tatsi. Yawano cui itoroba xua pexuino pemuxuna caenaetsinexa tsainchi. Yawano cui itoroba xua pemuxuna caenaetsinexa pocotsiwan xeina pon petanacuichin, xua barapo matoma pecatsinexatsi pon jiwi itorobiya pia pepa peewatsinchi. Ichitha daxita

barapo matoma awiya seica, bequein bapon daxita baxua cana exanaetsipatsi. ²⁶ Nexata pon petanacuichin pentabocototha uncua pon jiwi itorobiya pia pepa peewatsinchi itabaratha tatsi matautano jume daunweya namchiya jeye: ‘Tanentacaponae, abũ necayabara najũntũ coyene xeinare, xua jopa bepijawa neaitaconaenexa. Barapara bexa daxita pentoman cacatsibinchi’, jei pon petanacuichin. ²⁷ Pon jiwi itorobiya pia pepa peewatsinchi bara yabara najũntũ coyene xeina peyawenaenexa, yawa yabara jũntemaina barapo paratiximona, matautano bara saya pu copata.

²⁸ “Daichitha bapon pon petanacuichinxae poxona pontaba pon jiwi itorobiya pia pepa peewatsinchi weya, jemeicha caxina pia jiton pon penabarũ nacuichinxaebe. Pon caxinatsi bapon matoma amanayaba saya cien po paratiximonaebe. Pon jiwi itorobiya pia pepa peewatsinchi weya pona matoma amanayabatsi. Pon jiwi itorobiya pia pepa peewatsinchi weya pona bapon pia jiton coibotathũ waetaba, muxu penaichatabi. Pon pecoibotathũ waetabixae bapon jei: ‘¡Equeicha inta caewa canawire xua bayatha nentoma amanayabame!’ jei. ²⁹ Bapoxona pon coibotathũ waetabatsi pentabocototha uncua pia jiton itabaratha tatsi, matautano jeye: ‘Abũ, neyabara najũntũ coyene xeinare, xua jopa bepijawa neaitaconaenexa. Barapara bexa pentoma cacatsinchi’, jei pon coibotathũ waetabatsi. ³⁰ Ichitha pon jiwi itorobiya pia pepa peewatsinchi weya pona bapon aichaxaibi xua abũ came pentoma ewatsiwa. Daxota bapon pia jiton capona jiwi pecũbi bo beya, beya abũ poxona matoma catsinchi pia jiton, xua pon jiwi itorobiya pia pepa peewatsinchi weya pona matoma catsinchi. ³¹ Poxona ichamona pomona irũ petanacuichiwi baxua cui tane, barapomona unthũthũ wecoyei, tsipei ichũn pon irũ petanacuichin jiwi pecũbi botha etatsi. Bapoxona barapomona pon jiwi itorobiya pia pepa peewatsinchi beya pona. Barapomona tsipaeba pontha pon jiwi itorobiya pia pepa peewatsinchi daxita pocotsiwa pon petanacuichin cana exana ichũntha pon irũ petanacuichin. ³² Bapoxona pon jiwi itorobiya pia pepa peewatsinchi itoroba pijimona xua petawabinexa tsainchi pon petanacuichinxaetsi pontha xua pon peyabara jũntemainaexae pocotsiwa penacowaetsixaetsi. Pon jiwi itorobiya pia pepa peewatsinchi bapontha jeye: ‘¡Maisa pon inta nacuitame maisa bichocono abem! Xan cayabara jũntemainsi daxita barapo ainya paratiximona tsipei tanebarũ jumichimxaem. ³³ Xam bewa bayatha barichim. Bewa yabara najũntũ coyene xeinaem jinya jiton xua nejũntemainaenexa pocotsiwa bapon cantoma amanayaba, icha xan ichin xua bayatha cayabara najũntũ coyene xeinatsi tacayawenaenexa tsainchi’, jei. ³⁴ Pon jiwi itorobiya pia pepa peewatsinchi bichocono anaepana. Daxota bapon cui itoroba ichamona, xua barapon pon petanacuichinxaetsi caponaeinchi jiwi pecũbi bo beya. Baraxota peraxa exanaeinchi xua beya abũ poxona barapon pon petanacuichinxaetsi matoma catsinchi daxita po pentoma bayatha jopa caewa petacanawichixaetsi”, jei Jesús.

³⁵ Equeicha Jesús jeye:

—Bara jũta coyeneya ichi tsane icha be pon jiwi itorobiya pia pepa peewatsinchi ichi. Poxona bapon peraxa exana barapo pia petanacuichinxaetsi xua bapon pia jiton jopa pecui yabara jũntemainaexae, Nacom pon itaboco peecaen barichi tsane pijiwitha. Nacom exanaena baxua poxona barapomona jopa xapain yabara jũntemainaeyo pomonaetha pomona abe petaxanaexaetsi, jei Jesús.

19

Meje yabara poxona Jesús cuiduba xua jiwi piseurixi pepunapenteibiyainwa.

(Mr 10.1-12; Lc 16.18)

¹ Poxona Jesús najume weta xua tsipaeba pijimona, bapoxona Galilea nacua weya warapa. Bapoxona Jordán mene deca bara bereca pona, equeicha dabeya barapo Jordán mene, mene epa uncatabiya xua patopa Judea nacua, po nacua eca ichaxota pocotsiwa xometo bejopiya xua po nacua Jordán mene weya eca. ² Pin bicheitomona puna poinchi. Baxotiya Judea nacua Jesús axaibi exana peatenewi.

³ Bapoxonae fariseomonae piraichi Jesús imoxoyo caquita umenarucupatsi xua Jesús pejuntu coyene jujutsinexatsi daxota jeye Jesthath:

—¿Moisés pia peitorobi coyenewa copata xua pebin piseuri pepunaxubiwa ichi saya poxonae ichipa? jei fariseomonae.

⁴ Jesús fariseomonae jume notatsi, jeye:

—¿Jopa payorobim Nacom Pejume Diwesi? Barapo diwesitha jeye: ‘Poxonae aena Nacom forota, Nacom forota pebin yawa forota petsiriwa’, jei barapo Nacom Pejume Diwesitha. ⁵ Matauta jeyeno Nacom Pejume Diwesitha: ‘Daxota baxuaxae pebin paxa wepu natsata yawa pena wepu natsata xua piowabe imoxoyo penaperu nacoyobinexabe. Baraponbe be cae jiwimonae naexanabe’, jei Nacom Pejume Diwesitha. ⁶ Bapoxonae baponbe xua ainya jiwibe aibi, bara be caein naexanabe. Daxota pebin bapana jopa bewa punaxubi piowa, tsipei apara bayatha Nacom cana exana xua bara be bara caein naexanabe, jei Jesús.

⁷ Nexata fariseomonae Jesús yainyabatsi, jeye:

—¿Eta xua metha Moisés pia peitorobi coyenewa copata xua jiton itacupatsi xua pecatsiwa papera piseuri po paperatha tina xua pexubiwa tsane piseuri? jei fariseomonae.

⁸ Jesús jume nota, jeye:

—Moisés copata xua paxam painya seuriwi painya nepunapenteibiwa jopa painya nejume cowantsi jiwixae Nacom. Apra caena bayatha Nacom jopa baxua copatsiyo poxonae aena foforatapona jiwí. ⁹ Nama paca tsipaebatsi pon piowa punaxuba xua poxonae yabuyo bequein jopa nasi cui exanaeyo ichantha, icha bapon ichowa pita, bapon abe exana Nacom peitutha tatsi tsipei Nacom tsitatsi xua powa copiya baru popona apra bara piowa tatsi, jei Jesús.

¹⁰ Nexata Jesús tsipaebatsi pijimonae, jeye:

—Icha Nacom jopa copatsiyo xua pebin piowa punaxubina poxonae barapowa saya u exana pocotsiwa pebin aichaxaibi, baxua bichocono ajumeyapube. Metha nexata pebin jopa jitha ecaetsipae. Bara saya pebin metha misa ecaetsipa, jeichichi Jesús pijimonae.

¹¹ Jesús barai pijimonae, jeye:

—Daxita jiwí ba jopa itacupaetsi xua peyabara yaputaewa pocotsiwa aunxuae payabara caunutame xua jopa jitha peenaewa. Saya meisa pomonae Nacom yabara yaputane exana barapo coyene, barapomonae itacupatsi xua pecana exanaewa barapo coyenetha xua jopa jitha peenaewa. ¹² Barichi acoibi po cui coyenewabe xua pebiwi jopa penotsiwa pecotsiwaxi jiwí. Ichamonae aichaxaibi xua jitha peenaewa tsipei barapocotsi jiwimonae bara yacuiya naexana xua jopa penotsiwa yabuxitha. Ichamonae jopa itacupaetsi xua pecotsiwaxi penotsiwa tsipei bayatha tobu jucuatasi, xua ichamonae tobu jucua. Daxota jopa itacupaetsi xua pexui pecanaexanaewa. Ichamonae aichaxaibi xua pecotsiwaxi nota, peichichipaexae xua saya u peexanaewa pocotsiwa Nacom itoroba. Pon itacupatsi xua peyabara yaputaewa xua pocotsi coyene jopa pepichiwa pecotsiwa, bara moya jopa exanae tsane xua pepichiwa tsane pecotsiwa, jei Jesús.

Meje yabara poxonae Jesús jeye pexuitha: “Barabu Nacom beta paca yawenaena”, jei (Mr 10.13-16; Lc 18.15-17)

¹³ Nexata jiwí Jesús tacaponatsi pexui xua Jesús pejayabinexa pecobetha yawa xua Nacomtha pewucaenexa barapo pexui nexa xua pejeinexa: “Barabu Nacom beta paca yawenaena”, pejeinexa. Ichitha Jesús pijimonae tatsi poxonae baxua tane, tamropata notarucupa xua barapomonae cui matawentatsi pomonae pexui carendena tsaibi.

¹⁴ Ichitha Jesús jume barai pijimonae, jeye:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonae nexa pomonae pejuntu coyene xanepanaewi icha pexui ichi. Pexui pia cui xua tayapu xanepanatsi xua pia juntu coyeneintha jume cowanta Nacom, jei Jesús pijimonaetha.

¹⁵ Poxonae Jesús nacobe weta xua pexui jayabatsi yawa xua Nacomtha tawuca barapo pexui, xua jeye: “Barabũ Nacom beta paca yawenaena”, jei. Bapoxonae Jesús wepu pona barapomonae.

*Meje yabara poxonae pewowin pon copei pexeinaein Jesús tsipaebatsi
(Mr 10.17-31; Lc 18.18-30)*

¹⁶ Pewowin pona xua Jesús petaenexatsi. Barapo pewowin jeye Jesthath:

—Ja Tanecuidubim, maisa nejũntũ coyene xanepanaem. ¿Eta xua copiya matha exanocuaein xua ajũntũyapusũya tapoponaewa tsane xua ataya tsane? jei.

¹⁷ Jesús jume barai, jeye:

—¿Eta xua nebaram: ‘Nejũntũ coyene xanepanaem’, jam? Apra ichũn dapon aibi pon nejũntũ coyene xanepanaein. Jame meisa apra bapon Nacom compa nejũntũ coyene xanepanaein. Icha ichichipame xua ajũntũyapusũya nepoponaewa xua ataya tsane, moya matha exande pocotsiwa Moisés itoroba pia peitorobi jume coyenewantha, jei Jesús.

¹⁸ Pewowin Jesús jume baraichi jeye:

—¿Eta po peitorobi jume coyenewara? jei.

Jesús jume notsiya namchi xua Moisés pia peitorobi coyenewa namchi, jeye:

—Jopa ichũn bexubinde. Jopa ichowa pichinde ichũn piowa tatsi. Jopa caibinde ichũn piawan tatsi. Jopa naerabiya cayabara paebinde pocotsiwa ichamonae exana. ¹⁹ Axatha barũ jume cui itura jinare. Antobeinde necatsicuarabũ enaewi icha ichim xua jincoutha naantobem’, jei Moises, jei Jesús.

²⁰ Pewowin Jesús jume baraichi, jeye:

—Daxita caena bayatha barapo coyenein exaneiban. Poxonae pexuyothan tamropata pitaban, beya anoxuae yacuiya pinyon. ¿Eta pocotsiwa meisa inta acoibi xua exanaein? jei barapo pewowin.

²¹ Jesús jume barai, jei:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyo nexa tsane xua pocotsiwa xanepanaya neexanaewa, matha daxita caenaere pocotsiwa xename yawa catsibare pomonaetha pomonae peacopeibi jiwi. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha pocotsiwa Nacom necajũntana botsiwa pocotsiwa bichocono wũnae, jei Jesús.

²² Poxonae barapo pewowin baxua jume taeba bichocono unthũthũ wecoyeya ponataba tsipei bichocono copei pexeinaein.

²³ Nexata Jesús barai pijimonaetha, jeye:

—Bara xaniyeya paca tsipaebatsi. Maisa bichocono ayapubecai xua pomonae bichocono copei pexeinaewi naexana Nacom pijimonaetha tatsi jiwana pomonae Nacom itorobiya peewatsixae. Tsipei barapomonae bichocono antasiwayatane barapo pia copei beyacaincha xua Nacom antobetsi. ²⁴ Equeicha paca tsipaebatsi. Bichocono acuiruyapube xua duwein pon pewũn camello xua pejoniyawa acuicheto peetabũ wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonaetha tatsi jiwana pomonae Nacom itorobiya peewatsixae beyacaincha xua poxonae acuiruyapube xua poxonae camello acuicheto peetabũ wan iya pejoniyawa, jei Jesús.

²⁵ Poxonae baxua Jesús jume taerũcupatsi pijimonaetha, barapomonae yabara najũntũ cui coyene cabenaeca, yawa Jesús jeichichi:

—Bapoxonae ¿jintam metha nexata itacũpatsi xua penacapanepaewa pia coutha? jei barapomonae.

²⁶ Jesús necotsiya jeye:

—Pebiwi ba jopa itacupaetsi xua baxua exana, saya jame meisa Nacom compa itacupaetsi xua jiwi napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁷ Nexata Pedro jeye Jesthath:

—Pata Tanecanamataxeinaem, paxan daxita pacuenta ponan pocotsiwa paxeinan pata paca puna ponaewa tsainchi. Tsipei baxua bayatha paexanan ¿eta pocotsiwa metha nexata pana necatsiname? jei.

²⁸ Jesús jume nota, jeye:

—Bara xaniyeya paca tsipaebatsi. Po mataqueitha tsane Nacom pena ira exanaena, barapo mataqueitha, xan ponxaein Nacom Tananeitapetsin ecaein tapexeinya itupanae ecaethopaewatha po tapexeinya itupanae caecaethopaewa bichocono itupana. Paxam pomonae tapana nepuna jinompaewim doce po itupanae eneibithopeibiwatha paenae-name painya yabara paebinxam tsane pomonae doce po matabuxuyobe israelmonae pia penatsicuentsiwa abe peexanaexae. ²⁹ Daxita pomonae taneantobe jiwixae xua pecueicueije tsurubenaebiyaenexa Nacom Pejume Diwesi, Nacom beta cana exanaena barapomonae. Nacom beta cana exanaena pomonae pia bon pecuenta ponaexae, matauta ichacuitha ichamonae peweicho jiwi pecuenta ponaexae, matautano ichacuitha pamcho jiwi pecuenta ponaexae, matautano ichacuitha paxeiwi pecuenta ponaexae, matautano ichacuitha pena jiwi pecuenta ponaexae, matauta ichacuitha pia pexui pecuenta ponaexae, matautano ichacuitha pia iran pecuenta ponaexae. Barapomonae barapo coyenein exana tana neantobe jiwixae, daxota daxita barapomonaetha Nacom jopa juniya catsi tsane barapo cae pin nacuathe. Matautano barapomonaetha Nacom catsina pia peitorobi nacuatheicha peajuntucoyeneyapuswa, po peajuntucoyeneyapuswa ataya tsiteca. ³⁰ Pomonae xua anoxuae pomonae jiwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jiwi tsane. Pomonae xua anoxuae pepawi naexana, pomonae jiwi jopa petsita ainya cui jiwichi po cae pin nacuathe, barapomonae Nacom pia peitorobi nacuatheicha peainya cui jiwi tsane, jei Jesús.

20

Meje yabara poxonae Jesús paeba pecayabara juta pepaebi diwesiyo pomonae uva pabitha petanacuichiwi

¹ Equeicha Jesús tsipaeba pijimonae pecayabara juta pepaebi diwesiyotha, jeye: “Nacom pijimonae matomatsina pia nacuatheicha xua be pematomatsiwa petaexanaexaetsi pia petanacuichiwa tatsi icha pon pabi pexeinaein ichi xua poxonae matoma catsiba pomonaetha pomonae petanacuichixaetsi. Pon pabi pexeinaein caemumbotha pona xua jeita pomonae pia petanacuichinexa tsainchi pia uva bacabo. ² Bapon muxu tsipaeba pia petanacuichiwichi, jeye: ‘Paxam painta nacuire ta uva bacabo, nexata paca matoma catsibebinchi pocotsi paratiyo xua caentaqueitha nexa’, jei. Bapoxonae bapon pia petanacuichiwichi itoroba pia uva bacabo beya. ³ Bapoxonae equeicha bapon pona poxonae xometo taju beequina xua pejeichinexa ichamonae pomonae petanacuichiwichinexa tsainchi pia uva bacabo. Bapoxonae bapon tane ichamonae, pomonae panatha saya jinompa xua jopa nacuitompaeyo. ⁴ Bapon barai barapomonae jeye: ‘Paxam iruru painta nacuire ta uva pabi. Nexata beta paca matoma catsibinchi, xua pocotsi paratiyo po horatha panacuitame nexa’, jei. Bapoxonae barapomonae pona pabi beya penacuichinexa. ⁵ Bapon mateinyaxae equeicha pona xua pejeichinexa ichamonae pomonae pia petanacuichiwichi tsainchi. Barichi equeicha poxonae tabopiya pona xua pejeichinexa ichamonae pomonae pia petanacuichiwichi tsainchi. ⁶ Bapon equeicha pona pana beya poxonae xometo iriya ducuanaiha xua pejeichinexa ichamonae pomonae pia petanacuichiwichi tsainchi. Bapon equeicha tane ichamonae pomonae xua jopa iru nacuitompaeyo. Bapon barai barapomonaetha, jeye: ‘¿Eta xua metha came saya anoxuae paumenae po panathe, xua jopa panacuitompaem?’ jei pabi pexeinaein.

⁷ Barapomonaē jume nota, jeye: ‘Canta dapon aibi pon pata tana neitorobiwa tsane’, jei. Nexata bapon barai barapomonaē, jeye: ‘Paxam paponare, iruru painta nacuire ta uva pabi, nexata beta paca matoma catsibinchi xua pocotsi paratiyo po horatha painya nenacuichixae tsane’, jei pon pabi pexeinaein.

⁸ “Poxonaē quirei tsanaicha pon pabi pexeinaein, bapon itoroba pon pia petayapucaecaeinchi uva pabi, jeye: ‘Inta wabare pomonaē inta nacuita yawa matoma catsibare. Tamropata wabaponde yawa matoma catsibaponde. Copiya matha wabare pomonaē opi dubena pomonaē inta cotacaya nacuita poxonaē xometo iriya ducunaicha, beya poxonaē papataponaena pomonaē copiya inta nacuita caemumbotha’, jei. ⁹ Nexata copiya pata pomonaē cotacaya nacuita poxonaē xometo iriya ducunaicha. Daxita barapoyobe pomonaē cotacaya nacuita bara beta matoma catsibatsi xua pocotsi paratiyo caentaqueitha nexa, bequein bara jopa pin mataqueitha nacuichiyo. ¹⁰ Nexata bara iru bapoxonaē pata pomonaē tamropata notarucupa xua nacuita poxonaē tabopiya, bara barapomonaē iru beta matoma catsibatsi pocotsi paratiyo caentaqueitha nexa. Bapoxonaē iru pata pomonaē tamropata notarucupa xua nacuita poxonaē mateinyaxae, bara barapomonaē iru beta matoma catsibatsi, pocotsi paratiyo caentaqueitha nexa. Bapoxonaē iru pata pomonaē tamropata notarucupa xua nacuita poxonaē xometo taju beequina, bara barapomonaē iru beta matoma catsibatsi, pocotsi paratiyo caentaqueitha nexa. Bapoxonaē iru nama pata pomonaē tamropata notarucupa xua nacuita caemumbotha. Barapomonaē najei: ‘Metha equeicha mataropeichiya naca catsibina paratixi tsipei nacuitatsi caemumbotha’, najei barapomonaē. Daemetha barapomonaē saya matoma catsibatsi, pocotsi paratiyo caentaqueitha nexa. ¹¹ Ichitha poxonaē barapomonaē matoma nota, itaconacarucupa pontha pon peitorobixae barapomonaetha. ¹² Barapomonaē anaya jei bapontha: ‘Pomonaē nacuita cotacaya, saya cae horatha nacuita, barapomonaē matoma catsibame pocotsi matoma pana catsibame. Nama apara paxan daunweya panacuitan, yawa atsatha daunweya panacuitan’, jei barapomonaē. ¹³ Ichitha pon pabi pexeinaein jume nota caeintha barapomonaē jiwana pintha, jeye: ‘Tajiton, apara jopa bara abe pacata exanaetsi. Canaunxuae paca muxu tsipaebatsiba paca jeichi: Paca matoma catsibinchi xua pocotsi paratiyo caentaqueitha nexa, paca jeichi. ¹⁴ Bara jinya matoma pire. Bara nawiyama. Xan ichichipan tacoya matoma catsiban pomonaē quiripitha nacuita barapocotsi matoma, pocotsi matoma jupa paca catsibatsi. ¹⁵ Apara xan tawaxae itacoxonan xua tantoma exanaewa. Apara pauwame ichamonaē xua jopa taasiwaxae xua tantoma exanaewa ichamonaetha’, jei pon pabi pexeinaein.

¹⁶ “Nacom barapocotsi juta coyeneya cana ichi tsane jiwitha icha pon pabi pexeinaein ichi poxonaē cana exana pomonaetha pomonaē pia petanacuichiwichi. Pomonaē xua anoxuae pepawi naexana, pomonaē jiwi jopa petsita ainya cui jiwichi po cae pin nacuathe, barapomonaē Nacom pia peitorobi nacuatheicha peainya cui jiwi tsane. Pomonaē xua anoxuae pomonaē xua jiwi petsita ainya cui jiwichi po cae pin nacuathe, barapomonaē bexa Nacom pia peitorobi nacuatheicha jopa peainya cui jiwi tsane”, jei Jesús.

Meje yabara poxonaē Jesús nayabara paeba acoibi po coyenebetha xua poxonaē tupaena (Mr 10.32-34; Lc 18.31-34)

¹⁷ Bapoxonaē pirapae Jesús pona Jerusalén tomara beya. Poxonaē cataunxuae Jesús pijimonaē baru ecapona namtotha pomonaē doce poyobe tatsi, barapo doce poyobe Jesús meisa waba aisowa beya petsipaebinexa.

¹⁸ Jesús jeye:

—Anoxuae ponaeinchi Jerusalén tomara beya. Barapo tomaratha xan ponxaein Nacom Tananeitapetsin necaenaetsina sacerdotemonaē pia pentacaponawitha tatsi yawa pomonaetha pomonaē jiwi pecuidubiwi Moisés pia peitorobi coyene tatsi. Barapomonaē necaenaetsina ichamonaetha xua ichamonaē tana nebexubiwa tsane. ¹⁹ Bapoxonaē daxita barapomonaē necaenaetsina pomonaetha pomonaē penanapaincha jinompawei

xua icha nacua werena peponaewi xua barapomonaе tana necui caponaenexa. Matautano barapo penanapaincha jinompaewi nebena yawano tɔparucua neexanaena nae-totha. Daichitha poxonaе acoibi po matabibе yapu jopaena equeicha Nacom asu neexanaena petɔpae cuiru coyene weya, jei Jesuѕ.

Meje yabara poxonaе Jesuѕ wɔcatsi powa, Santiago pena tatsi xua iru Juan pena tatsi (Mr 10.35-45)

²⁰ Nexata petsiriwa Jesuѕ imoxoyo caquita uncuatabatsi. Barapowa, Juan pena tatsi yawa Santiago pena tatsi. Juan iru Santiago, baponbe Zebedeo pexantobe tatsi. Barapo petsiriwa pexantobe baru patopa Jestha. Barapo petsiriwa pentabocototha uncuа Jesuѕ peitabaratha tatsi, xua Jesuѕ pewɔcaenexa tsainchi. ²¹ Jesuѕ barai bapowatha, jeye:

—¿Eta pocotsiwa jinya newɔcaetsi? jei.

Barapowa Jesuѕ jume notatsi, jeye:

—Poxonaе matabi patopaena po matabeitha itorobiya ewatsiname jiji barapo matabeitha cawɔcatsi xua bara itorobiname barapo taxantobe, xua nantiyabe peecaewa tsanebe xamtha, xua ichun necoxa weya peecaewa tsane, xua ichun netsocona weya peecaewa tsane, jei.

²² Ichitha Jesuѕ baraibe baraponbe, jeye:

—Paxambe jopa payaputaembe xua pocotsiwa pana newɔcaenamebe. Poxonaе ichamonaе abe inta exanaena bara saya copatsin xua barapomonaе bara neperaxa jubina. Barichi poxoru paxambe pana neantobem, ¿bara iru paca itacɔpabe xua bara pacopatsinamebe xua bara ichamonaе paca peraxa jubinabe? Barichin bara saya copatsin xua ichamonaе bara tɔpa neexanaena. Barichi, ¿bara iru paca itacɔpabe xua bara pacopatsinamebe xua bara ichamonaе tɔpa paca exanaenabe? jei Jesuѕ.

Santiago peweichobe jume notabe, jeibe:

—Aa, bara pana itacɔpabe, jeibe.

²³ Jesuѕ jume nota, jeye:

—Bara bara xainyei barapocotsi coyene ichamonaе paca cana exanaenabe. Ichamonaе paca peraxa exanaenabe. Matautano tɔpa paca exanaenabeno icha xan necana ichi tsane. Nama xua xantha nantiya paecamebe xua ichun pocotsiwa tacoxa weya eca, yawa xua ichun tatsocona weya eca, baxua jopa tacoya yabara itorobinyo. Saya jame Taxa Nacom meisa baxua taexanaena pomonaetha pomonaе caena bayatha tsiwunaeta xua peenaewa tsane, jei Jesuѕ.

²⁴ Jesuѕ pijimonaе pomonaе umena, pomonaе diez poyobe jume tane xua Santiago iru Juan Jesuѕ wɔcatsibe. Barapoxonaе barapo diez poyobe, Santiago iru Juan yabara anaepanarɔcɔpatsibe. ²⁵ Ichitha Jesuѕ pia xainya berena pijimonaе waba yawa namchiya jeye barapomonaetha:

—Paxam bayatha pataneme po coyenewa ba exana pomonaе jopa judiomonaе naexanaeyo. Barapomonaе ba nantaɔta pomonaе pia nacua tatsi pia petaewatsiwichi tatsi. Daichitha barapo nacua peewatsiwi aebiya itoroba piamonaе, xua daxota bichocono jiji taayapubetsi. ²⁶ Ichitha nama paxam barapocotsi coyeneya jopa barapaichim tsane. Seicaya nama icha juntu coyenyatha paca itorobatsi. Icha pon paxam jiwana icha bapon ichichipa naexana be pocotsin canamataxeina ichamonaе, bapon matha bewa copiya daxita paxam beta amanaya pacata nacuichina. ²⁷ Matautano icha pon paxam jiwana icha bapon ichichipa naexana be pocotsin bichocono ainya cui penaexanaein xua beyacaincha ichamonaе, bapon bewa copiya matha daxita paxam amanaya pacata nacuichina pia coya peichichipaexae. ²⁸ Icha be pocotsi coyeneya icha ichin, bara paichinde. Xan ponxaein Nacom Tananeitapetsin patopeican xua tanacuichinexa tsane ichamonaе nexa. Aparajopa baxua tsipatopaeinyo xua ichamonaе inta penacuichiwanaxa tsane. Saya patopeican tsipei ichichipan xua daxita carepaya jiji tayawenaewa tsane. Matautano patopeican xua tatsitɔpaenexa tsane be pentoma xua daxita jiji pepanenebiyaenexa abe pia peexanae cuiru coyenein weya tatsi, jei Jesuѕ pijimonaetha.

*Meje yabara poxonae Jesús axaibi exana ponbe peitata nacutsinbe
(Mr 10.46-52; Lc 18.35-43)*

²⁹ Poxonae Jesús pijimonaе baru pontaba Jericó tomara weya, bapoxonae Jesús puna poinchi pin bicheito. ³⁰ Barapo Jerusalén namto iya ecabe pon peitata nacutsinbe. Poxonaе baponbe, ponbe peitata nacutsinbe jume yaputanebe xua juinya Jesús xentapona, bapoxonaе jume daunweya wawaibe, jeibe:

—¡Pon jiwi Necanamataxeinaem, ponxaem David pia pemomoxi susato jiwanapim, pana neyabara najuntu coyene xeinarebe xua pata taneyawenaenexamebe! jei baraponbe ponbe peitata nacutsinbe.

³¹ Barapo peitata nacutsinbe jume matawentatsibe barapo pin bicheito xua moya peecaenexabe. Ichitha baponbe equeicha jume daunweya wawaibe, beyacaincha xua poxonaе copiya, jeyebe:

—¡Pon jiwi Necanamataxeinaem, ponxaem David pia pemomoxi susato jiwanapim, pana neyabara najuntu coyene xeinarebe xua pata taneyawenaenexamebe! jei baraponbe ponbe peitata nacutsinbe.

³² Nexata Jesús naruntaba yawa wabatsibe ponbe peitata nacutsinbe. Bapoxonaе baponbe Jesús yainyaba, jeye:

—¿Eta xua jinya pata cata exanaetsibe? jei Jesús.

³³ Baraponbe Jesús jume notatsibe, jeibe:

—Pon jiwi Necanamataxeinaem, bepanecotsinbe cuinaya, jeibe baponbe. ³⁴ Nexata baponbe Jesús yabara najuntu coyene xeinabe xua pia peyawenaewa tsane. Bapoxonaе baponbe Jesús itamaiquei jayababe. Bapoxonaе baponbe nainya necotaxubabe. Jesthа napuna ponabe.

21

*Meje yabara poxonae Jesús Jerusalén tomaratha patopa
(Mr 11.1-11; Lc 19.28-40; Jn 12.12-19)*

¹ Poxonaе bara itiya pona Jerusalén tomara, Jesús bara muxu pebaru patopae pijimonaе Betfagé tomaratha. Barapo Betfagé tomara demxuwa itapatororotha eca po demxuwa pewun Olivowa, tsipei baxota umena olivo naein. Bapoxonaе Jesús itoroba pebinbe nacueyatabe xua doce poyobe jiwanabe. ² Jesús baraibe baponbe, jeye:

—Paponarebe po tomara painya itabaraya equiya. Poxonaе papatopaenamebe barapo tomaratha pacaxinaenamebe burra pesowato xua pon quetanotatsi yawano xua penun quetanotatsi pon pebto. Barapo burra paisanaxorebe yawa payama carenandebe coxiwa yawa penunno. ³ Icha ichun paca barai tsane: ‘¿Eta xua payama isanaxubamebe burra?’ jei tsane, nexata pajandebe: ‘Pon jiwi Pecanamataxeinaein bepa pata yama cayiyaeinjei, tsipei pinae nantawenona’, pajandebe. Nexata bapoxonaе nainya bapon paca cobe itorobinabe xua painya neyama carenaenexambe tsane, jei Jesús.

⁴ Poxonaе Jesús daxita baxua paeba bara bapoxonaе nayabara jume weta pocotsiwa bayatha Isaías yabara paeba pijume diwesitha xua Mesías pepatopaewa tsane Jerusalén tomaratha, jeye:

⁵ “Patsipaebare Sión tomarapiwi.

Pajande: ‘Pataename pon itorobiya painya pepa paca Ewatsin.

Pacata junteма patopaena, xua burriyotha

equeicaena, penuntha xua burra pesowato

coxi tatsi’ pajande”, jei pon Nacom

pia peitorobi jume pepaebin,

bapon Isaías, xua Mesías yabara paebatsi.

⁶ Nexata Jesús pijimonaе jitonbe tatsi ponabe. Matautano baponbe exanabe pocotsiwa bayatha Jesús itoroba. ⁷ Baponbe yama carenabe burra pesowato yawa yama carenabe penun. Baponbe pia paparuwan tsijuma jebicabe po paparuwan matha weruyabe

coxiwathano yawa penunthano. Bapoxonae Jesús equeica penuntha. ⁸ Jiwi, barapo jiwi pin bicheito bichocono. Bapoxonae barapo pin bicheito namtotha paparuwan yerababa jejabapoinya. Ichamonae peaxu ucuboba po axu icha coichaxu axu ichi. Bapoxonae barapo axu, namtotha axu jejabapoinya. Daxita barapomonae barapo coyene exana xua Jesús pebaru cui itura jinaenexa tsainchi. ⁹ Pomonae, xua Jesús tsiwana enapoinchi iruru pomonae Jesús peputha taenapoinchi daxita barapomonae bichocono jume daunweya wawaya jeye:

—¡Pai jayana, barabu jiwi baru cui itura jinaena bapon pon David pia pemomoxi susatopin tatsi! Bapon jiwi yabara jei: ‘¡Bapon David pexanto tatsi!’ jei. ¡Maisa Jesús pon jiwi itorobiya pia pepa peewatsinchi, maisa wuna! ¡Bapon patopa Nacom peitorobixae! ¡Maisa Nacom bichocono wuna jaintatsi pon athabeicha eca! jei barapomonae.

¹⁰ Poxonae Jesús patopa Jerusalén tomaratha, daxita barapo tomarapiwi najume cayayatsiya paeba. Cae bicheitomonae nayainyaba, jeye:

—¿Jintam metha bapon jane? najei.

¹¹ Ichamonae jume nota, jeye:

—Apara bapon Jesús pon Nacom pia peitorobi jume pepaebin, pon Nazaret tomarapin po tomara eca Galilea nacuatha, jei ichamonae xua iru ichamonae jume notatsi.

Meje yabara poxonae Jesús aisowa benapuna torobabiya pomonae Nacom pin pia botha pecaenaetsiwi

(Mr 11.15-19; Lc 19.45-48; Jn 2.13-22)

¹² Bapoxonae Jesús joniya Nacom pin pia botha, yawa aisowa benapuna torobabiya pomonae caenaeta baxota. Jesús tabu tayebiya bebai iratha pocotsiwa pexaethopaewan, po pexaethopaewantha nantiya nacatsiba paratixi yawa xua tabu tayebiya bebai iratha peenaewan po peenaewan ichaxota ena pomonae caenaeta topibo. ¹³ Jesús barai barapomonae:

—Nacom Pejume Diwesitha namchi, jeye: ‘Tabo apara po botha jiwi tanetsipaebinexa tsaibi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia muthu tutu pacana exaname ichaxota pijunuwi nantsiyabeibathopa tsipei baxota panacaetutame saya u xua painya necaibinexam tsane paratixi pomonaetha pomonae xua pateiba xua Nacom petsipaebinexatsi, jei Jesús.

¹⁴ Barapo Nacom pin pia botha tatsi, Jesús imoxoyo caquita umenarucupatsi pomonae peitata nacutsiwi. Iruru Jesús imoxoyo caquita umenarucupatsi pomonae pejayujayu-jeiwi. Jesús axaibi exana daxita barapomonae. ¹⁵ Sacerdotemonae pia pentacaponae tatsi iruru pomonae jiwi pecuidubiwi Moisés pia peitorobi coyenewa tatsi, daxita barapomonae tane pocotsiwa Jesús exana pia pexeinya petsita itutsi coyenewatha. Daxita barapomonae jume tane xua pexui wawai Nacom pin pia botha tatsi xua pexui Jesús yabara jeichichi: “¡Pai jayana, barabu jiwi baru cui itura jinaena bapon pon David pia pemomoxi susato jiwana pinsi! Pon jiwi yabara jei: ‘Bapon David pexanto tatsi’, jei”, jei pexui. Bapoxonae daxita pomonae sacerdotemonae pia pentacaponae tatsi iruru pomonae jiwi pecuidubiwi Moisés pia peitorobi coyenewa tatsi anaepana poxonae Jesús cui tainchi yawa xua jume tainchino. ¹⁶ Daxita barapomonae jopa ichipaeyo xua pexui paeba, daxota anaya Jesús jeichichi:

—¿Bayatha jume taneme xua baxua pexui cayabara wawaya namchi? jei barapomonae.

Jesús jume nota barapomonae, jeye:

—Aa, bara bayatha jume tan xua pexui newuna jainta. Paxam bayatha payorobame Nacom Pejume Diwesi xua pexui bara cui copatatsi xua bara wuna pejointeibiwa tsane. David pexui yabara jeichichi Nacom Pejume Diwesitha, jeye:

‘Xam Nacom, cana exaname pexui poxi isainatsi,
iru poxi jinompena, xua barapoxi pexeinya
weixi cayabara caununaya naxuna
poxonae sawuna jainchina’,

jei David Nacom Pejume Diwesitha,
jei Jesús daxita barapomonaetha.

¹⁷ Nexata Jesús daxita barapomonaetha wepu pona Jerusalén tomara weya. Bapoxonaetha Betania tomara bewarapiya. Baxota merawi maiteca.

*Meje yabara poxonaetha Jesús biatane higuera nae xua jopa penacoichixae
(Mr 11.12-14, 20-26)*

¹⁸ Poxonaetha Jesús caemumbotha equeicha caibe iya Jerusalén tomara beya, bichocono jainpa pona. ¹⁹ Bapoxonaetha Jesús imoxoyo namtotha taenota higuera nae. Imoxoyo caquita pona piyain, pia taetsi pethei. Daichitha barapo naetha Jesús jopa taeyo pethei, saya u noxu tane. Nexata Jesús biataenota higuera nae, jeye:

—Bapana equeicha jopa nacoichim tsane pethei, jei Jesús higuera naetha.

Bapoxonaetha caena nainya higuera nae yununcua. ²⁰ Poxonaetha Jesús cui tainchi pijimonaetha baxua barapomonaetha yabara najuntæ coyene cui cabenaeca bichocono. Yawa Jesús yainyabatsi pijimonaetha, jeye:

—¿Eta xua metha higuera nae nainya yununcua? jeichichi Jesús pijimonaetha.

²¹ Jesús jume nota pijimonaetha, jeye:

—Bara xaniyeya paca tsipaebatsi. Icha xanepanaya payabara jume cowuntame xua Nacom painya nepaca cayawenaewa xuano xua jopa ainya unthuton paxeinaem bara paca itacupaena xua painya nepaebiwa icha ichin xua cana exanan higuera nae. Matautano bara paca itacupaena xua painya nejeiwa uruto beya xua pajam: ‘Uruto natsixitabare, mar mene beya jopare’, xua painya nejeiwa. Bapoxonaetha bara baxua jopa bayathiyo tsane. ²² Daxita xua xuan pocotsiwan Nacom beya pawucame, icha bara xanepanaya pajume cowuntsiya wucame, bara Nacom paca catsibina baxuan, jei Jesús.

*Meje yabara xua Jesús pia peitorobi coyenewa xeina
(Mr 11.27-33; Lc 20.1-8)*

²³ Nexata bapoxonaetha Jesús joniya Nacom pin pia botha tatsi. Poxonaetha cataunxuae Jesús baxota cuidubuncua jiwi, bapoxonaetha Jesús imoxoyo caquita umenarucupatsi sacerdotemonaetha pia pentacaponae tatsi iru judiomonaetha pia pitiri jiwi tatsi. Daxita barapomonaetha Jesús yainyabatsi, jeye:

—¿Eta po peayapusu itorobi coyenewatha cuidubame baxuan? ¿Jintam cacata barapo peayapusu itorobi coyenewa?

²⁴ Jesús jume nota barapomonaetha, jeye:

—Xan iruru tha barichichi paca yainyabinchi. Icha beta pana nejume notsiname, bapoxonaetha xuya yabara paca tsipaebinchi xua po peayapusu itorobi coyeneyatha taexanaewa baxuan. ²⁵ ¿Jintam Juan cui itorobatsi xua bautisaba? ¿Metha bara Nacom cui itoroba jampa? ¿Metha bara jiwi cui itoroba jampa? Pana nejume nore, jei Jesús, xua Juan yabara paebatsi pon caena bayatha tupa.

Nexata daxita barapomonaetha caemonaetha najume matsontsonoba, najei: “¿Eta xua metha jei tsainchi? Icha jei tsipaetsi: ‘Juan cui itorobatsi Nacom xua pebautisabiwa jiwi’, metha naca jei tsipae: ‘¿Eta xua metha nexata jopa pajume cowuntsim Juan?’ metha naca jei tsipae Jesús. ²⁶ Jiwi cui cunuwatsi icha jeichi: ‘Juan cui itorobatsi jiwi xua bautisaba’, icha jeichi. Metha bapoxonaetha jiwi naca casebichipa anaya. Tsipei daxita jiwi Juan yabara jume cowuntatsi xua bapon apara pon Nacom pia peitorobi jume tatsi pepaebi jiton”, najei barapomonaetha. ²⁷ Nexata barapomonaetha Jesús baraichi, jeye:

—Canta jopa payaputaeinyo, jei barapomonaetha.

Nexata Jesús barai barapomonaetha, jeye:

—Nexata barichin tsane, jopa yabara paca tsipaebi tsainchi po peayapusu itorobi coyeneyatha xua daxita taexanaewan, jei Jesús.

Meje yabara poxonaetha Jesús cuiduba pecayabara juta pepaebi diwesiyo xua pebin ainya pexantobe tatsi

²⁸ Equeicha Jesús namchi Nacom pin pia botha daxita barapomonaetha, xua sacerdotemonae pia pentacaponae witha tatsi, iru judiomonae pia pitiri jiwitha tatsino. Jesús jeye:

—Moya pana nejume naitaeware pocotsiwa paca tsipaebinchi. Pebin nacueyatabe poyobe tatsi pexantobe tatsibe. Bapon caeintha nacoxi barai, jeye: ‘Owae, inta anoxuae uva bacabo pabi nacuire’, jei. ²⁹ Bapon jume notatsi pexanto jeye: ‘Bara, aichaxaibin’, jeichichi bapon pexanto. Daichitha equeicha bapon pexanto tatsi nanta xeinataba, bapoxonae pona xua penacuichinexa uva pabi, paxa tatsi pia pabi tatsi. ³⁰ Pirapae equeicha ichantha, nacoxi barai barapo jumetha, jeye: ‘Owae, inta anoxuae uva pabi nacuire’, jei bapon pexantho. Bapon paxa jume nota, jeye: ‘Je, moya daichane, methaunxae ponaein’, jei paxatha. Daichitha bapon jopa ponaeyo. ³¹ Incane yabara paca yainyabinchi xua bapon barapo pexantobe tatsi, zeta po pewowinda pon exana pocotsiwa paxa itorobatsi? jei Jesús.

Barapomonae Jesús jume notatsi, jeye:

—Pon copiya paxa itorobatsi, jeichichi Jesús barapomonae.

Nexata Jesús jume barai barapomonae, jeye:

—Bara xaniyan yabara paca tsipaebatsi, pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa, iruru yabuxi powaxi pesi cui weiweinaewaxi. Bara bequein barapomonae peantucoyenebewi, daichitha barapomonae naexanaena Nacom piamonae tatsi jiwana tatsi, beya poxonae paxam iru panaexaname Nacom piamonae tatsi jiwana tatsi. ³² Juan pon jiwi Pebautisabin patopa xua pia nepaca cuidubinexa xua pocotsiwa bewa paexanaename painya nexainaenexa tsane po juntu coyene pexanepanae juntu coyene. Daichitha paxam jopa pajume cowuntsim pocotsiwa Juan paeba. Ichitha Juan yabara jume cowuntatsi pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchichi nexa. Iruru yabuxi powaxi pesi cui weiweinaewaxi Juan yabara jume cowuntatsi po coyene Nacom Juan peitorobiwatsi. Nama paxam bequein bara Juan pacui taneme pocotsiwa exana, daichitha jopa painya neauraxae poxonae abe paexaname. Daxota icha juntu coyene jopa paxeinaem xua painya nejume cowuntsinexa Nacom, jei Jesús.

Meje yabara poxonae Jesús paeba pecayabara juta pepaebi diwesiyo pomonae xua abe exana, pomonae petayapucaenaewi uva pabi

(Mr 12.1-12; Lc 20.9-19)

³³ Nexata Jesús equeicha namchi jiwitha, jeye: “Incane pana nejume naitaeware xua paca tsipaebinchi pecayabara juta pepaebi diwesiyo. Matha iruru pebin pia pabi xeina. Bapon uba po unbo pewun uva cuei unbo. Yawano yapu curarata barapo uva pabi ibowantha xua jopa pejojondenaenexa ichamonae barapo pabitha. Yawano baxota ibo fetoto exana, xua barapo ibo fetotha pecubinexa uva cuei. Matautano baxota exananota bo po bo taucha xua baxota pebin bara wenecotequeica uva pabi. Bapoxonae bapon itoroba pomonae pia uva pabi pia petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona. ³⁴ Barapo matacabi tsuxubi po matacabitha uva cuei naweta. Bapoxonae barapo mataqueitha pomonae pabi petayapucaenaewi jiwana itapetanota xua penawetsiwa. Bapoxonae pon uva pabi pexeinaein, bapon pomonae petanacuichiwichi jiwana itoroba, xua petawucaenexa tsainchi uva cuei pomonae beya, pomonae pabi petayapucaenaewichi. ³⁵ Ichitha barapomonae, pomonae pabi petayapucaenaewichi teica, teiquebatsi pomonae itorobatsi, pomonae pabi pexeinaein itoroba uva pabi petayapucaenaewichi tatsi beya. Barapomonae pomonae petayapucaenaewi pabi, cuainta caeintha pomonae penajume carutsi jiwichi jiwana pintha. Ichun bexotsi. Ichun ibotontha cuinbabatsi. ³⁶ Pon pabi pexeinaein barichi equeicha itoroba ichamonae pomonae pia petanacuichiwichi. Equeicha barichi pomonae pabi petayapucaenaewi bara jutiya cana exana barapomonaetha.

³⁷ “Bara nama matapainya pexanto itoroba. Bapon najei: ‘Barapomonaē metha taxanto inta yabara baru cui itura jinaeinchi, daxota itoroban bapon’, najei bapon. ³⁸ Dapo jumetha pomonaē pabi petayapucaenaewi poxonaē bapon tainchi barapomonaē najei: ‘Apara bapon paxa copiniwa pichina. Daxota bapon bu bexotsi xainya xeinatsi barapo uva pabi’, najei barapomonaē. ³⁹ Barapo pexanto tatsi uva pabi juma bemaxu cayiyatsi. Baxotiya bexotsi”, jei Jesús.

⁴⁰ Nexata Jesús barai barapo jiwi Nacom pin pia botha, jeye: “Poxonaē pabi pexeinaein patopaena, zeta be cana ichi tsane pomonaetha pomonaē barapo uva pabi pia petayapucaenaewichi?” jei Jesús.

⁴¹ Barapomonaē Jesús jume notatsi, jeye:

—Bapon bewa jutebina barapomonaē, jopa weyataē tsane barapomonaetha xua peantucoyeneyapube jiwixae. Bapoxonaē itorobina ichamonaē xua petayapucaenaenexa tsainchi barapo uva pabi. Barapo pabi petayapucaenaewi matha notsina uva cuei xua naweta. Bapoxonaē tsabina pabi pexeinaein nexa yawa iruru barapomonaē nexaru, jei barapo jiwitha pomonaē peenaexae Nacom pin pia botha.

⁴² Nexata Jesús barai barapomonaē xua nayabara paeba, jeye:

—¡Paxam bara bayatha payorobameba Nacom Pejume Diwesitha! Barapo diwesitha neyabara caunuta poxonaē iboto yabara paeba, xua jeye:

‘Pebiwi pomonaē ibo bon peacabiwi,
barapo pebiwi xuba po iboto tabu caboca
po iboto peainya cui iboto.

Ichitha Nacom itapeta barapo iboto xua
petabu cabocaenexa barapo peainya cui ibotoxae.

Waxainchi nanta xeinatsi jeichichi:

Maisa pocotsiwa Nacom exana naca tsita xanepana’,
jeichichi, jei Nacom Pejume Diwesitha
xua neyabara caunuta.

⁴³ Daxota paca tsipaebatsi, Nacom paca itawetsina xua jopa painya nenaexanaenexa tsane Nacom piamonaē jiwana tatsi pam. Barapo coyenewa xua Nacom piamonaē jiwana tatsi penaexanaē coyenewa Nacom pichina painya xainya weya xua ichamonaetha pecatsinexa pomonaetha pomonaē petsita juntu coyene xanepanaewichi. ⁴⁴ Incane iboto yabara paca tsipaebinchi. Barapo ibototha poxonaē ichauyo jopeica pepurawixi tsanaya. Matautano poxonaē barapo iboto ichauyo matatsun jopeicatsi pebeno tsanaya. Icha barapo iboto ichi poxonaē cana exana ichauxitha peainya cui ibotoxae, xan barapocotsi juta coyeneya barichin pomonaetha pomonaē jopa tana nejume cowuntsiwi. Pia jopa tana neyaputaexae barapomonaē daxota peraxa exanaein, jei Jesús.

⁴⁵ Sacerdotemonaē pia pentacaponae wi tatsi iru fariseomonaē, poxonaē jume tane barapo pecayabara juta pepaebi diwesi, xua Jesús paeba, barapomonaē yaputane xua apara bara Jesús yabara paeba barapomonaē. ⁴⁶ Bequein barapomonaē Jesús muxu pewaetabichi, ichitha barapomonaē junuwa. Jiwi cunuwatsi, tsipei daxita jiwi Jesús xanepanaya yabara paebatsi xua pinae Jesús Nacom pia peitorobi jume pepaebiwi jiwana tatsi.

22

Meje yabara poxonaē Jesús cuiduba pecayabara juta pepaebi diwesiyo xua pin penabanaewa peexanaewa tsane

(Lc 14.15-24)

¹ Equeicha Jesús tsipaeba jiwitha pecayabara juta pepaebi diwesiyo, jeye:

² “Nacom cana exana piamonaetha pomonaē juntu coyene itorobiya ewata, icha pocotsin ichi pon jiwi itorobiya pia pepa peewatsinchi poxonaē waba, xua poxonaē ichamonaē wabatsi xua petsinacaetutsinexa pexaewa xua penabanaenexa. Baxua exana poxonaē pexanto tatsi pecotsiwa pepichixae. ³ Barapon pon jiwi itorobiya pia

pepa peewatsinchi itoroba pomonae pia petanacuichiwichi xua petawabinexa tsainchi pomonae xua bayatha petsipaebixae xua petapatsiwa tsainchi pia botha xua bepa pinae petanabanaewa tsainchi pia botha. Daichitha barapomonae aichaxaibi xua pepatsiwa tsane. ⁴ Bapoxonae barapon pon jiwi itorobiya pia pepa peewatsinchi equeicha itoroba ichamonae pomonae pia petanacuichiwichi, jeye barapomonaetha: ‘Pomonae bayatha tsiwaban pexaewa xua penabanaenexa painta tsipaebare pajande: Bepa pinae nainya papatsim, tsipei pinae bayatha pexaewa canacui wunaeta. Tsipei caena bayatha pinae cobe itoroba xua petajutebiwa tsainchi vacan, yawano po duwein bichocono nasita. Daxota bewa pinae nainya paponnem bara beya xua painya nenanabanaenexa pexaewa, yaitama tsipei pinae pexanto tatsi pichina pecotsiwa, pajande’, jei barapon pon jiwi itorobiya pia pepa peewatsinchi. ⁵ Daichitha barapomonae pomonae tsiwabatsi pexaewa, barapomonae jume naitemata, saya meisa u naitomatsiya exana piawan. Barapomonae jiwana pin pia pabitha pona. Iru ichun piawa caenaetauya. ⁶ Ichamonaeru teica, pomonae pon jiwi itorobiya pia pepa peewatsinchi itoroba, barapomonae teicatsi. Yawano bichocono abe exainchi beya poxonae nama werapa. ⁷ Nexata bapon pon jiwi itorobiya pia pepa peewatsinchi bichocono caseba pomonae petajutebixaetsi pomonae bapon itoroba. Nexata bapon itoroba pia soldadomonae xua barapomonae xuya pejutebinexa tsainchi matauta xua tomara petatautsinexa tsainchi. ⁸ Bapon pirapae equeicha barai ichamonaetha pomonae pia petanacuichiwichi jiwitha, jeye: ‘Bayatha bequein daxita wetan xua penabanaewa tsane, daichitha pomonae waban jopa xanepanaya ne-jume jejeyo daxota jopa bewa patsi tsane xua penabanaenexa. ⁹ Daxota paponde tomara namtontha, po namtontha pin namtontha, baxotiya pomonae poxonae pacaxibeibame, barapomonae painta wabare’, jei bapon. ¹⁰ Pomonae petanacuichiwi, barapomonae pona namton beya. Bapoxonae barapomonae, daxita pomonae caxiba namtontha, matacayiya pon jiwi itorobiya pia pepa peewatsinchi pia bo tatsi beya. Pomonae abe peexanaewino carendenatsi, pomonae xanepanaya peexanaewino carendenatsi, beya poxonae bo tutu naucaxuba.

¹¹ “Nexata pon jiwi itorobiya pia pepa peewatsinchi bo tutu joniya petanenexa tsane pomonae pata. Bapon itabara tane pebin xua iruru pon baxota eca. Ichitha barapo pebin pexeinya paparuwa jopa nama xatatsiyo icha be jopa ichiyo ichamonae, tsipei ichamonae pexeinya paparuwa nama xataba xua po paparuwa jiwi ba nama xataba poxonae pona penacaetutsiwatha xua penabanaenexa pexaewa poxonae pebin pecotsiwa pita. ¹² Pon jiwi itorobiya pia pepa peewatsinchi barai bapon, jeye: ‘Tajiton, ¿eta xua metha xote naecame xua matauta jopa pexeinya paparuwa nama xatatsim?’ jei bapon. Ichitha bapon saya moya eca. ¹³ Bapoxonae pon jiwi itorobiya pia pepa peewatsinchi barai pomonaetha pomonae pexaewa carena tsaibi pexaethopaewatha, jeye: ‘Bapon pacobe caecunta cure yawa pataxu caecunta cure, yawa aisowa beya paxore ichaxota quirei. Baxota bapon wecoyei tsane yawa baxota nantanuweya nanta jayabina, bichocono peatenexae tsane’, jei pom jiwi itorobiya pia pepa peewatsinchi. ¹⁴ Barapon pon jiwi itorobiya pia pepa peewatsinchi bequein pinmonae waba ichitha saya tsiquimonaeyo pata penabanaewatha. Icha barapon ichi Nacom bara juta coyene ichiya cana ichi tsane jiwi. Nacom bequein waba pin bicheitomonae, daichitha saya tsicamonaeyo itapetatsi, pomonae Nacom pijimonae tatsi penaexanaenexa tsane”, jei Jesús.

Meje yabara poxonae Jesús yabara cuiduba paratixi matoma po paratixi jiwi bewa catsibina pontha pon romanomonae itorobiya pia pepa peewatsinchi
(Mr 12.13-17; Lc 20.20-26)

¹⁵ Nexata fariseomonae pona Jesús weya, caemonae natsipaeba najei: “¿Eta po peyainyabiwa Jesús taexanaeinchi xua catsawa wanaca jume notsinexa? Bapoxonae waxainchi xain yopitatsi ichamonaetha xua bapon abeya wanaca jume notsiwaxae”, najei fariseomonae. ¹⁶ Bapoxonae barapomonae itoroba pia pepuna ponaewichi, matautano barapomonae itorobano pomonae Herodes pia pepuna jinompaewichi. Daxita

barapo matabuxuyobe pata Jesustha pomonae fariseomonae itoroba. Barapomonae Jesús beya jeye:

—Pon jiwi Necuidubim. Bara payaputan xua bara jume xainyeya tsipaebame jiwi, matautano xua jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi bara catsita najupa. ¹⁷ Incane yabara pana netsipaebare xua nanta xeiname xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara bapon pon penanapaincha poponaein xua icha nacua werena peponaein? Icha jopa tsipae ¿metha daxua abe tsipae? jeichichi Jesús barapomonae pomonae fariseomonae itoroba.

¹⁸ Daichitha Jesús yaputane xua bichocono barapomonae abeya nanta xeina xua Jesús abe pecanaexanaenexa tsainchi. Jesús barai barapomonae, jeye:

—Paxam pomonae itara mexeya xanepanaya pepaebiwi pam, daichitha abeya pepaebiwi pam. ¿Eta xua metha pana nejuntu coyene jujutame poxonae baxua yabara pana neyainyabame? ¹⁹ Incane moya painta xawena tha taetsi barapo paratiyo, jei Jesús.

Bapoxonae barapomonae barapo paratiyo Jesús tacapoinchi. ²⁰ Poxonae Jesús tane barapo paratiyo, bapoxonae yainyaba barapomonae, jeye:

—¿Jintam pejumopere? ¿Yawano jintam wun ducuaré? jei Jesús.

²¹ Nexata Jesús jume notatsi barapomonae, jeye:

—Apara romanomonae itorobiya pia pepa peewatsinchi, jei barapomonae.

Nexata Jesús barai barapomonae, jeye:

—Bara nexata romanomonae itorobiya pia pepa peewatsinchi pacare pocotsiwa xua bapon piawaxae tatsi. Matautano bara Nacom pacare xua baxua iru piawaxae tatsi, jei Jesús.

²² Poxonae barapomonae jume tane xua Jesús beta xanepanaya jume nota, bapoxonae barapomonae yabara najuntu cui coyene cabenaeca. Bapoxonae ponarucupa Jesús weya.

Meje yabara poxonae Jesús yabara yainyabatsi po coyene xua equeicha asu pomonae pewerapeibiwi

(Mr 12.18-27; Lc 20.27-40)

²³ Bapoxonae caena barapo mataqueitha saduceomonae jiwana pata Jesús pia xantha tatsi xua Jesús piraichi petsipaebinexatsi. Saduceomonae barompaya pia pecuidubi coyenewa xeina xua pinae pomonae pewerapeibiwi equeicha jopa asu tsaibiyo. Barapo pecuidubi coyenewa jopa jupaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxonae werapa. Daxota barapo saduceomonae Jesús tsipaebatsi jeye:

²⁴ —Pon jiwi Necuidubim, Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa xuya pentapin pecoutha coseuri pichina xua bapoxonae pentapin pecoutha pexeinaenexa tsane pexui’, jei Moisés. ²⁵ Barichi, matha iruru cae peweicho caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. Pon cotacaya naexana xuya pentapin coseuri pita xua bapoxonae pentapin pecoutha pexui pexeinaenexa. ²⁶ Bapon iru cuenta tupa, iru jopa xeinaeyo pexui. Bapoxonae ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. Daxita barapo siete poyobe cuenta nanapentapona bapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. ²⁷ Bapoxonae matapainya iru bapowa tupa. ²⁸ Xam Jesús, ba paebame, ba jam: Maticabi jopaena po maticabitha Nacom asu exanaena, xua jiwi asu exanaeinchi muthun wetsina, ba jam. Poxonae barapo maticabi jopaena xua daxita jiwi asu jujuinaena, barapo maticabitha ¿jintam metha bapowa xuya pichinchi, xua ichun pichina, xua barapo siete poyobe

caein jiwana? Tsipei caena bayatha barapo siete poyobe caepiwi cuenta nanapentapona barapowa, jei saduceomona.

²⁹ Nexata saduceomona Jesús jume nota, jeye:

—Paxam apara catsawiya pana nejume notame, tsipei jopa beta payaputaem xua Nacom Pejume Diwesitha payabara yorobame baxua. Matautano jopa payaputaem Nacom pia peayapusu itorobi coyenewa tatsi. ³⁰ Poxona petupaewi equeicha asu jujuinaena, jopa jitha eenapona tsane. Yawa barapomona jopa pexantixi jitha cuarebapona tsane. Tsipei barapomona barichi tsane icha be matatsunpiwimona ichi, po matatsunpiwimona Nacom pia nacuatheicha jinompa, xua po matatsunpiwi jopa jitha enaeyo. ³¹ Paxam bequein bara bayatha payabara yorobame pocotsiwa Nacom namchi Pejume Diwesitha, po coyene xua pomona pewerapaewi equeicha asu jujuina. Barapo diwesitha Nacom jeye: ³² ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. Baxua Nacom paeba tsipei Abraham iru Isaac iru Jacob pomona bayatha pewerapaewi anoxuae equeicha caewa asu jinompa Nacom pia nacuatheicha tatsi. Pomona pewerapaewi pomona jopa caewa equeicha asu pejinompaewi, barapomona jopa pia Nacom tatsi, pon itabocotha eca. Saya jame meisa pomona bayatha pewerapaewi xua caewa equeicha asu pejinompaewi, pomona pejume cowuntsiwixaetsi Nacom barapomona jame pia Nacom tatsi, pon itabocotha eca, jei Jesús.

³³ Poxonaewi jumi jume tane pocotsiwa Jesús cuiduba, barapomona yabara najuntu cui coyene cabenaeca.

Meje yabara poxonaewi Jesús yabara cuiduba po peitorobi cui coyene pepa peainya cui coyenewa (Mr 12.28-34)

³⁴ Poxonaewi fariseomonaewi yaputane xua saduceomonaewi moya umena xua Jesús beta pejume notsixaewi, bapoxonaewi fariseomonaewi nacaetuta xua equeicha peyainyabiwanexa tsainchi Jesús. ³⁵ Barapo fariseomonaewi caein jiwana, pon peyabara yaputaewi Moisés pia peitorobi coyene tatsi, bapon ichichipa xua Jesús pejuntu coyene jujutsiwatsi xua icha bara metha Jesús abeya jume notsina. Bapon jeye Jesthath:

³⁶ —Ja pon jumi Necuidubim, ¿eta po peitorobi coyene pepa ainya cui coyenewara po peitorobi coyene beyacaincha xua icha peitorobi coyene? jei.

³⁷ Jesús jume nota bapon, jeye:

—Po peitorobi cui coyenewa pepa ainya cui coyenewa jeye: ‘Antobeinde pon jumi Pecanamataxeinaewi, bapon Nacom xua daxita nejuntu coyene wetsina, matautano xua daxita jinya nepoponaewi coyenewatha, matautano xua daxita nenanta xeinaewatha nentasiopatha’, jei. ³⁸ Jame barapo peitorobi coyene bichocono ainya cui coyenewa beyacaincha icha peitorobi coyene. Barapo peitorobi coyene, po peitorobi coyene ainya cui coyenewa, Nacom copiya itoroba. ³⁹ Po peitorobi coyene cotacaya itoroba ichaxota ba ‘dos’ jei, barapo peitorobi coyene be jume jupa po peitorobi coyene copiya ducua. Iruru barapo peitorobi coyenewatha jeye: ‘Antobeinde jinya necatsicuarabu ecaein icha ichim xua jinya coutha naantobem’, jei barapo peitorobi coyenewatha. ⁴⁰ Barapo peitorobi coyene jumebe caunuta, xua Moisés pia peitorobi coyenewatha baxua yabara paeba, iru pomonaewi Nacom peitorobi jume pepaewi pia pecuidubi coyenewatha baxua yabara paebaru, jei Jesús.

Meje yabara poxonaewi Jesús nayabara jei: “Mesías, ¿jintam pia pemomoxi susato jiwana pin tatsira?” jei

(Mr 12.35-37; Lc 20.41-44)

⁴¹ Poxonaewi fariseomonaewi cataunxuae nacaetutampa bapoxonaewi Jesús yainyaba barapo fariseomonaewi, jeye:

⁴² —¿Eta xua pacayabara nanta xeiname Mesías pon Nacom pia Peitapetsin? ¿Jintam pia pemomoxi susato jiwana pin tatsira? jei Jesús.

Barapomonaewi Jesús jume notatsi, jeye:

—Apara David, pon Israel nacuapiwi itorobiya pia pepa peewatsinchi, bapon pia pemomoxi susato jiwanapin tatsi, jei fariseomona.

⁴³ Bapoxonaes Jesús barai barapomonaes, jeye:

—David yabara paeba xua Mesías apara pia Pecanamataxeinaeinchi tatsi poxonaes David cueicueijejei exanatsi Nacom pia Pejumope tñaxu tatsi.

⁴⁴ David salmos penaxunaes wei diwesitha bayatha jeye:

‘Nacom pon Pecanamataxeinaein jiwi,
Tanecanamataxeinaein baraichi pon Mesías, jeichichi:
Tacoza werena ecare, beya abu tsane poxonaes
necaaitafaetabi jiwi pia pecanamataxeinaeinchi
tatsi caexanaeinchi, jei Nacom’,
jei David salmos penaxunaes wei diwesitha.

⁴⁵ Icha David Mesías yabara jei: ‘Bapon Mesías Tanecanamataxeinaein’, jei, ¿eta xua metha tsipae xua Mesías apara David pia pemomoxi susato jiwanapin tatsi? jei Jesús.

⁴⁶ Daxita barapomonaes jopa itacupaetsi xua Jesús pejume notsiwatsi tsainchi, poxonaes pinaes David paeba xua pinaes jei: ‘Bapon Mesías Tanecanamataxeinaein’, jei. Bara nama barapo matabitha weya, equeicha nama Jesús jopa bepeyainyabiwatsi barapomonaes.

23

Meje yabara poxonaes Jesús muxuweta jiwi xua pomonaes fariseomonaes iru pomonaes jiwi pecuidubiwi Moisés pia peitorobi coyene tatsi barapomonaes pecuiyainwa tatsi

(Mr 12.38-40; Lc 11.37-54; 20.45-47)

¹ Nexata Jesús barai pin bicheito jiwi iru pijimonaes, jeye: ² “Pomonaes jiwi pecuidubiwi Moisés pia peitorobi coyene tatsi iru fariseomonaes daxita barapomonaes pia pecuidubi coyene xeina xua po coyene jiwi yaputane exanatsi po coyene Moisés pia peitorobi coyenewatha paeba. ³ Pacui yabara jume cowunde pocotsiwa barapomonaes pia pecuidubi coyenewan tatsi. Matautano paexande pocotsiwa barapomonaes paca itoroba. Daichitha jopa paexanaeinde pocotsiwa barapomonaes exana tsipei barapomonaes itara beta pepaebiwi daichitha yabara jume toxeinchiya catsawiya exana, barapo peitorobi coyenewan. ⁴ Barapomonaes be pocotsimonaes poxonaes ichamonaes itorobatsi xua pecaponaewa pocotsiwa arewe, pocotsiwa jiwi bapana jopa itacupaetsi xua pecaponaewa. Daichitha barapomonaes jopa yawenaeyo pocotsiwa ichamonaes itorobatsi. Matautano barapomonaes jopa tayoichaeyo cae cobesitiotha. Icha barapomonaes ichi poxonaes ichamonaes itorobatsi xua pecaponaewa pocotsiwa bichocono arewe, barapocotsi juta coyeneya ichi pomonaes jiwi pecuidubiwi Moisés pia peitorobi coyene tatsi, iru fariseomonaes, daxita barapomonaes itoroba pia pecuidubi coyenewatha pocotsiwa paxam painya neexanaenexa. Ichitha barapomonaes jopa exanaeyo baxua. Pocotsiwa barapomonaes paca cui itoroba pocotsiwa painya neexanaenexa, paxam bapana jopa paca itacupaeyo xua painya neexanaewa baxuan. ⁵ Barapomonaes ichichipa nawita xua jiwi pecui taewa tsane pocotsiwa poxonaes barapomonaes exana xua bapoxonaes jiwi penanta xeinaenexa xua barapomonaes bara pejuntu coyene xanepanaewi. Daxota barapomonaes tsica cajaxi peitapatha querabaduba xua pebocoton. Barapo bocotontha tututha iya jeya xua xoxitha tinaduba Nacom Pejume Diwesi. Yawa icha cajaxi pemaxutha querabaduba. Yawa barapo bocotontha tututha iya jeya xua xoxitha tinaduba Nacom Pejume Diwesi. Matauta barapomonaes nama xataba po paparuan bichocono apiyiya deca, beyacaincha xua poxonaes ichamonaes nama xataba po paparuan apiyiya. ⁶ Matauta barapomonaes nanta caxunaeneiba ichaxota nanta caxunaeneiba pomonaes peainya cui jiwi penaexanaewi. Matautano barapomonaes judiomonaes pia penacaetutsi bontha ichichipa nawita xua nanta caeneiba ichaxota enathopeiba pomonaes peainya cui jiwi penaexanaewi. ⁷ Matauta barapomonaes ichichipa xua jiwi pejacobeibiwa tsane namtontha barapomonaes aetha, xua jiwi pebaru cui itura jineibinexa barapomonaes. Matautano barapomonaes

ichichipa nawita xua jiwi ainya cui pecana exanaewa barapomonae poxonae jiwi pejei tsaibinexa 'Pomonae jiwi pecuidubiwi' poxonae pejei tsaibinexa jiwi.

⁸ "Ichitha nama paxam jopa bewa pacopatsim xua bara jiwi jacobiya paca necajei tsaibinexa: 'Pata pecuidubi jiwi pam', paca necajei tsaibinexa xua ainya cui jiwi painya nepaca exanae jiwixae. Painya xoba jiwi baxua bara pajume copatame, tsipei apara paxam be caemonae jiwi pam, saya jame panantaütame bara caein pon ainya cui penaexanaein painya itutha. ⁹ Pomonae po irathe jinompe jopa bewa wabi pajam 'Axa', jopa bewa pajam xua painya baru cui itura jinaexae pomonae jopa bequein barompaya painya axeiwi. Painya xoba jiwi baxua bara pajume copatame, tsipei paxam panantaütame bara caein painya Axa, pon pabarü cui itura jiname pon peitabocotha eca. ¹⁰ Mataütano jopa bewa pacopatsim xua bara jiwi jacobiya paca necajei tsaibiwa: 'Pata necanamataxeinaewi pam', paca necajei tsaibiwa xua ainya cui jiwi painya nepaca exanae jiwixae. Painya xoba jiwi baxua bara pajume copatame, tsipei apara paxam panantaütame bara caein pon painya Necanamataxeinaein, jame apara bapon meisa Cristo. ¹¹ Icha pon paxam jiwana, icha bapon ichichipa naexana be pocotsin canamataxeina ichamonae bapon matha bewa copiya daxita paxam beta amanaya pacata nacuichina. ¹² Pon xua pia coutha peainya cui jiton naexana pejüntü coyenetha, Nacom exanaena xua bapon pecui paw i jiton naexanaena. Ichitha pon xua pecui paw i jiton naexana, pejüntü coyenetha, Nacom exanaena xua bapon peainya cui jiton naexanaena.

¹³ "¡Paxam pomonae Moisés pia peitorobi coyene tatsi painya necuidubiwi jiwi pam tsobenaem! ¡Paxam irü pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam acuicoyeneyapubeya paexaname xua poxonae jiwi bequein ichichipa naexana Nacom piamonae tatsi jiwana. Paxam jopa pajume cowüntsime Nacom yawa jopa pacopatsim xua ichamonae irü pejume cowüntsiwa Nacom.

¹⁴ "¡Paxam pomonae Moisés pia peitorobi coyene tatsi painya necuidubiwi jiwi pam tsobenaem! ¡Paxam irü pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Powaxi pecuenta werapaewaxichi piseurixi, barapowaxi pacueranta ename pia bon. Naemata Nacom pawüqueibame. Jopa cuinaya pana najume copababeibim poxonae pawüqueibame Nacom tsipei paichichipame nawita xua jiwi xanepanaya paca necayabara paebiwa xua bara cou paxam pejüntü coyene xanepanae jiwi pam. Daxota poxonae po mataqueitha Nacom yabara paebina daxita jiwi penatsicuentsiwa barapo mataqueitha Nacom bichocono paca peraxa jubina, beyacaincha poxonae peraxa jubinchi pomonae pacuidubame.

¹⁵ "¡Paxam pomonae Moisés pia peitorobi coyene tatsi painya necuidubiwi jiwi pam tsobenaem! ¡Paxam irü pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam tajü beya paponame daxita carepayan beya, xua painya cana exanaenexa ichüntha xua bapon pejume cowüntsiwa tsane painya necuidubi coyenewan xua bapoxonae bapon be judiomonaepin penaexanaewa tsane. Bapon pacana exaname, xua bapon bichocono equeicha mataropeicha abe peexanaein. Daxota bapon bewa xubinchi ichaxota po nacuatha isoto jopa itacounayiyo, icha paca cana ichi tsane poxonae paca bebai tsane barapo nacuatha.

¹⁶ "¡Paxam abe peexanae jiwi tsobenae pam! Paxam barapocotsi coyeneya jüta panacana exaname, icha be pon peitata nacütsin ichi xua poxonae ichün matacapoinchi pon irü peitata nacütsin. Paxam ichamonae ba pacuidubeibame ba pajam tsaibim: 'Icha ichün nayabara cui wünae tsimuxu duta xua jeye: Xaniwaicha exanaein pocotsiwa xua catsipaebatsi Nacom pia pin bo wünthaxae tatsi, poxonae jei, baxua ba jopa ainya cuiyiyo poxonae ichün nayabara cui wünae tsimuxu duta bapocotsi wünthä', ba pajam tsaibim xua ichamonae poxonae pacuidubeibame. Mataütano ba pajam tsaibim: 'Icha ichün nayabara cui wünae tsimuxu duta xua jeye: Xaniwaicha bara exanaein pocotsiwa

xua catsipaebatsi oro nainto wuntha pocotsiwa daedaena po oro nain coroton Nacom pin pia botha tatsi eca, poxonae jei, baxua ba xua bapon exana bapocotsi wuntha, baxua jame ainya cui poxonae barapon barapo wuntha nayabara cui wunae tsimuxu dubeibina', ba pajam tsaibim poxonae pacuidubeibame. ¹⁷ ¡Paxam barapocotsi coyeneya juta panacana exaname, icha be pomonae matasipa daunwei ichi poxonae jopa beta jume cowuntsiyo Nacom! Nacom pin pia bo bichocono ainya cui beyacaincha oro nain, po oro nain coroton Nacom pin pia botha tatsi ena. Tsipei barapo oro nain poxonae aisowa beequiya Nacom pin pia bo weya jopa ainya cuiyiyo. Jame saya meisa poxonae bo tututha eca bapoxonae ainya cui barapo oro nain, tsipei barapo bo ainya cui cana exanatsi. ¹⁸ Matauta ba pajam tsaibim: 'Icha ichun nayabara cui wunae tsimuxu duta, xua jeye: Xaniwaicha bara exanaein pocotsiwa xua catsipaebatsi xua be pexaethopaewa wuntha xua ichaxota duwei tauteiba xua tuxusi exaneiba Nacom nexa, poxonae jei, baxua ba bapon jopa bewa exanae poxoru baraxua xua be pexaethopaewa jopa ainya cuiyiyo poxonae ichun nayabara cui wunae tsimuxu duta bapocotsi wuntha', ba pajam tsaibim poxonae ichamonae pacuidubeibame. Matautano ba pajam tsaibim: 'Icha ichun nayabara cui wunae tsimuxu duta xua jeye: Xaniwaicha bara exanaein pocotsiwa xua catsipaebatsi duwei wuntha po duwei xua bocopiya ichaxota xua be pexaethopaewa wuntha, poxonae jei, baxua ba bapon jame bewa exanae poxoru po duwei xua bocopiya ichaxota xua be pexaethopaewa, baxua jame ainya cui poxonae bapon barapo wuntha nayabara cui wunae tsimuxu dubeibina', ba pajam tsaibim poxonae pacuidubeibame. ¹⁹ ¡Paxam barapocotsi coyeneya juta pana cana exaname, icha be pomonae matasipa daunwei ichi poxonae jopa beta jume cowuntsiyo Nacom! Pocotsiwa xua be pexaethopaewa ichaxota duwei tauteiba xua tuxusi exana Nacom nexa, poxonae tauta baraxua xua be pexaethopaewa bichocono ainya cui, beyacaincha ainya cui poxonae duwein aisowatha bexuba xua saya pexaenexa. Tsipei duwei saya ainya cui poxonae pocotsiwa xua be pexaethopaewatha bocopiya poxonae petuxusi exanaewa tsane Nacom nexa. Bapoxonae barapo duwein ainya cui, tsipei baraxua xua be pexaethopaewa ainya cui cana exanatsi. ²⁰ Daxota pon nayabara cui wunae tsimuxu duta xua be pexaethopaewa wuntha, xua ichaxota duwei tauteiba xua tuxusi exaneiba Nacom nexa, saya meisa jopa barapo wunthiyo, matautano jame nayabara cui wunae tsimuxu dutsina duwei wuntha, po duwein baxota bocopiya. ²¹ Matautano pon nayabara cui wunae tsimuxu duta Nacom pin pia bo wuntha tatsi, saya jopa meisa barapo wunthiyo, matautano jame nayabara cui wunae tsimuxu dutsina Nacom pewuntha tatsi. Tsipei bara Nacom pin pia bothaxae eca. ²² Daxota pon nayabara cui wunae tsimuxu duta itaboco wuntha, saya meisa jopa barapo wunthiyo, matautano jame nayabara cui wunae tsimuxu dutsina Nacom pia pexeinya peecaethopeibiwa tatsi wuntha beicha matauta Nacom pewuntha tatsi pon baxoteicha eca.

²³ "¡Paxam pomonae Moisés pia peitorobi coyene painya necuidubi jiwi pam tsobenaem! ¡Paxam pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam ba caewaxi pajiwana wetsabeibame xua painya catsibeibinexa Nacom poxonae diez xoyobe paxeineibame xua pocotsiwa painya neubiwan. Barichi pacana exaname tsiqui xutixitha po xutoxi pewun menta, matautano po pexuno pewun anís barichi matautano po pexuno pewun comino. Bara bequein barapo coyene paexaneibame, daichitha jopa paexanaem pocotsiwa bichocono ainya cui coyenewa pocotsiwa Nacom pia peitorobi coyenewatha itoroba. Matautano jopa paexanaem po cui coyenewatha bewa bara xaniwaicha pata exanaename jiwi. Matautano jopa paexanaem po cui coyenewatha bewa jiwi payabara najuntu coyene xeinaename painya neyawenaenexa jiwi. Matautano jopa paexanaem po cui coyenewatha xua pana cana exaname xua beta painya nejume cowuntsinexa Nacom. Daxita barapo coyenein jame maisa paexanare, muxuna pa-eexanaponde po coyene copiya pa-eexanaponame, po coyene poxonae pajiwana nonotaponeibame poxonae pocotsiwan diez xoyobe paxeineibame, xua pocotsiwa painya neubiwan. ²⁴ ¡Paxam

barapocotsi coyeneya jũta pana cana exaname, icha be pon peitata nacutsin ichi xua poxonae ichũn matacapoinchi pon irũrũ peitata nacutsin! Paxam jopa juniya pacayabara jume exaneibim xua Moisés pia peitorobi coyenewatha itoroba. Daichitha jopa paexanaem po peitorobi coyene peainya cui coyenewa Nacomtha. Barapocotsi jũta coyeneya paexaname icha jiton ichi poxonae mera mene caewata paparuwatha xua pichixi pemuxuna apaeyainwa, daichitha apara yawa apareca xua xuan poxi peconoxi.

²⁵ “¡Paxam pomonae Moisés pia peitorobi coyene tatsi painya necuidubi jiwi pam tsobenaem! ¡Paxam pomonae irũ fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam jopa ba juniya paexaneibim poxonae meisa panaperũ iquicame. Daichitha bũpana iya painya jũntũ coyenetha pecaibi coyene paxename, peuwi coyeneno paxename. Be barapocotsi jiwi pam pocotsimonae coroton saya matawacaicha iquica yawa paratonno, ichitha atutuxuira bichocono. ²⁶ Paxam fariseomonae pam, pocotsi jiwimonae pam pomonae be peitata nacutsi jiwi pam. Copiya matha pana najũntũ cui coyene barapende barapo painya neajũntũcoyenebewan, bapoxonae jame xanepanaya painompaename.

²⁷ “¡Paxam pomonae Moisés pia peitorobi coyene tatsi painya necuidubi jiwi pam tsobenaem! ¡Paxam irũ pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Jiwi ba inyapana exana xua pocotsiwa jiton petũpaein peyamũthũ acatabiwatsi. Bequein bara baxua inyapana daichitha xua matha bocareca bichocono ayei xua jiton petũpaein.

²⁸ Barapocotsi jũta coyeneya paexaname, icha be pocotsi coyene peayeiwa ichi xua jiton petũpaein. Bequein panaperũ wũnaetame, daichitha painya jũntũ coyene abe bichocono. Bequein jiwi paca yabara nanta xeina poxonae paca cui tane xua paxam deta cou pejũntũ coyene xanepanae jiwi pam Nacomtha, daichitha painya jũntũ coyene bichocono paajũntũcoyenebem. Mataũtano bara bequein paxam itara mexeya xanepanaya pepaebi jiwi pam, daichitha apara abeya pepaebi jiwi pam.

²⁹ “¡Paxam pomonae Moisés pia peitorobi coyene tatsi painya necuidubi jiwi pam tsobenaem! ¡Paxam pomonae irũ fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam petũpaeiwi pomonae Nacom pia peitorobi jume pepaebiwi payamũthũ acabame boutixi. Mataũtano pomonae pejũntũ coyene xeicae jiwi payamũthũ itũpana exaname.

³⁰ Mataũta naerabiya pana najam: ‘Icha caena bayatha jinompaetsipatsi poxonae wamo susato jiwi jinompa metha jopa cueicha yawenaetsipaetsi poxonae barapo Nacom peitorobi jume pepaebiwi jutebatsi’, pana najam. ³¹ Barapo jumetha poxonae baxua pacaunutame, barapara barapo cui coyene paexaname, icha painya amo susato jiwi ichi poxonae barapo jũntũ coyeneya exana poxonae jutebatsi Nacom pia peitorobi jume pepaebiwi. ³² ¡Painya amo susato jiwi abe peexanaexae, caena bayatha bara paichinde! Poxonae pana nebexubiname moya pana necui yabara jume cui were icha matha painya amo susato jiwi ichi poxonae tamropata notarũcũpa xua barapo Nacom pia peitorobi jume pepaebiwi jutebatsi.

³³ “¡Maisa paxam pomonae pemuxuitorobi jiwi pam! ¡Daxota be jomomonae pacui jũpame poxoru jomo ba cuitaya dũcũpa nawa! Bara paichim anoxuae bequein paichichipame xua Nacom pacuitaya dũcũpame xua abe paca exanaeyainwa. Ichitha Nacom paca itorobina ichaxota isoto jopa itacounayiyo. Jopa papanenebiyaem tsane barapo isoto weya. ³⁴ Itorobicaein painya xantha pomonae taitorobi jume pepaebiwi. Mataũta itorobicaein pomonae peyaputaewi. Mataũtano itorobicaein pomonae jiwi pecuidubiwi Moisés pia peitorobi coyene tatsi. Ichitha barapomonae pajiwana jutebiname. Ichamonae naetotha pacobe matabobiname painya jutebinexa tsane. Ichamonae judiomonae pia penacaetutsi bontha tatsi pabename. Daxita carepaya tomarantha abe pacana eexanaponaename pomonaetha pomonae taitorobi jiwi. ³⁵ Daxota Nacom paca cana exanaena xua paca peraxa exanaena xua daxita pomonae pejũntũ coyene xeicae jiwi pejũntũ jutebaponaexaetsi painya nacũthã. Painya amo susato jiwi jũjutebapona

pomonae pejuñtu coyene xeicae jiwi. Copiya matha Abel bexotsi pon pejuñtu coyene xeicaein pon bequein jopa abe exanaeyo, beya poxonae iruru Zacarías bexotsiru pon Berequías pexanto tatsi. Barapon Zacarías pabexubame Nacom pin pia botha ichaxota xua barapo bo tututha uncua pocotsiwa be pexaethopaewa xua ichaxota tuxusi exana Nacom nexa xua iru baxota uncua pepa Nacom pia boyo tatsi xua naitama taeuncuabe. ³⁶Bara xaniwaicha paca tsipaebatsi pomonae xua anoxuae pajinompame bichocono paca peraxa jubebina tsipei daxita paxam barapara Nacom tsitatsi xua paxam patsita xeiname penatsicuentiwa xua painya amo susato jiwi pejujutebaponaexae pomonae pejuñtu coyene xanepanae jiwi xua iruru paxam painya nejutebaponaexaeru”, jei Jesús.

*Meje yabara poxonae Jesús Jerusalén tomarapiwi siwa wecoyeichi
(Lc 13.34-35)*

³⁷Bapoxonae Jesús yabara unthuthu wecoyei Jerusalén tomarapiwi. Jesús wecoyeya namchi, jeye: “¡Maisa Jerusalén tomarapiwi pam pajutebeibame pomonae Nacom pia peitorobi jume pepaebiwi! ¡Matauta paxam pajutebeibame ibotontha pomonae Nacom pacata itoroba! ¡Maisa be paca caetuaetuteibinchi, tapaca cayawenaewatsi tsainchi, icha wacara ichi poxonae nacoxi caetuaetuteta pecuarafetha! ¡Maisa be barichocuaein tsane, daichitha jopa paichichipaem! ³⁸Incane pataema Nacom nacui baraxuba xua jopa painya nepaca caewatsiwa tsane. Daxota Nacom jopa poponaeyo pia pin pia botha tatsi painya tomaratha. ³⁹Paca tsipaebatsi xua equeicha jopa pana netaem tsane beya abu poxonae pana neyabara jam tsane: ‘¡Maisa bapon jiwi juñtu coyene weiweina cana exanatsi pon patopa, Nacom peitorobixae, pon jiwi Pecanamataxeinaeinchi!’ pana neyabara jam tsane”, jei Jesús fariseomonaetha.

24

*Meje yabara poxonae Jesús yabara paeba xua ichamonae abe exanaena Nacom pin pia bo tatsi
(Mr 13.1-2; Lc 21.5-6)*

¹Jesús Nacom pin pia bo tatsi wejoniya. Poxonae nama bara weya pona, bapoxonae Jesús imoxoyo caquita umenarucupatsi pijimonae. Yawa pijimonae jeichichi:

—Maisa Nacom pin pia bo tatsi bepa wuna, jei barapomonae.

²Daichitha Jesús jume barai barapomonae, jeye:

—¡Moya caepatiyo pataema! Bara xaniyan paca tsipaebatsi. Matacabi jopaena barapo mataqueitha ichamonae pomonae penanapaincha jinompaewi xua icha nacua werena peponaewi abe cana exanaena Nacom pin pia bo tatsi po bo anoxuae pataneme. Apra jopa cae ibotiyo nacopatuncuae tsane icha iboto peumatha. Daxita abe tsane, jei Jesús.

Meje yabara poxonae Jesús yabara paeba xua copiya matha pewunaeya exanaena petsita itutsi coyenewa poxonae daxita weraweracaenaba

(Mr 13.3-23; Lc 21.7-24; 17.22-24)

³Bapoxonae Jesús pijimonae baru pona demxuwatheicha po demxuwa pewun demxu Olivowa tsipei baxota umena olivo naein. Poxonae Jesús demxuwatheicha ecopiya, bapoxonae Jesús pijimonae nameicha tsipaebatsi, jeye:

—Paichichipan xua xam tapata netsipaebiwam tsane, ¿eta poxonae metha ichamonae baxua exanaena poxonae abe cana exanaena Nacom pin pia bo tatsi? ¿Eta pocotsiwa tsane metha xua pewunaeya tsita itapeinya xeinaena xua poxonae patopeicaename, matautano xua poxonae imoxoyo daxita weraweracaenaba? jei Jesús pijimonae tatsi.

⁴Nexata Jesús barai, jeye:

—Dota pam bu ichamonae naerabiya paca muxu tsipaeba xua daxota abe paexanaet-sipame. ⁵Tsipei tsana patsina ayei bicheito jiwi pomonae natsicotaena icha be xan ichin. Barapomonae jei tsane: ‘Apra xan Mesías’, jei tsane. Poxonae barapomonae muxu-itorobiya paebina bapoxonae pinmonae jume cowuntsina. ⁶Pajume taename xua jiwi juinya nabenoutsina xote yawa xua juinya iruru nabenoutsina icha ira beya. Daichitha jopa pajunuwinde, tsipei baxua pewunaeya matha copiya tsane. Daichitha cataunxuae

dapo matakabi aichica tsane xua poxonaе daxita weraweracaenaba yatsicaewa. ⁷ Caе nacuapiwi iru icha nacuapiwino, barapo ainya nacuapiwibe nabenoutsina. Matautano iru pon nacia peewatsin iru ichundu pon icha nacia peewatsin, baraponbe iruru nantiya nabenabe. Matautano ainya nacuantha pin jainbo nacia tsane tsipei pin mayayo tsane. Matautano domae tsurucuae tsane ainya nacuantha. Matautano ainya nacuantha ira jijiyatsina. ⁸ Baraxua copiya matha tsane xua jiwi atene tsoponaе tsane bichocono, xua beya jopa nama juniya tsane.

⁹ “Bapoxonaе jiwi paca teiquebina, paca atene exanaena matautano paca jutebina. Daxita nacuanpiwi paca casebina painya tana nejume cowuntsixaemxae. ¹⁰ Barapo matakabintha jiwi pentsina xua Nacom pejume cowuntsiwatsi. Matautano daxita jiwi nacasebina, matauta barapomonaе piamonaе caenaetsina ichamonaetha. ¹¹ Pinmonaе tsana pateibina, pomonaе jiwi pemuxitorobiwi. Tsana jei tsane: ‘Xan Nacom peitorobi jume tapaebin, Nacom yabara paca cuidubinchi’, jei tsane. Barapo pemuxitorobi diwesi jume pinmonaе jume cowuntsina barapo diwesi. ¹² Pinmonaе jopa juniya abe exanaponaе tsane daxota jiwi, jopa caemonaе nantiya naantobe tsaibi tsane. ¹³ Ichitha pon awiya xua antuyapusya nejume cowuntsiya poponaena xua beya yacuiya tupaeya jopaena poxonaе bequein abe taexanatsi ichamonaе, bapon jame Nacom napaeba cana exanaena. ¹⁴ Tamonaе capanaena tapexeinya jume diwesi po diwesi xua Nacom waba jiwi petanaexanaenexatsi pijimonaе pomonaе itorobiya peewatsixae. Barapo diwesi tajiwimonaе pomonaе tanejume cowuntsi jiwi paebinoutsina daxita jiwitha. Poxonaе barapo diwesi daxita nacuanpiwi jume taena, bapoxonaе daxita barapo jiwi yaputaena xua bara matakabi imoxoyo jopaena po mataqueitha poxonaе daxita weraweracaenaba.

¹⁵ “Daniel, pon Nacom peitorobi jume pepaebin bapon caena bayatha yabara tsiwunaeya muxu dutsiya tina pocotsiwa xua bichocono abe, pocotsiwa xua weraweraca cana exana. Pataename pocotsiwa xua ichun Nacom pin pia bo tututha exananotsina, pocotsiwa jopa bewa notsi baxota, pocotsiwa Daniel bayatha yabara paeba. Bapoxonaе payaputaename xua bara imoxoyo matakabi jopaenaba poxonaе daxita weraweracaenaba”, jei Jesús. (Xan Mateon, paca baraichi: “Pon yorobina po jume diwesi tinan, moya jume naitaewatsina pia peyaputaenexa tsane”, paca jeichi.)

¹⁶ Cataunxuae Jesús cueicueije, jeye: “Poxonaе bara pocotsiwa pataename bapoxonaе pomonaе Judea nacuatha jinompa, barapomonaе bewa demxuan berucupiyaena. ¹⁷ Barapo matakabitha pon bo matatupatha uncuа bapon jopa bewa botha joniya tsane xua penotsiwa tsane pocotsiwa tabobeinchi bomaxu tututha. Saya jame bewa nainya benaetsiricuaena. ¹⁸ Iruru pon pabitha popona bapon jopa bewa caibeya ponaе tsane botha xua penotsiwa tsane pia paparuan. Saya jame bewa nainya benaetsiricuaena. ¹⁹ ¡Pai yabuxi tsobenaе powaxi pexui burana taenatsi barapo matakabitha! ¡Pai powaxi iru pexui isaina, barapowaxi tsobenaeru! Tsipei acabe tsobenaе tsane pexui. ²⁰ Poxonaе pewunaeya tsane baxua Nacom pawucare xua jopa painya nerucupaewa tsane poxonaе awubo peaquexae bichocono, matautano xua jopa painya nerucupaewa tsane poxonaе pentaquei seicaе matakabitha. ²¹ Tsipei barapo matakabintha jiwi bichocono pin peraxa exanaeinchi. Atene tsane beyacaincha poxonaе jiwi atene tsaibi poxonaе Nacom aena nacia exana, xua equeicha nama bichocono pin peraxa tsane. Equeicha bexa bapoxonaе bapana jopa baxua exanaе tsane poxonaе bichocono jiwi pin peraxa. ²² Icha Nacom jopa be caentacabiyobe exanaetsipae, metha dapomonaе ajibi tsipae pomonaе panenebiya barapo peatene coyenewa weya. Daichitha Nacom be caentacabiyobe exanaena peantobexae pijimonaе, pomonaе pia peitapetsiwixae tatsi.

²³ “Bapoxonaе icha ichun paca jei: ‘Pataema bapon apara Mesías uncuе pon Nacom itorobica’, paca jei, iru icha ichun paca jei: ‘Pataema bapon Mesías xota uncuiye’, paca jei, baxuan jopa pajume cowuntsinde barapo jumein. ²⁴ Tsipei pomonaе pemuxitorobi jiwi tsana patsina. Barapomonaе natsicotaena icha be xan ichi ponxaein Mesías. Matautano barapomonaе natsicotaena icha be pomonaе Nacom peitorobi jume pepaebiwi ichi tsane. Barapomonaе pexeinya petsita itutsi coyenewan exanaena peitabocotha, po

irathe tsaneno xua jiwi pemuxuitorobinexa tsainchi, xua jiwi pejume cowuntsinexa pocotsiwa barapomonae paeba. Barichiru pomonaetha pomonae Nacom pia peitapetsiwi tatsi pemuxuitorobinexa tsainchi, xua iruru icha metha barapomonae pejume cowuntsinexa tsaneru pocotsiwa barapomonae paeba. Ichitha jopa itacupaetsi tsainchi xua barapomonae pemuxuitorobiwa tsainchi. ²⁵ Baxua tsiwanaya yabara paca tsiwunae muxu dutatsi. ²⁶ Daxota icha jiwi paca jei tsane: ‘Pataema bapon Mesías uncuiye ira xuepana susato tsurucuae nacua beya’, icha paca jei, jopa bara beya paponaeinde. Matauta icha paca jei: ‘Pataema bapon Mesías xote uncue bomuxu tututha’, icha paca jei, jopa baxua pajume cowuntsinde. ²⁷ Icha yamuxu ichi poxonae jemeicha yacoicha uncueica xua coicha nayotaxuba itabocotha, barichi tsane po matabitha patopeicaein jemeicha. Xan ponxaein Nacom Tananeitapetsin tsita naitutsin daxita jiwi. ²⁸ Quequeremonae ba nacaetuta ichaxota baurin boca. Bara juta paichim tsane. Paxam pomonae tana nejume cowuntsi jiwi pam, pana newunae ewatsiname po mataqueitha patopeicaein. Bara po mataqueitha pana nacaetutsiname”, jei Jesús.

Meje yabara poxonae Jesús nayabara paeba xua poxonae equeicha patopaetsica ponxae Nacom pia Peitapetsin

(Mr 13.24-37; Lc 21.25-33; 17.26-30, 34-36)

²⁹ Equeicha Jesús namchi: “Po matabin poxonae nacui wetsina xua jiwi pin peraxa tsane, bapoxonae xometo nainya naquitabina. Jomocoichato jopa pentha tsane. Opiteiton peitaboco weothopeicaena. Matauta Nacom napuna torobabiyaena xua xuan itabocotha dubena. Bapoxonae jopa xapain dubenae tsane. ³⁰ Bapoxonae daxita jiwi taena peitabocotha xua cou equeicha apara tapatopaewa tsane ponxaein Nacom Tananeitapetsin. Poxonae daxita nacuanpiwi netaena xua patopaein, barapomonae pijunuwi wecoyei tsane. Jiwi netaena ponxaein Nacom Tananeitapetsin xua patopeicaein tsaquinaebowantha. Nacom pia peayapusu itorobi coyenewatha, matautano bichocono pexeinya itupanae coichatha patopeicaein. ³¹ Matautano itorobin tamatatsunpiwi xua bichocono daunweya peobinexa tsane, po peobiwa pewun trompeta. Poxonae baxua jume taena tamatatsunpiwi inta caetutsina pomonae taitapetsiwi. Nacaetutsina daxita nacuanpiwi jiwana, iru ichamonae pomonae ichaxota xometo weecoinapiwi jiwana, iru ichamonae pomonae ichaxota xometo bejopyapiwi jiwana, iru ichamonae pomonae pocotsiwa werenepiwi jiwana, iru ichamonae pomonae pocotsiwa berequepiwi jiwana”, jei Jesús.

³² Equeicha Jesús jeye: “Pajume taema barapo pecayabara juta pepaebi diwesiyo xua higuera nae xua painya nenacuidubiwa tsane. Poxonae ba pataneme xua pena noxu xuxuwapona, bapoxonae ba payaputaneme xua bara imoxoyo wei tsurucuae tsoponae, xua pentono perubenaenexa. ³³ Barapocotsi juta coyeneya ichi tsane poxonae pataename daxita baxuan pocotsiwa aunxuae paca tsipaebatsi, pocotsiwa bexa exanaena, bapoxonae payaputaename, xua bara imoxoyo tsane xua tapatopae wunae tsane. ³⁴ Bara xainyeya paca tsipaebatsi daxita judiomonae naitapataya naexanaponaena beya yacui othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomonae weraweracaena. ³⁵ Peitaboco aichurucuae tsane, matautano ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban”, jei Jesús.

³⁶ Equeicha Jesús jeye: “Po matabitha baxua exanaena, matauta po horatha baxua exanaena jiwi jopa baxuan yabara yaputaeyo. Iru matatsunpiwi pomonae peitaboco beicha jinompa baxuan iruru jopa yabara yaputaeyo. Iru xan, ponxaein Nacom Pexanton baxuan jopa yabara yaputaeyo. Meisa saya Nacom pon Waxa yaputane poxonae po matabitha baxua exanaena, matautano yaputane poxonae po horatha daxita exanaena baxua xuaunxuae paca tsipaebatsi”, jei Jesús.

³⁷ Equeicha Jesús jeye: “Icha matha ichi poxonae Noé caena bayatha popona jiwi jopa tsaqueinaeyo xua Nacom pin awubo exanaena methaunxuae. Saya barompaya icha juntu cuitha jinompa daxota jiwi werapa. Barichi juta ichi tsane poxonae patopeicaein barapo

cae pin nacuathe xua ponxaein Nacom Tananeitapetsin. Poxonae patopeicaein jiwi jopa tsaqueinae tsane xua Nacom werapa exanaena barapo jiwi pomonae jopa pejume cowuntsiyoxaetsi. ³⁸ Barapo matabintha poxonae Noé popona poxonae cataunxuae pin ema jopa duneicaeyo, jiwi jopa tsaqueinaeyo xua bexa pin awubo tsane. Barapo jiwi jantema nabaneiba yawa apeiba. Yawa jiwitha jijinapona, yawa pexantixi jitha dodoubapona beya yacuiya othopa poxonae po matabitha Noé pin jera naetha joniya. Bapoxonae pin ema mu jopa. Daxita Noé wepu bunothopatsi pomonae jinompa poxonae Noé popona. ³⁹ Barapo jiwi jopa awubo yabara tsaca jinompaeyo. Barapoxonae jemeicha pin ema uncueica. Matauta monapentatsi barapo jiwi. Icha jiwi ichi poxonae Noé popona poxonae barapo jiwi jopa nanta xeinaeyo xua nacabetsina, barichi tsane poxonae xan patopeicaein ponxaein Nacom Tananeitapetsin, jiwi jopa baxua yabara tsaqueinae tsane xua poxonae equeicha patopeicaein. ⁴⁰ Barapo mataqueitha ainya pebinbe nacuara nacuitauyaenabe pabitha. Ichun matatsunpin pichina, pejume cowuntsixaetsi Nacom. Ichun saya cuenta ponaeinchi jopa pejume cowuntsixaetsi Nacom. ⁴¹ Iruru ainya yabuyobe nacuara yacatoyorobauyaenabe. Ichowa matatsunpin pichina, pejume cowuntsixaetsi Nacom. Ichowa saya cuenta ponaeinchi, jopa pejume cowuntsixaetsi Nacom.

⁴² “Tsaca pajinompeibare xua tapatopae wnae tsane, tsipei jopa payaputaem po mataqueitha patopaein ponxaein jiwi Tacanamataxeinaein. ⁴³ Meje pocotsiwe payaputaema. Icha pon bo pexeinaein yaputaetsipa xua poxonae patopaena pon jiwi pecaibin, bapoxonae bapon jopa maitecaetsipae. Matauta bapon jopa copatsipae xua pon pecaibin petajondenaewatsi pia botha. ⁴⁴ Daxota bara paichinde. Tawanaetha pana nacui wnaere, tsipei xan, ponxaein Nacom Tananeitapetsin patopeicaein poxonae jopa tsaca payabara jinompaem tsane tsipei jopa payabara nanta xeinaem tsane xua tapatopaewa tsane”, jei Jesús.

Meje yabara poxonae Jesús yabara diwesi paeba ponbe xua bo peyapucaeaeinbe pon xua beta peexanaein iru xua pon jopa beta peexanaein

(Lc 12.41-48)

⁴⁵ Equeicha Jesús namchi pijimonaetha pecayabara juta pepaebi diwesiyo xua pepatopaewa tsane, jeye: “Yabara paca tsipaebatsi pon matabapopona pomonae bo pexeinaein tanacuitatsi. Barapon xanepanaya yaputaeya matabapopona. Poxonae bo pexeinaein wepu warapa barapomonae, pon bo pexeinaein itoroba pontha pon bo petayapucaeaeinchi, jeye: ‘Inta beta matabapoponde, yawa inta beta pexaewa apare daxita matababi pomonae xua inta nacuita’, jei bo pexeinaein. ⁴⁶ Pon bo petayapucaeaein bara juntu coyene weiweinaena poxonae patopaena pon bo pexeinaein petaexaetsi xua bara beta tayapucaeaca bo, xuano bara beta peexanaexae pocotsiwa xua bo pexeinaein itoroba. ⁴⁷ Xaniwaicha paca tsipaebatsi. Bo pexeinaein itorobina xua pon petayapucaeaeinchi bo xua bapon cana exanaeinchi xua equeicha daxita piawan beta petayapuenaewatsi xua xuan xeina pon bo pexeinaein. ⁴⁸ Ichitha ichacuitha pon bo petayapucaeaein bapon peantucuiyapubein tsipae. Bapon pia coutha nanta xeinaetsipa, najei tsipae: ‘Metha bo pexeinaein jopa cuinaya patopae tsane’, najei tsipae pon bo petayapucaeaein. ⁴⁹ Bapoxonae bapon cueinta pomonae pon bo pexeinaein tanacuitatsi. Matautano bapon nanabanaetsipa nawita ichamonae yawa cupatsi nanaexanaetsipano. ⁵⁰ Bapoxonae pon bo pexeinaein jemeicha patopaena poxonae pon bo petayapucaeaein jopa wnae tsaqueinaeyo. Poxonae bara po hora tsuxubi jopa yaputaeyo yawa poxonae barapo matababi tsuxubi jopa yaputaeyo. ⁵¹ Pon bo pexeinaein itoroba ichamonaetha xua pebenexatsi yawa peperaxa jubinexatsi tsainchi pon bo petayapucaeaeinchi. Matautano itoroba xua barapomonae bapon pexubinexatsi ichaxota jinompa pomonae itara mexeya wnaeya pepaebiwi ichitha abe peexanaewi. Barapo nacia bereca jiwi bichocono wecoyei pomonae abe peexanaewixae, matautano nantanuweya nantu jayabina bichocono peatenexae”, jei Jesús.

25

Meje yabara poxonae Jesús cuiduba pecayabara j̄uta pepaebi diwesiyo xua diez powayobe xua penowaxi

¹ Nexata Jesús equeicha icha pecayabara j̄uta pepaebi diwesiyo cuiduba pijimonae, jeye: “Nacom cana exanaena jiwi xua pomonae pej̄unt̄u coyene itorobiya ewatsixae, icha pebin ichi poxonae diez powayobetha xua penowaxi cana exana powaxi bapana j̄opa per̄u nacoyabiyo pebiwi. Barapo diez powayobe nota pia lámpan xua peewatsinexa pon pia pecotsiwa nacoyobina. Barapowaxi barompaya capona pia lámpan xua aceite epaca. ² Icha cinco powayobe barapo diez powaxi jiwana, barapowaxi ita coxanatsi xua penacui w̄naetsiwa. Icha cinco powayobe ita coxone xua penacui w̄naetsiwa. ³ Barapowaxi powaxi ita coxanatsi xua penacui w̄naetsiwa barapowaxi poxonae lámpan cajjinca j̄opa muxuna cajjincaeyo icha aceite xua equeicha pemene epacaenexa poxonae ameneibi tsurubena. ⁴ Saya meisa powaxi yaputane xua penacui w̄naetsiwa jame barapowaxi pia lámpan muxuna cajjinca aceite xua equeicha pemene epacaenexa poxonae ameneibi tsurubena. ⁵ Tsipei pon imoxoyo pecotsiwa nacoyobina bapon j̄opa cuinaya patopaeyo, daxota daxita barapo diez powayobe itamaipanaꝛꝛpa. Matapainya maitaꝛꝛpa. ⁶ Poxonae papae tsuxubi poxonae barapowaxi cataunxuae maita, bapoxonae jume tane pon wawai xua barapowaxi jeichichi: ‘Bara juinya dawerena pebin pon pecotsiwa nacoyobina. Bapon panta enare painya necobe jacobinexa’, jei pon wawai. ⁷ Daxita barapo diez powayobe nacosabarꝛpa. Matauta equeicha icha aceite epacaꝛꝛpa xua bapoxonae pecoicha exanaenexa. ⁸ Bapoxonae icha cinco powayobe, powaxi j̄opa nacui w̄naetsiyo jeye ichawaxitha xua cinco powayobetha: ‘Panecatibare icha aceite meraxi pata tha equeicha mene epacaetsi, yaitama pata lámpan acueicheibi’, jei barapowaxi. ⁹ Ichitha powaxi penacui w̄naetsiwaxi jume barai, jeye: ‘Aibi apara, canta peyaxi barompaya pacajjinca patauxi, j̄opa pacajjincaeyo xua paxam nexaꝛ. Maisa ichaxota pecaenaetsithopaewa aceite bara bepaiyande matha pacomocare aceite xua painya nemene epacaenexa’, jei barapowaxi poxonae xua jume barai ichawaxitha. ¹⁰ Poxonae cataunxuae ichawaxi enapona xua pecomocaenexa aceite ichamonaetha, bapoxonaer̄u pebin pecoutha patopa, pon pecotsiwa imoxoyo nacoyobina. Powaxi bayatha nacui w̄naeta napuna jojoniya bapontha xua penanabanaenexa pexaewa xua poxonae barapo pexaewa jiwi tsinacaetuta xua penabanaenexa poxonae barapo pebin pecotsiwa nacoyobina. Bapoxonae bot̄x̄u bichocono boupa cateitabanota. ¹¹ Bapoxonae pirapaeyo ichawaxi pata powaxi aceite siwayiya, jeye: ‘Pata Tanecanamataxeinaem, painta boupa saranaxorena’, jei bapowaxi. ¹² Ichitha bapon barapowaxi jume baraichichi, jeye: ‘Canta j̄opa paca yaitaetsi’, jei bapon”, jei Jesús, xua pijimonae tsipaeba.

¹³ Bapoxonae Jesús barai pijimonaetha, jeye: “Tawanaetha pana naj̄unt̄u coyene w̄naere, tsipei j̄opa payaputaem po matabitha patopaein, matautano j̄opa payaputaem po horatha patopaein ponxaein Nacom Tananeitapetsin”, jei Jesús.

Meje yabara poxonae Jesús paeba pecayabara j̄uta pepaebi diwesiyo xua paratixi yabara (Lc 19.11-27)

¹⁴ Equeicha Jesús pijimonae cuiduba pecayabara j̄uta pepaebi diwesiyo xua paratixi, jeye: “Anoxuae ichichipan xua tapaca tsipaebiwatsi po coyene xua xan beta matomacan pomonae inta beta penacuichiwi pomonae Nacom j̄unt̄u coyene itorobiya ewata. Barapo coyene j̄upa icha be poxonae pebin ichi poxonae bara juntucuru warapaenaba icha nacua beya. Pew̄naeya poxonae warapaenaba matha waba pomonae pia petanacuichi jiwichi tsainchi. Barapomonaetha itoroba xua pia paratixi tatsi beta petacacomocaewa tsainchi poxonae cataunxuae w̄nae ewatatsi xua pepatopaewa tsane. ¹⁵ Ich̄untha pomonae barapomonae jiwana cata cinco mil po paratiximonaebe. Ir̄u ich̄untha cata dos mil po paratiximonaebe. Ir̄u ich̄untha cata saya be cae mil po paratiximonaebe. Bapon daxita barapomonaetha barompaya catsiba be pocotsi coyeneya barapomonae yapu j̄upatsi xua

poxonae pecacomocaewa tsane barapo paratiximonaetha. Bapoxonae bapon warapa.¹⁶ Pon catatsi cinco mil po paratiximonaebe, barapo cinco mil po paratiximonaebetha equeicha icha cinco mil po paratiximonaebe matoma exana.¹⁷ Barichi pon catatsi dos mil po paratiximonaebe, barapo dos mil po paratiximonaebetha equeicha matoma exana icha dos mil po paratiximonaebe.¹⁸ Ichitha pon catatsi cae mil po paratiximonaebe, bapon muthu cua iratha. Bapoxonae barapo muthutha bota barapo cae mil po paratiximonaebe”, jei Jesús.

¹⁹ Equeicha Jesús jeye: “Poxonae ainya matakabin yapucaewa, bapoxonae patopa pon paratixi catsiba barapomonaetha pon barapomonae pia pecanamataxeinaeinchi tatsi. Bapon pia petanacuichiwichi pia paratixi matoma yabara yainyaba.²⁰ Copiya patopa pon cinco mil po paratiximonaebe catatsi. Bapon icha cinco mil po paratiximonaebe cata pia pecanamataxeinaeinchitha, yawa jeye: ‘Tanecanamataxeinaem, caena bayatha cinco mil po paratiximonaebe necatame, equeicha icha cinco mil po paratiximonaebe cata matoma exainchi’, jei bapon.²¹ Pon pecanamataxeinaein jume nota, jeye: ‘Maisa juntu coyene wunaem matautano xam ponxaem cayabara jume cowuntatsi xua xanepanaya neexaneibiwam pocotsiwa caitorobatsi. Tsipei inta xanepanaya beta exaname bequein poxonae be conotha caitorobatsi, daxota equeicha ichawa caitorobatsi xua bichocono nawita. Moya tabotha nebaru jonyama yawa nebaru juntu coyene weiweinare’, jei pon pecanamataxeinaein.²² Bapoxonae pirapae ichun patopa pon dos mil po paratiximonaebe catatsi yawa jeye pia pecanamataxeinaeinchitha: ‘Tanecanamataxeinaem, caena bayatha dos mil po paratiximonaebe necatame, equeicha icha dos mil po paratiximonaebe cata matoma exainchi’, jei bapon.²³ Pon pecanamataxeinaein jume nota, jeye: ‘Maisa juntu coyene wunaem matautano xam ponxaem cayabara jume cowuntatsi xua xanepanaya neexaneibiwam pocotsiwa caitorobatsi. Tsipei inta xanepanaya beta exaname bequein poxonae be conotha caitorobatsi, daxota equeicha ichawa caitorobatsi xua bichocono nawita. Moya tabotha nebaru jonyama yawa nebaru juntu coyene weiweinare’, jei pon pecanamataxeinaein”, jei Jesús.

²⁴ Equeicha Jesús jeye: “Bapoxonae matapainya patopa pon cae mil po paratiximonaebe catatsi. Bapon atsaquiya jei pia pecanamataxeinaeinchitha: ‘Tanecanamataxeinaem, xan yaputan xua xam be barapocotsim pon jopa jiwi juniya itorobeibim. Matautano jiwi cobe itorobeibame xua penoteibiwa pocotsiwa jopa jinyawiyo. Matautano pexaewa xua naweta noteibame ichaxota jopa ubim.²⁵ Daxota cacunuwatsi baxua neexanaeinxae tsipei metha inta pichipame barapo paratiximonaebe poxonae equeicha icha paratiximonaebe cata matoma exainchi daxota jinya paratiximonaebe muthutha xubotan. Xote barapo paratiximonaebe caewa cata canawitatsi’, jei bapon.²⁶ Nexata pon pecanamataxeinaein namchi jeye: ‘¡Bepa maisa dapon abem, pon fifiname poxonae inta nacuitame! Xam apara neyabara nanta xeiname xua xan pexaewa tanoteibiwa pocotsiwa naweta ichaxota jopa tacoya ubeibinyo. Matautano xua ichamonae cobe itorobeiban xua noteiba pocotsiwa jopa tawiyo.²⁷ Tsipei catsawiya neyabara nanta xeiname, xua bichocono daunwei itoroban daxota bayatha inta bewa barapo paratiximonaebe banco botha botsipame. Nexata poxonae equeicha patopan, icha paratiximonaebe equeicha matoma xeinaetsipan xua equeicha inta pemataropeicha botsixaetsipae poxonae ichamonae nacowaeta barapo taparatiximonaebe’, jei pon pecanamataxeinaein.²⁸ Bapoxonae pon pecanamataxeinaein barai pomonaebaxota umena jeye: ‘Bapon pacobe wepire barapo cae mil po paratiximonaebe. Bapoxonae barapo paratiximonaebe pacare pon icha diez mil po paratiximonaebe xeina.²⁹ Pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane xua beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi.³⁰ Matauta bapon pon inta beta jopa nacuichiyo bapon paxore peitaquirei nacuatha, xua barapo nacuatha pewecoyeinexa, xua nantanuweya penantu jayabinexa

tsane', jei pon pecanamataxeinaein", jei Jesús.

Meje yabara poxonae Jesús nayabara paeba xua bepa pinae Nacom Pexanto tatsi tsabina daxita jiwi

³¹ Equeicha Jesús pijimonae tsipaeba, jeye: "Xan, ponxaein Nacom Tananeitapetsin patopeicaein, iru matatsunpiwi nebaru patsicaena. Poxonae patopeicaein, bapoxonae ecaein pexeinya peitupanae ecaewatha xua tawa tayabara paebinexa daxita jiwi xua penatsicuenta siwa abe peexanaexae Nacomtha. ³² Jiwi nacaetutsina taitabaratha pomonae daxita nacuan werena pona. Barichin tsane icha pon oveja peewatsin ichi. Bapon ba tsaba ovejamona, matautano tsaba icha duweimonaeno, po duweimonaewun cabra. ³³ Pon ovejamona peewatsin, bapon ovejamona cuaranoba pecoxa weya. Cabra duweimona petsocona weya cuaranoba. Bara cana jutiya ichin tsane jiwitha, icha pon ovejamona peewatsin ichi. Pomonae xanepanaya peexanaewi tsana nobin. Pomonae abe peexanaewi tsana nobin. ³⁴ Bapoxonae xan ponxaein jiwi itorobiya pepa Taewatsin baran tsane pomonae tacoxa weya inta umena, jan tsane: 'Anetha paxam pomonae Nacom, Taxa, paca juntu coyene weiweina exana. Pajojoniyama Nacom pia peitorobi nacuatheicha. Bara xoteicha caena bayatha Nacom paca tsiwunaeta pocotsiwa xua paxam nexa, beya poxonae barapo nacue forota. ³⁵ Paca itacupa xua papatame baxoteicha, tsipei poxonae jainpan bayatha, bapoxonae pana neapatame pexaewa. Matauta tsipei poxonae meratsipan, bapoxonae mera pana neapatame. Matauta tsipei bayatha poxonae patopan painya botha poxonae be wawatsiyo coyeneya patopan daichitha pana nententa weyataeya wabame. ³⁶ Matautano tsipei poxonae bayatha jumasa patopan, bapoxonae paparuwa pana necatame. Matautano tsipei poxonae bayatha neromaeba yawa poxonae atenein bara pana nesiwa poname painya tana neyawenaenexam. Matautano tsipei poxonae jiwi pecubi botha neeta, paxam papatame painya tana nenecotsinexam', jan tsane xua ponxaein jiwi itorobiya pepa Taewatsin. ³⁷ Nexata barapomonae, pomonae tacoxa weya inta peumenaexae pomonae xanepanaya peexanaewi, nejei tsane: 'Pata Tanecanamataxeinaem, ¿eta poxonae paca tainchi xua jainpame matauta xua poxonae paca apatutsi pexaewa? ¿Eta poxonae paca cui tainchi xua meratsipame xua bapoxonae mera paca apatatsi? ³⁸ ¿Eta poxonae paca tainchi xua poxonae be wawatsiyo coyeneya patopame xua bapoxonae paca matenta weyataeya wabatsi? ¿Eta poxonae paca tainchi xua poxonae jumasa patopame xua bapoxonae paca catatsi paparuwa? ³⁹ ¿Eta poxonae paca tainchi poxonae caromaeba xua poxonae atenemno xua bapoxonae paca siwa poinchi pata paca cayawenaenexatsi? ¿Eta poxonae paca tainchi poxonae jiwi pecubi botha caeta xua bapoxonae papatan pata cataenexatsi?' nejei tsane barapomonae. ⁴⁰ Bapoxonae xan ponxaein jiwi itorobiya pepa Taewatsin, jume notsin barapomonaetha jan tsane: 'Xaniyan paca tsipaebatsi. Daxita po coyenewan paxam bayatha paexaname tamona jiwitha poxonae bequein barapomonae jopa peainya cui jiwiyoy, apara bara painta exaname', jan tsane ponxaein jiwi itorobiya pepa Taewatsin.

⁴¹ "Nexata xan ponxaein jiwi itorobiya pepa Taewatsin baran tsane pomonae tatsocona weya peumenaewi, pomonae jopa beta peexanaewi, jan tsane: 'Panatsixibarucupare taxainya weya, tsipei paxam pomonae abe painya neexanae jiwi pam. Maisa po nacuatha isoto jopa cuinaya itacounayiyo baxota paponare. Barapo iso nacua caena bayatha Nacom yabara wunaeta caurimonae pia pentacaponaein tatsi nexa iruru pia matatsunpiwimonae tatsi nexa pomonae caurimonae. ⁴² Tsipei poxonae jainpan bayatha, jopa pexaewa pana necatsim. Matauta tsipei poxonae bayatha meratsipan, jopa mera pana neapatsim. ⁴³ Matautano tsipei caena bayatha poxonae be wawatsiyo coyeneya patopan, paxam jopa pana nententa weyataeya wabim. Matauta tsipei poxonae bayatha jumasa patopan, paxam paparuwa jopa pana necatsim. Matautano tsipei caena bayatha poxonae neromaeba yawa poxonae jiwi pecubi botha ecan, paxam jopa pana nesiwa ponaem', jan tsane. ⁴⁴ Nexata pomonae abe peexanaewi nejume notsina, jei tsane: 'Pata Tanecanamataxeinaem, ¿eta poxonae xua pata paca cui taewathatsi xua jopa

paca yawenaetsi? ¿Eta poxonaе xua pata paca cataebenaewathatsi poxonaе jainpame? Matautano ¿eta poxonaе xua pata paca cataebenaewathatsi poxonaе meratsipame? Matautano, ¿eta poxonaе xua poxonaе pata paca cataebenaewathatsi poxonaе be wawatsiyo coyeneya patopame? Matautano, ¿eta poxonaе xua poxonaе pata paca cataebenaewathatsi poxonaе caromaeba? Matautano, ¿eta poxonaе xua poxonaе pata paca cataebenaewathatsi poxonaе jiwi pecubi botha caeta? Daxita baxuan, ¿eta poxonaе xua poxonaе jopa paca yawenaetsi? nejei tsane barapomonaе. ⁴⁵ Xan ponxaein jiwi itorobiya pepa Taewatsin jume notsin barapomonaе jan tsane: ‘Xaniyan paca tsipaebatsi. Daxita po coyenewa bayatha jopa paexanaem tamonaе jiwitha xua barapomonaе jopa peainya cui jiwiyoxae, apara bara jopa painta exanaem’, jan tsane ponxaein jiwi itorobiya pepa Taewatsin. ⁴⁶ Bexa bapoxonaе tsane barapo abe peexanae jiwi ponaena po nacuatha bapana jopa naci copatsi xua atene. Pomonaе pentu cui xanepanae jiwi ponaena po nacuatha jiwi xeineiba peantucoyeneyapusuwa, po peantucoyeneyapusuwa ataya tsiteca”, jei Jesús.

26

Meje yabara poxonaе fariseomonaе iru sacerdotemonaе pia pentacaponaei tatsi daxita barapomonaе Jesús yabara nanta xeinatsi po coyeneya xua Jesús pewaetabiwa tsainchi (Mr 14.1-2; Lc 22.1-2; Jn 11.45-53)

¹ Poxonaе Jesús baxua daxita najume weta, bapoxonaе pijimonaе barai, jeye:

² —Paxam payaputaneme xua poxonaе po baya tsane, jiwi nacaetutsina penabanaenexa pexaewa peyabara nanta xeinaenexa barapo matacabi xua poxonaе caena bayatha matha judiomonaе Egipto nacia weya panenebiya, po matacabi pewun Pascua matacabi wun. Barapo mataqueitha ichamonaе necaenaetsina xua tparucua tanaexanaenexa tsane naetotha, ponxaein Nacom Tananeitapetsin, jei Jesús.

³ Poxonaе Jesús pijimonaе baxua tsipaebuncua, bara caena barapo mataqueitha sacerdotemonaе pia pentacaponaei tatsi nacaetuta. Iruru baxota nacaetuta judiomonaе pia pitiri jiwi tatsi. Barapomonaе daxita nacaetuta po tututha pon pewun Caifás pon sacerdotemonaе pia pepa pentacaponaein tatsi pia pexeinya tutu botha tatsi. ⁴ Daxita barapomonaе naba ru muxu jei xua bepa pinae eta bichi tsane poxonaе Jesús nameicha waetabinchi xua pebexubiwa tsainchi. ⁵ Barapomonaе najei:

—Abu jopa waetabi tsainchi poxonaе jiwi Pascua matacabi wuntha nacaetuta penanabanaenexa pexaewa. Tsipei icha barapo mataqueitha waetabichipatsi pinmonaе anaepanaya najume cayayataxubichipa, najei daxita barapomonaе.

Meje yabara poxonaе petsiriwa Jesús mata epatabatsi penasiwa, po penasiwa petuxueiwa (Mr 14.3-9; Jn 12.1-8)

⁶ Pirapae Jesús pozona Betania tomaratha. Barapo tomaratha Jesús pozona Simón pia botha tatsi, pon copiya bayatha peperu sawinchi. ⁷ Barapo botha petsiriwa powa pesi cui weiweinaewa Jesús imoxoyo caquita uncuatabatsi. Barapo petsiriwa capatopa alabastro ibo wun bosibu atsato, xua bichocono wunca penasiwa xua petuxueiwa, po petuxueiwa bichocono ainya matoma. Poxonaе Jesús eca pexaethopaewatha, bapoxonaе barapo petsiriwa Jesús mata epatabatsi barapo petuxuei tuxusi nasiwatha. ⁸ Poxonaе Jesús pijimonaе tatsi tane baxua, barapomonaе bichocono anaepana, yawa caemonaе najeino:

—¿Eta pocotsiwa metha saya baxua xuba jane? ⁹ Barapo petuxueiwa becaenaetsipatsi bapoxonaе bexeinaetsipatsi paratixi nawita xua bapoxonaе barapo paratixitha beyawenaetsipatsi peacopeibi jiwi, najei barapomonaе.

¹⁰ Jesús yaputane xua pijimonaе tatsi baxua pepaebiwa, daxota Jesús jeye:

—¿Eta pocotsiwa metha barapowa pabiataneme? Pocotsiwa barapowa inta exana apara seicayaru xua pexeinya coyene inta exana. ¹¹ Barapo irathe peacopeibi jiwi paca baru jinompeibina painya neyawenaenexa tsaibi tsane barapo jiwi. Ichitha nama

paxam jopa ataya paca baru poponae tsainchi xua pata tana neyawenaenexam barapo irathe. ¹² Barapowa xua nenta epataraba tapepontha xua petuxuei tuxusi nasiwatha apara xua tsiwanaya nenacui yabara nacui wunaeta xua muthu tana neboyaenexa poxonae tupaen. ¹³ Bara xaniyan paca tsipaebatsi, daxita nacuantha poxonae jiwi cueicueije tsane Nacom pia pecapanenebiyae diwesi, barapo jiwi yawa yabara paebina xua pocotsiwa poxonae bapowa inta exana xua jiwi barapowa peyabara cui nanta xeinaenexatsi, jei Jesús.

Meje yabara poxonae Judas, Jesús caenaetaxotsi

(Mr 14.10-11; Lc 22.3-6)

¹⁴ Nexata Jesús pijimonaе tatsi pomonaе doce poyobe tatsi, barapo doce poyobe jiwana bara caein, bapon pewun Judas Iscariote. Bapon Judas pona sacerdotemonaе pia pentacaponae wi tatsi beya xua petsipaebinxе barapomonaetha. ¹⁵ Judas jeye barapomonaetha:

—¿Eta po paratixi pana necatsiname icha Jesús caenaetaxubin, painya xantha? jei.

Nexata barapomonaе Judas pentoma catatsi treinta po paratiximonaеbe, xua po paratixi bichocono matoma nawita. ¹⁶ Barapoxonaе Judas tamropata pitaba xua jeita xua po coyenetha Jesús pecaenaetaxubiwa tsainchi barapomonaetha, poxonae peyapu xanepanaewatha.

Meje yabara poxonae Jesús pijimonaе baru nabane Pascua wun matabitha

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Nexata copiya matabi jopa po matabi tsiwana penantacarucuae matabi, xua po matabintha poxonae jiwi tsinacaetsina xua penabanaewa tsane pan, po pan jopa muxunapentsiyo levadura matawun, pocotsiwa xua cotowa exana pan. Jesús imoxoyo caquita umenarucupatsi pijimonaе yawa Jesús jeichichino:

—¿Exota ichichipame xua ichaxota pexaewa paca tsinacui wunaetsinchi wana-banaenexa tsane xua Pascua wun matabi nexa? jei barapomonaе.

¹⁸ Jesús barai pijimonaе, jeye:

—Tomara beya paponde, Jerusalén tomara beya. Paponde po botha pon bichocono pin tutu xeina. Bapontha painta jande: ‘Pon jiwi Pecuidubin namchi: Bara nama tatupaе wunaе tsane. Jinya tututha tajiwiwimonaе tha baru nabanaetsi pexaewa Pascua wun matabi nexa’, cajei pon jiwi Pecuidubin, pajande, jei Jesús pijimonaetha.

¹⁹ Jesús pijimonaе tatsi bara exana pocotsiwa bayatha Jesús pijimonaе peitorobixae. Matautano barapomonaе pexaewa nacui wunaetajeba Pascua wun matabi nexa xua penabanaenexa.

²⁰ Poxonaе quirei tsanaicha bapoxonaе Jesús pijimonaе baru eca pexaethopaewatha pomonaе doce poyobe tatsi. ²¹ Poxonaе Jesús pijimonaе baru xunaeca bapoxonaе barai pijimonaе, jeye:

—Bara xaniyan paca tsipaebatsi caein pon paxam jiwana pam, bapon necaenaetaxubina ichamonaetha xua tana nebexubiwa tsane ichamonaе, jei.

²² Nexata bapoxonaе Jesús pijimonaе tatsi unthuthu wecoyei tsurucupae, nexata daxita tsana jei tsoponae Jesustha:

—Tanecanamataxeinaem, apara ¿xan cacaenaetaxubinchi? jei daxita barapomonaе xua Jesús tsana yainyabapoinchi.

²³ Jesús jume nota barapomonaе, jeye:

—Pon cae paratotha pana naba ru jajaucuncuaponanbe pan, bapon apara pon necaenaetaxubina ichamonaetha. ²⁴ Xan ponxaein Nacom Tananeitapetsin bewa tupaen, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha. Metha jame wunaе tsipae icha bapon bayatha jopa naexaenae tsipae, tsipei bexa tsane bichocono atene tsocuae tsane, bichocono abe tana necana exanaexae, jei Jesús.

²⁵ Nexata Judas pon Jesús caenaetaxubinchi bapon itacaretaba, jeye Jesustha:

—Pon jiwi Necuidubim, ¿xan apara cacaenaetaxubinchi? jei Judas.

Jesús jume nota, jeye:

—A, xuaunxuae bara paebame, jei.

²⁶ Poxonae Jesús pijimonae barũ xunaeca, bapoxonae Jesús pecobetha pita pan yawa Paxatha tsipaeba, jeye: “Axa, maisa jũntũ coyene weiweinan xua pan pata tana necatsiwam”, jei. Bapoxonae Jesús pecobetha pan epa janaca yawa catsiba pijimonae. Bapoxonae pijimonae barai, jeye:

—Paxaema po pan epa janacan. Barapo pan apara yabara caunuta tapepon xua poxonae tapaca tsitũpaewatsi tsainchi, jei Jesús.

²⁷ Bapoxonae Jesús equeicha pecobetha pita corotiyo yawa Nacomtha tsipaeba, jeye: “Axa, maisa jũntũ coyene weiweinan xua corotiyotha ecareca pepa uva mera xua pata tana necatsiwam”, jei. Bapoxonae Jesús pijimonae cata corotiyo xua pejiwana aapaponaenexa. Bapoxonae jeye pijimonaetha:

—Daxita pa-aapaponde xua barapo cae corotiyotha. ²⁸ Pena peyabara tsiwũnae muxu dutsi coyenewa paca tsipaebatsi. Barapo uva mera xua tsijuntutu eca corotiyotha barapo mera yabara caunuta tajana xua jana othoparenaein poxonae tũpaein. Barapo jana tsita itapeinya xeinaena xua jiwi pinmonae, yabara jũntemainaein abe pia peexanae cuiru coyenein tatsi. ²⁹ Daxota paca tsipaebatsi barapo uva mera jopa equeicha paca barũ apae tsainchi anoxuae. Meisa abũ bexa tsane equeicha pena coyenewatha paca barũ apaeinchi, barapo uva mera poxonae Nacom neexanaena xua itorobiya ewatsin jiwi, jei Jesús.

Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeinyo”, pinae yabara jei tsainchi Jesús

(Mr 14.26-31; Lc 22.31-34; Jn 13.36-38)

³⁰ Poxonae Jesús pijimonae barũ najume weta xua naxũna Nacom nexa, bapoxonae Jesús pijimonae barũ pona demxuwa beya. Barapo demxuwa pewũn demxu Olivowa, olivo naein peumenaexae baxota. ³¹ Nexata Jesús barai pijimonae, jeye:

—Anoxuae barapo merawithe daxita pam pana necuentarũcupaename, tapaca urapentsixaetsi tsainchi. Baxua paexanaename tsipei Nacom Pejume Diwesitha paca yabara cui tsiwũnaeya jeye: ‘Poxonae ovejamona peewatsin bexubinchi, bapoxonae ovejamona tsanarũcupaena’, jei Nacom. Penamchixae poxonae ichamonae newaetabina tana nebexubinexa pana necuentarũcupaename. ³² Ichitha taeyarapaeyo poxonae equeicha asũ neexanaena, bapoxonae paca tsiwana patopiyaeinchi Galilea nacua beya poxonae bara beya paponaname, jei Jesús.

³³ Nexata Pedro Jesús jume notatsi, jeye:

—Bequein ichamonae cacuentarũcupaena jinya neuraxubixae nama xan bapana jopa cacuenta naetsiricuae tsainchi tana neuraxubixaemxae, jei Pedro.

³⁴ Nexata Jesús Pedro jume baraichi, jeye:

—Bara xainyeya catsipaebatsi po merawithe, pewũnaeya poxonae beya ainya jume cuiyobetha wacara pebto fibina, bapoxonae xam copiya acoibi po jume cuiyobetha neyabara jam tsane: ‘Jopa dapon yaitaeinyo’, neyabara jam tsane, jei Jesús.

³⁵ Pedro Jesús baraichi:

—Bara bequein capuna tũpaeinchi ichitha baxua jopa cayabara paebi tsainchi, jei Pedro.

Irũrũ daxita Jesús pijimonae tatsi bara jumichi, nanta jũpiya paeba.

Meje poxonae Jesús Paxa tsipaeba ichaxota tsica iriyo, po iriyo pewũn Getsemaní

(Mr 14.32-42; Lc 22.39-46)

³⁶ Nexata Jesús pijimonae barũ patopa ichaxota tsica iriyo, po iriyo pewũn Getsemaní. Baxota Jesús barai pijimonae, jeye:

—Xote abũ paenare tha matha Taxatha tsipaebichi painya cuariyatha xotiye, jei Jesús.

³⁷ Jesús baru pona Pedro. Iru Zebedeo pexantobe tatsi Jesús baru pona. Bapoxonae Jesús bichocono unthuthu wecoyeyi, yawa bichocono unthuthu deideijei. ³⁸ Nexata barapo acoibi poyobetha Jesús barai, jeye:

—Bichocono juntu coyene natsepiya wecoyan, tsipei muxu tatupae. Xote paenare, yawa payoyocare xua painya tana nebaru naitaewatsinexam, jei Jesús.

³⁹ Nexata Jesús equeicha tsiwiyo dabe natsixitabiya, irabe taeuncuareca tsipei jopa juniya ajuntutaneyo. Bapoxonae Jesús Paxa tsipaeba, jeye:

—Axa, icha ichichipame xua tana neyawenaewam tsane, newepire pocotsiwa anthuthutane neexana. Ichitha jopa necana exanaeinde xua pocotsiwa ichichipan, saya jame necana exande xua pocotsiwa ichichipame, jei.

⁴⁰ Nexata Jesús equeicha caibe iya pijimonae tatsi beya poyobe xua acoibi poyobe, ichitha barapomonae maita. Jesús Pedro baraichi, jeye:

—Maisa jopa paca itacupaeyo xua pata tana nebaru yoyocaewam xua poxonae bequein bara cae horatha. ⁴¹ Maisa payoyocare. Nacom patsipaebare xua jopa abe painya neexanaewa tsane poxonae caurimonae pia pentacaponaein tatsi piraichi paca juntu coyene jujuta. Painya juntu coyene wetsina bichocono paichichipame xua Nacom painya netsipaebiwa ichitha painya pepon bichocono paacoyenefaetabim xua painya netsipaebiwa Nacom, jei Jesús.

⁴² Equeicha Jesús bara nama caeto pona xua Paxa petsipaebinexa. Poxonae Paxa tsipaeba, jeye:

—Axa, icha jopa ichichipaem xua tana newepichiawam, pocotsiwa neajuntutane exana, bara jopa necana exanaeinde xua pocotsiwa ichichipan saya jame necana exande xua pocotsiwa ichichipame, jei Jesús.

⁴³ Bapoxonae equeicha Jesús pijimonae beya pona xua acoibi poyobe daichitha barapo acoibi poyobe came maitumena, tsipei bichocono itata tsacatsaquei xua itamaipana.

⁴⁴ Bara nexata Jesús equeicha saya cuentapona. Equeicha Jesús pona xua Paxa petsipaebinexa xua equeicha acoibi po cuiyobetha, barapo jumetha equeicha Jesús Paxa tsipaeba.

⁴⁵ Nexata equeicha Jesús pona pijimonae tatsi beya. Bapoxonae barai pijimonae, jeye:

—¡Moya bara painya nepu maitumenaende aunxuae jopa Nacom patsipaebim xua painya nepaca cayawenaenexa! Bayatha tsuxubiba, po horatha poxonae xua xan ponxaein Nacom Tananeitapetsin ichun necaenaetaxubina ichamonaetha, pomonaetha pomona peantucoyenebe jiwi. ⁴⁶ Panacosapende, panonobapondeno. Antha bu poinchi. Dota dawerena pon necaenaetaxubina ichamonaetha, jei Jesús pijimonaetha.

Meje yabara poxonae Jesús waetabatsi

(Mr 14.43-50; Lc 22.47-53; Jn 18.2-11)

⁴⁷ Poxonae Jesús cataunxuae tsipaebuncua pijimonae bapoxonae Judas patopa. Bapon Judas doce poyobe jiwana caein, xua Jesús pepa pijimonae tatsi. Judas pinmonae baru patopa. Ichamonaе cusin cajjinca. Ichamonaе iwabi cajjinca. Daxota daxita barapomonae pata, tsipei sacerdotemonae pia pentacaponaei tatsi iru pitiri jiwiru daxita barapo pentacaponaei itoroba barapomonae. ⁴⁸ Judas, pon Jesús caenaetaxubinchi, pewunaeya tsane xua poxonae patopa bapon cou tsiwanaya paeba barapo pin bicheitha, cou jeye: “Pon tsutsubin, bapon apara barapo pebin, nexata moya pawaetabare bapon”, cou jei. ⁴⁹ Daxota poxonae patopa, bapoxonae Judas Jesús imoxoyo caquita poinchi, matauta nainya Jesús jeichichi:

—Pon jiwi Pecuidubim, xamda, jei Judas.

Bapoxonae nainya Judas Jesús tsutsubatsi. ⁵⁰ Nexata Jesús jume nota, jeye:

—Ponxae tajitom, moya bara exande xua jinya necana exanaetsi, jei.

Nexata barapomonae pomonaе Judas pebaru patopaexae barapomonae Jesús imoxoyo caquita umenarucupatsi, bapoxonae Jesús waetabatsi.

⁵¹ Caenin pon Jesús pijimonaе tatsi jiwana, pon Pedro, bapon nainya cusi namara wejonta. Bapoxonaе bapon muxuyoro catsoniba, pon sacerdotemonaе pia pepa pentacaponaein tatsi tanacuitatsi, bapon muxuyoro catsonibatsi. ⁵² Nexata Jesús barai pijimonaе jiwana jitontha, pon Pedro, jeye:

—Maisa cusi jeinca pentacuerutha. Tsipei pon ba cusitha namawainta, bapon ba xuya bexubinchi cusitha. ⁵³ ¡Maisa xam jopa yaputaem! Icha ichichipan bara neitacupa xua Taxatha tawucaewa, xua nainya inta peitorobinexa pia matatsunpiwi xua bichocono ayei pin bicheitomonaе xua tana neyawenaewa tsane. ⁵⁴ Icha Taxa wucaetsipan xua bapon tana neyawenaewa tsane bapoxonaе jopa neyabara jume cui wetsipae po coyene bayatha Nacom Pejume Diwesitha neyabara paeba, po coyene xua tana newaetabiwa tsane xua tana nebexubiwa tsane, jei Jesús.

⁵⁵ Nexata Jesús barai pomonaetha pomonaе Judas baru patopa, jeye:

—Pacapatame cusin yawa iwabi be poxonaе pacana ichim pontha pon jiwi pecaibin. Daxita matababin Nacom pin pia botha tatsi paca baru poponeibatsi, paca cuidubeibatsino, daichitha bapoxonaе jame jopa pana newaetabim. ⁵⁶ Ichitha daxita baxuan neyabara canacui jume weta exana, bayatha penecui yabara wunaе tsiwanaya paebixae pomonaе Nacom peitorobi jume pepaebiwi, Nacom Pejume Diwesitha, jei Jesús.

Bapoxonaе Jesús cuentarucupatsi pijimonaе, meisa Jesús baru umeinchi pomonaе Judas bayatha baru patopa.

Meje yabara poxonaе Jesús capoinchi judiomonaе pia pecanamata caitorobi jiwi bicheito tatsi pia peitabaratha tatsi

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Pomonaе Jesús teicatsi barapomonaе Jesús capoinchi pon pewun Caifás itabaratha tatsi. Bapon Caifás, pon sacerdotemonaе pia pepa pentacaponaein tatsi pon peainya cuin yatsicaya. Baxota iru nanacaetuta pomonaе judiomonaе pecuidubiwichi Moisés pia peitorobi coyene tatsi, iruru pitiri jiwi pomonaе judiomonaexae. ⁵⁸ Iru Pedro Jesús tsiwiyo taju pu taetae tsiniyatsi beya poxonaе patopa panatha, po panatha ichaxota sacerdotemonaе pia pepa pentacaponaein tatsi tauncuatsi bo. Poxonaе Pedro pana tututha joniya bapoxonaе imoxoyo naeca policiamonaetha pecui taenexa xua po coyeneya Jesús cana exanaeinchi pomonaе nacaetuta.

⁵⁹ Sacerdotemonaе pia pentacaponaewi tatsi iru ichamonaeno, pomonaе pecanamata caitorobi jiwi bicheito, daxita barapomonaе jeita ichamonaе pomonaе xua Jesús naerabiya peyabara paebinexatsi pocotsiwa xua Jesús paeba xuano xua exana, pia barapo jumetha paebichi xua bara Jesús tupa peexanaewa tsainchi. ⁶⁰ Bara bequein pin bicheito pata xua Jesús abeya peyabara paebinexatsi, ichitha cataunxuae barapomonaе pomonaе pecanamata caitorobi bicheito, came jopa xeinaeyo po jume naemata jume tsita itapeinya xeina pocotsiwa xua Jesús paeba xua barapo jumetha Jesús pebexubinexatsi. Matapainya bapoxonaе pebinbe nacueyatabe patopabe. Baponbe Jesús abeya yabara paebatsibe. ⁶¹ Baraponbe jeibe Jesús yabara:

—Bapon namchi: ‘Neitacupa xua Nacom pin pia bo abe taexanaewa. Bapoxonaе equeicha acoibi po matababibe barapo Nacom pin pia bo tatsi xanebin’, jei, jeibe baponbe.

⁶² Nexata bapoxonaе sacerdotemonaе pia pepa pentacaponaein tatsi asiya uncuataba yawa bapoxonaе Jesús baraichi, jeye:

—¿Jopa jume notsim barapomonaе? ¿Bara xainyei xua po jumein barapomonaе cayabara paeba? jei sacerdotemonaе pia pepa pentacaponaein tatsi.

⁶³ Daichitha saya Jesús moya uncua. Daxota bapoxonaе sacerdotemonaе pia pepa pentacaponaein tatsi Jesús baraichi, jeye:

—Caitorobatsi Nacom peitabaratha tatsi, pon asu popona. Yatsicaewa paebiname pocotsiwa bara xainyei nepaebiwa. Incane pana netsipaebare. ¿Bara yatsicaya xam Mesías, pon Nacom Pexantom, pon Nacom necaitorobin? jei.

⁶⁴ Jesús jume nota, jeye:

—Aa, xuaunxuae bara paebame. Paca tsipaebatsi xua pana netaename xan ponxaein Nacom Tananeitapetsin Nacom pia pecoxa weya tatsi ecaein pon peayapusu itorobi coyenewa pexeinaein. Matautano pana netaename poxona equeicha patopeicaein tsaquinaebowantha xua peitaboco wetsica, jei Jesús.

⁶⁵ Nexata bapon pon sacerdotemonae pia pepa pentacaponaein tatsi pin anaetha anaya paparuwa nata tsitsinaxuba. Bapoxonae jeye:

—Po jumetha xua bapon paeba barapo jume Nacom tsita abetsi. Nama equeicha jopa wanantawenonaewa ichamonae xua wanaca tsipaebiwa tsane xua bapon peyabara paebiwatsi. Bapon natsiaenae exana abe pepaebixae barapo jume poxonae Nacom Pexanto najainta. Paxam bara pajume taneme pocotsiwa bapon paeba, pocotsiwa Nacom jopa ichipaeyo. ⁶⁶ ¿Eta xua pacayabara nanta xeiname xua paexanaename bapontha abe pepaebixae? jei.

Daxita barapo bicheito po bicheito baxota ena, jeye:

—Bara xainyeya paebame. Jesús abe pia pepaebixae Nacom tsitatsi xua bapon tsita natsicuentatsi. Daxota bapon bewa tupaena, jei barapo pecanamata caitorobi jiwi bicheito.

⁶⁷ Poxonae barapomonae Jesús itacuere cutatsi, bapoxonae peonetha Jesús itabara subabatsi, yawano butsino. Ichamonae Jesús itabara tsaquibacotatsi. ⁶⁸ Bapoxonae barapomonae Jesús baraichi:

—Xam jam: ‘Xan Mesías’, jam, incane pana netsipaebare: ¿Jintam caitabara tsaquibobara xua bequein paca itacuere cutatsi? jei barapomonae.

Meje yabara poxonae Pedro Jesús yabara paebatsi xua jeye: “Jopa dapon yaitaeinyo”, yabara jeichichi Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Poxonae cataunxuae Jesús cana exanompatsi bapoxonae iruru Pedro panatha eca xua pesato beya. Bapoxonae iruru yabuyo, powa sacerdotemonae pia pepa pentacaponaein tatsi tanacuitatsi, bapowa Pedro imoxoyo caquita poinchi. Bapowa Pedro jeichichi:

—Apara xam bayatha iruru napuna poneibame Jesús, pon Galilea nacuarin, jei yabuyo.

⁷⁰ Ichitha Pedro jume matawenta bapowa, daxita jiwi peitutha tatsi. Pedro jeye:

—Jopa yaputaeyo pocotsiwa xua yabara paebame, jei Pedro.

⁷¹ Poxonae cataunxuae Pedro ecapona xua pia ponaetsi botuxu coiboto beya, bapoxonae iru ichawayo Pedro tainchi. Barapowa tsipaeba ichamonae pomona baxota iru umena, Pedro yabara paebatsi, jeye:

—Apara bapon, pon napuna poponeiba Jesús pon Nazaret tomarapin, jei barapowayo.

⁷² Equeicha Pedro jume matawenta, jeye:

—Bara xainyan jan. Jopa dapon yaitaeinyo pon aunxuae payabara paebame, jei Pedro.

⁷³ Equeicha bapoxonae pirapaeyo Pedro imoxoyo caquita poinchi pomona baxota umena. Barapomonae Pedro jeichichi:

—Apara bara xam iruru bapon pijimona tatsi jiwanam, daxota barapo jume coyeneya paebame, icha barapomonae ichi, jei.

⁷⁴ Nexata Pedro daunweya jeye:

—Bara Nacom peitabaratha xainyeya paca tsipaebatsi pocotsiwa bara xaniwaicha tapaebiwa. Icha jopa xainyeya paca tsipaebichipaetsi metha barabu Nacom abe necana exanaetsipa. Equeicha paca tsipaebatsi, jopa dapon yaitaeinyo xuaunxuae pon payabara paebame, jei Pedro.

Bapoxonae iruru caena nainya wacara pebto fibaru. ⁷⁵ Nexata Pedro nanta xeinataba xua bayatha Jesús Pedro tsipaebatsi poxonae jeye: ‘Xam barapo merawithe, pewunaeya poxonae wacara pebto fibina xam copiya acoibi po jume cuiyobetha neyabara jam tsane: Jopa dapon yaitaeinyo, neyabara jam tsane. Bapoxonae iru nainya wacara pebto fibina’, jeichichi Pedro, xua Jesús paeba. Nexata Pedro pesato bejoniya bichocono wecoyei, peajuntatanexae xua Jesús yabara paebatsi.

27

*Meje yabara poxonaē Jesús capoinchi Pilato beya
(Mr 15.1; Lc 23.1-2; Jn 18.28-32)*

¹ Poxonaē pentha tsina sacerdotemonae pia pentacaponaeawi tatsi irurū judiomonae pia pitiri jiwi tatsi, daxita barapomonae yabara nacaetuta xua nanta jupaeya peburūya penanta xeinaenexa po coyeneya xua Jesús pebexubiwa tsainchi. ² Daxita barapomonae equeicha Jesús maxū cūtsi. Bapoxonaē Jesús yamaxū cūtsiya capoinchi Pilato beya, pon Judea nacuapiwi peyanacua ewatsinchi xua romanomonae peitorobixae.

Meje yabara poxonaē Judas pia coutha nabexuba

³ Judas Jesús caenaetaxubatsi ichamonaetha. Poxonaē bapon jume tane xua ichamonaē Jesús yabara paebatsi xua bewa tupaena abe peexanaexae, poxonaē bequein jopa abe exanaeyo, bapoxonaē Judas bichocono aura xua Jesús pecaenaetaxubixae. Daxota Judas equeicha caewa capona barapo treinta po paratiximonaēbe. Sacerdotemonae pia pentacaponaeawi catatsi irurū pitiri jiwi catatsi. ⁴ Judas barai barapomonae, jeye:

—Poxonaē pebin caenaetaxuban, xua jopa pon abe exanaeyo, xua poxonaē ichamonaē pebexubinexa xua pejana pichapabarena, xan apara bara abe exanan, jei.

Ichitha barapomonae Judas jume notatsi, jeye:

—Apara baxua jopa painta ainya cuiyiyo. Jame apara xam jinya coyam poxonaē baxua cana exaname, jei.

⁵ Nexata Judas barapo treinta po paratiximonaēbe anaya xoya Nacom pin pia botha. Poxonaē Nacom pin pia bo weya pona, bapoxonaē Judas nabexuba pia coutha, nacoibo tathū catutaba athawetsica.

⁶ Bapoxonaē sacerdotemonae pia pentacaponaeawi tatsi nota po paratixi Judas bebaya. Bapoxonaē barapomonae najei:

—Jopa naca copatsiyo xua barapo paratixi bara wajebinexa Nacom pin pia botha tatsi nexa. Tsipei apara barapo paratixi taxoba poxonaē barapo paratixitha comotatsi pebin xua ichamonaē pebexubinexa, xua pejana pichapabarenaenexa, jei barapomonae.

⁷ Bapoxonaē daxita barapomonae peburūya nanta xeinarūcūpa, najei: “Waxainchi barapo paratixitha comotinchi tsica iriyo, po iriyotha jiton tsorobon noteiba xua juruwaton peexaneibinexa. Barapo iriyotha tsane xua pemūthūthūqueibinexa tsainchi poxonaē werapeibina pomonaē penanapaincha jinompaewi xua icha nacua werena peponaewi”, najei. ⁸ Daxota barapo iriyo barapomonae wūn duta po wūn jeye: “Pejana ira”, jei. Po iriyo barapo wūnthā cataunxuae jiwi wūn ununutapona beya anoxuae. ⁹⁻¹⁰ Baraxua barapomonae exana xua bayatha pecui yabara tsiwūnaeya wūnaē tsimuxu dutsiya jeixae pon Nacom peitorobi jume pepaēbin, pon pewūn Jeremías pon caena bayatha tupa. Bapon Jeremías jeye: “Israelmonae pia pentacaponaeawi tatsi catsina treinta po paratiximonaēbe ichūnthā xua poxonaē pecaenaetsixae tsainchi pon pejūntū coyene xeicaēin. Barapo matomatha cana matomatsinchi pon pejūntū coyene xeicaēin. Barapomonae baxua cana exanaena bapontha tsipei barapomonae peburūya nanta xeinarūcūpa pecana matomatsinexa. Bapoxonaē equeicha barapomonae caewa pichina barapo treinta po paratiximonaēbe. Barapo paratixitha barapomonae iriyo comotsina, po iriyotha jiton tsorobon noteibina xua exaneibina juruwaton. Baxua bara barapomonae exana be pocotsi coyeneya Nacom pon jiwi Pecanamataxeinaēin nejume cui itoroba”, jei Jeremías.

*Meje yabara poxonaē Jesús uncua Pilato peitabaratha tatsi
(Mr 15.2-5; Lc 23.3-5; Jn 18.33-38)*

¹¹ Jesús cataunxuae uncua Pilato peitabaratha, pon Judea nacuapiwi peyanacua ewatsinchi. Bapon Pilato Jesús yainyabatsi, jeye:

—¿Bara yatsicaya xam judiomonae itorobiya pia pepa Neewatsin? jei.

Jesús jume nota, jeye:

—A, xuaunxuae paebame bara baxua apara, jei Jesús Pilato beya.

¹² Sacerdotemonae pia pentacaponaeawi tatsi iru judiomonae pia pitiri jiwi tatsi, daxita barapomonae Jesús abe yabara paebatsi xua pinae abe exana. Daichitha Jesús jopa jume barabotsiyo barapomonae. ¹³ Nexata daxota Pilato Jesús baraichi, jeye:

—¿Jopa jume taem pocotsiwa barapomonae bichocono abe cayabara paeba? jei.

¹⁴ Ichitha Jesús jopa jume notsiyo Pilato xua pocotsiwa ichamonae Jesús abe peyabara paebiwatsi xua matauta cae jume coyenewatha jopa jume notsiyo. Daxota Pilato bichocono yabara nantu coyene cui cabenaeca baxua.

Meje yabara poxonae Pilato jume baru jejei xua Jesús bara pebexubiwa tsainchi ichamonae

(Mr 15.6-20; Lc 23.13-25; Jn 18.38-19.16)

¹⁵ Bara nama, Pilato ba pia cui xeina poxonae ba jiwi tsinacaetuta pexaewa penanabanaenexa. Barapo matacabitha Pilato ba caein jiwana pu sotaba pomonae jiwi pecubi botha peanaewi. Pilato ba pu sotaba pon ba jiwi itapeta cowai xua Pilato peisanaxubinexa. ¹⁶ Barapo jiwi pecubi botha iruru eca pon bichocono abe peexanaein, pon peyaputaeinchi daxita jiwi poxonae abe exaneiba. Bapon pewun Barrabás. ¹⁷ Poxonae jiwi nacaetuta, Pilato barai barapo jiwi, jeye:

—¿Eta pon pu sotabocuaein? ¿Metha Barrabás jampa? ¿Metha Jesús jampa, pon Mesías baraichi? jei Pilato.

¹⁸ Baxua Pilato paeba tsipei bapon yaputane xua pomonae pecanamata caitorobi bicheito, Jesús peuwixaetsi, caenaetaxubatsi Pilatotha.

¹⁹ Poxonae Pilato cataunxuae pia peecaethopeibiwatha eca xua Jesús peyabara paebinexatsi penatsicuentsiwa bapoxonae Pilato piowa tatsi najume caitoroba ichuntha xua jeye: “Jopa copatsinde xua bapon pebexubinexatsi ichamonae, tsipei apara bapon pejuntu coyene xeicaein. Yaitama tsipei merawi bapon camaitan daxota bichocono anthuthurewein, tsipei bapon dacotsiwa bexotsi”, jei bapon xua Pilato piowa tatsi najume caitoroba.

²⁰ Ichitha sacerdotemonae pia pentacaponaeawi tatsi, iruru judiomonae pia pitiri jiwi tatsi, daxita barapomonae jiwi cui tsacarabatsi, xua barapo jiwi Pilato pecui itorobinexatsi xua Barrabás pepu sotabinexatsi, matautano xua Jesús pebexubinexatsino. ²¹ Bapon Pilato equeicha barai jiwi, jeye:

—¿Eta pon pu sotabocuaein caein xua baponbe jiwana? jei. Barapomonae Pilatotha jeye:

—Maisa Barrabás pu sotabare bara, jei barapomonae.

²² Equeicha Pilato yainyaba barapomonae, jeye:

—¿Eta xua cana exanocuaein Jesús pon Mesías baraichi? jei.

Nexata pinmonae Pilato jume daunweya jume notatsi, jeye:

—¿Bewa maisa naetotha tūparucua exanaem! jei barapomonae.

²³ Nexata Pilato jume barai, jeye:

—¿Eta pocotsiwa xua metha jane xua abe exana? jei.

Equeicha daumetha barapomonae jume daunweya jeye:

—¿Bewa maisa naetotha tūparucua exanaem! jei.

²⁴ Poxonae Pilato yaputane xua nama taaibichiba pocotsiwa bapon pepaebinexa picoya, xua peajumetsacaxae barapomonae, daxota Pilato itoroba ichun xua petaxawenaenexa tsainchi mera. Bapoxonae barapo meratha nacobe quiataxuba barapo jiwi peitutha tatsi. Bapoxonae bapon namchi, jeye:

—Xan apara jopa tacoutha bexuba exanaeinoyo bapon xua daxota pejana pichapabarena pon jopa bequein abe exanaeyo. Poxonae nacobe quiataxuban meratha, baxua tsita itapeinya xeinan xua apara jopa tacouthinyo. Apara jame painya coutha pam poxonae bexuba paexaname pon abe jopa exanaeyo, jei Pilato.

²⁵ Daxita barapomonae equeicha namchi, jeye:

—¿Paxan iru pata tamomoxi susato jiwi pata coutha pan apara xua bapon bexotsi paexanan! jei daxita barapo jiwi.

²⁶ Nexata Pilato nama pu sotaba Barrabás. Bapoxonae itoroba xua soldadomonae bara Jesús moya bichocono pecuainchinexatsi pocotsiwatha eewa xua bichocono amūpiya xua xota ba jiwi cuainteibatsi poxonae abe exaneiba. Matautano itorobano xua moya bara Jesús tūparucua exanaeinchi naetotha.

²⁷ Bapoxonae soldadomonae Jesús capoinchi Pilato pia bo tatsi beya po soldadomonae yapu eena Pilato pia bo tatsi. Bapoxonae barapo soldadomonae waba icha soldadomonae xua daxita barapo soldadomonae Jesús pematawacaicha umenaenexa tsainchi. ²⁸ Bapoxonae Jesús pia paparuwa juma xuenatsi yawa juma xatatatsi icha paparuwa, po paparuwa tsobia xua Jesús be pecana exanaenexatsi pon jiwi itorobiya pepa Peewatsinchi. ²⁹ Bapoxonae cuane tepa xua pee tepa, yawa bapoxonae Jesús canamitontsiya mata xatatatsi baxua xua cana exanatsi icha be ichi pon jiwi itorobiya pepa peewatsin poxonae mata xatatatsi tepa. Matautano Jesús cobenatsi naewa icha be ichi pon jiwi itorobiya pepa peewatsinchi poxonae naewa cobenatsi poxonae itoroba jiwi. Bapoxonae Jesús peitabaratha tatsi pentabocototha taenatsi xua Jesús naerabiya pebarū cui itura jinaenexa tsainchi. Bapoxonae Jesús cui caponatsi, jeye:

—Jaco judiomonae itorobiya pepa Neewatsim! jei barapomonae xua Jesús canamitontatsi.

³⁰ Matautano Jesús yabara naone subabatsi. Matautano Jesús cobe wepitatsi naewa. Bapoxonae barapo naewatha Jesús mata cuaintatsi. ³¹ Poxonae Jesús canacui wetatsi xua cui caponatsi, equeicha bapoxonae Jesús caewa juma wejontatsi xua po paparuwa tsobia. Bapoxonae equeicha caewa juma xatatatsi po paparuwa pia paparuwaxae tatsi. Bapoxonae Jesús capoinchi xua tūparucua peexanaenexatsi naetotha.

Meje yabara poxonae Jesús tūparucua exanatsi naetotha

(Mr 15.21-32; Lc 23.26-43; Jn 19.17-27)

³² Poxonae Jesús namtotha caenapoinchi soldadomonae, bapoxonae barapo soldadomonae taeba pebin, pon Cirene tomarapin. Bapon pewun Simón. Bapoxonae barapo soldadomonae Simón itorobatsi xua pecaponaenexa Jesús pia naeto tatsi, po naetotha tūparucua peexanaenexatsi Jesús.

³³ Bapoxonae Jesús barū patatsi ichaxota po uruto be jiton matasipa piwa. Daxota barapo uruto jiwi wun unuta “Gólgota”, jei. ³⁴ Baraxotiya Jesús apatatsi vino mera, po vino mera equeicha muxuna epareca hiel mera matawun po mera bichocono atsu wawa. Poxonae Jesús mene pana, bapoxonae Jesús aichaxaibi apa barapo mera.

³⁵ Poxonae Jesús canacobe wetatsi xua naetotha tūparucua exanatsi, bapoxonae soldadomonae nata tsaba Jesús pia paparuwan tatsi. Barapomonae ibotixi bebeya penacueranta notsinexa Jesús pia paparuwan tatsi. Pon beta xoya ibotiyo bapon copiya pita Jesús pia paparuwan tatsi. ³⁶ Nexata barapo soldadomonae Jesús yapu caenatsi poxoru jopa ichipaeyo xua Jesús pepanepaewa tsane. ³⁷ Jesús pentutu wetsica tadutatsi napaewa xua barapo napaewatha tina. Barapo petinadutsiwa jeye: “Baponje apara judiomonae itorobiya pia pepa Peewatsinchi”, jei barapo petinadutsiwa xua napaewatha tinaduta.

³⁸ Irurū ponbe jiwi pecaibinbe tūparucua exanatsibe naetotha ichaxota imoxoyo Jesús ducua. Ichun Jesús petsocona wetauncuiyatsi, ichun pecoxa wetauncuarenatsi.

³⁹ Pomonae Jesús xentapoinchi barapomonae Jesús cui capoinchi, yawa Jesús yabara itata naichaquebatsi. ⁴⁰ Barapomonae Jesús jeichichi:

—Xam bayatha jam: ‘Nacom pin pia bo abe exanaein, bapoxonae equeicha acoibi po matabibe xaneibin’, jam. Moya bara jinya coutha nacapanepare naeto wetsica icha bara metha Nacom Pexantom tatsim, jei barapomonae.

⁴¹ Irurū barichi sacerdotemonae pia pentacaponae tatsi irurū pomonae jiwi pecuidubiwi Moisés pia peitorobi coyene tatsi irurū judiomonae pia pitiri jiwi tatsi, daxita barapomonae Jesús cui capanatsi. Daxita barapomonae najei:

⁴² —Bapon cain capanepeibabei ichamonae, came jopa nacapanepaeyo. Icha bara bapon israelmonae itorobiya pia pepa Peewatsinchi, bə bapon pia coutha naeto wetsica

ecoinca, xainya bapoxonae jume cowantatsi. ⁴³ Bapon jume cowanta Nacom, xua bepa pinae capanepaeinchi, xua Nacom capanepaena. Icha Nacom ichichipa, bu bara moya capanepaena, tsipei caena bayatha naca jei: ‘Apara xan Nacom Pexanton’, naca jei, jei barapomonae.

⁴⁴ Barichiru baxua paeba ponbe jiwi pecaibinbe, ponbe xua iruru cobe matatabarutat-sibe naetotha. Baponbe iruru Jesús cui caponatsi.

Meje yabara poxonae Jesús tupa
(Mr 15.33-41; Lc 23.44-49; Jn 19.28-30)

⁴⁵ Poxonae Jesús cataunxuae ducua naetotha, bapoxonae daxita nacuantha bichocono aitaquiri xua poxonae mataeinyaxae weya, beya yatabopiya. Tres po horabe quirei tsuncuae. ⁴⁶ Bapoxonae Jesús jume daunweya wawai, jeye: “Elí, Elí, ¿lema sabactani?” jei, (barapo jumetha xua jei: “Tanacom, Tanacom, ¿eta pocotsiwa metha nepunaxubame?” jei Jesús.)

⁴⁷ Ichamonae pomonae Jesús baxota jume taeumeinchi, barapomonae jeye:

—Pajume taema. Bapon waba, Elías wabatsi, pon Elías Nacom peitorobi jume pepaebin, pon caena bayatha tupa, jei.

⁴⁸ Bapoxonae caein nainya cuinaepoinya pon barapomonae jiwana yawa pitaba esponja xua baxota pemene capichinexa vino mera xua po mera mene atsu. Poxonae bapon baxota mene capita, bapoxonae naewatha duta xua Jesús petayoichaenexatsi xua peapaenexa. ⁴⁹ Ichitha ichamonae namchi, jeye.

—Abu, abu jopa apatsinde. Waxainchi abu matha taeinchi icha Elías patopeicaena xua bapon pecapanepaenexatsi, jei barapomonae.

⁵⁰ Equeicha Jesús jume daunweya wawai, bapoxonae nama tupanaicha Jesús.

⁵¹ Bapoxonae paparuwa, po paparuwa Nacom pin pia botha ducua, barapo paparuwa nainya bopiya matonta tsitsiqueica ainya epatobe naexanabe. Matautano ira jijiyataxuba, matauta ibo wacapouna. ⁵² Po muthantha pomonae pewerapeibiwi bobena, barapo muthan coibo tupa wacapouna pocotsiwa coibo xatababanoba xua pin ibo panawan. Barapo muthantha cataunxuae abu saya bobena pomonae caena bayatha werapa. Pirapaeyo acoibi po matacabiyo poxonae Jesús asu juina exanatsi, xua Nacom exana, bapoxonae iruru pomonae bayatha pejume cowantsiwichi Nacom pomonae xua bayatha pewerapaexae barapomonae iru asu jujuina exanatsi xua Nacom exana. ⁵³ Bapoxonae daxita barapomonae mutha we-iyiya. Daxita barapomonae, Jerusalén tomara beya pona po tomaratha xeina Nacom pin pia bo tatsi. Barapomonae naitata pinmonaetha Jerusalén tomarapiwitha.

⁵⁴ Bapoxonae soldadomonae pomonae Jesús yapu enatsi iruru barapo soldadomonae pia pentacaponaein tatsi, pon romanomonaein poxonae daxita barapomonae tane xua ira jijiyata yawa xua tane ichawanno, bapoxonae barapomonae bichocono junuwa. Bapoxonae barapomonae jeye:

—¡Apara bara yatsicaya bapon Nacom pepa Pexanto tatsi! jei barapo soldadomonae.

⁵⁵ Barichi iru ainyawaxi yabuxi, barapowaxi Jesús tsiwiyo tajü wetaeumeinyatsi. Barapowaxi Jesús bayatha matha puna jinompatsi xua poxonae Galilea nacua weya pona xua Jesús peyawenaenexatsi. ⁵⁶ Barapowaxi jiwana, ichowayo pewun María Magdalena, powa Magdala tomarapiwayo. Ichowayo pewun María, Santiago iru José baponbe penabe tatsi. Ichowayo pewun Salomé bapowa Zebedeo piowa tatsi, xua iru bapowa Santiago iru Juan baponbe pena tatsibe.

Meje yabara poxonae Jesús petupaen ibo muthantha yauxatababotatsi
(Mr 15.42-47; Lc 23.50-56; Jn 19.38-42)

⁵⁷ Poxonae quirei tsanaicha, pebin patopa ichaxota Jesús naetotha tuparucua. Bapon copei pexeinaein. Bapon pewun José. Bapon Arimatea tomarapin. Matauta bapon iru Jesús pia pepuna jinompaewichi jiwana pin tatsi pomonae Jesús pia pejume cowantsiwichixaetsi. ⁵⁸ Bapon pona Pilato beya pewucaenexa xua Jesús petupaen. Nexata

Pilato najume caruta xua bara José pecatsinexatsi Jesús petupaein. ⁵⁹ José nexata pita Jesús petupaein. Bapoxonae pena paparuwatha mata quiyontabareca xua pexeinya paparuwa. ⁶⁰ Bapoxonae José muthu iya Jesús botatsi pena ibo muthutha, po muthu bequein José pia muthu tatsi xua poxonae petupaewa tsane. Poxonae José nacobe weta xua yauxatatababota pin ibo panawatha, bapoxonae ponataba. ⁶¹ Baxotiya ibo muthu itapatha eca María Magdalena, powa Magdala tomarapiwayo. Iru ichowayoru María baxota naeca.

Meje yabara poxonae Pilato itoroba soldadomnae xua Jesús peyamuthu eenaenexa tsainchi

⁶² Icha matabitha po matabitha pentaquei seica matabi bapoxonae sacerdotemona pia pentacaponae tatsi iruru fariseomona daxita barapomona pona Pilato beya. ⁶³ Barapomona Pilato jeichichi:

—Pon pata Tanecanamataxeinaem, pananta xeinan xua barapo pemuxitorobin poxonae cataunxuae popona, pana tsipaeba, jeye: ‘Poxonae acoibi po matabibe tsuxubi tsane equeicha asun tsane petupae coyene cuiru weya’, pana jei bapon. ⁶⁴ Daxota xam itorobare soldadomnae xua xaniwaicha peyapu eenaenexa muthu xua beya poxonae acoibi po matabibe tsuxubi tsane. Baxua exande xua jopa pepatsinexa tsane muthu beya Jesús pia pepuna jinompaewichi, tsipei bu merawi barapomona pichapa Jesús pia pepon. Tsipei pirapae naerabichipa jiwitha jei tsipae: ‘Bayatha equeicha asu exanatsi petupae cuiru coyene weya’, jei tsipae xua Jesús yabara naerabatsi. Barapomona baxua naerabichipa jiwitha, baxua bichocono abe tsipae, beyacaincha poxonae Jesús bayatha pocotsiwa paeba xua pemuxitorobiwa, jei barapomona.

⁶⁵ Pilato barai barapomona, jeye:

—Bara moya pataema. Moya panore soldadomnae. Moya muthu beya pabarun ponde. Paexande pocotsiwa panantawenoname xua bu moya barapo soldadomnae xaniwaicha yapu eenaena, jei Pilato.

⁶⁶ Nexata barapomona iru soldadomnae bara be-iyiya. Bapoxonae muthu coibo daunwei exananota. Bichocono barapomona cateitabanota xua pin ibo panawa xua muthu boupa ata. Matautano bichocono barapomona pemacatha epatautarena boupa cutabarena barapo peboupa patsiwa, xua peyaputaenexa icha ichun namicha patopa xua pecaibinexa Jesús petupaein. Bapoxonae barapomona cuentadendena soldadomnae xua barapo soldadomnae peyapu eenaenexa muthu.

28

Meje yabara poxonae Jesús equeicha asu juina exanatsi petupae cuiru coyene weya (Mr 16.1-8; Lc 24.1-12; Jn 20.1-10)

¹ Poxonae po pentaquei seicae matabi yapu caewaba, bapoxonae matabi jopa po matabi xua nanta carucua xua cae semanatha xua penacuichi matabi. Barapo matabeitha María Magdalena, powa Magdala tomarapiwayo iru ichawayo María, barapowayobe caemumbotha siwa ponabe muthu ichaxota Jesús yamuthu uncu.

² Bapoxonae nainya ira jijiyatuxuba tsipei Nacom itoroba matatsunpin xua peitaboco wetsica pona. Barapo matatsunpin yaupataxubanota barapo pin ibo panawa. Bapoxonae barapo ibo panawatha ecopiya. ³ Barapo matatsunpin bichocono daedaena icha be yamuxu coicha ichi. Paparuwa bichocono inyapana. ⁴ Poxonae soldadomnae baxua taerucupa bichocono cuitaya jijiyei tsurucupae, mexeya poxi werapa iratha bobena, tsipei bichocono junuwa. ⁵ Barapo matatsunpin namchi barapowayobetha, jeye:

—Jopa pajunuwindebe. Bara yaputan xua pawenawenambe Jesús xua painya taetsibe, pon tupa exanadutatsi naetotha jiw. ⁶ Xote apara bapon aibi. Apra bayatha equeicha asu juina exanatsi petupae cuiru coyene weya, xua caena bayatha painya nepaca catsipaebixae. Incane anetha xote, pacou taemabe ichaxota bapon petupaein botatsi bayatha. ⁷ Nainya pondebe weye, patsipaebarebe Jesús pijimona tatsi. Pajandebe: ‘Bara bequein bapon bayatha tupa ichitha equeicha asu juina exanatsi petupae cuiru

coyene weya. Bapon copiya paca tsiwana ponaena Galilea nacua beya. Baxotiya bapon pataename, pana nejei matatsunpin', pajandebe Jesús pijimonaetha. Poxonae bapon pataename, bapoxonae payaputaename xuaunxuae paca tsipaebatsi bara apara xaniyei, jei matatsunpin.

⁸ Bapoxonae barapo yabuyobe muthu weya nainya pontababe. Junuwiya juntu coyene weiweinabe. Barapowayobe cuinaepoinyabe Jesús pijimonaetha tatsi beya xua diwesi caponabe pocotsiwa matatsunpin paeba. ⁹ Poxonae barapowayobe epathotha cataunxuae cuinaecaponabe bapoxonae Jesús jemeicha uncuataba barapowayobe pia xantha tatsi. Jesús jeye barapowayobetha: "Jaco", jei Jesús. Barapowayobe imoxoyo caquita ponabe Jesustha bapoxonae pentabocotha uncuabe yawa taxu waetababe xua Jesús wunaetha pejainchinxatsi. ¹⁰ Jesús barai barapowayobe, jeye:

—Jopa pana necunuwindebe. Paponarebe tajiwiwimonaetha beya. Patsipaebarebe pajandebe: Jesús paca itoroba bepa pinae paponae Galilea nacua beya. Bepa pinae baxotiya pataem, pajandebe, jei Jesús.

Meje yabara poxonae soldadomonaetha naerabiya paeba, jeye: "Jesús pijimonaetha petupaein pitatsi", jei

¹¹ Poxonae barapo yabuyobe cataunxuae namtotha ecaponabe, bapoxonae icha soldadomonaetha jiwana, po soldadomonaetha Jesús yamuthu eenatsi, barapo soldadomonaetha tomara beya pona. Matauta sacerdotemonaetha pia pentacaponae tatsi tsipaebatsi daxita pocotsiwa xua xuan tane. ¹² Barapo sacerdotemonaetha pia pentacaponae tatsi pona pitiri jiwi beya xua caemonaetha peyabara natsipaebinxetha xua Jesús petupaein yabara. Bapoxonae daxita barapomonaetha soldadomonaetha paratixi nawita catsibatsi xua jiwi naerabiya petsipaebinxetha. ¹³ Bapoxonae barapomonaetha soldadomonaetha baraichi, jeye:

—Patsipaebare jiwi xua merawi poxonae pamaitumenae Jesús pijimonaetha tatsi pata, yawa xua bapoxonae petupaein pitatsi. ¹⁴ Icha Pilato pon peyanacua ewatsin jiwi jume taebina xua Jesús petupaein aichurucuae, yawa icha bapon baxua yabara paca yainyabina, bapoxonae nexata paca yabara jume yawenaechi xua bapon jopa paca jutebi tsane, jei barapomonaetha.

¹⁵ Nexata barapo soldadomonaetha nota paratixi yawa jiwi tsipaeba tsiniyatsi xua sacerdotemonaetha pia pentacaponae tatsi peitorobixetha. Barapo penaerabi diwesi jume, judiomonaetha jume cocowuntapona. Anoxuae barichi po judiomonaetha anoxuae jinompa, jume cocowuntapona barapo diwesi.

Meje yabara poxonae Jesús cui itoroba pijimonaetha xua pia diwesi tatsi daxita nacuantha petapaebiwa tsainchi

(Mr 16.14-18; Lc 24.36-49; Jn 20.19-23)

¹⁶ Nexata once poyobe pomonaetha xua Jesús pijimonaetha tatsi barapomonaetha nawibiya Galilea nacua beya. Bapoxonae barapomonaetha demxuwa beya pona, po demxuwa pinae Jesús caunuta xua pinae baxota patopaena. ¹⁷ Poxonae barapo once poyobe baxota Jesús taerucupatsi, ichamonaetha Jesús wunaetha jaintatsi, bequein ichamonaetha ainya juntu coyenein xeina xua Jesús xapain beta jopa yabara jume cowuntichi. ¹⁸ Nexata Jesús pijimonaetha imoxoyo caquita pona. Bapoxonae jeye:

—Nacom necata daxita peayapusu itorobi coyene xua peitabocotha nexa, matautano po cae pin nacuathe tsiquenexano. ¹⁹ Paponare daxita carepaya jiwitha xua daxita nacuantha. Jiwi pacana exande xua tana nejume cowuntsiwa tsane. Daxita pomonaetha tana nejume cowuntsiwi pabautisabare. Poxonae pabautisabame Taxa pewun pawun taibare, matautano pana newun taibare, ponxaein Nacom Pexanton, matautano Nacom pia Pejumope tunaxu tatsi pawun taibare xua barapo acoibi wunthabe painya paca nepaca yawenaenexa pia peayapusu itorobi coyenewatha. ²⁰ Daxita barapomonaetha pacuidubare daxita xua xuan pocotsiwa bayatha paca itorobatsi. Matautano painya xoba pajuntemainame xua daxita matabin bara ataya paca baru poponeibinchi beya poxonae tsane xua equeicha patopeicaein, jei Jesús pijimonaetha.

Baja Mateo.

Jesucristo Pia Pexeinya Diwesi Jume Tatsi Marcos Petinae Diwesi

Meje yabara poxonae Juan pon Pebautisabin jivi cuiduba ira xuepana susato tsurucuae nacuatha

(Mt 3.1-12; Lc 3.1-9, 15-17; Jn 1.19-28)

¹ Baraxue tamropata pitaban xua Jesucristo pia pexeinya jume diwesi tatsi. Bapon Jesucristo, Nacom Pexanto tatsi.

² Bayatha Nacom pia peitorobi jume pepaebin, pon pewun Isaías, bapon tina petinae diwesitha. Isaías tina Nacom nexa, Nacom barapo diwesitha jeye Pexantotha:

“Itorobin copiya pon tana najume caitorobin xua catsiwanaya itorobinchi.

Bapon cana exanaena jiwitha xua jivi yabara aura tsane abe pia peexanae cuiru coyenein tatsi, xua poxonae nepatopae wunaeya tsane.

³ Pon itorobin bapon jume tan pon xua wawai ira xuepana susato tsurucuae nacuatha.

Bapon wawaya jeye: ‘Patsinajuntũ cui coyene wunaere, pon jivi pia pepa Pecanamataxeinaeinchi nexa pia pepatopae wunaeya tsane’, jei pon xua wawai”, jei Isaías petinae diwesitha.

⁴ Nexata Juan pon Isaías peyabara paebixae bapon ira xuepana susato tsurucuae nacuatha patopa. Bapon Juan bautisaba ducuaenaebiya, xua jivi bautisabatsi merantha. Matautano bapon tsipaeba jiwitha Nacom pia pexeinya jume diwesi tatsi. Bapon Juan jeye jiwitha: “Icha juntũ coyene paxeinare painya neauraxae xua abe paexaname. Bapoxonae Nacom paca yabara juntemainena abe painya neexanae cuiru coyenein”, jei Juan. ⁵ Daxita Judea nacua monae, irurũ Jerusalén tomarapiwi, daxita barapomonae pona ichaxota beya Juan bautisaba jivi ira xuepana susato tsurucuae nacuatha. Poxonae barapomonae nayopita Nacomtha xua bepa pinae Nacom tsita auratsi xua abe peexanaexae bapoxonae barapomonae Juan bautisaba Jordán mentha.

⁶ Juan jumaina duwein nabocoto, po duwein pewun camello. Coreinya bocoto maraina. Xane pocotsiwa yapupuna pocotsiwan be sure poxi. Matautano bana daeba.

⁷ Barapon pomonaetha pebautisabixae tsipaeba, jeye: “Pon nepuna patopaena, apara bapon Mesías. Bapon bichocono peayapusũ itorobi coyenewa xeina beyacaincha xan. Bapon pon jivi pia Pecanamataxeinaeinchi. Xan bichocono tapawin daxota bapon bichocono tsita pin ura xeinan xua tataxu mũ isanaxubiwa tsane pia penataxu xatatsiwa tatsi. Tsipei xan bichocono tapawin, beyacaincha pomonae amanaya petanacuichiwi pia pentacaponae wi poxonae barũ cui itura jina pia pentacaponae wichi. ⁸ Paca bautisabatsi meratha, ichitha nama barapon Mesías paca bautisabina Nacom pia Pejumope tũnaxũ tatsi poxonae Nacom paca najumope catsibina”, jei Juan jiwitha xua Jesús yabara.

Meje yabara poxonae Jesús bautisabatsi

(Mt 3.13-17; Lc 3.21-22)

⁹ Barapo dapaetha Jesús Nazaret tomara weya pona, po tomara eca Galilea nacuatha. Bapon Jordán mentha patopa, ichaxota Juan bautisaba. Baraxota Jesús bautisabatsi.

¹⁰ Poxonae mene wejuina barapoxonae caena nainya Jesús itaboco necoicha xua peitaboco nayausanaxuba. Jesús tane xua Nacom pia Pejumope tũnaxũ tatsi patopa bapontha xua be topiboto yaruneica. ¹¹ Barapoxonae Jesús jume tane pocotsiwa

peitaboco wetsipaebicatsi, jeichichi: “Xam apara Taxantom, pom bichocono caantobetsi, pom caitapetatsi. Nejüntu coyene weiweina exaname”, jei Nacom.

Meje yabara poxonae Jesús jüntu coyene jujutatsi caurimonae pia pentacaponaein tatsi xua Jesús abe coyeneya petaexanaenexa tsane

(Mt 4.1-11; Lc 4.1-13)

¹² Poxonae Jesús nanacui wetatsi xua bautisabatsi bapoxonae Nacom pia Pejumope tünaxu tatsi Jesús nainya itorobatsi ira xuepana susato tsurucuae nacua beya. ¹³ Jesús ira xuepana susato tsurucuae nacuatha popona cuarenta po matacabibe. Baraxota pichiwan xua camatsawan jinompa ichaxota Jesús popona pocotsiwan bichocono at-saca. Caurimonae pia pentacaponaein tatsi pon Satanás Jesús piraichi jüntu coyene jujutatsi xua Jesús abe coyeneya petaexanaenexa tsane. Pirapae matatsunpiwimonae po matatsunpiwimonae Nacom itoroba, barapomonae pata Jesththa xua Jesús pecui matateicaenexa tsainchi, matautano xua peapatsinexatsi tsainchi.

Meje yabara poxonae Jesús tamropata pitaba pia penacuichiwa xua Galilea nacuatha

(Mt 4.12-17; Lc 4.14-15)

¹⁴ Nexata poxonae ichamonae Juan maxu waetabatsi xua peetsinexatsi jiwi pecubi botha, bapoxonae Jesús Galilea nacuatha patopa. Jesús paeba ducunaeta jiwitha Nacom pia pexeinya jume diwesi tatsi. ¹⁵ Jesús namchi jeye: “Nacom bayatha yabara necana cui weta exana po coyeneya xua poxonae tapatopaewa. Daxota jiwi itacupatsi xua naexana Nacom piamonae, pomonae Nacom itorobiya peewatsixae. Daxota icha jüntu coyene paxeinare Nacomtha xua painya neauraxae xua abe paexaname, Nacom piamonae painya nenaexanaenexa tsane. Pajume cowunde Nacom pia pexeinya jume diwesi tatsi”, jei Jesús.

Meje yabara poxonae Jesús waba cuatro poyobe pebiwi, pomonae duwei peyamaewi

(Mt 4.18-22; Lc 5.1-11)

¹⁶ Poxonae Jesús pona Galilea pucua itapatha, bapoxonae tane ponbe peyaxunubinbe duwei. Ichun pewun Simón, ichun pewun Andrés. Baponbe bara cae peweichobe. Baponbe peweichobe duwei yamonauyabe pucuatha. ¹⁷ Jesús waba, baraponbe wabat-sibe. Jesús jeye:

—Anetha, pana nepuna pondebe. Paca cuidubinchibe. Anoxuae nama xan paca exanaeinchibe xua pinmonae payawenaenamebe xua barapomonae pejume cowuntsiwa tsane Nacom icha bayatha paichimbe poxonae payamonamebe duwei nawita, jei Jesús.

¹⁸ Bara caena baraponbe botabe barapo peyamaewa. Bapoxonae napuna ponabe Jesththa.

¹⁹ Jesús equeicha pona. Bapoxonae equeicha ichunbe tainchibe. Baraponbe ichun pewun Santiago, iru ichun pewun Juan. Baponbe Zebedeo pexantobe tatsi. Jeratha mataquerabauyabe peyamaewa xua ucupouna. ²⁰ Jesús nainya waba, baponbe wabatsibe: Jesús baraibe: “Anetha, pana nepuna pondebe”, jei Jesús. Baponbe paxa cuenta ponabe jera weya, pon pewun Zebedeo. Matautano cuenta ponabe pomonae Zebedeo pia peyawenae jiwichi tatsi xua yamona duwei. Baponbe Jesththa napuna ponabe.

Meje yabara poxonae pebin pon cauri xeina

(Lc 4.31-37)

²¹ Bapoxonae Jesús pijimonae baru pona Capernaum tomara beya. Bapoxonaeru judiomonae barompaya pia pentaquei seicae matacabi tatsi tsuxubi. Barapo matacabitha Jesús pijimonae baru joniya judiomonae pia penacaetutsi botha tatsi. ²² Barapo jiwi yabara najüntu coyene cabenaeca, tsipei pocotsiwa Jesús barapomonae cuidubatsi be pon peyaputaein pia peayapusu itorobi jume coyeneya tatsi paeba. Jesús jopa cuidubiyo be judiomonae pia pecuidubiwi pia coyeneya tatsi. ²³ Pebin pon cauri xeina barapon eca barapo judiomonae pia penacaetutsi botha tatsi.

²⁴ Bapon wawaya jeye:

—¡Jesús Nazaret tomarapim, pana wepu warapare! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebichim? Paca yaputainchi yawa paca yaitainchi xam apara pon Nacom caitoroba, pon pepa Nentacuiruyapuxanepanaem, jei pebin pon cauri xeina.

²⁵ Jesús taitaweta, pebin taitawetatsi cauri. Jesús cauritha jeye:

—¡Moyande! ¡Barapon wepu ponde! jei Jesús cauritha.

²⁶ Barapoxonae cauri pebin naichababa exanatsi. Poxonae cauri barapo pebin bichocono wawai exanatsi, bapoxonae barapo cauri pebin wepu poinchi. ²⁷ Daxita barapomonae yabara najuntũ coyene cabenaeca. Daxota nayainyaba, jeye:

—¿Eta pocotsiwa jane? ¿Jamaisa baxua mexeya pena pecuidubi coyenewa? Maisa barapo pebin Jesús bichocono peayapusũ itorobi coyenewa pexeinaein. Mataũtano caurimonae jume cowũta poxonae pocotsiwa bapon itoroba, najei barapomonae.

²⁸ Bapoxonae caena nainya daxita pomonae jinompa Galilea nacuatha jume taerũcũpa pocotsiwa juinya Jesús exana.

Meje yabara poxonae Jesús axaibi exana Simón Pedro pamiyo tatsi

(Mt 8.14-15; Lc 4.38-39)

²⁹ Jesús caena nainya pona judiomonae pia penacaetutsi bo tatsi weya. Bapoxonae Jesús joniya Simón pia botha tatsi po bo xua irũ Andrés pia bo tatsi. Barapo botha Santiago irũ Juan Jesús barũ joniya. ³⁰ Simón pamiyo tatsi domae xainchi. Barapowa camatha boca. Poxonae Jesús patopa barapomonae caena nainya Jesús tsipaebatsi, jeye: “Simón pamiyo tatsi domae xainchi”, jei. ³¹ Jesús caquita pona Simón pamiyo tatsi. Bapoxonae bapowa cobe pitatsi. Barapowa asiya cuaranotatsi. Bapoxonae barapowa caena nainya taichurucuaetsi domae. Nexata barapowa pexaewa apata barapomonaetha.

Meje yabara poxonae Jesús axaibi exana pin bicheitomonae

(Mt 8.16-17; Lc 4.40-41)

³² Poxonae tabopiya tsanaicha xua quirei tsanaicha, bapoxonae jiwí Jesús tacapoinchi pomonae peatenemonaewi, irũ pomonae caurimonae xeina. ³³ Daxita barapo tomara-piwi nacaetuta bomũxũ boupatha. ³⁴ Jesús axaibi exana pinmonae pomonae xeina daxita coyenexi xua xoxi peatenewa. Mataũtano Jesús taitaweta pomonae cauri xeina. Jesús jopa copatsiyo xua pecueicueijeíwa caurimonae, tsipei caurimonae Jesús cui yaputainchi.

Meje yabara poxonae Jesús cueicueijeí Nacom Pejume Diwesi judiomonae pia penacaetutsi bontha tatsi

(Lc 4.42-44)

³⁵ Baya poxonae caemũbotha poxonae cataunxuae quiriquirica Jesús nacosataxuba. Bapoxonae tomara weya pona xua ichaxota jiwaibi bara beya pona. Baraxotiya Jesús tsipaebauya, Nacom tsipaebatsi. ³⁶ Nexata Simón irũ pomonae Jesús pepuna jinompae jiwichi, barapomonae Jesús pu barainatsi. ³⁷ Poxonae barapomonae Jesús caxibatsi, bapoxonae Jesús tsipaebatsi, jeye:

—Daxita jiwí cawenawenei, jei.

³⁸ Jesús jume nota jeye:

—Barabũ ponaeinchi icha tomaran beya, barapo tomarantha irũ tacueicueijeinexa tsane Nacom pia pexeinya jume diwesi tatsi. Daxota apara baxua tsipatopeican, jei Jesús.

³⁹ Bapoxonae Jesús siwa pona ducuaeta daxita tomaran Galilea nacuatha. Judiomonae pia penacaetutsi bontha tatsi Nacom pia pexeinya jume diwesi Jesús tsipaeba barapo judiomonaetha. Mataũtano Jesús taitaweta caurimonae.

Meje yabara poxonae Jesús axaibi exana pon peperũ sawinchi

(Mt 8.1-4; Lc 5.12-16)

⁴⁰ Bapoxonaerū pebin, pon peperū sawinchi, Jesús caquita poinchi. Bapoxonae bapon pentabocototha uncua Jesús peitabaratha tatsi xua Jesús pebarū cui itura jinaexaetsi. Bapon matowa Jesús wūcatsi, jeye:

—Icha bara ichichipame bara caitacūpa xua axaibi tana neexanaewam, tsipei jinya neayapusū itorobi coyenewa nexainaem, jei bapon.

⁴¹ Jesús yabara najūntū coyene xeina bapon, xua peyawenaenexa. Jesús nacobe yota, bapoxonae bapon mata jayabatsi, jeye:

—Bara ichichipan. ¡Bara axaibinde! ¡Bara caaperūxaibi exanatsi! jei Jesús.

⁴² Bapoxonae bapon nainya taaichurucuaetsi xua peperū sawiwatsi. Mataūtano axaibi tsanayano. ⁴³⁻⁴⁴ Bapoxonae Jesús jume daunweya itorobiya jeye:

—Jopa yabara tsipaebinde ichamonaetha xua neaxaibiwam. Saya jame meisa ponde sacerdotepintha xua nenaitūtsinexa xua bapon necataenexa xua bayatha nejumewa. Care bapontha pocotsiwa xua pecatsiwa Nacomtha, pocotsiwa bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua perū wūnaem, jei Jesús.

⁴⁵ Daichitha poxonae bapon pona jopa moya yawūn xeinaeyo. Bapon yabara tsipaebapona ichamonaetha pocotsiwa xua bayatha peaxaibiwa. Daxota Jesús jopa itacūpaetsi xua naitūtsiya pata ducuaenaebiya tomarantha. Daxota Jesús tomaran cuariya popona xua aisowantha. Jiwi pomonae daxita ichawan werena pona, barapomonae Jesús pia xantha tatsi tapatatsi.

2

Meje yabara poxonae Jesús axaibi exana pon pecuenobinchi (Mt 9.1-8; Lc 5.17-26)

¹ Poxonae be caentacabiyobe yapucaewa, bapoxonae Jesús equeicha caibeya pona Capernaum tomara beya. Jiwi yopita xua pinae Jesús botha eca. ² Pin bicheito nacaetuta ichaxota po botha Jesús patopa, beya poxonae mataūta bo coibo quecona. Barapomonaetha Jesús tsipaeba Nacom pia pexeinya jume diwesi tatsi. ³ Bapoxonae pebiwi pata cuatro poyobe. Barapo pebiwi yapaparuwa capata pon pecuenobinchi. ⁴ Tsipei pin bicheito, daxota barapo pebiwi jopa itacūpaetsi xua Jesús imoxoyo pecaquita ponaewatsi. Daxota barapo pebiwi bomūxūtha pentatupa wereca atsa caxinaxoreca ichaxoya Jesús uncuareca. Barapo mūthū deca pon pecuenobinchi yapaparuwa yorecatsi. ⁵ Poxonae Jesús yaputane xua barapomonae yabara cui jume cowūnta xua bara Jesús peitacūpaewatsi xua axaibi peexanaewatsi pon pecuenobinchi, bapoxonae pecuenobinchitha Jesús tsipaebiya jeye:

—Tajitom cacui yabara jūntemainaya jūntū puxana exanatsiba abe jinya neexanae cuiru coyenein, jei Jesús.

⁶ Ichitha baraxota irū naena pomonae jiwi pecuidubiwi Moisés pia peitorobi coyene tatsi. Barapomonae nanta xeinaeya najei: ⁷“Maisa bapon bichocono abe tsipei pocotsiwa bapon paeba bichocono Nacom tsita ajumebetsi. Jiton dapocotsin aibi pon xua jiwi cacui yabara jūntemainaya jūntū puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jiwi cacui yabara jūntemainaya jūntū puxana exanatsi abe pia peexanae cuiru coyenein tatsi”, najei. ⁸ Barapoxonae caena nainya Jesús yaputane pejūntū coyenewatha pocotsiwa barapomonae pia coutha nayainyaba. Jesús jeye barapomonaetha:

—¿Eta pocotsiwa metha baraxua pana natsipaebame? ⁹ ¿Eta po jumetha baran tsane pecuenobinchi? ¿Metha jan tsane: ‘Jinya abe neexanae cuiru coyenein cata jūntemainatsi’, jan tsane? Ichacuitha ¿metha jan tsane: ‘Nontaponde, bara pire jinya nemaituncuaewa, yawa bara ponare’, jan tsane? ¹⁰ Daxota anoxuae paca tsita itapeinya xeinaeinchi, xua xan ponxaein Nacom Tananeitapetsin, xua xeinan taayapusū itorobi coyenewa xua bara tana neitacūpaewa xua jiwi tayabara cacui jūntemainaya jūntū

puxana exanaewa abe pia peexanae cuiru coyenein tatsi pomonae jinompa barapo cae pin nacuathe, jei Jesús.

Bapoxonae Jesús tsipaeba pontha pon pecuenobinchi. Jesús jeye:

¹¹ —Catsipaebatsi, nontaponde. Jinya nemaituncuaewa pire. Jinya bo be-iyandeno, jei Jesús.

¹² Bapoxonae bapon caena nainya nontapona barapomonae peitutha tatsi, yawa pita xua pemaituncuaewa. Bapoxonae bapon bo tutu weya pona barapo pin bicheito peitutha tatsi. Daxita barapomonae yabara najuntũ coyene cabenaeca, yawa Nacom wũnae jaintatsi, jeye:

—Maisa waxainchi bapana bayatha jopa taetsi pocotsiwa wũnae pocotsiwe icha be iche, jei barapomonae.

*Meje yabara poxonae Leví wabatsi, Jesús waba
(Mt 9.9-13; Lc 5.27-32)*

¹³ Barapoxonae Jesús pona Galilea pucua itapatha. Bapoxonae baxotiya pin bicheito pata Jesús pia xantha tatsi. Barapomonaetha Jesús cuiduba. ¹⁴ Poxonae Jesús cataunxuae ecapona Galilea pucua itapatha, bapoxonae Leví tainchi. Bapon Leví Alfeo pexanto tatsi. Bapon Leví eca ichaxota bapon paratixi matoma noteibeca po paratixi jiwi bewa catsibina pon romanomonae itorobiya pia pepa peewatsinchi. Jesús Leví tsipaebatsi, Jesús jeye:

—Nepuna ponde, jei Jesús.

Bapoxonae Leví nontapona, yawa Jesús puna poinchino.

¹⁵ Pirapaeyo Jesús Leví barũ eca pexaethopeibiwatha, xua Leví pia botha tatsi xua Jesús pebarũ xaenexatsi. Barichi Jesús barũ eca pinmonae barapo pexaethopeibiwatha pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. Irũrũ Jesús barũ eca ichamonae pomonae abe peexanae cuiru coyenein peexanae jiwi. Matautano Jesús pijimonae barũ eca barapo pexaethopaewatha. Pinmonae Jesús barũ eca tsipei pinmonae Jesús puna poinchi. ¹⁶ Ichitha pomonae jiwi pecuidubiwi Moisés pia peitorobi coyenewa tatsi irũrũ fariseomonae, daxita barapomonae Jesús tainchi poxonae Jesús barũ xayeca pomonae paratixi pentoma noteibiwi, irũ pomonae abe peexanae cuiru coyenein peexanae jiwi. Pomonae Jesús tainchi daxita barapomonae Jesús pijimonae tatsi jeichichi:

—Maisa Jesús pon painya nepaca cacuidubin abe exana poxoru barũ xayeca pomonae paratixi penoteibiwi, matautano, barũ xayeca pomonae peajuntũcoyenebe jiwi, jei barapomonae.

¹⁷ Poxonae Jesús jume tane baraxua, bapoxonae Jesús jume nota, jeye:

—Pomonae ba xua xaniwaicha jinompa xua jopa ateneyo barapomonae ba jopa canantawenonaeyo pon jiwi peyawubin. Saya jame meisa pomonae ba atene barapomonae jame canantawenona pon jiwi peyawubin. Barichi xan patopan apra tha jopa tawabinexa tsane pomonae pejuntũ coyene xanepanae jiwi. Saya apra tawabinexa pomonae abe peexanae cuiru coyene peexanaewi tayawenaenexa tsane barapomonae, jei Jesús.

*Meje yabara poxonae Jesús yabara yainyabatsi po coyene xua Nacom peyabara nainbotsiwatsi
(Mt 9.14-17; Lc 5.33-39)*

¹⁸ Caentaqueitha Juan pia pepuna jinompaewichi, irũrũ fariseomonae, nainbota Nacomtha xua saya pewũcaenexa Nacomtha. Poxonae barapomonae nainbota, bapoxonae ichamonae Jesús siwa poinchi. Barapomonae Jesús yabara yainyabatsi barapo penainbotsi coyene. Barapomonae jeye Jesththa:

—Juan pia pepuna jinompaewichi, irũ fariseomonae jopa juniya Nacom peyabara nainbotsiwatsi poxonae Nacom wũqueibatsi. Ichitha jinyamonae jopa daichiyo, jopa nainbotsiyo Nacomtha xua saya pewũcaenexa Nacomtha, jei barapomonae Jesththa.

¹⁹ Jesús jume nota barapomonae, jeye:

—Jiwi ba jopa bewa wecoyeya yabara nainbotsi poxonae ichamonae pexaewa tsinacae-tuta penabanaenexa xua poxonae pebin pecotsiwa pita. Poxonae cataunxuae awiwa bapon eca pexaewa penabanaewatha bapoxonae jiwi ba peburuya nabane. Jopa bewa yabara nainbotsi tsane. ²⁰ Ichitha icha pon aena piowa pita, caena nainya waetabatsi, ichamonae waetaba xua taju bapon pecaponaenexatsi, bapoxonae jame jiwi ba bewa wecoyeya yabara nainbotsi, xua equeicha bapon caewa pepatopaewa tsane.

²¹ “Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru doroutotha, bapoxonae barapo dorouto abe tsanaya tsipae. Tsipei poxonae barapo dorouto matanaxuba barapo pena paparuwa natsaquetabiya. Poxonae barapo pena paparuwa natsaquetabiya equeicha wan tsitsipanarena barapo dorouto. Bapoxonae equeicha nama bichocono pin wan tsanaya beyacaincha xua poxonae copiya. ²² Matautano jiwi ba pena vino mera jopa eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto. Tsipei barapo bocoto jopa nayeyetaponaeyo poxonae barapo vino mera atsaxa. Barapo pena vino mera naxuba xuano barapo bocoto naxuba poxonae barapo bocoto tsitsica. Daxota bewa jame pena vino mera eparecae pena bocototha. Bapoxonae pena vino mera jopa naxubiyo. Yawa pena bocoto jopa naxubiyo poxoru boco yeyena yawa poxoru pena bocoto”, jei Jesús.

Meje yabara poxonae Jesús pijimonaе tatsi yaboto nota trigo xu judiomonaе barompaya pia pentaquei seicaе mataqueitha tatsi

(Mt 12.1-8; Lc 6.1-5)

²³ Caentacabi poxonae judiomonaе barompaya pia pentaquei seicaе matakabi tatsi, barapo matakabitha Jesús, iru pijimonaе tatsino pabi iyiya. Jesús pijimonaе tatsi jainpa. Barapomonaе tamropata notarucupa xua yaboto xunumenapona trigo xu. Bapoxonaе pecobetha xu mata pepeta. ²⁴ Poxonaе fariseomonaе cui tane xua Jesús pijimonaе tatsi exana, bapoxonaе fariseomonaе Jesús tsipaebatsi, jeye:

—Jamaisa jinya jiwimonaе nacuita barapo matakabithe, poxonaе yaboto nota trigo xu. Apra jiwi jopa yabara cui copatsiyo xua ichamonae penacuichiwa barapo matakabithe xua judiomonaе barompaya pia pentaquei seicaе matakabi tatsi, jei fariseomonaе.

²⁵ Jesús jume nota, jeye:

—Barapomonaе tajiwiwimonaе jopa apra abe exanaeyo. ¿Jopa payabara yorobim pocotsiwa bayatha David exana poxonaе jainpa, poxonaе iru pijimonaе tajainpatsiru? Bapon David, pon caena bayatha israelmonae itorobiya pia pepa peewatsinchi. ²⁶ Bapon David, iru pijimonaе tatsi, barapomonaе joniya Nacom pin pia botha tatsi poxonaе pon pewun Abiatar tanacuita Nacom. Bapon Abiatar sacerdotemonaе pia pepa pentacaponaein tatsi. David xane pan, po pan ichamonae cana exana xua Nacom pecatsiwatsi. Iru barapo pan David pijimonaе cata xua pexaenexaru. Barapomonaе xane bequein bara Nacom pia peitorobi coyenewatha copata xua saya meisa sacerdotemonaе itacupatsi xua pexaewa tsane barapo pan, jei Jesús.

²⁷ Equeicha Jesús namchi, jeye:

—Nacom, jiwi pewunaeya taexanatsi pentaquei seicaе matakabi. Barapo pentaquei seicaе matakabi Nacom tsiexana jiwi, xua barapo matakabitha jiwi penafinacaewatsinexa. Nacom jopa ainya cui cana exanaeyo pentaquei seicaе matakabi xua beyacaincha jiwi. ²⁸ Daxota xan ponxaein Nacom tana neitapetsixae xeinan taitorobi coyenewa xua jiwi tacoya taitorobiwa pentaquei seicaе matakabitha, jei Jesús fariseomonaetha.

3

Meje yabara poxonaе Jesús cobe wunaе exana pon pecobe mubinchi

(Mt 12.9-14; Lc 6.6-11)

¹ Jesús equeicha joniya judiomonaе pia penacaetutsi botha tatsi. Baraxota pon pecobe mubinchi eca. ² Barichi pomonaе jiwi pecuidubiwi Moisés pia peitorobi coyene tatsi,

irũ fariseomonaē baxota ena. Daxita barapomonaē Jesús necotenatsi pecui taenexatsi icha bara metha Jesús cobe wũnaē exanaena pentaquei seicaē mataqueitha pon pecobe mũbinchi. Icha Jesús pon pecobe mũbinchi axaibi exanatsi, bapoxonaē barapomonaē xeinaena po coyenewa xua Jesús abe peyabara pæbiwatsi tsainchi. ³ Bapoxonaē Jesús barai pontha pon pecobe mũbinchi, jeye:

—Nontaponare. Uncuare xote, jei Jesús.

⁴ Pomonaē Jesús tainchi Jesús barai barapomonaē, jeye:

—Paca yainyabinchi, ¿eta xua copata pentaquei seicaē matacabitha? ¿Wũnaē jampa? ¿Abe jampa? ¿Eta xua metha tsipae? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

Ichitha barapomonaē jopa jume notsiyo, saya moya umena. ⁵ Nexata Jesús necota barapomonaē. Anaya Jesús caseba barapomonaē. Matautano jũntũ coyene wecoyē, tsipei barapomonaē jopa beyaputaeyo pocotsiwa bapon exana. Jesús barai pon pecobe mũbinchi:

—Nacobe doire, jei Jesús.

Bapon nacobe doita. Bapoxonaē bapon nainya cobe wũnaē tsanaya. ⁶ Bapoxonaē fariseomonaē Jesús weya ponarũcũpa. Bapoxonaē barapomonaē nacaetuta Herodes pijimonaetha tatsi xua pecui yabara pæbinexatsi xua po cui coyenewatha Jesús pebexubiwa tsainchi.

Meje yabara poxonaē pin bicheito nacaetuta Galilea pucua itapatha

⁷ Jesús pijimonaē barũ pona Galilea pucua itapa beya. Irũrũ pin bicheitomonaē Jesús puna poinchi pomonaē Galilea nacua weya pona. ⁸ Irũrũ pomonaē Judea nacua werena pona irũrũ pomonaē Jerusalén tomara werena pona, daxita barapomonaē Jesús puna poinchi. Irũrũ Idumea nacuapiwi Jesús puna poinchi. Irũrũ ichamonaē Jesús puna poinchi pomonaē icha muxunenetha jinompa xua Jordán mentha. Irũrũ Tiro tomarapiwi Jesús puna poinchi. Irũrũ Sidón tomarapiwi Jesús puna poinchi. Daxita barapo bicheito Jesús itata patatsi poxonaē jume tane daxita xua juinya pocotsiwan Jesús exana. ⁹ Tsipei pin bicheito, daxota Jesús pijimonaē itoroba xua jera petaxawenaewa tsainchi xua petsaquibabiyainwatsi barapo pin bicheito. ¹⁰ Yaitama Jesús axaibi exaneiba pin bicheito pomonaē atenemonaē, daxota irũ ichamonaē Jesús imoxoyo caquita poinchi. Barapomonaē ichichipa xua Jesús pejayabiwatsi xua barapomonaē irũ axaibi peexanaenexatsirũ.

¹¹ Pomonaē caurimonaē pexeinaewi, poxonaē barapomonaē Jesús tainchi, barapomonaē pentabocototha umena Jesús peitabaratha tatsi. Barapomonaē wawaya jeye xua caurimonaē wawai peexanaexaetsi:

—¡Maisa bara xam Nacom Pexantom! jei barapomonaē xua wawaya exanatsi caurimonaē.

¹² Jesús jume daunweya itoroba barapomonaē, jeye:

—Jopa pana neyabara pæbinde ichamonaetha xua xan Nacom Pexanton, jei Jesús.

Meje yabara poxonaē Jesús itapetsiya waba pia peitorobi jiwĩ tatsi pomonaē xua doce poyobe (Mt 10.1-4; Lc 6.12-16)

¹³ Bapoxonaē Jesús demxuwatha pona. Barapo demxuwatha Jesús waba pomonaetha xua peichichipaexae xua itapetsiya waba. Barapoxonaē barapomonaē Jesús pia xantha tatsi tapatatsi. ¹⁴ Jesús itapetsiya waba doce poyobe xua pomonaē pebarũ jinompaenexatsi. Matautano barapomonaē Jesús itoroba xua daxita jiwitha petacueicuei-jeinexatsi Nacom Pejume Diwesi. ¹⁵ Barapomonaetha Jesús cata pia peayapusũ itorobi coyenewa tatsi, xua cauri ichamonaē petaitawetsinexatsi pomonaē xua cauri pepuna jinompaewichi. ¹⁶ Meje barapomonaē pewũnxi tatsi pomonaē Jesús waba: Simón pon icha wũn wũn dutatsi “Pedro”, baraichi. ¹⁷ Ichũn pewũn Santiago. Ichũn pewũn Juan pon Santiago peweicho tatsi. Baraponbe Zebedeo pexantobe tatsi. Baraponbetha Jesús icha wũn wũn dutabe “Boanerges” jei (xua po wũntha xua jei: “Yamũxũ pexantobe tatsi”, jei). Barapo wũn wũn duta tsipei peajũntũcoyenesũnbe. ¹⁸ Ichũn pewũn Andrés. Irũ ichũn

pewun Felipe. Iru ichun pewun Bartolomé. Iru ichun pewun Mateo. Iru ichun pewun Tomás. Iru ichun pewun Santiago pon Alfeo pexanto tatsi. Iru ichun pewun Tadeo. Iru ichun pewun Simón pon celotemonaepin. ¹⁹ Iru ichun pewun Judas Iscariote. Barapon Judas pon Jesús caenaetaxubatsi ichamonaetha pebexubinexatsi.

Meje yabara poxonae Jesús baraichi xua pinae xeina Beelzebú pia peayapusu itorobi coyenewa tatsi

(Mt 12.22-32; Lc 11.14-23; 12.10)

²⁰ Bapoxonae Jesús, iru pomonaе pia peitapetsiwi tatsi botha joniya. Bapoxonae equeicha pin bicheito nacaetuta Jesús pia xantha tatsi. Daxota Jesús iru pijimonaе tatsi jopa itacupaetsi xua penabanaewa tsane. ²¹ Jesús piamonaе matabuxuyo tatsi jume tane xua jiwi paeba xua pinae juinya Jesús matayaibatsi. Daxota barapomonaе pata, xua Jesús pewaetabinexatsi, xua pia bo beya pecaponaenexatsi.

²² Matautano pomonaе jiwi pecuidubiwi Moisés pia peitorobi coyene tatsi, pomonaе Jerusalén werena pona, barapomonaе jiwitha jeye Jesús yabara: “Bapon caurimonaе itawetatsi, apara pexeinaexae Beelzebú pia peayapusu itorobi coyene tatsi, pon caurimonaе pia pentacaponaein tatsi”, jei barapomonaе pomonaе jiwi pecuidubiwi Moisés pia peitorobi coyenewa tatsi.

²³ Bapoxonaе Jesús waba barapomonaе pia xainya berena. Yawano Jesús pecayabara juta pepaebi diwesiyo tsipaeba, jeye: “Caurimonaе pia pentacaponaein tatsi jopa itacupaetsi xua peitawetsiwa icha caurimonaetha, xua pecae caurimonaexae. ²⁴ Icha cae nacuapiwi nawepu tsatabe xua matauta nababe, bapoxonaе jopa xaexaenaecaeyo. ²⁵ Matauta iruru icha cae bo matabuxuyomonaеbe nababe yawa nawepu tsatajopabe, bapoxonaе jopa xaexaenaecaeyo. ²⁶ Barichi icha Satanás, pijimonaе tatsi nawepu tsatajopabe matautano xua nababe, bapoxonaе jopa xaexaenaecaeyo. Satanás jopa itacupaetsi xua itoroba pijimonaе, tsipei amsiya exana.

²⁷ “Dapon ajibi, pon itacupatsi xua botha joniya po botha pon bichocono maxu daunwei pia bo tatsi xua daxita notsina pocotsiwa bapon xeina pon maxu daunwei icha jopa copiya matha maxu cutanotsiyo.

²⁸ “Bara xaniyeya paca tsipaebatsi. Pocotsiwa jiwi abe peexanae cuiru coyenein exana, matautano pocotsiwa xua jiwi abe paeba, barapo coyenein Nacom itacupatsi xua yabara junteinaena xua barapo jiwi abe exana. ²⁹ Pon abe yabara paeba Nacom pia Pejumope tunaxu tatsi, Nacom bapana jopa yabara junteinae tsane xua bapon paeba. Bara bapon ataya atene tsane ichaxota jopa itacounayiyo isoto xua bapon abe peexanaexae”, jei Jesús.

³⁰ Jesús baraxua paeba, tsipei pomonaе jiwi pecuidubiwi Moisés pia peitorobi coyene tatsi barapomonaе bayatha naerabiya paeba xua pinae Jesús cauri xeina. Ichitha pon Jesús xeina apara Nacom pia Pejumope tunaxu tatsi. Daxota barapomonaе Nacom pia Pejumope tunaxu tatsi tsita natsicuentatsi, tsipei Nacom pia Pejumope tunaxu tatsi abe yabara paebatsi.

Meje yabara Jesús pena tatsi, iruru peyapin jiwi tatsino

(Mt 12.46-50; Lc 8.19-21)

³¹ Pirapae Jesús pena tatsi, iru peyapin jiwi tatsi pata Jesustha. Ichitha barapomonaе pesato beumeinya. Bapoxonaе najume caruta ichamonaetha xua petawabinexa tsainchi Jesús. ³² Po bicheito Jesús matawacaicha enatsi, barapomonaе Jesús tsipaebatsi, jeye:

—Ena, iruru neyapin jiwino, pesato beya umena. Bepara bequein cataei. Bepara bequein catsipaеbei, jei.

³³ Ichitha Jesús jume barai barapomonaе, jeye:

—¿Jintam powa be taena natsicotanera? ¿Jintam pomonaе be tayapin jiwi natsicotanera? jei Jesús.

³⁴ Bapoxonaе Jesús necota pomonaе pematawacaicha enaewichi. Jesús jeye:

—Barapomonaē pomonaē xote umene apara be taena tsicotān, matautano be tayapin jiwi tsicotān. ³⁵ Pomonaē exana pocotsiwa Nacom itoroba, pon peitabocotha peecaēinxāe, barapomonaē be tayapin jiwi tsicotān, matautano irā be tayapixi tsicotanno, matautano irā be taena tsicotanno, jei Jesús.

4

Meje yabara poxonaē Jesús cuiduba jiwi pecayabara jūta pepaēbi diwesiyo xua pon peūbin yabara

(Mt 13.1-9; Lc 8.4-8)

¹ Equeicha Jesús tamropata pitaba xua cuiduba Galilea pucua itapatha. Bapoxonaē pin bicheito nacaetuta ichaxota Jesús cuidubuncua. Tsipei pin bicheito daxota Jesús jeratha nontabiya xua peecaenexa, po nae mentha ducuiya. Barapo pin bicheitomonaē taetabo itapatha umena. ² Jesús barapomonaētha cuiduba pecayabara jūta pepaēbi diwesintha.

Poxonaē Jesús cuiduba barapomonaē, jeye: ³ “Pana nejume naitaeware barapo diwesiyo: Pebin pon peūbin ponataba pia ūbichi pabitha. ⁴ Poxonaē pon peūbin ūbauya, icha xu namtotha othopeica. Pepupunaewi yapata. Bapoxonaē barapo xu xu xane. ⁵ Icha xu, xu othopeica ibowantha ichaxota xua ira itafafana. Barapoxonaē barapo xu caena nainya xu xuwa, tsipei jopa tajū xu xuwarecaeyo. ⁶ Ichitha poxonaē xometo atsa tsina, bapoxonaē yaboto tsaquiwa yawa tūpa tsipei jopa tajū tabū opina xuwarecaeyo. ⁷ Icha xu, xu othopeica ichaxota pesoiwān xuwinaena. Barapo xu yaboto nanta capanaba poxoru yawa muxuna xuwina pesoiwān. Daxota barapo xu jopa xu nacoichiyo. ⁸ Icha xu, xu othopeica ichaxota ira wūnae. Poxonaē barapo xu, xu xuwa, xu nawūnaeta. Icha xun, xu nanacoitapona treinta po xu matabūxūyobe tsiniya. Icha xun, xu nanacoitapona sesenta po xu matabūxūyobe tsiniya. Icha xun, xu nanacoitapona cien po xu matabūxūyobe tsiniya”, jei Jesús barapo pin bicheitomonaētha.

⁹ Equeicha Jesús jeye: “Icha pamuxu dubename, moya pana nejume naitaeware pocotsiwa tapaca tsipaēbiwatsi”, jei Jesús poxonaē pijimonaē muxuconaquiya tsipaēba.

Meje yabara poxonaē Jesús namchi xua exua metha pecayabara jūta pepaēbi diwesin

(Mt 13.10-17; Lc 8.9-10)

¹⁰ Nexata poxonaē Jesús pipatōtha eca, bapoxonaē barū eca pomonaē pia pepuna ponaewichi, irūno pijimonaē tatsi pomonaē doce poyobe. Barapomonaē Jesús yainya-batsi jeye: “¿Eta pocotsiwa yabara caunutame poxonaē barapo pecayabara jūta pepaēbi diwesiyo cuidubame?” jei barapomonaē. ¹¹ Jesús jume nota barapomonaē, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawūn xeinaewa. Barapo moya peyawūn xeinaewa apara xua Nacom paca cana exana xua painya nepaca itacūpaewa xua painya nenaexanaewa Nacom piamonaē tatsi pam, pomonaē pamxaem Nacom itorobiya paca ewata. Ichitha meisa jame ichamonaē pomonaē jopa nejume cowūntsiyo jopa daichichi. Nacom jopa copatsiyo xua barapomonaē peyabara yaputaewa baxua. Daxota barapomonaē cuiduban pecayabara jūta pepaēbi diwesintha, xua Nacom peyabara yaputaenexatsi. ¹² Baxua paēban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane. Poxoru bapomonaē jopa icha jūntū coyene xeinaeyo Nacomtha, daxota barapomonaē Nacom tsita natsicuentatsi abe petsita exanaexatsi xuanō Nacom jopa yabara jūntemainaeyo abe pia peexanaē coyenein tatsi”, jei Jesús.

Meje yabara poxonaē Jesús pijimonaē muxu yaputane exana po diwesi xua pecayabara jūta pepaēbi diwesiyo, pon peūbin yabara

(Mt 13.18-23; Lc 8.11-15)

¹³ Equeicha Jesús barapomonaētha muxu tsipaēba, jeye: “Tsipei jopa payaputaem po pecayabara jūta pepaēbi diwesiyo xua peūbin yabara paēban daxota jopa payaputaemt-sipae bequein ainya pecayabara jūta pepaēbi diwesin paca tsipaēbichipatsi. ¹⁴ Paca

tsipaebatsi pecayabara j̄ta pepaebi diwesiyo xua iche: Pon pēbin j̄pa, icha be ichi pon Nacom Pejume Diwesi pepaebi ducuaenaebiyaein. ¹⁵ Po xuton xua namto beothopiya, aichurubena. Barapo xuton yabara caunuta xua jiwi bara j̄nt̄a weichichi caurimonae pia pentacaponaein tatsi, pon Satanás. Jiwi j̄nt̄a coyene weajumetsurubena exanatsi Nacom Pejume Diwesi xua bayatha po jume jume tane, xua bapoxonae jopa petajume cow̄antsinexa tsainchi Nacom, yawa xua jopa petanacapanenebiyaenexa tsainchi Nacom beya, xua Nacom exanaena. ¹⁶⁻¹⁷ Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi, xuano j̄nt̄a coyene weiweinaya Nacom jume cow̄antatsi. Ichitha bara caeto jume cow̄anta, poxoru barapomona aj̄nt̄a faetabiya jume jeba Nacom Pejume Diwesi pēj̄nt̄a coyeneintha. Poxonae yaitama barapomona bichocono peatenexae, matautano poxonae barapomona yaitama abe petaexanaexaetsi ichamonae xua pejume cow̄antsixae Nacom, bapoxonae caurimonae abe exana barapomonaetha, xua barapomona j̄nt̄a coyene wēj̄nt̄a maina exanatsi xua Nacom pecayabara j̄nt̄a mainaewatsi. ¹⁸⁻¹⁹ Po xuton xua xu othopeica pesoiwantha, barapo xuton caunuta xua pomona Nacom Pejume Diwesi jume tane, ichitha saya barompaya pia j̄nt̄a coyeneyatha jinompa, yawa saya ̄ copei cayabara nanta xeina, yawa saya exana pocotsiwa j̄nt̄a coyene weiweina cana exainchi. Po coyene pebiwi exana baxuan bara j̄tiya ichiya exana xua po xuton be pesoiwantha othopiya. Barapo xuton jopa thei dubenaeyo. Barapocotsi j̄ta coyeneya ichi, barapo jiwi. Jopa xanepanaya jinompaeyo Nacom nexa. ²⁰ Po xuton xua xu othopeica peira w̄naewatha, bara nacoita. Barapo xuton yabara caunuta pomona jume tane Nacom Pejume Diwesi, matautano jume cow̄antano poxoru j̄nt̄a coyene xanepanaya jume tane. Matautano beta exana dubenanaebiya beya matapainya jiwi cui tane xua barapomona j̄nt̄a coyene xanepana Nacom peitabaratha tatsi. Bapoxonae ichamonae barapomona jiwana beta yawena ichamonaetha icha barapo xuto ichi xua treinta po xu matab̄x̄yobe tsiniya tsoponae. Matautano ichamonae barapomona jiwana beta yawena ichamonaetha icha barapo xuto ichi xua sesenta po xu matab̄x̄yobe tsiniya tsoponae. Matautano ichamonae barapomona jiwana beta yawena ichamonaetha icha barapo xuto ichi xua cien po xu matab̄x̄yobe tsiniya tsoponae”, jei Jesús.

Meje yabara poxonae Jesús pijimona tsipaeba pecayabara j̄ta pepaebi diwesiyo xua pecoicha yabara
(Lc 8.16-18)

²¹ Equeicha Jesús barapomonaetha tsipaeba, jeye: “Poxonae jiton pecoicha, coicha exana, bapoxonae jopa coicha matakatsiyo cajatha. Yawa jopa coicha exanaeyo cama pēpana deca. Jame asiya coicha exanatsi, xua pecoicha taenexa pomona jojoneibarena. ²² Daxita pocotsiwa xua moya peyaw̄n xeinaewa bexa tsane jiwi yabara yaputaena. Barichi po diwesi xua pecayabara j̄ta pepaebi diwesi xua paebapona jiwi barapo diwesi jiwi itac̄paeinchi xua peyabara yaputaewa tsane. ²³ Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús poxonae pijimona muxuconaqiuya tsipaeba.

²⁴ Equeicha Jesús barapomona barai, jeye: “Pana nejume naitaeware painya neexanaenexa pocotsiwa paca tsipaebatsi. Icha ichamonae daunweya payabara paebiname penatsicuentsiwa xua abe peexanaexae Nacom barichi daunweya paca yabara paebina painya nenatsicuentsiwa xua abe painya neexanaexae. Matautano equeicha ichawano mataropeicha paca catsina. ²⁵ Pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cow̄antsiwa tsainchi. Pon ba jopa ichipaeyo xua Nacom peyabara yaputaewatsi Nacom wepichina po coyene bapon yaputane xua beya daxota Nacom jopa pejume cow̄antsiwa tsainchi”, jei Jesús.

Meje yabara poxonae Jesús pecayabara j̄ta pepaebi diwesiyo paeba xua pēbi xuto yabara

²⁶ Nexata equeicha Jesús namchi, jeye: “Yabara paca cuidubatsi po coyene xua Nacom itorobiya ewata piamonae. Barapo coyene bara j̄ta coyeneya ichi, icha pebin ichi poxonae pēbi xu xu bebeya. ²⁷ Poxonae nacobe weta xua ũba, bapoxonae pabi weya pona. Bara bequein bapon jopa yawenaeyo xua barapo xuton xuxuwapona mataqueitha, merawithano poxonae pebin maitequeiba, daichitha awiya barapo xu xuxuwapona. ²⁸ Daxota barapo xu xuxuwapona tsipei ira yawena xua barapo xu xuxuwapona. Copiya pepaboto xuwina, bapoxonae pepato naexana. Bapoxonae pepa xu xu dubena xua bichocono axucucu. ²⁹ Poxonae pepa xu xu naweta barapo matabitha pebin pona xua penotsinexa pocotsiwa naweta”, jei Jesús.

Meje yabara poxonae Jesús cuiduba pecayabara j̄ta pepaebi diwesiyo po pēbi xutiyo pew̄n mostaza xutiyo

(Mt 13.31-32; Lc 13.18-19)

³⁰ Jesús barapomonae tsipaeba, jeye: “Poxonae Nacom waba jiwi xua petanaex-anaenexatsi piamonae tatsi pomonae itorobiya peewatsixae, ¿eta po coyene nacoyene j̄pabe? ¿Eta xua paca cuidubinchi xua baxua yabara? ³¹⁻³² Nacom pijimonae tatsi mataropeicha bichocono pinmonae tsoponae xua pomonae jume cow̄ntarona Nacom. Baraxua icha be mostaza xutiyo ichi po xutiyo bichocono tsica xutiyo beyacaincha xua icha pethei xutiyo. Barapo mostaza xutiyo pebin ũba pia pabitha. Xuwa beya pin nae tsoponae. Pepinnaexae daxota siri coton exana pemax̄ranantha. Icha mostaza xutiyo ichi xua beya pin nae tsoponae, bara j̄ta ichi Nacom pejume cow̄ntsiwichi, pomonae bapon itorobiya peewatsixae. Bequein anoxuae tsica bicheitiyo, bexa tsane beya pin bicheito tsoponae tsane”, jei Jesús.

Meje yabara poxonae Jesús cuiduba jiwi pecayabara j̄ta pepaebi diwesixitha

(Mt 13.34-35)

³³ Jesús jiwitha ainya pecayabara j̄ta pepaebi diwesixi tsipaeba poxonae cuiduba Nacom Pejume Diwesi, icha barapocotsi diwesixi ichi xuaunxuae po diwesixi paeba. Awiya cuidudubapona beya poxonae barapomonae xainwaicha yaputane. ³⁴ Saya meisa barapomonaetha Jesús cuidubeiba pecayabara j̄ta pepaebi diwesixi coyenexitha. Poxonae Jesús meisa pijimonae bar̄ eca, bapoxonae Jesús pijimonae yabara muxu yaputane exana pecayabara j̄ta pepaebi diwesixi coyenexi.

Meje yabara poxonae Jesús xainya ducuanaya exana joibo, yawa maratsacano xainya mene ducuanaya exanano

(Mt 8.23-27; Lc 8.22-25)

³⁵ Barapo mataqueitha poxonae quirei tsanaicha Jesús pijimonae tsipaeba, jeye:

—Antha poinchi icha muxunene beya, pucua beicha, jei Jesús.

³⁶ Bapoxonae Jesús pijimonae bar̄ wepu pona barapo pin bicheito. Bapoxonae Jesús pijimonae bar̄ poinchi jeratha, po jeratha Jesús cuidubeca barapo pin bicheito. Barichi icha jeranno naponano. ³⁷ Bapoxonae mentha jemeicha naetaba pin joibo. Maratsacan jeratha mene othopa, muxu jera pebunarecae. ³⁸ Ichitha Jesús jera tafetha maituncua, nantasipa ȳw̄tuncua paparuwatha xua xota nacuenacuena. Jesús pijimonae yābatsi, jeichichi:

—Pon pata Necuidubin, ¿jopa catsita ainya cuiyo xua waxainchi bunathopaeinchi? jei barapomonae.

³⁹ Bapoxonae Jesús asiya uncua, yawa joibo itawetaxuba. Jesús jeye maratsacantha:

—¿Barande, bara xainya mene ducuanayama! jei Jesús.

Bapoxonae joibo caewanaya, yawa mene xainya ducuanaya. ⁴⁰ Nexata Jesús barai pijimonae, jeye:

—¿Eta pocotsiwa metha bichocono pajunuwame? ¿Cataunxuae jopa pana nejume cui yabara jume cow̄ntsim xua bara tana neitac̄paewa xua tapaca yawenaewatsi? jei Jesús.

⁴¹ Barapomonae bichocono naj̄nt̄u coyene cabenaeca, yawa caemonae natsipaeba najei:

—¿Metha jintamda baponda? ¡Jamaisa bapon itawetaxuba joibo yawa maratsacan xua daxita xainya dubenanaya! najei barapomonaе.

5

*Meje yabara xua pebin pon caurimonaе xeina pon Gerasa nacuapin
(Mt 8.28-34; Lc 8.26-39)*

¹ Jesús, iru pijimonaе tatsi pata icha muxunene beya xua barapo pucuathiya. Po iratha Jesusbaru pata barapo ira pewun Gerasa nacua. ² Poxonaе Jesús jera wenontouna bapoxonaе patopa pebin pon caurimonaе xeina. Bapon ibo wou weya patopa Jesustha. ³ Barapo pebin poponeiba ibo wountha. Dapon aibi pon itacupatsi xua bapon pecutsi-watsi, matautano metha bequein penaintohta tsipae. ⁴ Bapon matowa penaintohta taxu cubeibatsi, yawa maxu cubeibatsi xua bapon peyapucaeineibinexa tsainchi. Daichitha bapon barapo nain nain epa xuneiba. Dapon aibi xua bapon pecui amanayabiwatsi. ⁵ Barapon mataqueitha poponeiba, yawa merawitha poponeiba. Matautano atororotha yawa ibo wountha wawai tsopoponeibi. Matautano ibotixitha pia coutha nathabeiba. ⁶ Poxonaе barapo pebin Jesús tajü taebatsi, bapoxonaе cuinaepona Jesús beya. Bapon pentabocotohta uncua Jesús peitabaratha tatsi xua Jesús pebaru cui itura jinaexaetsi peainya cuinxae. ⁷ Bapon wawaya jeye Jesustha:

—Jesús pon Nacom Pexantom, pon peitabocotha eca, ¿eta pocotsiwa metha taxantha patopame? Jume daunweya cabaraichi jopa neperaxa exanaeinde, jei.

⁸ Bapon baxua paeba tsipei Jesús copiya namchi, jeye:

—¡Caurimonaе pam, bapon pawepu ponare! jei Jesús.

⁹ Jesús yainyaba bapontha:

—¿Eta po wum? jei.

Bapon jume nota jeye:

—Tawun Ayei, tsipei paxan caurimonaе pan ayei jiwi pan, jei bapon xua paeba exanatsi caurimonaе.

¹⁰ Barapo caurimonaе Jesús muxu fayacotatsi xua bepa pinae barapomonaе jopa bewa itawetichi icha nacua beya. ¹¹ Ichaxota imoxoyo peitapatororotha baxota jinompa pin marranomonaе. Barapo marrano duweimonaе xayompa peitapa tororotha.

¹² Caurimonaе Jesús wucatsi, jeye:

—Icha pana itawetame, moya pana nepu copabare marrano duweimonaetha, jei caurimonaе.

¹³ Bapoxonaе Jesús copata xua bara caurimonaе ponaena marrano duweimonaetha pebin weya. Barapo marranomonaе ducupa. Pin pitapatororo othopareca. Pucuatha bunothopa. Yawa caurimonaе cabunathopatsi. Barapo marranomonaе dos mil po duweimonaеbe.

¹⁴ Bapoxonaе pomonaе peyapu eenaewi marranomonaе, barapomonaе bichocono junuwiya cuinaepona tomara beya, jiwi petsipaebinexatsi baxua yabara, yawa jiwi petsipaebinexatsi tomara cuariya beya. Bapoxonaе jiwi pata petaenexa pocotsiwa Jesús cana exana pebintha. ¹⁵ Poxonaе barapomonaе pata Jesustha, bapoxonaе barapomonaе tane pebin pon bayatha cauri xeina. Barapo pebin moya eca, paparuwa nama xatatano, matautano juntema eca. Bapoxonaе barapomonaе bichocono junuwa. ¹⁶ Pomonaе bayatha tane xua pocotsiwa Jesús bayatha cana exana pebintha, pontha pon cauri xeina, baxua yabara paeba ichamonaetha pomonaе pata. Matautano yabara paeba pocotsiwa Jesús cana exana marrano duweimonaetha. ¹⁷ Bapoxonaе barapomonaе tamropata notarucupa xua Jesús itawetatsi, jeye: “Maisa bewa warapaename Gerasa nacua weya, po nacua pata nacua weya”, jei barapomonaе.

¹⁸ Poxonaе Jesús jeratha nontabiya, bapo pebin pon bayatha caurimonaе xeina, bapon Jesús wucatsi xua bepa pinae Jesús puna ponaetsi. ¹⁹ Ichitha Jesús jopa copatsiyo xua pepuna ponaenexa tsainchi bapon. Saya jame Jesús bapontha jeye:

—Maisa jinya bo beya ponare ichaxota jinyamonaе matabuxuyo beya. Barapomonaetha tsipaebare daxita pocotsiwa Nacom cacana exana. Matautano barapomonaetha

tsipaebare xua Nacom bara cayabara najuntũ coyene xeina pia necayawenaenexa, jei Jesús.

²⁰ Bapoxonae barapo pebin ponataba. Matautano tamropata pitaba xua cueicueijei daxita pocotsiwa bayatha Jesús cana exana bapontha. Barapon baxua tsipaeba Decápolis tomarantha, po tomaran xua diez po tomaranbe xua imoxoyo nacacuita ena. Daxita jiwi barapo tomaran najuntũ coyene cabenaeca poxonae jume tane xua barapon paeba.

Meje yabara xua poxonae Jairo pexantiyo taaxaibi exanatsi; yawa yabara xua bapoxonae irũ icha yabũyo axaibi exanatsi poxonae Jesús pia paparuwa tajayabatsirũ

(Mt 9.18-26; Lc 8.40-56)

²¹ Poxonae Jesús caibeya pona jeratha icha muxunene beya pucua iya, bapoxonae pin bicheito Jesús pia xantha tapatatsi pitapatha. ²² Bapoxonae caein patopa pon judiomonae pia penacaetutsi bo tatsi pecanamataxeinaewi jiwanamonaepin. Bapon pewũn Jairo. Poxonae bapon Jesús tainchi, Jesús peitabaratha tatsi pentabocototha tauncuatsi. ²³ Bapon Jairo bichocono Jesús wucatsi. Jairo jeye:

—Taxantiyo muxu imoxoyo petũpae. Anetha, inta taxantiyo necobetha mata jayabare, axaibi jinya neexanaenexa tsane. Bapoxonae inta asũ pepoponaenexa tsane, jei Jairo.

²⁴ Bapoxonae nexata Jairo Jesús puna pona. Pin bicheito Jesús puna poinchi, yawa barapo bicheito tsaquibabatsi. ²⁵ Barapo pin bicheitha irũ napona yabũyo powa atene. Barapowa caena bayatha beya yadoce po weiyobe jopa xua pentabũ janatha boca xua be nantawane. ²⁶ Barapowa bichocono atene tsaibi bequein siwa poneiba pomonaetha pomonae peyawũbiwi jiwi. Barapomonae bapowa daxita cobe matapaeteibatsi paratixi xua bapowa peyawũbixaetsi, daichitha bapowa jopa yawenaetsi baxua. Saya equeicha bichocono abe tsoponae bapowa. ²⁷ Poxonae bapowa jume tane xua pinae juinya Jesús axaibi exana jiwi, bapoxonae bapowa imoxoyo caquita uncuataba Jesús peputha tatsi xua pin bicheitha. Barapowa Jesús pia paparuwa tatsi tajayabatsi xua peopirawa. ²⁸ Barapowa pia coutha natsipaeba, najei: “Icha saya Jesús pia paparuwa tajayabin, bapoxonae axaibin tsane”, najei. ²⁹ Poxonae barapowa tajayaba Jesús pia paparuwa tatsi, bapoxonae caena nainya bapowa ajaneibi tsanareca. Bapowa pia coutha nayaputane xua bayatha axaibi. ³⁰ Jesús pia coutha nayaputane xua ichũn axaibi peexanaewatsi, tsipei pia pepon weya taajiwanatsurucuaetsi pia peyapapusũ itorobi coyenewa tatsi. Bapoxonae Jesús napatomeicha necota jiwitha, jeye:

—¿Jintam inta paparuwa jayabara? jei Jesús.

³¹ Nexata Jesús pijimonae jume notatsi, jeye:

—Apara xam bayatha taneme xua pin bicheito catsaquibaba. ¿Eta xua metha pana yainyabame: ‘¿Jintam metha inta paparuwa jayabara?’ jam? jei pijimonae tatsi.

³² Ichitha Jesús daxita jũpaya tane peyaputaenexa pon pejayabiwatsi. ³³ Barapowa bichocono junuwa, tsipei yaputane xua barapowa Jesús jayabatsi poxonae axaibi exanatsi. Barapowa jijiyeya patopa Jesthã, yawa pentabocototha uncua Jesús peitabaratha tatsi xua Jesús pebarũ cui itura jinaexaetsi peainya cuinxae. Barapowa bara xainyeya paeba daxita pocotsiwa xua exana. ³⁴ Jesús jeye barapowatha:

—Yabũyo, caaxaibi exanatsi tana neyabara jume cowũntsixaem xua bara tana neitacũpaewa xua tacaaxaibi exanaewatsi. Saya jũntemiya poponde. Bara axaibim tsaibim tsane xua bara nepu tsitecae tsane, jei Jesús.

³⁵ Poxonae Jesús cataunxuae cueicueijei tsuncuae barapowatha, bapoxonae pata pomonae Jairo pia botha petanacuichi jiwichi. Bapon Jairo pecanamataxeinaein judiomonae pia penacaetutsi bo tatsi. Barapomonae jeye Jairotha pon pexantiyo taatenetsi:

—Nexantiyo bayatha cata tũpa. ¿Eta xua metha came fayacotame pon jiwi Pecuidubin? jei barapomonae.

³⁶ Bequein bara baxua Jesús jume tane, ichitha baxua Jesús jopa jume naitaewatsiyo. Jesús jeye Jairotha:

—Jopa junuwinde, saya maisa nejume cowũnde, jei Jesús.

³⁷ Bapoxonae Jesús jopa copatsiyo xua pepuna ponaewatsi tsainchi ichamonae. Saya meisa Jesús copata, xua pepuna ponaenexa tsainchi Pedro, iru Santiago iru Juan pon Santiago peweicho tatsi. ³⁸ Poxonae Jesusbaru pata Jairo pia botha tatsi, bapoxonae Jesusbaru tane pin bicheito xua ajumeyaexa. Barapomonae bichocono wecoyei, yawa wawai xua Jairo pexantiyo petatupaexaetsi. ³⁹ Bapoxonae Jesús joniya botha, yawa tsipaeba barapomonaetha, jeye:

—¿Eta pocotsiwa metha paajumeyaexam, xua yawa pawecoyam? Barapo pexuyo apara jopa tupaeyo, apara maituncua, jei Jesús.

⁴⁰ Ichitha barapomonae Jesús jume cui caponatsi. Nexata barapo pin bicheito Jesús pesato beitaweya. Meisa saya Jesús baru joniya coxiyuni, coxiwano ichaxota Jairo pexantiyo tatsi petupaeyo tabocatsi. Matautano Jesús pijimonae baru joniya poyobe acoibi poyobe. ⁴¹ Barapowayo Jesús cobe pita, yawa jeye:

—Talita, cum, jeichichi (xua apara jeichi: “Yabuyo, asiya uncuare, catsipaebatsi”, jei Jesús.)

⁴² Barapoxonae barapowa caena nainya nontapona, powa xua doce po weibe xeina powayo Jairo pexantiyoaxae tatsi. Barapowa asiya uncua, yawa itacupaetsi xua peponaewa. Barapoxonae barapo pin bicheito poxonae baxua Jesús cui tainchi najuntu coyene cabenaeca. ⁴³ Bapoxonae Jesús jume daunweya itoroba jiwitha xua baxua jopa peyabara paebinxatsi ichamonaetha pocotsiwa Jesús cana exana barapowayotha. Bapoxonae Jesús itoroba xua barapo pexuyo bara peapatsiwa tsainchi pexaewa.

6

Meje yabara poxonae Jesús Nazaret tomaratha popona

(Mt 13.53-58; Lc 4.16-30)

¹ Nexata Jesús Capernaum tomara weya warapa, equeicha caibeya pia tomara beya warapa xua Nazaret tomara beya. Iruu Jesús pijimonae puna poinchi. ² Poxonae judiomonae barompaya pia pentaquei seicae matacabi tatsi tsuxubi, barapo matacabitha Jesús tamropata pitaba xua cuiduba judiomonaetha judiomonae pia penacaetutsi botha tatsi. Pinmonae pomonae Jesús jume tayenatsi, barapomonae najuntu coyene cabenaeca, jeye:

—¿Eta xota metha bapon nacuiduba daxita baxua jane? ¿Jintam metha cata bapontha barapo peyaputae coyene jane, xua daxota bapon pexeinya petsita itutsi coyenewa exana? ³ Apra bapon pon naepan pematabobin. Bapon apara María pexanto tatsi, apara iru Santiago pentapin tatsi, iru José pentapin tatsi, iru apara Judas pentapin tatsi, iru Simón pentapin tatsi. Apra bara iru pamchowaxi tatsi watomaratha jinompa, jei barapomonae.

Daxota barapomonae jopa xapain Jesús yabara jume cowuntsichi. ⁴ Ichitha Jesús jeye barapo jiwitha:

—Daxita jiwu ba baru cui itura jina pontha pon Nacom peayapusu itorobi jume pepaebin. Nama pia tomarapiwi tatsi, iru piamonae tatsi iru pia bomonae matabuxuyomonaepiwi tatsi, barapomonae ba jopa bapon baru cui itura jinaetsi, jei Jesús.

⁵ Daxota Jesús jopa itacupaetsi xua pexeinya petsita itutsi coyenewan peexanaewa barapo Nazaret tomaratha po tomara pia tomaraxae tatsi. Saya meisa Jesús axaibi exana tsicamonaeyo pomonae peatenewi. ⁶ Jesús najuntu coyene cabenaeca, tsipei barapomonae jopa yatsicaewa jume cowuntsichi.

Meje yabara poxonae Jesús pijimonae itoroba xua barapomonae peyabara cueicueijeinexa jiwitha po coyene xua Nacom waba jiwu xua petanaexanaenexatsi pijimonae tatsi

(Mt 10.5-15; Lc 9.1-6)

Daxota Jesús cuidubapona tsiqui tomaraxitha po tomaraxi ena Nazaret tomara pecuariya. ⁷ Jesús waba pijimonae pomonae doce poyobe tatsi. Jesús tamropata pitaba xua tsana itoroba tsiniya tomarantha be dos poyobe tsiniya. Jesús pijimonae cata pia peayapusu itorobi coyenewa, xua pijimonae tatsi peitawetsinexa caurimonae. ⁸ Jesús

pijimonae itoroba, xua pijimonae tatsi jopa pecaponaenexa pocotsiwan xua poxonae namtontha peponaenexa. Itoroba xua saya meisa pecaponaenexa naeton po naeton penacobena bababi naeton. Jopa bewa barapomonaecaponaenexa cotein, yawa jopa bewa pecaponaenexa pexaewan, yawa jopa bewa pecaponaenexa paratixi. ⁹ Yawa Jesús pijimonae itoroba xua bara nataxu xatabina sapaton, po sapaton pebaxumubiwan. Matautano barapomonaecaponaenexa bewa nama xatabina saya be cae camisan. Jopa bewa caponaecaponaenexa icha camisan. ¹⁰ Jesús pijimonae barai, jeye:

—Poxonae papatame tomaratha moya bara paenare po botha papatame, xua beya abax poxonae pawaraponaecaponaenexa barapo tomara weya. ¹¹ Icha, icha tomarapiwi jopa paca matenta weyataeya wabiyo, matautano icha jopa paca jume naitawatsiyo pocotsiwa papaebame, nexata bapoxonae barapo tomara weya pawarapare. Po tsorobon painya taxutha dubena panataxu wenunababare barapo tomaratha. Baxua paexande xua barapomonaecaponaenexa xua apara barapomonaecaponaenexa abe exana paxamtha, jei Jesús.

¹² Bapoxonae Jesús pijimonae tatsi ponarucupa Jesús pia xainya weya tatsi. Barapomonaecaponaenexa cueicueijeijiwitha xua bewa pinae jiwi icha juntu coyene xeinae Nacomtha xua peuraxae xua abe peexanae cuiru coyene exana Nacomtha. ¹³ Barichino barapomonaecaponaenexa taitaweta cauri pomonaecaponaenexa cauri xeina. Matautano barapomonaecaponaenexa caxueba penasiwatha pomonaecaponaenexa pomonaecaponaenexa peatenewi. Bapoxonae barapomonaecaponaenexa axaibi exana pinmonaepomonaecaponaenexa peatenewi.

*Meje yabara poxonae Juan bexotsi pon Pebautisabin jiwi
(Mt 14.1-12; Lc 9.7-9)*

¹⁴ Herodes pon Galilea nacuapiwi itorobiya pia pepa peewatsinchi bapon jume tane xua juinya jiwi daxita jume tane pocotsiwa Jesús exana. Daxota bapon jeye:

—Juan pon jiwi Pebautisabin pon bequein bayatha tupa, equeicha asu juina. Daxota barapon Jesús xeina barapo peayapusu itorobi coyenewa xua exana pexeinya petsita itubi coyenewan, jei Herodes.

¹⁵ Ichamonae Jesús yabara jeichichi:

—Bapon apara Elías xua equeicha asu, pon bayatha tupa, jei.

Iruru ichamonae jeye:

—Bapon apara pon Nacom peitorobi jume pepaebin icha pomonaecaponaenexa ichi pomonaecaponaenexa Nacom peitorobi jume pepaebiwi pomonaecaponaenexa caena bayatha jinompa, jei xua ichamonae paeba.

¹⁶ Poxonae Herodes baxua jume tane, jeye:

—Apara bapon Juan, pon yabara xua bayatha najume carutan xua bapon pewisi ucuiwatsi. Anoxuae bapon equeicha asu petupae cuiru coyene weya, jei Herodes.

¹⁷ Herodes baxua paeba, tsipei caena bayatha Herodes cui itoroba xua Juan pe-waetabinexatsi, matautano xua pemaxu cubinexatsino matautano xua jiwi pecubi botha peetsinexatsi. Herodes baxua exana tsipei piowa tatsi powa pewun Herodías pia coutha baxua peichichipaexae. Barapowa copiya Felipe xeina pon Herodes peweicho tatsi. Herodes peweicho yacaiba yabyo. ¹⁸ Daxota Juan jiwi pecubi botha etatsi, tsipei Juan Herodes tsipaebatsi, jeichichi: “Nacom pia peitorobi coyenewa jopa copatsiyo xua xeiname bapowa tsipei bapowa eweicho piowa tatsi”, jei Juan.

¹⁹ Daxota bapowa Herodías Juan bichocono casebatsi. Bequein bapowa ichichipa xua Juan pecaenaetaxubiwatsi xua ichamonae pebexubiwatsi tsainchi, ichitha jopa itacupaetsi bapowa. ²⁰ Herodías jopa itacupaetsi xua peexanaewa baxua, tsipei Herodes Juan cunuwatsi. Bapon yaputane xua Juan bara xaniwaicha peexanaein, xuano matautano bara juntu coyene xanepana Nacomtha. Daxota jopa copatsiyo xua Juan bara abe pecana exanaenexa tsainchi. Bequein Herodes yabara unthuthu deideijeijiwatsiyo pocotsiwa Juan pepaebixae, daichitha awiya ichichipa pocotsiwa Juan pepaebiwa. ²¹ Ichitha matabi jopa, po matabitha Herodías itacupaetsi xua Juan abe pecana exanaewatsi. Herodes yantacabi jopa, po matabitha caena bayatha Herodes naexana poxonae pexuyo. Barapo matabitha Herodes exana pin penabanaewa. Bapon waba pomonaecaponaenexa

iru pentacaponawei, pomonaetha itoroba xua iru tacanamataxeinatsi icha tomarantha. Iruno wabano pomonae soldadomonaepia pia pepa pentacaponawei tatsi. Iruno wabano pomonae ainya cui penaexanae jiwi Galilea nacuatha. ²² Herodías pexantiyo tatsi patopa po tututha ichaxota nabanathopa. Barapowa tsita yaweibuncua xua barapomonae tane. Baxua Herodes ichichi xeica xua bapowa yaweibuncua. Iruru pomonae baxota naxayena, ichichi xeica baxua. Bapoxonae Herodes jeye bapowatha.

—Newucare pocotsiwa xua neichichipaewa, bapoxonae cacatsinchi jinya beta neyaweibixae, jei Herodes.

²³ Bapon Herodes yabara tsiwuna muxu dutsiya jeye:

—Bara cacatsinchi pocotsiwa xua newucame. Metha bequein newucaetsipame xua tanacua epa toyatsipan baraxua bara cacatsinchi, jei.

²⁴ Barapowa pona xua peyainyabinexa pena, jeye:

—Ena, ¿eta pocotsiwa metha wucacuaein? jei.

Barapowayo pena jume notatsi, jeye:

—Wucare Juan pentasipa tatsi, pon jiwi Pebautisabin matasipa, jei Herodías.

²⁵ Barapowayo bapoxonae caena nainya pona ichaxota eca Herodes. Jeye bapontha:

—Ichichipan xua nainya anoxuae tanecatsiwam tsane paratontha Juan pentasipa tatsi, pon jiwi Pebautisabin matasipa, jei.

²⁶ Bapoxonae Herodes bichocono unthathu wecoyei. Ichitha tsipei bayatha yabara petsiwuna muxu dutsixae xua bepa pinae catsina pocotsiwa wucaeinchi, matautano tsipei pejume taexaetsi pomonae bayatha waba, daxota Herodes jopa bejume totabiyo pocotsiwa wucatsi. ²⁷ Bapoxonae caena nainya Herodes itoroba soldadomonaepin xua pecarenaenexa tsane paratontha Juan pentasipa tatsi. Bapon pona jiwi pecubi bo beya. Baraxotiya Juan wisi ucuibatsi. ²⁸ Barapo soldadomonaepin matasipa carena paratontha. Bapon cata yabuyotha. Barapowayo xuya pena cata.

²⁹ Pomonae Juan pia pepuna jinompaewichi jume tane xua pinae Juan bexotsi. Bapoxonae barapomonae pona jiwi pecubi bo beya xua Juan pepichinexa tsainchi petupaein, yawano xua peboyaenexa tsainchi ibo wou muthu iya.

Meje yabara poxonae Jesús apata pexaewa cinco mil pebiwi

(Mt 14.13-21; Lc 9.10-17; Jn 6.1-14)

³⁰ Bapoxonae pirapae Jesús pia peitorobiwi tatsi, Jesús baru nacaetutatsi. Barapomonae Jesús tsipaebatsi xua daxita pocotsiwan barapomonae peexanaexae, yawano pocotsiwa xua bayatha barapomonae cuiduba. ³¹ Jesús pijimonae tsipaeba, jeye:

—Anetha poinchi, xua wanafifina ewatsinexa tsainchi saya caeto ichaxota jiwaibi beya, jei Jesús.

Daxota Jesús baxua paeba, tsipei pinmonae Jesús itata pateibatsi, xua poxonae naepanaya poneiba. Daxota Jesús iru pijimonae tatsi jopa itacupaetsi xua pexaewa tsane. ³² Bapoxonae Jesús, iru pijimonae tatsi compa ponarucupa jeratha ichawatha beya xua ichaxota jiwaibi beya. ³³ Ichitha pin bicheitomonae tane poxonae Jesús iru pijimonae tatsi jeratha pona. Barapo pin bicheitomonae Jesusbaru yaitainchi. Barapo pin bicheitomonae daxita tomaran wecuinaeyiya. Bapoxonae pata ichaxota jiwaibi beya. Barapomonae tsiwanaya patatsi Jesús. ³⁴ Poxonae Jesús jera wenontouna bapoxonae Jesús tane pin bicheito. Jesús yabara najantu coyene xeina xua barapomonae peyawenaenexatsi. Barapomonae jopa xeinaeyo pon peyawenaen barapomonaetha icha be oveja ichi poxonae jopa xeinaeyo pon peyapu eenaen. Daxota Jesús barapomonaetha cuiduba ainya coyenein. ³⁵ Poxonae tabopiya tsanaichaba Jesús pijimonae itata patatsi, jeye Jesthathu:

—Bayatha tabopiya tsanaicha. Xote apara bon ajibi xua ichaxota jiwi jinompa.

³⁶ Barapomonae itorobare ichaxota po bon pipatotha umena yawa ichaxota xua tomaranxitha xua imoxoyo wacuariya xua barapomonae pecomocaewa pexaewa. Tsipei xote pexaewa ajibi, jei pijimonae tatsi.

³⁷ Ichitha Jesús pijimonae barai, jeye:

—Paxam jame moya paapare pexaewa, jei.
Barapomonaē jeye:

—¿Xam ichichipame xua pata ɥpain comocaewa tsane barapo bicheitomonaē ainya panmonaēin xua pata comocaenexa doscientos po paratiximonaebetha pocotsi paratiximonaēbe xeineiba pomonaē nacuiteiba doscientos matabibetha? jei barapomonaē.

³⁸ Jesús barai pijimonaē, jeye:

—Pan ¿eta xoyobe paxeiname? Incane matha pataema, jei.

Poxonaē barapomonaē yaputane jeye Jesustha:

—Cinco po panyobe, yawa dos poyobe duweiyobe, jei barapomonaē.

³⁹ Jesús pijimonaē najume caruta xua bepa daxita barapo bicheito iratha taenaetsei naepanaewatha xua pepa bicheiton tsana naexana tsiniya. ⁴⁰ Barapo pin bicheito pepa bicheito naexana tsiniya. Icha bicheito cien poyobe tsiniya. Icha bicheito cincuenta poyobe tsiniya. ⁴¹ Barapoxonaē Jesús pecobetha pita pan cinco po panyobe. Yawa pita duweiyobe xua dos poyobe. Bapoxonaē Jesús peitaboco benecoicha, Nacomtha tsipaeba jeye: “Axa maisa jũntũ coyene weiweinan, xua pexaewa pata tanecatsiwaxaem”, jei Jesús. Barapoxonaē Jesús epa janaxuba pan. Jesús pijimonaē cata barapo pan, xua pijimonaē tatsi xuya pecatsibaponaenexa barapo pin bicheitho. Barichi Jesús duweiyobe epa janaxubabe. Bapoxonaē apata barapo pin bicheitho. ⁴² Barapo pin bicheito bara daxita nabane. Bara jain cowũntarũcupatsi. ⁴³ Barapoxonaē Jesús pijimonaē tatsi doce po cotebe wũmba xua nacopaba xua bayatha barapo jiwi jopa xaeyo petonsanaexae. ⁴⁴ Pomonaē xua barapo pan pexaexae barapomonaē cinco mil pebiwimonaē.

Meje yabara poxonaē Jesús mene matatsun jumatha pona
(Mt 14.22-27; Jn 6.16-21)

⁴⁵ Pirapae Jesús pijimonaē itoroba xua peponaenexa jeratha, xua icha muxunene beya. Barapomonaē Jesús tsiwana payatsi Betsaida tomara beya. Barapoxonaē Jesús napeyaba barapo pin bicheito. ⁴⁶ Poxonaē Jesús napeyaba barapo pin bicheito, bapoxonaē Jesús pona demxuwatheicha xua petsipaebinxua Nacomtha. ⁴⁷ Poxonaē bayatha quirei tsanaicha, bapoxonaē Jesús pijimonaē tatsi irũ jeratha tuwũtha yanapona. Jesús irũ compa pecaetha popona. ⁴⁸ Jesús tane xua barapomonaē bichocono daunweya nowaeta tsipei dawerena bichocono joibo daunwei. Poxonaē mataqueiwũnaeyo tsoponaē, Jesús pijimonaē imoxoyo caquita pona. Bapon mene matatsun jumatha pona. Jesús juntucuru xenta iya barapomonaē. ⁴⁹ Poxonaē Jesús pijimonaē tainchi xua mene matatsun jumatha pona, barapomonaē itaraerowiya nanta xeina, xua Jesús itara mexeya dowatsiwejei. Yawa barapomonaē wawai. ⁵⁰ Daxota barapomonaē bichocono wawai, tsipei daxita barapomonaē tane, yawa bichocono cuitaya junuwa. Ichitha Jesús barai barapomonaē, jeye:

—¡Apara xan! ¡Jopa pajunuwinde! ¡Maisa pajũntũ coyene weiweinare! jei Jesús.

⁵¹ Bapoxonaē Jesús jeratha nontabiya barapomonaē pia xantha tatsi. Barapoxonaē joibo caewanaya exana. Barapomonaē bichocono najũntũ coyene cabenaeca. ⁵² Barapomonaē baxua exana, tsipei barapomonaē cataunxuae jopa yaputaeyo xua aparta Jesús pon Nacom itoroba. Bequein bapon pexeinya petsita itũtsi coyenewa exana poxonaē apata pan pin bicheitonaetha, barapomonaē jopa beyaputaeyo pia jũntũ coyenewantha.

Meje yabara poxonaē Jesús axaibi exana pomonaē peatenewi, pomonaē Genesaret nacuapiwi
(Mt 14.34-36)

⁵³ Jesús, irũ pijimonaē tatsi bara pitapa berubenathopiya xua pucua weya. Genesaret nacuatha pata. Baxota jera quetanota pitapatha. ⁵⁴ Poxonaē Jesús jera wenontouna, bapoxonaē caena nainya pinmonaē Jesús yaitaerũcupatsi. ⁵⁵ Bapoxonaē barapo jiwi bara wecuinaeyiya daxita barapo ira weya. Mataũtano carendena pocotsiwa pemaichiwatha pomonaē atenemonaē, Jesús pia xainya betacayiyatsi. ⁵⁶ Daxitantha ichaxota Jesús ponaena, ichaxota bequein tsica tomaraxi, ichaxotano bequein pin tomaran, ichaxotano

bequein tomaran cuariya, daxita barapomonae capona peatenewimonae. Barapo peatenewimonae jebatsi namtontha. Barapomonae Jesús wúcatsi xua Jesús petajayabinexatsi pia paparuwa peopirato tatsi. Daxita pomonae Jesús pia paparuwa tajayabatsi daxita barapomonae axaibi tsurucupeibi.

7

Meje yabara poxonae Jesús yabara paeba xua pebin abe peexanae cuiru coyene juntu webocatsi
(Mt 15.1-20)

¹ Nexata fariseomonae, iru pomonae jiwi pecuidubiwi Moisés pia peitorobi coyene tatsi xua pomonae Jerusalén tomara werendena, daxita barapomonae Jesús imoxoyo caquita poinchi. ² Barapomonae tane xua Jesús pijimonae tatsi jiwana najuntu coyene taxoba xuano xua daxota Nacom tsita natsicuentatsi abe peexanaexae poxoru jopa matha nacobe quiatsiyo poxonae xane. Daxota barapomonae nanta xeina xua Jesús pijimonae tatsi pomonae peantucuiruyapube jiwi. ³ (Barapomonae aichaxaibi xua Jesús pijimonae tatsi jopa matha nacobe quiatsiyo poxonae xane, tsipei fariseomonae iru daxita judiomonae jopa daichiyo. Barapomonae pia cui xeina xua jopa xaibiyo poxonae jopa matha tsiwanaya daunweya nacobe quiateibiyo. Barapomonae barapo cui coyene exana xua po cui coyene pia pamo susato jiwi tatsi copiya cananta forota. ⁴ Poxonae barapomonae caibe nawibeibarena ichaxota po bon xua pexaewa pecaenaetsiwan weya, bapoxonae copiya tsiwanaya merantha naperu tsicababeiba xua poxonae xane. Barichi barapomonae icha coyeneinno exanapona xua peitorobi coyenewantha itoroba xua poxonae corotixi itapa quiata, yawano corotonno xua caseta itapa quiata yawano paraton po paraton pecaxae paraton itapa quiata yawa caman.) ⁵ Bapoxonae fariseomonae, iru pomonae jiwi pecuidubiwi Moisés pia peitorobi coyene tatsi, jeye Jesththa:

—¿Eta xua metha jinya jiwimonae jopa exanaeyo xua pocotsiwa wamo susato jiwi pia peitorobi cui coyenewatha itoroba xua penajuntu coyene taxobiyainwa? Jinyamonae barapo cui jopa exanaeyo xua jopa matha tsiwanaya nacobe quiateibiyo poxonae beya xaiba. Daxota jinyamonae pomonae peantucuiruyapube jiwi xua penajuntu coyene taxobixae, jei barapomonae.

⁶ Jesús jume nota barapomonae, jeye:

—Bara Isaías pon Nacom peitorobi jume pepaebin beta xaniwaicha paca yabara paeba xua paxam pomonae itara mexeya xanepanaeya pepaebi jiwi pam, daichitha apara abeya peexanae jiwi pam. Bapon paca yabara tinaeya jeye, xua Nacom paeba:

‘Barapomonae neyabara baru cui itura jina poxonae cueicueijei tsaibi, ichitha pejuntu coyenewantha jopa neantobeyo.

⁷ Pocotsiwa poxonae barapomonae wuna nejainta saya pejume pawí.

Po pecuidubiwa xua barapomonae cuiduba jiwitha saya apara jiwi pia peitorobi coyenewa tatsi’, jei Nacom xua Isaías tatina Nacom, jei Jesús.

⁸ Equeicha Jesús jeye barapo fariseomonaetha iru pomonaetha pomonae pecuidubiwi Moisés pia peitorobi coyene tatsi:

—Saya paxam panaitematame pocotsiwa Nacom pia peitorobi coyenewa tatsi painya exanaenexa po peitorobi coyenewa painya amo susato jiwi copiya canamata forota. Paxam baxua paexaname poxonae jiwi paitorobame xua jiwi matha penacobe quiateibinexa poxonae xaiba penajuntu coyene taxobiyainwa, jei Jesús.

⁹ Equeicha Jesús barapomonaetha jeye:

—Itapetsiya painya neexanaenexa pocotsiwa painya amo susato jiwi pia peitorobi coyenewatha itoroba, daxota bichoina pajume itawetame Nacom pia peitorobi coyenewa tatsi. ¹⁰ Bayatha Moisés pia peitorobi coyenewatha itoroba, jeye: ‘Axa baru cui

itura jinare, iru ena baru cui itura jinare', jei. Equeicha bapon Moisés jeye: 'Pon abe yabara paeba paxa, xua jopa peyawenaewa paxa ichacuitha tsipae xua penatha, bara bapon bewa tupaena', jei Moisés. ¹¹ Ichitha paxam papaebame, xua pinae pebin bara itacupatsi xua paxatha tsipaeba, ichacuitha xua penatha xua jeye: 'Jopa neitacupaeyo xua tapaca cayawenaewatsi, tsipei daxita pocotsiwa xeinan xua bequein pocotsiwatha tapaca cayawenaewatsi tsainchi baxuan daxita Nacomtha catan', xua jei pebin. ¹² Poxonae peburuya payabara nanta xeiname xua bapon baxua paeba, bapoxonae bara pacopatame xua barapo pebin jopa penantawenonaewa xua peyawenaewa paxatha, iruru xua penatha. ¹³ Poxonae paexanaponame pocotsiwa painya amo susato jiwi pia peitorobi coyenewatha itoroba, xuano xua ichamonae pacana exaname xua baxua iru exana bapoxonae paxam Nacom pia peitorobi jume pecui pawu jume pacana exaname. Barichi ichawanno xua be jupa xua peabe coyenein paexanamen, jei Jesús.

¹⁴ Equeicha Jesús waba barapo bicheito pia xainya berena, jeye:

—Daxita paxam pana nejume taema yawa pana nejume copi yaputaema pocotsiwa paca tsipaebinchi. ¹⁵ Pocotsiwa ba pebin pecoiboto deca tsijain jojonecatsi pexaewan, barapo coyene apara ba jopa bapana pebin antucuiruyapube exanaetsi xua poxonae pocotsiwa peexanaexae. Jame pocotsiwa ba pebin nanta xeina xua pecoibototha caunuta xua peabe jume, barapo jume coyenewatha jame pebin antucuiruyapube exanatsi xua poxonae pecueicueijeixae baxua. ¹⁶ Icha pamuxu dubename, moya pana nejume naitaeware pocotsiwa tapaca tsipaebiwatsi, jei Jesús.

¹⁷ Poxonae Jesús jiwi cuenta pona yawa bo bejoniya, bapoxonae Jesús pijimonae yabara yainyabatsi barapo pecayabara juta pepaebi diwesiyo. ¹⁸⁻¹⁹ Jesús jume nota pijimonae jeye:

—¡Paxam bara paichim icha fariseomonae ichi! Jopa payabara yaputaem barapo pecayabara juta pepaebi diwesiyo xua pexaewa yabara. Bayatha paxam payaputaneme pocotsiwa pebin tsijain jojonecatsi pexaewa pecoiboto deca, barapo pexaewa jopa abe cana exanaeyo pebin pia juntu coyenewa. Barapo pexaewa pebin jopa antucuiruyapube exanaetsi. Barapo pexaewa jopa ponaeyo pia juntu coyenewatha. Jame barapo pexaewa pecotsorotha pona. Bapoxonae pexaewa aichurucuae nawexacaeca, jei Jesús.

Poxonae Jesús baxua paeba jiwi yaputane xua daxita pexaewan bara wuna pexaenexa. Jopa jiwi antucuiruyapube exanaetsi. ²⁰ Equeicha Jesús namchi, jeye:

—Pocotsiwa pebin pecoibototha caunuta xua peabe jume, barapo jume coyenewatha jame pebin antucuiruyapube exanatsi. ²¹⁻²² Tsipei pejuntu coyenewatha pebin nanta xeina, xua meje bapocotsiwanje: Abe penanta xeinae coyenewa, iru peita coxanae coyenewatsi coyenewa xua poxonae penayaputae jiwi naperu nacoyaba, iru ichun piawa tatsi pecaibi coyenewa, iru ichun anaya pebexotsi coyenewa, iru ichun piseuri tatsi pepichi coyenewa, iru ichun piawa tatsi peichichipae coyenewa, iru abe peexanae coyenewa, iru ichun pemuxuitorobiwatsi coyenewa, iru peyuyujei coyenewa, iru peuwi coyenewa, iru ichun peyabara naerabiwatsi coyenewa, iru ichamonae peabi coyenewatsi, iru jopa xainyeya peexanae coyenewa poxonae bequein yaputaetha xua jopa bewa exanae. ²³ Daxita barapo coyenein pejuntu coyene weya jume pichapa. Barapo jume coyeneintha pebin antucuiruyapube exanatsi, jei Jesús.

*Meje yabara poxonae yab*uyo powayo penanapaincha poponaewayo Jesús jume cowuntatsi

(Mt 15.21-28)

²⁴ Bapoxonae Jesús bara weya pona. Tiro tomara beya pona. Sidón tomara beya ponano. Jesús botha joniya. Bequein Jesús aichaxaibi xua jiwi yaputane ichaxota bapon eca, ichitha Jesús jopa itacupaetsi xua nameicha eca. ²⁵ Barapoxonae caena nainya petsiriwa jume tane xua Jesús botha eca. Barapowa pexantiyo tatsi cauri xeina. Daxota barapo petsiriwa patopa Jesthath. Yawa pentabocototha uncua Jesús peitabaratha tatsi xua bapowa petsita ainya cuixaetsi. ²⁶ Barapowa penanapaincha poponaewayo pecueicueijeixae griegojume. Jopa judiomonae jitowayiy. Bapowa

sirofeniciamonaewayo naexana penaexanaexae Fenicia tomaratha xua Siria nacuatha. Barapowa Jesús wɔcatsi jeye:

—Taxantiyo inta taitawere cauri, jei barapowa.

²⁷ Ichitha Jesús jume nota barapowatha pecayabara jɔta pepaebi diwesiyotha, jeye:

—Jopa bewa ba auri apatsi pexaewa pocotsiwa pexui pia pexaewa tatsi. Baxua caunutsiya apara yabara paeban xua jopa bewa catsin tsane pomonaetha pomonae penanapaincha jinompaewi pomonae jopa judiomonae naexanaeyo xua pocotsiwa barompaya judiomonae piawa tatsi. Daxota jopa wɔnaeyo xua cayawenatsi, jei Jesús.

²⁸ Barapowa jume nota Jesustha pecayabara jɔta pepaebi diwesiyotha, jeye:

—Aa, bara barichi xuaunxuae netsipaebame ponxaem Tanecanamataxeinaem. Xainyei paebame. Jopa ba bewa auri catsibi pexui pia pexaewa tatsi. Daichitha auri ba xane pocotsiwa pexui sorobaba barapo pepɔrɔwixi pocotsiwa pexaethopaewa pebɔxɔpana tsica othopeica. Bara jɔtiya ichiya necana ichinde, daichitha neyawende, jei bapowa.

²⁹ Barapoxonae Jesús barai barapowatha, jeye:

—Bara xaniwaicha paebame daxota cayawenatsi. Moya bara bara beya ponare. Bara bayatha nexantiyo wepu poinchi cauri, jei Jesús.

³⁰ Poxonae barapowa patopa pia botha, pexantiyo taebota xua camatha jɔntema boca. Matautano tane xua bapowayo bayatha wepu poinchi cauri.

Meje yabara poxonae Jesús axaibi exana pon pemuxusipanaein

³¹ Bapoxonae Jesús Tiro tomara weya pona, xua caibeya pona, ichaxota Sidón tomara iya pona. Matautano ichaxota diez po tomaranbe iya pona po tomaran pewɔn Decápolis. Bapoxonae Galilea pucuatha patopa. ³² Baraxotiya Jesús pia xainya berena tacapoinchi pebin pon muxusipana, matautano xua jopa itacɔpaetsi xua pecueicueijejiwa. Pomonae pecarendenaexae bapon, barapomonae Jesús wɔcatsi, xua Jesús penta jayabiwa tsane xua bapon axaibi peexanaenexa tsainchi. ³³ Barapo pebin Jesús aisowa bebarɔ poinya pin bicheito pia xainya weya tatsi. Jesús pecobesitobetha nantiyabe muxu yauxatata. Poxonae naone sutaba peone pecobetha bapoxonae barapo cobetha ebato jayaba bapontha. ³⁴ Bapoxonae Jesús peitaboco benecoicha, yawa najumei cajujuina, yawano jeino bapontha: “¡Efata!” jeichichi, (xua jeichichi: “¡Muxu nasabare!” jeichichi.)

³⁵ Bapoxonae caena nainya bapon muxu nasaba nantiyabe. Matautano bara ebato xanepana. Matautano bara itacɔpatsi xua pecueicueijejiwa beta. ³⁶ Bapoxonae Jesús barai barapomonae, jeye: “Jopa ichamonaetha pana neyabara paebinde pocotsiwa exanan”, jei Jesús. Bequein Jesús matowa tsipaeba baxua, daichitha barapomonae awiya baxua yabara paebeiba ichamonaetha beyacaincha xua Jesús jume matawenta. ³⁷ Barapomonae najɔntɔ coyene cabenaeca, yawa jeino: “¡Maisa barapon bichocono daxita coyeneya xanepana exana! Pomonae pemuxusipanaewi equeicha beta jume tane, yawa bara cueicueijeji”, jei barapomonae.

8

*Meje yabara poxonae Jesús pexaewa apata cuatro mil pebiwi
(Mt 15.32-39)*

¹ Bapoxonae icha matabitha pinmonae nacaetuta Jesús pia xantha tatsi. Jopa xeinaeyo pocotsiwa xua pexaewa tsane. Bapoxonae Jesús waba pijimonae, yawa jeye:

² —Barapomonae yabara najɔntɔ coyene xeinan tayawenaenexa, tsipei barapomonae bayatha xote nebarɔ jinompa acoibi po matabibibe. Anoxuae jopa xeinaeyo xua pocotsiwa pexaewa tsane. ³ Icha barapomonae jainbotha pu itorobichipan pia bon beya, piyain namtotha xuirabathopaetsipa. Metha xuirabathopaetsipa tsipei ichamonae bayatha tajɔ werendena, jei Jesús.

⁴ Jesús pijimonae jume notatsi, jeye:

—Paxan jopa pana itacupaeyo xua barapomonae pexaewa pata apatsiwa, tsipei xote jiwaibi xua pata comocaenexa pexaewa, jei Jesús pijimonae tatsi.

⁵ Jesús yainyaba pijimonae, jeye:

—¿Eta po panyobe paxeiname? jei.

Jesús jume notatsi pijimonae, jeye:

—Siete po panyobe paxeinan, jei.

⁶ Nexata Jesús pijimonae najume caruta xua bepa pinae barapo jiwi iratha taenaetsei. Jesús pecobetha pita barapo siete panyobe. Bapoxonae Nacomtha tsipaeba jeye: “Axa, maisa juntu coyene weiweinan xua pexaewa pata tanecatsiwaxaem”, jei Jesús. Bapoxonae Jesús pan epa janaquiya nacobe weta. Bapoxonae Jesús pijimonae catsibapona, xua pijimonae tatsi xuya pecatsibaponaenexa barapo bicheittha. ⁷ Barichino barapomonae be conotha xeina duweixi poxi tsiquirixi. Jesús Paxa tsipaeba jeye: “Axa, maisa juntu coyene weiweinan xua pata tanecatsiwaxaem duweixi”, jei Jesús. Poxonae Jesús epa janaca, bapoxonae pijimonae cobe itoroba xua pecatsibaponaenexa barapo bicheittha. ⁸ Daxita barapomonae bara xane. Daxita bara jain cowuntarucupatsi. Pirapae awiya equeicha wumba siete po cotebe xua nacopaba pocotsiwa xua barapomonae bayatha jopa xaeyo petonsanaexae. ⁹⁻¹⁰ Pomonae nabane pexaewa, barapomonae cuatro mil pebiwi. Bapoxonae Jesús pu itoroba barapomonae, xua penawibiyaenexa pia tomaran beya. Bapoxonae caena nainya Jesús, iru pijimonae tatsi, jeratha nonobabiya pewarapaenexa Dalmanuta nacua beya.

Meje yabara poxonae fariseomonae Jesús cui itorobatsi xua peexanaewa tsane pexeinya petsita itutsi coyenewa

(Mt 16.1-4; Lc 12.54-56)

¹¹ Bapoxonae fariseomonae pata Jesustha. Barapomonae tamropata notarucupa xua najume matsontsonoba exana Jesustha. Barapomonae Jesús pejuntu coyene jujutsinexatsi, daxota Jesús piraichi cui itorobatsi pia petsita itutsi coyenewa pocotsi coyenewa xua cana exana itaboco wetsica. Barapomonae jopa bapon jume cowuntsichi icha jopa itacupaetsi xua exana petsita itutsi coyenewa. ¹² Jesús najumeicauna pejuntu coyene weya poxoru barapomonae bapon amuxucoyenefaetabi exanatsi. Bapoxonae jeye:

—¿Eta pocotsiwa metha barapomonae tapexeinya tsita itutsi coyenewa necui itoroba jane? Bara xainyeya paca tsipaebatsi jopa bapana beexanaeyo baxua, xua barapomonae necui itoroba, jei Jesús.

¹³ Bapoxonae Jesús cuenta pona barapomonae jeratha, peponaenexa icha muxunene beya xua pucua iya.

Meje yabara poxonae Jesús pijimonae yabara yaputane exana pocotsiwa pan cotowa exana

(Mt 16.5-12)

¹⁴ Jesús pijimonae tatsi junteina xua capona pan. Meisa cae pan capona jeratha, po nae pin naetha. ¹⁵ Jesús itoroba pijimonae, jeye:

—Dota pam, jopa pajume naitaewatsinde fariseomonae pia pecuidubi coyenewa tatsi xua painya nejume cowuntsiyainwa. Matautano dota pam, xua Herodes pia pecuidubi coyenewa tatsi xua painya nejume cowuntsiyainwa. Barapo pecuidubi coyenewan jiwi ichawa beya ajuntucicoyenyapube cana exanapoinchi icha be pocotsi coyene ichi xua levadura matawan xua pan cocotowa exanapona beya poxonae pin pan, jei Jesús.

¹⁶ Jesús pijimonae tatsi tamropata notarucupa xua caemonae natsipaeba, najei: “Metha apara poxoru junteina xua caponatsi po pan xua levadura cotowa exana, daxota metha baxua Jesús juntu coniquiya naca muxu tsipaeba”, najei barapomonae.

¹⁷ Jesús yaputane pocotsiwa pijimonae tatsi natsipaeba. Ichitha poxoru Jesús yabara paeba xua fariseomonae iru Herodes pia pecuidubiwat tatsi daxota Jesús yainyaba piamonae:

—¿Eta xua metha pana natsipaebame xua jopa painya necaponaexae pan? Baxua papaebame apara poxoru jopa pana nejume yabara cowuntsim pocotsiwa paca cuidubatsi. Cataunxuae jopa pana necui yabara yaputaem poxoru jopa paichichipaem xua painya neyaputaewa tsane painya jüntu coyeneintha. ¹⁸ Paxam bequein pana necui taneme, ichitha jopa xaniwaicha pana necui yaputaem. Matautano bequein bara pana nejume taneme ichitha jopa xaniwaicha pana nejume copi yaputaem. Matautano pajuntemainame poxona pexeinya petsita itutsi coyenewa exanan jiwi nexa poxona pan catan jiwitha. ¹⁹ Poxona janacan pan xua cinco po panbe xua cinco mil pebiwi nexa, ¿eta po cotethabe pawnbaponame xua pocotsiwa nacopaba? jei Jesús.

Barapomona Jesús jume notatsi, jeye:

—Doce po cotebe apara, jei Jesús pijimona tatsi.

²⁰ —Poxona janacan pan xua siete po panbe xua cuatro mil jiwi nexa, ¿eta po cotethabe pawnbaponame xua pocotsiwa nacopaba? jei Jesús.

Barapomona Jesús jume notatsi jeye:

—Siete po cotebe apara, jei Jesús pijimona tatsi.

²¹ Nexata Jesús pijimona barai xua muxu jei:

—Metha matapainya payaputaename xua apara jopa yabara paca tsipaebichi pan. Apra jame paca tsipaebatsi xua jopa bewa pajume cowuntsim tsane fariseomona iru Herodes pia pecuidubiwatatsi, jei Jesús.

Meje yabara poxona Jesús itacuere wunaeta pon peitata nacutsin Betsaida tomaratha

²² Jesús pijimona baru botouna jeratha Betsaida tomaratha. Barapo tomarapiwi jiwana carendena pon peitata nacutsin, Jesús pia xantha tatsi. Barapomona Jesús wucatsi, xua bapon pemata jayabinexatsi xuano xua axaibi peexanaenexatsi. ²³ Jesús cobe pita pon peitata nacutsin. Bapon cobe capoinchi aisowa beya xua tomara weya. Bapoxona Jesús naone sutaba bapon peitamaiqueitobetha, itacuere jayabano. Jesús bapon yainyaba jeye:

—¿Bara caitacupa xua netaewa? jei Jesús.

²⁴ Bapon necotaxuba, bapoxona Jesús jume notatsi, jeye:

—Pebiwi tan, daichitha itanonojan. Jiwi saya be naewan jinompa, jei bapon.

²⁵ Equeicha Jesús pecobetha itamaiquei jayaba nantiyabe. Barapo pebin daunweya naitata babatsiya tane. Bapoxona itamaiquei xanepana. Bapon bara beta matapainya wuna tane. ²⁶ Jesús itorobiya jeye bapon xua penawiyaenexa pia bo beya:

—Jopa tomaratha ponaeinde xua jopa baxua taneyabara cueicueijeinexa jiwitha, jei Jesús.

Meje yabara poxona Pedro namchi Jesthatha jeye: “Xam apara Mesías pon Nacom caitorobica”, jei

(Mt 16.13-20; Lc 9.18-21)

²⁷ Bapoxona Jesús, iru pijimona tatsi pata tsiqui tomaraxitha, po tomaraxi pewan Cesarea de Filipo. Poxona namtotha cataunxuae enapona, bapoxona Jesús pijimona yainyaba, jeye:

—¿Eta jiwi neyabara jei po coyene xua xan bapon aparan? jei Jesús.

²⁸ Barapomona Jesús jume notatsi, jeye:

—Ichamona cayabara jei: ‘Apra bapon Juan, pon jiwi Pebautisabin pon equeicha petupaein asu juina’, jei. Iru ichamona cayabara jei: ‘Apra bapon Elías, pon equeicha petupaein asu juina’, jei. Iru ichamona cayabara jei: ‘Apra bapon jiwana, pomona Nacom peitorobi jume pepaebiwi’, jei, jei Jesús pijimona tatsi.

²⁹ Bapoxona Jesús pijimona yainyaba, jeye:

—¿Incane iru paxamdu? ¿Eta paneyabara jumichimdu xua xan eta pondun? jei Jesús. Bapoxona Pedro, Jesús jume notatsi, jeye:

—Xam apara Mesías, pon Nacom caitorobica, jei Pedro.

³⁰ Jesús pijimonae muxu barai xua pijimonae jopa peyabara paebinexatsi ichamon-aetha baxua.

Meje yabara poxonae Jesús nayabara diwesi paeba po coyene xua petupaewa tsane
(Mt 16.21-28; Lc 9.22-27)

³¹ Bapoxonae Jesús tamropata pitaba xua pijimonae tsipaeba pocotsi coyene xua Jesús cana exanaeinchi ichamonae, Jesús jeye: “Xan ponxaein Nacom Tananeitapetsin jiwi bichocono neperaxa jubina. Matautano pitiri jiwi, iruru sacerdotemonae pia pentacaponaeawi tatsi, iruru pomonae jiwi pecuidubiwi Moisés pia peitorobi coyene tatsi, daxita barapomonae neitawetsina. Matautano barapomonae nebexubina. Ichitha equeicha asu poponaein poxonae acoibi po maticabiyobe tsuxubi tsane”, jei Jesús.

³² Baxua Jesús pijimonae wunaeya muxu tsipaeba xua barapomonae bara xaniwaicha peyaputaenexa. Bapoxonae Pedro, Jesús compa aisowa bebaru poinyatsi, Pedro Jesús jume daunweya tsipaebatsi xua Jesús jopa pepaebinexa baxua. ³³ Jesús pijimonae napatomeicha necota. Bapoxonae jume daunweya jeye Pedrotha:

—¡Xam be pon caurimonae pia pentacaponaein tatsim! Bara newepu ponare, tsipei xam jopa beta nanta xeinaem icha be jopa Nacom ichim poxonae xua beta nanta xeina. Saya xam nanta xeiname icha jiwi ichi poxonae nanta xeina, jei Jesús.

³⁴ Bapoxonae Jesús waba pin bicheito, matautano wabano pijimonae, yawa jeye daxita barapomonaetha:

—Icha pebin ichichipa xua tajiwiwimonae jiwana pin penaexanaewa tsane, bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonae jame bapon bewa eexanaponae pocotsiwa itoroban, bequein bara bapon bexotsi ichamonae, tajiwiwimonae jitonxae. ³⁵ Pon naantobeya nata exana pocotsiwa bapon ichichipa, bapon jopa xeinaeyo peajuntuyapusawa, po peajuntuyapusawa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan tana neantobexae xuano xua pecueicueijeixae Nacom Pejume Diwesi, bapon xeinaena peajuntuyapusawa, po peajuntuyapusawa ataya tsiteca xua Nacom pia nacua beicha. ³⁶ Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntucoyenesawa po peajuntucoyenesawa ataya tsiteca, bapoxonae bapon jopa itacupaetsi xua penajuntu coyene capanepaewa xua peweraweracaewa tsane. ³⁷ Tsipei pebin jopa itacupaetsi xua barapo copeitha Nacom pematomatsiwatsi, xua bapon pecatsinexa tsainchi peajuntucoyenesawa xua barapoxonae pepatopaewa tsane Nacom pia nacua beicha tatsi. ³⁸ Icha ichun neacaura, yawa nejume diwesi acaurano jiwi peitabaratha tatsi, pomonaetha pomonae jopa tana nejume cowantsi jiwi, pomonaethano pomonae bichocono abe peexanaewi, xan xuya barichin tsane. Xan ponxaein Nacom Tananeitapetsin, bapon xuya acauran tsane. Baxua exanaein poxonae patopaetsicaein be jiwi pia Pecanamataxeinaein tatsi yaitupanae susato patopaetsicaein. Taxa pia peitupanaewa tatsi yawa patopeicaein. Matautano Taxa pia matatsunpiwi tatsi nebaru patsicaena, jei Jesús.

9

¹ Barichino Jesús jeye:

—Bara xaniwaicha paca tsipaebatsi xua pomonae xote umene barapomonae jiwana abu copiya matha yabara yaputaena xua po coyene Nacom waba jiwi xua petanaexanaenexatsi piamonae pomonae itorobiya taewatsixae taayapusawatha. Bapoxonae barapomonae werapaena, jei Jesús.

Meje yabara poxonae Jesús pijimonae peitutha pexeinya itupanae coicha tsanaya naexana
(Mt 17.1-13; Lc 9.28-36)

² Poxonae seis po maticabibe jopa, xua Jesús paeba baxua bapoxonae pirapae Jesús baru pona Pedro, iru Santiago iru Juan. Barapoyobe Jesús compa baru pona demxuwatheicha po demxuwa bichocono tacha. Baxoteicha barapoyobe peitutha

tatsi, Jesús pexeinya itupanae coicha tsanaya. ³ Pocotsiwa Jesús pia penama xatatsiwa bichocono daedaena, yawa bichocono inyapana, beyacaincha poxonae jiwi bichocono paparuwa matanaca xua inyapana exana. ⁴ Bapoxonae Pedro, iru Santiago iru Juan Elías taerucupatsi, iru Moisés ponbe caena bayatha naxubabe. Baponbe Jesús baru cueicueijeichibe. ⁵ Bapoxonae Pedro namchi, jeye Jesththa:

—Pon jiwi Necuidubim maisa wuna xua xote pata umenaewa. Pacata acabinchi acoibi po boutiyobe, cae bouto xam nexa, icha bouto Moisés nexa, icha bouto Elías nexa, jei Pedro.

⁶ Pedro baxua paeba, bequein jopa yaputaeyo pocotsiwa yabara cueicueije, tsipei poru saya barapomonae bichocono pijunuwi. ⁷ Bapoxonae daxita barapomonae pia xainya bematawacaicha taruneicatsi tsaquinaebowa. Barapo tsaquinaebowatha pejume jume tane, xua Nacom Jesús yabara cueicueijeichi, jeye: “Bapon apara Taxanto pon bichocono antobein pon itapetan. Bapon beta pajume taema pocotsiwa paca tsipaeba”, jei Nacom. ⁸ Barapoxonae caena nainya poxonae necobarucupa barapomonae, baponbe jopa taetsi, meisa saya Jesús compa uncua. ⁹ Poxonae Jesús pijimonae baru juinca demxuwa wetsica, bapoxonae Jesús tsipaeba barapo acoibi poyobe, jeye: “Ichamonaetha jopa yabara patsipaebinde pocotsiwa xuaunxuae pataneme xua tapaca catsita exanaewatsi. Jopa payabara paebinde beya abu poxonae equeicha asun poponaein tatupae coyene weya, xan ponxaein Nacom Tananeitapetsin”, jei Jesús. ¹⁰ Daxota barapoyobe jopa yabara paebiyo ichamonaetha xua tane. Saya barapoyobe pia coutha namicha natsipaebabe najeibe: “¿Eta xua metha baraxuara xua Jesús paeba xua pinae petupae coyene weya asu tsane?” najeibe. ¹¹ Barapoxonae barapo acoibi poyobe Jesús yainyabatsi, jeibe:

—Pomonae jiwi pecuidubiwi Moisés pia peitorobi coyene tatsi, ¿eta xua metha bapomonae paeba xua pinae bewa copiya patopaena Elías, xua pinae beya poxonae patopaena Mesías? jei barapoyobe.

¹² Jesús barapoyobe jume notatsi, jeye:

—Bara xainyei, Nacom Pejume Diwesitha paeba xua pon be Elías copiya netsiwana patopaena. Matautano paeba xua bapon cana nantu coyene weta exanaena jiwi pia juntu coyenewantha xua jiwi pejume cowantsinexa Nacom. Matautano barapo Nacom Pejume Diwesitha paeba xua xan ponxaein Nacom Tananeitapetsin ichamona neperaxa jubina. Matautano bichocono abeya neyabara paebina. ¹³ Ichitha nama xan paca tsipaebatsi xua pon be Elías bayatha apara patopa. Bapontha abeya cana exanatsi ichamona, icha be pocotsiwa barapomonae ichichipa xua bapon pecana exanaewatsi. Bayatha baxua Nacom Pejume Diwesitha peyabara tsiwuna muxu dutsixae, jei Jesús.

*Meje yabara poxonae Jesús cauri taitaweta xua pewowin xeina
(Mt 17.14-21; Lc 9.37-43)*

¹⁴ Bapoxonae pirapaeyo barapo acoibi poyobe Jesús baru nawiya ichaxota ichamona pijimonae tatsi tajinompatsi. Bapoxonae barapomonae tane xua Jesús pijimonae tatsi pomonae baxota petajinompawixaetsi baru nacaetutatsi pin bicheito. Iru baxota naena pomonae jiwi pecuidubiwi Moisés pia peitorobi coyene tatsi. Barapo pecuidubiwi Jesús pijimonae tatsi jume matsontsonobatsi. ¹⁵ Barapo pin bicheito najuntu coyene nabenaeca poxonae Jesús taerucupatsi. Bapoxonae barapo pin bicheito caena nainya Jesús pexainya betacuinaeyiyatsi xua Jesús pejacobinexatsi. ¹⁶ Bapoxonae Jesús yainyaba barapo pin bicheito, jeye:

—¿Eta pocotsiwa metha tajiwiwimona pajume matsontsonobame? jei Jesús.

¹⁷ Caenin pon uncua baxota, bapon Jesús jume notatsi, jeye:

—Pon jiwi Pecuidubim, xote nexantha cata caponatsi taxanto. Bapon taxanto cauri xeina, xua daxota inta muxusipana exanatsi. ¹⁸ Poxonae taxanto taibatsi cauri, inta iratha bebai tsabichi. Bapoxonae inta coibo thamthamei exaneibatsi. Matautano inta nawano xane exanatsi. Daxota inta cuenecuenona. Bequein wucan jinyamonae, janje: ‘Painta taxanto taitawere cauri’, jan, daichitha jopa itacupaetsi xua inta taxanto petaitawetsinexatsi cauri, jei bapon.

¹⁹ Bapoxonae Jesús anaya barai pijimonae, jeye:

—¡Paxam barapomonae pam, pomonae jopa xapain cataunxuae pana nejume cowñtsim! ¿Eta po weibe nantawenonan xua bewa tapaca barꞥ ecaewatsi tsainchi xua beya poxonae tapana nejume cowñtsiwam tsane? Matautano ¿eta po weibe equeicha nantawenonan xua tapaca cayawenaewatsi tsainchi? Pon cauri xeina painta barꞥ awena, jei Jesús.

²⁰ Bapoxonae Jesús pexantha tacapoinchi barapo pewowin. Poxonae Jesús tainchi cauri, bapoxonae pewowin naichababa exanatsi. Barapo pewowin bapoxonae iratha xotsi. Yawa iratha natorenababa exanatsi. Yawa coibo thamthamei exanatsi. ²¹ Pexuyo paxa tatsi, Jesús yainyaba, jeye:

—¿Eta po weiyobe barapo pewowin xeina baxua xua cauri xeina? jei.

Barapon Jesús jume notatsi, jeye:

—Caena bayatha baxua xeina poxonae pexuyo tsecae. ²² Matowa cauri inta taxanto isototha bebai tsaibichi. Matautano inta mentha bebai tsaibichi pebexubinexatsi. Icha caitacꞥpa xua neexanaewa tsane baxua, pana yabara najñntꞥ coyene xeinare jinya tapana neyawenaenexam tsane, jei pexuyo paxa tatsi.

²³ Jesús jume nota bapon, jeye:

—¿Eta pocotsiwa metha barapo jumetha netsipaebame xua tana neitacꞥpaewa yabara? Tsipei ponba jume cowñta bara Nacom yawena xua peitacꞥpaewatsi xua daxitantha beta cana exana, jei Jesús.

²⁴ Bapoxonae pexuyo paxa tatsi jume daunweya wawaya jeye:

—Bara cajume cowñtatsi. Neyawende xua equeicha bichocono matowa tacajume cowñtsinexa tsainchi, jei pexuyo paxa tatsi.

²⁵ Poxonae Jesús tane xua pin bicheito imoxoyo nacaetutapona, bapoxonae Jesús itaweta cauri, jeye:

—Xam caurim pom muxusipana exaname jiwi, bara caitawetatsi. Bara xubiriware barapo pewowin. Equeicha bapana jopa caewa patopaeinde bapontha, jei Jesús.

²⁶ Bapoxonae cauri pewowin papai exanatsi. Yawano naichababa exanatsi. Barapo cauri pewowin cuenta poinchi, barapoxonae barapo pewowin be petꞥpaeyo boca iratha. Daxota daxita barapo pin bicheito paeba xua pinae barapo pewowin apara tꞥpa.

²⁷ Barapo pewowin Jesús cobe pita, yawano asiya cuaranota. Bapoxonae barapo pewowin nantacotuncuataba.

²⁸ Bapoxonae Jesús joniya botha. Jesús pijimonae compa seicaya tsipaebatsi, jeichichi:

—¿Eta pocotsiwa metha jopa pana neitacꞥpaeyo xua pata taitawetsiwa cauri? jei barapomonae.

²⁹ Jesús pijimonae jume nota, jeye:

—Barapocotsimonae caurimonae paca itacꞥpa xua painya neitawetsiwa saya meisa poxonae memecabiya matowa pawꞥcame Nacomtha, jei Jesús.

Meje yabara poxonae equeicha Jesús nayabara paeba xua poxonae tꞥpaena

(Mt 17.22-23; Lc 9.43-45)

³⁰ Poxonae Jesús, irꞥ pijimonae tatsi bara weya pona, bapoxonae Galilea nacua iya pona. Bapon jopa beyaputaetsi xua ichaxota ponaena, xua ichamonae yaputaena.

³¹ Baxua Jesús exana, tsipei pijimonae cuiduba. Jesús barai pijimonae xua nayabara paeba, jeye:

—Xan ponxaein Nacom Tananeitapetsin jiwi necaenaetsina ichamonaetha. Yawano nebexubina. Ichitha poxonae acoibi po matabibibe yapucaewina, bapoxonae equeicha asꞥ poponaein, jei Jesús.

³² Ichitha barapomonae pomonae Jesús pijimonae jopa jume yaputaetsi xua Jesús yabara paeba. Matautano barapomonae junuwa xua Jesús peyabara yainyabiwa tsainchi barapo jume.

Meje yabara poxonae Jesús yabara yainyabatsi pijimonae xua pon peainya cui peexanaeinchi
(Mt 18.1-5; Lc 9.46-48)

³³ Jesús pijimonaē barū patopa Capernaum tomaratha. Poxonaē Jesús pijimonaē botha barū patopa, bapoxonaē pijimonaē yainyaba, jeye:

—¿Eta xua namtotha pana najume matsontsonobaponame? jei Jesús.

³⁴ Barapomonaē saya moya umena peauraxae, tsipei namtotha najume matsontsonobapona xua po coyene metha jintam ainya cui peexanaewatsi tsainchi pon barapomonaē jiwanaxae. ³⁵ Nexata poxonaē Jesús eca, bapoxonaē pijimonaē waba, pomonaē doce poyobe, yawa jeye:

—Pon ichichipa xua ichamonaē ainya cui petsita naexanaewatsi, bapon bewa pia coutha pecui pawī jiton naexanaē petanacuichinexa ichamonaē, jei Jesús.

³⁶ Bapoxonaē Jesús pita pexuyo, yawa pijimonaē tatsi peitabarayo deca tatsi tacuara-noreca. Jesús isaeca barapo pexuyo, jeye:

³⁷ —Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi, barapon apara bara nententa weyataeya waba. Xan jopa meisa nententa weyataeya wabiyo, apara bara irū matenta weyataeya wabatsi pon tana neitorobixae xua pon bara Nacom, jei Jesús.

Meje yabara poxonaē Jesús barai pijimonaē: “Pon jopa nacata abe exanaeyo, bapon ba apara naca yawena”, jei

(Mt 10.42; Lc 9.49-50)

³⁸ Nexata Juan namchi Jesustha, jeye:

—Ja Tanecuidubim, paxan caein patan pon cawūn taiba poxonaē itaweta caurimonaē, xua caurimonaē itawetatsi. Paxan baxua pacui itawetan, tsipei jopa naca puna popon-aeo, jei Juan.

³⁹ Ichitha Jesús Juan jume notatsi, jeye:

—Bapon baxua jopa pacui itawetsinde, tsipei dapon aibi pon pexeinya petsita itūtsi coyenewan exana poxonaē newūn taiba xua bapoxonaē cotacaya abeya neyabara paeba.

⁴⁰ Tsipei pon abe jopa nacata exanaeyo, bapon apara naca yawena. ⁴¹ Pon paca yawena xua mera paca cata xua bequein tsica corotiyotha xua irū pejume cowuntsixae, xua xan Criston tajiwiwimonaē pamxaem, baxua peexanaexae, Nacom catsina bapontha pematomatsiwa baxua nexa, jei Jesús.

Meje yabara poxonaē Jesús paeba xua jiton jopa bewa cana exanaē ichūntha xua irū abe peexanaewa tsane

(Mt 18.6-9; Lc 17.1-2)

⁴² Equeicha Jesús namchi, jeye: “Nacom tsitatsi xua pebin bichocono abe exana poxonaē natsicuenta ichūn cana exanatsi xua abe peexanaē cuiru coyene exana, po barapo ichūn pon cataunxuae aena tana nejume cowuntsixae. Metha jame wūnae tsipae xua barapo pebin pon abeya cana exanaeya taexana ichūntha, barapon pin iboto wisi cūtsipatsi yawa xua tuwūtha xua pin mar menetha barapo ibototha cayawa cabutabachipatsino. ⁴³⁻⁴⁴ Icha painya cobe paca exana xua abe painya neexanaewa tsane, maisa panacobe ucubobare. Tsipei baxua xanepana xua cae cobexi pabebam tsane, xua saya cae cobexi painya neyawa patsiwa tsane Nacom pia nacua beicha tatsi. Baxua jame yatsicaya xanepana beyacaincha xua ainya cobebe painya necayawa bebaiwa tsane ichaxota po nacuatha isoto jopa itacounayiyo, xua ataya tsiteca. ⁴⁵⁻⁴⁶ Matautano icha painya taxu paca exana xua abe painya neexanaewa tsane, maisa panataxu ucubobare. Tsipei baxua xanepana xua cae taxuxi pabebam tsane, xua cae taxuxi painya neyawa patsinexa Nacom pia nacua beicha tatsi. Baxua jame yatsicaewa xanepana beyacaincha xua ainya taxube painya necayawa bebaiwa tsane ichaxota po nacuatha isoto jopa itacounayiyo xua ataya tsiteca. ⁴⁷ Matautano icha pocotsiwa pataneme painya itamaiqueitha xua icha baxua paca exana xua abe painya neexanaewa tsane, painya netaexae painya itamaiqueitha, maisa pana naitacuere jucuaire. Tsipei baxua xanepana xua cae itamaiqueitoxi pabebam tsane, xua cae itamaiqueitoxi painya neyawa patsiwa tsane Nacom pia peitorobi nacua beicha tatsi. Baxua jame yatsicaewa xanepana,

beyacaincha xua poxonae ainya itamaiqueitobe painya necayawa bebaiwa tsane ichaxota isoto jopa itacounayiyo. ⁴⁸ Barapo nacuatha isoto jopa itacounayiyo xua ataya tsiteca yawa oro jopa tupaeyo.

⁴⁹ “Tsipei daxita jiwi pia pejuntũ coyenein tatsi nacui wunaetsina Nacom nexa pocotsi coyenewantha xua jiwi taayapubetsi bichocono xua jiwi atene exanatsi pocotsiwa icha be isoto ichi. Matautano daxita pocotsiwan jiwi tauta xua petuxusi exanaewa Nacomtha, barapocotsiwa copiya yawa muxuna nacui xaxainchina sare beno. ⁵⁰ Sare beno, bara bena wuna. Ichitha icha barapo sare beno jopa abenataeyo bapoxonae jopa peitacupaewatsi xua equeicha peabenataewa. Bara paichinde poxonae icha be sare beno ichi. Paxeinare pocotsi coyene pexeinya juntũ coyene xua jopa po juntũ coyene abeyo. Matautano junte ma nantiya pana nabaru jinompare”, jei Jesús.

10

*Meje yabara poxonae Jesús cuiduba xua jiwi piseurixi pepunapenteibiyainwa
(Mt 19.1-12; Lc 16.18)*

¹ Jesús ponataba Capernaum tomara weya. Bapoxonae Judea nacuatha patopa. Yawa patopa Jordán mene iya icha muxunenetha, po muxunene xua Judea nacua weya. Baxotiya equeicha jiwi pin bicheitomonae nacaetuta ichaxota Jesús uncua. Equeicha Jesús cuiduba barapomonaetha, tsipei pia cui xua cuidubeiba. ² Bapoxonae ichamonae fariseomonae, barapomonaetha piraichi Jesús imoxoyo caquita umenarucupatsi xua Jesús pejuntũ cui coyene jujatsinexatsi, daxota jeye:

—¿Metha bara Moisés copata jampa xua pebin pepunaxubiwa piowa icha saya metha ichichipa jampa? jei.

³ Jesús jume epa pita barapomonaetha, jeye:

—¿Eta xua bapon Moisés paca itoroba? jei.

⁴ Barapomonaetha Jesús jume notatsi, jeye:

—Moisés copata xua jiton itacupatsi xua pecatsiwa papera piseuri, po paperatha tina xua pexubiwa tsane piseuri. Bara bapoxonaetha bapon xubina piseuri, jei barapomonaetha.

⁵ Bapoxonaetha Jesús jume nota barapomonaetha, jeye:

—Moisés paca cata barapo peitorobi coyenewa, tsipei paxam jopa bepajume cowantsim painya juntũ coyenewatha. ⁶ Tsipei poxonaetha Nacom aena forota daxita, pejume diwesitha jeye: ‘Nacom exana pebin, matautano exana yabũyo’, jei. ⁷ Equeicha Nacom jeye: ‘Daxota pebin paxa wepu natsata, yawa pena wepu natsata xua piowabe imoxoyo penaperũ nacoyobinexabe. ⁸ Baraponbe be cae jiwimonaetha naexanabe’, jei. Bapoxonaetha baponbe xua ainya jiwibe aibi, bara be caein naexanabe. ⁹ Daxota pebin bapana jopa bewa punaxubi piowa. Tsipei apara bayatha Nacom cana exana xua bara be caein naexanabe, jei Jesús.

¹⁰ Poxonaetha Jesús, irũ pijimonaetha tatsi botha jinompa, bapoxonaetha Jesús pijimonaetha yabara yainyabatsi baxua. ¹¹ Bapoxonaetha Jesús jume epa pita, jeye:

—Pon punaxuba piowa, yawa ichowa pita, bapon abe exana piseuritha yawa Nacom peitũtha tatsi, tsipei Nacom tsitatsi xua powa copiya baru popona, apara bara piowa tatsi.

¹² Barichi icha petsiriwa punaxuba pia pebin, yawa pita icha pebin, bapoxonaetha bapowa abe exana pia pebintha, yawa Nacom peitũtha tatsi, tsipei Nacom tsitatsi xua pon copiya xeina, apara bara pia pebin tatsi, jei Jesús.

*Meje yabara poxonaetha Jesús jeye pexuitha: “Barabũ Nacom beta paca yawenaena”, jei
(Mt 19.13-15; Lc 18.15-17)*

¹³ Nexata jiwi Jesús pexui tacaponatsi xua Jesús pejayabinexa pecobetha, yawa xua Nacomtha pewucaenexa barapo pexui nexa xua pejeinexa: “Barabũ Nacom beta paca yawenaena”, pejeinexa. Ichitha Jesús pijimonaetha tatsi poxonaetha baxua tane, tamropata notarucupa xua barapomonaetha cui matawentatsi pomonaetha pexui carendena tsaibi.

¹⁴ Poxonaetha Jesús baxua jume tane, jopa ichipaeyo pocotsiwa pijimonaetha tatsi paeba, daxota anaya jeye:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonaex nexa pomonaex pejuñtu coyene xanepanaewi icha pexui ichi. Pexui pia cui xua tayapu xanepanatsi xua pia juñtu coyeneintha jume cowũnta Nacom. ¹⁵ Bara xainyeya paca tsipaebatsi. Pon jopa yabara jume cowũntsiyo xua icha be jopa pexui ichiyo xua ba pexui tayapu xanepanatsi xua jume cowũnta, bapon bapana jopa naexanae tsane Nacom pijimonaex tatsi pomonaex Nacom itorobiya ewata, jei Jesús.

¹⁶ Bapoxonaex Jesús tsana tamropata nonotapona pexui, yawa pecobetha pexui jayabiya tawũcatsi Nacom. Jeye: “Barabũ Nacom beta yawenaena barapo pexui”, jei.

*Meje yabara poxonaex pewowin pon copei pexeinaein Jesús tsipaebatsi
(Mt 19.16-30; Lc 18.18-30)*

¹⁷ Poxonaex Jesús aena warapa, bapoxonaex pebin Jesús pia xainya betacuinaerenatsi. Bapon pentabocototha uncuax Jesús peitabaratha tatsi, xua pebarũ cui itura jinaenexatsi Jesús, tsipei Jesús pon peainya cuin. Bapon jeye Jesthax:

—Ja Tanecuidubim, maisa nejũntũ coyene xanepanaem. ¿Eta xua copiya matha exanocuaein xua ajũntũyapusũya tapoponaewa tsane xua ataya tsane? jei bapon.

¹⁸ Bapoxonaex Jesús jume nota, jeye:

—¿Eta xua nebaram: ‘Nejuñtu coyene xanepanaem’, jam? Apara ichũn dapon aibi pon pejuñtu coyene xanepanaein. Jame meisa apara bapon Nacom compa pejuñtu coyene xanepanaein. ¹⁹ Xam bara yaputaneme po coyene Moisés pia peitorobi coyenewatha itoroba, xua jeye: ‘Jopa ichũn bexubinde. Jopa ichowa pichinde ichũn piowa tatsi. Jopa caibinde ichũn piawan tatsi. Jopa naerabiya cayabara paebinde pocotsiwa ichamonaex exana. Jopa ichamonaex yabara muxujainyabinde xua caibame. Axatha barũ jume cui itura jinare. Mataũtano enatha barũ jume cui itura jinare’, jei Moisés, jei Jesús.

²⁰ Pewowin Jesús jume baraichi, jeye:

—Pon jiwi Necuidubim, daxita caena bayatha barapo coyenein exaneiban. Poxonaex pexuyothan tamropata pitaban, beya anoxuae yacuiya pinyon, jei bapon.

²¹ Jesús antobeya necota bapontha, jeye:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyo nexa tsane xua pocotsiwa xanepanaeya neexanaewa, matha daxita caenaere pocotsiwa xeiname, yawa catsibare pomonaetha pomonaex peacopeibi jiwi. Bapoxonaex jame moya anetha, nepuna ponde. Bequein bara bapoxonaex acopeibim tsane, daichitha Nacom cacatsina peitaboco beicha pocotsiwa Nacom necajuñtana botsiwa pocotsiwa bichocono wũnaex, jei Jesús.

²² Poxonaex barapo pewowin baxua jume taeba, bichocono nantanuweya pontaba, tsipei bichocono copei pexeinaein.

²³ Bapoxonaex Jesús necota jiwi, yawa jeye pijimonaetha:

—¿Maisa bichocono ayapubecai xua copei pexeinaewi naexana Nacom pijimonaex tatsi jiwana pomonaex itorobiya canamataxeina! Tsipei barapomonaex bichocono antasiway-atane barapo pia copei, beyacaincha xua Nacom antobetsi, jei Jesús.

²⁴ Jesús pijimonaex tatsi yabara najũntũ coyene cabenaeca pocotsiwa xua Jesús paeba. Ichitha Jesús pijimonaex equeicha tsipaeba, jeye:

—Pomonaex tamonaex pamxaem, ¿maisa bichocono ayapubecai xua pomonaex copei pexeinaewi jume cowũntsina Nacom! Barapomonaex nanta xeina xua pia copeitha nayawena xua daxota jopa canantawenonaeyo xua Nacom pejume cowũntsiwatsi.

²⁵ Bichocono acuiruyapube xua duwein, pon pewũn camello xua bapon pejoniyawa acucheto peetabũ wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonaex tatsi jiwana pomonaex itorobiya canamataxeina beyacaincha xua poxonaex acuiruyapube xua poxonaex camello acucheto peetabũ wan iya pejoniyawa, jei Jesús.

²⁶ Poxonae Jesús pijimonae jume taerucupatsi xua paeba bapoxonae najuntũ coyene cabenaeca bichocono. Barapomonae caemonae nayainyaba, najei:

—Bapoxonae ħjintam metha nexata itacupatsi xua pecapanepaewa pia coutha? jei barapomonae.

²⁷ Jesús tane barapomonae, yawa jeye:

—Pebiwi ba jopa itacupaetsi xua baxua exana, saya jame meisa Nacom compa itacupatsi xua jiwi napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁸ Nexata Pedro Jesús jume notatsi, jeye:

—Paxan daxita pacuenta ponan pocotsiwa paxeinan pata paca puna ponaewatsi tsainchi, jei Pedro.

²⁹ Jesús Pedro jume notatsi, jeye:

—Bara xainyeya paca tsipaebatsi. Nacom beta cana exanaena daxita pomonae pecueicueijeixae Nacom pia pecapanenebiyae diwesi yawa taneantobexae beyacaincha xua ichamonae antobetsi. Nacom beta cana exanaena barapomonae pia bon pecuenta ponaexae inta peexanaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowi pecuenta ponaexae. Matautano beta cana exanaena pomonae paxeiwi pecuenta ponaexae, matautano peniwi pecuenta ponaexae. Matautano beta cana exanaena pomonae pia pexui yawa pia iran pecuenta ponaexae. ³⁰ Nacom barapomonaetha catsina po irathe pentoma xua cien po cuiyobe tsane. Barapomonae xeinaena bon, matautano nantauntsina peweichowi, irũ pamchowi tatsi, irũ peniwi tatsi, irũ pia pexui tatsi, yawa iranno. Daxita barapomonaetha tsicotane be barompaya piamonae tatsi. Barapo cae pin nacuathe barapomonae peraxa ħubinchi taneantobexae, daichitha barapomonae xeinaena Nacom pia peitorobi nacuatheicha peajuntũyapusũwa po peajuntũyapusũwa ataya tsiteca. ³¹ Pomonae xua anoxuae, pomonae jiwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jiwi tsane. Pomonae xua anoxuae pepawi naexana pomonae jiwi jopa petsita ainya cui jiwichi, po cae pin nacuathe, barapomonae Nacom pia peitorobi nacuatheicha peainya cui jiwi tsane, jei Jesús.

Meje yabara poxonae Jesús nayabara paeba acoibi po coyenebetha xua poxonae tũpaena (Mt 20.17-19; Lc 18.31-34)

³² Poxonae Jesús pijimonae cataunxuae namtotha barũ ecapona xua Jerusalén tomara beya, Jesús pijimonae tsiwana nantacapona. Bapoxonae Jesús pijimonae tatsi najuntũ coyene cabenaeca, tsipei Jesús nainya nantacapona. Irũ pomonae Jesús puna poinchi yabara junuwa, tsipei yaputane xua Jesús abe cana exanaeinchi barapo tomarapiwi. Bapoxonae Jesús pijimonae compa waba aisowa beya xua pomonae doce poyobe tatsi. Jesús tamropata pitaba xua tsipaeba pijimonae xua pocotsiwa imoxoyo ichamonae Jesús cana exanaeinchi. ³³ Jesús jeye pijimonaetha: “Anoxuae ponaeinchi Jerusalén tomara beya. Baxotiya xan ponxaein Nacom Tananeitapetsin, necaenaetsina ichamonae sacerdotemonae pia pentacaponae witha tatsi, yawa pomonaetha pomonae jiwi pecuidubiwi Moisés pia peitorobi coyene tatsi. Barapomonae itorobina xua nebexubina. Matautano necana cobenatsina pomonaetha pomonae penanapaincha jinompaewi xua pomonae icha nacua werena peponaewi. ³⁴ Barapomonae necui caponaena, yawa necueinchinano. Matautano yawa necana one subabina. Bapoxonae nebexubina. Daichitha poxonae acoibi po matabibe weraweracaena equeicha asũ poponaein petũpae coyene weya”, jei Jesús.

Meje yabara poxonae Santiago irũ Juan Jesús yainyabatsibe (Mt 20.20-28)

³⁵ Bapoxonae Santiago irũ Juan ponbe Zebedeo pexantobe tatsi, baponbe Jesús imoxoyo caquita uncuatabatsibe, jeibe Jestustha:

—Pon jiwi Necuidubim, paichichipan xua painta exanaename pocotsiwa paca wu-caeinchi, jei.

³⁶ Nexata Jesús yainyaba baponbetha, jeye:

—¿Eta pocotsiwa paichichipamebe xua pacata exanaeinchibe? jei.

³⁷ Baponbe Jesús jume notatsi, jeye:

—Matacabi jopaena, po mataqueitha itorobiya ewatsiname jiwi poxonae ecaename jinyawa xua pexeinya itupanae ecaethopaewatha. Barapo mataqueitha copare xua paxanbe nantiyabe paecaeinbe patawantha xua pexeinya itupanae ecaethopaewatha. Ichun pocotsiwa necoxa weya ecaena. Ichun pocotsiwa netsocona weya ecaena, jeibe baponbe.

³⁸ Bapoxonae Jesús baraibe baponbetha, jeye:

—Paxambe jopa payaputaembe pocotsiwa pana newucamebe. Poxonae ichamonae abe inta exanaena, xan bara saya copatsin xua barapomonae bara neperaxa jubina. Barichi poxoru paxambe tapana neantobexaembe, ¿bara iru paca itacupabe xua bara pacopatsinamebe xua bara ichamonae paca peraxa jubinabe? Barichin bara saya copatsin xua ichamonae bara tupa neexanaena. Barichi, ¿bara iru paca itacupabe xua pacopatsinamebe xua bara ichamonae tupa paca exanaenabe? jei Jesús.

³⁹ Barapoyobe jume notabe Jesustha, jeye:

—Aa, bara baxua pana neitacupabe, jeibe.

Jesús jume notabe baponbetha, jeye:

—Bara bara xainyei, barapocotsi coyene ichamonae paca cana exanaenabe. Ichamonae paca peraxa jubinabe. Matautano ichamonae bara tupa paca exanaenabe, icha xan necana ichi tsane. ⁴⁰ Nama xua xantha nantiya paecamebe xua ichun pocotsiwa tacoxa weya eca, yawa xua ichun tatsocona weya eca, baxua jopa tacoya yabara itorobinyo. Saya jame Taxa Nacom meisa baxua taexanaena pomonaetha pomonae caena bayatha tsiwunaeta xua peenaenexa tsane, jei Jesús.

⁴¹ Jesús pijimonae tatsi pomonae umena, pomonae diez poyobe, barapomonae jume tane xua Santiago iru Juan Jesús wucatsibe. Bapoxonae barapo diez poyobe, Santiago iru Juan yabara anaepanarucupatsibe. ⁴² Ichitha Jesús pia xainya berena pijimonae waba yawa namchiya jeye barapomonaetha:

—Paxam bayatha pataneme po coyenewa ba exana pomonae jopa judiomonae naexanaeyo. Barapomonae ba nantauta pomonae pia nacua tatsi pia petaewatsiwichi tatsi. Daichitha barapo nacua peewatsiwi aebiya itoroba piamonae xua daxota bichocono jiwi taayapubetsi. ⁴³ Ichitha nama paxam barapocotsi coyeneya jopa bara paichinde. Seicaya nama icha juntu coyeneyatha paca itorobatsi. Icha pon paxam jiwana, icha bapon ichichipa naexana be pocotsin canamataxeina ichamonae, bapon matha bewa copiya daxita paxam beta amanaya pacata nacuichina. ⁴⁴ Matautano pon xua paxam jiwana, icha bapon ichichipa naexana be pocotsin bichocono ainya cui penaexanaein xua beyacaincha ichamonae, bapon matha bewa copiya daxita paxam beta amanaya pacata nacuichina icha pon pebusi cui taetaeinchi ichi. ⁴⁵ Icha be pocotsi coyeneya ichin bara paichinde. Xan ponxaein Nacom Tananeitapetsin patopeican xua tanacuichinexa tsane ichamonae nexa. Apari jopa baxua tsipatopaeinyo xua ichamonae inta penacuichinexa tsane. Saya patopeican tsipei ichichipan xua daxita carepaya jiwi tayawenaewa tsane. Matautano patopeican xua tatsitupaenexa tsane be pentoma xua daxita jiwi pepanenebiyaenexa abe pia peexanae cuiru coyenein weya tatsi, jei Jesús.

Meje yabara poxonae Jesús axaibi exana pon peitata nacutsin, pon pewun Bartimeo (Mt 20.29-34; Lc 18.35-43)

⁴⁶ Bapoxonae Jesús iru pijimonae tatsi pata Jericó tomaratha. Jesús iru pijimonae tatsi tomara we-iyiya xua iruru pin bicheitomonae napona. Iruru bapoxonae pebin pon pewun Bartimeo, pon Timeo pexanto tatsi, bapon namtotha eca. ⁴⁷ Poxonae Bartimeo

jume tane xua juinya Jesús imoxoyo pona, pon Nazaret tomarapin, bapoxonae bapon Bartimeo tamropata pitaba xua wawaya jeye:

—¿Jesús, David pia pemomoxi susato jiwanapim, ponxaem Nacom necaitapetsim neyabara najüntu coyene xeinare jinya tana neyawenaenexam! jei.

⁴⁸ Pinmonae jume matawenta bapontha xua moya peecaenexa. Ichitha bapon equeicha bichocono jume daunweya wawai, jeye:

—¿Jesús, David pia pemomoxi susato jiwanapim, ponxaem Nacom Necaitapetsim neyabara najüntu coyene xeinare jinya tana neyawenaenexam tsane! jei bapon.

⁴⁹ Bapoxonae Jesús naruntaba yawa namchi pijimonaetha, jeye:

—Maisa painta wabare, jei Jesús.

Bapoxonae pon peitata nacütsin wabatsi, yawa barapomonae jeye bapontha:

—Bara najüntu tsacatabare, jopa amurande. Nontaponare, aunxuae cawaba, jei barapomonae.

⁵⁰ Bapoxonae pon peitata nacütsin pia penaüyapatsiwa xubiriwa, yawa jirawuna. Bapoxonae pona Jestustha. ⁵¹ Jesús yainyaba bapontha, jeye:

—¿Eta xua jinya tacata exanaetsi? jei.

Bapon Jesús jume notatsi, jeye:

—Pon jiwi Pecuidubim, benecotsin cuinaya, jei.

⁵² Jesús jume nota bapontha, jeye:

—Bara moya ponde. Bara bayatha caitacuere xanepana exanatsi, tana neyabara jume cowantsixaemxae xua bara tana neitacupaewa xua tacayawenaewatsi, jei Jesús.

Bapoxonae caena nainya pon peitata nacütsin necotaxuba. Bapoxonae bapon Jesús puna poinchi namtotha.

11

Meje yabara poxonae Jesús Jerusalén tomaratha patopa (Mt 21.1-11; Lc 19.28-40; Jn 12.12-19)

¹ Poxonae Jesús, iru pijimonaetha tatsi muxu pepatsi Jerusalén tomaratha copiya pata Betfagé tomaratha yawa Betania tomaratha, po tomara xua nacacuita ecabe. Barapo tomarabe cuariya demxuwa eca, po demxuwa pewun Olivowa, xua baxota olivo naein peumenaexae. Bapoxonae Jesús nacueyatabe poyobe itoroba ponbe pijimonaetha tatsi jiwana. ² Jesús barai baponbetha, jeye:

—Paponarebe, po tomara painya itabaraya equiya. Poxonae papatopaenamebe barapo tomaratha, bapoxonae pacaxinaenamebe burro pon penun pon pequetanotsin, po burro ichamonae jopa tsijuma enaeyo. Barapo burro paisanaxorebe. Bapoxonae payama carenandebe. ³ Icha ichun paca yainyabiya jeye: ‘¿Eta xua payama isanaxubamebe burro?’ paca jei, nexata pajandebe: ‘Pon jiwi Pecanamataxeinaein bepa pata yama caiyaeinjei tsipei pinae nantawenona. Bexa nainya equeicha payama carenaein’, pajandebe, jei Jesús.

⁴ Barapomonae ponarucupa. Yawa caxinarucupa barapo burro pebto, pon quietanota imoxoyo bo coibototha xua aisowa beya namtotha. Bapoxonae barapoyobe yama isanaxubabe barapo burro.

⁵ Pomonae baxota jinompa barapomonae baponbe yainyabatsi jeye:

—¿Eta xua paexanamebe? ¿Eta xua burro paisanaxubamebe? jeichichibe baponbe.

⁶ Bara baraponbe jume notabe barapomonaetha pocotsiwa bayatha Jesús pe-jume itorobixae. Bara baraponbe tacopatatsibe xua bara peyama isanaxubinexabe.

⁷ Bapoxonae baponbe tayama cayabe burro Jesús tayama cayatsibe. Bapoxonae pia paparuwan tsijuma jebicabe, yawa Jesús tsijuma equeica. ⁸ Bapoxonae jiwi pinmonae namtotha yerababa jejabapoinya pia paparuwan. Ichamonae peaxu po axu be coichaxu axu ucuboba. Barapo axu namtotha jebapoinya xua Jesús ainya cui exanatsi.

⁹ Pomonae Jesús tsiwana nanta cajinjincatsi, iru pomonae Jesús peputha tajinjincatsi, barapomonae Jesús yabara wawaya jeichichi:

—¡Pai jayana, maisa Jesús pon jiwi itorobiya pia pepa peewatsinchi maisa wūnae, bapon patopa Nacom peitorobixae! ¹⁰ ¡Bara wūnae jaintatsi pon patopeica xua jiwi peitorobinexatsi, icha David ichi pon wamo susatopin poxonae bapon Israel nacua itorobiya ewata! ¡Maisa Nacom bichocono wūnae jaintatsi pon athabeicha eca! jei barapomona.

¹¹ Bara bapoxonae Jesús patopa Jerusalén tomaratha, yawa joniya Nacom pin pia botha tatsi. Jesús naita cui wetaba xua tane daxita pocotsiwa jiwi exana barapo botha. Bapoxonae equeicha Jesús pijimonae barū ponataba Betania tomara beya, poyobe xua doce poyobe, tsipei bayatha tabopiya.

Meje yabara poxonae Jesús biatane higuera nae xua jopa penacoichixae

(Mt 21.18-19)

¹² Icha matabitha baya, poxonae Jesús irū pijimonae tatsi Betania tomara weya pona, Jesús jainpagona. ¹³ Tajū weya Jesús tane higuera nae xua noxu tsuncuae. Jesús higuera nae beya pona piyain petaenexa pethei, ichitha saya noxu tane, tsipei cataunxuae dapō dapaē aibi po dapaetha higuera nae nacoita. ¹⁴ Bapoxonae Jesús barai higuera nae, jeye: —Bapana jopa equeicha nacoichim tsane, xua jiwi jopa necathei xaenexa, jei Jesús. Jesús pijimonae jume tainchi baxua poxonae higuera nae barai.

Meje yabara poxonae Jesús aisowa benapuna torobabiya Nacom pin pia botha pomonaē pecaenaetsiwi

(Mt 21.12-17; Lc 19.45-48; Jn 2.13-22)

¹⁵ Bapoxonae pirapaeyo Jesús pijimonae barū patopa Jerusalén tomaratha. Jesús joniya Nacom pin pia botha tatsi. Bapoxonae Jesús aisowa benapuna torobabiya barapo Nacom pin pia bo weya pomonaē pecaenaeta jiwi baxota. Jesús tabū tayebiya bebai iratha pocotsiwa pexaethopaewa po pexaethopawantha nantiya nacatsiba paratixi, yawa xua irurū baxota topibo caenaeta. ¹⁶ Jesús jopa copatsiyo xua jiwi piawan capona Nacom pin pia bo tatsi tutiya iya. ¹⁷ Jesús cuiduba barapomonaē, jeye:

—Nacom Pejume Diwesitha jeye: ‘Tabo apara po botha xua daxita nacuanpiwi tanetsipaebinecha tsaibi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia mūthū tutu pacana exaname, ichaxota pijunuwi nantiyabeibathopa. Tsipei baxota panacaetutame saya ɱ xua painya necaibinecham tsane paratixi pomonaetha pomonaē xua pateiba xua Nacom petsipaebeibinechatsi, jei Jesús.

¹⁸ Sacerdotemonaē pia pentacaponawē tatsi, irurū pomonaē jiwi pecuidubiwi Moisés pia peitorobi coyene tatsi, daxita barapomonaē jume tane xua Jesús paeba. Bapoxonaē barapomonaē tamropata notarɯɯpa xua jeita po coyenewatha Jesús bexubinchi. Barapomonaē bequein ichichipa Jesús bexotsi ichitha baxua jopa exanaeyo tsipei barapomonaē junuwa xua jiwi anaepana xua barapo sacerdotemonaē pia pentacaponawē tatsi pecasebiwatsi irūno xua pecasebiwatsi pomonaē jiwi pecuidubiwi Moisés pia peitorobi coyene. Tsipei barapomonaē jiwi cunuwatsi, xua daxita jiwi peichichipaexae nawita pocotsiwa Jesús cuiduba. ¹⁹ Poxonaē xometo iriya ecanaicha bapoxonaē Jesús pijimonaē barū ponataba barapo tomara weya.

Meje yabara poxonaē higuera nae yɯnuncua

(Mt 21.20-22)

²⁰ Baya poxonaē pentha tsina, Jesús pijimonaē baxoyo barū ecapona yawa tane xua higuera nae yɯnuncua xua daxita petabaca opina wetsina. ²¹ Bapoxonaē Pedro yabara nanta xeinataba xua mexuae Jesús biatane higuera nae. Bapoxonaē jeye Jesthā:

—Pon jiwi Necuidubim, taema po higuera nae mexuae biataneme, bayatha yɯnuncua, jei Pedro.

²² Bapoxonaē Jesús jeye pijimonaetha:

—Paxam bichocono pajume cowunde Nacom. ²³ Bara xainyeya paca tsipaebatsi. Icha xanepanaeya pana neyabara jume cowantame xua Nacom painya nepaca cayawenaewa xuano xua jopa ainya ɯnthɯton paxeinaem, bara paca itacɯpaena xua painya nepaebiwa

icha ichin xua cana exanan higuera nae. Matautano bara paca itacupaena xua painya nejeiwa uruto beya, xua pajam: ‘Uruto, natsixitabare, mar mene beya jopare’, xua painya nejeiwa. Bapoxonae bara baxua jopa bayathiyo tsane. ²⁴ Daxita xua xuan pocotsiwan Nacom beya pawucame, icha bara xanepanaeya pajume cowuntsiya wucame, bara Nacom paca catsibina baxuan. ²⁵ Poxonae Nacomtha patsipaebame, icha ichun abe pacata exana, copiya payabara juntemainare bapon pocotsiwa pacata abe exana, xua xuya beta painya necayabara canantaxeinaenexa. Barichi Nacom pon peitabocotha eca xuya paca yabara juntemainaena pocotsiwa abe painya neexanae cuiru coyenein paexaname. ²⁶ Ichitha icha jopa payabara juntemainaem ichun pocotsiwa pacata abe exana, barichi Nacom pon itabocotha eca, jopa paca yabara juntemainae tsane pocotsiwa abe painya neexanae cuiru coyenein paexaname, jei Jesús.

Meje yabara xua Jesús pia peitorobi coyenewa xeina
(Mt 21.23-27; Lc 20.1-8)

²⁷ Bapoxonae Jesús, iru pijimonae tatsi caibe nawibiya Jerusalén tomara beya. Poxonae Jesús Nacom pin pia botha joniya xua yawa tututha iya ponano, bapoxonae sacerdotemonae pia pentacaponae tatsi, iru pomonae jiwi pecuidubiwi Moisés pia peitorobi coyene tatsi iru pitiri jiwi, barapomonae Jesús imoxoyo caquita umenarucupatsi.

²⁸ Barapomonae Jesús yainyabatsi, jeichichi:

—¿Eta po peayapusu itorobi coyenewatha cuidubame baxuan? ¿Jintam cacata barapo peayapusu itorobi coyenewa? jei barapomonae.

²⁹ Jesús jume nota barapomonae, jeye:

—Xan iruru tha barichichi paca yainyabinchi. Icha beta pana nejume notsiname, bapoxonae xuya yabara paca tsipaebinchi xua po peayapusu itorobi coyeneyatha exanan baxuan. ³⁰ ¿Jintam Juan cui itorobatsi xua bautisaba? ¿Metha bara Nacom cui itoroba jampa? ¿Metha bara jiwi cui itoroba jampa? Pana nejume nore, jei Jesús.

³¹ Nexata daxita barapomonae caemonae najume matsontsonoba, najei: “¿Eta xua metha jei tsainchi? Icha jeichipaetsi: ‘Juan cui itorobatsi Nacom, xua pebautisabiwa jiwi’, metha naca jeichipae: ‘¿Eta xua metha nexata jopa pajume cowuntsim Juan?’ metha naca jeichipae Jesús. ³² Jiwi cui cunuwinchi icha jei tsainchi: ‘Juan cui itorobatsi jiwi, xua bautisaba’, icha jei tsainchi. Metha bapoxonae jiwi naca casebichipa anaya”, najei barapomonae. Barapomonae jiwi cunuwatsi tsipei daxita jiwi Juan yabara jume cowantatsi, xua apara bapon Nacom pia peitorobi jume tatsi pepaebi jiton. ³³ Bapoxonae barapomonae namchi Jesús beya, jeye:

—Canta jopa payaputaeyino, jei barapomonae.

Nexata Jesús barai barapomonaetha, jeye:

—Nexata barichin tsane jopa yabara paca tsipaebi tsainchi po peayapusu itorobi coyeneyatha exanan xua daxita taexanaewan, jei Jesús.

12

Meje yabara poxonae Jesús paeba pecayabara juta pepaebi diwesiyo pomonae xua abe exana, pomonae petayapucaenaewi uva pabi

(Mt 21.33-46; Lc 20.9-19)

¹ Bapoxonae Jesús tamropata pitaba xua cuiduba jiwitha pecayabara juta pepaebi diwesiyotha, jeye: “Matha iruru pebin pin uva pabi xeina. Bapon uba po unbo pewun uva cuei unbo. Yawa yapucurarata barapo pia uva pabi ibowantha xua jopa pejojon-denaenexa ichamonae barapo pabitha. Yawano baxota ibo fetu exana, xua barapo ibo fetotha pecubinexa uva cuei. Matautano baxota exananota bo, po bo bichocono taucha xua baxota pebin bara wenecotequeica uva pabi. Bapoxonae bapon itoroba pomonae pia uva pabi pia petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona. ² Barapo matabi tsuxubi, po matabitha uva cuei naweta. Bapoxonae barapo mataqueitha

pomonaē pabi petayapucaenaewi jiwana itapeta nota xua penawetsiwa. Bapoxonaē pon uva pabi pexeinaein, bapon pomonaē petanacuichiwichi jiwana itoroba, xua petawucaenexa tsainchi uva cuei pomonaē beya pomonaē pabi petayapucaenaewichi. ³ Ichitha barapomonaē pomonaē uva pabi petayapucaenaewi barapomonaē waetaba pon copiya patopa, pon uva pabi pexeinaein itoroba. Yawa bapon butsino. Bapoxonaē bapon caibe cobesa itorobiyatsi. ⁴ Pon uva pabi pexeinaein equeicha itoroba ichan pon pia petanacuichinchi. Barichiru bapon ibotontha matasipa cuinbabatsi, yawa abe jumetha biatainchi. ⁵ Equeicha pon uva pabi pexeinaein itoroba ichan pon pia petanacuichinchi. Barichiru bapon bexotsiru. Equeicha ichamonaē itorobatsi. Ichamonaē butsi, iru ichamonaē jutebatsi.

⁶ “Cataunxuae awiya bapon pexanto tanacopatatsi, pon pexanto compa tatsi, po pexanto bichocono antobe. Matapainya bapon pexanto cotacaya itoroba bara beya. Bapon nanta xeinaeya jeye: ‘Metha barapomonaē taxanto inta yabara baru cui itura jinaeinchi’, jei coxiyan. ⁷ Dapo jumetha pomonaē uva pabi petayapucaenaewi poxonaē bapon tainchi, barapomonaē najei: ‘Apara bapon paxa copiniwa pichina. Daxota bapon bu bexotsi xua xainya xeinatsi barapo uva pabi’, najei barapomonaē. ⁸ Bapoxonaē barapomonaē pon uva pabi pexeinaein pexanto tatsi tawaetabatsi. Poxonaē bexotsi bapoxonaē petupaēin aisowa beya xotsi uva pabi pecuariya beya”, jei Jesús.

⁹ Bapoxonaē Jesús yainyaba, jeye: “Pon uva pabi pexeinaein, zeta be cana ichi tsane pomonaetha pomonaē barapo uva pabi pia petayapucaenaewichi? Apara bapon patopaena xua pejutebinexa tsane pomonaē uva pabi pia petayapucaenaewichi. Bapoxonaē barapo uva pabi catsina ichamonaetha xua petayapucaenaenexa tsainchi barapo uva pabi”, jei Jesús.

¹⁰⁻¹¹ Equeicha Jesús nayabara paeba barapomonaetha, jeye: “¡Paxam bara bayatha payorobameba Nacom Pejume Diwesi! Barapo diwesitha neyabara caunuta poxonaē iboto yabara paeba, jeye:

‘Pebiwi pomonaē ibo bon peacabiwi, barapo pebiwi xuba po iboto tabu caboca,
po iboto peainya cui iboto.
Ichitha Nacom itapeta barapo iboto xua petabu cabocaenexa peainya cui ibotoxae.
Waxainchi nanta xeinatsi jeichichi: Maisa pocotsiwa Nacom exana naca tsita xanepana,
jeichichi’, jei Nacom Pejume Diwesitha”,
jei Jesús.

¹² Poxonaē bapomonaē jume tane xua Jesús paeba, Jesús muxu pewaetabichi. Tsipei bapomonaē yaputane xua apara barapomonaē yabara paebatsi poxonaē Jesús cueicueijei barapo pecayabara juta pepaebi diwesiyo. Daxota Jesús casebatsi. Tsipei barapomonaē jiwi cunuwatsi, daxota Jesús jopa waetabichi. Bapoxonaē bara saya ponarucpa.

Meje yabara poxonaē Jesús yabara cuiduba paratixi matoma po paratixi jiwi bewa catsibina pontha pon romanomonaē itorobiya pia pepa peewatsinchi

(Mt 22.15-22; Lc 20.20-26)

¹³ Bapoxonaē pirapaeyo Jesús pia xainya betaitorobiyatsi fariseomonaē jiwana, iruru pomonaē Herodes pia pepuna jinompaewichi jiwana tatsi, xua daxita barapomonaē piraichi Jesús petsipaēbinexatsi xua Jesús xuya abeya pejume notsinexa. ¹⁴ Bara barapomonaē Jesús pia xantha tatsi tapatatsi, jeye Jesththa:

—Pon jiwi Necuidubim. Bara payaputan xua bara jume xainyeya tsipaebame jiwi, xua matautano jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonaē cuidubame poxonaē bequein jiwi jopa ichichipaeyo baxua, tsipei xam daxita jiwi bara catsita najupa. Xam jume xainyeya cuidubeibame jiwi Nacom pia peitorobi coyenewa. Incane yabara pana netsipaebare xua nanta xeiname, xuaje:

¿Metha bara Nacom pia peitorobi coyene naca itoroba xua waxainchi paratixi catsibinchi pon romanomona itorobiya pia pepa peewatsinchi xua wanaca itorobixae bapon bequein bara bapon pon penanapaincha poponaein xua icha nacua werena pona? Icha jopa tsipae, ¿metha daxua abe tsipae? jeichichi Jesús barapomona pomona fariseomona itoroba.

¹⁵ Daichitha Jesús yaputane, xua barapomona itara mexeya xanepanaeya pepaebi jiwi ichitha abeya peexanae jiwi. Jesús jeye:

—¿Eta pocotsiwa metha painya daichi pana nejüntu coyene jujutame? Moya painta xawena paratiyo, tha taetsi, jei Jesús.

¹⁶ Bapoxonae barapomona barapo paratiyo Jesús tacapoinchi. Poxonae Jesús tane barapo paratiyo, bapoxonae Jesús yainyaba barapomona, jeye:

—¿Jintam pejumopere? ¿Yawano jintam wun ducua? jei Jesús.

Barapomona Jesús jume notatsi, jeye:

—Apara romanomona itorobiya pia pepa peewatsinchi, jei barapomona.

¹⁷ Jesús barai barapomona, jeye:

—Bara nexata romanomona itorobiya pia pepa peewatsinchi pacare pocotsiwa xua bapon piawaxae tatsi. Matautano bara Nacom pacare xua baxua iru piawaxae tatsi, jei Jesús.

Barapomona yabara najüntu cui coyene cabenaeca pocotsiwa xua Jesús xanepanaeya beta jume nota.

Meje yabara poxonae Jesús yabara yainyabatsi po coyene xua equeicha asu pomona pewerapeibiwi

(Mt 22.23-33; Lc 20.27-40)

¹⁸ Bapoxonae saduceomona jiwana pata Jesús pia xantha tatsi xua Jesús piraichi petsipaebinexatsi. Saduceomona barompaya pia pecuidubi coyenewa xeina xua pinae pomona pewerapeibiwi equeicha jopa asu tsaibiyo. Barapo pecuidubi coyenewa jopa jupaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxonae werapa. Daxota barapomona Jesús tsipaebatsi, jeye:

¹⁹ —Pon jiwi Pecuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa xuya pentapin pecoutha coseuri pichina xua bapoxonae pentapin pecoutha pexeinaenexa tsane pexui’, jei Moisés. ²⁰ Barichi, matha iru cae peweicho caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. ²¹ Pon cotacaya naexana xuya pentapin coseuri pita xua bapoxonae pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. Bapoxonae ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo.

²² Daxita barapo siete poyobe cuenta nanapentapona barapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. Bapoxonae matapainya iru bapowa tupa. ²³ Xam, Jesús, ba paebame, ba jam: ‘Matacabi jopaena po matacabitha Nacom asu exanaena, xua jiwi asu exanaeinchi muthun wetsina’, ba jam. Poxonae barapo matacabi jopaena xua daxita jiwi asu jujuinaena, barapo matacabitha jintam metha bapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe, caepi jiwi cuenta nanapentapona barapowa, jei saduceomona.

²⁴ Bapoxonae Jesús jume nota barapomona, jeye:

—Paxam apara catsawiya pana nejume notame, tsipei jopa beta payaputaem xua Nacom Pejume Diwesitha payabara yorobame baxua. Matautano jopa payaputaem Nacom pia peayapusu itorobi coyenewa tatsi. ²⁵ Poxonae petupaewi asu jujuinaena jopa jitha eenaponae tsane. Yawa barapomona pexantixi jopa jitha cuarebaponae tsane. Tsipei barapomona barichi tsane icha be matatsunpiwimona ichi, po matatsunpiwi Nacom pia nacuatheicha jinompa, xua po matatsunpiwi jopa jitha enaeyo. ²⁶ Paxam bequein bara bayatha payorobame pocotsiwa Nacom yabara namchi pejume diwesitha

xua pomonae equeicha asu jujuina pomonae pewerapebiwi. Barapo diwesitha Nacom cueicueijei ichaxota xua poxonae po naewa taxuncua, Nacom jeye: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. ²⁷ Baxua Nacom paeba, tsipei Abraham, iru Isaac, iru Jacob pewerapaewi anoxuae equeicha caewa asu jinompa, Nacom pia nacuatheicha tatsi. Pomonae pewerapaewi, pomonae caewa equeicha asu jopa pejinompaewi, barapomonae jopa pia Nacom tatsi, pon itabocotha eca. Saya jame meisa pomonae pewerapaewi caewa equeicha asu pejinompaewi, barapomonae jame pia Nacom tatsi, pon itabocotha eca. Daxota paxam catsawa papaebame, jei Jesús.

Meje yabara poxonae Jesús yabara cuiduba po peitorobi cui coyene pepa peainya cui coyenewa (Mt 22.34-40)

²⁸ Caein pon jiwanamonaepin pomonae jiwi pecuidubiwi Moisés pia peitorobi coyene tatsi, bapon jume tane xua Jesús iru saduceomonae najume matsontsonobiya paeba. Matautano bapon jume tane xua Jesús xanepanaeya betiya jume nota barapomonaetha. Daxota bapon yainyaba Jesustha, jeye:

—¿Eta po peitorobi coyene pepa peainya cui coyenewara, po peitorobi coyene beyacaincha icha peitorobi coyene? jei bapon.

²⁹ Jesús jume nota bapontha, jeye:

—Po peitorobi cui coyenewa pepa peainya cui coyenewa jeye: ‘Paxam Israel nacua-monaepiwi pam pajume taema xuaje meje: Pon jiwi Pecanamataxeinaein bara compa pepa Pata Nacom, icha Nacom ajibi. ³⁰ Antobeinde Jinya Necanamataxeinaein bapon Nacom xua daxita nejuntu coyene wetsina, matautano xua daxita jinya nepoponae coyenewatha, matautano xua daxita nenanta xeinaewatha nentasipatha, matautano daxita nedaunwei coyenewatham’, jei barapo peitorobi coyenewatha, po peitorobi coyenewa pepa peainya cui coyenewa. ³¹ Po peitorobi coyene cotacaya itoroba ichaxotaba ‘dos’ jei, barapo peitorobi coyene be jume jupa po peitorobi coyene copiya ducua. Iruru barapo peitorobi coyenewatha jeye: ‘Antobeinde jinya necatsicuarabu ecaein icha ichim xua jinya coutha naantobem’, jei barapo peitorobi coyenewatha. Icha peitorobi coyenewa aibi po peitorobi coyene peainya cui coyenewa, po peitorobi coyenewa xua beyacaincha po peitorobi coyenewe, jei Jesús.

³² Bapoxonae caein jiwanamonaepin pomonae jiwi pecuidubiwi Moisés pia peitorobi coyene tatsi, bapon jeye Jesustha:

—Bara beta paebame pocotsiwa aunxuae paebame ponxaem jiwi Necuidubim. Bara xainyeya paebame xua pinae pepa Nacom bara compa popona xua icha pepa Nacom ajibi. ³³ Matautano bara xainyeya paebame xua pinae bewa Nacom antobetsi xua daxita wajuntu coyene wetsina, matautano xua daxita wajinompae coyenewatha, matautano xua daxita wananta xeinaewatha wantasipantha, matautano daxita wadaunwei coyenewantha. Matautano bara xainyeya paebame xua wanacatsicuarabu enaewi bewa pinae antobe tsainchi icha ichichi xua wacoutha naantobetsi. Baraxua jame bichocono peainya cui coyenein pocotsiwa bewa exanaetsi, beyacaincha xua duwein ompin tautatsi yawa xua ichawan tautatsi xua watuxusi exanaenexa Nacom nexa, jei bapon. ³⁴ Poxonae Jesús jume tane xua bapon beta jume nota, Jesús jeye:

—Bara saya tsiwiyo cata seica xua jinya nejume cowuntsinexa xua nenantauntsinexa Nacom pon jiwi itorobiya pia pepa Peewatsinchi, jei Jesús.

Bapoxonae nama dapon ajibi xua pon Jesús peyainyabinexa tsainchi.

Meje yabara poxonae Jesús nayabara jei: “Mesías, ¿jintam pia pemomoxi susato jiwanapin tatsira?” jei

(Mt 22.41-46; Lc 20.41-44)

³⁵ Bapoxonae Jesús yabara cuiduba Nacom pin pia botha tatsi, xua pon Mesías baraichi xua nayabara paeba Jesús, jeye:

—¿Eta pocotsiwa metha pomonae jiwi pecuidubiwi Moisés pia peitorobi coyene tatsi paeba xua pinae Mesías bapon David pia pemomoxi susato jiwanapin tatsi? ³⁶ Nacom pia Pejumope tñaxu tatsi David cueicueijejei exanatsi. David jeye:

‘Nacom pon Pecanamataxeinaein jiwi,
Tanecanamataxeinaein baraichi pon Mesías,
jeichichi: Tacoxa werena ecare, beya abu
tsane poxonae necaaitafaetabi jiwi pia
pecanamataxeinaeinchi tatsi caexanaeinchi, jei
Nacom pia Pejumope tñaxu tatsi’, jei David.

³⁷ Icha David Mesías yabara jei, ‘Bapon Mesías Tanecanamataxeinaein’, jei, ¿eta xua metha tsipae xua Mesías apara David pia pemomoxi susato jiwanapin tatsi? jei Jesús.

Barapo pin bicheito bichocono tsimuxu wñaetsi pocotsiwa Jesús cueicueijejei.

Meje yabara poxonae Jesús muxuweta jiwi xua pomonae jiwi pecuidubiwi Moisés pia peitorobi coyene tatsi barapomonae pecuiyainwa tatsi

(Mt 23.1-36; Lc 11.37-54; 20.45-47)

³⁸ Poxonae Jesús cuiduba jiwitha, jeye: “Dota pam, dota pomonae jiwi pecuidubiwi Moisés pia peitorobi coyene tatsi. Barapomonae pia pecuidubi coyenewan tatsi pecuiyainwa pande. Jopa paexanaeinde icha bapomonae ichi xua barapomonae bichocono ichichipa xua penama xatabiwa po paparuan apipiya deca xua be pomonae peainya cui jiwi penaexanaewi naexana. Barapomonae bichocono ichichipa xua jiwi namtontha jacobebina barapomonaetha xua jiwi pebaru cui itura jinebinexa barapomonae. ³⁹ Barapomonae bichocono ichichipa xua nanta caeneiba judiomonae pia penacaetutsi bontha tatsi ichaxota ba enathopeiba pomonae peainya cui jiwi penaexanaewi. Matautano barapomonae bichocono ichichipa xua eneiba ichaxota ba eneiba pomonae peainya cui jiwimonae poxonae pexaewan tsinacaetuteiba penabaneibinexa tsane. ⁴⁰ Matautano barapomonae powaxi pecuenta werapaewaxichi piseurixi barapowaxi cueranta enatsi pia bon. Barapomonae naemata jopa cuinaya najume copababeibiyo poxonae tsipaebeiba Nacom. Barapomonae bichocono peraxa jubebinchipoxonae po mataqueitha Nacom jiwi yabara paebina penatsicuentisiwa xua abe peexanaexae Nacomtha. Barapomonae atene tsane beyacaincha poxonae ichamonae atene exanaeinchi xua jopa pejume cowantsixaetsi Nacom”, jei Jesús.

Meje yabara poxonae Jesús yabara paeba xua petsiriwa paratiyobe cata Nacomtha, powa pecuenta tupaewatsi piseuri

(Lc 21.1-4)

⁴¹ Poxonae Jesús eca Nacom pin pia botha tatsi xua peitabara weya, xua ichaxota jiwi jeyeiba paratixi Nacom nexa, bapoxonae Jesús tane xua pinmonae pomonae copei pexeinaewi paratixi nawita jeya ichaxota jiwi jeyeiba paratixi Nacom nexa. ⁴² Barapoxonaeru yabuyo patopa, powa pecuenta tupaewatsi piseuri. Barapowa bichocono peacopebiwayo. Bapowa jeca ainya pecacomocae paratiyobe Nacom nexa. Barapo paratiyobe tsiqui paratiyobe. ⁴³ Bapoxonae Jesús pijimonae waba, yawa jeye barapomonaetha:

—Bara xainyeya paca tsipaebatsi. Barapo yabuyo, powa pecuenta tupaewatsi piseuri, bapowa peacopebiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonae daxita pomonae xua jeya xua Nacom nexa. ⁴⁴ Daxita barapomonae jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca pocotsiwa bequein canantawenona xua pepoponaewa tsane bequein bichocono peacopebiwayo, jei Jesús pijimonaetha.

13

Meje yabara poxonae Jesús yabara paeba xua ichamonae abe cana exanaena Nacom pin pia bo tatsi

(Mt 24.1-2; Lc 21.5-6)

¹ Poxonae Jesús Nacom pin pia bo wejoniya, bapoxonae caein Jesús pijimonaе jiwana tatsi, Jesús tsipaebatsi jeichi:

—¡Pon jiwi Necuidubim, taema maisa pexeinya iboton, yawa pexeinya ibo bo! jei bapon.

² Ichitha Jesús jume nota bapontha, jeye:

—Aunxuae pataebename barapo iboton yawa xua pexeinya bon. Apra jopa cae ibotiyo nacopatuncuae tsane icha iboto peumatha. Daxita abe tsane, jei Jesús.

Meje yabara poxonae Jesús yabara paeba xua copiya matha pewunaeya exanaena petsita itutsi coyenewa poxonae daxita weraweracaenaba

(Mt 24.3-28; Lc 21.7-24; 17.22-24)

³ Bapoxonae Jesús pijimonaе baru pona demxuwatheicha, po demxuwa pewan demxu Olivowa tsipei baxota umena olivo naein. Poxonae Jesús ecopiya demxuwatheicha, po demxuwa Nacom pin pia bo itama tayecatsi, bapoxonae Jesús pijimonaе tatsi Pedro, iru Santiago iru Juan, iru Andrés, barapoyobe Jesús namicha tsipaebatsi. ⁴ Barapoyobe jeye:

—Paichichipan xua xam tapata netsipaebiwam tsane ¿eta poxonae metha ichamonae baxua exanaena poxonae abe cana exanaena Nacom pin pia bo tatsi? ¿Eta pocotsiwa tsane metha xua pewunaeya tsita itapeinya xeinaena po coyene xua poxonae imoxoyo daxita weraweracaenaba? jei Jesús pijimonaе tatsi.

⁵ Jesús jume nota barapomonaetha, jeye: “Dota pam, bu ichamonae naerabiya paca muxu tsipaeba, xua daxota abe paexanaetsipame. ⁶ Tsipei tsana patsina ayei bicheito jiwi pomonaе natsicotaena icha be xan ichin. Barapomonaе jei tsane: ‘Apra xan Mesías’, jei tsane. Poxonae barapomonaе muxutorobiya paebina, bapoxonae pinmonae jume cowuntsina.

⁷ “Pajume taename xua jiwi juinya nabenoutsina xote, yawa xua juinya iruru nabenoutsina icha ira beya. Daichitha jopa pajunuwinde, tsipei baxua pewunaeya matha copiya tsane. Daichitha cataunxuae dapo matacabi aichica tsane xua poxonae daxita weraweracaenaba yatsicaewa. ⁸ Cae nacuapiwi iru icha nacuapiwino, barapo ainya nacuapiwibe nabenoutsina. Matautano iru pon nacua peewatsin iru ichandu pon icha nacua peewatsin, baponbe iru nantiya nabenabe. Matautano ainya nacuantha ira jijiyatsina. Matautano ainya nacuantha jainbo nacua tsane tsipei pin mayayo tsane. Baxua copiya matha tsane xua jiwi atene tsoponae tsane bichocono xua beya jopa nama juniya tsane.

⁹ “Ichitha dota pam, tsipei poxonae baxua pewunaeya tsane jiwi paca teiquebina painya nepaca caenaetsinexa pomonaetha pomonaе tomaran pentacaponae. Matautano paca cuainchina judiomonaе pia penacaetutsi bontha tatsi. Yawa paca caponaena nacua peewatsiwi peitabaratha tatsi, painya tana nejume cowuntsixaemxae. Yawa paca caponaena pentacaponae peitabaratha tatsi pomonaе iru itoroba jiwitha xua pon nacua peewatsin nexa painya tana nejume cowuntsixaemxae. Barapoxonaе bara paca cui itacupaena xua barapomonaetha tapanayabara paebiwam pocotsiwa bayatha paca tsita exanatsi. ¹⁰ Barapo pecapanenebiyae diwesi, tamonaе bewa paebinoutsina daxita nacuanpiwitha xua poxonae pewunaeya tsane xua daxita weraweracaenaba. ¹¹ Poxonae barapomonaе paca caponaena pomonaetha pomonaе tomara pecanamataxeinaewi xua pia painya nepaca cayabara paebinexa tsane xua painya nenatsicuentsiwa xua abe painya neexanaexae bapoxonaе jopa patsiwanaya junuwiya najuntu coyene exabinde xua painya netsipaebiwa tsane barapomonaе. Paxam jame papaebare pocotsiwa xua caena bapoxonaе Nacom cueicueijeji paca exanaena. Bapoxonaе po jume pacueicueijam tsane apra jopa poxoru painya coya paichichipaem, apra jame Nacom pia Pejumope tunaxu tatsi baxua paca cueicueijeji exanaena. ¹² Jiwi barompaya pia peweicho jiwi

caenaetsina ichamonaetha xua pejutebinexa tsainchi. Irurū coxiyeiwi ichamonaetha caenaetsina pia pexui. Irū pexui paxa jiwi caenaetsina ichamonaetha pejutebinexa tsainchi. ¹³ Daxita nacuanpiwi paca casebina painya tana nejume cowantsixaemxae. Ichitha pomonae awiya antuyapusya nejume cowantsiya jinompaena xua beya yacuiya werapaeya othopaena poxonae bequein abe taexanatsi ichamonae barapomonae jame Nacom napaeba cana exanaena.

¹⁴ “Daniel pon Nacom peitorobi jume pepaebin, bapon caena bayatha yabara tsiwanaya muxu dutsiya tina pocotsiwa xua bichocono abe, pocotsiwa xua weraweraca cana exana. Pataename pocotsiwa xua ichūn Nacom pin pia bo tututha exananotsina, pocotsiwa jopa bewa notsi baxota, pocotsiwa Daniel bayatha yabara paeba. Bapoxonae payaputaename xua bara imoxoyo matabi jopaenaba poxonae daxita weraweracaenaba”, jei Jesús. (Xan Marcos paca baraichi: “Pon yorobina po jume diwesi tinan moya jume naitaewatsina pia peyaputaenexa tsane”, paca jeichi.) Equeicha Jesús jeye: “Poxonae barapocotsiwa pataename bapoxonae pomonae Judea nacuatha jinompa, barapomonae bewa demxuan berucupiyaena. ¹⁵ Barapo matabitha pon bo matatupatha uncua, bapon jopa bewa botha jonyae tsane xua penotsiwa tsane pocotsiwa tabobeinchi bomuxu tututha. Saya jame bewa nainya benaetsiricuaena. ¹⁶ Irurū pon pabitha popona, bapon jopa bewa caibeya ponae tsane botha xua penotsiwa tsane pia paparuwan. Saya jame bewa nainya benaetsiricuaena. ¹⁷ ¡Pai yabuxi tsobenae powaxi pexui bupana taenatsi barapo matabitha! ¡Pai irū powaxi pexui isaina barapowaxi tsobenaerū! Tsipei acabe tsobenae tsane pexui. ¹⁸ Poxonae pewnaeya tsane baxua Nacom pawucare xua jopa painya nerucupaewa tsane poxonae awūbo peaquexae bichocono. ¹⁹ Tsipei barapo matabintha jiwi bichocono pin peraxa exanaeinchi. Atene tsane beyacaincha poxonae jiwi atene tsaihi poxonae Nacom aena nacua exana, xua equeicha nama bichocono pin peraxa tsane. Equeicha bexa bapoxonae bapana jopa baxua exanae tsane poxonae bichocono jiwi pin peraxa. ²⁰ Icha Nacom jopa be caentacabiyobe exanaetsipae metha dapomonae ajibi tsipae pomonae panenebiya barapo peatene coyenewa weya. Daichitha Nacom be caentacabiyobe exanaena peantobexae pijimonae, pomonae pia peitapetsiwixae tatsi.

²¹ “Bapoxonae icha ichūn paca jei: ‘Pataema bapon apara Mesías uncue pon Nacom itorobica’, paca jei, irū icha ichūn paca jei: ‘Pataema bapon Mesías xota uncuiye’, paca jei, barapo jumein jopa pajume cowantsinde. ²² Tsipei pomonae pemuxitorobi jiwi tsana patsina. Barapomonae natsicotaena icha be xan ichin ponxaein Mesías. Matautano barapomonae natsicotaena icha be pomonae Nacom peitorobi jume pepaebiwi ichi tsane. Barapomonae pexeinya petsita itutsi coyenewan exanaena peitabocotha, po irathe tsaneno xua jiwi pemuxitorobinexa tsainchi xua jiwi pejume cowantsinexa pocotsiwa barapomonae paeba. Barichirū pomonaetha pomonae Nacom pia peitapetsiwi tatsi pemuxitorobinexa tsainchi xua irurū icha metha barapomonae pejume cowantsinexa tsanerū pocotsiwa barapomonae paeba. Ichitha jopa itacupae tsainchi xua barapomonae pemuxitorobiwa tsainchi. ²³ Tsaca pajinompare, tsipei baxua tsiwanaya yabara paca tsiwanae muxu dutatsi”, jei Jesús.

Meje yabara poxonae Jesús nayabara paeba xua poxonae equeicha patopaetsica ponxae Nacom pia Peitapetsin

(Mt 24.29-35, 42, 44; Lc 21.25-36)

²⁴ Equeicha Jesús namchi, jeye: “Po matabintha poxonae nacui wetsina xua jiwi pin peraxa tsane, bapoxonae xometo nainya naquitabina. Jomocoichato jopa pentha tsane. ²⁵ Opiteiton peitaboco weothopeicaena. Matauta napuna torobabiyaena Nacom xua xuan itabocotha dubena. Bapoxonae jopa xapain dubenanaeyo tsane. ²⁶ Bapoxonae daxita jiwi taena peitabocotha xua po coyene apara tapatopeicaewa tsaneba tsaquinaebowatha peitaboco wetsica ponxaein Nacom Tananeitapetsin. Nacom pia peayapusu itorobi coyenewatha matautano bichocono pexeinya itupanae coichathano patopeicaein. ²⁷ Matautano itorobin tamatatsunpiwi xua inta pecaetutsinexa pomonae

taitapetsiwi. Nacaetutsina daxita nacuanpiwi jiwana, iru ichamonae pomonae ichaxota xometo weecoinapiwi jiwana, iru ichamonae pomonae ichaxota xometo bejopiyapiwi, jiwana, iru ichamonae pomonae pocotsiwa werenepiwi jiwana, iru ichamonae pomonae pocotsiwa berequepiwi jiwana.

²⁸ “Payaputaema barapo pecayabara juta pepaebi diwesiyo xua higuera nae. Jeye: Poxonae ba pataneme xua pena noxu xuxuwapona, bapoxonae ba payaputaneme xua bara imoxoyo wei tsurucuae tsoponae, xua pentono perubenaenexa. ²⁹ Barapocotsi juta coyeneya ichi tsane poxonae pataename daxita baxuan pocotsiwa aunxuae paca tsipaebatsi pocotsiwa bexa exanaena, bapoxonae payaputaename, xua bara imoxoyo tsane xua tapatopae wuna tsane. ³⁰ Bara xainyeya paca tsipaebatsi daxita judiomonae naitapataya naexanaponaena beya yacuiya othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomonae weraweracaena pomonae poxonaeru barapo matabitha jinompa. ³¹ Peitaboco aichurucuae tsane. Matautano ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

³² “Po matabitha baxua exanaena, matautano po horatha baxua exanaena jiji jopa baxua yabara yaputaeyo. Iru matatsunpiwi pomonae peitaboco beicha jinompa baxuan iruru jopa yabara yaputaeyo. Iru xan ponxaein Nacom Pexanton baxua jopa yabara yaputaeyo. Meisa saya Nacom, pon Waxa yaputane poxonae po matabitha baxua exanaena. Matautano yaputane poxonae po horatha daxita exanaena baxua xuaunxuae paca tsipaebatsi.

³³ “Tsaca pajinompeibare xua tapatopae wuna tsane. Yawa Nacomtha patsipaeba dubenanaebiyama, tsipei jopa payaputaem po mataqueitha patopaein. ³⁴ Barapocotsi coyeneya juta ichi poxonae xan patopeicaein taitorobinexa tsane jiji, icha be poxonae pebin ichi poxonae warapaena icha nacia beya. Poxonae bapon pewunaeya tsane xua warapaena pia bo weya, copiya matha waba pia petanacuichiwichi. Bapon daxita pia petanacuichiwichi barompaya cobenata petanacuichiwantsi tatsi. Matautano bapon itoroba pon bo coiboto eena xua xanepanaeya bo pe-eeanaenexa. ³⁵ Paxam tsaca pajinompare, tsipei jopa payaputaem poxonae patopeicaein, icha be barapomonae ichi poxonae jopa yaputaeyo poxonae pepatopaewa tsane pia pecanamataxeinaeinchi pon bo pexeinaeinxae. Barapomonae jopa yaputaeyo icha barapon patopaena poxonae quirei tsanaicha, ichacuitha icha bapon patopaena papaetha, ichacuitha icha bapon patopaena mataqueiwunaeyo, ichacuitha icha bapon patopaena baya tsane. ³⁶ Barapomonae jopa yaputaeyo xua pia pecanamataxeinaeinchi nainya patopaena xua yaichamaicha mata taenabounaeinchi poxonae maitumena. ³⁷ Meje xuaje paca tsipaebatsi, xua paca jeichi: ‘Tsaca pajinompare’, paca jeichi, baxua iru daxita jiwitha tsipaeban”, jei Jesús.

14

Meje yabara poxonae fariseomonae iru sacerdotemonae pia pentacaponae tatsi daxita barapomonae Jesús yabara nanta xeinatsi po coyeneya xua Jesús pewaetabiwa tsainchi (Mt 26.1-5; Lc 22.1-2; Jn 11.45-53)

¹ Acoibi po matabiyobe cataunxuae seica poxonae jiji nacaetutsina penabanaenexa pexaewa, peyabara nanta xeinaenexa barapo matabi xua poxonae caena bayatha matha judiomonae Egipto nacia weya panenebiya. Barapo matabi pewun Pascua matabi wun. Barapo Pascua matabi wuntha jiji xane pan, po pan xua jopa cotowiyo. Sacerdotemonae pia pentacaponae tatsi, iru pomonae jiji pecuidubiwi Moisés pia peitorobi coyene tatsi, daxita barapomonae nabaru muxu jei xua bepa pinae eta bichi tsane poxonae Jesús nameicha waetabinchi pebexubinexatsi. ² Ichitha barapomonae najeye:

—Abu jopa waetabi tsainchi poxonae jiji Pascua matabi wuntha nacaetuta penanabanaenexa pexaewa. Tsipei icha barapo mataqueitha waetabichipatsi pinmonae

anaepanaya najume cayayataxubichipa, najei daxita barapomonae xua Jesús yabara paebatsi.

Meje yabara poxonae petsiriwa Jesús mata epatabatsi penasiwa, po penasiwa petuxueiwa (Mt 26.6-13; Jn 12.1-8)

³ Poxonae Jesús Betania tomaratha popona, bapoxonae Jesús Simón pia bo tatsi betajoniyatsi, pon peperu sawinchi. Poxonae Jesús eca pexaethopaewatha, bapoxonae patopa petsiriwa. Bapowa capatopa alabastro ibo bosibu atsato, xua bichocono wanca penasiwa xua petuxueiwa. Barapo petuxueiwa bichocono ainya matoma. Poxonae wacataba barapo bosibu, bapoxonae Jesús mata epatabatsi barapo petuxuei nasiwatha.

⁴ Pomonae iru baxota ena, barapomonae jiwana anaepana, yawa caemonae najei:

—¿Eta pocotsiwa metha saya xuba jane barapo petuxuei nasiwa? ⁵ Barapo petuxuei nasiwa becaenaetsipatsi. Bapoxonae bexeinaetsipatsi trescientos po paratiximonaebe po paratiximonaebe xua namatomata xua poxonae trescientos matabibibe nexa xua poxonae nacuita. Barapo paratixitha beyawenaetsipatsi peacopeibi jiwu, najei barapomonae.

Bapoxonae barapomonae bapowa casebatsi.

⁶ Ichitha Jesús jeye barapomonaetha:

—Moya pande, bara pacopare. ¿Eta pocotsiwa metha bapowa pabiataneme? Pocotsiwa bapowa inta exana apara seicayarú xua pexeinya coyene inta exana.

⁷ Barapo irathe peacopeibi jiwu paca baru jinompeibina ataya tsaibi tsane. Paca itacupa xua beta pata exaname barapomonae poxonae paichichipame. Ichitha nama paxam jopa ataya paca baru poponae tsainchi barapo irathe poxonae paca itacupa xua pana neyawename. ⁸ Bapowa xua nenta epataraba tapepontha xua petuxuei tuxusi nasiwatha apara xua tsiwanaya nenacui yabara nacui wnaeta xua mthu tana neboyaenexa poxonae tpaein. ⁹ Bara xainyeya paca tsipaebatsi. Daxita nacuanthan poxonae jiwu cueicueije tsane Nacom pia pecapanenebiyae diwesi barapo jiwu yawa yabara paebina xua pocotsiwa poxonae bapowa inta exana xua jiwu bapowa peyabara cui nanta xeinaenexatsi, jei Jesús.

Meje yabara poxonae Judas, Jesús caenaetaxotsi (Mt 26.14-16; Lc 22.3-6)

¹⁰ Barapoxonae Judas Iscariote pon doce poyobe jiwana, pomonae Jesús pijimonaexae tatsi, bapon sacerdotemonae pia pentacaponae tatsi beya pona. Bapon pona xua petsipaebinexa xua Jesús caenaetaxubinchi barapomonaetha. ¹¹ Poxonae barapomonae baxua jume taerucupa bichocono ichichiparucupa baxua. Yawa barapomonae Judas Iscariote muxu tsipaebatsi xua paratixi catsibapaebatsi. Bapoxonae Judas tamropata pitaba xua jeita, xua po coyenetha Jesús pecaenaetaxubiwa tsainchi barapomonaetha poxonae peyapu xanepanaewatha.

Meje yabara poxonae Jesús pijimonaetha baru nabane Pascua wun matabibitha (Mt 26.17-29; Lc 22.7-23; Jn 13.21-30; 1 Co 11.23-26)

¹² Nexata copiya matabibi jopa po matabibi tsiwana penanta carucuae matabibi xua po matabibintha poxonae jiwu tsinacuetutsina, xua penabanaenexa pan, po pan jopa muxuna pentsiyo levadura matawun, pocotsiwa xua cotowa exana pan. Barapo penanta carucuae matabibitha ba corderoxi pebtoxi xua oveja coxi jutebatsi xua jiwu pexaenexa. Bapoxonae barapo jiwu cayabara nanta xeina xua caena bayatha pia pamo susato jiwu tatsi corderoxi juteba yawa xane beya poxonae panenebiya Egipto nacua weya. Barapo matabibitha Jesús pijimonaetha yainyabatsi, jeye:

—¿Exota ichichipame xua xota pexaewa paca tsiwunaetsinchi wanabanaenexa tsane xua Pascua wun matabibi nexa? jei barapomonae.

¹³ Bapoxonae Jesús itoroba nacueyatabe poyobe ponbe xua doce poyobe jiwana, pomonae Jesús pijimonaetha tatsi. Jesús jeye:

—Tomara beya paponarebe. Barapo tomarathiya pantenta ponaenamebe pebin pon mera yantana ponaena juruwatotha. Bara bapon papuna pondebe. ¹⁴ Bo beya paponarebe ichaxota bapon joniyaena. Pon bo pexeinaein pabarande: ‘Pon jiwi Pecuidubin cabarai: ¿Incane tutura, po tututha tajiwimonaē barū nabanaein pexaewa Pascua wūn matakabi nexa?’ jei bapon, pajandebe. ¹⁵ Bapoxonae bapon paca tsita itacayopichinabe po tutu pin tutu po tutu xua asiyeicha po tutu xua bayatha tutu xaneba. Barapo tututha pexaewa pana cui wūnaetajebare xua wanabanaenexa pexaewa barapo Pascua wūn matakabi nexa, jei Jesús.

¹⁶ Bara bapoxonae baponbe ponatababe. Bara patopabe tomaratha. Bara tanebe daxita be po coyeneya bayatha Jesús paeba. Bapoxonae pexaewa nacui wūnaetajebabe Pascua wūn matakabi nexa xua penabanaenexa.

¹⁷ Poxonae quirei tsanaicha bapoxonae Jesús pijimonae barū patopa barapo tututha. ¹⁸ Poxonae Jesús pijimonae cataunxuae barū xunaboca pexaethopaewatha, bapoxonae Jesús pijimonae barai, jeye:

—Bara xainyeya paca tsipaebatsi caein pon paxam jiwana pam pon nebarū xaeuncua bapon necanaetaxubina ichamonaetha, jei Jesús.

¹⁹ Nexata bapoxonae Jesús pijimonae tatsi unthuthu wecoyei tsurucūpae, nexata daxita tsana jei tsoponae Jesustha:

—¿Apara xan cacaenaetaxubinchi? jei daxita barapomonae xua Jesús tsana yainyabaponatsi.

²⁰ Jesús jume nota barapomonaetha, jeye:

—Pon paxam jiwana pam xua doce poyobe jiwana xua cae paratotha pana nabarū jaucuncuaponanbe pan apara bapon necaenaetaxubina ichamonaetha. ²¹ Xan ponxaein Nacom Tananeitapetsin bewa tūpaein, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha. Metha jame wūnae tsipae icha bapon bayatha jopa naexanaetsipae, tsipei bexa tsane bichocono atene tsocuae tsane, bichocono abe tana necana exanaexae, jei Jesús.

²² Poxonae Jesús pijimonae barū xaeuncua, bapoxonae Jesús pecobetha pita pan. Yawa Paxatha tsipaeba, jeye: “Axa, maisa jūntū coyene weiweinan xua pan pata tanecatšiwam”, jei. Bapoxonae Jesús pecobetha pan epa janaca, yawa catsiba pijimonae. Bapoxonae pijimonae barai, jeye:

—Paxaema po pan epa janacan. Barapo pan apara neyabara caunuta tapepon xua poxonae tapaca tsitūpaeuwatsi tsainchi, jei Jesús.

²³ Bapoxonae Jesús equeicha pecobetha pita corotiyo, yawa Nacomtha tsipaeba, jeye: “Axa, maisa jūntū coyene weiweinan xua corotiyotha ecareca pepa uva mera xua pata tanecatšiwam”, jei. Bapoxonae Jesús pijimonae cata corotiyo xua pejiwana aapaponaenexa. Daxita barapomonae bara jiwana aapapona. ²⁴ Bapoxonae Jesús jeye pijimonaetha:

—Pena petsiwūnae muxu dutsi coyenewa paca tsipaebatsi. Barapo uva mera po mera xua corotiyotha tsijuntu eca yabara caunuta tajana barapo uva mera xua jana othoparenaein poxonae tūpaein. Barapo jana tsita itapeinya xeinaena xua jiwi pinmonae yabara jūntemainaein abe pia peexanae cuiru coyenein tatsi. ²⁵ Bara xainyeya paca tsipaebatsi, barapo uva mera jopa equeicha paca barū apae tsainchi anoxuae. Meisa abū bexa tsane pena coyenewatha paca barū apaeinchi barapo uva mera poxonae Nacom neexanaena xua itorobiya ewatsin jiwi, jei Jesús.

Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeinyo”, pinae yabara jei tsainchi Jesús

(Mt 26.30-35; Lc 22.31-34; Jn 13.36-38)

²⁶ Poxonae Jesús pijimonae barū najume weta xua naḫūna Nacom nexa, bapoxonae Jesús pijimonae barū pona demxuwa beya. Barapo demxuwa pewūn demxu Olivowa, olivo naein peumenaexae baxota. ²⁷ Nexata Jesús pijimonae barai, jeye:

—Anoxuae barapo merawithe daxita pam pana necuentarucupaename tapaca urapentsixaetsi tsainchi. Baxua paexanaename, tsipei Nacom Pejume Diwesitha paca yabara cui tsiwunaeya jeye: ‘Poxonae ovejamonae peewatsin bexubin, bapoxonae ovejamonae tsanarucupaena’, jei Nacom. Penamchixae poxonae ichamonae newaetabina tanebexubinexa pana necuentarucupaename. ²⁸ Ichitha taeyarapaeyo Nacom equeicha asu neexanaena. Bapoxonae paca tsiwana patopiyaeinchi Galilea nacua beya, poxonae bara beya paponaname, jei Jesús.

²⁹ Nexata Pedro Jesús jume notatsi, jeye:

—Bequein ichamonae cacuentarucupaena jinya neuraxubixae, nama xan bapana jopa cacuenta naetsircuae tsainchi taneuraxubixaemxae, jei Pedro.

³⁰ Nexata Jesús Pedro jume baraichi, jeye:

—Bara xainyeya catsipaebatsi, po merawithe pewunaeya poxonae ainya jume cuiyobetha wacara pebto fibina, bapoxonae xam copiya acoibi po jume cuiyobetha neyabara jam tsane: ‘Jopa dapon yaitaeinyo’, neyabara jam tsane, jei Jesús.

³¹ Ichitha Pedro equeicha jume daunweya, jeye:

—Bara bequein capuna tupaeinchi ichitha baxua jopa cayabara paebi tsainchi, jei Pedro.

Iruru daxita Jesús pijimonae tatsi bara jumichi, nanta jupiya paeba.

Meje yabara poxonae Jesús Paxa tsipaeba ichaxota tsica iriyo, po iriyo pewun Getsemani (Mt 26.36-46; Lc 22.39-46)

³² Nexata Jesús pijimonae baru patopa ichaxota tsica iriyo po iriyo pewun Getsemani. Baxota Jesús barai pijimonae, jeye:

—Xote abu paenare tha matha Taxatha tsipaebichi, jei Jesús.

³³ Jesús baru pona Pedro iru Santiago iru Juan. Bapoxonae Jesús bichocono unthathu wecoyei, yawa bichocono unthathu deideije. ³⁴ Nexata barapo acoibi poyobetha Jesús barai, jeye:

—Bichocono juntu coyene natsepiya wecoyan, tsipei muxu tatupa. Xote paenare, yawa payoyocare xua painya tanebaru naitaewatsinexam, jei Jesús.

³⁵ Nexata Jesús tsiwiyo dabe natsixitabiya, irabe taeuncuareca, tsipei jopa juniya ajuntutaneyo. Jesús yaputane xua bichocono tsiatene tsane xua daxita jiji abe pia peexanae coyenein tatsi. Daxota Jesús Paxa wuca xua icha itacupatsi xua jopa penantawenonaewa xua peatenewa. ³⁶ Bapoxonae Jesús Paxa tsipaeba, jeye: “Axa caitacupa xua daxita exaname. Icha ichichipame xua taneyawenaewam tsane, newepire pocotsiwa neajuntutane exana. Ichitha jopa necana exanaeinde xua pocotsiwa ichichipan. Saya jame necana exande xua pocotsiwa ichichipame”, jei.

³⁷ Nexata Jesús equeicha caibe iya ichaxota pijimonae jiwana tatsi taenatsi xua acoibi poyobe. Ichitha barapomonae maita. Jesús Pedro baraichi, jeye:

—Simón, ¿maituncuame? ¿Jopa caitacupaeyo xua yoyocame xua jinya tanebaru naitaewatsinexam, matautano xua bara cae horathano? ³⁸ Maisa payoyocare. Nacom patsipaebare xua jopa abe painya neexanaewa tsane poxonae caurimonae pia pentacaponaein tatsi piraichi paca juntu coyene jujuta. Painya juntu coyene wetsina bichocono paichichipame xua Nacom painya netsipaebiwa, ichitha painya pepon bichocono paacyenefaetabim xua painya netsipaebiwa Nacom.

³⁹ Equeicha Jesús bara nama caeto caibeya pona xua Paxa petsipaebinexa barapo jumetha, po jumetha copiya Paxa tsipaeba. ⁴⁰ Bapoxonae equeicha Jesús pijimonae beya pona xua acoibi poyobe. Daichitha barapo acoibi poyobe came maitumena, tsipei bichocono itata tsacatsaquei xua itamaipana. Barapomonae jopa yaputaeyo xua Jesús petsipaebiwatsi poxonae yaichamaicha mata taenanaboumeinch. ⁴¹ Bara nexata equeicha Jesús saya cuenta pona pijimonae, xua Paxa equeicha petsipaebinexa. Equeicha pijimonaetha patopa acoibi po cuiyobetha. Jesús jeye pijimonaetha:

—¡Moya bara painya nepu maitumenaende, aunxuae jopa Nacom patsipaebim xua painya necayawenaenexa! Bayatha tsuxubi po horatha xua xan ponxaein Nacom

Tananeitapetsin, ichun necaenaetaxubina ichamonaetha, pomonaetha pomonae pean-tucoyenebe jiwi. ⁴² Panacosabapende, panonobapondeno. Antha bu poinchi. Dota dawerena pon necaenaetaxubina ichamonaetha, jei Jesús.

Meje yabara poxonae Jesús waetabatsi

(Mt 26.47-56; Lc 22.47-53; Jn 18.2-11)

⁴³ Poxonae Jesús cataunxuae tsipaebuncua pijimona, bapoxona Judas patopa. Bapon Judas doce poyobe jiwana caein pomonae Jesús pepa pijimonaexae tatsi. Judas pinmonae baru patopa Jesustha. Ichamona cusin cajinjinca. Ichamona iwabi cajinjinca. Daxota daxita barapomona pata tsipei sacerdotemona pia pentacaponae tatsi, iru pomonae jiwi pecuidubiwi Moisés pia peitorobi coyene tatsi, iru pomonae pitiri jiwiru daxita barapo pentacaponae witoroba barapomonaetha. ⁴⁴ Judas pon Jesús caenaetaxubinchi beya poxona bapon patopa cou tsiwanaya paeba barapo pin bicheitha cou Jesús yabara paebatsi, cou jeye: “Pon tsutsubin bapon apara barapo pebin Jesús. Nexata moya bara pawaetabare. Pacaponde xua soldadomona xainwaicha pecutsinexa tsane”, jei Judas.

⁴⁵ Nexata Judas Jesús imoxoyo caquita poinchi. Bapoxona nainya Jesús jeichichi:

—Pon jiwi Necuidubim, ¿xamda? jei Judas.

Bapoxona nainya Judas Jesús tsutsubatsi. ⁴⁶ Nexata barapomona pomonae Judas pe-baru patopaexae, Jesús imoxoyo caquita umenarucupatsi. Bapoxona Jesús waetabatsi.

⁴⁷ Caein pon Jesús pijimona tatsi jiwana, bapon nainya cusi namara wejonta. Bapoxona bapon muxuyoro catsoniba, pon sacerdotemona pia pepa pentacaponaein tatsi tanacuitatsi bapon muxuyoro catsonibatsi. ⁴⁸ Bapoxona Jesús jeye jiwitha:

—Pacapatame cusin, yawa iwabi ichi be poxona pacana ichim pontha pon jiwi pecaibin. ⁴⁹ Daxita matabin Nacom pin pia botha tatsi paca baru poponeibatsi. Paca cuidubeibatsino. Daichitha bapoxona jame jopa pana newaetabim. Ichitha daxita baxuan neyabara canacui jume weta exana, bayatha Nacom Pejume Diwesitha tana necui yabara wuna tsiwanaya paebixae pomonae Nacom peitorobi jume pepaebiwi.

⁵⁰ Bapoxona Jesús daxita pijimona cuentarucupatsi.

⁵¹ Bapoxona pewowin Jesús puna poinchi pon saya meisa paparuwatha naepa yaraba. Barapo pewowin waetabatsi pomonae Judas baru patopa. ⁵² Ichitha barapo pewowin nama xueta cuta pia paparuwa epato. Tamasa naetsiricua.

Meje yabara poxonae Jesús capoinchi judiomona pia pecanamata caitorobi jiwi bicheito tatsi pia peitabaratha tatsi

(Mt 26.57-68; Lc 22.54-55, 63-71; Jn 18.12-14, 19-24)

⁵³ Pomona Jesús teicatsi, barapomona Jesús capoinchi pon sacerdotemona pia pepa pentacaponaein tatsi pia bo tatsi beya, pon yatsicaya peainya cuin. Baxota iru sacerdotemona pia pentacaponae tatsi nanacaetuta. Iru pitiri jiwino nanacaetuta. Baxota iru nanacaetuta pomonae jiwi pecuidubiwi Moisés pia peitorobi coyene tatsi. Daxita barapo penacaetutsi jiwi, barapomonaetha jiwi wun duta “Pecanamata caitorobi jiwi bicheito”, jei. ⁵⁴ Iru Pedro Jesús tsiwiyo taju pu taetae tsiniyatsi beya poxona patopa panatha, po panatha ichaxota sacerdotemona pia pepa pentacaponaein tatsi tauncuatsi bo. Poxona Pedro pana tututha joniya bapoxona naeca imoxoyo policiamonaetha pomonae Nacom pin pia bo tatsi pe-eeanaewi. Pedro cui tane po coyeneya xua Jesús cana exanatsi pomonae nacaetuta. Pedro nonopeca isototha.

⁵⁵ Sacerdotemona pia pentacaponae tatsi, iru ichamonaeno pomonae pecanamata caitorobi jiwi bicheito, daxita barapomona jeita ichamona pomonae xua Jesús naerabiya peyabara paebinexatsi pocotsiwa xua Jesús paeba, xuano xua exana, pia barapo jumetha paebichi xua bara Jesús tupa peexanaewa tsainchi. Bara bequein pin bicheito pata xua Jesús abeya peyabara paebinexatsi, ichitha cataunxuae barapomona pomonae pecanamata caitorobi jiwi bicheito came jopa xeinaeyo po diwesi xua daxota Jesús pebexubinexatsi. ⁵⁶ Pinmonae bequein Jesús yabara naerabiya paebatsi, ichitha tsanaya

barompaya pia diwesiin paeba. ⁵⁷ Ichamonae asiya umena, yawa naerabiya Jesús yabara paebatsi.

⁵⁸ Barapomonae jeye:

—Paxan pajume tan xua bapon Jesús paeba, jeye: ‘Xan abe exanaein barapo Nacom pin pia bo, po bo jiwi pia coutha acaba. Acoibi po matabibe icha bo equeicha exanaein po bo jiwi jopa exanaeyo’, jei Jesús, jei barapomonae.

⁵⁹ Daichitha barapomonae awiya came cataunxuae tsanaya barompaya ichawan paeba. Barapomonae pia pepaebiwani xua Jesús peyabara paebiwatsi jopa peburuya nanta jupaya nanta xeinaeyo.

⁶⁰ Bapoxonae sacerdotemonae pia pepa pentacaponaein tatsi asiya uncuataba xua daxita peitabaratha tatsi. Bapoxonae bapon Jesús yainyabatsi, jeichichi:

—¿Jopa jume notsim barapomonae? ¿Bara xainyei xua po jumein barapomonae cayabara paeba? jei bapon.

⁶¹ Daichitha Jesús saya moya uncua. Jopa jume notsiyo bapontha. Daxota equeicha sacerdotemonae pia pepa pentacaponaein tatsi jeye Jesthath:

—¿Bara yatsicaya xam Mesías pon Nacom necaitorobin, pon Nacom Pexantom, po Nacom wunaepajanteiban? jei bapon.

⁶² Bapoxonae Jesús jume nota bapontha jeye:

—Aa, bara xan tsocuaein apara, Nacom Pexanton apara. Paxam pana netaename xua xan ponxaein Nacom Tananeitapetsin ecaein Nacom pecoxa weya tatsi, pon peayapusu itorobi coyenewa pexeinaein. Matautano pana netaename poxonae equeicha patopeicaein tsaquinaebowantha xua peitaboco wetsica, jei Jesús.

⁶³ Nexata bapoxonae sacerdotemonae pia pepa pentacaponaein tatsi, pin anaetha anaya pia paparuwana nata tsitsinaxuba, peyabara anaepanaexaetsi Jesús, jeye:

—¡Nama equeicha jopa wanantawenonaewa ichamonae xua wanaca tsipaebiwa tsane xua bapon peyabara paebiwatsi! Bapon natsiaenae exana abe pepaebixae barapo jume poxonae Nacom pexanto najainta. ⁶⁴ Bara paxam pajume taneme pocotsiwa bapon paeba pocotsiwa Nacom jopa ichipaeyo. ¿Eta xua pacayabara nanta xeiname xua paexanaename bapontha abe pepaebixae? jei.

Daxita barapo pecanamata caitorobi jiwi bicheito jeye:

—Bara xainyeya paebame. Jesús abe pia pepaebixae, Nacom tsitatsi xua bapon Nacom tsita natsicuentatsi. Daxota bapon bewa tupaena, jei barapo pecanamata caitorobi jiwi bicheito.

⁶⁵ Bapoxonae barapomonae jiwana, peonetha Jesús anaya itabara subabatsi. Poxonae Jesús itacuere cutatsi, bapoxonae Jesús itabara tsaquibacotatsi pecobetha. Barapomonae jeye Jesthath:

—Incane pana netsipaebare: ¿Jintam caitabara tsaquibobara xua bequein paca itabara cutatsi? jei barapomonae.

Bapoxonae iruru policiamonae pomonae Nacom pin pia bo tatsi peenaewi Jesús itabara cuaintatsi.

Meje yabara poxonae Pedro Jesús yabara paebatsi xua jeye: “Jopa dapon yaitaeinyo”, xua yabara jeichichi Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Poxonae cataunxuae Jesús cana exanompatsi bapoxonae iruru Pedro eca panatha tsica xua bo peuma werena. Bapoxonae yabuyo patopa powa sacerdotemonae pia pepa pentacaponaein tatsi tanacuitatsi. ⁶⁷ Poxonae barapowa Pedro tainchi xua nonopeca, Pedro came taeuncuatsi. Pedro jeichichi:

—Apara xam bayatha iruru napuna poneibame Jesús, pon Nazaret tomarapin, jei yabuyo.

⁶⁸ Ichitha Pedro jume matawenta bapowa, jeye:

—Jopa dapon yaitaeinyo, matautano jopa yaputaeyo pocotsiwa xua yabara paebame, jei Pedro.

Bapoxonae Pedro pona bomuxu coiboto beya. Bapoxonae wacara pebto fiba. ⁶⁹Equeicha bapowa Pedro tainchi. Bapoxonae bapowa tamropata pitaba xua tsipaeba pomonaetha pomonae baxota iru umena. Bapowa Pedro yabara paebatsi, jeye:

—Apara bapon pomonae Jesús pijimonae tatsi jiwana, jei.

⁷⁰Equeicha Pedro jume matawenta bapowa, jeye:

—Jopa dapon yaitaeyo, jei Pedro.

Pirapaeyo pomonae umena baxota equeicha Pedro tsipaebatsi jeichichi:

—Bara xaniwaicha barapomonae jiwana. Apara xam Galilea nacuapim, jei pomonae umena.

⁷¹Nexata Pedro jume daunweya, jeye:

—Bara Nacom peitabaratha xainyeya paca tsipaebatsi pocotsiwa bara xainyeya tapae-biwa. Icha jopa xainyeya paca tsipaebichipaetsi metha barabu Nacom abe necana exanaetsipa. Equeicha paca tsipaebatsi: ‘Jopa dapon yaitaeyo’, xuaunxuae pon payabara paebame, jei Pedro.

⁷²Bapoxonae iruru caena nainya wacara pebto equeicha fiba. Nexata Pedro nanta xeinataba xua bayatha Jesús Pedro tsipaebatsi poxonae jeye: ‘Xam barapo merawithe pewnaeya poxonae ainya jume cuiyobetha wacara pebto fibina xam copiya acoibi po jume cuiyobetha neyabara jam tsane: Jopa dapon yaitaeyo neyabara jam tsane. Bapoxonae nainya iru wacara pebto fibina’, jeichichi Pedro xua Jesús paeba. Nexata bapoxonae Pedro bichocono wecoyeyi peanthuthutanexae xua Jesús peyabara paebiwatsi.

15

Meje yabara poxonae Jesús uncua Pilato peitabaratha tatsi

(Mt 27.1-2, 11-14; Lc 23.1-5; Jn 18.28-38)

¹Poxonae pentha tsina sacerdotemonae pia pentacaponae tatsi, iruru judiomonae pia pitiri jiwi tatsi, iru pomonae jiwi pecuidubiwi Moisés pia peitorobi coyenein tatsi, iruru ichamonae pomonae pecanamata caitorobi bicheito jiwi jiwana, daxita barapomonae yabara nacaetuta xua nanta juraya peburuya penanta xeinaenexa po coyeneya xua Jesús pebexubiwa tsainchi. Bapoxonae barapomonae Jesús maxu cutatsi. Bapoxonae capoinchi Pilato beya. ²Pilato Jesús yainyabatsi, jeye:

—¿Bara xam yatsicaya judiomonae itorobiya pia pepa neewatsin? jei.

Jesús jume nota, jeye:

—Xuaunxuae paebame bara baxua aparta, jei Jesús.

³Sacerdotemonae pia pentacaponae tatsi namchi Pilatotha, jeye:

—Bapon Jesús bichocono exana pocotsiwa xua abe, jei barapomonae. ⁴Equeicha Pilato yainyaba Jestha, jeye:

—¿Jopa jume notsim pocotsiwa barapomonae abe cayabara paeba? Maisa barapomonae bichocono abe cayabara paeba, jei Pilato.

⁵Ichitha Jesús jopa equeicha jume notsiyo, Pilato jopa jume notichi. Daxota Pilato najuntu coyene cabenaeca poxoru Jesús jopa nayabara paebiyu xua pia coya penayawenaenexa.

Meje yabara poxonae Pilato jume baru jejei xua Jesús bara pebexubiwa tsainchi ichamonae

(Mt 27.15-31; Lc 23.13-25; Jn 18.38-19.16)

⁶Bara nama matabi jopa poxonae ba Pilato pia cui xeina poxonae ba jiwi tsinacaetuta pexawa penanabanaenexa. Barapo matabitha Pilato ba pu sotaba pon ba jiwi itapeta cowai xua Pilato peisanaxubinexa pomonae jiwi pecubi botha peenaewi jiwanaemonaein. ⁷Barapo jiwi pecubi botha iruru eca pon pewun Barrabás. Bapon bichocono abe peexanaein tsipei caena bayatha matabi ichamonae xua barapomonae najume tsacaba cana exanatsi xuano xua jiwi jutebatsi. ⁸Bapoxonae pin bicheito jiwi pata Pilatotha, xua Pilato pewnaenexa tsainchi xua bapon exanaena pia cui coyeneya poxonae

xua isanaxubina caein pomonae jiwi pecubi botha peenaewi jiwanapin. ⁹ Bapoxonae Pilato yainyaba barapomonae Jesús yabara, jeye:

—¿Paichichipame xua tapu sotabiwa tsane pon judiomonae itorobiya pia pepa peewatsinchi? jei. ¹⁰ Baxua Pilato paeba, tsipei bapon yaputane xua sacerdotemonae pia pentacaponae tati Jesús uwatsi. Daxota barapomonae Jesús caenaetaxubatsi Pilatotha. ¹¹ Ichitha barapo sacerdotemonae pia pentacaponae tati jiwi jume cui tsacabatsi xua anaepana cana exanatsi, xua Pilato pecui itorobinexatsi xua Barrabás pepu sotabinexatsi, xua Jesús jopa pepu sotabinexatsi. ¹² Equeicha Pilato yainyaba barapo jiwi, jeye:

—¿Eta xua cana exanocuaein pon pawun dutame, xua pajam: ‘Judiomonae itorobiya pia pepa peewatsinchi?’ pajam, jei.

¹³ Barapomonae Pilato daunweya jume notatsi, jeye:

—¿Bewa maisa naetotha tūparucua exanaem! jei.

¹⁴ Bapoxonae Pilato jeye barapomonaetha:

—¿Eta pocotsiwa xua metha jane, xua abe exana? jei.

Ichitha equeicha daumetha jume daunweya, jeye:

—¿Bewa maisa naetotha tūparucua exanaem! jei.

¹⁵ Pilato ichichipa xua bapon jopa peita aenae-aeneiwatsi jiwi. Daxota Pilato Barrabás nama pu sotabatsi. Bapoxonae Pilato itoroba xua soldadomonae bara Jesús moya pecuainchinexatsi pocotsiwatha eewa xua bichocono amapiya xua xota jiwi cuainteibatsi poxonae abe exaneiba. Matautano itorobano xua moya bara Jesús tūparucua exanaeinchi naetotha.

¹⁶ Bapoxonae soldadomonae Jesús capoinchi Pilato pia bo tati beya po soldadomonae yapu eena Pilato pia bo tati. Bapoxonae barapo soldadomonae waba icha soldadomonae xua daxita barapo soldadomonae Jesús pematawacaicha umenaenexa tsainchi. ¹⁷ Bapoxonae Jesús pia paparuwa juma xuenatsi. Yawa juma xatatatsi icha paparuwa po paparuwa tsobia xua Jesús be pecana exanaenexatsi pon jiwi itorobiya pia pepa peewatsinchi. Yawa poxonae nacobe weta xua fata pee bapoxonae Jesús muxuna mata xatatatsi barapo pee tepa. ¹⁸ Bapoxonae barapomonae tamropata notarucua xua Jesús cui caponaeya jeichichi:

—¿Xamda? ¿Apara xam barapom pon judiomonae itorobiya pepa Neewatsin! jei.

¹⁹ Po naewa xua Jesús cobenatsi bayatha, barapo naewa Jesús cobe wepitatsi. Bapoxonae barapo naewatha Jesús mata cuaintatsi. Matautano Jesús yabara naone subabatsi. Bapoxonae barapomonae Jesús peitabaratha tati pentabocototha taumeinchi, xua Jesús naerabiya wūnae pejainchinexa tsainchi. ²⁰ Poxonae Jesús cana cui wetatsi xua cui caponatsi equeicha bapoxonae Jesús caewa juma wejontatsi xua po paparuwa tsobia. Bapoxonae equeicha caewa juma xatatatsi po paparuwa pia paparuwaxae tati. Bapoxonae Jesús capoinchi xua pecobe matabobinexatsi naetotha pebexubinexatsi.

Meje yabara poxonae Jesús tūparucua exanatsi naetotha

(Mt 27.32-44; Lc 23.26-43; Jn 19.17-27)

²¹ Poxonae Jesús namtotha caenapoinchi soldadomonae, bapoxonae barapo soldadomonae taeba pebin, pon Cirene tomarapin pon pewun Simón. Bapon wexua werena pona. Bapon Alejandro paxa tati, iru xua Rufo paxa tati. Bapoxonae barapo soldadomonae Simón itorobatsi xua pecaponaenexa Jesús pia naeto tati, po naetotha tūparucua peexanaenexatsi Jesús.

²² Bapoxonae Jesús capoinchi uruto beya, po uruto be jiton matasipa piwa, daxota barapo uruto jiwi wun unuta “Gólgota”, jei. ²³ Baraxotiya Jesús apatatsi vino mera, po vino mera equeicha muxuna epareca mirra mera matawun po mera bichocono atsu. Ichitha Jesús jopa apaeyo. ²⁴ Matautano bapoxonae Jesús tūparucua exanatsi. Bapoxonae barapo soldadomonae nata tsaba Jesús pia paparuwan tati. Barapomonae bebeya ibotixi penacueranta notsinexa Jesús pia paparuwan tati.

⁴² Po mataqueitha pewun penacui xaxainchi matabi poxonae judiomona ba weta daxita xua penacuichiwa pewunaeya poxonae jopaena pentaquei seicae matabi, poxonae quirei tsanaicha barapo penacui xaxainchi matabitha bapoxona patopa pebin Pilatotha. ⁴³ Bapon pon papatopaexae bapon pewun José, pon Arimatea tomarapin. Bapon pomona pecanamata caitorobi jiwi bicheito jivanapin. Bapon baru cui itura jineibatsi jiwi. Bapon yabara jume cowuntsiya wuna ewateiba po coyenewa xua poxonae Mesías patopaetsica pon jiwi itorobiya peewetsinexatsi. José ajuntucoyenetsaquiya patopa Pilato pia xantha tatsi pewucaenexa Jesús petupaein. ⁴⁴ Bapoxonae Pilato yabara najuntu coyene cabenaecatoba xua bayatha Jesús tupa. Daxota bapon itoroba soldadomonae pia pentacaponaein tatsi pia yaputaetsi po coyene xua eta poxonae bayatha tupa. ⁴⁵ Poxonae barapo soldadomonae pia pentacaponaein tatsi paeba xua pinae bayatha Jesús tupa, bapoxonae Pilato copata xua José bara pichina Jesús petupaein. ⁴⁶ Bapoxonae José pexeinya paparuwa comota. José naeto wepichica Jesús petupaein. Yawa mata quiyontabareca barapo pexeinya paparuwatha. Bapoxonae José ibo muthu iya boya Jesús petupaein. Yawa torenabapoinya pin ibo panawa. Yawa barapo ibo panawatha yauxatatabanota. ⁴⁷ María Magdalena, powa Magdala tomarapiwayo iru icha María powa José pena tatsi, barapowabe tanebe ichaxota Jesús petupaein boyatsi.

16

Meje yabara poxonae Jesús equeicha asu juina exanatsi petupae cuiru coyene weya (Mt 28.1-10; Lc 24.1-12; Jn 20.1-10)

¹ Nexata barapo judiomonae pia pentaquei seicae matabi tatsi yapucaewaba poxonae quirei tsanaicha xua icha matabi jopa. Bapoxonae María Magdalena, powa Magdala tomarapiwayo, iru icha María powa Santiago pena tatsi, iru ichowayoru powa pewun Salomé, daxita barapowaxi comoca petuxueiwan peponaenexa xua Jesús peperu epababinexatsi petupaein. ² Bapoxonae baya caemumbotha, po matabitha xua nanta carucua cae semanatha, barapowaxi capata petuxueiwan ichaxota Jesús ibo muthu iya boyatsi. Bapoxonae xometo pichatabina. ³ Barapowaxi caewaxi natsipaebenapona, najei:

—Jintam metha nacata pataxubina barapo ibo panawa xua yauxatatabobotatsi? najei.

⁴ Daichitha poxonae barapowaxi taerucupa xua po pin ibo panawatha yauxatatababota barapo ibo muthu bayatha cou yaupataxubanota. ⁵ Barapowaxi jojoniya barapo ibo muthu iya. Barapo ibo muthu tutu iya pewowin eca po muxunene pecoxa weya. Bapon nama xatata paparuwa, po paparuwa bichocono apiya yawa bichocono inyapana. Barapo yabuxi bichocono junuwa, pewowin cunuwatsi. ⁶ Ichitha barapo pewowin jeye barapo yabuxitha:

—Jopa pajunuwinde. Paxam pajeitame Jesús Nazaret tomarapin, pon bayatha naetha tupa. Ichitha bapon anoxuae xote jopa bocaeyo. Bayatha asu petupae cuiru coyene weya. Pataema ichaxota Jesús bayatha botatsi petupaein. ⁷ Bara paponare, yawano patsipaebare Pedro iru ichamona pomonae Jesús pijimonae tatsiru. Nexata pajande: ‘Bepa Jesús paca tsiwana patopiyaei Galilea nacua beya poxonae bara bepaiyiyaename. Bapoxonae baxotiya pataename bapon icha be pocotsi coyeneya paca tsipaeba bayatha’, pajande, jei pewowin barapo yabuxitha.

⁸ Barapo yabuxi ibo muthu wejojondena. Yawa bara weya ducupa tsipei bichocono pijunuwi jijiyei. Barapo yabuxi jopa paebiyo ichamonaetha poxoru bichocono junuwa.

Meje yabara poxonae Jesús María tsita naituta tatsi powayo Magdala tomarapiwayo (Jn 20.11-18)

⁹ Poxonae Jesús asu exanatsiba petupaewa weya po mataqueitha opi carucua xua cae semanatha poxonae aena pentha, bapoxonae Jesús tsita naituta María Magdalena, powa Magdala tomarapiwayo. Barapowa caena bayatha Jesús taitaweta cauri siete poyobe xua bapowa xeina barapo cauri, xua equeicha bapowa jopa pexeinaenexa.

¹⁰ Poxonae Jesús tainchi bapowa pona pemuxu tsipaebinexa pomonaetha pomonae

anoxuae anthuthutane yawa wecoyei xua Jesús petupaexae. Barapomonaе bayatha Jesús pepuna jinompaewichi. ¹¹ Poxonaе barapomonaе jume tane xua juinya Jesús asu popona, yawa xua bapowa bayatha Jesús tainchi, barapomonaе baxua jopa yabara jume cowuntsiyo.

Meje yabara poxonaе Jesús pebinbe tsita naituta namtotha poxonaе Emaús tomara beya ponabe

(Lc 24.13-35)

¹² Pirapae bapoxonaе equeicha Jesús tsita naituta pijimonaе tatsi jiwana beta icha cui coyenyatha xua poxonaе jopa xapain yaitaetsi poxonaе namtotha pipatotha ecaponabe aisawatha. ¹³ Bapoxonaе baponbe caibe nawiyabe. Yawa tsipaebabe ichamonaetha xua Jesús pijimonaetha tatsi xua po coyene bayatha Jesús baponbe tsita naitutatsibe. Ichitha barapomonaе barichiru iru jopa jume cowuntsiyoru barapo diwesi pocotsiwa baponbe paebabe.

Meje yabara poxonaе Jesús cui itoroba pijimonaе xua pia diwesi tatsi daxita nacuantha petapaebiwa tsainchi

(Mt 28.16-20; Lc 24.36-49; Jn 20.19-23)

¹⁴ Pirapae Jesús tsita naituta pijimonaе pomonaе once poyobe poxonaе barapomonaе pexaethopaewatha iratha ena. Jesús pin jumetha muxutaenaquiya exana xua jopa pejume cowuntsixaetsi matautano peyabara muxusipanaexaetsi matauta xua jopa peyabara jume cowuntsixaetsi pocotsiwa paeba pomonaе tane xua Jesús equeicha bayatha asu popona petupae cuiru coyene weya. ¹⁵ Jesús jeye pijimonaetha: “Paponare, daxita nacuantha beya. Patsipaebare daxita jiwitha barapo pecapanenebiyae diwesi jume. ¹⁶ Pomonaе neyabara jume cowuntsina xua xan apara Nacom Pexanton tatsi, matautano xua bautisabatsi, barapomonaе capanenebiyaeinchi xua jopa peweraweracaenexa. Ichitha pomonaе jopa neyabara jume cowuntsiyo xua xan Nacom Pexanton tatsi, barapomonaе peraxa jubebinchi xua Nacom peyabara paebixae xua pinae barapomonaе jopa jume cowuntsiyo. ¹⁷⁻¹⁸ Pomonaе neyabara jume cowuntsina xua xan Nacom Pexanton tatsin muxuna exanaein xuaje pocotsiwe: Barapomonaе taitawetsina ichamonaе cauri poxonaе tawuntha wuqueibina; matautano barapomonaе pena jumeintha cueicueijejei tsane; icha barapomonaе jomon notsina pecobetha, jopa barapomonaе tupa exanae tsainchi jomon; matautano icha barapomonaе apaena po mera jiwitupa exanatsi barapo mera jopa abe exanae tsainchi barapomonaе; matautano barapomonaе itacupaeinchi xua jayabina pecobetha pomonaе peatenewi, xua bapoxonaе barapo peatenewi peaxaibinexa tsaibi tsane”, jei Jesús.

Meje yabara poxonaе Jesús athabe juinya Nacom pia peitorobi nacua beicha tatsi

(Lc 24.50-53)

¹⁹ Jesús pon jiwitupa Pecanamataxeinaeinchi, poxonaе bapon najume weta xua cueicueijejei pijimonaetha, bapoxonaе Jesús asiya peitaboco beicha juinya exanatsi, xua Nacom exana. Bara xoteicha Jesús Paxa cuaretatsi pecoxa weya ainya cui peexanaenexatsi. ²⁰ Bara barapomonaе Jesús pijimonaе tatsi ponarucupa. Yawano barapomonaе cueicueijejei tsurubenanaebiya jiwitha barapo pecapanenebiyae diwesi jumein daxita nacuantha. Bapon Jesús pon jiwitupa Pecanamataxeinaeinchi yawena barapomonaetha. Matautano Jesús cana exana barapomonaetha xua barapomonaе muxuna exana pexeinya petsita itutsi coyenewan xua daxota pocotsiwa barapomonaе cueicueijejei jiwitha bara pexainyei jumein. Je, bara ichi tsane.

Baja Marcos.

Jesucristo Pia Pexeinya Diwesi Jume Tatsi Lucas Petinae Diwesi

Meje po diwesi yabara xua Lucas tamropata pitaba poxonae tina

¹ Jaco Teófilo. Ponxaem nentũ cui xanepanaein, cata tinatsi. Pinmonae bayatha xuya cou tina diwesi Jesús yabara, xua ichamonae cou pæba, xua pinae Jesús poxonae xanepanaya popona pata xantha. ² Pomonae cou xua baxua pepæbixæe barapomonae pinae copiya yatsicaewa tane daxita pocotsiwa Jesús exana pata xantha. Matautano pinae barapomonae Nacom Pejume Diwesi tatsi cuidubeiba. ³ Xan netsita wunæe daxota nanta xeinan xua yabara tayainyabiwa pomonae petinaexæe yawa pecueicueijeixæe daxita barapo diwesi xua pinae juinya Jesús exana. Bapoxonae cuita cata tinapoinchi Teófilo jinya neyaputaenexa tsane daxita pocotsiwa Jesús exana juinya xua copiya tsoponæe xuano xua bapoxonæe tsoponæeno. ⁴ Baraxua cata tinatsi jinya neyaputaenexa tsane barapo pexainyei jume po coyene ichamonæe bayatha cacuiduba.

Meje yabara poxonæe matatsunpin wunæe yabara tsiwunæe pæba xua Juan naexanaena pon jiwi Pebautisabin tsane

⁵ Caena bayatha poxonæe Herodes popona Judea nacuatha, xua pon Judea nacuapiwi peyanacua ewatsinchi, bapoxonæerũ barichi popona barapo nacuatha sacerdotepin pon pewun Zacarías. Bapon jiwana po sacerdotepiwi pia matabuxũ jiwi pewun Abías. Piseuri tatsi pewun Isabel. Piseuribe pia pamo susato jiwana pinsi tatsibe, bapon pewun Aarón pon yatsicaya tabũ ducua sacerdotepin. ⁶ Piseuribe Nacom tsita juntu coyene xanepanatsibe xua bara xanepanaya peexanaewabe. Pocotsiwa Nacom pon jiwi Pecanamataxeinaein, nacana jume diwesi itoroba baxua itapeta beta exaneibabe. Daxota jopa yabara pæbeibichibe jiwi po coyene xua baponbe natsiaenæe cuentabe xua abe peexaneibiwabe. ⁷ Ichitha pexui jopa xeinaeyobe, tsipei Isabel mawecowa, matautano tsipei bayatha acuewa irũ tsipei pebin bayatha amo tsecæe.

⁸ Caentacabi poxonæe Zacarías Ʃ pia matabuxũ jiwi pia cuitha exana Nacom nexa, bapon Zacarías xuya piamonæe itapetatsi. ⁹ Barapomonæe sacerdotemonæe, pia cui coyene xeina xua caein piamonæe jiwana itapetatsi poxonæe daxita barapomonæe nacuita Nacom pon jiwi Pecanamataxeinaein pin pia botha tatsi. Bapon Zacarías itapetatsi xua pejoniyænexa po tutu peainya cui tutu Nacom pin pia botha po tututha ichaxota exaneiba xua Nacom nexa. Barapo tututha Zacarías tauta petuxusi exanaenexa Nacom nexa xua Nacom peitorobixæe. ¹⁰ Poxonæe Zacarías cataunxuae tuxusi exanawiya petuxueiwa xua tauta Nacom nexa, barapoxonæe daxita pomonæe aisowa beumeinya barapomonæe Nacom tsipaebompa. ¹¹ Bapoxonæe Zacarías tsita naitutatsi matatsunpin pon Nacom pon jiwi Pecanamataxeinaein itoroba. Po muxunene pecoxa weya matatsunpin iboto caquita uncua po ibototha xua ichaxota tauteiba petuxueiwa Nacom nexa. ¹² Poxonæe Zacarías taeba matatsunpin jopa yaputaeyo xua peexanaewa, bichocono pejunuwixæe. ¹³ Ichitha matatsunpin Zacarías baraichi, jeichichi:

—Zacarías, jopa junuwinde. Nacom bara cajume tane poxonæe tsipaebame bapon. Methaunxuae jinseuri Isabel tanaexanaeinchi pexuyo. Jinseuri cata pabetsina pebin wuto. Xam wun dutsiname bapontha, po wun Juan, jei. ¹⁴ Juntu coyene weiweinaename. Barichi pinmonæe juntu coyene weiweinaena xua bapon penaexanaexæe tsane. ¹⁵ Bapon Juan Nacom pon jiwi Pecanamataxeinaein tsita ainya cui tsainchi. Bapon peatsaxæe mera jopa apæe tsane. Vino mera jopa apæe tsaneno. Poxonæe cataunxuae butiyotha eca bichocono juntu coyene yucaeinchi Nacom pia Pejumope tunaxũ tatsi pia peyapususwa tatsi. ¹⁶ Bapon cana exanaena xua ainya Israel nacuapiwi jume cowuntsina Nacom pon Pecanamataxeinaein jiwi xua barapomonæe barapo Nacom pia Nacom tatsi tsainchi.

¹⁷ Juan tsiwanaya poponaena xua pon xua Nacom itorobina bapon tsiwanaya poponaeinchi. Juan xeinaena Nacom pia Pejumo pe tñaxu tatsi pia peayapusuwa tatsi icha cain Elías ichi pon Nacom peitorobi jume pepaebin. Bapon Elías bayatha tupa. Juan exanaena xua pexui paxeiwi antobe tsaibi tsainchi. Matautano Juan cana exanaena xua jume cowantsina Nacom pomonae copiya Nacom pejumefebiwichi. Tsipei exanaena baxua, barapomonae tsiwanaya jume cui yabara najuntũ coyene wunaetsina, xua barapomonae pejume cowantsinexa Nacom pon Pecanamataxeinaein jiwi, jei matatsunpin.

¹⁸ Zacarías yainyaba matatsunpin, jeye:

—¿Eta nejumichim yatsicaewara xua inta naexanaena pexuyo? Apra xan amo tsecaein. Iru tapetsiriwa apra inta acue tsecaeba, jei.

¹⁹ Matatsunpin Zacarías jume notatsi, jeye:

—Apra xan Gabriel. Barapara Nacom ba imoxoyo caquita uncueiban. Nacom neitoroba bepara catsipaebichei barapo pexeinya jume diwesi. Daxota yatsicaya naexanaenaba nexanto. ²⁰ Incane jume taema. Yaitama jame maisa aunxuae jopa yabara nejume cowantsim, daxota methaunxuae jopa cuinaya paebim tsane. Yajume auneibiya yantacabi jopaname poxonae beya abũ nexanto naexanaena xuaunxuae catsipaebatsi, jei.

²¹ Poxonae Zacarías tsipaebauyatsi, Zacarías pesato beya ewatumeinchi pomonae Nacom tsipaeba pesatotha. Barapomonae nabarai: “¿Eta pocotsiwa metha Zacarías came jopa jondenaeyo Nacom pin pia bo werena?” najei. ²² Poxonae Zacarías matapainya jondena jopa itacupaetsi xua petsipaebiwa barapomonaetha. Bapoxonae barapomonae nanta xeina xua metha bara Zacarías tsita naitutatsi xua wunae barapo tututha poxorũ Zacarías pecobetha cowai barapomonaetha. Ichitha awiya came jopa cueicueijeiyõ.

²³ Poxonae Zacarías daxita nacobe weta xua exana Nacom nexa, Nacom pin pia botha, bapoxonae pia botha pona. ²⁴ Pirapaeyo Zacarías piseuri tatsi Isabel bũpana taecatsi pexuyo. Barapowa jopa naitutatsiyo cinco po xometiyobe. Saya pia botha eca. ²⁵ Barapowa nabarai, jeye: “Baxua Nacom inta exana pon Tanecanamataxeinaein. Bapon baxua inta exana xua jiwi jopa aura tana neexanaewa tsane”, najei bapowa.

Meje yabara poxonae matatsunpin wunae tsiwanaya paeba xua Jesús naexanaena

²⁶ Poxonae Isabel seis po xometiyobe yapucaewa poxonae pexuyo bũpana taecatsi, bapoxonae Nacom itoroba matatsunpin, pon pewũ Gabriel. Gabriel Nazaret tomara beitorobiyatsi po tomara eca Galilea nacuatha. ²⁷ Gabriel patopa pesiwa ponaenexa yabũyo, powa bapana jopa pebin pichiyo. Bapowa muxu pepichi pecotsiwa, pon pewũ José. Bapon José David pia pemomoxi susato jiwana tatsi. Caena bayatha David Israel nacuamonae itorobiya pia pepa peewatsinchi. Barapowa powa José pecotsiwaxae tatsi pewũ María. ²⁸ Matatsunpin Gabriel, patopa ichaxota María eca. Gabriel barai, María baraichi, jeye:

—María jaco. Nacom itapeta cayabara tsita jũntũ coyene xanepanatsi beyacaincha icha yabũxi. Matautano barapara Nacom pon jiwi Pecanamataxeinaein cabarũ popona, jei matatsunpin.

²⁹ Ichitha poxonae jume taeba bapowa, yabara jume cuitaya nabenaeca. Pia coutha nayainyaba jeye: “¿Eta xua bapon nejacoba jane?” najei. ³⁰ Matatsunpin María baraichi, jeichichi:

—María, jopa junuwinde, Nacom cayabara tsita jũntũ coyene xanepanatsi. ³¹ Matha taema xam methaunxuae pexuyo yapũruwa jinaename xuano bara pabetsiname nexanto. Bapoyo wũ dutsiname po wũ Jesús. ³² Bapon ainya cui peexanaeinchi tsainchi. Bapon wũ dutinchi, icha wũ jei tsainchi: ‘Nacom Pexanto tatsi pon peitabocõtha eca’, jei tsainchi. Nacom pon Pecanamataxeinaein jiwi, bapon pexanto cana exanaena xua bapon jiwi itorobiya pia pepa Peewatsinchi tsane icha matha David cana ichichi, pon Jesús pia pamo susato jiton tatsi. ³³ Bapon yacui tsitecaena xua jiwi peewatsinchi penaexanaewa tsane Israel piamonae susato saineiwi pexantha tatsi. Pia peitorobi coyenewa tatsi jopa weraweracae tsane, jei Gabriel, pon matatsunpin.

³⁴ Nexata María jume nota matatsunpin, jeye:

—¿Eta xua yapurwa jinocuaein pexuyo? Apra cataunxuae jopa nacueyabinyo, jei María.

³⁵ Matatsunpin jume nota, jeye:

—Nacom pia Pejumope tunaxu tatsi cata patopeicaena. Matautano Nacom pon bichocono pepa pejuntu coyene xanepanaein bapon, pia peayapuswa tatsi cantatsun matawacaicha nontsicaena icha be tsaquinaebowa ichi tsane. Daxota po pexuyo naexanaena, barapo pexuyo Nacom tsita juntu coyene xanepanaeinchi. Barapo pexuyo yabara jei tsainchi: ‘Nacom Pexanto tatsi’, jei tsainchi. ³⁶ Iruru barichi jinyamonaewayo Isabel, bequein bara acue tsecae, ichitha anoxuae pexanto yapurwa jina. Anoxuae barapowa seis po xometiyobe yapucaewa xua yapurwa jina bequein copiya mawecowa. ³⁷ Dapocotsiwa aibi pocotsiwa Nacom tsita ayapubetsi, tsipei bapon daxita bara yaputane.

³⁸ Nexata María namchi, jeye:

—Xan bara barapowayun xua taexanaewayon pocotsiwa Nacom pon jiwi Pecanamataxeinaein neitoroba. Bu moya bara Nacom inta exanaena xuaunxuae netsipaebame, jei María, matatsunpintha.

Bapoxonae matatsunpin napitaba.

Meje yabara poxonae María siwa pona, xua Isabel siwa poinchi

³⁹ Pirapaeyo María nainya pontaba tomara beya, po tomara eca ichaxota ira marafofowa xua Judea nacuatha. ⁴⁰ Baxota barapowa María joniya Zacarías pia botha tatsi. Bapoxonae Isabel jacobatsi. ⁴¹ Poxonae Isabel jume tane xua María jacobata, bapoxonae pia pexuyo tsiperu natsixibecatsi Isabel. Bapoxonae Nacom pia Pejumope tunaxu tatsi pia peayapuswa tatsi Isabel juntu coyene yucatsi. ⁴² Bapoxonae Isabel jume daunweya wawai xua María baraichi, jeye:

—¡Nacom cayabara tsita juntu coyene xanepanatsi beyacaincha icha yabuxi! ¡Barichi nexanto Nacom yabara tsita juntu coyene xanepanatsi! ⁴³ ¡Xam powa Tanecanamataxeinaein pena tatsim, bichocono auran xua tana nesiwa ponaewam tsipei jopa taainya cuiwayon! ⁴⁴ Poxoru poxonae cajume tainchi xua nejacobame bapoxonae pexuyo netsiperu weiweinaya natsixibeca. ⁴⁵ Juntu coyene weiweiname nejume cowantsixae tsipei bara nayabara jume cui wetsina pocotsiwa Nacom pon jiwi Pecanamataxeinaein yabara catsiwnae muxu duta pon Pecanamataxeinaein jiwi xua poxonae matatsunpin catsipaeba, jei Isabel.

⁴⁶ Nexata María namchi, jeye:

“Tajuntu coyene Nacom wunae jaintatsi pon jiwi Pecanamataxeinaein.

⁴⁷ Matautano tajuntu coyene Nacom yabara weiweinatsi pon Tanecapanepaein.

⁴⁸ Nacom neweyatane xua xan saya tapawin.

Bara barapowayun, powayun xua taexanaewa pocotsiwa Nacom neitoroba. Anoxuae xuano bexa tsaneno daxita jiwi pomonae naitapataya naexanaponaena wunae nejainchina tsipei Nacom nejuntu coyene weiweina exana bichocono beyacaincha icha yabuxi.

⁴⁹ Bapon Nacom pon peayapusu itorobi coyene pexeinaein inta bichocono wunae exana.

Bapon Nacom pepa pejuntu coyene xanepanaein.

⁵⁰ Bapon Nacom yaweneibina jiwi pia peantobewaxae pomonaetha pomonae copiya pecunuweibixaetsi.

⁵¹ Nacom tsita itaba xua peayapusu itorobi coyenewa xeina.

Baxua exana poxonae juntu coyene amanayaba

pomonaetha pomonae atsaquiya penayabara
paebiwu xua ichamonae peabiwu.

⁵² Nacom cui pita cana exana pomonaetha pomonae
pecanamataxeinaewi xua equeicha barapomonae jopa
naexanae tsane xua pecanamataxeinaewa jiwi.

Ichitha nama pomonaetha pomonae pecui pawu
naexana barapomonaetha Nacom cana exana xua
barapomonae penaexanaewa pomonae
pecanamataxeinae jiwi.

⁵³ Pomonae xua piyain barapomonaetha Nacom cana
exana xua barapomonae petonsanaewa xua
penabanaewa po pexaewa pexeinya pexaewan.
Matautano copei pexeinaewi barapomonaetha Nacom
cana exana xua barapomonae pecobesinaewa.

⁵⁴ Nacom yaweneiba pijimonae Israel nacuapiwi
pomonae pia pamo susatopin tatsi,
bapon Israel pon tanacuita Nacom.

Nacom jopa yabara juntemainaeyo xua
peyaweneibiwa barapo pijimonae peantobexae.

⁵⁵ Nacom daxita exana pocotsiwa Abraham wamo
susatopin yabara tsiwuna muxu dutatsi
xuano xua yabara tsiwuna muxu dutatsi pia
pemomoxi susato jiwi tatsi”, jei María.

⁵⁶ María cataunxuae acoibi po xometiyobe eca Isabel pia botha tatsi. Bapoxonae equeicha
caibe nawiya pia bo beya.

Meje yabara poxonae Juan naexana pon jiwi Pebautisabin

⁵⁷ Nexata Isabel xua bupana taecatsi pexuyo, peru cui nauchitane. Bapoxonae
pexuyo tanowaeincuatsi xua pexanto. ⁵⁸ Pomonae Isabel pia botha petaenaewichi,
iruru piamonae tatsi pomonae pecuariya petaenaewichi daxita barapomonae Isabel siwa
poinchi xua pejacobinexa tsainchi. Barapomonae yaputane xua Nacom pon Pecana-
mataxeinaeinxae jiwi Isabel beta taexanatsi poxonae Isabel dacotsiwa taitorobatsi
pexuyo. ⁵⁹ Poxonae ocho po matabibibe yapucaewa barapoxonae pexuyo wi thabatsi
xua pebin wutoxae xua ichaxota nareixacaeca. Barapomonae nanta xeina xua pexuyo
wan dutsinchi po wan pexuyo paxa tatsi xeina, xua po wan “Zacarías”, jei. ⁶⁰ Ichitha
pexuyo pena tatsi namchi barapomonaetha, jeye:

—Jume, jame bewa jei: ‘Juan’, jei, jei pexuyo pena tatsi.

⁶¹ Bapoxonae barapomonae Isabel baraichi, jeye:

—¿Exua? Jinyamonae dapocotsi wan aibiba, po wan: ‘Juan’, jei, jei barapomonae.

⁶² Nexata barapomonae moya pecobetha cowai Zacariastha. Matautano pecobetha
cowaya yainyaba, Zacarías yainyabatsi jeichichi: “¿Eta po wan jinya nexanto wan
dutsichi?” jei barapomonae. ⁶³ Zacarías wuca napaewa petinaenexa tsane. Bapoxonae
barapo napaewatha jei xua tina: ‘Apara pewan Juan’, jei. Bapoxonae barapomonae
najuntu coyene benaeca xua iru bapon namchi: ‘Bara pewan Juan’, jei. ⁶⁴ Poxonae
baxua exana, caena bapoxonae jemeicha Zacarías equeicha caewa paeba. Equeicha
ebato sadujei xua cueicueije. Zacarías tamropata pitaba xua wuna jainta Nacom.
⁶⁵ Bapoxonae daxita pomonae imoxoyo jinompa ichaxota Zacarías piseuribe poponabe,
daxita barapomonae junuwa. Matautano pomonae xua pejinompaewi daxita ichaxota po
ira xua marafowawa xua barapo Judea nacuatha, daxita barapomonae pebinouta pocot-
siwa xua bayatha petaexae. ⁶⁶ Daxita pomonae jume tane, barapomonae najuntu coyene
yabara nanta xeina nawita. Matautano caemonae nantiya nayainyaba najei: “¿Eta
bichane metha pexuyo poxonae wichabina?” najei barapomonae. Apara poxoru Nacom

pon Pecanamataxeinaein jiwi bichocono pexuyo petsita jũntũ coyene xanepanaexaetsi daxota barapomonaē baxua paeba.

Meje yabara xua Zacarías pia wei

⁶⁷ Pexuyo paxa tatsi Zacarías, jũntũ coyene yũcatsi Nacom pia Pejumope tũnaxũ tatsi pia peayapusũwa tatsi. Mataũtano bapon cueicueijeji po jumetha po jume Nacom cata. Zacarías namchi, jeye:

⁶⁸ “Nacom pon Pecanamataxeinaein jiwi, pon Israel pia Nacom tatsi, barabũ wũnae jainchinchĩ barapo Nacom. Tsipei bapon bayatha patopeica waxantha. Bapon bara piamonaetsi.

Mataũtano bapon bayatha naca capanepa.

⁶⁹ Pon Nacom nacata itorobica bapon pon jiwi pecapanenebiyaein pia peayapusũwatha. Bapon David pia pemomoxi susato jiwana tatsi. Bapon David pon Nacom pia petanacuitinchi xua peexanaewa pocotsiwa Nacom itoroba.

⁷⁰ Caena bayatha Nacom yabara naca tsiwũnae muxu duta, poxonaē itoroba pia peitorobi jume petapaebiwichi xua wanaca tsipaebinexa.

⁷¹ Bara naca tsipaeba xua pinae bapon pon Nacom wanacata itorobicaexae, pinae naca capanepaena pomonaē wanaca aitaetaebi jiwi pia xainya weya tatsi. Mataũtano pinae naca capanepaena pomonaē wanaca ita aenaē-aenei jiwi pia xainya weya tatsi.

⁷² Mataũtano Nacom naca tsipaeba xua pinae wamo susatopiwi yabara canantaxeinaeinchi xua peyawenaenexatsi. Mataũtano pinae jopa jũntemainae tsane xua wamo susatopiwi peyawenaponaewatsi xua bayatha Nacom yabara petsiwũnae muxu dutsixae baxua.

⁷³ Baraxua Nacom naca tsiwũnae muxu duta xua xainyeya bara paeba poxonaē Abraham tsipaebatsi, pon wamo susatopin.

⁷⁴ Nacom Abraham tsipaebatsi xua pinae naca capanenebiya tsane wanaca aitaetaebi jiwi weya. Baxua pinae nacata exanaena xua pinae waexanaewa tsane pocotsiwa naca itoroba, xuano jopa wacunuwinexa tsane ichamonae pinae.

⁷⁵ Mataũtano nacata exanaena xua pinae beta jinompaeinchi bapon peitabaratha, xuano xua jũntũ coyene xeicaeya jinompaeinchi daxita matabintha xua jopa abe waexanaponaewa.

⁷⁶ Iru xam taxantom Juan jiwi cayabara wũn dutsina pon Nacom peitorobi jume pepaebin, pon itabocotha eca, cayabara jei tsane. Baxua cayabara jei poxoru xam tsiwanaya patopaename pon jiwi pia pepa Pecanamataxeinaein.

Daxita jiwi juntu coyene wunaetsiname
pepatopaenexa tsane pon jiwi pia pepa
Pecanamataxeinaein, pon Mesías.

⁷⁷ Nacom caitoroba Juan xua jiwi neyaputane
neexanaenexa tsane xua Nacom junteinaena
jiwi abe pia peexanae cuiru coyenein tatsi.

Bapoxonae Nacom barapomonae capanenebiya
exanaeinchi bapon beya xua jopa Nacom petsita
natsicuentsixaetsi xua abe peexanaexae.

⁷⁸ Wanacom jopa juniya wanaca antobexae xuano
xua wanaca yawenaexae nacata itorobicaena
pexanto itaboco wetsica.

Nacata wunae exanaena icha xometo ichi xua
nacata wunae poxonae pentha pena matabixae.

⁷⁹ Poxonae patopeicaena pon Nacom itorobicaena,
bapoxonae bapon jiwi juntu cui
weiweinaya exanaeinchi.

Baxua exanaeinchi, pomonaetha pomonae pejume
cowantsiwi bequein copiya barapomonae

muxu pewerapae bichocono abe peexanaexae.

Yawa Nacom naca jumope antasx exanaena,
xua junteina wainompaenexa tsainchi”,
jei Zacarías xua pexanto barai pon Juan.

⁸⁰ Barapo pexuyo Juan wichabeca. Matautano ajuntayapusya popona xua Nacom
yabara yaputaepona. Juan ira xuepana susato tsurucuae nacuatha tsana popona, beya
poxonae po mataqueitha poxonae Juan tsita patopa Israel nacuapiwi pebautisabinexa
barapomonae.

2

*Meje yabara poxonae Jesús nowaeuncua pebin wuto barapo cae pin nacuathe
(Mt 1.18-25)*

¹ Iruru bapoxonae popona romanomonae itorobiya pia pepa peewatsinchi, pon pewun
Augusto. Bapon itoroba piamonae peexanaenexa censo matawun xua pewun tinaewan
xua daxita carepaya tomaran jiwi wun tinaeinchi. ² Barapo censo matawun xua pewun
tinaewan jiwi, baxua matapainya nacobe cui juta poxonae Cirenio Siria nacuapiwi pia
peyanacua ewatsinchi naexana. ³ Daxita jiwi tsanaya barompaya pia pepa tomaran bewa
benawibiyaena, ichaxota pia pamo jiwi tatsi tanowaeumeinchi. ⁴ Daxota José Nazaret
tomara wewarapiya, xua Galilea nacua weya. Belén tomara bewarapiya po tomara eca
Judea nacuatha. Baraxota caena bayatha David pon judiomonae itorobiya pia pepa
peewatsinchi nacatsiwa, pon José pia pamo jiwi susato jiwana tatsi, pon yatsicaya tabu
ducua. ⁵ José pecotsiwa baru pona pewun tinaenexa tsainchibe. Barapowa pewun María.
Barapowa pexuyo burana taecatsi. ⁶ Poxonae cataunxuae baraxota Belén tomaratha
ecabe, bapoxonae María xua burana taecatsi pexuyo, bara weperutanetsiba. ⁷ Bara
barapowa tanaexanatsi pexanto pon copiya tanacatsiwatsi. Barapo pexuyo paparuwantha
tsiwixitha mata quiyontababota jeriyotha, po naeyotha ichaxota vaca naepanaewa
xayathopa. Tsipei tutu quecona po bomuxutha ichaxota jiwi maiteiba pomonae pateiba
pomonae siwa poneiba.

*Meje yabara poxonae matatsunpiwi patsica ichaxota pomonaetha pomonae oveja duwei-
monae peyapu eenaewi*

⁸ Imoxoyo Belén tomaratha, pebiwi oveja duweimonae yapu eeneiba wexotha poxonae
merawi. ⁹ Nexata jemeicha barapo pebiwi tsita naitutatsi matatsunpin po matatsun-
pin itorobicatsi xua pon jiwi Pecanamataxeinaein itorobica. Matautano Nacom pon

jiwi Pecanamataxeinaein pia peitupanae coicha tatsino barapomonaе matawacaicha uncueicatsi. Barapo pebiwi bichocono junuwa. ¹⁰ Nexata matatsunpin barapomonaе baraichi jeye: “Jopa pajunuwinde. Apara paca tsipaebatsi pexeinya jume diwesi xua po diwesi daxita jiwi juntu coyene weiweina exanaeinchi. ¹¹ Poxoru anoxuae ichowayo tanaexanatsi pexuyo. Barapo pexuyo naexana David pia tomaratha tatsi xua Belén tomara. Barapo pexuyo, pon jiwi pecapanenebiyaein. Bapon apara pewun Mesías pon Pecanamataxeinaein jiwi, pon Nacom weitorobicatsi. ¹² Bara barapo pexuyo paca ita cayopitatsi xua pataebotsiname vaca pia boyotha. Pataebotsiname barapo pexuyo xua paparuwatha mata quiontabobotatsi jeriyotha ichaxota po naeyotha vaca naepanaewan xayathopa”, jei matatsunpin.

¹³ Bapoxonaе jemeicha equeicha icha matatsunpiwi pin bicheito naitubarucupa ichaxota icha matatsunpin uncua. Barapo matatsunpiwi itaboco wepatsica. Barapomonaе Nacom wunaе jaintatsi. Barapo matatsunpiwi namchi, jeye:

¹⁴ “¡Maisa bichocono Nacom wunaе jaintatsi pon itabocotha pecaein, peitorobixae pexanto! ¡Barabu jiwi junteма jinompa barapo irathe pomonaе xua Nacom juntu coyene weiweina exanatsi!” jei matatsunpiwi.

¹⁵ Poxonaе matatsunpiwi athabe ichicha caibeicha itaboco beicha, bapoxonaе pomonaе oveja duweimonaе peyapu eenaewi barapomonaе nabarai, jeye:

—Bu poinchi Belén tomara beya wataenexa tsane pocotsiwa bayatha Nacom exana, xuano xuaunxuae matatsunpin naca tsipaeba pon jiwi Pecanamataxeinaein nexa, jei barapomonaе pomonaе oveja duweimonaе peyapu eenaewi.

¹⁶ Barapoxonaе oveja duweimonaе peyapu eenaewi nainya ponarucupa. Barapoxonaе María iru José caxibarucupatsi. Iru pexuyo poyo boqueca jeriyotha vaca matabotha caxibarucupatsi. ¹⁷ Poxonaе barapomonaе taerucupa pexuyo, barapomonaе tsipaeba nawita ichamonaetha pocotsiwa bayatha barapomonaе petsipaebixaetsi matatsunpin xua pexuyo yabara. ¹⁸ Daxita pomonaе jume taerucupa baxua yabara najuntu coyene cabenaeca xua pomonaе oveja duweimonaе peyapu eenaewi pepaebixae baxua. ¹⁹ María barapo diwesi moya yawun xeina pejuntu coyenewatha xua jume cui cayabara nanta exaba. ²⁰ Bapoxonaе oveja duweimonaе peyapu eenaewi caibe nawibiya. Barapomonaе Nacom wunaе jaintatsi petaexae xuano pejume taexaeno xua bayatha matatsunpiwi pepaebixae. Barapomonaе namchi, jeye:

—Maisa Nacom pon pepa yatsicaewa pejuntu coyene xanepanaein, jei.

Meje yabara poxonaе María iru José caponabe Jesús Nacom pin pia botha tatsi

²¹ Poxonaе ocho po matabibibe yapucaewa, pexuyo wi thabatsi, xua pebin wutoxae xua ichaxota nareixacaeca. Baxua judiomonaе pia cui coyenetha tatsi. Barapoyo wun dutatsi pewun Jesús, po wun bayatha matatsunpin wun unuta xua María muxu tsipaebatsi poxonaе María cataunxuae abu jopa burana taecaetsi pexuyo.

²² Nexata matabi jopa, xua po mataqueitha María iru José bewa pepon naxanebibe xua sacerdotemonaepin taexanaena be pocotsi coyeneya bayatha Moisés pia peitorobi coyenewa tatsi paeba xua daxota jopa penataxobinexa. Bapoxonaе María iru José pexuyo caponabe Jerusalén tomara beya pecatsinexa tsanebe pexuyo Nacomtha pon jiwi Pecanamataxeinaein xua petsita itapeinya xeinaenexabe xua barapo pexuyo Nacom petanacuichiwa tsainchi poxonaе pinyo tsane. ²³⁻²⁴ Baxua exana tsipei Nacom pia peitorobi diwesitha tatsi tina, jeyei: “Daxita jiwi pia pexui tatsi, pebin wutixi, poxi copiya nacatsiwena, bapoxi Nacom itapeta pia taexanaetsi pocotsiwa Nacom ichichipa”, jei Nacom pia peitorobi jume diwesitha tatsi. Yawa ponabe pecaponaenexabe pepupunaein xua pecatsiwa Nacomtha xua sacerdotemonaepin pebexubinexa xua petautsinexa xua petuxusi exanaenexa tsane Nacomtha María nexa yawa José nexa. Nacom peitorobi coyenewa tatsi jeyei: “Bara iru ainya tsaqueintobe care. Ichacuitha icha tsaqueintobe aibi, bara iru ainya topibotobe care”, jei.

²⁵ Irurū barapoxonae pebin popona Jerusalén tomaratha, bapon pewun Simeón. Bapon pejuntū coyene xanepanaein. Bapon wūnae jainteiba Nacom. Bapon wūnae ewateiba xua Nacom itorobina pon Israel nacuapiwi pia Pecanamataxeinaein tatsi nexa. Bapon Israel nacuapiwi pu capanepaeinchi romanomonae weya. Barapo romanomonae icha nacua werena pona xua Israel nacuapiwi cueranta enatsi. Tsipei barapo romanomonae Israel nacuapiwi canamataxeinatsi. Nacom pia Pejumope tūnaxū tatsi Simeón barū popoinchi. ²⁶ Nacom pia Pejumope tūnaxū tatsi Simeón yaputane exanatsi xua pinae copiya taena Mesías pon xua Nacom, pon jiwi Pecanamataxeinaein itorobina. Bapoxonae xua pinae pirapaeyo tūpaena. ²⁷ Nacom pia Pejumope tūnaxū tatsi Simeón joniya exanatsi Nacom pin pia botha tatsi. Bara José irū pexuyo pena tatsino patopabe Nacom pin pia botha tatsi. Pexuyo capatopabe petacana exanaenexa tsainchibe icha be pocotsi coyeneya Moisés pia peitorobi coyenewatha tatsi itoroba. ²⁸ Simeón isapita pexuyo. Nacom wūnae jaintatsino. Simeón namchi, jeye:

²⁹ “Nacom pon Tanecanamataxeinaem,
bara anoxuae caitacūpa xua tanecopatsiwam
xua bara jūntemiya tatūpaewa tsane.

Tsipei anoxuae bara nayabara jume
wetame pocotsiwa bayatha yabara
netsiwūnae muxu dutame.

Poxoru xan bapon tsocuaein xua
exanan xua neitorobame.

³⁰ Xan yatsicaewa bara tanba,
pon Pecapanenebiyaein jiwi.

³¹ Bapon tan pon xua itorobicaeabame,
xua daxita jiwi taena xua bapon taeinchi.

³² Bapon yaputane exanaena xua Nacom yaputaeinchi
pomona jopa judiomona naexanaeyo.

Tsipei bapon be bapocotsin, xua poxonae jiwi
beta tane exainchi merawi xua xota yonoyonei.

Yawano bapon exanaena xua Israel nacuapiwi,
pomona jinyamona xua wūnae jaintinchi
xua ichamona wūnae jainchina”, jei Simeón.

³³ María irū José yabara najuntū coyene cabenaecabe pocotsiwa Simeón pexuyo yabara
paebatsi. ³⁴ Nexata Simeón barai, Nacom baraichi xua María yabara yawano xua José
yabara, jeye: “Juntū coyene weiweina exande baraponbe”, jei. Nexata Simeón, María
baraichi xua pexuyo pena tatsi:

—Barapo pexuyo Nacom itapeta xua bapon peexanaenexa tsane po coyene xua
Israel nacuapiwi ichamona Nacom beya peponaenexa xua ichacuiha icha ichamona
Nacom beya jopa peponaenexa tsane. Yawa Nacom itoroba barapo pexuyo, peitūbinexa
Nacom pia peayapusūwa ichitha ichamona jume cui aitaetaibi tsaibi tsane. ³⁵ Daxota
barapo pexuyo yaputaena pocotsiwa jiwi pejuntū coyeneintha nanta xeineibina. Ichitha
xam, María, daxita baxuan caajuntūcoyenerewe exanaena be poxonae ichūn canthūthū
tsapinopaena cusitha, jei Simeón xua María tsipaebatsi.

³⁶ Irurū baxota poponarū petsiriwa, pewun Ana. Barapowayo Nacom peitorobi
jume pepaebiwayo. Barapowa Fanuel pexantiyo tatsi. Aser pon yatsicaya tabū ducua
bapon pia pemomoxi susato jiwana tatsi. Barapowa bara nama penapataewa tsoponae.
Barapowa caena bayatha poxonae penowayo tsecae jitha eca. Pia pebinbe siete po
weiyobe nabarū poponabe. Bapoxonae pebin tūpa. ³⁷ Barapowa caena bayatha
piseuri cuenta tūpatsi. Anoxuae nama barapowa yaochenta y cuatro po weiyobe
jopaba. Barapowa Nacom pin pia bo weya jopa pichapeibiyo. Saya exaneiba pocotsiwa
Nacom itoroba merawintha yawa matababintha. Najainboteibano poxonae tsipaebeiba
Nacomtha. ³⁸ Poxonae Jesús caponatsi Nacom pin pia botha xua Nacom pecatsinexatsi

bapoxonae Ana imoxoyo caquita uncua barapomonaetha. Barapowa tsipaeba Nacomtha, jeye: “Nacom maisa jũntũ coyene weiweinan xua painta itorobame barapo pexuyo”, jei Ana. Bapoxonae Ana yabara paebaxoya pexuyo jiwitha pomonaetha pomonae wũnae ewateiba po coyene xua Nacom itorobina Israel nacuapiwitha pon Israel nacuapiwi capanenebiya exanaeinchi romanomonaetha weya.

Meje yabara poxonae Jesusbarũ caibe iyiya Nazaret tomara beya

³⁹ Nexata María irũ José wetabeba daxita xua Nacom, pon jiwi Pecanamataxeinaein, peitorobi jume coyenewa paeba. Bapoxonae caibe canawiyabe pexuyo Galilea nacua beya xua pia tomara beyabe, Nazaret tomara beyabe. ⁴⁰ Pexuyo wichabeca. Mataũtano bichocono daunwei nawita, peyaputae coyene xexeinaponano. Nacom tsita jũntũ coyene xanepanapoinchi.

Meje yabara poxonae Jesús siwa pona Nacom pin pia bo tatsi

⁴¹ Jesús pena tatsi irũ paxa tatsi daxita weitha poneiba Jerusalén tomara beya xua nataiba Pascua wũn matakabin. Barapo Pascua wũn jei, poxonae Israel nacuapiwi nanta xeina xua poxonae pinae bayatha pia pamo susato jiwi tatsi capanenebiya exanatsi Egipto nacua weya, xua Nacom capanenebiya. ⁴² Poxonae Jesús doce po weiyobe yapu jopa, María irũ José irũ Jesús, Jerusalén tomara be-iyi. Tsipei barapomonaetha pia cui xua poneiba barapo Pascua wũn matakabin nexa. ⁴³ María irũ José caibe nawirenabe pia tomara berena poxonae barapo matakabin weta. Ichitha pewowin Jesús naruntaba Jerusalén tomaratha. Jesús pena tatsi irũ José jopa taeyobe xua Jesús nacopataba. ⁴⁴ Nanta xeinabe xua Jesús mexeya itara napunaecaponawei pin bicheitha. Caentacabitha María irũ José namtotha naecaponabe, bapoxonae itax-anawiyabe pexanto. Necobauyabe pexanto pin bicheitha pia matabũxũyo jiwimon-aetha, pijiwimonaethano. ⁴⁵ Jopa pexanto caxinaebe. Bapoxonae equeicha caibe iyabe Jerusalén tomara beya, pewenaweneinexa tsanebe pexanto baxotiya equeicha.

⁴⁶ Poxonae acoibi po matakabiyobe yapucaewa Jerusalén tomaratha baxota pexanto caxinabe Nacom pin pia botha tatsi. Jesús naeca ichaxota pomonaetha jiwi pecuidubiwi Nacom pia peitorobi jume. Jesús jume tane barapomonaetha. Mataũtano yainyabano nawita barapomonaetha. ⁴⁷ Daxita pomonaetha jume tane, najũntũ coyene cabenaeca tsipei Jesús peyaputaein tsecae, mataũtano tsipei Jesús beta jume nota. ⁴⁸ María irũ José poxonae baxua cui tanebe najũntũ coyene cabenaecabe. María pexanto barai, jeye:

—Owae, ¿eta xua metha baxua painta exaname? Axa irũ xan paca yabara najũntũ coyene exabatsibe, paca jeitompatsi, jei.

⁴⁹ Jesús jume nota pena, jeye:

—¿Eta pocotsiwa metha ichawa beya pana nejeitompame? ¿Metha bara jopa payaputaem jampa xua bewa necui eenaena xua Taxa pia cui yabara tatsi? jei.

⁵⁰ Ichitha María irũ José jopa xapain yaputaeyobe pocotsiwa Jesús paeba.

⁵¹ Jesús caibe nanawiya pena tatsibarũtha Nazaret tomara beya. Jesús pena jume jejei tsaibi yawano José jume jejei tsaibichino xua daxita exana pocotsiwa Jesús itorobeibatsi. Jesús pena, daxita baxuan moicha cacui yabara cananta xeineibatsi pejũntũ coyenewatha. ⁵² Nexata Jesús wiwichabapona yawa jũntũ coyene ayapusũya exanapoinchino Nacom pia Pejumopetha tũnaxũ tatsi. Nacom irũ jiwi Jesús antobe tsoponaetsi.

3

Meje yabara poxonae Juan pon Pebautisabin jiwi cuiduba ira xuepana susato tsurucuae nacuatha

(Mt 3.1-12; Mr 1.1-8; Jn 1.19-28)

¹ Irũrũ Tiberio pon romanomonaetha itorobiya pia pepa peewatsinchi tatsi yapu jopa quince po weibe xua itorobiya canamataxeina barapo nacuanthapiwi. Bapoxonae irũ Poncio Pilato Judea nacuapiwi peyanacua ewatsinchi naexana. Barichi Herodes Galilea nacuapiwi peyanacua ewatsinchi naexana. Irũ Herodes peweicho tatsi Felipe, bapon

Iturea nacuapiwi peyanacua ewatsinchi naexana xua Traconite nacuathano. Barichiru Lisarias Abilinia nacuapiwi peyanacua ewatsinchi naexana. ² Barichiru Anás iru Caifás baponbe sacerdotemonaē pia pepa pentacaponaeinbe tatsibe. Barapoxonaerū Nacom Juan tsipaebatsi poxonaē ira xuepana susato tsurucuae nacuatha popona. Juan bapon Zacarías pexanto tatsi. ³ Juan popona ducuaeta Jordán nacuatha ichaxota Jordán mene. Nacom Pejume Diwesi tsipaeba ducuaeta jiwitha. Bapon barai jiwitha, jeye:

—Icha juntu coyene paxeinare painya neauraxae xua abe paexaname. Paca bautisabina ichamonae xua Nacom paca necayabara junte mainaenexa abe painya neexanae cuiru coyenein, jei Juan.

⁴ Baxua exana, peyabara jeichixaetsi xua peyabara jeixae pon Nacom peitorobi jume pepaebin Isaías poxonaē bapon tina pejume diwesi. Barapo diwesitha Isaías caena bayatha wūnae tsiwūnaeya yabara paeba xua Juan yabara. Isaías namchi, jeye:

“Jume tan pon wawai ira xuepana susato tsurucuae nacuatha.

Bapon wawai jeye: ‘Patsinajuntu cui coyene wūnaere pon jiwi pia pepa Pecanamataxeinaeinchi pia pepatopae wūnaeya tsane.

⁵ Daxita pamarafotontha paatsa jehebapoinyama.

Daxita petsuton paatsa caxiquiyama.

Pejeyajeyowa namton bopiya dubeinya paexande.

Pamarafotofotowa namton, panamto dameyama.

Apara jopa yabara janyo namton, jame apara yabara jan painya juntu coyenein.

Ichi paichim xua namton paxanebame bara paichinde pana najuntu cui wūnaere painya Nepacacanamataxeinaein nexa poxonaē bapon patopeicaena.

⁶ Daxita nacuapiwimonae yaputaena Nacom pia pecapanenebiyae coyene tatsi’, jei pon wawai”, jei Isaías pejume diwesitha.

⁷ Pin bicheito pata, xua Juan pebautisabinexa tsane. Juan barai barapomonae jeye: “¡Paxam pomonae pemuxutorobi jiwi pam! ¡Paxam be bara jomomonae pam, tsipei jomo ba cuitaya ducupa nawa! Bara paichim anoxuae paichichipame Nacom pacuitaya ducupame xua abe paca exanaeyainwa. Jopa papanenebiyaem tsane bequein bara paca bautisabinchi tsipei jopa pajuntu coyene xanepanaem Nacomtha. ⁸ Xaniwaicha painompare xain ichamonae paca cui tane xua icha juntu coyene painya nexainaewa Nacomtha, pon jiwi Pecanamataxeinaein. Tsipei bequein paxam pajam: ‘Waxainchi Abraham pia pemomoxi susato jiwichixaetsi Nacom naca capanenebiya exanaena’, pajam, daichitha paxam jopa xaniwaicha pajume cowantsim Nacom. Daxota Nacom itacupatsi xua paca cui matawenta pia jopa paca nepaca capanenebiyaenexa tsane. Matautano barichino Nacom itacupatsi xua jiwi forotsinchi barapo ibotixi weya, po ibotixi xote Jordán mene itapatha bobena. Barapo jiwi naexanaena, po jiwi yatsicaewa Abraham pia pemomoxi susato jiwi tatsi, pomonae pejume cowantsixaetsi Nacom. ⁹ Poxonaē pebin naein ūba, sipari ba canacui wūnaeta pecaucubobinexa po naein jopa nacoichiyo. Poxonaē barapo naein ucuboba nantatsun eta xua petautsinexa isototha. Paxam bara paca jūta ichiya paca cana exanaena. Nacom paca yabara nacui wūnaeta xua paca bebai tsane isototha, ichaxota po isototha jopa cuinaya itacounayiyo tsipei Nacom jopa xanepanaya pata taexanaem”, jei Juan.

¹⁰ Nexata barapomonae Juan yainyabatsi jeichichi:

—¿Eta pocotsiwa Nacom ichichipa pocotsiwa pata exanaenexa xua ichamonae pata necui taenexa tsane xua bara pajuntu coyene xanepanaein Nacomtha? jei barapomonae.

¹¹ Juan jume nota, jeye:

—Pon ainya camisabe xeina, bapon becatsipa pontha pon yatsicaewa jopa nauma xatatsiyo camisa. Iruru pon tamatecatsi penabanaewa bapon becatsipa ichun pontha pon jopa xeinaeyo penabanaewa, jei Juan.

¹² Barichiru pata, pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. Barapomonae pata xua Juan pebautisabinexa tsaneru barapomonae. Barapomonae Juan yainyabatsi, jeichichi:

—Pon jiwi Necuidubim, zeta pocotsiwa Nacom ichichipa pocotsiwa pata exanaewa tsane? jei barapomonae.

¹³ Juan jume nota, jeye:

—Saya meisa jiwi pawucaename paratixi xua romanomonae paca itoroba. Jopa yabara muxuitorobiya pawucaeinde ichawan, jei Juan.

¹⁴ Barichiru soldadomonae Juan yainyabatsi, jeichichi:

—Iru paxan, zeta pocotsiwa Nacom ichichipa pocotsiwa pata exanaewa tsane? jei barapomonae.

Juan jume nota, jeye:

—Jopa payabara jume daunweya wecobe noteibinde ichamonae piawan tatsi. Matautano ichamonae jopa pacui yopiteibinde pocotsiwa exana ichamonae poxonae apara jopa exaneibiyo. Bara saya pajuntu coyene weiweinare poxonae paratixi paxeiname poxonae ichamonae xua pata exaname xua soldadomonae pamxaem, jei Juan.

¹⁵ Daxita pomonae wunaewateiba xua Mesías pepatopeicaewa tsane, barapomonae poxonae Juan jume tainchi, barapomonae pejuntu coyeneintha nanta xeina, xua apara Juan metha apara Mesíaswei. ¹⁶ Ichitha Juan barai daxita barapomonae, jeye: “Xan paca bautisabatsi meratha. Ichitha nama patopaena pon bichocono ainya cui beyacaincha xan. Bapon pon pepa Pecanamataxeinaein jiwi. Xan saya tapawin. Daxota auran xua tataxu mu isanaxubiwa pia penataxu xatatsiwa. Bapon paca jiwana bautisabina Nacom pia Pejumope tunaxutha tatsi. Bapon paca jiwana cui copatsinchi xua atene tsane Jesús pejume cowuntsixaetsi tsane. ¹⁷ Bapon pon patopaena bapon bayatha tsinacobenata po paparato xua trigo xu nexa. Bapon trigo xu tsanaya seicaya matapepe jejebapona. Trigo xu jejebapona, trigo xu matabotha. Matapepe jejebapona petautsinexa isototha, ichaxota po isoto jopa cuinaya itacounayiyo. Bara juta cana ichi tsane jiwitha icha trigo xu cana ichiya ichichi jiwi Nacom tsananobina pomonae pejume cowuntsixaetsi pia nacuatha nexa. Ichamonae tsananobinchi pomonae jopa pejume cowuntsiwichi, petautsinexa isototha ichaxota xua jopa itacounayiyo”, jei Juan.

¹⁸ Icha diwesi yabara jumeno Juan barapomonaetha paeba Nacom pia pexeinya jume diwesi tatsi. ¹⁹ Matautano Juan biatane, Herodes biatainchi pon Judea nacuapiwi pia peyanacua ewatsinchi poxoru Herodes peweicho caiba yabuyo powa Herodías. Herodes peweicho tatsi pewun Felipe. Matautano Juan biatane poxoru bayatha Herodes abe exana nawita jiwitha. ²⁰ Ichitha daumetha equeicha Herodes abe exana xua Juan caenaetatsi ichamonaetha xua pecaponaenexa tsainchi jiwi pecubi botha.

Meje yabara poxonae Jesús bautisabatsi

(Mt 3.13-17; Mr 1.9-11)

²¹ Poxonae cataunxuae Juan jopa ecaeyo jiwi pecubi botha, Juan bautisaba ducuaeta jiwi. Barichi iru Jesús nabautisabatsi. Poxonae Jesús tsipaebuncua paxa, peitaboco nayausanaxuba. ²² Nacom pia Pejumope tunaxu tatsi patopeica Jesththa, be topiboto yaruneica. Jesús jume tane pocotsiwa peitaboco wetsipaebicatsi, jeichichi:

—Xam apara Taxantom pom bichocono cantobetsi, pom caitapetatsi. Nejuntu coyene weiweina exaname, jei Nacom.

Meje yabara pomonae Jesús pia pamo susatopiwi tatsi

(Mt 1.1-17)

²³ Poxonae Jesús treinta po weibe yapu jopa, bapoxonae nama tamropata pitaba barompaya pia pepa peexanae coyenewan po coyene Nacom Pejume Diwesi pecue-icueijeíwa xuano jiwi axaibi exana ducuaenaebiyano. Jesús, José pexanto tatsi. Daxita jiwi nanta xeina xua mexeya itara José yatsicaewa pexantowei. José, Elí pexanto tatsi. ²⁴ Bapon Elí, Matat pexanto tatsi. Bapon Matat, Leví pexanto tatsi. Bapon Leví, Melqui pexanto tatsi. Bapon Melqui, Jana pexanto tatsi. Bapon Jana, José pexanto tatsi. ²⁵ Bapon José, Matatías pexanto tatsi. Bapon Matatías, Amós pexanto tatsi. Bapon Amós, Nahúm pexanto tatsi. Bapon Nahúm, Esli pexanto tatsi. Bapon Esli, Nagai pexanto tatsi. ²⁶ Bapon Nagai, Maat pexanto tatsi. Bapon Maat, Matatías pexanto tatsi. Bapon Matatías, Semei pexanto tatsi. Bapon Semei, Josec pexanto tatsi. Bapon Josec, Judá pexanto tatsi. ²⁷ Bapon Judá, Joanán pexanto tatsi. Bapon Joanán, Resa pexanto tatsi. Bapon Resa, Zorobabel pexanto tatsi. Bapon Zorobabel, Salatiel pexanto tatsi. Bapon Salatiel, Neri pexanto tatsi. ²⁸ Bapon Neri, Melqui pexanto tatsi. Bapon Melqui, Adi pexanto tatsi. Bapon Adi, Cosam pexanto tatsi. Bapon Cosam, Elmadam pexanto tatsi. Bapon Elmadam, Er pexanto tatsi. ²⁹ Bapon Er, Josué pexanto tatsi. Bapon Josué Eliezer pexanto tatsi. Bapon Eliezer, Jorim pexanto tatsi. Bapon Jorim, Matat pexanto tatsi. ³⁰ Bapon Matat, Leví pexanto tatsi. Bapon Leví, Simeón pexanto tatsi. Bapon Simeón, Judá pexanto tatsi. Bapon Judá, José pexanto tatsi. Bapon José, Jonam pexanto tatsi. Bapon Jonam, Eliaquim pexanto tatsi. ³¹ Bapon Eliaquim, Melea pexanto tatsi. Bapon Melea, Mena pexanto tatsi. Bapon Mena, Matata pexanto tatsi. Bapon Matata, Natán pexanto tatsi. ³² Bapon Natán, David pexanto tatsi. Bapon David, Isaí pexanto tatsi. Bapon Isaí, Obed pexanto tatsi. Bapon Obed, Booz pexanto tatsi. Bapon Booz, Sala pexanto tatsi xua icha w̄n Salmón. Bapon Sala, Naasón pexanto tatsi. ³³ Bapon Naasón, Aminadab pexanto tatsi. Bapon Aminadab, Admin pexanto tatsi. Bapon Admin, Arni pexanto tatsi. Bapon Arni Esrom pexanto tatsi. Bapon Esrom, Fares pexanto tatsi. Bapon Fares, Judá pexanto tatsi. ³⁴ Bapon Judá, Jacob pexanto tatsi. Bapon Jacob, Isaac pexanto tatsi. Bapon Isaac, Abraham pexanto tatsi. Bapon Abraham, Taré pexanto tatsi. Bapon Taré, Nacor pexanto tatsi. ³⁵ Bapon Nacor, Serug pexanto tatsi. Bapon Serug, Ragau pexanto tatsi. Bapon Ragau, Peleg pexanto tatsi. Bapon Peleg, Heber pexanto tatsi. Bapon Heber, Sala pexanto tatsi. ³⁶ Bapon Sala, Cainán pexanto tatsi. Bapon Cainán, Arfaxad pexanto tatsi. Bapon Arfaxad, Sem pexanto tatsi. Bapon Sem, Noé pexanto tatsi. Bapon Noé, Lamec pexanto tatsi. ³⁷ Bapon Lamec, Matusalén pexanto tatsi. Bapon Matusalén, Enoc pexanto tatsi. Bapon Enoc, Jared pexanto tatsi. Bapon Jared, Mahalaleel pexanto tatsi. Bapon Mahalaleel, Cainán pexanto tatsi. ³⁸ Bapon Cainán, Enós pexanto tatsi. Bapon Enós, Set pexanto tatsi. Bapon Set, Adán pexanto tatsi. Bapon Adán, Nacom pexanto tatsi.

4

Meje yabara poxonae Jesús j̄unt̄u coyene j̄uj̄utatsi caurimonae pia pentacaponaein tatsi xua Jesús abe coyeneya petaexanaenexa tsane

(Mt 4.1-11; Mr 1.12-13)

¹ Poxonae Jesús j̄unt̄u coyene ȳucatsi Nacom pia Pejumope t̄unax̄u tatsi bapoxonae caibe nawiya Jordán mene weya. Nacom pia Pejumope t̄unax̄u tatsi Jesús mata cayatsi ira xuepana susato tsurucuae nacua beya. ² Baraxotiya Jesús popona cuarenta po matabibibe. Caurimonae pia pentacaponaein tatsi Jesús piraichi j̄unt̄u coyene j̄uj̄utatsi xua Jesús abe coyeneya petaexanaenexa tsane. Barapo cuarenta po matabibetha Jesús jopa nabanaeyo. Poxonae barapo matabin yapucaewa Jesús bichocono jainpa. ³ Caurimonae pia pentacaponaein tatsi, Jesús baraichi, jeichichi:

—Icha xam yatsicaya Nacom Pexantom, netsita it̄ure. Barapo iboto itorobare xain pan naexanaxoya, jei caurimonae pia pentacaponaein tatsi.

⁴ Jesús jume nota. Caurimonae pia pentacaponaein tatsi jume notatsi, jeye:

—Nacom Pejume Diwesitha namchi: ‘Jopa metha bepa meisa jiwi betiya una jinom-paetsipae pan’, jei Nacom Pejume Diwesi, jei Jesús.

⁵ Caurimonae pia pentacaponaein tatsi Jesús matabapoinchi ichaxota po demxuwa bichocono atororo. Baraxotiya Jesús tsita itutarabatsi daxita nacuan, xua barapo cae pin nacuathe. ⁶ Bapoxonae caurimonae pia pentacaponaein tatsi Jesús baraichi, jeichichi:

—Daxita barapo nacuan cacatinchi jiwí neitorobinexa tsane. Matautano daxita cacatinchi nacuan pia pewunaewan, tsipei bayatha necata daxita barapo nacuan xua taitorobeibiwa coyenewan. Tawaxae catsin ichantha pontha pon xua ichichipan xua tacatsiwa. ⁷ Ichaunxuae nentabocototha uncuaename taitabaratha, xuano ichaunxuae newanae jainchiname xua nenanta xeinaewaxae xua xan jinya tacacanamataxeinaeinchi, bapoxonae baxuan daxita bara cacatsinchi jinya Necanamataxeinaenexa barapo nacuan, jei caurimonae pia pentacaponaein tatsi.

⁸ Ichitha Jesús jume nota, jeye:

—Yaitama Nacom Pejume Diwesitha namchi, jeye: ‘Meisa wanae jainde jinya Necanamataxeinaein Nacom. Meisa bapon yatsicaewa taexande pocotsiwa caitoroba’, jei Nacom Pejume Diwesitha, jei Jesús.

⁹ Cotacaya nama equeicha Jesús matabapoinchi Jerusalén tomara beya, Nacom pin pia botha pentatupa beicha capoinchi. Jesús baraichi, jeichichi:

—Icha bara xaniwaicha Nacom Pexanto tatsim, wenaxoreinque. ¹⁰ Nacom Pejume Diwesitha namchi, jeye:

‘Nacom itorobina pia matatsunpiwi necayanabinexa.

¹¹ Barapo matatsunpiwi asiya cawaetaboutsina pecobetha, xua jopa necataxu tsaquituncuaenexa tsane ibototha poxonae wenaxorecame’, jei Nacom Pejume Diwesitha, jei caurimonae pia pentacaponaein tatsi.

¹² Jesús jume nota, jeye:

—Barichi Nacom Pejume Diwesitha namchi, jeye: ‘Jopa juntu coyene jujutsiya wacaeinde Nacom pon jinya Necanamataxeinaein, xua cajume jejei tsane necayawenaenexa poxonae jopa xapain exanaem’, jei Nacom Pejume Diwesitha, jei Jesús.

¹³ Poxonae caurimonae pia pentacaponaein tatsi yaputane xua jopa xeinaeyo po coyenetha equeicha Jesús pejuntu coyene jujutsiwa tsainchi, bapoxonae nama Jesús wepu poinchiba xua saya bara caeto nexa.

Meje yabara poxonae Jesús tamropata pitaba pia penacuichiwa Galilea nacuathe
(Mt 4.12-17; Mr 1.14-15)

¹⁴ Jesús caibe iya Galilea nacua beya. Matautano jopa juniya xeinaeyo Nacom pia Pejumope tunaxu tatsi pia peayapusu itorobi coyenewa tatsi. Daxita jiwí pomonae jinompa barapo nacuathe Jesús yabara paebinoutatsi. ¹⁵ Jesús cuidubeiba barapomonae judiomonae pia penacaetutsi bontha tatsi xua daxita tomarantha. Barapomonae Jesús wanae jainteibatsi.

Meje yabara poxonae Jesús Nazaret tomaratha popona
(Mt 13.53-58; Mr 6.1-6)

¹⁶ Nexata Jesús Nazaret tomara beya pona, po tomaratha ichaxota wichaba. Judiomonae barompaya pia pentaquei seicae matababitha tatsi Jesús joniya judiomonae pia penacaetutsi botha tatsi tsipei pia cui xeina xua peponeibiwa barapocotsi botha. Jesús xenta iya barapomonae peuncuaenexa peitabaratha, peyorobinexa Nacom Pejume Diwesi, xua barapomonae pejume taenexa. ¹⁷ Nexata Jesús catatsi Isaías pejume diwesi, pon Nacom peitorobi jume pepaebin, pon caena bayatha tupa. Poxonae Jesús diboro pataxuba baxota taeba pocotsiwa baxota paeba, xua jeye:

¹⁸ “Nacom pia Pejumope tunaxu tatsi neyanta popona.

Nacom neitapeta tatacuaeicueijeinexa tsane pia pexeinya jume diwesi tatsi pomonaetha

pomonaē peacopeibi jiwi.

Matautano neitoroba xua tayawenaenexa

pomonaē anthuthutane.

Matautano neitorobano xua tayawenaenexa

pomonaē caurimonaē itorobatsi nawita xua

barapomonaē pepanenebiyaenexa.

Matautano neitorobano xua tane tacana

exanaenexa pomonaē peitata nacutsi jiwi.

Matautano neitorobano xua tayawenaenexa

pomonaē xua bichocono taayapubetsi xua

pejinompaewa tsane xua barapomonaē jopa pexeinaē

dubenaēbiyaenexa tsane barapo coyenein.

¹⁹ Matautano neitorobano xua jiwi

tatsipaēbinexa po coyene xua Nacom nacui

wunaeta xua jiwi peyawenaewa tsainchi

pomonaē ichichipa xua Nacom pejume taewatsi”,

jei Isaías pejume diwesitha, jei Jesús xua yoroba.

²⁰ Poxonaē Jesús barapo diboro acataraba, bapoxonaē cata pontha pon jiwi peyawenequeibin judiomonaē pia penacaetutsi botha tatsi. Bapoxonaē Jesús econeca. Daxita pomonaē baxota ena, Jesús necotenatsi xua cui ewatenatsi xua pecueicueijejewa tsane Jesús. ²¹ Bapoxonaē Jesús tamropata pitaba xua paēba, jeye:

—Anoxuae xuaunxuae pajume taneme baxua apara barapo mataqueithe Nacom nayabara jume cui weta painya itutha, jei Jesús.

²² Daxita carepaya jiwi Jesús xanepanaya yabara paēbatsi. Daxita barapomonaē najuntū coyene cabenaeca xua pejume taexae xua po jume barapomonaē petsipaēbixaetsi. Barapomonaē nantiya nabarai, jeye:

—Maisa jume xeica bapon, jume wunaeya paēba. ¿Bara bapon José pexanto tatsi jampa? najei barapomonaē.

²³ Jesús barai barapomonaē, jeye:

—Metha pana netsipaēbichipame icha be pocotsi diwesiyo iche xua pecayabara jūta pepaēbi diwesiyo xua ba jei: ‘Pon jiwi neyawūbin, jinya coutha nayawūbare’, xua ba jei. Barichi anoxuae pana nejam tsane: ‘Xua paxan pajume tan xua juinya Capernaum tomaratha exaname, barichinde xote exande jinya tomaratha’, pana nejam tsane, jei Jesús.

²⁴ Awiya cataunxuae Jesús cueicueijejē. Equeicha namchi, jeye:

—Xaniwaicha paca tsipaēbatsi pon ba Nacom peitorobi jume pepaēbin pia nacua-monaēpiwi ba aitafaetabichi. ²⁵ Xaniyan paca baraichi xua caena bayatha poxonaē Elías popona pon Nacom peitorobi jume pepaēbin, ainyawaxi powaxi pecuenta werapaewaxichi pia seuriwi Israel nacuaṯa jinompa. Barapo nacuaṯa cuinaya jopa duneicaeyo acoibi po weiyobe xuano seis po xometiyobethano. Daxita jiwi piyain barapo nacuaṯa Israel nacuaṯa. ²⁶ Nacom jopa itorobiyo, Elías jopa itorobichi xua peyawenaenexa tsane caewayo jiwana powaxi pecuenta werapaewaxichi pia seuriwi xua Israel nacuaṯa. Ichitha saya meisa Nacom itoroba, Elías itorobatsi powatha powa pecuenta tupaewayotsi piseuri, powa popona Sarepta tomaratha, xua Sidón nacuaṯa xua barapowayo peyawenaenexatsi. ²⁷ Barichi Israel nacuaṯa pinmonaē jinompa pomonaē peperū sawatsi jiwimonaē, poxonaē Eliseo popona pon Nacom peitorobi jume pepaēbin. Eliseo jopa jiwana axaibi exanaeyo. Ichitha meisa Eliseo Naamán axaibi exanatsi pon bichocono peperū sawinchi. Bapon Naamán, Siria nacupin, jei Jesús.

²⁸ Poxonaē barapomonaē jume tane pocotsiwa Jesús paēba pomonaē judiomonaē pia penacaetutsi botha ena, bapoxonaē barapomonaē Jesús casebatsi. ²⁹ Asiya umenarūcūpa barapomonaē. Jesús tomara peūma beitaweyatsi. Jesús capoinchi pitapatororo itapa

beya, po tsututha bomuxun jeba, xua bara wepexorecaenexa tsainchi Jesús. ³⁰ Ichitha Jesús barapomonaе xenta iya, pu seicataba.

Meje yabara poxonaе pebin pon cauri xeina
(Mr 1.21-28)

³¹ Nexata Jesús pona Capernaum tomara beya po tomara eca Galilea nacuatha. Baxotiya Jesús cuiduba jiwi po mataqueitha pentaquei seicae matabitha. ³² Barapomonaе yabara najuntu coyene cabenaeca tsipei pocotsiwa bapon barapomonaе cuidubatsi be pon peyaputaеin pia peayapusu itorobi jume coyeneya tatsi paeba.

³³ Judiomonaе pia penacaetutsi botha tatsi pebin baxota eca, pon cauri xeina. Bapon bichocono wawaya exanatsi cauri. Bapon Jesús baraichi xua namtsebiya wawai, jeye:

³⁴ —¡Jesús Nazaret tomarapim, warapare pata xainya weya! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebicham? Paca yaputainchi yawa paca yaitainchi. Xam apara pon Nacom caitoroba, pon pepa Nentacuiruyapuxanepanaem, jei cauri.

³⁵ Jesús itaweta cauri, jeye:

—¡Moyande! ¡Bapon wepu ponde! jei Jesús.

Nexata cauri pebin iratha xotsi barapomonaе peitutha tatsi. Pebin wepu poinchi cauri, saya junteма. Equeicha jopa ateneyono. ³⁶ Daxita barapomonaе yabara najuntu coyene cabenaeca, nayainyaba namchi:

—¿Eta po jumera xua bapon paeba? Jamaisa barapo pebin itaweta caurimonaе pia peayapusuya itorobi coyenewatha. Matautano barapo caurimonaе bara pona.

³⁷ Daxita jiwi paebinouta Capernaum tomara cuariyatha pocotsiwa Jesús exana.

Meje yabara poxonaе Jesús axaibi exana Simón Pedro pamiyo tatsi
(Mt 8.14-15; Mr 1.29-31)

³⁸ Bapoxonaе Jesús judiomonaе pia penacaetutsi bo tatsi wejoniya. Jesús joniya Simón pia botha tatsi. Simón pamiyo tatsi atene, domaebatsi. Barapowa piamonaе tatsi Jesús jume daunweya wacatsi xua bapowa axaibi peexanaenexa tsainchi. ³⁹ Jesús imoxoyo caquita uncua pentasipatha. Jesús domaetha namchi, jeye:

—Barapowatha jopa bayatha yacacaewiyande, jei Jesús.

Domae aichurucuae. Nainya barapowa nantacotaxuba. Bapoxonaе bapowa pexaewa apata barapomonaetha.

Meje yabara poxonaе Jesús axaibi exana pin bicheitomonaе
(Mt 8.16-17; Mr 1.32-34)

⁴⁰ Poxonaе tabopiya tsanaicha pomonaе piamonaе barompaya taatenetsi pomonaе xua jopa nayaromae jupaeyo, daxita barapomonaе Jesús betacarendenatsi. Jesús ichawa beya jayabapona pecobetha, bapoxonaе daxita carepaya axaibi. ⁴¹ Barichi pomonaе cauri pexeinaewi Jesús taitaweta barapomonaе. Barapo caurimonaе wawaya jeye:

—Apara xam Nacom Pexantom, jei.

Bequein caurimonaе baxua paeba ichitha Jesús awiya daumetha itaweta caurimonaе. Jesús jopa najume copatsiyo xua equeicha pepaеbiwa tsane poxoru barapo caurimonaе yaputane xua bapon yatsicaewa Mesías pon Nacom itorobica.

Meje yabara poxonaе Jesús cueicueijeji Nacom Pejume Diwesi judiomonaе pia penacaetutsi bontha tatsi
(Mr 1.35-39)

⁴² Poxonaе baya juntucuru pentha tsina, Jesús tomara weiya ichaxota jiwaibi bara beya pona. Ichitha jiwi Jesús jeitatsi. Barapoxonaе bapomonaе pata ichaxota Jesús popona. Barapomonaе aichaxaibi xua Jesús pewepu warapaewa barapomonaе. ⁴³ Ichitha Jesús namchi, jeye:

—Bewa iru yabara paebin Nacom pia pexeinya jume diwesi tatsi, po diwesi yabara xua Nacom waba jiwi petanaexanaenexatsi piamonaе pomonaе Nacom juntu coyene itorobiya ewata. Apara baxua netsiyabara itorobica, jei Jesús.

⁴⁴ Daxota Jesús paeba ducuaeta Nacom Pejume Diwesi Judea nacuatha xua ju-
diomonae pia penacaetutsi bontha tatsi.

5

Meje yabara poxonae Jesús piamonae yawena xua duwei yamona
(Mt 4.18-22; Mr 1.16-20)

¹ Caentacabi Jesús Genesaret pucua itapatha uncua. Pin bicheito pata bichocono
nacucunaxuba Jesustha, tsipei barapomonae ichichipa jume tane Nacom Pejume Diwesi
tatsi. ² Jesús ainya jerabe tane pucuatha taetabo itapatha, po jera saya naebe. Tsipei
duwei peyamonaewi bayatha nacui wetarucupa, matautano poxoru bayatha nonobouna
taetabotha. Barapomonae pia peyamonaewan iquicompa. ³ Nexata Jesús jeratha
nontabiya Simón pia naetha tatsi. Jesús Simón baraichi:

—Tsiwiyo neyana torotaxoyam, jei Jesús.

Bapoxonae Jesús eca jeratha. Jesús mene wecuidubecarena jiwi Nacom Pejume Diwesi.

⁴ Poxonae Jesús najume weta, Simón baraichi, jeye:

—Jeratha ponde ichaxota pentatheibũ. Paxoyama painya neyacamonaewa painya
necapirenaenexa duwei, jei Jesús.

⁵ Simón, Jesús jume notatsi, jeye:

—Pon jiwi Necuidubim, bequein barapo merawithe payamonompan, pacobesa patan.
Yaitama aunxuae neitorobame, methaunxuae xoyaein tayamonaewa, jei Simón.

⁶ Poxonae barapomonae xoya, duwei pin tunto capirena, muxu peucubabi xua
peyamonaewa. ⁷ Nexata barapomonae moya pecobetha itacowaeba pomonae penabarũ
yaxunobompaexae, pomonae icha jeratha jinompa itacowaebatsi, penayawenaenexa.
Barapomonae pata. Jera ainya naebe wuntabe duwei. Muxu pebunopaebe jerabe.

⁸ Simón pon Jesús icha wãn duta, xua Pedro baraichi, bapon tane baxua. Bapoxonae
bapon Jesús peitabaratha tauncuatsi pentabocotha. Simón, Jesús baraichi, jeye:

—Tanecanamataxeinaein, newepu ponare, tsipei xan abe taexanaein, jei Simón Pedro.

⁹ Poxoru Simón Pedro junuwiya najũntũ coyene cabenaeca yaitama peyacamonaewi
watha capirena duwei pin tunto. Irũ pomonae Simón Pedro pia jeratha petaenaewichi
barapomonae irũ junuwiya najũntũ coyene cabenaeca. ¹⁰ Irũ Zebedeo pexantobe tatsi,
Santiago irũ Juan baponbe irũ junuwiya najũntũ coyene cabenaecabe. Baponbe ponbe
Simón pebarũ yamonaeinbe tatsibe. Ichitha Jesús Simón baraichi, jeichichi:

—Simón, jopa junuwinde, anoxuae caexanaeinchi xua pinmonae yawenaename xua
barapomonae pejume cowũntsiwa tsane Nacom icha bayatha ichim poxonae yamona
duwei nawita, jei Jesús.

¹¹ Nexata poxonae barapo jerabe botounabe, barapoxonae barapomonae baxuan
daxita nacui barapenta. Bapoxonae barapomonae Jesús puna poinchi.

Meje yabara poxonae Jesús axaibi exana pon peperũ sawinchi
(Mt 8.1-4; Mr 1.40-45)

¹² Jesús icha tomara siwa pona. Bapoxonae pebin patopa pon peperũ sawinchi.
Poxonae Jesús taebatsi, bapon Jesús peitabaratha tatsi pentabocottha tauncuatsi yawa
ira betaeuncuareca. Bapon Jesús jume daunweya wũcatsi, jeichichi:

—Pon Necanamataxeinaem jiwi, icha bara ichichipame bara caitacupa xua axaibi
tana neexanaewam, tsipei jinya neayapusũ itorobi coyenewa nexainaem, jeichichi Jesús
bapon.

¹³ Nexata Jesús, nacobe yota, yawa mata jayaba bapon, pon peperũ sawinchi. Jesús
barai, jeye:

—Bara ichichipan. ¡Bara axaibinde! ¡Bara caaperũxaibi exanatsi! jei Jesús.

Bapoxonae bapon nainya taachurucaetsi xua peperũ sawiwatsi. ¹⁴ Nexata Jesús barai
bapon, jeye:

—Jopa yabara tsipaebinde ichamonaetha xua neaxaibiwam. Saya jame meisa ponde sacerdotemonaepintha xua nenaitutsinexa xua bapon necataenexa xua bayatha ne-jumewa. Bapontha care pocotsiwa xua pecatsiwa Nacomtha, pocotsiwa xua bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua peru wunaem, jei Jesús.

¹⁵ Ichitha daxita jiwi taju beya jume taetaepona pocotsiwa Jesús exana. Pin bicheiton nacaetutapona Jesustha pejume taenexa tsane pocotsiwa Jesús exana. Matautano nacaetutapona xua Jesús peaxaibi exanaenexa barapomona. ¹⁶ Ichitha Jesús ichaxota jiwaibi bara beya poneiba compa. Baxotiya Paxatha tsipaebeiba.

Meje yabara poxonae Jesús axaibi exana pon pecuenobinchi

(Mt 9.1-8; Mr 2.1-12)

¹⁷ Caentacabi Jesús cuidubauya. Iruru baxotiya ena pomona fariseomona jiwana tatsi. Iru baxota ena pomona jiwi pecuidubiwi Moisés pia peitorobi coyenewa tatsi. Barapomona daxita tsiqui tomaraxi werendena po tomaraxi ena Galilea nacuatha. Iru daxita tsiqui tomaraxi werendena po tomaraxi ena Judea nacuatha, iru ichamona Jerusalem tomara werendena. Nacom pia peayapusu itorobi coyenewa tatsi Jesús yawenatsi, daxota axaibi exana peatene jiwi. ¹⁸ Nexata pebiwi pata. Barapo pebiwi carendena pon pecuenobinchi. Xua xota pocotsiwatha maiteiba, barapomona barapocotsiwatha carendenatsi pecuenobinchi. Barapomona bepa bomuxutha cajojoniya ei xua bepa Jesús peitabaratha tabotichei. ¹⁹ Ichitha barapomona jopa cajojoniyaeyo bomuxutha tsipei pin bicheito boupa quecona. Barapo bo matatupa pereca. Nexata daxota barapo bo matatupa beenoinya. Barapomona barapo penta tupa weatsa caxina xoreca. Nexata barapomona nantiya opi quetabe bumacatha barapo pemaiteibiwatha. Bapoxonae bara weyawa yorecatsi barapo pecuenobinchi jiwi pexainya deca tatsi, Jesús peitabarayo decano tatsi. ²⁰ Jesús tane xua barapomona yabara cui jume cowanta xua Jesús bara peitacupaewatsi xua axaibi peexanaewatsi pon pecuenobinchi. Daxota Jesús barai pecuenobinchi, jeye:

—Tajiton cayabara cui junte mainatsiba abe jinya neexanae cuiru coyenein, jei Jesús.

²¹ Nexata pomona jiwi pecuidubiwi Moisés pia peitorobi coyene, iru fariseomona, daxita barapomona caemona natsipaeba, najei: “Maisa bapon bichocono abe tsipei pocotsiwa bapon paeba bichocono Nacom tsita ajumebetsi. Jiton dapocotsin aibi pon xua jiwi cacui yabara junte mainaya juntu puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jiwi cacui yabara junte mainaya juntu puxana exanatsi abe pia peexanae cuiru coyenein tatsi”, najei barapomona.

²² Ichitha Jesús yaputane xua barapomona caemona natsipaeba. Jesús barai barapomona, jeye:

—¿Eta pocotsiwa metha baxua pana natsipaebame? ²³ ¿Eta po jumetha baran tsane pecuenobinchin? ¿Metha jan tsane: ‘Abe jinya neexanae cuiru coyenein cata junte mainatsi’, jan tsane? Ichacuitha ¿metha jan tsane: ‘Asiya uncuatabare yawa ponare’, jan tsane? ²⁴ Daxota aunxuae paca tsita itapeinya xeinaeinchi xua xan ponxaein Nacom Tananeitapetsin, xua xeinan taayapusu itorobi coyenewa xua bara tana neitacupaewa xua jiwi tayabara cacui junte mainaya juntu puxana exanaewa abe pia peexanae cuiru coyenein tatsi pomona jinompa barapo cae pin nacuathe, jei Jesús.

Bara nexata pecuenobinchi Jesús barai, jeye:

—Catsipaebatsi, nontaponde. Jinya nemaituncuaewa pire. Jinya bo be-iyandeno, jei Jesús.

²⁵ Bapoxonae pon pecuenobinchi caena nainya nontapona barapomona peitutha tatsi, yawa pita xua pemaituncuaewa. Pia bo be-iyawa Nacom wuna jaintatsi poxonae namtotha ecapona. ²⁶ Barapomona daxita yabara najuntu coyene cabenaeca yawa Nacom wuna jaintatsi. Barapomona junuwiya namchiya jeye:

—Anoxuae waxainchi tainchi xua pewunaewa pocotsiwa jopa yaputaetsi, jei barapomona.

Meje yabara poxona Levi wabatsi, Jesús waba
(Mt 9.9-13; Mr 2.13-17)

²⁷ Poxona baxua Jesús nacui weta, bapoxona Jesús pontaba. Jesús tane pebin pon pewun Leví. Leví bapon pon paratixi pentoma noteibin po paratixi jiwi bewa catsibina pon romanomona pia pepa peyanacua ewatsinchi nexa. Bapon eca ichaxota paratixi matoma noteibeca. Jesús Leví baraichi, jeichichi:

—Nepuna ponde, jei Jesús.

²⁸ Bapoxona Levi nontapona. Daxita baxua xubota, cuenta pona. Bapoxona Jesús puna poinchi.

²⁹ Pirapaeyo Leví pin penabanaewa exana pia botha xua Jesús tsiexanatsi. Irü pebiwi pinmona pomona paratixi pentoma noteibiwi po paratixi jiwi bewa catsibina pon romanomona pia pepa peyanacua ewatsinchi nexa, barapomona Jesús baru eca pexaethopeibiwatha, irü ichamonaeno baru enatsi penabaru nabanaenexa tsane.

³⁰ Ichitha fariseomona irü pomona jiwi pecuidubiwi Moisés pia peitorobi coyenewa, daxita barapomona Jesús pijimona abeya tsipaebatsi xua Jesús yabara. Barapomona namchi, Jesús pijimona tatsi baraichi, jeichichi:

—Maisa Jesús abe exana poxoru baru xayeca pomona paratixi pentoma noteibiwi po paratixi jiwi bewa catsibina pon romanomona pia pepa peyanacua ewatsinchi nexa. Matautano baru xayeca pomona abe peexanae cuiru coyene peexanaewi, jeichichi Jesús pijimona tatsi barapomona.

³¹ Jesús jume nota barapomona, jeye:

—Pomona ba xua xaniwaicha jinompa xua jopa ateneyo barapomona ba jopa canantawenonaeyo pon jiwi peyawubin. Saya jame meisa pomona ba atene canantawenona pon jiwi peyawubin. ³² Barichinno xan patopan apara tha jopa tawabinexa tsane pomona pejuntu coyene xanepanae jiwi. Apara tha meisa tawabinexa tsane pomona peajuntu coyenebe jiwi, xua barapomona icha juntu coyene pexinaenexa tsane Nacomtha, jei Jesús.

Meje yabara poxona Jesús yabara yainyabatsi po coyene xua Nacom peyabara nainbotsiwatsi
(Mt 9.14-17; Mr 2.18-22)

³³ Nexata barapomona fariseomona irü pomona jiwi pecuidubiwi Moisés pia peitorobi coyene, daxita barapomona Jesús yainyabatsi, jeichichi:

—Pomona Juan pia pepuna jinompaewichi jopa juniya nainboteibiyo xua jopa juniya tsipaebibiyo Nacomtha. Irü pomona fariseomona barichirü. Ichitha nama jinyamona daxua jopa cou daichiyo, saya cou ɱ penabaneibi xuano saya ɱ peapeibi cou, jeichichi Jesús.

³⁴ Jesús jume nota barapomona, jeye:

—Paxam jopa bewa paexanaem tsane xua ichamona nainbotsina, pomona patsiwabame pexaewa xua penabanaenexa xua poxona pebin pecotsiwa pita. Poxona cataunxuae awiya bapon eca poxona jiwi nabane, jopa ba bapoxona nainbotsi.

³⁵ Ichitha icha pon aena piowa pita, bapon caena nainya waetabatsi, ichamona waetaba xua bapon taju pecaponaenexatsi, bapoxona jame jiwi ba bewa wecoyeya yabara nainbotsi, xua equeicha bapon caewa pepatopaewa tsane, jei Jesús.

³⁶ Matautano Jesús pecayabara juta pepaebi diwesiyo tsipaeba barapomona, jeye:

—Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru dorouto, bapoxona barapo dorouto abe tsanaya. Tsipei poxona barapo dorouto matanaxuba barapo pena paparuwa natsaquetabiya. Poxona barapo pena paparuwa natsaquetabiya equeicha wan tsitsipanarena barapo dorouto. Bapoxona equeicha pin wan tsanaya beyacaincha xua poxona copiya. ³⁷ Matautano jiwi ba pena vino mera jopa

eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto tsipei barapo bocoto jopa nayeyetaponaeyo poxonae barapo vino mera atsaxa. Barapo pena vino mera naxuba xuano barapo bocotono naxuba poxonae barapo bocoto tsitsica. ³⁸ Daxota bewa jame pena vino mera eparecae pena bocototha. Bapoxonae pena vino mera jopa naxubiyo, xuano pena bocoto jopa nacubiyo poxoru boco yeyena xuano poxoru pena bocoto. ³⁹ Pon ba xua peru vino mera apa pirapaeyo jopa ichipaeyo pena vino mera. Bapon jei: 'Maisa peru vino mera xeica, beyacaincha pena vino mera', jei.

6

Meje yabara poxonae Jesús pijimonaе tatsi yaboto nota trigo xu judiomonaе barompaya pia pentaquei seicae mataqueitha tatsi

(Mt 12.1-8; Mr 2.23-28)

¹ Caentacabitha judiomonaе barompaya pia pentaquei seicae matakabitha tatsi Jesús pijimonaе baru iya pabi iyiya. Jesús pijimonaе tatsi xunumenapona trigo xu, bapoxonaе barapomonaе pecobetha xu mata pepeta yawa xu xane. ² Nexata Jesús pijimonaе tatsi tayainyabatsi, fariseomonaе yainyaba, jeye:

—¿Eta pocotsiwa baxua paexaname? Apará jiwi jopa yabara cui copatsiyo xua ichamonaе penacuichiwa barapo matakabithe, xua judiomonaе barompaya pia pentaquei seicae matakabi tatsi, jei barapomonaе.

³ Jesús jume nota barapomonaе, jeye:

—Barapo tajimonaе jopa apará abe exanaeyo. ¿Jopa payabara yorobim pocotsiwa bayatha David exana poxonaе jainpa poxonaе iru pijimonaе tajainpatsiru? Bapon David pon caena bayatha Israel nacuamonaе itorobiya pia pepa peewatsinchi. ⁴ Bapon David iru pijimonaе tatsi barapomonaе Nacom pin pia botha jojoniya. David xane pan, po pan ichamonaе cana exana xua Nacomtha pecatsiwatsi. Iru barapo pan David pijimonaе cata xua pexaenexaru. Barapomonaе xane bequein barapo Nacom pia peitorobi coyenewatha copata xua saya meisa sacerdotemonaе itacupatsi xua pexaewa barapo pan.

⁵ Jesús namchi, jeye:

—Xan ponxaein Nacom Tananeitapetsin taitorobi coyenewa xeinan xua jiwi tacoya taitorobiwa pentaquei seicae matakabitha, jei Jesús fariseomonaetha.

Meje yabara poxonaе Jesús cobe wunaе exana pon pecobe mubinchi

(Mt 12.9-14; Mr 3.1-6)

⁶ Icha matakabitha judiomonaе pia pentaquei seicae matakabitha tatsi Jesús joniya judiomonaе pia penacaetutsi botha tatsi. Matautano tamropata pitaba xua cuiduba barapomonaе. Barapo botha eca pon pecoxa weya pecobe mubinchi. ⁷ Pomonaе jiwi pecuidubiwi Moisés pia peitorobi coyene tatsi, iru fariseomonaе baxota ena. Daxita barapomonaе Jesús necotenatsi pecui taenexatsi icha bara metha Jesús cobe wunaе exanaena pentaquei seicae mataqueitha pon pecobe mubinchi. Icha Jesús pon pecobe mubinchi axaibi exanatsi, bapoxonaе barapomonaе xeinaena po coyenewa xua Jesús abe peyabara paebiwatsi tsainchi. ⁸ Ichitha Jesús yaputane pocotsiwa barapomonaе nanta xeina. Jesús barai pontha pon pecobe mubinchi, jeye:

—Nontaponde, uncuare xote, jei Jesús.

Bapon nontapona, asiya uncua Jesús peitabaratha tatsi. ⁹ Nexata Jesús barai ichamonaе, jeye:

—Paca yainyabinchi, ¿eta xua copata pentaquei seicae matakabitha? ¿Wunaе jampa? ¿Abe jampa? ¿Eta xua, xua exana jane? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

¹⁰ Nexata Jesús naita muxunene cauncuapona, tane pomonaе pematawacaicha enaewichi. Jesús barai pon pecobe mubinchi, jeye:

—Nacobe doire, jei Jesús.

Bapon nacobe doita. Nainya cobe wunae tsanaya. ¹¹ Ichitha barapomonaе bichocono Jesús casebarucupatsi. Barapomonaе caemonaе natsipaeba najei:

—¿Etabe cui yabara ichainchi Jesús? jei barapomonaе fariseomonaе.

Meje yabara poxonaе Jesús itapetsiya waba pia peitorobiwi tatsi pomonaе xua doce poyobe (Mt 10.1-4; Mr 3.13-19)

¹² Barapo matacabintha Jesús pona demxuwatha petsipaebinexa Paxa. Baraxotiya Jesús Paxa matowa tsipaeba barapo merawitha. ¹³ Poxonaе baya xometo pentha tsina bapoxonaе Jesús pijimonaе waba. Barapomonaе jiwana itapetsiya waba doce poyobe, pomonaе baraichi xua jeye: “Jesús pia peitorobi jiwu tatsi”, yabara jeichichi. ¹⁴ Meje barapo doce poyobe pomonaе Jesús pia peitorobiwi tatsi. Meje barapomonaе: Simón, pon icha wun “Pedro”, baraichi, iru ichun pewun Andrés, pon Simón peweicho tatsi, iru ichun pewun Santiago, iru ichun pewun Juan, iru ichun pewun Felipe, iru ichun pewun Bartolomé. ¹⁵ Iru ichun pewun Mateo, iru ichun pewun Tomás, iru ichun pewun Santiago, pon Alfeo pexanto tatsi, iru ichun pewun Simón, pon celotemonaepin. ¹⁶ Iru ichun pewun Judas, pon Santiago pexanto tatsi, iru ichun pewun Judas Iscariote, pon Jesús caenaetaxubatsi ichamonaetha xua Jesús pebexubinexatsi.

Meje yabara poxonaе Jesús pin bicheitomonaе cuiduba (Mt 4.23-25)

¹⁷ Barapo doce poyobe Jesús demxuwa webaru dunareca, peira matafatanaewatha baru patopa. Baxota peira matafatanaewatha pin bicheito Jesús ewatumeinchi. Ichamonaе pomonaе Jesús pejume cowuntsiwichi baxota umena. Iru Jerusalén tomarapiwi pata xua Judea nacuapiwi. Barichi Tiro tomarapiwi, Sidón tomarapiwino pata. Barapo tomarabe mar mene itapatha ecabe. Daxita barapo pin bicheito pata xua Jesús pejume taenexatsi xua cueicueijeji xuano xua Jesús pia axaibi exanaetsi peatene jiwu. ¹⁸ Pomonaе cauri pexeinaewi barapomonaе Jesús taitaweta cauri. ¹⁹ Daxita jiwu ichichipa xua Jesús pejayabiwatsi tsipei Jesús daxita jiwu axaibi exana pia peayapusuwatha.

Meje yabara poxonaе Jesús yabara cuiduba pejuntu coyene weiweinaewa, xuano jopa pejuntu coyene weiweinaewa

(Mt 5.1-12)

²⁰ Nexata Jesús pijimonaе necota. Jesús barai pijimonaе, jeye:

“Pajuntu coyene weiweiname bequein anoxuae peacopeibi jiwu pam. Tsipei Nacom pia pejume cowuntsiwichi tatsi piamonaе tatsi pam, pomonaе Nacom juntu coyene itorobiya ewata.

²¹ “Pajuntu coyene weiweiname, bequein bara anoxuae pajainpame, bexa tsane patonsanaename.

“Pajuntu coyene weiweiname, bequein bara anoxuae pawecoyam, bexa tsane bichocono pajuntu coyene weiweinaename.

²² “Pajuntu coyene weiweiname poxonaе bequein jiwu paca ita aenae-aenei, bequein paca itaweta bo weya xuano poxonaе bequein abeya paca muxutainyaba. Matautano poxonaе bequein jiwu paca yabara abe paeba. Barapomonaе baxua paca cana exana tamonaе jiwu pamxaem xua xan ponxaein Nacom Tananeitapetsin. ²³ Bichocono pajuntu coyene weiweinare barapo matacabitha, tsipei peitabocotha Nacom paca catsibina pia pexeinya peitupanaewan pocotsiwan Nacom paca juntana jeba pia nacuatheicha. Icha barapomonaе paca ichi, barapomonaе pia pamo susato jiwu tatsi, Nacom pia peitorobi jume pepaebiwi barichichi abeya biatainchi yawa abe exanatsi.

²⁴ “¡Ichitha pai jaibo paxam, anoxuae copei paacabem tsobenaem poxoru methaunxuae equeicha jopa painya neraichiwa tsane!

²⁵ “¡Pai jaibo, paxam pomonaе anoxuae patonsanabename tsipei methaunxuae bexa tsane pajainpabenaename!

“¡Pai jaibo, paxam pomonaе pajuntu coyene weiweinabename tsipei anoxuae methaunxuae pajuntu coyene wecoyam tsane!

²⁶ “¡Pai jaibo, pomonae jiwi wūnae paca jainteibena painya necueicueijeixae po diwesi jopa Nacom Pejume Diwesiyo! ¡Icha barapomonae paca ichi barichi barapomonae pia pamo susato jiwi tatsi, wūnae jainta pomonaetha pomonae naerabiya paeba xua pinae barapomonae Nacom pia peitorobi jume pepaebiwi!” jei Jesús.

Meje yabara poxonae Jesús yabara cuiduba xua jiwi bewa antobe pomonaetha pomonae pia peaitafaetabi jiwichi

(Mt 5.38-48; 7.12)

²⁷⁻²⁸ Equeicha Jesús namchi, jeye: “Paxamtha pomonae beta pana nejume taneme, barapomonae paca baraichi: Paantobeinde pomonae bequein painya nepaca caaitafaetabi jiwi. Matautano beta pata taexande pomonae paca ita aenae-aenei. Matautano amanaya beta papaebare pomonaetha pomonae paca yabara abe paeba. Nacomtha patawūcare pomonae xua paca biatane. ²⁹ Icha ichūn paca jumata tsaquinopa pecobetha, moya equeicha icha jumata pana najumata caeware xua painya necajumata tsaquinopaenexa. Icha ichūn pacata pita peamūtiyū camisa, po camisa xua athawe peruyaewa yawa bara saya moya pacopare xua equeicha painya nepacata pichiwa tsane camisa. ³⁰ Daxita coyenexi pocotsiwa ichamonae paca wūca moya bara pacachabeibare. Pon pacata pita painyawa jopa equeicha caewa pawūcaeinde. ³¹ Paexande ichamonaetha xua po coyene painya neichichipaewa xua barapomonae beta painya nepacata exanaewa tsane.

³² “Icha saya meisa paantobem pomonae painya nepaca antobexae, Nacom jopa paca cui yabara matomacae tsane. Tsipei apara irū pomonae peajūntūcoyenebewi antobe ichamonae pomonae peantobewixaetsi. ³³ Barichi icha saya beta pata exaname pomonae beta pacata exana, Nacom jopa paca cui matomatsiyo tsaneno baxua. Tsipei pomonae peaitabe jiwi barapocotsi coyene irū exana ichamonaetha pomonae peaitabe jiwitha. ³⁴ Barichi icha saya pacatsibame ichamonae xua bexa xuya painya nepaca catsibinexa, Nacom jopa paca cui matomatsiyo tsane baxua. Tsipei pomonae peaitabe jiwi barichi icha peaitabe jiwitha catsiba xua xuya equeicha pecatsibeibinexatsi. ³⁵ Paxam jame bewa paantobem tsane painya nepaca caaitafaetabi jiwi, xuano jame beta bewa paexanaem ichamonaetha. Matautano jame bewa bara pacatsibim ichamonae xua jopa painya neyabara ewateibiwa xua xuya painya nepaca catsibeibiwa tsane. Icha baxua paexanaename Nacom paca catsibina pia nacuatheicha pocotsiwa xua paca jūntana jeba pia nacuatheicha. Matautano Nacom paca cana exanaena pia pexanton jiwi tatsi pam, pon peitabocotha eca. Tsipei Nacom pejūntū coyene xanepanaein, daxota yawena barapomonaetha, pomonae bequein xua jopa wecobe noteibiya jacobebiyo xuano xua peaitabe jiwi. ³⁶ Payabara cui nanta xeinare po coyene xua ichamonae painya neyawenaewa. Icha be Nacom ichi xua yabara cui nanta xaina po coyene xua peyawenaenexatsi jiwi, bara paichinde”, jei Jesús.

Meje yabara poxonae Jesús cuiduba xua jiwi jopa bewa yabara paebina ichamonae xua penatsicuentiwa xua abe peexanaexae

(Mt 7.1-5)

³⁷ Equeicha Jesús namchi, jeye: “Jopa ichamonae payabara paebinde xua penatsicuentiwa xua abe peexanaexae. Nexata bapoxonae Nacom jopa paca yabara paebi tsane painya xua nenatsicuentiwa xua abe painya exanaexae. Ichamonae jume daunweya jopa pajande: ‘Apara bapon picoya, apara bapon picoya’, jopa pajande. Nexata Nacom jopa paca daichi tsane baxua. Pacui yabara jūntemainare po coyene ichamonae pacata abe exana, nexata Nacom paca cui yabara jūntemainena xua abe painya neexanaewa. ³⁸ Ichamonaetha, jopa juniya pacatsibinde, nexata Nacom jopa juniya paca catsibi tsane. Painya dorotha paca catsina, beta pacata pesabina, yawa beta pacata xatabacorecaena pecobetha yawa pacata nūnūcūtaxuina. Yawa pacata wūnca exanaena. Icha daunweya payabara paebiname xua penatsicuentiwa ichamonae

xua abe peexanaexae, Nacom barichi daunweya paca yabara paebina xua painya nenatsicuentsiwa xua abe painya neexanaexae”, jei Jesús.

³⁹ Jesús tsipaeba barapomonaе pecayabara j̄ta pepaebi diwesiyo, jeye: “Pon ba peitata nacutsin jopa itacupaetsi xua pematacaponaewa ich̄un pon ir̄a peitata nacutsin. Icha bapon baxua exanaetsipabe, baponbe fetotha joparecaetsipabe. ⁴⁰ Pon ba aena nacuiduba xua peyaputaenexa, bapon jopa be bapocotsinyo, pon pecuidubin jiwi, pon peyaputaein. Ichitha pon poxonaе wetsina xua nacuiduba, bapon be pia pecuidubin cui j̄pa”, jei Jesús.

⁴¹ Barichi equeicha Jesús paeba caeintha pomonaе pijimonaе tatsi jiwana icha pecayabara j̄ta pepaebi diwesiyo, jeye: “Xam be jinya jiton itata taneme poxonaе naep̄tiyo itata jopiyatsi, ichitha jopa taem xua ir̄ur̄a xam nama pin naep̄to neitacuere-totha ducua. Barapocotsi j̄ta coyeneya ichi, xam ba jinya jiton cui taneme xua poxonaе abe exana, ichitha jopa nayaputaem xua ir̄ur̄a xam bara ichim nama bichocono abe exaname. ⁴² Icha jopa taem pin naep̄to xua neitacuere-totha ducua, jopa caitacupaeyo xua nejeiwa jinya jitontha: ‘Tajiton, cata jutinchi naep̄tiyo xua ducua neitacuere-totha’, xua nejeiwa. Xam nepaebin xua ich̄un exana xua baxua neexanaewatha ir̄a. Xam copiya nata jure barapo pin naep̄to xua neitacuere-totha ducua. Bapoxonaе beta taename nejuetsinexa tsane naep̄tiyo xua jinya jiton peitacuere-totha tarucuatsi”, jei Jesús.

Meje yabara poxonaе Jesús yabara cuiduba xua pinae jiwi yaputane nae penacoichixae (Mt 7.17-20; 12.34-35)

⁴³ Jesús namchi, jeye: “Po naein pexeinya naein jopa bapana nacoichiyo po pethei camatsa thei. Barichi po naein camatsa naein jopa bapana nacoichiyo po pethei pexeinya thei. ⁴⁴ Jiwi yaputane nae po nae penacoichixae. Daxita jiwi yaputane xua higo thei, po pethei pexeinya thei jopa bapana teracae po naetha sojei xua camatsa nae. Matautano jiwi yaputane xua uva thei po thei unbototha xuwa jopa bapana teracae naexitha. Bara j̄ta ichi jiwi yaputane xua pebin pej̄nt̄a coyene xanepanaein pon xanepanaya peexanaeinxae. ⁴⁵ Pon ba pej̄nt̄a coyene xanepanaein, bapon ba jame ba paeba pocotsiwa pexeinya coyene, pej̄nt̄a coyene xanepanaeinxae. Barichi pon ba peaj̄nt̄a coyenebein bapon ba abe paeba, peaj̄nt̄a coyenebeinxae. Pocotsiwa jiwi nanta xaina pej̄nt̄a coyenetha, baxua ba pecoiboto tsina cueicueijej̄”, jei Jesús.

Meje yabara poxonaе Jesús ainya bom̄x̄ube yabara paeba (Mt 7.24-27)

⁴⁶ Equeicha Jesús namchi, jeye: “Paxam pana neyabara jam: ‘Patatanecanamatax-einaem’, pajam, daichitha jopa paexanaem pocotsiwa paca itorobatsi. ⁴⁷ Incane yabara paca tsipaebinchi pon xua patopa taxantha, nejume naitomata pocotsiwa paeban, matautano exanano pocotsiwa ichichipan, bapon beta popona Nacom nexa. ⁴⁸ Bapon barapocotsi j̄ta coyeneya nacana exana icha be ichi pon bo acabanota peira matat-sucaewatha xua ichaxota ira daunwei. Meje jeye: Copiya m̄th̄un taj̄u exanareca pecuaranobinexa bom̄x̄u naeton. Poxonaе mene matacaewaxuba, barapo bom̄x̄u jopa joparenaeyo poxoru naeton taj̄u umenareca xuano poxoru bom̄x̄u uncua pematatsucaewatha ichaxota ira daunwei. ⁴⁹ Ichitha nama pon nejume taetha, xuano jopa exanaeyo pocotsiwa ichichipan, bapon be meje: Bapon be pocotsin bo acabanota ichaxota ira matafatsana, xuano naeton jopa taj̄u umenarecaeyo. Poxonaе mene matacaewaxuba, barapo bom̄x̄u joparena poxoru naeton jopa taj̄u umenarecaeyo, xuano poxoru bom̄x̄u uncua ichaxota ira matafatsana. Barapo bom̄x̄u nainya joparena. ¡Maisa bom̄x̄u bichocono abe!” jei Jesús.

Meje yabara poxonaе Jesús axaibi exana pon soldadomonaе romanomonaе pia pentacapon-aein tatsi tanacuitatsi (Mt 8.5-13)

¹ Poxonae Jesús baxuan najume weta xua barapomonae jume tane, bapoxonae Capernaum tomara beya pona. ² Baxotiya popona romanomonae soldadomonae pia pentacaponaein tatsi, pon xeina pia petanacuiteibinchixaetsi. Barapon bichocono antobe pia petanacuitinchi. Bapon pon petanacuiteibin bichocono atene, xua awatha petupae. ³ Poxonae romanomonae soldadomonae pia pentacaponaein tatsi Jesús yabara jume tainchi, bapoxonae itoroba pitiri jiwi judiomonae jiwaniapiwi Jesús beya xua petaxaibi exanaenexa tsainchi pia petanacuichin tatsi. ⁴ Barapomonae Jesús imoxoyo caquita poinchi. Barapomonae Jesús jume daunweya tsipaebatsi, jeichichi:

—Barapo pentacaponaein, pentacui xanepanaein, daxota yawende. ⁵ Poxoru bapon wanacuamonae wunaeyabara cananta xeineibatsi. Matautano bapon itoroba xua acaba pata penacaetutsi bo pia paratixitha, jei barapo pitiri jiwi.

⁶ Nexata Jesús barupoinchi barapomonae. Ichitha poxonae Jesús muxu pepatopae, romanomonae soldadomonae pia pentacaponaein tatsi pia botha tatsi, barapo soldadomonae pia pepa pentacaponaein tatsi, bapon itoroba pia jiwi xua petacajume jeichinexa tsainchi Jesustha: “Tanecanamataxeinaein, xan saya tacui pawin. Auran xua xam nepatopaewa tsane tabohta tsipei xam ainya cuim. ⁷ Daxota jopa patopaeinyo nexainya beya, tsipei xam ainya cuim, xua paebiname pia peatenewatha tatsi bapoxonae bapon axaibi bara tsane pon inta nacuiteiba. ⁸ Xan bichi xeinan tanecanamataxeinaein, pon neitoroba. Barichiru xeinan soldadomonae pomonae itorobeiban. Poxonae ichun itoroban: ‘ponde’, jan, bapon pona. Poxonae ichun waban: ‘antha’, jan, bapon patopa. Pon inta nacuita, itoroban: ‘inta exande’, jan, inta exana”, jeye pentacaponaein, jei pomonae penacajume caitorobixaetsi.

⁹ Poxonae Jesús baxua jume taeba, jume cui yabara cananthuthu nanta xeinanaya cabenaeca beta pepaebixae romanomonae soldadomonae pia pentacaponaein tatsi. Jesús necotaba pomonae puna poinchi, barai, jeye:

—Xaniyan paca tsipaebatsi Israel nacuatha iru dapocotsin jopa caxinaeinyo pocotsin icha pon iche pon tana necui yabara jume cowuntsin xua bara neitacupa xua axaibi taexanaewa jiwi, jei Jesús.

¹⁰ Poxonae barapomonae botha caibe nawibiya, barapomonae taeba ducupa xua axaibiya boca romanomonae soldadomonae pia pentacaponaein tatsi pia petanacuichin tatsi.

Meje yabara poxonae Jesús petupaein asu exana pexanto tatsi powa pecuenta tupaewayotsi piseuri

¹¹ Poxonae Jesús baxua nacui weta, bapoxonae Naín tomara beya pona. Jesús cueyabatsi pijimonae, iru pin bicheitomonaeno napon. ¹² Poxonae Jesús muxu pepatopae tomaratha, Jesús tane xua pewowin petupaein cajojondenatsi xua pemuthuthu xubinexa tsainchiba, pon pena tsita compa. Barapo pewowin powa pecuenta tupaewayotsi piseuri barapowa pexanto tatsi. Barapowa puna poinchi pin bicheito. ¹³ Bapon Jesús pon Pecanamataxeinaeinxae jiwi, barapowa yabara cui nanta xeinatsi. Jesús barai bapowa, jeye:

—Jopa wecoyande, jei Jesús.

¹⁴ Nexata Jesús imoxoyo caquita pona petupaein, yacaja jayabano. Pomonae yacaja capona yacaja caumenarucupa. Jesús barai petupaein, jeye:

—Pewowin catsipaebatsi, nontaponde, jei Jesús.

¹⁵ Nexata pewowin pon tupa, nantacotecataba, yawa tamropata pitaba xua pecueicuei-jeiwa. Jesús coxiwatha cana cobenata pexanto. ¹⁶ Poxonae pin bicheito taerucupa baxua, barapo pin bicheito bichocono junuwa. Barapoxonae barapo pin bicheito Nacom wunaeyaintatsi, barapomonae namchi:

—Nacom peitorobi jume pepaebin, pon ainya cui, waxantha patopa. Nacom siwa pona peyawenaenexa pijimonae pomonae pia pejume cowuntsiwichi, jei barapomonae.

¹⁷ Daxita jiwi jume tane xua Jesús exana Judea nacuatha, iru po nacuan imoxoyo caquita ena Judea nacuatha.

*Meje yabara poxona Juan itoroba pijimona Jesús beya peyainyabinexa tsainchi Jesús
(Mt 11.2-19)*

¹⁸ Juan pijimona tsipaebatsi daxita baxua xua Jesús exana. Juan waba ainya pebinbe pijimona jiwana tatsi. ¹⁹ Baponbe Juan itoroba Jesús beya xua najume caruta baponbetha matauta xua Jesús peyainyabinexatsi xua icha metha bara baponde jei pon bewa patopeicaena, bapon Cristo, jei. Ichacuitha metha ichun jampa, xua pawana ewatsin jampa jei. ²⁰ Bara baponbe ponbe Juan peitorobixaebe, baponbe imoxoyo Jesús caquita uncuatsibe. Baponbe Jesús baraichi:

—Juan pon jiwi Pebautisabin, bapon pana nejume caruta, bapon namchi: ‘¿Metha bara xaniwaicha baponda, pon bewa patopeicaena, bapon Cristo?’ jei. ‘¿Ichacuitha metha bara ichun pawana ewatan jampara?’ jei Juan, jei baponbe.

²¹ Poxona baponbe patopabe, Jesús axaibi exana peatenewi, iru pomona pin domae xainchi, yawa taitaweta pomona cauri xeina. Matautano yawenano xua equeicha tane pomona jopa necotsiyo. ²² Baponbe jume notatsibe. Jesús jume nota, jeye:

—Paponarebe Juan beya. Juan patsipaebarebe xuaunxuae pocotsiwa panecui tane-mebe, matautano xuaunxuae pocotsiwa pana nejume tanemebeno. Matautano patsipaebarebe xua pomona peitata nacutsi jiwi equeicha tane, matautano xua pomona pejayujayujeimona beta pona equeicha. Matautano xua pomona peperu sawichimona equeicha peru wanae, matautano xua pomona pemuxusipanaewi equeicha muxu nasaba, matauta xua pomona pewerapaewi equeicha asu. Matautano pomona xua peacopeibiwi jume tane Nacom pia pexeinya pecapanenebiyae diwesi jume. ²³ Patsipaebare Juan xua xan janje: ‘Juntu coyene weiweinaena pon jopa ainya unthuthuno, pon xaniwaicha neyabara cui jume cowunta’, xua jan, jei Jesús.

²⁴ Nexata ponbe Juan itorobabe ponabe Juan beya. Bapoxona Jesús tsipaeba jiwitha, xua Juan yabara paebatsi, jeye barapomonaetha: “Ira xuepana susato tsurucuae nacuatha paponame. Poxona bara beya paponame, ¿eta xua painyatsi? ¿Painya jume taetsi pebin pon ainya unthuthuto cui xeina icha be naepanaewa ichi xua saya joibo ba jubabiya caya tsaibi? Jume apara. ²⁵ Bara paichim paponame, ¿painya nejume taenexa pebin, pon peitupanae paparuwa nama xatata? Jume apara. Payaputaneme pomona peitupanae paparuwan nama xataba, barapomona jinompa pexeinya bontha pomona jiwi itorobiya pia pepa peewatsiwixaetsi. ²⁶ Jume. Jopa baxua patsiponaem xua jopa painya jume taenexa pebin pon ainya unthuthuto cui xeina, matautano xua jopa painya jume taenexa pebin pon peitupanae paparuwa nama xatata. Apra jame baxua patsiponaem xua painya nejume taenexa pon Nacom peitorobi jume pepaebin. Bapon Juan bichocono peainya cuin pon Nacom pia peitorobi jume pepaebiwi jiwana pin beyacaincha ichun pon Nacom peitorobi jume pepaebin. ²⁷ Juan bapon apra, pon yabara paebatsi Nacom Pejume Diwesitha poxona Nacom netsipaeba, nejei: ‘Catsiwanae itorobinchi copiya pon tana nacajume carutsin. Baraponuntu cui wanaetsina jiwi, xua daxita jiwi najuntu cui wanaetsina xam nexa, xua necantenta weyataeya wabinexa poxona patopaename’, nejei Nacom Pejume Diwesitha.

²⁸ Paca tsipaebatsi, xua daxita Nacom peitorobi jume pepaebiwi pomona Juan tsiwanaya jinompatsi bayatha, dapocotsin aibi barapomona jiwana pon yatsicaewa peainya cuin beyacaincha pon Juan, pon jiwi Pebautisabin. Juan peainya cui diwesi yabara cueicueijei po coyene xua Nacom itorobina jiwi. Ichitha po diwesi xua tamona anoxuae paeba barapo diwesi bichocono ainya cui diwesi beyacaincha xua Juan cueicueijei, bequein jiwi nanta xeina xua tamona jopa ainya cui jiwi.

²⁹ “Daxita barapomona baxua jume taerucupa. Iru jume taerucupa pomona paratixi pentoma noteibiwi romanomona pia pepa peyanacua ewatsinchi nexa, pomona bayatha Juan bautisaba. Daxita barapomona nanta xeinarucupa xua Nacom

bara pepa pentacui xanepanaein. ³⁰ Ichitha fariseomonaē irū pomonaē jiwī pecuidubiwi Moisés pia peitorobi coyene tatsi, barapomonaē jume itaweta, Nacom jume itawetatsi pocotsiwa xua Nacom beexanaena barapomonaē nexa. Matautano barapomonaē cui itaweta, Juan cui itawetatsi xua pia pebautisabi coyenewa.

³¹ “Jiwī pia Pecanamataxeinaeinchi tatsi, bapon Jesús namchi, jeye: ¿Eta pocotsimonaē cui jūpatsi barapomonaē pomonaē xote jinompe pomonaē Nacom jume itawetatsi? ¿Etabe jūta ichi barapomonaē? ³² Barapomonaē be pexui, pocotsixi panatha nabarū jinompa. Nabarū wawai tsurubenaēbiya. Barapoxi nabarai, jeye: ‘Bayatha oibo paca tsimuxu obatsiba ichitha jopa panawirabim. Bayatha paca tsimuxu wecoyeichiba icha be ichi poxonaē ichūn tatūpatsi, ichitha jopa pana itanuwe jume notsim xua painya newecoyeinexarū’, jei barapoxi. ³³ Juan patopa pon jiwī Pebautisabin. Bapon jopa xaeyo pan. Matautano jopa apaeyo vino mera. Ichitha paxam pajam: ‘Apara Juan puna popoinchi cauri’, pajam. ³⁴ Bapoxonaē xan, ponxaein Nacom Tananeitapetsin patopan. Xan pan taxaein yawa vino mera taapaein. Paxam pana neyabara paebame, pajam: ‘Bapon maisa jopa juniya nabanaeyo, yawa jopa juniya apaeyo. Peatsacae jiwī abe peexanaē jiwī pia jiton tatsi, irū pomonaē paratixi pentoma noteibiwi barapomonaē pia jiton tatsi’, pana neyabara jam. ³⁵ Nacom piamonaē tatsi barapomonaē tsita exana xua jiwī tsita exanatsi Nacom pia peyaputae coyeneintha tatsi. Po coyene barapomonaē exana baxua Nacom tsita pexeinya coyenetsi”, jei Jesús.

Meje yabara poxonaē Jesús siwa pona Simón fariseomonaēpin pia bo beya tatsi

³⁶ Caēin fariseomonaēpin bapon Jesús wabatsi petaxaenexa tsainchi pia botha. Jesús pona bara beya yawa naeca pexaethopaewatha penanabanaenexa tsane. ³⁷ Nexata petsiriwa patopa powa pesi cui weiweinaewa, powa barapo tomaratha popona. Barapowa yaputane xua Jesús nanabanaēicha fariseomonaē jiwanaēpintha. Barapowa alabastro ibo wūn bosibū atsato capatopa Jesustha xua petuxuei nasiwa xua bichocono wūnca. ³⁸ Barapowa Jesús imoxoyo caquita wecoyei tsuncuaetsi yawa peitacuere mentha Jesús taxu atatsica exanatsi. Bapoxonaē barapowa pia pentanatha baxota Jesús taxu tsewa exanatsi. Barapowa Jesús taxu tsutsubatsi poxoru Jesús Pecanamataxeinaein jiwī. Bapoxonaē barapowa Jesús taxu epatabatsi petuxuei nasiwatha. ³⁹ Poxonaē fariseomonaē jiwanaēpin pon Jesús pewabixaetsi petaxaenexa tsane pia botha, poxonaē bapon tane baxua, bapon pia coutha nabarai: “Icha bapon xaniwaicha tsipae pon Nacom peitorobi jume pepaēbin tsipae metha yaputaetsipa xua powa jayabatsi apara powa pesi cui weiweinaewa, matautano xua bapowa powa peatsacaewa. Ichitha bapon xaniwaicha jopa daponyo pon Nacom itoroba”, jei barapon pon fariseomonaēpin. ⁴⁰ Nexata Jesús barai fariseomonaē jiwana jiton, jeye:

—Simón incane catsipaēbinchi, jei.

Bapon jume nota, jeye:

—Pon jiwī Necuidubimxae, moya taema, jei.

⁴¹ Jesús barai, jeye:

—Pebinbe nacueyatabe nacowaetabe paratixi ichūntha. Ichūn jopa cataunxuae xuya catsiyo quinientos po paratiximonaēbe po paratixi quinientos po matabibē nexa poxonaē nacuita. Ichūn jopa cataunxuae xuya catsiyo cincuenta po paratiximonaēbe pontha pon penacowaetsixaetsi. ⁴² Poxoru baponbe jopa itacūpaetsibe xua xuya equeicha pecatsiwa tsanebe pontha pon penacowaetsixaēbe, daxota pon penacowaetsixaetsi paratixi, bapon namchi, jeye: ‘Metha basaya paca cui yabara jūntemainatsibe’, jei. Incane netsipaēbare Simón xua baponbe, ¿jintam yatsicaewa antobetsira xua beyacaincha ichūn antobetsi xua antobe pon nacowaetatsi paratixi? jei Jesús.

⁴³ Simón jume nota, Jesús jume notatsi, jeye:

—Bū, metha moya pon bichocono cacui yabara jūntemainatsi bichocono pon penacowaetsixae quinientos po paratiximonaēbe, jei Simón.

Jesús barai:

—Bara beta nejume notame, jei Jesús.

⁴⁴ Nexata Jesús necota barapo petsiriwa, bapoxonae Jesús Simón baraichi: Taema pocotsiwa barapo petsiriwa inta exana. Xan patopan jinya botha ichitha jopa meratha netaxu waexubim xua painya cui coyeneyathaxae xua judiomonae pamxaem. Nama barapowa peitacuere mentha netaxu atatsica exana yawa pia pentanatha netaxu tsewa exana. ⁴⁵ Xam jopa netsutsubim, ichitha bapowa poxonae caena jonarenan awiya came netaxu tsutsuba.

⁴⁶ Jopa nenta eptabim petuxuei tuxusi nasi mera. Ichitha barapowa petuxuei tuxusi nasi mera netaxu eptaba. ⁴⁷ Daxota catsipaebatsi xua bapowa matowa nasi cui matacaeta. Daxita baxuan yabara jüntemainan, daxota bichocono neantobe. Ichitha nama pon be conotha nasi cui matacaeta, be conotha yabara cui jüntemainan. Bapon be conotha neantobe, jei Jesús.

⁴⁸ Equeicha Jesús namchi bapowatha. Petsiriwa baraichi, jei:

—Cacui yabara jüntemainaya jüntu puxana exanatsiba abe jinya neexanae cuiru coyenewan, jei Jesús.

⁴⁹ Pomonae Jesús pebaru nabanaexaetsi, barapomonae nabarai, jeye:

—Bapon, jıntamda, jamaisa bapowa cacui yabara jüntemainaya jüntu puxana exanatsi abe pia peexanae cuiru coyenewan tatsi? jei barapomonae pomonae baxota naena.

⁵⁰ Jesús barai petsiriwa, jeye:

—Bayatha necacapanepawa caexainchi tsipei yabara tana nejume cowantsixaem. Saya jüntemiya poponde, jei Jesús.

8

Meje yabara yabuxi powaxi Jesús yanabatsi

¹ Bapoxonae pirapae Jesús daxita tomarantha pona ducuaeta, tsica tomaraxithano po tomarantha pin tomaranthano. Matautano paeba ducuaeta Nacom pia pexeinya jume diwesi tatsi po diwesi yabara xua Nacom waba jiwi petanaexanaenexatsi piamonae pomonae Nacom jüntu coyene itorobiya ewata. Jesús yanabatsi pia peitorobiwi tatsi pomonae doce poyobe. ² Barichi Jesús yanabatsi petsiriwaxi, powaxi Jesús bayatha taitaweta cauri xuano axaibi exanano xua domae xainchi. Barapowaxi jiwana caewayo pewun María Magdalena, tsipei pia tomara tatsi pewun Magdala. Barapowa María powa bayatha taitawetatsi siete poyobe cauri. ³ Bichiru petsiriwa, powa pewun Juana, bapowa napon. Bapowa Juana, Cuza piowa tatsi. Bapon Cuza pon Herodes pia bo tatsi tayapucaecatsi. Iru ichowa pewun Susana, bapowa napon. Iru ichowaxi ainya yabuxiru napon. Daxita barapowaxi Jesús upain exaneibatsi xua xoxi barapowaxi pexeinaexae.

Meje yabara poxonae Jesús cuiduba jiwi pecayabara juta pepaebi diwesiyo xua pon peubin yabara

(Mt 13.1-9; Mr 4.1-9)

⁴ Daxita tomaranpiwi pata. Poxonae pin bicheito nacaetuta Jesús cuiduba barapo bicheito po diwesiyo pecayabara juta pepaebi diwesiyo. ⁵ Jesús barai: “Pebin pon peubin pontaba pia ubichi pabitha. Poxonae pon peubin ubauya, icha xu namtotha othopeica, pexu jiwi taxunaunaba, yawa pepupunaewi xu xane. ⁶ Icha xu, xu othopeica ibowantha. Poxonae barapo xu xuwa, barapo xu, xu yunna poxoru jopa tajü xuwarecaeyo poxoru ibotixi nacucuna yawa poxoru ira tsewa. ⁷ Icha xu, xu othopeica ichaxota pesoiwan xuwinaena. Barapo xu yaboto nanta capanaba poxoru yawa muxuna xuwina pesoiwan. ⁸ Icha xu, xu othopeica ichaxota ira wuna. Poxonae barapo xu, xu xuwa, xu nawunaeta. Cae xuto nacoita cien po xu matabuxuyobe”, jei Jesús.

Poxonae Jesús baxua paeba, bapoxonae jume daunweya namchi: “Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús.

Meje yabara poxonae Jesús namchi xua exua metha pecayabara jũta pepaebi diwesiyo yabara, jane jei

(Mt 13.10-17; Mr 4.10-12)

⁹ Nexata Jesús yainyabatsi pijimona, barapomona namchi, jeye: “¿Eta pocotsiwa yabara caunutame poxona pana netsipaebame barapo pecayabara jũta pepaebi diwesiyo?” jei bapomona. ¹⁰ Jesús jume nota, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawun xeinaewa. Barapo moya peyawun xeinaewa apara xua Nacom exana xua paca cana exana xua painya nepaca itacupaewa xua painya nenaexanaewa Nacom piamona tatsi pam, pomona pamxaem Nacom itorobiya paca ewata. Ichitha jame ichamona meisa pomona jopa nejume cowuntsiyo jopa daichichi Nacom jopa copatsiyo xua barapomona peyabara yaputaewa baxua. Daxota barapomona cuiduban pecayabara jũta pepaebi diwesintha xua Nacom peyabara yaputaenexatsi. Baxua paeban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane”, jei Jesús.

Meje yabara poxonae Jesús pijimona muxu yaputane exana po diwesi xua pecayabara jũta pepaebi diwesiyo pon peubin yabara

(Mt 13.18-23; Mr 4.13-20)

¹¹ Equeicha Jesús namchi: “Meje apara baxua yabara caunutan poxona paeban pecayabara jũta pepaebi diwesiyo: Po xuto xua iratha xuwa nacoichiya xanepanaya exana. Barapo xuto yabara caunuta Nacom Pejume Diwesi xua poxona pebin jũntu coyene webocatsi pebin wunaeya xanepanaya cana exanatsi. ¹² Po xuton xua namto beothopiya, aichurubena. Barapo xuton yabara caunuta xua jiwi bara jũntu coyene weichichi caurimona pia pentacaponaein tatsi. Jiwi jũntu coyene weajumetsurubena exanatsi Nacom Pejume Diwesi xua bayatha po jume jume tane, xua bapoxona jopa petajume cowuntsinexa tsainchi Nacom, yawa xua jopa petana capanenebiyaenexa tsainchi Nacom beya xua Nacom exanaena. ¹³ Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi xuano jũntu coyene weiweinaya Nacom jume cowuntatsi. Ichitha bara caeto jume cowanta poxoru barapomona antufaetabiya jume jeba Nacom Pejume Diwesi pejũntu coyeneintha. Matauta cauri jũntu coyene wemuxu paeba xua abe peexanaenexa tsane. Daxota barapomona cayabara jũntemaina Nacom. ¹⁴ Po xuton xua xu othopa pesoiwantha barapo xuton caunuta xua pomona Nacom Pejume Diwesi jume tane ichitha saya barompaya pia jũntu coyeneyatha jinompa, yawa saya u copei cayabara nanta xeina, yawa saya exana pocotsiwa jũntu coyene weiweina cana exanatsi. Po coyene pebiwi exana baxuan barapocotsi jũta coyeneya exana icha ichi xua po xuton be pesoiwantha xu othopiya. Barapo xuton jopa thei dubenaeyo. Barapocotsi jũta coyeneya ichi, barapo jiwi jopa xanepanaya jinompaeyo Nacom nexa. ¹⁵ Po xuton xua xu othopeica peira wunaewatha, bara nacoita. Barapo xuton yabara caunuta pomona jume tane Nacom Pejume Diwesi xuano jume cowantano poxoru jũntu coyene xanepanaya jume tane. Matautano beta exana dubenanaebiya beya matapainya jiwi cui tane xua barapomona jũntu coyene xanepana Nacom peitabaratha tatsi”, jei Jesús.

Meje yabara poxonae Jesús pijimona tsipaeba pecayabara jũta pepaebi diwesiyo xua pecoicha yabara

(Mr 4.21-25)

¹⁶ Equeicha Jesús namchi: “Poxona jiton pecoicha coicha exana bapoxona jopa coicha matacatsiyo. Matauta jopa coicha exanaeyo cama peupana deca. Jame asiya coicha exanatsi, pecoicha taenexa pomona jojoneibarena. ¹⁷ Daxita pocotsiwa xua moya peyawun xeinaewa bexa tsane jiwi yabara yaputaena. Barichi barapo diwesin xua pecayabara jũta pepaebi diwesin xua paebaponan jiwi itacupaeinchi xua peyabara yaputaewa tsane.

¹⁸ “Pana nejume naitaeware painya neexanaenexa pocotsiwa paca tsipaebatsi. Pon ba be conotha Nacom yabara yaputainchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowantsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowantsiwa tsainchi”, jei Jesús.

Meje yabara Jesús pena tatsi iruru peyapin jiwi tatsino
(Mt 12.46-50; Mr 3.31-35)

¹⁹ Nexata Jesús pena tatsi iruru peyapin jiwi tatsino pata ichaxota Jesús uncua. Ichitha jopa Jesús imoxoyo caquita ponaetsi tsipei bichocono pin bicheito. ²⁰ Ichun Jesús baraichi:

—Ena, iruru neyapin jiwino pesato beya umena. Bepara bequein cataei, jei bapon.

²¹ Jesús namchi barapomonaetha:

—Apara jame be taena tsicotan yawano be tayapin jiwi tsicotan pomonae xua jume tane Nacom Pejume Diwesi xuano xua exana pocotsiwa Nacom itoroba, jei Jesús.

Meje yabara poxonae Jesús xainya ducuanaya exana joibo, yawa maratsacano xainya mene ducuanaya exanano

(Mt 8.23-27; Mr 4.35-41)

²² Caentacabi Jesús baru pona pijimonae jeratha. Jesús pijimonae barai:

—Anthá, poinchi icha muxunene beya, pucua beya, jei Jesús.

Bara ponarucupaba. ²³ Poxonae cataunxuae jeratha yana enapona bapoxonae Jesús maituncuataba. Bapoxonae jemeicha pin joibo naetaba mentha. Matauta bichocono jera mene wanca, muxu pebunarecae. ²⁴ Nexata Jesús yaubaxotsi. Jesús baraichi:

—¡Jesús, Patatanecuidubim, yana bunarecatsi! jei barapomonae.

Nexata Jesús nacosataxuba. Jesús itawetaxuba joibo maratsacano. Daxita caewanaya joibo yawa maratsacano. ²⁵ Nexata Jesús barai pijimonae:

—¡Jopa pana nejume cui yabara jume cowantsim xua bara tana neitacupaewa xua tapaca yawenaewatsi? jei Jesús.

Barapomonae bichocono junuwa yawa najuntu coyene cabenaecarucupa. Barapomonae caemonae natsipaeba, jeye:

—¡Jintam metha baponda? ¡Jamaisa bapon itaweta joibo yawa maratsacan xua daxita xainya dubenanaya! najei barapomonae.

Meje yabara xua pebin yabara pon caurimonae pexeinaein pon Gerasa nacupin
(Mt 8.28-34; Mr 5.1-20)

²⁶ Pirapaeyo jebouna Gerasa nacua itapatha, po itapa eca Galilea nacua icha itapa panawa beya. ²⁷ Poxonae Jesús muxu penontounae jeratha, pebin pon copiya tomarapin pon equeicha aisowapin naexana, bapon patopa. Jesús caquita uncuatabatsi. Caena bayatha bapon puna jinompatsi caurimonae. Paparuwa jopa yawa poponaeyo, matautano botha jopa poponaeyo, saya ibo wountha poponeiba. ²⁸ Poxonae Jesús tainchi, iratha jopa. Pentabocototha uncua bapon, Jesús peitabaratha tatsi. Jume daunweya wawai:

—Jesús, Nacom Pexantom, pon peitabocototha eca. ¿Eta pocotsiwa metha patopame taxantha? ¡Jume daunweya cabaraichi jopa neperaxa exanaeinde! jei.

²⁹ Daxota bapon baxua paeba yaitama Jesús taitaweta cauri xua peponaenexa bapon pia xainya weya tatsi. Bapon matowa teiqueibatsi cauri. Bayatha bequein jiwi taxu cubeiba yawa pemaxuno penaintohta xua bapon xua jopa peponaenexa, ichitha bapon nain xuneiba. Bapon ira xuepana susato tsurucuae nacua beya itorobeibatsi cauri.

³⁰ Jesús yainyaba:

—¿Eta po wum? jei Jesús.

Bapon jume nota exanatsi Jesustha. Bapon namchi, jeye:

—Tawun ayei, jei.

Baxua namchi tsipei bayatha cauri bicheito cunto pata bapontha. ³¹ Equeicha barapo pebin cueicueijejei exanatsi barapo cauri bicheito cunto. Barapo cauri cunto namchi, jeye: “Jesús jopa pana neitawetsinde po nacua ira bereca ichaxota jiwi atene tsaibi”, jei bapon xua cueicueijejei exanatsi cauri. ³² Pin marrano duweimonaē pitapatororotha jinompa xua yawa xayompano. Caurimonaē Jesús jume daunweya wūcatsi, jeye: “Pana nepu copabare marrano duweimonaētha”, jei. Jesús namchi: “Moya pataema”, jei. ³³ Nexata caurimonaē pebin wepu ponatsi, yawa marrano duweimonaētha pata. Barapo marrano duweimonaē dūcupa, pin pitapatororo othopareca. Pucuatha bunothopa. Caurimonaē cabunothopatsi.

³⁴ Pomonaē yapu eena barapo marrano duweimonaē junuwiya cuinaenouta tomarantha xuano tomaran aisowapiwi, xua pepaebinexa xua baxua exana. ³⁵ Jiwi poxonaē baxua tane, pata baxota ichaxota Jesús uncuā. Tainchi pon wepu poinchi caurimonaē. Bapon Jesús petaxu deca taecatsi, xuano paparuwa nama xatateca. Axaibiya eca, be pocotsin jopa matsiyaibichi. Barapo jiwi junuwa nawita. ³⁶ Pomonaē copiya tane, barapomonaē equeicha tsipaeba ichamonaētha pomonaētha pomonaē jopa taeyo po coyene xua bapon equeicha jume xua copiya bequein caurimonaē pexeinaewa. ³⁷ Poxonaē daxita barapo Gerasa nacuapiwi jume tane baxua, daxita barapomonaē Jesús itawetatsi xua pewarapaenexa bara weya xua Gerasa nacua weya, poxoru barapomonaē junuwa bichocono. Daxota Jesús jeratha nontabiya bara warapano. ³⁸ Pebin, pon wepu poinchi caurimonaē, Jesús wūcatsi xua bepara puna ponaetsei Jesús. Ichitha Jesús jopa copatsiyo xua pepuna ponaewa tsainchi bapon.

³⁹ —Jinya bo beya ponare. Daxita paebare jiwitha xua bayatha Nacom cata exana, jei Jesús.

Pebin nawiya tomara beya yawa daxita paebano tomaratha xua po coyene bayatha Jesús taexana xua bapon tacana exanatsi.

Meje yabara xua poxonaē Jairo pexantiyo taxaibi exanatsi; yawa yabara xua bapoxonaē irū icha yabūyo axaibi exanatsi poxonaē Jesús pia paparuwa tajayabatsirū

(Mt 9.18-26; Mr 5.21-43)

⁴⁰ Poxonaē Jesús caibe patoparena Galilea nacua berena, jiwi Jesús matenta weiweinyaya wabatsi, tsipei daxita barapomonaē Jesús ewatatsi. ⁴¹ Nexata pebin patopa pon pewūn Jairo. Bapon Jairo pon canamataxeina judiomonaē pia penacaetutsi bo tatsi. Jesús petaxutha irabe tatayecarecatsi. Baxua Jairo exana poxoru Jesús pon ainya cui peexanaeinchi. Bapon Jairo Jesús jume daunweya wabatsi, jeye: “Anthā taboḥa ponare”, jei Jairo. ⁴² Bapon baxua paeba tsipei Jairo pexantiyo saya compa tatsi. Barapowayo doce po weibe xeina. Bapowayo muxu petūpae.

Poxonaē Jesús iya irū pin bicheito naponā. Bichocono jiwi acūcū. ⁴³ Barapo pin bicheitoḥa yabūyo irū naponā. Bapowa caena bayatha beya yadoce po weiyobe jopa xua pentabū janatha boca xua be nantawane. Barapowa daxita cobe caewitatsi xua peaxaibi exanaenexa tsainchi. Pomonaē jiwi peyawūbiwi cobe caewita daichitha jopa axaibi exanaetsi. ⁴⁴ Bapoxonaē barapowa imoxoyo caquita uncuataba Jesús peputha tatsi. Barapowa Jesús pia paparuwa tatsi tajayabatsi xua peopirawa. Bapoxonaē caena nainya bapowa ajaneibi tsanareca. ⁴⁵ Nexata Jesús yainyaba barapo pin bicheitoḥa, jeye:

—¿Jintam nejayabara? jei.

Daxita barapomonaē paeba xua pinae jopa jayabichiba. Daxota Pedro barai:

—Patatanecuidubim, barapo pin bicheito acūcū canapuna torobabiya tane, dacotsiwa jam: ‘¿Jintam nejayaba?’ jam, jei Pedro.

⁴⁶ Ichitha Jesús jume nota:

—Ichūn nejayaba tsipei taayapusūwa newepu jiwana aichurucuae xua axaibi exanan, jei Jesús.

⁴⁷ Petsiriwa yaputane xua cobe yaputainchi xua Jesús cobe yaputane poxonaē bapowa jayaba. Barapowa junuwiya patopa yawa pentabocotoḥa uncuā ira betaeuncuarecano

Jesús petaxutha tatsi. Baxua exana bapowa poxoru Jesús ainya cui peexanaeinchi. Nexata barapowa namchi barapo bicheito peitabaratha, jeye:

—Apara xan jayaban. Poxonae jayaban caena nainya axaibin, jei. ⁴⁸ Nexata Jesús barai, bapowa baraichi, jeye:

—Yabũyo caaxaibi exanatsi tana neyabara jume cowũtsixaem xua bara tana neitacũpaewa xua tacaaxaibi exanaewatsi. Saya jũntemiya poponde, jei Jesús.

⁴⁹ Poxonae cataunxuae Jesús tsipaebauya bapowatha, pebin patoparũ pon Jairo pia bo tatsi weya pona. Bapon tsipaeba pontha pon pecanamataxeinaeinxae judiomonae pia penacaetutsi botha tatsi pon Jairo. Jairo baraichi, jeichichi:

—Nexantiyo bayatha cata tũpa. Jopa came fayacotsinde pon jiwĩ Pecuidubin, jeichichi Jairo bapon.

⁵⁰ Ichitha poxonae Jesús jume tane baxua, xua Jairo baraichi, Jesús barai, Jairo baraichi, jeye:

—Jopa junuwinde, maisa saya nejume cowũnde. Nexantiyo cata axaibi tsane, jei Jesús.

⁵¹ Poxonae botha pata, Jesús jopa juntucuru bebarũ joniyaeyo ichamonae. Saya meisa Pedro irũ Santiago irũ Juan irũ powayo tũpa paxa tatsi, bapon Jairo yawa pena tatsi, Jesús barũ joniya barapomonae. ⁵² Daxita barapomonae yabũyo siwa wawaya wecoyeichi. Ichitha Jesús barai barapomonae, jeye:

—Jopa pawecoyande, yabũyo apara jopa tũpaeyo, maituncua apara, jei Jesús.

⁵³ Ichitha Jesús jume caponatsi barapomonae. Tsipei barapomonae yaputane xua yatsicaewa apara tũpa barapowayo. ⁵⁴ Nexata Jesús jume daunweya cobe pichiya barai, jeye:

—¡Ja, owae asiya uncuatabare! jei Jesús.

⁵⁵ Barapowayo equeicha petũpaewa nacosataxuba, caena nainya asiya uncuataba. Jesús itoroba barapomonae xua barapowayo peapatsinexatsi pexaewa. ⁵⁶ Barapowayo paxa tatsi irũ pena tatsi najũntũ coyene cabenaecaeya tanebe. Jesús barapomonae tsipaeba xua jopa cui yopichi tsainchi ichamonaetha xua po coyene bapon peexanaexae.

9

Meje yabara poxonae Jesús pijimonae itoroba xua barapomonae peyabara cueicueijeinexa jiwitha po coyene xua Nacom waba jiwĩ xua petanaexanaenexatsi pijimonae tatsi (Mt 10.5-15; Mr 6.7-13)

¹ Jesús pijimonae caetuta pomonae xua doce poyobe. Yawa pijimonae cata pia peayapusũwa. Mataũtano catano peitorobi coyenewa xua barapomonae peitaweteibinexa tsane cauri xuano xua peaxaibi exanaenexa tsaibi tsane jiwĩ pomonae atene.

² Jesús itoroba barapomonae xua barapomonae peyabara cueicueijeinexa tsane jiwitha xua po coyene Nacom waba jiwĩ xua petanaexanaenexatsi pijimonae pomonae itoroba peewatsixae. Mataũtano itoroba xua barapomonae peaxaibi exanaenexa tsane jiwĩ pomonae atene. ³ Jesús barai pijimonae:

—Jopa pacaponaeinde ichawa xua painya necawarapaenexa. Mataũtano jopa iwabi pacaponaeinde, yawa jopa cote pacaponaeinde. Mataũtano jopa pacaponaeinde pexaewa, yawa jopa pacaponaeinde paratixi. Saya cae camisa panama xatabare, jopa icha camisan pacaponaeinde. ⁴ Botha po botha papatsiname, bara po botha painya nepu enaeinde bapoxonae barapo botha painya nepu warapaeinde. ⁵ Pomonae xua ichaxota jopa paca matenta weyataya wabiyo barapo tomara weya pawarapare. Pana taxu wenũnũbabare tsorobon po tsorobon painya taxutha dubena. Baxua paexande xua barapomonae peyaputaenexa xua abe exana paxamtha, jei Jesús.

⁶ Bara barapomonae ponarũcũpa. Mataũtano barapomonae pona daxita carepaya peya tomaraxitha. Mataũtano papaeba tsiniya Nacom pia pecapanenebiyae diwesi jume tatsi. Yawa axaibi exana tsiniyano jiwĩ pomonae atene.

Meje yabara poxona Herodes Juan yabara jume unthuthu deideijeichi pebexubixaetsi bayatha

(Mt 14.1-12; Mr 6.14-29)

⁷ Bapoxonae Herodes Galilea nacuapiwi pia peyanacua ewatsinchi daxita jume tane xua Jesús exana. Bapon Herodes jopa xapain beta nanta xeinaeyo. Tsipei ichamonae catsawa Jesús yabara namchichi: “Apara bapon Juan, pon bequein bayatha tupa, equeicha asu juina”, jei. ⁸ Iru ichamonae namchi: “Bapon apara Elías, pon tsita naituta jiwitha”, jei. Iru ichamonae namchi: “Apara pomonae bayatha Nacom peitorobi jume pepaebiwi, barapomonae jiwana, bapon apara, pon petupaein equeicha juina”, jei barapomonae. ⁹ Ichitha Herodes namchi:

—Bara bayatha ichamonae cobe itorobacoumba xua Juan pewisi ucubiwatsi. ¿Jintam metha bapon xua yabara jume tan nawita xua pinae peitupanaewan exana? jei.

Herodes bichocono beyaitaena, Jesús beyaitaeinchi pon wuna peexanaein.

Meje yabara poxona Jesús apata pexaewa cinco mil pebiwi

(Mt 14.13-21; Mr 6.30-44; Jn 6.1-14)

¹⁰ Poxonae pata pomonae Jesús itoroba, barapomonae Jesús tsipaebatsi pocotsiwa xua barapomonae exana. Jesús tsana baru jopa barapo pijimonae tatsi xua pin bicheito weya. Ichaxota jiwi aibi, Jesús bara beya baru pona pijimonae, Betsaida tomara pecuariya beya baru pona. ¹¹ Ichitha poxona barapo bicheito yaputane xua xota Jesús ponaena, barapo bicheito iru Jesús puna poinchi. Jesús matenta weiweinaya waba barapo pin bicheito. Matautano Jesús yabara tsipaeba barapo bicheitha po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae. Matautano Jesús axaibi exana atenemonae.

¹² Poxonae imoxoyo tabopiya Jesús barompaya pijimonae tatsi pomonae xua doce poyobe, barapoyobe Jesús imoxoyo caquita umenarucupatsi. Jesús baraichichi, jeye:

—Barapo bicheito itorobare pejeichinexa tsane xua ichaxota maichina xuano xua pexaewa pejeichinexa tsane tomaranxitha yawa po bon pipatotha umena, poxoru xote aibi pexaewa yawa bon xua ichaxota pemaichiwa tsane, jeichichi Jesús pijimonae.

¹³ Ichitha Jesús barai pijimonae:

—Paxam paapare pexaewa, jei Jesús.

Jesús jume notatsi pijimonae:

—Saya apara cinco po panbe paxeinan matautano saya ainyoyobe paxeinan duweiyobe. Apara acoibi tsipei pin bicheito. Metha paponan pata comotsinexa icha pexaewa, daxita barapomonae nexa, jei.

¹⁴ Barapo bicheito be cinco mil pebiwi. Nexata Jesús pijimonae barai:

—Pana nantaure xua ichamonae tsana eeniyaena be cincuenta po matabuxuyobe tsiniya, jei.

¹⁵ Bara Jesús pijimonae tatsi exana pocotsiwa xua Jesús paeba. Bapoxonae barapo pin bicheito iratha ena. ¹⁶ Bapoxonae Jesús pan pita cinco po panbe, yawa duwei ainyobe pitano. Jesús itaboco benecoicha, Paxa tsipaeba: “Axa, maisa juntu coyene weiweinan xua pexaewa pata tanecatxiwaxaem”, jei Jesús. Poxonae Jesús epa janaquiya nacobe weta, pijimonae caitoroba xua pecatsibaponaenexa tsane barapo bicheitha. ¹⁷ Bara daxita nabane, yawa bara daxita jain cowuntarucupatsi. Bapoxonae Jesús pijimonae tatsi doce po cote matabuxuyobe wunba xua bayatha nacopaba pocotsiwa xua bayatha barapo jiwi jopa xaeyo petonsanaexae.

Meje yabara poxona Pedro namchi Jesththa jeye: “Xam apara Mesías pon Nacom caitorobica”, jei Pedro

(Mt 16.13-19; Mr 8.27-29)

¹⁸ Caentacabitha Jesús Nacom tsipaebawiya, meisa pijimonae baru pona. Bapoxonae Jesús yainyaba pijimonae, jeye:

—¿Eta jiwi neyabara jei po coyene xua xan bapon aparan? jei Jesús.

¹⁹ Barapomonae Jesús jume notatsi, jeye:

—Ichamonae cayabara, jei: ‘Apara bapon Juan pon jiwi Pebautisabin, pon equeicha petupaevin asu juina’, jei. Iruru ichamonae cayabara, jei: ‘Apara bapon Elías, pon equeicha petupaevin asu juina’, jei. Iruru ichamonae cayabara, jei: ‘Apara bapon jiwana pomonae Nacom peitorobi jume pepaebiwi, pon petupaevin equeicha asu juina’, jei, Jesús pijimonae tatsi.

²⁰ Nexata Jesús pijimonae yainyaba, jeye:

—Incane iru paxamdu, ¿eta pana neyabara jumichimdu xua xan eta pondun? jei Jesús.

Pedro jume epa pita:

—Xam apara Mesías, pon Nacom caitorobica, jei Pedro.

Meje yabara poxonae Jesús nayabara diwesi paeba po coyene xua petupaewa tsane (Mt 16.20-28; Mr 8.30-9.1)

²¹ Jesús pijimonae muxu barai, xua pijimonae jopa peyabara paebinexatsi ichamonae aetha baxua. ²² Yawa barai pijimonae po coyene xua bexa ichamonae Jesús cana exanaeinchi. Jesús namchi, jeye:

—Xan ponxaein Nacom Tananeitapetsin, jiwi bichocono neperaxa jubina. Matautano pitiri jiwi iruru sacerdotemonae pia pentacaponae tatsi, iruru pomonae jiwi pecuidubiwi Moisés pia peitorobi coyenewa tatsi, daxita barapomonae neitawetsina. Matautano barapomonae nebexubina. Ichitha equeicha asu poponaein poxonae acoibi po matabiyobe tsuxubi tsane, jei Jesús poxonae nayabara paeba.

²³ Bapoxonae Jesús barai daxita pijimonae, jeye:

—Icha pebin ichichipa xua tajiwiwimonae jiwana pin penaexanaewa tsane bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonae jame bapon bewa eexanaponae daxita matabi pocotsiwa itoroban bequein bara bapon bexotsi ichamonae, tajiwiwimonae jitonxae. ²⁴ Pon naantobeya nata exana pocotsiwa bapon ichichipa, bapon jopa xeinaeyo peajuntuyarusuwa, po peajuntuyarusuwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan bapon xeinaena peajuntuyarusuwa, po peajuntuyarusuwa ataya tsiteca xua Nacom pia nacua beicha. ²⁵ Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntucoyenesuwa, po peajuntucoyenesuwa ataya tsiteca, bapoxonae bapon jopa itacupaetsi xua penajuntu coyene capanepaewa xua jopa peweraweracaewa. ²⁶ Icha ichun neacaura, yawa nejume diwesi acaurano, xan ponxaein Nacom Tananeitapetsin xuya bapon acauran tsane. Baxua exanaein poxonae patopaetsicaein be jiwi pia pecanamataxeinaein tatsi yaitupanae susato patopaetsicaein. Taxa pia peitupanaewa tatsi yawa patopeicaein. Matautano Taxa pia matatsunpiwi tatsi nebaru patsicaena, jei Jesús. ²⁷ Bara xaniwaicha paca tsipaebatsi xua pomonae xote umene abu barapomonae jopa werapae tsane. Barapomonae jiwana copiya matha necotsina xua po coyene Nacom waba jiwi xua petanaexanaenexatsi piamonae pomonae itorobiya peewatsixae, bapoxonae barapomonae werapaena, jei Jesús.

Meje yabara poxonae Jesús pijimonae peitutha pexeinya itupanae coicha tsanaya naexana

(Mt 17.1-8; Mr 9.2-8)

²⁸ Poxonae ocho po matabibibe jopa xua poxonae Jesús barapo diwesi paeba, bapoxonae Jesús pona demxuwa beicha petsipaebinexa Nacom. Pedro iru Juan iru Santiago barapo matabixyobe baru poinchibe. ²⁹ Poxonae Jesús cataunxuae Nacom tsipaebauya, bapoxonae icha itabara tsanaya. Matauta penama xatatsiwano inyapana tsanaya yawa bichocono daedaena tsanaya. ³⁰ Nexata pebinbe yaitupanae be damacu patopabe. Baponbe, iru Jesús, bapoyobe nabaru cueicueijeibe. Ponbe xua Jesús jemeicha tsita patopatsibe, bapon Moisés iru ichun pewun Elías, ponbe xua caena bayatha naxubabe. ³¹ Baponbe yabara baru cueicueijeibe xua Jesús petupaewa tsane xua peraxa jubinchi ichamonae Jerusalén tomaratha. ³² Bequein Pedrobaru bichocono itamaipana daichitha nacosatumena. Pedrobaru tane xua Jesús yamatawacaicha pexeinya itupanae be damacu

tsuncuaetsi. Matautano Pedrobarũ tane ponbe Jesús barũ uncua, Moisés irũ Elías.
³³ Moisés irũ Elías, poxonae baponbe Jesús weya naetababe, bapoxonae Pedro Jesús baraichichi, jeye:

—Jiwi Necuidubin, maisa wũnae xua xote pata umenaewa. Pacata acabinchi acoibi po boutobe, cae bouto xam nexa, icha bouto Moisés nexa, icha bouto Elías nexa.

Ichitha Pedro beta jopa yaputaeyo xua baxua paeba. ³⁴ Poxonae Pedro cataunxuae barũ cueicueijei Jesús, bapoxonae daxita pexainya bematawacaicha taruneicatsi tsaquinaebowa. Poxonae barapomonaе tsaquinaebowata tututha nataerũcupa bichocono junuwa. ³⁵ Nexata barapomonaе tsaquinaebowatha pejume jume tane xua Nacom namchi, jeye: “Bapon apara Taxanto, pon bichocono antobein, pon itapetan. Bapon beta pajume taema pocotsiwa paca tsipaeba”, jei Nacom.

³⁶ Poxonae Nacom najume weta, Pedrobarũ necobarũcupa xua Jesús beya compa uncua. Pedrobarũ saya moya. Jopa pejumeyo ichamonaetha xua tane.

Meje yabara poxonae Jesús cauri taitaweta xua pewowin xeina

(Mt 17.14-21; Mr 9.14-29)

³⁷ Baya poxonae Jesús barapo acoibi poyobe pijimonaеbe dabe barũ dunareca Jesús pin bicheito matenta poinchi. ³⁸ Nexata barapo bicheitha jiwana pebin, bapon jume daunwei wawai, jeye:

—Jiwi Necuidubin, incane inta taema taxanto. Bapon taxanto inta compa pebin.
³⁹ Taxanto inta waetabatsi cauri, inta papai exanatsi, yawa inta iratha bebaichi. Matauta inta coibo thamthamei exanatsi poxoru matayaibatsi exanatsi. Inta taxanto cui tatainchi jopa bepu sorobabeibichi barapo cauri. ⁴⁰ Bayatha bequein jinyamonaе jume daunweya cui itoroban: ‘Painta taxanto taitawere cauri’, jan. Ichitha jopa itacũpaetsi xua taxanto inta petaitawetsiwatsi cauri, jei pewowin paxa tatsi.

⁴¹ Jesús barai pin bicheitha, jeye:

—¡Paxam barapomonaе pam pomonaе jopa xapain cataunxuae pana nejume cowũntsim! ¡Paxam barapomonaе pam, peajũntũcoyenebe jiwi pam! ¿Eta po weibe nantawenonan xua bewa tapaca barũ ecaewa tsainchi xua beya poxonaе tapana nejume cowũntsiwam tsane? ¿Matautano eta po weibe equeicha nantawenonan xua tapaca cayawenaewatsi tsainchi? jei Jesús.

Nexata Jesús barai pewowin paxa tatsi, jeye:

—¡Nexanto inta carenande! jei Jesús.

⁴² Poxonae pewowin cataunxuae Jesús itiya poinchi, bapoxonaе equeicha pewowin iratha xotsi cauri. Equeicha pewowin coibo thamthamei exanatsi. Ichitha Jesús taitaweta cauri pewowin. Jesús axaibi exana pewowin. Equeicha Jesús caewa cata. Coxian caewa catatsi pexantoxae. ⁴³ Daxita barapo pin bicheito yabara najũntũ coyene cabenaeca pocotsiwa pewowin pexeinya coyene taexanatsi Nacom.

Meje yabara poxonae equeicha Jesús nayabara paeba xua poxonae tũpaena

(Mt 17.22-23; Mr 9.30-32)

Poxonae awiya cataunxuae yabara najũntũ coyene cabenaecompa barapo pin bicheito pocotsiwa Jesús exana, bapoxonae Jesús pijimonaе barai:

⁴⁴ —Incane beta pajume taema, yawa jopa pana nejume cayabara jũntemainaeinde. Xan, ponxaein Nacom Tananeitapetsin jiwi, necaenaetsina ichamonaetha xua tanebexubinexa tsane, jei Jesús.

⁴⁵ Ichitha Jesús pijimonaе jopa xapain jume yaputaetsi xua barai. Barapomonaе jopa tacopatichi Nacom xua Jesús pejume yaputaewa tsainchi. Barapomonaе junuwa xua Jesús yabara peyainyabiwa tsainchi xua Jesús yaputane peexanaenexa xuaunxuae paeba.

Meje yabara poxonae Jesús yabara yainyabatsi pijimonaе po coyene xua pon peainya cui peexanaeinchi

(Mt 18.1-5; Mr 9.33-37)

⁴⁶ Nexata Jesús pijimonaе tatsi caemonae yabara nayainyaba, najei: “¿Jintam paxantha bichocono peainya cuinda xua beyacaincha ichun?” jei. ⁴⁷ Jesús yaputane baxua pocotsiwa barapomonaе yabara nanta xeina. Nexata Jesús cobe pita pexuyo yawa pexainya cuaranoreca. ⁴⁸ Nexata Jesús barai pijimonaе:

—Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi barapon bara apara nententa weyataeya waba. Xan jopa meisa nententa weyataeya wabiyo apara bara iru matenta weyataeya wabatsi pon tana neitorobixae xua pon bara Nacom. Daxota pon paxam jiwana pam, pon jopa paca tsita ainya cuiyo, bapon jame Nacom tsita ainya cuichi, jei Jesús.

Meje yabara poxonaе Jesús barai pijimonaе: “Pon jopa nacata abe exanaeyo, bapon ba apara naca yawena”, jei

(Mr 9.38-40)

⁴⁹ Nexata Juan Jesús baraichi, jeye:

—Ja Tanecuidubim, paxan caein patan pon cawun taiba poxonaе itaweta caurimonaе, xua caurimonaе itawetatsi. Paxan baxua pacui itawetan tsipei jopa naca puna popon- aeyo, jei Juan.

⁵⁰ Ichitha Jesús jume nota, jeye:

—Jopa pacui itawetsinde, tsipei pon jopa nacata abe exanaeyo bapon ba apara naca yawena, jei Jesús.

Meje yabara poxonaе Jesús jume itaweta, Santiago iru Juan jume itawetatsibe

⁵¹ Poxonaе imoxoyo matabi jopaena, po matabitha Jesús athabe icha tsane, xua Nacom exanaena, bapoxonaе Jesús bichocono awiya nantusuba xua peponaewa tsane Jerusalén tomara beya. ⁵² Jesús nawunaе jume caitoroba pia jitonbe tatsi. Barapo Jesús pia jitonbe tatsi ponabe Samaria nacula beya. Ponabe xua bo tutu pewucaenexa tsanebe po tomara barapo Samaria nacuatha eca xua Jesús peecaenexa. ⁵³ Ichitha barapo tomarapiwi xua Samaria nacuatha jinompa, barapomonaе aichaxaibi xua Jesús weiweinaya pententa wabiwatsi baxota poxoru barapomonaе yaputane xua Jesús pona Jerusalén tomara beya. ⁵⁴ Ichitha Santiago iru Juan poxonaе baxua tanebe, ponbe bequein tawucabe bo tutu Jesús nexa, baponbe Jesús baraichi, jeye:

—Patatanecanamataxeinaem, ¿xam ichichipame xua paxan isoto pawucaein po isoto xua itaboco wetsica xua petautsinexatsi barapomonaе? jei baponbe.

⁵⁵ Nexata Jesús pijimonaе napatomeicha necota yawa jume itaweta. ⁵⁶ Nexata equeicha Jesús pijimonaе baru pona icha tsiqui tomariyo beya.

Meje yabara poxonaе Jesús yabara paeba pomonaе ichichipa xua pepuna ponaewatsi

(Mt 8.19-22)

⁵⁷ Poxonaе namtotha enapona, pebin Jesús baraichi, jeye:

—Patatanecanamataxeinaem, ichichipan xua tacapuna ponaewatsi xua ichaxota pon- ame, jei pebin. ⁵⁸ Jesús jume nota, jeye:

—Namomonaе ba pia muthun xeina ichaxota pemaitathopeibiwa. Iru peya- pupunaewi ba coton xeina ichaxota peyamaitathopeibiwa. Nama xan ponxaein Nacom Tananeitapetsin nama jopa daichinyo. Nama jopa xeinaeyo bo xua tabo xua xota nafifinacaecan, jei Jesús.

⁵⁹ Jesús barai ichuntha, jeye:

—Nepuna ponde.

Ichitha bapon Jesús jume notatsi, jeye:

—Tanecanamataxeinaem, nepu copare xua taxa matha muthutha xubichi copiya xua bapoxonaе tacapuna ponaenexatsi, jei.

⁶⁰ Jesús jume nota, jeye:

—Bara copare xua petupaewi muthucaeinchi, pomonaе xua be pewerapaewi jopa betanejume cowuntsiwixae, barapomonaе muthucaena. Ichitha xam ponare jinya

neyabara tsipaebinexa jiwitha po coyene xua Nacom waba jwi petanaexanaenexatsi pijimona pomona itorobiya pecanamataxeinaexae, jei Jesús.

⁶¹ Nexata ichun Jesús baraichi, jeye:

—Tanecanamataxeinaem, ichichipan xua tacapuna ponaewatsi. Ichitha copiya bara necopare xua tana napeyabiwa tsane tamona, tabopiwi, jei bapon.

⁶² Jesús jume nota:

—Pebinba jopa itacupaetsi xua beta penacuichiwa pabi icha saya napatomeicha necobiya nacuita. Barapocotsi juta coyeneya ichi, icha pebin exana Nacom pia petanacuichiwa tatsi jopa xapain exanaeyo xua peyabara paebiwa po coyene xua Nacom waba jwi petanaexanaenexatsi pijimona pomona itorobiya pecanamataxeinaexae icha bapon saya cayabara nanta xeina pocotsiwa barapo cae pin nacuathe xeina, jei Jesús.

10

Meje yabara poxona Jesús pijimona itoroba setenta y dos poyobe pebiwi

¹ Barapoxona Jesús pon jwi Pecanamataxeinaeinxae tatsi, bapon itapeta equeicha icha pijimona tatsi setenta y dos poyobe. Daxita tomarantha Jesús itoroba be dos poyobe tsiniya, tsica tomaraxithano, pin tomaranthano xua ichaxota Jesús cotacaya ponaena. ² Jesús barai barapomona poxona muxu peitorobi, jeye: “Bara xaniyeya paca tsipaebatsi. Pabitha ba pocotsiwa peubiwana naweta nawita, daichitha ba penacuichiwi pomona jota pinmona aibi. Bara juta ichi barapo cae pin nacuathe. Jiwi pinmona jinompa pomona nantawenona pejume taenexa Nacom pia pexeinya jume diwesi tatsi. Daichitha pomona Nacom Pejume Diwesi cueicueijei tsurubenanaebiya ichamon-aetha barapomona pinmona aibi saya tsiquimonaeyo. Daxota Nacom pawucare xua pecaitorobinexa tsane ichamona xua petacamuxu tsipaebinexa tsainchi pia pejume diwesi pomona barapo cae pin nacuathe pejinompaewi nexa. ³ Paponde ichaxota paca itorobatsi. Paca itorobatsi pia xainya beya pomona jopa jume cowantsiyo, pomona itacupaetsi xua abe painya nepaca exanaewa icha oveja ichi xua poxona pona ichaxota neuthu jinompa xua itacupaetsi xua abe peexanaewatsi. ⁴ Jopa pacaponaende cote. Yawa paratixi jopa pacaponaende. Yawa jopa pacaponaende painya nenataxu xatabiwan. Matauta jopa ichamona namtotha paewatumeyaeinde xua saya painya netsipaebinexa. ⁵ Poxona bomaxutha pajojoniyaename, barapo bopiwi pajacobare, pajande: ‘Barabu Nacom juntea jinompa paca cana exanaena’, pajande. ⁶ Icha baxota jinompa pomona juntea jinompa, baxua Nacom taexanaena xua papaebame. Ichitha icha baxota jinompa pomona jopa juntea jinompaeyo, baxua Nacom jopa taexanae tsane xua papaebame. Equeicha caewa pacata parenaena xua baxua papaebame. ⁷ Barapo botha paenare. Paxaema paapareno pocotsiwa barapomona paca apata. Painya xoba paauram xua paca cata tsipei baraxua xua paca cata painya matoma painya netanacuichixae Nacom. Jopa ichawa beya paponaeinde bontha, saya bara po botha paenare. ⁸ Poxona tomaratha papanenebiyam, icha barapomona paca matenta weyataeya waba, moya paxaema pocotsiwa barapomona paca apata. ⁹ Axaibi paexande peatene jwi, pomona xua barapo tomaratha ena. Barapomona pabarande: ‘Anoxuae Nacom waba jwi xua petanaexanaenexatsi piamona tatsi pomona itorobiya peewatsixae’, pajande. ¹⁰⁻¹¹ Ichitha poxona icha tomaratha papatsiname icha barapo tomarapiwi jopa paca matenta weyataeya wabiyo, pajande barapomonaetha: ‘¡Po tsorobon panataxu wenunubaban painya tomaratha, apara xua abe paexaname pata xainya berena poxona pana nejume itawetame! Payaputaema, anoxuae Nacom waba jwi petanaexanaenexatsi piamona tatsi pomona itorobiya peewatsixae ichitha pana nejume itawetame pomona Nacom pata tana neitorobiwi panxaein’, pajande. ¹² Xaniyeya paca tsipaebatsi matabi patopaena. Barapo matabitha Nacom yabara paebina jwi xua penatsicuentiwa xua petsita exanaexaetsi. Barapo matabitha jopa juniya bichocono atene tsane pomona paca jume itaweta. Ichitha nama pomona barapo tomaratha jinompa pomona paca

jume itaweta jopa juniya atene tsane, beyacaincha poxonae Sodoma tomarapiwi atene”, jei Jesús.

Meje yabara poxonae Jesús yabara paeba po tomaranpiwi jopa pejume cowantsiwichi (Mt 11.20-24)

¹³ Jesús equeicha pijimonaetha namchi, pomonae setenta y dos poyobe xua ichamonaе yabara paebatsi, jeye: “¡Pai jaibo Corazín tomarapiwi tsobenae! ¡Iru Betsaida tomarapiwi tsobenae! Po tsita itutsi coyenewan exanan Corazín tomaratha yawa Betsaida tomaratha ichan jopa bapana exanaeyo barapo tsita itutsi coyenewan Tiro tomaratha yawa Sidón tomaratha. Icha barapo tsita itutsi coyenewan exanaetsipa Tiro tomaratha Sidón tomarathano, barapo tomaranbepiwi icha penanta xeinae coyenewatha yabara nanta pentsipa Nacomtha. Barapomonaе iratha enaetsipa yawa paparuwan nama xatabichipa xua pocotsiwa be peru mapaton xua axan, yawa ipuna nacaxuebichipa pia pepontha. Barapomonaе baxua exanaetsipa xua ichamonaе petsita itapeinya xeinaenexa tsainchi xua icha juntu coyenein Nacom petsita xeinaewatsi peuraxae xua abe peexanaexae. ¹⁴ Poxonae barapo matabi patopeicaena po matabitha Nacom yabara paebina daxita jiwi xua petsita natsicuentisixae xua abe petsita exanaexaetsi, Tiro tomarapiwi, Sidón tomarapiwino, daxita barapo tomarabepiwi bichocono peraxa jubebinchi. Ichitha nama paxam pomonaе Corazín tomarapiwi pam, iruru Betsaida tomarapiwi pamdu, daxita paxam jopa juniya paca peraxa jubebi tsane, beyacaincha xua peraxa jubebinchi Tiro tomarapiwi iru Sidón tomarapiwi. ¹⁵ ¡Incane iru Capernaum tomarapiwi pamdu! ¿Bara pananta xeiname xua paca capanenebiya tsane peitaboco beicha? Jume, apara paca itorobina petupae coyene cuiru bereca.

¹⁶ “Pon xua paca jume naitawata, barapara nejume naitawataru. Pon xua paca jume itaweta, barapara nejume itaweta xan berena. Pon xua nejume itaweta, barichi Nacom jume itawetatsi pon xua tana neitorobixae”, jei Jesús.

Meje yabara poxonae equeicha caibe parenana Jesús pijimonaе tatsi pomonaе setenta y dos poyobe pebiwi

¹⁷ Barapo setenta y dos poyobe juntu coyene weiweinaya caibe nawibarena, jeye: —Patatanecanamataxeinaem, caurimonaе pana nejume cowanta xua paitawetan poxonae paca wun wun taibatsi, jei Jesús pijimonaе tatsi.

¹⁸ Jesús jume nota, jeye:

—Aa, bara bayatha cauri pia pentacaponaein tatsi Satanás tan xua jopeica itaboco wetsica icha yamuxu ichi poxonae uncueica. ¹⁹ Paxam paca catatsi taayapuswa painya netaxunaunabaponaewa tsane jomon yawa putonno, xua jopa painya nepaca capepeichinexa. Po peayapuswa paca catatsi bichocono daunwei, beyacaincha painya nepaca caaitafaetabi jiton, pon cauri pia pentacaponaein pia peayapuswa tatsi xua xota jiwi abe exanatsi. Jiwi dapomonaе aibi pomonaе abe paca cana exana. ²⁰ Jopa pajuntu coyene weiweinaeinde xua caurimonaе pia paca jume jejeixae xua ducupa poxonae paitawetame, saya jame pajuntu coyene weiweinare xua Nacom painya nepaca wun dubixae pia diborotha itabocotha.

Meje yabara poxonae Jesús juntu coyene weiweina exanatsi Nacom pia Pejumope tunaxu tatsi (Mt 11.25-27; 13.16-17)

²¹ Bara caena bapoxonae Jesús juntu coyene weiweina exanatsi Nacom pia Pejumope tunaxu tatsi. Jesús namchi, jeye: “Axa peitaboco Necanamataxeinaem, yawa ira Necanamataxeinaem. Wunaе cajaintatsi tsipei jopa tsita itubim pocotsiwa pexainyei coyenewa xan yabara pomonaetha pomonaе bichocono penacuidubiwi pomonaе be pinyon penatsicotaewi tsipei nanta xeina xua bichocono peyaputaewi daxita. Jame nama tsita itutame barapo pexainyei coyenewa xan yabara pomonaetha pomonaе jopa bichocono penacuidubiwi pomonaе be pexui penatsicotaewi tsipei jopa nanta xeinaeyo

xua bichocono peyaputae jiwi daxita. Axa baxua exaname necatsita xanepanaexae baxua”, jei Jesús Paxatha.

²² Equeicha Jesús pijimonaē barai pomonaē xua setenta y dos poyobe, jeye: “Taxa daxita necata xua pia peitorobi coyenewa tatsi matautano xua pia peyaputae coyenewan tatsi. Dapon aibi pon xaniwaicha nejuntū cui coyene yaputane. Jame saya meisa Taxa Nacom, nejuntū cui coyene yaputane. Dapon ajibi pon Taxa juntū cui coyene yaputainchi ichan, saya meisa Taxaxae juntū cui coyene yaputan. Matauta barichi Taxa meisa juntū coyene yaputainchi pon saya bara copatan xua bara Taxa pejuntū cui coyene yaputaewa tsainchi pomonaē ichichipan”, jei Jesús.

²³ Nexata Jesús pijimonaē napatomeicha necota pomonaē xua doce poyobe. Meisa barapomonaebetha barai, jeye: “Juntū coyene weiweina pomonaē xua tane, pocotsiwan xua pataneme. ²⁴ Poxoru paca tsipaebatsi, xua Nacom pia peitorobi jume pepaebi jiwimonaē irū nacuan peewatsiwimonaē, pomonaē bayatha napenta barapomonaē bequein betaena pocotsiwa pataneme ichitha jopa taeyo. Matauta barapomonaē bequein bejume taena pocotsiwa pajume taneme ichitha jopa jume taeyo”, jei Jesús.

Meje yabara poxonaē Jesús yabara paeba Samaria nacuapin, pon wunaē exana

²⁵ Nexata irurū pon jiwi pecuidubin Moisés pia peitorobi coyene tatsi, barapon Jesús piraichi juntū coyene jujutsiya yainyabatsi xua barapon pejume barabotsinexatsi. Barapon Jesús jeichichi:

—Ja Tanecuidubim, ¿eta xua copiya matha exanocuaein xua ajuntuyapusūya tapopon-aewa tsane xua ataya tsane? jei.

²⁶ Jesús jume nota, jeye:

—¿Eta xuara xua barapo Moisés pia peitorobi coyene diwesitha tina? ¿Eta xua yabara yorobame barapo diwesitha? jei Jesús.

²⁷ Pon jiwi pecuidubin Moisés pia peitorobi coyene bapon Jesús jume notatsi, jeye:

—Antobeinde jinya Necanamataxeinaein, bapon Nacom, daxita xua nejuntū coyene wetsina, matautano xua daxita jinya nepoponaē coyenewatha, matautano xua nanta xeiname, daxita xua nenanta xeinaewatha nentasiopatha, matautano daxita xua nedaunwei coyenewatham, matautano antobeinde necatsicuarabū ecaein icha ichim xua naantobem jinya coutha, jei pon jiwi pecuidubin Moisés pia peitorobi coyene.

²⁸ Nexata Jesús jume nota, jeye:

—Bara beta nejume notame. Icha baraxua exanaename peajuntuyapusūwa xeinaename po peajuntuyapusūwa xua ataya tsiteca, jei Jesús.

²⁹ Ichitha pon jiwi pecuidubin Moisés pia peitorobi coyene tatsi, barapon awiya nanta xeina nawita, pia jiwi nanta xeinaetsi xua bapon xeina pexeinya peyainyabiwa. Bapon Jesús yainyabatsi, jeye:

—¿Jintam barū pomonaē tanetsicuarabū enaewi? jei.

³⁰ Nexata Jesús jume nota, jeye:

—Irurū pebin Jericó tomara bereca pona, Jerusalén tomara namtotha weya pona. Poxonaē awiya namtotha ecapona jemeicha waetabatsi pomonaē jiwi pecaibiwi. Barapon daxita wecobe notatsi xua pocotsiwa xeina, yawa butsi. Barapomonaē aichurubenaē, tsica cuiyotha copatabatsi. ³¹ Bapoxonaē irū sacerdotemonaepin barapo namto ecapona. Poxonaē barapon yasusūinya taebotatsi sacerdotemonaepin taju matawacaicha toquetaba. ³² Irū levimonaepin baxoyo ecapona, bapon irū taju matawacaicha toquetaba poxonaē yasusūinya taebota. ³³ Ichitha Samaria nacuapin baxoyo irū ecapona poxonaē yasusūinya taebota, yabara najuntū coyene xeinanareca peyawenaenexa. ³⁴ Nexata Samaria nacuapin imoxoyo caquita uncuataba pon yasusūinya boca. Bapon wan yawubecapona penasiwatha vino merathano. Bapoxonaē paparuwatha wan yarabecapona. Bapoxonaē burrotha cuaretsica piyūnthā. Bomuxū beya capona ichaxota jiwi maiteibathopa. Baxota xanepanaeya bota. ³⁵ Bapoxonaē baya poxonaē juntucuru Samaria nacuapin ponaenaba, pita ainya paratixi. Bapoxonaē cata pontha

pon bo pexeinaein. Samaria nacuapin barai pontha pon bo pexeinaein: ‘Barapon beta xanepanaya bore. Icha paratixi seicanaya, equeicha bexa cacatsinchi poxona caewa denan tsane’, jei Samaria nacuapin, jei Jesús.

³⁶Equeicha Jesús namchi, jeye: “Barapo acoibi poyobe jiwana, ¿jintam yabara cananta xeiname xua wuna exana xua peantobexaetsi pon waetabatsi pomona jiji pecaibiwi, yawa xua butino?” jei Jesús.

³⁷Pon jiji pecuidubin Moisés pia peitorobi coyene tatsi, bapon Jesús jume notatsi, jeye:

—Pon xua yabara najuntú coyene xeinanareca xua peyawenaenexa, jei bapon.

Jesús jume nota, jeye:

—Ponare, icha pocotsi coyeneya Samaria nacuapin ichi barichiya exande, xanepanaya exande ichamonaetha, jei Jesús.

Meje yabara poxona Jesús, Marta yawa María siwa poinchibe

³⁸Jesús pijimona cataunxuae baru ecapona namtotha Jericó tomara beya baru pona. Pijimona baru patopa tsica tomariyotha ichaxota petsiriwa popona powa pewun Marta. Barapowa Jesús matenta weyataeya wabatsi pia botha. ³⁹Marta peyapiyo nantaúta powa pewun María. Barapowa María Jesús caquita ecatsi xua Jesús pejume taenexatsi pocotsiwa paeba. ⁴⁰Ichitha Marta enatsi pia penacuichiwa xua Jesús tsixanatsi pexaewa xuano xua pijimona tatsi nexano. Barapowa pona Jesús beya, namchi, jeye:

—Tanecanamataxeinaem, ¿jopa taem xua tayapiyo necopata xua compa nacuitan? Awiya bobena penacuichiwan. Itorobare bu neyawena, jei Marta.

⁴¹Ichitha Jesús jume nota, jeye:

—Marta, caenauya jinya nenacuichiwan xua pocotsiwa xua ichichipame neexanaewa.

⁴²Saya cae coyene ainya cui xua xam nantawenoname pocotsiwa xua María exana xua barompaya itapeta xua wuna exana poxona nejume tayeca. Jiton dapocotsin aibi xua pon María juntú coyene weaichurubena exainchi xua nejume tayeca, jei Jesús.

11

Meje yabara poxona Jesús pijimona yabara cuiduba xua Nacomtha petsipaebiwa

(Mt 6.9-15; 7.7-11)

¹Caentacabi Jesús tsipaebauya Nacom ichawatha. Jesús najume weta, bapoxona pijimona tatsi jiwana poyobe xua doce poyobe Jesús baraichi, jei:

—Jesús, Patatanecanamataxeinaem, pana necuidubare xua Nacomtha pata tsipaebiwa, icha Juan ichi xua pijimona cuiduba, jei bapon.

²Jesús barai barapomona, jeye:

—Poxona Nacom patsipaebame, pajande:

‘Pata Taxam xam ponxaem peitabocotha

athabeicha necaein.

Barabu daxita jiji cabaru cui itura jina nejuntú coyene wunaewa nexainaexae.

Barabu jopaena matabi po matabi xua

poxona xam jiji itorobiya canamataxeinaename

barapo cae pin nacuathe.

³Daxita matabin pexaewa pana catsibeibare po pexaewa daxita matabi pata canantawenonaewa.

⁴Pana neyabara cui cana jantemainare

xua abe pata catsita exanaewatsi.

Bapoxona pana neyabara cui cana exanare xua

jopa equeicha pata catsita natsicuentiswatsi

tsainchi xua abe pata catsita exanaewatsi.

Baraxua painta exande icha paichin ichamonaetha.

Tsipei paxan copiya payabara cui cana exanan

xua ichamonaē jopa pana netsita natsicuentſiyo
xua abe pata tanetsita exanaewa.

Jopa pana copatsinde xua abe pata exanaewa
tsane poxonaē jiwi pana neĵuntũ coyene

ĵũĵũta xua abe pata exanaewa tsane’,

pajande poxonaē Nacomtha patsipaebame, jei Jesús.

⁵⁻⁶ Equeicha Jesús barai, jeye:

—Metha beya tsipae xua caein paxam jiwana bapon nantaũta pon peyaputaēinchi. Bapon pia peyaputaēinchi beya pona papaetha. Pia peyaputaēinchi barai: ‘Tamo, cacowaetatsi acoibi po panbe, yaitama icha taneyaputaēin patopa pon anoxuae warapa tabo berena. Jopa xeinaēinyo xua taapatsiwa bapon’, jei pebin. ⁷ Metha pon bomũxũ tututha boca bapon jume notsipa, jei tsipae: ‘Jopa nejume fayacotsinde bomũxũ boupa daunwei, tapexui barũ maituncuan camatha. Jopa benontaponaēinyo xua pan tacacatsiwa tsane’, jei tsipae pon bomũxũ tututha boca. ⁸ Paca tsipaebatsi bequein bapon bomũxũtha jopa benontaponaēyo, bequein bara pia peyaputaēinchi, daichitha cata poxoru jume fayacotatsi pia peyaputaēinchi. Mataũtano cata daxita xua pia peyaputaēinchi nantawenona. ⁹ Daxota paca tsipaebatsi. Matowa pawũcare Nacom, bapoxonaē paca catsibina pocotsiwa xua pawũcame. Baraxua matowa paexande icha paichim poxonaē matowa pajeiteibame beya poxonaē pataebame, yawa icha paichim poxonaē matowa pawawam bomũxũtha beya poxonaē ichũn paca jume nota. ¹⁰ Tsipei pon matowa wũca ichũn bara catatsi. Tsipei pon matowa necoba, bara taeba. Tsipei pon bomũxũ pecoibototha matowa wawai bara tacoibo sarana xorenatsi yawa jume notatsino.

¹¹⁻¹² “Paxam pomonaē pexui paxeiname paca yainyabatsi. Poxonaē painya pexui paca wũca duwei, ĵpainya pexui pacatsipame jomo? Jume. Ichacuitha tsipae poxonaē painya pexui paca wũca petobũ, ĵpainya pexui pacatsipame pũto? Jume, jopa baxua paraichim tsane. ¹³ Bara bequein peajũntũcoyenebe jiwi pam, ichitha paxam payaputaneme xua pewũnaewan painya pexui pacatsibeibame. Ichitha nama Nacom painya axa jopa juniya paca catsiyo Nacom pia Pejumope tũnaxũ tatsi poxonaē pawũcame. Nacom paca cata beyacaincha poxonaē painya pexui pacatsibeibame poxonaē paca wũqueiba”, jei Jesús.

Meje yabara poxonaē Jesús baraiichi xua pinaē xeina Beelzebú pia peayapusũ itorobi coyenewa tatsi

(Mt 12.22-30; Mr 3.20-27)

¹⁴ Irũrũ Jesús taitawetauya cauri xua pebin muxusipana exainchi. Poxonaē cauri pebin wepu poinchi, bapoxonaē pebin equeicha paeba. Jiwi yabara najũntũ coyene cabenaeca poxonaē baxua tane. ¹⁵ Ichitha ichamonaē namchi: “Bapon caurimonaē itawetatsi apara pexeinaexae Beelzebú pia peayapusũ itorobi coyenewa tatsi pon caurimonaē pia pentacaponaēin tatsi”, jei barapomonaē.

¹⁶ Ichamonaē Jesús wũcatsi: “Pana netsita itũre peitũpanaewa xua peitaboco wetsica jopeicaena”, jei. Barapomonaē baxua paeba poxoru ichichipa xua Jesús tsita itũtsina, pia yaputaetsi icha barapon pon yatsicaewa Nacom itoroba. ¹⁷ Ichitha Jesús yaputane xua barapomonaē nanta xeina. Jesús barai:

“Icha cae nacuapiwi nawepu tsatabe xua mataũta nababe, bapoxonaē jopa xaexaenaecaeyo. Mataũta irũrũ icha cae bo matabũxũyomonaēbe nababe yawa nawepu tsatajopabe, bapoxonaē jopa xaexaenaecaeyo. ¹⁸ Barichi icha Satanás pijimonaē tatsi nawepu tsatajopabe mataũtano xua nababe bapoxonaē jopa xaexaenaecaeyo. Satanás jopa itacũpaetsi xua itoroba pijimonaē tsipei amsiya exana. Baxua paca tsipaebatsi tsipei naerabiya pana baram: ‘Apara bapon cauri itaweta Beelzebú pia peayapusũ itorobi coyenewa tatsi pexeinaexae pon cauri pia pentacaponaēin tatsi’, pana neyabara jam. ¹⁹ Icha Beelzebú pia peayapusũ itorobi coyeneya tatsi cauri itawetan pon cauri pia pentacaponaēin tatsi, ĵnaxata eta po peayapusũ itorobi coyeneya tatsi painyamonaē cauri itaweta? ĵIrũrũ barapomonaē cauri itawetatsi Beelzebú pia peayapusũ itorobi

coyenea tatsi? Daxota painyamonaē paca yaputane xua apara paxam panaerabame.
²⁰ Ichitha nama xan cauri itawetan Nacom pia Pejumoŋe t̄nax̄ tatsi pia peayapusu itorobi coyenewatha tatsi xua barapo pia pejumoŋe t̄nax̄ tatsi tanecatsixae. Baxua apara paca tsipaebatsi painya neyaputaenexa, xua painya xantha patopan ponxaein Nacom Tananeitapetsin.

²¹ “Pebin ba pon bo pexeinaein pon xua max̄ daunwei, bapon nayanaba xua xuan peopi sojeiwan. Daxota pocotsiwan xua xeina pia botha bara xaniwaicha tabobeinchi.

²² Ichitha icha ich̄n patopa pon beyacaincha max̄ daunwei, bapon ba nawita yawa caiba barapo peopi sojeiwan xua xuan bom̄x̄ pexeinaein nanta xeina xua barapocotsiwantha bara xaniwaicha nayaewata. Poxonaē barapo peopi sojeiwan bapon caiba tatsana ichamonaē bichocono pematataeuncuaexae.

²³ “Pomonaē jopa neyawenaeyo, barapomonaē apara inta abe exana. Barapomonaē exana xua ichamonaē jopa tana nejume cowantsiwa tsane. Barapomonaē jopa neyawenaeyo xua ichamonaē nenacaetutsina tajiwiwimonaexae tsane”, jei Jesús.

Meje yabara poxonaē Jesús yabara paeba cauri xua caewa nauyata pebintha
 (Mt 12.43-45)

²⁴ Equeicha Jesús namchi, jeye: “Poxonaē pebin wepu poinchi cauri, bapoxonaē cauri pona wexotha ichaxota ira tsewa pepoponaenexa tsane baxota. Ichitha poxonaē jopa caxinaeyo xua ichaxota pepoponaenexa bapoxonaē bapon nabarai: ‘Tha caibeya ponaetsi pebin beya ichaxota bayatha wepu ponan’, jei cauri. ²⁵ Poxonaē caibeya pona cauri caxina, pebin caxinatsi xua xanepanaya popona. ²⁶ Nexata equeicha cauri pona pebin weya. Pirapaeyo bapon bar̄ patopa siete poyobe cauri pomonaē bichocono abe, beyacaincha bapon pon copiya. Daxita barapo caurimonaē pebin xeina. Anoxuae bapon nama yatsicaya bichocono abe cana exainchi beyacaincha poxonaē copiya abe cana exainchi poxonaē saya caein”, jei Jesús.

Meje yabara poxonaē Jesús yabara paeba po coyene pepa pej̄nt̄ coyene weiweinaewa

²⁷ Poxonaē Jesús cataunxuae cueicueijeji tsuncuae barapo diwesi, baxota pin bicheithoŋa petsiriwa jume daunwei wawai Jesustha, jeye:

—j̄Maisa ena j̄nt̄ coyene weiweina powayo xua bayatha caexana yawa xua mito caapatano! jei petsiriwa.

²⁸ Ichitha Jesús barai petsiriwa, jeye:

—j̄Bequein barichi, jame yatsicaewa j̄nt̄ coyene weiweina pomonaē jume tane xua Nacom paeba xuano xua exana pocotsiwa Nacom itoroba! jei Jesús.

Meje yabara poxonaē pomonaē peaj̄nt̄ coyenebe jiwi Jesús cui itorobatsi xua peexanaewa tsane pexeinya petsita it̄tsi coyenewa

(Mt 12.38-42; Mr 8.12)

²⁹ Jesús imoxoyo matawacaicha umenatsi pin bicheito. Jesús barai barapo pin bicheito, jeye: “Jiwi pomonaē anoxuae jinompa barapomonaē peaj̄nt̄ coyenebe jiwi. Barapomonaē necui itoroba xua bepa pinae tsita exanaein tatsita it̄tsi coyenewa xua pexeinya coyenewa. Ichitha jopa exanaein tsane icha tatsita it̄tsi coyenewa xua pexeinya coyenewa, saya meisa exanaein icha bayatha j̄ta coyene cana ichichi Jonás pon Nacom peitorobi jume pepaebin, pon caena bayatha t̄pa. ³⁰ Caena bayatha N̄nive tomarapiwi Jonás yaputainchi pon Nacom peitorobi jume pepaebin xua po coyene bapon Jonás Nacom peitorobinchi, tsipei Nacom bichocono Jonás ainya cui exanatsi. Xan ponxaein Nacom Tananeitapetsin Nacom ainya cui neexana. Daxita jiwi pomonaē anoxuae jinompa barapomonaē neyaputane po coyene xua xan Nacom neitorobica peitaboco wetsica. ³¹ Matabi patopeicaena po matabitha Nacom yabara paebina jiwi xua penatsicuentsiwa daxita peperaxa exanaenexa xua abe peexanaexae. Barapo mataqueitha tsane petsiriwa powa caena bayatha t̄pa, bapowa asiya uncuaena Nacom peitabaratha tatsi. Barapowa pia nacua, nacuapiwayo, po nacua pocotsiwa parowa bereca taj̄ bereca eca. Barapowa pia nacuapiwi tatsi itorobiya pia pepa

peewatsiwayo. Barapowa yabara cueicueijei tsane pomonae xua anoxuae jinompa poxonae uncuaena Nacom peitabaratha tatsi. Jei tsane bapowa: ‘Maisa pomonae xua jinompa poxonae Mesías popona po irathe deque, barapomonae abe bichocono peexanaewi tsipei ajuntucoyenefaetabiya jume tane pocotsiwa Mesías cuiduba bequein Mesías bichocono peyaputaein’, jei tsane barapowa. Barapowa baxua paebina poxoru bapowa bayatha tajũ werena pona pesiwa ponaenexatsi Salomón, pon caena bayatha Israel nacuapiwi itorobiya pia pepa peewatsinchi. Bapowa yaputane xua Salomón bichocono peyaputaein xua Nacom peyabara yaputaewatsi. Daxota bapowa ichichipa xua pecuidubinexatsi xua Salomón pecuidubinexa Nacom yabara. Nama xote uncuanje ponxaein taexanaein pocotsiwa pepa peainya cui coyenewa xua tacuidubin daxita jiwitha xua Nacom yabara. Barapocotsi coyenewa toxeinchiya ainya cui coyenewa beyacaincha po cui coyene Salomón exana poxonae cuiduba xua barapowa cuidubatsi xua Nacom yabara. ³² Barichi barapo matabitha Nínive tomarapiwi pomonae caena bayatha jinompa barapomonae abeya paca yabara paebina poxonae umenaena Nacom peitabaratha. Barapomonae baxua exanaena tsipei barapo Nínive tomarapiwi icha jũntũ coyene xeina Nacomtha peuraxae xua abe exana caena bayatha poxonae Jonás muxuwetsiya tsipaeba barapomonaetha Nacom pia pexeinya jume diwesi tatsi. Ichitha paxam jopa bara paichim, jopa icha jũntũ coyene paxeinaem. Nama apara xote uncuanje ponxaein taexanaein pocotsiwa pepa peainya cui coyenewa xua tacaponaewa Nacom Pejume Diwesi daxita jiwitha. Barapocotsi coyenewa toxeinchiya ainya cui coyenewa beyacaincha Jonás po cui coyene exana poxonae Nacom Pejume Diwesi capona Nínive tomarapiwitha”, jei Jesús.

Meje yabara poxonae Jesús yabara cuiduba jiwi po coyene xanepanaya peexanaewa pejũntũ coyene wetsina

(Mt 5.15; 6.22-23)

³³ Jesús namchi jiwitha jeye: “Jiton dapon aibi pon pecoicha cueicha exana xua quirei pebũxũ pana wetsina, yawa xua cueicha matabitha cajatha. Jume, jame, asiya cueicha exanatsi xua pecoicha taenexa pomonae jojoneibarena. ³⁴ Pecoicha ba yonoyonei merawi painya nepaca cayawenaenexa xua beta painya netaewa tsane quireitha. Barichi painya itacuereton painya nepaca cayawenaenexa xua beta painya netaewa tsane. Icha painya itacuereton wũnae bara beta pataneme. Ichitha icha painya itacuereton abe jopa beta pataetsipaem. Barichirũ painya jũntũ coyenewan xua painya nenanta xeinaewan. Icha painya jũntũ coyenewan xanepanaetsipa bara beta Nacom payabara najũntũ coyene xeinaetsipame. Ichitha icha painya jũntũ coyenewan jopa xanepanaetsipae jopa beta Nacom payabara najũntũ coyene xeinaetsipaem. ³⁵ Painya jũntũ coyenewan paca cana exanaetsipa xua bichocono abe paexanaetsipame daxota dota pam. Painya xoba merawi paponame icha jopa paxeinaem xua peyonoyoneiwa poxoru cotacaya panapapeichipame. Barichi pam, painya xoba pajinompame icha jopa paxeinaem xua pocotsiwa beta painya neyabara nanta xeinaewa Nacom poxoru cotacaya abe paexanaetsipame. ³⁶ Icha painya jũntũ coyene wũnae, xuano xua jopa paxeinaem peabe coyenewa painya jũntũ coyenewa, bara xaniwaicha Nacom payabara yaputaneme icha poxonae pecoicha paca cana ichi xua beta pataneme”, jei Jesús.

Meje yabara poxonae Jesús muxuweta jiwi fariseomonae irũ pomonae jiwi pecuidubiwi Moisés pia peitorobi coyene tatsi barapomonae pecuiyainwa tatsi

(Mt 23.1-36; Mr 12.38-40; Lc 20.45-47)

³⁷ Poxonae Jesús najume weta, fariseomonae jiwanaepin Jesús wabatsi xua petaxaenexa tsainchi pia botha. Jesús joniya yawa ecoundeca pexaethopaewatha. ³⁸ Fariseomonae najũntũ coyene cabenaecaeya necotecataba xua Jesús jopa matha tsiwanaya penacobe quiatsiyoxae poxonae xane icha judiomonae ichi, xua saya pia cui coyene tatsi xua barapomonae nanta xeina icha jopa matha nacobe quiatsiyo Nacomtha natsicuentisipa. ³⁹ Nexata Jesús pon Pecanamataxeinaeinxae jiwi, fariseomonaepin baraichi:

—Paxam fariseomonaepiwi pam, paxam jopa ba juniya paexaneibim poxonae meisa panaperu iquicame. Daichitha bupana iya painya juntu coyenetha pecaibi coyene paxeiname, peuwi coyeneno paxeiname. Be barapocotsi jiwi pam, pocotsimona coroton saya matawacaicha iquica yawa paratonno, ichitha atutuxuira bichocono.⁴⁰ Jopa peyaputae jiwi pam. Nacom exana wapepon yawa exana wajuntu coyenewa. ¡Baxua payaputanemeba!⁴¹ Xua xoxi paxeineibame matha abu copiya pajiwana tsabeibare pomona peacopeibiwi nexa. Bapoxona xua xoxi nacopabeiba baxua panata copabeibare. Icha bara paichim tsane, bara xaniwaicha pajuntu coyene xanepaname Nacomtha. Yawa jopa panantawenonaem xua pana nacobe iquiqueibame jiwi peitutha xua be panatsicotaneme pocotsi pebin pejuntu coyene wnaein.

⁴² Equeicha Jesús namchi, jeye: “¡Paxam fariseomonaepiwi pam tsobenae, xua peperaxa peru jubuwa bexa paxeinaename! Daxita xua painya neubiwa Nacom pacatsibeibame caewaxi poxonae diez xoyobe paxeineibame. Iru xua tsiwaxino pacatsibeibame. Bequein baxua paexaneibame ichitha Nacom jopa paantobem. Matauta ichamona jopa xapain pata exanaem. Bewa paexanaem xua Nacom pacatsibeibame caewaxi poxonae diez xoyobe paxeiname. Yawano bewa paantobem Nacom. Yawano bewa xainyeya paexanaem jiwitha”, jei Jesús fariseomonaepintha.

⁴³ Bapoxona Jesús fariseomona baraichi, jeye: “¡Paxam fariseomonaepiwi pam tsobenae! Bexa paxeinaename xua peperaxa peru jubuwa. Paxam paichichipeibame xua painya nenanta caenebiwa pexeinya peenaewantha judiomona pia penacaetutsi botha po peenaewan ichaxota enathopeiba pomona ainya cui penaexanaewi. Matautano paichichipeibame xua jiwi paca wnae jainteiba poxona paca jacobana namtotha, xua jiwi painya nepaca baru itura jinaenexa”, jei Jesús.

⁴⁴ Equeicha Jesús namchi, jeye: “¡Moisés pia peitorobi coyene tatsi, jiwi pecuidubiwi pam tsobenae! ¡Iru fariseomona pam tsobenae! Poxona jiton ba pona namtotha jopa tsaqueinaeyo xua jiton piwa baxoyo bocareca muthu deca, xua peayeiwa poxoru jopa wnaeyo. Paxam bara paichim. Jiwi imoxoyo paca caquita pona jopa tsaqueinaeyo xua pocotsiwa painya juntu coyenetha pananta xeiname xua abe xua jopa pecui wnaewiyo”, jei Jesús.

⁴⁵ Nexata pomona jiwi pecuidubiwi Moisés pia peitorobi coyene tatsi, barapomona jiwana caein bapon Jesús baraichi, jeye:

—Jiwi Necuidubin, poxona baxua paebame, apara iru pana neyabara jam poxona catsawiya paebame, jei.

⁴⁶ Nexata Jesús jume nota, jeye:

—¡Iru paxam Moisés pia peitorobi coyene tatsi jiwi pecuidubiwi pam tsobenaem! Tsipei paxam ichamona paitorobame xua capona pocotsiwa arewe pocotsiwa jiwi bapana jopa itacupaetsi xua pecaponaewa, ichitha paxam jopa pata yoichaem, matauta bara cae cobesitiotha jopa pata yoichaem. Jiton ba itoroba ichantha xua pecapon-aenexa pocotsiwa jopa juniya arewiyo, xua pocotsiwa jopa itacupaetsi xua pecaponaewa pon itoroba. Bara paichim paxam ichamona pacuidubame xua jopa itacupaetsi xua peexanaenexa baxuan xua pocotsiwa iru xua jopa paca itacupaeyo xua painya neexanaewa baxuan.

⁴⁷ “¡Paxam patsobenaem! Paxam petupaewi pomona Nacom peitorobi jume pepaebiwi payamuthu acabame boutixi bequein painya amo susato jiwi juteba barapomona.

⁴⁸ Poxona baxua paexaname, ichamona patsita itapeinya xeiname xua paxam bara iru paichichipameru pocotsiwa xua painya amo susato jiwi juteba xua barapomona pomona Nacom peitorobi jume pepaebiwi jutebatsi. Daxota barapo petupaewi payamuthu acabame boutixi.

⁴⁹ “Daxota Nacom peyaputae jumetha namchi: ‘Itorobicaein barapomonaetha taitorobi jume pepaebiwi iru pomona taitorobiwi. Ichamona pomona taitorobi jume pepaebiwi jutebinchi. Ichamona pomona taitorobi jume pepaebiwi abe exanaeinchi. Ichamona, pomona taitorobiwi jutebinchi. Ichamona, pomona taitorobiwi abe

exanaeinchi', jei Nacom peyaputae jumetha", jei Jesús. ⁵⁰ Equeicha Jesús namchi, jeye: "Pomonaе anoxuae jinompa Nacom cana exanaena xua barapomonaе peraxa jubebinchi petsitaxaetsi xua barapomonaе penatsicuentsiwa xeina, tsipei jiwi juteba xua Nacom peitorobi jume pepaеbiwi jutebatsi caena bayatha xua weya xua poxonaе Nacom aena forota barapo cae pin nacue. ⁵¹ Painya amo susato jiwi jujutebapona xua pomonaе pejuntũ coyene xeicae jiwi jutebatsi. Copiya matha Abel bexotsi beya poxonaе irũrũ Zacarías bexotsirũ. Barapon Zacarías pabexubame Nacom pin pia botha ichaxota xua barapo bo tututha naitama taeuncuabe xua be pexaethopaewa xua ichaxota duwei tauteiba Nacom nexa irũ ichaxota po tutu yatsicaewa Nacom pia tutu. Daxota paca tsipaebatsi Nacom cana exanaena xua daxita paxam pomonaе anoxuae pajinompame paca peraxa jubebina tsipei Nacom patsitame xua paxeiname penatsicuentsiwa xua painya amo susato jiwi pejutebixae barapomonaе", jei Jesús.

⁵² Equeicha Jesús namchi, jeye: "¡Paxam jiwi pecuidubiwi pam tsobenaem xua Moisés pia peitorobi coyene tatsi! Paxam ayapube paexaname xua jiwi peyaputaewa Nacom Pejume Diwesi poxoru icha caununaya pacuidubame, xua jopa xapain pocotsiwa Nacom paеbiyo. Paxam jopa pajume cowũntsim Nacom matauta jopa pacopatsim xua ichamonaе irũ pejume cowũntsiwa Nacom", jei Jesús.

⁵³ Poxonaе Jesús baxua paeba poxonaе cataunxuae jopa natsixatabiyo, fariseomonaе irũ pomonaе jiwi pecuidubiwi Moisés pia peitorobi coyene, daxita barapomonaе Jesús bichocono casebatsi. Barapomonaе Jesús muxu fayacotatsi xua yainyabatsi nawita, peamuxuconaе exanaenexa tsainchi. ⁵⁴ Barapomonaе Jesús piraichi matowa yainyabatsi peyaputaenexa icha Jesús ajumebeya jume bara botsina.

12

Meje yabara poxonaе Jesús yabara cueicueijeji jiwitha xua fariseomonaе itara beta paeba ichitha jopa xapain exanaeyo

¹ Poxonaе cataunxuae Jesús cueicueijeji tsuncuae, bapoxonaе ayei jiwi nacaetutapona Jesthа. Jiwi nataxu taxunaunaba. Jesús tamropata pitaba xua cueicueijeji jiwitha. Copiya matha Jesús pijimonaе tsipaeba, jeye: "Dota pam jopa pajume naitaewatsinde fariseomonaе pia pecuidubi coyenewa tatsi xua painya nejume cowũntsiyainwa. Barapomonaе itara beta paeba ichitha jopa xapain exanaeyo. ² Daxita diwesin xua po diwesin bequein anoxuae jiwi jopa yaputaeyo, bexa yaputaena. Pocotsiwa jiwi abe nameicha exana daichitha ichamonaе bexa yaputaеponaena baxua. ³ Paxam xua po diwesi merawi nameicha pana natsipaebame, barapo diwesi ichamonaе mataqueitha jume taena. Mataũtano pocotsiwa paxam aisawatha pana namuxu paxapaxeya tsipaebame, barapo diwesi ichamonaе panatha paca jume canawabiya wawai tsane", jei Jesús.

Meje yabara poxonaе Jesús yabara paeba xua pontha bewa ba jiwi cuitaya cunuwina (Mt 10.26-31)

⁴ Equeicha Jesús pijimonaе barai, jeye: "Tamonae paxam paca tsipaebatsi jopa pacuitaya cunuwinda pomonaе xua itacũpatsi xua paca necajutebiwa xua meisa painya pepontha. Ichitha barapomonaе jopa itacũpaetsi xua equeicha paca jumopein tũnaxũ jutebina. ⁵ Ichitha yabara paca tsipaebatsi pontha jame bewa pacuitaya cunuwim, bapon apara jame Nacom. Tsipei bapon itacũpatsi xua painya nepaca bebaiwa pin isototha po pin isototha jopa bapana itacounayiyo xua weraweraca painya nepaca exanaenexa painya pepon. Xaniyan paca tsipaebatsi bewa jame pacunuwim bapon Nacom.

⁶ "Jiwi ba caenaeta siri cinco poyobe, saya ainya paratiyobe nantomata. Bequein barapo siri caenaeta jiwi xua jopa matoma nautsiyo, ichitha Nacom jopa yabara jũntemainaejo siri, mataũtano caeyono jopa yabara jũntemainaejo. ⁷ Irũ daxita painya nentanan Nacom daxita matapaеicha paca matana ununa. Jopa pajunuwinda tsipei paxam Nacom bichocono patsita ainya cuim beyacaincha siri", jei Jesús pijimonaetha.

Meje yabara poxonae Jesucristo yabara paeba xua pomonae peyabara paebiwichi ichamona peitabaratha tatsi

(Mt 10.32-33; 12.32; 10.19-20)

⁸ Equeicha Jesús namchi pijimonaetha, jeye: “Yabara paca tsipaebatsi pomonae xua nayopita ichamonaetha, pomonae xua najei: ‘Apara paxan Jesús pijimonaetha tatsi pan’, najei. Barichi xan, ponxaein Nacom Tananeitapetsin xuya jan tsane matatsunpiwitha. Barapomonae apara tana nejume cowuntsiwi, jan tsane xuya barapo Nacom pia matatsunpiwi tatsi peitabaratha tatsi. ⁹ Ichitha pomonae xua neyabara jei ichamonaetha: ‘Jopa dapon payaitaeyino’, jei, xan ponxaein Nacom Tananeitapetsin xuya barapomonae yabara jan tsane Nacom pia matatsunpiwi peitabaratha tatsi: ‘Apara barapomonae jopa yaitaeyino’, jan tsane.

¹⁰ “Xan ponxaein Nacom Tananeitapetsin pon abe neyabara paeba Nacom itacupatsi xua bapon peyabara junteinaewatsi pocotsiwa bapon abe neyabara paeba. Ichitha pon nama Nacom pia Pejumope tunaxu tatsi bichocono abe yabara paebatsi Nacom jopa bapana yabara junteinae bapon.

¹¹ “Paca caponaena judiromonae pia penacaetutsi bontha ichaxota nacaetuteiba pentacaponae. Paca caponaena pomonaetha pomonae peyabara paebi jiwu xua penatsicuentiwa xua abe peexanaexae yawa tomara pia pentacaponae peitabaratha tatsi paca caponaena. Poxonae baxua paca exanaena, jopa payabara najuntu coyene exabinde pocotsiwa xua painya nejume notsiwa xuano xua painya netsipaebiwa tsane barapomonaetha. ¹² Poxonae juntucuru pacaunutsiya paebiname, bapoxonae Nacom pia Pejumope tunaxu tatsi paca tsijume dubina pocotsiwa painya netsipaebiwa tsane”, jei Jesús.

Meje yabara poxonae Jesús pijimonaetha yabara tsipaeba pon copei pexeinaein

¹³ Caein pin bicheitha, bapon Jesús baraichi, jeye:

—Jiwu Necuidubim, taeweicho inta itorobare bu necata xua tawa xua taxa pecopiniwa xua xuan taxa bayatha pana nejuntana jeba, jei.

¹⁴ Jesús jume epa pita, jei:

—Maisacai, apara dapon aibi pon necana exana xua xan tapaca yabara paebiwatsi xua painya nenatsicuentiwa xua abe painya neexanaexae. Matautano apara dapon aibi pon necana exana xua xan be pon tapacata tsabibeiwatsi pocotsiwa painya axa pia pecopiniwan tatsi, xua bayatha paca juntana jebeiba painya axa, jei Jesús.

¹⁵ Yawa Jesús namchi, jeye:

—Dota xua asiwiya paantobem xua xoxi paxeiname. Bequein pebin copei nawita xeinaetha, ichitha barapo pebin jopa yawenaetsi xua beta pepoponaewa, jei Jesús.

¹⁶ Nexata Jesús tsipaeba jiwu peyabara jeta pepaebi diwesiyo, xua jeye: “Iru matha pebin popona pon copei pexeinaein. Pia pabi tatsi pexaewa tanawetatsi nawita. ¹⁷ Pon copei pexeinaein nexata pia coutha nabarai: ‘¿Eta bichocuaein tsane? ¿Eta xota jebocuaein pocotsiwan pabitha notan?’ jei. ¹⁸ Pia coutha najume nota: ‘Bara yaputan tha xubichi pexaewa matabon. Tha equeicha acabichi po bon bichocono pin bon. Barapo pin bontha daxita pexaewa etsin yawa etsinno daxita pocotsiwa xeinan. ¹⁹ Nexata najuntu coyene baran tsane: Bara daxita xeiname ainya wei dapaein nexa. Nafinacae, xaibare, apeibareno, juntu coyene weiweineibare’, najei xua najuntu coyene barai pon copei pexeinaein. ²⁰ Ichitha pon copei pexeinaein Nacom barai bapon, jeye: ‘Pebin pon jopa xapain nenanta xeinaem, methaunxuae anoxuae merawi tupaename. Daxita baxuan xua yabo notame, ¿jintam metha piawa tsane?’ jei Nacom. ²¹ Baxua barichi pon xua saya copei yabara nanta xeina nawita pecaetubinexa. Bapon Nacom copei xeina taetha, Nacom tsitatsi xua bapon apara acopeibi, tsipei bapon pejuntu coyene tatsi tsocuae xua Nacom jopa pejume cowuntsixaetsi”, jei Jesús.

Meje yabara poxonae Jesús yabara cuiduba po coyene xua Nacom eena pijimonaetha
(Mt 6.25-34)

²² Bapoxonae Jesús pijimonae tsipaeba, jeye: “Paca tsipaebatsi, jopa bichocono payabara najuntũ coyene exabinde pexaewa xua painya neuna jinompaewa tsane. Barichi jopa bichocono payabara najuntũ coyene exabinde papabũrũ xua painya pepon nexa. ²³ Pocotsi asũ pejinompaewa xua Nacom naca cata jame baxua ainya cui, beyacaincha pexaewa xua peuna jinompaewa. Pepon ainya cui irũ, beyacaincha papabũrũ xua pepon nexa. ²⁴ Uni payabara yaputaema. Bapomonae jopa ũbiyo pabitha. Mataũtano jopa jotsiyo pocotsiwa penawetsiwa. Jopa xeinaeyo bomũxũn xua pejebinexa pexaewa. Ichitha Nacom, uni apatatsi pexaewa. Paxam nama bichocono Nacom patsita ainya cuim jame, beyacaincha peyapupunaewi xua Nacom tsita ainya cuichi. ²⁵ Dapon aibi pon paxam jiwana pon itacũpatsi xua xeinaena icha matabi xua po matabitha pepoponaewa tsane poxonae tũpaena. Bequein bapon nayabara nantũ exaba nawita baxua, ichitha jopa itacũpaetsi xua xeinaena caentacabi equeicha. ²⁶ Icha jopa paca itacũpaeyo xua paexaname xua be conotha xua caentacabi nexa, ¿eta xua metha equeicha yabara panantũ exabame ichawan xua daunwei bichocono?

²⁷ “Jame pacayabara nanta xeinare pentonon xua xuwa, xua matono itũpana. Pentonon jopa nacuichiyo yawa jopa natsiexanaeyo papabũrũ penamaxatabinexa. Ichitha paca tsipaebatsi xua pentonon matono itũpana bichocono beyacaincha pocotsi paparuwa Salomón nama xatata xua pexeinya paparuwa. Bapon Salomón pon caena bayatha judiomonae itorobiya pia pepa peewatsinchi pon bayatha tũpa. ²⁸ Pentonon, po matonon wexotha anoxuae xuwa, Nacom cana exana xua matono itũpana. Ichitha pebiwi baya matono tautsina ichaxota pocotsiwatha pan seba, tsipei saya pentono. Nacom cana exana xua pentonon bichocono wũnae bara bequein saya pentonon. Barichi Nacom itacũpatsi xua beta paca naca-eenaewa xua beta painya nejinompaenexa. Mataũtano Nacom paca catsina paparuwan. ¡Maisa pebiwi pam tsobenae be conotha pajume cowũntame Nacom! ²⁹ Jopa payabara najuntũ coyene exabinde pexaewa xuano xua painya neapaewan yabara. Jopa panthũthũ deideijeya jinompaeninde xua ichawa pacayabara nanta xeiname. ³⁰ Tsipei barapo cae pin nacuathe jiwi, saya i baxua pecayabara najuntũ coyene exabi pocotsiwa nantawenona. Ichitha nama paxam painya Axa Nacom panantaũtame pon yaputane daxita pocotsiwa xua xoxi panantawenoname. ³¹ Meisa saya bichocono pacayabara nanta xeinare xua painya neexanaewa xua Nacom ichichipa waba jiwi xua jiwi wabatsi xua petanaexanaenexatsi pijimonae pomonae itorobiya pecanamataxeinaexae. Icha baxua paexanaename nexata Nacom paca catsibina xua daxita pocotsiwa panantawenoname”, jei Jesús.

Meje yabara poxonae Jesús yabara cuiduba xua pocotsiwa Nacom jiwi pejũntana jebiwatsi pia nacuatheicha

(Mt 6.19-21)

³² Equeicha Jesús namchi, jeye: “Tamonae pomonae be ovejamonae pam, painya nejunuwi jiwi pamxaem. Jopa pajunuwinde bequein bara tsiquimonaeyo pam. Painya Axa Nacom pia coya peichichipaexae pia coya paca cana exanaena pijimonae tatsi jiwana pam pomonae pejume cowũntsiwichi pomonae itorobiya pecanamataxeinaexae. ³³ Pacaenaere xua paxeiname. Barapo paratixi pomonae acopeibiwi pacatsibare. Poxonae baxua paexaname, bapoxonae xuya Nacom athabeicha paca catsibina pocotsiwa xua painya nepaca jũntana jebiwa pocotsiwa xua jopa naxubiyo. Athabeicha pecaibin jopa patopaeyo painya nepaca caibinexa pocotsiwa pajebame bara xoteicha. Mataũtano ofo jopa xaeyo pocotsiwa xua pajebame bara xoteicha. ³⁴ Ichaxota ba pajebame xua painya neichichipaewan baxota ba payabara nanta xeiname nawita”, jei Jesús.

Meje yabara poxonae Jesús yabara paeba xua pinae bewa nacui wũnaetichi

³⁵⁻³⁶ Equeicha Jesús namchi, jeye: “Pana najuntũ coyene cui wũnaere xua tapatopaewa tsane. Barapocotsi jũta coyeneya paichinde, icha pomonae petanacuichiwi ichi xua nacui wũnaeta, xua pon bo pexeinaein imoxoyo pepatopaexae. Bapon pon bo pexeinaein nasiwa pona ichaxota jiwi nacaetuta xua pexaenexa pexaewa poxonae pebin piowa

pita. Bapon nawirena bara werena, pomonae pia petanacuichiwichixaetsi nainya tayausaranaxorenatsi pecoiboto poxonae bapon patopa pia botha. Barapocotsi juta coyeneya paichinde. Paxam panacui wunaetsiya jinompare xua tapatopeicaewa tsane. ³⁷ Poxonae bo pexeinaein patopa icha bapon tane xua pomonae pia petanacuichiwichixaetsi jopa maichiyo bapoxonae barapomonae juntu coyene weiweina. Bara xaniwaicha paca tsipaebatsi bapon pon bo pexeinaeinxae pia petanacuichiwichi cuareba pexaethopaewatha, bapoxonae apatsina pexaewa. ³⁸ Pon bo pexeinaein, bara bequein papaetha patopaetha tsipae, ichacuitha bara bequein metha patopaetha tsipae mataquei wunaeyo, ichitha barapomonae pomonae petanacuichiwi juntu coyene weiweinaetsipa poxonae bo pexeinaein tane xua jopa maichiyo barapomonae. ³⁹ Barichi payaputaema, icha bo pexeinaein yaputaetsipa xua poxonae patopaena pon jiwi pecaibin jopa maitecaetsipae. Matauta bapon jopa copatsipae xua pon pecaibin petajondenaewatsi pia botha. ⁴⁰ Bara paichinde. Tawanaetha pana nacui wunaere tsipei xan ponxaein Nacom Tananeitapetsin patopeicaein poxonae jopa tsaca payabara jinompaem tsane poxonae jopa payabara nanta xeinaem tsane xua tapatopaewa tsane”, jei Jesús

Meje yabara poxonae Jesús yabara diwesi paeba ponbe xua bo peyapucaeaeinbe pon xua beta peexanaein, iru xua pon jopa beta peexanaein

(Mt 24.45-51)

⁴¹ Nexata Pedro Jesús yainyabatsi:

—Jesús, pata Tanecanamataxeinaem, po diwesi xuaunxuae pana tsipaebame, xua pecayabara juta pepaebi diwesiyo, ¿saya meisa paxan nexa? ¿Iru ichamonae nexano? jei Pedro.

⁴² Jesús pon Pecanamataxeinaeinxae jiwi, Pedro jume notatsi pecayabara juta pepaebi diwesiyotha pepatopaewa tsane yabara, jeye: “Yabara catsipaebatsi pon matacapopona pomonae bo pexeinaein tanacuitatsi. Barapon xanepanaya yaputaeya matacapopona. Poxonae bo pexeinaein wepu warapa barapomonae, pon bo pexeinaein itoroba pontha pon bo petayapucaeaeinchi, jeye: ‘Inta beta matacapoponde, yawa inta beta pexaewa apare daxita matacabi pomonae xua inta nacuita’, jei bo pexeinaein. ⁴³ Pon bo petayapucaeaein bara juntu coyene weiweinaena poxonae patopaena pon bo pexeinaein, petaexaetsi xua bara beta tayapucaeaca bo, xuano bara beta peexanaexae xua bo pexeinaein itoroba. ⁴⁴ Xaniwaicha paca tsipaebatsi. Bo pexeinaein itorobina, xua pon petayapucaeaeaxaetsi bo, bapon cana exanaeinchi xua equeicha daxita piawa beta petayapu enaewatsi xua xuan xeina pon bo pexeinaein. ⁴⁵⁻⁴⁶ Ichitha ichacuitha pon yapucaeca bo bapon peantacuiyapubein tsipae. Bapon pia coutha nanta xeinaetsipa, najei tsipae: ‘Metha bo pexeinaein jopa cuinaya patopae tsane’, najei tsipae. Bapoxonae bapon cueinta pomonae pon bo pexeinaein tanacuitatsi, pebiwi yawa petsiriwaxi. Matautano bapon nanabanaetsipa nawita ichamonae yawa cupatsi nanaexanaetsipano. Bapoxonae bo pexeinaein jemeicha patopaena poxonae pon bo petayapucaeaein jopa wuna tsaqueinaeyo. Poxonae barapo hora tsuxubi jopa yaputaeyo yawa poxonae barapo matacabi tsuxubi jopa yaputaeyo. Pon bo pexeinaein itorobina ichamonaetha xua pebenexatsi yawa peperaxa exabinexa tsainchi pon bo petayapucaeaein icha cana ichichi pomonae jopa pejume cowuntsiwi.

⁴⁷ “Pon bo yapucaeca, bapon bequein yaputane pocotsiwa pon bo pexeinaein itoroba xua ichichipa, ichitha jopa exanaeyo pocotsiwa itorobatsi, xua bo pexeinaein itoroba. Barapon bichocono peraxa jubinchi xua jopa peexanaexae pocotsiwa itorobatsi. ⁴⁸ Ichitha ichun pon bo yapucaeca jopa cono yaputaeyo pocotsiwa bo pexeinaein itoroba yawa itatemaya abe exana. Bequein jopa cono yaputaeyo yawa itatemaya abe exana, ichitha nantawenona xua peperaxa exanaewatsi be conotha, tsipei abe exana be conotha. Pon ba be conotha Nacom yabara yaputaecinchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom

peyabara yaputaewatsi Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

Meje yabara poxonae Jesús yabara paeba xua jiwi ainya bicheiton naexanaena xua Jesús pejume cowuntsixaetsi xua ichamonae jopa pejume cowuntsixae

(Mt 10.34-36)

⁴⁹ Equeicha Jesús namchi, jeye: “Patopan barapo cae pin nacuathe Nacom tana neitorobixae xua jiwi aperaxatane taexanaenexa abe peexanaexae barapo jiwi. Tap-atopaewaxae jiwi atene tsane icha be ichi poxonae barapo jiwi tautatsi isototha. ¡Maisa metha bayatha bena baxua exanocuaein barapo isoto! ⁵⁰ Xan barichin tsane daxita matapaeicha aperaxatanein tsane poxonae tupaen. Awiya bichocono anthuthurewein xua beya baxua inta exanaena. ⁵¹ ¿Pananta xeiname xua xan apara patopan xua jiwi jüntema pejinompaewa tsane? Apara aibi, jopa baxua tsipatopaeinyo. Apara jame patopeican taexanaenexa po coyene jiwi naba exanatsi xua daxota ainya bicheiton penaexanaewa tsane. ⁵² Anoxuae, yawa bexa tsane cinco poyobe cae matabuxuyo xua bomuxutha jinompa barapomonaenawepu tsatajopaenabe. Tres poyobe ita aenae-aenei tsane xua dos poyobe ita aenae-aenei tsainchibe. Nantiya barapo matabuxuyobe naita aenae-aenei tsanebe. Baxua exanaena xua ichamonae tana nejume cowuntsi jiwixae xua iru ichamonae jopa tana nejume cowuntsixae. ⁵³ Coxiyan pexanto ita aenae-aenei tsane. Coxiyan xuya pexanto ita aenae-aenei tsainchi. Coxiwa pexantiyo ita aenae-aenei tsane. Coxiwa xuya pexantiyo ita aenae-aenei tsainchi. Iruru pamiyobe naita aenae-aenei tsanebe. Pecopeinyobe naita aenae-aenei tsanebe”, jei Jesús.

Meje yabara poxonae Jesús diwesi paeba xua jiwi itaboco tane peitaboco yaputaenexa

(Mt 16.1-4; Mr 8.11-13)

⁵⁴ Yawa Jesús barai jiwitha, jeye: “Poxonae tsaquinaebowa pataneme xua pocotsiwe wejopeine: ‘Ema dawa jopeina’, pajam. Jopa jume bara duneica. ⁵⁵ Poxonae joibo jopa: ‘Wei imoxoyo’, pajam. Jopa jume bara coicha jopa. ⁵⁶ Itara mexeya pexeinya juntu coyene paxeiname ichitha peajuntucoyenebe jiwi pam. Itaboco yawa irano panaita caewatame painya yaputaetsi icha ema yawa xua icha pexeinya matababi. Ichitha jopa payabara yaputaem xua bequein peitupanaewan exanan, ichitha cataunxuae came awiya jopa payabara yaputaem po coyene xua baxua Nacom taneitorobiwa”, jei Jesús.

Meje yabara poxonae Jesús paeba xua ichun juntu cui xanepanaya jüntema popona cana exana xua pon peitafaetabixaetsi

(Mt 5.25-26)

⁵⁷ Equeicha Jesús namchi jiwitha, jeye: “¿Eta xua metha painya coutha beta jopa pana nayabara nanta xeinaem xua icha metha wuna painya neexanaewa? ⁵⁸ Icha ichun bepaca itoroba paca necaponaenexa pontha pon jiwi peyabara paebin xua penatsicuentisiwa xua abe peexanaexae nexata bapon patsipaebare poxonae cataunxuae namtotha paca baru ecapona xua painya nenaita coxone exanaenexa. Xain bapoxonaenae bapon jopa paca caponaenae tsane pontha pon jiwi peyabara paebin xua penatsicuentisiwa xua abe peexanaexae. Tsipei icha bapon bara beya paca caponaetsipa, bapoxonaenae pon jiwi peyabara paebin xua penatsicuentisiwa xua abe peexanaexae equeicha dabeya policiamonaenae beya paca itorobichipa. Bapoxonaenae nama policiamonaenae jiwi pecubi bo beya paca itorobichipa. ⁵⁹ Bara xaniyeya paca tsipaebatsi. Paxam jopa paca pu copabi tsane jiwi pecubi bo weya, beya abu poxonaenae panatsipu matomacaenae daxita paratixi cuntha po paratixi xua paxeiname”, jei Jesús.

13

Meje yabara poxonae Jesús yabara paeba xua ainya cui xua icha juntu coyene pexeinaewa Nacomtha

¹ Barapoxonaenae ichamonae pata. Jesús tsipaebatsi, jeye:

—Galilea nacuapiwi Jerusalén tomaratha capata duweimonae, Nacom pin pia botha xua barapo duweimonae pejutebinexa petautsinexa xua petuxusi exanaenexa Nacom nexa. Ichitha poxonae cataunxuae baxua exanompa Galilea nacuapiwi pon Galilea nacuapiwi peyanacua ewatsinchi, pon pewun Pilato poxonae bapon baxua jume taeba, xua Galilea nacuapiwi exanompa Nacom pin pia botha, bapoxonae bapon pia soldadomonae itoroba Nacom pin pia bo beya xua pejutebinexatsi Galilea nacuapiwi. Daxita duwei jana, yawa Galilea nacuamonae jiwi jana cae jana naexananaya, jei barapomonae.

² Jesús jume nota, jeye: “¿Eta xua metha pananta xeiname? ¿Barapo pebiwi jutebatsi bichocono yatsicaya abe peexanaewixae beyacaincha pomonae abe peexanaewi pomonae jinompa Galilea nacuatha? ³ Apará aibi. Icha jopa Nacom patsita xeinaem icha juntu coyene, bara paichipaem, paca weraweraca exanaetsipa. ⁴ Ichacuitha metha pacui cananta xeiname pomonae dieciocho poyobe, pomonae bayatha bomuxutha mata perababatsi xua po botha bichocono taicha po bo pewun Siloé. ¿Barapomonae mata tsapababatsi bichocono abe peexanaexae beyacaincha pomonae jinompa Jerusalén tomaratha? ⁵ Apará aibi. Icha Nacom jopa patsita xeinaem icha juntu coyene, paxam bara paichipaem paca weraweraca exanaetsipa”, jei Jesús.

Meje yabara poxonae Jesús yabara paeba higuera nae xua po diwesi pecayabara juta pepaebi diwesiyo

⁶ Nexata Jesús tsipaeba pecayabara juta pepaebi diwesiyo. Bapon namchi, jeye: “Matha iruru pebin higuera nae xeina po nae ubanota pia pabitha. Barapo pebin pia pabitha pona pia taetsi icha yacuei dubena. Ichitha poxonae tane jopa yacuei dubenaeyo.

⁷ Nexata pon pabi pexeinaein tsipaeba pontha pon pabi petayapu eenaeinchi, namchi, jeye: ‘Taema acoibi po weibe pabitha poneiban tha bequein taibichi pethei ichitha jopa yacuei dubeneibiyo. Uncataxore. Jopa ichichipaeinyo xua came barapo nae saya uncua ichaxota ubanotinchi icha nae, po nae penacoichi nae’, jei pon pabi pexeinaein poxonae tsipaeba pon pabi petayapu eenaeinchi. ⁸ Ichitha pon pabi petayapu eenaein jume nota: ‘Tanentacaponam, abu barapo nae uncuaena barapo weithe. Tha yaira tabaca nacuenacuena exanaetsi paraparatotha, bapoxonae duwei petasin jebarecaetsi petabaca deca. ⁹ Metha bapoxonae matono dubenaetsipa icha weitha. Icha jopa matono dubena tsane icha weitha nexata moya beuncataxotsi’, jei pon pabi petayapu eenaein”, jei Jesús.

Meje yabara poxonae Jesús axaibi exana yabuyo pentaquei seicae matabitha powayo naepasi xurutsiya pona

¹⁰ Caentacabitha judiomonaе barompaya pia pentaquei seicae matabitha tatsi Jesús cuidubauya Nacom Pejume Diwesi judiomonaе pia penacaetutsi botha tatsi. ¹¹ Barapo botha yabuyo eca, powa caena bayatha atene dieciocho po weiyobe. Barapowa naepasi xurutsiya pona. Barapowa xua juntucuru epasi boipana ajibi. ¹² Poxonae barapowa Jesús tane, Jesús waba barai, jeye:

—Yabuyo anoxuae jopa neraichiwa, bayatha wunaem, jei Jesús.

¹³ Nexata barapowa Jesús pecobetha jayaba. Bapoxonae yabuyo epasi naroitaba yawa barapowa wunaе jainta, Nacom wunaе jaintatsi. ¹⁴ Ichitha pon pecanamataxeinaein judiomonaе pia penacaetutsi bo tatsi, bapon Jesús casebatsi xua axaibi peexanaexae pentaquei seicae matabitha. Bapon barai jiwitha, jeye:

—Bara iru seis po matabibе xua be cae semanatha tsohoneibi xua barapo matabintha benacuitatsi. Jame barapo seis matabintha moya papare xua axaibi painya nepaca exanaewa tsane. Nama jopa papatsinde pentaquei seicae matabitha, jei bapon pon pecanamataxeinaein judiomonaе pia penacaetutsi bo tatsi.

¹⁵ Bapoxonae Jesús jume nota, jeye:

—Itara mexeya pexeinya juntu coyene painya nexenaewi ichitha peajuntucoyenebe jiwi pam. Ichitha paxam iru panacuitame pentaquei seicae matabitha. Burro ba payama isanaxubame, bueyno ba payama isanaxubame painya apatsinexa mera pepa mene beya barapo pentaquei seicae matabitha. ¹⁶ Barapowa powayo Abraham pia

pemomoxi susatopiwi jiwana wayo tatsi. Barapowa caena bayatha atene exanatsi. Satanás atene exana dieciocho po weyobetha. Daxota iruru barapowa xan axaibi exanan pentaquei seicae mataqueitha, jei Jesús.

¹⁷ Poxonae Jesús baxua caunuta, bapoxonae pomonae Jesús pia peaitafaetabiwichi aura tsumenae. Ichitha daxita jiwi juntu coyene weiweina petaexae xua Jesús pexeinya pewunaewa exana.

Meje yabara poxonae Jesús cuiduba pecayabara juta pepaebi diwesiyo po peubi xutiyo pewun mostaza xutiyo

(Mt 13.31-32; Mr 4.30-32)

¹⁸ Equeicha Jesús namchi, jeye: “Poxonae Nacom waba jiwi petanaexanaenexatsi pijimonae tatsi, pomonae itorobiya peewatsixae, ¿eta po coyene nacoyene jupabe? ¿Eta xua paca cuidubinchi xua baxua yabara? ¹⁹ Baraxua apara icha be mostaza xutiyo ichi po mostaza xuto pebin uba pia pabitha. Xuwa beya pin nae tsoponae. Pepinnaexae daxota siri exana coton pemaxuranantha. Icha mostaza xutiyo ichi xua beya pin nae tsoponae, bara juta ichi Nacom pejume cowuntsiwi. Bequein anoxuae tsica bicheitiyo, bexa tsane beya pin bicheito tsoponae tsane”, jei Jesús.

Meje yabara poxonae Jesús cuiduba pecayabara juta pepaebi diwesiyo xua levadura yabara xua pan cotowa exana

(Mt 13.33)

²⁰ Barichi Jesús namchi, jeye: “Poxonae Nacom waba jiwi petanaexanaenexatsi pijimonae tatsi pomonae itorobiya peewatsixae barapomonae pin bicheitomonae naenaexanapona. ¿Eta po coyene nacoyene jupabe? ²¹ Barapo coyene bara juta ichi icha levadura matawun ichi, pocotsiwa cotowa exana poxonae pan exana. Petsiriwa tres po tsoropabe trigo xu beno muxuna cauyentaba levadura matawun pocotsiwa xua cotowa exana pan. Bapoxonae pentubu naexananaya, cocotowapona tsipei levadura matawun muxunaxuba”, jei Jesús.

Meje yabara poxonae Jesús yabara cuiduba po boupayo tsica boupayo dena

(Mt 7.13-14, 21-23)

²² Poxonae Jesús Jerusalén namto beya pona, cuiduba tsiniya Nacom Pejume Diwesi po bon epatotha bobena yawa tomaranthano. ²³ Pomonae Jesús cuiduba barapomonae caein jiwana Jesús yainyabatsi, jeichichi:

—Patatanecanamataxeinaem, ¿saya tsiquimonaeyo pomonae capanenebiyatsi? jeichichi Jesús.

Nexata Jesús namchi jiwitha, jeye:

²⁴ —Bequein bichocono ayapube xua naexana Nacom pijimonae pomonae Nacom itorobiya ewata, ichitha bichocono pajujure xua panaexaname Nacom pijimonae tatsi. Baraxua be poxonae pin bicheitomonae ichichipa xua pejojondenaewa tsica boupayo dena. Bichocono ayapube. Bequein barapomonae ichichipaena xua pejojondenaewa tsane ichitha jopa itacupae tsainchi. ²⁵ Barapoxonae matabi jopaena po matabitha poxonae pon bo pexeinaein pecoiboto daunwei exanaena. Paxam pomonae aisowatha paumenae pecoiboto padacadacatsiname, pajam tsane: ‘Patatanecanamataxeinaem, painta coibo saranaxorena bomuxu’, pajam tsane. Ichitha bapon paca jume notsina. Jei tsane: ‘Bu canta jopa paca yaitaetsi xua jopa paca yaputaetsi xua ichaxota werena painya neponaewi’, jei tsane. ²⁶ Paxam pajam tsane: ‘Bara cain bayatha paca baru xainchiba yawa paca baru apatsiba, yawa bayatha jiwi cuidubameba namtotha pata tomaratha’, pajam tsane. ²⁷ Ichitha Nacom pon painya Nepacacanamataxeinaein paca jume notsina: ‘Aunxuae bayatha paca baraichiba: Bu canta jopa paca yaitaetsi. Jopa paca yaputaetsi xua ichaxota werena painya neponaewi’, jan. ‘Taxainya weya panatsixibarucupare. Apra paxam peajuntucoyenebe jiwi pam, xua abe painya neexanaewi’, paca jei tsane. ²⁸ Barapoxonae pataename xua Abraham, iru Isaac, iru Jacob, iru daxita Nacom peitorobi jume pepaewi xua ena Nacom pia peitorobi nacuatheicha. Ichitha paxam baxoteicha

jopa pana naenaem tsane poxoru paca bebai tsane Nacom pia peitorobi nacua weya. Daxota pawecoyam tsane anaya nantanuweya pana nawano tsaquibasinaename poxoru paca bebai tsane Nacom pia peitorobi nacua weya. ²⁹ Poxoru pinmonae patsina, Nacom pia peitorobi nacuatha penabanaenexa tsane. Ichamonae pomonae ichaxota xometo ecoina, barapomonaepiwi patsinano. Ichamonae pomonae ichaxota xometo jopeica, barapomonaepiwi patsinano. Ichamonae pomonae ena pocotsiwa bereca, barapomonaepiwi patsinano. Ichamonae pomonae pocotsiwa beweyabeicha ena, barapomonaepiwi patsinano. ³⁰ Pomonae xua anoxuae pepawi naexana pomonae jiwi jopa petsita ainya cui jiwichi po cae pin nacuathe barapomona Nacom pia peitorobi nacuatheicha peainya cui jiwi tsane. Pomonae xua anoxuae, pomonae jiwi petsita ainya cui jiwichi po cae pin nacuathe, barapomona bexa Nacom pia peitorobi nacuatheicha jopa peainya cui jiwi tsane, jei Jesús.

Meje yabara poxonae Jesús Jerusalén tomarapiwi siwa wecoyeichi (Mt 23.37-39)

³¹ Barapoxona fariseo jiwanamonae pata. Jesús tsipaebatsi. Jeichichi:

—Bewa warapaetsipame barapo tomara weya. Dota bepa Herodes cabexubei, jei.

³² Ichitha Jesús jume nota, jeye:

—Paponare painya netsipaebinexa pon jiwi pemuxujainyabin, bapon Herodes. Pana nejume yopire pajande: ‘Taema anoxuae yawa baya tsane itawetsin caurimonae jiwi weya yawa axaibi exanaein peatenewi. Popobaya tsane wetsin’, jei pajande. ³³ Ichitha anoxuae yawa baya tsane nantawenonan xua bara beya Jerusalén tomara beya ponaein namtotha. Barapoxona popobaya patopiyaein Jerusalén tomaratha. Jopa tana neitacupaexae xua tatapaewa tajũ Jerusalén tomara pepuya beya ponxaein Nacom peitorobi jume tapaebin. Bewa tãpaein Jerusalén tomaratha, jei Jesús fariseomonaetha.

³⁴ Bapoxona Jesús yabara unthũthũ wecoyei Jerusalén tomarapiwi. Jesús wecoyeya namchi, jeye: “¡Maisa Jerusalén tomarapiwi pam, pajutebeibame pomonae Nacom pia peitorobi jume pepaebiwi! ¡Mataũtano paxam pajutebeibame ibotontha pomonae Nacom pacata itoroba! ¡Maisa bepaca caetucaetuteibinchi, tapaca cayawenaewa tsainchi, icha wacara ichi poxonae nacoxi caetucaetuteta pecuarafetha! ¡Maisa bebarichocuaein tsane daichitha jopa paichichipaem! ³⁵ Incane pataema Nacom nacui baraxuba xua jopa painya nepaca caewatsiwa tsane. Daxota Nacom jopa poponaeyo pia pin pia botha tatsi painya tomaratha. Paca tsipaebatsi xua equeicha jopa pana netaem tsane, beya abũ poxonae pana neyabara jam tsane: ‘¡Maisa bapon jiwi jũntũ coyene weiweina cana exanatsi, pon patopa Nacom peitorobixae, po Nacom jiwi Pecanamataxeinaeinchi!’ pana neyabara jam tsane”, jei Jesús fariseomonaetha.

14

Meje yabara poxonae Jesús axaibi exana pon perũ putsuna

¹ Caentacabi pentaquei seicae matabitha Jesús pona fariseomona pia pentacaponae aewi tatsi jiwanapin pia botha tatsi penanabanaenexa. Baxota fariseomona ichamonae Jesús amanayabiya tainchi pecui yaputaenexa tsainchi xua exana. ² Irũ baxota pebin patopa ichaxota Jesús naeca. Barapo pebin pon perũ putsuna. ³ Nexata Jesús yainyaba pomonae jiwi pecuidubiwi Moisés pia peitorobi coyene, yainyabano fariseomona, jeye:

—¿Bara Moisés pia peitorobi coyene jumewatha yabara copata jampa xua pon atene bara axaibi peexanaewatsi pentaquei seicae matabitha jampa? ¿Ichacuihitha metha jopa yabara copatsiyo jampa? jei Jesús.

⁴ Ichitha barapomona moya umena. Bara Jesús jayaba pecobetha pontha pon atene, yawa axaibi exana, tsipaebano xua bara peponaenexa. ⁵ Jesús tsipaeba, barapo fariseomonaetha, jeye:

—Paxam panantawenoname xua panacuitame pentaquei seicae mataqueitha xua poxonae pajutsiname painya nexanto xua poxonae butecatsi iruba bueyno bara bequein pentaquei seicae matabi, jei Jesús.

⁶ Barapomonae jopa itacupaetsi xua Jesús pejume notsiwatsi.

Meje yabara poxonae Jesús yabara paeba pomonae pexaewa petsiwabiwichi penabanaenexa poxonae pebin piowa pita

⁷ Nexata Jesús tsipaeba barapomonae pecayabara juta pepaebi diwesiyo pomonaetha pomonae xua pata penabanaenexa. Baxua tsipaeba poxonae tane xua barapomonae nanta caeniya, copiya penabanaenexa. Jesús namchi barapomonaetha, jeye:

⁸—Poxonae ichun cawaba jinya nenabanaenexa tsane, jopa nantacaecaeinde ichaxota enothopeiba pomonae peainya cui jiwi. Poxoru metha iruru patopaetsipa pon bichocono jiwi tsita ainya cuichi pon beyacaincha xam. ⁹ Pon xua cawaba, iru xua wabatsi pon jiwi tsita ainya cui naexanatsi, bapon cabarai tsipae: ‘Incane nontaponde icha muxunenetha ecare. Cotacaya xaema. Ichaxota ecame, baxota ecaena pon jiwi tsita ainya cui naexanatsi’, jei tsipae pon xua paca mata canabane. Nexata icha muxunenetha uranaya ecoundecaetsipame. ¹⁰ Daxota poxonae cawaba nenabanaenexa, cotacaya ecareinca necajeinexa poxonae patopa pon paca mata canabane: ‘Tajiton, icha muxunenetha ecare ichaxota xaiba pomonae jiwi tsita ainya cui naexanatsi’, jei. Bapoxonae pomonae pata xua penabanaenexa barapomonae cayaitaena xua xam pon jiwi tsita ainya cui naexaname. ¹¹ Pon pia coutha peainya cui jiton naexana pejuntu coyenetha, Nacom exanaena xua bapon pecui paw jiton naexanaena. Ichitha pon xua pepawi naexana pejuntu coyenetha Nacom exanaena xua bapon peainya cui jiton naexanaena, jei Jesús.

¹² Yawano Jesús barai pontha pon pexaewa petsiwabixaetsi, jeye:

—Poxonae pexaewa tsixaname yawano ichacuitha xua poxonae pin penabanaewa tsixaname, jopa wabinde jinya jiwimonae penabanaenexa. Iru jopa wabinde ewe-ichomonae iru jinyamonae iru pomonae copei pexeinaewi. Poxoru barapomonae pentoma exanaetsipa xua xuya catsi wabichipa penabanaewa. ¹³ Jame maisa poxonae jiwi pexaewa tsixaname yawano ichacuitha pin penabanaewa tsixaname, wabare pomonae peacopeibi jiwi. Yawa wabare pomonae jopa peainya cui jiwi, iru pejajuyajuyei jiwino, iru pomonae peitata nacutsi jiwino. ¹⁴ Bapoxonae juntu coyene weiweinaename. Barapomonae jopa itacupaetsi xua xuya necatsi wabiwa penabanaewa xua pentoma nexa. Ichitha Nacom cata exanaena pentoma poxonae jiwi asu exanaeinchi pomonae pejuntu coyene wanae jiwi, xuano xua exana pocotsiwa Nacom itoroba, jei Jesús.

Meje yabara poxonae Jesús cuiduba pecayabara juta pepaebi diwesiyo xua pin penabanaewa peexanaewa tsane

(Mt 22.1-10)

¹⁵ Poxonae baxua jume tane, pomonae xua xayena, barapomonae caein jiwana Jesús baraichichi, jeichichi:

—¡Pon xua nanabane Nacom pia peitorobi nacuatheicha tatsi, bapon bichocono juntu coyene weiweina! jeichichi Jesús bapon.

¹⁶ Nexata Jesús jume nota, jeye:

—Pebin pin penabanaewa tsixana jiwi. Barapo pebin itoroba ichun, xua pewabinexa ayei bicheito. ¹⁷ Poxonae barapo hora tsuxubi poxonae pexaewa nacui wanaeta, bapon itoroba pia petanacuichinchi xua pewabinexatsi pomonae bayatha wabatsi. Barapon namchi: ‘Pajande jiwi: Antha pajojondena jei. Pexaewa weta jei, pajande’, jei pon mata canabane. ¹⁸ Ichitha daxita barapomonae paeba xua pinae enatsi xua peexanaewa. Ichun namchi: ‘Bayatha pabi comotan, tha canta matha taetsi. Nexata nejume yopire pinae jopa casebinde yaitama pinae jopa patopae tsane, jande’, jei. ¹⁹ Ichun namchi: ‘Canta diez poyobe comotan buey. Tha canta matha taetsi. Nexata nejume yopire pinae jopa casebinde yaitama pinae jopa patopae tsane, jande’, jei. ²⁰ Ichun namchi: ‘Canta anoxuaetha taseuri pitan. Nexata nejume yopire pinae jopa

itacupaetsi xua pepatopaewa tsane, jande', jei. ²¹ Poxonae caibe nawiya pon penajume caitorobinchi bapon daxita baxua tsipaeba pia pecanamataxeinaeinchitha. Nexata pon pecanamataxeinaein caseba pomonaetha pomonae bequein pewabixae, xua jopa pepatsixae. Bapon barai pia petanacuichinchi, jeye: 'Nainya ponde tomara namtontha, yawa tsiqui namtoxitha tomara cuariya. Berene peacopeibiwi caponde, penabenaewi caponde, pejayujayujeimonae caponde, pomonae peitata nacutsi jiwi berene caponde', jei pon pecanamataxeinaein. ²² Pon petanacuichin pia pecanamataxeinaeinxaetsi, bapon pia pecanamataxeinaeinxaetsi barai: 'Tanecanamataxeinaem, xua neitorobame bayatha exanan, ichitha bomuxu jopa tutu canaupaxubiyo, jiwi yayatha', jei. ²³ Nexata bapon jume notatsi pia pecanamataxeinaeinchi: 'Equeicha nainya ponde tomara cuariya beya po namton pin namtontha, yawa tsiqui namtoxithano tomara cuariya. Baxota jume daunweya itorobare pomonae xua taneme xua pepatsinexa tabotha petutu canaupaxubinexa tsane. ²⁴ Catsipaebatsi, pomonae bequein waban ichitha jopa patsiyo, barapomonae jopa nabanae tsane tabotha', jei pon pecanamataxeinaein, jei Jesús.

Meje yabara poxonae Jesús paeba xua pinae bewa matha nacui barapentsi pia peexanaewan poxonae Jesús pepuna jinompaewa tsainchi
(Mt 10.37-38)

²⁵ Pin bicheitomonae Jesús puna poinchi. Jesús napatomeicha necota, namchi barapomonaetha, jeye: ²⁶ "Icha pebin ichichipa xua tajiwiwimonae jiwanapin penaexanaewa tsane, bapon bewa yabara naitematsi pia peexanaewa. Bapon jame bewa neantobe tsane beyacaincha xua paxatha, beyacaincha xua penatha, beyacaincha xua piowatha, beyacaincha xua pia pexuitha, beyacaincha xua peweichowitha, beyacaincha xua pamchoxitha, yawano xua beyacaincha naantobe pia coutha, nexata bapon bara tajiwiwimonaeepin. Ichitha icha jopa baxua exanaeyo xua bichocono nama tana neantobewa, bapon jopa tajiwiwionaeyo. ²⁷ Matautano pon jopa awiya exana ducuaenaebiyaeyo pocotsiwa itoroban, tsipei jopa beperaxa exanaetsi icha be xua poxonae neichi nexata bapon jopa tajiwiwionaepinyo. ²⁸ Poxonae pebin imoxoyo bo exana, po bo, pin bo, copiya matha nanta xeina xua bo yabara, copiya coichaxu ununa, icha jupa xua pecubaponaenexa pomonae nacuita bo. ²⁹ Ichacuitharu saya naewa wetanota, poxoru coichaxu axu weraweraca. Daxota jopa yaputaeyo xua pewetsiwa. Ichamonae pata, barapomonae bo taenota. Poxonae tane barapomonae cui capona, bapon cui caponatsi. ³⁰ Barapomonae namchi tsane, jei tsane: 'Barapon tamropata pitaba bo xua acaba, ichitha jopa itacupaetsi xua pewetsiwa', jei tsane", jei Jesús. ³¹ Equeicha Jesús namchi: "Iru ru pon jiwi itorobiya pia pepa peewatsinchi ichichipa xua jiwi naba exana ichun beya pontha pon iru jiwi itorobiya pepa peewatsin. Poxonae bapon baxua exana, copiya nanta xeina, najei tsane: 'Jamaisa, saya beisa diez mil po soldadomonae bicheitobe neyaewatacua, bapon netsi veinte mil po soldadomonae bicheitobe yaewatatsi. Metha tamonae jopa inta itacupaetsi xua peamanayabiwa barapo veinte mil bicheitha xua taxainya berena ponaena', najei tsane. ³² Icha barapon jopa itacupaetsi xua peamanayabiwa, bapon najume caitorobina ichuntha, poxonae cataunxuae tajun eca, ichun pon icha nacuapiwi itorobiya pia pepa peewatsinchi xua petapaebinexa tsainchi xua jopa penabiwa tsane yabara, xua equeicha juntema pejinompaenexa. ³³ Icha bapon ichi pon jiwi itorobiya pia pepa peewatsinchi xua baraxuba xua nanta xeina, xua penabiwa tsane, barichi icha paxam jopa pabarapentsim daxita pocotsiwa paxei name, jopa paca itacupaeyo xua tajiwiwimonae painya nenaexanaewam", jei Jesús.

Meje yabara poxonae Jesús diwesi yabara paeba xua bequein sare xoya pexaewatha ichitha awiya axaibi
(Mt 5.13; Mr 9.50)

³⁴ Equeicha Jesús jeye: "Sare beno, bara beno wuna. Ichitha icha barapo sare beno jopa abenataeyo, bapoxonae jopa peitacupaewatsi xua equeicha peabenataewa. ³⁵ Barapo sare jopa ira nexiyo tsipei naein jopa beta xuwa exanaetsi. Daxota barapo sare

jiwi bewa xubi. Icha pamuxu dubename moya pana nejume naitaeware pocotsiwa tapaca tsipaebiwatsi”, jei Jesús.

15

Meje yabara poxonae Jesús paeba pecayabara j̄ta pepaebi diwesiyo xua oveja pe-eeinaein yabara xua poxonae pia oveja taeba

(Mt 18.10-14)

¹ Pomonaē paratixi pentoma noteibiwi, po paratixi jiwi bewa catsibina pon romanomonaē itorobiya pia pepa peewatsinchi nexa, ir̄a pomonaē abe peexanaē cuiru coyene peexaneibiwi daxita barapomonaē Jesús imoxoyo caquita umenarucupatsi xua Jesús pejume taenexatsi. ² Daxota fariseomonaē ir̄ur̄a pomonaē jiwi pecuidubiwi Moisés pia peitorobi coyene tatsi daxita barapomonaē Jesús abe yabara paebatsi. Barapomonaē namchi, jeye:

—Barapo pebin napona pomonaetha pomonaē abe peexanaē cuiru coyene peexanaewi, yawa barapomonaetha nanabane, jei.

³ Tsipei Jesús yabara paebatsi barapomonaē, daxota nexata Jesús tsipaeba pecayabara j̄ta pepaebi diwesiyo jeye: ⁴ “Jiton ba xeina oveja cien poyobe, caein tanapuxanatsi. Jiton wexotha cuenta pona noventa y nueve poyobe oveja pewenaweneinexa oveja pon beya matapainya taeba. ⁵ Poxonaē jiton oveja taeba pon aichurucuae, j̄nt̄a coyene weiweinyaya bota peutucuratha. ⁶ Poxonaē jiton oveja capatopa botha bapoxonaē piamonaē waba pomonaē petaenaewichi pia botha, pia jiwi wabano, wabano pomonaē petsicuarab̄a enaewichi. Jiton daxita barapomonaetha barai, jeye: ‘Panebar̄a j̄nt̄a coyene weiweinare tsipei oveja bayatha taeban pon bayatha inta aichurucuae’, jei bapon piamonaetha. ⁷ Xaniyan paca tsipaebatsi. Icha jiton ichi poxonaē j̄nt̄a coyene weiweina petaebixae oveja, barichi pomonaē peitaboco beicha ena. Bapomonaē bichocono j̄nt̄a coyene weiweina poxonaē ich̄un Nacom tsita xeinatsi icha j̄nt̄a coyene pon copiya penacui matacaetsin xua abe peexanaē cuiru coyene exana. Barapomonaē bapon yabara toxeinchiya j̄nt̄a coyene weiweinatsi beyacaincha poxonaē yabara j̄nt̄a coyene weiweinatsi pomonaē xua noventa y nueve poyobe jiwi pomonaē xanepanaya peexanaewi, pomonaē jopa Nacom pentichi”, jei Jesús.

Meje yabara poxonaē Jesús paeba pecayabara j̄ta pepaebi diwesiyo xua yab̄ayo yabara xua poxonaē taeba paratiyo

⁸ Equeicha Jesús paeba pecayabara j̄ta pepaebi diwesiyo, jeye: “Petsiriwa diez po paratiyobe xeina xua pecacomocae paratixi. Cae paratiyo taaichurucuaetsi, daxota peoicha coicha exana. Bo tutu camona bewayo, beya matapainya taeba. ⁹ Poxonaē barapowa paratiyo taeba bapoxonaē pia jitowaxi waba, wabano powaxi petsicuarab̄a enaewaxichi. Barapowa namchi barapowaxitha: ‘Pana nebar̄a j̄nt̄a coyene weiweinare poxoru bayatha taeban paratiyo, po paratiyo bayatha inta aichurucuae’, jei. ¹⁰ Paca tsipaebatsi barichi peitabocotha Nacom pia matatsunpiwimonaē tatsi bichocono j̄nt̄a coyene weiweina poxonaē ich̄un Nacom tsita xeinatsi icha j̄nt̄a coyene pon copiya penacui matacaetsin xua abe peexanaē cuiru coyene peexanaein”, jei Jesús.

Meje yabara poxonaē Jesús paeba pecayabara j̄ta pepaebi diwesiyo xua pebin yabara pon pexanto cayabara cui j̄nt̄emaina xua abe exana

¹¹ Barichi equeicha Jesús paeba icha pecayabara j̄ta pepaebi diwesiyo, jeye: “Jiton xeina pexantobe. ¹² Pon xuyapin paxa barai: ‘Axa, necare xua necopiniwa tsane pocotsiwa xua pana nej̄ntana jebame bequein cataunxuae poponame’, jei xuyapin. Nexata barapo jumetha coxiyan pexantobe tsata catabe. ¹³ Pirapaeyo xuyapin piawa caenaeta xua paxa catatsi. Barapo paratixi cuntha taj̄a beya pona icha nacua beya. Icha nacua abe exana. Barapo paratixi cobe caewitatsi xua nasi cui matacaeta yab̄axitha. ¹⁴ Poxonaē bapon daxita paratixi wetaxuba, ir̄ur̄a mayayo tsuxubir̄a barapo nacua, barapon muxu piyain pet̄apae. ¹⁵ Nexata bapon jeita penacuichiwa ich̄untha xua barapo

nacuatha. Bara barapon itorobatsi xua petayapu eenaenexa marranomona. ¹⁶ Bapon piyain ichichipa xane marranomona pexunenowa xua petsebocoton, tsipei bapon jopa catichi pexaewa. ¹⁷ Nexata bapon pia coutha nanta xeinanaya najei: ‘¡Maisa taxa pia petanacuichiwichi tatsi pexaewa ajainbe, tonsana nawita! Nama xota ecanje tain muxu tatapae. ¹⁸ Tha tacoyo beya nawiyaetsi ichaxota taxa popona. Metha jan tsane: Axa, Nacom tsita abe exanan, yawa catsita abe exanatsino. ¹⁹ Daxota equeicha jopa be taxanto, nejam. Nenatsicotaema be jinya necata nacuichiwi jiwanan, jan tsane’, najei barapo xuyapin. ²⁰ Nexata bapon paxa beya caibe nawiya.

“Poxonae cataunxuae tajũ jiniya, paxa taebiyatsi, coxiyan pexanto yabara nantanuweya cui nanta xeina. Coxiyan pexanto matenta cuinaepoinya. Nexata pexanto cobe jayaba. Jũntũ coyene weiweinaya pexanto naise cateita waetaba peantobexae. ²¹ Nexata barapo xuyapinxae paxa barai: ‘Axa, Nacom abe tsita exanan, yawa abe catsita exanatsino. Daxota equeicha jopa be taxanto nejam. Nenatsicotaema be jinya necata nacuichiwi jiwanan’, jei barapo xuyapin. ²² Ichitha coxiyan barapo jumetha barai pia petanacuichiwichi: ‘Nainya papire pexeinya paparuwa pamaxatare taxanto. Yawa anillo pacobesi xatare. Yawa pataxu xatare xua penataxu xatatsiwa. ²³ Vacayo pebtiyo poyo nasiteca pacarenande. Pabexore. ¡Bũ xainchi! ²⁴ Poxoru barapo taxanto mexeya nacata tũpawejan, ichitha anoxuae asũ. Bayatha nacata aichawiya, anoxuae matapainya netsita patopa’, jei coxiyan. Nexata bapoxonae tamropata notarũcũpa xua weiweina poxonae xane”, jei Jesús.

²⁵ Equeicha Jesús namchi, jeye: “Irũrũ pin penabanaewa exanumpa, irũrũ matapin pabitha popona. Poxonae bo benawirena busi taeba xua busi tanbaba yawa jume tane xua juinya nawiraba. ²⁶ Nexata barapon pon matapinxae waba caein pomonae penacuichiwi. Yainyaba, jeye: ‘¿Eta xua juinya busi exanumpa?’ jei. ²⁷ Nexata barapon pon penacuichiwi jiwana jume nota. Jeye: ‘Apara poxoru neyapin patopa. Axa pana itoroba bepa pinae pabexubin vaca pebtiyo poyo nasiteca, poxoru pinae neyapin xanepanaya asuya pepatopaexae’, jei. ²⁸ Ichitha barapon pon matapinxae barapo jumetha anaepana. Jopa bejoniyaeyo botha. Coxiyan pesato bejoniya, pexanto jume daunweya waba: ‘Owae, antha, antha jonarena’, jei coxiyan. ²⁹ Nexata barapo coxiyan pexanto jume notatsi: ‘Bara xam caena bayatha yaputaneme xua ainya wei cata nacuitatsi yawa jopa cajumefebichi. Ichitha bapana jopa necatsim peweinyo cabritiyo, tajiwimonae tabarũ nabanaenexa. ³⁰ Ichitha barapo nexanto anoxuae cata patopa, xua jinya paratixi caewitaxuba xua penasi cui matacaetsiwa yabũxitha. Xam penacuichiwi itorobame xua vacayo pebtiyo bexubina poyo nasiteca tayapin nexa’, jei barapon pon matapinxae.

³¹ “Nexata coxiyan jume nota pexanto: ‘Owae, apra xam cabarũ poponeibatsi. Daxita pocotsiwan xeinan, apra bara jinyawa. ³² Ichitha anoxuae wũnae nawita xua pin penabanaewa, yawa jũntũ coyene weiweinaeinchi poxoru barapo neyapin, pon xua mexeya nacata tũpawejan, anoxuae asũ popona. Caena bayatha nacata aichurucuae, yawa anoxuae matapainya naca tsita patopa’, jei coxiyan poxonae pexanto tsipaeba”, jei Jesús.

16

Meje yabara poxonae Jesús paeba pecayabara jũta pepaebi diwesiyo xua pebin yabara pon jopa xanepanaya peyapucaeaein bo

¹ Equeicha Jesús tsipaeba pijimonae pecayabara jũta pepaebi diwesiyo. Jesús jeye: “Matha irũ pebin popona pon copei pexeinaein. Bapon xeina pon bo petayapucaeaeinchi. Bapon pon copei pexeinaein tsipaebatsi ichamonae xua pinae pon bo petayapucaeaeinxatsi jopa pinae xapain exanaeyo, saya pinae abe exana, jei ichamonae. ² Nexata bo pexeinaein pon copei pexeinaeinxae, bapon waba pia petayapucaeaeinchi bo. Bapon barai pontha pon bo petayapucaeaeinchi, jeye: ‘¿Jame ichamonae jume tan xua pinae inta abe exaname xua tawan? Incane tha taetsi xua po paperantha tinadubame

pocotsiwa inta caenaetame, xuano xua inta comocame. Tsipei jopa becaexanaetsi eque-icha xua inta yapucaecame daxita tawan', jei. ³ Nexata pon bo peyapucaecaeinxae nacui yabara nanta xeina pia coutha, nabarai: '¿Eta pocotsiwa exanocuaein anoxuae tsipei nama pon tanecanamataxeinaein imoxoyo necopata xua bapoxonae jopa taxeinaewa tsane pocotsiwa taexanaewa? Jopa nebusi coxonaeyo xua naein tauncatsiwa pabitha. Auran tsipae xua saya amanaya i tawuqueibiwa paratixi. ⁴ Jaina, bara yaputan xua po coyeneya exanaein poxonae tanecanamataxeinaein necopatsina, xua poxonae jopa xeinaein tsane tanacuichiwa xua ichamonae tanententa wabeibinexa pia botha', jei. ⁵ Nexata bapon pon bo petayapucaecaein daxita tamropatsiya wawabapona pomonae pia pecanamataxeinaeinchi petantoma amanayabixaetsi. Bapon matha yainyaba pontha pon copiya patopa jeye: '¿Eta xoyobe matoma amanayabame xua jopa cataunxuae catsim pontha pon tanecanamataxeinaein?' jei. ⁶ Bapon jume nota, pon bo peyapucaecaein, jume notatsi, jeye: 'Cien po penasi mera bosibube xua pin bosixibun tha baxua catichi, ichitha cataunxuae jopa baxota matomatsinyo barapo penasi mera bosibun', jei. Pon bo petayapucaecaein xuya jume nota: 'Taema xote xeinanje jinya papera xua tinadutame, cien po nasi bosixibun, jam, xua bexa matomatsiname. Xote nainya ecoundeisque barapo netinadutsiwa, iquinaxore. Icha itaneto dure xua saya cincuenta po penasi mera bosixibube, jande', jei pon bo petayapucaecaein. ⁷ Bapoxonae equeicha ichuntha yainyaba: 'Incane iru xamdu, ¿eta xoyobe tanecanamataxeinaein taacoibichi xua catsiname bapon?' jei. Bapon jume nota, pon bo petayapucaecaein jume notatsi, jeye: 'Tha catichi cien po sacube aro sacun', jei bapon. Nexata pon bo petayapucaecaein xuya jume nota: 'Taema xote xeinanje jinya papera xua bayatha tinadutame xua cien po sacube, jam, xua bexa matomatsiname pontha pon tanecanamataxeinaeintha. Xote nainya ecoundeisque barapo itaneto tsitsinaxore, icha pena netinadutsiwa tinadure xua saya ochenta po sacube, jande', jei pon bo petayapucaecaein. ⁸ Ichitha bo pexeinaein yabara paeba pon bo petayapucaecaeinchi xua pinae bequein bara bapon abe taexana ichitha yaputane xua pocotsiwa pia coutha nayawena xua poxonae pia jiwimonae peexanaewa. Daxota paca tsipaebatsi pomonae anoxuae jinompa barapo cae pin nacuathe, pomonae jopa penejume cowuntsiwi nama barichi. Barapomonae yabara najuntu coyene wunaeta xua po coyene cae jiwimonae penaexanaewa xua daxota cae jiwimonae nantiya penayaweneibinexa. Baxua barapomonae exana beyacaincha pomonae Nacom pejume cowuntsiwi.

⁹ "Paca tsipaebatsi ichamonae pacatsibeibare paratixi xua painya jiwi painya nexaneibinexa po paratixi xeina pomonae barapo cae pin nacuathepiwi pomonae abe peexanaewi. Bapoxonae poxonae jopa paxeinaem tsane paratixi pomonae bayatha payaweneme barapomonae paca matenta weiweinaya wabina po bontha xua ataya tsitecaeya pajinompaeneme.

¹⁰ "Pon xua xanepanaya yapucaeca xua poxonae peya penacuichiwiyo, barichi beta yapucaeca xua poxonae pin penacuichiwa. Pon naerabiya exana poxonae peya penacuichiwiyo, barichi naerabiya exanaena xua poxonae pin penacuichiwa. ¹¹ Icha paxam jopa xanepanaya patayapuenaem xua paratixi xua barapo cae pin nacuathe nexa, Nacom jopa paca itorobiyo xua patayapuenaeneme xua bapon pia pexeinya pexeinaewa tatsi.

¹² Icha jopa xanepanaya payapucaecaem ichun piawa, metha nexata jopa paca catsipae xua painyawa nexa tsane painya neyapucaenaewamxae.

¹³ "Jiton dapon aibi pon xeina ainya pia pecanamataxeinaeinchibe tatsi xua pon beta tanacuita barapo pia ainya pecanamataxeinaeinchibe tatsi. Tsipei barapo petanacuichin meisa antobeya taexana caeintha pon pia pecanamataxeinaeinchi poxonae itorobatsi. Icha pia pecanamataxeinaeinchi jopa taraichiyo. Cae pia pecanamataxeinaeinchi xanepanaya taexana. Icha pia pecanamataxeinaeinchi abeya taexana. Barichi jiton pon bichocono antobe Nacom, jopa itacupaetsi xua bichocono peantobewa paratixi poxonae yawa bichocono antobetsi Nacom", jei Jesús.

¹⁴ Ichitha fariseomonaē pomonaē xua bichocono antobe nawita paratixi, barapomonaē baraxua Jesús jume tayenatsi, yawa Jesús cui caponatsi. ¹⁵ Nexata Jesús fariseomonaē baraichi, jeye: “Paxam barapomonaē pam, xua ichamonaē paca yabara nanta xeina xua pejuntũ coyene xanepanaē jiwi pam. Ichitha Nacom paca jũntũ coyene yaputane xua peajũntũcoyenebe jiwi pam. Xua pocotsiwan jiwi bichocono tsita ainya cuichi, baxuan Nacom bichocono tsita abetsi”, jei Jesús.

Meje yabara poxonaē Jesús diwesi yabara paeba Moisés pia peitorobi coyene tatsi, yawa po coyene Nacom waba jiwi petanaexanaenexatsi pijimonaē pomonaē itorobiya pecanamatax-einaexae

¹⁶ Equeicha Jesús namchi, jeye: “Caena bayatha jiwi xeina Moisés pia peitorobi coyenewa tatsi, yawano xua pomonaē Nacom peitorobi jume pepaebiwi pia pecuidubiwa tatsi, beya Juan patopa. Barapoxonaē caena poxonaē Juan popona pon jiwi Pebautisabin, jiwi paebinouta po coyene Nacom xua waba jiwi petanaexanaenexatsi pijimonaē tatsi pomonaē itorobiya peewatsixae. Jiwi bewa yabara najũntũ coyene sũbi awiya xua pepatsinexa Nacom pia peitorobi nacua beicha tatsi.

¹⁷ “Yapu xanepana xua itaboco yawa ira peweraweracaewa. Nama Nacom peitorobi jume ajumeyapusũ bapana jopa peweraweracaewa bequein bara cae peitorobi coyene”, jei Jesús.

Meje yabara poxonaē Jesús cuiduba xua jiwi piseurixi pepuna penteibiyainwa (Mt 19.1-12; Mr 10.1-12)

¹⁸ Equeicha Jesús namchi, jeye: “Pon punaxuba piowa yawa ichowa pichapa, bapon abe exana piseuritha yawa Nacom peitũtha tatsi, tsipei Nacom tsitatsi xua powa copiya barũ popona apara bara piowa tatsi. Barichi pon pita petsiriwa powa pepunaxubixae piseuri, bapon barichi pia coutha abe natsixana, tsipei Nacom ichowa yabara nanta xeina xua bapowa cataunxuae pia pebin xeina bequein bara punaxuba”, jei Jesús.

Meje yabara poxonaē Jesús diwesi yabara paeba xua pon copei pexeinaein irũ ichũn pon Lázaro

¹⁹ Equeicha Jesús tsipaeba icha diwesi, jeye: “Matha irũrũ barichi pebin pon copei pexeinaein. Pexeinya paparuwan xua pena paparuwa nama xatabapona. Mataũta daxita matababi peitũpanae nabanaewa exaneiba. ²⁰ Irũrũ ichũn pebin popona, pon pewũn Lázaro pon peacopeibin. Bapon Lázaro wan nawita xeina reparũtotha. Bapon iratha eca pon copei pexeinaein pia bo boupatha weya tatsi. ²¹ Xua pon copei pexeinaein pia pexaethopaewatha taothopeicatsi pexaewa pepũrũwan, baraxua Lázaro ichichipa xaiba. Yawa aurimonaē pata xua Lázaro pewan daebinexatsi. ²² Icha matababitha Lázaro tũpa. Matatsunpiwi Lázaro jumope pitatsi. Jumope capoinchi ichaxota Abraham popona athabeicha. Irũrũ pon copei pexeinaein tũpa, yawa mũthũtha xotsi.

²³ “Pon copei pexeinaein patopa ichaxota pateiba pomonaē pewerapeibiwi barapo petũpae cuiru coyene nacuatha. Bapon bichocono atene. Bapon athabeicha necoicha. Bapoxonaē Abraham tajũ taebiyatsi asiyeicha, yawa xua Lázaro barũ equiyatsi. ²⁴ Pon copei pexeinaein wawai: ‘Tamo susato jiwana, Abraham, necui yabara nanta xeinare. Inta Lázaro itorobinca taneebato memeyatsinexa meratha poxoru bichocono netaxua po isotothe uncuana’, jei. ²⁵ Ichitha Abraham jume nota: ‘Tamonae susato jiwana, nanta xeinatabare xua caena bayatha poxonaē cataunxuae asũ poponame, xeiname xua acabem xua pocotsiwan ichichipame xua nexainaewa. Xanepanaya poponame. Ichitha nama Lázaro jopa daichiyo poxonaē cataunxuae asũ popona. Jopa xanepanaya popon-aeyo. Xote bapon wũnae yabara nantanuweya cananta xeinatsi xua peyawenaenexatsi. Ichitha nama xam jopa caraichiyo. Bichocono caperũ weyawa. ²⁶ Yawa pin pitapatororo naca yacaincha ducua. Daxota pomonaē ichichipa bara bedunareca taxainya wereca jopa itacũpaetsi xua bara beparecaena nexainya bereca. Irũ pomonaē nexainya weruneina jopa itacũpaetsi xua taxainya betsina pepatsinaenexa’, jei.

²⁷ “Nexata pon copei pexeinaein jume nota: ‘Nexata tamo susatopim cawucatsi inta Lázaro itorobare taxa pia bo beya. ²⁸ Baxota xeinan cinco poyobe tayapin jiwi. Abraham Lázarotha najume carure xua bu tayapin jiwi jopa pepatsinexaru tsane ichaxota uncuan xua bichocono atenein’, jei. ²⁹ Ichitha Abraham jume nota: ‘Apara neyapin jiwi xeina Moisés pia peitorobi coyene tatsi, yawa Nacom peitorobi jume pepaebiwi pia penacuidubiwan tatsi. Bu barapomonaexana pocotsiwa baraxua pejume coya’, jei Abraham. ³⁰ Pon copei pexeinaein jume nota: ‘Aa, tamo susato jitom, Abraham, ichitha icha petupaewi jiwana caein siwa ponaena barapomonaexana beya, barapomonaexana jume cowuntsina yawa icha juntu coyene pexeinaenexa tsane Nacomtha’, jei. ³¹ Ichitha Abraham jume nota: ‘Icha barapomonaexana jopa exanaeyo xua peexanaewa pocotsiwa Moisés pia peitorobi coyene tatsi itoroba, xuano xua Nacom peitorobi jume pepaebiwi pia pecuidubiwan tatsi, barapomonaexana jopa jume cowuntsipae bara bequein Nacom taitorobichipa xua jiwana caein pomonaexana petupaewi’, jei Abraham”, jei Jesús.

17

Meje yabara poxonaexana Jesús paeba xua jiton jopa bewa cana exanaexana ichuntha xua iru abe peexanaewa tsane

(Mt 18.6-7, 21-22; Mr 9.42)

¹ Jesús namchi pijimonaetha, jeye: “Barapo nacuathepiwi ataya xeineiba po jiwi pecana exanaexaetsi xua ichamonaexana cana exana xua barapo jiwi abe peexanaexana cuiru coyene peexaneibinexa xua daxota jopa nejume cowunteibiyo. Ichitha pebin tsocuae xua bapon cana exana, xua ichun cana exanatsi, xua ichun abe peexanaewa tsane. ² Metha jame wunaexana tsipae xua barapo pebin pin iboto wisi cutsipatsi pin mar mentha barapo iboto cayawa cabutabachipatsino. Tsipei jopa wunaexana tsipae xua bapon cana exana xua ichamonaexana abe peexanaexana xuiru coyene exana pomonaexana cataunxuaexana aena nejume cowunta. ³ ¡Dota pam, xua jopa bara paichim tsane!

“Icha ichun pon iru pejume cowuntsinda, icha bapon pacata abe exana, bapon baxua yabara patsipaebare. Icha icha juntu coyene paca tsita xeinaena peuraxae xua pacata exana, bapoxonaexana pacui yabara junteinare pocotsiwa bapon pacata exana. ⁴ Bequein bara bapon abe pacata exana, siete po cuiyobe xua cae matacabitha, yawa paca tsipaeba siete po jumeyobe, bapon jeye: ‘Maisa auran tsocuae xua abe pacata exanatsi, equeicha jopa pacata abe exanaexana tsainchi’, jei pon abe exana. Daxota paca jeichi xua nantawenona peyabara junteinaewa baxua xua po coyene bapon pacata abe exana”, jei Jesús.

Meje yabara poxonaexana Jesús yabara paeba xua pin pejume cowuntsi coyenewa

⁵ Jesús pon Pecanamataxeinaein jiwi, equeicha pia peitorobiwi baraichi, jeye:

—Pana cana exande xua bichocono pata jume cowuntsiwa beyacaincha xua anoxuaexana, jei barapomonaexana.

⁶ Nexata Jesús pia peitorobiwi jume nota, jeye:

—Icha paxeinaetsipame xua be peya pejume cowuntsi coyenewiyo xua bequein icha mostaza xutiyo juta ichi xua tsica xutiyo ichitha bara paca itacupa xua naewatha painya nejeiwa: ‘Ee, naewa jinya coutha natabu jonde yawa pin mar mene beya equeicha uncuare’, painya nejeiwa. Bapoxonaexana barapo nae jopa bayatha tsipae poxonaexana pajam tsipae baxua, jei Jesús.

Meje yabara poxonaexana Jesús paeba xua pocotsiwa jiwi bewa exanaexana pocotsiwa pentacoponaexana itoroba

⁷ Equeicha Jesús namchi, jeye: “Metha ba paxam jiwana caein xeina pia petanacuichinchi pon penacuichin bapon ira cacobauya, matauta vaca yapu capopona. Bapoxonaexana bapon pon penacuichin wexua wenawirena, bo benawirena. Pon paxam jiwana caein metha bapon jopa jei tsipae: ‘Anetha, jondena matha xaema’, jopa jei tsipae bapon. ⁸ Jame bapon jei tsipae: ‘Pexaewa netsiupain exanare. Inta carena tsaibinde pexaewa pexaethopaewatha poxonaexana xunaecan. Bapoxonaexana cotacaya bexa nabanare’, jei tsipae

pon paxam jiwana. ⁹ Pon penacuichin jopa jei tsipaetsi: ‘Jaco xua taneyawenaewam’, jopa jei tsipae pon paxam jiwana. Tsipei saya taexanatsi xua bapon peitorobixae. ¹⁰ Icha pon petanacuichin ichi xua taexana peitorobixaetsi pia pentacaponaein, paxam bara jũta paichinde. Poxonae pawetame pocotsiwa Nacom paca itoroba, pajande: ‘Paxan pata nebusi cui tataewimonae pan xuano pata pecui pawĩ pan, tsipei saya paexanan xua pocotsiwa bewa paexanaein’, pajande”, jei Jesús.

Meje yabara poxonae Jesús axaibi exana diez poyobe pebiwi, pomonae peperu sawichimonae

¹¹ Poxonae Jesús cataunxuae ecapona Jerusalén tomara beya nexa, Samaria nacua iya pona yawa Galilea nacua iya pona. ¹² Poxonae Jesús tsica tomariyotha patopa, diez poyobe pebiwi pata Jesús pia xantha tatsi. Barapo diez poyobe peperu sawichimonae, ichitha barapomonae Jesús taju wetaeumendenatsi. ¹³ Barapomonae wawai, jeye:

—Jesús, pon Patatanecuidubim, pana neyabara najũntu coyene xeinare jinya pata tana neyawenaenexam, jei barapo peperu sawichimonae.

¹⁴ Poxonae Jesús tane barapomonae, Jesús barai, jeye:

—Paponare sacerdotemonaetha painya nepaca cataenexa, jei Jesús.

Poxonae cataunxuae namtotha enapona, bapoxonae barapomonae peru jume tsurucupae xua peperu sawiwatsi barapomonae. ¹⁵ Barapo diez poyobe jiwana caein, poxonae bapon taeba xua axaibi tsurucupae, bapoxonae Jesús beya pona, xua caibeya pona, yawa jume daunweya Nacom wũnae jaintatsi. ¹⁶ Barapon pentabocototha uncua Jesús peitabaratha tatsi. Yawa irabe taescuareca xua Jesús pejacobinexatsi. Barapo pebin apara pon seicaya Samaria nacuapin. ¹⁷ Nexata Jesús namchi, jeye:

—¿Diez poyobe itara axaibi exanan? ¿Incane dapo nueve poyobe jane? ¹⁸ Bapon apara penanapaincha jinompaewi jiwana. Yawa cou compa caiberena pia wũnae jainchichi Nacom, jei Jesús.

¹⁹ Nexata Jesús equeicha pebin baraichi, jeye:

—Nontaponde pondeno, bayatha axaibim tana neyabara jume cowũntsixaemxae xua bara tana neitacupaewa xua axaibi tacaexanaewatsi, jei Jesús.

Meje yabara poxonae Jesús yabara paeba po coyene xua poxonae Nacom itorobiya ewatsina jiwi

(Mt 24.23-28, 36-41)

²⁰ Fariseomonae Jesús yainyabatsi namchi, jeye:

—¿Eta poxonae Nacom itorobina pon peitapetsinxae pata tanecapanenebiwa exanaenexa, xuano xua itorobiya pata taneewatsiwa? jeichichi barapomonae Jesús.

Jesús jume nota, jeye:

—Poxonae Nacom itorobiya ewatsina jiwi, barapo coyene jiwi jopa itacupaetsi xua petaewa baxua. ²¹ Daxota jiwi jopa jei tsane: ‘Baraxote bayatha patope’, jopa jei tsane. Matautano jopa jei tsane ‘Xoteiche bayatha patope’, jopa jei tsane. Tsipei apara po coyene xua Nacom itorobiya ewatsina jiwi barapo coyene patopa jiwitha. Daxota Nacom jũntu coyene itorobiya ewatsina jiwi pomonae pejume cowũntsiwixaetsi Nacom, jei Jesús.

²² Nexata Jesús barai pijimonae, jeye:

—Matacabin othopaena po matacabintha poxonae paichichipame xua painya tana netaewam xua ponxaein Nacom Tananeitapetsin xuano xua muxuna bepataebenaename caentacabi xua barapo matacabin jiwana. Dapo jumetha jopa painya nepaca itacupaewa tsane xua painya tana netaewam tsane xuano xua caentacabi xua barapo matacabin jiwana. ²³ Ichamonae paca jei tsane: ‘Baraxote bayatha patopa bapon’, paca jei tsane. Ichacuitha paca jei tsane: ‘Baraxoteicha bayatha patopa bapon’, paca jei tsane, ichitha jopa paponaeinde bara beya yawa jopa pajume cowũntsinde. ²⁴ Icha yamũxu ichi xua jemeicha yacoicha uncueica, xua coicha nayotaxuba itabocototha, barichi tsane po matacabintha poxonae patopeicaein ponxaein Nacom Tananeitapetsin. ²⁵ Ichitha copiya nantawenona xua neperaxa jubina ichamonae. Yawa neitawetsinano pomonae xua

anoxuae jinompa. ²⁶ Icha matha ichi poxona Noé caena bayatha popona jiwi jopa tsaqueinaeyo xua Nacom pin awubo exanaena methaunxuae. Saya barompaya icha jantũ cuitha jinompa daxota jiwi werapa. Barichi jũta ichi tsane poxonae patopeicaein barapo cae pin nacuathe xua ponxaein Nacom Tananeitapetsin. Poxonae patopeicaein jiwi jopa tsaqueinae tsane xua Nacom werapa exanaena barapo jiwi pomona jopa pejume cowũntsiyoaxaetsi. ²⁷ Pomona jinompa poxona Noé popona, barapomona jantema nabaneiba, yawa apeiba, yawa apeiba yawa jiwitha jijinapona yawa pexantixi jitha dodoubapona, beya yantacabi othopa poxonae po matacabitha Noé pin jera naetha joniya. Bapoxona pin ema mũ jopa. Daxita Noé wepu bunothopatsi pomona jinompa poxona Noé popona. ²⁸ Barichirũ jiwi pocotsiwa ichamona exana poxonae ichũn pebin popona pon pewũn Lot. Barapomona nabaneiba, yawa apeiba, yawa comaqueiba, yawa caenaeteiba, yawa pexaewa ubeiba, yawa bomũxũn acabeiba. ²⁹ Poxona bapon Lot Sodoma tomara wenaetabiya, barapoxona iso itere mũ, mũ othopeica tomaratha, yawa pocotsiwa be ibo pũrũ baxua itaboco weothopeicano xua bichocono atou. Daxita Sodoma tomarapiwi werapa. ³⁰ Icha Sodoma tomaratha ichi xua jemeicha iso itere mũ, mũ othopeica yawa xua jemeicha ibo pũrũ itaboco weothopeica, bara jũta ichin tsane jemeicha patopeicaein ponxaein Nacom Tananeitapetsin poxonae jiwi tsita naitutsin.

³¹ “Barapo matacabitha icha ichũn bo matatupatha uncua, barapon jopa bewa botha jonyae tsane xua penotsiwa tsane pocotsiwa tabobeinchi bomũxũ tututha. Irũ pon pabitha popona jopa bewa caibeya ponae tsane botha, saya jame nainya benaetsiricuaena. ³² Pacui yabara nanta xeinare Lot piseuri tatsi xua tũpa poxona jopa nainya naetsiricuaeyo piawan caibe pesiwa necoyaexae. ³³ Pon naantobeya nata exana pocotsiwa bapon ichichipa, bapon jopa xeinaeyo peajũntũyarusũwa po peajũntũyarusũwa ataya tsiteca xua Nacom pia nacia beicha. Ichitha pon neantobeya inta exana pocotsiwa ichichipan bapon xeinaena peajũntũyarusũwa, po peajũntũyarusũwa ataya tsiteca xua Nacom pia nacia beicha.

³⁴ “Paca tsipaebatsi po mataqueitha patopaein, ainya pebinbe ponbe xua nanta jũpaya maitecabe, caein matatsunpin pichina, pon pejume cowũntsixae Nacom. Ichũn saya cuenta ponaeinchi jopa pejume cowũntsiyoaxae Nacom. ³⁵ Irũrũ ainya yabũyobe nacuara yacatoyorobauyaenabe, ichowa matatsunpin pichina pejume cowũntsixae Nacom. Ichowa saya cuenta ponaeinchi jopa pejume cowũntsixae Nacom. ³⁶ Irũrũ ainya pebinbe nacuara nacuitauyaenabe pabitha, ichũn matatsunpin pichina, ichũn saya cuenta ponaeinchi”, jei Jesús.

³⁷ Poxona baxua Jesús pijimona jume tainchi, Jesús yainyabatsi jeichichi, jeye:

—Pata Tanecanamataxeinaem, ¿exota metha baxua exanaena? jeichichi pijimona.

Jesús pijimona jume nota pecayabara jũta pepaebi diwesiyotha, jeye:

—Quequeremona ba nacaetuta ichaxota baurin boca. Bara jũta paichim tsane paxam pomona tana nejume cowũntsi jiwi pam pana newũnae ewatsiname po mataqueitha patopeicaein, barapo mataqueitha panacaetutsiname, jei Jesús.

18

Meje yabara poxona Jesús paeba pecayabara jũta pepaebi diwesiyo xua yabũyo yabara powa pecuenta tũpaewayotsi piseuri xua irũ pon jiwi peyabara paebin xua penatsicuentsiwa xua abe peexanaexae

¹ Jesús pijimona tsipaeba pecayabara jũta pepaebi diwesiyo xua pecuidubinexa, jeye: “Paxam daxita matacabi bewa pawũqueibim Nacom. Painya xoba paajũntũcoyenefatabim tsaibim poxona pawũqueibame”, jei Jesús. ² Equeicha Jesús pijimona barai, jeye: “Matha irũrũ tomaratha popona pon jiwi peyabara paebin xua penatsicuentsiwa xua abe peexanaexae. Bapon jopa Nacom cunuwichi. Yawa bapon jopa beta yabara nanta xeinaeyo jiwitha xua peyawenaenexa. ³ Barapo tomaratha irũrũ popona petsiriwa, powa pecuenta tũpaewayotsi piseuri. Barapowa siwa poneiba pontha pon jiwi peyabara paebin xua penatsicuentsiwa xua abe peexanaexae. Barapowa jei

tsaibi bapontha: ‘Neyawende, ichun inta abe exana’, jei tsaibi. ⁴ Pon jiwi peyabara paebin xua penatsicuentsiwa xua abe peexanaexae bapon ainya matababin juntucuru jopa beexaneibiyo pocotsiwa barapowa wuqueiba. Ichitha bapon matapainya nanta xeina. Najei: ‘Xan apara jopa Nacom cunuwinyo. Matauta jopa beta tayabara nanta xeineibin jiwi xua tayawenaenexa. ⁵ Ichitha barapo pecuenta tupaewayotsi piseuri matowa nefayacota daxota neamuxufaetabi exana. Metha moya barapowa yawenaen, xua equeicha barapowa jopa penesiwa ponaenexa, tsipei bichocono amuxufaetabin’, najei pon jiwi peyabara paebin xua penatsicuentsiwa xua abe peexanaexae”, jei Jesús.

⁶ Jesús pon Pecanamataxeinaein jiwi equeicha namchi, jeye: “Baxua apara pocotsiwa paeba pon jiwi peyabara paebin xua penatsicuentsiwa xua abe peexanaexae xuano pon jopa beta yabara nanta xeinaeyo jiwitha xua peyawenaenexa. Pajume naitaware pocotsiwa bapon paeba. ⁷ ¿Eta xua metha pananta xeiname? ¿Metha bara Nacom came bayatha tsaibi poxonaen jiwi yaweneibatsi pomonaen xua pewuqueibixaetsi? ¡Jume, apara! Nacom nainya jiwi yaweneiba poxonaen barapo jiwi abe exaneibatsi ichamonaen, beyacaincha xua barapowa yawenatsi. Jame yatsicaewa Nacom yaweneiba pomonaetha pomonaen peitapetsixae pewuqueibixaetsi merawitha yawa mataqueithano. ⁸ Paca tsipaebatsi xua Nacom jopa bayatha tsabiyo xua peyaweneibinexa pomonaen nejume cowunta. Xan ponxaein Nacom Tananeitapetsin poxonaen patopeicaein, ¿metha bara pin bicheito taeyopeicaein jampa, pomonaen xua xanepanaya beta tana nejume cowuntsiya jinompaewi pomonaen Nacom pewuqueibiwichi?” jei Jesús pijimonaetha.

Meje yabara poxonaen Jesús paeba pecayabara juta pepaebi diwesiyo yabara xua fariseomonaen iru pon paratixi matoma penoteibin

⁹ Jesús icha pecayabara juta pepaebi diwesiyo tsipaeba pomonaetha pomonaen jiwi peabiwi pomonaen xua nayabara nanta xeina xua pinae beta jume cowunta xua pinae ichamonaen jopa daichiyo. ¹⁰ Jesús namchi, jeye: “Iruru ainya pebinbe Nacom pin pia bo beya ponabe, xua baxotiya pewucaenexabe Nacom. Ichun fariseomonaepin, ichun bapon jiwana pomonaen paratixi pentoma noteibiwi po paratixi jiwi bewa catsibina pon romanomonaen itorobiya pia pepa peewatsinchi nexa. ¹¹ Fariseomonaepin nantacotuncua yawa penthutha wuca Nacomtha. Poxonaen tsipaeba Nacom, jeye: ‘Nacom meisa xam nejuntu coyene xanepanaein. Juntu coyene weiweinan xua tana neyawenaewam tsipei xan jopa be ichamonaeninyo pomonaen xua jiwi pecaibiwi, yawa xua peabewi, xuano xua penasi cui matacaetsiwi yabuxitha. Matautano xan jopa dapomonaen jiwanyo pomonaen xua paratixi pentoma noteibiwi po paratixi jiwi bewa catsibina pon romanomonaen itorobiya pia pepa peewatsinchi nexa. ¹² Xan cayabara nainbotatsi ainya cuiyobe xua cae semanatha, beta tacawuqueibinexatsi. Matautano cae paratixi jiwana wetsabeiban xam nexa poxonaen diez po paratiximonaebe xeineiban. Yawano daxita xua xenan baxuano jiwana tsaban xam nexa’, jei fariseomonaepin. ¹³ Ichitha pon paratixi pentoma noteibin auranaya tajun beuncuiya. Saya irabe necoreca yawa jopa athabe necoichaeyo. Saya u penantanuweya penanthuthu jayabi abe peexanaeinxae. Bapon Nacom wuca, jeye: ‘Jaibo, Nacom neyabara najuntu coyene cui xeinare xua tana neyawenaewam tsane bequein bara taajuntucoyeneyapubein’, jei pon paratixi matoma penoteibin. ¹⁴ Barapon pon paratixi penoteibin poxonaen najume weta xua wuca Nacom, nawiya pia bo beya. Paca tsipaebatsi xua barapon Nacom tsitatsi xua jopa xeinaeyo xua penatsicuentsiwa xua abe peexanaexae. Ichitha fariseomonaepin jopa daichichi tsipei bapon awiya peajuntucoyenebein. Pon xua pia coutha peainya cui jiton naexana pejuntu coyenetha, Nacom exanaena xua bapon pecui pawu jiton naexanaena. Ichitha pon xua pepawu naexana pejuntu coyenetha, Nacom exanaena xua bapon peainya cui jiton naexanaena”, jei Jesús.

Meje yabara poxonaen Jesús jeye pexuitha: “Barabu Nacom beta paca yawenaena”, jei (Mt 19.13-15; Mr 10.13-16)

¹⁵ Nexata jiwi Jesús tacaponatsi pexui, xua Jesús pejayabinexa pecobetha yawa xua Nacomtha petawucaenexa barapo pexui xua pejeinexa: “Barabũ Nacom beta paca yawenaena”, pejeinexa. Ichitha Jesús pijimonae tatsi poxonae baxua tane, tamropata notarucupa xua barapomonae cui matawentatsi pomonae pexui carendena tsaibi.

¹⁶ Ichitha Jesús waba pexui. Jesús pijimonae barai:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonae nexa pomonae pejũntũ coyene xanepanaewi icha pexui ichi. Pexui pia cui xua tayapu xanepanatsi xua pia jũntũ coyeneintha jume cowũnta Nacom. ¹⁷ Xaniyan paca tsipaebatsi. Pon jopa yabara jume cowũntsiyo xua icha be jopa pexui ichiyo xua ba pexui tayapu xanepanatsi xua jume cowũnta, bapon bapana jopa naexanae tsane Nacom pijimonae tatsi pomonae Nacom itorobiya ewata, jei Jesús.

*Meje yabara poxonae pewowin pon copei pexeinaein Jesús tsipaebatsi
(Mt 19.16-30; Mr 10.17-31)*

¹⁸ Caein pon pentacaponae wi jiwanapin bapon Jesús yainyabatsi, jeichichi:

—Ja Tanecuidubim, maisa nejũntũ coyene wũnaem. ¿Eta xua copiya matha exanocuaein xua ajũntũyapusũya tapoponaewa tsane xua ataya tsane? jei.

¹⁹ Jesús jume epa pita, jeye:

—¿Eta xua nebaram: ‘Nejũntũ coyene xanepanaem’, jam? Aparã ichũn dapon aibi pon pejũntũ coyene xanepanaein. Jame meisa apara bapon Nacom compã pejũntũ coyene xanepanaein. ²⁰ Xam yaputaneme po coyene Moisés pia peitorobi coyenewatha itoroba xua jeye: ‘Jopa ichowa pichinde ichũn piowa tatsi, jopa ichũn bexubinde, jopa caibinde ichũn piawan tatsi, jopa naerabiya cayabara paebinde pocotsiwa ichamonae exana. Axatha jume barũ cui itura jinare. Mataũtano enatha jume barũ cui itura jinare’, jei Moisés, jei Jesús.

²¹ Pon pentacaponaein jume epa pita, jeye:

—Daxita caena bayatha barapo coyenein exaneiban, poxonae pexuyothan tamropata pitaban, beyã anoxuae yacuiya pinyon, jei.

²² Poxonae Jesús baxua jume tane, Jesús barai, jeye:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyonexa tsane xua pocotsiwa xanepanaeya nexanaewa, matha daxita caenaere pocotsiwa xeiname, yawa catsibare pomonaetha pomonae peacopeibi jiwi. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha, pocotsiwa Nacom necajũntana botsiwa pocotsiwa bichocono wũnae, jei Jesús.

²³ Poxonae barapo pebin jume taeba, bichocono jũntũ wecoyei, tsipei bichocono copei pexeinaein. ²⁴ Poxonae Jesús tane xua barapon jũntũ coyene wecoyei, Jesús barai, jeye:

—¿Maisã bichocono ayapubecã xua copei pexeinaewi naexana Nacom pijimonae tatsi jiwana pomonae itorobiya canamataxeina! Tsipei barapomonae bichocono antasiway-atane barapo pia copei, beyacaincha xua Nacom antobetsi. ²⁵ Nama bichocono acuiruyapube xua duwein pon pewũn camello xua bapon pejoniyãewa acuichetto peetabũ wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonae tatsi jiwana pomonae itorobiya canamataxeina beyacaincha xua poxonae acuiruyapube xua poxonae camello acuichetto peetabũ wan iya pejoniyãewa, jei Jesús.

²⁶ Pomonae xua baxua jume taerucupa, barapomonae Jesús yainyabatsi, jeye:

—Bapoxonae ¿jintam metha nexata itacũpatsi xua penacapanepãewa pia coutha? jei barapomonae.

²⁷ Jesús jume nota, jeye:

—Pebiwi ba jopa itacũpaetsi xua baxua exana, saya jame meisa Nacom compã itacũpatsi xua jiwi napãeba canã exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁸ Pedro barai, Jesús baraichi:

—Tapata Tanecanamataxeinaem, paxan daxita pacuenta ponan pocotsiwa paxeinan pata paca puna ponaewa tsainchi, jei Pedro.

²⁹ Jesús jume nota, jeye:

—Bara xainyeya paca tsipaebatsi. Nacom beta cana exanaena daxita pomonae peyabara cueicueijeixae po diwesi xua Nacom waba jiwi petanaexanaenexatsi pijimonae tatsi pomonae itorobiya peewatsixae. Nacom beta cana exanaena barapomonae pia bon pecuenta ponaexae, yawa piseuri pecuenta ponaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowi pecuenta ponaexae. Matautano beta cana exanaena pomonae paxei jiwi pecuenta ponaexae, matautano peniwi pecuenta ponaexae. Matautano beta cana exanaena pomonae pia pexui pecuenta ponaexae. ³⁰ Barapomonae barapo coyenein exana taneantobe jiwixae, daxota daxita barapomonaetha Nacom jopa juniya catsi tsane barapo cae pin nacuathe. Matautano barapomonaetha Nacom catsina pia peitorobi nacuatheicha peajuntucoyeneyapusawa po peajuntucoyeneyapusawa ataya tsiteca, jei Jesús.

Meje yabara poxonae Jesús nayabara paeba acoibi po coyenebetha xua poxonae tupaena (Mt 20.17-19; Mr 10.32-34)

³¹ Bapoxonae Jesús pijimonae compa waba aisowa beya xua pomonae doce poyobe tatsi. Jesús barai barapomonae, jeye: “Anoxuae ponaeinchi Jerusalén tomara beya. Baraxotiya tana nayabara jume cui wetsinexa bara nama, po coyene Nacom pia peitorobi jume pepaebiwi newuna tsiwanaya yabara tina xua xan ponxaein Nacom Tananeitapetsin. ³² Yawa necaenaetsina pomonaetha pomonae penanapaincha jinompaewi, xua icha nacua werena peponaewi xua barapomonae tanecui caponaenexa. Matautano abe neyabara paebina. Yawa neyabara naone subabina. ³³ Yawa necuainchina, barapomonae nebexubina. Daichitha poxonae acoibi po matabibibe yapu caewina equeicha asu neexanaena petupae cuiru coyene weya”, jei Jesús.

³⁴ Ichitha Jesús pijimonae tatsi jopa yaputaeyo baxua xua pocotsiwa Jesús pijimonae tsipaeba. Barapomonae jopa jume ita cui cupaetsi poxoru Jesús barompaya nabarujume yabara canamchi, baxua barapomonae taayapubetsi bichocono.

Meje yabara poxonae Jesús Jericó tomaratha axaibi exana pon peitata nacutsin (Mt 20.29-34; Mr 10.46-52)

³⁵ Poxonae Jesús itiya pona Jericó tomara, pon peitata nacutsin namtotha eca, yawa jiwi wuqueibeca paratixi. ³⁶ Poxonae bapon ponxae peitata nacutsin jume tane xua juinya pin bicheito pona, bapoxonae bapon yainyaba, ichamonae yainyabatsi, jeye: “¿Eta xua metha juinya pin bicheito pona?” jei pon peitata nacutsin. ³⁷ Bapon ponxae peitata nacutsin jume notatsi, jeye: “Apara Jesús, Nazaret tomarapin xote imoxoyo patope”, jei. ³⁸ Nexata bapon pon peitata nacutsin jume daunweya wawai, jeye:

—Jesús, David pia pemomoxi susato jiwanapim, ponxaem Nacom necaitapetsim neyabara najuntucoyene xeinare jinya tana neyawenaenexam, jei pon peिता nacutsin.

³⁹ Pomonae xua pin bicheito matabaenapoinchi, barapomonae pon peitata nacutsin jume matawentatsi xua moya peecaenexa. Ichitha bapon equeicha jume daunweya wawai, jeye:

—Jesús, David pia pemomoxi susato jiwanapim ponxaem Nacom Necaitapetsim neyabara najuntucoyene xeinare jinya tana neyawenaenexam, jei pon peिता nacutsin.

⁴⁰ Nexata Jesús naruntaba. Jesús namchi, jeye:

—Painta maxu xawena, jei.

Poxonae pon peिता nacutsin imoxoyo patopa Jestutha, Jesús yainyaba, barai, jeye:

⁴¹ —¿Eta xua jinya tacata exanaetsi? jei.

Pon peिता nacutsin jume nota, jeye:

—Jesús Tanecanamataxeinaem, benecotsin cuinaya, jei.

⁴² Jesús jume nota, barai, jeye:

—Moya necore antha. Axaibi caexanatsi tana neyabara jume cowuntsixaemxae xua bara tana neitacupaewa xua tacayawenaewatsi, jei.

⁴³ Caena nainya bapon necotaxuba. Yawa Jesús puna poinchi. Matautano Nacom wūnae jaintatsi. Poxonae pin bicheito baxua cui tane, iruru daxita barapo bicheito Nacom wūnae jaintatsi.

19

Meje yabara poxonae pebin pon pewun Zaqueo Jesús jume cowuntatsi

¹ Jesús Jericó tomaratha patopa. Bapoxonae bapon barapo tomara xenta iya. ² Baxota Jericó tomaratha pebin popona, pon copei bichocono pexeinaein. Bapon pewun Zaqueo. Bapon pon pecanamataxeinaein pomonae paratixi pentoma noteibiwi po paratixi jiw bewa catsibina pon romanomonae itorobiya pia pepa peewatsinchi nexa. ³ Barapon Zaqueo bequein ichichipa xua Jesús peyaitaewatsi, ichitha Jesús jopa taetsi tsipei pin bicheito, matautano poxoru Zaqueo xataxatequeca. ⁴ Nexata Zaqueo nanta cacuinaepoinya, peitiya ecoinyaenexa tsane naetha, po nae imoxoyo namtotha uncua ichaxota Jesús ponaena, xua Jesús barapo naetheicha xaniwaicha peyaitaenexatsi. ⁵ Jesús barapo nae cacuita ecapona, bara asiya necoicha. Poxonae Zaqueo naetha tayeichatsi, Jesús namchi, jeye:

—Zaqueo, nainya ecoinca tha jinya botha ecaetsi anoxuae, jei Jesús.

⁶ Bapoxonae Zaqueo nainya dunatabica. Matautano Jesús matenta weiweinaya wabatsi pia botha. ⁷ Poxonae pin bicheito baxua tane, Jesús abe yabara paebatsi, jeye:

—Maisa Jesús bewa jopa pona barapo botha, tsipei bapon abe peexanae cuiru coyene peexanaein, jei barapo bicheito.

⁸ Nexata Zaqueo nantacotuncua pia botha, yawa jeye Jesustha:

—Taema Jesús Tanecanamataxeinaem, tha daxita jiwana wetsabichi pocotsiwa xeinan, tacatsibinexa tsane pomonaetha pomonae peacopeibiwi. Matautano pomonae xua naerabiya wūcan cae paratixi equeicha caewa tha catsibichi cuatro po paratixibe, jei Zaqueo.

⁹ Jesús jume nota, jeye:

—Anoxuae Nacom cana exana xua barapomonae pecapanenebiyae jiwichi, pomonae barapo botha peenaewi. Zaqueo, xam Abraham pia pemomoxi susatopiwi jiwanam.

¹⁰ Daxota xan ponxaein Nacom Tananeitapetsin patopan tawenaweneinexa tsane pomonae abe peexanae cuiru coyene peexanaewi pomonae icha xam ichim, xua tacapanenebiyaenexa tsane barapomonae, jei Jesús.

Meje yabara poxonae Jesús paeba pecayabara jūta pepaebi diwesiyo xua diez po paratixibe yabara

(Mt 25.14-30)

¹¹ Barapomonae jume tayena xua Jesús paeba barapo jiwitha poxonae Zaqueo yabara paebatsi. Daxota Jesús cuiduba barapo jiw peayabara jūta pepaebi diwesiyotha, tsipei barapomonae nanta xeina xua Jesús pona Jerusalén tomara beya xua itara mexeya barapomonae itorobiya pia pepa peewatsinchi tatsi naexanaenawejei.

¹² Bapoxonae Jesús jeye: “Matha iruru pebin popona. Barapo pebin jiwana pin pomonae peainya cui jiw pomonae barompaya piomonae matabuxumona. Barapo pebin tajū pona icha nacuatha xua barapon icha nacuatha peexanaenexa tsainchi pocotsin be jiw itorobiya pia pepa peewatsinchi, xua itorobiya peewatsinexa piomonae. Barapoxonae caibe nawiyaena pia nacuatha. ¹³ Poxonae cataunxuae jopa tajū ponaeyo matha waba diez poyobe pebiwi, xua petanacuichinexatsi. Daxita barapomonaetha barompaya catsina be cae paratixi xua pocotsiwa ainya matoma. Barapo pebin namchi pomonaetha pomonae pia petanacuichiwiwi, jeye: ‘Barapo paratixitha pacomocare, equeicha pacaenaere xuya, painya xuya nawita nexeinaponaenexa paratixi. Payacobe cui othopare poxonae beya patopaein’, jei barapo pebin. ¹⁴ Ichitha bapon casebatsi

piamonae, pomonae jinompa pia nacuatha tatsi. Pomonae bapon casebatsi, barapomonae itoroba ichamonae xua pecoyo wepetayiyaenexatsi poxonae bapon penta caponaein naexanopiya ichaxota pon jiwi itorobiya pia pepa peewatsinchi. Xua barapo penacajume caitorobiwichi pejeinexa: ‘Ponxaem jiwi itorobiya pia pepa neewatsin, taema, apara bapon piamonae aichaxaibichi xua peexanaewatsi pon jiwi itorobiya pia pepa peewatsinchi’, jei penacajume caitorobiwichi, xua saya tapaeba.

¹⁵ “Daichitha barapon cana exanatsi, pon jiwi itorobiya pia pepa peewatsinchi, xua ichan cana exana pon iru jiwi itorobiya pia pepa peewatsinchi, bapoxonae equeicha bapon caibe nawiya pia nacua beya. Poxonae bapon pia nacuatha patopa bapon waba pia petanacuichiwichi pomonaetha pomonae catsiba paratixi. Waba peyaputaenexa icha barapomonae metha comoca yawa caenaeta icha be pocotsi coyeneya bayatha bapon itoroba. ¹⁶ Pon copiya patopa bapon namchi: ‘Tanecanamataxeinaem, po paratixi necatame, barapo paratixitha comocan, xuya equeicha caenaetan, equeicha diez po paratixibe matoma xeineiban’, jei pon copiya patopa. ¹⁷ Pon pecanamataxeinaein jume nota, jeye: ‘Maisa xam beta exaname pon inta nenacuichim. Yaitama beta eexanaponame xua peyauyo caitorobatsi daxota pentacaponaein caexanatsi xua necanamataxeinaewa tsane diez po tomariyobepiwi’, jei. ¹⁸ Iru icha petanacuichinchi patopa. Bapon jeye: ‘Tanecanamataxeinaem, po paratixi necatame, barapo paratixitha comocan, equeicha caenaetan, equeicha matoma xeineiban cinco po paratixibe’, jei. ¹⁹ Pon pecanamataxeinaein jume nota. Bapontha jeye: ‘Xam pentacaponaein caexanaeinchi xua necanamataxeinaenexa cinco po tomariyobepiwi’, jei.

²⁰ “Iru icha pia petanacuichinchi patopa, bapon jeye: ‘Tanecanamataxeinaem, taema xote xeinanje jinya paratiyo, cata mata quiyontabatsi painyaweratha. ²¹ Yaitama cacui cunuwatsi, tsipei be barapocotsim pon jopa jiwi juniya itorobeibim. Matautano jiwi cobe itorobeibame xua noteibina pocotsiwa jopa jinyawiyo. Matautano pexaewa xua naweta noteibame ichaxota jopa ubim’, jei. ²² Nexata pon jiwi itorobiya pia pepa peewatsinchi namchi: ‘Bepa maisa dapon abem. Apara xam jinya coutha nanatsicuenti exaname abe nepaebixae. Xam yaputaneme xua xan pon jopa jiwi juniya taitorobeibin, xuano xua pexaewa naweta tanoteibiwa xua ichaxota jopa tacoya ubeibinyo, matautano xua ichamonae cobe itorobeiban xua noteiba pocotsiwa jopa tawiyo. ²³ Tsipei catsawiya neyabara nanta xeiname xua bichocono daunweya itoroban daxota bayatha inta bewa barapo paratiyo banco botha botsipame xua equeicha poxonae patopan, icha paratiyo equeicha matoma xeinaetsipan xua equeicha inta pemataropeichabotsixae tsipae poxonae ichamonae nacowaeta barapo paratiyo’, jei. ²⁴ Pon jiwi itorobiya pia pepa peewatsinchi barai, pomonae xua ena baxota baraichi: ‘Barapon pacobe wepire barapo paratiyo, nexata barapo paratiyo pacare pon xua equeicha diez po paratixibe matoma exanaeya xeina’, jei pon jiwi itorobiya pia pepa peewatsinchi. ²⁵ Pomonae ena, barapomonae jume epa nota, jeye: ‘Pon jiwi itorobiya pepa neewatsin, equeicha icha paratiyo jopa catsinde bapontha. Bayatha apara diez po paratixibe xeina’, jei barapomonae. ²⁶ Pon jiwi itorobiya pia pepa peewatsinchi barapomonae jume notatsi, jeye: ‘Paca tsipaebatsi, pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi. ²⁷ Yabara paca tsipaebatsi pomonae taneaitafaetabi jiwi. Barapomonae neaichaxaibi xua jiwi itorobiya pepa taewatsin tanecana exanaewa. Barapomonae pacarenenande ichaxota ecan. Barapomonae pajutebare ichaxota ecan’, jei pon jiwi itorobiya pia pepa peewatsinchi”, jei Jesús.

*Meje yabara poxonae Jesús Jerusalén tomaratha patopa
(Mt 21.1-11; Mr 11.1-11; Jn 12.12-19)*

²⁸ Poxonae Jesús baxua najume weta, bapoxonae pona Jerusalén tomara beya. ²⁹ Jesús itiya patopa Betfagé tomara, Betania tomarano xua saya patopa demxuwatha po demxuwa pewun Olivowa tsipei baxota umena olivo naein. Bapoxonae nacueyatabe poyobe itoroba poyobe xua pijimonaexae tatsi jiwanaabe pomonae xua doce poyobe. ³⁰ Jesús barai baponbe, jeye:

—Paponarebe po tomara painya itabaraya equiya. Poxonae papatopaenamebe barapo tomaratha, pacaxinaenamebe burro pon penen pon pequetanotsin, pon jopa ichamonae tsijuma enaeyo. Payama isanaxorebe bepayama carenandebe. ³¹ Icha ichun paca barai: ‘¿Eta pocotsiwa payama isanaxubamebe burro?’ icha paca jei bapon, nexata pajandebe: ‘Pon Wanacanamataxeinaein bepa pata yama cayiyaeinjei, tsipei pinae nantawenona’, pajandebe, jei Jesús.

³² Poxonae baponbe tomaratha patopabe, tanebe be pocotsi coyeneya bayatha Jesús namchi. ³³ Poxonae baponbe burro yama isacauyabe, baponbe yainyabatsibe pomonae barapo burro pexeinaexae. Baponbe baraichibe:

—¿Eta pocotsiwa burro payama isacauyamebe? jeichichibe baponbe.

³⁴ Baraponbe jume notabe barapomonaetha, jeye:

—Pon Pecanamataxeinaein jiwi bepa pinae patayama cayiyaein, tsipei pinae nantawenona, jeibe baponbe.

³⁵ Baraponbe burro tayama cayabe, Jesús tayama cayatsi. Baraponbe burro paparuwa tsijuma jebicabe po paparuwan aitiyua xua baponbe pia paparuwan tatsi, bapoxonae Jesús cuaretsicatsi. ³⁶ Jesús burrotha ecapona. Jiwi paparuwan namtotha yerababa jejebabapoinya. Barapo paparuwan Jesús matatsun ecapona burrotha. Barapomonae baxua exana tsipei Jesús matenta weyatainchi xua patopa. ³⁷ Poxonae Jesús muxu perunadecae demxuwa wereca, po demxuwa pewun Olivowa, tsipei baxota umena olivo naein barapoxonae pomonae Jesús pejume cowuntsiwichi, barapomonae juntu coyene weiweinaya jume daunweya wawai. Yawano Nacom wunae jaintatsi xua bayatha pexeinya petsita itutsi coyenewan petaexae xua Nacom exana. ³⁸ Barapomonae jeye:

—¡Pai jayana! ¡Maisa Jesús pon jiwi itorobiya pia pepa peewatsinchi, maisa wunae, bapon patopa Nacom peitorobixae! ¡Pomonae xua peitabocotha jinompa juntu coyene weiweina bichocono! ¡Maisa Nacom bichocono wunae jaintatsi pon athabeicha eca! jei Jesús pijimonae tatsi.

³⁹ Nexata fariseo jiwamonae, pomonae naenapona pin bicheittha, barapomonae Jesús baraichi:

—Pon jiwi Necuidubim, jinya jiwimonae baxua jume matawende: ¡Moya pande! jande, jei fariseo jiwamonae.

⁴⁰ Ichitha Jesús jume epa pita, jeye:

—Paca tsipaebatsi, icha barapomonae metha moya tsipae bara nexata iboton jume daunweya wawai tsipae, jei Jesús.

⁴¹ Poxonae Jesús imoxoyo Jerusalén tomaratha patopa, poxonae tomara tane, Jesús juntu coyene wecoyei tsanareca, poxoru Jerusalén tomaramonae yabara wecoyeichi.

⁴² Jesús namchi, jeye: “¡Pai maisa bepayaputaename xua pocotsi juntu coyene juntea jinompa paca cana exana! Nama anoxuae baxua nantsiyata. Jopa paca itacupaeyo xua painya nexainaewa painya juntu coyenetha. ⁴³ Meisa matabi pacata jopaena po matabi abe. Barapo matabitha painya nepaca caaitafaetabi jiwi paca yatomara yatoroto exanaxubina. Tsorobo paca yacaincha acabina. Yawa paca yacaincha umenaena daxita muxuneneintha. ⁴⁴ Paxam Jerusalén tomarapiwi pam, yawano painya pexuino, ichamonae paca jutebina. Painya bon iratha paca yawa bebai tsane. Jopa cae iboto asiya uncuiyae tsane, omeicha othopeicaena. Tsipei paxam jopa Nacom payaitaem xua poxonae paca necasiwa ponaewa”, jei Jesús Jerusalén tomarapiwimonae yabara.

Meje yabara poxonae Jesús aisowa benapuna torobabiya pomonae Nacom pin pia botha pecaenaetsiwi

(Mt 21.12-17; Mr 11.15-19; Jn 2.13-22)

⁴⁵ Jesús Nacom pin pia botha joniya. Baxota Jesús aisowa benapuna torobabiya pomonae caenaeta baxota. ⁴⁶ Jesús barai barapomonae, jeye:

—Nacom Pejume Diwesitha jeye: ‘Tabo aparta po botha xua jiwi tanetsipaebinexa tsaibi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia muthu tutu pacana exaname, ichaxota pijunuwi nantsiyabeibathopa, tsipei baxota panacaetutame saya u xua painya necaibinexam tsane paratixi pomonaetha pomonae xua pateiba xua Nacom petsipaebebinexatsi, jei Jesús.

⁴⁷ Nacom pin pia botha daxita matacabi Jesús cuidubeiba. Ichitha sacerdotemonae pia pentacaponae, iru pomonae jiwi pecuidubiwi Moisés pia peitorobi coyene tatsi, iruru tomara pia pentacaponae daxita barapomonae Jesús yabara nanta xeinatsi nawita xua pebexubinexa tsainchi. ⁴⁸ Ichitha jopa itacupaetsi barapomonae xua Jesús pebexubiwa tsainchi tsipei pin bicheito beta xanepanaya Jesús jume tayenatsi.

20

Meje yabara xua Jesús pia peitorobi coyenewa xeina

(Mt 21.23-27; Mr 11.27-33)

¹ Caentacabi Jesús Nacom pin pia botha joniya. Barapo botha Jesús cuiduba jiwi. Yawa Nacom pia pecapanenebiyae diwesi yabara cueicueije. Bapoxonae iru sacerdotemonae pia pentacaponae tatsi pata. Iru pata pomonae jiwi pecuidubiwi xua Moisés pia peitorobi coyenewa tatsi. Iru pata pomonae penapatae jiwi. ² Daxita barapomonae Jesús baraichi, jeye:

—Incane pana tsipaebare, eta po peitorobi coyenewatha cuidubame baxuan? Jintam cacata barapo peitorobi coyene? jei.

³ Nexata Jesús jume nota, jeye:

—Xan iruru tha barichichi paca yainyabinchi pana nejume nore. ⁴ Jintam Juan cui itorobatsi jane xua jiwi pebautisabinexa tsainchi? Metha bara Nacom cui itoroba jampa? Metha bara jiwi cui itoroba jampa? jei Jesús.

⁵ Barapomonae caemonae yabara natsipaeba pocotsiwa Jesús pepaebiwa. Barapomonae jeye: “eta xua metha jei tsainchi? Icha jei tsipaetsi xua Juan cui itorobatsi Nacom xua pebautisabiwa jiwi, metha naca jei tsipae: ‘eta xua metha nexata jopa pajume cowantsim Juan?’ metha naca jei tsipae Jesús. ⁶ Icha jei tsipaetsi Juan cui itorobatsi jiwi, metha aparta jiwi naca jutebina ibotoxitha, tsipei daxita barapo jiwi nanta xeina xua Juan pon Nacom peitorobi jume pepaebin”, najei barapomonae.

⁷ Barapomonae Jesús jume notatsi, jeye:

—Canta jopa payaputaeyo xua pon Juan cui itorobatsi xua jiwi pebautisabiwatsi, jei barapomonae.

⁸ Nexata Jesús barai barapomonae, jeye:

—Nexata barichin tsane. Jopa yabara paca tsipaebi tsainchi, po peitorobi coyeneyatha exanan xua daxita taexanaewan, jei Jesús.

Meje yabara poxonae Jesús paeba pecayabara jata pepaebi diwesiyo pomonae xua abe exana, pomonae petayapucaenaewi uva pabi

(Mt 21.33-44; Mr 12.1-11)

⁹ Nexata Jesús diwesi tsipaeba jiwitha po diwesi pecayabara jata pepaebi diwesiyo. Jesús jeye: “Matha iru pebin pin uva pabi xeina. Bapon uba po unbo pewun uva cuei unbo. Bapoxonae bapon itoroba pomonae pia uva pabi petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona ainya wei nexa. ¹⁰ Matacabi tsuxubi xua uva cuei naweta. Bapoxonae barapo mataqueitha pomonae pabi petayapucaenaewi jiwana itapeta nota xua penawetsiwa. Bapoxonae pon uva pabi pexeinaein, caein jiwana itoroba pomonae

pia petanacuichiwichi jiwana, xua petawucaenexa tsainchi uva cuei pomonae beya pomonae pabi petayapucaenaewichi. Ichitha barapon pon najume caitorobatsi, bapon butsi. Bapon caibe cobesa iya. ¹¹ Pon uva pabi pexeinaein bapon equeicha caein jiwana itoroba pomonae pia petanacuichiwichi jiwana. Bapon barichi bichocono butsi, caibe cobesa nawiya yawa jopa catichi. ¹² Pon uva pabi pexeinaein equeicha caein jiwana itoroba pomonae pia petanacuichiwichi jiwana. Barichi pomonae pabi petayapucaenaewi barapon butsi yawa wan exanatsi yawa pabi weya xotsi.

¹³ “Pon uva pabi pexeinaein matapainya nanta xeina najei: ‘¿Eta xua metha exanaein? Metha taxanto itorobin pon bichocono antobein. Metha poxonae taxanto taeinchi, metha inta yabara baru cui itura jinaeinchi’, najei. ¹⁴ Dapo jumetha pomonae uva pabi petayapucaenaewi poxonae bapon taeinchi, barapo petayapucaenaewi uva pabi najei tsane: ‘Apara bapon paxa copiniwa pichina. Daxota bapon bu bexotsi xua xainya xeinatsi barapo uva pabi’, najei barapomonae. ¹⁵ Barapo pexanto tatsi uva pabi juma bemaxu cayiyatsi. Baxotiya bexotsi”, jei Jesús.

Nexata Jesús barai barapomonae, pomonae jume tayenatsi Jesús, jeye: “Pon uva pabi pexeinaein, ¿eta be cana ichi tsane pomonaetha pomonae barapo uva pabi pia petayapucaenaewichi? ¹⁶ Pon uva pabi pexeinaein patopaena pia uva pabitha, pomonae uva pabi peyapucaenaewi daxita barapomonae jutebinchi. Barapoxonae barapo uva pabi ichamonae xuya catinchi xua petayapucaenaenexa tsainchi barapo uva pabi”, jei Jesús.

Pomonae Jesús jume tayenatsi poxonae baxua jume tane xua Jesús paeba, barapomonae Jesús jume itawetatsi, jeye:

—¡Bara, jopa bepajume taeinyo baxua, tsipei xua paebame Nacom jopa copatsiyo pata xantha xua pata tanejutebinexa ichamonae! jei barapomonae.

¹⁷ Ichitha Jesús tane, barapomonae tainchi. Jesús jeye:

—Incane pajume taema pocotsiwa Nacom Pejume Diwesitha neyabara caunuta poxonae iboto yabara paeba, jeye:

‘Pebiwi pomonae ibo bon peacabiwi,
barapo pebiwi xuba po iboto tabu
caboca, po iboto peainya cui iboto.
Ichitha Nacom itapeta barapo iboto xua
petabu cabocaenexa peainya cui ibotoxae’,
jei Nacom Pejume Diwesitha.

¹⁸ Incane iboto yabara paca tsipaebinchi. Barapo ibototha poxonae ichauyo jopeica peruruxixi tsanaya. Matautano poxonae barapo iboto ichauyo matatsun jopeicatsi pebeno tsanaya. Icha barapo iboto ichi poxonae cana exana ichauxitha peainya cui ibotoxae, xan barapocotsi juta coyeneya barichin pomonaetha pomonae jopa tana nejume cowuntsiwi. Pia jopa tana neyaputaexae barapomonae daxota peraxa exanaeinchi, jei Jesús.

¹⁹ Sacerdotemonae pia pentacaponae tatsi, iru pomonae jiwi pecuidubiwi xua Moisés pia peitorobi coyenewa tatsi, daxita barapomonae juntucuru Jesús teicatsi poxoru barapomonae yaputane xua yabara paebatsi xua Jesús paeba. Nexata Jesús jopa teicaetsi poxoru jiwi cunuwatsi.

Meje yabara poxonae Jesús yabara cuiduba paratixi matoma po paratixi jiwi bewa catsibina pontha pon romanomonae itorobiya pia pepa peewatsinchi

(Mt 22.15-22; Mr 12.13-17)

²⁰ Barapomonae itoroba, ichamonae itorobatsi xua petataenexa tsainchi. Pomonae xua itorobatsi, barapomonae naexana itara mexeya pentu cui xanepanaewi. Barapomonae pona Jesús beya, xua Jesús naerabiya pecui jume yopichinexa tsainchi xua exana yawa xua paeba. Pia bapoxonae Jesús waetabichi yawa pia caponaetsi pontha pon Judea nacupiwipi peyanacua ewatsinchi. Bapon peajumeyapusu itorobiwa xeina, xua po peajumeyapusu itorobiwa cata pon romanomonae itorobiya pia pepa peewatsinchi.

²¹ Daxota barapomonae Jesús yainyabatsi jeye:

—Pon jiwi Necuidubim. Bara payaputan xua bara jume xainyeya tsipaebame jiwi, matautano xua jiwi bara beta cuidubame xua pocotsiwa jiwi bewa exanaena pex-einaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi catsita najupa. ²² Incane yabara pana netsipaebare xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara pon penanapainchi poponaein? Icha jopa tsipae, ¿metha daxua abe tsipae? jeichichi Jesús barapomonae pomonae fariseomonae itoroba.

²³ Ichitha Jesús yaputane xua piraichi baxua yainyabatsi.

²⁴ Daxota jeye:

—Incane moya painta xawena paratiyo, tha taetsi. ¿Jintam pejumopere? ¿Yawano jintam wun ducuaire? jei Jesús.

Barapomonae jume nota, jeye:

—Apara romanomonae itorobiya pia pepa peewatsinchi, jei barapomonae.

²⁵ Nexata Jesús barai barapomonae, jeye:

—Bara nexata romanomonae itorobiya pia pepa peewatsinchi pacare pocotsiwa xua bapon piawaxae. Matautano Nacom pacare xua baxua iru piawaxae tatsi, jei Jesús.

²⁶ Barapomonae jopa itacupaetsi xua Jesús pewaetabiwatsi daxita jiwi peitutha, tsipei Jesús beta jume nota barapomonae. Barapomonae yabara najuntu cui coyene cabenaeca pocotsiwa xua Jesús xanepanaya beta jume nota, daxota barapomonae saya moya umena.

Meje yabara poxonae Jesús yabara yainyabatsi po coyene xua equeicha asu pomonae pewerapeibiwi

(Mt 22.23-33; Mr 12.18-27)

²⁷ Bapoxonae saduceomonae jiwana pata Jesús pia xantha tatsi xua Jesús piraichi petsipaebinexatsi. Saduceomonae barompaya pia pecuidubi coyenewa xeina xua pinae pomonae pewerapeibiwi equeicha jopa asu tsaibiyo. Barapo pecuidubiwa jopa jupaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxonae werapa. Daxota saduceomonae Jesús siwa poinchi. Saduceomonae Jesús baraichi:

²⁸ —Pon jiwi Necuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa pentapin pecoutha coseuri pichina xua bapoxonae pentapin pecoutha pexeinaenexa tsane pexui’, jei Moisés. ²⁹ Barichi, matha iru cae peweicho jiwi xua caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. ³⁰ Pon cotacaya naexana xuya pentapin coseuri pita xua bapoxonae pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. ³¹ Bapoxonae ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. Daxita barapo siete poyobe cuenta nanapentapona barapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. ³² Bapoxonae matapainya iru barapowa tupa. ³³ Xam, Jesús, ba paebame, ba jam: ‘Matacabi jopaena po matacabitha Nacom asu exanaena xua jiwi asu exanaeinchi muthu wetsina’, ba jam. Poxonae barapo matacabi jopaena xua daxita jiwi asu jujuinaena, barapo matacabitha, ¿jintam metha barapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe caepiwi cuenta nanapentapona barapowa, jei saduceomonae.

³⁴ Nexata saduceomonae, Jesús jume nota. Jesús jeye:

—Barapo nacuathe pebiwi yawa yabuxi, barapomonae jitha eenapona. ³⁵ Pomonae xua Nacom itapeta waba, poxonae barapomonae patsina Nacom pia nacuathe, barapomonae jopa equeicha jitha eenapona tsane, yawa jopa pexantixi jitha cuarebapona tsane.

³⁶ Tsipei barapo nacuatheicha, barapomonae bexa jopa werapae tsane icha matatsunpiwi

ichi xua jopa werapaeyo. Matauta barapomonaē Nacom pia pexui, tsipei barapomonaē equeicha asu barapo petupae coyene weya. ³⁷ Caena bayatha Moisés yabara naca cuiduba xua pomonaē pewerapeibiwi xua equeicha asu tsaibi tsane, po diwesitha naewa yabara tina po naewa taxuncua. Barapo diwesitha Nacom pon Pecanamataxeinaein jiwi, namchi: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. ³⁸ Baxua Nacom paeba tsipei Abraham iru Isaac, iru Jacob pomonaē bayatha pewerapaewi anoxuae equeicha caewa asu jinompa Nacom pia nacuatheicha tatsi. Pomonaē pewerapaewi pomonaē jopa caewa equeicha asu pejinompaewi, barapomonaē jopa pia Nacom tatsi, pon itabocotha eca. Saya jame meisa pomonaē bayatha pewerapaewi caewa equeicha asu pejinompaewi pomonaē pejume cowantsiwixaetsi Nacom, barapomonaē jame pia Nacom tatsi, pon itabocotha eca, jei Jesús.

³⁹ Nexata pomonaē jiwi pecuidubiwi Moisés pia peitorobi coyene tatsi, barapomonaē jiwanamonaē Jesús baraichi, jeye:

—Pon jiwi Necuidubim, maisa bara beta xanepanaya paebame, jei barapomonaē.

⁴⁰ Saduceomonaē equeicha jopa Jesús yainyabichi xua equeicha beta pejume notsiwat-siyainwa.

Meje yabara poxonaē Jesús nayabara jei: “Mesías, ¿jintam pia pemomoxi susato jiwanapin tatsira?” jei

(Mt 22.41-46; Mr 12.35-37)

⁴¹ Equeicha Jesús nayabara paeba pomonaetha pomonaē jiwi pecuidubiwi Moisés pia peitorobi coyene tatsi. Jesús jeye:

—¿Eta pocotsiwa metha jiwi paeba xua pinae Mesías bapon David pia pemomoxi susato jiwanapin tatsi? ⁴²⁻⁴³ Tsipei David jei salmos penaxunaē weixi diwesintha:

‘Nacom pon Pecanamataxeinaein jiwi

Tanecanamataxeinaein baraichi pon

Mesías jeichichi:

Tacoxa werena ecare, beya abu tsane poxonaē
necaitafaetabi jiwi pia Pecanamataxeinaeinchi
tatsi caexanaeinchi, jei Nacom’,

jei David salmos penaxunaē weixi diwesintha.

⁴⁴ Icha David yabara jei xua Mesías yabara jeichi: Bapon Mesías Tanecanamataxeinaein, jei, ¿eta xua metha tsipae xua Mesías apara David pia pemomoxi susato jiwanapin tatsi? jei Jesús.

Meje yabara poxonaē Jesús muxuweta jiwi xua pomonaē jiwi pecuidubiwi Moisés pia peitorobi coyene tatsi barapomonaē pecuiyainwa tatsi

(Mt 23.1-36; Mr 12.38-40; Lc 11.37-54)

⁴⁵ Pomonaē xua umena daxita barapomonaē Jesús jume taeumeinchi poxonaē Jesús pijimonaē tsipaeba. Jesús namchi, jeye: ⁴⁶ “Dota pam, dota pomonaē jiwi pecuidubiwi Moisés pia peitorobi coyene tatsi. Barapomonaē pia pecuidubi coyenewan tatsi pecuiyainwa pande. Jopa paexanaeinde icha barapomonaē ichi xua barapomonaē bichocono ichichipa xua penama xatabiwa po paparuwan apiyiya deca xua be pomonaē peainya cui jiwi penaexanaewi naexana. Barapomonaē bichocono ichichipa xua jiwi namtotha jacobebina xua barapomonaē pejacobinexatsi xua jiwi pebaru cui itura jineibinexa barapomonaē xua barapomonaē pebaru cui itura jineibinexatsi. Barapomonaē bichocono ichichipa xua nanta caeneiba judiomonaē pia penacaetutsi bontha tatsi ichaxota ba enathopeiba pomonaē peainya cui jiwi penaexanaewi. Matauta barapomonaē bichocono ichichipa xua eneiba ichaxota ba eneiba pomonaē peainya cui jiwimonaē poxonaē pexawan tsinacaetuteiba xua poxonaē penabaneibinexa tsane.

⁴⁷ Matautano barapomonaē powaxi pecuenta werapaewaxichi piseurixi, barapowaxi cueranta enatsi pia bon. Barapomonaē naemata jopa cuinaya najume copababeibiyo

poxonae tsipaebeiba Nacom. Barapomonae bichocono peraxa jubebinchi poxonae po mataqueitha Nacom yabara paebina jiwi xua pia penatsicuentisiwa xua abe petsita exanaexaetsi. Barapomonae bichocono atene tsane xua poxonae beyacaincha ichamonae atene exanaeinchi xua jopa pejume cowuntsixaetsi Nacom”, jei Jesús.

21

Meje yabara poxonae Jesús yabara paeba xua petsiriwa paratiyobe cata Nacomtha, powa pecuenta tupaewatsi piseuri

(Mr 12.41-44)

¹ Nacom pin pia botha Jesús tane xua baxota pomonae copei xeinaewi paratixi jeya Nacom nexa ichaxota jiwi jebeiba paratixi. ² Barichi Jesús tane xua iru ainya tsica paratiyobe jeca baxota powa pecuenta tupaewatsi piseuri, yawa bapowa peacopeibiwayo. ³ Jesús jeye:

—Bara xaniyeya paca tsipaebatsi. Barapo yabayo powa pecuenta tupaewatsi piseuri, barapowa peacopeibiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonae daxita pomonae nawita jeya xua Nacom nexa. ⁴ Daxita barapomonae jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca po paratiyobe bequein canantawenona xua pexaewa tsane, bequein bichocono peacopeibiwayo, jei Jesús pijimonaetha.

Meje yabara poxonae Jesús yabara paeba xua ichamonae abe exanaena Nacom pin pia bo tatsi
(Mt 24.1-2; Mr 13.1-2)

⁵ Ichamonae yabara natsipaeba nawita Nacom pin pia bo tatsi. Barapomonae najei: “¡Maisa Nacom pin pia bo tatsi bepa wanae! ¡Maisa bepa wanae xua jiwi tutu pepena peitupanaewan barapo Nacom pin pia botha xua Nacom nexa!” jei barapomonae. Nexata Jesús jeye:

⁶ —Matacabi jopaena po mataqueitha tsane ichamonae pomonae penanapaincha jinompaewi pomonae xua icha nacua werena peponaewi abe exanaena Nacom pin pia bo tatsi, xuaunxuae pataneme po bo. Jopa cae ibotiyo nacopatuncuae tsane icha iboto peumatha, daxita abe tsane, jei Jesús.

Meje yabara poxonae Jesús yabara paeba xua copiya matha pewanaeya exanaena petsita itutsi coyenewa poxonae daxita weraweracaenaba

(Mt 24.3-28; Mr 13.3-23)

⁷ Nexata jiwi Jesús yainyabatsi, jeye:

—Pon jiwi pata Pecuidubim, ¿eta poxonae metha ichamonae baxua exanaena poxonae abe cana exanaena Nacom pin pia bo tatsi? ¿Eta pocotsiwa tsane xua pewanaeya tsita itapeinya xeinaena po coyene xua poxonae imoxoyo daxita weraweracaenaba? jei Jesús pijimonaetha tatsi.

⁸ Jesús jume barai: “Dota pam bu ichamonae naerabiya paca muxu tsipaeba xua daxota abe paexanaetsipame. Tsipei tsane patsina ayei bicheito jiwi pomonae natsicotaena icha be xan ichin. Barapomonae jei tsane: ‘Apara xan, Mesías’, jei tsane. Ichun jei tsane: ‘Anoxuae Mesías patopaena’, jei tsane. Ichitha paxam jopa payabara jume cowuntsinde pocotsiwa xua barapomonae paeba. ⁹ Pajume taename xua jiwi juinya nabenoutsina xote, yawa xua juinya iruru nabenoutsina icha ira beya. Daichitha jopa pajunuwinde, tsipei baxua pewanaeya matha copiya tsane. Daichitha cataunxuae dapu matacabi aichica tsane xua poxonae daxita weraweracaenaba yatsicaewa”, jei Jesús.

¹⁰ Equeicha Jesús namchi: “Cae nacuapiwi iru icha nacuapiwino barapo ainya nacuapiwibe nabenoutsina. Matautano iru pon nacua peewatsin iru ichundu pon icha nacua peewatsin baponbe iru nantiya nabenabe. ¹¹ Matautano ainya nacuantha ira jijiyatsina. Matautano ainya nacuantha jainbo nacua tsane, tsipei pin mayayo tsane. Matautano domae tsurucuae tsane ainya nacuantha. Matautano Nacom peitabocotha peitupanaewan itatsina, xua jiwi bichocono cunuwa.

¹² “Poxonae baxua pewunaeya tsane jiwi paca teiquebina, paca atene exanaena. Judiomonae pia penacaetutsi botha paca caponaena painya paca yabara paebinexa painya nenatsicuentsiwa xua abe painya neexanaexae. Yawa paca caponaena jiwi pecubi botha. Paca caponaenano nacua peewatsiwi peitabaratha tatsi, painya tana nejume cowuntsixaemxae. Yawano paca caponaena pentacaponae peitabaratha tatsi, pomonae iru itoroba jiwitha xua pon nacua peewatsin nexa painya tana nejume cowuntsixaemxae. ¹³ Barapoxonae paca cui itacupaena xua barapomonaetha tapan neyabara paebiwam pocotsiwa bayatha paca tsita exanatsi. ¹⁴ Pananta xeinare painya juntu coyenetha, pana najande: ‘Jopa tsiwanaya yabara nacui wunaetsi tsainchi xua ichamonae watsipaebiwatsi xua abe wanaca yabara paebiwa’, pana najande. ¹⁵ Tsipei xan paca tsimuxu dutinchi po jume xua pacaunutsiname, xua po jumetha beta paca yaputane exanaena. Barapo jume pacata exanatsi xua painya paca necaitafaetabi jiwi jopa paca jume matanonopentsi tsane, xuano xua jopa peitacupaenexa tsainchi xua abe painya nepaca yabara paebiwa. ¹⁶ Paca caenaetsina ichamonae icha jiwitha pomonaetha pomonae jiwi pecanamataxeinaewi. Iru painya axeiwi yawa painya ena jiwi paca caenaetsina ichamonaetha. Iru painya eweicho jiwi paca caenaetsina ichamonaetha. Iru painya amoyo jiwi paca caenaetsina ichamonaetha. Iru painya jiwimonae paca caenaetsina ichamonaetha. Barichi ichamonae pomonae paxam jiwana pam jutebinchi. ¹⁷ Daxita nacuanpiwi paca casebina, painya tana nejume cowuntsixaemxae. ¹⁸ Ichitha Nacom paca capanenebiyaena painya nejuntu coyenein panenebiyaenexa. ¹⁹ Awiya paantuyapuswa nejume cowuntsiya jinompare poxonae bequein ichamonae abe pacata exana xua beya payacuiya werapaeya othopaename xua painya xeinaewa tsane peajuntuyapuswa po peajuntuyapuswa ataya tsiteca.

²⁰ “Poxonae pataename xua soldadomonae xua icha nacuapiwi yacaincha matawacaicha yatoxoroto naexanaxubina Jerusalén tomara bapoxonae payaputaename xua barapo tomara bara imoxoyo abe exanaeinchi. ²¹ Barapo mataqueitha, daxita pomonae Judea nacuatha jinompa barapomonae bewa demxuwan berucupiyaena. Iru pomonae Jerusalén tomarapiwi, barapomonae bewa bara berucupiyaena. Iru pomonae pabitha jinompa, barapomonae jopa bewa ducupaetsipae tomara beya. ²² Tsipei barapo matabintha Nacom cui itorobina, ichamonae cui itorobinchi, xua jiwi peraxa exanaeinchi, icha be po coyeneya Nacom Pejume Diwesitha yabara paeba baxua. ²³ ¡Pai yabuxi tsobenae powaxi pexui bupana taenatsi barapo matabitha! ¡Pai powaxi iru pexui isaina, barapowaxi tsobenaer! Tsipei acabe tsobenae tsane pexui. Matautano Nacom cui itorobina barapo nacuathe, ichamonae cui itorobinchi xua barapo nacuathepiwi pin peperaxa jubiwatsi tsainchi. ²⁴ Ichamonae cusitha jutebinchi. Ichamonae yamaxu cubiya caponaeinchi icha nacuan beya. Barapo Jerusalén tomaratha pomonae penanapaincha jinompaewi xua icha nacua werena peponaewi dubenanaebiyaena beya barapo matabi yacobe cui othopaena, po matabitha xua Nacom cobe matawentsina xua equeicha jopanae tsane barapo tomaratha barapomonae”, jei Jesús.

Meje yabara poxonae Jesús nayabara paeba xua poxonae equeicha patopaetsica ponxae Nacom pia Peitapetsin

(Mt 24.29-35, 42-44; Mr 13.24-37)

²⁵ Equeicha Jesús jeye: “Bapoxonae xometotha naitutsina peitupanaewa, yawa jomocoichathotha, yawa opiteitontha. Barapo irathe daxita nacuanpiwi yabara najuntu coyene cabenaenoutsina. Matautano busi taena pin maratsacan busi xua busi jopa xainya mene ducuaeyo. Bichocono jiwi najuinyacaena. ²⁶ Jiwi pijunuwi muxu pewerapae tsane poxonae nanta xeinaena po coyene Nacom exanaena barapo cae pin nacuathe. Matauta junuwina xua exanaena itabocotha poxonae Nacom napuna torobabiyaena xua xuan itabocotha dubena. Bapoxonae jopa xapain dubenanaeyo tsane. ²⁷ Bapoxonae jiwi ne taena ponxaein Nacom Tananeitapetsin xua tsaquinaebowatha patopeicaein. Nacom pia peayapuswa itorobi coyenewatha, matautano bichocono pexeinya itupanae coichatha

yawa patopeicaein. ²⁸ Poxonae baxuan juntucuru exanaenaba, panantusubarucupare, athabe panecotumeinyama, tsipei bara imoxoyo paca necapanenebiwa tsane”, jei Jesús.

²⁹⁻³⁰ Nexata Jesús pijimonaе tsipaeba pecayabara j̄ta pepaebi diwesiyo xua higuera nae, jeye: “Pataema nae po nae pew̄n higuera nae, xuano ichacuitha icha naeinno xua pataneme xua pena noxu xuxuwa pona. Nexata bapoxonae payaputaema xua imoxoyo wei tsurucuae tsoponaе. ³¹ Nexata barapocotsi j̄ta coyeneya icha tsane xuaunxuae paca tsipaebatsi xua poxonae jiwi muxu pijunuwi pewerapae tsane. Bapoxonae payaputaename xua bara imoxoyo tsane poxonae xua tapatopae w̄nae tsane poxonae jiwi itorobiya ewatsin.

³² “Bara xaniyeya paca tsipaebatsi daxita judiomonaе naitapataya naexanaponaena beya yacui othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomonaе weraweracaena. ³³ Peitaboco aichurucuae tsane, matauta ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

³⁴ “Dota pam, pana neyabara cananta xeinaeya jinompare. Painya xoba pana naj̄nt̄ coyene ararana exaname xua pana nasi cui matacaetame yab̄xitha xuano xua pana nac̄pa exaname peatsaxae meratha, yawano xua saya i pananta xeiname xua panantawenoname xua saya paxam nexa. Bapoxonae barapo matabi xain jopa paca benaecae tsane poxonae jopaena. ³⁵ Tsipei barapo matabi jemeicha jopaena, icha be pocotsi j̄ta coyeneya ichi poxonae duwein jemeicha ātabatsi mayatha. Barapo matabi jopaena daxita barapo cae pin nacuathe yajiwi canāpaxuinchi. ³⁶ Tsaca pajinompeibare xua tapatopae w̄nae tsane. Matowa patsipaeba dubenanaebiyama Nacom. Patsipaebare xua Nacom paca capanenebiya exanaena baxua weya xua poxonae Nacom cana exanaena ichamonaetha xuaunxuae paca tsipaebatsi. Barichi patsipaebareno xua painya nepaca itac̄paewa tsane xua painya neumenaewa taitabaratha ponxaein Nacom Tananeitapetsin”, jei Jesús pijimonaetha.

³⁷ Daxita matabi Jesús cuidubeiba jiwi Nacom pin pia botha Jerusalén tomaratha. Merawitha tsaibi demxuwa beya poneiba xua baxotiya peecaenexa tsaibi tsane, po demxuwa pew̄n Olivos. ³⁸ Daxita matabi jiwi caem̄botha tsaibi pateiba Nacom pin pia botha xua Jesús pejume taenexa tsaibi tsainchi.

22

Meje yabara poxonae fariseomonaе ir̄ sacerdotemonaе pia pentacaponaei tatsi daxita barapomonaе Jesús yabara nanta xeinatsi po coyeneya xua Jesús pewaetabiwa tsainchi (Mt 26.1-5, 14-16; Mr 14.1-2, 10-11; Jn 11.45-53)

¹ Bara nama imoxoyo matabi jopa po matabitha xua jiwi nacaetuta pexaenexa pan xua jopa cotowiyo. Barapo matabi pew̄n Pascua matabi w̄n. Barapo Pascua matabi w̄ntha jiwi yabara nanta xeina po matabi poxonae caena bayatha matha judiomonaе Egipto nacua weya panenebiya. ² Sacerdotemonaе pia pentacaponaei tatsi, ir̄ pomonaе jiwi pecuidubiwi Moisés pia peitorobi coyene tatsi, daxita barapomonaе nabar̄ muxu jei xua bepa pinae eta bichi tsane poxonae Jesús waetabinchi pebexubinexatsi. Cataunxuae jopa exanaeyo, canta jiwi cunuwatsi.

³ Bapon Judas caein jiwana pomonaе doce poyobe pomonaе Jesús pijimonaexae tatsi. Judas icha w̄n xeina, po w̄n “Iscariote”, baraichi. Nexata bapoxonae Satanás caurimonaе pia pentacaponaein tatsi, Judas imoxoyo peinya caquita uncuatabatsi peitorobinexatsi xua abe peexanaewa tsane. ⁴ Judas siwa pona sacerdotemonaе pia pentacaponaei tatsi, ir̄ policiamonaе xua pebar̄ cueicueijeinexa tsane. Barapomonaе policiamonaе pentacaponaei, xua pomonaе peyabara umenaewi Nacom pin pia bo tatsi. Daxita barapomonaetha Judas tsipaeba xua pocotsi coyeneya poxonae Jesús caenaetinchi barapomonaetha. ⁵ Barapomonaе bichocono ichichiparuc̄pa baxua. Yawa barapomonaе Judas muxu tsipaebatsi xua paratixi catsibapaebatsi. ⁶ Judas bara yabara jejei xua barapomonaе paeba. Bapoxonae Judas tamropata pitaba xua jeita

xua po coyenetha Jesús pecaenaetaxubiwa tsainchi barapomonaetha poxonae peyapu xanepanaewatha poxonae jiwaibi tsurucurape.

Meje yabara poxonae Jesús pijimonaē baru nabane Pascua wun matabitha (Mt 26.17-29; Mr 14.12-25; Jn 13.21-30; 1 Co 11.23-26)

⁷ Nama matabitha jopaba po matabitha poxonae jiwi tsinacaetsina xua penabanaenexa pan po pan jopa muxuna pentsiyo levadura matawun pocotsiwa xua cotowa exana pan. Barapo penantacarucuae matabitha ba corderoxi pebtoxi xua oveja coxi jutebatsi xua jiwi pexaenexa. ⁸ Pedro iru Juan itorobatsibe, Jesús itoroba. Jesús barai, jeye:

—Paponarebe panacui wunaerebe pexaewa Pascua wun matabitha nexa waxaenexa tsainchi, jei Jesús.

⁹ Baponbe, Pedro iru Juan, Jesús yainyabatsibe. Jeibe:

—¿Exota ichichipame xua xota pexaewa paca tsiwunaetsinchi wanabanaenexa tsane xua Pascua wun matabitha nexa? jei barapomonaē.

¹⁰ Jesús jume nota. Jeye:

—Poxonae tomaratha papatopaenamebe, pataenamebe pebin. Barapo pebin juruwatoha yantana ponaena mera. Bapon papuna ponarebe bo beya ichaxota bapon joniyaena. ¹¹ Pon bo pexeinaein pabarande: ‘Pon jiwi Pecuidubin cabarai: ¿Incane tutura, po tututha tajiwimonaē baru xaein Pascua wun matabitha nexa? jeye Pecuidubin’, pajandebe, jei Jesús. ¹² Equeicha Jesús jeye:

—Bapoxonae pon bo pexeinaein paca tsita ita cayopichinabe po tutu pin tutu. Barapo tutu, po tutu xua asiyeicha, barapo tutu bayatha xaneba. Barapo tututha pexaewa panacui wunaetajebare xua wanabanaenexa pexaewa barapo Pascua wun matabitha nexa, jei Jesús.

¹³ Barapoyobe ponabe, penamchixae daxita tanebe be pocotsi coyeneya Jesús bayatha paeba. Bapoxonae pexaewa nacui wunaetajebabe Pascua wun matabitha nexa xua penabanaenexa.

¹⁴ Poxonae barapo hora tsuxubi poxonae quirei tsanaicha, Jesús baru ecoundeca pexaethopaewatha pijimonaē pomonaē doce poyobe pomonaē pia peitorobiwixae tatsi Jesús. ¹⁵ Nexata Jesús barai, jeye:

—Maisa bichocono juntu coyene weiweinan xua tapaca cabaru nacaetsiwatsi, yawa tapaca cabaru nabanaewatsi barapo Pascua wun nabanaē matabitha, xua baxua matha pewunaeye tsane xua poxonae tatupaewa tsane. ¹⁶ Daxota paca tsipaebatsi xua equeicha jopa tapaca baru nacaetsiwatsi tsainchi xua wanabanaewa tsane Pascua wun matabitha. Equeicha exanaeinchi barapo penabanaewa po mataqueitha poxonae Nacom neexanaena xua jiwi itorobiya ewatsin, jei Jesús.

¹⁷ Nexata Jesús pecobetha pita corotiyo, Nacomtha tsipaeba, jeye:

—Axa, maisa juntu coyene weiweinan xua corotiyotha ecareca pepa uva mera xua pata tanecatsiwam, jei.

Yawa barai pijimonaē, jeye:

—Barapo corotiye pana nacobe wenonotaponde tamropata tsiwixi pa-aapaponde.

¹⁸ Daxota paca tsipaebatsi barapo uva mera jopa equeicha paca baru apae tsainchi anoxuae. Meisa abu bexa tsane pena coyenewatha paca baru apaeinchi barapo uva mera poxonae Nacom neexanaena xua jiwi itorobiya ewatsin, jei Jesús.

¹⁹ Jesús pecobetha pita pan, Nacomtha tsipaeba, jeye:

—Axa, maisa juntu coyene weiweinan xua pan pata tanecatsiwam, jei.

Bapoxonae Jesús pecobetha epa janaca pan, yawa catsiba pijimonaē. Pijimonaē barai, jeye:

—Paxaema po pan epa janacan. Barapo pan apara neyabara caunuta tapepon xua poxonae tapaca tsitupaewatsi tsainchi. Baxua paexaneibare bapocotsiwa xuaunxuae pan paca baru xainchi. Barapo coyene paexaneibare painya tana neyabara juntanaineibinexa tsabi tsane, jei Jesús.

²⁰ Poxonae Jesusbarũ najain weta, barapoxonae Jesús yabara paeba corotiyo, icha ichi xua yabara paeba pan. Jesús jeye:

—Nacom exana pena pecapanenebiyae coyene jiwi nexa. Barapo pecaapaewiyotha uva mera paapame, xuaunxuae paapame, apara natsicotane be tajana xua tatũpaein jana jopeicaein. Barapo pejanatha paca jũntũ coyene cui capanepaeinchi abe painya neexanae cuiru coyenein weya. ²¹ Pebin taxantha necacuita namaxũ yũtabota pexaethopaewatha, barapo pebin necaenaetsina ichamonaetha xua tanebexubinexa tsane ichamonae. ²² Xan ponxaein Nacom Tananeitapetsin bewa tũpaein, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha, jei Jesús.

²³ Nexata barapomonaе caemonaе nantiya nayainyaba, jeye: “¿Jintam metha caenaе-tatsi Jesús?” najei barapomonaе.

Meje yabara poxonae Jesús pijimonaе tatsi, yabara najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana

²⁴ Pirapaeyo Jesús pijimonaе tatsi najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana. ²⁵ Nexata Jesús jume barai: “Pomonaе jopa judiomonaе naexanaeyo, barapomonaе ba nantauta piamonaе pomonaе nacua peewatsiwi. Barapomonaе pomonaе jiwi itorobiya pia pepa peewatsiwichi barompaya piamonaexae jopa juniya itorobeibiyo. Barapomonaе pomonaе jiwi itorobiya pia pepa peewatsiwichi baxua exana, xua daxita jiwi pia jeichi: ‘Maisa barapomonaе pomonaе jiwi itorobiya pia pepa peewatsiwichi wũnae nacata exana xua naca itoroba’, pia jeichi jiwi. ²⁶ Ichitha paxam jopa bewa paraichim tsane xua aebiya painya neitorobiwa tsane. Jame, icha cui bewa paxeinare. Pon ainya cui peexanaeinchi paxamtha xua beyacaincha ichamonaе bapon bewa naexanaena be pon pecui pawi. Pon xua jiwi itorobeiba, bapon bewa naexanaena be pon amanaya tanacuita ichũn nexa. ²⁷ Iru ainya pebinbe. Ichũn pexaethopaewatha ecoundeca. Ichũn pexaewa apata. Pon ecoundeca apatatsi. ¿Jintamda pon ainya cui peexanaeinchira xua beyacaincha ichũn? Pon xua jiwi apata pexaewa bapon jopa ainya cui peexanaeinchi. Jame pon pententa apatinchi bapon jame pon peainya cui peexanaeinchi, xua beyacaincha ichũn. Nama painya xantha ecan, xua tacoya nacana exanan be pon xua pexaewa jiwi taapatsin, pocotsin jopa ainya cuiyiyo.

²⁸ “Paxam barapomonaе pam, pomonaе meisa pana nebarũ jinompeibame poxonae bequein ichamonaе inta abe exana. ²⁹ Daxota paca catatsi taitorobi coyenewan icha Taxa Nacom neichi xua necata barapo peitorobi coyenewan. ³⁰ Barapo peitorobi coyenewan paca catatsi, painya nenabarũ nabanaenexa taitorobeibi nacuatheica. Paenaename pexeinya peitũpanae enaewantha, painya neyabara paebinexa tsane pomonaе doce po bicheito cuntiyobe, pomonaе Israel pia pemomoxi susato jiwimonaе tatsi xua penatsicuentsiwa abe pia peexanaexae”, jei Jesús.

Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeinyo”, pinae yabara jei tsainchi Jesús

(Mt 26.31-35; Mr 14.27-31; Jn 13.36-38)

³¹ Equeicha Jesús jeye:

—Simón jan, caurimonaе pia pentacaponaein tatsi, bapon Satanás newũca: ‘Jinya-monaepin necare’, nejei. Bapon ichichipa xua abe cata exanaena xua taneitawetsinexam tsane. Icha jiwi ichi xua pebeno daunweya yasisita pexubinexa pesiberapewa. Barichi caurimonaе pia pentacaponaein tatsi ichichipa cajũntũ coyene itorobina xua taneitawetsinexam tsane. ³² Ichitha xan Taxa beicha cata tsipaebatsi xua jopa tana neyabara jũntemainenexam tsane xua tana nejume cowũntsiwam. Ichitha Satanás cacana exanaena xua tana nejumefebiwam saya bara caeto tsane. Bapoxonae equeicha caewa nejume cowũntsiname. Poxonae equeicha caewa nejume cowũntsiname, nexata

ichamonae pomonae tana nejume cowuntsiwi barapomonae yawenaename xua ajuntayapusya tana nejume cowuntsiwa tsane, jei Jesús.

³³ Simón Jesús jume notatsi, jeye:

—Tanecanamataxeinaem, maisa be cabarū poponaeinchi. Bara bequein ichamonae cacaponaena jiwi pecubi botha ichitha awiya capuna tūpaeinchi. Matauta bequein tūpaename ichitha awiya capuna tūpaeinchi, jei Simón Pedro.

³⁴ Jesús jume nota, jeye:

—Pedro, catsipaebatsi bexa necaunutsiname acoibi po jume cuiyobe neyabara jam tsane: ‘Dapon jopa yaitaeinyo’, neyabara jam tsane. Barapoxonae irū tsane wacara pebto fibina, jei Jesús.

Meje yabara poxonae bara nama barapo matacabi tsane po matacabitha Jesús waetabatsi

³⁵ Nexata Jesús pijimonae yainyaba, jeye:

—Poxonae bayatha paca itorobatsi paca jeichi: ‘Jopa paratixi dorō pacaponaeinde, jopa cote pacaponaeinde, jopa panataxu xatabinde xua penataxu xatabiwa’, jan. ¿Eta xoyo pacata seica xua xoyo pacobena poname? jei Jesús.

Barapomonae Jesús jume notatsi, jeye:

—Ajibi, bara paxeinan pocotsiwa panantawenonan, jei.

³⁶ Nexata Jesús jume nota. Barapomonae jume notatsi. Namchi:

—Anoxuae paca tsipaebatsi xua icha cui coyeneya. Pon cote xeina, moya bewa caponae. Pon xeina paratixi dorō, moya bewa caponae. Pon peaitiyū camisa xeina, bapon bewa caenaetsina barapo camisa, barapo paratixitha bewa comotsina cusi.

³⁷ Poxoru paca tsipaebatsi caena bayatha Nacom Pejume Diwesitha neyabara paeba, jeye: ‘Bapon cayabara cananta xeinaeinchi jei tsane bapon jiwana caein pomonae peabewi’, jei Nacom Pejume Diwesitha xua pinae jiwi jei tsane. Jiwi nantawenona xua baxua neyabara caunutsina xua Nacom peneyabara jumichixae baxuan pejume diwesitha, jei Jesús.

³⁸ Barapomonae Jesús jume notatsi. Jeye:

—Patatanecanamataxeinaem, xote bayatha paxeinan ainya watobe cusi, jei.

Jesús jume nota, jeye:

—Bara, bare, jei Jesús.

Meje yabara poxonae Jesús Paxa tsipaeba ichaxota tsica iriyo po iriyo pewun Getsemani (Mt 26.36-46; Mr 14.32-42)

³⁹ Nexata Jesús tomara weya pona. Bapon pona demxuwa beya po demxuwa pewun demxu Olivowa, olivo naein peumenaexae baxota poxoru pia cui xua poneiba baxota petsipaebibinexa Paxa. Jesús pijimonae puna poinchi. ⁴⁰ Poxonae barapo demxuwatha patopa, Jesús pijimonae barai:

—Nacom patsipaebare xua jopa abe painya neexanaewa tsane xua caurimonae paca itoroba.

⁴¹ Nexata Jesús pijimonae tsiwiyo wepu natsixitaba. Saya jopa tajūyo. Be poxonae pebin ibotiyo xoya xua be pocotsiwatha naruntabiya jopeica. Jesús pentabocototha ecoundeca. Paxa tsipaeba. ⁴² Jesús namchi: “Axa, icha ichichipame xua tana neyawenaewam, inta pire xua ajuntūcoyenerewe neexana. Ichitha jopa neexanaeinde be pocotsi coyeneya ichichipan. Saya jame necana exande be pocotsi coyeneya ichichipame”, jei Jesús.

⁴³ Bapoxonae Jesús tsita naitūtatsi matatsunpin pon itaboco wetsica pona. Barapo matatsunpin Jesús antūsyua cana exanatsi poxonae yawenatsi. ⁴⁴ Bichocono Jesús ajuntūtane tsipei Paxa copatatsi xua jiwi petsitūpaewa tsainchi. Paxa beya bichocono matowa jume daunweya tsipaeba. Yawano bichocono najaneta. Barapo penajanetsiwa poxonae iratha othopeica be pejana othothopeica.

⁴⁵ Poxonae najume wetaba xuano xua asiya uncuano bapoxonae pijimonae beya pona. Jesús tane pijimonae xua tamaitumeinchi. Barapomonae maita tsipei jūntū cuerona xua wecoyei, xua Jesús yaitama petūpapaebixae. ⁴⁶ Nexata Jesús pijimonae barai, jeye:

—¿Eta xua metha pamaitame? Panonobaponde Nacom patsipaebare xua jopa abe painya neexanaenexa tsane pocotsiwa caurimonae paca itoroba, jei Jesús.

Meje yabara poxonae Jesús waetabatsi

(Mt 26.47-56; Mr 14.43-50; Jn 18.2-11)

⁴⁷ Cataunxuae abũ Jesús pijimonae tsipaebuncua poxonaerũ jiji pin bicheito pata. Caein Jesús pijimonae tatsi jiwana, pon pewũ Judas, pomonae xua doce poyobexae, bapon pin bicheito matacapona. Judas Jesús imoxoyo caquita uncuatabatsi xua Jesús petsutsubinexa tsainchi. ⁴⁸ Nexata Judas baraichi, Jesús barai, jeye:

—Xan ponxaein Nacom Tananeitapetsin, ¡Judas, jamaisa netsutsubame, apara metha jinya necaenaetichi ichamonaetha! jei Jesús.

⁴⁹ Pomonae Jesús pijimonae tatsi caquita umeinchi, poxonae barapomonae baxua tane xua Judas Jesús tsutsubatsi xua pecaenaetsinexatsi ichamonaetha, bapoxonae barapomonae Jesús baraichi:

—Pata Tanecanamataxeinaem, ¿barapomonae cusitha paucuboban? jei Jesús pijimonae tatsi.

⁵⁰ Jesús pijimonae tatsi jiwana caein, bapon muxuyoro catsoniba, pon sacerdotemonae pia pepa pentacaponaein tatsi tanacuitatsi bapon muxuyoro catsonibatsi po muxuyoroto pecoxa werucuiya. ⁵¹ Ichitha Jesús barai bapon jeye:

—Bara, bara, jei Jesús.

Pon muxuyoro catsonibatsi Jesús muxuyoro jayaba pecobetha. Bapoxonae bapon equeicha muxuyoro ducuanaya. ⁵² Jesús tsipaeba, sacerdotemonae pia pentacaponaein tatsi tsipaebatsi. Yawano tsipaebano pomonaetha pomonae penapataewi. Barichi tsipaebano pomonaetha pomonae Nacom pin pia bo peyapu enaewi. Daxita barapomonae Jesús cueicueije, pomonae ichichipa xua Jesús pewaetabiwatsi. Jesús jeye:

—¡Pacapatame cusin yawa iwabi, icha paichim poxonae pacana exaname pontha pon jiji pecaibin! ⁵³ Poxonae daxita matacabi Nacom pin pia botha paca baru poponeibatsi, jopa pana newaetabim. Ichitha anoxuae barapo matacabi tsuxubi nama po matacabitha Nacom paca yabara cui copata xua painya neexanaewa tsane pocotsiwa paca necaitorobixae cauri, bapon Satanás pon peyaitaquireya jinaein.

Meje yabara poxonae Pedro Jesús yabara paebatsi xua jeye: “Jopa dapon yaitaeinyo”, yabara jeichichi Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Nexata daxita barapomonae Jesús teicatsi. Yawano capoinchino sacerdotemonae pia pepa pentacaponaein tatsi pia bo beya tatsi. Pedro, Jesús tsiwiyo tajũ pu taetae tsiniyatsi. ⁵⁵ Baraxotiya sacerdotemonae pia pentacaponaein tatsi pia botha tatsi bara po botha aisowa beya panatha tututha isoto itutaeta. Soldadomonae barapomonae nayatoroto exanaxubiya ena isototha. Baraxota irũ Pedro naeca. ⁵⁶ Yabũyo powa sacerdotemonae pia pepa pentacaponaein tatsi tanacuitatsi, poxonae Pedro tainchi barapowa, xua irũ naeca baxota isototha barapowa Pedro caununaya baraichichi, jeichichi:

—Bapon irũ apara bayatha Jesús puna poponeibatsi, jei.

⁵⁷ Ichitha Pedro jume matawenta, jei:

—¡Petsiriwa, barapo pebin jopa yaitaeinyo! jei Pedro.

⁵⁸ Bapoxonae pirapaeyo irũ ichũndũ pebin patopa. Bapon Pedro irũ tainchi xua irũ naeca baxota. Pedro baraichi bapon, jeye:

—Xam apara irũ Jesús pijimonae tatsi jiwana, jei.

Ichitha Pedro jume barai, jeye:

—¡Pebin, jopa dapomonae jiwana apara! jei Pedro.

⁵⁹ Poxonae cae hora yapucaewa, irũ ichũn Pedro matowa baraichichi:

—Bapon apara napuna poneiba Jesús, tsipei bapon Galilea nacuapindũ, jei.

⁶⁰ Ichitha Pedro jume barai, jeye:

—¿Pebin, daumetha jopa taeinyo xua paebame! jei Pedro.

Poxonae Pedro cataunxuae baxua cueicueijei, bapoxonae caena nainya wacara pebto caein fiba. ⁶¹ Nexata Jesús napatomeicha necota, Pedro necoyatsi. Nexata Pedro nanta xeinataba xua bayatha Jesús Pedro tsipaebatsi, poxonae jeye: “Xam barapo merawithe, pewunaeya poxonae wacara pebto fibina xam copiya acoibi po jume cuiyobetha neyabara jam tsane: ‘Jopa dapon yaitaeinyo’, neyabara jam tsane. Barapoxonae iru nainya wacara pebto fibina”, jeichi Pedro xua Jesús paeba. ⁶² Nexata Pedro pesato bejoniya. Bichocono wecoyeyi, peajuntutanexae xua Jesús yabara paebatsi.

Meje yabara poxonae Jesús cui caponatsi

(Mt 26.67-68; Mr 14.65)

⁶³ Pomonae Jesús yapucaumeinchi, daxita barapomonae Jesús cui caponatsi, yawa butsin. ⁶⁴ Jesús itacuere cutatsi, paparuwatha yawa itabara cuaintatsino. Barapomonae Jesús baraichi:

—Incane pana netsipaebare, ¿jintam caitabara tsaquibobara xua bequein paca itabara cutatsi? jei.

⁶⁵ Daxita barapomonae Jesús tsümü jume baru paebatsi ainya jumeintha.

Meje yabara poxonae Jesús capoinchi judiomonae pia pecanamata caitorobi jiwi bicheito tatsi pia peitabaratha tatsi

(Mt 26.59-66; Mr 14.55-64; Jn 18.19-24)

⁶⁶ Poxonae pentha tsina nabaru nacaetuta penapataewi judiomonae, iru sacerdotemonae pia pentacaponae tatsi, iruru pomonae jiwi pecuidubiwi Moisés pia peitorobi coyene tatsi. Daxita barapomonae Jesús capoinchi pecanamata caitorobi bicheito itabaratha tatsi xua peyainyabinexatsi, jeichi:

⁶⁷ —Incane pana netsipaebare, ¿Xam Mesías, pon Nacom necaitorobin? jei.

Jesús jume epa pita jeye:

—Icha: ‘Aa’, paca jei tsipaetsi, apara jopa pana nejume cowuntsitsipaem. ⁶⁸ Icha paca yainyabichipatsi tayinyabiwan apara jopa pana nejume notsipaem. ⁶⁹ Ichitha ponxaein Nacom Tananeitapetsin ecaein Nacom pia pecoxa weya tatsi, po Nacom peayapusu itorobi coyenewa pexeinaein, jei Jesús.

⁷⁰ Bapoxonae daxita barapomonae Jesús baraichi:

—¿Nexata metha xam Nacom Pexanto tatsim? jei.

Jesús jume epa pita jeye:

—Aa, barichi xuaunxuae papaebame painya coutha, jei.

⁷¹ Nexata barapomonae caemonae natsipaeba najei:

—Anoxuae jopa nantawenonaetsi xua ichamonae Jesús peyabara paebiwatsi. Tsipei anoxuae nama yatsicaewa jume tainchi, xua bapon pia coutha nayabara paeba, jei barapomonae.

23

Meje yabara poxonae Jesús uncua Pilato peitabaratha tatsi

(Mt 27.1-2, 11-14; Mr 15.1-5; Jn 18.28-38)

¹ Nexata daxita penayatoroto exanaxubiya enae jiwi barapomonae asiya ume-narucupa, Jesús teicatsi yawa capoinchi Pilato peitabaratha tatsi. Pilato bapon pon Judea nacuapiwi peyanacua ewatsinchi. ² Baxota daxita barapomonae Jesús cui yopitatsi xua abe exana, jeye:

—Barapo pebin patan xua wajiwimonae jume cui tsacabatsi xua anaepana cana exanatsi. Yawano pajume tanno pocotsiwa jopa bewa pinae paratixi matoma catsi pontha pon romanomonae itorobiya pia pepa peewatsinchi. Matauta bapon nayabara paeba: ‘Xan apara Mesías pon jiwi itorobiya pepa Taewatsin’, jei, jei barapomonae.

³ Nexata Pilato Jesús yainyabatsi, jeye:

—¿Xam judiomonae itorobiya pia pepa Neewatsin? jei.

Jesús jume nota namchi, jeye:

—Xuaunxuae paebame bara baxua apara, jei Jesús.

⁴ Nexata Pilato barai sacerdotemonae pia pentacaponae wi tatsi yawa baraino jiwi, jeye:

—Jopa jume itaraerowinyo bapon xua po jumetha penayaita anae exanaewa, xua pebexubinexatsi barapo pebin, jei.

⁵ Ichitha barapomonae jume daunweya cueicueijei, jeye:

—Jiwi jopa juniya jume cui tsacabichi xua anaepana exanatsi pia pecuidubiwantha, daxita Judea nacuatha. Baxua Galilea nacuatha tamropata pitaba, equeicha aunxuae waxainya becuí joparene, jei.

Meje yabara poxonae Jesús uncuá Herodes peitabaratha tatsi

⁶ Poxonae Pilato baxua jume taeba barapo bicheito baraichi, jeye:

—¿Jesús bara Galilea nacuapin? jei Pilato barapo bicheitotha.

⁷ Barapo bicheito namchi, jeye:

—Aa, bapon Galilea nacuapin, jei barapomonae.

Bapoxonae Pilato itoroba, Jesús itorobatsi, Herodes peitabaratha beya. Bapon Herodes pon Galilea nacuapiwi peyanacua ewatsinchi. Herodes siwa poneiba Jerusalén tomara. ⁸ Poxonae Jesús taebatsi Herodes, bapon bichocono juntu coyene weiweinanareca, tsipei bayatha Herodes cuinaya betaena. Herodes saya jume taiba xua Jesús yopiteibatsi. Herodes ichichipa tane xua Jesús petsita itatsi coyenewa exanaena. ⁹ Herodes Jesús matowa yainyabatsi. Ichitha Jesús jopa jume notsiyo. ¹⁰ Baraxota iruru ena sacerdotemonae pia pentacaponae wi tatsi. Iruru baxota ena pomonae jiwi pecuidubiwi Moisés pia peitorobi coyenewa tatsi. Daxita barapomonae Jesús bichocono abe yabara paebatsi Herodes pia xantha tatsi. ¹¹ Nexata Herodes yawano pia soldadomonae tatsino daxita barapomonae Jesús tsumu jume baru paebatsi. Jesús cui caponatsi, pexeinya paparuwa juma xatatatsi pocotsi paparuwan nama xataba pomonae peyanacua ewatsi jiwi. Equeicha Jesús itorobatsi Pilato peitabaratha beya, Herodes bara beitorobiya. ¹² Barapo matabitha Herodes iruno Pilato naitacoxonabe. Baponbe caena bayatha saya penaita aenae-aenei jitonbe.

Meje yabara poxonae Pilato jume baru jejei xua Jesús bara pebexubiwa tsainchi ichamonae

(Mt 27.15-26; Mr 15.6-15; Jn 18.39-19.16)

¹³ Sacerdotemonae pia pentacaponae wi tatsi iruru judiomonae pia pentacaponae wi, iruru daxita jiwi, daxita barapo bicheito Pilato waba xua barapo bicheito penacae-tutsinexa. ¹⁴ Pilato barai barapo bicheito, jeye:

—Paxam barapo pebin pacaponame taxantha. Pajam: ‘Barapo pebin daxita jiwi jume cui tsacabatsi xua anaepana exanatsi’, pajam. Bayatha bequein baxua barapo pebin yabara yainyaban painya itabaratha pocotsiwa bayatha payabara paebame taxantha, ichitha jopa jume itaraerowinyo bapon, xua po jumetha penayaita anae exanaewa xua yabara pana netsipaebame. ¹⁵ Icha ichin xua jopa jume itaraerowinyo Herodes barichi. Daxota equeicha Jesús caibe itorobarenatsi waxainya berena. Yaitama Jesús jopa abe exanaeyo, daxota jopa bewa bexubi. ¹⁶ Tha cueintichi bapon. Tha bapoxonae pu copatichi, jei Pilato.

¹⁷ Poxonae Pascua matabintha ichun ba bewa isanaxubichi. Pilato barapo Pascua matabintha nantawenona xua isanaxubina caein pon jiwi pecubi botha pecaein, pon xua jiwi ichichipa, xua bapon peisanaxubinexa tsainchi.

¹⁸ Bapoxonae daxita jiwi jume daunweya wawai, jeye:

—¿Soldadomonae itorobare xua bapon pebexubinexatsi! ¡Barrabás painta pu sotabare! jei.

¹⁹ Barrabás jiwi pecubi botha etatsi, tsipei caena bayatha matabintha ichamonae xua barapo tomarapiwi najume tsacaba cana exanatsi xuano xua jiwi jutebatsi. ²⁰ Pilato ichichipa xua Jesús pu copatatsi. Daxota equeicha barapo bicheito tsipaebatsi xua Jesús

yabara paebatsi. ²¹ Ichitha equeicha barapo bicheito jume daunweya wawai Pilatotha, jeye:

—¡Bewa maisa naetotha t̄parucua exanaem! ¡Bewa maisa naetotha t̄parucua exanaem! jei.

²² Equeicha Pilato tsipaeba barapo bicheito, jeye:

—¿Eta pocotsiwa xua metha jane xua abe exana? Xan jopa jume itaraerowinyo bapon xua po jumetha penayaita anae exanaewa xua pebexubinexatsi bapon. Tha cueintichi, tha bapoxonae pu copatabichi, jei.

²³ Barapo bicheito jopa juniya wawayo xua naetotha t̄parucua peexanaenexatsi Jesús. Ir̄r̄r̄ sacerdotesmonae pia pentacaponae wi tatsi jume daunweya wawair̄, beya capanepa po coyene ichichipa pecana exanaewa. ²⁴ Daxota Pilato namchi: “Moya paexande be pocotsi coyeneya paichichipame”, jei Pilato. ²⁵ Nexata Pilato nama pu sotaba pon jiwi pec̄bi botha peecaen, pon jiwi ichichipa xua bapon peisanaxubiwa tsainchi. Bapon pew̄n Barrabás, pon waetabatsi poxonae jiwi najume tsacaba xuano poxonae jiwi jutebatsi. Bapoxonae Jesús copatatsi, Pilato copata, xua Jesús bara pebexubinexatsi judiomonae pejumeyainwa tatsi.

Meje yabara poxonae Jesús t̄parucua exanatsi naetotha

(Mt 27.32-44; Mr 15.21-32; Jn 19.17-27)

²⁶ Poxonae Jesús cataunxuae caenapoinchi t̄pa peexanadutsinexatsi naetotha, pebin waetabatsi, soldadomonae waetaba. Bapon pew̄n Simón, Cirene tomarapin. Bapon wexua werena pona. Bapon peutucuratha tabotsicatsi naeto, xua pecaponaenexa Jesús peputha tatsi.

²⁷ Jesús peputha tapoinchi pin bicheito, ir̄ ainya yab̄xino Jesús peputha tapoinchi. Daxita barapowaxi nantanuweya siwa namtsebiya wecoyeichi Jesús. ²⁸ Ichitha Jesús necotabiya barai barapowaxi, jeye:

—Yab̄xi Jerusalén tomarapiwaxi pam, jopa pana nesiwa namtsebiya wecoyande. Jame maisa painya coutha pana nasiwa wecoyande, painya pexuino pasiwa wecoyande.

²⁹ Tsipei maticabin othopaena po maticabintha jiwi atene tsane. Barapo mataqueintha, jiwi jei tsane: ‘J̄nt̄ coyene weiweina po yab̄xi jopa pexui xeinaeyo. J̄nt̄ coyene weiweina po yab̄xi jopa bapana b̄tixitha taenaetsi pexui. J̄nt̄ coyene weiweina po yab̄xi bapana pexui jopa isainae’, jei tsane jiwi barapo maticabintha. ³⁰ Yawano jiwi namchi tsane: ‘Maisa xanepana xua wawerapaewa xua wanaca c̄n̄babiwa demxuwan, yawano tsorobon naca matatsun wetoxebabina xua jopa wanaca it̄tsiwa tsane’, jei tsane jiwi barapo maticabintha. ³¹ Xan w̄nae exanan dacotsiwa jiwi jopa juniya neperaxa exanaeyo. Ichitha pomonae abe peexanaewi nama jopa juniya bichocono peraxa exanaetsi beyacaincha xua neperaxa exana, jei Jesús.

³² Cataunxuae Jesús ecapona. Ir̄r̄r̄ ponbe abe matowa peexanaeinbe, baponbe Jesús peputha tacapoinchibe, xua baponbe ir̄ pebexubinexa tsainchibe poxonae Jesús bexotsi. ³³ Daxita jiwi Jesús bar̄ patatsi ichaxota po uruto be jiton matasipa piwa. Po uruto w̄n caunuteiba xua jei tsaibi: “La Calavera”, jei. Barapo uruto matasoittha Jesús t̄parucua exanatsi naetotha. Ir̄r̄r̄ ponbe jiwi pecaibinbe t̄parucua exanatsibe naetotha ichaxota imoxoyo Jesús ducua. Ich̄n Jesús petsocona wetauncuiyatsi, ir̄ ich̄n pecoxa wetauncuarenatsi. ³⁴ Poxonae Jesús naetotha ducua, Jesús jeye:

—Axa yabara cui j̄nt̄emainare po coyene barapomonae necana exana, tsipei barapomonae jopa yaputaeyo xua necana exana, jei Jesús.

Soldadomonae nata tsaba Jesús pia paparuwan tatsi. Bapomonae ibotixi bebeya penacueranta notsinexa Jesús pia paparuwan tatsi. Pon beta xoya ibotiyo bapon copiya pita Jesús pia paparuwan tatsi. ³⁵ Baraxota Jesús taeumeinchi jiwi. Ichitha nama pentacaponae wi Jesús cui caponatsi, barapomonae jeye:

—Bapon cain capanepibabei ichamonae, came jopa nacapanepaeyo. Icha bara bapon Mesías, pon Nacom pia peitapetsin, b̄ bara bapon pia coutha nacapanepa naeto wetsica, jei barapomonae.

³⁶ Soldadomonaē irū Jesús cui capoinchi, imoxoyo caquita umenapoinchino. Barapo soldadomonaē Jesús apatatsi po mera pewan vino, po mera mene atsu. ³⁷ Barapo soldadomonaē Jesús baraichi, jeye:

—¡Icha xaniwaicha judiomonaē itorobiya pia pepa Neewatsim, moya jinya coutha nacapanepare! ¡Naeto wetsica ecoinca! jei soldadomonaē.

³⁸ Jesús pentutu wetsica tadutatsi napaewa xua barapo napaewatha tina. Barapo petinadutsiwa jeye: “Baponje apara judiomonaē itorobiya pia pepa peewatsinchi”, jei barapo petinadutsiwa.

³⁹ Ponbe Jesús pecuariya tacobe matatabarutatsibe, ponbe matowa abe peexanaeinbe, baponbe caein ichun, bapon Jesús biatainchi petupaeyainwa naetotha. Bapon namchi:

—¡Icha xaniwaicha xam Mesías, ponxaem Nacom caitapeta, moya jinya coutha nacapanepare! ¡Yawano pana necapaneparebe! jei bapon.

⁴⁰ Pon icha naetotha ducua, bapon jume matawenta, pon Jesús casebatsi, bapon jume matawentsi. Pon icha naetotha ducua namchi, jeye:

—¿Xam jopa cuitaya junuwim Nacom? Aparauxuae tupaeinchibe ichaunxae Jesús ichi tsane. ⁴¹ Waxainchibe jopa juniya naca peraxa jubiyobe abe waexanaexaēbe, apara bara xainwaicha xua nacata exana tsipei bayatha apara abe exanatsibe. Ichitha nama ponje jopa apara abe exanaeyo, jei.

⁴² Nexata pon baxua penamchixae, bapon Jesús baraichi, jei:

—Jesús, neyabara cananta xeinare xua tana neyawenaenexam po matacabitha poxonaē patopeicaename xua jiwi neitorobinexam tsane, jei bapon.

⁴³ Jesús jume nota, jeye:

—Xaniwaicha bara catsipaebatsi, anoxuae tsane cabarū ecaeinchi ichaxota jiwi juntu coyene weiweinathopeiba, peitupanaē nacuatheicha, jei Jesús.

Meje yabara poxonaē Jesús tupa

(Mt 27.45-56; Mr 15.33-41; Jn 19.28-30)

⁴⁴ Poxonaē Jesús cataunxae ducua naetotha, bapoxonaē daxita nacuantha bichocono aitaquiri xua poxonaē mateinyaxae weya, beya yatabopiya. Tres po horabe quirei tsuncuae. ⁴⁵ Poxonaē cataunxae xometo jopa penthiyo, bapoxonaē paparuwa, po paparuwa Nacom pin pia botha ducua, barapo paparuwa nainya bopiya matonta tsitsiqueica. ⁴⁶ Nexata Jesús jume daunweya wawai, jeye:

—Axa, nejumope pire, po jumope tana necatsixaemxae, jei Jesús.

Poxonaē Jesús baxua caunuta, bapoxonaē Jesús tupaicha.

⁴⁷ Soldadomonaē pia pentacaponaein tatsi Roma nacupin, poxonaē bapon baxua taeba, bapoxonaē Nacom wūnaē jaintatsi, jeye:

—Jaina, apara baraponje jopa abe exanaeyo, itara ichamonae yopita xua abe exana, jei bapon.

⁴⁸ Daxita pomonaē xua baxua taeumena baxota, barapomonaē pia bo benawibiya. Poxonaē namtotha enapona, daxita barapomonaē nantacari cuainbobenapona poxoru bichocono ajuntucoyenetane xua Jesús pewisiwatsi. ⁴⁹ Ichitha pomonaē Jesús peyaitae jiwi, irū yabuxino, powaxi Jesús puna dendenatsi Galilea nacua werena, daxita barapomonaē Jesús tajū wetaeumeinyatsi poxonaē ichamonae Jesús bexotsi.

Meje yabara poxonaē Jesús petupaēin ibo muthutha yauxatatabobotatsi

(Mt 27.57-61; Mr 15.42-47; Jn 19.38-42)

⁵⁰ Irurū pebin popona, bapon pewan José, Arimatea tomarapin. Arimatea tomara eca Judea nacuatha. Bapon pentacui xanepanaein. Yawano beta pepoponaēin Nacom peitutha tatsi. José, bapon jiwana caein pomonaē judiomonaē pia pecanamata caitorobi bicheito tatsi. ⁵¹ Barapon José yabara jume cowantsiya wūnaē ewateiba po coyenewa xua poxonaē Mesías patopaetsica pon jiwi itorobiya peewatsinexatsi. Poxonaē pomonaē pecanamata caitorobi bicheito exana poxonaē Jesús bexotsi, baxua José jopa peburūya nacayabara nanta xainaeyo. ⁵² José Pilato siwa poinchi. Pilato wūcatsi Jesús

petɔpaein, José wɔca. ⁵³ José naeto wepichica Jesús petɔpaein. Bapoxonae José mata quiyontabareca barapo pexeinya paparuwatha. Bapoxonae José ibo mɔthɔ iya boya, po mɔthɔ jiwi mɔthɔ tofobobapona. Barapo mɔthɔtha cataunxuae petɔpaein ichɔn jopa boyaetsi. ⁵⁴ José baxua exana po mataqueitha pewɔn penacui xaxainchi matakabi poxonae judiomonae ba weta daxita xua penacuitsiwa pewɔnaeya poxonae jopaena pentaquei seicae matakabi. Barapo pentaquei seicae matakabi imoxoyo jopaena.

⁵⁵ Powaxi Jesús puna dendenatsi Galilea nacua werena, barapowaxi pona mɔthɔtha, petaenexa xua Jesús mɔthɔtha xotsi. ⁵⁶ Poxonae barapowaxi bo benawibiya, bapoxonae nacui wɔnaetajeba petuxueiwan yawa penasiwanno, xua Jesús petɔpaein tsixaxaintajebatsi.

24

Meje yabara poxonae Jesús equeicha asɔ juina exanatsi petɔpae cuiru coyene weya (Mt 28.1-10; Mr 16.1-8; Jn 20.1-10)

¹ Barapowaxi botha cuicuina peseicae matakabitha, Moisés pia peitorobi coyeneya pepaebixae, barapo matakabi yabara.

Poxonae judiomonae pia pentaquei seicae matakabi tatsi yapu caewaba bapoxonae patopa matakabi po matakabi xua copiya ducua cae semanatha. Barapo matakabitha poxonae aena pentha tsina, yabɔxi pona mɔthɔ beya ichaxota Jesús boca. Barapowaxi capona petuxueiwan yawa penasiwanno xua bayatha xaxaintajeba. Barapowaxi cueyabatsi icha yabɔxi. ² Poxonae barapowaxi barapo mɔthɔ beya pata, barapowaxi taerɔcupa xua po ibo panawatha yauxatatababota xua pin ibo panawa barapo ibo mɔthɔ bayatha cou yaupataxubabota. ³ Barapowaxi jojoniya mɔthiya ichitha barapowaxi jopa taeyo xua Jesús pon Pecanamataxeinaein petɔpaein pebocuaewa. ⁴ Barapowaxi yabara najɔntɔ coyene cabenaeca. Jopa yaputaeyo xua exana tsipei jopa taeyo xua Jesús petɔpaein boca. Barapowaxi tsita naitɔtatsi nacueyatabe pebinbe ponbe xua asiya uncuabe, xuano xua yawa paparuwa nama xatatabe, po paparuwa bichocono daedaena. ⁵ Barapowaxi bichocono junuwa, pijunuwi irabe necobareca. Barapo pebinbe barapowaxi baraichi, jeibe:

—¿Eta xua metha petɔpae cuiru coyenewatha panecobompame pon equeicha asɔ barapo petɔpae cuiru coyene weya? ⁶ Xote jopa bocaeyo bapon. Bayatha bapon asɔ petɔpae cuiru coyene weya. Payabara jume nanta xeinare xua bayatha bapon paca tsipaeba poxonae cataunxuae Galilea nacuatha popona. ⁷ Paca jeye: ‘Xan ponxaein Nacom Tananeitapetsin, bewa necaenaetsina pomonaetha pomonae abe peexanaewi. Barapo abe peexanaewi naetotha tɔparucua neexanadutsina. Ichitha equeicha po matakabi acoibibetha asɔn juina neexanaena petɔpae cuiru coyene weya’, paca jei Jesús, jei barapo pebinbe xua barapowaxi tsipaebatsi.

⁸ Nexata barapowaxi baxua jume cui yabara nanta xeinarɔcupa xua bayatha barapowaxi tsipaebatsi, xua Jesús tsipaeba. ⁹ Poxonae barapowaxi mɔthɔ wenawibiya tomara beya, barapowaxi daxita paeba pocotsiwa tane. Jesús pia peitorobiwi tatsi pomonae xua once poyobe barapomonae tsipaebatsi, ichamonaeno tsipaebatsino, pomonae Jesús jume cowɔntatsi. ¹⁰ Powaxi yopita, xua powaxi Jesús pia peitorobiwi tsipaebatsi, ichowayo pewɔn María Magdalena powa Magdala tomarapiwayo, irɔ ichowayo Juana, ichowayo María, Santiago pena tatsi, yawanorɔ ichowaxino powaxi saya napona. ¹¹ Ichitha Jesús pia peitorobiwi tatsi nanta xeina xua barapowaxi jopa xainyeyo, yawano jopa jume cowɔntsichi barapowaxi.

¹² Bapoxonae Pedro mɔthɔ becuinaepoinya. Mɔthɔ tututha tane xua meisa paparuwa boca. Bapon pia bo benawiya. Bapon baxua yabara nanta xeina nawita.

Meje yabara poxonae Jesús pebinbe tsita naitɔta namtotha poxonae Emaús tomara beya ponabe (Mr 16.12-13)

¹³ Barapo matacabitha Jesús pijimonaе tatsi jiwanabe namtotha ecaponabe, siwa ponabe tomara, po tomara pewun Emaús. Barapo tomara eca once po kilómetrobe xua Jerusalén tomara weya. ¹⁴ Baraponbe yabara natsipaebecaponabe namtotha xua mexuaetha exana. ¹⁵ Poxonaе cataunxuae yabara natsipaebecaponabe yawa yabara najume matsontsonobecaponabe, bapoxonaе Jesús imoxoyo caquita uncuatababe yawa naponano. ¹⁶ Bequein baraponbe Jesús tainchi, ichitha baponbe jopa ita cui canaupæet-sibe xua Jesús peyaitaewatsi. ¹⁷ Nexata Jesús yainyaba, baponbe baraichibe, jeye:

—¿Eta xua namtotha yabara pana natsipaebecaponamebe? jei Jesús.

Baponbe juntu wecoyeya naruntababe peyabara natsipaebecaponaexaеbe xua mexuaetha exana. ¹⁸ Ponbe penacueyatsixaеbe caein pewun Cleofas. Bapon Cleofas Jesús jume notatsi, jeye:

—Daxita pomonaе jinompa Jerusalén tomaratha, daxita barapomonaе yaputane xua exana barapo matacabintha. ¿Meisa xam compam jopa yaputaem xua mexuaetha exana? jei.

¹⁹ Nexata Jesús baraibe baponbe, jei:

—¿Eta xua exanara barapo tomaratha? jei.

Baraponbe jume notabe, jeibe:

—Apara pana natsipaebecaponanbe xua jiwi exana, pajan: ‘Xua po coyeneya Jesús Nazaret tomarapin cana exanatsi’, pajan. ‘Pon Nacom peitorobi jume papaеbin, pon peitupanae petsita itutsi coyenein exana Nacom pia peayapusu itorobi coyeneya tatsi’, pajan. ‘Pon xanepanaya pecueicueijein Nacom peitutha tatsi, xuano xua jiwi peitutha tatsi’, pajan. ²⁰ Sacerdotemonaе pata tanecanamataxeinaewi iru pata pecanamata caitorobiwi piraichi Jesús cobe waetabatsi pia Pilato peitorobinexa soldadomonaе xua Jesús tuparucua peexanaenexa tsainchi naetotha. ²¹ Bequein pawunaе ewatan xua Jesús patopa xua peyawenaenexa tsane Israel nacuapiwi xua barapo Israel nacuapiwi panenebiya peexanaenexatsi, ichitha bapon jopa capanenebiyaeyo barapomonaе. Yawano acoibi po matacabibe pu caewa poxonaе Jesús bexotsi. ²² Yabuxi, powaxi xua paxan jiwana pan, barapowaxi pona muthu beya poxonaе aena pentha tsina. Pona ichaxota Jesús boca. Barapowaxi pana tsipaeba xua tane. Daxua pana nenabenaeca exana bichocono. ²³ Barapowaxi pinae jopa taeyo Jesús petupaein. Bapoxonaе pana netsipaeba xua pinae barapowaxi tsita naitutatsi matatsunpiwi. Pinae matatsunpiwi namchi: ‘Bayatha Jesús asu’, jei pinae. ²⁴ Bapoxonaе pata jiwimonaе, barapomonaе jiwana muthu beya pona. Barapomonaе bara tane baxua, xua yabuxi yopita. Ichitha Jesús petupaein jopa taetsi, jeibe xua Jesús tsipaebatsi.

²⁵ Nexata Jesús jume nota baraponbe, jeye:

—Paxam pomonaе jopa peyaputae jiwi pam, xuano xua bewayo pajume cocowuntaponame pocotsiwa bayatha Nacom peitorobi jume pepaеbiwi paeba. ²⁶ Paxam payaputaneme xua Mesías pon Nacom itapeta, copiya bewa peraxa exanaeinchi. Nacom cana exanaena xua bapon patopaena Nacom pia peitorobi nacua beicha xua pexeinaenexa tsane Nacom pia peayapusu itorobi coyenewa tatsi, jei Jesús.

²⁷ Nexata Jesús tsipaeba baraponbe xua daxita i dapo diborontha Jesús yabara paebatsi Nacom Pejume Diwesitha. Copiya matha Jesús yaputane exana po diwesin xua Moisés tina xua Jesús yabara paebatsi. Bapoxonaе equeicha Jesús yaputane exana xua po diwesi Nacom peitorobi jume pepaеbiwi tina, xua Jesús yabara paebatsi.

²⁸ Jesús, iru barapo pebinbe imoxoyo pata tomaratha, po tomara siwa ponaena. Barapo pebinbe naruntababe, ichitha Jesús mexeya maisa pona namto tomara weya. ²⁹ Ichitha baponbe Jesús jume daunweya baraichi, jeye:

—Pana nebaru ecare, apara bayatha tabopiya tsanaicha, quirei tsanaicha apara, jeibe.

Daxota Jesús puna joniya ichaxota baraponbe patopabe xua barponbe pebaru ecaenexa tsainchibe. ³⁰ Nexata poxonaе Jesús baru eca pexaethopaewatha baponbe, bapoxonaе Jesús wecobe pita pan. Paxa barai: “Axa, maisa juntu coyene weiweinan xua pata tana necatsiwam barapo pan”, jei. Bapoxonaе Jesús epa janaxuba pan.

Baponbe catatsibe. ³¹ Poxonae Jesús baxua exana, caena bapoxonae baponbe Jesús yaitainchi. Baponbe yaitaebabe. Bapoxonae Jesús yacuina yameicha aichurucuae tsanaya. ³² Baponbe natsipaebabe, najeibe:

—Maisa jũntũ coyene weiweinatsibe poxonae namtotha naca tsipaebecaponabe. Bapon naca yaputane exanabe xua bapon peyabara paebiwatsi Nacom Pejume Diwesitha, jei baponbe.

³³ Bapoxonae caena yacuina caibe iyabe Jerusalén tomara beya. Baraxotiya Jerusalén tomaratha baponbe caxinabe penacaetutsi jiwi pomonae once poyobe pomonae Jesús pia peitorobiwi tatsi. Irũrũ nanacaetuta pomonae cueyaba xua pomonae once poyobe pia pecueyabiwichi. ³⁴ Barapo penacaetutsi jiwi namchi baponbetha, jeye:

—Apara xainyei. Bara Jesús pon Pecanamataxeinaein, asũ. Apara bapon Jesús Simón tsita naitũtatsi, jei barapo penacaetutsimonae.

³⁵ Nexata baponbe daxita yabara paebabe barapo penacaetutsi jiwitha xua baponbe namtotha cuidubecapoinchibe. Mataũta paebabeno xua baponbe matapainya yaitaebabe xua Jesús yaitaebatsi poxonae Jesús pan epa janaxuba, xuano xua poxonae catatsibeno pan.

*Meje yabara poxonae Jesús tsita naitũta pijimonae Jerusalén tomaratha
(Mt 28.16-20; Mr 16.14-18; Jn 20.19-23)*

³⁶ Poxonae cataunxuae tsipaebabe barapo diwesi, bapoxonae Jesús jemeicha tsita naitũta barapomonae peitabaratha. Jesús jacoba barapomonae, jeye:

—Barabũ Nacom jũntema jinompa paca cana exana, jei Jesús barapo penacaetutsimonae.

³⁷ Barapomonae bichocono nabenaeca, yawa bichocono cuitaya junuwa. Barapomonae nanta xeina xua metha Jesús perowatsi tainchi. ³⁸ Ichitha Jesús barai barapo penacaetutsimonae, jeye:

—¿Eta xua metha junuwiya pana nabenaecame? ¿Eta xua metha ainya unthũton pam? ³⁹ Pana necobe taema, yawa pana netaxu taema. Apara bara xan tsocuaein. Pana nejayabare, yawa pana neyaputaema xua xan pepa jiton. Dowatsi bapana jopa wi ducuae, yawa bapana jopa piwa ducuae. Ichitha aunxuae nama yatsicaewa xaniwaicha pana netaneme xua xan pepa jiton icha paxam paichim, jei Jesús.

⁴⁰ Poxonae baxua Jesús najume weta, nacobe wan itũba, yawa nataxu wan itũba. ⁴¹ Ichitha came awiya barapomonae jopa jume cowũntsiyo poxoru barapo diwesi barapomonae tsita jume xEICATSi yawa barapo diwesi yabara najũntũ coyene cabenaeca exanatsi. Jesús jeye:

—¿Paxam xote penabanaewiyo paxeiname? jei Jesús.

⁴² Nexata barapomonae Jesús catatsi duweiyo, poyo seba. ⁴³ Jesús wecobe pita, yawa xane barapomonae peitũtha tatsi. ⁴⁴ Bapoxonae Jesús namchi barapomonaetha:

—Caena bayatha paca tsipaebatsi poxonae cataunxuae paca barũ ecatsi. Paca jeichiche: ‘Daxita po coyenein neyabara tina, daxita baxuan peneyabara jeixae, bewa necana exanaena. Daxita xua Moisés po diwesintha neyabara tina, bewa necana exanaena. Daxita pocotsiwa Nacom peitorobi jume pepaebiwi neyabara tina, bewa necana exanaena. Daxita xua salmos penaxũnae weixi diwesintha neyabara tina, bewa necana exanaena’, paca jeichiche, jei Jesús.

⁴⁵ Jesús barapomonae yaputane exana xua Nacom Pejume Diwesi paeba. ⁴⁶ Jesús barai barapomonae, jeye:

—Nacom Pejume Diwesitha neyabara jei: ‘Mesías bewa tũpaena, yawa equeicha asũ tsane po matabi acoibibe petũpae coyene cuiru weya. ⁴⁷ Yawano bewa barapomonae Mesías pia pejume cowũnchiwichi bewa tsipaebina daxita nacuantha Nacom Pejume Diwesi tatsi Mesías pia peayapusũ itorobi coyenyatha tatsi. Copiya petamropata notsinexa Jerusalén tomara weya. Barapomonae jei tsane jiwitha: Bewa icha jũntũ

coyene Nacom patsita xeinaem xua bapoxonae Nacom painya nepaca cayabara jũntemainaewa tsane abe painya neexanae cuiru coyenewa, jei tsane barapomonae', jei Nacom Pejume Diwesitha, jei Jesús. ⁴⁸ Equeicha Jesús barai pijimonae, jeye:

—Paxam daxita jiwi patsipaebiname daxita xua pataneme. ⁴⁹ Matauta pataemano xua pacata itorobicaeinchi Nacom pia Pejumope tũnaxũ tatsi xua bayatha Taxa yabara paca tsiwũnae muxu duta. Barapo Nacom pia Pejumope tũnaxũ tatsi yawa patopaena peayapusũ itorobi coyenewa. Paenare xote Jerusalén tomaratha, beya poxonae barapon yawa pacata patopaena pia peayapusũ itorobi coyenewa Nacom pia nacua tatsi wetsica, jei Jesús.

Meje yabara poxonae Jesús athabe juinya Nacom pia peitorobi nacua beicha tatsi (Mr 16.19-20)

⁵⁰ Nexata Jesús pijimonae barũ pona Jerusalén tomara weya, Betania tomara bebarũ iya. Jesús namaũxũ yoicha itaboco beicha yawa tsipaeba Nacomtha xua pijimonae tatsi nexa, xua pijimonae petayawenaenexatsi. ⁵¹ Poxonae cataunxuae Jesús tsipaebuncua Nacom xua pijimonae tatsi nexa, bapoxonae Jesús athabe juinya exanatsi peitaboco beicha, Nacom exana. ⁵² Poxonae Jesús pijimonae tatsi baxua tane, bapoxonae barapomonae Jesús pecoutha tatsi namchi: “Maisa Wanacanamataxeinaein wũnae”, jei. Barapomonae Jerusalén tomara beya jũntũ coyene weiweinaya caibe nawibiya. ⁵³ Barapomonae Jesús pia peitorobi jiwi tatsi Nacom pin pia botha, baxota Nacom jopa juniya wũnae jainteibichi.

Baja Lucas.

Jesucristo Pia Pexeinya Diwesi Jume Tatsi Juan Petinae Diwesi

Meje yabara poxonae Mesías jiwi forotatsi, pon pewun “Pejume”, baraichi

¹ Poxonae cataunxuae daxita nacuan jopa forotsiyo, bapoxonae irurū caena bayatha Mesías popona, pon Nacom Pexanto tatsi, pon pewun “Pejume”, baraichi. Bapon Nacom caena bayatha barū poponeiba. Bapon apara bara Nacom. ² Poxonae aena copiya, bapoxonae bapon caena bayatha Nacom barū popona. ³ Nacom cana exana xua Mesías daxita nacuan foforota. Dapocotsiwa aibi xua yaseicanaya xua pocotsiwa bapon jopa exanaeyo. ⁴ Bapon Mesías, pon “Pejume” baraichi bapon asū cana exana daxita jiwi tsipei bapon ataya xeina peasū coyenewa. Matautano bapon pena juntu coyeneno cana catsiya taexanano jiwi xua jiwi yaputaena po coyene pexainyei coyenewa. ⁵ Icha pecoicha ichi xua jiwi yaweinchi xua beta pejinompaenexa poxonae quirei, bara jata ichi Mesías. Bapon jiwi yaweinchi xua beta xanepanaya pejinaponaenexa poxonae bapon Mesías cuiduba jiwi. Caurimonae pia pentacaponaein tatsi bequein ichichipa xua Mesías peamanayabiwatsi, ichitha caurimonae pia pentacaponaein tatsi jopa itacupaetsi xua Mesías peamanayabiwatsi tsipei bichocono Mesías peayapusūwa xeina.

⁶ Bapoxonae irū Nacom itoroba pebin, pon pewun Juan. ⁷ Bapon patopa xua Mesías peyabara paebinexatsi, po wun xua jei “Pon Nacom itorobica”, jei. Bapon Juan daxita jiwi juntu coyene cui tsacaraba xua jiwi Mesías pewunaeya tatsi, penajuntu cui wunaetsinexa xua daxita jiwi Mesías pejume cowuntsinexa tsainchi. ⁸ Juan apara Mesías aibi. Apara saya pia Mesías wūnae yabara paebichi xua Juan peitorobixaetsi baxua. ⁹ Bapon Mesías patopeica po cae pin nacuathe tsique peyawenaenexa daxita carepaya jiwitha pia pecuidubi coyenewantha.

¹⁰ Bapon popona barapo cae pin nacuathe tsique. Bara bequein bapon exana pia coya barapo nacue, po cae pin nacuathe tsica pona, daichitha barapo cae pin nacuathepiwi jopa Mesías yaitaetsi po coyene xua bapon po cae pin nacuathe tsique forota daxita. ¹¹ Bequein bapon bara pia nacuathe patopeica, daichitha barapo cae pin nacuathepiwi bapon jopa weiweinaya matenta wabichi. Matautano jopa yaputaetsi xua po coyene bapon Mesías apara pon Nacom itoroba. ¹² Ichitha ichamonae pomonae bapon matenta weiweinaya wabatsi xuano xua bapon jume cowuntatsi, barapomonae Mesías cana exana xua po coyeneya barapomonae Nacom piamonae tatsi penaexanaewa tsane. ¹³ Tsipei barapomonae jopa naexanaeyo Nacom pia pexui xua poxoru be jiton coyeneya penaexanumenaponaexae. Matautano barapomonae jopa naexanaeyo Nacom pia pexui xua poxoru pebin peichichipaexae xua pepichiwa piowa. Matautano barapomonae jopa naexanaeyo Nacom pia pexui xua poxoru coxiyūn peichipaexae xua pexeinaewa pia pexui. Saya jame barapomonae Nacom pia pexui tatsi naexana, tsipei Nacom cana exana baxua.

¹⁴ Barapon Mesías pon pewun “Pejume”, baraichichi, bapon poxonae naexana po cae pin nacuathe tsique bara bapon yatsicaya pepa jiton. Matautano naca barū popona bapon. Bapon wun ununatatsi “Jesús” baraichichi. Matautano bapon pejuntu coyene wetsina bichocono jiwi antobetsi. Matautano bapon xainyeya pepaebin. Matautano paxan pacui tan xua Jesús exaneiba pia pexeinya peayapusūwatha po pexeinya peayapusūwa Jesús Paxa catatsi. Bapon Nacom Pexanto tatsi, bara yatsicaya compa tatsi pepa Pexanto. ¹⁵ Juan yabara paeba, Jesús yabara paebatsi. Juan jeye: “Bara barapon apara pon bayatha yabara paeban xua poxonae janje: ‘Pon cotacaya patopa xua xan tsiwana patopan, bapon jame bichocono peainya cuin, beyacaincha xan. Tsipei bapon caena bayatha popona poxonae xan aibin xua poxonae abū cataunxuae jopa naexanaeyo’, janje”, jei Juan.

¹⁶ Bapon Jesús naca cata daxita pia peyaputae coyenewan. Jopa juniya amanaya naca catsiyo baxuan, xua pocotsiwa nantawenonatsi jüntema watsita jinompaenexa tsane bapon. ¹⁷ Moisés naca cata Nacom pia peitorobi coyenewan tatsi. Baxuan bichocono jopa juniya ayapubeyo. Ichitha Jesucristo, pon “Mesías” baraichi xua pocotsiwa naca cuiduba xua pinae Nacom jopa juniya antobeyo jiwi, xuano xua pocotsiwa naca cuiduba bara baxua yatsicaya pexainyei jume. ¹⁸ Dapon aibi pon Nacom petaewatsi. Nacom Pexanto tatsi, pon yatsicaewa compa tatsi bapon naca cana exana xua Nacom wayaputaewatsi, paxa imoxoyo pebarū poponaexaetsi.

Meje yabara poxonae Juan pon jiwi Pebautisabin Jesucristo yabara cueicueijeichi (Mt 3.11-12; Mr 1.7-8; Lc 3.15-17)

¹⁹ Judiomonae pomonae ena Jerusalén tomaratha barapomonae sacerdotemonae itorobatsi irurū levitamonaē itorobatsi Juan beya, xua Juan peyainyabinexatsi xua pejeinexatsi: “¿Xam jintamūmda?” pejeinexatsi. ²⁰ Juan beta nayabara paeba, jeye:

—Xan Mesías apara aibin, pon Nacom itorobicaena, pon wanaca capanenebiwa tsane, jei Juan.

²¹ Nexata equeicha Juan yainyabatsi, jeichichi:

—¿Metha nexata xam jintamūmda? ¿Bara xam bapom pon Nacom peitorobi jume pepaebim pon pewun Elías, pon bayatha tupa? jei barapomonae.

Juan jume nota, jeye:

—Xan bapon apara aibin, jei.

Equeicha Juan yainyabatsi, jeichichi:

—¿Nexata jintam metham? ¿Xam bapom pon Nacom peitorobi jume nepaebim pon bewa patopeicaena juinya pata tanecuidubinexa tsane Nacom Pejume Diwesi? jei barapomonae.

Equeicha Juan jume nota, jeye:

—Jume, xan apara aibin dapon, jei Juan.

²² Nexata daxita barapomonae Juan baraichi, jeye:

—¿Eta pom metham? Tsipei xua pata tanejume notsiwam pata tha xuya tsipaebichi pomonae pana nejume caitoroba. ¿Etabe pana nejumichim tsane xua jinya coutha nenayabara paebiwam? jei barapomonae.

²³ Nexata Juan jume nota, jeye:

—Xan bapon aparan pon wawan ichaxota ira xuepana susato tsurucuae nacua beya, xua jan: ‘Patsi najuntū cui coyene wūnaere, pon jiwi pia pepa Pecanamataxeinaeinchi nexa pia pepatopae wūnaeya tsane’, xua jan ponxaein xua wawan ira xuepana susato tsurucuae nacua beya. Bayatha Isaías pejume diwesitha taneyabara jume cui wūnae tsiwanaya paebixae pon Nacom peitorobi jume pepaebim, jei Juan.

²⁴ Daxita pomonae Juan barū cueicueijeichi, barapomonae fariseomonae itoroba.

²⁵ Daxita barapomonae Juan yainyabatsi, jeichichi:

—Icha xam bapon Mesías aibim xuano xua icha Elías aibim, yawa icha xam bapon aibim pon Nacom peitorobi jume nepaebim, ¿nexata jintam cacui itoroba xua nebautisabiwa jiwi? jei barapomonae.

²⁶ Juan jume nota, jeye:

—Xan meratha bautisaban, ichitha ichun beta exanaena beyacaincha xan. Bapon bara bequein painyamonae pia xantha tatsi popona ichitha bapon jopa payaitaem.

²⁷ Bequein bapon nepuna patopaena, ichitha pocotsiwa bapon exana bichocono ainya cui beyacaincha pocotsiwa exanan. Bichocono pin ura tsita xeinan xua tataxu mū isanaxubiwa tsane pia penataxu xatatsiwa tatsi, jei Juan.

²⁸ Daxita baxuan Juan yainyabatsi ichaxota po tomara pewun Betania. Barapo tomara eca icha pocotsiwa xometo weecoina xua icha muxunenetha eca Jordán mentha. Barapo muxunenetha Juan bautisaba jiwi.

Meje yabara xua poxonae Jesús pon “Cordero”, baraichichi

²⁹ Icha mataqueitha Juan tane, Jesús tainchi xua Juan pexainya tarenatsi. Bapoxonae Juan jiwitha jeye: “Incane pataema pon pejuntũ coyene xeicaein pon Nacom itorobica, pon ‘Cordero’, baraichichi xua oveja pebto penũn. Apra bapon pon jiwi petsitupaewa tsainchi xua abe pia peexanae cuiru coyenein tatsi icha poxonae ovejiyo ichi poxonae tsitupa jiwi abe pia peexanae cuiru coyenein tatsi. ³⁰ Bara bapon apra pon bayatha yabara paeban poxonae janje: ‘Pon cotacaya patopa xua xan tsiwũna patopan, bapon jame bichocono peainya cuin, beyacaincha xan. Tsipei bapon caena bayatha popona poxonae xan aibin xua poxonae abũ cataunxuae jopa naexanaeinyo’, janje. ³¹ Xan copiyatha jopa yaputaeyinyo xua Jesús bapon barapara Mesías, pon icha wũn Cristo, pon Nacom itorobica. Ichitha xan patopan tabautisabinexa meratha Israel piamonae susato saineiwi xua barapomonae bapon peyaputaewa tsainchi”, jei Juan.

³² Juan yawa namchi, jeye: “Poxonae bapon bautisaban bapoxonae tan Nacom pia Pejumope tũnaxũ tatsi xua peitaboco weruneica xua be topiboto yaruneica. Barapo Nacom pia Pejumope tũnaxũ tatsi, bapon pexantha tapatopatsi. ³³ Xan cataunxuae bapoxonae xaniwaicha jopa yaitaeyinyo bapon. Ichitha pon xua necui itoroba xua jiwi bautisaban meratha, nejei bapon: ‘Taename tajumope tũnaxũ xua be topiboto tsecae xua peitaboco weruneica, po tajumope tũnaxũ bapon pia xantha tapatopatsi. Poxonae baxua taename bapoxonae yaputaename xua barapo pebin apra pon jiwi pebautisabiwa tsainchi tajumope tũnaxũtha. Bapon barompaya pia pebautisabi coyenewa exanaena xua poxonae barapo tajumope tũnaxũ catsibina pomonaetha pomonae piamonaethaxae. Barapoxonae barapo tajumope tũnaxũ barapomonae yanaba jinompaeinchi’, jei Nacom. ³⁴ Bapoxonae bapon yaitan xua deta cou apra Mesías, yaitama tan xua poxonae bayatha Nacom netsipaeba. Daxota paca tsipaebatsi xua bapon barapara Nacom Pexanto tatsi”, jei Juan jiwitha.

Meje yabara xua poxonae Jesús itapeta pomonae copiya pomonae Jesús pijimonae tatsi

³⁵ Icha mataqueitha equeicha Juan pon jiwi Pebautisabin pecoutha patopa xuano xua pebinbe nacueyatabe puna poinchi ponbe xua pia pepuna ponaewichi jiwanae tatsi. ³⁶ Poxonae Juan tane xua Jesús dawerena ichaxoyo Juan dena, bapoxonae Juan jeye xua Jesús yabara jeichi:

—¡Pataema apra bapon pon ‘Cordero’ baraichi xua oveja pebto penũn pon Nacom itorobica xua petsitupaenexa jiwi abe pia peexanae cuiru coyenein tatsi! jei Juan.

³⁷ Barapo pebinbe ponbe Juan pia pepuna ponaewichi jiwanae tatsi, baraponbe Juan jume tainchibe xua Juan baxua paeba. Bapoxonae barapo pebinbe Jesús puna poinchibe.

³⁸ Nexata Jesús napatomeicha necota caibeya yawa tanebe xua barapo pebinbe Jesús puna poinchibe. Bapoxonae baponbe Jesús yainyaba, jeye:

—¿Painya eta xuatsi?

Jesús jume notatsibe baponbe, jeibe:

—Pon jiwi Necuidubim, ¿exota poponame? jeibe.

³⁹ Jesús jume nota baponbe, jeye:

—Anetha, matha pataema, jei Jesús.

Nexata napuna ponabe yawa natanebe ichaxota Jesús popona. Barapo mataqueitha naecabe ichaxota Jesús popona. Jopa nawiyaebe tsipei xometo tabopiya tsanaichaba.

⁴⁰ Ponbe Juan pejume taexaetsibe xuano pepuna ponaexaetsibe Jesús, caein pewũn Andrés, Simón Pedro peweicho tatsi. ⁴¹ Andrés copiya matha peweicho wenawenei pon pewũn Simón. Andrés barai peweicho, jeye:

—Paxan pacaxinan pon pewũn Mesías, jei Andrés. (Barapo wũn yabara caunuta xua jei “Cristo”, jei.)

⁴² Bapoxonae Andrés peweicho capona, Simón capoinchi ichaxota Jesús uncu. Poxonae Jesús tane xua poxonae Simón tainchi, jeye:

—Xam Simón Juan pexanto tatsim. Ichitha xam anoxuae newun Cefas tsane, barapo wun Cefas wun jei: 'Iboto', jei, jei Jesús. Seicaya griego jume wun 'Pedro', jei barapo wun iru jei: 'Iboto', jei.

Meje yabara poxonae Jesús Felipe wabatsi, iru Natanael wabatsi

⁴³ Bapoxonae icha mataqueitha Jesús ichichipa xua peponaewa Galilea nacua beya. Bapoxonae Jesús, Felipe caxinatsi, yawa jeichichi:

—Nepuna ponde, jei Jesús.

⁴⁴ Barapon Felipe Betsaida tomarapin, po tomaratha iru Andrés popona iru Pedro.

⁴⁵ Nexata Felipe Natanael wenaweneichi, yawa Felipe barai bapon, jeye:

—Pebin pacaxinan, pon bayatha Moisés yabara tsiwuna cui tina pia peitorobi diwesi jume coyenewatha. Matautano pon bayatha iruru Nacom peitorobi jume pepaebiwi yabara tsiwuna cui tina. Bapon apara Jesús, José pexanto tatsi. Bapon Jesús pon Nazaret tomarapin, jei Felipe.

⁴⁶ Natanael jeye:

—Dapon pebin pon pejuntu coyene xanepanaein Nazaret tomara weya bapana jopa pona. Tsipei daxita barapo tomarapiwi apara peajuntacuiruyapubewi, jei Natanael.

Felipe jume barai, jeye:

—Anetha incane matha taema, jei Felipe.

⁴⁷ Poxonae Jesús tane xua Natanael imoxoyo caquita pona, Jesús jeye:

—Patopa pebin pepa israelmonaepin, pon jopa jiwi pemuxuitorobin, pon xaniwaicha pejume cowuntsin Nacom, jei Jesús.

⁴⁸ Nexata Natanael Jesús yainyabatsi. Natanael jeye:

—¿Eta ichim xua taneyaitaewam? jei.

Jesús jume nota, jeye:

—Bayatha catainchi poxonae higuera nae tabacatha uncuame poxonae cataunxuae Felipe jopa cawabiyo, jei Jesús.

⁴⁹ Bapoxonae Natanael jume nota, jeye:

—Pon jiwi Necuidubim. ¡Apara xam bara Nacom Pexantom! ¡Apara bara xam Israel nacuamonae itorobiya pia pepa Neewatsim! jei Natanael.

⁵⁰ Jesús jume nota, jeye:

—Xam nejume cowuntame poxonae xua saya catsipaebatsi xua cacataewatsi higuera naetha. Ichitha bexa necotsiname xua exanaein pocotsiwa pexeinya peitupanae tsita itatsiwan, beyacaincha xua saya aunxuae catsipaebatsi, jei Jesús.

⁵¹ Equeicha Jesús jeye:

—Xaniyan paca tsipaebatsi paxam pataename xua Nacom peitaboco saranaxuicaena. Matautano pataename matatsunpiwi xua jujuneibicaena xote tsique taxantha pia taneyawenaetsi. Matautano pataename xua equeicha caibe jujuneibiyaena taxainya weicha, ponxaein Nacom Tananeitapetsin, jei Jesús.

2

Meje yabara poxonae jiwi tsinacaetuta pexaewa Caná tomaratha xua penabanaenexa xua poxonae pebin pita pecotsiwa

¹ Poxonae acoibi po matabibibe yapucaewa, bapoxonae iruru pexaewa tsinacaetuta Caná tomaratha xua Galilea nacuatha xua pebin pecotsiwa pepichixae. Jesús pena tatsi iru baxota natane pewabixaetsi. ² Iru Jesús wabatsi, iru pijimona tatsi wabatsi xua penaponaewa tsane barapo pexaewa petsinacaetutswatha xua poxonae pebin pecotsiwa pita. ³ Vino mera omeicha mene weranapenta tsipei daxita jiwi apa. Daxota Jesús pena baraichi, jeye:

—Nama equeicha ameneibi vino mera omeicha mene weranapenta, jei Jesús pena tatsi.

⁴ Jesús jume nota, jeye:

—Ena, abũ bexabũ abũ jopa yabara neyainyabinde baxua. Canta daxua aichica xua petsita itũbiwa taexanaewa, jei Jesús.

⁵ Bapoxonae barapowa barai pomonaetha pomonae pexaewa carena tsaibi, jeye:

—Moya paexande xua pocotsiwa bapon paca itoroba, jei barapowa.

⁶ Baxota iratha ena seis po juruwatobe sayawan. Barapo pin juruwaton barompaya cae juruwatontha tsiniya cincuenta po mera bosibũ matabũxũyobe tutu canaũpa. Icha juruwatontha tsiniya setenta po mera bosibũ matabũxũyobe tutu canaũpa. Barapo juruwatontha ba judiomonae mene yaebeiba xua barapo merantha penacobe quiateib-inexa xua daxota jopa Nacom petsita najũntũ coyene taxobeibinexatsi. ⁷ Pomonae pexaewa carena tsaibi barapomonae Jesús barai, jeye:

—Barapo saya juruwatontha pawũnbare mera, jei.

Bapoxonae barapomonae barapo juruwaton wũnba. ⁸ Bapoxonae Jesús barai, jeye:

—Anoxuae barapo juruwaton tsiwixi pajiwana mene wenore xua po mera equeicha vino mera exanan. Pacaponare pontha pexaewa mata canabane, jei Jesús.

Daxota barapomonae bara baxua exana xua Jesús peitorobixae. ⁹ Pon mata canabane pexaewa, bapon mene pana barapo vino mera, po vino mera copiya saya mera. Ichitha bapon jopa yabara yapuraeyo xua barapo vino mera xua eta werena metha mene capona. Saya meisa pomonae mene eepacaponae barapo juruwatontha barapomonae yaputane xua barapo juruwatontha jiwana mene nota xua po mera vino mera naexana. Bapoxonae pon mata canabane pexaewa waba, pon pecotsiwa pita bapon wabatsi. ¹⁰ Bapon barai, pon pecotsiwa pita baraichi, jeye:

—Daxita jiwi ba poxonae aena copiya matha apata po vino mera mene xeica. Poxonae jiwi ba wenaxuba po vino mera xeica, bapoxonae ba barapo jiwi ba equeicha apatatsi po vino mera be conotha xaexaeca. Ichitha nama xam icha coyene exaname. Po vino mera be conotha mene xaexaeca matha copiya apatame jiwi barapo vino mera. Poxonae barapo vino mera jiwi wenaxuba po vino mera be conotha mene xaexaeca bapoxonae apatame po vino mera bichocono xeica, jei bapon.

¹¹ Baxua xua Jesús exana Caná tomaratha xua Galilea nacuatha. Barapo pexeinya petsita itũtsi coyenewa poxonae xua aena copiya matha exana pia peayapusũwatha. Poxonae baxua Jesús pijimonae cui tainchi, Jesús jume cowũntatsi pijimonae.

¹² Poxonae baxua pexaewa najain weta bapoxonae Jesús pona Capernaum tomara beya. Bapon pena barũ pona yawa peweicho jiwi barũ pona, mataũtano pijimonae barũ pona. Baxota Capernaum tomaratha daxita Jesusbarũ be caentacabiyoobe ena.

Meje yabara poxonae Jesús aisowa benapuna torobabiya pomonae Nacom pin pia botha pecaenaetsiwi

(Mt 21.12-13; Mr 11.15-18; Lc 19.45-46)

¹³ Tsipei poxoru imoxoyo barapo matababi tsaneba xua Pascua wũn matababin daxota Jesusbarũ Jerusalén tomara beya pona. Barapo Pascua wũn matababin, po matababin poxonae judiomonae yabara nanta xeina xua pinae caena bayatha pia pamo susato jiwi tatsi panenebiya Egipto nacua weya. ¹⁴ Baxota Jesús caxina Nacom pin pia botha pomonae baxota caenaeta buey duweimonae, yawa ovejamonaeno yawa topibomonae caenaetano. Mataũtano Jesús tane xua pomonae ena pexaethopaewantha ichaxota paratixi nantiya nacatsiba jiwi. ¹⁵ Poxonae Jesús tane barapomonae, Jesús bapoxonae exana xua pocotsiwa xota cuainta xua duwein perũ mũto. Daxita barapomonae Jesús Nacom pin pia bo wenapuna torobabiya. Yawano Jesús muxuna itaweta xua barapomonae piawanxae, bueymonaeno, ovejamonaeno. Pomonae xua ena pexaethopaewantha xua ichaxota nantiya nacatsiba paratixi Jesús iratha tabebai paratixi, yawa irabe tayebabareca torobabiya pexaethopaewan. ¹⁶ Pomonae baxota caenaeta topibo, Jesús barai barapomonae, jeye:

—¡Daxita baxuan panore barapo Nacom pin pia bo weya pocotsiwan pacaenaetame!
¡Barapo Nacom pin pia bo jopa pacana exanaeinde xua be pocotsi bo jiwi ichaxota caenaeta pexaewa! jei Jesús.

¹⁷ Bapoxonae Jesús pijimonae tatsi yabara jume cui nanta xeinarucupa xua Nacom Pejume Diwesitha namchi xua Cristo yabara jeichichi xua jeye: “Yabara nejuntũ coyene yũca xua yabara nanta xeinan xua pocotsiwa Taxa pia pin pia botha tatsi xeina. Daxota jiwi necaseba”, jei Nacom Pejume Diwesitha xua Cristo yabara paebatsi.

¹⁸ Nexata judiomonae Jesús yainyabatsi, jeye:

—¿Eta po pexeinya petsita itutsi coyenewa pana netsita itutsiname? Bapoxonae xain payaputaein xua bara cou xam deta xeiname Nacom pia peitorobi coyenewa tatsi xua daxota jiwi cui itawetame Nacom pin pia bo tatsi weya, jei.

¹⁹ Jesús jume nota, jeye:

—Icha barapo bo weraweraca paexanaename, equeicha acoibi po matabibetha beta caewa xanebin, jei Jesús.

²⁰ Nexata barapo judiomonae Jesús tsipaebatsi, jeye:

—Jiwi barapo Nacom pin pia bo tatsi acaba ainya wei, cuarenta y seis po weibetha nacobe weta. ¿Eta pocotsiwa baxua paebame xua jinya saya acoibi po matabibetha equeicha wũnae exanaetsi? jei judiomonae.

²¹ Po bo xua Jesús yabara paeba apara xua nayabara paeba pia pepon. ²² Daxota poxonae Jesús equeicha asũ juina petũpae cuariyatha Jesús pijimonae yabara jume cui nanta xeinatsi xua bayatha Jesús paeba. Daxota jume cowũnta Nacom Pejume Diwesi. Yawano Jesús jume cowũntatsi pocotsiwa xua paeba.

Meje yabara xua po coyene Jesús daxita jũntũ coyene yaputane jiwi

²³ Poxonae Jesús Jerusalén tomaratha popona xua Pascua wũn matabibetha bapoxonae pin bicheitomonae Jesús jume cowũntatsi. Daxota barapo bicheiton jume cowũnta tsipei tane Jesús pia pexeinya petsita itutsi coyenewan tatsi. ²⁴ Jesús jopa yabara jume cowũntsiyo barapomonae bequein jume cowũntatsi taetha. Tsipei Jesús daxita jũntũ coyene yaputane jiwi xua ainya jũntũ coyene pexeinaewa. ²⁵ Daxota jopa nantawenonaeyo xua ichamonae Jesús petsipaebiwatsi icha jiwi yabara. Tsipei bapon Jesús daxita jũntũ coyenein yaputane jiwi.

3

Meje yabara poxonae Nicodemo Jesús tsipaebatsi

¹ Irũrũ pebin popona pon fariseomonaepin, pon pewũn Nicodemo. Bapon judiomonae canamataxeinatsi. ² Bapon Nicodemo merawi Jesús siwa poinchi, yawa Jesús jeichichi:

—Pon jiwi Necuidubim, bara paxan payaputan xua Nacom caitoroba xua jinya pata tanecuidubiwam tsane. Tsipei ichũn jopa itacũpaetsi xua pexeinya petsita itutsi coyenewan peexanaewa Nacom pia peayapusuwatha tatsi icha Nacom jopa yantsiyo bapon icha be xua poxonae ichim poxonae xua exaname Nacom necayantsixae, jei Nicodemo.

³ Nexata Jesús Nicodemo jume notatsi, Jesús jeye:

—Xaniyan catsi paebatsi. Pon equeicha jopa caewa naexanaeyo xua pena jiton penaexanaenexa, bapon jopa itacũpaetsi xua Nacom piamonae tatsi penaexanaewa pomonae Nacom itorobiya peewatsixae, jei Jesús.

⁴ Nicodemo Jesús jume epa notsiya yainyabatsi. Nicodemo jeye:

—¿Eta bichi xua pebin pon bayatha pinyo xua equeicha caewa pena jiton naexana? ¿Metha bara itacũpatsi xua pena equeicha tsiperũ wepatopa xua equeicha caewa penaexanaenexa pena jiton? jei Nicodemo.

⁵ Jesús jume nota, jeye:

—Xaniyan catsipaebatsi. Pon meratha jopa bautisabichi xuano xua icha jopa xeinaeyo Nacom pia Pejumope tũnaxũ tatsi po jumope tũnaxũ bapon icha jũntũ coyene xeina pecana exanaenexatsi, bapon jopa itacũpaetsi xua Nacom piamonae tatsi penaexanaewa pomonae Nacom itorobiya peewatsixae. ⁶ Pomonae pena jiwi tsiperũ wenaexana bara jiwi coyeneya yacuiya naexana. Pomonae naexana Nacom piamonae tatsi barapomonae Nacom pia Pejumope tũnaxũ tatsi cana exana xua barapomonae pexeinaewa icha jũntũ

coyene. Barapomonae yacuiya naexana Nacom piamonae tatsi tsipei exana pocotsiwa Nacom pia Pejumope t̄nax̄ tatsi itoroba. ⁷ Jopa naj̄nt̄ coyene cabenaecaeinde xua tacatsipaebiwatsi xua tacajeiwatsi: ‘Daxita jiwi bewa pena jiwi naexanae equeicha’, tacajeichiwatsi xua. ⁸ Joibo ba pona ichaxota ichichipa peponaewa. Joibo busi taneme, ichitha jopa yaputaem xua ichaxota weponarena, yawa jopa yaputaem xua xota ponaena. Icha jiwi ichi xua jopa taeyo joibo ichitha tane xua joibo bubujei barichi jiwi jopa taeyo Nacom pia Pejumope t̄nax̄ tatsi. Saya jiwi yaputane xua icha jiwi j̄nt̄ coyene xeica cana exainchi barapo Nacom pia Pejumope t̄nax̄ tatsi, jei Jesús.

⁹ Nexata Nicodemo equeicha Jesús yainyabatsi, jeye:

—¿Eta metha bichi Nacom pia Pejumope t̄nax̄ tatsi? jei Nicodemo.

¹⁰ Jesús jume barai, Nicodemo jume baraichi, Jesús jeye:

—Xam pon daxita neyaputaem israelmonae pexantha tatsi yawa pon jiwi necuidubim barapomonae pexantha tatsi. Bequein barapo jitom ichitha jopa baxua yabara yaputaem xua tacatsipaebiwatsi. ¹¹ Xaniyan catsipaebatsi xua paxanbe, Juan, pon jiwi Pebautisabin, ir̄ xan Jesús paca tsipaebatsi xua pocotsiwan payaputanbe. Matautano paxanbe bara yatsicaewa pata paebinbe xua patanbe bayatha. Ichitha paxam pomonae judiomonae pam jopa yabara pana nejume cow̄ntsim pocotsiwa paxanbe paca tsipaebatsi. ¹² Icha jopa pana nejume cow̄ntsim pocotsiwan xua barapo cae pin nacuathe yabare paca tsipaebatsi bara paichim jopa pana nejume cow̄ntsi paem icha yabara paca tsipaebichipatsi pocotsiwan Nacom pia peitorobi nacua beicha tatsi.

¹³ “Dapon aibi pon peitaboco beicha pona Nacom beicha xua equeicha caewa patopeica bara wetsica. Daxota jiwi jopa yabara yaputaeyo Nacom pia peitorobi nacua beicha tatsi. Saya meisa jame xan ponxaein Nacom Tananeitapetsin patopeican tanacua wetsica daxota yabara yaputan Nacom pia peitorobi nacua beicha tatsi. ¹⁴⁻¹⁵ Caena bayatha ira xuepana susato tsurucuae nacuatha, pinmonae werapa poxoru jomon sinebatsi. Daxota Moisés penainto asiya duta xua be jomo canaxobiya exana. Pomonae jomon sinebatsi, poxonae barapomonae tane barapo penain jomo, bapoxonae jopa werapaeyo. Icha Moisés ichi bara neichi tsane jiwi. Xan ponxaein Nacom Tananeitapetsin, ichamonae asiya naetotha t̄parucua neexanaena. Barichi tsane pomonae yabara nejume cow̄ntsina po coyene xua xan naetotha tatsit̄paewa tsane xua barapomonae abe pia peexanae cuiru coyenein tatsi, barapomonae jopa weraweracae tsane. Barapomonae xeinaena peaj̄nt̄yapus̄wa, po peaj̄nt̄yapus̄wa ataya tsiteca”, jei Jesús.

Meje yabara xua Nacom daxita jiwi bichocono antobetsi barapo cae pin nacuathe

¹⁶ Equeicha Jesús nayabara paeba poxonae Nicodemo tsipaebatsi. Jesús jeye: “Nacom antobe bichocono daxita carepaya jiwi xua barapo cae pin nacuathe. Daxota Nacom Pexanto itoroba pon yatsicaya compa tatsi. Pon Nacom Pexanto tatsi jume cow̄ntatsi, bapon jopa weraweracae tsane. Bapon peaj̄nt̄yapus̄wa xeinaena, po peaj̄nt̄yapus̄wa ataya tsiteca. ¹⁷ Nacom Pexanto jopa itorobicaeyo xua saya barapo cae pin nacuepiwi atene peexanaenexatsi xua penatsicuentisixae xua abe peexanaexae Nacomtha. Saya apara jame Nacom Pexanto itorobica xua jiwi pecapanenebiyaenexatsi penatsicuentisawa weya.

¹⁸ “Pon Nacom Pexanto tatsi yabara jume cow̄ntatsi, bapon jopa Nacom tsitatsi xua atene peexanaewa tsainchi xua penatsicuentisixae xua abe peexanaexae Nacomtha. Ichitha nama pon Nacom Pexanto tatsi jopa yabara jume cow̄ntsichi bapon Nacom bayatha tsitatsi xua atene peexanaewatsi tsainchi xua penatsicuentisixae jopa peyabara jume cow̄ntisixae Nacom Pexanto tatsi, pon bara compa. ¹⁹ Pomonae jopa Nacom Pexanto tatsi yabara jume cow̄ntichi, barapomonae Nacom bayatha tsitatsi xua atene peexanaewatsi xua penatsicuentisixae xua abe peexanae cuiru coyenein peexanaexae. Tsipei poxonae Nacom Pexanto tatsi patopeica po cae pin nacuathe tsique, barapomonae ichichipa exana abe peexanaewan beyacaincha xua peexanaewa pocotsiwa Nacom itoroba. ²⁰ Tsipei daxita pomonae abe peexanaewi barapomonae Nacom Pexanto tatsi aichaxaibichi daxota jopa imoxoyo caquita ponaetsi bapon. Barapomonae jopa

ichipaeyo xua peyaputaewatsi, xua Nacom Pexanto tatsi peyaputaewa xua pocotsiwa barapomonae abe exana. ²¹ Ichitha pomonae pejume cowuntsiwi, pomonae yatsicaewa beta xanepanaya exana, barapomonae Nacom Pexanto tatsi imoxoyo caquita poinchi. Tsipei barapomonae ichichipa xua peyaputaewatsi xua Nacom Pexanto tatsi peyaputaewa tsane xua pocotsiwa barapomonae wuna peexanaexae, xua pocotsiwa Nacom peitorobixae”, jei Jesús Nicodemotha poxonae nayabara paeba.

Meje yabara poxonae Juan pon jiwi Pebautisabin equeicha Jesús yabara cueicueijeichi

²² Poxonae Jesús najume weta xua poxonae Nicodemo tsipaebatsi, bapoxonae pirapae Jesús pijimonae baru pona Judea nacua beya. Barapo nacuaatha Jesús ainya matababintha pijimonae baru popona. Matautano baxota Jesús pijimonae cui itoroba xua jiwi pebautisabiwa tsainchi. ²³ Iruru Juan bautisaba jiwi Enón tomaratha, po tomara eca ichaxota imoxoyo po tomara pewun Salim. Tsipei baxota menein nawita. Pinmonae Juan itata patatsi, yawa Juan bautisaba barapomonae. ²⁴ Juan baxua pewunaeya exana xua poxonae jiwi pecubi botha etatsi.

²⁵ Bapoxonae pomonae Juan pia pepuna jinompaewichi tatsi iru judiomonaeno, barapomonae yabara baru najume matsontsonobatsi pebautisabi coyenewa. ²⁶ Barapomonae Juan siwa poinchi xua Juan yabara peyainyabinexa tsainchi baxua. Jeye Juantha:

—Pon jiwi Necuidubim, incane matha taema. Pon caniwi cabaru popona Jordán mentha xua icha muxunene beya, pon bayatha yabara pana netsipaebame, bapon nama anoxuae bautisabauya jiwi yawa bapon puna poinchi daxita jiwi, jei Juan pijimonae tatsi xua Jesús yabara paebatsi.

²⁷ Nexata Juan barai barapomonae, jeye:

—Jiwi ba jopa xeinaeyo icha Nacom jopa catsiyo. ²⁸ Paxam bara yatsicaewa pana nejume taneme xua paca jeichi: ‘Xan dapon aibin Mesías’, jan. ‘Apara bapon pia pewunaeya tatsi Nacom neitoroba’, jan. ²⁹ Poxonae ba pebin pecotsiwa pita bapon pona yabuyo pia botha tatsi. Pon piowa pepichixae bapon pia jiton tatsi bichocono juntu coyene weiweina xua bapon piowa pepichixae poxonae jume taeuncua xua pia jiton tatsi piowa pita. Icha pebin cana ichichi pia jiton, bara juta ichin Jesucristotha anoxuae. Bichocono juntu coyene weiweinan tsipei daxita jiwi Mesías puna poinchi. ³⁰ Bapon bewa mataropeicha ainya cui naexanaponae jiwi peitatha tatsi. Xan bewa jopa ainya cui naexanaponaein tsane jiwi peitatha tatsi, jei Juan.

Meje yabara poxonae Juan yabara paeba pon peitaboco wetsica pona

³¹ Equeicha Juan piamonae barai, jeye:

—Pon peitaboco wetsica pona, bapon jame bichocono peyaputaein beyacaincha xua ichamonae. Pon xua po irathepin bapon apara saya jiton. Bapon saya yabara cueicueije pocotsiwa po irathe yabara. Ichitha pon peitaboco wetsica pona, bapon daxita canamataxeina. ³² Bapon bequein jiwi yabara tsipaebatsi pocotsiwa xua bayatha tane peitabocotha, xuano xua pocotsiwa bayatha jume tane peitabocotha, ichitha jiwi jopa jume cowuntsiyo pocotsiwa bapon paeba. ³³ Icha pebin jume cowunta pocotsiwa paeba pon peitaboco wetsica peponaexae xua Nacom yabara paebatsi, barapon tsita itapeinya xeina ichamonaetha, xua apara Nacom bara xaniwaicha pepaebin. ³⁴ Pon xua Nacom itoroba bara bapon cueicueije Nacom pejumein tatsi, tsipei Nacom jopa juniya nacana jumope tunaxu catsiyo xua bapon peyawenaewa tsainchi. ³⁵ Nacom bichocono antobe Pexanto. Pexanto cata peyapusu itorobi coyenewa xua bapon daxitan pecanamataxeinaewa tsane. ³⁶ Pon Nacom Pexanto tatsi yabara jume cowuntinchi, bapon peajuntuyapusuwa xeinaena, po peajuntuyapusuwa jopa bapana weraweracaeyo. Ichitha pon Nacom Pexanto tatsi jopa yabara jume cowuntichi, bapon jopa xeinae tsane barapo peajuntuyapusuwa. Nama bapon Nacom cana exanaena xua bapon bichocono atene peexanaewa tsainchi, jei Juan.

4

Meje yabara poxonae Jesús tsipaeba powayo Samaria nacuapiwayo

¹ Jesús jume tane xua jiwi tsipaeba fariseomonaetha xua jeye: “Jesús pinmonae xeina, pomonae pia pepuna ponaewichi. Jesús toxeinchiya jopa juniya bautisabiyo jiwi beyacaincha xua poxonae Juan bautisaba jiwi”, jei jiwi fariseomonaetha. ² (Daumetha Jesús apara jopa bautisabiyo. Apara jame Jesús pijimonae tatsi bautisaba jiwi.) ³ Poxonae Jesús jume yaputane xua jiwi paeba fariseomonaetha, bapoxonae Jesús pijimonae Judea nacua webaru warapiya. Caibeya warapa Galilea nacua beya.

⁴ Poxonae warapa Galilea nacua beya bewa ponaena ichaxoyo Samaria nacua iya, tsipei namto baxoyo ducuiya. ⁵ Bapoxonae Jesús pijimonae baru patopa Sicar tomaratha, po tomara eca Samaria nacua. Barapo tomara, Sicar tomara eca ichaxota imoxoyo po iriyo caena bayatha Jacob pexanto cata. Barapo Jacob pexanto tatsi pewun José. Jacob iru pexanto tatsi caena bayatha tupabe. ⁶ Barapo iriyotha mene muthu eca, barapo mene muthu pewun, “Jacob pia muthu”, jei. Tsipei Jesús natsepapona namto dena, tsipei taju werena pona, daxota barapo mene muthu muxuburutha ecora. Matautano bapoxonae mateinyaxae tsuxubi iru. ⁷⁻⁸ Iru bapoxonae Jesús pijimonae tatsi tomara be-iyiya pecomocaenexa pexaewa. Barapomonae pecoutha tatsi yabuyo Samaria nacuapiwayo patopa ichaxota Jesús po mene muthu muxuburutha eca. Jesús barai bapowa, jeye:

—Mera necare, jei Jesús.

⁹ Bapoxonae barapo Samaria nacuamonaepiwayo Jesús jume notatsi. Barapowa jeye: —¿Eta pocotsiwa metha mera nebaru ununame? Apara judiomonaepim iru xan apara Samaria nacuamonaewayon, jei.

Barapowa baxua paeba tsipei judiomonaepiwayo iru Samaria nacuamonaepiwayo daxita barapomonaepiwayo jopa naita coxonaeyo. ¹⁰ Nexata Jesús jume nota, jeye:

—Icha xam yaputaetsipame xua pocotsiwa Nacom cata jiwitha, yawa icha neyaputaetsipame pon aunxuaein mera cawucatsi, bapoxonae jame newucaetsipame mera, xua icha mera, po mera jiwi peajuntuyapusuwa xeina cana exainchi, po peajuntuyapusuwa jopa bapana weraweracaeyo, jei Jesús.

¹¹ Bapowa Jesús jume notatsi, jeye:

—Pon jiwi Necanamataxeinaem, apara jopa xeinaem xua xota mene capatame. Yawa po mene muthu apara taju deca. ¿Jinya exota po mene boca inta mene capitichi, po mera jiwi ajuntuyapusuwa exainchi? ¹² Barapon Jacob pata tamo susatopin pana cata barapo mene muthu. Bapon barapo mene muthu mene capaneiba peapeibinexa, iru pia pexui tatsi mene capaneiba xua peapeibinexa, matautano mene capaneiba peapateibinexa pia duweimonaein. ¿Metha bara Jacob toxeincha ainya cuim, beyacaincha bapon? jei bapowa.

¹³ Jesús jume nota, jeye:

—Daxita pomonaepiwayo xua po mene muthu mene capaneiba xua peapeibinexa equeicha meratsipouneibina. ¹⁴ Ichitha pon apa xua po mera catan, bapon equeicha jopa caewa meratsipae tsane. Barapo mera icha ira baru bapana mene ichi xua epatoya mene jujuina poxoru bichocono ira baru bapana mene nauca. Barichi po coyene xua cacatinchi barapo coyene cajuntu coyene yuca cacana exanaena, bapoxonae xeinaename peajuntuyapusuwa, po peajuntuyapusuwa xua ataya tsiteca, jei Jesús.

¹⁵ Nexata bapowa Jesús jume notatsi, bapowa jeye:

—Pon jiwi Necanamataxeinaem, dapo mera necare xua jopa caewa tameratsipouneibiwa tsane yawa xua equeicha po mene muthu jopa tapateibiwa tsane xua mera tacapanathopeibinexa, jei barapowa.

¹⁶ Jesús jume nota, jeye:

—Moya matha iyande, matha jinseuri wabare. Nexata bapoxonaepiwayo xote papatoparebe, jei Jesús.

¹⁷ Bapowa jume nota, Jesús jume notatsi, jeye:

—Taseuri apara jopa xeinaeyo, jei.

Nexata Jesús jume barai, jeye:

—Bara xainyeya paebame poxonae jam, ‘Taseuri jopa xeinaeinyo’, jam. ¹⁸ Tsipei caena bayatha cinco poyobe pebiwi punaxubame. Pon xua anoxuae baræ poponame, apara jinseuri aibi. Poxonae paebame baxua bara xainyeya paebame, bara jopa naerabim, jei Jesús.

¹⁹ Barapowa poxonae Jesús baxua jume tainchi barapowa jeye:

—Pon jiwi Necanamataxeinaem, bara catainchi xua xam apara pon Nacom peitorobi jume nepaebim. ²⁰ Pata tamo susato jiwi, Samaria nacuamonaepiwi, barapomonae wænae jainteiba Nacom xote po demxuwathe. Ichitha paxam judiomonaе pam, papaebame xua pinae bewa jiwi wænae jainteibina Nacom bomæxætha po bo uncua Jerusalén tomaratha po bo Nacom pin pia bo tatsi, jei barapowa.

²¹ Jesús jume nota, jeye:

—Yabæyo moya yabara nejume cowænde xua tacatsipaebiwatsi. Tsipei barapo mat-acabi imoxoyo patopaena, po mataqueitha xua wænae pajainteibiname Nacom. Nama jopa painya nenantawenonaewam tsane xua painya neponaewa, po demxuwathe yawa Jerusalén tomara beya xua wænae painya nejainteibiwa tsane Nacom. ²² Paxam Samaria nacuamonaе pam, jopa payaputaem pon wænae pajainteibame. Paxan nama judiomonaе pan payaputan pon wænae pajainteiban, tsipei pon pecapanenebiyaein jiwi apara bapon judiomonaе jiwana pin. ²³ Ichitha anoxuae nama patopa po mataqueitha poxonae pomonaе xaniwaicha wænae pejainchiwa Nacom, barapomonaе icha coyene cuitha Nacom wænae jaintinchi, xua barapomonaе pia Paxaxae tatsi. Barapomonaе xaniwaicha pia pejæntæ coyenewatha wænae jainchina Nacom. Tsipei Nacom baxua ichichipa xua wænae pejainchiwatsi xua jiwi wænae pejainchiwa pejæntæ coyenewatha. ²⁴ Nacom pejæntæ coyene xanepanaein pon peinya jumopein. Daxota pomonaе Nacom wænae pejainchiwatsi, barapomonaе bewa xaniwaicha pejæntæ coyenewatha wænae jainchina Nacom, jei Jesús.

²⁵ Barapowa jume nota, jeye:

—Yaputan xua patopeicaena pon pewæn Mesías, (xua pon icha wæn “Cristo” baraichi). Poxonaе bapon patopeicaena daxita yabaran pana necuidubina, jei bapowa.

²⁶ Jesús jume nota, jeye:

—Apara xan bapon, pon aunxuaein catsipaebatsi, jei Jesús.

²⁷ Bapoxonaе equeicha Jesús pijimonaе tatsi pata. Daxita barapomonaе yabara najæntæ cui coyene cabenaeca xua Jesús tsipaeba Samaria nacuamonaewayo. Ichitha dapon aibi xua pon pejeiwa Jesthæ, “¿Eta xua metha jinya xuatsi? ¿Eta pocotsiwa metha bapowa tsipaebame?” xua pon pejeiwa. ²⁸ Nexata bapowa juruwato cuenta iya tomara be-iyæ, nainya yacuinaya iya. Bapowa jiwi tsipaeba, jeye:

²⁹ —Anetha, pataema pebin ichaxota mæthæ mene. Bapon yabara netsipaeba daxita pocotsiwa bayatha caena exanan. ¡Apara bapon metha Mesías! jei bapowa.

³⁰ Bapoxonaе jiwi tomara we-iyiya peponaenexa ichaxota Jesús popona. ³¹ Iræru Jesús pijimonaе jume daunweya baraichichi, jeye:

—Pon Patatanecuidubim, matha xaema, jeichichi pijimonaе.

³² Jesús jume barai pijimonaе, jeye:

—Xan xeinan pexaewa, po pexaewa jopa payaputaem, jei Jesús.

³³ Jesús pijimonaexae tatsi nexata bara caemonaе nayainyaba, jeye:

—¿Metha bara ichæn Jesús apatatsi pexaewa? najei barapomonaе.

³⁴ Ichitha Jesús pijimonaе jume barai, jeye:

—Icha pebin ichi xua bewa nabanaena, barichin xan bewa exanaein pocotsiwa Nacom ichichipa pocotsiwa bapon tana necui itorobixae. Matautano bewa nacui wetsin Nacom pia penacuichiwa tatsi xua tana neitorobixae. Daxota xua bapoxonaе tanejæntæ coyene yæcaewa tsane be poxonaе pebin xua pexaewa una tonsana. ³⁵ Paxam ba pajam: ‘Abu cataunxuae cuatro po xometobe yapu seica pabitha xua pexaewa penawetsiwa tsane’, ba pajam. Ichitha nama paca jeichi: ‘Pataema bayatha pexaewa naweta xua pabitha’,

paca jeichichi. Barapocotsi jũta coyeneya paca jeichi: ‘Jiwi barapo cae pin nacuathe bayatha najũntũ cui coyene wũnaetaba xua pejume taenexa Nacom Pejume Diwesi xua pejume cowũntsinexa’, paca jeichi. ³⁶ Catsibin pomonae tamonaexae pocotsiwa xua pematomatsiwa xua inta ichamonae peyawenaexaetsi xua irũrũ be tamonae jiwi penaexanaenexa. Pomonae nejume cowũnta barapomonae catsibin peajũntũyapusũwa, po peajũntũyapusũwa jopa weraweracaeyo. Tsipei pomonae tajume diwesi pecueicuei-jeiwi copiya xuano irũ pomonae tajume diwesi cotacaya xuya yaputane cana exana xua daxota jiwi nejume cowũnta, daxita barapomonae matabũxũyobe nabarũ jũntũ coyene weiweina xua ichamonae nejume cowũnta pecana exanaexaetsi. ³⁷ Tsipei po diwesiyo xua tsica diwesiyo, po diwesiyo yabara canaũta jũtsiya pepaebiwa bara aparta xaniwaicha, po diwesiyo xua ba jeye: ‘Ichũn ũba, irũ ichũn xuya jota poxonae naweta’, xua jei po diwesiyo. ³⁸ Paca itorobatsi xua inta payawenname jiwi xua tajiwiwimonae penaexanaenexa xua po coyene jopa pacata ayapubeyo xua poxonae paexanname baxua. Baxua paexananame bequein bara jopa dapomonae pam pocotsimonae copiya tajume diwesi paeba barapo jiwitha. Jame paxam aparta barapomonae pam, xua xuya cotacaya yaputane pacana exaname barapo tajiwiwimonae. Baraxua icha be poxonae ichi poxonae ichũn xuya jota cotacaya poxonae ichũn copiya ũba, jei Jesús.

³⁹ Bapoxonae pin bicheitomonaes pomonae barapo tomaratha jinompa xua Samaria nacuatha, Jesús jume cowũntatsi, tsipei barapo petsiriwa pejeixae: “Bapon Jesús yabara netsipaeba daxita pocotsiwa bayatha caena exanan”, jei. ⁴⁰ Poxonae barapo Samaria nacuapiwi Jesustha pata, bapoxonae Jesús jume daunweya jeichichi: “Pana barũ ecare pata tomaratha”, jeichichi. Daxota Jesús ainya matababibe naeca barapo tomaratha. ⁴¹ Bichocono pinmonae Jesús jume cowũntaponatsi poxonae jume tane xua Jesús paeba. ⁴² Nexata barapomonae bapowa tsipaebatsi, jeichichi:

—Anoxuae nama pajume cowũntan jopa meisa saya poxoru pata tanetsipaebiwam. Mataũtano bara pajume cowũntan tsipei yatsicaewa pata muxutontha pajume tan pocotsiwa bapon paeba. Mataũtano bara payaputan xua bapon pon jiwi Pecapanenebiyaeinchi abe pia peexanae cuiru coyenein tatsi weya xua barapo jiwi jopa peweraweracaenexa, jei barapomonae.

Meje yabara poxonae Jesús axaibi exana pon pentacaponaein pexanto tatsi

⁴³ Poxonae barapo ainya matababibe yapucaewa, bapoxonae Jesús pijimonae Samaria nacua webarũ warapiya xua barũ pona Galilea nacua beya. Ichitha pijimonae jopa barũ patopaeyo pia tomaratha Nazaret tomaratha. ⁴⁴ Tsipei Jesús bayatha pijimonae tsipaeba xua nayabara jeye:

—Pon ba Nacom peitorobi jume pepaebin, bapon ba pia nacuapiwi jopa barũ cui itura jinaetsi, jei Jesús. ⁴⁵ Poxonae Jesús pijimonae barũ patopa Galilea nacuatha, barapo Galilea nacuapiwi Jesús matenta weyataya wabatsi. Tsipei caena bayatha barapo Galilea nacuapiwi Jesús tainchi Jerusalén tomaratha, poxonae jiwi nacaetuta xua penabanaenexa pexaewa po matababintha pewũn Pascua wũn matababin poxonae jiwi yabara canantana xeina xua caena bayatha pia pamo susato jiwi tatsi panenebiya Egipto nacua weya. Mataũtano tsipei poxoru bayatha barapomonae tane daxita pocotsiwa Jesús exana baxota.

⁴⁶ Bapoxonae Jesús pecoyo barũ pona pijimonae Caná tomara beya xua po tomara eca barapo Galilea nacuatha. Barapo Caná tomara, po tomaratha ichaxota bayatha Jesús meratha equeicha vino mera cana exana. Poxonae Jesús Caná tomaratha eca, irũrũ pebin pon pentacaponaein Capernaum tomaratha popona. Bapon pexanto taatenetsi. Barapo pentacaponaein tanacuita, pon jiwi itorobiya pia pepa peewatsinchi tanacuitatsi. ⁴⁷ Barapon pon pentacaponaein yaputane xua Jesús pijimonae barũ patopa Galilea nacuatha xua Judea nacua weya pona. Bapoxonae Jesús siwa poinchi. Bapon Jesús jume daunwei jeichichi:

—Tabo beya ponde. Inta taxanto axaibi exande tsipei imoxoyo petũpae, jei bapon.

⁴⁸ Nexata Jesús barai bapon xua piamonae tatsirũ, jeye:

—Paxam jopa yabara pana nejume cowuntsim. Saya poxonaē pexeinya petsita itutsi coyenewan paca tsita exaneibatsi bapoxonaē deta pana nejume cowunteibame, jei Jesús.

⁴⁹ Ichitha pentacaponaein jume nota, jeye:

—Pon Necanamataxeinaem jiwi, anetha nainya iyande, xua pewunaeya tsane poxonaē taxanto tupaena, jei.

⁵⁰ Nexata Jesús jume barai bapon, jeye:

—Moya caibe nawayama jinya bo beya. Bayatha cata axaibi nexanto, jei Jesús.

Barapo pentacaponaein yabara jume cowanta pocotsiwa Jesús paeba. Bara pontaba pia bo beya. ⁵¹ Poxonaē barapo pentacaponaein cataunxuae ecapona namtotha xua pia bo beya pona, bapoxonaē bapon matenta poinchi pomonaē pia petanacuichiwiwaetsi pia botha. Bapon jeichichi:

—Nexanto bayatha cata axaibi, jei barapomonaē.

⁵² Nexata bapon yainyaba pia petanacuichiwichi, jeye:

—¿Eta poxonaē inta taxanto axaibi? ¿Eta xoyo poxonaē ecatabiya xometo? jei bapon. Barapomonaē jume nota, jeye:

—Mexuae axaibi tsuxubi poxonaē mateinyaxae pepuya weya bapoxonaē yasataxotsi domae, jei barapomonaē.

⁵³ Nexata pexuyo paxa tatsi yabara nanta xeinataba xua barapo mateinyaxae pepuya weya xua mexuae Jesús namchi jeye: “Moya caibe nawayama jinya bo beya, bayatha nexanto cata axaibi”, jei Jesús. Bapoxonaē bapon iru pomonaē pia botha petaenaewichi Jesús yabara jume cowantatsi.

⁵⁴ Barapo pexeinya petsita itutsi coyenewa xua poxonaē equeicha Jesús cotacaya exana poxonaē caibe warapiya Galilea nacua beya poxonaē Judea nacua wewarapiya.

5

Meje yabara poxonaē Jesús axaibi exana pon pecuenobinchi ichaxota po fetiyo pewun Betzata

¹ Bapoxonaē pirapae Jesús pona Jerusalén tomara beya. Barapo tomaratha judiomonaē nacaetuta xua penabanaenexa pexaewa. ² Barapo tomaratha xua iboton peyacaincha toxoro dutsi acabiwa coiboton cae boupa iya barapo boupa pewun “Oveja pia boupa”, jei. Imoxoyo barapo boupa iya eca tsica mene fetiyo. Barapo fetiyo hebreo jumetha pewun “Betzata”, jei. Barapo fetiyotha cinco po boutiyobe umena. ³ Barapo boutontha peatenewi iratha bobenapoinya, ichamonaē pomonaē peitata nacutsi jiwi, iru ichamonaeno pomonaē pejayujayujei jiwi, iru ichamonaeno pomonaē pecuenobiwichi. Barapomonaē ewatabobena xua barapo mene fetiyo mene najirababa. ⁴ Tsipei ichacuitha tsaibi matatsunpin patopeiqueiba barapo mene fetiyotha xua peitaboco wetsica pona. Barapo matatsunpin mene najirababa exana barapo mene fetiyo. Pon copiya maxu cayatsi mene beya xua baxota cuaranotatsi, bapoxonaē axaibi exainchi. ⁵ Baxota pebin iru boca pon caena bayatha atene treinta y ocho po weiyobetha. ⁶ Jesús tane xua bapon iratha boca. Matautano Jesús yaputane xua bapon ainya dapaein bayatha ewata boca. Jesús yainyaba bapontha, jeye:

—¿Ichichipame xua neaxaibiwa? jei Jesús.

⁷ Pon atene Jesús jume notatsi, jeye:

—Pon Necanamataxeinaem jiwi, dapon inta aibi pon taneyawenaewa xua mene be-tanemaxu cayaenexa poxonaē matatsunpin mene najirababa exana. Poxonaē tacoutha taepatotha iya tsaibin ichun copiya netsiwana patopeiba. Bapon axaibi, copiya pecaxi-naexae mene, jei pon atene.

⁸ Jesús jume barai, jeye:

—Asiya uncuare. Pire jinya nebocaewa. Bara ponde, jei Jesús.

⁹ Bapoxonaē caena nainya axaibi tsuxubi. Yawa pita pia pebocaewa, bara ponano. Ichitha barapo matabi apara po matabi pentaquei seicae matabi. ¹⁰ Daxota judiomonaē barai pontha pon axaibi exainchi. Jeichichi:

—Apara anoxuae po matabi xua pentaquei seicae matabi. Barapo mataqueitha jopa cacopatsiyo xua bara necaponaewa jinya nebocaewa, jei judiomona.

¹¹ Bapon jume barai judiomona, jeye:

—Pon neaxaibi exana bapon nebarai: ‘Pire jinya nebocaewa, bara ponde’, nejei bapon, jei bapon judiomonaetha.

¹² Nexata judiomona yainyaba bapon, jeye:

—¿Jintam bapon pon baxua cabarai: ‘Pire jinya nebocaewa, bara ponde’, jei? jei barapomona.

¹³ Ichitha bapon jopa wun taeyo pon peaxaibi exanaeatsi, tsipei Jesús pin bicheitha naita cafetaba. ¹⁴ Pirapae bapon Jesús taeba Nacom pin pia botha tatsi. Jesús barai bapon, jeye:

—Incane nejume taema. Jame caaxaibi exanatsi. Equeicha jinxoba abe exaname, tsipei bapoxonae bichocono atenem tsipae beyacaincha xua poxonae copiya atenem, jei Jesús.

¹⁵ Nexata barapo pebin pona judiomona beya xua pejeinexa:

—Apara pon neaxaibi exana bapon apara Jesús, jei bapon.

¹⁶ Daxota Jesús abe tsiyabara jeitapoinchi xua pebexubiwa tsainchi yaitama Jesús axaibi exana pon atene po mataqueitha pentaquei seicae mataqueitha. ¹⁷ Ichitha Jesús jeye barapomonaetha:

—Taxa, apara cataunxuae nacuiteiba daxita matabintha. Xan barichin bara bequein pentaquei seicae matabi tan, jei Jesús.

¹⁸ Daxota bichocono nama judiomona jopa juniya anaepanaeyo, yawa ichichipa xua Jesús pebexubiwa tsainchi. Barapomona anaepana tsipei yaitama Jesús po mataqueitha pentaquei seicae matabi naita nacuita poxonae bequein barapomona jopa copatsiyo. Matautano anaepana tsipei Jesús naexana xua Nacom pecui jupaewatsi, yawa tsipei jeye: “Nacom, Taxa”, jei.

Meje yabara poxonae Jesús yabara paeba xua pexeinaewa pia peayapusu itorobi coyenewa

¹⁹ Nexata equeicha Jesús barai barapo judiomona, jeye: “Xaniyan paca tsipaebatsi xua xan Nacom Pexanton jopa exanaeinyo pocotsiwa tacoutha ichichipan. Saya jame exanan pocotsiwa Taxa cui tan pocotsiwa exana. Daxota bapocotsiwan baxua exanan.

²⁰ Taxa bichocono neantobe, yawa netsita ituta daxita xua bapon pocotsiwa exana. Taxa equeicha ichawanno netsita itutsina pocotsiwa xua bichocono wunae beyacaincha xua bayatha exanan. Bapoxonae yabara pana najuntui cui coyene cabenaecaename.

²¹ Taxa equeicha asu cana exana pomona caena bayatha werapa. Xan barichin tsane Nacom Pexantonxaein equeicha asu cana exanaein pomona pewerapaewi, pomona xua ichichipan xua asu tacana exanaewa.

²² Taxa jopa ba yabara paebiyo jiwi xua penatsicuentisiwa xua abe peexanaexae. Saya meisa xan Pexanto tatsixaein necata barapo peayapusu itorobi coyenewa xua tayabara paebiwa jiwi xua penatsicuentisiwa xua abe peexanaexae Nacomtha. ²³ Baxua Taxa barapo peayapusu itorobi coyenewa necata xua daxita jiwi tana nebarui cui itura jinaenexa xua icha barapo jiwi ichi xua poxonae Taxa barui cui itura jinatsi. Xan ponxaein Nacom Pexantoxaein ponxaein Nacom tana neitorobixae pon jopa nebarui cui itura jinaeyo bapon barichi Taxa jopa barui cui itura jinaetsi.

²⁴ “Bara xainyeya paca tsipaebatsi xua xan, Nacom Pexantoxaein, pon xanepanaya nejume naitawata pocotsiwa paeban xuano xua Taxa jume cowuntatsi bapon peajuntuyapusuwa xeinaena po peajuntuyapusuwa xua ataya tsiteca. Bapon bapana jopa yabara caunutsin tsane xua bapon Nacom bayatha tsitatsi xua bapon penatsicuentisiwa xua daxota bapon bewa tupaena abe peexanaexae. Tsipei bapon be barapocotsin, bara be pocotsin xua equeicha asu exanan petupae cuiru coyene weya. ²⁵ Xainyeya paca tsipaebatsi. Apara anoxuae barapo matabi patope, po mataqueitha pomona be pewerapaewi jopa pexeinaexae peajuntuyapusuwa, barapomona nejume taena. Yawano icha barapomona nejume cowuntsina bapoxonae xeinaena peajuntuyapusuwa.

²⁶ Taxa xeina xua peajüntuyapusüwa, po pia peajüntuyapusüwa tatsi jopa weraweracaeyo. Daxota bara tayapu xanepanatsi xua ichün pecatsinexatsi barapo peajüntuyapusüwa. Mataütano Taxa necata barapo peajüntuyapusüwa xua daxota xuya jiwi catan. ²⁷ Taxa pia peayapusü itorobi coyenewa necata xua jiwi tayabara paebinexa xua penatsicuentisiwa xua abe peexanaewixae Nacomtha. Tsipei naexanan pepa Jiton daxota necui jüpa xua barapo pia peayapusü itorobi coyewathaxa jiwi tayabara paebiwa xua penatsicuentisiwa xua abe peexanaexae. ²⁸ Jopa baxua payabara najüntü coyene cabenae-caeinde pocotsiwa tapaca tsipaebiwatsi. Tsipei patopaena icha matacabi po mataqueitha pomonae pewerapaewi nejume taena. ²⁹ Barapomonae pomonae pewerapaewi müthü wejujuinaena. Pomonae xua xanepanaya exana xua poxonae caena bayatha jinompa, barapomonae asü exanaeinchi xua pexeinaewa tsane peajüntuyapusüwa. Ichitha nama pomonae abe exana xua poxonae caena bayatha jinompa, barapomonae asü exanaeinchi xua peyabara paebinexatsi xua penatsicuentisiwa xua abe peexanaexae Nacomtha”, jei Jesús.

Meje yabara poxonae Jesús tsita itapeinya xeina jiwi xua bara xeina peayapusü itorobi coyenewa

³⁰ Cataunxuae awiya Jesús cueicueijeji judi monaetha. Jesús jeye: “Jopa exanaeincho pocotsiwa tacoutha ichichipan. Jiwi yabara paeban xua penatsicuentisixae xua abe peexanaexae Nacomtha be pocotsi coyeneya Taxa tanecui itorobixae. Baxua xua pocotsiwa poxonae jiwi yabara paeban xua penatsicuentisiwa xua abe peexanaexae apara bara xanepana. Tsipei jopa exanaeincho pocotsiwa tacoutha ichichipan jame saya exanan pocotsiwa Taxa ichichipa, pon tana neitorobixae. ³¹ Icha saya meisa nayabara paebichipan tacoutha, yawa icha ichün jopa neyabara jume yawenaetsipae metha bapoxonae pana neyabara jam tsipaem: ‘Apara pocotsiwa bapon pia coutha nayabara paeba jopa xainyeyo’, pana neyabara jam tsipaem. ³² Ichitha ichün neyawena xua tana neyabara paebiwa tsipei paeban xua pocotsiwa bapon paeba. Nanta jüpayapa paebanbe. Apara bapon Nacom bara Taxa. Bara yaputan po coyene bapon xua tana neyabara paebiwa apara bara xainyei. ³³ Paxam ichamonae paitorobame Juan beya, xua Juan peyainyabiwa tsainchi, pocotsiwa Juan yabara paca jume nota xua xan yabara, bara apara xainyei. ³⁴ Xan jopa jiton nantawenonaeincho xua tana nebarü jume yawenaewa xua jiwi yabara tana nejume cowüntsiwa xua bara xainyeya tapaebin. Saya yabara paca tsipaebatsi pocotsiwa Juan tana neyabara paebiwa. Poxonae baxua pajume cowüntsiname pocotsiwa Juan tana neyabara paebiwa bapoxonae paca capanenebiyaena abe painya neexanae cuiru coyenein weya xua jopa painya atene tsaibiwa tsane abe painya neexanaewantha. ³⁵ Poxonae pecoicha itanata, jiwi ba caeto jüntü coyene weiweina poxoru ichichipa barapo coicha xua yonoyonei. Icha pecoicha ichi Juan barichi. Poxonae Juan paca cuiduba copiya pajüntü coyene weiweiname caeto, poxoru paichichipame barapo diwesi pocotsiwa bapon paca tsipaeba. ³⁶ Ichitha nama xan xeinan xua pocotsiwa ainya cui beyacaincha xua po diwesi Juan tana neyabara paebiwa. Baxuan xua xuan pocotsiwa exanan apara bara xua pocotsiwa Taxa neitoroba. Po pexeinya petsita itübiwan xua exanan poxonae baxuan jiwi necui tane bapoxonae nejume cowünta xua Taxa necata barapo peayapusü itorobi coyenewa. ³⁷ Mataütano Taxa, pon tana neitorobixae, beta xanepanaya neyabara paeba. Ichitha paxam jopa bapana Nacom pajume taem xua pejume. Mataütano jopa bapana pataem pia pepon. ³⁸ Nacom Pejume Diwesi jopa paxeinaem painya jüntü coyeneintha tsipei jopa pana nejume cowüntsim ponxaein xua Nacom tana neitorobixae. ³⁹ Paxam matowa pana nacuidubame Nacom Pejume Diwesi, tsipei pananta xeiname xua pia bapoxonae Nacom painya nepaca catsibichi pia peajüntuyapusüwa, po peajüntuyapusüwa jopa weraweracaeyo. Ichitha Nacom Pejume Diwesi, po diwesi payorobame, apara xua tana neyabara paebiwa. ⁴⁰ Ichitha jopa bapana pana nejume cowüntsim xua tapaca catsibinexatsi barapo peajüntuyapusüwa, po peajüntuyapusüwa jopa weraweracaeyo.

⁴¹ “Jopa netsita ainya cuiyiyo xua bara jiwi tana nebarū cui itura jinaewa xua ainya cuin tanaexanaexae. ⁴² Matautano paca jūntū coyene yaputainchi xua painya jūntū coyeneintha jopa Nacom paantobem. ⁴³ Xan, Nacom Taxa tana neitorobixae, pacata patopatsi, daichitha jopa pana nejume cowūntsim. Ichitha icha ichūn pacata patopaetsipa pon pia coutha naitoroba, bapon xanepanaya pajume cowūntsipame. ⁴⁴ Jopa paca itacūpaeyo xua pana nejume cowūntsiname tsipei saya pananta xeiname xua pia jiwi paca necayabara barū cui itura jineibiwa. Jopa pananta xeinaem xua po coyene Nacom paca necayabara barū cui itura jinaewa tsane. ⁴⁵ Jopa pananta xeinaeinde xua Taxatha tapaca yabara paebiwatsi xua po coyene abe painya neexanaewa. Xan dapon apara aibin xua abe tapaca yabara paebiwatsi. Paxam pananta xeiname, pana najam: ‘Caena bayatha Nacom nacana jume diwesi cata Moiestha xua jiwi pejume cowūntsiwa tsane. Jume cowūntatsi barapo diwesi, daxota Nacom naca capanenebiya tsane’, pana najam. Daichitha jopa paexanaem pocotsiwa Moisés paca itoroba. Poxoru tsipei jopa Nacom pajume cowūntsim daxota Nacomtha abe paexaname. ⁴⁶ Icha pajume cowūntsipame pocotsiwa Moisés neyabara tinaeya paeba, metha irurū pana nejume cowūntsipame, tsipei Moisés neyabara tina. ⁴⁷ Icha jopa pajume cowūntsim pocotsiwa Moisés neyabara paeba, bara paichipaem jopa pana nejume cowūntsi paem”, jei Jesús xua judiomonae tsipaebatsi.

6

Meje yabara poxonae Jesús apata pexaewa cinco mil pebiwi
(Mt 14.13-21; Mr 6.30-44; Lc 9.10-17)

¹ Poxonae Jesús najume weta judiomonaetha, bapoxonae Jesús pijimonae barū pona jeratha xua Galilea pucua icha muxunene beya. Barapo pucua icha wūn Tiberias pucua.

² Pin bicheito Jesús puna poinchi, tsipei Jesús cui tainchi xua exana pia pexeinya petsita itutsi coyenewan, poxonae axaibi exana peatenewi. ³ Nexata Jesús pijimonae baru ecoinya demxuwa icha. Bapoxonae baxoteicha Jesús pijimonae barū ecopiya. ⁴ Imoxoyo bara nama patopaena matababi xua judiomonae pia Pascua wūn matababi tatsi. ⁵ Jesús tane xua puna poinchi pin bicheito. Bapoxonae Jesús barai, Felipe baraichi jeichichi:

—¿Eta xota metha pexaewa barapomonae upain comocaeinchi? jei Jesús Felipetha.

⁶ Baxua Jesús Felipe yainyabatsi, pia xua Felipe jume taetsi, xua po coyeneya Felipe pejume notsiwa tsane. Tsipei Jesús yaputane po coyeneya xua imoxoyo peexanaewa.

⁷ Nexata Felipe Jesús jume notatsi, jeye:

—Bequein doscientos po pan matabuxūmonae comocaetsipathatsi jopa awiya jūpaetsipae xua daxita barompaya pexexinaponaewa barapo bicheito. Barapo denario paratiyo matawūn xua bichocono matoma nawita xua caentaqueitha nexa xua matoma xeineiba pomonae penacuichiwi, jei Felipe.

⁸ Bapoxonae Andrés pon irurū Jesús pijimonae tatsi jiwana jiton, pon Simón Pedro peweicho tatsi, bapon Jesús jeichichi:

⁹ —Meje pewowin wuto uncue. Bapoyo cinco po panbe xeina, po pan xua cebada beno pan. Matautano bapoyo duweiyoye capana. ¡Ichitha apara jopa yapu jūpaeyo xua pin bicheito! jei Andrés.

¹⁰ Nexata Jesús jume nota pijimonae, jeye:

—Daxita jiwi patsipaebare xua peenaewa tsane iratha, jei.

Baxota naepanaewan nawita. Baxota pebiwi iratha ena. Barapo bicheito bara be cou cinco mil pebiwi. ¹¹ Nexata Jesús pecobetha pita pan, po pan xua pexuyo capatopa. Bapoxonae Jesús Paxatha tsipaeba: “Axa, maisa jūntū coyene weiweinan xua pata tana necatsiwaxaem pexaewa”, jei Jesús. Bapoxonae Jesús pijimonae tsicobe jajanacaponā pan. Equeicha Jesús pijimonae tatsi cacatsibapona barapo pan barapo cinco mil pebiwitha. Jesús barichiya exana poxonae duweiyoye pita. Matautano pijimonae tsicobe jajanacaponā barapo bicheito nexa. Barapo cinco mil pebiwi bara xane xua ichichipa piyainxae. ¹² Poxonae daxita tonsanarūcupa, bapoxonae Jesús pijimonae barai:

—Panore xua barapomonaē jiwana xane. Pajebare, jopa pabebande, jei Jesús.

¹³ Barapomonaē Jesús pijimonaē tatsi nonotapona pocotsiwa barapo pin bicheito jiwana xaexaepona. Jesús pijimonaē tatsi doce po cotebe wunba xua bayatha po cinco panbe jiwana xaexaepona pin bicheito po pan xua cebada beno pan. ¹⁴ Barapo cinco mil jiwi poxonaē Jesús cui tainchi xua pexeinya petsita itatsi coyenewa exana, jeye:

—Apara bara bapon pon Nacom peitorobi jume pepaebin, pon xua juinya bewa pinae patopaena po nacuathe xua wanacuatha tsica, jei.

¹⁵ Ichitha Jesús yaputane xua barapomonaē ichichipa xua po coyene Jesús penaexanaewa tsane be pon jiwi itorobiya pia pepa peewatsinchi tsane barapo bicheito pia nacuathe tatsi. Daxota equeicha Jesús ponataba demxuwa beya, xua compa peecaenexa.

Meje yabara poxonaē Jesús mene matatsun jumatha pona

(Mt 14.22-27; Mr 6.45-52)

¹⁶ Poxonaē quirei tsanaicha Jesús pijimonaē tatsi pucua itapa bepareca. ¹⁷ Bapoxonaē jeratha nonobabiya. Barapo pucua iya jeratha epatauta iyiya xua pepatsiwa tsane Capernaum tomara beya. Jesús cuenta iyiyatsi poxoru bayatha quirei, yawano poxoru Jesús jopa cataunxuae patopaeyo. ¹⁸ Bapoxonaē pin joibo tsuxubi. Yawa maratsaca muxunenababa jera. ¹⁹ Poxonaē Jesús pijimonaē tuwatha yana panenebiya, bapoxonaē Jesús pijimonaē tainchi. Jesús mene matatsun juma dena pona jera dena. Bapoxonaē barapomonaē bichocono junuwa. ²⁰ Ichitha Jesús pijimonaē barai, jeye:

—¡Apara xan! ¡Jopa pajunuwinde! jei Jesús.

²¹ Bapoxonaē Jesús pijimonaē yaitaerucupatsi. Bapoxonaē Jesús juntũ coyene weiweinaya wabatsi pijimonaē xua jeratha penontabinaenexa. Bapoxonaē nainya patarucupa Capernaum tomaratha.

Meje yabara poxonaē jiwi Jesús wenaweneichi

²² Icha mataqueitha pin bicheito, pomonaē umena pucua itapatha xua icha muxunenetha, barapomonaē tane xua Jesús pijimonaē cuenta ponarucupatsi jeratha, po jera saya bara cae nae xua po nae baxota boca. ²³ Poxonaē cataunxuae Jesús yabara nanta xeinatsi baxua, bapoxonaē icha jera naein pata xua po naein Tiberias tomara werendena. Barapo jera naein pata ichaxota po iriyo itama tayeca xua ichaxota bayatha Jesús, pon Wanacanamataxeinaein, Paxa tsipaeba xua jeye: “Axa, maisa juntũ coyene weiweinan xua pata tanecatsiwam pan”, xua jei, xuano xua baxota Jesús apata pan jiwitha. ²⁴ Barapomonaē yaputane xua Jesús aichurucuae. Matautano yaputane xua Jesús pijimonaē tatsi aichurubenaē. Daxota jeran notarucupa Capernaum tomara be-iyi xua Jesús pewenaweneiwa tsainchi.

Meje yabara xua Jesús apara bapon yabara caunutatsi xua poxonaē po pexaewa Nacom jiwi itaboco wetaitorobicatsi

²⁵ Poxonaē barapomonaē pata icha muxunene beya xua pucua iya, bapoxonaē Jesús tainchi. Barapomonaē Jesús yainyabatsi, jeichichi:

—Pon jiwi Necuidubim, ¿eta poxonaē xote patopame? jei barapomonaē.

²⁶ Jesús jume barai barapo jiwi, jeye:

—Xaniyan paca tsipaebatsi. Pana newenawenam, tsipei bayatha pana najain taneme pexaewa xua beya poxonaē patonsaname. Apara jopa baxua patsipatsim xua bayatha tapaca tsita exanaexaetsi pexeinya tatsita itatsi coyenewan. ²⁷ Jopa pananta xeinaeinde xua saya pexaewa pana natsiupain nacuitame, po pexaewa saya nainya weraweraca. Saya meisa jame payabara nanta xeinare xua peajuntuyapusũ coyenewa, po peajuntuyapusũ coyenewa jiwi ajuntuyapusũ exanatsi, po peajuntuyapusũwa jopa weraweracaeyo. Taxa, Nacom, barapo peajuntuyapusũwa necata, po peajuntuyapusũwa xuya paca catsinchi ponxaein Nacom Tananeitapetsin, jei Jesús.

²⁸ Nexata barapomonaē Jesús yainyabatsi, jeye:

—¿Eta xua bewa paexanaein xua xainyeya pata exanaewa tsane pocotsiwa Nacom ichichipa? jei.

²⁹ Nexata Jesús jume nota barapomonaē, jeye:

—Jame Nacom baxua ichichipa xua pata tanejume cowuntsiwam tsane ponxaein xua barapon Nacom, Taxa, neitoroba, jei Jesús.

³⁰ Nexata barapomonaē Jesús yainyabatsi, jeye:

—¿Eta po jinya pexeinya netsita itutsi coyenewa, pana netsita itutsiname? Icha paca cui taeinchi baxua xua pana netsita itutsiname nexata bapoxonaē xua xain paca jume cowuntatsi. ³¹ Ichaxota ira xuepana susato tsurucuae nacuatha wamo susato jiwi xane pexaewa, po pexaewa Nacom taitorobica itaboco wetsica. Barapo pexaewa maná matawun. Barapomonaē baxua cana exanatsi be pocotsi coyeneya Nacom Pejume Diwesitha yabara jeichichi: ‘Nacom cata barapomonaetha pexaewa, po pexaewa itaboco wetaitorobica’, jei Nacom Pejume Diwesitha, jei barapomonaē.

³² Nexata Jesús jume barai barapomonaē, jeye:

—Xaniyan paca tsipaebatsi, Moisés barapo pexaewa apara jopa wamo susato jiwi catsichi, po pexaewa xua itaboco wetaitorobicatsi. Apara jame Nacom, Taxa, barapo pexaeyei nabanaē pexaewa taitorobica. ³³ Po pexaewa Nacom itaboco wetaitorobica, apara neyabara wunaē caunuta. Nacom neitorobica xua tacana exanaewa tsane jiwi barapo cae pin nacuathe xua jiwi pexeinaewa tsane peajuntuyapuswa, po peajuntuyapuswa jopa weraweracaeyo, jei Jesús. ³⁴ Nexata barapomonaē Jesús baraichichi, jeye:

—Patatanecanamataxeinaem, barapo pexaewa pana catsibeibare daxita matabi tsaibi, jei.

³⁵ Jesús jume nota, jeye:

—Xan apara bapon xua po pexaewa Nacom itaboco wetaitorobica jiwi xua po pexaewa tana neyabara wunaē caunutsixae ponxaein jiwi peajuntuyapuswa tacatsin. Bequein jiwi xaiba pexaewa daichitha equeicha jainpouneiba, yawa equeicha meratsipouneiba. Jame pon patopa taxantha yawa pon nejume cowunta bara xeina daxita pocotsiwa penantawenonaewa. ³⁶ Bara bayatha bequein paca tsipaebatsi, daichitha jopa pana nejume cowuntsim bequein pana netaneme. ³⁷ Daxita pomonaē xua Taxa necata, barapomonaē bara tamonaē. Barichi pomonaē nejume cowunta, barapomonaē jopa beban tsane. ³⁸ Xan apara jopa baxua tsipatopeicaeyo itaboco wetsica xua taexanaewa tsane pocotsiwa tacoutha ichichipan. Apara saya jame baxua tsipatopan xua taexanaewa tsane pocotsiwa Taxa ichichipa. ³⁹ Tsipei Taxa ponxae neitoroba, barapon ichichipa xua daxita jiwi beta ta-eenaewa tsane pomonaē tana necatsixae. Matautano Taxa jopa ichipaeyo xua barapomonaē jiwana caein tanexubiwa. Matautano Taxa ichichipa xua equeicha asu cana exanaein petupae coyene cuariya weya pomonaē tana necatsixae xua poxonaē po matabi opi ducuaenaba po cae pin nacuathe. ⁴⁰ Paxam yabara paca tsipaebatsi xua pocotsiwa Taxa peichichipaewa. Daxita pomonaē neyabara paebina po coyene xua xan apara Nacom Pexanton, xuano xua nejume cowunta, barapomonaē xeinaena peajuntuyapuswa xua ataya tsiteca. Barapomonaē asu exanaein petupae coyene cuariya weya poxonaē matabi opi ducuaenaba po cae pin nacuathe, jei Jesús.

⁴¹ Poxonaē Jesús baxua nayabara paeba bapoxonaē judiomonaē Jesús abe yabara paebatsi, tsipei Jesús jeye: “Xan apara bapon po pexaewa Nacom itaboco wetaitorobica jiwi xua po pexaewa tana neyabara wunaē caunutsixae ponxaein jiwi peajuntuyapuswa tacatsin”, jei Jesús. ⁴² Barapomonaē najei caemonaē:

—Apara bapon Jesús, José pexanto tatsi. Apara coxiyün bayatha yaputainchi, coxiwano yaputainchino. ¿Eta pocotsiwa metha naca tsipaeba xua pinaē itaboco wetsica pona? najei barapomonaē.

⁴³ Nexata Jesús jume barai, jeye:

—Jopa caemonaē pana natsipaebinde xua abe papaebame. ⁴⁴ Dapon aibi pon peitacupaewatsi xua pia coutha pepatopaewa xantha xua tana nepuna ponaewa tsane icha Taxa pon tana neitorobixae, pia coutha jopa copatsiyo xua jiwi pepatsinexa xantha. Barapomonaē asu exanaein petupae coyene cuariya weya poxonaē po mataqueitha daxita weraweracaena po nacuathe. ⁴⁵ Nacom peitorobi jume pepaebiwi pia petinaē

diwesintha jeye: ‘Daxita jiwi Nacom yaputane cana exanaena’, jei barapo Nacom peitorobi jume pepaebiwi pia petinae diwesintha. Daxota daxita pomonae Taxa jume tainchi xuano xua jume cowuntatsino barapomonae bara pata taxantha.

⁴⁶ “Dapon aibi pon Taxa tainchi. Jame meisa ponxaein itaboco wepatopeican bara Taxa tan. ⁴⁷ Xaniyan paca tsipaebatsi, pon nejume cowunta bapon jame xeinaena peajuntuyapusuwa, po peajuntuyapusuwa jopa weraweracaeyo. ⁴⁸ Xan apara bapon xua po pexaewa Nacom itaboco wetaitorobica jiwi xua po pexaewa tana neyabara wnae caunutsixae ponxaein jiwi peajuntuyapusuwa tacatsin. ⁴⁹ Painya amo susato jiwi pexaewa xane ichaxota ira xuepana susato tsurucuae nacuatha. Barapo pexaewa maná matawun. Bequein bara barapo pexeinya pexaewa nabane daichitha matapainya werapa. ⁵⁰ Paxam yabara paca tsipaebatsi po pexaewa Nacom itaboco wetaitorobica jiwi xua po pexaewa tana neyabara wnae caunutsixae. Pon nejume cowuntsina jopa weraweracae tsane icha ichun ichi xua poxonae xane barapo pexaewa jopa tupaeyo. ⁵¹ Xan apara bapon xua po pexaewa Nacom itaboco wetaitorobica jiwi, po pexaewa ayapusu, xua po pexaewa tana neyabara wnae caunutsixae. Pon xua nejume cowunta bara ataya poponaena icha ichun ichi xua poxonae xane barapo pexaewa bara asu. Po pexaewa xua yabara paeban, apara tapepon xua paca catatsi painya nenabanaewa tsane. Tupaeyin xua jiwi pexeinaewa tsane peajuntuyapusuwa”, jei Jesús.

⁵² Nexata judiomonae caemonae najume matsontsonoba, najei:

—¿Eta pocotsiwa metha bapon naca tsipaeba xua naca catapaeba pia pepon xua wanabanaewa tsane? jei barapomonae.

⁵³ Jesús barai barapomonae, jeye:

—Xaniyan paca tsipaebatsi xan ponxaein Nacom Tana neitapetsin. Icha jopa paxaem tsane tapepon, yawa icha jopa paapaem tsane tajana, jopa paxeinaem tsane peajuntuyapusuwa, po peajuntuyapusuwa jopa weraweracaeyo. ⁵⁴ Pon xua tapepon xane yawa xua apa tajana, bapon xeinaena peajuntuyapusuwa, po peajuntuyapusuwa jopa weraweracaeyo. Yawa bapon asu exanaein petupae coyene cuariya weya po mataqueitha poxonae daxita weraweracaena po cae pin nacuathe. ⁵⁵ Tsipei tapepon be pexeinya pexaewa poxonae xua jiwi pexaewa tsane. Yawa tajana be pexeinya peapaewa xua jiwi peapaewa tsane. ⁵⁶ Pon tapepon xane yawa apa tajana, bapon nebaru poponeibina yawa xan baru poponeibin. Tsipei poxoru bapon neyabara jume cowunta xua xan bapon pia pepon tatsi tsitapan, yawano xua tajana othoparenaewa bapon nexa xua abe pia peexanae cuiru coyenein tatsi nexa. ⁵⁷ Taxa ponxae neitoroba bapon ataya asu poponeiba. Iruru xan barichin ataya asu poponeiban tsipei Taxa necata pia peajuntuyapusuwa, po peajuntuyapusuwa jopa weraweracaeyo. Barichiru pon xane tapepon, xua poxonae tana nejume cowuntsiwa, bapon asu poponeibina tacatsixae peajuntuyapusuwa. ⁵⁸ Xan yabara paeban pexaewa, po pexaewa Nacom itaboco wetaitorobica jiwi. Barapo pexaewa jopa jupaeyo, xua icha be maná matawun ichi, po pexaewa painya amo susato jiwi xane. Daichitha barapomonae matapainya werapa. Po pexaewa yabara paeban icha ichun xane barapo pexaewa, bapon xeinaena peajuntuyapusuwa, po peajuntuyapusuwa jopa weraweracaeyo, jei Jesús.

⁵⁹ Baxuan Jesús cuiduba judiomonae pia penacaetutsi botha tatsi xua Capernaum tomaratha.

Meje yabara poxonae Jesús yabara paeba peajuntuyapusuwa, po peajuntuyapusuwa jopa weraweracaeyo

⁶⁰ Pinmonae pomonae Jesús puna poinchi, poxonae barapomonae Jesús jume tainchi pia pecuidubiwa, bapoxonae barapomonae najei:

—Pocotsiwa bapon paeba maisa bichocono ayapube xua wayabara jume cowuntsiwa. ¿Jintam metha itacupatsi xua peexanaewa tsane pocotsiwa bapon paeba? najei.

⁶¹ Ichitha Jesús yaputane pocotsiwa xua peyabara paebiwatsi barapomonae xua peayapubexae pocotsiwa Jesús pepaebiwa. Nexata Jesús yainyaba barapomonae, jeye:

—Pocotsiwa aunxuae paca tsipaebatsi, ¿baxua pacata ayapube? ⁶² ¿Eta xua metha pananta xeinaetsipame icha pana netaetsipame xua athabe taichaewa itaboco beicha ichaxota bayatha poponan ponxaein Nacom Tananeitapetsin? ⁶³ Jiwi asu jinompa poxoru xeina pejumope tuxaxu. Poxonae pejumope tuxaxu panepa jiton ba pia pepon tupa. Icha pejumope tuxaxu ichi xua jiton asu exainchi pia pepon, barichi xua xan pocotsiwa tapaca tsipaebiwatsi barapo jume paca juntu coyene ayapusu cana exana xua jopa painya neweraweracaewa tsane. ⁶⁴ Ichitha cataunxuae pinmonae pomonae paxam jiwana pam, jopa nejume cowantsiyo, jei Jesús.

Caena bayatha Jesús copiya wunae tsiwanaya yaputane pomonae jopa pejume cowantsiwa tsainchi. Matautano caena bayatha Jesús copiya wunae tsiwanaya yaputane pon pecaenaetsiwa tsainchi tsane ichamonaetha xua pebexubiwa tsainchi Jesús. ⁶⁵ Equeicha Jesús barai pomonaetha pomonae pia pepuna ponaewichi, jeye:

—Daxota paca jeichi: ‘Dapon aibi pon peitacupaewatsi xua pia coutha pepatopaewa xantha xua tana nepuna ponaewa tsane, icha Taxa pia coutha jopa copatsiyo xua bara jiwi pepatsiwa xantha’, paca jeichi, jei Jesús.

⁶⁶ Poxonae Jesús baxua paeba bapoxonae pin bicheito pomonae Jesús pepuna ponaewichi barapomonae Jesús cuenta warapatsi. Barapomonae equeicha nama jopa Jesús puna ponaetsi. ⁶⁷ Bapoxonae Jesús pijimonae yainyaba pomonaeyoxae xua doce poyobe, pomonae Jesús pijimonaexae tatsi. Jesús pijimonae barai, jeye:

—¿Paxam painya iru ponaetsiru? jei Jesús.

⁶⁸ Nexata Simón Pedro Jesús jume notatsi. Pedro jeye:

—Patatanecanamataxeinaem, dapon aibi tsipae pon papuna ponan icha paca cuenta ponaetsipatsi. Saya meisa payaputan xua meisa xam compam yabara pana netsipaebame peajuntuyapusuwa, po peajuntuyapusuwa jopa weraweracaeyo. ⁶⁹ Paxan paca jume cowantatsi. Matautano payaputan xua xam apara pon Nacom caitoroba, pon pepa Nentacuiruyapuxanepanaem, jei Simón Pedro.

⁷⁰ Jesús pijimonae jume nota, jeye:

—Paxam pomonae doce poyobe pam pomonae tapaca caitapetsiwichi pam. Daichitha caein jiwana pam cauri piamonae jiton tatsi, jei Jesús.

⁷¹ Poxonae Jesús baxua paeba, Jesús yabara paeba Judas, Simón Iscariote pexanto tatsi. Bapon Judas Jesús caenaetsinchi bequein bapon caein jiwana pomonae Jesús pijimonaexae tatsi, pomonae doce poyobe tatsi.

7

Meje yabara poxonae Jesús jopa yabara jume cowantichi peweicho jiwi

¹ Bapoxonae Jesús popona ducuaeta baxota xua Galilea nacuatha. Jesús aichaxaibi xua pepoponaewa Judea nacuatha, tsipei judiomonae, pomonae baxota jinompa, ichichipa xua Jesús pebexubiwatsi. ² Bara nama imoxoyo tsurucuae tsoponaeba po maticabintha judiomonae jinompa tsica bomuxuxitha xua penabanaenexa pexaewa. Barapo maticabin ba judiomonae cayabara nanta xeina xua caena bayatha pinae pia pamo susato jiwi tatsi jinompa tsica bomuxuxitha ira xuepana susato tsurucuae nacuatha. ³ Jesús baraichi pia peweicho jiwi, jeye:

—Jopa xote poponaende. Judea nacua beya warapiyama xain baxotiya jinyamonae cacui tane pocotsiwa exaname xua jinya netsita itutsiwa. ⁴ Pon xua ba ichichipa peyaputaewatsi daxita jiwi, bapon ba daxita jiwi peitutha exana po coyene xua moya peyawun xeinaewa po coyene jiwi copiya jopa yabara yaputaeyo. Bapon ba jopa nameicha exanaeyo. Xam iruru barichinde. Daxita jiwi peitutha exande xain cacui tane xua jinya netsita itubiwa neexanaewam, jeichichi Jesús peweicho jiwi.

⁵ Baxua Jesús baraichichi peweicho jiwi, tsipei Jesús jopa jume cowantichi peweicho jiwi. ⁶ Nexata Jesús jume barai peweicho jiwi, jeye:

—Apara inta cataunxuae dapu matacabi aichica, po mataqueitha tana naitutsiwa judiomonaetha xua Judea nacuatha. Ichitha poxonae paichichipame xua painya neponaewa moya bara paponde Judea nacua beya. ⁷ Pomonae jopa Nacom jume cowantichi barapomonae jopa paca casebiyo. Ichitha xan necaseba tayabara paebixae xua po coyene pocotsiwa barapomonae exana pejuntũ coyeneintha apara abe. ⁸ Paxam bara moya paponde ichaxota judiomona nacaetuta xua penabanaenexa pexaewa. Xan nama jopa ponaeyino cataunxuae canta tamatacabi aichica, jei Jesús.

⁹ Poxonae Jesús baxua najume weta, bapoxonae abũ cataunxuae Galilea nacuatha popona be caentacabiyo xua pecoyo weya peponaenexa.

Meje yabara poxonae Jesús nasiwa pona Jerusalén tomara ichaxota judiomona nacaetuta xua penabanaewa tsane pexaewa

¹⁰ Poxonae Jesús peweicho jiwi tatsi bayatha ponaba penanabanaenexa pexaewa irũ Jesús bara beya pona. Jesús compa nameicha pipatotha pona. Jopa peburũya naponae yo jiwitha. ¹¹ Barapo judiomona nacaetutsiwatha Jesús wenaweneichi. Barapo judiomona pia pentacaponae tatsi caemonae nayainyaba, najei:

—¿Incane methara? ¿Exota metha popona bapon? najei barapomonae xua Jesús yabara paebatsi.

¹² Barapo pin bicheitomonaetha ichamona Jesús yabara paxapaxeya paebatsi. Ichamona jeye: “Bapon apara pejuntũ coyene xanepanaein”, jei. Ichamona jeye: “Bũũ, metha jume, apara jiwi muxujainyabeibatsi”, jei barapomonae.

¹³ Ichitha dapon aibi pon pentha pejume jinaewa jiwi peitũtha xua Jesús peyabara paebiwatsi, tsipei judiomona pia pentacaponae tatsi cunuwatsi.

¹⁴ Poxonae cuatro po matacabinbe yapucaewa xua poxonae judiomona po matacabintha nacaetuba, bapoxonae Jesús joniya Nacom pin pia botha. Mataũtano baxota tamropata pitaba xua pecuidubiwa jiwitha.

¹⁵ Bapoxonae judiomona yabara najuntũ cui coyene cabenaeca pocotsiwa Jesús beta caununaya pepaebiwa. Yawano najei:

—¿Eta xua metha bapon bichocono yaputane diwesi bequein jopa nacuidubiyo diwesi xua jopa barichiyo xua waxainchi wepu wanacuidubiwatsi diwesi? jei.

¹⁶ Jesús jume nota barapomonae, jeye:

—Po diwesi jiwi cuiduban apara jopa barompaya tacuidubi coyenewa. Saya apara Taxa pia pecuidubi coyenewan tatsi jiwi cuiduban, pon tanecui itorobixae baxua. ¹⁷ Icha ichũn ichichipa exana pocotsiwa Nacom ichichipa, bapon necayabara yaputaena xua po coyene tacuidubi coyenewa. Bapon yaputaena icha metha bara cuiduban pocotsiwa Taxa neitoroba, xuano xua ichacuitha icha metha apara cuiduban pexeinya peayapusũ itorobi coyenewatha po coyene xua tawa xua saya tacoutha ichichipan. ¹⁸ Pon barompaya pia diwesi pia coutha nayabara paeba, apara bapon pia xua wũnae yabara paebichi xua jiwi wũnaeya peyabara paebiwa tsane. Ichitha ichũn pon ichichipa xua jiwi Nacom wũnae pejainchiwatsi pon Nacom bapon peitorobixaetsi, bapon jame po diwesi pexainyei diwesi paeba. Bapon jame jopa pemuxuitorobin jiwi.

¹⁹ “Moisés paca cata pia peitorobi coyenewa. Daichitha jopa pacayabara jume cui cowantsiya exanaem. Bequein Moisés paca cui itoroba xua bepa pinae jopa jiton pabexubim tsane. Dapo jumetha, ¿eta xua metha paichichipame xua pata tanebexubiwam?” jei Jesús.

²⁰ Daxita barapomonae Jesús jume notatsi, jeye:

—¡Apara cou cauri xeiname! Dapon apara aibi pon cabexubapaeba, jei judiomona.

²¹ Jesús jume barai barapomonae, jeye:

—Daxita paxam payabara najuntũ cui coyene cabenaecame, tsipei pebin axaibi exanan po matacabitha pentaquei seicae matacabitha. ²² Ichitha paxam irũ panacuibeibame barapo matacabitha. Moisés paca cata pia peitorobi coyenewa xua pexui painya newi thabiwa xua ichaxota pebiwichi xeinatsi xua ichaxota nareixacaena xua ocho

po matabibetha poxonae yapu othopeiba. Ichitha Moisés jopa tamropata pitabiyo baxua, saya jame painya amo susato jiwi tamropata notarucupa baxua. Poxonae ocho po matabibe yapu othopeiba pawu thabame pebin wutixi bequein poxonae pentaquei seicae matabi pataetham. ²³ Paxam paichichipame xua painya yabara jume cui wetsiwa xua pocotsiwa Moisés paca cui itoroba. Daxota pexui pebin wutixi pawu thabame ichaxota pebiwichi xeinatsi xua ichaxota nareixacaena bequein pentaquei seicae matabi pataetham poxonae. Icha bara paichim pentaquei seicae matabitha, ¿eta pocotsiwa metha pana necasebame xua pebin axaibi taexanaexae pentaquei seicae matabitha? ²⁴ Painya xoba pebin payabara paebame xua penatsicuentiwa xua abe peexanaexae Nacomtha poxonae cataunxuae jopa payaputaem pocotsiwa pebin abe exana. Jame metha copiya pacui yaputaema xua icha bara metha pebin abe exana tsipei methapara barapo pebin xanepanaya exana.

Meje yabara xua Jesús yabara paeba xua ichaxota copiya popona

²⁵ Pomonae Jerusalén tomaratha jinompa, poxonae barapomonae Jesús baxua jume tainchi, nayainyaba. Barapomonae najei:

—¿Metha apara baponje, pon yabara paebatsi ichamonae xua bepa pinae pon bexubichi? ²⁶ Bapon apara jiwi peitabaratha paebuncuajeba. Ichitha dapon aibi pon pejume matawentsiwatsi bapon. ¿Metha poxoru pentacaponaeawi bapon yabara nanta xeinatsi xua bapon barapara Mesías pon Nacom itoroba daxota jopa pejumeyo barapomonae? ²⁷ Ichitha waxainchi yaputainchi xua ichaxota werena pona bapon. Jame poxonae Mesías patopaena dapon ajibi tsane pon yaputaena xua ichaxota werena peponaewa Mesías, jei barapomonae, pomonae Jerusalén tomarapiwi.

²⁸ Jesús cuiduba jiwi Nacom pin pia botha tatsi. Poxonae Jesús baxua jume tane pocotsiwa jiwi paeba, bapoxonae Jesús jume daunweya wawai, jeye:

—Pana neyabara cananta xeinaeya yaitaneme. Yawa pana neyabara nanta xeiname xua payaputaneme xua ichaxota werena taponae. Apra jopa tsipatopaeinyo xua taexanaewanexa pocotsiwan ichichipan tacoutha. Mexeya apra daxota tsipatopan ichan tana neitorobixae pon xua yabara jume xainyeichi xua barapon bara eca peitabocotha. Bapon paxam jopa payaputaem. ²⁹ Bapon bara yaitan tsipei bapon pexainya wetsica ponan. Matautano bapon neitorobica, jei Jesús.

³⁰ Bapoxonae bequein barapomonae ichichipa xua Jesús pewaetabiwatsi, ichitha Jesús jopa waetabichi tsipei cataunxuae Jesús pia matabi jopa tapatopeicaetsi. ³¹ Pin bicheitomonae Jesús yabara jume cowantatsi xua Jesús apra bara Mesías. Barapomonae Jesús yabara jeichichi:

—Barapo pebin pexeinya petsita itutsi coyenewan exana be pocotsi coyene bayatha Nacom peitorobi jume pepaebiwi paeba xua juinya pinae Mesías pocotsiwa exanaena, jei barapomonae.

Meje yabara poxonae fariseomonae itoroba policiamona xua Jesús pewaetabiwa tsainchi

³² Bapoxonaerū fariseomonae jume tane pocotsiwa jiwi Jesús yabara baraichi: “Bapon apra Cristo”, xua jei jiwi. Nexata bapoxonae fariseomonae irurū sacerdotemonae pia pentacaponaeawi tatsi, daxita barapomonae itoroba policiamonae Nacom pin pia bo beya xua Jesús pewaetabiwa tsainchi. ³³ Nexata Jesús jei jiwitha:

—Saya caeto paca barū popoinchi. Bapoxonae pirapaeyo equeicha tacoya beicha Taxa beicha ponaein pon tana neitorobixae. ³⁴ Paxam pana newenawenam tsane ichitha jopa pana necaxinaem tsane. Tsipei jopa paca itacupae tsane xua painya neponaewa xua ichaxota taponae tsane, jei Jesús.

³⁵ Nexata judiomona caemona nayainyaba, najei:

—¿Exota metha bapon ponaena xua jopa wacaxinaewa tsainchi? ¿Metha icha judiomonaetha ponaena jampa po judiomonae icha nacua werena pona po judiomonae griegomonae barū jinompa jampa? Metha pia bapoxonae bapon cuidubichi barapo judiomonae, griegomonaeno. ³⁶ ¿Eta xua metha baxua caunuta poxonae naca jei: ‘Paxam

pana newenawenam tsane ichitha jopa pana necaxinaem tsane, tsipei jopa paca itacupae tsane xua painya neponaewa xua ichaxota taponae tsane', poxona xua naca jei? najei judiomonae.

Meje yabara poxonae Jesús yabara paeba xua ira бѣхѣрѣна mene epatoyaya ichawa beya mene pona

³⁷ Po matabi opi ducuanayaba xua po mataqueitha judiomonae nacaetuta xua penabanaenexa pexaewa, barapo matabi bichocono peainya cui matabi. Barapo matabitha Jesús uncua jiwi peitabaratha tatsi. Matautano jume daunweya wawaya jeye:

—Icha ichun meratsipa, bu pona xan berena xua peapaenexa mera. ³⁸ Nacom Pejume Diwesitha paeba: Pinae pon tana nejume cowuntsiwa bichocono juntu coyene yuyca exanaponaeinchi po coyene xua tana nejume cowuntsiwa, icha be pinae mene ichi tsane po mene ira бѣхѣрѣна mene, po mene xua ichawa beya epatoyaya mene pona bichocono pemene nayca ponaexae, jei Jesús.

³⁹ Baxua Jesús paeba, xua pomonae pejume cowuntsiwa tsainchi, barapomonae pinae xeinaena Nacom pia Pejumope tunaxu tatsi. Ichitha cataunxuae Nacom pia Pejumope tunaxu tatsi aichica. Tsipei cataunxuae Jesús jopa tupaeyo naetotha. Matautano tsipei cataunxuae jopa ponaeyo Nacom beicha. Bapoxonae bexa tsane barapomonae pomonae Jesús pejume cowuntsiwichi xeinaena Nacom pia Pejumope tunaxu tatsi.

Meje yabara poxonae jiwi Mesías yabara najume matsontsonobatsi

⁴⁰ Baxota iruru ena ichamonae pomonae Jesús jume tainchi poxonae yabara paeba mera. Bapoxonae barapomonae najume matsontsonobiya paeba. Ichamonae jeye:

—Apara barapo pebin pon Nacom peitorobi jume pepaebin, pon wunaewatatsi, pon bewa juinya patopaena, jei.

⁴¹ Ichamonae jeye:

—Apara barapo pebin, bapon apara Mesías pon Nacom itorobeicapae peitaboco wetsica, jei.

Ichitha ichamonaeru jeye:

—Jume apara, apara Mesías aibi, tsipei Mesías jopa patopaeyo Galilea nacua werena.

⁴² Tsipei Nacom Pejume Diwesitha jeye: 'Bapon Mesías itorobarecaein. Bapon Mesías David pia pemomoxi susato jiwana pin tatsi, pon caena bayatha Judea nacua monae itorobiya pia pepa peewatsinchi tatsi naexana. Bapon Mesías Belén tomaratha naexanaena, po tomaratha David ichaxota popona bayatha', jei Nacom Pejume Diwesitha, jei barapomonae.

⁴³ Daxota pinmonae najume matsontsonoba, tsipei daxita barapomonae Jesús ichawa beya barompaya yabara nanta xeinatsi. ⁴⁴ Barapomonae jiwana monae bequein ichichipa xua Jesús pewaetabiwatsi, ichitha dapon aibi pon Jesús pewaetabiwatsi.

Meje yabara poxonae pentacaponae wi jopa Jesús yabara jume cowuntichi

⁴⁵ Bapoxonae policiamonae pomonae Nacom pin pia bo peyapu eenaewi nawibiya fariseomonae beya yawa sacerdotemonae pia pentacaponae tatsi beyano. Daxita barapomonae policiamonae yainyabatsi, jeichichi:

—¿Eta xua metha jopa pacarendenaem Jesús? jei daxita.

⁴⁶ Barapo policiamonae jume nota barapomonae, jeye:

—¿Dapon aibi ichun pon beta pepaebiwa, icha bapon ichi xua beta wunaeya paeba! jei.

⁴⁷ Daxita nexata barapomonae policiamonae jume notatsi, jeye:

—¿Paxam iruru jiwi pacui jurame, xua iruru pajume cowuntame bequein bara bapon paca muxitoroba? ⁴⁸ Tsipei apara jopa payaputaem xua judiomonae pia pentacaponae tatsi jopa yabara jume cowuntsiyo bapon. Iru fariseomonae pia pentacaponae tatsi jopa yabara jume cowuntsiyo bapon. ⁴⁹ Pomonae Jesús jume cowuntatsi apara barapomonae jopa yaputaeyo pocotsiwa Nacom paeba pia peitorobi jumeintha.

Barapomonaē apara Nacom atene cana exanaena xua petsita natsicuentsexiaetsi xua abe petsita exanaexaetsi, jei daxita fariseomonaē.

⁵⁰ Barapo fariseomonaē jiwana pin baxota eca, pon pewun Nicodemo, pon merawitha bayatha Jesús siwa poinchi. Bapon Nicodemo jeye fariseomonaetha xua ichamonaetha:

⁵¹ —Waitorobi coyenewatha ba jeichichi: ‘Jopa bewa yabara paebichi pebin xua penatsicuentsiwa xua abe peexanaexae poxonaē cataunxuae jopa jume taetsi bapon pocotsiwa exana. Jame copiya matha bewa jume taetsi xua bapon pia coutha nayopita xua pocotsiwa exana’, ba jeichichi, jei Nicodemo.

⁵² Nexata fariseomonaē Nicodemo jume notatsi, jeye:

—¿Xam iruru barichim Galilea nacupin naexaname, po Galilea nacupiwu jopa beta yaputaeyo? Maisa jame matowa yorobare Nacom Pejume Diwesi. Xain yaputaneme xua dapon aibi pon xua Nacom peitorobi jume pepaebin, pon Galilea nacia werena pona, jei fariseomonaē.

*Meje yabara poxonaē yabu*yo abe exana poxonaē nasi cui wainmeinta icha pebintha bequein pia pebin xeinaetha

⁵³ Nexata daxita barapomonaē barompaya pia bon be-iyiya.

8

¹ Nexata Jesús pona demxuwa beya, po demxuwa pewun demxu Olivowa. ² Icha matabitha poxonaē pentha tsina, bapoxonaē equeicha Jesús caibeya pona Nacom pin pia bo tatsi beya. Pinmonaē Jesús imoxoyo caquita poinchi. Jesús eca yawa tamropata pitaba xua pecuidubiwa jiwu. ³ Bapoxonaē judiomonaē, pomonaē jiwu pecuidubiwi Moisés pia peitorobi coyene tatsi, iruru fariseomonaē, daxita barapomonaē carendena petsiriwa Jesús pia xantha tatsi. Barapomonaē cui taepona poxonaē barapo petsiriwa nasi cui wainmeinta icha pebintha bequein pia pebin xeinaetha. Bapoxonaē daxita barapomonaē barapo petsiriwa cuaranotatsi pin bicheito itabarayo deca xuano xua Jesús peitabarayo deca tatsi. ⁴ Daxita fariseomonaē iruru judiomonaē, pomonaē jiwu pecuidubiwi Moisés pia peitorobi coyene tatsi daxita barapomonaē Jesús baraichi, jeye:

—Pon jiwu Necuidubim, paxan jemeicha pacui taeponan xua barapo yabuyo abe exana, poxonaē nasi cui wainmeinta icha pebintha bequein pia pebin xeinaetha. ⁵ Moisés pia peitorobi coyenewatha naca tsipaeba xua pinae bewa tupa exanaetsi ibowantha powaxi poxonaē barapo coyene exana xua abe exana. ¿Incane iru xamdu? ¿Jinya eta xua pana netsipaebichi xua pata cana exanaewa bapowatha? jei.

⁶ Baxua naemata Jesús yainyabatsi, pia poxonaē Jesús abeya jume notsina bapoxonaē pia barapomonaē Jesús abe yabara paebichi. Nexata bapoxonaē Jesús irabe taeuncuareca yawano ira tinano pecobesitha. ⁷ Tsipei barapomonaē matowa Jesús yainyabatsi, daxota Jesús equeicha nantacotaxuba. Yawano barai barapomonaē, jeye:

—Caein paxan jiwana pam, pon bapana jopa abe exanae, bu bapon jame copiya matha bapowa cuintabatsi ibototha, jei Jesús.

⁸ Equeicha Jesús irabe taeuncuareca. Yawano equeicha Jesús ira tina pecobesitha.

⁹ Ichitha poxonaē barapomonaē Jesús jume tainchi, bapoxonaē daxita barapomonaē barompaya nanthuthu cayabara nanta xeina xua iruru abe exanaru barapomonaē. Daxita barapomonaē Jesús pia xainya weya tatsi tsana nanatsixibapona. Copiya penapataewi pona, bapoxonaē cotacaya ichamonaē nawibiya, beya jiwabi. Saya meisa barapo yabuyo compa uncua Jesús pia xantha tatsi. ¹⁰ Bapoxonaē Jesús equeicha nantacotaxuba. Yawa Jesús tane barapo yabuyo xua compa uncua pia xantha tatsi. Jesús barai yabuyo, jeye:

—¿Incane dapomonaē? ¿Dapomonaē aibi pomonaē cayabara paeba xua nenatsicuentsiwa xua abe neexanaexae Nacomtha? jei Jesús.

¹¹ Barapowa Jesús jume notatsi, jeye:

—Jume, Tanecanamataxeinaein, dapomonaē aibi pomonaē neyabara paeba xua tanatsicuentsiwa xua abe taexanaexae Nacomtha, jei.

Nexata Jesús barai bapowa, jeye:

—Xan irurū jopa cayabara paebi tsainchi xua nenatsicuentsiwa xua abe neexanaexae Nacomtha. Nawayama, equeicha jopa abe peexanae cuiru coyene exanaeinde, jei Jesús.

Meje yabara poxonae Jesús namchi, jeye: “Icha pecoicha ichi xua jiwi beta tane cana exainchi merawi, barichin xan jiwi cana exanan xua Nacom beta peyaputaewatsi”, jei Jesús

¹² Equeicha Jesús tsipaeba jiwi Nacom pin pia botha. Jesús jeye:

—Icha pecoicha ichi xua jiwi beta tanecana exainchi merawi, barichin xan jiwi cana exanan xua Nacom beta peyaputaewatsi xua pomonae jinompa po cae pin nacuathe. Pon nejume cowunta, bapon xeinaena peajuntuyapusūwa, po peajuntuyapusūwa ataya tsiteca xua bapon jopa abe peexanaenexa, jei Jesús.

¹³ Nexata fariseomonae Jesús baraichi, jeye:

—Xam apara jinya coutha nayabara diwesi paebame, daxota jopa be paca jume cowuntichi tsipei jopa ainya cuiyo pocotsiwa paebame, jei fariseomonae.

¹⁴ Jesús jume nota barapomonaetha, jeye:

—Xua xan nayabara diwesi paeban, baxua apara xainyan, bequein bara tacoutha nayabara diwesi paeban saya. Tsipei yaputan ichaxota werena taponae xua ichaxota beya taponae tsane. Ichitha paxam jopa payaputaem ichaxota werena taponae xua ichaxota beya taponae tsane. ¹⁵ Paxam jiwi payabara paebame xua penatsicuentsiwa xua abe peexanaexae Nacomtha saya xua poxonae pataneme xua exana icha po cae pin nacuathepiwi ichi. Xan jopa bapana jiwi yabara paebinyo xua penatsicuentsiwa xua abe peexanaexae Nacomtha saya xua poxonae tan xua exana. ¹⁶ Icha jiwi yabara paeban xua penatsicuentsiwa xua abe peexanaexae Nacomtha bara pexainyei coyeneyatha exanan. Tsipei jopa bapana companyo poxonae jiwi yabara paeban xua penatsicuentsiwa xua abe peexanaexae Nacomtha tsipei Taxa Nacom nebaru exana baxua pon tana neitorobixae. ¹⁷ Painya itorobi coyenewatha jeye: ‘Icha ichunbe nanta jupaeya yabara paebabe pocotsiwa tanebe bewa baponbe pajume cowuntsiname tsipei baxua apara ainya cui’, jei. ¹⁸ Xan tacoutha nayabara diwesi paeban. Irurū Taxa nayabara diwesi paeba, pon tana neitorobixae. Daxota Taxa pana nacueyatanbe, jei Jesús.

¹⁹ Nexata barapomonae Jesús yainyabatsi, jeye:

—¿Incane Axa, exota poponara? jei.

Jesús jume nota, jeye:

—Paxam jopa pana neyaitaem, matautano Taxa jopa payaitaem. Icha pana neyaitaetsipame bapoxonae metha payaitaetsipame Taxa, jei Jesús xua fariseomonae tsipaebatsi.

²⁰ Baxuan Jesús caunuta poxonae tsipaeba jiwi Nacom pin pia botha tatsi. Jesús imoxoyo uncua ichaxota jiwi jeba paratixi Nacom nexa. Dapon aibi pon Jesús pewaetabiwatsi, tsipei Jesús pia matabi cataunxuae taaichicatsi.

Meje yabara poxonae Jesús namchi: “Jopa paca itacupae tsane xua painya neponaewa tsane ichaxota taponae tsane”, jei Jesús

²¹ Equeicha Jesús jeye barapo fariseomonaetha:

—Bexa equeicha caibeicha ponaein. Paxam pana neitaxanaename painya tapaca cayawenaenexa tsainchi abe painya neexanae cuiru coyenein weya. Jopa paca capanepae tsainchi abe painya neexanae cuiru coyenein weya xua poxonae pawerapenae. Jopa paca itacupae tsane xua painya neponaewa ichaxota taponae tsane, jei Jesús fariseomonaetha.

²² Nexata judiomonae caemonae najei:

—¿Eta pocotsiwa metha bapon naca tsipaeba xua pinae jopa tae tsainchi xua pinae jopa naca itacupae tsane xua waponae ichaxota bapon peponaewa tsane? ¿Metha pia coutha pia nabexuichi? jei judiomonae.

²³ Nexata Jesús barai judiomonae, jeye:

—Paxam saya betsiquepiwi pam. Xan seicaya nama athabeicha tapoponaein. Paxam seicaya nama po cae pin nacuathepiwi pam. Xan nama po cae pin nacuathepin aibi. ²⁴Daxota bayatha paca jeichi: ‘Paxam jopa paca capanepae tsainchi abe painya neexanae cuiru coyenein weya poxonae pawerapaename’, jan. Tsipei jopa pana neyabara jume cowantsim po coyene xua bara tana neitacupaewa xua tapaca cayawenaewatsi, daxota pamuxuna werapaename abe painya neexanae cuiru coyenein, jei Jesús judiomonaetha.

²⁵Nexata barapomonae Jesús yainyabatsi, jeye:

—¿Jintam xamda? ¿Etapo jitom? jei.

Jesús jume nota barapomonae, jeye:

—Poxonae aena tamropata pitaban xua paca cuidubatsi, bapoxonae bayatha nayopichiya paca tsipaebatsi po coyene xua ichaxota werena taponawa. ²⁶Acoibi nawita xua yabara tapaca tsipaebiwatsi po coyene xua abe peexanae cuiru coyenein painya neexanaewa xua daxota Nacom patsita natsicuentame xua abe painya neexanaexae Nacomtha. Taxa neitoroba xua jiwi tatsipaebiwa pocotsiwa bayatha Taxa jume tan. Taxa bara yatsicaya jume xainyeya paeba, jei Jesús.

²⁷Ichitha barapomonae jopa yaputaeyo poxonae Jesús jeye Nacom yabara: “Taxa”, jei xua apara Paxa caunuta, pon Nacom. ²⁸Daxota Jesús barai barapomonae, jeye:

—Poxonae paxam naetotha pana necobe matatabarutsiname xan ponxaein Nacom Tananeitapetsinxae, bapoxonae pana neyaputaename xua deta cou apara barapo jiton xan. Matautano pana neyaputaename xua xan jopa tacoutha nayabara paebinyo, saya xua cueicueijan pocotsiwa Taxa necuiduba. ²⁹Tsipei pon neitoroba apara nebaru popona. Taxa bapana jopa compa popona neexanae tsipei saya exaneiban pocotsiwa Taxa tsita xanepanatsi, jei Jesús.

³⁰Poxonae Jesús baxua caunuta pinmonae judiomonae Jesús jume cowantatsi.

*Meje yabara poxonae Jesús yabara paeba Nacom pijimonae tatsi iru pomonae caurimona*e pia pentacaponaein tatsi piamonae tatsi

³¹Nexata bapoxonae Jesús barai judiomonae, po judiomonae Jesús pejume cowantsix-aetsi. Jesús jeye:

—Icha paxam xanepanaya pana nejume cowantsiya exanaponaeya jinompae-name pocotsiwa tapaca tsipaebiwatsi, bapoxonae bara pepa tajimonae pam tsane.

³²Bapoxonae payaputaename po coyene pexainyei coyenewa. Matautano papanenebiyaename pexainya weya pon paca itoroba xua abe painya neexanaewa, jei Jesús.

³³Barapo judiomonae, Jesús jume notatsi, jeye:

—Apara paxan Abraham pia pemomoxi susato jiwi tatsi pan. Dapon aibi pon pana itoroba xua pata taexanaewa poxonae pana itoroba xua poxonae pana busi tatane. ¿Eta pocotsiwa metha pana nejam: ‘Paxam papanenebiyaename pexainya weya pon paca itoroba xua abe painya neexanaewa’, pana nejam? jei pomonae Jesús jopa jume cowantichi.

³⁴Jesús barai barapomonae, jeye:

—Xaniyan paca tsipaebatsi daxita pomonae xua abe peexanae cuiru coyenein exana barapomonae bara exana po coyenein pia pepon itorobatsi icha jiton ichi pon amanaya tanacuita ichun xua poxonae bewa exanae pocotsiwa peitorobixaetsi poxonae busi cui tatainchi. ³⁵Pon ba amanaya tanacuita ichun, bapon ba apara piamonae aibi pomonae peitorobixaetsi, tsipei bapon pebusi cui taetaeinchi. Ichitha pon ba xua ichun pexantoxae tatsi, bapon ba ataya pexanto tatsi bara piamonae pexeinaexae bapon. ³⁶Daxota xan Nacom Pexanton, icha panenebiya paca cana exainchi caurimonae pia pentacaponaein tatsi weya, pon xua paca itorobeiba xua abe painya neexanaewa, barapoxonae bara ataya paca capanenebiya tsoponeibi tsainchi bapon pexainya weya tatsi. ³⁷Bayatha yabara paca yaputainchi xua Abraham pia pemomoxi susatopiwi tatsi pam. Daichitha paichichipame xua pana nebexubame, jopa painya neichipaexae xua painya nejume taewa pocotsiwa paca tsipaebatsi. ³⁸Xan yabara paeban po coyenein xua Taxa netsita itata. Paxam paexaname xua po coyenein painya axa paca itoroba, jei Jesús.

³⁹ Barapomonaē Jesús jume notatsi, jeye:

—¡Pata tamo susatopin pon be pata taxa patsicotan, bapon apara Abraham! jei barapomonaē.

Ichitha Jesús jume barai, jeye:

—Icha bara Abraham pia pexui tatsi pam tsipaem, metha bara paexanaetsipame pocotsiwa bapon bayatha caena exana. ⁴⁰ Bequein bara paca tsipaebatsi po coyene pexainyeiwa xua po coyene Nacom necuiduba, ichitha paichichipame xua pana nebexubame. Apara Abraham jopa bapana baxua daichi. ⁴¹ Paxam bara barapocotsiwa paexaname pocotsiwa painya axa exana, jei Jesús.

Nexata barapomonaē Jesús baraichi, jeye:

—Paxan dapomonaē pan aibi pomonaē piacoibi jiwi pan, tsipei pata taena jopa nasi cui wainmeinchiyo. Paxan xaniwaicha payaputan xua bara compa painta pata taxa, bapon Nacom, jei barapomonaē.

⁴² Nexata Jesús jume barai, jeye:

—Icha bara Nacom pia pexui pam tsipaem metha pana neantobe tsipaem. Tsipei Nacom bapon pia xainya wetsica ponan, anoxuaeno bara uncuanje. Apara jopa daxua tsipatopaeinyo xua tacoutha tana nayabara paebiwa tsane. Saya patopan poxoru Nacom neitoroba. ⁴³ Paxam jopa payaputaem xua paca tsipaebatsi poxoru jopa be painya nejume taexae baxua pocotsiwa paca tsipaebatsi. ⁴⁴ Caurimonaē pia pentacaponaein tatsi, bapon apara painya axa. Barapo caurimonaē pia pentacaponaein tatsi bapon piamonaē tatsi pam daxota paexaname pocotsiwa bapon paca itoroba. Barapo caurimonaē pia pentacaponaein tatsi jiwi jutebapoinchi poxonaē Nacom aena nacua forota weya, xua beya anoxuae. Bapon bapana jopa xainyeya pepaebin tsipei po juntu coyene Nacom xainyeya peyabara paebiwaitsi jopa xeinaeyo. Poxonaē bapon naerabiya paeba, baxua paeba tsipei barapo penaerabi juntu coyene xeina. Bapon jiwi itorobatsi xua jiwi naerabiya pepaebiwa tsane. ⁴⁵ Paxam bapon piamonaē tatsi pamxaem daxota jopa xaniwaicha pana nejume cowuntsim pocotsiwa xainyeya tapaebiwa. ⁴⁶ Paxam caein jiwana pam dapon aibi pon tana neyabara jeiwa: ‘Maisa bapon abe exana’, pon tana neyabara jeiwa. Bequein bara pexainyei jume paca tsipaebatsi daichitha jopa pana nejume cowuntsim. ⁴⁷ Pon ba Nacom piamonaē tatsi baraba namuxu naewata pocotsiwa Nacom paeba. Paxam apara jopa Nacom piamonaē tatsi pam, daxota jopa bepajume cowuntsim pocotsiwa Nacom paeba, jei Jesús xua judiomonaē tsipaebatsi.

Meje yabara poxonaē Jesús namchi: “Poxonaē cataunxuae Abraham jopa poponaeyo, caena bayatha tsiwanaya ataya poponeiban”, jei Jesús

⁴⁸ Nexata equeicha judiomonaē Jesús baraichi, jeye:

—Bara xainyeya paca yabara paebatsi poxonaē pana najan: ‘Bapon apara Samaria nacuamonaepin, apara cauri xeina’, poxonaē paca yabara jeichichi, jei judiomonaē.

⁴⁹ Jesús jume nota, jeye:

—Xan apara cauri jopa nebarũ poponaeyo. Saya xua exanan bara pocotsiwa jiwi cana exanan xua Taxa wũnae pejainchiwatsi, ichitha nama paxam pana necasebame, saya abeya pana neyabara paebame. ⁵⁰ Jopa netsita ainya cuiyiyo xua jiwi wũnae tana nejainchiwa. Bequein Taxa ichichipa xua jiwi wũnae tana nejainchiwa. Bapon Taxa yabara paebina jiwi pomonaē xua abe peexanaewa xua penatsicuentsiwa xua abe petsita exanaexaetsi. ⁵¹ Xaniyan paca tsipaebatsi pon nejume cowuntsiya exanaena pocotsiwa paeban, bapon jopa bapana tũpae tsane, jei Jesús.

⁵² Bapoxonaē judiomonaē Jesús jume notatsi, jeye:

—Bara xaniwaicha payaputan xua xam cabarũ popona cauri. Abraham irũrũ pomonaē Nacom peitorobi jume pepaebiwi daxita barapomonaē caena bayatha werapa. Ichitha xam pana nejam: ‘Pon nejume cowuntsiya exanaena pocotsiwa paeban, bapon jopa bapana tũpae tsane’, pana nejam. ⁵³ ¡Xam apara jopa toxeincha ainya cuim Abraham pon pata tamo susatopin! Bapon caena bayatha tũpa irũrũ caena bayatha werapa pomonaē

enaewichi tatsi, irano pomonae pecui yaputaexaetsi xua poxonae bapon aitatabeya popona daxita barapomonae bapon yabara natsipaebatsi. Ichamonae jeye:

—¿Apara baponda pon iratha jiwi wunquequeibara paratixi? jei.

⁹ Ichamonae jeye:

—Aa, apara bapon, pon iratha jiwi wunquequeiba paratixi, jei.

Ichamonae jeye:

—Apara bapon aibi. Saya apara be bapon, jei.

Ichitha pon peitata nacutsin pia coutha jeye:

—Apara bara xan tsocuaein, jei.

¹⁰ Nexata daxita barapomonae peitata nacutsin yainyabatsi, jeichichi:

—¿Eta xua metha anoxuae taneme? jei daxita barapomonae.

¹¹ Pon peitata nacutsin jume nota barapomonae, jeye:

—Pon pewan Jesús, bapon tsoroboyo peonetha nacobena pontaba, bapoxonae barapo tsoroboyotha neitacuere caxueba. Yawa nejei: ‘Fetiyo beya ponare, po fetiyo pewan Siloé. Barapo fetiyotha naitacuere waexore’, nejei. Bara barabeya ponan. Poxonae baxota naitacuere waexuban, bapoxonae bara tan, jei bapon.

¹² Bapoxonae peitata nacutsin yainyabatsi barapomonae, jeichichi:

—¿Incane dapo pebin, pon caaxaibi exana? jeichichi.

Bapon jume barai bapomonae, jeye:

—Bɯ, canta jopa taeinyo, jei bapon.

Meje yabara poxonae pon equeicha xua itata wɯnae matowa yainyabatsi xua fariseomonae matowa yainyaba

¹³ Pon xua equeicha itata wɯnae, pomonae pia petsicuarabɯ enaewichi tatsi barapomonae bapon capoinchi fariseomonae beya. ¹⁴ Ichitha po mataqueitha Jesús axaibi exana pon peitata nacutsin, xua poxonae tsoroboyo peonetha nacobena pontaba, barapo matakabi apara judiomonae pia pentaquei seicae matakabi tatsi. ¹⁵ Bapoxonae bapon yainyabatsi fariseomonae, jeye:

—¿Eta bichim xua anoxuae jamaisa necotame? jei fariseomonae.

Bapon jume barai, jeye:

—Bapon tsoroboyo peonetha neitacuere caxueba. Bapoxonae naitacuere waexuban meratha. Bapoxonae yawa bara necotan, jei fariseomonaetha.

¹⁶ Bapoxonae fariseo jiwamonae bapon baraichi, jeye:

—Pon caaxaibi exana apara Nacom jopa bapon itorobicaeyo, tsipei bapon jopa yabara barɯ cui itura jinaeyo barapo pentaquei seicae matakabi, jei fariseo jiwamonae.

Ichamonae jeye:

—Icha bapon peajuntucoyenebein, ¿metha nexata eta pocotsiwa pexeinya petsita itutsi coyenewa exana? jei.

Daxita barapo fariseomonae nantiya najume matsontsonoba. ¹⁷ Equeicha fariseomonae, pon bayatha itacuere axaibi exainchi, bapon yainyabatsi, jeichichi:

—¿Incane xam, eta xua yabara nanta xeinamerɯ pon caaitacuerexaibi exana? jei fariseomonae.

Bapon jume epa pita, jeye:

—Yaitama bapon neaxaibi exana metha moya bara bapon, pon Nacom peitorobi jume pepaebin, jei bapon.

¹⁸ Ichitha judiomonae jopa bejume cowuntsiyo pocotsiwa pon peitata nacutsin bayatha itacuere axaibi exainchi xuano xua anoxuae itacupatsi xua petaewa. Daxota bapoxonae barapo judiomonae pon itacuere axaibi exainchi paxa tatsi wabatsi, yawa pena tatsi wabatsi. ¹⁹ Barapo judiomonae jeye coxiyɯnbetha:

—¿Baponje bara yatsicaya painya nexanto? ¿Apara bara bapon pon bayatha yaitata nacutsiya naexana? ¿Eta bichi xua anoxuae itacupatsi xua penecotsiwa? jei judiomonae.

²⁰ Barapo coxiyɯnbe jume notabe, jeibe:

—Bara yatsicaewa payaputan xua bapon barapara pata taxanto. Matautano payaputan xua bayatha bapon itata nacutsiya naexana. ²¹ Daichitha jopa payaputaeyinyo xua eta bichi xua bapon anoxuae necota. Matautano jopa payaputaeyinyo xua pon pata taxanto itacuere axaibi exainchi. Paxam moya bara bapon payainyabare. Bũ nexata bapon pia coya paca jume notsina tsipei apara bayatha pinyo, jeibe coxiyũbe.

²² Barapo coxiyũbe cunuwa judiomonaey cunuwatsi. Tsipei judiomonaey bayatha jei: “Pomonaey Jesús yabara jume cowũntatsi, pomonaey xua jeye: ‘Jesús apara bapon Mesías pon Nacom itorobica’, pomonaey jeye, barapomonaey paitawetan pata penacaetutsi bo weya”, jei barapo judiomonaey. Daxota barapo coxiyũbe pijunuwi jopa jeibe: “Apara bapon Jesús pon Mesías bapon painta taxanto itacuere axaibi exainchi”, jopa jeibe. ²³ Daxota barapo coxiyũbe barapo judiomonaetha jeibe: “Paxam moya bapon payainyabare. Bũ nexata bapon pia coya paca jume nota tsipei bayatha pinyo”, jeibe coxiyũbe.

²⁴ Bapoxonaey equeicha judiomonaey pon itacuere axaibi exainchi yainyabatsi, jeichichi: —Yatsicaewa xainyeya pana netsipaebare xua irũrũ Nacom necajume taenexa. Paxan payaputan xua Jesús bapon apara pon peajũntũcoyenebein, jei judiomonaey.

²⁵ Bapon jume nota barapo judiomonaetha, jeye: —Xan jopa yabara yaputaeyinyo xua icha metha bapon pon peajũntũcoyenebein. Saya meisa yaputan xua copiya taitata nacutsin xuano xua anoxuae neitacũpa xua tanecotsiwa, jei bapon.

²⁶ Equeicha barapo judiomonaey bapon yainyabatsi, jeichichi: —¿Eta caitacuere ichi poxonaey caaitacuerexaibi exana? jei judiomonaey.

²⁷ Bapon jume nota barapo judiomonaey, jeye: —Bara bayatha paca tsipaebatsiba. Came jopa yabara pana nejume cowũntsim. ¿Eta xua metha equeicha bepa baxua matowa paca tsipaebichi? ¿Painya irũrũ naexanaetsi Jesús pijimonaey tatsi? jei bapon.

²⁸ Ichitha barapo judiomonaey bapon biatainchi, jeichichi: —Xam moya Jesús piamonaey jiton tatsi naexande, nama paxan Moisés pia peitorobi coyenewa pata exanaponaey jiwĩ. ²⁹ Paxan payaputan xua Nacom Moisés itorobatsi. Ichitha nama pon caaitacuerexaibi exana jopa payaputaeyinyo xua ichaxota werena peponaewa xua ichũn peitorobixae, jei judiomonaey.

³⁰ Bapon jume nota, jeye: —¡Jina! Paxam jopa payaputaem xua bapon Jesús ichaxota werena peponaewa xua bequein painya tana netaewatham xua Jesús tana neaitacuerexaibi exanaewa. ³¹ Waxainchi yaputainchi bara, xua Nacom jopa jume naitaewatsiyo pomonaetha pomonaey abe peexanaewi xua peyawenaewanexa. Nacom saya meisa jume naitaewata pomonaetha pomonaey wũnaey pejainchixaetsi. Matautano Nacom saya jume naitaewata pomonaetha pomonaey peitorobixae xua pia petaexanaewa tsainchi pocotsiwa bapon peichichipaexae. ³² Poxonaey aena Nacom nacua forota, bapoxonaey xua beya anoxuae, dapon aibi pon ichũn itacuere axaibi exainchi pon peitata nacutsin. ³³ Icha bapon Nacom jopa itorobichipae, metha bapon jopa itacũpaetsipaetsi xua ichũn itacuere axaibi peexanaewatsi, pon peitata nacutsin, jei bapon.

³⁴ Nexata bapon baraichi, jeichichi: —Daxota itata nacutsiya naexaname tsipei ajũntũcoyenebey naexaname. ¡Dacotsiwa apara ichichipame pana necuidubamecai! jei judiomonaey.

Bapoxonaey bapon itawetatsi judiomonaey pia penacaetutsi bo tatsi weya.

Meje yabara poxonaey Jesús yabara paeba pomonaey jopa Nacom yaputaetsi

³⁵ Jesús yaputane xua pon bayatha itacuere axaibi exainchi itawetatsi judiomonaey pia penacaetutsi bo tatsi weya, xua judiomonaey itaweta. Poxonaey bapon Jesús caxina, Jesús jeye:

—¿Xam yabara jume cowũntame pon Nacom pia Peitapetsin tatsi? jei Jesús.

³⁶ Bapon jume barai Jesús, jeye:

—Pon Necanamataxeinaem jiwi, incane netsipaebare, ¿Incane bapon pon Nacom pia Peitapetsin? Bapoxonae tha jume cowuntichi, jei pon peitata nacutsin.

³⁷ Jesús jume nota, jeye:

—Xam apara bapon bayatha taneme pon Nacom pia Peitapetsin tatsi. Pon aunxuaein catsipaebatsi, apara bara xan, jei Jesús xua nabarai.

³⁸ Nexata bapon pentabocototha uncuca Jesús peitabaratha tatsi xua Jesús wūnae pejainchinexatsi. Bapon jeye:

—¡Tanecanamataxeinaem, cajume cowuntatsi bara! jei bapon.

³⁹ Bapoxonae Jesús barai, jeye:

—Barapo cae pin nacuathe patopeican xua jiwi tayabara paebinexa xua penat-sicuentsiwa xua abe peexanaexae Nacomtha. Pomonae xua bayatha jopa Nacom cayabara yaputaetsi barapomonae cana exanaein xua barapomonae Nacom cayabara yaputaecinchi. Pomonae xua bayatha bequein nanta xeina xua Nacom cayabara yaputainchi barapomonae cana exanaein xua barapomonae equeicha jopa Nacom cayabara yaputae tsainchi, jei Jesús.

⁴⁰ Bapoxonae fariseo jiwanaemonaem, pomonae Jesús baru uncuca, poxonae barapomonae Jesús jume tainchi, Jesús yainyabatsi, jeye:

—¿Apara pana baram xua equeicha jopa payabara yaputaein tsane Nacom? jei fariseo jiwanaemonaem.

⁴¹ Jesús jume nota, jeye:

—Icha paxam bayatha jopa payabara yaputaemtsipae Nacom, jopa apara painya coutham tsipae xua poxonae abe painya neexanaewa. Ichitha mexeya poxoru pajam: ‘Payaputan Nacom’, pajam daxota apara painya coutham xua bara abe painya neexanaewa, jei Jesús.

10

Meje yabara poxonae Jesús yabara paeba pon oveja pe-enaem

¹ Equeicha Jesús namchi: “Xaniyan paca tsipaebatsi diwesi xua pata neyabara yaputaewam tsane. Pebin ba oveja pia curara boupa iya joniya. Ichitha pon peboupa jopa joniyaeyo, saya ecoinya icha muxunene werena, bapon apara pon pecaibin oveja. ² Pon jame joniya pepa boupa iya bapon apara pon pe-enaem oveja. ³ Pon peboupa xatababin, bapon boupa saranaxorena pon oveja pe-enaem taboupa saranaxorenatsi. Poxonae pon oveja pe-enaem junuta oveja, barapo oveja jume copi yaputane baxua. Pon oveja pe-enaem, bapon daxita barapo oveja barompaya pia wūnxitha junuta. Bapoxonae bapon curara weya mata coniya ovejamonaem. ⁴ Poxonae curara weya mata coniya daxita bapon mata caecapona yawa punaenapoinchi pejume copi yaputaexaetsi. ⁵ Ichitha barapo ovejamonaem jopa puna ponaeyo ichuntha, pontha pon jopa yaitaeyo. Saya cuitaya дѹсѹра tsipei ichun jopa jume copi yaputaetsi”, jei Jesús.

⁶ Jesús tsipaeba barapomonae barapo pecayabara juta pepaebi diwesiyo poxonae oveja yabara paeba, daichitha came barapomonae jopa yaputaeyo barapo diwesi.

Meje yabara xua Jesús pon beta pe-enaem jiwi

⁷ Nexata equeicha Jesús tsipaeba barapomonae, jeye: “Icha oveja ichi xua curaratha joniya xua peboupa peyawenaexaetsi, barichi jiwi xua Nacom pia nacuatheicha tatsi pata poxoru xanxaein xua tayawenaexae. ⁸ Daxita pomonae netsiwana pata, pomonae xua jei: ‘Nacom pana itoroba’, jei, barapomonae apara pomonae jiwi pemuxujainyabiwi. Ichitha jiwi jopa yabara jume cowuntsiyo barapomonae, icha oveja ichi xua aichaxaibi pepuna ponaewa ichuntha jopa pejume copi yaputaexae. ⁹ Xan jiwi tayawenaem daxota pon nejume cowunta yawenan xua pepatopaewa Nacom beicha. Icha oveja ichichi xua merawi curaratha yaboupa xatatabatsi xuano xua mataqueitha yausaranaxorenatsi xua pexaenexa naepanaewa, barichi pomonae tana nejume cowuntsiwi barapomonae beta yawenan.

¹⁰ “Pon pecaibin patopa xua saya pecaibinexa oveja, yawa xua saya abe peexanaenexa yawa pebexubinexa. Ichitha nama xan patopan xua jiwi tacatsinexa peajuntuyapusuwa, po peajuntuyapusuwa jopa weraweracaeyo xua jiwi jopa juniya mataropeichiya hexeinaponae tsane barapo peajuntuyapusuwa. ¹¹ Pon beta pe-eenaen oveja, bapon tsitupa pia ovejamonae, tsipei jopa ichichipaeyo xua petajutebiwatsi pia ovejan tatsi xua poxonae pomonae pecaibiwi jutebina. Barapocotsi coyene ichi jiwi beta ta-eenaen. Jiwi tsitupaein xua barapomonae tacapanepaenexa. ¹² Ichitha pon tanacuita ichun xua tayapu eena oveja apara saya piaparatichi. Poxonae bapon neuthu tane pijunuwi, oveja cuenta naetsiriwa, tsipei barapo ovejamonae pia ovejamonae tatsi aibi. Poxonae neuthu icha ovejan teicatsi, bapoxonae icha ovejamonae tsanaothopa. ¹³ Bapon naetsiriwa tsipei saya oveja eena xua piaparatichi, xuano xua jopa xapain peyabara nanta xeinaexae ovejamonae.

¹⁴⁻¹⁵ “Xan natsicotan be pon ovejamonae beta tayapu eenaen tsipei beta ta-eenaen pomonae tana nejume cowuntsiwi. Taxa neyaitane, xuya Taxa yaitan. Barichi yaitan pomonae tana nejume cowuntsiwi, xuya barapomonae neyaitane. Xan tana nejume cowuntsiwi yaitatsin xua tatsitupaenexa naetotha xua jopa peweraweracaewa tsane barapomonae. ¹⁶ Barichi xeinan icha tana nejume cowuntsiwi pomonae jopa israelmonaeyo. Barapomonae bewa iruru nacaetuta exanaen xantha pomonae caena bayatha tana nejume cowuntsiwi iru pomonaeno xua bexa nejume cowuntsinano. Cae bicheito exanaen. Barapomonae exanaena pocotsiwa itoroban. Matautano xeinaena bara compa xua xan ponxaein beta ta-eenaen, icha pebin ichi pon ovejamonae peyapu eenaen xua poxonae ovejamonae caetucaetuteta cae curaratha.

¹⁷ “Taxa bichocono neantobe tsipei tsitupaein pomonae tana nejume cowuntsiwi. Ichitha equeicha asun tsane. ¹⁸ Dapon aibi pon xua pia coutha tana nebexubiwa. Saya jame poxonae tacoutha ichichipan. Xan itacoxonan xua bara jiwi tatsitupaewa. Matautano itacoxonan xua equeicha asu tapoponaewa tsane petupaewa weya. Baxua itacoxonan xua taexanaewa, Taxa tana neitorobixae”, jei Jesús.

¹⁹ Poxonae barapo judiomonae Jesús baxua jume tainchi, bapoxonae equeicha barapo judiomonae yabara najume matsontsonoba. ²⁰ Ichamonae judiomonae yainyaba xua icha judiomonae yainyabatsi, jeichichi:

—¿Eta xua metha bapon pajume naitawatame pocotsiwa bapon paeba? ¡Apara matayaibatsi! ¡Cauri xeina apara! jei judiomonae.

²¹ Ichamonae jeye:

—Dapon aibi pon xanepanaya pepaebiwa icha cauri xeina. Caurimonaepin jopa bapana itacupaetsi xua pon peitata nacutsin axaibi peexanaewatsi, jei ichamonae.

Meje yabara poxonae judiomonae Jesús jume itawetatsi

²² Poxonae awubo daxita jiwi nacaetuta Jerusalén tomaratha xua penabanaenexa pexaewa. Barapo penacaetutsi maticabin poxonae nabane jiwi yabara nanta xeina xua caena bayatha piamonae tatsi equeicha xaneba Nacom pin pia bo tatsi poxonae ichamonae abe exana. Barapomonae baxua yabara nacaetuta peyabara paebinexa xua barapo bo Nacom nexa. ²³ Jesús popona Nacom pin pia bo tauchipa boutotha. Barapo Nacom pin pia bo tauchipa bouto pewun Salomón. ²⁴ Baxota judiomonae Jesús imoxoyo caquita umenarucupatsi yawa Jesús jeichichi:

—¿Eta po maticabibe metha ainya muxu paxeinaen xua pata cayabara yaputaewa tsainchi? Icha bara yatsicaya Mesías xam, moya pana netsipaebare, jei.

²⁵ Jesús jume nota, jeye:

—Bara bayatha paca tsipaebatsiba ichitha jopa pana nejume yabara cowuntsim. Pocotsiwa xua exanan, xua Taxa tana neitorobixae, baxua apara bara paca tsita naitapeinya xeinatsi xua xan apara bara Mesías. ²⁶ Baxua jopa pana neyabara jume cowuntsim tsipei jopa tajimonae pam be pocotsi coyeneya aunxuae bayatha paca tsipaebatsi. ²⁷ Pomonae tana nejume cowuntsiwi nejume copi yaputane yawa nepuna

pona, icha ovejamonaē ichi xua jume copi yaputane pontha pon pe-eenaexaetsi xuano xua barapo ovejamonaē puna pona xua bapon puna poinchi. ²⁸ Tana nejume cowũntsiwi catan peajũntũyapũsũwa, po peajũntũyapũsũwa xua bapana jopa peweraweracaewa tsane. Mataũtano ichamonaē jopa itacũpaetsi xua tana newecobe notsiwa xua tamonaē inta notatsi. ²⁹ Taxa barapomonaē necata. Barapon Taxa bichocono toxecha caein ainya cui, beyacaincha ichũn xua ainya cui. Dapon aibi pon Taxa wecobe notatsi xua piamonaē tatsi tanotatsi. ³⁰ Xan, irũ Taxa bara caein panbe, jei Jesús.

³¹ Nexata judiomonaē ibotoxi nota xua Jesús pecuinbabiwa tsainchi. ³² Jesús barai barapomonaē, jeye:

—Paxantha matowa exaneiban pexeinya tatsita itũtsi coyenewan Taxa pia peayapũwatha tatsi. ¿Eta po tatsita itũtsi coyenewan taexanaexae ibotoxitha painya necuinbabichi? jei Jesús.

³³ Judiomonaē jume nota, jeye:

—Jopa apara daxota paca cuinbabichi poxoru pexeinya petsita itũtsi coyenewan neexanaexae. Daxota paca cuinbabatsi tsipei jam: ‘Xan irũ Taxa bara caein panbe’, jam. Baxua apara abe paebame tsipei be Nacom naexaname jinya coutha poxonaē saya pebim, jei judiomonaē.

³⁴ Jesús barai, jeye:

—Nacom Pejume Diwesitha yabara paebatsi pomonaē Nacom pejume cowũntsiwichi. Nacom jeye: ‘Paxam irũrũ nacommonaē pam’, yabara jei Nacom, pomonaē pejume cowũntsiwixaetsi. ³⁵ Nacom paeba xua pinae pomonaē petajume cowũntsiwixaetsi pejume diwesi barapomonaē pinae bara nacommonaē tsenae. Mataũtano waxainchi yaputainchi barapo diwesitha xua jopa bapana Nacom naerabiyo. ³⁶ Nacom neitapeta, neitorobano tapatopaenexa barapo cae pin nacuathe. ¿Eta xua metha papaebame xua xan abe paeban poxonaē jan: ‘Xan Nacom Pexanton’, jan? ³⁷ Icha jopa exanaeinyo pocotsiwa Taxa neitoroba painya xoba pana nejume cowũntame baxua. ³⁸ Icha exanan pocotsiwa Taxa neitoroba, bapoxonaē pana necui yabara jume cowũnde pocotsiwa exanan, bequein jopa pana nejume cowũntsim xua paca tsipaebatsi. Bapoxonaē xain payaputaename xua xan Taxa nebarũ popona, xua barichin xua Taxa barũ poponan, jei Jesús.

³⁹ Equeicha barapomonaē ichichipa xua Jesús pewaetabiwatsi ichitha Jesús naetsiriwa barapomonaē weya.

⁴⁰ Nexata Jesús pijimonaē caibe barũ nawiya icha muxunene beya xua Jordán mentha. Baraxotiya Jesús pijimonaē barũ eca, ichaxota Juan bayatha bautisaba jiwi. ⁴¹ Pin bicheitomonaē Jesús siwa poinchi pejume taenexatsi. Barapomonaē Jesús yabara natsipaebatsi, najei:

—Xaniyei bequein Juan pexeinya petsita itũtsi coyenewan jopa exanaeyo daichitha daxita pocotsiwa xua Jesús yabara paebatsi, daxita baxuan bara apara xainyei, najei barapomonaē.

⁴² Baraxotiya pin bicheitomonaē Jesús yabara jume cowũntatsi.

11

Meje yabara poxonaē Lázaro tũpa

¹ Irũ pebin popona, pon pewũn Lázaro. Bapon atene. Bapon Betania tomarapin. Irũrũ bapon Lázaro pamchobe tatsi barichi Betania tomarapiwayobe. Barapo pamchobe tatsi ichowayo pewũn María, ichowayo pewũn Marta. ² Barapowa María, powa Lázaro pamcho tatsi, powa Jesús taxu epatabinchi icha matabitha penasiwatha xua petuxueiwa xuano xua taxu tsewa exanaeinchi pentanatha. ³ María pamchobe najume caitorobabe ichũnthath icha tomara beya xua baxotiya Jesús beya petacajume jeichinexatsibe:

—Patatanecanamataxeinaein, jinya jiton atene, petacajume jeichinexatsibe bapon.

⁴ Poxonaē Jesús baxua jume tane, Jesús jeye:

—Bequein Lázaro atene ichitha barapo peatenewa jopa exanaeyo xua tupa peex-aneibiwa ataya. Saya atene, apara Nacom pia jiwi tsita itutsichi pia peayapusya itorobi coyenewa. Matautano iru xan Nacom Pexanton jiwitha tatsita itutsinexa taayapusya itorobi coyenewa, jei Jesús.

⁵⁻⁶ Bequein Jesús antobe Marta iru María iru Lázaro ichitha cataunxuae eca baxotiya ainya matabibe poxonae jume taetha xua Lázaro bayatha atene nawita. ⁷ Pirapae Jesús daxita pijimonae barai, jeye:

—Caibeya poinchi Judea nacua beya, jei Jesús.

⁸ Nexata daxita Jesús pijimonae baraichi, jeye:

—Pon Patatanecuidubim, cain judiomonae, Judea nacua ichichicha cacuinbaba ibotoxitha. Dacotsiwa equeicha jinya ponaetsi barapo Judea nacua beya, jeichichi.

⁹ Jesús barai, jeye:

—Caentacabi doce po horabe xeina poxonae pentha tsuncuae. Icha pebin mataqueitha popona jopa xuirapopaeyo pentha petsuncuaexae barapo cae pin nacuathe. ¹⁰ Barichin poxonae cataunxuae poponan barapo cae pin nacuathe bewa exanaein xua Taxa pocotsiwa neitoroba. Tsipei poxonae tupaen jopa neitacupae tsane xua exanaein baxua, barapo cae pin nacuathe.

¹¹ Pirapae Jesús daxita pijimonae barai, jeye:

—Wajiton, Lázaro, maituncua. Ichitha tha bexa yaubaxuichi, jei Jesús.

¹² Nexata daxita Jesús pijimonae baraichi, jeye:

—Patatanecanamataxeinaem, icha bapon maituncua, ¿metha poxoru anoxuae yasa-tatsi, daxota baxua paebame? jeichichi.

¹³ Ichitha Jesús namchi: “Lázaro bayatha tupa”, jei, xua poxonae jei: “Lázaro maituncua”, jei. Daichitha Jesús pijimonae tatsi nanta xeina xua metha Lázaro maituncua icha merawi ichi poxonae maiteca. ¹⁴⁻¹⁵ Bapoxonae Jesús pijimonae tsita najume itapeinya xeina, jeye:

—Lázaro bayatha naxuba. Pacata daxua wunae xua jopa baxotiya poponaeyo poxonae Lázaro tupa. Tsipei baxua painya nejume cowuntsinexa, daxota jopa nainya ponaeyo. Antha poinchi bara beya ichaxota Lázaro boca, jei Jesús.

¹⁶ Nexata Tomás, pon icha wun Gemelo peweichobe penama naexanaexaebe, bapon Jesús pijimonae tatsi baraichi, jeye:

—Bu naca baru pona Jesús, xain Jesús naca baru werapa, jei Tomás.

Meje yabara xua Jesús namchi: “Xan pon jiwi asu taexanaein petupae cuiru coyene weya”, jei

¹⁷ Poxonae Jesús pijimonae baru patopa Betania tomaratha, jiwi Jesús tsipaebatsi xua pinae bayatha Lázaro cuatro po matabibe yapucaewa xua muthutha xotsi. ¹⁸ Betania tomara tajuyo itamataeca Jerusalén tomara saya tres po kilómetro epatiyobe xeina.

¹⁹ Pinmonae judiomonae Marta iru María siwa poinchibe pia botha tatsi peitanuwe matataenexa tsainchibe petatupaexaetsibe peweicho tatsi. ²⁰ Poxonae Marta yaputane xua Jesús pijimonae baru patopa, bapowa bo wejonarena xua Jesús pententa weyataeya wabinexatsi. Ichitha nama María botha eca. ²¹ Marta Jesús baraichi, jeye:

—Pon Necanamataxeinaem jiwi, icha bayatha xote ecaetsipame, metha bayatha jopa tupaetsipae taeweicho. ²² Yaputan xua methaunxuae Nacom cacatsina daxita pocotsiwa newucaewam, jei Marta.

²³ Jesús barai, jeye:

—Eweicho equeicha cata asu poponaena, jei Jesús.

²⁴ Marta Jesús baraichi, jeye:

—Aa, bara yaputan xua equeicha asu poponaena poxonae po mataqueitha daxita jiwi Nacom asu exanaena petupae cuiru coyene weya poxonae po cae pin nacue daxita weraweracaena, jei Marta.

²⁵ Nexata Jesús jume barai, jeye:

—Xan apara barapo jiton, pon jiwi asu jinompa taexanaein petupae cuiru coyene weya. Matautano xan pon jiwi tacatsin peajuntuyapusuwa, po peajuntuyapusuwa jopa weraweracaeyo. Pon nejume cowunta bequein bara tupa ichitha equeicha asu poponaena. ²⁶ Pon xeinaena peajuntuyapusuwa xuano xua nejume cowuntsina, bapon bapana jopa weraweracae tsane. ¿Baxua bara yabara jume cowuntame? jei Jesús xua Marta tsipaebatsi.

²⁷ Bapowa jume nota, jeye:

—Aa, Tanecanamataxeinaem, bara baxua yabara jume cowuntan xua xam Mesías pon Nacom Pexantom, pon bewa juinya patopaename po cae pin nacuathe tsique, jei Marta.

Meje yabara poxonae Jesús itamata wecoyei tsuncuae ichaxota Lázaro yamuthu uncu

²⁸ Poxonae Marta najume weta xua Jesús tsipaebatsi, bapoxonae Marta pamcho waba powa pewan María. Marta nameicha pamchotha jeye:

—Pon jiwi Pecuidubin xote patope, cawaba, jei Marta.

²⁹ Poxonae María baxua jume taeba, bapoxonae caena nainya ponataba Jesús petanexatsi. ³⁰ Jesús abu cataunxuae pijimonaе jopa baru ponaeyo tomaratha. Jesús caxinatsi ichaxota copiya Marta Jesús caxinatsi. ³¹ Judiomonaе pomonaе María pamchobe itanuwe matateicatsibe xua pomonaе pia botha tatsi taenatsibe, poxonaе barapo judiomonaе tane xua María nainya ponataba, iruru barapomonaе napuna pona. Barapo judiomonaе nanta xeina xua mexeya itara María pamchobe muthu beya ponabewei xua pewecoyeinexabe ichaxota peweichobe tatsi tayamuthu uncuatsibe.

³² Poxonae María itamata patopatsi María pentabocototha uncu, yawa Jesús baraichichi, jei:

—Tanecanamataxeinaem, icha bayatha xote ecaetsipame metha bayatha pata taewecho jopa tupaetsipae, jei María xua Jesús tsipaebatsi.

³³ Jesús tane xua María wecoyei. Taneno xua judiomonaе pomonaе napona xua iruru wecoyei. Bapoxonaе Jesús unthuthu wecoyei yawa anthuthurewe. ³⁴ Jesús baraino barapomonaе, jeye:

—¿Exota Lázaro pamuthuthu xubame? jei Jesús.

Jesús jume notatsi, jeye:

—Pon Necanamataxeinaem jiwi, xotiye incane matha taema, jei barapomonaе.

³⁵ Iruru Jesús wecoyei tsanareca. ³⁶ Bapoxonaе judiomonaе Jesús yabara jeichichi, jeye:

—Incane pataema maisa bapon Lázaro bichocono antobetsi, najei judiomonaе.

³⁷ Ichitha ichamonaе judiomonaе Jesús yabara jeichichi:

—Icha bapon itacupatsi xua pon peitata nacutsin axaibi exainchi, zeta xua metha bapon jopa itacupaetsi xua Lázaro yawenatsi xua bayatha jopa tupaetsipae? najei judiomonaе.

Meje yabara poxonae Lázaro equeicha asu popona

³⁸ Equeicha Jesús bichocono anthuthurewe. Yawa imoxoyo pijimonaе baru pona muthu beya. Barapo muthu ibo muthu, yawa muthu yauxatatabanota pin ibo panawatha. ³⁹ Jesús barai barapomonaе, jeye:

—Papataxore ibo panawa, jei Jesús.

Lázaro pon tupa bapon pamcho tatsi Marta, Jesús jeichi:

—Patatanecanamataxeinaem, apara bayatha pepon bichocono tuxamna, tsipei bayatha cuatro po matabibe yapucaewa poxonaе tupa, jei Marta.

⁴⁰ Ichitha Jesús Marta jume baraichi, jeye:

—Bara bayatha catsipaebatsiba: Icha yabara jume cowuntame, necotsiname Nacom pia peayapusuwa, cajeichiba, jei Jesús.

⁴¹ Nexata ichamonaе ibo panawa pataxuba. Bapoxonaе Jesús peitaboco beicha athabeicha necoicha. Yawa jeye Paxatha:

—Axa, juntu coyene weiweinan, yaitama nejume taneme pocotsiwa tacawucaexaetsi.

⁴² Bara yaputan xua nejume taibame poxonaе cawuqueibatsi. Apara catsipaebatsi baxua

xua pomonae xote umene barapomonae nexa xua tana neyabara jume cowuntsinexa xua xan pon tana neitorobim, jei Jesús.

⁴³ Poxonae Jesús najume weta baxua, bapoxonae jume daunweya wawai, jeye:

—¿Lázaro, bara wejondena! jei Jesús.

⁴⁴ Bapoxonae pon xua tupa muthu wejondena. Xua bayatha paparuwatha maxu caecunta cubaxotsi yawa pesito decano yawa xua painyaweratha itabara yarabaxotsi, baxuan Lázaro yawa jondena. Jesús barai jiwi, jeye:

—Daxita baxuan paweisacare, bapoxonae bu bara pona, jei Jesús.

Meje yabara poxonae fariseomonae iru sacerdotemonae pia pentacaponaeawi tatsi daxita barapomonae Jesús yabara nanta xeinatsi xua po coyeneya Jesús pewaetabiwa tsainchi (Mt 26.1-5; Mr 14.1-2; Lc 22.1-2)

⁴⁵ Judiomonae pomonae María pamchobe cueyatatsibe, poxonae barapo judiomonae baxua Jesús cui tainchi Jesús yabara jume cowuntatsi pinmonae. ⁴⁶ Ichitha ichamonae judiomonae fariseomonae beya pona xua peyabara paebinexa pocotsiwa bayatha Jesús exana. ⁴⁷ Nexata fariseomonae iru sacerdotemonae pia pentacaponaeawi tatsi daxita barapomonae nacaetuta penacanamata caitorobi bicheitha, yawa najei barapomonae:

—¿Eta xua exanaeinchi metha? Barapo pebin exana nawita pexeinya petsita itutsi coyenewan. ⁴⁸ Icha baraxua saya yabara cui copatinchi metha pinmonae bapon yabara jume cowuntsinchi. Barapoxonae romanomonae pia pentacaponaeawi patsina waxantha, yawa abe exanaena Nacom pin pia bo tatsi xua watomaratha, yawa wanacuatha naca jutebina, najei barapomonae.

⁴⁹ Caecin bapomonae jiwana pewun Caifás. Bapon Caifás barapo weitha sacerdotemonae pia pepa pentacaponaein tatsi naexana. Bapon Caifás jei pin bicheitha:

—Paxam apara jopa baxua payabara yaputaem. ⁵⁰ Matautano jopa payabara yaputaem xua po coyene pacata xanepana xua ichun bara caecin piamonae yaitatsina pebexubinexatsi xua daxita piamonae tatsi jopa petajutebinexa tsainchi, jei Caifás xua piraichi nanta xeina.

⁵¹ Ichitha Caifás jopa baxua pia coutha nanta xeinaeyo. Tsipei Caifás barapo weitha sacerdotemonae pia pepa pentacaponaein tatsi naexana, daxota tsiwunaeyabara paeba xua Nacom cueicueije exana xua Jesús bewa tsitupaena judiomonae. ⁵² Meisa barapo judiomonae Jesús jopa tsitupaeyo, apara iruru ichamonae nexano Jesús tsitupa xua Jesús caemonae nacaetuta peexanaenexa pomonae Nacom piamonae tatsi, pomonaeno tajue ena ichaxota icha nacuantha. ⁵³ Daxota barapomonae judiomonae pia pentacaponaeawi tatsi nabanu muxu jei po coyeneya xua poxonae Jesús pebexubiwa tsainchi.

⁵⁴ Daxota Jesús jopa naitapeinya xeinaeyo judiomonaetha. Saya Jesús Judea nacua wewarapiya, tomara beya pona po tomara pewun Efraín, po tomara eca ichaxota ira xuepana susato tsurucuae nacua. Barapo tomaratha pijimonae baru eca Jesús.

⁵⁵ Bara nama imoxoyo tsurucuae tsoponae po matabin xua judiomonae pia Pascua wun matabin tatsi. Pin bicheitomonae tomara weya pona xua Jerusalén tomara beya pona xua baxotiya pia cui coyenewa peexanaenexa Nacom nexa, xua Nacom jopa petsita natsicuentinexatsi xua abe petsita peexanaexae. Tsipei pia peitorobi coyenewatha tatsi baxua yabara paeba xua barapomonae bewa baxua exanaena Pascua wun matabin pewunaeya. ⁵⁶ Daxita barapomonae Jesús wenaweneichi. Poxonae barapomonae Nacom pin pia botha pata, baxota barapomonae najei:

—¿Etabe payabara nanta xeinaeya ichim? ¿Metha Jesús xote patopaena jampa? ¿Metha jopa patopae tsane jampa? najei barapomonae.

⁵⁷ Fariseomonae iruru sacerdotemonae pia pentacaponaeawi tatsi daxita barapomonae jiwi baraichi, jeichichi:

—Pon tane Jesús, nexata bu pana netsipaeba, xua bapon pata tha waetabichi, jei barapomonae.

12

Meje yabara poxonae petsiriwa Jesús mata epatabatsi penasiwa, po penasiwa petuxueiwa (Mt 26.6-13; Mr 14.3-9)

¹ Poxonae cataunxuae seis po matabibibe aibi xua Pascua wun matababin nexa, Jesús pijimonaе baru pona Betania tomara beya. Barapo Betania tomara, po tomara ichaxota Lázaro popona, pon Jesús bayatha asu exana petupae cuiru coyene weya.

² Baxota pexaewa Jesús upain exanatsi. Marta apata pexaewa. Jesús pijimonaе tatsi iru naena pexaethopaewatha. Iru Lázaro baxota naeca xua iru naxane. ³ Iru bapoxonae María carena bosibu bichocono wunca petuxuei nasiwa. Barapo tuxusi tuxuei nasiwa bichocono ainya matoma. Barapo tuxusi tuxuei nasiwa pewun nardo. Barapo petuxuei tuxusi nasiwatha María Jesús mata epatabatsi yawa taxu epatabatsino. Bapoxonae María pentanatha Jesús taxu tsewa exainchi. Daxita bomuxu tutu canaupra ducua xua tuxuei tsurucuae. ⁴ Iruru naeca Judas Iscariote, pon Simón pexanto tatsi. Bapon Judas Jesús pijimonaе tatsi jiwana. Barapo Judas pon bexa Jesús caenaetsinchi. Bapon namchi, jeye:

⁵ —¿Eta pocotsiwa metha saya xuba barapo tuxusi tuxuei nasiwa? Barapo petuxuei tuxusi nasiwa becaenaetsipame xua nentoma xeinaenexa beyacaincha xua trescientos po paratiximonaеbe xua po paratiximonaеbe beyacaincha trescientos po matabibibe nexa, poxonae nacuita, jei Judas Iscariote.

⁶ Judas apara jopa baxua paebiyo xua peantobexaetsi pomonaе peacopeibiwi. Saya apara baxua paeba poxoru bapon pon pecaibin jiwi. Bapon Judas Jesusbaru paratixi dunucue tacapoinchi. Ichitha bapon cou jiwana wenoteiba paratixi poxonae Jesusbaru jeiba. ⁷ Nexata Judas Jesús barai, jeye:

—¡Moyande bara copare! Apara xua barapowa netsibota barapo petuxuei tuxusi nasiwa tapepon nexa xua tatupaein tana neperu waenexa poxonae po mataqueitha muthiya tana neboyaenexa tsane. Baxua netsibota apara xua muthu tana neboyaenexa poxonae tupaein. ⁸ Barapo irathe peacopeibi jiwi paca baru jinompeibina painya neyawenaenexa tsaibi tsane barapo jiwi. Ichitha nama paxam jopa ataya paca baru poponaе tsainchi xua pata tana neyawenaenexam barapo irathe, jei Jesús.

Meje yabara poxonae sacerdotemonaе pia pentacaponaewi tatsi peburuya nanta xeina xua Lázaro pebexubiwa tsainchi

⁹ Pinmonae judiomonaе jume tane xua Jesús popona Betania tomaratha. Bapoxonae barapo judiomonaе pona Betania tomara beya xua Jesús petaenexatsi iruru xua Lázaro petaenexatsi pon Jesús bayatha asu exana petupae cuiru coyene weya. ¹⁰ Nexata sacerdotemonaе pia pentacaponaewi tatsi peburuya nanta xeina xua iru Lázaro pebexubiwa tsainchi. ¹¹ Tsipei pinmonae judiomonaе penta sacerdotemonaе pia pentacaponaewi tatsi pia pecuidubiwan tatsi. Matautano barapo judiomonaе saya Jesús jume cowantatsi tsipei Jesús cui tainchi pocotsiwa Jesús wunaе exana poxonae Lázaro asu exainchi petupae cuiru coyene weya.

Meje yabara poxonae Jesús Jerusalén tomaratha patopa (Mt 21.1-11; Mr 11.1-11; Lc 19.28-40)

¹² Icha mataqueitha baya xua poxonae po mataqueitha Jesús taxu wainchi petuxuei nasiwatha, bapoxonae Jesús pijimonaе baru pona Jerusalén tomara beya. Bapoxonaeru Jeruslén tomaratha ena pin bicheito pomonaе xua copiya bayatha pata Pascua wun matababin nexa. Daxita barapomonaе yaputane xua anoxuae methaunxuae patopaena Jesús barapo tomaratha. ¹³ Barapo pin bicheito peaxu ucuboba po axu icha coichaxu axu ichi. Barapomonaе Jesús matenta iyiyatsi xua Jesús pententa weyataeya wabinexatsi. Yawa jume daunweya wawaya jeye:

—¡Pai jayana! ¡Maisa Jesús pon Pecanamataxeinaein jiwi deta wunaе, bapon patopa Nacom peitorobixae! ¡Maisa Nacom bichocono wunaе jaintatsi pon peitabocotha eca! ¡Maisa Jesús deta wunaе, pon Israel nacuamonaе itorobiya pia pepa Peewatsinchi tatsi! jei barapo pin bicheito.

¹⁴ Bapoxonae Jesús tane burro pon penun. Bapoxonae barapo burrotha equeica yawa ponano namtotha. Jesús exana be pocotsi coyeneya caena bayatha yabara paebatsi Nacom Pejume Diwesitha, xua Mesías pepatopaewa tsane Jerusalén tomaratha, jeye:

¹⁵ “Sión tomarapiwi pam, jopa pajunuwinde.

Pataema pon itorobiya pepa painya Nepacacaewatsin.

Bapon pacata patopaena xua burrotha equeicaena”, jei Nacom Pejume Diwesitha.

¹⁶ Bapoxonae Jesús pijimonae tatsi jopa yaputaeyo po coyene xua caena bayatha Jesús wunae yabara tsiwunae paebatsi, xuano xua po coyene exanaenano. Ichitha pirapae poxonae Jesús caibe nawicha peitaboco beicha, yawa poxonae Paxa matenta weyataeya wabatsi, bapoxonae barapomonae yaputane po coyene Jesús yabara tsiwunae paebatsi Nacom Pejume Diwesitha, xuano xua jiwi exana poxonae Jesús wunae jaintatsi.

¹⁷ Pomonae napona poxonae Jesús Lázaro wabatsi petupae cuiru coyene weya, barapomonae tamropata notarucupa xua jiwitha paeba pomonaetha pomonae Jerusalén tomarapiwi, pomonae bayatha Jesús pecui taexaetsi poxonae Lázaro asu exainchi.

¹⁸ Daxota pinmonae pona Jesús beya xua Jesús pematenta weyataeya wabinexatsi. Tsipei barapo pinmonae jume tane pocotsiwa Jesús exana pexeinya petsita itatsi coyenewa poxonae Lázaro asu exainchi. ¹⁹ Nexata fariseomonae caemonae natsipaeba, najei:

—¡Incane matha pataema! Barapomonae jopa naca jume cowuntsiyo, yawa daxita jiwi meisa napuna pona bapontha, najei barapomonae.

Meje yabara poxonae griegomonae Jesús wenaweneichi

²⁰ Barapo pin bicheito, po bicheito copiya bayatha Jerusalén tomaratha ena, xua baxota wunae pejainchinexa Nacom, barapo pin bicheito jiwamonae, griego nacua-monaepiwi jiwana. ²¹ Barapo griego nacua-monaepiwi Felipe imoxoyo caquita poinchi. Barapon Felipe Betsaida tomarapin xua Galilea nacua. Barapo griego nacua-monaepiwi Felipe tsipaebatsi, jeichichi:

—Incane matha pana nejume taema. Pata bequein Jesús taetsi, jei.

²² Bapoxonae Felipe jume yopita Andrés beya, xua equeicha baponbe pejume yopichinexabe Jesús beya. ²³ Bapoxonae Jesús baraponbe baraichi yawa daxita barapo jiwi baraichi, jeye:

—Nama imoxoyo barapo matacabi tsoponae, po mataqueitha xan, ponxaein Nacom tana neitapetsixae nebexubina ichamonae. Barapo mataqueitha Nacom ainya cui neexanaena. ²⁴ Xaniyan paca tsipaebatsi. Poxonae trigo xuto saya xu boca yawa icha jopa xu bocaeyo tsorobo tututha, yawa icha jopa xuwiyo, jopa itacupaetsi xua pexaewa naexana. Ichitha icha barapo trigo xuto tsorobo tututha boca yawa icha xuwa, bapoxonae jame bara pexaewa naexana. Icha barapo trigo xuto ichi, xan barapocotsi coyeneya jiwi bara necana ichi tsane. ²⁵ Pon naantobeya nata exana pocotsiwa bapon ichichipa po cae pin nacuate, bapon jopa xeinaeyo peajuntuyapusuwa, po peajuntuyapusuwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan, bapon xeinaena peajuntuyapusuwa, po peajuntuyapusuwa ataya tsiteca xua Nacom pia nacua beicha. ²⁶ Pon ichichipa exana tawa xua penacuichiwa, bapon bara bewa moya exanaena pocotsiwa itoroban. Pon exana pocotsiwa itoroban, bapon patopaena ichaxota poponan. Icha pebin exana pocotsiwa itoroban, bapon Taxa cana exanaena xua bapon peainya cui jiton tsane Taxa pia nacua beicha tatsi, jei Jesús.

Meje yabara poxonae Jesús nayabara paeba xua petupaewa tsane

²⁷ Equeicha Jesús jeye: “Anoxuae bichocono anthuthurewein tsipei tatupaewa tsaneba. ¿Eta jumichicuaein tsane metha Taxatha? ¿Metha jan tsane: ‘Axa, necapanepare baxua weya’, metha jan tsane? Jume, apara jopa baxua tsipatopeicaeinyo. Apara tsipatopeican xua taaperutanewa tsane jiwi nexa. ²⁸ Jame bejan: ‘Axa, bara bu jiwi cana exaname xua wunae necajainchiwa’, bejan jame”, jei Jesús.

Poxonae Jesús baxua najume weta, bapoxonae Jesús jume tane xua Nacom namchi peitaboco wetsica, jeye: “Bayatha apara baxua jiwi cana exanan xua jiwi w̄nae tana nejainteibiwanexa, tsipei daxita beta exanan. Matautano equeicha ichawa exanaein xua jiwi w̄nae tana nejainteibiwanexa tsane”, jei Nacom.

²⁹ Pinmonae umena xua Jesús jume taeumeinchi, ir̄u Jesús pijimonae tatsi baxota umenar̄u. Barapo jiwi baxua nayabara yainyaba xua Nacom cueicueije. Ichamonae jeye:

—¡Apara xua jurujurei yam̄x̄u! jei.

Ichamonae jeye:

—¡Apara bapon tsipaebatsi matatsunpin! jei.

³⁰ Nexata Jesús pijimonae barai, jeye:

—Pon pajume taneme apara Nacom. Jopa apara paebiyo xua xan nexa. Apara paeba pia xua painya nejume taenexa daxota baxua Nacom paeba. ³¹ Imoxoyo nama matabi patopaena, po mataqueitha Nacom yabara paebina jiwi xua penatsicuentisiwa xua abe peexanaexae bapontha. Pon jiwi j̄nt̄u coyene itorobatsi xua abe peexanaewa po cae pin nacuathe, nama imoxoyo Nacom amanayabina bapon poxonae xubina barapo cae pin nacue weya. ³² Poxonae ichamonae nedutsina naetotha tat̄upaenexa tsane, bapoxonae daxita jiwi cana exanaein xua pomonae peichichipaewa tsane xua tana nejume cow̄ntsinexa, jei Jesús.

³³ Poxonae Jesús baxua paeba jiwi yaputane exainchi xua Jesús pebexubiwa tsainchi poxonae t̄upaena. ³⁴ Bapoxonae barapo jiwi Jesús tsipaebatsi. Jesús jeichichi:

—Paxan pajume tan xua poxonae wamonae yoroba Moisés pia peitorobi coyenewatha pocotsiwa baxota jeye: ‘Bara Mesías ataya as̄u poponeiba’, jei baxota. ¿Eta xua metha pana netsipaebame xua pinae pon Nacom Peitapetsin bewa naetotha t̄upaena? ¿Jintam metha pon Nacom Peitapetsin? jei barapomonae.

³⁵ Nexata Jesús tsipaeba barapomonae xua nacaunuta, jeye:

—Saya caeto pana netaneme pon paca yaputane exainchi. Beta pajinompame tapaca yawenaexae tsainchi, icha paichim xua beta pajinompame poxonae xometo paca yawena xua beta pajinompame mataqueitha. Pana nejume cow̄nde poxonae cataunxuae po cae pin nacuathe poponanje. Matautano poxonae cataunxuae paca itac̄pa xua pata tanejume cow̄ntsiwam. Jopa abe paexanaeinde xua poxoru poxonae jopa pata tanejume cow̄ntsixaemxae. Tsipei bara j̄tiya ichi, poxonae jiwi abe exana be poxonae pomonae pona ichaxota quirei. Jopa beta ponaeyo tsipei jopa xeinaeyo peicocha. ³⁶ Pana nejume cow̄nde poxonae cataunxuae po cae pin nacuathe poponanje. Bapoxonae paxam tajimonae pam tsane, jei Jesús.

Poxonae baxua Jesús najume weta, barapo jiwi weya natsixitaba yawa wepu aichurucuae.

Meje yabara poxonae Jesús yabara paeba xua eta xua metha pinae Jesús jopa jume cow̄ntichi judiomonae

³⁷ Bequein Jesús matowa exana pia pexeinya petsita it̄tsi coyenewan barapomonae peit̄tha tatsi, daichitha pinmonae barapomonae jopa Jesús yabara jume cui cow̄ntichi po coyene xua Jesús bara bapon Mesías pon Nacom itorobica. ³⁸ Baxua exana xua nayabara jume cui weta po coyene bayatha pon Nacom peitorobi jume pepaebin Isaías w̄nae tsiwanaya yabara jei:

“Pon jiwi Necanamataxeinaein barapomonae jopa jume cow̄ntsiyo xua pacuiduban bequein barapomonae tane matowa poxonae paexanan Nacom pia peayapus̄watha”, jei Isaías.

³⁹ Barapomonae jopa jume cow̄ntsiyo, tsipei Isaías equeicha jei:

⁴⁰ “Nacom cana exana xua barapomonae jopa beta xapain naita cui coyene yaputaeyo. Matautano Nacom cana exana xua jopa pejume

cowantsiwa pejuntũ coyene wetsina.
 Barapomonaē be natsicotane peitata nacutsi
 jiwi, tsipei jopa beyaputaeyo, xua
 icha jũntũ coyene pexeinaewanexa.
 Matautano jopa ichipaeyo xua peyabara jume
 cowantsiwa po coyene xua Nacom itacupatsi
 xua pejuntũ coyene xanepana peexanaewa”,
 jei Isaías pejume diwesitha.

⁴¹ Daxita baxuan Isaías paeba xua Jesús yabara paebatsi. Isaías caena bayatha tane poxonaē eca Mesías pia pexeinya pia peitũpanaē peecaewatha. Daxota Isaías yabara paeba, Mesías yabara paebatsi xua pocotsiwa bayatha petaexaē.

⁴² Bequein daxita judiomonaē Jesús jopa jume cowantichi, daichitha ichamonaē judiomonaē Jesús jume cowantatsi. Matautano ichamonaē judiomonaē xua pomonaē judiomonaē pia pentacaponawewi tatsi Jesús jume cowantatsi. Ichitha daxita barapomonaē jopa Jesús yabara paebichi jiwi peitũtha tatsi tsipei fariseomonaē cunuwatsi. Tsipei icha barapomonaē Jesús yabara paebichipatsi, metha barapomonaē itawetsipatsi judiomonaē pia penacaetutsi bon tatsi weya, xua fariseomonaē itawetsipa. ⁴³ Tsipei barapo Jesús pia pejume cowantsiwichi pijunuwi daxota itapeta jume naitawata xua jiwi jei: “Jopa Jesús payabara paebinde”, jei jiwi. Barapomonaē pomonaē Jesús pejume cowantsiwichi baxua itapeta jume naitawata beyacaincha xua poxonaē bequein Nacom cui itoroba.

Meje yabara xua po jume Jesús paeba barapo jumetha jiwi yabara paebinchi xua penatsicuentiwa xua abe peexanaexaē

⁴⁴ Equeicha Jesús jume daunweya jeye: “Pon nejume cowanta meisa jopa nejume cowantsi tsane, jame Taxa jume cowantsinchino pon tana neitorobixaē. ⁴⁵ Pomonaē xua neyaputane barapomonaē barichi Taxa yaputainchi. ⁴⁶ Xan pon yabara yaputane paca cana exainchi Nacom. Patopeican po cae pin nacuathe xua pomonaē tana nejume cowantsiwi jopa penantawenonaenexa xua pejinompaewa poxonaē jopa Nacom yabara yaputaetsi. ⁴⁷ Pon bequein jume tane tajume diwesi xuano xua icha bequein jopa exanaeyo tana nejume taewatha pocotsiwa itoroban, bapon jopa yabara paebin tsane xua penatsicuentiwa xua abe peexanaexaē Nacomtha. Tsipei apara jopa baxua tsipatopaeinyo xua tacoya barapocotsi jiwimonaē tayabara paebinexa xua penatsicuentiwa xua abe peexanaexaē Nacomtha. Jame apara tsipatopan xua jiwi ƚ tacapanenebiyaenexa tsane. ⁴⁸ Pon jopa tsita ainya cuichi xua jopa tsita ainya cuinyo, xuano xua icha jopa jume cowantsiyo pocotsiwa paeban po jume aunxuae paeban, bapon barapo jumetha yabara paebinchi xua penatsicuentiwa xua abe peexanaexaē poxonaē po mataqueitha nacua weraweracaena. ⁴⁹ Tsipei xan jopa paebinyo pocotsiwa tacoutha taichichipaewa. Saya apara baxua daxita exanan pocotsiwa Taxa neitoroba pocotsiwa bewa paebin xuano xua pocotsiwa bewa jiwi cuidubin. ⁵⁰ Yaputan Taxa pia peitorobi coyenewa, barapo peitorobi coyenewa jiwi cana exainchi xua pexeinaewa peajũntũyapũwa, po peajũntũyapũwa ataya tsiteca. Daxota pocotsiwa paca tsipaebatsi apara xua Taxa bayatha tana neitorobixaē”, jei Jesús.

13

Meje yabara poxonaē Jesús pijimonaē taxu matawane meratha

¹ Barapoxonaerũ bara barapo matakabi tsuxubi, po matakabi tsiwanaya mata carucua xua Pascua wũn matakabin. Jesús yaputane xua bara nama imoxoyo bara po matakabi tatsoponaetsiba, po mataqueitha Jesús cuenta ponaena po cae pin nacue xua Pacha beicha peponaewa tsane. Jesús antobe tsaibi pia pejume cowantsiwichi pomonaē xua tajinompatsi po cae pin nacuathe. Nama imoxoyo Jesús exana xua pocotsiwa jiwi yaputane xua Jesús jopa juniya antobeyo pomonaē pia pejume cowantsiwichi.

²⁻⁴ Judas, pon Simón Iscariote pexanto tatsi, bapon cui itorobatsi caurimonaē pia pentacaponaein tatsi xua Jesús pecaenaetsinexatsi ichamonaetha. Jesús yaputane xua

bayatha Paxa wetsica pona. Matautano xua equeicha Paxa beicha patopaena xuano xua Paxa catatsi daxita pia peayapusuya itorobi coyenewa. Baxua bequein xeina, daichitha poxonaе pijimonaе baru eca pexaethopaewatha asiya uncuataba. Yawa paparuwa nama jonta, po paparuwa matha weruya. Yawa icha paparuwatha naepa cuta. ⁵ Bapoxonaе Jesús mera epata corototha. Bapoxonaе pijimonaе taxu matawaepona meratha. Yawa paparuwatha taxu tsewa exana po paparuwatha naepa cuta.

⁶ Poxonaе Jesús Simón Pedro muxu petaxu matawaetsi, Simón jeye:

—Tanecanamataxeinaem, ¿eta pocotsiwa metha iru jinya netaxu matawaetsi? jei Simón Pedro.

⁷ Jesús jume barai, jeye:

—Xua baxue cata exanatsi anoxuae jopa yabara yaputaem. Ichitha bexa tsane baxua yabara yaputaename, jei Jesús.

⁸ Ichitha equeicha Simón Pedro jume barai, jeye:

—Bapana jopa netaxu matawaem tsane, jei Simón Pedro.

Jesús jume barai, jeye:

—Icha jopa cataxu matawaetsipaetsi meratha nexata jopa tajimonaе jitom tsipaem, jei Jesús.

⁹ Simón Pedro jume barai, jeye:

—Tanecanamataxeinaem, meisa jopa netaxu matawaeinde, jame yawa necobe matawaema, yawa nentasipa matawaema, jei Simón Pedro.

¹⁰ Jesús jume barai, jeye:

—Pon xua anoxuae nowaexuba, bapon equeicha jopa nantawenonaeyo xua pia pepon matawaeinchi, saya jame meisa petaxu. Paxam pejuntu coyene xeicaе jiwi pam, saya caein jiwana pam jopa daichiyo, jei Jesús.

¹¹ Jesús jeye: “Paxam pejuntu coyene xeicaе jiwi pam, ichitha caein jiwana pam jopa daichiyo”, jei. Jesús baxua paeba tsipei yaputane xua caein jiwana pomonaе Jesús pijimonaе tatsi, bapon Jesús caenaetinchi.

¹² Poxonaе Jesús nacobe weta xua pijimonaе taxu matawane meratha equeicha paparuwa nama xatata po paparuwa copiya nama xuenaxuba. Bapoxonaе equeicha econeca pexaethopaewatha. Yawa pijimonaе barai, jeye:

—¿Bara payaputaneme xuaunxuae pacata exanatsi? ¹³ Pana neyabara jam: ‘Pon Patatanecuidubin’, pana neyabara jam. Yawano pana neyabara jam: ‘Pon Patatanecanamataxeinaein’, pana neyabara jam. Bara xainyeya pana neyabara jam baxua, tsipei apara xan bapon. ¹⁴ Icha xan painya Tapacacuidubinchi xuano xua painya Tapacacanamataxeinaeinchi xua paca taxu matawainchi meratha bewa paxam bara paichim tsane, bewa nantiya pana nataxu matawaem meratha. ¹⁵ Baxua paca tsita exainchi xua painya bara paichinexam tsane ichaunxuae ichin. ¹⁶ Xaniyan paca tsipaebatsi. Pon ba tanacuita bapon jopa ainya cuiyo. Jame bapon pia pentacaponaein tatsi yatsicaya ainya cui beyacaincha pon tanacuita. Pon ba itorobatsi jopa ainya cuiyo. Jame pon peitorobixae bapon ainya cui. ¹⁷ Icha baxua payaputaneme yawa icha baxua paexanaenameno bapoxonaе pejuntu coyene weiweinae jiwi pam tsane.

¹⁸ “Apara jopa daxita paca yabara paebichi xua pejuntu coyene weiweinae jiwi pam tsane, tsipei caein jiwana pam jopa daichiyo. Xan paca juntu coyene yaputainchi tsipei tapaca itapetichi jiwichi pam. Ichitha nacui yabara jume wetsina be po coyeneya bayatha Nacom tsiwunaе yabara paeba pejume diwesitha. Nacom jeye: ‘Pon baru xan, pon itara mexeya tajiton, bapon equeicha caewa tana neitafaetabi jiton naexana’, jei Nacom Pejume Diwesitha. ¹⁹ Baxua pewunaeya paca tsipaebatsi xua poxonaе necana exanaena pon equeicha caewa tana neitafaetabi jiton naexana. Bapoxonaе painya yabara tana nejume cowuntsinexam tsane xua xan bapon aparán xua ponxaein paca tsipaebatsi. ²⁰ Xaniyan paca tsipaebatsi. Po pebin matenta weyataya waba pontha pon itoroban barapo pebin barapara nententa weyataya waba. Barichi pon nententa weyataya waba barapara Nacom matenta weyataya wabatsi, pon tana neitorobixae”, jei Jesús.

*Meje yabara poxonae Jesús jeye: “Judas necaenaetsina ichamonaetha”, jei
(Mt 26.20-25; Mr 14.17-21; Lc 22.21-23)*

²¹ Poxonae baxua Jesús najume weta, bapoxonae bichocono anthũthũrewẽ tsanareca. Yawa najume naitapeinya xeinaeya, jeye:

—Xaniyan paca tsipaebatsi. Caein jiwana pam bapon necaenaetsina ichamonaetha, jei Jesús pijimonaetha.

²² Nexata Jesús pijimonaetha tatsi naitabara taerũcupa, nantiya najeye: “¿Jintam metha bepa Jesús caenaetichi?” najei. Ichitha barapomonaetha jopa yaputaeyo xua Jesús yabara jei pon. ²³ Caein Jesús pijimonaetha tatsi jiwana, pon bichocono Jesús antobe, bapon Jesús imoxoyo barũ xunaeca, barapo pexaethopaewatha. ²⁴ Simón Pedro pecobetha moya jume itoroba jeye: “Jesús yainyabare: ‘¿Jintam yabara paebame?’ jande”, jei Simón Pedro xua jume itorobatsi pon Jesús imoxoyo caquita ecatsi. ²⁵ Bapoxonae Jesús imoxoyo caquita ecarenatsi equeicha. Jesús yainyabatsi, jeye:

—Tanecanamataxeinaem, ¿jintam cacaenaetsina? jei.

²⁶ Jesús jume nota, bapon jume notatsi, jeye:

—Pan pũrũwiyo tha atatsica exanaetsi. Pon catan barapo pan pũrũwiyo, bapon apara pon necaenaetsina ichamonaetha, jei Jesús pontha pon peyainyabixaetsi.

Poxonae Jesús pan pũrũwiyo atatsica exana, bapoxonae Jesús cata, Judas catatsi pon Simón Iscariote pexanto tatsi. ²⁷ Poxonae Judas barapo pan Jesús wecobe pitatsi, bapoxonae caena nainya Judas jũntũ coyene itorobatsi Satanás caurimonaetha pia pentacaponaein tatsi xua Jesús pecaenaetsiwa tsainchi. Bapoxonae Jesús jeye, Judas jeichichi:

—Xua pocotsiwa jinya anoxuae exanaetsi, moya exande nainya, jei Jesús.

²⁸ Daxita barapomonaetha pomonaetha tatsi, pomonaetha pebarũ xunaecaexae, jopa xapain yaputaeyo pocotsiwa Jesús itoroba, xua Judas itorobatsi. ²⁹ Tsipei bapon Judas paratixi dorõ capopona, daxota Jesús pijimonaetha tatsi nanta xeina xua mexeya itara Jesús itorobawejei xua pia tacomotichi pexaewa penabanaetha coyenewa nexa. Yawa nanta xeina xua mexeya itara Jesús itorobawejei xua Judas paratixi pecatsinexa peacopeibi jiwitha. ³⁰ Poxonae Judas Jesús wecobe pitatsi pan pũrũwiyo, bapoxonae Judas ponataba. Irũrũ bapoxonaetha quirei tsanaicharũ.

Meje yabara poxonae Jesús yabara cuiduba jiwi pena peitorobi coyenewa

³¹ Nexata poxonaetha Judas pontaba Jesús pijimonaetha barai, jeye:

—Imoxoyo nama paca tsita itũtsinchi taayapusũya itorobiya coyenewa xua xan apara bara ponxaein Nacom Tananeitapetsin. Barichino paca tsita itũtsinchi Nacom pia peayapusũ itorobi coyenewa tatsi. ³² Icha xan ponxaein Nacom Tananeitapetsin, icha paca tsita itũtatsi Nacom pia peayapusũ itorobi coyenewa, nexata Nacom xuya nainya paca tsita itũtsina taayapusũ itorobi coyenewa xua xan apara bara ponxaein Nacom Tananeitapetsin. ³³ Pomonaetha be tapexui tapaca canatsicotaewichi pam, bara nama saya caeto paca barũ poponaethinchi. Icha ichin xua caena bayatha xua judiomonaetha tsipaeban, bara paca jumichichi anoxuae: ‘Jopa paca itacũpae tsane xua pana nepuna ponaename ichaxota taponaeewa tsane’, paca jeichi. ³⁴ Barapo pena itorobi coyenewe paca cuidubatsi, xua janje: ‘Nantiya pana naantobeinde, icha paca ichichi xua paca antobetsi. Bewa bara paichim tsane xua nantiya pana naantobem tsane’, jan. ³⁵ Icha paxam nantiya pana naantobem tsurubenanaebiyam tsane, daxita jiwi paca cui yaputaena xua paxam bara apara tana nejume cowũntsi jiwi pam, jei Jesús.

Meje yabara poxonae Jesús namchi xua Pedro jei tsane: “Jopa dapon yaitaeyo”, pinae yabara jei tsainchi Jesús

(Mt 26.31-35; Mr 14.27-31; Lc 22.31-34)

³⁶ Simón Pedro Jesús yainyabatsi, Pedro jeye:

—Tanecanamataxeinaem, ¿jinya exota ponaetsi? jei Simón Pedro.

Jesús jume nota, jeye:

—Anoxuae jopa caitacupaeyo xua tana nepuna ponaewam ichaxota ponaein. Ichitha bexa tsane caitacupaena xua tana nepuna ponaewam ichaxota ponaein, jei Jesús.

³⁷ Nexata Simón Pedro jume barai, jeye:

—Tanecanamataxeinaem, ¿eta xua metha baxua paebame xua anoxuae jopa neitacupaeyo xua tacapuna ponaewatsi ichaxota poname? ¡Ichitha xan bara copatan xua jiwi tana nebexubinexa tacapuna ponaenexatsi! jei Pedro.

³⁸ Jesús jume barai, jeye:

—¿Bara xaniwaicha xua xam bara copatame xua jiwi necabexubinexa tana nepuna ponaenexam? Jume, apara xaniyan catsipaebatsi barapo merawithe acoibi po jumeyobebe neyabara jam tsane: ‘Jopa dapon yaitaeinyo’, neyabara jam tsane. Bapoxonae iruru wacara pebto fibina, jei Jesús.

14

Meje yabara poxonae Jesús jeye: “Xan apara pon jiwi matacaponan Taxa beicha”, jei Jesús

¹ Equeicha Jesús pijimonaem barai, jeye: “Jopa yabara nantu exabinde ichawan. Pana neyabara jume cowunteibare yawano Taxa payabara jume cowunteibareno. ² Taxa pia nacua beicha bon nawita ichaxota jiwi pejinompaewa. Icha bon ajibi tsipae, metha bayatha jopa paca tsipaebichipaetsi, daxota apara paeban tsipei xainyan. Daxota paca tsiwanaeya pacata tutu wunaetinchi bara po bon. ³ Poxonae wetan xua Taxa beicha taponaewa xuano xua icha nacobe wetan xua bon paca tsiwanaeya tutu wunaetatsi, bapoxonae equeicha patopeicaein. Paca caponaeinchi ichaxoteicha xua tapoponaewa tsane. ⁴ Paxam payaputaneme ichaxota ponaein. Daxota payaputanemeno po coyeneya xua painya nepatsiwa tsane baxota”, jei Jesús.

⁵ Tomás jeye Jesustha:

—Patatanecanamataxeinaem, jopa payaputaeyo po nacua beya ichaxota ponaename. Tsipei baxua jopa payaputaeyo, daxota jopa pana neitacupaeyo xua pata ponaewa po nacua beya ichaxota xam ponaename, jei Tomás.

⁶ Jesús jume nota, jeye:

—Xan apara pon jiwi tamatacaponaein Taxa beicha. Matautano xan pon xainyeya tapaebin. Matautano xan apara pon jiwi tacatsin peajuntuyaruswa, po peajuntuyaruswa ataya tsiteca. Saya meisa xan ba jiwi yawenan xua pepatsiwa Taxa beicha. ⁷ Icha paxam pana neyaputaneme bara paichim Taxa payaputaneme. Daxota anoxuae nama Taxa payaputaneme yawano patanemeno tsipei paxam pana netaneme, jei Jesús.

⁸ Nexata Felipe Jesús baraichichi, jeye:

—Patatanecanamataxeinaem, copare xua Axa pata tha taetsi. Bapoxonae juntema pata jinompaewa tsane, jei Felipe.

⁹ Jesús Felipe jume notatsi. Jesús jeye:

—Felipe, bara bayatha cabaru popoinchiba. ¿Eta xua came jopa neyaputaem? Pon ba netane barichi apara bara Taxa tainchi. Daxota jopa benejam: ‘Copare painta pata tha Axa taetsi’, jopa bepana nejam. ¹⁰ ¿Eta xua metha jopa jume cowuntsim xua bara Taxa neyanta xua bara iru Taxa yantandu? Daxita pocotsiwan paca tsipaebatsi apara jopa paebinyo pocotsiwa tacoutha ichichipan. Apara Taxa pon neyantsiya popona baxua apara exana pocotsiwa xua exanan. ¹¹ Pajume cowunde xua Taxa neyanta popona, xua Taxa iru yanta poponan xua daxota Taxa be caein panbe. Icha jopa paca itacupaeyo xua pana nejume cowuntame pocotsiwa yabara paca tsipaebatsi Taxa, moya pana necui yabara jume cowunde xua bayatha exanan pexeinya tatsita itutsi coyenewan. Baxuan jiwi tsita ituban xua bara xainyei xua Taxa neyanta popona xua daxota Taxa be caeinbe panbe. ¹² Xaniyan paca tsipaebatsi, pon nejume cowunta, bapon iru exanaena pocotsiwa exanan. Matautano equeicha ichawan mataropeicha exanaena pewnaewan beyacaincha xua pocotsiwa exanan. Tsipei xan ponaein Taxa beicha.

¹³ Daxita pocotsiwan pana newun caununaya wucame Taxa beicha, bara baxua exanaein,

tapaca catsita itutsinexatsi Taxa pia peayapusu itorobi coyenewa tatsi. ¹⁴ Bara pacata exanaeinchi poxonae pana newun caununaya wucame Taxa beicha, jei Jesús.

Meje yabara poxonae Jesús tsiwunaeya paeba xua bexa Nacom najumope tñaxu itorobina jiwitha

¹⁵ Equeicha Jesús barai pijimona, jeye: “Icha pana neantobem, moya paexande taitorobi coyenewan. ¹⁶ Icha baxua paexanaename tha bapoxona Taxa wucaetsi jan tsane: ‘Axa, ichun itorobare xua barapomona peyawenaenexatsi’, jan tsane. Bapoxona Taxa pacata itorobina pon ataya paca yantsiya poponeibina. ¹⁷ Pon Nacom itorobina, apara bapon bara pia Pejumope tñaxu tatsi, po Pejumope tñaxu tatsi paca yaputane exana xua bara xainyei xua pocotsiwa Nacom yabara. Ichitha pomona jopa nejume cowuntsiyo, barapomona jopa yaputaeyo Nacom pia Pejumope tñaxu tatsi. Daxota barapo Nacom pia Pejumope tñaxu tatsi jopa itacupaetsi xua barapomona peyantsiya jinompaewatsi. Daichitha payaputaename barapo Nacom pia Pejumope tñaxu tatsi tsipei pacata patopaena yawano ataya paca yantsiya poponaena”, jei Jesús.

¹⁸ Equeicha Jesús barai pijimona, jeye: “Jopa paca punapentsi tsainchi. Equeicha caibe patopeicaein xua tapaca baru poponaewatsi tsainchi. ¹⁹ Bara caeto jiwi jopa netae tsane pomona jopa tana nejume cowuntsiwi. Ichitha paxam pana netaename. Paxam equeicha asu pajinompaename tsipei xan equeicha asu poponaein. ²⁰ Barapo mataqueitha poxona Nacom pia Pejumope tñaxu tatsi patopeicaena, payaputaename xua xan Taxa be caein pana naexananbe iru xua paxam be caein pana necana exaname iru xua xan be caein paca cana exanatsi. ²¹ Pon yaputane taitorobi coyenewan xuano xua exana xua barapo taitorobi coyenewan paeba, bapon tsita itapeinya xeina jiwitha xua xaniwaicha bara neantobe. Taxa antobe tsane bapon, pon neantobe. Xan barichin antobein tsane bapon. Matautano yaputane exanaein xua bara bapon baru poponan”, jei Jesús.

²² Iru Judas pon seicaya ichundu, pon Judas Iscariote aibi, barapo Judas Jesús tsipaebatsi, Jesús jeichichi:

—Patatanecanamataxeinaem, zeta xua jinya meisa pana neyaputane exanaetsi xua bara pana nebaru jinompame xua jopa daichim pomonaetha pomona jopa cajume cowuntsiyo? jei Judas.

²³ Jesús Judas jume notatsi, jeye:

—Pon neantobe bapon exana pocotsiwa itoroban. Bapoxona Taxa antobe tsane bapon. Xan iruru Taxa pon caein panxaeinbe papatopaeinbe bapontha pata yantsinexa bapon. ²⁴ Pon jopa neantobeyo, bapon jopa exanaeyo pocotsiwa itoroban. Po jume diwesi xuaunxuae pana nejume taneme apara jopa nata paebinyo. Apra baxua paeban tsipei Taxa nejume caitoroba pon tana neitorobixae, jei Jesús xua Judas tsipaebatsi.

²⁵ Equeicha Jesús pijimona barai, jeye: “Daxita baxuan paca tsipaebatsi poxona cataunxuae paca baru popoinchi anoxuae. ²⁶ Inta paxam pacata Nacom najumope tñaxu itorobina. Barapo Nacom pia Pejumope tñaxu tatsi paca yawenaena. Matautano paca cuidubina xua pexainyeiwa xua Nacom yabara. Matautano barapo Nacom pia Pejumope tñaxu tatsi paca cana exanaena xua pana neyabara cananta xeinaename xua pocotsiwan bayatha daxita yabara paca tsipaebatsi.

²⁷ “Poxona paca cuenta ponaeinchi juntea jinompa paca cana exanaeinchi. Paca catinchi po coyene juntea tapopona coyenewa. Barapo juntea tapopona coyenewa jopa bara be jeta ichiyo xua jiwi barompaya juntea pia pejinompa coyenewa tatsi. Jopa yabara pana najuntu exabinde ichawan. Matauta jopa junuwiya pajinompaeinde.

²⁸ Bayatha pana nejume taneme xua ponaein jan xuano xua equeicha patopeicaein paxamtha xua paca baru poponaeinchi jan. Icha xaniwaicha pana neantobem tsipaem metha pajuntu coyene weiweinaetsipame xua taponawa Taxa beicha. Tsipei Taxa bichocono ainya cui, beyacaincha xua xan poxona cataunxuae poponan po cae pin nacuate. ²⁹ Baxua paca tsipaebatsi xua tsiwuna paeban painya tana nejume cowuntsinexam tsane poxona xaniwaicha baxua tsane.

³⁰ “Nama imoxoyo jopa neitacupaeyo xua equeicha caeto tapaca tsipaebiwa tsainchi, tsipei nama imoxoyo patopaenaba pon jiwi juntu coyene itorobeibatsi po jiwitha jopa tana nejume cowuntsiwi. Ichitha bapon jopa xeinaeyo peayapusu itorobi coyenewa xua tana neitorobiwa tsane. ³¹ Bewa exanaein pocotsiwa xua Taxa neitoroba, xua daxita jiwi peyaputaenexa xua apara bara xan ponxaein Taxa bichocono tana neantobein.

“¡Panonoba ponde! Weye poinchi”, jei Jesús pijimonaetha.

15

Meje yabara poxonae Jesús yabara paeba uva unboto xua pepa unboto

¹ Equeicha Jesús jeye: “Icha pepa unboto ichi xua petabu opina wejujuina mene xua uva thei penacoichinexa, xan bara pocotsi jata coyeneya cana ichin jiwi. Jiwi ajuntucoyeneyapusu cana exanan pomonae tana nejume cowuntsi jiwi, icha uva pabi pexeinaein ichi xua yabaca xueta xua xanepanaya petaxuwiwa tsainchi. Taxa bara jata coyeneya ichi. Taxa yawena pomonae tana nejume cowuntsiwi, pomonae xanepanaya inta pejinompaewi. ² Uva pabi pexeinaein daxita ucuboba po maxuranan xua jopa nacoichiyo. Bapoxonae daxita barapo pemaxuranan po maxuranan xua dubena xanepanaya nacoita beyacaincha xua copiya poxonae nacoita. Taxa barapocotsi jata coyeneya exana. Taxa itaweta pomonae bequein nejume cowunta ichitha jopa beta jinompaeyo xan nexa. Barichi pomonae bequein nejume cowunta ichitha saya tsiwiyo exana pocotsiwa itoroban, Taxa atene cana exana xua barapomonae atene, xua daxota barapomonae beta exanaena pocotsiwa itoroban. ³ Pajuntu coyene wunaem painya tana nejume cowuntsixaemxae xua bayatha po jume diwesi tapaca tsipaebixaetsi. ⁴ Pana necayawa jinompeibare icha ichin xua ataya paca cayawa poponeibinchi. Uva unboto maxuranawa ba poxonae iratha maxurana boca jopa ba pipatotha matono xuwouncuaeyo xua pethei perubenaenexa. Bara jata coyeneya paichim. Icha jopa pana necayawa jinompaem, jopa paxeinaem tsane xua po coyene pexeinya peajuntuyapusu coyenewa.

⁵ “Icha pepa uva unboto ichi xua xeina pemaxuranawan, bara jata coyeneya ichin. Xeinan pomonae tana nejume cowuntsi jiwi pam. Pepa uva unboto nacoita exana nawita pethei pemaxuranawantha tsipei poxoru pemaxuranawan dubena pepa uva unbototha tsica. Bara jutiya ichi icha pana necayawa jinompame bapoxonae bichocono paca juntu coyene xanepana exanaeinchi. Daxota icha pana nepentsiya jinompame jopa paca itacupaetsipae xua paexaname pocotsiwa xua Nacom ichichipa. ⁶ Pon jopa necayawa poponaeyo bapon Taxa itawetsina, icha xua uva pabi pexeinaein ichi. Bapon petupae maxuranawan nota xua bayatha ucobobeba yawa bapoxonae isotototha bebeya petautsinexa.

⁷ “Icha pana necayawa jinompaename yawa icha jopa pajuntemainae tsane pocotsiwa bayatha paca cuidubatsi, bapoxonae pocotsiwa pana newucaename bara baxua pacata exanaeinchi. ⁸ Jiwi Taxa baru cui itura jinatsi poxonae paca tane xua betiya xanepanaya pajinompame painya neexanaexae pocotsiwa Taxa paca itoroba. Yawa Taxa baru cui itura jinatsi tsipei barapomonae paca cui yaputane xua paxam barapara pepa tamonae jiwi pam. ⁹ Paca antobetsi icha Taxa ichi xua neantobe. Ataya payacuiya jinompare xua paxam po coyene xua pomonae tapana nejume cowuntsi jiwi pam. ¹⁰ Paexanaponde pocotsiwa paca itorobatsi, bapoxonae bichocono tsitecaeya paca antobe tsoponae tsainchi, icha xan ichin xua poxonae exanan pocotsiwa Taxa neitoroba xua daxota ataya tsitecaeya neantobe tsoponae.

¹¹ “Baxuan paca tsipaebatsi xua paca juntu coyene xanepana exanaeinchi xua bapoxonae bichocono pajuntu coyene weiweinaename. ¹² Barapo taitorobi coyenewa baxue xua janje: ‘Nantiya paxam pana naantobeinde, icha paca ichichi xua paca antobetsi’, jan. ¹³ Yabara paca tsipaebatsi po peantobewa bichocono ainya cui beyacaincha icha peantobewa. Barapocotsi peantobewa xeina pebin poxonae peantobexae pia jiton yaitataba xua pebexubinexatsi xua pia jiton tatsi jopa bepetabexubiwa tsainchi. ¹⁴ Paxam

apara tajiwimonae pam, icha paexanaponaename pocotsiwa xua tapaca itorobiwatsi. ¹⁵ Anoxuae jopa bepaca caunutichi xua paxam pomonae inta amanaya penacuichiwi pam. Nama po cae pin nacuathe pomonae petanacuichiwi jopa yabara yaputaeyo pocotsiwa exana pomonae pia pecanamataxeinaewichi tsipei jopa baxua yabara paebiyo. Ichitha paca caunutatsi xua paxam apara tajiwimonae pam, tsipei nama xan paca cana exainchi xua payabara yaputaneme daxita pocotsiwan xuan Taxa necui itoroba. ¹⁶ Apara jopa pana neitapetsim. Jame apara paca itapetatsi. Paca cui itorobatsi xua xanepanaya painya neexanaewa pocotsiwa Taxa paca itoroba. Ichichipan xua jopa peweraweracaewa tsane pocotsiwan painta exanaename. Bapoxonae Taxa bara pacata exanaena poxonae Taxa beicha pawncame poxonae pana nebuxna bobenouname. ¹⁷ Daxota equeicha paca jeichi: ‘Paxam nantiya pana naantobeinde’, jan”, jei Jesús pijimonaetha.

Meje yabara poxonae Jesús jeye: “Jiwi necaseba, iru paca caseba”, jei Jesús

¹⁸ Equeicha Jesús jeye: “Pomonae jopa nejume cowuntsiyo icha barapomonae paca caseba pananta xeinare xua barapomonae copiya necaseba daxota paca casebaru. ¹⁹ Icha paxam pomonae jopa pata tana nejume cowuntsiwi jiwana pam tsipaem, bapoxonae pomonae necaseba paca antobe tsipae icha ichi xua barompaya antobe pijimona. Pomonae xote jinompe, pomonae jopa tana nejume cowuntsiwi, barapomonae pexantha tatsi paca itapetatsi daxota barapomonae paca caseba. Tsipei anoxuae paxam jopa barapomonae jiwana pam. ²⁰ Pana nejume cayabara nanta xeinare xua bayatha paca tsipaebatsi xua janje: ‘Pon ba tanacuita ichun, bapon jopa ainya cuiyo, jame pia pentacaponaein tatsi ainya cui pon peitorobixaetsi’, paca jeichi. Tsipei jiwi inta abe exana daxota iru pacata abe exana. Jiwi jopa jume cowuntsiyo tacuidubiwa. Barichi jopa jume cowuntsiyo painya necuidubiwa. ²¹ Daxita baxuan jiwi paca cana exanaena xua painya neexanaexae pocotsiwa paca itorobatsi tsipei jopa yaputaetsi pon neitoroba pon Taxaxae.

²² “Icha jopa patopaeinchipae po cae pin nacuathe, xuano xua icha jopa cuidubinchipae barapomonaetha, barapomonae jopa natsicuentcipae xua abe peexanaexae tsipei jopa yaputaetsipae xua abe exana. Ichitha anoxuae jopa itacupaetsi xua pejeiwa: ‘Jopa payaputaeyo xua abe paexanan’, xua pejeiwa, tsipei patopan yawa cuiduban barapomonae. ²³ Pomonae xua necaseba, barapomonae iru Taxa casebatsi. ²⁴ Barapomonae tane xua xan exanan pocotsiwa ichun jopa itacupaetsi xua peexanaewa. Icha barapomonae jopa bayatha necui taetsipae xua exanan jopa natsicuentcipae xua abe peexanaexae jopa peyaputaexae tsipae xua abe exana. Ichitha barapomonae bara xaniwaicha necui tane xua exanan. Matautano yaputane xua abe exana. Daxota barapomonae necaseba iru daxota Taxa casebatsi. ²⁵ Ichitha baxua bewa neyabara jume cui wetsina tsipei Moisés pia peitorobi coyenewatha neyabara tsiwunaeya jeye: ‘Barapomonae necaseba poxoru saya apatsi’, jei barapo Moisés pia peitorobi coyenewatha.

²⁶ “Itorobin Nacom pia Pejumope tunaxu tatsi xua po pejumope tunaxu Taxa werena pona, po pejumope tunaxu paca yawenaena po pejumope xainyeya pepaebin. Barapo pejumope tunaxu neyabara paebina poxonae bapon patopeicaena. ²⁷ Paxam bara paichim tsane ichamonaetha pana neyabara paebiname. Tsipei poxonae aena tamropata pitaban tanacuichiwa barapo cae pin nacuathe, bapoxonae caena bayatha pana nebaru jinompame”, jei Jesús pijimonaetha.

16

¹ Equeicha Jesús barai pijimona, jeye: “Baxua paca tsipaebatsi xua jopa painya nebarapentsiwa tsane xua tapana nejume cowuntsiwam poxonae jiwi abe pacata exanaena. ² Paca itawetsina judiomona pia penacaetutsi bon weya. Po mataqueitha poxonae jiwi paca jutebina, barapo jiwi catsawiya nanta xeinaena xua Nacom pecui itorobixae xua daxota painya paca necajutebiwa tsane. ³ Barapo jiwi baxua pacata exanaena, tsipei jopa neyaputaeyo matauta Taxa tsipei jopa yaputaetsi. ⁴ Baraxua paca

tsipaebatsi xua painya tana necayabara jume cananta xeinaewam tsane poxonae barapo matacabi tsane poxonae po mataqueitha jiwi abe pacata exanaena.

Meje yabara po coyene xua Nacom pia Pejumope tñaxũ tatsi exana

“Poxonae aena tamropata pitaban tanacuichiwa baraxua jopa paca tsipaebichi tsipei paca barũ popoinchi. ⁵ Ichitha nama anoxuae baxua paca tsipaebatsi tsipei ponaein, xua Taxa beicha taecaewa tsane pon tana neitorobixae. Dapon aibi paxam jiwana pam pon neyainyaba xua nejai: ‘¿Eta xota ponaename?’ pon nejai, tsipei daxita pam bara pana neyaputaneme xua xota taponaeawa. ⁶ Nama anoxuae bichocono panthũthũ wecoyam tapaca tsipaebixaetsi baxua. ⁷ Ichitha bara yatsicaya xainyeya paca tsipaebatsi. Baxua pacata wũnae xua taponaeawa tsipei icha jopa ponaeinchipae, jopa neitacũpaetsipae xua taitorobiwa Nacom pia Pejumope tñaxũ tatsi xua painya nepaca cayawenaenexa. Icha ponaein barapo jumope pacata itorobinchi. ⁸ Poxonae Nacom pia Pejumope tñaxũ tatsi patopeicaena, jiwi yabara yaputane cana exanaeinchi pocotsiwa daxita jiwi abe peexanae cuiru coyenein exana. Mataũtano barapo Nacom pia Pejumope tñaxũ tatsi jiwi yaputane cana exanaeinchi xua xan saya xanepanaya Nacom tayabara paebin. Mataũtano barapo Nacom pia Pejumope tñaxũ tatsi jiwi yaputane cana exanaeinchi xua po coyene poxonae Nacom exanaena xua Nacom yabara paebina daxita jiwi xua penatsicuentiwa xua abe peexanaexae. ⁹ Poxonae barapomona abe peexanae cuiru coyene exana baxua tsita itapeinya xeina xua barapomona jopa tana nejume cowũntsiwi. ¹⁰ Mataũtano jiwi yaputane cana exanaeinchi xua xan saya xanepanaya Nacom tayabara paebin, tsipei Taxa beicha ponaein yawa paxam jopa equeicha pana netaem tsane. ¹¹ Mataũta barapo Nacom pia Pejumope tñaxũ tatsi jiwi yaputane cana exanaeinchi xua po coyene poxonae Nacom exanaena xua Nacom yabara paebina daxita jiwi xua penatsicuentiwa xua abe peexanaexae. Tsipei caena bayatha bapocotsiwa exana caurimona pia pentacaponaeintha, pon jiwi juntũ coyene itorobatsi barapo cae pin nacuathe xua abe peexanaenexa. Mataũtano Nacom bapontha cana exanaena xua bexa bapon weraweracaena.

¹² “Ichawa bequein xeinan xua tapaca tsipaebiwatsi ichitha anoxuae jopa paca itacũpaeyo xua painya neyaputaewa tsipei jopa paca coyene cũpaeyo. ¹³ Poxonae patopeicaena Nacom pia Pejumope tñaxũ tatsi, barapo pejumope tñaxũ paca tsipaebina daxita xua xuan pocotsiwa pexainyeiwa tsipei apara jopa paebi tsane xua pia coutha peichichipaewa. Saya paebina xua Nacom bayatha jume tainchi. Mataũtano barapo pejumope tñaxũ yabara yaputane paca cana exanaena pocotsiwa bexa tsane exanaena po cae pin nacuathe tsique. ¹⁴ Barapo Pejumope tñaxũ jiwi cana exanaeinchi xua jiwi wũnae tana nejainchiwa tsane. Pocotsiwa xua paca tsipaebatsi, barapo pejumope tñaxũ xuya yaputane paca exanaena. ¹⁵ Daxita xua Taxa pocotsiwa xeina irũ apara xan tawa. Daxota paca jeiche: ‘Pocotsiwa tacuidubi coyenewa, barapo coyenewa barapo pejumope tñaxũ xuya equeicha paca cuidubina’, paca jeichi.

¹⁶ “Caeto tsane jopa pana netaem tsane. Ichitha bexa tsane bapoxonae equeicha pana netaename. Bapoxonae pirapaeyo Taxa beicha ponaein”, jei Jesús pijimonaetha.

Meje yabara poxonae Jesús jeye: “Bequein copiya pawecoyam tsane ichitha bexa equeicha pajũntũ coyene weiweinaename”, jei Jesús

¹⁷ Bapoxonae ichamona pomona Jesús pijimona tatsi caemona nayainyaba, najei: —¿Eta xua bapon naca tsipaebara? ¿Eta xua metha naca jei: ‘Caeto tsane jopa pana netaem tsane. Ichitha bexa tsane, bapoxonae equeicha pana netaename. Bapoxonae pirapaeyo Taxa beicha ponaein’, naca jei? ¹⁸ ¿Eta xua metha ‘caeto tsane’, jane? Jopa baxua yaputaetsi, najei.

¹⁹ Jesús pijimona yaputane xua pijimonae juntucuru yainyabatsi. Daxota pijimona barai, jeye:

—Xuaunxuae paca jeichi: ‘Caeto tsane jopa pana netaem tsane. Ichitha bexa tsane bapoxonae equeicha pana netaename’, jan ¿baxua apara pana necayabara jume

yainyabame? ²⁰ Xaniyan paca tsipaebatsi. Tacoutha paxam pawecoyam tsane yawano paanthuthurewem tsane poxonae iruru juntu coyene weiweinaena pomonae jopa tana nejume cowuntsi jiwi. Bequein caeto pawecoyam tsane ichitha equeicha pajuntu coyene weiweinaename. ²¹ Poxonae yabuyo bupana taecatsi pexuyo, poxonae imoxoyo naexanaena pexuyo, bapowa bichocono wecoyei. Ichitha poxonae bayatha pexuyo naexana, bapoxonae bapowa nacayabara junte maina xua bayatha yaporowa papai xua peatenexae. Daxota bapowa juntu coyene weiweina pexuyo bayatha penaexanaexae. ²² Bara jata coyeneya paichim tsane. Poxonae tupaen xua taponae nexa tsane, bequein pawecoyam tsane, ichitha panetaename poxonae asun tsane xua ponaen Taxa beicha. Yawa bapoxonae pajuntu coyene weiweinaename. Dapon aibi pon barapo juntu weiweinae coyenewa paca juntu coyene wejunte maina cana exanaena.

²³ “Barapo mataqueitha, po mataqueitha Taxa beicha ponaen, equeicha bara nama jopa painya tana neyainyabiwam tsane. Saya meisa poxonae Taxa beicha pana newun caununaya wucaename, bara baxua daxita pacata exanaena. Baxuan pocotsiwa paca tsipaebatsi bara xainyan. ²⁴ Caena bayatha xua beya anoxuae jopa pana newun caununaya wucaem Taxa beicha. Anoxuae nama pana newun caununaya wucaename Taxa beicha. Bara baxua pacata exanaena xua bichocono yatsicaya painya nejuntu coyene weiweinaewa tsane”, jei Jesús pijimonaetha.

Meje yabara poxonae Jesús jeye: “Xan amanayabaxubin pon jiwi juntu coyene itorobatsi po cae pin nacuathe”, jei Jesús

²⁵ Equeicha Jesús barai pijimona, jeye: “Pocotsiwan xua bayatha paca tsipaebatsi, bara paeban pecayabara jata pepaebi diwesixitha. Ichitha barapo matacabi patopaena, po mataqueitha jopa paca tsipaebi tsainchi pecayabara jata pepaebi diwesixitha. Barapo mataqueitha bara Nacom yabara jume penthiya paca tsipaebinchi. ²⁶ Barapo mataqueitha pana newun caununaya wucaename Taxa beicha. Jopa paca tsipaebichi xua Taxatha tapacata wucaewa tsainchi tsipei apara bara painya coya paca itacupa. ²⁷ Taxa paca antobe pata tana neantobemxaem yawa pata tana nejume yabara cowuntsixaemxae xua xan bara yatsicaya Taxa wetsica ponan. ²⁸ Taxa pia xainya wetsica ponan xua tapatopaewa tsane po cae pin nacuathe tsique. Ichitha anoxuae barapo cae pin nacue cuenta ponan xua equeicha Taxa beicha taponae wa tsane”, jei Jesús pijimonaetha.

²⁹ Nexata Jesús pijimonaexae baraichichi, jeye:

—Anoxuae bara yatsicaya jume penthiya pana netsipaebame. Jopa paebim pecayabara jata pepaebi diwesixitha. ³⁰ Anoxuae payaputan po coyene xua bara daxita neyaputaewan. Matautano payaputan xua jopa pata nantawenonaewa xua paxan pata paca cayainyabiwatsi. Daxota pajume cowuntan xua xam bara yatsicaewa Nacom wetsica neponaen, jeichichi Jesús pijimona.

³¹ Jesús jume barai pijimona, jeye:

—jAnoxuae matapainya pana nejume cowuntame! jei Jesús. ³² Bara nama imoxoyo matacabi patopa, po mataqueitha tsana parucupaename poxonae jiwi paca yotabina. Paxam pana necuentarucupaename. Daichitha xan jopa companyo tsane tsipei Taxa neyanta bayatha. ³³ Daxita baxuan paca tsipaebatsi painya nejuntu coyene weiweinaenexam tsane tapana necayawa jinompaexaem tsane. Poxonae cataunxae pajinompaename po cae pin nacuathe jiwi paca atene exanaena poxonae abe paca cana exanaena. Daichitha junte ma pajinompare. Tsipei xan amanayabaxubin pon jiwi juntu coyene itorobatsi po cae pin nacuathe, jei Jesús pijimonaetha.

17

Meje yabara poxonae Jesús pijimona tawuca Paxatha

¹ Poxonae Jesús baxua najume weta xua pijimona tsipaeba, bapoxonae Jesús itaboco necoicha. Paxatha tsipaeba jeye: “Axa, aunxae patopaena xua poxonae jiwi tsita itutsiname xua xan, apara bara Nexanton, pon taainya cuin. Bapoxonae jiwi tsita itutsin xua xam jinya neainya cuim. ² Xam, Nexantonxaein, daxita jinya neitorobi coyenewa

necatame xua taitorobinexa tsane jiwi. Daxita po jiwi necatame, po jiwi tana nejume cowuntsiwi, barapo jiwi catsin peajuntuyapusuwa, po peajuntuyapusuwa ataya tsiteca. ³ Axa, yatsicaya compam xam Nacom, iru xan Jesucriston compan ponxaein neitorobame po cae pin nacuathe tsique. Pomonae nejume cowanta iru xuano cajume cowantano, barapomonae xeinaena peajuntuyapusuwa, po peajuntuyapusuwa ataya tsiteca.

⁴ “Po cae pin nacuathe exanan xua jiwi wnae necajainchiwa. Bayatha wetan xua bayatha necui itorobame xua taexanaewa tsane. ⁵ Axa, anoxuae equeicha ainya cui neexande neitabaratha, icha matha neichim poxonae caena bayatha ainya cui neexaname neitabaratha poxonae nexantha poponan poxonae cataunxuae po cae pin nacue jopa forotsinyo.

⁶ “Pomonae bayatha itapetame, pomonae nejume cowanta, barapomonae yabara cuiduban xua xam cayabara paebatsi. Barapomonae bara jinyamonae yawa nepuna pona exaname. Barapomonae bara xanepanaya exana xua pocotsiwa itorobame. ⁷ Pocotsiwan xua xan paeban xuano xua exanan, daxita baxuan exanan tana necatsimxae jinya pexeinya ayapusu itorobi coyenewa. Anoxuae daxita baxuan barapomonae yaputane. ⁸ Pocotsiwan necuidubame xuya barapomonae cuiduban. Daxita baxuan barapomonae yabara nejume jejei. Barapomonae yaputane xua xan bara yatsicaya xam wetsica ponan. Matautano yaputaneno xua xam tana neitorobiwam.

⁹ “Cawucatsi barapomonae nexa xua neyawenaewa tsane barapomonae. Apara jopa yabara cawucaetsi pomonae jopa nejume cowuntsiyo xua neyawenaewa tsane. Saya jame yabara cawucatsi pomonae tana necatsixaemxae pomonae jinyamonaexae. ¹⁰ Daxita pomonae xua jinyamonae apara tamonaeru. Daxita iruru pomonae xua tamonae, apara jinyamonaeru. Ichamonae wnaeya necayabara nanta xeina xua xan ainya cuin tsipei xanepanaya jinompa, pomonae tana nejume cowuntsi jiwi.

¹¹ “Xan jopa poponaein tsane po cae pin nacuathe tsipei ponaein nexainya beicha xua tapoponaenexa nexantheicha. Nama barapomonae jopa daichiyo, saya po cae pin nacuathe dubenanaebiyaena. Axa, xam ponxae bichocono nejuntu coyene xanepanaein tsaibim. Pomonae bayatha tana necatsixaemxae barapomonae bebere jinya neayapusu neitorobi coyenewatha xua barapomonae jopa pejuntu coyene cui itorobinexa tsainchi xua abe peexanaewa tsane xua caurimonae pia pentacaponaein tatsi juntu coyene cui itoroba. Bapoxonae barapomonae be caein cana naexanaeinhibe waantobexaebe barapomonae icha ichichibe xua be caein naexainhibe. ¹² Poxonae cataunxuae poponan po cae pin nacuathe, apara xan bebeteiban barapomonae jinya neayapusu neitorobi coyenewatha pomonae tana necatsixaemxae. Barapo tamonaexae beta bebetan yawa jopa copatsinyo xua ichun tana newepu aichurucuaewa, saya meisa caein nexubina barapomonae jiwana. Daxota bapon bewa tupaena tsipei bichocono peajuntucoyenyapubein. Bapon abe exana tsipei caena bayatha nejume diwesitha bapon yabara paebatsi po coyeneya xua bapon tana necana exanaewa tsane.

¹³ “Anoxuae xan ponan nexainya beicha ichaxoteicha ecame. Ichitha daxita baxuan paeban poxonae cataunxuae po cae pin nacuathe poponanje xua barapomonae bichocono pejuntu coyene weiweinaenexa, po pejuntu coyene weiweinaewa bayatha xeinan. ¹⁴ Nejume diwesi catan barapo tamonae. Ichitha barapo tamonae inta casebatsi ichamonae tsipei barapo jiwi po cae pin nacuathepiwi. Barapo tamonae nama po cae pin nacuathepiwi aibi, icha ichin xua xan po cae pin nacuathepin aibin. ¹⁵ Apara jopa cawucaetsi xua barapo tamonae nenotsinexa po cae pin nacue weye. Saya apara cawucatsi xua barapomonae nebebetsinexa caurimonae pia pentacaponaein tatsi pecuiyainwa. ¹⁶ Icha xan ichin xua po cae pin nacuathepin aibin, barichi barapo tamonae jopa barapo cae pin nacuathepiwiyo. ¹⁷ Nejume diwesi, apara po diwesi nexainyei diwesi jume. Poxonae barapo tamonae jume tane baxua barapomonae catame xua pejuntu coyene weiweinaewa xua peexanaewa tsane pocotsiwa ichichipame. ¹⁸ Icha neichim xua neitorobame pomonaetha pomonae jopa jume cowuntsiyo, barichin pomonae tana nejume cowuntsiwi itoroban pomonaetha pomonae jopa tana nejume cowuntsiwi.

¹⁹ Najuntũ coyene catan nexainya beya tha xua exanaetsi pocotsiwa ichichipame. Baxua exanan tsipei antobein tamona. Exande xua barapomona irũ penajuntũ coyene catsinexa nexainya beya xua pia peexanaewa tsane pocotsiwa ichichipame. Baxua peexanaenexa tsane pexeinaexae nejume diwesi, po diwesi nexainyei jume diwesi.

²⁰ “Jopa meisa cawũcaetsi barapo tamona nexa, apara yawano irũ yabara cawũcatsi pomona beja nejume cowũntsina poxona jume taena tajume diwesi xua poxona pepaebixae tsane barapo tamona. ²¹ Cawũcatsi xua barapomona be caein penaexanaenexa xuano xua cae penanta xeinaeya nacana barũ cayawa nanta xeinaenexa tsainchibe. Baxua exanatsibe barapomonaetha icha neichim xua neyantame xuano xua xam cayantatsirũ. Poxona barapomona be caein nacayawa naexana ponaenichibe, bapoxona ichamona yabara jume cowũntsina xua xam bara yatsicaya tana neitorobiwam. ²² Barapo tamona peainya cui coyenewa catan, po peainya cui coyenewa xam necatame xua barapomona be caein penaexanaenexa icha ichichibe xua bara caein naexanatsibe. ²³ Xan tamona yantan irũ xam neyantame, tsipei daxitatsi be caein naexainchi daxota barapomona yatsicaya bara be caein naexana. Bapoxona daxita jiwi cui yaputaena xua xam bara yatsicaya tana neitorobiwam. Matautano barapo jiwi cui yaputaena xua tamona antobem icha ichim xua neantobem.

²⁴ “Axa, necatame barapo tana nejume cowũntsiwi. Ichipan xua barapomona pomona tana nejume cowũntsiwi ponaena ichaxoteicha taponawa tsane xuano xua pia petanenexa tsane taainya cui coyenewa xua necatame. Tsipei caena bayatha neantobem poxona cataunxuae jopa forotsiyo po cae pin nacue. ²⁵ Axa, pon bichocono nejuntũ coyene xanepanaem. Pomona jopa tana nejume cowũntsiwi jopa pepa jinyamonaeyo tsipei jopa cayaitaeyo. Ichitha xam bara cayaitainchi. Pomona tamona, pomona tana nejume cowũntsiwi barapomona neyabara yaputane xua xam tana neitorobiwam. ²⁶ Barapomona pomona tana nejume cowũntsiwi yabara yaputane exanan xua xam cayabara paebatsi. Abũ cataunxuae awiya baxua exanaein xua jinya necaantobenexa tsane icha neichim xua neantobem. Matautano barapomona ataya yaitata poponeibin”, jei Jesús poxona Paxe tsipaeba.

18

Meje yabara poxona Jesús waetabatsi

(Mt 26.47-56; Mr 14.43-50; Lc 22.47-53)

¹ Poxona Jesús najume weta xua poxona Paxe tsipaeba, bapoxona pomona Jesús pijimonaexae tatsi Jesús barũ pona. Jesús barũ pona foto iya icha muxunene beya, po foto cataunxuae ira tsewa. Barapo foto pewũn Cedrón. Barapo icha muxunene beya umena xua ponaein peubi naein, baxota Jesús pijimona barũ patopa. ² Judas, pon Jesús caenaetatsi, bapon yaputane barapo momiyo tsipei baxota matha matowa Jesús pijimona barũ nacaetuteiba. ³ Judas patopa ichaxota Jesús pijimona barũ uncua. Judas barũ pona soldadomona irũno policiamona, po policiamona pomona Nacom pin pia bo peyabara umenaewi. Daxita barapomona, pomona Judas barũ patopa fariseomona itoroba irũ sacerdotemona pia pentacaponawewi tatsi itorobarũ. Daxita barapomona cusin capona. Irũ ichamona lámpan capata irũ ichamona banaxuton capata. ⁴ Bequein Jesús tsiwana yaputane barapomona xua po coyene pecana exanaewa tsainchi, ichitha Jesús itataya yawa yainyaba, jeye:

—¿Jintam pawenawenam? jei Jesús.

⁵ Daxita barapomona Jesús jume notatsi, jeye:

—Apara Jesús Nazaret tomarapin pawenawenan tsompae, jei.

Jesús jume nota, jeye:

—Apara bara bapon uncuanje, jei Jesús.

Irũ Judas, pon Jesús caenaetatsi, baxota nauncuarũ. ⁶ Poxona Jesús, jeye: “Apara, bara bapon uncuanje”, jei, bapoxona barapomona peũma iyiya caibeya yawa xuirabathopa.

⁷ Equeicha Jesús yainyaba, jeye:

—¿Jintam pawenawenam tsompae? jei.

Equeicha barapomonae, jeye:

—Apara, Jesús Nazaret tomarapin pawenawenan tsompae, jei barapomonae.

⁸ Nexata Jesús barai, jeye:

—Bayatha paca tsipaebatsiba: ‘Apara bara bapon uncuanje’, jan. Icha pana newenawenam bara tamonaie inta painta pu copabare, jei Jesús.

⁹ Baxua exana tsipei caena bayatha Jesús jeye Paxatha: “Axa, barapo tamonaexae beta bebetan yawa jopa copatsinyo xua ichun tana newepu aichurucuaewa”, jei Jesús.

¹⁰ Bapoxonae Simón Pedro namara wejonta pia wato cusi. Simón Pedro muxuyoro catsoniba pon pewun Malco, po muxuyoroto pecoxa werucuiya. Bapon Malco pon sacerdotemonae pia pepa pentacaponaein tatsi tanacuitatsi. ¹¹ Jesús Pedro baraichi, jeye:

—Cusi jeinca pentacuerutha. ¿Eta pocotsiwa daxua daichim? ¿Xam ichipame xua jopa taexanaewa tsane pocotsiwa caena bayatha Taxa neitoroba xua bara bewa jiwi atene tana necana exanaewa? jei Jesús.

Meje yabara poxonae Jesús uncua Anás peitabaratha tatsi

(Mt 26.57-58; Mr 14.53-54; Lc 22.54)

¹² Bapoxonae soldadomonae iru soldadomonae pia pentacaponaein tatsi iruru policiamonae, po policiamonae pomonae Nacom pin pia bo peyabara umenaewi, daxita barapomonae Jesús waetabatsi yawa maxu cubatsi. ¹³ Bapoxonae Jesús capoinchi Anás pia bo tatsi beya. Bapon Anás Caifás paxuyo tatsi. Bapon Caifás barapo weitharu sacerdotemonae pia pepa pentacaponaein tatsi naexana. ¹⁴ Barapon Caifás, pon caena bayatha jei judiomonaetha: “Metha wunae xua bara caein piamonae yaitatsina pebexubinexatsi xua daxita piamonae tatsi jopa petajutebinexatsi”, jei Caifás xua bayatha paeba.

Meje yabara poxonae Pedro Jesús yabara paebatsi xua jeye: “Jopa dapon yaitaeinyo”, yabara jeichichi Jesús

(Mt 26.69-70; Mr 14.66-68; Lc 22.55-57)

¹⁵ Simón Pedro iru ichun ponxaeru Jesús pijimonae tatsi jiwana Jesustha napuna ponabe poxonae policiamonae Jesús capoinchi sacerdotemonae pia pepa pentacaponaein tatsi pia botha tatsi. Barapon pon ichun bapon yaitainchi xua sacerdotemonae pia pepa pentacaponaein tatsi yaitane. Daxota bapon sacerdotemonae pia pepa pentacaponaein tatsi pia pin pia bo panatha tatsi Jesús puna jonyatsi. ¹⁶ Nama Pedro aisowatha uncua peboupa juma werena. Daxota bapon pon ichun pana weya pona peboupa beya xua yabuyo petsipaebinexatsi powayo yapu eeneiba peboupa. Bapon jeye: “Inta Pedro pu itorobarena xua bara jondenaena”, jei. Tsipei barapo sacerdotemonae pia pentacaponaein tatsi bapon yaitainchi daxota barapowa Pedro bara copatatsi xua bara jondenaena. ¹⁷ Nexata poxonae Pedro jondena, bapowa Pedro yainyabatsi, jeichichi:

—¿Bara xam, Jesús pijimonae tatsi caein jiwanamda? jeichichi Pedro.

Pedro jume nota, jeye:

—Jume, apara xan dapon aibin, jei Pedro.

¹⁸ Yaitama iru aque tsuncuaeru daxota pomonae sacerdotemonae pia pepa pentacaponaein tatsi tanacuitatsi iru policiamonae, daxita barapomonae isoto itutaeta barapo panatha. Daxita barapomonae nonopumena barapo isototha. Pedro iru baxota nanonopuncuaru.

Meje yabara poxonae sacerdotemonae pia pepa pentacaponaein tatsi Jesús matowa yainyabatsi

(Mt 26.59-66; Mr 14.55-64; Lc 22.66-71)

¹⁹ Iruru bapoxonae sacerdotemonae pia pepa pentacaponaein tatsi tamropata pitaba xua Jesús matowa peyainyabiwatsi. Jesús jeichichi: “Jesús, ¿jintam baru jinyamonae? ¿Eta po diwesi cuidubame barapo jinyamonae?” jeichichi Jesús.

²⁰ Jesús jume nota, jeye:

—Caena bayatha daxita jiwi peitútha cueicueijan tsaibin. Judiomonae pia penacae-tutsi bontha ataya cuidubeiban. Matautano Nacom pin pia botha ichaxota judiomonae nacaetuteiba, baraxotano ataya cuidubeiban. Bapana jopa jiwi wepu nameicha paebin xua pocotsiwa jiwi jopa tana nejume taenexa. ²¹ ¿Eta pocotsiwa metha nejume yabara yainyabame? Jame maisa moya yainyabare pomonae bayatha nejume tane. Moya barapomonae catsipaebina pocotsiwa bayatha tsipaeban barapomonae petanejume yaputaexae pocotsiwa bayatha tsipaeban, jei Jesús.

²² Poxonae Jesús baxua najume weta, bapoxonae caein policiamonae jiwanapin pomonae baxota umena, po policiamonae Nacom pin pia bo peyabara umenaewi bapon Jesús jumata cuaintaxotsi. Yawa bapon Jesús jeichichi:

—¿Eta xua dapó jume paebame poxonae baxua jume notame sacerdotemonae pia pepa pentacaponaein tatsi? jei bapon.

²³ Jesús jume nota, jeye:

—Icha bara pocotsiwa abe paeban, moya netsipaebare xua abe. Ichitha icha xua wñae paeban, ¿eta pocotsiwa metha nexata nejumata cuaintaxubame? jei Jesús.

²⁴ Bapoxonae Anás Jesús yamaxñ cñbiya itorobatsi Caifás beya. Bapon Caifás sacerdotemonae pia pepa pentacaponaein tatsi naexana barapo weitharñ.

Meje yabara poxonae equeicha Pedro Jesús yabara paebatsi: “Jopa dapon yaitaeinyo”, yabara jeichichi Jesús

(Mt 26.71-75; Mr 14.69-72; Lc 22.58-62)

²⁵ Poxonae baxuarñ, irññ cataunxuae Pedro nanonopuncua. Barapoxonae barapomonae Pedro yainyabatsi, jeichichi:

—¿Xam apara Jesús pijimonae tatsi caein jiwanamda? jeichichi Pedro.

Ichitha Pedro jume notsiya jeye:

—Jume, apara xan bapon aibin, jei Pedro. ²⁶ Bapoxonae equeicha ichñ Pedro yainyabatsi pon sacerdotemonae pia pepa pentacaponaein tatsi tanacuitatsi. Pon Pedro yainyabatsi, bapon caein jiwana pomonae Pedro jiwana muxuyoro catsoniba. Bapon Pedro yainyabiya jeichichi:

—Xam bayatha caena catainchi poxonae Jesús paca barñ pona momiyo beya. ¿Bara methara? jeichichi Pedro.

²⁷ Pedro equeicha jume notsiya jeye:

—Jume, jopa dapon yaitaeinyo, jei.

Bapoxonaerñ caena nainya wacara pebto fiba.

Meje yabara poxonae Jesús uncua Pilato peitabaratha tatsi

(Mt 27.1-2, 11-14; Mr 15.1-5; Lc 23.1-5)

²⁸ Caemñbotha Jesús capoinchi Caifás pia bo weya pon jiwi peyanacua ewatsinchi pin pia bo tatsi beya, pon pewñ Pilato. Ichitha judiomonae jopa jojoniyaeyo barapo botha pon jiwi peyanacua ewatsinchi pin pia bothaxae tatsi. Judiomonae pia jñntñ coyene cui xeina xua jei: “Judiomonae jopa bewa nanacaetutsi pomonae jopa be judiomonae naexanaeyo pia bothaxae tatsi po mataqueitha poxonae imoxoyo Pascua wñn maticabin xua poxonae jiwi penabanaewanexa pexaewa”, jei. Tsipei icha baxua exanaetsipa pia coutha najñntñ coyene taxobichipa yawa barapomonae jopa itacupaetsipaetsi xua pexaewa xaena, po pexaewa poxonae xane Pascua wñn maticabintha. ²⁹ Daxota Pilato aisowa bejoniya pia bo weya xua petsipaebinxatsi pomonae pesatotha umena. Pilato jeye barapomonaetha:

—¿Eta pocotsiwa painya yabara netsipaebichi bapon xua abe peexanaewa? jei.

³⁰ Barapomonae Pilato jume notatsi, jeye:

—Icha bapon jopa abe exanaetsipae, metha bapon jopa caponaetsipaetsi nexantha, jei barapomonae.

³¹ Nexata Pilato barai jiwi, jeye:

—Paxam papire bapon, barompaya painya neitorobi coyenewatha payabara paebare xua penatsicuentsiwa xua abe peexanaexae, jei Pilato.

Barapo judiomonae jume nota, jeye:

—Ichitha paxan judiomonae pan, romanomonae pia peitorobi coyenewa jopa pana copatsiyo xua ichun pacui itoroban xua jiton pebexubiwatsi xua poxonae abe peexanaexae, jei judiomonae.

³² Baxua exana tsipei bayatha Jesús tsiwanaya nayabara paeba po coyeneya jiwi poxonae Jesús pebexubiwa tsainchi. ³³ Bapoxonae Pilato equeicha pia pin pia bo bejoniya yawa Jesús wabatsi, jeichichi:

—¿Xam judiomonae itorobiya pia pepa Neewatsin? jei Pilato.

³⁴ Jesús jume nota, jeye:

—¿Apara jincoya necayabara cananta xeinaeya yainyabame? Apara ichun yabara necatsipaebixae baxua, ¿daxota barapo jumetha neyainyabame? jei Jesús.

³⁵ Pilato jume nota, jeye:

—Jopa taeinyo tsipei apara xan judiomonaepin aibin. Apara jinya nacuamonaepiwi iru sacerdotemonae pia pentacaponae tatsi, apara barapomonae cacaenaeta taxantha. ¿Eta pocotsiwa metha exaname? jei Pilato.

³⁶ Nexata Jesús jume nota, jeye:

—Taitorobi coyenewatha jopa itorobinyo jiwi po cae pin nacuathe. Icha baxua exanaetsipan, bara nexata tamonae neyawenaetsipa xua judiomonae jopa tana newaetabinexa. Ichitha taitorobi coyenewatha jopa itorobinyo jiwi po cae pin nacuathe, jei Jesús.

³⁷ Nexata Pilato Jesús jeichichi:

—¿Apara xam pon jiwi itorobiya pia pepa Neewatsin? jeichichi Jesús.

Jesús jume nota, jeye:

—Aa, apara bara xan bapon pon jiwi itorobiya pia pepa Taewatsin xuaunxuae bara paebame. Daxota naexanan po cae pin nacuathe yawa patopan tapaebinexa xua pocotsiwa pexainyeiwa yatsicaewa. Daxita pomonae ichichipa xua pejume cowuntsiwa xua barapo pexainyei jume, barapomonae bara nejume tane, jei Jesús.

³⁸ Pilato Jesús baraichi, jeye:

—¿Eta pocotsiwa metha pocotsiwa pexainyeiwa? jei Pilato.

Meje yabara poxonae Pilato jume baru jejei xua Jesús bara pebexubiwa tsainchi ichamonae

(Mt 27.15-31; Mr 15.6-20; Lc 23.13-25)

Poxonae Pilato baxua yainyaba, bapoxonae Pilato equeicha aisowa bejoniya xua equeicha judiomonae petsipaebinexatsi. Pilato barai judiomonae, jeye:

—Xan jopa jume itaraerowinyo bapon xua po jumetha nayaita anae exanaena xua pebexubinexatsi. ³⁹ Ichitha paxam painya cui paxeiname xua ba caein tapacata isanaxubiwatsi pomonae jiwi pecubi botha nobatsi poxonae xua po mataqueitha Pascua wun matabintha. ¿Bara anoxuae pacata saya pu copatinchi pon judiomonae itorobiya pia pepa peewatsinchi? jei Pilato.

⁴⁰ Nexata barapo judiomonae jume daunweya wawai, jeye:

—¡Jume, jopa dapon isanaxubinde! ¡Maisa jame Barrabás isanaxore! jei barapo judiomonae.

Barapon Barrabás, pon bichocono jiwi pecaibi.

19

¹ Nexata Pilato najume caitoroba xua Jesús bara pecuainchinexatsi xua pocotsiwatha ewea xua bichocono amupiya xua xota ba jiwi cuainteibatsi poxonae abe exaneiba. Soldadomonae baxua exana. ² Barapo soldadomonae Jesús mata xatatatsi pee tepa. Matautano bapoxonae Jesús pia paparuwa juma xuenatsi. Icha paparuwa juma xatatatsi

po paparuwa tsobia. ³ Bapoxonae barapo soldadomonae Jesús imoxoyo cacuita ume-narucupatsi. Yawa Jesús cui caponaeya jeichichi:

—¡Jaina, maisa wñaem pon judiomonae itorobiya pia pepa Neewatsin! jei barapo soldadomonae xua Jesús cui capoinchi.

Bapoxonae Jesús itabara cuaintatsi.

⁴ Equeicha Pilato pesato bejoniya judiomonae beya. Pilato barai judiomonae, jeye:

—Matha pataema. Bapon pacata carenaeinchi, painya neyaputaenexa xua xan jopa jume taeinyo xua po jumetha penayaita anae exanaewa xua pebexubinexatsi barapo pebin, jei Pilato.

⁵ Bapoxonae Jesús pee tepa pesato beyawa joniya. Yawa paparuwa yawa joniya po paparuwa tsobia. Nexata Pilato barai jiwi, jeye:

—¡Pataema xote uncue baponje! jei Pilato.

⁶ Bapoxonae sacerdotemonae pia pentacaponae tatsi iru policiamonae, poxonae daxita barapomonae Jesús taerucupatsi, jume daunweya wawaya jeye:

—¡Naetotha bara tũparucua bewa exanaem! ¡Naetotha bara tũparucua bewa exanaem! jei barapomonae.

Pilato barai jiwi, jeye:

—Moya paxam jame bara papire, moya painya coya naetotha tũparucua paexande. Yaitama xan apara jopa jume taeinyo po jumetha xua bapon penayaita anae exanaewa xua pebexubinexatsi.

⁷ Ichitha judiomonae Pilato jume notatsi, jeye:

—Paxan pata taitorobi coyenewa paxeinan. Bapon pia coutha Nacom Pexanto tatsi natsicotane daxota bapon bewa tũpaena tsipei pata taitorobi coyenewa baxua peyabara paebixae, jei judiomonae.

⁸ Poxonae Pilato baxua jume tane, Pilato nama bichocono equeicha junuwa. ⁹ Equeicha Pilato Jesús caibe maxũ coniyatsi bo beya. Baxota Pilato Jesús yainyabatsi. Jesús jeichichi:

—¿Eta werenapim xam? jei Pilato.

Ichitha Jesús jopa jume notsiyo. ¹⁰ Nexata Pilato Jesús baraichi, jeichichi:

—¿Eta pocotsiwa jopa nejume notsim? ¿Apara xam jopa neyaputaem xua xeinan taitorobi coyenewa xua tana neitacupaewa xua jiwi taitorobiwa xua tũparucua necaex-anadutsiwa naetotha? Mataũtano xeinan taitorobi coyenewa po coyene xua jiwi taitorobiwa xua saya necapu sotabiwa, jei Pilato.

¹¹ Jesús jume nota, jeye:

—Icha Nacom jopa cacatsipae barapo peitorobi coyenewa metha ichamonae jopa itorobimchipae xua ichamonae abe tana necana exanaewa. Daxota pon necanaeta xamtha bapon jame bichocono abe exana beyacaincha xam xua abe necana exaname, jei Jesús.

¹² Poxonae baxua Pilato jume taeba, bequein bichocono nanta xeina xua Jesús bara saya pepu sotabiwa tsainchi, ichitha junuwa poxoru judiomonae jume daunweya wawai. Barapomonae jeye:

—¡Icha xam bara saya, pu sotabame, apara romanomonae itorobiya pia pepa peewatsinchi bapon jopa pia jiton tsipaem! ¡Pon pia coutha naexana xua be natsicotane pon jiwi itorobiya pia pepa peewatsinchi, bapon apara romanomonae itorobiya pia pepa peewatsinchi bapon pia peaitafaetabinchi jitontsi! jei judiomonae.

¹³ Poxonae Pilato baxua jume taeba, bapoxonae eoundeca ichaxota pia coutha cayabara cananta xeinecaeya cueicueije tsequeibi jiwi. Bapon baxota eca yawa najume caitorobeca xua bara berena Jesús pecarendenaenexatsi ichaxota Pilato eca, po pia peecaethopae tutu ibo pana tatsi hebreo jumetha, “Gabata”, jei. Baraxua jei: “Pefaratsiwa ibowa pana”, jei. ¹⁴ Bapoxonaeru barapo matakabi tsuxubiru, po matakabi copiya tsiwanaya ducua Pascua wũn matakabi. Barapo mataqueitha judiomonae pexaewa

xaxaintajeba xua Pascua wun matababi nexa xua baya tsane. Poxonae mateinyaxae tsuxubi, bapoxonae Pilato barai judiomonaetha, jeye:

—¡Incane pataema pon itorobiya pepa painya Nepacacaewatsin! jei.

¹⁵ Ichitha barapo judiomonaetha jume daunweya wawaya jeye:

—¡Maisa bara tupaena! ¡Bara naetotha tupaerucua exande! jei.

Pilato jume barai, jeye:

—¿Bara itorobin jampa xua pebexubiwatsi pon itorobiya pepa painya Nepacacaewatsin? jei Pilato.

Ichitha sacerdotemonaetha pia pentacaponaeawi tatsi Pilato jume notatsi, jeye:

—Apara ichun jopa paxeinaeinyo pon jiwi itorobiya pia pepa Peewatsinchi. Jame saya meisa painta bara compa pon itorobiya pepa pata Neewatsin, bapon jame apara pon romanomonaetha itorobiya pia pepa Peewatsinchi, jei judiomonaetha.

¹⁶ Barapo jumetha Pilato Jesús canacobena catatsi barapo judiomonaetha. Baxua Pilato exana xua Jesús bara tupa peexanaenexatsi naetotha. Bapoxonae barapo judiomonaetha Jesús pitatsi.

Meje yabara poxonae Jesús tupaerucua exanatsi naetotha

(Mt 27.32-44; Mr 15.21-32; Lc 23.26-43)

¹⁷ Jesús bara pona, yawa pia naeto utucurapona, xua barapo naetotha pecobe matatabarutsinexatsi ichaxota po demxuwatha be jiton matasipa piwa. Barapo demxuwa caunuteiba xua jei tsaibi: “La Calavera”, jei. (Seicaya hebreo jumetha jei tsaibi: “Gólgota”, jei.) ¹⁸ Barapo demxu matasoitotha Jesús cobe matatabarutatsi naetotha. Iru ainya pebinbe cobe matatabarutatsibe. Jesús tutiyotha yanaeto uncuwa, ichun Jesús pecoxa weya tayanaeto uncuatsi iru ichun Jesús petsocona weya tayanaeto uncuatsi. ¹⁹ Pilato itoroba xua Jesús pentutu wetsica petarutsinexatsi napaeuyo. Barapo napaeuyotha jeye xua tinaduta: “Jesús, Nazaret tomarapin, pon judiomonaetha itorobiya pia pepa Peewatsinchi”, jei barapo petinae napaeuyotha. ²⁰ Pinmonaetha judiomonaetha yoroba barapo petinadutsiwa tsipei ichaxota Jesús cobe matatabarutatsi imoxoyo itama tayeca tomara, po tomara pewun Jerusalén. Barapo petinae napaeuyotha, hebreo jumetha tina, griego jumetha tinano, iru latín jumetha tinano. ²¹ Daxota sacerdotemonaetha pia pentacaponaeawi tatsi, pomonaetha judiomonaetha, Pilato baraichi, jeye:

—Jopa jande ‘Pon judiomonaetha itorobiya pia pepa Peewatsinchi tatsi’, jopa jande. Jame maisa jande: ‘Ponje najei: Xan pon judiomonaetha itorobiya pia pepa Taewatsin, najei’, jande, jei sacerdotemonaetha pia pentacaponaeawi tatsi.

²² Ichitha Pilato jume nota, jeye:

—Xuaunxuae tinadutan bara ducuaena, jei Pilato.

²³ Soldadomonaetha poxonae Jesús canacobena wetatsi xua cobe matabobatsi, bapoxonae nota Jesús pia paparawan tatsi. Tsipei cuatro po soldadopinbe daxota nata tsaba xua cuatro poyobe nexa xua soldadomonaetha. Matauta dorouto Jesús juma wejontatsi, po dorouto ompareca, xua jopa epa xuxucaeyo. ²⁴ Barapo cuatro poyobe xua soldadomonaetha caemonaetha natsipaeba, najei:

—Jopa tsana nata epa tsitsicae tsainchi. Jame metha xanepana xua ibotixi bebeya tsainchi. Bapoxonae yaputaeinchi xua pon ibotiyoyo beta xoya, moya copiya pichina, jei.

Baxua barapomonaetha exana peyabara cui wunaetha tsiwanaya jeixae pon Nacom peitorobi jume pepaebin. Bapon jeye Cristo yabara, Nacom Pejume Diwesitha: “Tapaparawan nata tsabina yawa ibotixi bebeya tsane penacueranta notsinexa tsane tapaparawan”, jei pon Nacom peitorobi jume pepaebin. Bara baxua exana barapo soldadomonaetha.

²⁵ Jesús pena tatsi imoxoyo uncuwa ichaxota Jesús ducua. Barichi Jesús pena tatsi iru pamcho tatsi baxota umena. Barichi icha María, powa Cleofas piowa tatsi baxota uncuwa. Barichi icha María, powa María Magdalena, powa Magdala tomarapiwayo, baxota uncuwa. ²⁶ Poxonae Jesús taenota pena yawa poxonae taenota pon bichocono Jesús antobe, pon pijimonaetha jiwanaepin bapoxonae Jesús barai pena, jeye:

—Ena, taema bapon nexanto cata uncuareque, jei Jesús.

²⁷ Bapoxonae Jesús barai bapon, jeye:

—Incane taema barapowa, powayo enaxae, jei Jesús.

Bapoxonae barapowa barapon pena tsicotae ya waba pia botha.

Meje yabara poxonae Jesús tupa

(Mt 27.45-56; Mr 15.33-41; Lc 23.44-49)

²⁸ Bapoxonae pirapaeyo Jesús yaputane xua bayatha yabara jume cui wetatsi xua bayatha Nacom Pejume Diwesitha paeba. Matautano xua Jesús penajume cui yabara wetsinexatsi xua bayatha Nacom Pejume Diwesitha yabara tsiwænae paebatsi, bapoxonae Jesús jeye:

—Meratsipan, jei.

²⁹ Baxota juruwato eca xua yawa eca vino mera, po mera atsu. Nexata barapo soldadomonaes esponjatha mene yutsiya capita. Bapoxonae Jesús naewatha tadutatsi yawa tayoichatsi pecoiboto deca. ³⁰ Jesús tsutsubiya apa barapo vino mera. Bapoxonae jeye:

—Bara daxita neyabara jume cui weta, jei Jesús.

Bapoxonae Jesús nawisi jetataba. Tupa naicha.

Meje yabara poxonae soldadomonaepin Jesús epa catsitsinaxubiya cawæichatsi dejonatha

³¹ Cataunxuae barapo matabi po matabitha poxonae judiomonaes pewænaeya nacui wænaeta pia pentaquei seicae matabi tatsi nexa. Barapomonaes jopa ichipaeyo xua came naetotha dubenaena po pebiwi naetotha werapa poxonae jopaena barapo pentaquei seicae matabi, po matabi peainya cui matabixae. Barapo pentaquei seicae matabi, po matabi tamropata pitaba xua Pascua wæn matabin. Judiomonaes jopa ichipaeyo xua pejontsiwa pepon naetotha barapo pentaquei seicae matabitha. Daxota barapo judiomonaes Pilato jume itorobatsi, jeye: “Soldadomonaes itorobare xua petopa janacaenexa tsainchi pomonaes naetotha dubena xua nainya barapo pebiwi tupa peexanaenexatsi. Matauta itorobare xua barapo pebiwi naeton wetsica penotsinexatsi icha xaniwaicha daxita barapo pebiwi bayatha werapa”, jei barapo judiomonaes.

³² Nexata soldadomonaes bara beya pona. Yawa barapo soldadomonaes copiya topa janaxuba ichæn pon Jesús icha muxunene wetarucuiyatsi. Bapoxonae equeicha ichæn topa janaxotsi pon Jesús icha muxunene wetarucuiyatsi. ³³ Poxonae soldadomonaes imoxoyo umenarucupa ichaxota Jesús ducua, bapoxonae Jesús tainchi xua bayatha Jesús tupa. Daxota barapo soldadomonaes Jesús jopa topa janaxuichi.

³⁴ Ichitha caein barapo soldadomonaes jiwana, bapon Jesús epa cawæicha catsitsinaxubi yatsi dejonatha. Bapoxonae caena nainya jana othoparena yawano mera othoparenano. ³⁵ Xan, Juan, baxuan daxita tan pocotsiwa soldadomonaes Jesús cana exanatsi. Daxota pocotsiwa xua baxua paeban bara xainyan, xua daxota painya tana nejume cowæntsinexam. ³⁶ Barapomonaes baxua exana tsipei bayatha Nacom Pejume Diwesitha Cristo yabara tsiwanaya jeichichi: “Jopa piwa janaxubi tsainchi bapon xua matauta cae piwano”, jei Nacom Pejume Diwesitha. ³⁷ Matautano icha jume diwesitha xua Nacom Pejume Diwesi, jeye: “Necoichaeinchi pon xua cawæichatsi”, jei Nacom Pejume Diwesitha.

Meje yabara poxonae Jesús petupaen ibo muthutha yauxatatabotatsi

(Mt 27.57-61; Mr 15.42-47; Lc 23.50-56)

³⁸ Bapoxonaeræ pebin, pon pewæn José, pon Arimatea tomarapin, bapon Jesús iræ jume cowæntatsi. Ichitha José baxua jopa nayopichiyo ichamonaetha xua Jesús pejume cowæntsiwatsi, tsipei judiomonaes jume cunuwatsi. Bapon José copiya Pilato muxu tsipaebiya jeichichi, jeye:

—Nejume baru jejande tha jontichi Jesús petupaen naeto wetsica, jei José.

—Bara moya taema, jei Pilato.

Daxota José bara beya pona. Bapoxonae José jonta naetotha Jesús petupaein. ³⁹ Iruru ichun napona Jesús pia muthutha. Bapon pewun Nicodemo, pon matha Jesús siwa poinchi merawi. Daxota bapon Nicodemo patopa xua José peyawenaenexatsi. Bapon Nicodemo capatopa treinta po kilobe xua pocotsiwa pebeno, po beno xua tuxuei. Barapo benotha muxunaxuba po petuxuei nain pewun mirra, xuano xua icha petuxuei nainwano po petuxuei nainwa pewun áloe. ⁴⁰ Bapoxonae José iru Nicodemo pitabe Jesús petupaein. Yawa paparuwatha petuxuei beno muxuna capanaboinca mata quiyontabicabe. Baxua exanabe, tsipei judiomonae pia cui coyene xeina xua poxonae pon petupaein canacui wunae wetatsi poxonae namuthaqueiba. ⁴¹ Imoxoyo ichaxota Jesús po demxuwatha tupa, baxota peubi naein umena. Barapo peubi naein uniyotha ibo itapatororotha muthu boca pena muthu, po muthutha cataunxuae jopa muthutha xubichi petupaein ichun. ⁴² Barapo pena muthutha Jesús boyatsi, tsipei barapo pena muthu imoxoyo boca ichaxota Jesús tupa. Matauta tsipei quirei tsanaicha xua poxonae patopa pentaquei seicae matakabi, po mataqueitha judiomonae jopa nacuichiyo.

20

Meje yabara poxonae Jesús equeicha asu juina exanatsi petupae cuiru coyene weya
(Mt 28.1-10; Mr 16.1-8; Lc 24.1-12)

¹ Bapoxonaeru domingo matakabi jopa, po matakabi xua copiya ducua cae semanatha. Bapoxonae caemumbotha poxonae cataunxuae quiriquirica, bapoxonae María Magdalena, powa Magdala tomarapiwayo, muthutha patopa ichaxota Jesús boca. Barapowa tane xua muthu yapusauncua xua bequein ichamonae yapu xatatabanota pin ibo panawatha. ² Bapoxonae barapowa nainya pata taxainya becuinaerena ichaxota Simón Pedro uncua iru xan, Juan, baxota uncuan ponxaein Jesús bichocono neantobe. Yawa pana nejei:

—Cou Jesús petupaein pitatsi, pon Wanacanamataxeinaein. Jopa payaputaeyinyo ichaxota equeicha botatsi, pana nejei.

³ Bapoxonae Simón Pedro, iru xan Juan, muthu bepaiyanbe. ⁴ Bara beya pana nacuara cuinayanbe. Ichitha xan, Juan, bichocono bichoinan beyacaincha Pedro. Daxota muthutha patopan copiya. ⁵ Yawa muthu beya nabuxu tsutiya necobiyan. Paparuwa tan xua iratha boca, po paparuwatha Jesús petupaein mata quiyontabatsi, ichitha jopa jonyaeinyo. ⁶ Bapoxonae Simón Pedro tacoya werena cotacaya patopa. Bapoxonae muthu joniya. Barichi barapon barapo paparuwa tane xua iratha boca. ⁷ Matautano taneno po paparuwatha Jesús matasipa quiyontababotatsi. Barapo paparuwa nanta quiyontabiya tsanaya boca. ⁸ Bapoxonae xan, ponxaein copiya patopan, iru joniyan muthu iya. Poxonae daxita baxuan tan, bapoxonae nainya jume cowantan xua Jesús bayatha asu. ⁹ Bayatha jopa payaputaeyinyo Nacom Pejume Diwesi, po diwesitha xua xota bapon yabara paebatsi po coyene xua bapon bewa asu tsane petupae coyene cuiru weya. ¹⁰ Nexata xan, Juan, iru Simón Pedro caibe panawiyambe bo beya.

Meje yabara poxonae Jesús María tsita naitutatsi, powayo Magdala tomarapiwayo
(Mr 16.9-11)

¹¹ María Magdalena, Magdala tomarapiwayo, powa pana tsiwun caya, bapowa equeicha caiberena muthutha patopa. Barapowa muthu coiboto juma weya wecoyei tsuncuae. Poxonae wecoyei tsuncuae nantanuweya nabuxu japasota necobiya muthu iya. ¹² Bapoxonae bapowa tane ponbe matatsunpinbe xua ecabe ichaxota bayatha Jesús botatsi petupaein. Barapo matatsunpinbe po paparuwa apiya nama xatatabe pemainya paparuwa. Icha matatsunpin eca Jesús pentasipa coyo deca tatsi. Icha matatsunpin eca Jesús pia pesito coyo deca tatsi. ¹³ Barapo matatsunpinbe María yainyabatsi, jeichichi:

—María, ¿eta xua metha wecoyam tsauya? jei.

María jume nota, jeye:

—Yaitama cou Tanecanamataxeinaein petupaein pitatsi. Jopa taeinyo xua equeicha xota botatsi petupaein, jei María.

¹⁴ Poxonae bapowa najume wetsiya paebaxoya, xuano xua poxonae napatomeicha necotaxoya, bapoxonae pebin taenotatsi ichitha bapowa jopa yaputaeyo xua apara bapon Jesús. Ichitha bapowa Jesús jopa yaitaetsi. ¹⁵ Nexata Jesús María yainyabatsi, jeichichi:

—Ja, ¿eta pocotsiwa came wecoyam tsauyam? ¿Jintam wenawenam? jei.

Barapowa nanta xeina xua mexeya itara pon peubi naein yapu eenawei. Daxota bapowa, jeye:

—Icha xam bayatha pitame petupaein pon Tanecanamataxeinaein, incane netsipaebare xua equeicha exota botame. Tha bapoxonae petupaein equeicha pitichi, jei María.

¹⁶ Nexata Jesús barai, jeye:

—María, jei.

María equeicha napatomeichaxuba. Yawa hebreo jumetha jeye:

—¡Rabuni! jei (po jumetha xua jei: “Pon jiwí Necuidubin”, jei).

¹⁷ Jesús jume nota, jeye:

—Jopa nejayatabinde tsipei cataunxuae jopa ponaeyo ichaxota Taxa equiya. Jamaisa ponde, paebareno tajimonaetha xua xan paeban xua jan: ‘Taxa beicha ponaein, po Taxa painya Axa iru’, jan. ‘Barapon Nacom, Tanacom iru paxam painya Nacom’, jan xua, jei Jesús.

¹⁸ Barapoxonae María Magdalena, powa Magdala tomarapiwayo, tsiwun caya Jesús pijimonae tatsi beya. Bapowa tsipaeba xua bayatha tane pon Pecanamataxeinaein jiwí. Yawano tsipaebano daxita pocotsiwa Jesús paeba bapowatha.

Meje yabara poxonae Jesús pijimonae tsita naituta
(Mt 28.16-20; Mr 16.14-18; Lc 24.36-49)

¹⁹ Barapo mataqueitha poxonae cataunxuae awiya domingo, bapoxonae merawi Jesús pijimonae tatsi nacaetuta. Tsipei judiomonaeyo cui cunuwatsi daxota bo bichocono boupa daunwei exana. Nexata Jesús barapo tututha patopa. Yawa pijimonae peitabarayo deca tauncua. Pijimonae jacobiya jeye:

—Maisa juntea pajinompore, jei Jesús.

²⁰ Poxonae Jesús baxua najume weta bapoxonae tsita nacobe wan ituta pijimonae yawa naepa wan ituta. Poxonae Jesús pijimonae taerucupatsi bichocono juntea coyene weiweina petaexaetsi Jesús pon barapomonae Pecanamataxeinaexaetsi. ²¹ Pirapaeyo equeicha Jesús pijimonae barai, jeye:

—Maisa juntea pajinompore. Icha Taxa neichi xua neitoroba bara paca ichichi paca itorobatsi, jei Jesús.

²² Nexata bapoxonae Jesús pijimonae matatsun ofutaba, jeye:

—Nacom pia Pejumope tanaxu tatsi bara paca yantsina, jei. ²³ Pomonaeyo xua pacui cayabara junteamainame abe pia peexanaeyo cuiru coyenein tatsi, bara barapomonae Nacom iru cayabara cui junteamainaena abe pia peexanaeyo cuiru coyenein tatsi. Pomonaeyo jopa pacayabara cui junteamainaem abe pia peexanaeyo cuiru coyenein tatsi, bara barapomonae Nacom iru jopa cayabara cui junteamainaeyo abe pia peexanaeyo cuiru coyenein tatsi, jei Jesús.

Meje yabara poxonae Tomás tane xua Jesús equeicha asu

²⁴ Tomás, bapon Jesús pijimonae tatsi jiwana. Bapon icha wun Gemelo, po wun xua jei: “Nama naexanabe pexuyobe”, jei. Barapon Tomás jopa naecaeyo poxonae Jesús pijimonae tsita naituta.

²⁵ Pirapae poxonae Jesús napitaba ichamonae pomonaeyo Jesús pijimonae tatsi Tomás tsipaebatsi, jeichichi:

—Paxan Jesús, pon Wanacanamataxeinaein, patan, jeichichi Tomás.

Ichitha Tomás jume nota, jeye:

—Jopa jume cowuntsinyo baxua. Jopa bejume cowuntsinyo icha jopa cobe wan taeinyo xua penain wan, xuano xua icha jopa jayabinyo tacobetha. Matautano jopa bejume cowuntsinyo icha jopa yene wan jayabinyo, jei Tomás.

²⁶ Poxonae ocho po matabibibe yapucaewa xua icha domingotha, bapoxonae equeicha bomuxutha nacaetuta Jesús pijimonae tatsi. Bapoxonaeru Tomás jame naeca. Bequein bomuxu boupa bichocono daunwei exana ichitha Jesús jonarena. Pijimonae peitabarayo deca tauncua. Yawa jacobiya jeye:

—Maisa juntea pajinompere, jei Jesús.

²⁷ Bapoxonae Jesús jeye Tomás beya:

—Moya necobe wan jayabare xua penain wan. Moya taema xua nantiyabe tacobe wanbe. Yawano neyene wan jayabare. Jopa ainya muxu xeinaeinde. Moya maisa nejume cowunde, jei Jesús.

²⁸ Nexata Tomás jume nota, jeye:

—¡Jaina, deta Tanecanamataxeinaem! ¡Yawa Nacom, Tanacom! jei Tomás.

²⁹ Jesús jume nota, jeye:

—Tomás anoxuae nejume cowuntame tanetaemxaem. Ichitha pomonae bequein jopa netaeyo xua daichitha nejume cowunta, barapomonae bichocono juntu coyene weiweina, jei Jesús.

Meje yabara xua eta pocotsiwa metha yabara tina barapo diboro

³⁰ Jesús ainya coyenein matowa pijimonae peitutha exaneiba pexeinya petsita itutsi coyenewan. Daxita barapo coyenein awiya yabara seica xua jopa yabara tinaeinyo barapo diborothe. ³¹ Daxita xua xuan pocotsiwa yabara tinan po diborothe apara xua baxuan painya yabara jume cowuntsinexam tsane xua Jesús apara bara Mesías. Matautano yabara tinan xua painya yabara jume cowuntsinexa xua Jesús apara Nacom Pexanto tatsi. Matautano yabara tinan xua painya nexeiaenexa tsane peajuntuyaruswa, po peajuntuyaruswa xua ataya tsiteca xua poxonae pajume cowuntsiname Jesús.

21

Meje yabara poxonae Jesús tsita naituta siete poyobe pomonae pijimonaexae tatsi jiwana

¹ Bapoxonae pirapae equeicha Jesús pijimonae tsita naituta Tiberias pucua itapatha. Poxonae pijimonae tsita naituta poxonae apara iche: ² Jesús pijimonae tatsi nacaetuta. Barapo matabuxuyobe meje: Simón Pedro, iru Tomás pon icha wun Gemelo, iru Natanael Caná tomarapin, po tomara eca Galilea nacuaatha, iru xan, Juan, iru taeweicho xua Zebedeo pexantobe tatsi panbe, iru ichunberu. Daxita barapo matabuxuyobe panpanacaetutan Tiberias pucua itapatha. ³ Simón Pedro pana jei:

—Tha duwei yamonaetsi, jei.

Paxan pajanje:

—Paxan iru paca puna ponaeinchi, pajan.

Bapoxonae jeratha daxita panonobabiyon. Ichitha barapo merawitha jopa duwei pataeinyo, bequein payamonan. ⁴ Poxonae baya pentha tsina, Jesús pana tsita naituta pitapathiya, tuwutha payana dubendenan. Ichitha paxan jopa payaitaeinyo xua bapon apara Jesús. ⁵ Nexata Jesús pana nebarai:

—Incane, ¿jopa pataem duwei? jei Jesús.

—Jume, duwei aibi, pajan.

⁶ Nexata Jesús pana barai, jeye:

—Jera coxa beya bara bepaxoyama peyacamonaewa. Bapoxonae pacapirenaename duwei, jei Jesús.

Baxua paexanan. Pirapae jopa pana itacupaeyo xua patajutaxorenaewa peyacamon-
aewa, poxoru pin duwei tunto pacapirenan. ⁷ Nexata xan, Juan, ponxaein bichocono Jesús neantobe, Simón Pedro baran, janje:

—Apara bapon Jesús, pon Wanacanamataxeinaein, jan.

Poxonae Simón Pedro nejume taeba, bapoxonae paparuwa xua nama xuenabota nainya yacuina ya nama xatataba. Bapoxonae mene weitata jopiya. ⁸ Ichitha paxan pomonae jopa paraichinyo jeratha pajebounan. Barapo jera be conotha tajū tuwūtha berucuarena saya cien metrobe xeina. Bewayo pajeboundenan tsipei peyacamonae mentha yawa ducuapona pin duwei tunto. ⁹ Poxonae jera wepanonobabiyān, bapoxonae isoto patan xua barapo isototha duwein yūtabo ya yawano xua pan boquiya. ¹⁰ Jesús pana barai, jeye:

—Painta xawena duwei xuaunxuae pacaebouname, pana jei.

¹¹ Simón Pedro jeratha nontabiya. Yawa taetabo itapa bejutabotsina peyamonaewa xua bichocono wūnca duwei. Ciento cincuenta y tres po duwei matabūxūmonaebe. Bequein duwei bichocono wūnca daichitha jopa ucupanayiyo peyacamonae. ¹² Nexata Jesús pana barai, jeye:

—Anthā matha paxaema, pana jei.

Paxan jiwana dapon aibi pon peyainyabinexa, pon pejeinexa: “¿Jintam xamda?” pon jei, tsipei daxita paxan payaitan xua bapon apara pon Patatanecanamataxeinaein. ¹³ Bapoxonae Jesús isoto bepoinya pepichinexa pan. Bapoxonae pana necatsiba yawa duwei pana necatsiba.

¹⁴ Baxua exana poxonae nama acoibi po cuiyobe xua Jesús pana netsita naituta xua poxonae equeicha asū popona petūpae cuirū coyene weya.

Meje yabara poxonae Jesús barū cueicueije Simón Pedro

¹⁵ Poxonae pana nain wetan xua Jesús pana apata, bapoxonae Simón Pedro, Jesús yainyaba, jeye:

—Simón, pon Juan pexantom, ¿bichocono neantobem, beyacaincha xua po pebiwe neantobe? jei.

—Aa, Tanecanamataxeinaem, bara caena bayatha neyaputaneme xua tacaantobewatsi bichocono, jei Pedro.

Jesús barai, jei:

—Icha neantobem, inta tamonaē tana nejume cowūntsiwi yawende, icha pon ovejāxi pe-eenaēin ichi xua yawena ovejāxi, jei Jesús.

¹⁶ Equeicha Jesús barai Pedrotha, jeye:

—Simón, pon Juan pexantom, ¿bichocono neantobem? jei.

—Aa, Tanecanamataxeinaem, bara caena bayatha neyaputaneme xua bichocono tacaantobewatsi, jei Pedro.

Jesús jume nota, jeye:

—Icha neantobem, inta tamonaē tana nejume cowūntsiwi yawende, icha pon ovejamonaē pe-eenaēin ichi xua yawena ovejamonaē, jei Jesús.

¹⁷ Equeicha acoibi po jume cuiyobe Jesús barai Pedrotha, jeye:

—Simón, pon Juan pexantom, ¿bichocono neantobem? jei.

Pedro jūntū coyene wecoyei yaitama Jesús yainyaba acoibi po jume cuiyobetha. Pedro jeye Jesustha:

—Tanecanamataxeinaem, bayatha caena daxita yaputaibame. Mataūtano yaputane-meno xua tacaantobewatsi, jei Pedro.

Jesús jume nota, jeye:

—Icha neantobem, inta tamonaē pomonaē tana nejume cowūntsiwi yawende, icha pon ovejamonaē pe-eenaēin ichi xua yawena ovejamonaē. ¹⁸ Xaniyan catsipaebatsi poxonae matha cataunxuae pewowim jinya paparuwa bara jincoutha namaxatabeibame. Mataūtano matha bara poneibame xua ichaxota ba ichichipa neponaewa. Ichitha poxonae perum tsane, ichamonaē camaxū cūbiya yotsina. Ichūn paparuwa cama xatatsina. Ichamonaē camaxū caponaena ichaxota jopa ichipaem xua neponaewa, jei Jesús.

¹⁹ Poxonae Jesús baxua paeba Pedro w̄nae tsiwanaya cui yaputane exainchi xua jiwi eta bichi tsane poxonae Pedro bexubinchi. Matautano Jesús tsiwanaya cui yaputane exana xua jiwi Nacom w̄nae jainchinchí xua poxonae jiwi taena xua po coyene cuirutha xua poxonae Pedro t̄paena peexanaexae pocotsiwa Nacom itoroba. Bapoxonae Jesús jeye Pedrotha:

—¡Bara ataya yacuiya poponare xua tamonaē jitom! jei Jesús.

Meje yabara poxonae Jesús neyabara paeba ponxaein xua Jesús bichono neantobe

²⁰ Poxonae Pedro napatomeicha necota, bapoxonae netaenota xua punauncuan ponxaein Jesús bichocono neantobe. Xan apara bapon pon bayatha matha imoxoyo Jesús caquita xunaecan, poxonae matha jan: “Tanecanamataxeinaem, ¿jintam pon cacaenaetapaeba?” ponxaein matha jan. ²¹ Poxonae Pedro netane, bapoxonae jeye Jesustha:

—Tanecanamataxeinaem, ¿incane ponje tsaner̄? jei Pedro.

²² Jesús Pedro jume notatsi, jeye:

—Icha xan tacoutha ichichipan xua bapon Juan bara ataya as̄ poponaena beya poxonae xua equeicha caewa patopeicaein po cae pin nacuathe, baxua jopa apara cata ainya cuiyo. Jamaisa xam bara ataya yacuiya poponde po coyene xua tamonaē jitom, jei Jesús.

²³ Daxota Jesús pijimonaē tatsi, barapomonaē neyabara tsiw̄n capana pijimonaetha xua xan jopa tat̄paewa tsane. Ichitha Jesús jopa paebiyo xua jopa tat̄paewa tsane. Saya apara jei: “Icha xan tacoutha ichichipan xua bapon bara ataya as̄ poponaena beya poxonae xua equeicha caewa patopeicaein po cae pin nacuathe, baxua jopa apara cata ainya cuiyo”, jei Jesús.

²⁴ Xan, Juan, ponxaein xua Jesús yabara paeban. Daxita pocotsiwa xua xuan paeban, apara pexainyeiwan. Matauta barapo diborothe xan apara tinan, pon Juan tsocuaein. Bara paichim daxita xua xuan tinan payaputanemer̄ xua baxuan apara bara pexainyeiwan.

²⁵ Awiya cui yapu seica xua tayabara tinaewa pocotsiwa Jesús daxita exana. Icha daxita diwesin tsana yabara titiniyaetsipan pocotsiwa Jesús exana, metha barapo diboron jopa po cae pin nacue tsijuntutu canāpaetsipaetsi.

Baja Juan.

Po Coyenein Jesucristo Pia Peitorobiwi Tatsi Pexeinya Coyenein Exana

*Meje yabara xua Lucas yabara tina xua Nacom yabara tsiw*nae muxu duta xua itorobina jiwitha pia Pejumope t̄nax̄ tatsi.

¹ Xam, Teófilom, tajiton cata tinatsi. Bayatha copiya matha cain cata tinatsi icha diwesi. Barapo diwesitha yabara catsipaebatsi daxita po coyenewan xua Jesús exana. Cata tinatsi bayatha daxita xua po mataqueitha Jesús tamropata pitaba po coyene xua peexanaewa, matautano xua pecuidubiwano, xua beya yacui weraweracanaya po mataqueitha poxonae athabe juinya. ² Poxonae pew̄naeya tsane xua Jesús athabe icha, matha pia peitorobiwi itapeta. Jesús cuiduba barapomonaē xua Nacom pia Pejumope t̄nax̄ tatsi pia peayapus̄watha tatsi. Jesús cata barapomonaē po coyenewan xua Jesús petaexanaenexa tsainchi. ³ Poxonaē Jesús equeicha as̄, poxonaē bequein t̄pa, bapoxonaē Jesús tsita nait̄ta barapomonaētha. Cuarenta po matakabibetha Jesús tsita nait̄ba ducuaenaēbiya barapomonaē. Petsita nait̄ba ducuaenaēbiyaexae pijimonaē, barapoxonaē pijimonaē yaputainchi xua xaniwaicha bara pet̄paein equeicha as̄. Jesús barapo pia peitorobiwi yabara cuiduba po coyene Nacom waba jiwi petanaexanaenexatsi pijimonaē pomonaē itorobiya peewatsixae.

⁴ Poxonaē cataunxuae awiya Jesús pia peitorobiwi bar̄ nacaetuta ducuaenaēbiya, Jesús barai, jeye:

—Ab̄ jopa pponaēinde Jerusalén tomara weya. Paeware xua Nacom Taxa bayatha yabara paca tsiw̄nae muxu duta. Taxa namchi: ‘Tajumope t̄nax̄ itorobicaēin’, jei. Baraxua bayatha paca tsipaebatsi. ⁵ Barapon Juan bautisaba ̄ meratha. Ichitha tsiwiyo bayiyo bexa tsane Nacom pia Pejumope t̄nax̄tha tatsi paca bautisabina. Pacata patsina Nacom pia Pejumope t̄nax̄ tatsi painya paca bar̄ poponaenexa tsane, jei Jesús pijimonaētha.

Meje yabara poxonaē Jesús athabe icha

⁶ Poxonaē Jesús pia peitorobiwi bar̄ nacaetutatsi Jesús yainyabatsi pia peitorobiwi, jeichichi:

—Jesús, pata Necanamataxeinaem, ¿methaunxuae anoxuae exanaename xua Israel nacuapiwi equeicha xeinaena itorobiya pia pepa peewatsinchi? jeichichi Jesús pijimonaē.

⁷ Jesús jume nota pijimonaē, jeye:

—Paxam jopa paca itac̄paeyo xua painya neyaputaewa po dapae poxonaē Nacom peexanaewa tsane baxua, matautano xua po mataqueitha poxonaē peexanaewa tsane. Saya meisa Taxa xeina peayapus̄ itorobi coyenewa, po peayapus̄ itorobi coyenewatha xua peexanaewa baxua. ⁸ Poxonaē Nacom pia Pejumope t̄nax̄ tatsi pacata patsina painya nepaca bar̄ poponaenexa xua bapoxonaē peayapus̄wa painya nexenaenexa. Tajume diwesi painta papaebiname Jerusalén tomaratha, Judea nacuathano, Samaria nacuathano, daxita carepaya taj̄ nacuantha, jei Jesús.

⁹ Poxonaē Jesús baxua najume weta, Jesús athabe caichatsi Nacom. Jesús pia peitorobiwi taeumeinyatsi. Barapomonaē tsaquinaebowa tane xua Jesús matawacaicha duneicatsi. Equeicha Jesús jopa taetsi. ¹⁰ Poxonaē awiya came barapomonaē necotumeinya itaboco, barapomonaē jemeicha caquita umenar̄cupatsi pon xua nacueyatabe, ponbe xua pemainya paparuwa penama xatatsinbe. ¹¹ Baraponbe Jesús pijimonaē tatsi baraichi, jeye:

—Ja, pomonaē Galilea nacuapiwi pam, ¿eta xua metha came awiya paitaboco necotumeinyame? Bapon Jesús, pon xuaunxuae athabe icha painya xamtha, bexa tsane

equeicha patopaetsica, barapocotsi j̄ta coyeneya ichi tsane ichaunxuae aunxuae icha ichi, poxonae athabe icha.

Meje yabara poxonae Jesús pia peitorobi jiwi tatsi Matías itapetatsi Judas pecoutha petanacuichiwa tsainchi

¹² Barapoxonae Jesús pia peitorobi jiwi tatsi demxuwa weiyiya po demxuwa pew̄n Olivo demxuwa xua Jerusalén tomara be-iyiya. Poxoru Jerusalén tomara imoxoyo daxota barapomonae itac̄patsi xua peponaewa Jerusalén tomara beya demxuwa weya bequein bara judiomonae pia pentaquei seicae matabi tatsi saya poxoru Moisés pia peitorobi coyenewatha baxua peyabara copatsixae. ¹³ Poxonae Jesús pia peitorobiwi tatsi pareca Jerusalén tomaratha, athabe jujuinya po tututha athawetsica jinompa. Baraxota jinompa Jesús pia peitorobiwi tatsi pew̄n Pedro, ir̄ Juan, ir̄ Santiago, ir̄ Andrés, ir̄ Felipe, ir̄ Tomás, ir̄ Bartolomé, ir̄ Mateo. Ir̄ popona ich̄n Santiago pon Alfeo pexanto tatsi. Ir̄ popona ich̄n pon pew̄n Simón. Barapon Simón celotemonae jiwanapin. Barapo celotemonae pomonae ba ichichipa xua pexeinaewa barompaya pia pecanamataxeinaeinchi. Ir̄ popona ich̄n pon pew̄n Judas pon Santiago pexanto tatsi. ¹⁴ Daxita barapomonae ir̄ Jesús peyapin jiwi tatsi bar̄ nacaetuteibatsi, xua pebar̄ tsipaebibinexatsi Nacomtha. Ir̄ Jesús pena tatsi, bapowa María, ir̄ ichowaxi yab̄xi bar̄ nacaetuteibatsi xua pebar̄ tsipaebibinexatsi Nacomtha.

¹⁵ Nexata caentacabi Pedro nontapona ichaxota ena pomonae xua Jesús pejume cow̄ntsiwi. Barapo bicheito be ciento veinte poyobe. Barapomonae Pedro barai, jeye: ¹⁶ “Tamonae pam, pomonae ir̄ painya nejume cow̄ntsiwixae Jesús. Bewa nayabara jume cui wetsina po coyene bayatha Nacom namchi xua pejume diwesitha yabara tsiwanaya paeba. Bayatha caena David cueicueije exanatsi Nacom pia Pejumope t̄nax̄ tatsi xua Judas cui coyene caunutatsi xua pinae Jesús waetabinchi pomonae Judas matabapona. ¹⁷ Bara Judas yatsicaya pata jiton petain pana nabar̄ nacuitan barapo penacuichiwa. ¹⁸ Poxonae Judas Jesús caenaetatsi, sacerdotemonae pia pentacaponae wi tatsi Judas catatsi paratixi. Pirapae sacerdotemonae pia pentacaponae wi tatsi bapo paratixitha Judas pet̄paein tsicomotatsi ira. Judas iratha jopeica poxonae t̄pa yawa coto tsitecatsi, ̄n̄ pichatecatsino abe peexanaexae. ¹⁹ Nexata pomonae Jerusalén tomaratha pejinompaewi, barapomonae jume tane pocotsiwa Judas exana. Daxota barapomonae barapo ira w̄n duta po w̄n jei: ‘Acéldama ira’, jei. Barapo jume, barapomonae pijumetha xua jei: ‘Pejana ira’, jei”, jei Pedro. ²⁰ Equeicha Pedro barai barapomonae pomonae pejume cow̄ntsiwi, jeye: “Salmos penax̄nae wei diwesitha Judas pet̄paexae yabara paeba, jeye: ‘Pia bo tatsi tausaya bo tauncuaeinchi.

Jopa ich̄n ecae tsane baxota’, jei.

Matautano namchino:

‘Equeicha pecoutha tanacuitinchi ich̄n’,

jei Salmos penax̄nae wei diwesitha,

xua Judas yabara”, jei Pedro.

²¹ Nexata Pedro equeicha namchi, jeye: “Xote waxantha jinompa pebiwi pomonae matha cain pana nepuna jinompar̄ poxonae Jesús pon Wanacanamataxeinaein pana nebar̄ jinompa daxita pan. ²² Barapo pebiwi taneno xua Juan Jesús pebautisabiwatsi. Yawa barapo pebiwi taneno xua poxonae Jesús cataunxuae exana ducuaebiya pocotsiwa xua pew̄naewan. Matautano barapo pebiwi taneno poxonae Jesús yantacabi jopa po mataqueitha poxonae athabe juinya. Bewa wabichipatsi caein barapo pebiwi jiwana, pon pecui yaputaein po coyene Jesús equeicha as̄ popona. Bapon ir̄ pana puna cueicueije tsane xua po coyene Jesús equeicha as̄ pepoponaewa”, jei Pedro barapo pejume cow̄ntsi jiwitha.

²³ Barapomonae pomonae pejume cow̄ntsi jiwi najiwana itapeta ayunbe. Ich̄n pew̄n José Barsabás, pon icha w̄n Justo. Ir̄ ich̄n pew̄n Matías. ²⁴ Nexata barapomonae Jesús athabeicha tsipaebatsi, jeye: “Nacom, pon jiwi Necanamataxeinaem.

Daxita jiwi nejuntũ coyene yaputaevin. ¿Incane methara ponbe jiwana pon xua ichichipamera, pon xua cuita itapeta ichichipame? ²⁵ Barapon irũ penaexanaenexa jinya neitorobi jiton pon xuya Judas pecoutha petanacuichinexatsi. Judas tũpa nacabeta abe peexanaexae. Judas pona ichaxota po nacuatha jopa nacoicha duntsiyo isoto”, jei barapomona.

²⁶ Nexata barapomona wũn jiyatabaxuba ibotiyobe. Nexata saya Matías wũn naitutaraba. Daxota bapon Matías itapeta cuita wabatsi. Matías once pomonaeyobetha napona pomona Jesús pia peitorobi jiwi tatsi.

2

Meje yabara poxona Nacom pia Pejumope tũnaxũ tatsi patopeica pomonaetha pomona Nacom pejume cowũntsiwi

¹ Pentecostés matababi tsuxubi, po mataqueitha xua poxona jiwi tsinacaetuteiba penabanaenexa pexaewa peyabara nanta xeinaexae xua pexaewa naweta. Barapo matababitha daxita pomona Jesús pejume cowũntsiwi bara cae botha nacaetuta.

² Barapo mataqueitha barapomona busi tane, pebusi po busi xua be joibo busi po busi xua busi nainya naetaba itaboco wetsica. Barapo busi daxita bo tutu canaũpa ichaxota barapomona nacaetuta. ³ Barapoxona barapomona tsita naitapeinya xeinatsi xua be peebato jumope coichan. Barapo peebato jumope coichan daxita carepaya barompaya barapomona jajayababa tsiniya taenatsi. ⁴ Barapoxona daxita carepaya barapomona jũntũ coyene yũcatsi Nacom pia Pejumope tũnaxũ tatsi pia peayapusũ itorobi coyenewa tatsi. Mataũtano daxita barapomona barompaya tsanaya icha jumeintha cueicueijeji xua be po jumetha Nacom pia Pejumope tũnaxũ tatsi cueicueijeji cana exana barapomona po jumein xua jopa yaputaeyo.

⁵ Barapo matababintha, irũ pinmona judiomona pata Jerusalén tomaratha, po judiomona i dapocotsi nacuan werena peponaewi xua penataenexa Pentecostés wũn matababi poxona tsinacaetuta pexaewa penabanaenexa. Barapomona bichocono pejume cowũntsiwi Nacom. ⁶ Barapo ayei bicheitomona pomona judiomona barapomona busi tane xua po busi, busi duneica ichaxota nacaetuta pomona barapon Jesús pia pejume cowũntsiwichi tatsi. Barapo judiomona jume tane xua daxita barapomona barompaya pia jumexitha cueicueijeji xua judiomona pia pejume tatsi. Barapoxona barapomona nanacaetuta Jesús pejume cowũntsiwitha. Barapomona pomona judiomona najũntũ coyene cabenaeca. Yawa jopa yaputaeyo xua peyabara nanta xeinaewa baraxua tsipei daxita barapomona pomona Jesús pejume cowũntsiwichi barompaya judiomona pijumexitha tatsi cueicueijeji. ⁷ Daxita barapomona pomona judiomona najũntũ coyene cabenaeca. Nantiya caemona natsipaeba, jeye:

—¡Jina, bara barapomona Galilea nacuapiwiba, pomona bequein barapomona jopa icha jumeintha pecueicueijeji jiwi xua wajumeintha pecueicueijejiwa! ⁸ ¿Eta pocotsiwa barapomona metha daxita barompaya tsanaya icha jumeintha cueicueijeji xua wajumeintha? ⁹ Xote jinompa Partia nacuapiwi irũ Media nacuapiwiba, irũ Elam nacuapiwiba. Barichi xote jinompe Mesopotamia nacuapiwi, irũ Judea nacuapiwiba, irũ Capadocia nacuapiwiba, irũ Ponto nacuapiwiba, irũ Asia nacuapiwiba. ¹⁰ Mataũtano barichi xote jinompa Frigia nacuapiwi, irũ Panfilia nacuapiwiba, irũ Egipto nacuapiwiba, irũ Libia nacuapiwiba pomona jinompa imoxoyo Cirene nacua. Mataũtano ichamona pata pomona Roma tomarapiwi. ¹¹ Barapo Roma tomarapiwi icha judiomona pepa judiomona xua yacui naexana. Icha judiomona jopa pepa judiomonaeyo. Saya judiomona penaexanaewi, tsipei barapomona jume cowũnta Nacom icha be judiomona ichi pomona pepa judiomona. Irũ pata ichamona Creta nacuapiwi, irũ Arabia nacuapiwiba. Ichitha daxita waxainchi jume tainchi xua Nacom pewũnaewan exana peayapusũwatha, poxoru barapo Jesús pijimona tatsi wajumeintha paeba, jei barapo judiomona.

¹² Daxita barapo judiomonae najuntũ coyene cabenaeca. Daxota barapomonae jopa xaniwaicha yabara nanta xeinaeyo baxua. Barapomonae caemonae nayainyabiya, jeye: —¿Eta pocotsiwa metha baxua jane? jei. ¹³ Ichamonae saya jume cui capana. Barapomonae namchi, jeye:

—¡Apara barapomonae Jesús pijimonae tatsi cãpatsi! jei.

Meje yabara poxonaе xua Pedro tsipaeba barapomonae

¹⁴ Jesús pia peitorobiwi tatsi poyobe xua once poyobe, barapoyobe pia xantha tatsi Pedro nontapona. Matautano nontapona pepa bicheito itabaratha tatsi. Pedro jume daunweya barai barapo bicheitho, jeye: “Paxam, pomonae Judea nacuapiwi pamxaem irũ daxita pomonae Jerusalén tomarapiwi pamxaem, incane pana nejume taema, yabara paca tsipaebinchi xuaunxuae pajume taneme. ¹⁵ Barapo pebiwe xua Jesús pijimonae tatsi apara jopa cãpaetsi xuaunxuae pacui yabara nanta xeiname. Apara awiya xometo caewa ecareca. Cataunxuae apara baya daxota jopa cãpaetsi. ¹⁶ Baraxua xuaunxuae anoxuae pajume taneme, caena bayatha Nacom pia peitorobi jume pepaebin yabara tsiwũnae muxu duta pon pewũn Joel. Joel baraxua Nacom Pejume Diwesitha tina xua saya tatina, xua pinae Nacom paeba.

¹⁷ Jeyei Nacom:

‘Poxonae barapo cae pin nacuathe po matabi
opi weraweracaena, bapoxonae barapo
matabitha daxita carepaya jiwitha
najumope tũnaxũ cayataxubiya catsibin.
Painya nexanto jiwi irũ painya nexantixi
neyabara cueicueijei tsane pocotsiwa
xua yaputane exanan.

Pewowi yatsicaya tsita naituteibinchi
be poxonae camaiteibina.

Pitiri jiwi camaiteibina poxonae amachinae tsane.

¹⁸ Pomonae xua amanaya neyabara diwesi
canantsipaebina, barapomonaethano
najumope catsibin barapo matabitha,
yabũxithano, pebiwithano. Barapoxonae inta cueicueijei tsane.

¹⁹ Peitabocotha paca tsita itũtsinchi po coyenein
bichocono pewũnaewan xua jiwi bichocono
najuntũ coyene cabenaeca exanatsi.

Iratha tsicano paca tsita itũtsinchi po coyenein
xua jopa juniya be pejana tsurucuae tsane, xuano
xua jopa juniya be isoto tsurucuae tsane, xuano
xua jopa juniya be nobo tsũxũ tsurucuae tsane.

²⁰ Poxonae patopaetsica pon jiwi Pecanamataxeinaein
copiya baraxue panecotsiname xua xometo quiri
jei tsane, jopa pentha tsurucuae tsane.

Yawa panecotsiname xua jomocoichato be
janowa ducuaena.

Barapo matabi wũnae tsane poxonae pon jiwi
Pecanamataxeinaein patopaetsica.

Barapo matabi Nacom pepa peitũpanae
matabi exanaena.

²¹ Pomonae picoya penata wũcaewa Nacomtha xua
Nacom peyawenaenexa tsainchi, barapomonae
capanenebiya tsainchi Nacom’, jei Joel
xua saya Nacom tapaebatsi”, jei Pedro.

²² Equeicha Pedro barai barapomonae jeye: “Pomonae Israel nacuapiwi pamxaem, incane pana nejume taema, xua paca tsipaebinchi. Jesús, pon Nazaret tomarapinxae bapon Nacom itoroba painya xantha. Bapon Jesús pewunaewan exana pexeinya petsita itatsi coyenewanno Nacom pia peayapuswatha tatsi, painya neyaputaenexa tsane xua Nacom yawena xua Jesús peyawenaewatsi. Paxam bayatha payaputaneme xua bapon tsita naituba ducuaenaebiya. ²³ Bayatha Nacom paca cui wuna tsiwanaya tane xua po coyeneya pata exanaename pexantotha tatsi. Nacom bara paca cui copata xua abe paexaname. Jesús pawaetabame painya caenaetsinexa tsane bapon peacuibe jiwitha. Barapomonae Jesús cobe matabobatsi naetotha yawa bexotsi. ²⁴ Ichitha equeicha Nacom asu exana pexanto petupae cuiru nacua weya. Nacom Pexanto capanepa pia peantuyapuswatha barapo petupae cuiru nacua weya, tsipei barapo petupae cuiru nacua jopa xeinaeyo peayapuswa xua Jesús awiya pebotsiwatsi barapo petupae cuiru nacua. ²⁵ Iru David, Israel nacuapiwi itorobiya pia pepa peewatsinchi, caena bayatha tina Nacom Pejume Diwesitha. David tina Jesús jume yabara tatsi. David namchi, jeye:

‘Yaputan xua Tanecanamataxeinaein nebaru
poponeiba daxita matacabi.

Bapon neyaweneiba.

Bapon nebaru poponeiba daxota
jopa junuwin tsane.

²⁶ Daxota bichocono juntu coyene weiweinan.

Matautano daxota Nacom Pejume Diwesi
juntu coyene weiweinaya
cueicueijan ichamonaetha.

Bara bequein tupaen, muthutha bocuaeinno,
ichitha jume cowantan xua Nacom equeicha asu
neexanaena pia peantuyapuswatha.

²⁷ Xam Nacom jopa punaxubim tsane tajumope
petupae cuiru cuariyatha.

Poxoru xan jinya nexanton tajuntu cui
xanepanaein daxota jopa benecopatsim
xua tatupaein tuxamnuncuaein,
yawa xua tsabanuncuaein.

²⁸ Neita cui tsita itubame beta xaniwaicha
tapoponaenexa tsane poxona equeicha asu
neexanaename petupae cuiru nacua weya.
Nejuntu coyene weiweina exaname tsipei
neyanta poponeibame’, jei David
xua saya Jesús tapaebatsi”, jei Pedro.

²⁹ Equeicha Pedro barai barapomonae, jeye: “Tamonae, daxota beta paca tsipaebatsi xua pinae David wamo susato nacuapin bayatha pinae tupa. Piamonae muthutha xotsi. Awiya waxantha boca barapo muthu ichaxota petupaein muthutha xotsi. ³⁰ Apra, barapon David, pinae Nacom peitorobi jume pepaebin. Bayatha pinae David nacana wuna tsiwanaya muxu tsidutatsi Nacom, xua pinae David pijimonae tatsi jiwana pon jiji Pecanamataxeinaein tatsi naexanaena. Barapon pon Pecanamataxeinaein jiji Israel nacuapiwi canamataxeinaeinchi icha cain bayatha David ichi poxona canamataxeina barapo Israel nacuamonae. ³¹ Bayatha pinae David yabara tsiwuna muxu duta xua bexa tsane Nacom Mesias equeicha asu exanaeinchi. Nacom Pexanto tatsi pon David yabara jume jei, apra bapon Mesias. David namchi xua Mesias jeyei xua saya pinae David tapaeba: ‘Xam Nacom jopa punaxubim tsane tajumope petupae cuiru cuariyatha. Poxoru xan jinya nexanton tajuntu cui xanepanaein, daxota jopa benecopatsim xua tatupaein tuxamnuncuaein yawa xua tsabanuncuaein’, jei David xua Mesias jeyei.

³² Pon Mesias, pon xuaunxuae yabara paca tsipaebatsi apra bapon Jesús pon Nacom equeicha asu exana. Baraxua paxan yatsicaewa pata cui taewi. ³³ Jesús asiya icha

peecaenexa Nacom pecoxatha tatsi. Jesús pon jiwi pepa Pecanamataxeinaein exanatsi Nacom. Matautano Jesús nacana jumope catatsi, Nacom. Barichi baxua xuaunxuae pataneme yawa pana nejume tanemeno xua daxita carepaya barompaya icha jumexitha pacueicueijan, baraxua Nacom pia Pejumope tñaxu tatsi pana cata. ³⁴ Poxoru David saya tupa, jopa athabe ichiyo, icha be jopa Jesús ichiyo poxonae athabe icha Jesús. Ichitha saya baxua David tapaeba Nacom, xua Nacom Mesías tsipaebatsi, jeye:

‘Nacom, Tanecanamataxeinaein baraichi.

Tacoxatha weya ecare.

³⁵ Abũ beya poxonae matapainya necaitafaetabi jiwi

pia Pecanamataxeinaein tatsi caexanaeinchi.

Barapomonaē beexanaetsipa pocotsiwa xua xam

nepaebiwam’, jeye pinae Nacom xua Mesías

tsipaebatsi, jei David Nacom nexa”, jei Pedro.

³⁶ Equeicha Pedro namchi barapomonaetha: “Paxam, pomonaē Israel nacuapiwi pamxaem. Anoxuae payaputaneme pon xua naetotha tũparucua paexaname, Nacom exana xua bapon jiwi pia Pecanamataxeinaein tatsi naexana. Yawano Nacom naca itata caewata xua pon Mesías jei, pon Nacom itorobica petsitũpaenexa jiwi, apara bapon Jesús”, jei Pedro.

³⁷ Poxonaē daxita carepaya barapomonaē baxua jume taerũcupa bichocono jũntũ coyene wecoyeyi tsũrũcupae. Barapomonaē Pedro baraichi irũ Jesús pia peitorobi jiwi tatsi baraichi, jeye:

—Patamonaē, ¿eta bewa pabichin tsane metha? jei.

³⁸ Nexata Pedro barapomonaē barai, jeye:

—Icha jũntũ coyene paxeinare Nacomtha painya neauraxae xua abe paexaname. Matautano daxita carepaya pam ichamonaē paca bautisabina Jesucristo pewũnta xua Nacom pia paca necayabara jũntemainaenexa xua abe painya neexanaē cuiru coyenein. Barapoxonaē Nacom paca nacana jumope catsibina. ³⁹ Barapo peyabara tsiwũnaē muxu dutsiwa apara paxam nexa, irũ muxuna daxita painya pexui nexano. Matautano pomonaē tajũ beya jinompa irũ barapomonaē nexa. Barichi Nacom pon Wanacanamataxeinaeinxae, pomonaē waba peantobexae barapomonaē irũ nexa, jei Pedro.

⁴⁰ Barapo jumeintha yawa icha jumeintha Pedro tsipaeba barapomonaē. Matautano Pedro bichocono muxuweta poxonaē jeye:

—Po coyenein xua daxita abe peexanaē cuiru coyenein paexaneibame, barapo coyenein pana nacui barapende, po coyenein xua daxita carepaya jiwi exaneiba, jei Pedro.

⁴¹ Po matabitha poxonaē Pedro paeba baxua barapo matabitha pomonaē jume cowũnta xua Pedro paeba barapomonaē bautisabatsi. Barapo matabitha tres mil po bicheito jiwimonaēbe naexana xua pomonaē copiya pomonaē Nacom pejume cowũntsiwixaetsi barapomonaē mataropeicha pinmonaē naexanatsi. ⁴² Barapomonaē nacuiduba nawita, xua Jesucristo pia peitorobi jiwi tatsi paeba. Barapomonaē nacana cui nanta jũpaya jinompa. Nacomtha nabarũ tsipaēbeibano. Nabarũ nacaetuteibano xua penabarũ epa janaqueibinexa pan xua penabarũ xaibinexa. Barapomonaē baxua exana dubenanaēbiya xua Jesucristo peyabara nanta xeina dubenanaēbiyaenexatsi po coyene xua Jesucristo bayatha icha ichi xua poxonaē pan epa janaca.

Meje yabara po coyeneya xua jinompa pomonaē copiya Jesús pejume cowũntsiwi

⁴³ Jesucristo pia peitorobiwi tatsi, barapomonaē pexeinya petsita itũtsi coyenewan exana nawita Nacom pia peayapusũwatha tatsi. Daxota pomonaē jopa Jesucristo pejume cowũntsiwichi, daxita barapomonaē junuwa, Nacom cunuwatsi poxonaē cui tane baxuan. ⁴⁴ Daxita barapomonaē, pomonaē Jesús pejume cowũntsiwixaetsi, barapomonaē xaniwaicha caemonaē pebũrũya nabarũ jinompa. Matautano barapomonaē caemonaē

nantiya nacatsiba dubenanaebiya pichiwiwi pocotsiwan xua xeina. ⁴⁵ Matautano barapomonaе daxitan pocotsiwan xua xeina caenaeta dubenanaebiya. Bapoxonaе barapo paratixi nata tsaba dubenanaebiya xua jopa pexeinaexae ichamonaе xua icha be pocotsi coyeneya pocotsiwan canantawenona ichamonaе. ⁴⁶ Daxita carepaya barapomonaе nabarũ nacaetuta dubenanaebiya Nacom pin pia botha. Matautano pia boxitha nabarũ nacaetuta dubenanaebiya pan nabarũ epa nantarũba janaquiya exana dubenanaebiya. Jũntema nabarũ jũntũ coyene weiweinaeya xaerubenanaebiya. ⁴⁷ Daxita barapomonaе carepaya Nacom wũnae jainta dubenanaebiya. Matautano barapomonaе barũ cui itura jinatsi ichamonaе beta peexanaexae. Daxita matabi tsaibi pomonaе Nacom pejume cowũntsiwixaetsi barapomonaе Nacom cana exana xua mataropeicha pinmonaе tsoponaе tsaibi.

3

Meje yabara poxonaе pon pejayujayuwei jiton equeicha cui jume exanatsi

¹ Caentaqueitha quiripitha poxonaе tres po horabe tsuxubi po horatha poxonaе jiwi ba poneiba Nacom pin pia botha xua petsipaebeibinexa Nacomtha bapoxonaе Pedro irũ Juan Nacom pin pia botha jonyabe. ² Barapo bo Nacom pin pia bo tatsi icha coiboto jiwi wũn duta, jeye: “Pexeinya coiboto”, jei. Barapo coibototha daxita matabi tsaibi pebin cuareteibatsi pon pejayujayuwei jiton xua yawa naexana poxonaе pexuyo. Daxota bapon baxota cuareteibatsi xua pewũquequeibinexa pomonaetha pomonaе jojoneibiya barapo coiboto iya. ³ Pon pejayujayuwei jiton wũca paratixi poxonaе Pedro irũ Juan tainchibe xua muxu pejonyabe barapo coiboto iya. ⁴ Nexata Pedro irũ Juan tanebe bapon. Pedro barai bapontha, jeye:

—Incane pana taemabe, jei Pedro.

⁵ Nexata necota bapon. Nanta xeinataba xua catinchi paratixi. ⁶ Ichitha Pedro barai bapontha, jeye:

—Canta jopa xeinaeyo paratixi. Matautano jopa xeinaeyo pocotsiwa oro nain matawũn. Meisa po coyenewa xua taxainaewa baxua cacatinchi. Jesucristo, Nazaret tomarapin wantha cabaraichi, asiya uncuatabare yawa pondeno, jei Pedro.

⁷ Nexata Pedro pocotsiwa pecoxa weya cobe pita. Yawa asiya cuaranotano. Bapoxonaе nainya beta taxuyawere daunweya ducuanaya. Pesitano wũnae tsanayano. ⁸ Nexata bapon pon pejayujayuwei jiton jirawũna. Asiya uncuatabano. Ponano. Bapoxonaе Pedro irũ Juan puna jonyatsibe bapon, Nacom pin pia botha. Jirajirawiya ponano. Yawano Nacom wũnae jaintatsi. ⁹ Nexata daxita pomonaе xua Nacom pin pia bo tututha peenaexae, tainchi pon pejayujayuwei jitonxae xua pona, yawano xua Nacom wũnae jaintatsino. ¹⁰ Barapomonaе daxita carepaya najũntũ coyene cabenaecaeya tane, tsipei barapomonaе bayatha cui tane xua bapon amanaya jiwi wũquequeiba paratixi pecoibototha, po coiboto pewũn “Pexeinya coiboto”, jei.

Meje yabara poxonaе Pedro diwesi paeba Nacom pin pia botha po tututha pewũn Salomũn bo wũn tututha

¹¹ Poxonaе pejayujayuwei jiton awiya maxũ waetabatsibe Pedro Juanno bapoxonaе irũrũ daxita jiwi najũntũ coyene cabenaecaeya cuinaenouta Nacom pin pia botha xua tututha po tututha Salomũn bo wũn tututha ichaxota Pedro barũ jinompa. ¹² Poxonaе Pedro barapomonaе caetaebiya, Pedro barai: “Ja, pomonaе Israel nacuamonaepiwi pamxaem, ¿eta xua metha daxita paxam pana najũntũ coyene cabenaecaeya taneme baxua? ¿Pana neyabara nanta xeinamebe xua pata taayapusuwatha paaxaibi exananbe pejayujayuwei jiton? ¿Matautano pana neyabara nanta xeinamebe poxoru Nacom pajume cowũntanbe daxota pon pejayujayuwei jiton axaibi? ¹³ Ajibi, apara wamo susato jiwi pia Nacom tatsi axaibi exana bapon. Barapo Nacom Jacob pia Nacom tatsi, Abraham bapon pia Nacomno, Isaac bapon pia Nacomno. Apara bapon baxua taexana Nacom. Bapon Nacom Pexanto bichocono ainya cui cana exana poxonaе pexanto asũ exana petũpae cuiru coyene weya. Bapon apara Jesús pon pacanaetame pomonaetha pomonaе

pentacaponawewi, pon bepa bequein isanaxubei Pilato poxona paxam jopa pacopatsim xua bapon peisanaxubiwa. ¹⁴ Bapon pon bichocono pejuntũ coyene xanepanaein xua jopa xeinaeyo penatsicuentsiwa xua abe peexanaexae tsipei saya exaneiba pocotsiwa Nacom ichichipa. Ichitha jopa paichipaem xua Pilato peisanaxubiwa tsane bapon. Saya meisa pawucame xua Pilato peisanaxubiwa ichun pon jiwi pejutebeibin pon Barrabás. ¹⁵ Poxona baxua paexaname barapara Jesús pabexubame. Bapon Jesús pon jiwi cana exanatsi xua jiwi ajuntũyapusũya pejinompaewa. Bapon Jesús Nacom equeicha asũ exana petũpae cuiru coyene weya. Bara baxua yatsicaya pacui tan daxita. ¹⁶ Po jume wun peayapusũ wun, bapo wun Jesús pia wun. Daxota pejajuyajuyjei jiton barapo jume wuntha axaibi exanatsi. Barapon pataneme xua axaibi, tsipei bapon jume nanta pitabiya jume cowũnta barapo peayapusũ jume wun. Daxota barapon painya itabaratha axaibi tsuxubi poxoru jume cowũnta Jesús”, jei Pedro.

¹⁷ Equeicha Pedro jeye: “Tamona yaputan xua jopa payabara yaputaem xua paexaname poxona Jesús pabexubame. Barichi painya pentacaponawewino jopa yabara yaputaeyo xua baxua exana. ¹⁸ Nacom peitorobi jume pepaebiwi bayatha Mesías yabara tsiwana paebatsi. Barapomona paeba, jeye: ‘Bexa tsane Mesías bexubinchi’, jei. Nacom bara nacui yabara jume weta baxua xua bayatha Nacom peitorobi jume pepaebiwi paeba. ¹⁹ Daxota icha jũntũ coyene paxeinare Nacomtha painya neuraxae xua abe paexaname. Yawa pajume cowũnde painya nepaca cayabara jũntemainaenexa abe painya neexanae cuiru coyenein. Yawa Nacom pawucare xua paca jũntũ coyene xanepana exanaena. Bapoxona Nacom paca jũntũ coyene ayapusũya exanaena. ²⁰ Tsipei Nacom equeicha athawetsica Jesús itorobicaeinchi pon bayatha Nacom itapeta pon Mesías xua painya nepaca capanenebiyaenexa tsane abe painya neexanae cuiru coyenein weya. ²¹ Cataunxuae abũ Jesucristo equiya Nacom pia nacuatheicha tatsi. Equeicha bapon patopaetsica poxona Nacom wũnae exanaena daxitan, be pocotsi coyeneya bayatha Nacom peitorobi jume pepaebiwi paeba. ²² Barichi Moisés pata amo susato jiton namchi: ‘Painyamonae jiwana Nacom cana exanaena, pon Nacom pia peitorobi jume pepaebin tsecae tsane icha neichi. Pajume cowũntsiya exande daxita pocotsiwa xua bapon paca tsipaebina. ²³ Daxita pomona jopa jume cowũntsiyo pocotsiwa bapon paeba, barapomona Nacom weraweraca cana exanaena xua jopa penaexanaenexa Nacom pijimona tatsi’, jeyei Moisés”, jei Pedro.

²⁴ Equeicha Pedro jeye: “Daxita Nacom peitorobi jume pepaebiwi irũ Samuel pon xua yatsicaya tabũ ducua, baraxua carepaya bapo diwesin yabara paeba barapo matacabin. ²⁵ Barapo Nacom pia peyabara tsiwũnae muxu dutsiwa po peyabara tsiwũnae muxu dutsiwa Nacom tsiwũnaeya muxu duta Nacom pia peitorobi jume pepaebi jiwitha, apara bara irũ paxam nexa. Baxua Nacom pena peyabara tsiwũnae muxu dutsiwa Abraham yabara tsiwũnae muxu dutatsi pon wamo susatopin xua xanepanaya painya nejinompaenexa. Nacom Abraham baraichi, jeye: ‘Caein jinya nemomoxi susato jiwi jiwana pin pepatopaexae tsane daxita i dapocotsi nacuanpiwi yawenaen’, jei Nacom Abrahamtha. ²⁶ Poxona Nacom Pexanto asũ exana petũpae cuiru coyene weya, bapoxonae copiya pacata itoroba painya xantha pia painya nepaca cayawenaenexa xua daxita paxam painya nenacui barapentsinexa abe painya neexanae cuiru coyenein”, jei Pedro.

4

Meje yabara poxona Pedro irũ Juan cueicueije tsuncuaebe pomona tomarapiwi pia pentacaponawewi tatsi peitabaratha tatsi

¹ Poxona cataunxuae Pedro irũ Juan cueicueijeibe barapomonaetha, bapoxonae sacerdotemona pia pentacaponawewi tatsi pata. Irũ patopa pon soldadomona pia pentacaponaein tatsi pon Nacom pin pia botha tatsi pe-eenaen. Yawa saduceomonaeno irũ pata baxota. ² Barapomona bichocono anaepana, yaitama Pedro Juanno paebabe xua po coyene Jesús petũpaein equeicha asũ, xua pinae barichi jiwino poxonae tũpa

equeicha asu. ³ Bara nexata Pedro Juanno waetabatsibe barapomona. Jiwi pecubi botha capoinchibe. Barapo botha etatsibe tsipei quirei tsanaya xua beya poxona yaitapenacaena. ⁴ Pinmonae jume tane po diwesi Juan iru Pedro paebabe, yawa jume cowantano barapo diwesi. Barapomona iruru pomona copiya jume cowanta caena bayatha, daxita barapomona nexata daxita cinco mil bicheito tsuxubi xua saya pebiwi ununatsi.

⁵ Icha mataqueitha judiomona pia pentacaponaeawi tatsi, iruru pitiri jiwi, iruno pomona jiwi pecuidubiwi Moisés pia peitorobi coyenewa tatsi, daxita barapomona nacaetuta Jerusalén tomaratha. ⁶ Baxota iru nanacaetuta Anás pon sacerdotemona pia pepa pentacaponaein tatsi. Iru nanacaetuta Caifás, Anás perobi. Iru nanacaetuta Juan iru Alejandro, ponbe Anás piamona tatsi. Barichiru nanacaetuta ichamona pomona sacerdotemona pia pentacaponaeawi tatsi barapomona piamona tatsi. ⁷ Bapoxona ichamona itoroba xua Pedro iru Juan pecuaranotatsinexatsibe barapo penacaetutsiwi itabaratha. Yainyabatsibe, jeichibe:

—¿Jintam pia peayapusu itorobi coyenewatha tatsi matautano jintam pewantha tatsi axaibi paexanamebe? jeichichibe.

⁸ Pedro bichocono juntu coyene yucatsi Nacom pia Pejumope tunaxu tatsi pia peayapusu itorobi coyenewa tatsi. Pedro barapomona jume nota, jeye:

—Pomona tomarapiwi pia pentacaponae jiwi pamxaem, iruru pomona pitiri jiwi pamxaem, pomona Israel pijimona tatsi pamxaem, daxita barapomona pam paca tsipaebatsi. ⁹ Maisa yabara pana yainyabamebe xua po coyene pejayujayujei jiton axaibi xua painya neyaputaenexa xua eta po coyeneya xua paexananbe poxona bapon axaibi exanatsi po coyene xua bichocono wnae. ¹⁰ Daxota paxanbe paca jume notatsi xua iru israelmonaejiwi peyaputaenexa po coyene xua pon pejayujayujei jiton axaibi exanatsi poxona pawun paeban Jesús pewun pon Nazaret tomarapin. Bapon Jesús, pon apara naetotha tupaerucua paexaname matautano pon equeicha Nacom petupaen asu exana petupae cuiru coyene weya. ¹¹ Bayatha Nacom Pejume Diwesitha tsiwanaya yabara paeba xua po coyeneya pacana exanaename Jesustha. Paxam be barapocotsimona pam, be pocotsimona xua ibo bo peacabiwi. Barapomona xuba iboto po iboto bequein ainya cui naexana beyacaincha icha iboto. Paxam bara paichim Jesucristo paxubame pon peainya cuin xua Nacom ainya cui cana exana beyacaincha ichamona. ¹² Barapo cae pin nacuathe dapocotsin aibi pon capanepeiba jiwi. Saya meisa bapon Jesús capanepeiba jiwi. Ichun Nacom jopa nacata itorobiyo.

¹³ Daxita tomarapiwi pia pentacaponaeawi tatsi yabara najuntu coyene cabenaeca xua Pedro Juanno jopa auriyobe xua atsaquiya paebabe. Tsipei barapomona pomona pentacaitorobi bicheito yaputane xua Pedro Juanno jopa nacuidubiyobe petinae botha matautano xua baponbe saya pecui pawu jitonbe. Barichi barapo pentacaitorobi bicheito yaputaneno xua xaniwaicha apara baponbe ponbe napuna poponeibabe Jesustha. ¹⁴ Barapomona moya ena tsipei pon pejayujayujei jiton Pedro Juanno axaibiya caquita uncuatsibe. Daxota barapomona Pedro Juanno jopa abe yabara paebichibe. ¹⁵ Pedro Juanno matha pesato beitorobiyatsibe. Barapomona natsipaeba. ¹⁶ Nabarai, jeye:

—¿Eta bichainchi metha baraponbetha Pedro Juanno? Bayatha daxita carepaya Jerusalén tomarapiwi yaputane xua Juan Pedrono exanabe pexeinya petsita itutsi coyenewa Nacom pia peayapusuwatha tatsi. Daxota jopa naca itacupaeyo xua wapaebiwa po coyene xua baponbe jopa apara exanaeyobe pexeinya petsita itutsi coyenewa Nacom pia peayapusuwatha tatsi. ¹⁷ Maisa aichaxaibichi xua daxita carepaya jiwi jume taetaepona baxua. Metha daxota baponbe jume daunweya itorobinchi xua equeicha jopa paebi tsanebe xua Jesús peyabara paebiwatsi, jei barapomona.

¹⁸ Barapo pentacaitorobi bicheito equeicha Pedro iru Juan wabatsibe. Jume daunweya tsipaebatsibe:

—Equeicha jopa Jesús payabara paebindebe. Equeicha jopa yabara pacuidubindebe barapo cui, jei barapomona.

¹⁹ Bara nexata Pedro Juanno jume notabe barapomonaē, jeibe:

—Incane payabara nanta xeinare icha metha bara Nacom tsita xanepanatsi xua pax-anbe pata paca cajume cowantsiwatsi xua pata exanaewabe pocotsiwa pana itorobame xua daxota jopa pata exanaewa pocotsiwa Nacom pana itoroba. ²⁰ Bewa paexanaeinbe daxita pocotsiwa Nacom pana neitorobabe. Bewa papaebinde daxita pocotsiwa patanbe xua Jesús exana yawa xua pajume tanbeno xua Jesús paeba, jeibe Pedro Juanno.

²¹ Barapomonaē pomonaē tomarapiwi pia pentacaponawē tatsi, Pedro iru Juan jume itawetatsibe. Daichitha saya pu copatatsibe. Barapomonaē jopa itacupaetsi xua pecuainchiwatsibe Pedro iru Juan jiwi pecunuwixaetsi, tsipei pinmonaē jiwi Nacom wunaē jaintatsi, petaexae pocotsiwa Pedro iru Juan exanabe. ²² Pon pejayujayujei jiton pontha pon Nacom pexeinya petsita itutsi coyenewa taexana, bapon axaibi exanatsi poxonaē cuarenta po weiyobe xeina.

Meje poxonaē pomonaē Jesús pejume cowantsiwichi tatsi wuca Nacom xua jopa pe-junuwinexa tsane poxonaē Nacom Pejume Diwesi cueicueijejē tsane jiwitha

²³ Pedro Juanno nainya pontababe ichaxota Jesús pejume cowantsiwichi tatsi jinompa. Baxota nanabarū nacaetutatsibe. Barapomonaētha paebabe, xua baraunchichibe sacer-dotemonaē pia pentacaponawē, pitiri jiwino. ²⁴ Poxonaē Pedro iru Juan baxua jume taerucupaetsibe, barapomonaē Nacomtha tsipaeba, jeye: “Nacom, pon pata Necanamataxeinaem, xam daxita peitabocotha exaname, irathano, menthano, daxita icha coyeneinno. ²⁵ David pon neitorobi jume pepaebin, nejumope tūnaxū cueicueijejē cana exanatsi xua cata paeba, poxonaē jeye:

‘¿Eta xua metha, pomonaē jopa judiomonaē naexanaeyo cayabara anaepana? Bara bequein ichipa abe cata exana ichitha jopa itacupaetsi.

²⁶ Daxita carepaya nacuanpiwi pomonaē jiwi itorobiya pia pepa peewatsiwichi iru ichamonaē pomonaē jiwi peyanacua ewatsiwichi barapomonaē nacaetuta xua abe necayabara paebinexa yawa xua Nexanto pia abe yabara paebichi pon Mesías, pon jinya Neitapetsin’, jeyei David, xua pinaē Nacom tapaebatsi”, jei barapomonaē xua wuca Nacomtha.

²⁷ Equeicha bapomonaē jeye: “Bara yatsicaya baxua exana poxonaē Herodes iru Poncio Pilato, iru icha nacuamonaepiwino, iru Israel nacuamonaepiwino xote nacaetuta Jerusalén tomaratha. Barapomonaē nacaetuta xua Jesús abe peyabara paebinexatsi nexanto pon pejuntū coyene xanepanaein pon Mesías pon itapetame. ²⁸ Barapomonaē, pomonaē xote nacaetuta, exana daxita xua caena bayatha cui wunaē tsiwanaya yabara paebame po coyene xua barapomonaē exanaena. ²⁹ Pata Necanamataxeinaem, matha jume taema xua pana yabara abe jume baraunchi xua abe pana exanapaeba. Pana care xua neajuntūyapusūwa xua jopa junuwiya pata paebinexa tsane jinya jume diwesi, tsipei paxan jinya neitorobi jiwi pan. ³⁰ Peatenewi axaibi exande neayapusūwatha. Matautano barabū copatame xua pexeinya petsita itutsi coyenewan paexanaein poxonaē pacueicueijan tsane jinya jume diwesi, Jesús nexanto pia peayapusūwatha tatsi pon pejuntū coyene xanepanaein”, jei barapomonaē poxonaē wuca Nacomtha.

³¹ Barapomonaē najume wetarucupa xua Nacomtha petsipaebiwa. Bapoxonaē ichaxota nacaetuta barapomonaē ira jijiyataxuba. Daxita barapomonaē juntū coyene yuca cana exanatsi Nacom pia Pejumope tūnaxū tatsi pia peayapusūwatha itorobi coyenewa tatsitha. Matautano barapomonaē Nacom Pejume Diwesi jopa junuwiya paebinoutsio.

Meje yabara poxonae pomonae Jesús pejume cowantsiwi pocotsiwan xua xeina daxita baxuan bara barapomonae nexa

³² Pomonae pejume cowantsiwi Jesucristo pinmonae tsoponae. Barapomonae peburaya nanta xeina be caenthuto coyeneya. Ichun jopa jeiyo: “Apara pocotsiwa xeinan meisa tawa”, jopa jeiyo. Ichitha daxita xua barapomonae xeina baxua saya daxita bara barapomonae nexa. ³³ Jesús pia peitorobi jiwi tatsi ajumeyapusaya yabara paeba pocotsiwa bayatha tane poxonae Jesucristo pon jiwi Pecanamataxeinaeinchi xua equeicha petupaein asu popona exanatsi. Matautano yabara cueicueije po coyene Nacom bichocono wnae exana daxita barapomonaetha peantobexaetsi. ³⁴⁻³⁵ Jopa ichun acopeibiyo pomonae Jesús pejume cowantsiwi. Daxita barapomonae xeina xua pocotsiwa penantawenonaewa poxoru ichamonae pomonae nawita pexeinaewi caenaeta dubenanaebiya pabin, bomaxunno. Barapo paratixi poxonae xeineiba, catsibeibatsi Jesucristo pia peitorobi jiwi tatsitha. Nexata xuya barapo paratixi Jesucristo pia peitorobi jiwi tatsi catsibeiba pomonaetha pomonae peacopeibi jiwi xua daxota jopa petaseicaenexatsi pocotsiwa nantawenona. ³⁶ Barichi exana bapon José pon Leví pia pemomo susato jiwanapin. Jesucristo pia peitorobi jiwi tatsi icha wun duta bapontha, po wun Bernabé. (Barapo wun, xua hebreo jume jei: “Pon jiwi pentateiqueibin”, jei.) Barapon José, Chipre tunaetha naexana. ³⁷ Bapon pia pabi caenaeta. Bapoxonae barapo paratixi Jesucristo pia peitorobi jiwi tatsi catatsi peacopeibiwi nexa.

5

Meje yabara poxonae Ananías iru piowa Safira abe exanabe

¹ Bapoxonae iru ichun pon pewun Ananías iru piowa pewun Safira, pabi xeinabe. Bapon piowabe pia ira caenaetabe. ² Bapon piowabe najupa nanta xeinabe. Baponbe icha paratixi nata botabe. Icha paratixi Jesucristo pia peitorobi jiwi tatsi catabe bequein Ananías paeba xua daxita catabe Jesús pia peitorobi jiwitha tatsi. ³ Bara nexata Pedro Ananías baraichi, jeye:

—Ananías, ¿eta xua metha Satanás jume jejam xua cajume tsiduta xua Nacom pia Pejumope tunaxu tatsi muxuitorobame? ¿Eta xua metha paratixi nata botame xua ira matoma cacata? ⁴ Po ira caenaetame apara bara jinya ira. Yawa barapo matomano apara bara jinyawa. Barapo paratixi icha canantawenoname bara ba moya tainchi. ¿Eta xua metha baxua najuntu coyene xeiname? Jopa apara muxuitorobim pebiwi. Jame yatsicaya apara Nacom pia Pejumope tunaxu tatsi muxuitorobame, jei Pedro.

⁵ Poxonae baraxua Ananías jume taeba, petupaein Ananías iratha jopa. Daxita pomonae xua jume tane xua bapon tupa, bichocono junuwa. ⁶ Pewowi pata. Ananías petupaein mata yarabatsi pesato becayatsi, xua pemuthutha xubinexatsi.

⁷ Pirapaeyo poxonae tres po horabe weta, Ananías piowa tatsi patopa ichaxota Pedrobaru ena. Barapowa jopa yaputaeyo xua pia pebin tatsi tatupatsi. ⁸ Nexata Pedro barai barapowa, jeye:

—¿Bara daxita pana catame xoxi pacaenaetame pentoma pabi? jei Pedro.

Barapowa jume nota, jeye:

—Aja, bara daxita, jei barapowa.

⁹ Nexata Pedro barai barapowa, jeye:

—¿Eta xua metha pana muxu wetamebe xua Nacom pia Pejumope tunaxu tatsi pamuxuitorobinamebe? Taema, pewowi pomonae aunxuae jinya pebin muthutha xotsi, pecoibototha pata, necamuthutha xubinexa tsaneru.

¹⁰ Barapoxonae caena nainya Safira Pedro petaxutha petupaein tanabotabatsi. Poxonae pewowi taeba xua barapowa bayatha tupa, bapoxonae bapowa jontaxorenatsi. Pia pebin cacuita muthutha xorecatsi. ¹¹ Daxita Jesús pejume cowantsi jiwi, ichamonaeno unthuthu nayotarucupa rejunuwixae poxonae baraxua jume tane.

Meje yabara poxonae Jesús pia peitorobi jiwi tatsi ainya pexeinya petsita itatsi coyenewan exana, Nacom pia peayapusuwatha tatsi

¹² Jesús pia peitorobi jiwi tatsi pexeinya petsita itatsi coyenein exana jiwitha Nacom pia peayapusuwatha tatsi. Pinmonae Jerusalén tomarapiwi pomonae jume cowanta Jesús, Nacom pin pia botha nacaetuta. Po tutu pewun Pórtico de Salomón tutu, bapo tututha nacaetuta. ¹³ Ichamonae, pomonae xua jopa jume cowuntsiyo Jesús, junuwa xua penanacaetutsiwa Jesús pejume cowuntsi jiwitha tatsi. Ichitha barapo Jerusalén tomarapiwi tsita cui wunaetsi Jesús pejume cowuntsi jiwi tatsi. ¹⁴ Pin bicheito nayoyotapona, pebiwino, yabuxino pomonae xua jume cowantapona Jesús ponxae jiwi Pecanamataxeinaeinchi. ¹⁵ Jesús pia peitorobi jiwi tatsi wuna peexanaexae, Nacom pia peayapusuwatha tatsi, daxota pomonae atene namtotha capoinchi. Ichamonae camatha bobena namtotha. Ichamonae weintha bobena. Barapomonae ichipa jayababatsi xua Pedro pejumope tatsi, xua barapomonae peaxaibi exanaenexa tsainchi. ¹⁶ Jiwi nacaetuta Jerusalén tomaratha pomonae xua pia tomaran jeba Jerusalén tomara pepuya weya. Barapomonae capata peatenewi iru pomonae xua matajemabatsi exanatsi cauri. Daxita barapomonae peburaya axaibi exanatsi. Daxita barapomonae carepaya equeicha axaibi.

Meje yabara poxonae Jesús pia peitorobi jiwi tatsi peraxa exanatsi

¹⁷ Nexata sacerdotemonae pia pepa pentacaponaein tatsi, iru pomonae xua napuna pona, pomonae saduceomonae, daxita barapomonae Jesús pia peitorobi jiwi tatsi anaepanaya jume uwatsi. ¹⁸ Daxota pomonae xua anaepana Jesús pia peitorobi jiwi tatsi teicatsi. Jiwi pecubi bothano capoinchi. ¹⁹ Ichitha Jesús itoroba matatsunpin. Bapon merawi patopa. Jiwi pecubi coiboto yausaranaxuba. Matatsunpin aisowa bemaxu cayiya Jesús pia peitorobi jiwi tatsi. ²⁰ Matatsunpin Jesús pia peitorobi jiwi tatsi tsipaebatsi, jeye: “Paponde Nacom pin pia botha. Baxota paumende. Payabara paebare daxita jiwitha barapo pena juntu coyene po coyene xua Nacom cata jiwitha xua beta pejinompaenexa”, jei matatsunpin. ²¹ Poxonae baya caemumbotha Jesús pia peitorobi jiwi tatsi bara exana xua matatsunpin paeba. Bara Nacom pin pia botha yacuinaya jojoniya pecuidubinexa jiwi.

Barapoxonae sacerdotemonae pia pepa pentacaponaein tatsi, iru saduceomonaeno waba daxita carepaya Israel nacua pia penapatae jiwi xua penacaetutsinexa pentacaitorobi bicheitha. Barapoxonae barapomonae itoroba ichamonae xua Jesús pia peitorobi jiwi tatsi pecuaranobinexatsi pin bicheitha peitabaratha tatsi. ²² Ichitha poxonae policiamonae jiwi pecubi botha pata, Jesús pia peitorobi jiwi tatsi jopa taetsi. Daxota policiamonae diwesiyo caibeya capona pin bicheito peitabaratha. ²³ Policiamonae namchi, jeye:

—Poxonae papatan jiwi pecubi botha, soldadomonae pomonae peewatsiwi barapo pecubi botha barapo soldadomonae pecoiboto yabara umena, daunwei tsuncuae. Poxonae pasaranaxoyan jopa paitaraerowinyo Jesús pia peitorobi jiwi tatsi. Jiwaibi. Aichurubena, jei.

²⁴ Poxonae sacerdotemonae pia pepa pentacaponaein tatsi, iru Nacom pin pia bo peyabara umenaewi pia pentacaponaein tatsi, iru sacerdotemonae pia pentacaponaein tatsi jume tane baxua, bapoxonae najuntu coyene benaecaeya nayainyaba, jeye: “¿Exota metha jane Jesús pia peitorobi jiwi tatsi? ¿Exua jane?” jei. ²⁵ Iruru barapoxonae pebin patopa. Barapomonae baraichi, jeye:

—Ja, pomonae jiwi pecubi botha pacaponame, barapomonae Nacom pin pia botha umena. Matautano cuiduba jiwi, jei bapon.

²⁶ Nacom pin pia bo peyabara umenaewi barapomonae pia pentacaponaein tatsi bapon baru pona policiamonaeno Nacom pin pia botha. Equeicha caewa baru denenatsi Jesús pia peitorobi jiwi tatsi ichaxota nacaetuta pentacaitorobi bicheito. Saya jopa abe exanaetsi poxonae teicatsi. Saya baru cui wunaeya carendenatsi poxoru barapo policiamonae jiwi cui cunuwatsi. Daxota policiamonae saya be xainyatha teica barapomonae xua jiwi pecuiyainwaxae tatsi xua policiamonae pecuinbabiwa tsipaetsi ibotixitha.

²⁷ Nacom pin pia bo peyabara umenaewi pia pentacaponaein tatsino, barapomonaes Jesús pia peitorobi jiwi tatsi capoinchi pentacaitorobi bicheito peitabaratha. Sacerdotemonaes pia pepa pentacaponaein tatsi bapon, Jesús pia peitorobi jiwi tatsi baraichi, jeye:

²⁸ —Bayatha jume daunweya paca tsipaebatsiba: ‘Equeicha jopa Jesús payabara paebinde’, pajan. ¿Ichitha eta xua paexaname? Daxita carepaya Jerusalén tomarapiwi yaputane pocotsiwa paxam pacuidubame Jesús yabara. Yawa painya metha paebichi xua paxan panatsiaena cuentan Nacomtha tupa pata exanaexae Jesús, jei barapo pentacaitorobi bicheito.

²⁹ Nexata Pedro iru ichamonaes pomonaes Jesús pia peitorobi jiwi tatsi daxita barapo matabuxyobe jume nota barapomonaetha, jeye:

—Apara jame bewa paexanaein pocotsiwa Nacom pana itoroba. Nacom pia peitorobi coyenewa ainya cui beyacaincha jiwi pia peitorobi coyene tatsi. ³⁰ Pata amo susato jiwi pia Nacom tatsi, barapo Nacom Jesús equeicha petupaein asu exanatsi pon xua pabexubame, poxonaes naetotha tupaerucua paexanadutame. ³¹ Nacom Pexanto pia peayapusuwatha exana yatsicaya jiwi pia pepa Pecanamataxeinaein tatsi. Yawa exana pexanto pon jiwi Pecapanenebiyaein. Baxua exana poxonaes pecoxatha taecatsi pexanto. Nacom baxua exana tsipei ichichipa xua Israel nacuapiwi icha juntu cui coyene xeinaena bapontha, xua bapoxonaes barapomonaes Nacom pecui yabara junteinaenexa po coyene xua barapomonaes Nacom tsita natsicuentatsi xua abe pe-eexanaexae. ³² Bara yatsicaya pata cui taewi daxita baxuan, Nacom pia Pejumope tunaxu tatsi iru taneru. Daxota paca tsipaebatsi baxua, pocotsiwa xua Jesús exana. Nacom najumope cata pomonaetha pomonaes xua peichichipaewa xua peexanaewa pocotsiwa Nacom itoroba, jei Jesús pia peitorobi jiwi tatsi.

³³ Pentacaitorobi bicheito jume taerucupa xua pocotsiwa paeba barapomonaes pomonaes Jesús pia peitorobiwitsi tatsi. Bapoxonaes barapomonaes bichocono casebarucupatsi. Barapo pentacaitorobi bicheito ichichipa xua barapo Jesús pia peitorobiwitsi tatsi pejutewiwitsi. ³⁴ Barapo pentacaitorobi bicheitotha eca fariseomonaepin pewun Gamaliel, pon jiwi pecuidubin Moisés pia peitorobi coyene tatsi. Jiwi bapon baru cui itura jineibatsi. Bapon asiya uncua yawa itoroba xua bara caeto pesato becayiya tsainchi barapomonaes pomonaes Jesús pia peitorobi jiwi tatsi. ³⁵ Bapoxonaes bapon Gamaliel barai barapomonaes pomonaes pentacaitorobi bicheitotha, jeye:

—Paxam pomonaes Israel nacuamonaepiwi pamxaem, dota pam xua pocotsi coyeneya pacana exanaename barapomonaes. ³⁶ Metha bara pajunteinaename poxonaes matha bapon Teudas poxonaes pia coya pentacaponaein naexana, nayabara paeba xua pinaes bichocono peainya cui jiton. Cuatrocientos pebiwimonaes matabuxube puna jinompatsi bapon. Ichitha poxonaes Teudas bexotsi ichamonaes, bapoxonaes pijimonaes tatsi ducupa, poxonaes daxita yotabatsi. Saya xua Teudas exana baxua pecui pawe. ³⁷ Barichi Teudas pepuya weya ichun patopa pon pewun Judas. Bapon pentacaponaein najainta poxonaes jiwi pewun tinaes matabubi tsuxubi. Bapon Galilea nacuapin. Piamonaes pin bicheito puna jinompatsiru, ichitha barichi bapon Judas bexotsi ichamonaes. Barichiru pijimonaes tatsi tarucupatsi poxonaes yotabatsi. ³⁸ Daxota paca jeichi: ‘Jesús pia peitorobi jiwi tatsi bara pacui copabare’, jan. Icha barapomonaes saya exanaetsipa xua jiwi itoroba, nexata barapomonaes jopa amanayabichipae pocotsiwa xua ichichipa peexanaewa. ³⁹ Ichitha icha barapomonaes exanaetsipa pocotsiwa Nacom itoroba, nexata paxam jopa pacui amanayabichipaem barapomonaes. Dota pam. Daxota jopa paexanaponaeinde po coyene xua Nacom pia peitafaetabi jiwichi pana naexanaponame, jei Gamaliel.

Barapomonaes pomonaes pentacaitorobi bicheito bara jopa pecuiyo Gamaliel pepaebixae. ⁴⁰ Bapoxonaes barapomonaes pomonaes pentacaitorobi bicheito equeicha wabatsi Jesús pia peitorobi jiwi tatsi. Bapoxonaes matha copiya ichamonaes itorobatsi xua Jesús pia peitorobi jiwi tatsi pecuainchinexatsi. Equeicha jume daunweya tsipaebatsi: ‘Equeicha jopa Jesús payabara papaebim tsane’, jei. Bapoxonaes pu copababatsi nama Jesús pia peitorobi jiwi tatsi. ⁴¹ Jesús pia peitorobi jiwi tatsi pentacaitorobi bicheito

weya pona. Barapomonaē jũntũ coyene weiweina tsipei peraxa exanatsi ichamonaē, Jesũs pijimonaexae xua baxua saya Nacom pecopatsixae. ⁴² Awiya barapomonaē amsiya yabara cuiduba, Nacom pin pia botha Jesũs pia pexeinya jume diwesi yawa xua boxithano. Mataũtano cuidubano xua Jesũs apara Mesías pon Nacom itorobica.

6

Meje yabara poxonaē Jesũs pia peitorobi jiwi tatsi itapeta siete poyobe peyawenaenexa tsane ichamonaetha

¹ Barapoxonaē barapo mataqueitha pinmonaē jume cowũnta Jesũs. Pomonaē xua griego jume pecueicueijeijiwi anaya tsipaeba, pomonaē xua hebreo jume pecueicueijeijiwi baraichi, jeye: “Patamonaē, powaxi pecuenta werapaewaxichi piseurixi powaxi griego jume pecueicueijeijiwaxi poxonaē judiomonaē apata pexaewa, barapowaxi saya peyauxi apatatsi pexaewa. Ichitha meisa judiomonaewaxi powaxi pecuenta werapaewaxichi barapowaxi jopa juniya nabaneibiyo”, jei. ² Jesũs pia peitorobi jiwi tatsi, pomonaē doce poyobe, barapomonaē barũ nacaetuta ichamonaē pomonaē irũ Nacom pejume cowũntsiwi. Barapomonaē pomonaē Jesũs pia peitorobi jiwi tatsi jeye barapomonaetha:

—Painta jopa yapu xanepanaeyo xua pata nacui barapentsiwa xua pata cueicueijeijiwa Nacom Pejume Diwesi xua saya pexaewa pata apatsinexa jiwi. ³ Daxota wajiwimonaē paitapere siete poyobe pebinbe paxam jiwana. Paitapere pomonaē xua daxita jiwi ita cui jũntũ coyene xanepaneibatsi, pomonaē xua jũntũ coyene yũcatsi Nacom pia Pejumope tũnaxũ tatsi pia peayapusũwatha tatsi, pomonaē xua peyaputaewi. Barapo siete poyobe pacui itorobin xua pexaewa apateibina. ⁴ Bapoxonaē paxan Jesũs pia peitorobiwi tatsi pan, jopa paapatsin tsane pexaewa. Saya meisa Nacom pata tsipaebeibichi nawita yawa pata cueicueijeiji tsaibichi Jesũs pejume diwesi, jei barapomonaē.

⁵ Jesũs pejume cowũntsi jiwi tatsi nanta jũpaya nanta xeinarũcũpa. Bapoxonaē Esteban itapetatsi. Bapon Esteban pon bichocono jume cowũnta Jesũs yawa bichocono jũntũ yũcatsi Nacom pia Pejumope tũnaxũ tatsi pia peayapusũwa tatsi. Itapetatsi Felipeño, irũ Prócoro, irũ Nicanor, irũ Timón, irũ Parmenas, irũ Nicolás. Bapon Nicolás Antioquía tomarapin. Bapon copiya jopa naexanaeyo judiomonaepin. Poxonaē jume cowũnta Nacom, bapoxonaē judiomonaepin naexana. ⁶ Barapoxonaē barapo siete poyobe Jesũs pejume cowũntsi jiwi tatsi capona Jesũs pia peitorobi jiwi tatsitha. Jesũs pia peitorobi jiwi tatsi mata jayabiya tawũca Nacomtha xua Nacom yawenaena barapomonaē.

⁷ Pinmonaē jume tane Nacom Pejume Diwesi. Pinmonaeno irũ jume cowũnta Cristo Jesũs, pomonaē Jerusalén tomaratha jinompa. Irũ judiomonaē pia sacerdotemonaē tatsi, barapocotsimonaē pin bicheito jume cowũnta.

Meje yabara poxonaē Esteban waetabatsi

⁸ Esteban pexeinya petsita itatsi coyenewan exaneiba jiwitha Nacom pia peayapusũ itorobi coyenewatha tatsi. Tsipei Nacom yanta popona bapon daxota Esteban Nacom yaweneibatsi pecatsixaetsi peayapusũwa. ⁹ Nexata nacaetuta pinmonaē judiomonaē pia penacaetutsi botha tatsi. Ichamonaē wũn dutatsi xua jeichichi: “Pomonaē pepu sorobabewiwichi poxonaē busi cui tatayebabatsi”, yabara wũn jeichichi. Irũ nanacaetutapona Cirene tomarapiwi, irũ Alejandría tomarapiwi, irũ Cilicia nacuapiwi irũ Asia nacuapiwi. Daxita barapomonaē Esteban jume matsontsonobatsi. ¹⁰ Ichitha Esteban xaniwaicha cueicueijeiji exanatsi Nacom pia Pejumope tũnaxũ tatsi. Daxota poxonaē Esteban paeba barapomonaē jopa itacũpaetsi xua beta pejume notsiwa. ¹¹ Nexata barapomonaē po pin bicheito penacaetutsimonaē ichamonaē nantsiyatsiya catatsi paratixi petacamuxu-itorobinexa tsainchi xua Esteban paeba. Barapomonaē pomonaē pemuxuitorobi jiwi namchi xua Esteban Moisés baraunchichi abe jei, yawa xua Nacom baraunchichi abe jei. ¹² Barapo jumetha pemuxuitorobi jiwi daxita jiwi anaepana exanatsi xua Esteban jume canaerabatsi. Pitiri jiwino anaepana. Irũ pomonaē jiwi pecuidubiwi Moisés pia peitorobi coyene tatsi barapomonaeno irũ anaepana. Daxota barapo penapatae jiwi irũ pomonaē

jiwi pecuidubiwi Moisés pia peitorobi coyene tatsi barapomonaē Esteban yorobateicatsi. Pentacaitorobi bicheito peitabaratha capoinchi. ¹³ Barapo pentacaitorobi bicheito equeicha waba pomonaē Esteban jume cui canaerabatsi wabatsi. Barapomonaē pomonaē penaerabiwi Esteban yabara jeichichi:

—Bapon Esteban Nacom pin pia bo tatsi baraunchichi abe jei. Barichi bapon Esteban Moisés pia peitorobi coyenewa tatsi baraunchichi abe jei. ¹⁴ Pajume tan, xua Esteban paeba xua pinae Jesús Nazaret tomarapin paeba. Jesús pinae namchi, pinae jeye: ‘Barapo bo Nacom pin pia bo tantanaca exanaein’, pinae jei Jesús. Equeicha Esteban namchi xua pinae Jesús paeba pinae jeye: ‘Tamropata pitaban po peitorobi coyenewa xua bayatha Moisés paca itoroba’, jei pinae bapon Jesús, jei barapomonaē pomonaē penaerabiwi.

¹⁵ Pomonaē baxota ena pomonaē pentacaitorobi bicheito, barapomonaē Esteban necotenatsi. Barapomonaē itabara tayena xua Esteban peitabara be matatsunpin itabara, xua bichocono wūnae.

7

Meja yabara poxonaē Esteban pentacaitorobi bicheito itabaratha pia coya paeba

¹ Nexata sacerdotemonaē pia pepa pentacaponaein tatsi bapon Esteban baraichi, jeichi: “¿Bara xainyei xua barapomonaē cabarai?” jei sacerdotemonaē pia pepa pentacaponaein tatsi. ² Esteban jume nota, jeye: “Tamonae pam pana nejume taema. Wanacom wūnae nawita. Barapon Abraham tsita naitutatsi poxonaē caena bayatha awiya Mesopotamia nacuatha popona. Bapon Abraham wamo susatopin matha copiya tsiwanaeya popona Mesopotamia nacuatha poxonaē Harán tomara bewarapiya. ³ Nacom pinae Abraham baraichi: ‘Barapo ira jinya ira cuenta warapare. Jinyamonaeno cuenta warapare. Icha ira bewarapiyama ichaxota po ira beya cacaponaeinchi’, jei pinae Nacom. ⁴ Nexata pinae Abraham Caldea nacua wewarapiya. Harán tomara pinae bewarapiya. Poxonaē pinae Abraham Harán tomaratha popona pinae Abraham paxa tatupatsi pon pewun Taré. Bapoxonaē Nacom, Abraham pinae itorobatsi barapo irathe po irathe pajinompame anoxuae. ⁵ Barapoxonaē pinae Abraham cataunxuae jopa catichi ira. Saya pinae tacayabara wūnae tsimuxu dutatsi. Nacom pinae Abraham baraichi: ‘Jinya ira tsane, irū jinya jiwi penaitapataya naexana dubenaponeibiwi tsane pomonaē jinya nemomo susato jiwi pia ira nexa tsanerū’, jei pinae Nacom. Ichitha pinae barapoxonaē jopa xeinaeyo pexui. ⁶ Baraxua Nacom pinae Abraham baraichi: ‘Jinya nemomo susato jiwi icha nacuatha jinompaena. Be pomonaē penanapaincha jinompaewi tsicotaeinchi xua be pocotsi jiwimonaē icha nacua werena peponaewi. Tanacuitinchi ichamonaē xua amanaya tanacuichina. Busi cui tatayebeibinchino. Caitacueintinchino yawa. Cuatrocientos po weiyobe tsane xua jinyamonaē naitapataya atene exaneibinchi’, jei Nacom Abrahamtha. ⁷ Equeicha Nacom tsipaeba Abraham, jeye: ‘Barapomonaē xua abe pacata exanaena poxonaē paca busi cui tataibina barapomonaē jopa cui jūnteminaein tsane. Barapomonaē itawetsiya peraxa jūbin. Bapoxonaē jinya nemomoxi susato jiwi warapaena po nacuathe ichaxota uncuame yawa wūnae nejainchina xote’, jei pinae Nacom Abrahamtha. ⁸ Nacom pinae Abraham itorobatsi xua peexanaenexa po coyene xua pexui pebin wūtixi pewi thabiwatsi xua ichaxota nareixacaena. Barapo coyene exana Abraham penanta xeinaenexa irū piamonaē tatsi xua po coyene bayatha Nacom pinae yabara tsiwūnae muxu duta, xua bepa pinae yaweneibina xua barapomonaē pinae bepa yaweneibinchi. Daxota pinae poxonaē Abraham pexanto tanaexanatsi pexanto wi thaba, pinae pewun Isaac. Isaac irū pinae barichi pexanto wi thaba, pinae pewun Jacob. Jacob irū pinae barichi wi thaba pexanto jiwi, pomonaē bayatha Israel nacuamonaepiwi pia pentacaponaein tanaexanatsi barapo doce poyobe.

⁹ “Jacob pia pexanto jiwi tatsi, barapo doce poyobe, wamo susatomonaē. Barapo doce poyobe jiwana caein pewun José. José pentapin jiwi uwatsi. Daxota José pentapin jiwi caenaetatsi. Pomonaē bapon José comotatsi barapomonaē José Egipto nacua becayiyatsi. Pon be jiwi pebusi cui tataibinchi be bapocotsin petsicotaenexa tsainchi. Ichitha

Nacom José yawenatsi pebaru poponaexaetsi. ¹⁰ Poxonae José abe jume baraunchaibichi ichamonae, yawa poxonae muxu atene peexaneibichi awiya José capanepeibatsi Nacom. Poxonae faraón peitabaratha taponatsi José, Nacom exana xua José faraón tsita juntu coyene xanepanatsi. Matautano Nacom peyaputaen exanano. Bapon faraón Egipto nacuamonae pia pepa peewatsinchi tatsi. Faraón cana exana xua José Egipto nacuapiwi yanacua ewatatsi faraón nexa. Matautano faraón cana exana xua José canamataxeina daxita xua xuan faraón xeina.

¹¹ “Barapoxonae Egipto nacuatha jainbo nacua tsurucuaeno, Canaán nacuathano iru. Pata amo susato jiwi jopa pexaewa taeyo. Yawa piyain pewerapae nacua tsurucuae poxoru pexaewa ajibi. ¹² Poxonae Jacob jume tane xua trigo xu xeina Egipto nacuatha, pia pexui bara beitorobiya. Barapon Jacob pia pexui tatsi, pata amo susato jiwi. Baraxua poxonae xua copiya aena pona Egipto nacuatha. ¹³ Poxonae equeicha pona José pentapin jiwi tsita naitapeinya xeina xua bapon bara peweicho jiwi tatsi. Bapoxonae faraón yaputane xua barapomonae apara bara José piamonae tatsi. ¹⁴ Pirapae José pentapin jiwi itoroba xua petabarü dendenaenexatsi paxa tatsi, pon pewun Jacob, matautano piamonae tatsi petabarü dendenaenexatsi po jiwimonaexae xua setenta y cinco poyobe. ¹⁵ Daxota Jacob iru pijimonaeno Egipto nacua beya warapa. Baxota pirapae bapon tupa. Iru pirapae pata amo susato jiwino weraparü baxota. ¹⁶ Pirapaeno Jacob piwan capoinchi Siquem tomara beya. Baxota piwan muthutha xotsi, po ira bayatha Abraham comota, po ira Hamor pexantixi tatsi caenaeta.

¹⁷ “Ainya wei tsuxubi. Poxonae barapomonae Egipto nacua wewarapiyaenaba, be pocotsi coyeneya bayatha Nacom yabara tsiwunae muxu duta, bapoxonae Israel nacuapiwi pinmonae naexana. ¹⁸ Nexata Egipto nacuatha ichun nacua peewatsin naexana, pon José jopa yaputaetsi. ¹⁹ Barapo Egipto nacuapiwi itorobiya pia pepa peewatsinchi tatsi pata amo susato jiwi muxuitorobeibatsi. Yawa cuainteibatsino. Yawa cobe itorobeibatsino xua pexui saya pebebainexa tsaibi tsane aisowatha xua pewerapeibinexa. ²⁰ Barapoxonae iru Moisés naexanaru. Moisés paxa pia botha wichatatsi acoibi po xometiyobe. Barapon Moisés pexeinyan nawita Nacom tsita juntu coyene xanepanecatsi barapo pexuyo. ²¹ Poxonae Moisés pena xotsi yawa paxa xotsi namicha jeriyotha yana botetatsi mentha xua musuripawa cuba, barapoxonae faraón pexantiyo tatsi Moisés pitatsi. Be pexanto tsicotane, pia botha wichata. ²² Bapon Moisés nacuiduba nawita pocotsiwa Egipto nacuamonae yaputane. Daxota peyaputaen tsecaeno, wunae peexanaen tsecaeno.

²³ “Pirapae poxonae Moisés yacurenta po weibe jopa, bapon nanta xeina xua piamonae pesiwa ponaewa pomonae Israel nacuamonaexae. ²⁴ Poxonae Moisés piamonae siwa pona, bapon tane xua piamonae jiwana tatsi tabutsi, Egipto nacuapin. Daxota Moisés yawena pon piamonae jiwanaxae tatsi yawa bexuba Egipto nacuapin. ²⁵ Moisés nanta xeina, pia coutha nabarai: ‘Tamonae, Israel nacuamonaepiwi neyaputaena xua Nacom neitoroba. Mata cawarapaein barapomonae Egipto nacua weya, penacapanenebiyaenexa tsane’, najei. Ichitha daumetha barapomonae jopa tsaqueinaeyo. ²⁶ Icha matabitha Moisés tane xua caepinbe iru nababeru Israel nacuamonaepinbe. Moisés barai baponbe: ‘Ja, ¿eta xua metha caepinbe pana nabamebe?’ jei. ²⁷ Pon piamonae ba, Moisés napuna torobapoinchi. Moisés baraichi: ‘¿Jintam caitoroba pata xantha xua pon be jiwi neyabara paebin penatsicuentisiwa xua abe peexanaexae, xuano xua jiwi Necanamataxeinaem naexaname?’ ²⁸ ¿Jinya nebexuichi icha mexuae ichim Egipto nacuapin?’ jeichichi Moisés. ²⁹ Poxonae Moisés jume taebiriwa baxua, Moisés naetsiricua Madián nacua benaetsiricuiya. Baxota Moisés tanaexanatsi pexuyobe, pebin wutobe”, jei Esteban.

³⁰ Equeicha came Esteban barapomonae baru cueicueijei. Namchi, jeye: “Caentacabi pirapae poxonae cuarenta po weibe pu caewa, xua poxonae equeicha icha cuarenta po weibe xeina, Moisés popona ichaxota ira xuepana susato tsurucuae nacuatha. Imoxoyo demxuwan, po demxuwan pewun Sinaí baraxota Moisés tsita naitutatsi matatsunpin xua

poxonae isototha uncua xua taxuncua tsica naeyo. ³¹ Moisés yabara najuntũ coyene cabenaeca. Bapon itatapoinya tsipei ichipa yaitane. Bapoxonae baxota Moisés jume tane xua Nacom namchi: ³² ‘Apara jinya amo susato jiwi pia Nacom tatsin. Irũ apara, Abraham pia Nacom tatsin. Irũrũ apara Isaac pia Nacom tatsin. Apara irũ Jacob pia Nacom tatsin’, jei Nacom. Moisés pijunuwi bichocono jiyijiyei daxota aichaxaibi xua tane. ³³ Nacom pinae Moisés baraichi: ‘Xua nataxu xatatame nataxu wejonde, poxoru po iratha poname apara tairiyo. ³⁴ Tamonae, pomonae Egipto nacuatha jinompa bichocono atene exaneibatsi yawa jume tanno xua nanenaba. Daxota barapomonae capanepan. Antha, caitorobatsi equeicha necoyo beya, Egipto nacua beya’, jei pinae Nacom”, jei Esteban.

³⁵ Equeicha Esteban namchi, jeye: “Pomonae Egipto nacuatha jinompa, barapomonae Moisés aichaxaibichi. Barapomonae Moisés baraichi: ‘¿Jintam caitoroba pata xantha xua naexaname pon be jiwi neyabara paebin xua penatsicuentisiwa xua abe peexanaexae xuano xua naexaname pon be necanamataxeinaein?’ jei barapomonae. Bequein barapomonae baxua paeba ichitha Nacom cana exana xua bapon Moisés naexana be pon jiwi peyabara paebin xua penatsicuentisiwa xua abe peexanaexae. Matautano Moisés cana exanatsi pon pecapanepaein piamonae. Baxua Moisés naexana poxonae matatsunpin itoroba po matatsunpin Moisés tsita naitutatsi poxonae isototha uncua xua taxuncua tsica naeyo. ³⁶ Bapon Moisés pon wamo susato jiwi capanepatsi Egipto nacua weya. Moisés petsita itutsi coyenewan exana Nacom pia peayapuswatha. Baxua exana Egipto nacuatha, Mar Rojo menthano. Matautano exanano ichaxota ira xuepana susato tsurucuae nacuatha cuarenta po weibetha. ³⁷ Moisés Israel nacuamonae jiwitha namchi: ‘Nacom paca jiwana cana exanaena pon pia peitorobi jume petapaebinchi icha neichi barichi tsane. Bapon xua pon Nacom itorobina, apara pon painyamona jiwana tsane’, jei Moisés. ³⁸ Matautano apara bapon Moisés pon nanacaetuta poxonae Israel nacuamonae nacaetuta ichaxota ira xuepana susato tsurucuae nacuatha. Matautano bapon Moisés diwesi tsipaeba jiwitha xua petsipaebixaetsi matatsunpin poxonae tsipaebatsi demxuwatha po demxuwa pewũn Sinaí. Barapo diwesi po diwesi Moisés wamo susato jiwi tsipaebatsi barapo diwesi jiwi cana exanatsi xua peajuntũyapuswãwa pexeinaewa. Barapo diwesi irũ waxainchi nexarũ.

³⁹ “Ichitha barapomonae wamo susato jiwi jopa bejume jejeyo xua peexanaewa pocotsiwa Moisés itorobatsi Nacom. Moisés jume matawentatsi. Saya barapomonae ichipa xua equeicha caibeya penawibiwa Egipto nacua beya. ⁴⁰ Poxonae cataunxuae Moisés demxuwatha pona, barapoxonae barapomonae Moisés peweicho tatsi pon pewũn Aarón, bapon baraichi: ‘Painta exande ainya ibo nain nacomũn. Barapo ibo nain nacomũn naca tsiwana copiya cajjijncaena namtotha. Jopa payaputaeyinyo xua Moisés aichawiya pon pana matacapona Egipto nacua weya’, jeichichi Aarón. ⁴¹ Barapoxonae barapomonae penain nacom exana be vacayo pebtiyo canaxobeta. Bapoxonae barapomonae tabexuba oveja, penain nacom vacayo nexa. Tsipei barapomonae nanta xeina xua metha penain nacom ichichipa baxua. Barapomonae bichocono jũntũ coyene weiweina penain nacom pia coya peexanaexae, xua pin penabanaewa xua pebarũ itura jinaenexatsi barapo ibo nacom. ⁴² Barapomonae Nacom wepu tsatajopa tsipei barapomonae pia penain nacom exana. Nacom bara copata barapomonae xua bara barapomonae bara exanaena be pocotsi coyeneya xua ichichipa peexanaewa. Daxota barapomonae opitei be nacom cana exana, po opitei barapomonae wũnae jainta. Barapomonae pomonae wamo susatomonae, exana pocotsiwa caena bayatha Nacom pia peitorobi jume pepaebin yabara cui tsiwũnae muxu dutsiya tina. Bapon diwesi tina xua Nacom jume yabara tinatsi xua Nacom namchi barapo diwesitha, jeye:

‘Israel nacuamonae, paxam oveja pabexubame
painya penain nacomũn nexa,
ichitha xan nexa jopa paraichim.

Baraxua paexaname poxonae pajinompame ichaxota

ira xuepana susato tsurucuae nacuatha
xua cuarenta po weibetha.

⁴³ Yawa pacaponame penain boutiyo nacom
po penein boutiyo nacom pewæn Moloc.
Yawa pacaponame icha penain opitei nacom
po opitei penain nacom pewæn Refán.
Barapo penain nacombe paexaname
painya wænae jaintichi.
Daxota xan itorobin ichæn xua paca mata
cawarapaena Babilonia nacua beya.
Bequein jopa bepawarapaem ichitha awiya
paca itorobinchi', jei Nacom.

⁴⁴ "Wamo susato jiwi exana xua be bo xua anseraboco, xua ichaxota tututha jeba
ibo xua po iboton Moisés mata tina xua Nacom pejume caitorobiwan. Barapomona
cuita acaba be pocotsi boyo Moisés tsita itutatsi Nacom. ⁴⁵ Wamo susato jiwi poxona
tawerapatsi paxa tatsi, itorein pita barapo boyo xua anseraboco boyo. Pata tamo jiwi
Nacom pia boyo capona poxona Josué napon. Poxona pata tamo jiwi ainya nacuan
nonota tsiniya barapoxona equeicha barapo anseraboco boyo capona beya yacobe
cui matabi othopa poxona David popona pon Israel nacuapiwi itorobiya pia pepa
peewatsinchi. ⁴⁶ Bapon David pon Israel nacuapiwi itorobiya pia pepa peewatsinchi
tatsi, Nacom tsita pejuntũ coyene xanepanaeinchi. Bapon David ichichipa xua acaba
pin bo Nacom nexa po Nacom Jacob pia Nacom tatsi. ⁴⁷ Ichitha Salomón bapon apara
pon Nacom pin pia bo exana. ⁴⁸ Bequein Nacom pon pepa Nacom jopa poponaeyo botha
pocotsi bo jiwi acaba Nacom nexa. Nacom peitorobi jume pepaebin baxua yabara paeba
xua Nacom tapaebatsi, jeye:

⁴⁹ 'Peitaboco apara ichaxota taequeibithopeibiwa.

Ira apara ichaxota nataxu yutabotan.

¿Eta pocotsi bo netsiexanaename?

jei pon Wanacanamateinaein.

Matautano jeino: 'Ichacuitha ¿eta po irara

xua ichaxota nafinacaecaen?

⁵⁰ Apara xan tacoutha exanan daxita ira yawa
peitaboco daxota jopa nantawenonaeyo xua
ichawa tana netsiexanaewam', jei Nacom",
jei Esteban.

⁵¹ Equeicha Esteban barai, jeye: "Maisa bichocono pajuntũ coyene daunwam xua jopa
bepayaputaem. Matautano pamuxu tutu daunwam, yawano pajuntũ coyene daunwam
icha be pocotsimona ichi pomona jopa peyaputaewi Nacom. Barichi paichaxaibim
Nacom pia Pejumo tæna xæ tatsi. Paxam bara paichim icha painya amo susato jiwi
ichi. ⁵² Apara painya amo susato jiwi bayatha Nacom pia peitorobi jume pepaebi
catsa jume baræ paebatsi, yawa cueintatsino. Matautano bayatha jutebatsi barapomona
pomona Nacom pia peitorobi jume pepaebiwi, pomona namchi: 'Bexa patopaena pon
pepa pejuntũ xanepanaein pon Mesías baraichi', jei. Cain paxam, barapon poxona
patopa, pacaenaetame, pabexubameno. ⁵³ Nacom pia peitorobi diwesi pajume taneme
xua matatsunpiwi paca tsipaeba Nacom nexa. Ichitha jopa paexanaem pocotsiwa Nacom
paca itoroba barapo pia peitorobi diwesitha", jei Esteban pentacaitorobi bicheitha.

Meje yabara poxona Esteban tæpa

⁵⁴ Poxona pentacaitorobi bicheito jume tane pocotsiwa Esteban paeba, bapoxona
bichocono Esteban yabara cui anaepanaræcupatsi. ⁵⁵ Ichitha Esteban bichocono juntũ
coyene yæca cana exainchi Nacom pia Pejumo tæna xæ tatsi pia peayapusæwatha.
Esteban athabeicha necoicha. Bapon necota Nacom pia peitæpana coicha tatsi iræ
Jesucristo xua uncua Nacom pecoxatha tatsi. ⁵⁶ Nexata Esteban namchi, jeye:

—Incane pataema. Necotan xua peitaboco naitaboco coibo yausaranaxuba. Tan Jesús xua uncuia Nacom pecoxa weya tatsi ponxae Nacom pia Peitapetsin tatsi, jei Esteban.

⁵⁷ Barapomonae jume itapataya namuxu acaba pocotsiwa Esteban paeba. Yawa anaepanaya wawai. Barapomonae be cae bicheito naexana pomonae Esteban betacuinaeyiyatsi. ⁵⁸ Barapomonae Esteban aisowa bexoyatsi tomara weya. Yawa baraxota ibotontha cuinbabatsi. Pomonae abe peexanaewichi Esteban, barapomonae Saulo juma camisa jeba xua pocotsiwan nainya werubiya. Bapon Saulo pon pewowin xua bayatha pinyo.

⁵⁹ Poxonae barapomonae Esteban cuinbabompatsi ibotontha bapoxonae Esteban tsipaeba Nacomtha, jeye: “Jesús, pon Tanecanamataxeinaem, nejumope t̃nax̃u pire”, jei Esteban. ⁶⁰ Bapoxonae pentabocototha uncuia. Namtsebiya wawaino, jeye: “¡Jesús, Tanecanamataxeinaem! ¡Necana cui j̃ntemainare, yawa jopa neyantomatsinde xua barapomonae inta abe exana!” jei Esteban.

Poxonae najume wetaba, t̃panaicha Esteban.

8

¹ Saulo ir̃u bar̃u ita cui w̃naetsi poxonae ichamonae Esteban bexotsi.

Meje yabara poxonae Saulo abe exana pomonaetha pomonae Jesús pejume cow̃ntsiwi

Po matabitha Esteban bexotsi, barapo matabitha judiomonae tamropata notar̃cupa xua Jesús pejume cow̃ntsiwi tatsi bichocono abe exanatsi Jerusalén tomaratha. Daxita Jesús pejume cow̃ntsiwi tatsi yotabatsi. Ichamonae Judea nacua ber̃cupiya, ichamonae Samaria nacua ber̃cupiya. Meisa Jesús pia peitorobi jiwitatsi pomonae xua doce poyobe ena Jerusalén tomaratha. Jopa d̃cupaeyo. ² Ichamonae, pomonae Nacom pejume cow̃ntsiwichi, Esteban m̃th̃tha xotsi. Barapomonae Esteban bichocono siwa wecoyeichi. ³ Saulo jeita ducuaeta Jesucristo pia pejume cow̃ntsiwi tatsi. Daxita bom̃x̃un j̃paya Saulo jiwitatsi teteica tsiniya yab̃x̃ino pebiwino. Jiwipecubi bo beya capona.

Meje yabara poxonae Jesús pejume cow̃ntsiwi tatsi paeba dubenanaebiya Jesús pia pexeinya jume diwesi tatsi Samaria nacuatha

⁴ Pomonae bewa Jerusalén tomara wer̃cupiyaena barapomonae Jesucristo pia pecapanepae jume diwesi paeba dubenanaebiya daxita po tomarantha xua pateiba. ⁵ Barapomonae jiwana tatsi pon Felipe baraichi bapon pona pepa tomaratha Samaria nacuatha. Barapo tomaratha tamropata pitaba xua pecueicueijejewa Cristo yabara. ⁶ Jiwitatsi nacaetuta dubenanaebiya. Matautano jume naitomatsiya jume taerubenanaebiya pocotsiwa Felipe cueicueijejewa Cristo yabara. Matautano barapomonae taerubenanaebiya pexeinya petsita it̃tsi coyenewan xua Felipe exana Nacom pia peyapus̃u itorobi coyenewatha. ⁷ Pomonae xua cauri pexeinaewi, barapomonae equeicha axaibi exanatsi poxonae Felipe taitaweta cauri. Matautano caurimonae barapomonae wawaya wepu d̃cupaibatsi. Ichamonae pomonae pecuenobichi jiwitatsi, pejayujayujeimonaeno, daxita barapomonae axaibi exanatsi. ⁸ Felipe baxua peexanaexae daxota barapo tomarapiwi bichocono j̃nt̃u coyene weiweinaya jinompa.

⁹ Barapo Samaria tomaratha popona pon pentaw̃n Simón. Bapon Simón mara pexeinaein. Matautano bapon barapo Samaria tomarapiwi muxujainyabeibatsi poxonae bapon pia coya pentacaponaein naexana. ¹⁰ Daxita tomarapiwi pomonae peacopebiwi ir̃u pomonae nawita pexeinaewino, barapomonae beta jume naitawata pocotsiwa Simón paeba. Barapomonae namchi, jeye: “Barapon Simón apara pon yabara jeichichi: ‘Pon bichocono Nacom pia peyapus̃uwa tatsi xeina’, yabara jeichi”, jei barapomonae.

¹¹ Daxita barapo tomarapiwi itapeta jume naitawata pocotsiwa Simón paeba, tsipei saya caena bayatha barapomonae muxujainyabatsi mara peexanaewi pia coyeneyatha tatsi. ¹² Barapomonae jume cow̃nta po pexeinya jume diwesi Felipe cueicueijejewa xua Nacom yawa Jesucristo yabara, po diwesi xua Nacom waba jiwitatsi petanaexanaenexatsi

pijimonae tatsi jiwana pomonae Nacom itorobiya ewata. Bapoxonae barapomonae bautisabatsi pebiwi yawa yabuxino. ¹³ Bapoxonae bapon Simón iru jume cowanta. Iruno bapon bautisabatsi. Matautano bapon tamropata pitaba xua Felipe peyantsiwatsi. Bapon Simón yabara najuntu coyene cabenaeca bichocono poxonae Felipe pexeinya petsita itatsi coyenewan exana Nacom pia peayapuswatha.

¹⁴ Jesucristo pia peitorobi jiwi tatsi, pomonae peenaexae Jerusalén tomaratha, jume tane xua Samaria nacuamonae jume cowanta Nacom Pejume Diwesi. Daxota barapomonae Pedro itorobatsi iru Juan itorobatsi, Samaria nacuamonae beya. ¹⁵ Poxonae Juan Pedrobe patopabe barapomonaetha, bapoxonae Nacomtha tawucabe Samaria nacuapiwi nexa, pomonae pejume cowantsixae Nacom. Baponbe ichichipabe xua barapomonae peyanaba jinompaenexatsi Nacom pia Pejumope tuxaxu tatsi. ¹⁶ Pedro iru Juan tawucabe barapomonae Nacomtha. Tsipei barapomonae awiya cataunxuae jopa tapatichi pia juntu coyeneintha Nacom pia Pejumope tuxaxu tatsi. Saya meisa poxoru bautisabatsi Jesús pon Pecanamataxeinaein jiwi bapon pewuntha tatsi. ¹⁷ Pedro iru Juan, pecobetha mata jayababe barapomonae. Barapoxonae barapomonae tapatatsi pia juntu coyeneintha tatsi Nacom pia Pejumope tuxaxu tatsi.

¹⁸ Poxonae Simón cui tane xua Pedro Juanno pecobetha mata jayababe xua daxota Nacom pia Pejumope tuxaxu tatsi tapatatsi barapomonae, Simón ichichipa xua pecatsiwa paratixi baponbetha. ¹⁹ Simón namchi, jeye:

—Dapo peayapuswa necare. Tha iru poxonae mata jayabeiban ichamonae tapateibinchi Nacom pia Pejumope tuxaxu tatsi, jei Simón.

²⁰ Nexata Pedro Simón baraichi, jeye:

—Barabu xam yawa jinya paratixino cayawa muxuna weraweraca exanaena, tsipei saya nanta xeiname xua necaitacupaewa xua Nacom pia peayapuswa tatsi necomotsiwa paratixitha, po peayapuswa bequein Nacom amanaya pecatsiwa jiwitha. ²¹ Jopa caitacupaeyo xua nexainaewa Nacom pia peayapuswa tatsi, tsipei apara Nacom cajuntu coyene yaputane xua neajuntucoyenebewa. ²² Nacui baraxore jinya abe neexanae cuiru coyenein. Nacom wucare, xain Nacom cayabara junteina xua nanta xeiname baxua. ²³ Catainchi xua pejume uwiwa nenthutotha xeiname. Xam neabewa canthuthu yancababa daxota beta jopa xapain poponaem, abe nanta xeiname jincoutha, jei Pedro.

²⁴ Nexata Simón jume nota. Pedro iru Juan jume notatsibe, jeye:

—Painta yabara wucarebe Nacomtha baxua xuaunxuae pana netsipaebamebe, xain bapoxonae xeinaein barapo coyene xua jopa abe tana necana exanaenexa, jei Simón.

²⁵ Bapoxonae Pedro Juanno ichamonaetha nacui yopitabe po coyene xua bayatha jume cowantabe Nacom. Yawa xua penthutotha taecatsibe Nacom pia Pejumope tuxaxu tatsi. Baponbe Nacom pia pexeinya jume diwesi tsipaebabe barapomonaetha. Jerusalén tomara bewarapiyabe. Poxonae warapabe, Jesús pia pexeinya jume diwesi papaeba tsiniyabe Samaria nacuatha. Ainya tomarantha cueicueijeibe.

Meje yabara xua poxonae Felipe iruru Etiopía nacuapin nantenta ponabe namtotha

²⁶ Barapoxonae pirapae, Jesucristo pon Pecanamataxeinaein jiwi, bapon pia matatsunpin tatsi, Felipe tsita naitatsiya tsipaebatsi, jeichichi: “Nontaponde, yawa ponde pocotsiwa parowa bereca. Jerusalén namto iyande xua po namto Gaza tomara betaerucuiya”, jei matatsunpin. Barapo namto ducuiya ichaxoyo ira xuepana susato tsurucuae nacua iya. ²⁷ Felipe nantacotaxuba, bapoxonae bara ponataba. Poxonae Felipe namtotha ecapona, bapoxonae caxina pebin Etiopía nacuapin. Barapon pon pentacaponaein pon peainya cui jiton. Matautano bapon paratixi tayapu eena xua yabayo nexa powa Etiopía nacua pepa peewatsiwayo. Bapon Etiopía nacuapin bayatha pona Jerusalén tomara beya xua wuna pejainchinexa Nacom. ²⁸ Bapon caewa pia nacua siwa ecapona Etiopía nacua. Cawayu pecapona naeyo ecapona yawa yorobecapona po diwesi bayatha Isaías tina, pon Nacom peitorobi jume pepaebin.

²⁹ Nacom pia Pejumope tuxaxu tatsi Felipe baraichi, jeye: “Imoxoyo ponde cawayu pecapona naeyo beya yawa imoxoyo caquita naecaponde”, jeichichi Felipe. ³⁰ Felipe

cuinaepona cawayu pecaponae naeyo beya, ichaxota jume tane xua yoroba Etiopía nacuapin. Bapon yoroba Nacom Pejume Diwesi, xua po diwesi bayatha Isaías tina. Felipe barai bapontha jeye:

—¿Bara yaputaneme xuaunxuae yorobame? jei.

³¹ Bapon Felipe jume notatsi, jeye:

—¿Eta bichin xua tayaputaewa icha dapon aibi pon yabara neyaputane exana barapo diwesi? jeichi Felipe.

Felipe wabatsi xua penontabinaenexa xuano xua peecaenexa ichaxota bapon eca. ³² Po diwesi ichaxota bapon yoroba xua baxue meje:

“Be poxonae jiwi oveja yam̄ capona

pebexubinexa tsane, barichi tsane jiwi

caponaena jiton pebexubinexa tsane.

Be cordero moya, jopa papayo poxonae na thabatsi

barichi tsane jiton moya tsane, jopa papai

tsane poxonae caitacueintinchi poxonae

yawa aperutane tsaneno.

³³ Jiton ura exanaeinchi.

Jiwi ura exanaena.

Jopa beta yabara exanae tsainchi

poxonae jiton atene tsane poxonae

jopa bequein abe exanaeyo.

Jiwi jopa yabara paebi tsane xua pia

pexui tatsi, poxoru jopa nantaṭsi

tsane pexui, pemomoxino.

Jiwi barapo jiton bexubinchi”, jei Nacom

Pejume Diwesi, po diwesi Isaías tina xua

ichaxota yoroba Etiopía nacuapin.

³⁴ Nexata Felipe yainyabatsi Etiopía nacuapin, jeichichi:

—Incane netsipaebare, ¿jintam Isaías yabara jei? ¿Pia coutha nayabara jei jampa? ¿Bara metha ich̄n yabara jeichi? jeichichi Felipe Etiopía nacuapin.

³⁵ Felipe yaputane exana Etiopía nacuapin po diwesi xua Isaías tina Jesús jume yabara. Bapoxonae nama paeba po coyene Jesús pia pexeinya jume diwesi tatsi. ³⁶ Poxonae Felipe Etiopía nacuapinno namtotha ecaponabe, bapoxonae Etiopía nacuapin namchi, jeye:

—Taema meniyo eque jeba. ¿Jopa nebautisabim tsane? jeichichi Felipe.

³⁷ Felipe barai, jeye:

—Icha daxita carepaya jume cow̄ntame nej̄nt̄ coyenetha, methaunxuae bara cabautisabinchi, jei Felipe.

Etiopía nacuapin Felipe jume notatsi, jeye:

—Bara yabara jume cow̄ntan xua Jesucristo, bara Nacom pexanto tatsi, jei bapon.

³⁸ Nexata Etiopía nacuapin cobe itoroba xua duntabina pon xua cawayu pecomaecaein. Nexata duneicabe Felipe Etiopía nacuapinno. Meniyo bejonecabe. Nexata Felipe meniyotha bautisaba Etiopía nacuapin. ³⁹ Poxonae meniyo wejuinabe, Nacom pia Pejumoṑe t̄nax̄ tatsi Felipe puxanatsi. Felipe equeicha jopa taetsi Etiopía nacuapin. Saya equeicha Etiopía nacuapin j̄ntema pona pia nacua beya. ⁴⁰ Felipe taer̄cupatsi ichamonae Azoto tomaratha. Felipe daxita tomaran tamropatecapona xua pecueicuei-jeiwa Jesucristo pia pexeinya jume diwesi tatsi, beya yacui jopa Cesarea tomaratha.

9

*Meje yabara poxonae Saulo jume cow̄nta Jesús
(Hch 22.6-16; 26.12-18)*

¹ Awiya came Saulo ichipa daxita pejutebiwa pomonae Jesucristo pejume cow̄ntsi jiwi tatsi, pon Jesús Pecanamataxeinaein jiwi. Daxota Saulo siwa pona sacerdotemonae pia pepa pentacaponaein tatsi. ² Saulo w̄ca: “Necare cartan judiomonae pia

penacaetutsi bon pia pentacaponae wi nexa. Tha tacaponae tsi Damasco tomara beya. Icha caxinaein pomonae Jesús pejume cowuntsiwi tha jiwi pecubi botha caponaetsi Jerusalén tomaratha, pebiwino, yabuxino”, jei Saulo. ³ Saulo Damasco tomara beya pona. Poxonae bara muxu pepatopae, bapoxonae pin coicha yacaincha matawacaicha matatsun uncuatabicatsi. Barapo coicha peitaboco wejopeica. ⁴ Nexata iratha jopa Saulo. Yawa jume taneno xua pejume xua baraichichi, jeichichi: “Saulo, Saulo, ¿eta xua metha tamonae inta abe exaname?” jei pejume.

⁵ Saulo jume nota, jeye: “Pon jiwi Pecanamataxeinaem, ¿jintamunda?” jei Saulo. Saulo Ꞇ pejume jume notatsi, jeye: “Apara bara xan Jesús, ponxaein inta abe cana exaname tamonae. ⁶ Nontaponde, tomara be-iyande. Baraxotiya catsipaebina pocotsiwa bewa exanaename”, jeichichi Saulo.

⁷ Pebiwi, pomonae Saulo puna poinchi bichocono pijunuwi moya umena tsipei saya Ꞇ pejume jume tane ichitha pepon jopa xapain taeyo. ⁸ Saulo nantacotaxuba asiya uncua. Poxonae necotaxuba jopa xapain taeyo. Daxota pomonae Saulo puna poinchi cobe capoinchi Damasco tomara beya. ⁹ Baraxota Damasco tomaratha Saulo eca acoibi po matabibetha. Jopa xapain necotsiyo. Barapo acoibi po matabibetha jopa nabanaeyo, jopa apaeyono.

¹⁰ Baxota Damasco tomaratha popona pon pejume cowuntsin Jesucristo. Bapon pewun Ananías. Ananías tsita naitapeinya xeinatsi Jesús poxonae camaita. Ananías tsipaebatsi Jesús jeichichi: “¡Ananías!” jeichi. Ananías jume nota, jeye: “Jai, para xote ecanje, pon jiwi Pecanamataxeinaem”, jei.

¹¹ Nexata Jesús Ananías baraichi: “Nontaponde. Namto beya ponde, po namto pewun Bopiya perucuiyae namto. Poxonae Judas pia botha patopame, yainyabare barapo botha. ‘¿Incane Saulo, Tarso tomaramonaepin?’ jande. IraunxuaerꞆ Saulo Nacom tsipaebauya.

¹² Saulo amachinae xua cacamaita, xua Ananiam xua itacuere wunaetsiname Saulo necobetha”, jei Jesús.

¹³ Nexata Ananías jume nota, jeye: “Pon jiwi Pecanamataxeinaem, pinmonae netsipaeba xua pinae bapon cata abe exanatsi jinya jiwimonae, pomonae Jerusalén tomaratha jinompa. ¹⁴ Bapon carta capatopa xote, po carta bayatha sacerdotemonae pia pentacaponae wi caitoroba. Saulo carta capatopa poxoru sacerdotemonae jume jejei xua Saulo pinae bara caponaena jiwi pecubi bo beya pomonae cawun ununeiba poxonae Nacom tsipaebibatsi”, jei Ananías.

¹⁵ Jesús Ananías baraichi, jeichichi: “Ponde tsipei yaitama bapon bayatha Saulo itapetan. Bapon Saulo tsipaebina tajume diwesi icha nacuantha, po nacuantha jinompa pomonae jopa judiomonae naexanaeyo. Matautano tsipaebina pomonaetha pomonae jiwi itorobiya pia pepa peewatsiwichi. Matautano tsipaebina barapo tajume diwesi israelmonaetha. ¹⁶ Tha bexa Saulo tsita itutichi po coyene xua bewa atene tsane tajume diwesi penatsipei cueicueijeixae tsane”, jei Jesús.

¹⁷ Nexata Ananías pona ichaxota Saulo eca. Poxonae joniya botha, Saulo pecobetha ainya cobethabe mata jayabatsi. Ananías namchi, jeye:

—Saulom, pon be tayapin catsicotainchi, nejume cowuntsixae Jesús. Bapon Jesús pon jiwi Pecanamataxeinaein neitoroba, pon namtotha catsita naituta xuano xua catsipaebano. Jesús neitoroba nenecotsinexa tsane yawa Nacom necajuntꞆ coyene yꞆca exanaenexa pia Pejumope tunaxutha, jei Ananías xua Saulo tsipaebatsi.

¹⁸ Barapoxonae caena nainya peitacuere totha be petsebocoton taothopeinatsi. Bapoxonae equeicha caewa wunaeya daxita carepaya tane. Saulo asiya uncua bapoxonae caena bautisabatsi. ¹⁹ Poxonae nabane bapoxonae cui thꞆnei tsanaya. Be caentacabiyobe Saulo eca Damasco tomaratha ichaxota ena pomonae pejume cowuntsiwi Jesucristo.

Meje yabara poxonae Saulo Jesús pejume diwesi paeba Damasco tomaratha

²⁰ Caena nainya Saulo pona judiomonae pia penacaetutsi bontha tatsi. Tsipaeba barapomonaetha, jeye: “Barapon Jesús, para Nacom Pexanto tatsi”, jei. ²¹ Daxita pomonae jume tayena barapomonaeyabara najuntꞆ coyene cabenaeca, nabarai, najei:

—Bara baraponda, pon cain matha Jerusalén tomaratha patopa xua abe peexanapon-aenexatsi pomonae Jesucristo pewun ununaewichi poxonae Nacom wꞑqueibatsi. Apra bapon pon bayatha xote patope xua peteicaenexatsi pomonae pejume cowuntsiwi xuano xua pecaponaenexatsi pomonaetha pomonae sacerdotemonae pia pentacaponaewi xua Jerusalén tomara beya, najei.

²² Ichitha bapon Saulo awiya jume tsacatsacapiya cueicueijei. Bapon tsita itapeinya xeina xua Jesús apra Mesías. Daxota barapomonae judiomonae moya umenarꞑcꞑpa tsipei yabara najantꞑ coyene cabenaeca pocotsiwa xua Saulo paeba.

Meje yabara poxonae Saulo panepa judiomonae pecuiyainwa

²³ Poxonae ainya matabin yapucaewa judiomonae caemonae pebꞑꞑya nanta xeina xua bepa bexubichei Saulo. ²⁴ Saulo ichun muxu baraichi: “Bepa cabexubei ichamonae”, jei. Saulo ewatumeinchi tomara coibotontha po coiboton xua tomara peyacaincha toxoroto dutsiwa coiboton. Barapo coibotontha Saulo ewatumeinchi daxita matabi, yawa merawino. ²⁵ Ichitha Saulo merawi panepa poxonae pijimonae pitatsi yawa yacote yorecatsi pepa tomara juma deca xua tomara peyacaincha toxoroto dutsiwa juma deca.

Meje yabara poxonae Saulo Jerusalén tomaratha popona

²⁶ Poxonae Saulo Jerusalén tomaratha patopa bepa bequein barꞑ nacaetutei Jesús pejume cowuntsiwichi tatsi, ichitha barapomonae Saulo cunuwatsi tsipei nanta xeina xua Saulo jopa xapain Jesús pejume cowuntsiwichi jiwana tatsi. ²⁷ Ichitha Bernabé Saulo cuaranotatsi Jesús pia peitorobi jiwatsi peitabaratha tatsi. Bernabé barapomonaetha namchi, jeye: “Pinae bayatha Saulo namtotha tsita naitꞑtatsi Jesús pon jiwatsi Pecanamataxeinaein. Matautano pinae Saulo muxu tsipaebatsi. Matautano pinae tsipaeba Jesús pejume diwesi Damasco tomaratha xua pinae cui tsacatsacapiya cueicueijei”, jei Bernabé. ²⁸ Daxota Saulo napopona ducuaeta Jerusalén tomaratha ichaxota Jesús pia peitorobi jiwatsi. Saulo Jerusalén tomaratha jume tsacatsacapiya cueicueijei ducuaeta Jesús pejume diwesi tatsi pon jiwatsi Pecanamataxeinaein. ²⁹ Saulo yabara barꞑ natsipaeba Jesús pejume diwesi, yawa barꞑ najume matsontsonobatsi judiomonae, pomonae xua griego jume penatsipaebiwi. Barapomonae judiomonae, ichichipa xua Saulo pebexubiwatsi. ³⁰ Pomonae irꞑ Jesús pejume cowuntsiwi tatsi jume tane, xua bepa Saulo imoxoyo bexubichei judiomonae. Daxota Saulo Cesarea tomara becayiyatsi. Baxota punaxubathopatsi. Equeicha Saulo dabe pu itorobiyatsi Tarso tomara beya.

³¹ Daxita Jesús pejume cowuntsiwi tatsi junte ma jinompa Judea nacuatha, Galilea nacuatharꞑ, Samaria nacuatharꞑ, tsipei jopa ichamonae abe exanaeyo barapomonaetha. Matautano barapomonae mataropeichiya nacuidubapona xua pejume cowuntaponaewa Nacom. Matautano exanapona pocotsiwa Nacom ichichipa. Nacom pia Pejumope tꞑnaxꞑ tatsi barapomonae yaweinchi pejꞑntꞑ coyeneintha tatsi. Pinmonae Jesús jume cocowuntapona.

Meje yabara poxonae Eneas axaibi exanatsi

³² Poxonae Pedro siwa pona ducuaeteiba daxita toman Jesús pejume cowuntsiwi tatsi, bapoxonae yawa siwa ponano pomonae Jesús pejume cowuntsiwi tatsi pomonae ena Lida tomaratha. ³³ Baxota Pedro caxina pon pecuenobinchi xua saya camatha boca. Bayatha caena xeina baxua ocho po weibe. Bapon pewun Eneas. ³⁴ Pedro, Eneas baraichi: —Eneas, Jesucristo caaxaibi exana. Asiya uncuatabare. Jinya cama xaxainta xore, jei Pedro.

Barapoxonae caena yacuinaya nantacotaxuba Eneas. ³⁵ Nexata Lida tomarapiwi, irꞑ Sarón tomarapiwino, barapomonae Eneas tainchi xua equeicha beta pona. Bapoxonae barapomonae nacui barapenta xua copiya jume cowꞑnta pejume cowuntsinexa Jesucristo, pon jiwatsi Pecanamataxeinaein.

Meje yabara poxonae Dorcas equeicha caewa asꞑ exanatsi poxonae tꞑpa

³⁶ Irꞑꞑꞑ jame caena bayatha Jope tomaratha popona powa pejume cowuntsiwayo Jesús. Bapowa pewun Tabita. Barapo wꞑn seicaya griego jume wꞑn “Dorcas” baraichi.

Barapowa pocotsiwa wūnae itapeta exaneiba nawita. Matautano barapowa yaweneiba pomonaetha pomonae peacopeibiwi. ³⁷ Barapowa caena nainya atene tsanaya. Caena nainya tūpanaya. Daxita petūpaein matapaeta perū iquicatsi. Bapoxonae po tutu athabeicha baxota boichatsi. ³⁸ Jope tomara Lida tomara imoxoyo nacaquita ecabe. Baxota Pedro popona Lida tomaratha. Baxota Jope tomaratha pomonae Jesús pejume cowūntsiwichi tatsi jume tane xua juinya Pedro Lida tomaratha popona. Bapoxonae itoroba pebinbe nacueyatabe xua bepa pinae tawabathopiyaetsi xua Pedro pewabathopiyaenexatsi Lida tomara beya. Baponbe namchibe. Pedro baraichi: “Cawaba pomonae Jesús pejume cowūntsiwichi tatsi. Bepa pinae anetha iyaem”, jeibe baponbe.

³⁹ Bara Pedro puna pona baponbetha. Poxonae Pedro patopa Jope tomaratha, barū jojoniyatsi Pedro, ichaxota po tututha boca petūpaei Dorcas. Daxita pecuenta werapaewaxichi piseurixi caquita wecoyei tsumenaetsi Pedro. Yawa barapowaxi Pedro tsita itūbatsi doroburū, camisanno xua bayatha Dorcas taxūxūca poxonae cataunxuae abū popona. ⁴⁰ Pedro pesato beitaweya daxita barapomonae. Pedro imoxoyo caquita eca pentabocototha. Nacomtha tsipaeba. Bapoxonae powa tūpuncua Pedro pexainya benecoya, Pedro barai bapowa, jeye:

—Tabita, asiya uncuatabare, jei Pedro.

Bapoxonae powa tūpuncua necotaxuba. Poxonae Pedro tainchi, bapoxonae nantacotecataba. ⁴¹ Pedro Dorcas cobe pitatsi. Asiya cuaranotatsi. Bapoxonae Pedro waba pomonae Jesús pia pejume cowūntsi jiwi tatsi, irūru powaxi pecuenta werapaewaxichi piseurixi. Barapomonae Pedro tsita itūta xua equeicha Dorcas asū. ⁴² Jope tomarapiwi jume taerūcūpa xua equeicha Dorcas petūpaei nacosata. Bapowa equeicha asū popona. Daxota pinmonae jume cowūnta Jesús pon jiwi Pecanamataxeinaeinchi. ⁴³ Jope tomaratha Pedro baxota popona ainya matababin. Pedro popona Simón pia botha tatsi pon xua duwei peboco wūnaeteibin.

10

Meje yabara Pedro irū Cornelio

¹ Irūru jame Cesarea tomaratha pebin warapaeya popona. Bapon pewūn Cornelio. Cornelio, jame yatsicaya pia nacua tatsi Italia nacua. Bapon soldadomonae pia pentacaponaein tatsi. Irūru soldadomonae pia nacua tatsi Italia nacua. ² Cornelio piamonae barū jume cowūnta Nacomtha. Matautano Nacom wūnae jaintatsi. Barapon Cornelio matowa yaweneiba judiomonae, pomonae peacopeibiwi. Bapon paratixi catsibeiba barapomonaetha. Bapon Cornelio tsipaebeyiba Nacomtha. ³ Icha mataqueitha, Cornelio mataqueitha quiripitha amachinae.

Cornelio tane Nacom pia matatsunpin tatsi be poxonae camaita. Matatsunpin patopaeya namchi, jeye: “¡Cornelio!” jei. ⁴ Cornelio junuwiya camaitiya tane matatsunpin. Cornelio jume epa pita, jeye: “Pon jiwi Pecanamataxeinaem, ¿eta xua jinyatsi?” jei Cornelio. Cornelio jume notatsi matatsunpin jeye: “Bayatha Nacom cajume tane poxonae tsipaebame pexainya beya. Cacui taneno xua yaweneibame peacopeibiwi. Nacom cayabara nanta xeina. ⁵ Cornelio, ichamonae Jope tomara beitorobiyama pewabinexa tsainchi pon ainya wūnbe pexeinaein. Bapon Simón baraichi yawa Pedro baraichi. ⁶ Barapon Simón Pedro eca icha Simón pia botha tatsi pon Simón seicaya pon duwein peboco wūnaeteibin. Barapon Simón mar mene itapatha yabo uncua”, jeichichi Cornelio matatsunpin.

⁷ Poxonae matatsunpin napitaba, barapoxonae Cornelio ichamonae waba, pomonae xua pia botha petanacuichiwichi. Irū soldadomonaepin waba, pon xua pia botha tanacuitatsi. Barapon soldadomonaepin pejūntū coyene xanepanaein Nacomtha. ⁸ Barapomonaetha tsipaebatsi pocotsiwa bayatha Cornelio tsipaebatsi matatsunpin. Cotacaya Cornelio itoroba barapomonae Jope tomara beya.

⁹ Icha mataqueitha barapomonae warapa Jope tomara beya. Poxonae cataunxuae itiya pona poxonae mateinyaxae, poxonae bara imoxoyo patichaba, bapoxonae irūru

Pedro bo matatupa beecoinyarũ, po bo matatupa pereca. Nacom tsipaebawiyã poxonaẽ bayatha mataeinyaxae tsuxubi. ¹⁰ Pedro bichocono jainpeca, bepa bequein xaei. Ichitha poxonaẽ awiyã cataunxuae tasetatsi, Pedro tsita naitutatsi be poxonaẽ camaita. ¹¹ Pedro athabe necoicha xua peitaboco nayausaranaxuba. Yawa taneno xua pin paparuwa pexainya betaruneicatsi, be xua jiton nantiya caruneicabe. ¹² Bapoxonaẽ barapo paparuwatha Pedro tane daxita xua xuan saya pecobetha pona be cawayun. Yawa tane daxita xua xuan saya petaxutha bobenapona be maquibun. Yawa tane daxita xua xuan saya petompacuetontha bobenapona be jomon. Matautano tane daxita xua xuan saya yapupuna be peyapupunaewi. ¹³ Nexata Pedro peitabocotha jume tane xua namchi, jeye: “Pedro asiya uncuatabare. Pon xua ichichipame, pire. Moya bexore. Yawa xaema”, jei barapo jume.

¹⁴ Nexata Pedro jume nota, jeye: “Bara, bayatha apara jopa bapana camatsawan xaeinyo, xua tamonaẽ jopa copatsiyo xua pexaewa”, jei Pedro. ¹⁵ Equeicha Pedro jume tane pejume xua tsipaebatsi, xua jeichichi: “Xua Nacom catsijainya exana, baraxua jopa camatsawa jaintocuaetsi”, jeichichi.

¹⁶ Pedro matha acoibi po jumejobe tsipaebatsi baxua. Bapoxonaẽ paparuwa caibe juinya peitaboco beicha. ¹⁷ Xua Pedro baraichi Nacom, baxua Pedro yabara nanta xeina nawita: “¿Eta xua metha Nacom yabara nejumichira?” najei. Pomonaẽ Cornelio itoroba, barapomonaẽ i dapo bon yainyainyaba tsiniya: “¿Incane Simón pia bo?” jei. Bapoxonaẽ bapomonaẽ pata Simón pia curara coibototha tatsi. Poxonaẽ barapomonaẽ pata, Pedro cataunxuae yabara nanta xeina xua tsipaebatsi xua Nacom tsipaeba. ¹⁸ Poxonaẽ Cornelio pijimonaẽ tatsi pata baxota, pin jumetha namchi, jeye: “¿Incane Simón pon icha wãn ‘Pedro’ baraichi? ¿Baxota bara ecara?” jei.

¹⁹ Awiya came Pedro baxua yabara nanta xeinequiya xua pocotsiwa bapon tane. Nexata bapoxonaẽ Nacom pia Pejumope tunaxũ tatsi Pedro baraichi, jeye: “Pedro, nejume taema. Acoibi poyobe pebiwi cawenawenei tsompae. ²⁰ Nontaponde nainya ira bedunatabareinca. Barapomonaẽ naponde, beitatema napontabare, yaitama barapomonaẽ itoroban”, jeichichi Pedro.

²¹ Bara nexata Pedro ira bedunatabareca. Pedro barai barapomonaẽ, jeye:

—Apara bara xan, po jiton xua pana newenawenei tsompaem. ¿Eta xua metha papatame? jei.

²² Barapomonaẽ Pedro jume notatsi, jeye:

—Papatã yaitama Cornelio, pon soldadomonaẽ pia pentacaponaein tatsi, bapon pana itoroba. Barapon pejuntũ coyene xanepanaein. Barapon Nacom jume cowuntatsi. Irũrũ daxita judiomonaẽ barapon barũ cui itura jineibatsi yawa antobetsi. Pinaẽ Nacom pia matatsunpin tatsi Cornelio itorobatsi Simón Pedro wabare nejume taenexa tsane jei pinaẽ, jei barapomonaẽ, xua Pedro tsipaebatsi.

²³ Nexata Pedro waba barapomonaẽ xua petamaitenaewa tsainchi barapo botha. Icha matababitha piawa xaxainta xua caponaena. Bapoxonaẽ Pedro naponã barapomonaẽ. Irũ ichamonaẽ naponano, pomonaẽ irũ Jesús pejume cowuntsiwi tatsi, pomonaẽ xua ena Jope tomaratha.

²⁴ Icha matababitha pata Cesarea tomaratha. Baraxota Simón Pedro ewatatsi. Cornelio pia matabũxũyomonaẽ pewabixae barũ ewateca, yawa pia jiwi tatsino. ²⁵ Poxonaẽ Pedro Cornelio pia botha tapatopatsi, Cornelio Pedro jacobatsi. Bapoxonaẽ Cornelio Pedro peitabaratha pentabocototha tauncuatsi, pewũnaẽ jainchinexa tsainchi Pedro. ²⁶ Ichitha Pedro, Cornelio asiya cuaranotsiya baraichichi, jeye:

—Cornelio, nontaponde. Saya apara xan pebin naexanan icha xam ichim barichin apara, jei Pedro.

²⁷ Poxonaẽ Pedro natsipaebiya jonyabe, baxota Pedro pin bicheito tane xua nacaetuta.

²⁸ Nexata Pedro barai barapomonaẽ, jeye:

—Bara bayatha payaputaneme xua waxainchi judiomonaẽ jiwichi wacui coyenewa xeinatsi xua jopa nacui yabara copatichi xua wabarũ nacaetuteibiwa pomonaẽ jopa

judiomonae naexanaeyo. Matautano jopa nacui yabara copatichi xua pia bonthano waponeibiwa. Ichitha Nacom aunxuae necuiduba xua pinae jopa bewa ichamonae catsapiwi jaintin tsane. ²⁹ Daxota bichoina patopan yaitama pinae pana wabame. ‘Bara’, jopa janyo. Methaunxuae paca yainyabinchi: ¿Eta xua metha pana tsiwabame? jei Pedro.

³⁰ Nexata Cornelio, Pedro jume notatsi, jeye:

—Petain cuatro po matabibe tsuxubi, quiripitha xote tabotha poxonae yabara nainbotan xua Nacom tsipaeban barapoxonae matatsunpin jemeicha tabotha patopa. Barapo matatsunpin paparuwa nama xatata po paparuwa bichocono daedaena. ³¹ Matatsunpin nebarai: ‘Cornelio, bayatha Nacom cajume tane poxonae tsipaebame pexainya beya. Cacui taneno xua yaweneibame peacopeibiwi daxota Nacom cayabara nanta xeina’, jei. ³² Nebaraino: ‘Ichamonae Jope tomara be itorobiyama, pewabinexa tsainchi pon ainya wunbe pexeinaein. Bapon Simón baraichi, yawa Pedro baraichi. Pedro eca ichun Simón pia botha tatsi, pon Simón pon seicaya duwein peboco wunaeteibin. Barapon Simón mar mene itapatha yabo uncua’, nejeyi. ³³ Daxota nainya itoroban ichunbe acoibi poyobe yaitama apara cawabatsi. Barabun patopame. Daxita paxan xote Nacom peitabaratha pajinompan. Matautano paca ewatatsino tsipei yaitama tha paca jume taetsi xua Nacom, pon Pecanamataxeinaein, cana cajume itoroba, jei Cornelio.

Meje yabara poxonae Pedro pin diwesi paeba Cornelio pia botha tatsi

³⁴ Pedro barapomonaetha namchi, jeye:

—Anoxuae yaputan xua Nacom jopa cana exanaeyo jiwi xua ichun ainya cui xua beyacaincha ichun. Nacom daxita jiwi tsita najupatsi. ³⁵ Daxita nacuantha pomonae xua Nacom wunae jaintatsi xuano xanepanaya exanano, Nacom antobe barapomona. ³⁶ Bayatha payaputaneme xua Nacom Pejume Diwesi nacariwesi itoroba paxantha pomonae Israel pia pemomoxi susato jiwi tatsi panxaein. Barapo pexeinya diwesi jume juntea jinompa pana exana poxonae Jesucristo pajume cowuntan. Nacom Jesús Pecanamataxeinaein exanatsi daxita carepaya jiwi nexa. ³⁷ Paxam bara payaputaneme xua Juan Jesús yabara cueicueijeichi yawa bautisaba jiwi Galilea nacuatha. Bapoxonae irun Jesucristo tamropata pitaba xua cueicueije Galilea nacuatha yawa daxita Judea nacuatha. ³⁸ Matautano bara payaputanemeno xua Nacom cata pia peayapusu itorobi coyenewa, Jesucristo Nazaret tomarapin catatsi. Yawano Jesucristo nacana jumope tunaxu catatsi. Bapoxonae Jesús daxita carepaya tomarantha popona ducuaeta. Yawa axaibi exana ducuaetano peatene jiwi. Yawa taitaweta ducuaetano pomonae xua cauri pexeinaewi. Daxota bapon baxua beta exana Nacom pebaru poponaexae. ³⁹ Bayatha pacui tan daxita carepaya xua Jesús exana Judea nacuatha, Jerusalén tomarathano ichaxota jinompa judiomonae. Bapoxonae nama Jesús naetha cobe matatabarutatsi, xua poxonae tupa exanadutatsi naetha. ⁴⁰ Poxonae acoibi po matabibe tsuxubi Nacom petupaein equeicha asu exana. Matautano bapon pana netsita naituta exana. ⁴¹ Ichitha daxita jiwi jopa tsita naituta exanaetsi. Saya paxan pana netsita naituta exana. Nacom pana itapeta pia patayopichinexa ichamonaetha pocotsiwa Jesús exana xuano xua paebano. Paxan Jesús pabarun naban, matautano pabarun apanno poxonae equeicha asu popona. ⁴² Jesús pana itoroba daxita nacuantha pata paebinexa tsane Nacom Pejume Diwesi, xuano bapon pejume diwesino. Nacom cana exana, Jesucristo cana exanatsi be pon jiwi peyabara paebin penatsicuentisiwa xua abe peexanaexae. Bexa tsane Jesús daxita jiwi nanantaitsiya jiwana torotsiya itawetsina, pomonae cataunxuae jinompa yawa pomonae bayatha werapano. ⁴³ Bayatha pomonae Nacom pia peitorobi jume pepaebiwi Jesús pejume diwesi paeba. Barapomona namchi: ‘Daxita pomonae Jesús pejume cowuntsiwichi barapomona Nacom yabara junteinaena abe pia peexanae cuiru coyenein tatsi Nacom pia peayapusuwathaxae’, jei barapomona, jei Pedro.

Meje yabara poxonae pomonae jopa judiomonae naexanaeyo pejuntu coyeneintha tapatsi Nacom pia Pejumo pe tunaxu tatsi

⁴⁴ Poxonae cataunxuae Pedro cueicueijei, bapoxonae Nacom pia Pejumope t̄nax̄u tatsi tapatatsi pomonae jume tane xua Pedro paeba. ⁴⁵ Judiomonae, Jope tomarapiwi, pomonae pejume cow̄antsixae Jesucristo, barapomonae Pedro puna poinchi. Barapomonae daxita yabara naj̄unt̄u coyene cabenaeca xua ir̄u barapomonae pomonae jopa judiomonae naexanaeyo ir̄u pējunt̄u coyeneintha taenatsi Nacom pia Pejumope t̄nax̄u tatsi. ⁴⁶ Judiomonae yaputane xua bara xaniwaicha Nacom pia Pejumope t̄nax̄u tatsi tapatatsi pomonae jopa judiomonae naexanaeyo. Yaputane tsipei barapomonae barompaya tsanaya icha jumeintha cueicueijei. Ichitha barapomonae jopa xapain najume copi yaputaeyo. Judiomonae jume taneno xua pomonae jopa judiomonae naexanaeyo Nacom w̄nae jaintatsi. ⁴⁷ Pedro namchi, jeye:

—Barapomonae apara Nacom pia Pejumope t̄nax̄u tatsi xeina icha waxainchi ichichi. Jiton dapon aibi pon jeye: ‘Jopa bewa bautisabi, apara pomonae jopa judiomonae naexanaeyo’, xua pon pejeiwa, jei Pedro.

⁴⁸ Pedro cui itoroba judiomonae. Pedro namchi, jeye: “Pabautisabare barapomonae pomonae jopa judiomonae naexanaeyo. Jesucristo pew̄n paw̄n taibare poxonae pabautisabame”, jei Pedro. Bapoxonae pirapae barapomonae, pomonae xua aena taenatsi Nacom pia Pejumope t̄nax̄u tatsi, Pedro apusiwatsi xua jopa warapae tsane yawa xua caeto ab̄u ecaenano.

11

Meje yabara poxonae Pedro diwesi tsipaeba pomonaetha pomonae Jesús pejume cow̄antsi jiwi Jerusalén tomaratha

¹ Jesús pia peitorobi jiwi tatsi ir̄ur̄u pomonae pejume cow̄antsiwi Jesús, pomonae ena Judea nacuatha, barapomonae daxita jume tane xua ir̄ur̄u pinae pomonae jopa judiomonae naexanaeyo bayatha jume cow̄anta Nacom Pejume Diwesi. ² Poxonae Pedro Jerusalén tomara bewarapiya, judiomonae pomonae xua jume cow̄anta xua ainya cui Jesús pejume cow̄antsi jiwi tatsi pewi thabiwa tsainchi, barapomonae Pedro jume daunweya tsipaebatsi. ³ Pedro baraichi, jeye:

—¿Eta xua metha barapomonae siwa poname pomonae jopa judiomonae naexanaeyo? ¿Eta xua metha naxaneme barapomonaetha? jei judiomonae.

⁴ Nexata Pedro diwesi eetapona xua cueicueijei barapomonaetha. Po diwesiin eetapona, barapo diwesiin xua poxonae siwa pona pomonae jopa judiomonae naexanaeyo. Pedro namchi:

⁵ —Poxonae Jope tomaratha Nacom tsipaeban, pin paparuwa tan be poxonae camaitan. Barapo paparuwa peitaboco weruneica be pem̄utontha nantiya yacaincha opi queraba. Taxainya duneica. ⁶ Barapo paparuwatha tan xua bobena. Baraxuan tan xua saya pecobetha pona be cawayun. Baraxuanno tan xua saya petaxutha bobenapona be maquib̄n. Baraxuanno tan xua saya petompacuetontha bobenapona be jomon. Baraxuanno tan xua saya yapupuna be peyapupunaewi. ⁷ Peitabocotha jume tan xua nebarai: ‘Pedro asiya uncuatabare. Pon xua ichichipame, pire. Moya bexore. Yawa xaema’, nejei. ⁸ Jume notan nexata: ‘Bara, bayatha apara jopa bapana camatsawan xaeinyo xua tamonae jopa copatsiyo xua pexaewa’, jan. ⁹ Equeicha peitaboco wenebaraichica: ‘Xua Nacom catsijainya exana, baxua jopa camatsawa jaintocuaetsi’, nejei. ¹⁰ Acoibi po jumeyobe nebarai. Saya ̄ barapo jumethabe nebarai. Bapoxonae paparuwa equeicha peitaboco beicha caibe caicha. ¹¹ Paparuwa caibe juinya, ir̄ur̄u pebiwi acoibi poyobe patar̄u. Bapoyobe Cesarea tomarapiwi, taxantha pata. Barapo acoibi poyobe, pomonae Cornelio itoroba. ¹² Nacom pia Pejumope t̄nax̄u tatsi nebarai: ‘Napuna ponde. Beitatema pontabare’, nejei. Ir̄u nebar̄u pona seis poyobe Cesarea tomara beya pomonae pejume cow̄antsiwi Jesús. Pajojoniyan Cornelio pia botha tatsi. ¹³ Cornelio pana netsipaeba xua pinae pia botha tapatopatsi matatsunpin. Matatsunpin namchei: ‘Pebiwi Jope tomara beitorobiyama, pewabinexa tsainchi pon xua ainya w̄nbe xeina, Simón yawa Pedro. ¹⁴ Barapon Simón Pedro paca tsipaebina Jesús pejume diwesi,

paca necayawa capanenebiyaenexa tsane Nacom', jei pinae matatsunpin poxonae pinae Cornelio tsipaebatsi, jei Pedro barapomonaetha. ¹⁵ Pedro equeicha namchi:

—Poxonae Jesucristo pejume diwesi paebaxoyan Corneliobarutha, barapoxonae Nacom pia Pejumope tñaxu tatsi tapatatsi barapomonaetha. Icha cain painta ichi, barichi pomonaetha Nacom nacana jumope catsiba. ¹⁶ Bapoxonae nantana pitaban Jesús pejume, poxonae pana barai: 'Juan saya u meratha bautisaba. Ichitha Nacom seicaya barompaya pia cuitha paca bautisaba. Ichitha Nacom seicaya barompaya pia cuitha paca bautisabina. Bapoxonae painya juntu coyeneintha pacata patsina Nacom pia Pejumope tñaxu tatsi', jei Jesús. ¹⁷ Xaniwaicha beta yaputan xua Nacom nacana jumope tñaxu cata barapomonaetha pomonaetha jopa judiomonaetha naexanaeyo, icha cain ichi poxonae Nacom nacana jumope tñaxu cata pata xantha poxonae Jesucristo pajume cowuntan. Daxota Nacom jopa cui yancatabinyo poxonae ichichipa exana barapomonaetha, jei Pedro.

¹⁸ Poxonae Jesucristo pejume cowuntsi jiwi, pomonaetha ena Jerusalén tomaratha, poxonaetha baxua jume taerucupa moya umenarucupa. Matautano Nacom wunaetha jaintatsino. Barapomonaetha namchi, jeye:

—¡Maisa wunaetha, iru Nacom nacana cui cata pomonaetha pomonaetha jopa judiomonaetha naexanaeyo xua barapomonaetha pejume cowuntsiwa tsaneru Jesús, yawa xua junte ma pejinompaewa tsaneru! Baraxua Nacom ichichipa xua barapomonaetha najuntu cui coyene barapenta xua abe, petaxeinaenexa tsainchi peajuntuyaruswa, po peajuntuyaruswa xua jopa weraweracaeyo, jei barapomonaetha.

Meje yabara poxonaetha Jesús pejume cowuntsi jiwi tatsi jinompa Antioquia tomaratha

¹⁹ Jesucristo pia pejume cowuntsi jiwi tatsi ducupa, tsipei peanaepanaewi yotaba, poxonaetha po matabitha Esteban bexotsi. Barapomonaetha tsanarucupa, ichun Fenicia nacua beya, ichun Chipre nacua tunaeto beya, ichun Antioquia tomara beya. Barapomonaetha saya judiomonaetha cueicueije Jesús pejume diwesi. ²⁰ Ichamonaetha, pomonaetha pejume cowuntsiwa Jesús, Chipre nacua tunaetopiwi, Cirene tomarapiwino, barapomonaetha Antioquia tomaratha pata. Daxita barapomonaetha tsipaeba pomonaetha pomonaetha jopa judiomonaetha naexanaeyo Jesús pejume diwesi tatsi pon jiwi pia Pecanamataxeinaeinchi. ²¹ Barapomonaetha yawenatsi nawita Nacom pia peayaruswa tatsi. Daxota pin bicheito pomonaetha jopa judiomonaetha naexanaeyo, barapomonaetha jume cowuntatsi Jesús, pon jiwi Pecanamataxeinaeinchi.

²² Jerusalén tomaratha, Jesucristo pejume cowuntsi jiwi tatsi, barapomonaetha, jume tane xua Antioquia tomarapiwi jume cowunta Jesucristo pomonaetha jopa judiomonaetha naexanaeyo. Daxota Bernabé Antioquia tomara beitorobiyatsi. ²³ Poxonaetha Bernabé Antioquia tomaratha patopa be ita cui wunaetha xua Nacom yawena barapomonaetha. Bapoxonaetha Bernabé juntu coyene weiweina. Bernabé barapomonaetha barai, jeye: "Pajuntucoyeneyaruswa jinompare Nacomtha. Matautano Nacom ajuntuyaruswa pajume cowuntaponde", jei Bernabé. ²⁴ Bernabé pejuntu coyene xanepanaein. Bapon juntu coyene ucatsi Nacom pia Pejumope tñaxu tatsi tsipei daxita i daxuan exana pocotsiwa Nacom itoroba. Matautano bichocono Nacom jume cowuntatsi. Daxota pin bicheito jume cowunta Jesús, pon jiwi Pecanamataxeinaeinchi.

²⁵ Nexata Bernabé Tarso tomara bewarapiya, pewenaweneinexatsi Saulo. ²⁶ Poxonaetha Saulo caxinatsi baxota, Antioquia tomara bebaru warapiyatsi Saulo. Baraponbe cae wei naecabe baxota, cuidubabe pin bicheito xua Jesús pejume diwesi. Baraxota jiwi matha Jesús pijimonaetha tatsi wun dutatsi xua Antioquia tomarapiwi wun duta xua jeye: "Cristobarumonaetha", jeichichi barapomonaetha pomonaetha Jesús pijimonaetha tatsi.

²⁷ Poxonaetha Bernabé iru Saulo cataunxuae cuidubapoponabe Antioquia tomaratha, Nacom pia peitorobi jume pepaebiwi baxota pata, Jerusalén tomara werendena. ²⁸ Bara caein jiwana pewun Agabo. Agabo asiya uncua barapomonaetha. Bapon wunaetha tsiwanaya paeba. Agabo yaputane exanatsi Nacom pia Pejumope tñaxu tatsi. Agabo namchi, jeye: "Bexa tsane daxita carepaya nacuantha jainbo tsane", jei Agabo. Baraxua

xainyei poxonae jumba matha Claudio romanomonaе itorobiya pia pepa peewatsinchi tatsi naexana, bapoxonaе pin jainbo tsurucuae. ²⁹ Daxota Jesús pejume cowantsiwi tatsi, pomonaе ena Antioquía tomaratha, ichipa yawena pomonaе iru pejume cowantsiwixae Jesús pomonaе peenaexae Judea nacuatha. Daxota barapomonaе pomonaе Jesús pejume cowantsiwixae peburaya nanta xeina xua paratixi taitorobina. Daxita barapomonaе carepaya paratixi cata be xua po coyene cobe itacurpatsi xua pecatsiwa. ³⁰ Barapomonaе baxua exana. Barapo paratixi Bernabé iru Saulo caitorobatsibe pitiri jiwі nexa xua Judea nacua beya.

12

Meje yabara poxonaе Santiago bexotsi iru xua poxonaе Pedro jiwі pecubi botha capoinchi

¹ Barapoxonaе Herodes pon Judea nacuapiwi peyanacua ewatsinchi, bapon tamropata pitaba xua pomonaе Jesús pejume cowantsiwi tatsi peraxa exanatsi. ² Herodes itoroba pia jiwі, xua pin cusitha Santiago pebexubiwatsi, pon Juan peweicho tatsi. ³ Herodes jume tane xua judiomonaе tsita xanepanatsi xua Santiago bexotsi. Daxota Herodes cui itoroba piamonaе xua Pedro pewaetabiwatsi xua pecaponaenexatsi jiwі pecubi botha. Baxua exana poxonaе Pascua wun matacabintha poxonaе jiwі pan xane po pan xua jopa xeinaeyo levadura xua pocotsiwa cotowa exana. ⁴ Poxonaе Pedro jiwі pecubi botha eca, soldadomonaе yapucaumena, Pedro yapucaumeinchi. Soldadomonaе, cuatro po bicheito matabuxyobe. Cae matabuxyo xeina be cuatro poyobe. Be cae matabuxyo tamroropatapona poxonaе yacaincha umeneibatsi Pedro. Herodes yabara nanta xeina xua peexanaewa tsane xua Pedro pin bicheito peitabaratha cuaranotinchi pepa tomaratha poxonaе Pascua wun matacabin yapu caewina. ⁵ Awiya came Pedro jiwі pecubi botha eca. Ichitha Jesús pejume cowantsiwichi jume daunweya wuca Nacom, Pedro tawucatsi.

Meje yabara poxonaе Nacom, Pedro capanepatsi jiwі pecubi bo weya

⁶ Herodes merawi nanta xeina xua baya tsane Pedro cuaranotinchi pepa bicheittha peitabaratha. Barapo merawitha, abu cataunxuae Pedro nantiya cobe nain camaituncuatsibe soldadomonaepinbe. Iru soldadomonaepinbe yacaincha uncuabe jiwі pecubi bo boupa. ⁷ Caena nainya Jesús pia matatsunpin tatsi Pedro tsita naitatatsi. Jiwі pecubi botha pin coicha pentha tsuxubi bichocono. Matatsunpin Pedro yubaxotsi. Nexata Pedro nacosataxuba. Matatsunpin namchi, jeye: “Pedro, nanainya nonta ponde”, jei matatsunpin. Bapoxonaе Pedro nantiya cobe nain jopeicabe iratha. ⁸ Bapoxonaе matatsunpin Pedro baraichi, jeye: “Coreinya bocoto bichocono nacoto epa catutabare. Nainya nataxu xatare jinya nenataxu xatatsiwa”, jei. Baraxua Pedro exana. Equeicha matatsunpin namchi, jeye: “Pire jinya camisa po paparua xua nainya weruyame. Antha nepuna ponde”, jei matatsunpin.

⁹ Nexata matatsunpin Pedro pecoiboto bepuna joniya, pesato beya. Ichitha Pedro xapain jopa naita cui coyene taeyo xua jiwі pecubi bo wepuna joniya matatsunpin. Saya nanta xeina be amachinae. ¹⁰ Pedro iru matatsunpin xenta jonyabe soldadomonaepin pon yacaincha uncua ichaxota Pedro etatsi. Bapoxonaе equeicha icha soldadomonaepin xenta jonyabe pon ewatuncua pepa boupa xua pesattha. Pedro iru matatsunpin peboupa penainwa xua peyacaincha dutsiwa bara wejonyabe tomara beya. Barapo boupa jemeicha nacoibo yausaranaxuba. Pedro matatsunpinno namtotha ponabe. Poxonaе icha namtotha patopabe bapoxonaе jemeicha matatsunpin Pedro cuenta aichurucuaetsi tomara namtotha.

¹¹ Barapoxonaе Pedro xaniwaicha naita cui coyene tane. Bapon nabarai, jeye: “Bara yatsicaya xainyei Jesús pia matatsunpin inta itoroba tsipei metha bepa necapanepae Herodes pia xainya weya tatsi xuano xua judiomonaе pia xainya weya tatsi, pomonaе ichichipa abe inta peexanaewa”, najei.

¹² Poxonae baxua nacui cananta xeina, Pedro pona María pia bo tatsi beya. Bapowa Juan pena tatsi. Juan icha wun xeina, Marcos. María pia botha tatsi pin bicheito nacaetuta pewunqueibinexa Nacomtha. Baxota Pedro patopa. ¹³ Pedro curara coiboto dadacata. Yabayo powa pewun Rode muxu naya pia yaputaetsi pon patopa. ¹⁴ Poxonae barapowa Pedro jume copi tainchi xua wawai abu jopa saranaxubiyo peboupa. Bapowa bichocono juntu coyene weiweina daxota caibe cuinaya piamonae tsiwun caya. Namchi:

—Pedro curara coibototha uncuca, jei Rode.

¹⁵ Barapomonae namchi, jeye:

—¡Apara camatayaiba! jei.

Equeicha bapowa jume nota, jeye:

—¡Babara xainyan, Pedro bapon yatsicaya! jei.

Equeicha barapomonae jume nota, jeye:

—Metha apara Pedro pia matatsunpin tatsi, pon yantatsi, jei.

¹⁶ Awiya came Pedro peboupa dacadacatuncua. Poxonae barapomonae peboupa saranaxoya, Pedro yabara najuntu coyene benaecaeya tainchi. ¹⁷ Pedro pecobetha moya jume matawenta. Cotacaya Pedro diwesi tsipaeba barapomonae xua bayatha capanepatsi jiwi pecubi bo weya, xua Jesús capanepa pon jiwi Pecanamataxeinaeinxa tatsi. Pedro namchi, jeye:

—Barapo diwesi Santiago patsipaebare iru ichamonae patsipaebare pomonae Jesús pejume cowuntsiwi tatsi, jei Pedro.

Barapoxonae Pedro icha namto be-iya.

¹⁸ Poxonae baya pentha tsina soldadomonae nabenaenompa tsipei jopa yabara yaputaeyo po coyene xua Pedro aichurucuae. ¹⁹ Herodes soldadomonae itorobatsi xua jeitatsi Pedro. Ichitha jopa Pedro taebichi. Daxota Herodes cana exana xua barapo soldadomonae natsiaenae cuenta pepanepaexae Pedro. Barapoxonae Herodes icha soldadomonae cui itorobatsi xua barapo soldadomonae jutebinchi. Barapoxonae Herodes Judea nacua wewarapiya, Cesarea tomaratha pepoponaenexa.

Meje yabara poxonae Herodes tupa

²⁰ Herodes pon Judea nacuapiwi peyanacua ewatsinchi, bapon Tiro tomarapiwi casebatsi iru Sidón tomarapiwino casebatsi. Bequein bayatha copiya Herodes itoroba pexaewa barapo tomarabe nexa ichitha anoxuae jopa daichiyo poxoru Herodes caseba barapo tomarapiwibe. Daxota Sidón tomarapiwi iru Tiro tomarapiwino itoroba pebiwi pesiwa ponaenexa tsainchi Blasto pon peainya cui jiton xua Herodes pon tanacuitatsi. Barapomonae ichichipa xua Herodes xaniwaicha caewa be piamonae exana, daxota barapomonae Blasto tsipaebatsi xua barapomonae peyabara jume yawenaenexatsi xua poxonae petsipaebinexatsi Herodes. ²¹ Daxota Herodes wun duta, barapo matabi, po matabitha xua Herodes siwa ponaeinchi barapomonae. Poxonae matabi tsuxubiba barapo matabitha Herodes pia paparuwa nama xatataba po paparuwa tsobia, pocotsi paparuwan nama xataba pentacaponae. Bapoxonae pia peecaewatha eca. Herodes piamonaetha tsipaeba. ²² Nexata barapomonae wawai Herodes baraichi, jeye: “¡Apara xua bapon paeba, jopa be pebinyo, apara bara nacom tsecae!” jei barapomonae. ²³ Bara caena bapoxonae Nacom pia matatsunpin tatsi Herodes iratha xotsi. Iratha xotsi yaitama bapon jopa Nacom baru cui itura jinaetsi poxonae pia coya Nacom naexana. Oro unu caewita poinchi. Jana caewita poinchino. Tsapita poinchino. Herodes tupanaicha.

²⁴ Pomonae xua jume cowanta Jesús, barapomonae taju tsipaebapona Nacom Pejume Diwesi daxita nacuantha. Daxota daxita pinmonae jume cowantatsi Jesús.

²⁵ Poxonae Bernabé Saulono nacui wetabe baxua, Jerusalén tomara wewarapiyabe. Antioquía tomara bewarapiyabe. Juan Marcos baru warapatsi.

13

Meje yabara poxonaē Bernabé Saulono Nacom Pejume Diwesi caponabe

¹ Baraxota Antioquía tomaratha jiwana jinompa pomonaē pejume cowũntsiwi Nacom pomonaē Nacom pia peitorobi jume pepaebiwi irũ pomonaē jiwi pecuidubiwi Moisés pia peitorobi coyene. Barapomonaē meje: Bernabé irũ Simón pon icha wũnno, Negro baraichi, irũ Lucio Cirene tomarapin ecarũ. Irũ Saulo ecarũ. Irũ Manaén ecarũ, pon Herodes bayatha caepinbe naexanabe xua nacuara wichaba ponabe. Herodes Galilea nacuapiwi peyanacua ewatsinchi naexana. ² Caentacabi, poxonaē barapomonaē Nacom pejume coyene canatsipaeba exana, yawa yabara nainbota, barapoxonaē Nacom pia Pejumope tũnaxũ tatsi barapomonaē tsipaebatsi, jeye: “Paitorobare Bernabé, Saulono, petsipaebinexa tsanebe Nacom pia pexeinya jume diwesi tatsi po penacuichiwa baponbe bayatha tsiwabanbe”, jei Nacom pia Pejumope tũnaxũ tatsi.

³ Nexata poxonaē xua Nacom wũca najume weta, xuano poxonaē weta xua yabara nainbota, barapoxonaē Bernabé Saulono pecobetha mataboco jayabatsibe. Bapoxonaē napeyabatsibe.

Meje yabara poxonaē Nacom pia peitorobi jiwi tatsi, Nacom pia diwesi tatsi cueicueijei Chipre tunaetotha

⁴ Bapoxonaē Bernabé Saulonũrũ itorobatsibe Nacom pia Pejumope tũnaxũ tatsi. Seleucia tomara bewarapiyabe. Bapoxonaē ponabe jeratha po naetha po nae pin nae, petunaeto beya. Barapo tunaeto pewũn Chipre. ⁵ Poxonaē patopa Salamina tomaratha, Nacom pia pexeinya diwesi tatsi cueicueijei judiomonaē pia penacaetutsi bontha tatsi. Juan Marcos bichi naponna Bernabé Saulono peyawenaenexatsi.

⁶ Barapoyobe daxita barapo tunaeto matawacaicha enapona petsipaebinexa Nacom pia pexeinya jume diwesi tatsi. Bapoxonaē Pafos tomaratha pata. Barapo tomaratha bapoyobe caxinabe judiomonaepin pon pewũn Barjesús. Bapon Barjesús mara pexeinaein, pon saya naeraba paeba. Bapon Barjesús namchi, jeye: “Xan tacueicueijein Nacom nexa”, jei. ⁷ Barapon napuna poneiba pontha pon Chipre tunaetopiwi peyatunaeto ewatsinchi ponxae pewũn Sergio Paulo. Bapon Sergio Paulo peyaputaein. Bernabé Saulono wabatsibe pia jume taetsibe xua Nacom Pejume Diwesi tatsi pepaebiwa. ⁸ Barapon pon mara pexeinaein icha wũn xeina, griego jume, “Elimas”, baraichi. Bapon Bernabé Saulono jume yancatabatsibe, tsipei jopa ichipaeyo xua Sergio Paulo jume cowũntsina Nacom Pejume Diwesi. ⁹ Nexata Saulo, pon icha wũnxae Pablo, Nacom pia Pejumope tũnaxũ tatsi jũntũ coyene yũcatsi. Pablo bichocono pexainya beya tane. ¹⁰ Pablo barai, jeye:

—¡Barjesús, xam pon jiwi nemuxuitorobeibin, abe neexanaein, cauri pexantom, daxita xua pewũnaewan neaichaxaibim! ¿Eta xua daichim jiwi cui yancababeibame xua pejume cowũnteibiwa Jesús, pon jiwi Pecanamataxeinaeinchi? ¹¹ Bara anoxuae Nacomtha natsiaenae cuentsiname. Daxota caitacuere piontababa. Jopa caeto pesato taem tsane, beya poxonaē matapainya Nacom copatsina xua netaewa tsane, jei Pablo.

Bapoxonaē Elimas nainya itata quirei. Bapon ichawa beya ichũn nacobena jayaba, pecobe caponaenexatsi peitata nacũtsinxae. ¹² Poxonaē Sergio Paulo baxua tane bapoxonaē bapon Nacom jume cowũntatsi tsipei tsita wũnaetsi pocotsiwa Pablo Bernabeno yabara cuidubabe Nacom pon jiwi Pecanamataxeinaeinchi.

Meje yabara poxonaē Bernabé Pablono Antioquía tomaratha ecabe xua Pisidia nacuatha

¹³ Pablo irũ pijimonaē tatsino Pafos tomara wewarapiya. Perge tomara be-iyiya jeratha, po nae pin nae. Perge tomaratha pata, Panfilia nacuatha. Barapo nacuatha daxita barapomonaē Juan Marcos wũ pona. Barapoxonaē Jerusalén tomara bewarapiya.

¹⁴ Nexata Pablo irũ pijimonaē tatsi Antioquía tomara be-iyiya. Barapo tomara Pisidia nacua nacacuita ecabe. Barapo matababitha, po matababitha pentaquei seicae matababitha, judiomonaē pia penacaetutsi botha tatsi pata, yawa enoundeca. ¹⁵ Baraxota ichũn yoroba Moisés pia peitorobi coyene diwesi tatsi. Yawa yoroba xua Nacom peitorobi

jume pepaebiwi paeba. Bapoxonae poxonae najume weta pentacaponae, pomonae peyabara umenaewi penacaetutsi bo, barapomonae Pablo wabatsi iru piamonae tatsi wabatsi. Barapomonae jeye:

—Pata tajiwimonaem, icha paxeiname diwesi, po diwesi xua barapomonae pejuntu coyene tsacabiwatsi xua juntema pejinompaewa nexa barapomonae pomonae xote ene, bara moya papaebare barapo diwesi, jei barapomonae.

¹⁶ Nexata Pablo asiya uncua. Pecobetha jume matawenta xua moya peenaenexa. Pablo barai, jeye:

—Incane pajume taema, israelmonae pam, iru paxamno pomonae Nacom abe paca necaexanaeyainwa pam xua icha abe paexaname, pomonae judiomonae jopa naexanaeyo pam. ¹⁷ Wamo susato jiji, pomonae Israel piamonae, barapomonae Nacom cana exana xua barapomonae nayoyotapona beya xua pin bicheito naexanapona, poxonae cataunxuae Egipto nacuatha jinompa. Nacom itapeta waba barapomonae, xua petanaexanaenexatsi pijimonae jiwana tatsi. Daxota Nacom pia peayapuswatha wamo jiji capanepatsi Egipto nacua weya. ¹⁸ Wamo jiji ira xuepana susato tsurucuae nacua beya warapa cuarenta po weibe. Nacom yaweneiba barapomonae bequein barapomonae abe exaneiba cuarenta po weibe. ¹⁹ Wamo susato jiji tsimaxu dubatsi Nacom poxonae jutebatsi Canaan nacuamonae. Nacom caewitaxuba Canaan nacuamonae siete po bicheito matabuxyobe. Wamo susato jiji barapo ira xuya catatsi, Nacom cata. ²⁰ Daxita baraxua Nacom exana barapomonaetha cuatrocientos cincuenta po weibetha.

“Bapoxonae Nacom jiwana cana exana pomonae jiji peyabara paebiwichi xua penatsicuentisiwa xua abe peexanaexae pentacainompaenexa tsane barapomonae. Nacom baxua exana beya poxonae pon pewun Samuel popona pon Nacom pia peitorobi jume pepaebin. ²¹ Nexata israelmonae Nacomtha wuca pon be yatsicaya barapomonae barompaya itorobiya pia pepa peewatsinchi tatsi tsane. Daxota Nacom taexana barapomonaetha pon pewun Saúl, Cis pexanto tatsi, pon Benjamín pia pemomoxi susato jiwana tatsi. Bapon Saúl, pon jiji itorobiya pia pepa peewatsin naexana cuarenta po weiyobe. ²² Bapoxonae Saúl cui matawentatsi Nacom abe peexanaexae. Equeicha exana ichun pon jiji itorobiya pia pepa peewatsinchi, pon pewun David. Nacom yabara jume jei David: ‘David tan, pon Isaí pexanto. David netsita juntu coyene xanepana yawa wnae exanano. David itapeta exanaena daxita pocotsiwa ichichipan’, jei Nacom. ²³ David pia pemomo susato jiwana tatsi, bapon pewun Jesús. Jopa cain bayatha Nacom Pejume Diwesi paebi penamchixae Jesús capanepa Israel nacuamonae. Baraxua caena bayatha Nacom yabara tsiwanae muxu duta. ²⁴ Pewunaeya poxonae Jesús tamropata pitabina xua pecuidubiwa Nacom nexa copiya matha Juan daxita Israel nacuapiwi tsipaeba xua pinae bewa nacui barapentsina abe peexanae cuiru coyenein xua Nacom petsita xenaenexatsi icha juntu coyenein, xuano xua bewa pinae nabautisabina. ²⁵ Poxonae Juan bara imoxoyo tupa, jeye: ‘Jopa daponyo xan, pon xua payabara nanta xename, pon Mesías baraichi. Cotacaya ichun patopaena xua pon nepuna patopaena. Pocotsiwa bapon exana bichocono ainya cui beyacaincha pocotsiwa exanan. Bichocono pin ura tsita xeinan xua daxota bewa jopa tataxu mu isanaxubiwa tsane pia penataxu xatatsiwa tatsi’, jei Juan”, jei Pablo.

²⁶ Equeicha Pablo jeye: “Tamonae pam, Abraham pia pemomoxi susato jiji tatsi pamxaem, iruru pomonae Nacom abe paca necaexanaeyainwa pam xua icha abe paexaname. Nacom pacata itoroba barapo pecapanenebiyae diwesi jume po diwesi Juan yabara paeba. ²⁷ Barapomonae pomonae Jerusalén tomaratha jinompa iru pia pentacaponae tatsi jopa Jesús yaitaetsi po coyene xua bapon apara Mesías. Matautano barapomonae jopa yaputaeyo xua bayatha Nacom peitorobi jume pepaebiwi yabara wnae tsiwanaya paeba xua bexa Jesús cana exanaeinchi. Pentaquei seicae matabitha poxonae ichamonae yoroba po diwesi xua Nacom pia peitorobi jume pepaebiwi tina, judiomonae pia penacaetutsi botha tatsi barapomonae jopa yabara yaputaeyo barapo diwesi. Poxonae Jesús naetotha tparucua exanatsi, barapomonae nanta jupiya exana

Jesustha icha be pocotsi coyeneya bayatha Nacom pia peitorobi jume pepaebiwi paeba. ²⁸ Barapo judiomonaе jopa xeinaeyo po coyeneya xua Jesús pebexubiwa tsainchi. Bequein Jesús jopa abe exanaeyo ichitha barapomonaе Pilato wacatsi xua Pilato itorobina soldadomonaе xua Jesús pebexubiwa tsainchi. ²⁹ Barapomonaе exana daxita po coyene bayatha xua Jesús yabara wunaе tsiwanaya paebatsi Nacom Pejume Diwesitha. Barapoxonaе Jesús pijimonaе petupaein naeto wepichicatsi. Pijimonaе muthutha xotsi petupaein pitapatororo muthutha. ³⁰ Ichitha Nacom, Jesús equeicha caewa asu exanatsi petupae cuiru coyene weya. ³¹ Matha cain Jesús puna jinompeibatsi ichamonaе poxonaе Galilea nacuatha popona, Jerusalén tomarathano. Barapomonaetha equeicha Jesús tsita naituta ducuaenaеbiya ainya matabi dapaein. Pomonaе Jesús bayatha tsita naituta, barapomonaе apara pomonaе xua anoxuae daxita tomanan tsipaeba dubenanaеbiya Jesús yabara.

³² “Daxota paca tsipaebatsi Jesucristo pia pexeinya diwesi jume xua bayatha Nacom yabara tsiwunaе muxu duta wamo susato jiwitha. ³³ Baxua Nacom exana poxonaе Jesús equeicha asu exanatsi. Nacata exana poxoru waxainchi wamo susatopiwi pijimonaetsi. Icha be pocotsi coyeneya bayatha tina Nacom Pejume Diwesitha xua salmos penaxunaе weixi diwesintha, po wei xua ichaxota ‘dos’, jei xua jeye: ‘Xam, taxantom, itawan caexanatsi bara’, jei. ³⁴ Nacom, Jesús asu exanatsi, xua equeicha jopa petupaenexa tsane, xua equeicha jopa tsabanuncuae tsane. Daxota jei pejume diwesitha: ‘Paca catinchi xua bayatha David tayabara tsiwunaе muxu dutan’, jei. ³⁵ Daxota pon xua tina salmos penaxunaе weixi diwesintha, barapo diwesintha Nacom baraichi: ‘Jopa copatsim xua nexanto petsabanuncuaewa tsane pon bichocono pejuntu coyene xanepanaein’, jei. ³⁶ Xainyei, David exana xua Nacom ichipa poxonaе baru popona Israel nacuapiwi. David bayatha tupa. Muthutha xotsi ichaxota pamo jiwi tatsi yamuthu umena. Yawa bayatha tsabanuncua. ³⁷ Ichitha barapo pepon po pepon Nacom asu exana, barapo pepon jopa tsabanaeyo. ³⁸ Tamonaе pam, maisa bepayabara yaputaename Jesús po coyene xua bapon Jesús pacata cayawa tupa abe painya neexanaе cuiru coyenein xua daxota Nacom juntemaina barapo abe painya neexanaе cuiru coyenein. ³⁹ Tsipei Jesús tupa daxota daxita pomonaе jume cowanta bapontha, Nacom juntu coyene wunaetsina. Bequein jiwi exana daxita pocotsiwa Moisés pia peitorobi coyenewatha itoroba, ichitha barapo coyenewa bapana jopa jiwi juntu coyene xanepana exanaetsi abe pia peexanaе cuiru coyenein tatsi weya. ⁴⁰ Dota, icha metha jopa Nacom pajume cowantsipaem, bara paichim tsipae icha be pocotsi coyeneya bayatha pomonaе Nacom peitorobi jume pepaebiwi yabara tina. Namchiya tina, jeye:

⁴¹ ‘Ja, jiwi pecui caponaemonaе pam,
 bara pana nabenaecare, pawerapare.
 Xan, Nacom, anoxuae exanaein bichocono pepa
 pewunaewa poxonaе cataunxuae pajinompame.
 Baxua xua exanan, jopa pajume cowantsim,
 bara bequein ichamonaе paca tsipaeba’,
 jei Nacom”, jei Pablo.

⁴² Pablo, iru pia pepuna ponaewichi daxita barapoyobe judiomonaе pia penacaetutsi bo tatsi wejojoniya. Pomonaе baxota umena pomonaе jopa yacuiya naexanaeyo xua judiomonaе penaexanaewa, barapomonaе Pablo wacatsi xua bepa pinaе Pablo equeicha cuidubina po diwesi anoxuae paeba xua equeicha icha diwesi mataropeichiya cuidubina xua icha mataqueitha tsane xua pentaquei seicaе matabitha. ⁴³ Poxonaе najume weta Pablo iru Bernabé, puna poinchibe judiomonaе iru pomonaе jopa judiomonaе naexanaeyo. Barapomonaе Nacom jume cowanta nawita icha judiomonaе ichi. Pablo Bernabeno tsipaebabe barapomonaе: “Nacom pajume cowanta dubenanaеbiyama xua Nacom wunaе pia pacata exanaenexa painya juntu coyeneintha pia paca necaantobexae”, jeibe.

⁴⁴ Icha matabi, po matabitha pentaquei seicae matabitha, pin bicheito pomonae tomaratha ena, nacaetuta xua pejume taenexa Nacom pia pexeinya jume diwesi tatsi, pon Pecanamataxeinaeinchi jiwi. ⁴⁵ Ichitha poxonae judiomonae pinmonae necota, jume uwa tsipei pinmonae nacaetuta pejume taenexatsi Pablo. Pablo jume matawentatsi xua paeba yawa tsũmũ jume barũ paebatsino. ⁴⁶ Nexata Pablo Bernabeno tsipaebabe barapomonae. Jopa auriya paebiyobe. Jeibe:

—Bara xanepana xua copiya Nacom Pejume Diwesi paca tsipaebatsi pomonae judiomonae pamxaem. Daichitha, jopa bepajume taem barapo diwesi tsipei jopa paichichipaem xua painya nexeiaewa peajũntũyapusũwa po peajũntũyapusũwa ataya tsiteca. Daxota anoxuae ichamonaetha pata tha ponaetsi pomonaetha pomonae jopa judiomonae naexanaeyo. ⁴⁷ Pata Tanecanamataxeinaein Nacom pana itoroba. Pana baraino, jeye:

‘Paca exanatsi xua painya neyawenaewa
daxita pomonae jopa judiomonae naexanaeyo
xua xanepanaeya pejinompaenexa tsane.
Matautano paca exanatsi xua beta
painya netsipaebinexa Nacom Pejume
Diwesi daxita nacuantha, xua jiwi
pecapanenebiyaenexa tsainchi Nacom abe pia
peexanae cuiru coyenein weya tatsi’,
jei Nacom, jei Pablo.

⁴⁸ Poxonae baxua jume taerũcũpa, pomonae jopa judiomonae naexanaeyo, bara-pomonae bichocono jũntũ coyene weiweinarũcũpa, jũntema jinompano. Pablo tsipaebatsi: “Nacom Pejume Diwesi jume xeica. Bichocono jume wũnae”, jei. Daxita barapomonae jume cowũnta pomonae Nacom cuita itapeta petaxeinaenexa tsainchi peajũntũyapusũwa, po peajũntũyapusũwa ataya tsiteca. ⁴⁹ Barapomonae pomonae Jesús pejume cowũntsiwichi daxita nacuantha tsipaeba Jesús pia pexeinya jume diwesi tatsi, pon jiwi Pecanamataxeinaein. ⁵⁰ Ichitha judiomonae anaepana exana yabũxi powaxi Nacom cananta xeinatsi bichocono. Yawa pebiwi pomonae peainya cui jiwi, barapo pebiwi anaepana exanatsirũ. Irũ judiomonae Pablo Bernabeno abe yabara cueicuei-jeichibe, daxota daxita jiwi Pablo irũ Bernabé casebatsibe. Barapo jiwi Pablo Bernabeno itawetaxotsibe pia nacua beya. ⁵¹ Nexata Pablo Bernabeno nataxu nũnũtababe tsorobo. Baxua exanabe petsita itapeinya xeinaenexa po coyene bapomonae abe exana poxonae jume itaweta Nacom Pejume Diwesi. Barapoxonae warapabe Iconio tomara beya. ⁵² Ichitha pomonae Jesús jume cowũnta, barapomonae bichocono jũntũ coyene weiweina. Matautano barapomonae jũntũ coyene yũcatsi Nacom pia Pejumope tũnaxũ tatsi.

14

Meje yabara poxonae Pablo Bernabeno Iconio tomaratha poponabe

¹ Iconio tomaratha Pablo Bernabeno judiomonae pia penacaetutsi botha tatsi jonyabe. Beta paebabe daxota pinmonae Jesús jume cowũnta. Judiomonae jume cowũnta, irũrũ pomonae jopa judiomonae naexanaeyo jume cowũnta Jesús. ² Ichitha po judiomonae jopa Jesús pejume cowũntsiwichi barapomonae cui tsacaba pomonae jopa judiomonae naexanaeyo cui tsacabatsi. Daxota barapomonae pomonae jopa judiomonae naexanaeyo abe yabara nanta xeina xua pomonae Jesús pejume cowũntsiwi tatsi abe yabara nanta xeinatsi. ³ Pablo Bernabeno barapo tomaratha ecabe. Ainya matabi dapaein baraponbe ecabe baraxota. Nacom Pejume Diwesi jume daunweya cueicueijeibe Pecanamataxeinaein nexa. Baponbe Nacom cata pia peayapusũwa peexanaenexabe pexeinya petsita itutsi coyenewan. Poxonae jiwi cui tane xua baponbe exanabe, barapo jiwi yaputane xua Nacom yawena baponbe, peantobexaetsibe. ⁴ Daxita jiwi tomaratha be ainya jiwibe natsababe. Ichamonaetha judiomonae ichichipa. Ichamonaetha

Jesús pia peitorobi jiwi tatsi ichichipa. Daxota ainya bicheitobe nacana exanabe. ⁵ Nexata bapoxonae judiomonae iru pomonae jopa judiomonae naexanaeyo peburaya yabara jume baru nanta xeinarucupa xua pentacaponae wi paeba po coyene xua Pablo yawa Bernabé abe peexanaewa tsainchibe xuano xua ibotontha pecuinbabinexatsibe. ⁶ Poxonae Bernabé Pabloe jume taebabe nainya naetsirucuabe Listra tomara beya, Derbe tomara beyano. Barapo tomarabe Licaonia nacuatha ecabe. Matautano icha tomaran beya ponabe Pablo Bernabeno xua po tomaran ena barapo Licaonia nacuatha. ⁷ Barapo tomarantha cuiduba ducuaebiyabe Jesús pia pexeinya jume diwesi tatsi.

Meje yabara poxonae Pablo Listra tomaratha ibotontha cuinbabatsi

⁸ Listra tomaratha pebin popona pon pemubinchi, pon xua jopa peponaein. Bapon pexuyotha caena yawa naexaneca, xuano bapana jopa ponae. ⁹ Bapon pon pemubinchi Pablo jume tainchi xua pocotsiwa cueicueije. Pablo pemubinchi tane. Pablo nanta xeina, xua pon pemubinchi bara Nacom jume cowuntatsi. Pablo nanta xeinataba xua axaibi peexanaewa tsainchi pon pemubinchi. Daxota bichocono Pablo naita cui duya bapontha beya. ¹⁰ Nexata Pablo jume daunweya barai, jeye:

—Asiya uncuare, jei.

Pon pemubinchi asiya uncuatabiya jirawuna yawa nainya ponano. ¹¹ Poxonae Pablo cui tainchi barapomonae, jume daunweya wawai pin jumetha, Licaonia pijumetha tatsi:

—¡Nacombe be pebin juta tsecae waxainya berena patopabe! jei.

¹² Barapomonae namchi: “Maisa Bernabé bara mexeya nacom tsecae, po nacom pewun Zeus. Iru Pablo bara mexeya icha nacom tsecae, po nacom pewun Hermes”, jei. Barapomonae bapo wun duta poxoru tsipei Pablo penantacapaebin tsecae. ¹³ Iru barapo nacom Zeus pia sacerdotemonaepin xeinaru, pon Zeus wunae jainteibatsi pia penacaetutsi bo tatsitha. Barapo penacaetutsi bo uncua tomara coiboto juma weya. Barapo sacerdotepin vaca pebton wiyaba pentonon pecaponaenexa Zeus pia penacaetutsi botha tatsi. Barapo tomarapiwi iru Zeus pia sacerdotepin ichichipa juteba vaca pebton petautsinexa xua petuxusi exanaenexa Pablo iru Bernabé nexabe pia Pablo iru Bernabé yabara nanta xeinaebe barapomonae xua barapomonae bara pejuntu coyene xanepanaewi. ¹⁴ Bernabé Pabloe jume tanebe xua taexanaeinchibe baxua barapomonae. Bapoxonae anaya nama paparuwa tsitsinaxubabe. Cuinaeponaya wawaibe poxoru aichaxaibibe xua baxua barapomonae exanaena. Jeibe:

¹⁵ —¿Eta xua daxua pana canautame? Apará saya jiwi panbe. Be paxam paichim bara paichinbe. Papatopanbe tsipei apara pata paca catsipaebinexa tsainchi xua painya nenacui barapentsiwa tsane barapo coyenexi xua jopa pecui xanepanaewiyo. Maisa Nacomtha panantana pende. Barapo Nacom pon peantucuiyapusun, exana peitaboco, iranno, pin meneinno. Daxita xua xuanno yawa muxuna dubena tsiniya Nacom bayatha exana. ¹⁶ Wawunaeya Nacom cui copata daxita nacuapiwi xua bara pejinompaenexa icha be pocotsi coyeneya ichichipa xua pejinompaewa. Daxita jiwi pia cui nata exana saya. ¹⁷ Nacom xua pewunaewan nacopiniwa tsita ituba daxota jiwi naita cui coyene tane xua Nacom exana. Barapon Nacom apara pon ema pacata itorobica, pexuwiwanno paca tsijain exaneica catsicano. Pexaewa paca cata. Paca juntu coyene weiweina exana, jei.

¹⁸ Bequein Bernabé Pabloe jume daunweya yabara paebabe baraxua, awiya barapomonae ichichipa jutebina vaca pebton xuano xua wunae pejainchinexatsibe Pablo iru Bernabé. Barapomonae muxu pejutebi vaca daichitha jopa jutebiyo.

¹⁹ Bapoxonae judiomonae pomonae jopa pejume cowuntsiwi, Antioquia tomara weparena, iruru Iconio tomara weparena. Daxita barapo judiomonae Listra tomarapiwi baru cueicueijeichi pebaru anaepanaenexatsibe Pablo iru Bernabeno. Nexata barapomonae Listra tomarapiwi ibotontha cuinbabatsi Pablo. Barapomonae najuntu coyene xeina xua bayatha tupa Pablo. Pablo tomara coiboto juma bejojontapoinyatsi. ²⁰ Jesús pejume cowuntsiwichi Pablo cacuita mata wacaicha umenarucupatsi. Bapoxonae Pablo

asiya uncuataba. Equeicha tomara bepoinya. Icha mataqueitha Bernabé Pablo Derbe tomara beya ponabe.

²¹ Barapoxonae Bernabé Pablo muxu tsipaebabe Jesús pia pexeinya jume diwesi tatsi. Pinmonae jume cowunta Jesús. Equeicha bapoxonae Listra tomara beya, caibeya ponabe. Iconio tomarano, Antioquía tomara beyano bara bewarapiyabe. ²² Bernabé iru Pablo barapo tomarantha juntu coyene tsacababe pomonaetha pomonae pejume cowuntsiwi xua xanepanaya pejinompaewa tsane. Matautano cui itorobabe barapomonaetha xua bewa barapomonaeta xanepanaya jume cowunta dubenanaebiyaena. Barichino matautano tsipaebabe xua pinae poxonae ichamonae pepatsiwa tsane Nacom pia peitorobi nacua beicha bewa matha ajuntucoyenetane exaneibinchi xua ichamonae taexanaena. ²³ Bernabé Pablo tamroropata itapeta tsiniyabe pitiri jiwi daxita Jesús pejume cowuntsiwi pia penacaetutsi bontha. Barapo pitiri jiwi itapetatsi peyawenaenexa xua peyawenaenexatsi pomonae Jesús pejume cowuntsiwi. Poxonae daxita najume weta xua Nacomtha petsipaebiwa, xuano xua yabara nainbota pitiri jiwi nexa, barapoxonae Pablo iru Bernabé, Nacom pon Pecanamataxeinaein jiwi, jeichichi: “Nacom, barapo pitiri jiwi beta eenare jinya necajume cowuntsixae”, jeibe.

Meje yabara poxonae Bernabé iru Pablo Antioquía tomaratha equeicha caibe patopiyabe xua po tomara peecaexae Siria nacuatha

²⁴ Copiya matha Pisidia nacua bewarapiyabe. Bapoxonae Panfilia nacuatha patopabe. ²⁵ Jesús pia pexeinya jume diwesi tsipaebabe Perge tomaratha. Barapoxonae equeicha Atalia tomara bewarapiyabe. ²⁶ Baraxotiya Atalia tomaratha Antioquía bewarapiyabe jeratha, po naetha po nae pin nae. Antioquía tomara barapo tomara ichaxota bayatha matha barapomonaeta Bernabé iru Pablo tawucatsibe Nacomtha poxonae juntucuru warapabe. Bayatha cain barapo Antioquía tomarapiwi tawuca Nacomtha, xua Nacom beta eenaena peantobexae xua Pablo iru Bernabeno beta eenaechibe poxonae nacuitabe Nacom pia penacuichiwa. Baxota equeicha Pablo Bernabeno pecoutha patopabe tsipei barapo pia penacuichiwabe bayatha wetabe. ²⁷ Bernabé iru Pablo poxonae patopabe Antioquía tomaratha caetutabe pomonae pejume cowuntsiwi Jesús. Baponbe barapomonaetha tsipaebabe po coyene bayatha Nacom Pablo iru Bernabé taexanatsibe. Matautano tsipaebabe xua Nacom pon Pecanamataxeinaein jiwi, pomonae jopa judiomonaeta naexanaeyo tacopatatsi xua iru barapomonaeta peitacupaewatsi xua pejume cowuntsinexatsi Jesús. ²⁸ Bernabé iru Pablo baraxotiya ainya dapaein naecabe barapomonaeta pia xantha tatsi pomonae Jesús pejume cowuntsi jiwichi.

15

Meje yabara poxonae nacaetuta Jerusalén tomaratha Jesús pia peitorobi jiwi tatsi iru penapatae jiwi

¹ Barapoxonae iru pebiwi, pomonae Judea nacuatha jinompa, pata Antioquía tomaratha. Barapomonaeta tamropata notarucupa xua pecuidubiwa pomonaetha pomonae iru pejume cowuntsiwixae Jesús. Jeye: “Icha paichichipame xua painya nepaca capanenebiwa matha pana nawi thabare pebiwi pam ichaxota pana nareixacaename icha be ichi pocotsi coyeneya bayatha Moisés paca itoroba”, jei. ² Pablo iru Bernabeno jume daunweya tsipaebabe xua baxua jopa xainyeyo. Ichitha jume matsontsonobatsibe barapomonaeta. Daxota Pablo iru Bernabé wun dutatsibe, iru ichamonae wun dubatsi xua daxita barapomonaeta peponaenexa Jerusalén tomara beya. Matautano barapomonaeta itorobatsi xua barapo penawi thabi coyene yabara petsipaebinexatsi Jesús pia peitorobi jiwi tatsi, iruru pitiri jiwi petsipaebinexatsi pomonae penacaetutsi jiwi jiwana xua Jerusalén tomaratha.

³ Barapo Antioquía tomarapiwi pomonae Jesús pejume cowuntsiwi pu taeumena. Pablo iru Bernabé iru icha pebiwi pu taeumeinchi. Barapoxonae Pablo Bernabeno iru icha pebiwino warapa. Barapomonaeta siwa pona Fenicia nacua beya, Samaria nacua beyano. Barapomonaeta Pablo Bernabeno tsipaebabe, jeibe: “Pomonae xua jopa

judiomonae naexanaeyo, barapomonae pia cui coyenein nacui barapenta po coyenein xua jume cowunta bayatha pia jume cowuntichi Nacomtha”, jeibe Pablo, Bernabeno. Daxita pomonae iru pejume cowuntsiwixae Jesús bichocono juntu coyene weiweina poxonae jume tane baxua.

⁴ Bernabé iru Pablo poxonae patopabe Jerusalén tomaratha, pomonae pejume cowuntsi jiwi baponbe matenta weiweinaya wabatsibe. Iruru Jesús pia peitorobi jiwi tatsi matenta weiweinaya waba. Barichiru pitiri jiwi matenta weiweinaya waba. Bernabé iru Pablo tsipaebabe barapomonaetha po coyene bayatha Nacom taexana baponbetha. ⁵ Ichitha ichamonae fariseomonae, pomonae bayatha jume cowunta Jesús, asiya umena. Barapomonae namchi, jeye:

—Pomonae jopa judiomonae naexanaeyo pomonae pejume cowuntsiwi Jesús bewa exanaetsi xua penawi thabiwa tsane xua ichaxota nareixacaena xua ichaxota pebiwixae xeina. Matautano bewa cui itorobichi xua bewa exanaponaena pocotsiwa bayatha Moisés itoroba pia peitorobi coyenewatha, jei.

⁶ Bapoxonae Jesús pia peitorobi jiwi tatsi iru pitiri jiwimonaeno nacaetuta peyabara paebinexa barapo penawi thabi coyene. ⁷ Caena bayatha bapomonae najume matsonobompa. Bapoxonae Pedro asiya uncuataba. Barai barapomonaetha, jeye:

—Tamonae pam, pomonae iru painya nejume cowuntsiwixae Jesús, paxam payaputaneme, xua caena bayatha Nacom neitapeta painya xantha. Newaba tacueicuei-jeinexa tsane Jesús pia pexeinya pecapanenebiyae diwesi jume pomonaetha pomonae jopa judiomonae naexanaeyo, xua iruru barapomonae pejume cowuntsinexa barapo diwesi. ⁸ Nacom pejuntu coyene yaputaein jiwi daxota naca yaputane exana xua bapon tsitatsi xua barapomonae pejuntu coyene xanepanaewi bequein jopa judiomonae naexanaeyo. Nacom bara nanajumope tunaxu cata barapomonaetha icha matha naca cana ichi. ⁹ Nacom bichocono antobe barapomonae icha ichi xua bichocono naca antobe. Nacom juntu coyene puxana exana barapomonae xua abe pia peexanae cuiru coyenein tatsi pejume cowuntsixaetsi icha naca ichi. ¹⁰ Maisa anoxuae jopa bepayabara yaputaem pocotsiwa Nacom exana. Matautano barapo pejume cowuntsiwi pomonae jopa judiomonae naexanaeyo pacui itorobame xua penawi thabiwa xua ichaxota nareixacaena xua ichaxota pebiwichi xeinatsi. Matautano be paca ita cui jicha xua barapomonae bewa exanaena pocotsiwa Moisés itoroba. Apra baraxua jopa naca itacupaeyo xua waexanaewa. Iruru wamo susato jiwi jopa itacupaetsi xua peexanaewa baxua. ¹¹ Nama apra waxainchi wanaca capanenebiyae jiwichi xua saya amanaya xua Jesús pon jiwi Pecanamataxeinaein peichichipaexae baxua. Barapo pejume cowuntsiwi iru bara cana ichichi, jei Pedro barapomonaetha.

¹² Bapoxonae barapomonae moya umena. Barapomonae Bernabé iru Pablo jume taeumenatsibe. Tsipaebabe: “Paponeibanbe pomonaetha pomonae jopa judiomonae naexanaeyo. Paexaneibanbe barapomonaetha pexeinya petsita itutsi coyenewan Nacom pia peayapusuwiyatha tatsi”, jeibe. ¹³ Poxonae Bernabé iru Pablo najume wetabe xua paebabe, bapoxonae Santiago namchi, jeye:

—Tamonae pam, pomonae iru painya nejume cowuntsiwixae Jesús, pana nejume taema: ¹⁴ Simón Pedro aunxuae naca tsipaeba. Pedro namchi: ‘Poxonae Nacom copiya tamropata pitaba xua yawena pomonae jopa judiomonae naexanaeyo, Nacom jiwana itapeta pomonae xua peantobenexa tsainchi bapon’, jei Pedro. ¹⁵ Xuaunxuae Pedro paeba caena bayatha Nacom pia peitorobi jume pepaebiwi yabara tsiwunae muxu dutsiya tina Nacom Pejume Diwesitha xua Nacom nexa, jeye:

¹⁶ ‘Poxonae daxita baraxua wetsina, xan Nacom equeicha patoparecaein. Exanaein xua caein, pon David pia pemomo jiwi tatsi jiwana matacapoponaena piamonae, icha matha David ichi poxonae piamonae matacapopona.

¹⁷ Poxonae baraxua exanaein, barapoxonae ichamonae pomonae jopa judiomonae naexanaeyo newenawenei tsane pia tanejume cowuntsinexa tsane. Barapomonae pia Pecanamataxeinaein tatsi naexanaein taitapetsixae barapomonae.

¹⁸ Nacom pon jiwi yaputaeya exanatsi barapo coyenein caena bayatha pepaebixae baxua daxota xaniwaicha Nacom exanaena', jei Nacom pia peitorobi jume pepaebiwi, Nacom Pejume Diwesitha xua Nacom nexa, jei Santiago.

¹⁹ Santiago cataunxuae awiya cueicueijeji, jeye: "Daxota nanta xeinan, equeicha waxainchi jopa bewa itorobi tsainchi pomonae jopa judiomonae naexanaeyo xua peexanaewa po coyenein xua taayapubetsi. Barapomonae nacui barapenta pia cui coyenein po coyenein xua jume cowunta bayatha pia jume cowuntichi Nacomtha.

²⁰ Betatinaetsipatsi carta pomonae jopa judiomonae naexanaeyo. Barapo cartatha jeichipaetsi: 'Jopa equeicha pewi paxaeinde po wi jiwi tajeba ibo nacom nexa. Painya xoba yabuxi panotame po yabuxi jopa painya seurixi. Painya xoba duwei paw xaneme pon saya pipato tupa xuano pon saya bunopa. Matautano jopa paxaeinde pejanan', bejei tsipaetsi. ²¹ Baraxua bewa exanaetsi poxoru caena cain bayatha pomonae Nacom Pejume Diwesi pecanatsipaebi jiwi yorobeiba barapo diwesi judiomonae pia penacaetutsi bontha tatsi. Daxita tomarantha xua po maticabintha pentaquei seicae maticabintha barapomonae yorobeiba Nacom Pejume Diwesi, po diwesi xua Moisés tina bayatha pocotsiwa yabara tsiwuna muxu duta Nacom", jei Santiago.

Meje yabara poxonae barapo bicheito carta tatina pomonaetha pomonae jopa judiomonae naexanaeyo

²² Jesús pia peitorobi jiwi tatsi iruru pitiri jiwi, iru daxita pomonae pejume cowuntsiwi juntucuru najiwana itapeta. Bapoxonae xua Antioquia tomara beya penajiwana itorobinexa Pablo iru Bernabé. Judas wun dutatsi pon icha wun Barsabás. Iru Silas wun dutatsi, baponbe ponbe bichocono peainya cui jitonbe xua pomonae iru pejume cowuntsiwi pia xantha tatsi. ²³ Jesús pia peitorobi jiwi tatsi iruru pitiri jiwi, iru pomonae Jesús pejume cowuntsiwi, barapomonae carta tina xua pecaitorobinexa xua Pablo iru Bernabé iru Judas iru Silas barapoyobe pecaitorobinexatsi. Barapo carta namchi, jeye:

"Paxan Nacom pia peitorobi jiwi tatsi pan, iru pitiri jiwi panno xua nacaemonae jiwichi xua wajume cowuntsiwichi Jesús. Paxan pajacoban patamonae pomonae jopa judiomonae naexanaeyo pomonae iru Jesús pejume cowuntsiwichi, pomonae pejinompaexae Antioquia tomaratha, xuano xua pejinompaexae Siria nacuatha, Cilicia nacuathano. ²⁴ Payaputan ichamonae xua patamonae pata tomara weya pipato paca siwa pona painya tomara beya. Paca cajume acaura. Barapomonae namchi: 'Pana nawi thabare. Matautano paexande pocotsiwa Moisés pia coyenewatha itoroba', jei. Jopa paitorobinyo barapo jume. ²⁵ Daxota be juntucuru pawunaein xua cuita pananta jupaya nanta xeinan. Paitoroban ichamonae pata xainya weya pia paca necataenexa tsane. Napuna ponabe Bernabé Pablono ponbe bichocono paantobein. ²⁶ Baponbe Pablo iru Bernabé muxu pebocaebe xua pebexubiwatsibe pecueicueijeji tsurucuanabiyaexaebe Jesucristo nexa, pon Wanacanamataxeinaein. ²⁷ Paitorobanbe Judas Silasno. Baraponbe saya pia coutha paca tsipaebinabe daxita xua barapo cartatha papaeban painya neyaputaenexa. ²⁸ Paxan iru Nacom pia Pejumope tunaxu tatsi pananta jupaya nanta xeinan xua jopa bepaca itorobichi icha cui coyene po cui coyene bichocono pacata ayapube xua painya neexanaewa tsane. Meisa saya u baxua xua pacata tinatsi po cartathe baxua panantawenoname xua painya neexanaewa tsane. ²⁹ Painya xoba paxaneme pewi po wi jiwi tajeba ibo nacom nexa poxonae tauta barapo duwei xua tuxusi exana barapo ibo nacom nexa. Barichi painya xoba duwei paw xaneme pejanano

po duwei pipato t̄upumena. Matautano ichamonaē painyamonaē jiwana pia xoba nota yab̄uxi powaxi jopa piseurixi tatsi. Icha baraxua panacui barapentsiname xanepanaya pajinompaename. Baja”, jei barapo cartatha.

³⁰ Bernabé ir̄u Pablo, ir̄u Judas Silasno barapomonaeyobe peitorobixaetsi bara Antioquía tomara be-iyiya. Barapo tomarathiya barapomonaeyobe caetuteta pomonaē pejume cow̄ntsiwi. Matautano barapomonaeyobe barapo carta cata barapomonaetha. ³¹ Pomonaē ir̄u pejume cow̄ntsiwixae Jesús bara yoroba barapo carta. Barapomonaē bichocono j̄unt̄u coyene weiweina tsipei barapo cartatha cui matateicaeya yabara paebatsi. ³² Judas ir̄u Silas peitac̄upaexaetsibe xua beta petsipaebiwabe Nacom Pejume Diwesi xua Nacom yaputane exana, daxota j̄unt̄u coyene tsacababe barapomonaetha pomonaē ir̄u Jesús pejume cow̄ntsiwi tatsi xua beta pejinompaewa tsane. Matautano baponbe cui matateicabe. ³³ Barapoyobe barapo pejume cow̄ntsiwitha naecabe caena bayiyo. Barapoxonaē barapomonaē pomonaē pejume cow̄ntsiwixae Jesús barapoyobe j̄unt̄u coyene xanepanaya pu napeyabatsi xua penawibiyaexae caibeya ichaxota werena bayatha pomonaē peitorobirenaexaetsi. ³⁴ Ichitha Silas juntucuru narunta. ³⁵ Pablo ir̄u Bernabé Antioquía tomaratha ecabe. Baponbe ir̄u ichamonaeno pomonaē pinmonaē, daxita barapomonaē cuiduba dubenanaebiya yawa tsipaeba dubenanaebiya Jesús pon Pecanamataxeinaein jiwi pia pexeinya jume diwesi tatsi.

Meje yabara poxonaē Pablo equeicha warapa nacueyatabe po cuiyobetha xua Jesús pia pexeinya jume diwesi tatsi pecueicueijejwa nexa

³⁶ Pirapaeyo icha mataqueitha, Pablo barai, Bernabé baraichi, jeye:

—Antha equeicha Jesús pejume cow̄ntsiwi siwa ponaeinchi daxita j̄upaya tomarantha ichaxota matha cain Jesús pon jiwi Pecanamataxeinaein pia jume diwesi tatsi tsipaebatsibe. Wayaputaenexabe icha metha bara beta jinompa bapomonaē, jei Pablo.

³⁷ Bernabé ichichipa xua puna poinchibe pon Juan, pon icha w̄anno Marcos. ³⁸ Ichitha Pablo jopa ichipaeyo xua pebarū ponaewatsi Juan Marcos tsipei bayatha Panfilia tomaratha Bernabé ir̄u Pablo cuenta ponatsibe. Bayatha Juan Marcos juntucuru jopa benapuna nanacuichiyo Jesús pia pexeinya jume diwesi tatsi. ³⁹ Najume matsontabe. Bernabé ir̄u Pablo naw̄u tsatajopabe. Bernabé tsana barū jopa Marcos. Weratha ponabe Chipre tunaeto beya. ⁴⁰ Barapoxonaē Pablo cuita waba Silas. Antioquía tomaratha pomonaē pejume cow̄ntsiwixae Jesús, Pablo Silasno tatsipaebatsibe Nacomtha xua Nacom peenaenexa peantobexae xua Pablo ir̄u Silas peenaenexatsibe poxonaē cueicueijeibe Nacom Pejume Diwesi. ⁴¹ Pablo ir̄u Silas warapabe Siria nacua beya, Cilicia nacua beyano. Baponbe j̄unt̄u coyene tsacababe pomonaetha pomonaē pejume cow̄ntsiwi Jesús xua beta pejinompaewa nexa.

16

Meje yabara poxonaē Timoteo cueyata, Pablo ir̄u Silas cueyatatsibe

¹ Pablo ir̄u Silas Derbe tomaratha patopabe. Equeicha bapoxonaē Listra tomaratha patopabe. Baraxota Listra tomaratha caxinabe pebin pon pejume cow̄ntsin Jesús. Bapon pew̄n Timoteo. Pena tatsi saya judiomonaewayo. Barapowa ir̄u pejume cow̄ntsiwayo Jesús. Timoteo paxa tatsi griegomonaepin. ² Jesús pejume cow̄ntsiwi, pomonaē jinompa Listra tomaratha, ir̄u pomonaē Iconio tomaratha jinompano, barapomonaē Timoteo beta yabara paebatsi xua pinae pej̄unt̄u coyene xanepanaein. ³ Pablo ichichipa xua bepuna ponaeichatsi Timoteo xua peyawenaenexatsi. Ichitha matha copiya cui itorobatsi Timoteo xua pewi thabinexatsi xua ichaxota nareixacaeca xua ichaxota pebinxae xeina. Pablo baxua exana tsipei jopa ichipaeyo xua judiomonaē anaepana peexanaewa tsainchi xua jopa pewi thabixae tsipaetsi Timoteo. Tsipei Pablo yaputane xua judiomonaē nawita ichaxota poneibinabe. Barapomonaē judiomonaē nawi thabeiba tsipei pia cui. Matautano barapomonaē judiomonaē yaputane xua Timoteo paxa tatsi griegomonaepin. Daxota Timoteo jopa caena bayatha wi thabichi

tsipei canta griegomonaе jopa daxua exaneibiyo. ⁴ Daxita jupaya tomarantha pateiba, Pablono, Silasno, Timoteono. Barapomonaеyobe tsipaebabe pomonaetha pomonaе Jesús pejume cowantsiwi pocotsiwa bayatha Jesús pia peitorobi jiwi tatsi iru pitiri jiwi tina cartatha poxonaе nacaetuta Jerusalén tomaratha pomonaе pejume cowantsiwi Jesús. ⁵ Daxota pomonaе penacaetutsi jiwi bara xanepanaya beta jume cowanta. Daxotano pinmonaе jume cowanta. Daxita matabi mataropeicha pinmonaе tsoponaе xua jume cowantapona Jesús.

Meje yabara poxonaе Pablo camaita Macedonia nacuapin

⁶ Nacom pia Pejumope tunaxu tatsi Pablo jopa copatichi xua pecueicueijiwa tsane Nacom pejume diwesi Asia nacuatha. Daxota Pabloaru Frigia nacua iya pona xuano xua Galacia nacua iya pona. ⁷ Misia nacua iyiya. Baraxotiya bequein ichichipa pata Bitinia nacuatha, ichitha Jesús pia Pejumope tunaxu tatsi apusiwa. ⁸ Daxota Misia nacua iyiya. Troas tomaratha mene itapatha pata. ⁹ Baraxota merawi Pablo camaita pebin pon Macedonia nacuapin. Bapon Macedonia nacuapin nantacotuncua. Pablo jume daunweya wabatsi: “¡Anetha denande! Macedonia nacua berena. ¡Pana yawende!” jeichichi Pablo. ¹⁰ Pablo camaita bapon, daxota paxainxainyan xua pata warapaenexa Macedonia nacua beya. Iru xan, Lucas tsocuaein, naponan. Paxan tsipei payaputan xua bara Nacom pana itoroba barapo nacuatha xua pata cueicueijiwa tsane Jesús pia pexeinya jume diwesi tatsi.

Meje yabara poxonaе Pablo iru Silas Filipos tomaratha ecabe

¹¹ Jeratha pawarapan, po naetha po nae pin nae. Paponarucupan Troas tomara mene itapa weya. Weratha bopiya payiyan petunaeto cacuitiya Samotracia tunaeto. Icha mat-acabitha papatan Neápolis tomaratha. ¹² Equeicha baxotiya Filipos tomara bepaiyan, po tomaratha xua romanomonaе cueranta ena. Barapo Filipos tomara yatsicaya pepa tomara, pepa Macedonia nacua. Baraxota ainya matababin paenan. ¹³ Caentacabi, po matababi pentaquei seicae matababitha, tomara pepuya beya paponan mene itapa beya, ichaxota judiomonaе Nacom wunqueiba. Paenan baraxotiya. Jesús pejume diwesino pacueicueijan yabuxitha powaxi xua cou bayatha nacaetuta. ¹⁴ Barapowaxi caewayo jiwana pana jume tane. Barapowa pewan Lidia, Tiatira tomarapiwayo. Bapowa caenaeteiba papaburu, po papaburu mu tsofia po papaburu ainya matoman. Barapowa wunaе jainteiba Nacom. Barapowa beta jume tane pocotsiwa Pablo paeba. Nacom pon jiwi Pecanamataxeinaein, barapowa icha juntu coyene cana exanatsi xua peexanaenexa pocotsiwa Pablo paeba. ¹⁵ Barapowa bautisabatsi, yawa piamonaе matabuxuyo tatsi bautisabatsi. Bapoxonaе bapowa pana barai, jeye:

—Icha bara metha xaniwaicha pananta xename xua Jesús tajume cowantsiwayo, pon jiwi Pecanamataxeinaein, nexata antha tabotha pamaire, pana nejei Lidia.

Pecono jumeyotha pana barai, bepa pinae xua pia botha pamaichin.

¹⁶ Icha matabaetha poxonaе namtotha paenaponan xua poxonaе paponan ichaxota jiwi wunqueiba Nacomtha, baxota yabuyo pacaxinan namtotha. Barapowayo cauri xeina. Barapowayo pebusi cui taetaewayotsi xua amanaya petanacuichiwa pia pentacaponaein nexa. Matautano barapowayo paratixi caetuba pia pentacaponaein tatsi nexa xua bapowa pecueicueiji tsaibixae pocotsiwa cauri yaputane exana. ¹⁷ Barapowa, Pablo, iru paxan pana pu wabapona. Bapowa wawaya namchi, jeye:

—¡Barapomonaе tanacuita Nacom nexa, po Nacom itabocotha eca! ¡Paca muxu tsipaeba Nacom pia pecapanenebiyae diwesi! jei barapowayo.

¹⁸ Bapowa baxua exaneiba ainya matababin. Pablo amuxufaetabi. Pablo barapowa taitaweta cauri. Pablo cauritha namchi, jeye:

—Jesucristo wantha caitawetatsi. Naetsiriware. Xubariware bapowayo, jei Pablo.

Bara caena barapowayo copatabatsi cauri.

¹⁹ Barapoxonaе yabuyo cui tainchi pia pentacaponaeiwichi tatsi xua equeicha jopa amanaya tacaetubi tsane paratixi barapomonaе nexa. Daxota Pablo Silasno

waetabatsibe. Pematacaitorobi bicheito jiwi peitabaratha capoinchibe tomara panatha. ²⁰ Barapomonaе Pablo iru Silas cuaranotatsibe peitabaratha tatsi pomonaе jiwi peyabara paеbiwi xua penatsicuentsiwa xua abe peexanaexae. Barapomonaetha jeye:

—Baponbe judiomonaе jitonbe, watomaratha baponbe wamonaе cui tsacabatsi xua najume matsontsonoba. ²¹ Baraponbe pia cui coyeneya naca cuiduba. Barapo coyene jopa becopatichi xua wajume taenexa xuano xua waexanaenexa, tsipei romanomonaetsi, jei barapomonaе.

²² Bara nexata Pablo iru Silas baru anaepanarucupatsibe jiwi. Matautano pomonaе jiwi peyabara paеbiwi xua penatsicuentsiwa xua abe peexanaexae, barapomonaе ichamonaе cui itorobatsi xua Pablo iru Silas pema xuenaxubinexatsibe paparuwa, bapoxonaе xua pecuainchinexatsibe iwatontha. ²³ Matha bichocono cuaintatsibe. Bapoxonaе caponatsibe jiwi pecubi bo beya. Pon peyabara equeibin pomonaе cubebatsi jiwi pecubi botha bapon cui itorobatsi jeichichi: “Beta yapu eenare, xua jopa penaetsiriwanexabe”, jeichichi barapon. ²⁴ Poxonaе bapon jume tane pocotsiwa pentacaponawewi cui itoroba, bapoxonaе po tutu taju beya baxota Pablo iru Silas cuaranoyatsibe. Bichocono naepawatha taxu cateitabetatsibe jiwi petaxu cateibabi naewatha.

²⁵ Papaetha Pablo iru Silas Nacomtha tsipaebabe yawa Nacom pijume weino naxunabe. Ichamonaе baraxota cubebatsi jiwi pecubi botha. Barapomonaе Pablo iru Silas jume tayenatsibe. ²⁶ Barapoxonaе jemeicha bichocono jijiyataxuba. Ibowano jijiyataxubano xua bomuxu peyutanotsiwa. Bapoxonaе jemeicha nainya saya dubenanaya peboupan. Matautano pomonaе jiwi pecubi botha jebatsi daxita taxu nain sarababatsi. ²⁷ Pon peyabara equeibin pomonaе cubebatsi, bapon nacosataxuba. Bapon tane xua barapo jiwi pecubi bo saya peboupa umenarucupa. Bapoxonaе pia cusi namara jonta. Muxu penabexubi, tsipei bapon nanta xeina xua bara daxita panenebiya, Pablo, Silasno iru ichamonaeno. ²⁸ Ichitha Pablo waba bapon pon peyabara equeibin pomonaе cubebatsi jiwi pecubi botha, jeye:

—Jopa jinya coutha nabexubinde, tsipei apara cataunxuae xote pajinompan! jei Pablo.

²⁹ Nexata pon peyabara equeibin pomonaе cubebatsi jiwi pecubi botha, wawaya namchi, jeye: “Painta itanatabare”, jei. Jijiyeya cuinaepondena. Pablo iru Silas imoxoyo petaxutha pentabocototha caquita tauncuatabatsibe. ³⁰ Bapoxonaе bapon pon peyabara equeibin pomonaе cubebatsi jiwi pecubi botha, bapon Pablo iru Silas pesato becayatsibe. Pablo iru Silas baraichichibe, jeye:

—Ja, zeta bichocuaein tsane xua tana necapanepaewa tsane Nacom beicha? jei bapon.

³¹ Pablo iru Silas jume notabe, jeye:

—Jume cowunde Jesús pon jiwi Pecanamataxeinaein, bapoxonaе necapanepae jitom tsane iru jinyamonaе matabuxuyo pecapanenebiyae jiwi tsainchi, jeibe.

³² Tsipaebabe bapontha, Jesús pon jiwi Pecanamataxeinaein, pia pexeinya jume diwesi tatsi. Matautano tsipaebabe piamonaе matabuxuyo jiwitha tatsi, pomonaе pia botha petaenaexaetsi. ³³ Caena barapoxonaе, pon peyabara equeibin pomonaе cubebatsi jiwi pecubi botha, Pablo, iru Silas wan quiatatsibe. Bapoxonaе bapon bautisabatsi iru piamonaе matabuxuyo tatsi bautisabatsi. Pablo, iru Silas bautisababe. ³⁴ Bapoxonaе Pablo iru Silas bo beya caponatsibe. Pexaewa catatsibe. Bapon piamonaе matabuxuyo tatsino bichocono juntu coyene weiweina pejume cowuntsixae Nacom.

³⁵ Pomonaе jiwi peyabara paеbiwi penatsicuentsiwa xua abe peexanaexae, barapomonaе caemambotha itoroba, policiamonaе itorobatsi ichaxota pon peyabara equeibin pomonaе cubebatsi jiwi pecubi botha. Bapon copatatsi xua bara Pablo iru Silas pepu copatsinexatsibe. ³⁶ Nexata pon jiwi peyabara equeibin pomonaе cubebatsi jiwi pecubi botha, bapon Pablo baraichi, jeye:

—Pomonaе jiwi peyabara paеbiwi penatsicuentsiwa xua abe peexanaexae, barapomonaе necui itoroba xua tapaca isanaxubiwa tsainchibe. Bara paca itacupabe xua bara papu seicaenamebe, jei bapon.

³⁷ Ichitha Pablo barai policiamonaetha, jeye:

—Apara barapomonaе pana cuainta pepa bicheito peitabaratha. Dacotsiwa barapomonaе abe painta exana. Seicaya apara romanomonaе pan. Copiya matha jopa pana caponaeyobe ichaxota pon jiwi peyabara paebin xua penatsicuentsiwa xua abe peexanaexae. Saya barapomonaе pia coutha paeba xua abe paexananbe. Daxota jiwi pecubi botha pana caponabe. Deta aena poxonaе juntucuru pana isanaxubapaebabe moya namicha pana itorobabe. Pentacaponaeви patsipaebare, pomonaе pana cuainta, bu jame barapomonaе pia coutha pana nepu sotababe, jei Pablo.

³⁸ Baxua policiamonaе bayatha jume yopita pomonaetha pomonaе jiwi peyabara paebiwi xua penatsicuentsiwa xua abe peexanaexae. Barapomonaе bichocono junuwa poxonaе jume tane xua Pablo iru Silas apara romanomonaepinbe. ³⁹ Barapomonaе ponarucupa jiwi pecubi botha, Pablo, iru Silas siwa poinchibe peuraxae xua bayatha Pablo, iru Silas cuaintatsibe. Barapomonaе Pablo iru Silas tsipaebatsibe, jeichichibe: “Maisa paauran tsipei abe paca exanatsibe. Moya paponarebe. Jopa po tomarathe paecaeindebe. Jopa pana neyopichinde”, jei. ⁴⁰ Poxonaе Pablo iru Silas jiwi pecubi bo wenaetabiyabe, Lidia pia bo tatsi be-iyabe. Siwa ponabe pomonaе pejume cowuntsiwixae Jesús. Barapomonaetha baponbe juntu coyene tsacababe xua xanepanaya pejinompaewa tsane. Bapoxonaе bara wewarapiyabe.

17

Meje yabara poxonaе Tesalónica tomarapiwi namtsebiya anaepanaya wawai xua Pablo, iru Silas pecasebixaetsibe

¹ Pablo iru Silas Anfípolis tomara iyabe. Apolonia tomara iyabeno. Barapoxonaе Tesalónica tomaratha patopabe po tomara ichaxota judiomonaе pia penacaetutsi bo tatsi uncua. ² Pablo pia cui xeina xua judiomonaе pia penacaetutsi bontha tatsi pateiba. Daxota baxota eca acoibi po semanabe. Matautano daxita pentaquei seicaе matabintha barapo judiomonaе pia penacaetutsi botha Pablo iru Silas cuidubabe. ³ Pocotsiwa Nacom Pejume Diwesi paeba, baxua Pablo tsipaeba po coyene xua pinaе pon Mesías bewa bexubinchi ichamonaе, xuano xua pinaе bapoxonaе equeicha asu tsane. Pablo jeye barapomonaetha:

—Pon xua Jesús xuaunxuae yabara paca muxu tsipaebatsi, bapon apara bara Mesías, jei Pablo.

⁴ Ichamonaе, judiomonaе jume cowunta. Barapomonaе Pablo, iru Silas caemonaе naexanatsibe. Barichi pin bicheiton griegomonaе jume cowuntaru, pomonaе Nacom wunaе jointatsi. Barapomonaе jume cowunta Jesús. Iraru ainya yabaxi bicheiton jume cowunta Jesús powaxi baru cui itura jineibatsi xua jiwi baru cui itura jineiba. ⁵ Ichitha icha judiomonaе pomonaе jopa pejume cowuntsiwi, baxua yabara uwa. Daxota barapomonaе pebiwi baru nacaetuba po pebiwi peajuntucoyenyapubewi xua po pebiwi saya pejinompaewi namtontha. Daxita barapomonaе namtsebiya wawai tomaratha. Jasón pia botha tatsi anaepanaya jojoniya xua Pablo iru Silas pejeichinexatsibe xua pewaetabinexatsibe xuano xua pecaenaetsinexatsibe jiwitha. ⁶ Ichitha baxota Pablo iru Silas jopa taebichibe. Daxota catsaya waetabatsi Jasón, iru ichamonaе pomonaе pejume cowuntsiwixae Jesús. Pablo iru Silas waetabatsibe. Daxita barapomonaе pentacaponae jiwitha becayiyatsi. Daxita barapomonaе yabara wawaichiya jeichibe:

—¡Barapo pebinbe daxita nacuantha abe paeba ducuaebiyabe yawa waxainya becu joparenabe! ⁷ Jasón barapomonaе matenta weiweinaya waba pia botha. Jasón pia botha maitecabe. Daxita Pablobaru jopa exanaeyo po peitorobi coyenewan xua pon romanomonaе itorobiya pia pepa peewatsinchi itoroba. Matautano barapomonaе paeba xua pinaе ichun popona pon jiwi itorobiya pia pepa peewatsinchi, bapon pinaе Jesús, xua jopa yabara cananta xeinaetsi pon romanomonaе itorobiya pia pepa peewatsinchi, jei barapomonaе xua namtsebiya wawai.

⁸ Poxonae baxua jume tane, pentacaponae iru pomonae xua baxota umena, daxita barapomonae anaepanaeya namtsebiya wawai. ⁹ Barapo pentacaponae wecobe nota paratixi xua Jasón iru pomonae pejume cowantsiwi wecobe notatsi. Barapo pentacaponae namchi xua pinae equeicha caewa catsinchi Jasón barapo paratixi poxonae Pablo baru tomara weya ponaena. Bapoxonae pentacaponae Pablo baru pu sorobabatsi pewarapaenexa tsane tomara weya.

Meje yabara poxonae Pablo iru Silas Berea tomaratha poponabe

¹⁰ Barapo merawitha pomonae iru pejume cowantsiwixae Jesús, barapomonae Pablo, iru Silas itorobatsibe xua nainya pewarapaenexabe Berea tomara beya. Poxonae barapo tomaratha patopiyabe judiomonae pia penacaetutsi botha tatsi jonyabe. ¹¹ Judiomonae, pomonae Berea tomarapiwi, barapomonae pejuntu coyene xanepanaewi icha be jopa Tesalónica tomaratha ichiyo. Jame barapo Berea tomarapiwi bara xanepanaya jume tane Jesús pejume diwesi. Daxita matabi barapomonae Nacom Pejume Diwesi yorobeiba pia yaputaetsi barapo diwesi, po diwesi xua Pablo iru Silas paebabe icha metha baraxua bara xainyeibe. ¹² Daxota pinmonae jume cowanta Jesús. Judiomonae jume cowanta Jesús. Iru griegomonae jume cowantano, yabuxi, iru pebiwi. Powaxi jume cowanta Jesús, barapowaxitha jiwi baru cui itura jineiba. ¹³ Judiomonae, Tesalónica tomaramonae, jume tane xua Pablo cuiduba Nacom Pejume Diwesi Berea tomaratha. Daxota bapomonae Berea tomara be-iyiya. Baxotiya barapomonae namtsebiya wawai xua Pablo iru Silas pecasebixaetsibe. ¹⁴ Ichitha pomonae pejume cowantsiwixae Jesús, Pablo itorobatsi xua nainya peponaenexa imoxoyo mar mene beya poxonae cataunxuae Silas iru Timoteo ecabe Berea tomaratha. ¹⁵ Pomonae Pablo cueyabatsi barapomonae Pablo punaxubathopatsi Atenas tomaratha. Barapomonae equeicha caibe nawibiya Berea tomara beya. Barapomonae Silas iru Timoteo tsipaebatsibe xua Pablo najume caruta xua bepa pinae Silas iru Timoteo nainya patopaenabe Atenas tomaratha.

Meje yabara poxonae Pablo Atenas tomaratha popona

¹⁶ Pablo ewata, Silas iru Timoteo ewatatsibe Atenas tomaratha. Barapoxonae barapo tomaratha Pablo tane xua barapomonae ainya ibo nacomun xeina. Daxota bichocono yabara najuntu coyene exaba. ¹⁷ Daxota Pablo tsipaeba Nacom Pejume Diwesi judiomonaetha judiomonae pia penacaetutsi botha tatsi. Matautano baxotano tsipaeba pomonae bequein jopa judiomonae naexanaeyo, barapomonae Nacom wuna jaintatsi. Barichi daxita matabi pomonae Pablo caxibeiba pomonae nacaetuteiba tomara pin panatha barapomonaethano Pablo cuidubeiba Nacom Pejume Diwesi. ¹⁸ Barichi griegomonae ichichipa xua pejume taewa pocotsiwa Pablo paeba. Ichamonae griegomonae itapeta jume cowanta pocotsiwa epicureomonae cuiduba. Iru ichamonae griegomonae itapeta jume cowanta pocotsiwa estoicomonae cuiduba. Barapomonaebe Pablo tsipaeba. Bapoxonae ichamonae Pablo yabara jeichichi, jeye:

—¿Eta xua bapon naca barai tsipae, pon xua jopa juniya cueicueijejei tsabiyo? jei.

Ichamonae jeye:

—Mexeya maisa bapon cueicueijejei pia nacomun nexa, jei.

Barapomonae baraxua paeba, tsipei Pablo Jesús pia pexeinya jume diwesi paeba ducuaenabiya, matautano poxoru paeba xua Jesús equeicha pinae asu. ¹⁹ Nexata ichamonae Pablo teicatsi pecaponaenexatsi atororotha ichaxota ba pentacaponae nacaetuteiba, poxonae ichauxi muxu peexaneibi. Barapo pentacaponae matabuxayo pewun Areópago, Pablo yainyabatsi, jeichichi:

—Pana netsipaebare bepayabara yaputaen po diwesi xua cuidubiya paeba ducuaenabiya. ²⁰ Xuaunxuae pana tsipaebame, barapo diwesi jopa payaputaenyo bayatha. Pata bequein yabara yaputaetsi xua po diwesi baxua yabara caunuta, jei barapomonae.

²¹ Atenas tomaramonae iru pomonae penanapaincha jinompaewi xua icha nacua werena peponaewi, pomonae anoxuae jinompa xote, daxita barapomonae u saya

pepaebibi. Yawa saya ɱ cou paebiba poxonae pena jume jume taiba, saya baxua paebiba.

²² Nexata Pablo Areópago wɱn matabɱxɱyo peitabaratha tatsi asiya uncuataba. Pablo namchi, jeye:

“Paxam Atenas tomaramonae pam. Bara paca cui yaputainchi xua painya nacomɱn wɱnae pajaintame. ²³ Poxonae ponan ichaxota painya nacomɱn wɱnae pajaintathopeibame tan ainya ibo nacom matabon. Matautano tan baxota, ichaxota nacom wɱnae pajaintame, xua cou ichaxota pocotsiwatha xua be pexaethopaewa xua ichaxota duwei patautathopame baxua cou panta tinadutame. Baxua panamchim couje: ‘Barapo nacom xua pon jiwi jopa yaputaeyo’, pajam. Xuaunxuae cou asiya pawɱn dutame pon, bapon, apara pepa Nacom. Xuaunxuae po diwesi yabara paca tsipaebatsi, barapon pejume diwesi apara.

²⁴ “Barapon pon pepa Nacom, daxita barapo ira exana. Daxita carepaya jɱpaya exana. Barapon pon pia coya peewatsin barapo susato nacuano, yawa barapo itabocono. Po bon patsiacabeibame Nacom xua po botha jiwi wɱnae pejaintithopeibinexa Nacom, apara ba Nacom jopa poponaeyo barapocotsi botha. ²⁵ Xua pocotsiwan jiwi taexana Nacom nexa, baraxua Nacom jopa nantawenoneibiyo. Barapo Nacom saya pia coutha daxita nacata exana. Peayapusɱwano, naca cata. Daxita barapo petusato tutu joibo naca cata. Baxuan daxita amanaya saya nacata exana. Daxita ichauxino muxuna exanano.

²⁶ “Copiya meisa bapon Nacom compa exana pebin, bara caein. Barapo cae janatha daxita yanacua exana jiwi. Daxita wɱnae tsiwanaeya yaputaneno poxonae naexanaena daxita jiwi. Matautano yaputane xua eta po weiyobetha jinompaena. Matautano yaputane xua pia iranthea bea naexanumenaponaena. ²⁷ Icha pebin cuita cananta xeinaetsipa Nacom, bara Nacom cana exanaetsipa xua bapon bara Nacom pejume cowɱntsiwa tsainchi. Nacom jopa tajɱ ecaeyo ichitha bara waxantha imoxoyo popona.

²⁸ Nacom pepoponaexae daxota asɱ jinompatsi. Nacom naca exana, daxota beta nacuiyenabatsi, yawa daxota wacobexitha ɱ waexanae. Ichaunxuae ichin xua paca tsipaebatsi barichi painyamonae baxua paeba pomonae diwesi petinaewi poxonae jei, ‘Nacom apara pia jiwichi waxainchi’, jei. ²⁹ Waxainchi Nacom pia jiwichixaetsi, daxota jopa bewa nanta xeinaetsi xua Nacom po Nacom pepa Nacom, apara jɱpa po nacomɱn jiwi exana pecobetha. Barapo nacomɱn po nacomɱn xua jiwi cana exana xua oro nainton yawa xua plata nainton yawa xua ibowan, saya jiwi pia coyene cuirutha nanta xeina xua peexanaewa barapo nacomɱn. ³⁰ Matha copiya bayatha Nacom saya beitatemaya tane jiwi abe pia peexanaewan tatsi, tsipei barapomonae jopa yabara yaputaeyo pocotsiwa Nacom ichichipa. Ichitha matapainya anoxuae daxita jiwi Nacom cui itoroba xua petsita xeinaenexatsi icha jɱntɱ coyene, xua jopa equeicha peexanaenexa abe peexanae coyene. Saya ɱ penanta xeinaenexa tsane pocotsiwa Nacom ichichipa. ³¹ Nacom matababi wɱn duta xua po matabaetha tsane Jesús caetucaetutetsina daxita jiwi pia peitabaratha. Barapo matababitha tsane Jesús xaniwaicha yabara paebina daxita jiwi xua penatsicuentsiwa xua abe peexanaexae. Pomonae xua abe exana itawetsinchi, pomonae xua wɱnae exana jopa itawetsi tsainchi. Nacom itapeta, xua Jesús tsiitapetatsi barapo penacuichiwa tsipei Jesús saya xaniwaicha pepaebin. Poxonae Nacom Jesús asɱ exanatsi petɱpaewitha, Nacom naca tsita itapeinya xeina xua apara Jesús tsiitapetatsi barapo penacuichiwa”, jei Pablo.

³² Poxonae barapomonae Pablo jume tainchi po coyene xua equeicha petɱpaewi pinae asɱ tsaibi tsane, ichamonae Pablo jume cui caponatsi nawita. Ichamonae namchi, jeye:

—Bexa paca jume tainchi equeicha xuaunxuae paebame, jeichichi Pablo.

³³ Nexata Pablo cuenta ponataba barapomonae. ³⁴ Ichitha ichamonae Pablo puna poinchi yawa bapomonae Jesús jume cowɱntatsi. Ichɱn barapomonae jiwana pewɱn Dionisio. Bapon Dionisio Areópago wɱn matabɱxɱyo jiwanaɱin. Petsiriwa powa irɱ napona powa irɱ pejume cowɱntsixae Jesús, bapowa pewɱn Dámaris. Ichamonae irɱ napona pomonae irɱ Jesús pejume cowɱntsiwichi.

18

Meje yabara poxonae Pablo Corinto tomaratha popona

¹ Pirapae equeicha Pablo Atenas tomara wewarapiya. Corinto tomara bewarapiya. ² Baraxota Pablo caxina judiomonaepin, pon pewun Aquila. Bapon Ponto nacuapin. Piowa tatsi pewun Priscila. Piseuribe mexuaetha Italia nacia wewaraparenabe, tsipei pon romanomonae itorobiya pia pepa peewatsinchi pon pewun Claudio, bapon judiomonae daxita itorobatsi xua pewarapaewa tsane barapo Roma tomara weya. Daxota Corinto tomaratha patopabe. Pablo siwa pona, Aquila petsiriwano siwa poinchibe. ³ Pablo naeca Aquila pia botha tsipei bapon pia penacuichiwiyo iru xeina icha Aquila piawabe ichi. Pia penacuichiwiyo xeina xua chivo boco bouton exana. Aquila piowabe nacuitabe, iru Pablo piawa nacuita. ⁴ Daxita matababi, po matababintha pentaquei seicae matababintha Pablo poneiba judiomonae pia penacaetutsi botha tatsi. Baxota Pablo jume daunweya cueicueijeji pomonaetha pepa judiomonaetha iru pomonaetha jopa judiomonae naexanaeyo. Pablo cueicueijeji barapomonaetha tsipei ichichipa xua barapomonae Jesús pejume cowuntsiwa tsainchi.

⁵ Poxonae Silas iru Timoteo Macedonia nacia wepatoparenabe, barapoxonae daxita matababintha Pablo cuidubeiba judiomonaetha. Pablo paeba xua pinae pon Jesús jeichichi xua apara pinae bapon apara bara Mesías, pon xua pinae barapomonae pewunaewatsixae. ⁶ Barapomonae tamropata pitaba xua Pablo abe yabara paebatsi yawa tsumu jume baru paebatsi. Nexata Pablo pepatomeicha nama paparuwa nunutaba. Baxua exana poxoru barapomonae anthuetafiya jume tane. Pablo barai barapomonae, jeye:

—Bara apara painya coutha icha pana natsicuentame xua daxota poxonae paweraweracaename. Jopa tacouthinyo xua jopa paxeinaem tsane peajuntucuiyapusuwa, tsipei bayatha yabara paca tsipaebatsi barapo peajumeyapusu diwesi. Tha anoxuae Nacom Pejume Diwesi caponaetsi pomonaetha pomonaetha jopa judiomonaetha naexanaeyo, jei Pablo.

⁷ Barapoxonae Pablo judiomonaetha pia penacaetutsi bo tatsi wewarapiya. Pablo pona Justo pia bo beya tatsi. Bapon Justo, icha wun xeina, Ticio baraichi. Bapon wunaewatsixae pejainteibin Nacom. Bapon yabo uncuwa ichaxota imoxoyo judiomonaetha pia penacaetutsi bo tatsi peuma werena. ⁸ Iru Crispo, pon judiomonaetha pia penacaetutsi bo peyapucauncuaein, bapon piamonaetha matabaxoyo baru jume cowunta Jesús pon jiwi Pecanamataxeinaein. Barichi pinmonaetha pomonaetha Corinto tomaratha jinompa poxonaetha jume tane Nacom Pejume Diwesi, bapomonaetha iru jume cowunta Jesús. Pomonaetha pejume cowuntsiwi barapomonaetha daxita bautisabatsi. ⁹ Barapoxonae Pablo merawi camaituncua Nacom pon Pecanamataxeinaein jiwi. Pablo baraichichi, jeye: “Jopa junuwinde. Nacom Pejume Diwesi paeba ducuaenaebiyama. Jinxoba moyam. ¹⁰ Tsipei apara, xan cabaru popoinchi, daxota ichamonaetha jopa itacupaetsi xua abe necaexanaewa. Barapo tomarathe tamonaetha, pinmonaetha apara inta jinompa”, jei Jesús. ¹¹ Pablo baxota popona dieciocho po xometiyobe Corinto tomaratha. Baxota Pablo cuiduba ducuaenaebiyama Nacom Pejume Diwesi.

¹² Iruu pebin popona pon pewun Galión. Bapon Galión Acaya nacuapiwi pia peyanacua ewatsinchi exanatsi. Barapoxonaetha judiomonaetha pomonaetha Acaya tomarapiwi nacaetuta Pablo yabara nacaetutatsi pecasebixaetsi xua pecaponaenexatsi Galión peitabaratha tatsi. ¹³ Judiomonaetha namchi, Galión baraichi, jeye:

—Poxonaetha bapon Pablo paeba ducuaenaebeyiba pinmonaetha baraxua jume jejei tsaibi. Pablo cuidubeiba jiwi, xua pinae jame bewa jiwi wunaewatsixae jainteibi Nacom po coyene jopa jupaeyo Moisés pia peitorobi coyenewa tatsi, jei barapomonaetha.

¹⁴ Pablo bara muxu pepaebi, iru Galión paebaxoyaru. Nexata barapon namchi judiomonaetha baraichi, jeye:

—U judiomonaetha pam. Painya xoba pana tsipaebame. Jame icha bapon caiba, icha jiton bexotsi, icha ichawiyobe exana xua abe, metha jame barapoxonaetha paca jume jejei

tsipaetsi. Ichitha bapon jopa abe exanaeyo. ¹⁵ Saya ɯ payabara cueicueijam tsaibi barompaya painya cui xua painya amo jiwi pia cui coyeneya tatsi. Moya baxua paxam paexande pocotsiwa Pablo payabara paebame. Tsipei jopa bepacata naexanaetsi be pon jiwi peyabara paebin xua penatsicuentisiwa xua abe peexanaexae. Moya painya coutha pacui itawere, jei Galión.

¹⁶ Bapoxonae Galión pesato benapuna torobabiya barapo judiomonae. ¹⁷ Bara nexata daxita judiomonae Sóstenes waetabatsi pon judiomonae pia penacaetutsi bo tatsi peewatsin. Barapomonae Sóstenes butsi Galión peitabaratha tatsi. Daichitha baxua Galión saya cui tane, jopa tsita ainya cuichi.

Meje yabara poxonae Pablo equeicha Antioquía tomara beya caibeya warapa. Baxotiya tamropata pitaba xua warapa acoibi po cuiyobetha xua pecueicueijeinexa Jesús pia pexeinya jume diwesi tatsi

¹⁸ Pablo awiya came baxota popona ainya maticabin Corinto tomaratha. Bapoxonae nama copiya napeyaba pomonae pejume cowantsiwixae Jesús. Siria nacua bewarapiya weratha, po naetha po nae pin nae. Aquilano piowabe naponabe. Barapoxonae juntucuru bara ponatabichiba copiya matha nanta catepateya sibaxuba Cencrea tomaratha xua penayabara tsita itapeinya xeinaenexa xua nayabara jume cui wetsina xua exanaena xua bayatha Nacomtha nayabara tsiwɯnae muxu duta. ¹⁹ Bara Efeso tomaratha patarɯcupa. Baxota Pablo Aquila piseuribe xubetatsibe pia ponaetsi ichaxota judiomonae nacaetuta barompaya pia penacaetutsi botha. Baraxota Pablo barɯ cueicueijei barapo judiomonae. ²⁰ Efeso tomarapiwi bequein Pablo apusiwatsi xua abɯ pecaewa tsane. Ichitha Pablo juntucuru jopa beecaeyo baxota ainya maticabin. ²¹ Nexata Pablo napeyaba barapomonae. Pablo namchi, jeye: “Tha nama Jerusalén tomara beequiyaetsi. Tha naewatequiyaetsi xua jiwi petsinacaetutsinexa pexaewa xua penabanaewa. Metha equeicha paca taeyoparenaeinchi icha Nacom metha newɯnae ichipaena”, jei Pablo.

—Bara warapataba Pablo. Efeso tomara wewarapiya jeratha po naetha po nae pin nae. ²² Poxonae Cesarea tomaratha patopa Jerusalén tomara be-iyá, pia jacobichi pomonae Jesús pejume cowantsiwichi. Bapoxonae equeicha Antioquía tomara bewarapiya. ²³ Poxonae bara juntucuru yaainya merawin jopa baxotiya equeicha icha nacuabe bewarapiya. Galacia nacua bewarapiyano. Frigia nacua bewarapiyano. Baxota Jesús pejume diwesi cuiduba Pablo pomonaetha pomonae Jesús pejume cowantsiwi. Pablo jɯntɯ coyene tsacaba xua barapomonae ajɯntɯyapɯsɯya pejume cowantaponaewa tsane Jesús.

Meje yabara poxonae Apolos Nacom Pejume Diwesi cueicueijei Efeso tomaratha

²⁴ Caecin judiomonae jiwana-pin Efeso tomaratha patopa. Bapon pewɯn Apolos. Bapon seicaya irɯ Alejandría tomarapin. Bapon Nacom Pejume Diwesi peyaputaecin yawa beta cacueicueijei barapo diwesi. ²⁵ Apolos beta yabara cuidubatsi ichamonae xua Jesús, pon Pecanamataxeinaein jiwi, pia cui. Jɯntɯ coyene weiweinaya paeba. Xaniwaicha piamonae cuiduba Jesús yabara bequein saya yaputane xua po coyene pinae Juan pebautisabiwa jiwi xua icha jɯntɯ coyene pexeinaenexa Nacomtha. ²⁶ Apolos judiomonae pia penacaetutsi botha tatsi bichocono jɯntɯ coyene wɯnaeya cueicueijei Nacom Pejume Diwesi. Priscila, Aquila piowabe jume tanebe bapon. Wababe bapon, pia bo becayabe. Aquila, Priscila pia pebinbe yabara muxu tsidutabe icha diwesi xua Nacom pia pepa diwesi po diwesi xua jopa yaputaeyo. ²⁷ Apolos ichichipa xua peponaewa Acaya nacua beya. Bapoxonae pomonae pejume cowantsiwixae Jesús, Apolos canatsiwana tinaxotsi carta xua tatinatsi pomonae pejume cowantsiwixae Jesús. Daxota barapomonae tatina xua Apolos pententa weiweinaya wabinexatsi. Poxonae Apolos patopa Acaya nacuatha, bapon yawena pomonaetha pomonae bayatha Nacom jume cowantatsi pomonae Nacom peantobexae. ²⁸ Apolos daxita jiwi peitabaratha jume amanayaba poxonae Jesús beta yabara paebatsi. Daxota barapomonae judiomonae jopa itacɯpaetsi xua pejume notsiwatsi bapon po coyene xua poxonae bapon abe pepaebiwa.

Poxonae Apolos yoroba Nacom Pejume Diwesi bapon tsita itapeinya xeina xua Jesús apara Mesías pon Nacom itorobica.

19

Meje yabara poxonae Pablo Efeso tomaratha popona

¹ Poxonae Apolos Corinto tomaratha eca, bapoxonae iru Pablo seicaya ducuaenaebiya daxita tomaran jupaya, po tomarantha ichaxota atororon. Efeso tomaratha patopa, baxota Pablo caxina ichamonae pomonae Cristo pejume cowantsiwichi. ² Pablo yainyaba barapomonae, jeye:

—¿Bayatha Nacom pia Pejumope tunaxu tatsi painya juntu coyenetha pacata pata poxonae pajume cowantame Jesús? jei.

Barapomonae Pablo jume notatsi, jeye:

—Jume, jopa payaputaeyino. ¿Eta pocotsiwara xua Nacom pia Pejumope tunaxu tatsi? Bayatha jopa payabara jume taeinyo baxua, jei.

³ Pablo yainyaba, jeye:

—¿Eta pabichim poxonae pajume cowantame poxonae paca bautisaba? jei.

Pablo jume notatsi, jeye:

—Apara saya payabara jume cowantan xua Juan cuiduba, po coyene xua Juan itorobatsi xua jiwi pebautisabiwatsi, jei.

⁴ Pablo jume nota, jeye:

—Aja, Juan bautisaba pomonaetha pomonae abe pia peexanae cuiru coyenein nacui barapenta xua pomonae pejume cowantsiwichi Nacom. Daxota metha Juan piamonaetha barai: ‘Pajume cowunde pon xua tsiwana patopan’, jei Juan piamonaetha. Xua Juan namchi: ‘Pon xua tsiwana patopan’, jei, bapon apara Jesús, pon ‘Mesías’ baraichi, jei Pablo.

⁵ Poxonae baraxua Pablo jume taerucupatsi, caena barapomonae bautisabatsi Jesús pia pewantha tatsi pon Pecanamataxeinaein jiwi. ⁶ Poxonae Pablo barapomonae pecobetha mata jayaba, barapoxonae barapon Nacom pia Pejumope tunaxu tatsi barapomonae tapatatsi pejuntu coyeneintha, yawa cueicueijeji exanebatsi icha jumeintha xua ichamonae pia jume tatsi. Matautano barapoxonae barapomonae cueicueijeji Nacom Pejume Diwesi pocotsiwa Nacom yaputane exana. ⁷ Daxita bapomonae pomonae baxota ena doce pomonae matabuxuyobe pomonae xua Jesús pejume cowantsixaetsi.

⁸ Baxota Efeso tomaratha, Pablo judiomonae pia penacaetutsi botha tatsi poneiba acoibi po xometiyobetha Nacom Pejume Diwesi pecueicueijejiwanexa. Bapon jopa junuwiyo poxonae cueicueijeji. Matautano yabara tsipaeba po coyene Nacom waba jiwi petanaexanaenexatsi piamonae tatsi pomonae itorobiya peewatsixae. ⁹ Ichitha ichamonae aichaxaibi jume tane. Jopa juntucuru bejume cowantsiyo. Saya barapomonae jiwi peitutha tatsi abe yabara paeba Jesús pia pena pecuidubiwa tatsi. Nexata barapomonae pia xainya weya tatsi Pablo napitaba. Saya meisa baru pona pomonae Jesús pejume cowantsiwichi po bo penacuidubi bo beya. Pebin pon pewun Tirano barapo bo, bapon pia bo tatsi. Barapo botha Pablo daxita matababi Nacom Pejume Diwesi cuidubeiba. ¹⁰ Baraxota Pablo ainya weibe paeba ducuaenaebiya Nacom Pejume Diwesi. Daxita pomonae Asia nacuapiwi judiomonae iru pomonae jopa judiomonae naexanaeyo barapomonae jume cowanta Jesús pia pexeinya jume diwesi tatsi, pon Pecanamataxeinaein jiwi. ¹¹ Nacom Pablo yawenatsi xua pexeinya petsita itutsi coyenewan exana Nacom pia peayapusuwatha tatsi. ¹² Ichamonae paparuwan yawa painyaweran capona Pablo beya xua barapo paparuwantha Pablo peperu jayababinexatsi. Barapo paparuwan nata capona peatene jiwitha. Bapoxonae barapo paparuwantha nainya axaibi tsouneibi. Iru pomonae cauri xeina barapo paparuwantha nacapanenebiya tsaibi. Barapomonae cauri wepu poneibatsi.

¹³ Ichamonae judiomonae, pomonae saya pejinompaewi, barapomonae pia cui xeina xua jiwi taitaweteibatsi cauri. Barapomonae ichichipa Jesús wun wun taibatsi poxonae

itaweta cauri. Barapomonaе caurimonaе baraichi, jeye: “¡Bara Jesús pewuntha paca itawetatsi, pon Pecanamataxeinaein jiwi, xua pon Pablo wun yopita ducuaenaebiya!” jei barapomonaе.

¹⁴ Iru barapoxonaeru judiomonaepin pon pewun Esceva, xeina siete poyobe tatsi pebiwi. Barichi barapo siete poyobe wun wun taibatsi Jesús, poxonaе itaweta cauri. Esceva sacerdotemonaе pia pentacaponaeви jiwana tatsi. ¹⁵ Poxonaе barapomonaе paeba barapo wuntha, Jesús pewuntha tatsi, barapomonaе jume notatsi cauri, jeye: “Bara tayaputaеin Jesús, Pablono bara yaputanno. ¿Incane paxamda? ¿Jintam pamda?” jei bapon cauri.

¹⁶ Bapoxonaе barapo siete poyobe pexainya betanaxorenatsi pon cauri xeina. Barapomonaе butsi. Matautano barapomonaе jopa nacuiyenabiyo. Barapo siete poyobe daxita tamasa jebompatsi yawa wan dubatsi. Bo bejumasa ducupa. ¹⁷ Pomonaе Efeso tomaratha peenaewi, judiomonaе, iru pomonaе jopa judiomonaе naexanaeyo, daxita bapomonaе jume tane xua siete poyobe jumasa ducupa. Barapomonaе junuwa bichocono. Daxota barapomonaе Jesús pon Pecanamataxeinaein jiwi wunaе jaintatsi.

¹⁸ Pomonaе Jesús jume cowantatsi pinmonaе barapomonaе jiwana baxota pata. Barapomonaе jiwi peitatha tatsi paeba xua bepa pinaе bayatha abe exana poxonaе mara coyeneya exana nawita. ¹⁹ Pomonaе Jesús pejume diwesi coyene nacuiduba, barapomonaе carendena diboron po diboron xua mara yabara penacuidubiwan. Barapo diboron tauteba. Poxonaе barapo diboron tauteba daxita nataeumena. Barapomonaе yabara matoma ununa xua pinaе barapo diboron matoma nawita, cincuenta mil po paratiximonaеbe pinaе nantomata. ²⁰ Barapoxonaе pin bicheito jume cowanta Jesús, pon Pecanamataxeinaein jiwi. Yawa barapomonaе tsita itapeinya xeina dubenanaebiya xua bara Nacom apara xeina peayapusu itorobi coyenewa.

²¹ Poxonaе baxua weta Pablo najuntu coyene weta xua pesiwa ponaewa tsane tomaran xua Macedonia nacuatha, yawa xua Acaya nacuathano xua bapoxonaе Jerusalén tomara bepewarapiyaenexa. Nanta xeinano xua peponaewa tsane Roma tomara beya. ²² Ponbe Pablo yawenatsi, Timoteono Erastono, baponbe Pablo Macedonia nacua beitorobyabe. Cataunxuae abu bapon Pablo Asia nacuatha eca.

Meje yabara poxonaе jiwi namtsebiya wawai Efeso tomaratha Pablo pecasebixaetsi

²³ Barapoxonaе Efeso tomarapiwi anaya anaepanaeya najume cayayataxuba poxoru aichaxaibi xua pejume taewa xua Pablo yabara cueicueijei Jesús pia pena pecuidubiwa tatsi. ²⁴ Pon xua abe penajume cayayataxubin xua poxonaе namtsebiya wawai bapon pewun Demetrio. Bapon pinmonaе xeina pomonaе petanacuichiwichi xua petaexanaewichi penainwixi. Barapomonaе Demetrio taexanatsi tsiqui penain boxi xua Artemisa pia bo canaxobeba. Artemisa Efeso tomarapiwi pia nacomwa tatsi. Barapowa jopa be pepa nacomio. ²⁵ Bapon Demetrio pia petanacuichiwichi waba. Pomonaе iru Artemisa pia penain boxi peexanaewi wabatsino. Demetrio namchi daxita barapomonaetha, jeye: “Bara metha payaputaneme xua paratixi xeinatsi poxoru Artemisa pia penain boxi exanatsi wacaenaetsinexatsi, daxota xeinatsi paratixi. ²⁶ Pon pataneme yawa pajume tanemeno, barapon Pablo. Bapon paeba ducuaenaebiya xua pinaе pomonaе icha nacom canautsiya exana apara pinaе xapain jopa daxua pepa nacomio. Pomonaе Pablo cuidubeiba jume jejei tsaibichi ayei jiwi Efeso tomarathano, Asia nacuathanoru jume jejei pinmonaе. ²⁷ Baxua bichocono nacata abe, tsipei icha jiwi jopa comocaetsipae barapo penain boxi xua waxainchi exaneibatsi bapoxonaе jopa xeinaetsipaetsi paratixi. Jiwi namchi tsane: ‘Artemisa pia pin bo tatsi abe. Xapain jopa pepa Nacom pin pia boyo’, jei tsane. Cataunxuae anoxuae barapo jiwi Asia nacuapiwi iru daxita nacuanpiwi Artemisa wunaе jainteibatsi. Ichitha icha jume cowantsinchi Pablo, metha equeicha jopa bewunaе jainteibichipaetsi Artemisa”, jei Demetrio.

²⁸ Poxonae baxua Demetrio jume taerucupatsi, anaepanarucupa barapomonae. Yawa barapomonae namtsebiya wawai, jeye: “¡Maisa Artemisa powa pata tanecanamataxeinaewa, barapowa bichocono pejuntũ coyene xanepanaewa! ¡Maisa Efesiomonae pan Artemisa wunae pajaintan!” jei barapomonae.

²⁹ Barapoxonae daxita tomarapiwi jupaya anaepana. Gayo irũ Aristarco, ponbe Macedonia nacuapinbe, ponbe Pablo pepuna ponaexaetsibe, baraponbe waetabatsibe. Po botha ichaxota jiwi nacaetuteiba pecueicueijeinexa tsaihi tsane bara bemaxũ cayatsibe. ³⁰ Bepa bequein Pablo najoniyaei barapo botha, petsipaebinexa tsane barapomonae, ichitha Jesús pejume cowuntsiwichi Pablo jopa pu copatichi. ³¹ Barichi pomonae pentacaponae wi jiwana Asia nacuatha, barapomonae Pablo pia jiwi tatsi cou tana cajume caitorobatsi xua bepa pinae Pablo jopa najoniyae tsane baxota. ³² Barapoxonae barapo penacaetutswatha, ichamonae icha caununaya wawai irũ ichamonae icha caununaya wawai. Daxita barapomonae najume cayayataxubiya wawai. Ichamonae jopa yaputaeyo po coyene xua barapomonae yabara nacaetuta. ³³ Barapo penacaetutswimonae anaepana. Pablo yabara anaepanatsi irũ pijimonae tatsi tayabara anaepanatsi. Daxota judiomonae caemonae najiwana napuna totabiya pebin xua bapon peitabaratha peuncuaenexa barapo penacaetutswatha. Bapon pewun Alejandro. Bapon pecobetha jume matawenta tsipei ichichipa bequein yabara jume yawena judiomonae barompaya piamonae. ³⁴ Poxonae barapomonae Alejandro yaitaerucupatsi xua Alejandro judiomonae pin, barapoxonae equeicha daxita namtsebiya wawai tsompae ainya horabe. Barapomonae namchi, jeye: “¡Maisa pata tanecanamataxeinaewa Artemisa! ¡Maisa barapowa pejuntũ coyene xanepanaewa! ¡Maisa efesiomonae pan Artemisa wunae pajaintan!” jei barapomonae.

³⁵ Nexata, pon xua tomara peewatsin, bapon uncuwa barapo penacaetutswi itabaratha. Bapon jume matawenta xua equeicha jopa penamtsebiya wawainexa tsane barapomonae. Bapoxonae bapon namchi, jeye: “Pomonae Efeso tomaramonae pam. Bara daxita nacuamonae piwi naca yaputane xua waxainchi notatsi Artemisa pin pia bo tatsi. Matautano yaputane xua waxainchi botatsi po iboto xua athawe jopeica. Barapo iboto apara bara Artemisa tsipei be Artemisa pia paw. ³⁶ Jiton dapocotsin aibi pon xua nejume barai xua naeraban, daxota saya irũ moya pande. Painya xoba ichawa pananta xeiname poxonae jopa beta pananta xeinaem. ³⁷ Ponbe, Gayo irũ Aristarco, ponbe pacarendename, baponbe jopa abe paebiyobe. Baponbe jopa caibiyobe xua xoyo boca Artemisa pin pia botha tatsi. Matautano Artemisa nacomwa jopa cui aebiyobe. ³⁸ Icha Demetrio irũ petanacuichiwichi nanta xeina xua ichamonae Demetriobarũ abe taexainchi moya jame barapomonae bewa ponaena po bo ichaxota ena pomonae jiwi peyabara paebiwi xua penatsicuentswi xua abe peexanaexae. Bapoxonae barapomonae itacupatsi xua petsipaebiwa pomonaetha pomonae tomara pentacaponae wi po coyene xua ichamonae abe exana barapomonaetha. ³⁹ Icha ichawa painya paebichi abũ anoxuae jopa papaebinde. Po mataqueitha poxonae pentacaponae wi ba nacaetuta pejume taenexa xua jiwi paeba bapoxonae jame papaebare. ⁴⁰ Wanamtsebiya wawaijeixae anoxuae daxota romanomonae naca yabara anaepanaena tsipei nanta xeinaena xua waxainchi aichaxaibichi xua barapomonae naca itoroba. Jopa xeinaetsi po diwese xua yabara tsipaebinchi barapomonaetha pocotsiwa xua yabara namtsebiya wawaichi”, jei tomara peewatsin. ⁴¹ Poxonae najume wetaba baxua, barapomonae pesato beitorobiyatsi.

20

Meje yabara poxonae Pablo siwa pona Macedonia nacua, Grecia nacuano

¹ Bara najume wetarucupa daxita poxonae namtsebiya wawai tsompae. Bapoxonae Pablo waba pomonae Jesús pejume cowuntsiwichi pebarũ nacaetutswinexa. Barapomonaetha Pablo yabara tsipaeba Jesús pejume diwesi xua barapomonae peajuntuyapuwya xanepanaya pejinompaenexa tsane Nacomtha. Bapoxonae Pablo barapomonae napeyaba. Macedonia nacua bewarapiya. ² Daxita barapo toman, Pablo siwa pona

barapo Macedonia nacuatha, cuidubano pomonaetha pomonae Jesús pejume cowantsiwichi, xua peajuntuyapusuya xanepanaya tajinompaenexa tsainchi Nacomtha. Poxonae nacui wetaba equeicha Grecia nacua bepatopiya. ³ Baraxota Pablo acoibi po xometiyobe yapucaewa. Bara juntucuru Siria nacua beya warapa jeratha po nae pin naetha. Bapoxonae jume tane xua pinae judiomonae anaepana xua Pablo bexubapaebatsi. Daxota Pablo najuntu cui weta xua caibeya peponaewa tsane petaxutha Macedonia nacua beya. ⁴ Pablo yanabatsi ichamonae. Iru ichun napona bapon pewun Sópater, pon Berea tomarapin, pon Pirro pexanto tatsi. Iru ichunbe naponabe baponbe pewunbe Aristarco iru Segundo, baponbe Tesalónica tomarapinbe. Iru ichun napona, bapon pewun Gayo, Derbe tomarapin. Iru ichun napona, bapon pewun Timoteo. Iru ichunbe naponabe, ponbe pewunbe Tíquico iru Trófimo, baraponbe Asia nacupinbe. ⁵ Barapomonae daxita pana netsiwana nantacapona, Troas tomaratha cou baxota pana ewata. ⁶ Ichitha Filipos tomara weya pawarapan jeratha, po naetha po nae pin nae poxonae weta Pascua wun matabin. Barapo Pascua matabintha jiwi xane pan xua pocotsiwa jopa cotowiyo. Poxonae cinco po matabibibe caewa papatan Troas tomaratha, baxota barapomonae pacaxiban. Baraxota paenan siete po matabibibe.

Meje yabara poxonae Pablo Troas tomara siwa pona

⁷ Pentaquei seicae matabitha, domingotha, pana nacaetutan, pata epanantarubi janacaenexa tsane pan. Pablo cuiduba pomonae Jesús pejume cowantsiwichi, tsipei baya warapaena Pablo. Daxota poxonae cueicueijeji beya yapapae. ⁸ Po tutu athabeicha barapo tututheicha pana nacaetutan. Barapo tututha ainya coichan dubena. ⁹ Pewowindu pewun Eutico, barapoyo bomuxu tututha ventanatha pemuxuburutha eca. Pablo bayiyo tsuxubi xua Nacom Pejume Diwesi cueicueijeji. Barapoxonae Eutico nantacotiya maitecataba. Tajun wejopeica. Po tututha Pablo cueicueijeji tsuncuae xua ichaxota acoibi tututheicha barapo tutu wejopeica. Eutico petupaeyo pitatsi. ¹⁰ Bara nexata Pablo dunatabica. Pablo Eutico caquita ecatsi pentabocototha. Pablo naisa cateita waetaba. Piamonae barai Pablo, jeye:

—Jopa pajunuwinde, bara apara asu, jei.

¹¹ Nexata Pablo equeicha caibe juinya. Pan epa janaxuba, yawa xane. Barapoxonae equeicha Pablo matowa cueicueijeji Nacom Pejume Diwesi, beya yajume pentha tsina. Bapoxonae weta. Bara cou nama matabi wunae tsuxubiba Pablo warapa. ¹² Barapo pewowin Eutico equeicha bara asu. Eutico piamonae bo becayiyatsi. Daxita saya juntu coyene tsacabatsi xua juntea jinompa xua equeicha Eutico peasuxae.

Meje yabara poxonae Pablo jeratha Troas tomara wewarapiya po naetha po nae pin nae xua Mileto tomara bewarapiya

¹³ Paxan copiya jeratha paponan weratha Aso tomara beya tsipei yaitama Pablo pana itoroba xua bepa pinae weratha paponaein. Bapon yaitama bepa petaxutha ponaei. Bara xotiya, Aso tomaratha paichichipan payapitan Pablo. ¹⁴ Poxonae Pablo Aso tomaratha pacaxibarucupan, bapon equeicha pana yantaba. Mitilene tomara beya pawarapan. ¹⁵ Mitilene tomara wewarapiyan. Bapoxonae icha matabitha imoxoyo Quío tunaetotha papatan icha muxunenetha. Baraxota caentacabitha paenan. Equeicha icha matabitha Samos tunaetotha papatan. Barapoxonae equeicha icha matabitha Mileto tomaratha papatan. ¹⁶ Baxua Pablo exana tsipei bapon nanta xeina xua jopa becaeyo ainya matabin Asia nacuatha. Bapon aichaxaibi pona Efeso tomaratha. Ichichipa Jerusalén tomara beya bichoina peponaewa tsane, tsipei imoxoyo bara Pentecostés matabi tsane, icha bara pecui jupaenexatsi.

Meje yabara poxonae Pablo tsipaeba penapatae jiwi Efeso tomaratha

¹⁷ Pablo Mileto tomaratha eca. Pablo najume caitoroba ichamonae xua Efeso tomaramonae pitiri jiwi pewabinexatsi pomonae Jesús pejume cowantsiwichi, xua Mileto tomaratha pepatsinexa. ¹⁸ Poxonae Efeso tomarapiwi, penapatae jiwi pata baxota, Pablo barai, jeye: “Bara paxam payaputaneme xua wunae poponan poxonae

copiya patopan Asia nacuatha painya xantha. Awiya cataunxuae barichin w̄nae poponan. ¹⁹ Daxita matabi Jesús pejume diwesi cueicueijan tsaibi. Jopa bichocono atsaca tsaibinyo. Jume w̄naeya natsipaeban saya. Poxonae Nacom pon jiwi Pecanamataxeinaein pejume diwesi cueicueijan, bichocono yaitawanaeya cueicueijan yawa nejume yancababeiba judiomonae yawa bepa nejutebeibi. ²⁰ Paxam payaputaneme xua jopa nacui baraxubinyo xua tapaca tsipaebiwatsi Jesús pejume diwesi xua po coyene painya nepaca yawenaewa tsane. Paca cuidubatsi jiwi peitabaratha tatsi. Matautano painya boxithano paca cuidubatsi. ²¹ Judiomonae jume daunweya cuiduban. Iruru pomonae jopa judiomonae naexanaeyo jume daunweya cuiduban xua barapomonae bewa icha j̄nt̄u coyene pexeinaenexa Nacomtha xuano pejume cow̄ntsinexatsi Jesús pon Wanacanamataxeinaein. ²² Nacom pia Pejumope t̄nax̄ tatsi neitoroba xua bewa ponaetsipanjei Jerusalén tomara beya. Ichitha jopa nayaputaeyo pocotsiwa xua baxotiya tsane ichamonae inta exanaena. ²³ Jame anoxuae saya meisa yaputan xua Nacom pia Pejumope t̄nax̄ tatsi yabara netsipaeba xua daxita tomaran ichaxota pateibin. Nebarai, jeye: ‘Jiwi pec̄bi bontha cajebeibina, yawa caperaxa exaneibinano’, nejei Nacom pia Pejumope t̄nax̄ tatsi. ²⁴ Juntucuru xua icha t̄pan, baraxua jopa netsita ainya cuiyo. Bara jemba tsane icha saya poponaein. Icha t̄pan, bara jemba tsane. Daxota neitac̄pa xua j̄nt̄u coyene weiweinyaya exanaein pocotsiwa Jesús neitoroba beya yacuiya t̄pajopaein. Matautano daxota neitac̄pa xua wetsin pocotsiwa Jesús neitoroba, pon Pecanamataxeinaeinchi jiwi, xua tapaca tsipaebiwatsi barapo pexeinya jume diwesi po coyene xua bichocono jiwi peantobewatsi Nacom.

²⁵ “Bayatha paca tsipaebatsi Nacom Pejume Diwesi po diwesi yabara xua Nacom waba jiwi, petanaexanaenexa tsainchi pijimonae jiwana tatsi pomonae itorobiya peewatsixae. Anoxuae bara xaniwaicha yaputan paxam pomonae pamxaem xua paca tsipaebatsi barapo diwesi, equeicha jopa pana netaem tsane. ²⁶ Daxota anoxuae paca tsipaebatsi icha jopa pajume cow̄ntsim, baraxua apara jopa tacoyiyo. Bara apara painya coyam tsipei bayatha bequein matowa paca tsipaebatsi pexeinya jume diwesi. ²⁷ Daxita xua Nacom neitoroba barapo diwesi omeicha paca tsipaebatsi. Jopa icha diwesiyo copatsinyo. ²⁸ Painya coutha xanepanaya pana naj̄nt̄u coyene yabara nanta xeinare. Matautano xaniwaicha payapu eenare pomonae Jesús pejume cow̄ntsiwichi. Paxam pitiri jiwi pam, baxua paexande tsipei Nacom pia Pejumope t̄nax̄ tatsi paca itoroba painya neyapu cainompaenexa tsane Jesús pejume cow̄ntsiwi tatsi. Matautano baxua paexande tsipei barapomonae Nacom piamonae tatsi, tsipei pexanto tatsi tsit̄pa xua barapomonae jopa peweraweracaewa tsane. ²⁹ Yaputan poxonae warapaein tacoutha patsina ichamonae. Barapomonae Jesús pejume cow̄ntsiwichi abe exanaeinchi. Barapomonae Jesús pejume cow̄ntsiwichi d̄c̄pa exanetinchi icha neuth̄u ichi. ³⁰ Barichi painya jiwi jiwamonae ajumebeya cuidubina xua jopa xainyeyo. Barapomonae cuidubina penaerabi diwesi, xua pomonae Jesús pejume cow̄ntsiwichi pejume cow̄ntsinexa barapo penaerabi diwesi. ³¹ Dota pam, xua peabe jume, painya nejume cow̄ntsiwa. Pana necui yabara nanta xeinare xua paca cuidubatsi acoibi po weiyobe. Paca cuidubatsi merawithano, mataqueithano. Matautano paca siwa wecoyeichi ichacuitha.

³² “Tamonae pam, Nacomtha pacata tsipaebatsi xua paca necayawenaewa tsane, xuano xua Nacom Pejume Diwesi painya necayawenaenexa po diwesi xua paca cuiduba xua pinae Nacom paca antobe. Barapo Nacom Pejume Diwesi peayapus̄wa xaina xua aj̄nt̄uyapus̄ya paca cana exanapona. Matautano paca catsina daxita pocotsiwa bayatha pepa piamonaetha yabara tsiw̄nae muxu duta xua catsiba paeba. ³³ Jopa taichichi tsaibinyo xua ich̄n pia paratixi tatsi matautano xua ich̄n pia paparuwan tatsi. ³⁴ Jame bara payaputaneme xua tacoutha natsiyabara nacuitan. Bara tawa comotan. Matautano xua pexaewa comotan, paparuwano. Matautano yawenan pomonae xua necueyaba. ³⁵ Bayatha payaputaneme xua daunweya nacuitan. Baxua exanan tsipei ichichipan xua painya neyaputaewa tsane, xua painya neyawenaenexa pomonae peacopeibi jiwi. Jopa paj̄nt̄emainaeinde xua Jesús pon Pecanamataxeinaein jiwi namchi, xua jeye: ‘Ba j̄nt̄u

coyene weiweina bichocono pon cata beyacaincha xua pon pecatsixaetsi', jei Jesús", jei Pablo.

³⁶ Poxonae Pablo najume wetsiya paeba, poxonae xua pitiri jiwi tsipaebatsi, bapoxonae pentabocototha uncua. Pablo daxita baru tsipaeba Nacomtha. ³⁷ Barapoxonae daxita matowa wecoyei. Yawano matowa naisa teicatsino Pablo poxonae tsutsubatsi, peantobexaetsi. ³⁸ Barapomonae bichocono wecoyei tsipei Pablo bayatha namchi, jeye: "Equeicha jopa pana netaem tsane", jei. Barapoxonae barapomonae Pablo jera bepuna tayathopiyatsi po naetha po nae pin nae.

21

Meje yabara poxonae Pablo weratha Jerusalén tomara bewarapiya po naetha po nae pin nae

¹ Poxonae Jesús pejume cowuntsiwichi pacuenta ponan, barapoxonae Cos tomara bepawarapiyan weratha. Barapoxonae icha matabitha Rodas tomara bepapiyan weratha. Barapoxonae equeicha icha matabitha Pátara tomara bepawarapiyan weratha. ² Pátara tomaratha baxota equeicha icha nae panotarucupan. Fenicia tomara bepawarapiyan. ³ Poxonae Chipre tunaeto patan pamatawacaicha toqueban. Barapo tunaeto pata tatsocona iya paxenta iyian. Siria nacua bepapiyan. Barapo nae Tiro tomaratha botouna, pejotsinexa tsane xua capona. Tiro tomaratha paxubarucupan barapo nae. Baxota painompanno. ⁴ Baraxota Tiro tomaratha pacaxibarucupan pomonae Jesús pejume cowuntsiwichi. Barapomonae pia xantha tatsi pajinompan siete po merawiyobe. Barapomonae Pablo tsipaebatsi, jeichichi: "Jopa Jerusalén tomara beya ponaeinde", jeichichi. Nacom pia Pejumope tunaxu tatsi barapomonae yabara tsiwanaya tsipaebatsi po coyene xua ichamonae Pablo cana exanaeinchi barapo tomaratha. ⁵ Poxonae barapo siete merawiyobe payapucaeawan paponarucupan. Daxita pomonae Jesús pejume cowuntsiwichi, tomara weya pana nepu taeumenathopiya yabuxino pexuino. Taetabo mene itapa bepapiyan. Baraxota pentabocototha paumenan. Nacom patsipaeban. ⁶ Pana napeyaban barapomonae, pana naisa teica pata taneantobexae. Bapoxonae equeicha jera panotarucupan, barapomonae equeicha pia boxi benawibiya.

⁷ Bara papanenebiyan tsurucupae xua Tiro tomara weya paponan. Tolemaida tomara beya papanenebiyan. Baxota equeicha pajacoban pomonae Jesús pejume cowuntsiwichi. Caentacabitha baxota pajinompan. ⁸ Icha matabitha, Pablono yawa xua pomonae pata tacueyabixae pan Cesarea tomaratha papatan. Barapo tomaratha Felipe pia bo tatsi bepapiyan. Bapon Nacom Pejume Diwesi pecueicueije ducuaeibiyae jiton. Bapon jiwana pomonae siete poyobe pomonae peyawenae jiwi. Barapo siete poyobe, matha cain itapetatsi Jerusalén tomaratha xua Jesús pia peitorobi jiwi tatsi peyawenaenexatsi. Barapon pia xantha tatsi paenan. ⁹ Felipe cuatro po pexantiyobe tatsi xeina. Barapowaxi cataunxuae jopa jitha enaeyo. Barapowaxi tsipaeba jiwi Nacom Pejume Diwesi xua Nacom yaputane exana. ¹⁰ Baxota caentacabiyobe paenan Cesarea tomaratha. Barapoxonae Judea nacupin patopa, pon Nacom pia peitorobi pepaebin, pon pewun Agabo. ¹¹ Agabo pana nesiwa pona. Pablo coreinya bocoto mara wejontatsi. Barapo coreinya bocototha petaxuno, pemaxuno Agabo pia coutha nacaecunta cubaxuba. Bapoxonae Agabo namchi, jeye:

—Bayatha Nacom pia Pejumope tunaxu tatsi netsipaeba po coyene xua judiomonae exanaena Jerusalén tomaratha. Bepa pinae barapomonae caiche tsane pon xua pia bocoto pexeinaein pocotsi bocote, ichaunxuae naichin, bara juta caichi tsane pinae. Matautano bepa pinae barapomonae cacaponae pomonaetha pomonae penanapaincha jinompaewi xua icha nacua werena peponaewi, jei Agabo.

¹² Poxonae baxua pajume tan, paxan iru pomonae Cesarea tomarapiwi Pablo pabaran, pajanje:

—Bara, jinxoba poname Jerusalén tomara beya, pajan.

¹³ Ichitha Pablo pana jume nota, jeye:

—¿Eta xua metha pana siwa wecoyam? ¿Eta xua metha pana itanuwe forotame? Bara bayatha nacui yabara jume wetan tanecubinexa tsane, matautano tatupaenexa tsane Jerusalén tomaratha tajume cowuntsixae Jesús, pon jiwi Pecanamataxeinaein, jei Pablo.

¹⁴ Bequein Pablo jume daunweya pabaran xua jopa ponae tsane ichitha Pablo dapo jumetha bepa ponaei. Matapainya saya jopa equeicha pata jumeyo. Matautano pajan:

—Basaya moya baxua exanaena be pocotsi coyeneya xua Nacom ichichipa, pajan.

¹⁵ Bapoxonae poxonae pana jume wetan baxua, bara nama paxainxainyan. Bapoxonae Jerusalén tomara bepawarapiyan. ¹⁶ Ichamonae Cesarea tomarapiwi, pomonae Jesús pejume cowuntsiwichi pana nepuna pona. Pana capona bo beya pata tajinompaenexa tsane, pebin pon pewun Mnasón, bapon pia bo beya tatsi. Bapon Mnasón Chipre tunaetopin. Bapon pinae caena bayatha jume cowunta Jesús.

Meje yabara poxonae Pablo, Santiago siwa poinchi

¹⁷ Poxonae Jerusalén tomaratha papatan, baxota pomonae Jesús pejume cowuntsiwichi weiweinaya pana matenta waba bichocono. ¹⁸ Icha matabitha Pablo pana nebaru pona. Pasiwa ponan Santiago. Baraxota iru daxita pitiri jiwi jinomparu. ¹⁹ Barapomonae Pablo jacobae. Bapoxonae tsiwiyo bexa Pablo tsipaeba daxita po coyene xua Nacom exana pomonaetha pomonae jopa judiomonae naexanaeyo. Yawano paeba po coyene Pablo itorobatsi Nacom, xua petacaponanexa Nacom Pejume Diwesi tatsi. ²⁰ Poxonae jume tane baxua xua Pablo paeba, barapoxonae barapomonae Nacom wanae jointatsi. Nexata Santiago Pablo baraichi, jeye:

—Taema, incane jume taema. Judiomonae pin bicheiton tsoponae, pomonae bayatha Jesús jume cowuntatsi. Daxita barapomonae namuxutainyaba xua pinae daxita jiwi nantawenona xua Moisés pia peitorobi coyene exanapona. ²¹ Cayopita ichamonae xua pinae cuidubame judiomonae pomonae icha nacuantha pejinompaewi. Pinae cuidubame xua equeicha pinae barapomonae bewa jopa yabara jume cui exanae pocotsiwa bayatha Moisés itoroba. Matautano pinae cuidubame barapomonae xua pinae jopa bewa penawi thabi coyene exanae tsane xua pewi thabiwa pia pexui ichaxota nareixacaena xua ichaxota pebiwixae xeina. Matautano pinae cuidubame xua barapomonae bewa jopa exanae barapo peitorobi coyenewan xua pinae pocotsiwa wamo jiwi bayatha exaneiba. ²² ¿Eta xua waxainchi exanaeinchi? Tsipei judiomonae, pomonae pejume cowuntsiwi Jesús, nacaetutsina xote barapo Jerusalén tomarathe, poxonae jume taena xua patopame. ²³ Paxan xua paca itorobatsi baxua exande. Taema xote pata xantha cuatro poyobe poponabe pebiwi. Barapoyobe yabara nacui wanae tsijume dutabe Nacomtha pocotsiwa xua exanapaeba. Anoxuae baxua barapomonae bewa exanae pocotsiwa bayatha exanapaeba. ²⁴ Barapomonae matabayande paratixi nanacui baru nantomare sacerdotemonaepintha, xam nexano iru barapomonae nexano xua jopa painya nenajuntu coyene taxobinexa. Nanacui baru nantomare, barapoyobe penanta catepateya sibapentsinexa tsane. Icha baxua exanaename, daxita jiwi cacui yaputaena xua bayatha jopa exanaem xua ichamonae abe cayabara paeba. Yawa daxita jiwi cacui yaputaena xua xam xaniwaichiya exaname pocotsiwa Moisés itoroba. ²⁵ Paxan pata tinan carta pomonae Jesús pejume cowuntsiwichi, pomonae jopa judiomonae naexanaeyo. Pata yabara tinan baxua xua pananta xeinan xua barapomonae beexanaetsipa. Pajan barapo cartatha: ‘Painya xoba duwei pawu xaneme po duwein jiwi tsiseba ibo nacom. Matautano painya xoba paxaneme po duwein pon saya pipato tumpuncua, xuano painya xoba pajana xaneme. Painya xoba pasiwa xeiname yabuxi xua jopa painya seurixi’, pajan, jei Santiago.

Meje yabara poxonae soldadomonae Pablo maxu waetabatsi judiomonae pin pia botha tatsi, bapoxonae jiwi pecubi bo beya caponatsi

²⁶ Nexata Pablo baru poinya barapo cuatro poyobe. Icha matabi Pablo iru barapo cuatro poyobe exana po coyene xua jopa penajuntu coyene taxobiwa Nacomtha. Bapoxonae Pablo iru barapo cuatro poyobe Nacom pin pia botha tatsi joniya. Pablo namchi,

jeye: “Equeicha papatsinan siete po matacabibe poxonae pawetsin po coyene xua daxota jopa pata najuntũ coyene taxobiwa Nacomtha. Pacaponaein duwein sacerdotemonaepin pebexubinexa tsane xua pata catsinexa Nacom”, jei Pablo.

²⁷ Poxonae barapo siete matacabiyobe imoxoyo yapucaewinaba, bapoxonae Pablo judiomonae Nacom pin pia botha tainchi. Pomonae Pablo tainchi, barapomonae judiomonae pomonae Asia nacua weya pona. Pomonae Pablo tainchi, barapomonae exana xua pin bicheito namtsebiya wawai xua Pablo pecasebixaetsi. Bapoxonae Pablo waetabatsi. ²⁸ Jume daunweya wawai, jeye: “¡Pajume taema, paxam pomonae Israel nacuapiwi pamxaem! ¡Pana yawende! Barapon cuiduba ducunaebiya daxita jivi. Abeya naca yabara cui cueicueije. Matautano abeya yabara cueicueije Moisés pia peitorobi coyenewan tatsi. Matautano barapo Nacom pin pia bo abeya yabara cueicueije barapon. Matautano bapon griegomonae matacapoinchi barapo Nacom pin pia bo berena. Poxonae Pablo matacapona griegomonae, Nacom pin pia botha tatsi atutube exana”, jei barapomonae.

²⁹ Baxua paeba, tsipei poxoru bayatha barapomonae Pablo tainchi Jerusalén tomaratha. Baxota Pablo barũ pona Efeso tomarapin, pon pewun Trófimo. Daxota barapomonae catsawa nanta xeina xua metha bayatha Pablo Nacom pin pia botha baru pona Trófimo. Daumetha Trófimo baxota jopa naponaeo.

³⁰ Daxita tomarapiwi jũpaya equeicha jume daunweya wawai. Daxita cuinaerendena, barapomonae Pablo yoroba teicatsi. Nacom pin pia bo wemaxũ capoinyatsi. Barapoxonae barapomonae bichocono yaboupa cateitabanota Nacom pin pia bo. ³¹ Barapomonae, pomonae peanaepanaewi muxu Pablo pebexubichi. Bara nexata romanomonae soldadomonae pia pepa pentacaponaein tatsi jume tane xua daxita Jerusalén tomaramonae najume cayayataxuba. ³² Nexata soldadomonae pia pepa pentacaponaein tatsi, bapon pia soldadomonae copiya piamonae caeacetuteta. Bapoxonae barapo soldadomonae pin bicheito becuinaeyiya ichaxota Pablo muxu pebexubichi. Poxonae barapo soldadomonae taerucupatsi barapo bicheito xainya umenarucupa. Barapoxonae barapomonae equeicha jopa Pablo butsi. ³³ Nexata soldadomonae pia pepa pentacaponaein tatsi Pablo imoxoyo caquita uncuatabatsi. Bapoxonae Pablo maxũ waetabatsi. Bapon soldadomonae pia pepa pentacaponaein tatsi piamonae itoroba xua ainya naintothabe pemaxũ cubaxubinexatsi Pablo. Bapoxonae bapon soldadomonae pia pepa pentacaponaein tatsi yainyaba pin bicheittha, jeye: “¿Jintam baraponda? ¿Eta xua metha bapon exana?” jei. ³⁴ Ichitha barapomonae ichawan caununaya wawai. Ichamonae ichawa wawai. Daxota bapon soldadomonae pia pentacaponaein tatsi jopa xapain jume taeyo. Bapoxonae bapon soldadomonae pia pentacaponaein tatsi Pablo itorobatsi soldadomonae pia bo beya tatsi. ³⁵ Poxonae patopa soldadomonae pia bo beya, penonobabeiyaewatha xua nonababeibiya soldadomonae Pablo yoichiya capoinchi bara beya. Pin bicheito bichocono anaepana daxota Pablo yoichiya capoinchi. ³⁶ Barapo pin bicheito soldadomonae cayabara wawaya punaenapoinchi, jeye: “¡Maisa pabexore bapon!” jei barapomonae.

Meje yabara poxonae Pablo paeba barapomonae peitabaratha

³⁷ Poxonae juntucuru Pablo soldadomonae pia bo beya capoinchi, Pablo barai soldadomonae pia pentacaponaeintha tatsi, jeye:

—¿Metha ichauyo catsipaebichipatsi? jei Pablo.

Poxonae baxua jume taeba, soldadomonae pia pentacaponaein tatsi yainyaba, jeye:

—¿Xam necueicueijeinda griego jumera? ³⁸ ¿Xam barapo jitomda egipcio nacuapimda, pon nacaetuteiba exaneiba pijimonae xua ichamonae pejutebebinexa tsainchi? ¿Xam barapomonae pia pentacaponaein tatsi, pon xua matacaponaponaem cuatro mil jivi ichaxota ira xuepana susato tsurucuae nacuatha? jei soldadomonae pia pepa pentacaponaein tatsi.

³⁹ Nexata Pablo jume nota, jeye:

—Apara pepa judiomonaepiyon. Tarso tomaratha naexanan. Tatomara ainya cui tsipei pepa tomara. Tarso tomara Cilicia nacuatha eca. Nejume cui yabara copare xua barapomonaе tatsipaebiwa tsane, jei Pablo.

⁴⁰ Soldadomonaе pia pepa pentacaponaein tatsi bara Pablo yabara jume copatatsi xua Pablo bara pepaebiwa tsane. Pablo ichaxota nonababeibiya baxota asiya uncua. Yawa pecobetha jume matawenta barapomonaе xua moya peenaenexa. Poxonaе moya enarꝥꝥpa barapomonaе, Pablo hebreo jumetha cueicueije. Namchi, jeye:

22

¹ “Tamonae pam, irꝥ pomonaе pitiri jiwi pam, pana nejume taema xua tapaca tsipaebiwa tsainchi xua tana nabarꝥ jume yawenaewan”, jei Pablo.

² Poxonaе barapomonaе jume taerꝥꝥpa, xua Pablo hebreo jumetha cueicueije, barapomonaе moya enarꝥꝥpa. Pablo barapomonaе barai, jeye:

³ “Xan apara judiomonaepin. Bayatha naexanan Tarso tomaratha, Cilicia nacuatha. Saya apara Jerusalén tomaratha wichaban. Baxota nacuiduban po coyenein wamo susato jiwi itorobeiba. Daxita barapo coyenein pebin pewꝥn Gamaliel, necuiduba. Necui eeneiba xua Nacom tanacuiteiban xua daxita tajꝥntꝥ coyenewatha icha anoxuae daxita paichiponaem. ⁴ Bayatha jeiteiban pomonaе pejume cowꝥntsiwi Jesús pia pena pecuidubiwa tatsi. Teiqueibanno, jiwi pecꝥbi bo beya caponeiban, pebiwino yawa yabꝥxino. Tsipei ichichipan xua ichamonaе jutebeiba xua barapomonaе pejutebeib-inexatsi. ⁵ Sacerdotemonaе pia pentacaponaein tatsi irꝥ pitiri jiwi paca tsipaebina xua bayatha barapomonaе necata cartan xua barompaya wajudiomonaе nexa xua Damasco tomaratha. Barapo cartanxae neitacꝥpa xua tateicaewa tsane pomonaе Jesús pejume cowꝥntsiwichi. Baxota Damasco tomaratha ponan tajeichinexa pomonaе Jesús pejume cowꝥntsiwichi, tsipei tha Jerusalén tomara becayaetsi barapomonaе, mataꝥtano tsipei tha yamaxꝥ cꝥbiya caponaetsi taperaxa exanaenexa tsane barapomonaе”, jei Pablo.

Meje yabara poxonaе Pablo diwesi paeba xua poxonaе po coyene pejume cowꝥntsiwa Jesustha

⁶ Equeicha Pablo jeye: “Damasco tomara namtotha ecaponan, bara nama mateinyaxae tsuxubi. Poxonaе bara muxu tapatopaeba barapo tomaratha, bapoxonaе pin coicha neyancataba. Taxainya benematawacaicha jopeica. Peitaboco wejopeica. ⁷ Iratha jopan. Bapoxonaе peitaboco wenebaraichica. Jume taeuncuan, nebarai, jeye: ‘Saulo, Saulo, ꝥeta xua metha tamonaе inta abe exaname?’ jei. ⁸ Nexata yainyaban: ‘Pon jiwi Necanamataxeinaem, ꝥjintamꝥmda?’ jan. Nejume epa pita, jeye: ‘Apara xan Jesús, Nazaret tomarapin ponxaein tamonaе inta abe exaname’, nejei. ⁹ Pomonaе nepuna pona irꝥ coicha taneno. Bichocono bapomonaе junuwa. Saya meisa coicha tane, saya jopa jume taeyo po jume xua nebaraichica. ¹⁰ Nexata yainyaban: ‘Pon jiwi Necanamataxeinaem, ꝥeta pocotsiwa metha exanocuaein?’ jan. Bapon nebarai, jeye: ‘Nontaponde Damasco tomara be-iyande barapo tomaratha, ichꝥn yabara catsipaebina pocotsiwa xua bewa exanaename’, nejei. ¹¹ Barapo coicha bichocono neitata naquitaba exana. Pomonaе nepuna pona Damasco tomara benemaxꝥ cayiya.

¹² “Barapo tomaratha, Damasco tomaratha, cou pebin popona, bapon pewꝥn Ananías. Bapon daxita yabara jume cuiya exaneiba Moisés pia peitorobi coyene tatsi. Barapo judiomonaе, Damasco tomaratha, barapomonaе Ananías xanepanaya yabara paebeibatsi.

¹³ Ananías nesiwa pona. Bapon nebarai: ‘Saulo, tamonaе jitom, equeicha caewa nepu necotsinde’, jei. Bara caena barapoxonaе equeicha caewa necotaxuban. Bapon bapoxonaе taenotan. ¹⁴ Ananías nebarai, jeye: ‘Pata amo jiwi pia Nacom tatsi bayatha itapeta cawaba xua neyaputaenexa tsane xua Nacom caitoroba. Caitapeta xua netaenexa pon yatsicaewa peꝥntꝥ coyene xanepanaein, mataꝥtano nejume taenexa pocotsiwa catsipaeba. ¹⁵ Aunxuae Jesús yabara cueicueijam tsane daxita nacuan ꝥꝥpayantha. Yabara paebiname daxita xua taneme xuano xua jume tanemeno. ¹⁶ Anoxuae, ꝥeta xua metha came ecame? Nontaponde. Barabꝥ ichꝥn cabautisabina Jesucristo pewꝥntha,

pon jiwi Pecanamataxeinaein, necayabara jüntemainaenexa abe jinya neexanae cuiru coyenein', nejei Ananías", jei Pablo.

Meje yabara poxonae Pablo nayabara paeba xua peitorobiwatsi ichaxota pomonaetha pomonae jopa judiomona naexanaeyo

¹⁷ Pablo cataunxuae cueicueijeji, jeye: "Poxonae caibe nawiyen Jerusalén tomara beya, Nacom pin pia botha tatsi ponan. Barapo botha Nacom tsipaeban. Bapoxona camaitan xua netsita naitaata. ¹⁸ Jesús necotan, pon jiwi Pecanamataxeinaein. Bapon nebarai: 'Anthaxuacuinaya pontabare Jerusalén tomara weya, tsipei barapomona jopaxapain cajume cowantsi tsane xua tana neyabara paebiwam', jei Jesús. ¹⁹ Nexata jume epa pitan: 'Pon jiwi Necanamataxeinaem, barapomona bayatha necui yaputane xua poneiban daxitan judiomona pia penacaetutsi bontha tatsi. Bayatha jiwi pecubi botha caponeiban, pomona necajume cowantsiwi. Matautano bichocono beibanno. ²⁰ Poxona Esteban bichocono jana othopeica xan saya cui necotuncuan. Bapon Esteban pon cajume cowanta bayatha. Bapon jinya diwesi pecanantsipaebin. Poxona Esteban bexotsi, saya cui matu taeuncuan. Yabara jume baru cui jejan poxona barapomona Esteban bexubapaebatsi. Barapomona pipaparuwan tajeban', jan Jesthaxu. ²¹ Ichitha bapon pon jiwi Pecanamataxeinaein nebarai: 'Anthaxuacuinaya pon de. Aunxuae taju caitorobinchi barapomona beya, pomonaetha pomona jopaxuacuinaya judiomona naexanaeyo beya', nejei", jei Pablo.

Meje yabara poxona soldadomona pia pentacaponaein tatsi Pablo waetabatsi

²² Pablo cataunxuae paebuncua barapo penonobabeibiyathopaewatha soldadomona pia botha. Poxona Pablo jume taerucupatsi xua bepa pinae ponaena pomonaetha pomona jopaxuacuinaya naexanaeyo beya, bapoxona barapo bicheito namtsebiya wawai, jeye: "¡Maisa bapon pabexore bara! ¡Dapocotsin jopaxuacuinaya bepa!" jei. ²³ Awiya came barapomona wawai tsompae. Yawa pia paparuwan anaya nunubaba. Yawa taetowan anaya athabe bebeicha. ²⁴ Romanomona soldadomona pia pepa pentacaponaein tatsi, bapon pia soldadomona itoroba xua Pablo pecaponaenexatsi soldadomona pia bo beya tatsi xua jiwi pecubi bo. Baxota Pablo capoinchi pecuainchinexa tsainchi xua daxota Pablo peyabara paebiwa tsane baxua xua Pablo peyabara namtsebiya wawaichiwatsi judiomona. ²⁵ Poxona bara juntucuru Pablo maxu cutanotatsi xuano juntucuru muxu pebetsino, Pablo barai soldadomona pia pentacaponaein tatsi, jeye:

—Jopaxuacuinaya be pana necuainchipein tsipei apara xan romanomonaepin. Matautano baxua jopaxuacuinaya pana necuainchipein icha jopaxuacuinaya paebiyo pon jiwi peyabara paebin penatsicuentsiwa xua abe peexanaexae, jei Pablo.

²⁶ Poxona baxua jume tane, soldadomona pia pentacaponaein tatsi, bapon pona pia pepa pentacaponaein tatsi beya. Bapon namchi pia pepa pentacaponaeintha, jeye:

—Dota xua xam cana exanaename bapontha. Apra cou deta Pablo iru romanomonaepin, jei.

²⁷ Nexata soldadomona pia pepa pentacaponaein tatsi, bapon Pablo imoxoyo caquita uncuatabatsi. Bapon Pablo yainyabatsi, jeichichi:

—¿Bara yatsicaya xainyei bara xam romanomonaepim? jeichichi Pablo.

Pablo jume nota, jeye:

—Aa, bara xan tsocuaein, jei Pablo.

²⁸ Soldadomona pia pepa pentacaponaein tatsi Pablo jume notatsi, jeichichi:

—Xan iru barichin romanomonaepin. Nacui yabara matomatan bichocono pin paratixi matoma xua romanomonaepin tana naexanaewa tsane, jei.

Pablo namchi, jeye:

—Apra seicaya nama xan caena bayatha pexuyothan yacuiya naexanan romanomonaepin, jei.

²⁹ Poxona Pablo baxua paeba, bapoxona pomona Pablo muxu pecuainchichi Pablo pexeinya wetanatsixibarucupiyatsi. Iru ru bara wenatsixitabiya soldadomona pia pepa

pentacaponaein tatsi tsipei bapon yaputane xua Pablo apara romanomonaepin. Daxota junuwa xua Pablo pemaxu cubixaetsi.

Meje yabara poxonae Pablo pentacaitorobi bicheitomona peitabaratha uncu pomona judiomona

³⁰ Icha matabitha soldadomona pia pepa pentacaponaein tatsi bepa yaputaei, bepa jeyei: “¿Eta xua metha Pablo yabara anaepanatsi judiomona?” bepa jeyei. Daxota bapon, Pablo taxuenaxotsi xua maxu cutatsi. Nexata bapon itoroba xua sacerdotemona pia pentacaponaei tatsi iru pentacaitorobi bicheito nacaetutsina. Pablo bara bebaru iyatsi. Baraxota cuaranotatsi barapomona peitabaratha tatsi.

23

¹ Pablo pentacaitorobi bicheito beya bichocono naita cui dutsiya necoya. Pablo barapomona beya namchi, jeye:

—Tamonae, caena bayatha beya anoxuae juntu coyene xanepanaya poponan Nacom peitatha tatsi, jei Pablo.

² Nexata sacerdotemona pia pepa pentacaponaein tatsi, Ananías, bapon itoroba xua Pablo pecoibo cuainchinexatsi pomona Pablo imoxoyo caquita peumenaexaetsi.

³ Ichitha Pablo jume nota, Ananías jume notatsi, jeye:

—Xam ponxaem itara mexeya xanepanaya nepaebin ichitha jiwi nemuxuitorobin, Nacom cacuainchina. Xam ecame xote jinya tana neyabara paebinexam tana natsicuentsiwa xua abe taexanaexae icha be pocotsi coyeneya Moisés pia peitorobi coyenetha baxua yabara paeba. Ichitha xam jopa xapain exanaem poxona ichamona itorobame xua tana necoibo cuainchinexa poxona Moisés pia peitorobi coyenewatha jopa baxua itorobiyo, jei Pablo.

⁴ Pomona Pablo imoxoyo caquita umeinchi, jeichichi:

—Apara sacerdote pia pepa pentacaponaein tatsi abe tsipaebame pon Nacom tanacui-tatsi, jei barapomona.

⁵ Pablo jume nota, jeye:

—Tamonae, jopa yaputaeyinyo xua pon tsipaeban apara sacerdotemona pia pepa pentacaponaein tatsi. Icha yaputaetsipan, jopa paebinchipae. Nacom Pejume Diwesitha namchi, jeye: ‘Jopa bewa painya pentacaponaei jiwana abe pajainchim pomona xua painya tomaratha’, jei Nacom Pejume Diwesitha, jei Pablo.

⁶ Nexata Pablo cui yabara nanta xeina barapomonaetha tsipei ainya bicheitobe, ichamona saduceomonaeru, ichamona fariseomonaeru. Daxota bapon Pablo jume daunweya wawai barapomonaetha, jeye:

—Tamonae, bara xan apara fariseomonaepin, yawa fariseomonaepin pexanton. Tsipei jume cowuntan xua jiwi petupaewi equeicha asu tsaibi tsane daxota pana necapomona painya tana neyabara paebinexam xua tana natsicuentsiwa xua abe taexanaexae, jei Pablo.

⁷ Poxona Pablo baxua paeba saduceomona iru fariseomona najume matsontsonobabe. Barapo bicheito ainya bicheitobe naexanabe, tsipei barapo bicheitobe seicaya barompaya nabaru nanta xeina. ⁸ Saduceomona paeba xua pinae petupaewi jopa equeicha asu tsaibi tsane. Matautano barapomona paeba xua pinae matatsunpiwi jopa jinompaeyo, matautano pinae dowatsi dapomona pinae ajibi. Ichitha meisa fariseomona jume cowanta daxita barapo diwesin, xua pinae pewerapeibiwi equeicha asu tsaibi tsane, matautano xua pinae dowatsi jinompa, xuano xua pinae matatsunpiwi bara jinompa. Daxita barapo diwesin fariseomona jume cowanta. Ichitha nama saduceomona jopa daichiyo. ⁹ Daxita barapo bicheitobe namtsebiya wawai. Fariseomona jiwana ichamona nonobapona. Barapomona yaputane nawita Moisés pia peitorobi coyene tatsi. Barapomona namchi, jeye:

—Bapon Pablo jopa abe exanaeyoba, metha dowatsi bapon tsipaebatsi, ichacuitha metha matatsunpin bapon tsipaebatsi, jei barapomona.

¹⁰ Barapomonaē daxita najume matsontsonobiya biatane. Bapon romanomonaē soldadomonaē pia pepa pentacaponaein tatsi, bapon bichocono junuwa tsipei Pablo tsana perũ xunaēinchi. Daxota bapon romanomonaē soldadomonaē pia pepa pentacaponaein tatsi itoroba pia soldadomonaē xua Pablo equeicha caponaēinchi soldadomonaē pia bo beya tatsi.

¹¹ Icha mataqueitha merawi pon Pecanamataxeinaēin jiwi, Pablo imoxoyo caquita uncuatsi xua tsita naitautatsi. Bapon namchi, Pablo baraichi, jeye: “Pablo, najũntũ coyene tsacatabare. Icha ichim xua Jerusalén tomaratha neyabara paebame barichinde equeicha Roma tomaratha neyabara paebare”, jei Jesús.

Meje yabara poxonaē judiomonaē nanta xeina xua Pablo pebexubiwa tsainchi

¹² Icha mataqueitha, ichamonaē judiomonaē pebũrũya nanta jũpaya nanta xeina xua Pablo pebexubiwa tsainchi. Barapomonaē nayabara tsiwũnaē muxu duta Nacomtha xua bepa pinaē jopa nabanaē tsane, xuano jopa apae tsaneno xua beya pinaē yajainbonaya othopaena poxonaē Pablo bexubinchi. ¹³ Barapomonaē pomonaē Pablo bexubapaebatsi xuano xua yabara nainbotapaebatsi bichocono pinmonaē beyacaincha xua pocotsi cuarenta po pebiwimonaeyobe. ¹⁴ Barapomonaē pona sacerdote pia pentacaponaei tatsi beya, yawa judiomonaē pia pitiri jiwi tatsi beya. Barapo pebiwimonaeyobe barai barapomonaētha, jeye:

—Bayatha pana nayabara tsiwũnaē muxu duban Nacomtha xua jopa pata nabanaēwa tsane beya tsane poxonaē cataunxuae jopa pabexubinyo tsane Pablo. ¹⁵ Paxam irũ pomonaē pentacaitorobi bicheito, romanomonaē soldadomonaē pia pepa pentacaponaein tatsi patsipaebare xua bapon pia soldadomonaē peitorobinexa xua Pablo pecuaranotsinexa tsainchi painya itabaratha baya tsane. Romanomonaē soldadomonaē pia pepa pentacaponaein tatsi pamuxuitorobare. Naemata bapon pabarande: ‘Awiya peyainyabiwa paxeinan pata tha yainyabichi Pablo’, pajande. Paxan pata tha nama namtotha ewatumenaetsi. Pata tha bexuichi, poxonaē barapomonaē Pablo caponaēinchi, jei barapomonaē.

¹⁶ Pablo perobi tatsi jume tane xua barapo cuarenta po pebiwimonaeyobe namtotha nantsiyatsiya bobenapaēba pewaetabinexa tsainchi Pablo. Daxota Pablo perobi tatsi pona soldadomonaē pia bo tatsi beya. Baxota Pablo perobi tsipaebatsi xua barapomonaē Pablo bepa bexubichei. ¹⁷ Nexata Pablo waba pon xua romanomonaē soldadomonaēin pia pentacaponaei jiwana. Pablo namchi, jeye:

—Poye pewowin wũto caponde romanomonaē soldadomonaē pia pepa pentacaponaein tatsi beya, tsipei bapoyo diwesiyo xeina xua petsipaēbiwa tsane, jei Pablo.

¹⁸ Romanomonaē soldadomonaē pia pentacaponaein tatsi Pablo perobi tatsi capoinchi xua romanomonaē soldadomonaē pia pepa pentacaponaein tatsi beya. Bapon namchi, jeye:

—Pablo soldadomonaē pia botha peecaēin, bapon neitoroba xua pinaē bepa caponaēin jei poye. Tsipei pinaē xeina diwesiyo xua necatsipaēbinexa, jei bapon soldadomonaē pia pentacaponaein tatsi. ¹⁹ Pablo perobi tatsi cobe pitatsi romanomonaē soldadomonaē pia pepa pentacaponaein tatsi. Barũ natsixitabatsi aisowa beya. Bapoyo baraichichi, jeichichi:

—¿Jinya eta xua netsipaēbichi? jeichichi.

²⁰ Nexata pewowin wũto jume nota romanomonaē soldadomonaē pia pepa pentacaponaeintha, jeye:

—Judiomonaē pebũrũya nanta xeina xua bepa sawũcaēi xua Pablo baya necaponaeinexa pentacaitorobi bicheitho. Bepa camuxuitorobei. Bepa jeyei: ‘Panantawenonan pata tha Pablo yainyabichi ichawiyo’, bepa jeyei barapomonaē. ²¹ Ichitha jopa jume cowũntsinde, barapomonaē namtotha nantsiyatsiya bobenapaēba pewaetabinexa tsainchi taxuyo. Barapo cuarenta po pebiwimonaeyobe natsiwũnaē yabara muxu duba Nacomtha xua bepa pinaē jopa nabanaē tsane yawa jopa apae tsane beya pinaē poxonaē tsane poxonaē Pablo bexubinchi. Anoxuae barapomonaē cajume cui ewata xua jam

tsane: ‘Baya tsane Pablo pentacaitorobi bicheittha itorobinan’, jam tsane, jei Pablo perobi tatsi.

²² Nexata romanomonae soldadomonae pia pepa pentacaponaein tatsi barapoyo napeyabatsi. Pewowin wuto ponataba. Pewowin wuto baraichi, jeye:

—Ichuntha jopa tsipaebinde xuaunxuae po diwesiyo netsipaebame, jei soldadomonae pia pepa pentacaponaein tatsi.

Meje yabara poxonae soldadomonae pia pepa pentacaponaein tatsi Pablo itorobatsi Félix beya pon Judea nacuamonae pia peyanacua ewatsinchi

²³ Romanomonae soldadomonae pia pepa pentacaponaein tatsi waba ainya pentacaponaeinbe. Bapon baraponbetta itoroba. Barai: “Soldadomonae pacui wunaerebe doscientos po soldado matabuxube pomonae xua petaxutha ponaena, iru setenta po soldado matabuxube pomonae xua cawayutha ponaena, iru doscientos po soldado matabuxube pomonae dejonan cajjincaena. Barapo bicheito daxita peponaenexa Cesarea tomara beya merawitha poxonae a las nueve tsuxubi. ²⁴ Matautano pacui wunaerebe cawayu ayunbe xua Pablo pequeicaenexa tsane. Matautano paitorobarebe xua Pablo beta pecaponaenexatsi, xua asuno Félix beya”, jei. ²⁵ Bapon pia soldadomonae caitoroba carta. Barapo cartatha namchi, jeye:

²⁶ “Xan Claudio Lisias. Félix, ponxaem tacabarũ cui itura jinaeinchi, cajacobatsi. ²⁷ Pon anoxuae cata itorobatsi nexainya beya barapo pebin waetabatsi, judiomonae waetaba. Muxu pebexuichi. Poxonae jume tan xua bapon romanomonaepin najainta daxota nainya soldadomonae barũ ponan bapoxonae bapon capanepan. ²⁸ Tsipei tha yaputaetsi xua barapomonae Pablo yabara paebatsi, daxota Pablo cuaranotan judiomonae pia pentacaitorobi bicheittha tatsi. ²⁹ Jume tan xua barapomonae Pablo yabara paebatsi xua pinae bapon jopa exanaeyo icha be pocotsiwa barapomonae pia peitorobi coyenewan tatsi paeba. Ichitha barapomonae jopa xeinaeyo po coyene xua daxota Pablo pebexubinexatsi, xuano xua daxota jiwi pecubi botha peetsinexatsi. ³⁰ Ichitha bapoxonae jume tan xua judiomonae namuxuweta pebexubinexa tsainchi Pablo. Daxota Pablo nexainya beya itoroban. Tsipaeban judiomonae pia pentacaitorobi bicheito tatsi. Janje: ‘Icha awiya Pablo pacui itawetsiname xua abe bapon exana —cabaraichi— bapon pia xainya beya paponare. Papaebare Félixtha baxua, pocotsiwa Pablo exana’, jan. Baja, Claudio”, jei barapo cartatha.

³¹ Barapo soldadomonae exana pocotsiwa xua bayatha itoroba pon romanomonae soldadomonae pia pepa pentacaponaein tatsi itoroba pon pewun Claudio. Barapo soldadomonae barapo merawitha Pablo capoinchi Antípatris tomara beya. ³² Icha mataqueitha barapomonae soldadomonae pomonae petaxutha pona, caibe nawibiya ichaxota tauncuatsi soldadomonae pia bo beya. Pomonae cawayutha pona awiya Pablo barũ poinchi. ³³ Soldadomonae Pablo capoinchi Cesarea tomara beya. Barapomonae soldadomonae Félix catatsi barapo carta. Pablono baxota punaxubothopatsi. ³⁴ Félix matha yoroba carta. Bapoxonae Pablo yainyabatsi, jeichichi:

—Pablo, ¿eta po nacua jitomda? jei.

Pablo jume nota, jeye:

—Bara Cilicia nacua piyon, jei.

³⁵ Félix namchi, jeye:

—Poxonae judiomonae patsina, pomonae xua abe cayabara paeba, bapoxonae cajume taeinchi xua tana netsipaebiwam tsane, jei Félix.

Bapoxonae Félix itoroba soldadomonae xua Pablo yapucaenaeinchi ichaxota po botha peitũpanae bo, po bo Herodes cuenta naxuba.

¹ Icha matabitha poxonae cinco po matabibe tsuxubi, pebiwi pata Cesarea tomaratha. Ichun pewun Ananías. Bapon Ananías sacerdotemonae pia pepa pentacaponaein tatsi. Iru pitiri jiwimonaeno pata. Iru pon xua petapaebeibin jiwi, pon pewun Tértulo bapon napatopa. Barapomonae nacuara pata Cesarea tomaratha. Barapomonae Félix peitabaratha taumeinchi, xua Pablo abeya peyabara paebinexatsi. ² Poxonae Pablo carendenatsi, Tértulo Pablo abe yabara paebatsi. Félix baraichi, jeye:

—Félix, xam pon pana yanacua ewatame. Daxota juntea xanepanaya pajinompan. Maisa bara beta itorobiya canamataxeiname jiwi jinya neyaputae coyenewatha. Daxota xam beta exaname barapo nacuathe. ³ Félix, xam pon pata paca baru itura jinaeinchim, xua exaname yatsicaya wuna nawita barapo nacue nexa. ⁴ Jopa ichichipaeinyo xua tacayatacutsiwatsi. Daxota catsipaebatsi xua saya caeto pana nejume taema xua pata paca catsipaebiwa tsainchi. ⁵ Anoxuae payaputan xua Pablo bichocono pana cui fayacota xua abe exana. Matautano bapon judiomonae cui tsacabatsi xua nacaseba exanatsi daxita nacuantha. Matautano bapon, apara pomonae nazarenomonae barapomonae pia pentacaponaein tatsi, pomonae pecuidubi jiwi icha coyeneya pocotsiwa jopa xainyeyo. ⁶ Yawa Nacom pin pia bono tatsi juntucuru abe taexanatsino, poxonae juntucuru baru jonyatsi pon jopa judiomonae naexanaeyo Nacom pin pia botha. Daxota pawaetaban. Paxan paichichipan Pablo paperaxa exanan barompaya pata peitorobi coyenewa cuitha. ⁷ Ichitha soldadomonae pia pepa pentacaponaein tatsi, Lisias, daunweya pana wecobe maxu pitatsi Pablo. ⁸ Soldadomonae pia pepa pentacaponaein tatsi, Lisias, pana barai: ‘Pomonae Pablo abe jaintatsi moya Félix peitabaratha papaebare’, pana jei Lisias, jei Tértulo.

Tértulo equeicha namchi, jeye:

—Félix icha yainyabatsipame Pablotha metha bara yaputaetsipame xuaunxuae cabaraichichi. Xuaunxuae Pablo yabara paeban baxua xaniyan yatsicaya, jei Tértulo.

⁹ Judiomonae, pomonae Tértulo puna poinchi namchi: “Tértulo bara xaniyei paeba”, jei. ¹⁰ Nexata Félix Pablo moya pecobetha jume itorobatsi. Bapoxonae Pablo Félix baraichi, jeye:

—Yaputan xua caena bayatha ainya wei xam naexaname pon jiwi neyabara paebin xua penatsicuentsiwa xua abe peexanaexae xua barapo tomarathe nexa. Daxota juntu coyene weiweinan xua tana nayabara paebiwa neitabaratha. ¹¹ Icha yainyabame barapomonae, Jerusalén tomarapiwi, catsipaebichipa xua bayatha Jerusalén tomara beya ponan. Baxota ponan tsipei Nacom pin pia botha wuna tajainchinexa Nacom. Anoxuae petain doce matabibe yapucaewan poxonae xua bayatha ponan bara beya. ¹² Jopa jume matsontsonobeibinyo jiwi. Yawa jiwi jopa jume cui tsacabeibinyo xua anaepanaya penajume cayayatsinexa. Baxuan jopa exanaeinyo Nacom pin pia botha. Matautano judiomonae pia penacaetutsi bontha tatsi, baxuan jopa exanaeinyo. Matautano tomaran pecuariyathan jopa baxuan exanaeinyo. ¹³ Pomonae paeba xua pinae abe exanan, barapomonae jopa jume cupaetsi xua tana necui yopichiwa xua abe exanan. ¹⁴ Xaniwaicha catsipaebatsi xua xan Nacom tanacuitan pon tamo susato jiwi pia Nacom tatsi. Baraxua exanan xua jiwi cuiduban be pocotsi coyeneya xua paeba Jesús pia pena pecuidubiwa tatsi po pecuidubiwa judiomonae yabara nanta xeina xua pinae barapo pecuidubiwa jopa xainyeyo. Xan jume cowuntan daxita Moisés pia peitorobi coyenewan. Matautano po diwesin Nacom pia peitorobi jume pepaebiwi tina, barapo diwesinno jume cowuntan. ¹⁵ Xan barichindu, Nacom yabara baru jume cowuntsiya ewatan icha barapomonae ichi xua po coyene pomonae pewerapaewi equeicha asu tsane, pomonae peajuntucoyenebe jiwi iru xua asu tsane pomonae pejuntu coyene xanepanae jiwino. ¹⁶ Daxota jopa najuntu coyene acaurinyo tsipei nayaputan xua Nacom beta taexanan. Jiwithano jopa najuntu coyene acaurinyo.

¹⁷ “Ainya wei dapaein saya icha nacuantha poponan. Bapoxonae equeicha tatomara beya poronan, Jerusalén tomara beya. Patopan baxota Nacom pin pia botha poru yaitama paratixi caponan xua tamona nexa po paratixi ichamona taitoroba.

Matautano bara beyan xua baxotiya Nacom tatsita exanaenexa xua pocotsiwa be tacatsiwa Nacomtha, xua duwein tatautsiwa tsane. ¹⁸ Barapo coyenein awiya exanawiyān, bequein bayatha nenacui yabara jume weta exana po coyene xua daxota Nacom jopa tsitanyo xua taajuntucoyenebewan be pocotsi coyeneya xua judiomonae itoroba. Bapoxonae judiomonae pomonae Asia nacua weparena netaeba Nacom pin pia botha. Barapomonae baxota necaxiba bequein poxonae jopa jiwi namtsebiya wawaya exanaeinyo. ¹⁹ Pomonae netane Nacom pin pia botha pomonae Asia nacua werena pepatsiwi bewa dapomonae xote patsi xua necatsipaebinexa tsane xua tana neyabara paebinexa tsane xua abe taexanaewa. ²⁰ Icha barapomonae jopa patsiyo pomonae xote ena bu paeba. Barapomonae netane poxonae cain matha judiomonae pia pentacaitorobi bicheito peitabaratha uncuan. Barapomonae bu catsipaeba, icha metha bara abe exanan poxonae barapo pentacaitorobi bicheito peitabaratha tatsi uncuan. ²¹ Saya u baxua exanan poxonae peitabaratha uncuan, bapoxonae bichocono wawan. Janje: ‘Anoxuae poxonae paxam pana neyabara paebame xua tanatsicuentisiwa xua abe taexanaewa paxam pananta xeiname xua abe exanan yaitama jume cowuntan xua pewerapaewi equeicha asu tsaibi tsane’, jan jei”, Pablo.

²² Félix caena bayatha yabara yaputane Jesús pia pena pecuidubiwa tatsi. Daxota Félix cataunxuae abu jopa baxua yabara paebiyo pocotsiwa barapomonae paeba. Daxota Félix namchi, bapomonaetha, jeye:

—Abu bexa pacatsipaebinchi, poxonae soldadomonae pia pepa pentacaponaein tatsi patopaena pon Lisias, bapoxonae yabara paebin pocotsiwa Pablo exana, jei Félix.

²³ Nexata Félix itoroba soldadomonae pia pentacaponaein tatsi xua soldadomonae Pablo cataunxuae yapu eeniya pebaru jinompaenexatsi Herodes pia botha tatsi, bequein bara copata xua Pablo bara exanaena be pocotsiwa xua bapon ichichipa exana barapo botha. Matautano copatano xua Pablo bara pesiwa ponaenexatsi piamonae xua piamonae peyawenaenexatsi xua pocotsiwa nantawenona bapon.

²⁴ Icha matabitha pirapaeyo Félix piowabe patopabe. Petsiriwa pewun Drusila. Barapowa judiomonaewayo. Félix najume caitoroba ichuntha xua Pablo pewabinexatsi Félix berena, matautano xua Pablo Félix yabara petsipaebinexatsi xua po coyene jiwi jume cowunta Jesucristo. ²⁵ Pablo Félix tsipaebatsi xua pinae ainya cui xua jiwi beta yanthuthiya jinompa icha be Nacom ichi xua beta yanthuthiya popona. Matautano paebano xua pinae jiwi pia xoba abe exaneiba. Matautano namchino xua pinae caentacabitha tsane Nacom wabina daxita jiwi xua peyabara paebinexa xua penatsicuentisiwa xua abe peexanaexae barapo cae pin nacuathe. Félix najuntu coyene cabenaeca poxonae jume tane baxua. Pablo tsipaebatsi, jeichichi:

—Jinya tutu beya bara ponde. Bexa equeicha cawabinchi icha ichawiyo jopa neenaeyo, jei Félix.

²⁶ Félix nanta xaina xua paratixi pecatsiwa tsainchi xua Pablo pecatsiwa tsane xua daxota Pablo pepu copatsinexatsi. Daxota memecabiya wabatsi Pablo. ²⁷ Baraxua exana beya yaainya weibe jopa. Barapoxonae Félix weta xua pon peyanacua ewatsin jiwi naexana barapo Judea nacuathe, xua icha nacua beya pewarapaexae. Ichun Félix pecoutha tatsi tapatopatsi pon pewun Porcio Festo pon xuya pon peyanacua ewatsin jiwi naexana Judea nacuathe. Félix ichichipa xua peweyataewatsi xua judiomonae peweyataewa daxota Pablo jopa copatichi xua bara yatsicaewa pepu copatsiwatsi xua pepanepaewa tsane.

25

Meje yabara poxonae Pablo Festo peitabaratha tatsi tauncuatsi

¹ Festo bara patopa xua penaexanaenexa pon peyanacua ewatsin jiwi. Poxonae acoibi po matabibewe weta Cesarea tomara weya pona, Jerusalén tomara beya pona.

² Barapo tomaratha Jerusalén tomaratha sacerdotemonae pia pentacaponaein tatsi iru judiomonaeno pomonae pentacaponaein, barapomonae Pablo abeya cui yabara

canantsipaebatsi. ³ Barapomonae Festo baraichi: “Bũ painta ichamonae Pablo Jerusalén tomara beya capoinchi”, jei. Barapomonae baxua Festo jeichichi, tsipei Pablo namtotha ewatabobenapaebatsi pebexubinexatsi. ⁴ Festo jume nota, jeye:

—Canta Pablo Cesarea tomaratha eca xua soldadomonae barũ jinompatsi. Tha nama imoxoyo bara beya equeicha caibeya ponaetsi. ⁵ Painyamonae jiwana pomonae pentacaponae moya bũ barapomonae nepuna pona Cesarea tomara beya. Icha Pablo abe exana, metha moya baraxota Pablo jame be cui yabara paebichipatsi barapomonae, jei Festo.

⁶ Festo cataunxuae Jerusalén tomaratha ocho po merawiyobe yapucaewa xua equeicha ainya dapaeyobe. Barapoxonae Cesarea tomara bewarapiya caibeya. Icha matabitha Festo eca peequeibithopeibiwatha po tututha ichaxota yabara paebequeiba jiwi xua penatsicuentiwa xua abe peexanaexae. Festo barai soldadomonae: “Painta caponde Pablo taxainya berena”, jei. ⁷ Poxonae Pablo patopa, judiomonae imoxoyo umenarũcũpa pomonae Jerusalén tomara weparena. Barapomonae judiomonae Pablo yacaincha matawaqueicha umenatsi. Barapomonae Pablo cui yabara paebatsi xua abe exana nawita. Ichitha xua barapomonae paeba jopa tsita itapeinya xeinaeyo xua apara bara xainyei pocotsiwa barapomonae paeba. ⁸ Nexata Pablo pia coya nayabara paeba, jeye:

—Xan jopa abe exanaeinyo. Jopa abe yabara paebinyo Moisés pia peitorobi coyene tatsi. Matautano Nacom pin pia bo jopa abe yabara paebinyo. Matautano jopa abe yabara paebinyo romanomonae itorobiya pia pepa peewatsinchi tatsi, jei Pablo.

⁹ Festo bepara antobetsei judiomonae. Daxota Festo Pablo yainyabatsi, jeichichi:

—¿Jinya ponaetsi Jerusalén tomara beya xua baxotiya cayabara paebinchi nenatsicuentiwa xua abe neexanaexae? jei Festo.

¹⁰ Pablo jume nota, Festo jume notatsi, jeye:

—Xan uncuan peitabaratha tatsi pomonae pentacaponae, pomonae romanomonae itorobiya pia pepa peewatsinchi tatsi itoroba. Barapomonae pentacaponae bara itacũpatsi xua barapo tomarathe tana neyabara paebinexa xua tana natsicuentiwa xua abe taexanaexae. Jopa nantawenonaeinyo xua taponae tsane Jerusalén tomaratha. Xam bayatha beta yaputaneme xua jopa abe exanaeinyo judiomonaetha. ¹¹ Icha xaniwaicha abe exanan barapomonaetha, metha moya benebexubina. Jopa junuwinyo xua tatũpaewa tsane. Ichitha icha jopa xainyeyo xua barapomonae neyabara paeba, metha nexata barapomonae jopa nebexubichipae. Tha nama warapaetsi romanomonae itorobiya pia pepa peewatsinchi beya, tacoya nayabara paebichi, jei Pablo.

¹² Copiya matha Festo tsipaeba pejume yaweneibiwichi. Barapoxonae Festo, Pablo baraichi, jeye:

—Yaitama aunxuae siwa ponapaebame romanomonae itorobiya pia pepa peewatsinchi tatsi, xua necayabara paebinexa xua nenatsicuentiwa xua abe neexanaexae daxota moya ponaename bapon beya, jei Festo.

Meje yabara poxonae Pablo uncua Agripa peitabaratha tatsi pon peyanacua ewatsin jiwi

¹³ Icha matabitha Agripa, pon peyanacua ewatsin jiwi, bapon pona Cesarea tomara beya. Petsiriwa puna poinchi, bapowa pewũn Berenice. Festo siwa poinchi Cesarea tomaratha iya. ¹⁴ Baraxotiya Agripa petsiriwano ainya matabin ecabe. Festo namchi Agripatha, jeye:

—Xote eque pon cain Félix xubeta Cesarea tomaratha xua bapon pebarũ jinompænexatsi soldadomonae. ¹⁵ Poxonae Jerusalén tomaratha ecan, sacerdotemonae pia pentacaponae jiwi tatsi, pitiri jiwino, barapomonae netsipaeba xua bepa pinae Pablo itorobin xua petũpaewa tsane. ¹⁶ Barapomonae baran: ‘Barapocotsi coyene romanomonae pan pata cui coyene. Paxan jopa pacopatsinyo xua ichũn amanaya bexotsi. Jame copiya pomonae xua abe yabara paeba ichũntha, barapomonae bewa paebina bapon peitabaratha tatsi icha bara metha bapon xaniwaicha abe exana. Bapoxonae bapon pia coutha beya nayabara paebichipa xua barapomonae paeba’, jan. ¹⁷ Daxota poxonae barapomonae pata xote, jopa be bayathinyo yaitama. Daxota baya caena

nainya ecoundecan, po tututha yabara paebequeiban jiwi xua penatsicuentisiwa xua abe peexanaexae. Itoroban soldadomonaē xua Pablo pecaponaenexatsi taxainya berena. ¹⁸ Xan nanta xeinan xua Pablo bichocono abe exana. Ichitha poxonaē barapomonaē asiya umena peyabara cueicueijeinexa tsainchi, Pablo jopa paebiyo po diwesi xua daxota tananta xeinaenexa xua Pablo bara abe exana cou. ¹⁹ Pocotsiwa xua Pablo yabara cueicueijeichi, saya xua apara pia pejume cowuntsiwa tatsi yabara, matautano xua Pablo peyabara cueicueijeixae pebin pon Jesús baraichi, xua pinae equeicha asu poxonaē tupa. Seicaya nama barapomonaē paeba xua pinae bapon apara tupa, xua equeicha jopa asuyo. ²⁰ Jopa yaputaeyinyo xua baxua exanan xua Pablo abe yabara paebatsi. Daxota copiya matha Pablo yainyaban, janje: ‘¿Xam, jinya ponaetsi Jerusalén tomara beya xua baraxotiya cayabara paebinchi xua nenatsicuentisiwa xua abe neexanaexae?’ jan. ²¹ Ichitha Pablo dapo jumetha netsipaeba xua bepa ponaēi Augusto beya, romanomonaē itorobiya pia pepa peewatsinchi beya, pon xua bepa pinae yabara paebinchi xua penatsicuentisiwa xua abe peexanaexae. Daxota itoroban soldadomonaē xua Pablo abu pebaru jinompaenexatsi soldadomonaē, beya abu poxonaē necui jupa xua itorobin pontha pon romanomonaē itorobiya pia pepa peewatsinchi, jei Festo xua Agripa tsipaebatsi.

²² Nexata Agripa Festo baraichi, jeye:

—Tha bequein iru jume taetsiru Pablo, jei Agripa.

Agripa jume notatsi, Festo jume nota, jeye:

—Metha moya baya tsane jume taename, jei Festo.

²³ Bara icha matabitha Agripa iru Berenice patopabe. Papanuwa peitupanaewa nama xatatabe. Agripa pinmonaē baru pata, soldadomonaē pia pepa pentacaponaewi tatsino, iru Cesarea tomara pia pentacaponaewino. Barapo bicheito Agripa baru pona. Festo itoroba soldadomonaē xua Pablo pecarendenaenexa tsainchi. ²⁴ Festo barai, jeye:

—Agripa, xam pon neyanacua ewatsin jiwi, iru pomonaē pecanamataxeinaē jiwi pamdu. Bapon xote uncue Pablo. Daxita judiomonaē iru Jerusalén tomarapiwi, iru Cesarea tomarapiwi, daxita barapomonaē Pablo jume yabara paebatsi xua pinae abe exana. Matautano barapomonaē neitoroba nawita xua bepa pinae Pablo itorobin xua petupaewa tsane. ²⁵ Ichitha xan saya tacoya nanta xeinan be jopa neichichi abe exanaeyo, poxonaē nejume nota, poxonaē tsipaeban. Daxota jopa becaenaetaxubinyo xua pebexubiwa tsainchi. Ichitha Pablo netsipaeba xua bepa ponaēi romanomonaē itorobiya pia pepa peewatsinchi tatsi beya, pon pewun Augusto, tsipei bepa pinae yabara paebichi xua penatsicuentisiwa xua abe peexanaexae. Daxota yabara najuntu coyene wetan xua bapon Pablo taitorobiwa tsane bara beya. ²⁶ Yaitama bapon jopa abe exanaeyo, jopa yaputaeyinyo xua eta be tajumichiwa tsane barapo cartatha poxonaē Pablo itorobin xuano xua cartano cayabara cui pu catsin bara beya. Daxota anoxuae Pablo painya itabaratha cuaranotan. Xam Agripa, pon neyanacua ewatsin jiwi, moya matha copiya yainyabare Pablo, tsipei tha beta cui yabara tatinaetsi bara beya pontha pon romanomonaē itorobiya pia pepa peewatsinchi. ²⁷ Tsipei inta jopa xanepanaetsipae icha itorobichipan Pablo pon pewaetabinchi icha jopa yabara paebinchipae xua pocotsiwa bapon peexanaexae, jei Festo xua Agripa tsipaebatsi.

26

Meje yabara poxonaē Pablo pia coutha cuita paeba, Agripa peitabaratha tatsi, pon peyanacua ewatsin jiwi

¹ Bara nexata Agripa Pablo baraichi, jeye:

—Icha jinya paebichi, moya taema, jei.

Barapoxonaē Pablo namaxu yoicha xua Agripa jacobatsi. Bapoxonaē namchi, jeye:

² “Agripa, pon neyanacua ewatsin jiwi, maisa bichocono juntu coyene weiweinan, xua anoxuae neitabaratha tana nayabara jume paebixae tsane pocotsiwa bayatha neyabara paeba judiomonaē po coyene xua pinae abe exaneiban. ³ Poxoru yaitama, xam Agripa, bayatha yaputaneme pata juntu coyenein pomonaē judiomonaē panxaein.

Yaputanemeno baxuan xua pana najume matsontsonoban. Daxota cabaraichi xua saya beta nejume taema xua jopa aitaconaeinde”, jei Pablo.

Meje yabara poxona Pablo nayabara paeba, poxona pinae cataunxuae jopa jume cowuntsiyo Jesús

⁴ Equeicha Pablo namchi, jeye: “Daxita judiomona barapomona neyaputane xua poxona pexuyon, poxona caena bayatha pia xantha tatsi poponan xua tanacuaxae. Barichino neyaputane poxona Jerusalén tomaratha poponan. ⁵ Icha yainyabatsipame barapomona, yabara catsipaebichipa pocotsiwa exaneiban xua fariseomona pocotsi jantũ coyene cuidubeiba, pocotsiwa judiomona cuidubeibatsi, tsipei xan fariseomon-aepin. Daxita barapomona yaputane xua caena bayatha jume cowuntan daxita pocotsiwa xua barapomona itoroba. Fariseomona itapeta cuita exaneiba pocotsiwa Nacom itoroba beyacaincha ichamona xua exaneiba. ⁶ Judiomona necapona xote tsipei saya poxoru yabara wũnae ewatan xua bexa Nacom asũ exanaena pomona xua werapa. Baxua pinae Nacom wamo susato jiwi yabara tsiwũnae muxu dutatsi. ⁷ Patamona pomona Israel nacuamonaepiwi pomona xua doce pomona bicheitobe, baxua yabara jume cui wũnae ewata poxona petũpaewi equeicha asũ exanaeinchi, xua poxona Nacom exanaena. Daxota barapomona Nacom wũnae jainteibatsi. Mataũtano itapeta exana pocotsiwa Nacom itoroba, merawithano, matabithano. Xam Agripa pon neyanacua ewatsin jiwi catsipaebatsi baxua tayabara jume cowuntsixaerũ, daxota judiomona neyabara paeba xua pinae abe exanan. ⁸ Painya xoba pananta xeiname xua Nacom jopa itacũpaetsi xua equeicha jiwi asũ peexanaewatsi pomona xua werapa”, jei Pablo.

Meje yabara poxona Pablo nayabara paeba xua pinae copiya abe exana nawita pomonaetha pomona pejume cowuntsiwichi Jesús

⁹ Equeicha Pablo jeye: “Xan copiya tacoutha nanta xeinan xua bewa bichocono abe exanaein pomonaetha pomona Jesús pejume cowuntsiwichi pon Nazaret tomara-pin. ¹⁰ Jerusalén tomaratha baxua exanan. Sacerdotemona pia pentacaponawei pia peitorobi coyenewa necata xua daxota tana necui jũpaewa xua jiwi tacaponawei jiwi pecũbi botha. Pinmonaeca caponan, pomona Jesucristo pejume cowuntsiwi. Xan yabara jume jejan xua barapomona pejutewiwatsi. ¹¹ Anaya caenaetan, peraxa exananno poxoru ichipan xua barapomona pentsina xua Jesús pejume cowuntsiwatsi. Ũ baxua exanan. Daxita judiomona pia penacaetutsi bontha tatsi exananno. Bichocono anaepanan. Daxota icha nacuantha ponan tajeichinexa pomona pejume cowuntsiwichi Jesús xua barapomona abe taexanaenexa”, jei Pablo.

Meje yabara poxona equeicha Pablo nayabara paeba poxona pinae jume cowunta Jesús

¹² Equeicha Pablo namchi, jeye: “Barichi sacerdotemona pia pentacaponawei tatsi pia peitorobi coyenewa necata xua daxota tana necui jũpaewa xua taponawei Damasco tomara beya, xua pomona jume cowunta Jesucristo tacaponawei tsane Jerusalén tomara berena. ¹³ Xam pon neyanacua ewatsin jiwi bara xaniwaicha catsipaebatsi poxona namtotha paenaponan poxona mateinyaxae tsuxubi pecoicha tan xua peitaboco wejopeica, pin coicha po coicha beyacaincha xua xometo. Barapo coicha pomona nepuna pona nebarũ matabaicha matatsun uncueica. ¹⁴ Nexata daxita iratha paothopan. Jume tan xua pon hebreo jumetha nebarai, jeye: ‘Saulo, Saulo, ¿eta xua tamona inta abe exaname? Poxona tamona peraxa exaname, apara jinya coutha atene nacana exaname icha be buey ichi poxona ba pia coutha xua xota sojei nataxu matababa’, nejjei. ¹⁵ Nexata jume notan janje: ‘Pon jiwi Necanamataxeinaem, ¿jintam xamda?’ jan. Nejume nota jeye: ‘Apara bara xan, Jesús ponxaein inta abe exaname tamona pomona tana nejume cowuntsiwi. ¹⁶ Nontaponde. Xua anoxuae necotame catsita naitutatsi. Apara tha tana nejume yopichim. Mataũtano bexano equeicha ichawa necotsiname tana neyabara paebinexam tsane baxuanno. ¹⁷ Cacui itorobatsi xua Nacom Pejume Diwesi necueicueijamnexam. Nexata cacapanepaeinchi poxona juntucuru

caperaxa exana judiomonae iru pomonae jopa judiomonae naexanaeyo. ¹⁸ Caitorobatsi judiomonaetha iru pomonaetha pomonae jopa judiomonae naexanaeyo xua jopa equeicha pejinompaenexa poxonae jopa jume cowuntsiyo. Matautano caitorobatsi xua barapomonae jopa peexanaponaenexa pocotsiwa caurimonae pia pentacaponaein tatsi itoroba, pon Satanás, jame meisa peexanaenexa pocotsiwa Nacom itoroba. Matautano caitorobatsi xua barapomonae tana nejume cowuntsinexa. Bapoxonae yabara juntemainaein barapomonae abe pia peexanae cuiru coyenein tatsi, matautano xua pexeinaenexa pocotsiwa Nacom yabara tsiwænae muxu duba', nejei Jesús", jei Pablo.

Meje yabara poxonae Pablo exana pocotsiwa Nacom itoroba poxonae tsita naitutatsi namtotha

¹⁹ Equeicha Pablo namchi, jeye: "Agripa, xam pon neyanacua ewatsin jiwi, xan jopa jumefebinyo xua Jesús neitoroba poxonae itaboco wenetsita naitutsica xua namtotha netsita naituta poxonae pecoichatha jume tan xua Jesús netsipaeba. ²⁰ Copiya matha Damasco tomarapiwi tsipaeban Nacom Pejume Diwesi. Bapoxonae equeicha barapo diwesi tsipaeban Jerusalén tomarapiwi. Bapoxonae equeicha daxita Judea nacuamonaepiwi barapo diwesi tsipaebanno. Iru pomonaetha pomonae jopa judiomonae naexanaeyo tsipaebanno. Barapo diwesi tsipaeban xua barapomonae icha juntu coyenein pexeinaenexa, yawa Nacom pejume cowuntsinexatsi, matautano xua barapomonae petsita itapeinya xeinaenexa jiwitha xua bara Nacom jume cowuntatsi xua beta peexanaexae. ²¹ Daxota judiomonae newaetaba poxonae Nacom pin pia botha patopan yawa bepa nebexubei. ²² Ichitha Nacom neyawena. Daxota awiya Nacom Pejume Diwesi paeban bichocono daxita i dapomonaeintha pomonaetha pomonae pepawi jiwi iru poponaethano pomonae peainya cui jiwi. Baraxua saya meisa paeban be pocotsi coyeneya matha juinya Moisés yabara wænae tsiwanaya paeba iruru be pocotsi coyeneya matha juinya Nacom peitorobi jume pepaebiwi yabara wænae tsiwanaya paeba. ²³ Barapomonae tsipaeban po diwesi yabara xua pinae bexa Mesías peraxa exanaeinchi ichamonae. Matautano bapon pinae pon xua copiya pomonae pewerapaewi asu nanta caexanaeinchi. Matautano xua pinae judiomonae iru pomonae jopa judiomonae naexanaeyo yabara yaputane exanaeinchi pecapanenebiyae diwesi jume", jei Pablo xua Agripa tsipaebatsi.

Meje yabara poxonae Pablo paeba Jesús pejume diwesi Agripa xua Agripa pejume cowuntsinexa

²⁴ Poxonae baraxua Pablo najume weta xua nayabara jume paeba, Festo jume daunweya wawai, jeye:

—¡Pablo, maisa cantsiyaibeca poxoru saya u necuidubi daxota cantsiyaiba! jei Festo.

²⁵ Pablo jume nota, jeye:

—Festo ponxaem tacabaræ cui itura jinaeinchi, jopa nentsiyaibiyo apara. Xuaunxuae paeban, apara seicayaræ xua xaniwaicha paeban xua bara apara pexainyeiwa. ²⁶ Ee taema, Agripa, pon pepa peyanacua ewatsin jiwi pon xote eque. Bapon yaputane xua xaniwaicha paeban. Bapontha jopa junuwinyo xua tsipaeban. Xuaunxuae catsipaebatsi bapon baxua daxita yaputane poxoru jopa namicha exanaeinyo. ²⁷ Agripa, xam pon neyanacua ewatsim jiwi. ¿Jume cowuntame pocotsiwa Nacom pia peitorobi jume pepaebiwi paeba? Bara yaputan xua bara jume cowuntame, jei Pablo.

²⁸ Agripa jume nota, Pablo jume notatsi, jeye:

—Saya caeto netsipaebame. Saya barapo jumetha nanta xeiname xua xan nainya jume cowuntsinan Jesús, jei Agripa.

²⁹ Nexata Pablo namchi, jeye:

—Xua caeto paca tsipaebatsi yawa icha matowa paca tsipaebatsi bara ba Nacomtha pacata wæcatsi xam nexa, iru pomonae nexa, pomonae nejume tane painya nejume cowuntsinexam tsane Jesús. Ichichipan xua painya neexanaewa icha ichin xua tajume cowuntsiwa, bara bequein jopa ichipaeinyo xua painya nemaxutha painya nexainaewa jiwi pecæbi nainto be pocotsi nainto xuaunxuae tamaxutha ducua, jei Pablo.

³⁰ Poxonae Pablo najume weta baxua, Agripa pon peyanacua ewatsin jiwi iru Berenice asiya uncuatababe. Iru Festo pon peyanacua ewatsin jiwi asiya uncuataba. Pomonae iru ena asiya umenarucupa. ³¹ Aisowa be-iyiya barapomonae natsipaeba, najei:

—Barapon Pablo jopa apara abe exanaeyo po coyeneyatha xua daxota bapon pebexubinexatsi, matautano po coyeneyatha xua daxota bapon jiwi pecubi botha peetsinexatsi, najei barapomonae.

³² Agripa tsipaeba, Festo baraichi, jeye:

—Icha metha jopa naca wucaetsipae Pablo xua peponaewa tsane pontha pon romanomonae itorobiya pia pepa peewatsinchi xua baxotiya peyabara paebinexatsi penatsicuentsiwa xua abe peexanaexae metha pu copatsipatsi xua bara pepanepaewa tsane yatsicaewa, jei Agripa.

27

Meje yabara poxonae Pablo Roma tomara beitorobiyatsi

¹ Barapomonae najuntu coyene weta xua pata taneitorobiwa Italia nacua beya. Pablo iru ichamonaeru pomonae peteiquebiwichi daxita barapomonae itorobatsi Roma tomara beya. Pon barapomonae matabapoinchi bapon pewun Julio, pon soldadomonae pia pentacaponaein tatsi. Barapo matabuxuyo soldadomonae bicheito wun dutatsi “Augusto soldado bicheito”, jei, poxoru barapo soldadomonae Augusto tanacuitatsi, pon romanomonae itorobiya pia pepa peewatsinchi. Barapo soldadomonae Pablo iru ichamonae caponatsi Augusto beya. ² Pepa weranaetha pawarapan, po nae Adramitio tomara werena pona. Barapo nae equeicha Asia nacua beya ponaena. Po tomaraxi pitapatha ena barapo tomaraxi bepa siwa ponaeni. Ichun pana cueyata. Bapon pewun Aristarco Tesalónica tomarapin. Barapo tomara Tesalónica tomara eca Macedonia nacuatha. ³ Icha matabitha Sidón tomaratha papatan. Baraxota barapon Julio, Pablo baru jume wunaetsi. Matautano bapon Julio, Pablo copatatsi xua bara Pablo piamonae pesiwa ponaewa tsainchi, xuano xua bara Pablo peyawenaenexatsi xua xoxi nantawenona. ⁴ Bara Sidón tomara wepawarapiyan weratha. Bara weratha paenaponan joibo cuiyainwa Chipre tunaeto pantawaqueban, yaitama bichocono pin joibo dena ichaxoyo copiya payiyan. ⁵ Bara mar mene iya paenaponan, Cilicia nacua, Panfilia nacuano imoxoyo pacaquita enaponan. Bapoxonae Mira tomaratha papatan, po tomara Licia nacuatha eca.

⁶ Baraxota pon soldadomonae pia pentacaponaein tatsi bapon icha nae taeba baraxota. Barapo nae Alejandría tomara werena pona. Barapo nae iru seicaya Italia nacua beya ponaena. Barapo naetha equeicha Julio pana baru iya Italia nacua beya. ⁷ Ainya matababin saya bewayo paenaponeiban, poxoru yaitama joibo jera caewa carena tsaibi. Gnido tomara paxenta enaponan. Salmón tomarano paxenta enaponan. Creta tunaetono pantawaqueban. ⁸ Bewayo weratha paenaponan, pitapa pacaquita enaponan. Tomaratha papatan ichaxota pexutoroto. Baxota pajebounan, po tomara pewun Buenos Puertos. Barapo tomara imoxoyo eca ichaxota Lasea tomara.

⁹ Baraxota came awiya ainya matababin paenan. Bayatha yapu caewa barapo matababin poxonae barapomonae warapapaeba barapo matabitha xua pin mene mara mene iya. Tsipei imoxoyo awubo tsurucuae tsoponae, daxota Pablo nanta xeina xua icha metha paponatsipan, panacabetsipan. Daxota barapomonae Pablo muxuweta. ¹⁰ Pablo namchi, jeye:

—Pebiwi pam, pana nejume taema. Ichaunxuae warapaeinchi methaunxuae nacetinchi. Matautano methaunxuae weranae abe exanaena. Matautano xoxino xua capoinchi methaunxuae napentsina. Matautano jiwi methaunxuae napentsina, jei Pablo.

¹¹ Ichitha soldadomonae pia pentacaponaein tatsi, bapon Julio, jopa jume naitomatsiyo xua Pablo tsipaeba. Ichitha dapo jumetha saya meisa pon jera pecanamataxeinaein iru pon jera pexeinaein, baponbe itapeta jume naitomatatsibe. ¹² Barapomonae nanta

xeina, xua baraxota jopa beenaeyo poxoru barapo tomara jopa cui wunaeyo xua jera peboacaewa poxonae awubo pin joiboxae. Pinmonae barapomonae jiwana tsita xanepanatsi xua Buenos Puertos weya pewartapenexa jeratha Fenice tomara beya, po tomara eca Creta tunaetotha. “Methaunxuae tsiwanaya payaeinchi penacabetsi awubo, joibono”, jei. Barapo tomara cui wunae xua ichaxota jera jebouneiba. Baxota joibo yayapa poxoru tomara naita cafeteca, poxoru joibo jopa patopaeyo pocotsiwa wetsica yawa pocotsiwa wetsina. Baraxota bepa enaei poxonae awubo tsuxubi.

Meje yabara poxonae maratsaca daunwei pepa mar mentha

¹³ Nexata bewayo joibo tsuncuae, be pocotsiwa parowa wejopeina. Daxota barapomonae namchi: “B̄n̄ poinchi cataunxuae saya tsiqui joibiyo”, jei. Bapoxonae totabiya jera. Barapo Creta tunaeto imoxoyo pitapa pacaquita enaponan weratha. ¹⁴ Poxonae saya caeto paenaponan bapoxonae pin joibo pana epa taepona, Creta nacua tunaeto wejoparena. Jera epa yutaba. ¹⁵ Nexata joibo jera muxunenababa. Canta joibo nawita, daxota jopa paponaeinyo joibo beya. Daxota saya pacopatan xua saya bara joibo pana yanacaputabiyaenaba. ¹⁶ Cauda tunaetiyo bepana yanacaputabiya. Baraxota ichaxota joibo yayapa, tsica naeyo jeriyo po naeyo paquetoutan, pajontaxuinan pepa naetha. ¹⁷ Panacuitontan xua pajonta xuinan. Barapo naeyo pepa jeratha pacutabotan. Nexata jera penacuichiwi pepa b̄m̄acantha p̄ema wem̄ux̄ub̄uru capabina, m̄ux̄ub̄uru babataruba xua pewacatabiyainwa joibo. Nexata barapomonae bichocono junuwa poxoru nanta xeina xua mexeya itara jera naxatatabawei taetabotha, po taetabo pew̄n̄ Sirte. Daxota wera jontabota jeratha. Saya jera caputabiya joibotha. ¹⁸ Icha maticabitha came awiya maratsacan bichocono daunwei. Daxota ichawan mentha bebai xua xuan capona. ¹⁹ Icha maticabitha daxota pabeban xua jeratha jeba tsipei ichichipa xua tafafanatsi. ²⁰ Ainya maticabin came awiya jopa panecotsinyo xometo. Opiteino jopa panecotsinyono. Pajunuwan. Pananta xeinan: “Metha aparaunxuae jopa nacapanenebiya tsainchi. Bunothopaeinchi aunxuae”, pajan.

²¹ Ainya maticabin pana yapu xenaca xua jopa panabanaeinyo. Pablo nontapona. Barapomonae baraichi, jeye:

—Bara bayatha paca tsipaebatsiba: ‘Creta tunaeto beya, jopa pawarapaeinde’, paca baraichiba. Daumetha equeicha pawarapame. Daxota aunxuae jera abe exana. Matautano pananta puxanameno xuaunxuae pabebam xoxi pacaponame. ²² Ichitha saya jopa pajunuwinde. Jopa pajiwana t̄paem tsane, bequein meisa jera naxubina. ²³ Merawi matatsunpin netsita naituta. Barapo matatsunpin Nacom itoroba pon Tanacom xuano xua taexanaexae pocotsiwa bapon neitoroba. ²⁴ Barapo matatsunpin nebarai: ‘Pablo jopa junuwinde poxoru bexa tsane romanomonae itorobiya pia pepa peewatsinchi pon Augusto, peitabaratha tatsi uncuaename. Daxota pomonae xua napona cata capanepatsi Nacom’, nejei matatsunpin. ²⁵ Daxota, paxam pana najunt̄u coyene tsacabare, poxoru xan nanta xeinan xua pocotsiwa matatsunpin netsipaeba bara baxua exanaena. ²⁶ Ichitha petunaetotha naca monapentsina, jei Pablo.

²⁷ Poxonae catorce po maticabibe tsuxubi, barapoxonae mar mene pacaxiban. Barapo pepa mar mene pew̄n̄ Adriático mene. Barapo mentha joibo pana yana muxunenababa. Merawi papaetha, pomonae petanacuichiwi barapo naetha, barapomonae nanta xeina xua imoxoyo ira itiya pona. ²⁸ Barapomonae mene epa tutu canaubareca. Treinta y seis po m̄ epatiyobe xeina xua iratha deca. Caeto equeicha mene epa tutu canauba, baxota veinte y siete po m̄ epatiyobe xeina xua iratha deca. ²⁹ Barapomonae pejunuwixae xua jera tofotabina poxonae yutabina ibowantha, daxota barapomonae po nainto arewe, xua jera duntaba exanaduta petafe xoreca. Cuatro po naintobe xoreca peruntaba exanadutsinexa. Matautano barapomonae Nacomtha w̄ca xua xometo pentha tsane, penecotsinexa tsane. ³⁰ Pomonae petanacuichiwi barapo naetha barapomonae nanta xeina xua p̄ēc̄paewa. Daxota barapomonae naemata po nainto arewe dureca p̄ēx̄ureca. Ichitha tsiqui naeyo mentha durecano, poxoru pia namicha d̄c̄paetsi

barapo naeyotha. ³¹ Pablo barai Julio, pon soldadomonaē pia pentacaponaein tatsi, xuano baraino soldadomonaetha, jeye:

—Icha pomonaē petanacuichiwi barapo naetha icha jopa enae tsane barapo pin naethe, jopa Nacom capanenebiyaē tsane, jei Pablo.

³² Daxota soldadomonaē jeriyo m̄ ucuiba. Jeriyo mentha jopeica.

³³ Poxonaē caem̄mbo, Pablo pijiwimonaē jain itoroba. Pablo pijiwimonaē barai, jeye: —Bayatha dos po semanabe painya junuwi jopa bichocono panabanaem poxoru pajunuwame xua pabunothopame. ³⁴ Daxota pin jumetha paca jeichichi. Moya matha paxaema tsipei baxua ainya cui xua painya nenacapanenebiyaenexam. Bara caein jopa napuxanaē tsane. Matautano jopa caentanatiyo aichurucuaē tsane.

³⁵ Poxonaē Pablo najume weta, pecobetha pan pita, Nacomtha tsipaeba barapomonaē peitabaratha tatsi. Barapoxonaē pan epa janaxuba. Bapoxonaē xane. ³⁶ Bapoxonaē barapomonaē najunt̄ coyene tsacabar̄cupa. Matautano barapomonaē daxita j̄ntema nabaner̄cupa. ³⁷ Jerapiwi doscientos setenta y seis po matab̄x̄m̄onaēbe pan xua daxita pan. ³⁸ Poxonaē barapomonaē najain wetar̄cupa, daxita barapomonaē trigo xu bebai pepa mentha poxoru bepa jera tafafanaetsei.

Meje yabara poxonaē jera bunareca

³⁹ Poxonaē xometo baya pentha tsina, pomonaē petanacuichiwi barapomonaē jopa yaitaeyo ira, po iratha muxu pepatsi. Poxonaē barapomonaē pexutoroto tane, barapomonaē nanta xeina xua juntucuru jebounaena taetabo itapatha. ⁴⁰ Daxota barapomonaē nayana m̄ ucuiba, xua po nainton arewe mene b̄pana bobendeca. Po catenano pecabobotsi catena, barapo catenano isanaxoreca. Nexata paparuwa duta wera naetotha. Barapo wera peb̄x̄utha duta. Jera nainya cacuita caputabiya ira. ⁴¹ Ichitha barapoxonaē barapo nae ichaxota tsewa tuw̄tha naxatatabarena. B̄x̄ naxatatabuncua bichocono. Petafe fotaba maratsacatha.

⁴² Soldadomonaē bepara jutebei pomonaē peteiquebi jiwichi, tsipei poxonaē mentha othopaena mexeya itara d̄cupaenawei. ⁴³ Ichitha soldadomonaē pia pentacaponaein tatsi, bapon Julio, ichipa xua Pablo as̄ popona. Daxota Julio jopa yabara jume copatsiyo xua jutebinchi pomonaē peteiquebi jiwichi. Bapoxonaē Julio itoroba pomonaē yaputane xueiba, copiya pepatsinexa tsane pepa iratha. ⁴⁴ Pomonaē xua jopa xueibiyo napaewan cobena xueibiya. Matautano barapo jera pepan cobena xueibiya. Daxota daxita panenebiya pepa iratha.

28

Meje yabara poxonaē Pablo Malta tunaetotha patopa

¹ Poxonaē po tunaetotha papanenebiyan ichamonaē pana tsipaeba: “Apara Malta tunaeto”, jei. ² Malta tunaetopiwi beta pana matenta weiweinaya waba. Bichocono ema duna. Ema pana atsana. Aqueno. Daxota barapomonaē pin isoto itutaeta. Bapoxonaē barapomonaē pana waba: “Anthā panonopenare”, jei. ³ Pablo isoton nota po isoton tsewa. Poxonaē barapo isoton pepa isototha bebebeya, barapo isotontha jomo athabe jopeina poxoru bichocono atou. Pablo cobe sinaducuatsi barapo jomo. ⁴ Malta tunaetomonaēpiwi, Pablo cui tainchi xua jomo cobe sinaducuatsi. Barapomonaē nantiya natsipaeba, najei: “Barapo pebin apara pon jiwī pejutebin. Bequein panepa pepa mar mentha ichitha barapo nacom, po nacom pew̄n Justicia, bapon itoroba jomo pesinarucuaenexa tsainchi, xua bapon jopa pepoponaenexa tsane”, jei barapomonaē.

⁵ Ichitha Pablo nacobe n̄nt̄aba jomo isototha. Saya axaibi tsuncuaē Pablo. ⁶ Daxita barapomonaē Pablo cui necotumeinchi xua cobe putsunanaya yawa icha iratha jopiyaena pet̄paein. Bayatha cui wenaewatumena. Poxonaē baxua jopa daichiyo, daxota equeicha ichawa nanta xeinar̄cupa: “Metha moya bara Pablo nacom tsecae”, jei bapomonaē.

⁷ Ichaxota isoto, baxota ainya iran bobena Malta tunaeto peewatsin, bapon pia iran tatsi. Bapon, acoibi po matab̄c̄ibe beta pexaewa pana apata. Baxota yawa pamaitenan.

Bapon pewun Publio pon iran pata tan. ⁸ Publio paxa tatsi camatha boca. Domaebatsi. Suibatsino. Pablo barapo tutu bejoniya ichaxota bapon boca. Bapoxonae Pablo cobe jayabiya tsipaeba Nacomtha. Bara bapon axaibi tsanaya. ⁹ Poxonae baraxua exana Pablo, daxita Malta tunaetomonae, pomonae peatenewi, baxota pata. Iru Pablo axaibi exanaru daxita barapomonae. ¹⁰ Malta tunaetomonae pana baru cui itura jina nawita. Bapoxonae poxonae equeicha pawaraparucspan jeratha, pana nepu catsiba xua xoxi pata nantawenonaenexa poxonae weratha pawarapan.

Meje yabara poxonae Pablo Roma tomaratha patopa

¹¹ Poxonae acoibi po xometiyobe payapucaewan barapo Malta tunaetotha, barapoxonae pawarapan. Pawarapan weratha po naetha po nae barapo Malta tunaetotha ayawubo tsuncuae. Barapo nae Alejandria tomara werena peponae nae. Barapomonae barapo naetha petafetha cuareta naewiyo be jitonyobe. Saya canaxoba pia nacombe. Icha nacom pewun Castor. Icha nacom pewun Polux. ¹² Siracusa tomaratha pajebounan. Barapo tomaratha acoibi po matabibetha paenan. ¹³ Barapo tomara wepawarapiyan, Siracusa tomara weya. Bapoxonae Regio tomaratha papatan. Icha matabitha joibo wexubiye Puteoli tomara bepana yanacaicha ainya merawibe. Baxota papatan Puteoli tomaratha. ¹⁴ Baraxota pacaxiban pomonae iru pejume cowuntsiwichi Jesus. Barapomonae pana waba: “Cae semanatha pana baru enare”, jei. Bapoxonae equeicha Roma tomara bepawarapiyan. Pecaie payiyan. ¹⁵ Pomonae iru pejume cowuntsiwichi Jesus, Roma tomaramonaepiwi, cou pana yabara jume tane xua imoxoyo papatan. Daxota cou ichamonae pana siwa dendena pecaerena. Foro de Apio tomara beparena. Ichamonae Tres Tabernas tomara beparena pia pana taetsi. Poxonae Pablo barapomonae tane, Nacomtha tsipaeba. Pablo juntu coyene sadujei xua juntea pepoponaewa poxonae tane pomonae pejume cowuntsiwichi Jesus. ¹⁶ Poxonae Roma tomaratha papatan, soldadomonae pia pentacaponaein tatsi, copata xua Pablo bara saya pepoponaenexa icha botha, xuano xua saya caein Pablo peyapu eenaenexatsi soldadomonaepin.

Meje yabara poxonae Pablo Nacom pexeinya jume diwesi paebe Roma tomaratha

¹⁷ Poxonae acoibi po matabibibe yapucaewa, Pablo najume caruta ichamonaetha petawabinexa tsainchi Roma tomarapiwi, pomonae judiomonae pia pentacaponaei tatsi. Poxonae barapomonae pata, Pablo barai barapomonae, jeye:

—Tamonaie, jopa abe exanaeinyo wamonaetha pomonae judiomonaexae. Matautano bequein jopa abe exanaeinyo wamo susato jiwi piamonae pia coyene cuitha tatsi, ichitha barapomonae newaetaba. Matautano jiwi pecubi botha necapona Jerusalen tomaratha xua romanomonae pia pentacaponaei tatsi pia xantha tatsi. ¹⁸ Barapomonae, romanomonae, neyabara yainyaba nawita xua icha abe exanan. Ichitha barapomonae neyaputane xua jopa abe exanaeinyo. Daxota barapomonae ichipa xua saya tana necopatabiwa tsane. Romanomonae aichaxaibi xua jemeicha saya nenacui cayantomata xua tana nebexubiwa tsane tsipei pinae jopa abe exanaeinyo. ¹⁹ Ichitha judiomonae neapusiwa xua jopa taponaeiwa tsane. Daxota bewa wucaein xua taponaeiwa tsane romanomonae itorobiya pia pepa peewatsinchi beya, xua tana neyabara paebinexa tsane icha metha abe exanan. Baxota ponan bequein jopa xeinaeinyo xua po coyene tayabara paebiwa tamonaie xua abe exana. ²⁰ Daxota paca wabatsi tha paca cataetsi xuano xua tha panejume taicham. Waxainchi israelmonaexaetsi wunaie ewatatsi pon Nacom itorobicapaeba. Tajume cowuntsixae baxua daxota anoxuae penainto tamaxutha ducua, jei Pablo barapo pentacaponaeiwa.

²¹ Barapoxonae romanomonae Pablo baraichi, jeichichi:

—Jopa painta patopaeyo carta Judea nacua werena xua xam necayabara tinaewa. Po judiomonae, Judea nacua werena pata pomonae patamonae, barapomonae jopa abe cayabara paebiyo. ²² Paichichipan paca jume tainchi xua jinya coutha nanta xeiname. Poxoru daxita nacuan pajume tan, xua Jesus pia pena pecuidubi coyenewan tatsi abe yabara paebe, jei barapo judiomonae pia pentacaponaei tatsi xua Pablo tsipaebatsi.

²³ Pablo muxu tsipaebatsi po mataqueitha xua patsina. Barapo mataqueitha Pablo pia botha tapatatsi pin bicheito. Pablo baya tamropata pitaba xua tsipaeba barapomonaetha, beya yapentha. Pablo jume daunweya yabara cueicueije barapomonaetha po diwesi po coyene xua Nacom waba jiwi petanaexanaenexatsi piamonae tatsi poxonae Jesús jume cowuntatsi. Matautano tsipaeba barapomonaetha Jesús yabara xua Jesús apara pon Moisés yabara paeba pia peitorobi coyenewatha. Matautano Jesús apara pon Nacom pia peitorobi jume pepaebiwi yabara tina pia petinae diwesintha. ²⁴ Xua Pablo po jume diwesi paeba, ichamonae jume cowunta poxonae cataunxuaerū ichamonae jopa jume cowuntsiyo. ²⁵ Barapomona be ainya bicheitobe natsicotane. Daxota barapomonaebe tamropata notarucupa xua peponaewa. Pablo namchi, jeye:

—Po diwesi Nacom pia Pejumope tūnaxū tatsi cata xua Isaías catatsi xua bapon pet-sipaebinexa xua wamo susato jiwi petsipaebinexatsi, barapo diwesi po diwesi pexeinya diwesi, xua jeye:

²⁶ ‘Ponde, barapomonaethano jande:

Pajume taneme ichitha jopa xapain payabara
jume yaputaem pocotsiwa pajume taneme.

Pataneme painya itacueretontha ichitha
jopa xapain payaputaem pocotsiwa panecotame.

²⁷ Barapomona najūntū coyene ararana exana,
jopa peichichipaexae xua pejume taewa.

Matautano antūfaetabiya jume tane.

Barapomona baraxuan exana,
poxoru jopa betaeyo peitacueretontha,
poxoru jopa bejume taeyono pemuxutontha,
yawa poxoru pejūntū coyeneintha jopa beyaputaeyo.

Barapomona jopa ichipaeyo xua tana netsita
xeinaewa icha jūntū coyene xua daxota jopa
neitacupaeyo xua tayabara jūntemainawa
abe pia peexanae cuiru coyenein tatsi’,
jeyei Nacom pia Pejumope tūnaxū tatsi xua
Isaías cueicueije exanatsi pinae, jei Pablo.

²⁸ Pablo cataunxuae cueicueije, jeye:

—Anoxuae xuano bexa tsaneno payaputaename xua pomona jopa judiomona naexanaeyo jume taena Nacom pia pecapanenebiyae diwesi. Bara barapomona beta jume naitaewatsina.

²⁹ Poxonae Pablo najume weta natsixibarucupa judiomona. Poxonae pona barapomona yabara najume matsontsonoba xua Pablo paeba.

³⁰ Pablo Roma tomaratha popona ainya weibe. Pia botha eca xua saya tanacowaeicha eca. Barapo botha daxita matenta weiweinaya wabeiba pomona pesiwa poneibixaetsi Pablo. ³¹ Pablo tayapu xanepanatsi xua pepoponaewa. Barapoxonae Pablo barapomonaetha yabara tsipaeba po diwesi po coyene Nacom waba jiwi petanaexanaenexatsi pijimona tatsi pomonae itorobiya peewatsixae. Matautano yabara cuidubano xua Jesucristo yabara, pon Pecanamataxeinaein jiwi. Romanomona pia pentacaponaein tatsi Pablo jopa cui matawentichi.

Baja Lucas.

Meje Po Carte Pablo Tatina, Roma Tomarapiwi Tatinatsi

Meje yabara poxonaē Pablo tamropata pitaba xua tatina pomonaetha pomonaē Roma tomarapiwi

¹ Xan, Pablon, apara pon tanacuichin amanaya Jesucristo nexa. Nacom newaba yawa tsana nenota xua necana exana Jesucristo pia peitorobi jiwi jiwana tatsin xua tacueicueijeinexa Nacom pia pecapanenebiyae diwesi jume.

² Barapo pecapanenebiyae diwesi jume caena bayatha Nacom yabara tsiwunaē muxu duta Nacom pia peitorobi jume pepaebi jiwitha poxonaē barapomonaē tina Nacom Pejume Diwesi xua Nacom yaputane exana, po diwesi xua Nacom pia pexeinya jume diwesi tatsi. ³ Barapo diwesi yabara tinatsi Jesucristo, pon Wanacanamataxeinaein, pon Nacom Pexanto tatsi. Poxonaē bapon Jesucristo be jiton coyeneya naexana, xaniwaicha bapon David pia pemomoxi susato jiwana pin tatsi. Barapo David pon caena bayatha Israel nacuapiwi itorobiya pia pepa peewatsinchi. ⁴ Poxonaē Nacom pia peayapusu itorobi coyenewatha Jesucristo pon Wanacanamataxeinaein asu exanatsi petupaē cuiru coyene weya, bapoxonaē Nacom tsita itapeinya xeina jiwitha xua bapon Jesucristo bara Nacom Pexanto tatsi po pexantoxae tatsi pia jumope tūnaxu tatsi jūntu coyene xanepana Nacomtha.

⁵ Jesucristo pata tana neantobexae, Nacom pana cata pocotsi coyene xua pana netsita coyene xanepana xua pata tana necana exanaewa tsane Jesucristo pia peitorobi jiwi tatsi. Nacom pana itoroba pata cueicueijeinexa daxita nacua jiwitha xua barapomonaē pejume cowūntsinexa yawa xua peexanaenexa pocotsiwa xua Jesucristo itoroba. ⁶ Daxita barapomonaē pomonaē jume cowūnta, paxam barapomonaē jiwana pam. Nacom iru paca waba xua paxam Jesucristo piamonaē tatsi jiwana pam painya nenaexanaenexa. ⁷ Daxita pam pacata tinatsi pomonaē pajinompame Roma tomaratha, pomonaē pam xua Nacom paantobem. Yawano Nacom paca waba xua bapon painya tsita nenajūntu coyenein xanepana exanaenexam tsane. Barabu Nacom, pon Waxa, iru Jesucristo pon jiwi Pecanamataxeinaein baponbe paca yawenaenabe pia paca necaantobexae. Matautano baponbe barabu jūntema jinompa paca cana exanaena.

Meje yabara poxonaē Pablo ichichipa xua pesiwa ponaewa Roma tomara

⁸ Matha copiya Jesucristo wun caununaya tsipaeban Nacomtha, janje tsaibin: “Nacom, yabara jūntu coyene weiweinan Roma tomarapiwi, tsipei daxita nacuan jiwi yabara paeba xua pinaē barapo Roma tomarapiwi xaniwaicha beta cajume cowūnta”, jan tsaibin Nacomtha. ⁹ Ajūntuyapusu Nacom tanacuitan. Nacom tacueicueijan pia jume diwesi xua pocotsi jume Pexanto tatsi tayabara paeban. Barapon Nacom bara yatsicaewa neyaputane xua matowa paca yabara nanta xeinaeya tsipaebaponatsi barapo Nacomtha. ¹⁰ Nacomtha yainyabeiban xua icha bapon ichichipa xua bara metha neitacupaetsipa xua matapainya tapaca siwa ponaewatsi tsainchi. ¹¹ Paca siwa ponaeinchi tsipei bichocono ichichipan xua tapaca taewatsi. Ichichipanno xua tapaca cuidubiwatsi tsainchi xua Nacom pia Pejumope tūnaxu tatsi painya nepaca cayawenaenexa tsane painya jūntu coyenewatha. Bapoxonaē paca jūntu coyene ayapusu exanaena. ¹² Pocotsiwa xuaunxuae yabara paeban apara xua waxainchi caemonaē nantiya wanajūntu coyene tsacabinexa xua jūntema wajinompaenexa. Baxua nacana exanaeinchi poxonaē wanatsipaebibeinexa Nacom Pejume Diwesi, po jume diwesi pajume cowūntame xua iruru jume cowūntandu.

¹³ Tamonaē pam, pomonaē iru painya nejume cowūntsiwixae Jesucristo. Ichichipan xua payaputaneme xua matowa ichichipeiban xua tapaca siwa poneibiwa tsaibi tsainchi. Ichitha beya anoxuae jopa neitacupaeyo xua tapaca siwa ponaewatsi. Ichichipan xua tapaca cuidubiwatsi Nacom Pejume Diwesi xua pejume cowūntsinexa pomonaē jopa copiya jume cowūntsiyo, xua iruru pejūntu coyene tsacabinexatsi pomonaē copiya jume

cowanta. Baxua barichin tsane icha bayatha ichin ichamonaetha xua poxonae yawenan pomonaе jopa judiomonaе naexanaeyo xua pejume cowantsinexa. ¹⁴ Nacom neitoroba daxita jiwitha. Daxota bewa cueicueijan tsane Nacom Pejume Diwesi daxita jiwitha, bequein metha bara tomarapiwi tsipae, ichacuiitha metha bara bequein unupiwi tsipae, bequein metha peyaputaewi tsipae, ichacuiitha metha bequein jopa peyaputaewi tsipae. ¹⁵ Daxota bichocono ichichipan xua paxam iru tapaca cuidubiwatsi tsainchi Nacom Pejume Diwesi pomonaе pamxaem xua painya nejinompaewi pam Roma tomaratha.

Meje yabara xua Nacom Pejume Diwesi xeina peyapusu itorobi coyenewa xua jiwi pecapanenebiwatsi

¹⁶ Jopa ajumeurinyo xua tacueicueijejwa Nacom pia pexeinya jume diwesi. Poxonaе jiwi jume cowanta barapo diwesi, Nacom capanenebiya exana barapomonaе abe pia peexanae cuiru coyenein weya tatsi pia peyapusu itorobi coyenewatha. Nacom capanenebiya pomonaе pia pejume cowantsiwichi, matha copiya judiomonaе, bapoxonaе iru pomonaе jopa judiomonaе naexanaeyo. ¹⁷ Barapo diwesi naca yaputane exana xua Nacom naca cana juntu coyene xanepana exana bapontha, xua jopa watsita natsicuentisixae xua abe waexanaexae bapontha. Nacom baxua naca cana juntu coyene exana saya poxoru u meisa wayabara jume cowantsixae pocotsiwa exanapaeba, bapon. Nacom Pejume Diwesitha jeye baxua yabara: “Pontha, pon Nacom juntu coyene xanepana exana pia peyabara jume cowantsinxatsei pocotsiwa exanapaeba bapon ataya tsitecaeya poponaena”, jei Nacom Pejume Diwesitha.

Meje yabara xua jiwi penatsicuentisawa Nacomtha abe peexanaexae

¹⁸ Waxainchi yaputainchi xua Nacom anaepana pomonaetha pomonaе abe peexanaewi. Daxota itorobica athawetsica po coyenetha xua barapo jiwi atene peexanaewatsi. Nacom anaepana, jiwi abe peexanaexae bapontha yawano abe peexanaexae ichamonaetha. Matautano barapomonaе abe peexanaexae, jopa copatsiyo xua bara pia juntu coyeneintha peyaputaewa pexainyei jumein. ¹⁹ Barapomonaе bewa xaniwaicha bayatha yaputaena po coyene xua Nacom pejuntu coyene tatsi. Tsipei bayatha Nacom tsita najuntu coyene ituta barapomonaetha. ²⁰ Jiwi jopa itacupaetsi xua paeba xua pinae jopa Nacom yabara yaputaetsi. Beya poxonaе Nacom aena forota barapo cae pin nacue, jiwi yaputane xua Nacom xaniwaicha popona yawa pia peyapusu itorobi coyenewa bapana jopa weraweracae tsane. Jiwi yaputane baxua poxonaе tane pocotsiwa Nacom forota bequein Nacom jopa taetsi. Daxota jiwi natsiaenae cuenta exana Nacomtha pia coutha poxonaе abeya paeba xua pinae jopa yaputaetsi Nacom. ²¹ Bequein barapomonaе yabara yaputane xua bara Nacom popona, daichitha barapomonaе jopa baru cui itura jinaeyo Nacom ponxae xua yatsicaewa pia pepa Nacom tatsi. Yawano barapomonaе jopa jei tsaibiyo Nacomtha: “Nacom, pajuntu coyene weiweinan xua pocotsiwa painta neexanaewamxae”, jopa jei tsaibiyo. Saya meisa barapomonaе yabara nanta xeina dubenanaebiya pocotsiwa xua pepawi. Saya abeya nanta xeina dubenanaebiya xua daxota jopa yaputaeyo pexainyei jume. ²² Bequein barapomonaе paeba xua pinae peyaputaewi daichitha be pomonaе xua jopa xapain peyaputae jiwi naexanaeyo. ²³ Barapomonaе jopa wanae jainchiyo Nacom, pon ataya tsitecaeya popona. Saya u wanae pejainchi ibo nacomun, po ibo nacomun be tsita jiwichi xua saya peweraweracae coyene. Yawano icha ibo nacomun exana xua xuan be peyapupunaewi, yawano po ibo nacomun be jomon xua petompacuetontha pona, yawano po ibo nacomun be duwein xua pecobe xeina yawa pesito xeina.

²⁴ Daxota Nacom copata xua barapomonaе bara moya peexanaenexa abe peexanaewa be pocotsi coyeneya xua ichichipa. Bapoxonaе barapomonaе nantiya nata exana pocotsiwa xua aura exanatsi pia pepontha. ²⁵ Baxuan Nacom copata xua peexanaewa barapomonaе, tsipei barapomonaе jopa jume cowantsiyo Nacom pia pexainyei diwesi jume. Saya barapomonaе itapeta u jume cowanta xua xuan penaerabi diwesi jumein. Pocotsiwan Nacom forota baxuan barapomonaе be pia nacomun cana exana pejume

cowũntsinexa, mataũtano xua barapomonae pebaru cui itura jinaenexa xua wũnae pe-jainchiwa nexa. Barapomonae jopa wũnae jainchiyo pepa Nacom, pon daxita peforotsin. Barapon waxainchi bewa wũnae jainteibinchi xua ataya tsaibi tsane pia peexaneibixae waxainchi nexa. Je, bara ichi tsane.

²⁶ Daxota Nacom copata xua barapomonae bara moya peexanaenexa pocotsiwan xua aura exanatsi pia pepontha pocotsiwan abe coyenewa peichichipaewan. Mataũtano barapomonae pia yabũxi tatsi jopa equeicha exanaeyo po coyene yabũxi ba exana poxonae peichichipaewa pia pebin. Bapoxonae barapo yabũxi exana xua cae yabũxi naichichipa. ²⁷ Barichi pebiwi aichaxaibi po coyene pebiwi ba exana poxonae pe-ichichipaewa pia petsiriwa. Saya meisa bichocono penthũtontha ichichipa exana xua cae pebiwi naichichipa. Barapo pebiwi nantiya nata exana pocotsiwa xua pin ura xeina exanatsi. Barapomonae abe peexanaexae Nacomtha natsicuenta. Daxota Nacom copata xua barapomonae pia pepon atene nata exana.

²⁸ Poxoru barapomonae jopa ichipaeyo xua jopa pejume cowũntsiwa Nacom, daxota Nacom copata xua barapomonae moya bara abeya penanta xeinaenexa. Mataũtano Nacom copata xua barapomonae bara moya exanaena pocotsiwan jopa bewa exanae pocotsiwa xua abe. ²⁹ Barapomonae jopa juniya jũntũ coyene yũcaetsi xua peabe coyenewan. Barapomonae nasi cui weiweina exanaduta, yawano abe exana ichamon-aetha. Yawano exana xua ichichipa pocotsiwa ichamonae xeina. Yawano ichichipa xua ichamonae atene exanatsi. Barapomonae uwa, ichamonae uwatsi. Yawano barapomonae juteba, ichamonae jutebatsi. Yawano penabi coyene exana. Yawano barapomonae jiwi muxujainyaba nawita. Yawano barapomonae bichocono piamonae caseba nawita. Yawano caemonae nabaru paxapaxei xua ichamonae abe yabara paebatsi. ³⁰ Yawano barapomonae jume atsaquiya abeya yabara paeba xua ichamonae pocotsiwa exana. Barichi barapomonae Nacom casebatsi. Yawano barapomonae biatane ichamonae. Yawano pia coutha penayabara paebiwi xua pinae peainya cui jiwi. Yawano barapomonae peabiwi xua ichamonae aebatsi. Yawano jeita nawita pocotsiwan xua peabe coyenewa. Yawano jopa exanaeyo pocotsiwan xua paxeiwi itorobeibatsi. ³¹ Barapomonae jopa ichichipaeyo xua Nacom peyabara yaputaewatsi. Yawano barapomonae jopa jume xainyeya exanaeyo pocotsiwan xua exanapaebeiba. Yawano barapomonae jopa xapain antobeyo ichamonae. Yawano barapomonae jopa ichamonae yabara jũntemainetsi xua abe exana. Yawano barapomonae jopa ichamonae xapain yabara nanta xeinaetsi xua peyawenaenexatsi. ³² Barapomonae yaputane pocotsiwa xua Nacom itoroba. Yawano barapomonae yaputane xua pomonae barapo peabe coyenewan exana bewa werapaena. Bequein barapomonae yaputane baxuan ichitha awiya abe eexanapona. Yawano barapomonae jũntũ coyene weiweina, poxonae ichamonae irũ barapo peabe coyenewan exana.

2

Meje yabara xua Nacom yabara paebina penatsicuentsiwa jiwi, xua yatsicaewa pexainyei coyenewatha

¹ Paca tsipaebatsi paxam judiomonae jiwana pam pomonae xua ichamonae pecayabara nanta xeinaewichi xua icha abe exana xuano xua icha jopa abe exanaeyo. Paxam jopa bewa pajam tsane ichũntha: “Xam abe exaname, natsicuenta exaname Nacomtha”, jopa bewa pajam tsane. Tsipei poxonae ichũn payabara paebame xua penatsicuentsiwa xua abe peexanaewaxae, apara painya coutha panatsicuentame Nacomtha xua abe painya neexanaexae. Poxoru bichocono abe painya neexanaewi icha ichi pomonae payabara paebame xua penatsicuentsiwa xua abe pia peexanaewaxae. ² Waxainchi yaputainchi xua Nacom yabara paebina daxita jiwi xua penatsicuentsiwa xua abe peexanaexae xua yatsicaewa pexainyei coyenewatha xua abe peexanaexae bapontha. Poxonae Nacom yabara paebina xua penatsicuentsiwa jiwi, bapon paebina xua pomonae barapo peabe coyenewan exana bewa peraxa jũbebinchi xua atene tsane.

³ Paxam ichun payabara paebame penatsicuentsiwa xua abe pia peexanaewaxae. Aparapainya coutha panatsicuentame Nacomtha xua iru paxam painya nebarichiwatham xua abe painya neexanaexae. Paxam jopa paca itacupaeyo xua painya nepanenebiwaxoxonae Nacom atene exanaena xua poxonae yabara paebina jiwu xua penatsicuentsiwa xua pomonae abe peexanaewi. ⁴ Paxam paaichaxaibim poxonae Nacom bichocono peichichipaexae xua painya nepaca yawenaewa xua painya nepaca antobexae. Yawapaxam paaichaxaibim poxonae Nacom abu saya juntema ewata xua beta pacata exanaena xua pomonae pamxaem xua pajume cowuntsiname yawa atene paca exanaena pomonae pamxaem jopa painya nejume cowuntsiwi. Nacom baxua exana pia xua paxam painya auratsi abe painya neexanaexae. Yawano pia painya bapoxonae Nacom wucaetsi xua painya nepaca cayabara juntemainaenexa painya abe exanae coyenewan. ⁵ Paxam ainya unthuton paxeiname. Yawano jopa paichipaem xua icha juntu coyene painya tsita xeinaewa Nacom. Daxota paxam mataropeicha paexanaponame xua pocotsiwan abe. Daxota bexa Nacom paca yabara anaepanaena xuano atene paca exanaena painya tsita natsicuentsixae po mataqueitha Nacom paebina xua bewa atene exanaeinchi pomonae barapo peabe coyenewan exana. Nacom yabara paebina jiwu xua penatsicuentsiwa xua abe peexanaexae xua yatsicaewa pexainyei coyenewatha abe peexanaexae bapontha. ⁶ Nacom catsibina pentoman daxita carepaya jiwitha xua pocotsiwan pia petanacuichiwiwaxaetsi. Pomonae abeya tanacuita xuya abeya matoma catsibebinchi. Pomonae wunaeya tanacuita xuya wunaeya matoma catsibebinchi. ⁷ Ichamona Nacom peajuntuyapusu coyenewa catsibina pomonaetha pomonae jopa aitaconaeya exana dubenanaebiyaeyo pocotsiwa Nacom ichichipa. Barapomonae ichichipa nawita xua po coyene Nacom petsita xanepanaewa tsainchi. Matautano barapomonae ichichipa nawita pia pebaru cui itura jinaewa Nacomtha. Matautano barapomonae ichichipa nawita xua pia xeinaetsi peajuntuyapusu coyenewa po peajuntuyapusu coyenewa ataya tsiteca. ⁸ Ichamonaetha, Nacom anaya exanaena xua atene exanatsi barapomonae pomonae saya u piawa nata exana. Yawa Nacom atene exanaena pomonae jopa jume cowuntsiyo Nacom pia pexainyei jume diwesi. Barapomonae Nacom bichocono caseba itapeta peichichipaewaxae xua abe coyenewa peexanaewa. ⁹ Atene exanebinchi yawa ajunturewe exanebinchi daxita pomonae abe coyenewan peexanaewi, matha copiya pomonae judiomona, bapoxonae iru catsibinchi pomonae jopa judiomona naexanaeyo. ¹⁰ Ichitha nama Nacom seicaya catsibina pomonaetha pomonae xanepanaya betiya peexanaewi po coyenewa xua Nacom petsita xanepanaewa tsainchi. Yawano catsibina po coyenewa xua pebaru cui itura jinae coyenewa. Yawano catsibina po coyenewa xua juntema pejinompae coyenewan. Matha copiya catsibinchi judiomona, bapoxonae iru catsibinchi pomonae jopa judiomona naexanaeyo.

¹¹ Barapomonaethabe Nacom catsina barapo coyenein tsipei Nacom tsita najupatsi daxita jiwu. ¹² Pomonae jopa judiomona naexanaeyo daxita barapomonae yaputane poxonae abe exana pia peitorobi coyenewan pexeinaexae. Icha barapomonae awiya eexanapona pocotsiwa xua abe, Nacom tsita natsicuentatsi. Barapomonae werapaena abe peexanaexae bequein jopa yaputaeyo Moisés pia peitorobi coyenewa tatsi. Pomonae judiomona barapomonae yaputane Moisés pia peitorobi coyenewa tatsi. Daxota yaputane poxonae abe exana. Poxonae barapomonae abe eexanapona Nacom tsita natsicuenta exanatsi abe peexanaexae, poxoru yaputane Moisés pia peitorobi coyene tatsi. ¹³ Pomonae jume tane Moisés pia peitorobi coyenewa tatsi xuano exana pocotsiwa itoroba, barapomonae Nacom tsita juntu coyene xanepanatsi. Pomonae saya jume tane Moisés pia peitorobi coyene tatsi daichitha jopa exanaeyo pocotsiwa itoroba, barapomonae Nacom jopa tsita juntu coyene xanepanaetsi. ¹⁴ Pomonae jopa judiomona naexanaeyo barapomonae jopa xeinaeyo Moisés pia peitorobi coyenewa tatsi. Ichitha ichacuitha barapomonae exana xua be pocotsi coyene Moisés pia peitorobi coyenewatha itoroba. Baxua barapomonae exana, tsipei pejuntu coyenewantha yaputane pocotsiwa xua abe xuano pocotsiwa xua xanepana bequein bara jopa xeinaeyo Moisés pia peitorobi

coyenewa tatsi. Poxonae baxuan exana be barompaya pia peitorobi coyenewan xeina pia jũntũ coyenewantha. ¹⁵ Poxonae barapomonae beta exana, baxua itapeinya xeina xua barapomonae pia jũntũ coyenewantha xeina Nacom pia peitorobi coyenewa tatsi. Barapomonae yacuiya naexana. Barapomonae pia jũntũ coyenein yaputane cana exanatsi xua poxonae wũnae exana xuano xua poxonae ichacuiitha abe exana. ¹⁶ Jemeicha jopaena matacabi po mataqueitha poxonae Nacom itorobina xua Jesucristo yabara paebina daxita jiwi xua pia penatsicuentisiwa xua abe peexanaexae Nacomtha. Barapo mataqueitha Jesucristo yabara paebina jiwi xua penatsicuentisiwa xua abe peexanaexae xua pocotsiwan namicha abeya peexanaexae matautano pocotsiwan namicha abeya penanta xeinaexae. Baraxua Jesucristo bara exanaena icha be pocotsi coyeneya paeban poxonae cueicueijan Nacom pia pexeinya pecapanenebiyae diwesi jume.

Meje yabara xua judiomonae yawa Moisés pia peitorobi coyenewa tatsi

¹⁷ Paxam papaebame, pajam: “Paxan seicaya judiomonaepiwi pan”, pajam. Pananta xeiname xua Moisés pia peitorobi coyenewa tatsi paca capanepaena. Atsaquiya papaebame xua barompaya painya nacom, yatsicaya pepa Nacom. ¹⁸ Barichi paxam papaebame xua pinae payaputaneme pocotsiwa xua Nacom pia peichichipae coyenewa. Matautano papaebame xua pinae Moisés pia peitorobi coyenewa paca cuiduba xua painya neitapetsiwa po coyene xua pexainyei coyenewa. ¹⁹ Matautano atsaquiya papaebame, pajam: “Paxan pacuiduban pomonae jopa peyaputae jiwi Nacom. Yawa jume cowũnta pacana exanan pomonae jopa jume cowũntsiyo Nacom”, pajam. ²⁰ Paxam pananta xeiname xua paca itacũpa xua pacuidubame pomonae Nacom jopa peyaputae jiwi. Barichi pananta xeiname xua paca itacũpa xua yaputane pacana exaname pomonae pena pejume cowũntsiwi. Paca itacũpa barapo ainya coyenewabe painya neyaputaexae Moisés pia peitorobi coyenewa xua xeina pexainyei yaputae coyenewan. ²¹ Poxonae ichamonae po coyenein yabara pacuidubame paxam jopa apara matha pajume yabara cowũntsiya exanaem barapo coyenein. Paxam pacuidubame pocotsi coyenewa xua jopa bewa caibi ichamonaetha xua irũ painya barichiwathamdũ. ²² Paxam pacuidubame xua jopa bewa ichũn piowa tatsi tapichichi xua irũ painya barichiwathamdũ. Paxam papaebame xua pinae paichaxaibim ibo nacomũn, ichitha paxam pacaibame pocotsiwan xua jeba ibo nacomũn pia botha tatsi. ²³ Atsaquiya papaebame xua paxeiname Moisés pia peitorobi coyenewa. Ichitha irũ apara paxam jopa paexanaem xua painya nebarũ cui itura jinaewa Nacom, poxonae jopa payabara jume cui coyeneya exanaem barapo Moisés pia peitorobi coyenewa. Daxota ichamonae jopa Nacom barũ cui itura jinaetsi. ²⁴ Daxota Nacom Pejume Diwesitha jeye: “Apara paxam painya coutha pam poxonae pomonae jopa judiomonae naexanaeyo Nacom abe yabara paebatsi tsipei copiya paxam abe paexaname”, jei Nacom Pejume Diwesitha.

²⁵ Paxam judiomonae pam, xua pebiwi pam paca wi thaba poxonae cataunxuae pexui pam. Paca jumapa perũ muxunene caxica xua ichaxota pebiwichi xeinatsi ichaxota pana nareixacaename. Baxua paca cana exana poxoru Moisés pia peitorobi coyene paca itoroba xua painya tsita itapeinya xeinaenexa xua bara apara Nacom piamonae tatsi pam. Barapo coyenewa xua Moisés pia peitorobi coyene tatsi paca yawena xua Nacom pajume cowũnta dubenanaebiyame icha paexaname daxita pocotsiwa Moisés paca itoroba. Ichitha icha jopa paexanaem pocotsiwa xua Moisés paca itoroba jopa paca yawenaeyo xua Nacom pajume cowũnta dubenanaebiyame bequein paca wi thabitha tsipae. ²⁶ Pon jopa wi thabichi poxonae bapon exana pocotsiwa Moisés pia peitorobi coyenewatha itoroba, Nacom tsitatsi be xua bapon bayatha apara wi thabatsi. Nacom tsitatsi xua bapon bara pijimonae jiton tatsi bequein bara jopa wi thabichi. ²⁷ Ichacuiitha pebiwi bequein jopa wi thabichi, daichitha exana pocotsiwa Moisés pia peitorobi coyenewatha itoroba. Barapomonae paca jũntũ cui coyene yabara nanta xeinaena xua icha abe paexaname Nacomtha xuano xua icha wũnae paexaname Nacomtha. Bequein payaputaetham Moisés pia peitorobi coyenewa xua petinae diwesi, ichitha jopa payabara jume cuiya exanaem pocotsiwa barapo Moisés pia peitorobi coyenewatha paeba. ²⁸ Pon

jiwi tsitatsi xua pepa judiomonaepin saya poxoru pewi thabixaetsi xua pepontha, bapon Nacom jopa tsitatsi xua pia jiton tatsi. ²⁹ Jame xua pepa judiomonaepin penaexanaenexa tsane, saya jame poxona Nacom jũntũ coyene xanepana exana barapo jiton xua Nacom jopa bapon tsita natsicuentichi abe peexanaexae pia jũntũ coyenewatha. Poxona jiton xaniwaicha wi thabatsi, apara baxua, xua poxona jiton xaniwaicha jume cowũnta pejũntũ coyenewatha Nacom. Pocotsiwa xua Moisés pia petinae coyenewa, jopa exanaeyo xua jiton icha jũntũ coyene pexeinaewa Nacomtha xua pexanepanaewa. Saya apara meisa Nacom pia Pejumope tũnaxũ tatsi baxua exana. Jiwi wũnaeya yabara paeba pomona xua pewi thabiwichi. Ichitha nama Nacom wũnaeya yabara paeba pontha pon icha jũntũ coyene xeina bapontha xua pexanepanaewa.

3

¹ Metha beya ichũn yainyabichipa jei tsipae: “¿Eta po coyene, po coyene Nacom tsita xanepanatsi, po coyene beta wepu toxeinchiya exana pomona judiomona xua wepu beta toxeincha exanatsi pomona jopa judiomona naexanaeyo? ¿Eta po coyene, po coyene Nacom tsita xanepanatsi, po coyene beta wepu toxeinchiya exana pon pewi thabinchi xua wepu beta toxeincha exanatsi pon jopa pewi thabinchi?” jei tsipae. ² Metha jume notsipan bapon, jan tsipae: “Apara bara bichocono jopa juniya xanepanaeyo xua penaexanaewa judiomona xuano xua wi thabatsi, poxoru copiya Nacom Pejume Diwesi nacana jume diwesi cata judiomonaetha”, jan tsipae. ³ Ichacuitha metha beya equeicha bapon yainyabichipa jei tsipae; “Daichitha ¿eta bichi tsipae icha barapomona jiwana nacui barapentsipa xua jopa peyabara jume cowũntsiwa xua Nacom bexa exanaena pocotsiwa Nacom yabara tsiwũnae muxu duta? ¿Daxota metha Nacom xuya nacui baraxubichipa xua jopa equeicha peexanaewa pia peyabara tsiwũnae muxu dutsiwa?” jei tsipae. ⁴ Metha jan tsipae: “¿Jume, apara Nacom bapana jopa baxua exanae! Apara jame Nacom daxitan pexainyeiwantha exaneiba. Nacom bewa exaneibina baxuan bara bequein jiwi pemuxuitorobi jiwi. David baxua yabara paeba Nacom Pejume Diwesitha xua Nacom tapaebatsi, jeye: ‘Nacom, poxona cueicueijam jiwi yaputaena xua xam xainyeya bara nepaebin. Bapoxona jiji jume amanayabame poxona baxua exaname poxona bequein jiwi cayabara paeba xua abe exaname’, jei David Nacom Pejume Diwesitha”, jan tsipae.

⁵ Ichitha metha ichamonae jume coxonaya najume matsontsonobichipa jei tsipae: “Poxona waxainchi abe exanatsi bapoxona Nacom naca atene exana. Abe waexanae coyenewantha jiwi tsita itapeinya xeinatsi xua bara Nacom aichaxaibi abe peexanae coyenewa xua bara Nacom xanepanaya peexanaein. Daxota abe waexanae coyenewatha Nacom yawenatsi. ¿Eta xua metha yabara paebinchi baxua? ¿Metha Nacom jopa xaniwaicha exanaeyo icha naca atene exana abe peexanae cuiru coyene waexanaexae?” jei tsipae barapomona, xua saya paeba icha jiwi ichi pomona jopa peyaputae jiwi. ⁶ Metha barapomona jume notsipan, jan tsipae: “¿Jume apara, baxua jopa xainyeyo! Icha Nacom jopa xaniwaichiya exanaetsipae poxona naca yabara paeba xua penatsicuentisiwa bapoxona jopa itacũpaetsipaetsi xua daxita yabara paebatsi jiwi xua penatsicuentisiwa xua abe peexanae cuiru coyene peexanaexae. Ichitha Nacom apara xaniwaichiya exana daxota itacũpatsi xua daxita jiwi yabara paebatsi penatsicuentisiwa”, jan tsipae.

⁷ Metha ichamonae jei tsipae: “Nacom jopa bewa naca yabara paebi penatsicuentisiwa tsane wanaca yabara paebinexa xua abe waexanaewan poxona naerabiya cueicueijeichi. Poxoru poxona naerabiya cueicueijeichi ichamonae tsita itapeinya xeinatsi xua Nacom seicaya exana xua Nacom bichocono xainyeya pepaebin xuano xua Nacom bara peainya cuin”, jei tsipae barapomona. ⁸ Ichamonae irũ jei tsipae: “Daxota waxainchi bewa abe exanaeinchi, xua watsita itapeinya xeinaenexa xua Nacom bara xainyeya

pepaebin”, jei tsipae barapomona. Barapomona naerabiya paeba xua pinae xan barapo coyene cuiduban ichamona. Barapo naerabiya pepaebiwi xua neyabara jume caenaeraba, barapomona Nacom tsita natsicuentinchi abe taneyabara paebixae.

Meje yabara xua daxitatsi pomonaetsi pomona Nacom watsita natsicuentiwichi abe waexanaexae bapontha

⁹ ¿Waxainchi pomona judiomonaetsi Nacom tsitatsi xua jopa wanatsicuenti jiwichi xua beyacaincha pomona jopa judiomona naexanaeyo xua naca toxeinchiya bichocono abe peexanaewi? Jume. Tsipei bayathaunxuae paeban: “Waxainchi judiomonaetsi iru pomona jopa judiomona naexanaeyo daxitatsi abe waexanae jiwichi”, jan. ¹⁰ Nacom Pejume Diwesitha baxua yabara jeye:

“¡Dapomona ajibi pomona xua xanepanaya peexanaewi, xua matautano bara caeinno!

¹¹ Matautano dapon ajibi pon ichichipa xua peyabara yaputaewa pexainyei coyenewa.

Matautano dapon ajibi pon xua ichichipa penaponaewa Nacomtha.

¹² Daxita jiwi Nacom pentatsi yawano abe peexanae jiwi bichocono.

¡Dapon ajibi pon xua xanepanaya beta exana, xua matautano bara caeinno!

¹³ Barapomona caunuta nawita pocotsiwa peabe jumein, icha muthu tsina ichi xua cawenabeina xua tuxamna baxoyareca pebocarecaexae pon tupa.

Barapomona pepaebiwantha ichamona muxujainyabeibatsi.

Barapo pepaebiwantha ichamona ajuntucoyenetane exanatsi, icha jomo ichi xua ichun sinatsi poxona bichocono atene exanatsi pewano tsapa pexeinaexae.

¹⁴ Barapomona saya u cueicueije xua xuan peabe jumein, po jumein xua atsaca pepaebiwa.

¹⁵ Barapomona bichocono ichichipa nawita xua ichamona bichocono atene peexanaewatsi xuano xua pejutebiwatsi.

¹⁶ Daxita ichaxota poneiba barapomona, ichamona abe exaneibatsi.

Matautano exaneiba pocotsiwa ichamona ajuntucoyenetane cana exanatsi.

¹⁷ Barapomona jopa yaputaeyo xua po coyene caemona nantiya juntema jinompa penaexanae coyenewa.

¹⁸ Matautano barapomona jopa cunuwiyo Nacom xua abe peexanaeyainwatsi”, jei Nacom Pejume Diwesitha.

¹⁹ Waxainchi yaputainchi xua daxita Nacom paeba Moisés pia peitorobi coyenewatha baraxua judiomona nexa. Barapomona bewa exanae Moisés pia peitorobi coyenewa tatsi. Ichitha judiomona jopa itacupaetsi xua peexanaewa barapo coyenewa. Barichi pomona jopa judiomona naexanaeyo jopa itacupaetsi xua peexanaewa baxua. Barapo coyeneya Nacom yaputane exana xua daxita jiwi jopa pepaebinexa xua pinae jopa abe peexanaewa barapo jiwi. Matautano Nacom tsita itapeinya xeina jiwitha xua Nacom yabara paebina xua penatsicuentiwa daxita jiwi xua abe peexanaexae bapontha.

²⁰ Dapon ajibi pon itacupatsi xua pejeiwa: “Xan bichocono tajuntu coyene xanepanaein xua Nacom jopa tatsita natsicuentisixae abe taexanaexae bapontha. Tsipei daxita yabara

jume cuiya exanan pocotsiwa Moisés pia peitorobi coyenewatha itoroba”, xua pejeiwa. Tsipei jame अपारा barapo Moisés pia peitorobi coyenewa tatsi naca yaputane exana xua waxainchi अपारा abe waexanae jiwichi.

Meje yabara xua jiwi capanenebiyatsi pejume cowuntsixae Nacom

²¹ Ichitha anoxuae Nacom jiwi yaputane exanatsi po coyeneya bapon exana xua poxonae jiwi jüntu coyene xanepana exanatsi bapontha. Nacom jopa tsita natsicuentichi barapomonaе xua abe peexanaexae. Nacom baxua exana jopa poxoruyo xua peexanaexae pocotsiwa Moisés pia peitorobi coyenewatha itoroba. Moisés pia peitorobi coyenewa tatsi, iru Nacom pia peitorobi jume pepaebiwi paeba xua bewa jiwi Nacom tsita jüntu coyene xanepanaetsi. ²² Nacom jüntu coyene xanepana cana exana jiwi poxonae barapo jiwi jume cowanta Jesucristo. Nacom bara daxita najüntu coyene jüpiya exana pomonaetha pomonaе pejume cowuntsiwi Jesucristo, poxoru Nacom tsita najupatsi barapo pejume cowuntsiwichi. ²³ Tsita najupatsi yaitama daxita jiwi peabe coyenewan exana. Yawano barapo jiwi taseicatsi po coyene xua Nacom tsita xanepanatsi barapomonaе. ²⁴ Ichitha Nacom peantobexae jopa tsita penatsicuentiwatsi barapo jiwi. Baxua Nacom amanaya taexana. Nacom pentoma exana xua jiwi pejüntu coyene xanepanaenexa poxonae Cristo Jesús naetotha tsitupa, xua jiwi tsitupatsi. ²⁵ Nacom Pexanto itorobica, pon Cristo. Bapon jana pichapabarena poxonaе tsitupa jiwi pia peabe coyenewan tatsi. Nacom jüntemaina jiwi pia peabe coyenewan poxonaе barapomonaе jume cowanta Cristo. Barapo coyenewatha Nacom yaputane exana xua bara jüntu coyene xanepana cana exana jiwi xua jopa Nacom petsita natsicuentiwatsi xua abe peexanaexae. Bayatha bapon beitatemaya cui taetaepona jiwi abe pia peexanae cuiru coyenewan tatsi pomonaе xua caena bayatha jinompa poxonaе cataunxuae Jesús jopa tupaeyo. ²⁶ Ichitha anoxuae Nacom yaputane exana jiwitha xua beta xanepanaya peexanaewa. Anoxuae Nacom jopa beitatemaya cui taeyo jiwi abe pia peexanae cuiru coyenewan tatsi. अपारा jame Nacom jüntu coyene xanepana cana exana jiwi poxonaе Nacom yabara jüntemaina jiwi xua pia penatsicuentiwa xua abe peexanaexae. Baxua exana daxita pomonaetha pomonaе pejume cowuntsiwi Jesús.

²⁷ Daxota waxainchi jopa naca itacupaeyo xua atsaquiya nayabara paebatsi xua beta waexanaewa. Waxainchi jopa najüntu coyene xanepana exanaetsi bequein ichichipatsi xua waexanaewa pocotsiwa Moisés pia peitorobi coyenewatha itoroba, daichitha jopa exanaetsi. Nama अपारा wajume cowuntsixae Jesús, daxota bapon naca jüntu coyene xanepana cana exana Nacomtha. ²⁸ Nama anoxuae waxainchi yaputainchi xua Nacom jüntu coyene xanepana cana exana pontha pon jume cowanta Jesús. Nacom jopa jüntu coyene xanepana exanaeyo poxonaе bequein ichun ichichipa xua peexanaewa pocotsiwa Moisés pia peitorobi coyenewatha itoroba xua daichitha poxonaе jopa exanaeyo.

²⁹ Nacom jopa meisa अपारा judiomonaе pia Nacom tatsi. अपारा iru pomonaе jopa judiomonaе naexanaeyo barapomonaе iru pia Nacom tatsi. ³⁰ Icha Nacom ajibi, saya meisa bapon Nacom nacata bara compa. Barapo Nacom jüntu coyene xanepana cana exana jiwi, pomonaetha pomonaе jume cowanta Jesucristo, bequein pomonaе wi thabatsi xuano bequein pomonaе jopa wi thabichi. ³¹ Waxainchi jopa nacui barapentichi Moisés pia peitorobi coyenewa tatsi yaitama jume cowuntatsi Jesús. Jame poxonaе xaniwaicha jume cowuntatsi Jesús bapoxonaе bara xaniwaicha exanatsi pocotsiwa Moisés pia peitorobi coyenewatha itoroba.

4

Meje xua Abraham yabara

¹ Anoxuae paca tsipaebatsi xua pocotsiwa Nacom exana Abrahamtha. Bapon wamo susatopin, iruru daxita judiomonaе pia pamo susatopin tatsi pon caena bayatha tupa.

² Abraham jopa pia coya najüntu coyene xanepana exanaeyo xua jopa Nacom petsita natsicuentiwatsi xua abe peexanaexae. Daxota jopa itacupaetsi xua atsaquiya nayabara paeba xua xanepanaya peexanaewa. Bapon jopa itacupaetsi xua atsaquiya paeba Nacom

peitutha tatsi. ³ Nacom Pejume Diwesitha Abraham yabara pæbatsi, jeye: “Abraham jume cowũnta Nacom. Peyabara jume cowũntsixae pocotsiwa xua Nacom exanapaeba, Nacom jũntũ coyene xanepana cana exana bapon”, jei Nacom Pejume Diwesitha. ⁴ Poxonae jiton ba tanacuita ichũn, jopa jiton pentoma becatsichi xua saya amanaya nexa poxoru ichũn peyabara nanta xeinaexae bapon. Jame jiton ba bewa pentoma catsichi xua poxoru penacuichixae. ⁵ Ichitha nama Nacom seicayiya exana. Pon yabara jume cowũnta pocotsiwa Nacom exanapaeba xua Nacom peyabara jũntemainenexa xua bapon pia penatsicuentisiwa tatsi, bara Nacom yawena bapon. Barapo jiton Nacom tsita jũntũ coyene xanepanatsi, bequein bapon jopa exanaeyo pocotsiwa bewa bapon exanae xua daxota Nacom peyawenaenexa tsane. ⁶ David pon wamo susatopin, pon caena bayatha tũpa, bapon caena bayatha Israel nacuapiwi itorobiya pia pepa peewatsinchi. Bapon David yabara pæba po jiton bichocono jũntũ coyene weiweina. Jeye: “Pon peyabara jume cowũntsixae pocotsiwa Nacom exanapaeba, Nacom jũntũ coyene xanepana cana exana. Jopa apara Nacom jũntũ coyene xanepana exanaeyo xua poxoru bapon wũnaeya xanepanaya peexanaexae. Apara poxoru Nacom peichichipaexae, daxota baxua exana”, jei David. ⁷ Equeicha David jei:

“Jũntũ coyene weiweina pomonae Nacom yabara jũntemaina xua puxana exana abe pia peexanae cuiru coyenewan tatsi.

⁸ Jũntũ coyene weiweina pon Nacom jopa tsita natsicuentisichi xua abe peexanaexae”, jei David.

⁹ Po pejũntũ coyene weiweinaewa xua David yabara pæba, meisa saya Ʃ pomonae pewi thabiwichi jopa nexiyo. Apara barapo pejũntũ coyene weiweinaewa irũ pomonae jopa pewi thabiwichi nexano apara. Bayathaunxuae paca tsipaebatsi xua Abraham yabara jume cowũnta pocotsiwa Nacom exanapaeba, daxota Nacom jũntũ coyene xanepana cana exana bapon xua jopa Nacom tsitatsi xua Abraham penatsicuentisiwa xua abe peexanaexae. ¹⁰ Abraham jopa jũntũ coyene xanepana exanaetsi poxonae nacana cui wetatsi xua pewi thabiwatsi. Apara Nacom Abraham jũntũ coyene xanepana exanatsi poxonae cataunxuae jopa wi thabichi. ¹¹ Abraham peyabara jume cowũntsixae pocotsiwa Nacom exanapaeba, Nacom jũntũ coyene xanepana exana. Cotacaya bapoxonae Abraham wi thabatsi. Barapo pewi thabi coyene tsita itapeinya xeina xua bara Nacom jũntũ coyene xanepana exana Abraham, peyabara jume cowũntsixae pocotsiwa Nacom exanapaeba. Abraham petsiwana exanaexae xua pewi thabiwatsi, daxota Nacom tsitatsi xua Abraham be coxiyũn poxonae cana exanatsi xua canamataxeinaena xua daxita nacuanpiwi pomonae jopa pewi thabiwichi. Barapomonae be Abraham pia pexui. Baxua Nacom cana exana po jiwitha, po jiwi peyabara jume cowũntsiwixae pocotsiwa exanapaeba bara bequein daxita barapo jiwi jopa pewi thabiwichi copiya. Daxota Nacom irũ yabara nanta xeina xua bara irũ barapomonae jũntũ coyene xanepana bapontha. ¹² Barichi Abraham be coxiyũn cana exanatsi, xua pomonae bayatha pewi thabiwichi barapomonae be pia pecanamataxeinaeinchi. Jopa Abraham be coxiyũn cana exanaetsi xua poxoru barapomonae pewi thabixae. Jame apara be coxiyũn cana exanatsi poxoru irũ peyabara jume cowũntsiya jinompaexae pocotsiwa Nacom exanapaeba icha Abraham ichi, pon wamo susatopin xua beya poxonae wi thabatsi.

Meje yabara xua poxonae Nacom cata pia peyabara tsiwũnae muxu dutsiwa, Abraham catatsi

¹³ Nacom yabara tsiwũnae muxu duta Abrahamtha irũ pia pemomoxi susato jiwitha tatsi. Nacom yabara tsiwũnae muxu duta xua catsina daxita barapo cae pin nacue Abrahamtha, irũ pia pemomoxi susato jiwitha tatsi. Daxita barapomonaetha Nacom jopa apara catsiyo barapo yabara petsiwũnae muxu dutsiwa xua poxoru Abraham peexanaexae pocotsiwa Moisés pia peitorobi coyenewatha itoroba tsipei Moisés jopa cataunxuae naexanaeyo poxonae bayatha Abraham tũpa. Apara Nacom cata barapo

yabara petsiwænae muxu dutsiwa poxoru Abraham peyabara jume cowæntsixæ pocotsiwa Nacom exanapaeba. Daxota Nacom yabara tsitatsi xua bara Abraham pejuntu coyene xanepanaein bapontha. ¹⁴ Icha pomonae xeinaetsipa pocotsiwa Nacom yabara tsiwænae muxu duta, icha barapomonae apara barapomonae tsipae pomonae exana daxita pocotsiwa Moisés pia peitorobi coyenewatha itoroba bapoxonae barapomonae jopa nantawenonaetsipae xua yabara jume cowænta pocotsiwa Nacom exanapaeba. Matautano pocotsiwa xua Nacom yabara tsiwænae muxu duta barapomonae jopa tsita xainyei tsipaetsi. ¹⁵ Ichitha baraxua jopa xainyeyo, tsipei Moisés pia peitorobi coyenewa saya exana xua jiwi atene peexanaewatsi. Atene exanatsi poxoru jiwi beta jopa daxita yabara jume cuiya exanaeyo barapo Moisés pia peitorobi coyenewa tatsi. Ichitha pomonae jopa xeinaeyo Moisés pia peitorobi coyenewa, barapomonae Nacom jopa tsita penatsicuentsiwatsi xua abe peexanaexæ xua poxonae jopa exanaeyo barapo peitorobi coyenewa.

¹⁶ Daxota Nacom yabara tsiwænae muxu duta Abrahamtha peyabara jume cowæntsixaetsi pocotsiwa Nacom exanapaeba. Nacom pia yabara petsiwænae muxu dutsiwa, Nacom bara xaniwaicha amanaya catsina Abraham pia pemomoxi susato jiwitha tatsi. Nacom jopa meisa catsiyo pomonaetha pomonae peexanaewi xua Moisés itoroba. Apra Nacom iru cata pomonaetha pomonae pejume cowæntsiwichi icha Abraham ichi poxonae jume cowænta Nacom. Bapon Abraham be coxiyæn cana exainchi xua daxita waxainchi be xua wanacanamataxeinaein, copiya pejume cowæntsixæ. ¹⁷ Nacom jeye Abrahamtha pejume diwesitha: “Xam cacana exanatsi xua ainya nacuanpiwi necayabara nanta xeinaenexa xua xam compam daxita nacuanpiwi cacanamata caexanatsi be coxiyæm”, jei Nacom Pejume Diwesitha. Daxota barapo yabara petsiwænae muxu dutsiwa Nacom tsita coyene xanepanatsi. Barapon Nacom Abraham yabara jume cowænta pocotsiwa Nacom exanapaeba. Matautano barapo Nacom equeicha asu exana pomonae bayatha werapa. Matautano barapon Nacom itoroba xua forota pocotsiwan jiwi bapana jopa tae copiya, poxoru Nacom cataunxuae abu jopa forotsiyo bapocotsiwan.

¹⁸ Abraham poxonae nawei wetaba xua jopa itacupaetsi xua pexeinaewa pexui, awiya cataunxuae yabara jume cowæntsiya wænae ewata pocotsiwa Nacom exanapaeba. Bapon jume cowæntsiya popona xua Nacom exanaena xua bayatha paeba xua Abraham pinae bapon pexanto xeinaena. Abraham yabara jume cowænta pocotsiwa Nacom exanapaeba pocotsiwa yabara tsiwænae muxu duta. Bapon Abraham cana exanatsi xua daxita carepaya nacuan jiwi peyabara nanta xeinaenexa xua Abraham compa daxita nacuanpiwi canamata exanatsi be coxiyæn. Caena bayatha Nacom tsipaeba Abraham. Nacom jeye: “Abraham, exanaein ayei jiwi jinya nemomoxi susato jiwi”, jei Nacom. ¹⁹ Abraham jopa juntu coyene natsepaeyo xua peyabara jume cowæntsiwa pocotsiwa Nacom exanapaeba, bequein bara bapon cien po weibe xeina. Bapon Abraham yaputane, xua bapon iru piowa tatsi Sara bara imoxoyo methaunxuae tupaenabe. Abraham piseuribe bichocono perunbe. Matautano yaputaneno xua Sara jopa itacupaetsi xua pexui pexeinaewa. ²⁰ Bapon Abraham jopa ainya muxu xeinaeyo. Matautano jopa nacui baraxubiyo xua peyabara jume cowæntsiwa pocotsiwa Nacom exanapaeba xua pocotsiwa Nacom yabara tsiwænae muxu duta xua pinae Abraham pexanto xeinaena. Jame bapon Abraham beta xaniwaicha jume cocowæntapona. Abraham wænae jaintapona Nacom. ²¹ Baxua Abraham exanapona poxoru bara yatsicaewa yaputane xua Nacom itacupatsi xua peexanaewa pocotsiwa xua bapon yabara tsiwænae muxu duta. ²² Abraham peyabara jume cowæntsixæ pocotsiwa Nacom exanapaeba, daxota bapon Nacom tsitatsi xua bapon bara peyabara juntu coyene tsita xanepanaeinchi xua jopa petsita natsicuentsixaetsi abe peexanaexæ bapontha.

²³ Po jumein xua bayatha Abraham yabara paebatsi xua jeye: “Nacom tsitatsi xua bapon bara pejuntu coyene xanepanaein xua jopa petsita natsicuentsixaetsi abe peexanaexæ bapontha”, jei, barapo jumein jopa meisa tinaeyo xua bapon nexa. ²⁴ Barapo jumein xua po jumein tina apra iru bara waxainchi nexa xua naca yabara paebaru.

Wajume cowuntsixae Nacom, daxota Nacom tsitatsi xua bara waxainchi iru wajuntu coyene xanepanae jiwichi xua jopa watsita natsicuentisiwatsi xua abe waexanaexae bapontha. Waxainchi yabara jume cowuntatsi pocotsiwa Nacom exanapaeba, pon Jesús asu exanatsi petupa cuiru coyene weya, pon Wanacanamataxeinaein. ²⁵ Nacom itoroba xua bapon Jesús naca tsitupa abe waexana cuiru coyenewan. Matautano Nacom asu exanano, xua Jesús asu petupa cuiru coyene weya xua wanaca cana exanaenexa xua jopa Nacom watsita natsicuentisiwa tsane xua abe waexanaexae bapontha.

5

Meje yabara xua Nacom wanaca cana exanaewa xua jopa wanatsicuentisiwa tsane bapontha, xua abe waexanaexae

¹ Nacom naca cana exana xua bapon jopa watsita natsicuentisiwa tsane abe waexanaexae bapontha. Baxua Nacom naca cana exana wayabara jume cowuntsixae pocotsiwa Nacom exanapaeba. Daxota waxainchi juntea dubenanaebiyatsi Nacom peitutha tatsi Jesucristo wanaca tsitupaexae, pon Wanacanamataxeinaein. ² Cristo wajume cowuntsixae, daxota naca cana exana xua Nacom bara wanaca yawenaewa tsane wanaca antobexae. Nacom wanaca yawenaexae ajuntucoyenesuya jinompatsi. Yawa waxainchi juntu coyene weiweinatasi wawuna ewatsixae xua bexa iru xeinainchi pebaru cui itura jinaewa po pebaru cui itura jinaewa jiwi Nacom tsita xeinatsi peainya cuinxae icha bapon ichi. ³ Jopa meisa baxua nexiyo, jame yawa juntu coyene weiweineibatsi poxonae ichamona naca atene exaneiba. Tsipei waxainchi yaputainchi xua wanaca juntu coyene ayarusu exanaewa xua daxota jopa waaitaconaewa poxonae bequein ichamona naca atene exana. ⁴ Poxona ajuntucoyenyarusuya jinompatsi xua daxota jopa waaitaconaewa poxonae bequein ichamona naca atene exana, bapoxona Nacom naca weyatane xua bara beta waexanaewa. Poxona Nacom naca weyatane, baxua naca cana exana xua wawuna ewatsiya ewatsiwatsi xua Nacom nacata exanaena pocotsiwa yabara naca tsiwuna muxu duta. ⁵ Barapo wawuna ewatsiwa jopa naca juntu coyene cana exanaeyo xua wajuntu coyene wecoyeiwa xua jopa wataexae pocotsiwa wawuna ewatsiwa. Nacom bichocono naca juntu coyene yuca cana exana pia peantobe coyenewa pia Pejumope tunaxutha. Barapo pia Pejumope tunaxu tatsi naca nacana jumope cata wajuntu coyenewatha.

⁶ Poxona waxainchi jopa naca itacupaeyo xua wacoutha wanacapanenebiwa, bapoxonae Cristo naca tsitupa abe waexanae cuiru coyenewan nexa. Bapon Cristo tupa poxona po mataqueitha Nacom copata xua bapon petupaewa tsaneba. ⁷ Barapo cae pin nacuathe nacata ayapube xua nanta xeinatsi xua jiton wayabara nanta xinaewa xua ichun peita araranaewatsi xua peyapu cabocaewa xua daxota petupaewa bequein barapo ichun daxita yabara jume cuiya exana pocotsiwa Moisés pia peitorobi coyenewatha paeba. Tsipei jiwi ba anatsiantabe, jopa ichipaeyo xua petupaewa. Ichitha ichacuitha tsipae metha jiton yaita araranaetsipa xua peyapu cabocaewa xua daxota petupaewa pon xanepanaya petaexanaein ichamona. ⁸ Jame Nacom xaniwaicha naca tsita itapeinya xaina pia wanaca antobexae. Baxua Nacom naca cana exana poxonae Cristo naca yapu caboca xua wanaca tsitupaewa bara bequein cataunxuae abe waexanae jiwichi. ⁹ Nacom naca exana xua waxainchi pejuntu coyene xanepanae jiwichi xua poxonae jopa natsicuentisichi bapontha abe waexanaexae, xua poxonae Cristo naca tsitupa. Bapoxonae yawa jana pichapabarena. Barichi icha coyenewano exanaenano. Cristo naca yaputane exana xua wanaca capanenebiwa tsane Nacom pia pewanaca casebiwa weya. Po mataqueitha Nacom yabara paebina daxita jiwi xua penatsicuentisiwa xua abe peexanaexae, barapo mataqueitha Nacomtha jopa natsicuentisi tsainchi xua abe waexanaexae. ¹⁰ Copiyatha waxainchi Nacom pia peaitafaetabi jiwichi. Ichitha bapon Nacom naca cana exana xua waita coxonaewa xua daxota Nacom pia jiwi tatsi wanaexanaenexa, Pexanto tatsi pewanaca tsitupaexae. Ichitha anoxuae Nacom pia jiwi tatsixaetsi, Jesucristo naca capanenebiya pia peasu poponae coyenewatha. ¹¹ Jopa meisa

baxuiyo, jame juntu coyene weiweinatsino Nacomtha xua xuan Jesucristo peexanaexae waxainchi nexa, pon Wanacanamataxeinaein. Bapon Cristo naca cana exana xua waxainchi Nacom wanaca ita coxonaewa xua daxota Nacom pia jiwi tatsi wanaca cana exanaewa.

Meje xua Adán yabara iru Cristo yabara

¹² Caein pon xua copiya abe exana barapo cae pin nacuathe, bapon Adán. Bapon caena bayatha tupa copiya abe peexanaexae. Bapoxonae daxita jiwi abe eexanapona barapo cae pin nacuathe. Jiwi abe peexanaponaexae daxota werapaena, tsipei daxita jiwi abe exana. ¹³ Barapo cae pin nacuathe jiwi abe eexanapona beya poxonae Moisés pia peitorobi coyene tatsi xeina barapo cae pin nacuathepiwi. Poxonae jiwi cataunxuae jopa yaputaeyo Moisés pia peitorobi coyenewa tatsi, jopa Nacom tsitatsi xua barapomonae pexeinaewa penatsicuenti coyenewa bapontha bequein barapomonae abe exanaetha. ¹⁴ Ichitha po dapaetha poxonae Adán popona weya xua beya poxonae iru Moisés popona, jiwi abe eexanapona. Daxota jiwi xeinapona po coyenewatha xua daxota werapaena barapo jiwi. Barapomonae werapa bequein pia peabe coyenewan tatsi jopa barichiyo icha Adán ichi. Adán abe exana poxonae bequein Nacom itoroba xua jopa bewa pinae xae tsane petheito. Bapon Adán bara be bapon pon bexa patopeicapaeba, bapon Cristo. Adán pia coutha xua jiwi abe peexanaewa xua jiwi pecanamata caexanaexaetsi. Seicaya nama Cristo pia coutha xua jiwi beta peexanaewa xua jiwi pecanamata caexanaexaetsi.

¹⁵ Pocotsi coyene xua Adán naca tsiexana jopa be ichiyo xua pocotsi coyene naca tsiexana Jesucristo. Jiwi nawita werapa poxoru caein abe pecanamata exanaexae bapon Adán. Ichitha Nacom amanaya naca tsiexana pecapanenebiyae coyenewa poxoru caein, pon Jesucristo, naca tsitupa abe waexanaexae. Barapo coyene xua po coyene Nacom naca tsiexana bichocono peainya cui coyene, beyacaincha po cui coyene Adán naca tsiexana. Barapo coyene Nacom naca tsiexana xua peantobexae daxita jiwi peyawenaenexa ayei jiwitha. ¹⁶ Po peabe coyenewa caein canamata exana bapon Adán jopa coyene jupaetsi xua nacui coyene jupa exanabe po cui coyene xua Nacom amanaya naca tsiexana. Copiya Adán canamata exana abe peexanae cuiru coyene. Bapoxonae daxita jiwi jupa exana. Nacom yabara paeba Adán xua penatsicuentiwa abe peexanaexae. Daxota Nacom Adán yabara jeichichi xua Adán bewa pinae tupaena abe peexanaexae. Barichi Nacom tane xua daxita jiwi bewa werapaena bichocono abe peexanaexae. Daxota Nacom ichichipa xua jiwi peyawenaewatsi. Nacom amanaya juntu coyene xanepana exana jiwi xua barapo jiwi jopa natsicuentiyo bapontha, abe peexanaexae. Baxua exana Cristo petsitupaexae jiwi. ¹⁷ Bara xaniwaicha caein abe pecanamata exanaexae, daxita jiwi bewa werapaena abe peexanaexae. Ichitha nama anoxuae pocotsiwa caein peexanaexae pon Jesucristo, barapocotsiwa bichocono ayapusu beyacaincha xua Adán exana. Jesucristo petsitupaexae jiwi daxota Nacom bichocono jopa juniya yawenaeyo jiwi peantobexae. Barapo jiwi Nacom amanaya juntu coyene xanepana exana. Daxota Nacom weyatane xua barapomonae jopa xeinaeyo penatsicuenti coyenewa bapontha bequein barapomonae abe exana taetha. Barapomonae Jesucristo ayapusuya nanabaruru yawa popona penanabaruru yawa itorobinexa tsane ichamonaetha.

¹⁸ Barapon Adán pia peabe coyenewaxae, daxita jiwi natsicuenta Nacomtha xuya abe peexanaexae icha Adán ichi. Po pexanepanae coyenexae xua Jesucristo exana, barapo coyene jiwi cana exanatsi xua capanenebiyatsi penatsicuenti coyenewa weya xua abe peexanaexae. Daxota daxita jiwi pomonae pejume cowuntsixae Jesucristo itacupatsi xua ataya asu jinompaena. ¹⁹ Baxua caanutan xua caein jopa pejume jejeixae xua peexanaewa pocotsiwa xua Nacom itoroba, daxota jiwi ayei jiwi abe eexanapona. Barichi xua caein pejejeixae xua peexanaewa pocotsiwa Nacom itoroba, daxota ayei jiwi najuntu coyene xanepana exanapona Nacomtha. Matauta barapomonae Nacom capanenebiya exana xua pia penatsicuenti coyenewa weya, xua abe peexanaexae.

²⁰ Nacom itoroba, xua Moisés tina pia peitorobi coyenewa xua jiwi peyaputaewa tsane xua bara jiwi daxita abe peexanapona jiwi poxonae jopa yabara jume cuiya exanaeyo

pocotsiwa Moisés itoroba. Poxonae jiwi equeicha mataropeicha yaputane Moisés pia peitorobi coyenewa, bapoxonae equeicha bichocono mataropeicha yaputane abe peexanae coyenewan. Daichitha Nacom bichocono mataropeicha aantobe tsoponae xua peyawenaenexatsi barapomonae. ²¹ Copiya daxita jiwi werapa abe peexanaexae. Ichitha anoxuae Nacom peantobexae jiwi daxota cana exana xua jopa xeinaeyo penatsicuentisi coyenewa xua abe peexanaexae. Nacom jiwi catatsi peajüntuyapusu coyenewa po peajüntuyapusuwa ataya tsiteca Jesucristo pon Wanacanamataxeinaein wanaca tsitupaexae.

6

Meje yabara xua waxainchi asu jinompatsi caemonae wanaexanaexae Cristotha

¹ Waxainchi jopa bewa abe eexanaponaeinchi xua Nacom wanaca yayawenapon-aenexa xua daxota wayaputaenexa xua bara Nacom naca antobe. ² Jopa bewa baxua exanaetsi. Waxainchi bayatha wetatsi xua abe waexanaewa. Equeicha jopa bewa abe exanaetsi, icha be pon petupaein ichi, xua jopa itacupaetsi xua equeicha abe peexanaewa, tsipei bayatha tupa. ³ Paxam payaputaneme baxue: Poxonae waxainchi ichamonae naca bautisaba, bapoxonae caemonae nanaexainchi Cristo Jesustha. Waxainchi caemonae wananaexanaexae Cristotha poxonae naca bautisaba, bapoxonae be cae cui coyeneya nanaexanatsi xua wawerapaewa, icha bapon ichi poxonae tupa. Baxua be icha waxainchi xua bayatha werapatsi xua daxota equeicha jopa naca itacupaeyo xua abe waexanaewa. ⁴ Wanaca bautisabi coyenewa baxua be poxonae Cristo naca cayawa muthuthu xotsi. Yawano be Cristo naca cayawa tupa poxonae bapon tupa. Icha Cristo ichichi xua equeicha asu exanatsi petupae cuiru coyene weya, Nacom bara naca ichi tsane. Nacom Cristo paxa asu cana exanatsi pia peitupanae coicha ayapusu itorobi coyenewatha. Barichi Nacom bara naca ichi tsane wayawa jinompaenexa pena juntu coyenewa. Bapoxonae xeinatsi pena juntu coyenewa, xua po juntu coyenewatha jinompatsi icha Cristo ichi. Nacom, baxua Cristo paxa cana exanatsi Nacom pia peitupanae coicha ayapusu itorobi coyenewatha.

⁵ Tsipei waxainchi be caemonae nanaexanaeinchi po petupae coyenewatha poxonae bapon tupa. Barichi tsane poxonae equeicha asu naca exanaena petupae cuiru coyene weya icha matha Cristo ichichi poxonae asu exainchi petupae cuiru coyene weya. Bapoxonae caemonae nanaexanaeinchi Cristotha. Daxota icha Cristo ichichi xua poxonae asu exainchi equeicha petupae cuiru coyene weya, naca barichi tsane. Nacom equeicha asu naca exanaena petupae cuiru coyene weya caemonae wananaexanaexaetsi Cristotha poxonae be naca yawa tupa Cristo. ⁶ Waxainchi yaputainchi, xua pocotsiwan exanatsi xua xuan waperu juntu coyenein po coyenein naca cana exana xua abe waexanaewa, barapo coyenein be weraweraca poxonae Cristo tupa exanadutatsi naetotha. Baxua nacata exana xua jopa equeicha bichocono waichichipaewa tsane xua waexanaewa abe coyenewa poxonae bequein wajuntu coyene naca itoroba xua abe waexanaewa tsane. ⁷ Daxota ba pon xua bayatha tupa jopa itacupaetsi xua equeicha abe peexanaewa. Waxainchi barichichi jopa naca itacupaeyo xua equeicha abe waexanaewa tsane. ⁸ Waxainchi Cristo naca cayawa tupa, daxota jume cowuntatsi xua bexa bapon Cristo baru jinompaeinchi. ⁹ Waxainchi yaputainchi, xua poxonae Cristo equeicha asu exanatsi petupae cuiru coyene weya, bapoxonae bapana equeicha jopa tupa exanae tsainchi. ¹⁰ Poxonae Cristo tupa bapon saya bara cae coyenewatha tupa xua daxita jiwi nexa abe peexanaexae xua ataya tsiteca. Ichitha xua Cristo anoxuae asu popona, barapo pepoponae coyenewa xua beta peexanaenexa pocotsiwa Nacom peichichipaewa xua bara ataya tsane. ¹¹ Barichi anoxuae paxam bewa pananta xeinaename be pomonae xua werapa xua equeicha jopa itacupaetsi xua abe peexanaewa. Bara paichinde paexande xua jopa paexanaeinde icha barapomonae ichi. Paexande pocotsiwa Nacom tsita xanepanatsi xua pocotsiwa Nacom ichichipa xua caemonae painya nanaexanaexae Cristo Jesustha.

¹² Daxota jopa pacopatsinde xua painya jũntũ coyenein paca itoroba xua abe painya neexanaewa. Painya pepon werapaena daxota jopa paexanaem tsane xua pocotsiwa painya pepon paca itoroba xua pocotsiwa ichichipa paexaname xua peabe coyenewan. ¹³ Painya xoba pacopatame xua bara painya jũntũ coyenein paca itorobina xua painya neexanaewa tsane peabe coyenewan. Jame maisa bara pacopare xua bara Nacom paca jũntũ coyene itorobeibina painya neexanaenexa pocotsiwa Nacom paca itoroba. Bara paichinde icha be ichi xua pomonae bayatha werapa xua equeicha asũ exanatsi xua jopa equeicha abe exanaeyo. ¹⁴ Anoxuae barapo abe peexanae coyenewa po coyene xua copiya paexanaponame jopa itacũpaetsi xua paca cana exana xua equeicha abe painya neexanaponaewa tsane. Barichi anoxuae equeicha jopa panantawenonaem xua paexanaename pocotsiwa Moisés paca itoroba pia peitorobi coyenewatha Nacom painya paca capanenebiyaenexa. Jame paexana dubenanaebiyama pocotsiwa xua Nacom ichichipa pia paca necayawenae coyenewatha, pia paca necaantobexae.

Meje yabara xua waxainchi bewa exanaetsi pocotsiwa pexainyei coyenewa

¹⁵ ¡Waxainchi jopa bewa abe eexanaponaeinchi! Anoxuae jopa Moisés naca itorobiyo pia peitorobi coyenewatha xua waexanaewa. Apra Nacom naca itoroba wanaca yawenaenexa xua wanaca antobexae. ¹⁶ Paxam payaputaneme icha pebin nacaenaeta xua ichichipa exana pocotsiwa xua ichũn itoroba, bapoxonae bapon naexana be pon xua amanaya petanacuichin pon pia pentacaponaeinchi nexa. Daxota poxonae paxam paichichipame xua itapeta painya neexanaewa peabe coyenewan, bapoxonae barapo peabe coyenewa be paca canamataxeina. Bapoxonae be pana nacana exaname be pocotsin amanaya petanacuichin pia pentacaponaein nexa. Daxota pawerapaename, painya neexanaexae barapo abe peexanae coyenewa. Ichacuitha icha paichichipame xua itapeta painya neexanaewa pocotsiwa xua Nacom itoroba, bapoxonae xaniwaichiya painompame. Nacom tsitatsi xua painya jũntũ coyenein xanepana xua jopa painya nenatsicuentsiwa abe painya exanaexae bapontha. ¹⁷ Ichitha baxua yabara Nacom tsipaeban, janje: “Nacom maisa jũntũ coyene weiweinan, barapo Roma tomarapiwi pia peexanaexae. Tsipei copiya Ʃ saya xua abe coyenewan peexanaewi. Ichitha anoxuae barapomonae cajume cowũnta. Barapomonae bichocono jume cowũnta pia jũntũ coyenewatha pocotsiwa pexainyei jume xua barapomonae nacuiduba”, janje Nacomtha. ¹⁸ Daxota anoxuae Nacom paca capanenebiya exana barapo abe painya neexanae coyenewan weya. Yawano paxam amanaya painya netanacuichi jiwi pam Nacom nexa xua beta painya neexanaewam. ¹⁹ Xan cueicueijan pocotsi jumeintha xua jiwi itacũpatsi peyaputaenexa, tsipei yaputan xua pacata ayapube xua painya neyaputaewa. Caena bayatha paxam saya payabara copatame xua bara painya neexanaewa peabe coyenewan xua paichichipame. Jamaisa anoxuae payabara copare xua painya pepon peexanaponaenexa pocotsiwa xua pexanepanae coyenewan Nacom nexa. Bapoxonae Nacom patsita jũntũ coyene xanepanaya jinompame.

²⁰ Poxonae cataunxuae saya Ʃ painya neexanaewi abe peexanae coyenewan, bapoxonae jopa Ʃ painya neexanae jiwi pocotsiwa pexanepanae coyenewan. ²¹ Poxonae bayatha peabe coyenewan paexaname baraxua apra jopa paca yawenaeyo. Apra saya paca aura exana anoxuae. Ichitha barapo abe peexanae coyenewan saya paca cana exana xua painya newerapaewa tsane. ²² Ichitha anoxuae panenebiya painya nepaca exanaexae barapo abe painya neexanae coyenewan weya, daxota anoxuae paexaname pocotsiwa xua Nacom paca itoroba. Daxota pocotsiwa Nacom painya nepaca matomatsiwa, baxua apra poxonae Nacom paca jũntũ coyene xanepana cana exana bapontha. Mataũtano Nacom paca catsibina pocotsiwa peajũntũcoyenesũwa po peajũntũcoyenesũwa ataya tsiteca. ²³ Barapo peabe coyenewaxae saya jiwi werapaena cana exanaeinchi. Ichitha pocotsiwa xua Nacom amanaya wanaca catsiwa, baxua apra po coyene xua peajũntũyapusũ coyene po peajũntũyapusũ coyene ataya tsiteca. Barapo peajũntũyapusũ coyenewa naca cana exana xua caemonae naexainchi Cristo Jesthã, pon Wanacanamataxeinaein.

7

Meje yabara xua po peitorobi coyenewa poxonae jitha peecaewa yabũyo

¹ Tamonae pam, pomonae pam pomonae irũ painya nejume cowũntsi jiwixae Jesu-cristotha. Paxam barapomonae pam xua payaputaneme Moisés pia peitorobi coyenewa tatsi. Yawano payaputaneme xua jiwi saya bewa exanaena pocotsiwa Moisés itoroba barapo peitorobi coyenewatha poxonae cataunxuae jinompa barapo cae pin nacuathe. Ichitha poxonae jiwi werapa barapomonae jopa equeicha bewa exanae pocotsiwa barapo peitorobi coyenewa itoroba. ² Paca tsipaebatsi peyabara jũta paebiwa: Petsiriwa powa xeina piseuri bewa piseuritha cuicuinae pepaebixae barapo peitorobi coyenewa, xua poxonae pia pebin tatsi awiya asũ popona. Ichitha icha barapowa pia pebin tatsi tatũpatsi barapowa jopa nantawenonaeyo xua peexanaewa pocotsiwa Moisés itoroba barapo peitorobi coyenewatha xua po coyene pebin yabara paebatsi. ³ Daxota icha barapowa isa maiteca icha pebin xua nasi cui exana icha pebintha poxonae cataunxuae barũ popona pia pebin, bapowa bapoxonae Nacom tsita natsicuentatsi xua abe peexanaexae. Ichitha icha bapowa pia pebin tatsi tatũpatsi barapowa itacũpatsi xua pepichiwa icha pebin. Barapowa jopa Nacom tsita natsicuentatsi xua abe peexanaexae. Poxonae baxua exana, tsipei barapo peitorobi coyenewa jopa yabara paebiyo baxua.

⁴ Tamonae pam, paxam pomonae irũ painya nejume cowũntsiwixae Jesucristo. Barichi bara jũta ichi poxonae Cristo tũpa, paxam irũ be pawerapame. Daxota jopa panantawenonaem xua paexanaename pocotsiwa Moisés itoroba pia peitorobi coyenewatha. Anoxuae paxename ichũn pon paca itoroba. Baraxua barichi icha yabũyo ichi xua pita icha pebin pon bapowa itorobatsi poxonae piseuri tatsi tatũpatsi. Anoxuae paxam Cristo piamonae tatsi pam, pon equeicha asũ exanatsi petũpae cuiru coyene weya. Barapo coyenewatha Nacom naca cana exana xua wanaca itacũpaewa xua waexanaewa tsane pocotsiwa xanepana Nacom nexa. ⁵ Poxonae waxainchi copiya jume cowũntatsi, Moisés yabara naca itoroba pia peitorobi coyenewatha po coyenewa jopa bewa exanaetsi. Ichitha wajũntũ coyenewatha ichichipatsi nawita xua waexanaewa barapo abe peexanae coyenewan poxonae jume tainchi xua jopa bewa exanaetsi barapo coyene. Barapo coyene naca cana exana xua saya wawerapaewa tsane. ⁶ Ichitha anoxuae jopa wanantawenonaewa xua waexanaewa pocotsiwa Moisés itoroba pia peitorobi coyenewatha. Waxainchi bayatha be werapatsi xua daxota barapo Moisés pia peitorobi coyene tatsi jopa itacũpaetsi xua wanaca itorobiwa. Daxota anoxuae naca itacũpa xua watanacuichiwa Nacom. Waxainchi xeinatsi pena jũntũbũ coyene po pena jũntũ coyene Nacom pia Pejumope tũnaxũ tatsi naca cata. Nama jopa equeicha exanaetsi pocotsiwa Moisés itoroba barapo pia peru itorobi coyenewatha xua bayatha tina.

Meje yabara xua Pablo jeye: “Meje xua po peabe exanae coyene xeinan”, jei.

⁷ Waxainchi jopa bewa paebichi xua Moisés pia peitorobi coyenewa tatsi abe. Tsipei barapo Moisés pia peitorobi coyenewa tatsi necuiduba xua bara abe exanan. Copiya jopa yaputaeyo xua peabe coyenewa poxonae yabara uwiya ichichipan pocotsiwan ichamonae xeina. Ichitha barapo peitorobi coyenewa naca tsipaeba, naca jeye: “Jopa yabara uwiya paichichipaeinde pocotsiwa xua ichamonae xeina”, jei barapo peitorobi coyenewa. ⁸ Poxonae copiya jume cowũntan, Moisés yabara neitoroba pia peitorobi coyenewatha po coyenewan xua jopa bewa uwiya ichichipaein tsane ichamonae piawan. Ichitha jame ichichipan nawita tajũntũ coyenewatha xua taxeinaewa tsane xua ichamonae piawan poxonae jume tan xua jopa bewa ichichipaein tsane xua taxeinaewa tsane ichamonae piawan. Poxonae awiya jopa yaputaeyo Moisés pia peitorobi coyenewa jopa ichipaeinyo xua taxeinaewa pocotsiwa ichamonae piawan. ⁹ Caena bayatha poxonae jopa yaputaeyo Moisés pia peitorobi coyenewa xan saya jũntema poponan, tsipei jopa yabara yaputaeyo xua abe taexanaewa. Ichitha pirapae bequein yabara yaputan barapo peitorobi coyenewa, xua ichamonae piawan peuwiwa yabara, awiya bichocono abe exanaponan. Bapoxonae bara be tatũpae coyenewaba tsipei jopa jũntema

tapoponaewa abe taexanaexae. ¹⁰ Barapo Moisés pia peitorobi coyenewa tatsi Nacom cata xua jiwi pejuntũ coyene weiweinaenexa xua poxonae pejuntũ coyene xanepanaewa tsane. Poxonae jiwi jume cowuntsiya exana daxita xua barapo coyenewatha itoroba, barapo jiwi bexa tsane xeinaena peajuntũyapusuwa xua bara ataya tsane xeinaena. Daichitha barapo coyenewa wecoyei necana exana tsipei bewa tãpae coyenewa tsane poxoru jopa neitacũpaeayo xua exanan daxita xua barapo coyenewa itoroba. ¹¹ Barapo Moisés peitorobi coyenewa be netsita penaerabi coyenewa. Mexeya itara xeinacuaein jantocuae peajuntũyapusuwa poxonae exanaein pocotsiwa Moisés itoroba pia peitorobi coyenewatha. Daichitha poxonae abe exanan Moisés pia peitorobi coyenewa netsita ituta xua bewa tãpaein tanatsicuentsiwaxae abe taexanaexae Nacomtha.

¹² Daxita po peitorobi coyenewan Nacom cata Moiestha daxita bara wãnae, yawa bara pexainyei coyenewan. ¹³ Barapo Moisés pia peitorobi coyenewa jopa necana exanaeyo xua bewa tãpaein tanatsicuentsiwaxae abe taexanaexae Nacomtha. Apara jame barapo abe taexanae coyene necana exana xua be tãpaein tanatsicuentsiwaxae abe taexanaexae Nacomtha. Bequein barapo Moisés pia peitorobi coyene tatsi wãnae, daichitha barapo peitorobi coyene neyaputane exana xua abe taexanaein. Barapo peitorobi coyenewatha xua Nacom naca yaputane exana xua poxonae abe exanatsi barapo abe peexanae coyenewa bara xainyei, bara abe bichocono. Jopa bichocono juniya abeyo.

¹⁴ Yaputainchi xua Moisés pia peitorobi coyenewa tatsi apara xanepana, Nacom weya pejume pichipaexae. Ichitha poxoru saya jiton jũntũ coyeneya taxeinainxae tajũntũ coyene necana exana xua abe taexanaewa. ¹⁵ Tsipei jopa xapain yaputaeyo pocotsiwa xua exanan, poxoru jopa exanaeyo pocotsiwa xua xanepana xua pocotsiwa ichichipan xua taexanaewa nexa. Ichitha pocotsiwa aichaxaibin xua jopa pexanepanaexae, daichitha apara baxua exaneiban. ¹⁶ Ichitha icha abe exanan xua bequein aichaxaibin abe taexanaewa, bapoxonae yaputan xua Moisés pia peitorobi coyenewa tatsi xanepana. Tsipei barapo peitorobi coyenewa necuiduba xua jopa bewa exanae abe peexanae coyenewan. ¹⁷ Tacoutha jopa ichipaeinyo xua abe taexanaewa bequein baxua exanan. Ichitha barapo abe peexanae coyenewa xua tajũntũ coyenewatha xeinan, barapo coyene necana exana xua apara abe taexanaewa. ¹⁸ Tsipei xan yaputan xua xeinan jiton pia coyene. Daxota jopa xeinaeyo pexanepanae coyenewa. Bequein ichichipan xua xanepanaya taexanaewa, ichitha jopa neitacũpaeayo xua baxua exanan tacoutha. ¹⁹ Jopa exanaeyo po pexanepanae coyenewa bequein ichichipaethan xua taexanaewa. Ichitha ñ exanaponan po abe peexanae coyenewan bequein aichaxaibithan xua taexanaewa. ²⁰ Daxota icha abe exanan pocotsiwa bequein aichaxaibithan xua abe taexanaewa, bapoxonae jopa neitacũpaeayo xua tacoutha nayawenan xua jopa abe taexanaewa. Barapo abe peexanae coyenewa xua tajũntũ coyenewatha xeinan, barapo coyene necana exana xua equeicha mataropeicha abe taexanaewa.

²¹ Daxota nayaputan pocotsiwa exaneiban tajũntũ coyenewatha, xua poxonae bequein ichichipan beta taexanaewa tsane bapoxonae abe exaneiban. ²² Bichocono ichichipeiban tajũntũ coyenetha Nacom Pejume Diwesi tatsi. ²³ Ichitha yaputan xua po peabe coyenewa tajũntũ coyenewatha xeinan neitoroba xua abe taexanaewa tsaibi, bequein nanta xeinan xua beta taexanaewa, icha Nacom ichichipa. Ichitha barapo peabe coyenewa neitoroba xua equeicha mataropeichiya abe taexanaewa, po peabe coyenewa xua tajũntũ coyenewatha xeinan. Xan be pon tanebusi cui taetaein ichamonae tsipei barapo abe taexanaewa neitorobeiba xua abe taexanaewa.

²⁴ ¡Ooo, jopa taxanepanae tsocuaeyo! ¡Jopa tajũntũ coyene wãnae tsocuaeyo! ¡Jintam metha necapanepaena barapo tapepon weya po pepon xua bewa tãpaena?

²⁵ Daxota Nacomtha janje: “Nacom jũntũ coyene weiweinan xua Jesucristo, pon Tanecanamataxeinaein, itacũpatsi xua tanecapanepaewa tsane barapo tapepon weya”, jan Nacomtha. Daxota yaputan xua nanta xeinan xua bara beta taexanaewa pocotsiwa Nacom neitoroba, ichitha tajũntũ coyenewatha exanan pocotsiwa xua abe taexanaewa.

8

Meje yabara xua peajuntuyarusuwa pejinompaewa po peajuntuyarusuwa Nacom pia Pejumope tñaxu tatsi naca cata

¹ Dapon ajibi pon itacupatsi peyabara paebiwa xua pomonae caemonae penaexanaewi Cristo Jesustha natsicuenta abe peexanaexae Nacomtha. ² Nacom pia Pejumope tñaxu tatsi naca cata peajuntuyarusuwa xua wajinompae coyenewanexa xua caemonae xua wanaexanaexaetsi Cristo Jesustha. Barapo Nacom pia Pejumope tñaxu tatsi neyawena pia peayarusu itorobi coyenewatha. Necapanepa exana po peitorobi coyene weya xua neitoroba xua abe taexanaewa. Matautano necapanepa exana xua po peitorobi coyene weya tupa necana exana. ³ Moisés pia peitorobi coyenewa tatsi jopa itacupaetsi xua jiwi capanenebiya exainchi abe pia peexanae cuiru coyenein weya. Jiwi jopa itacupaetsi xua daxita yabara jume cuiya exana barapo Moisés pia peitorobi coyenewa tatsi. Ichitha Nacom Pexanto itorobica pon yatsicaya pepa Pexanto tatsi. Barapo Pexanto tatsi naexana be bara jiton pia pepon tatsi, bara naca peru coyene jupa, po pepontsi xua abe waexanae jiwichi. Poxonae Cristo tsitupa waabe exanae cuiru coyenewan, bapon amanayaba barapo waabe exanae cuiru coyenewantha. Barapo peabe coyenewan jopa peitacupaenexa tsainchi xua wanaca cana exanaewa tsane xua equeicha abe waexanaewa tsane. ⁴ Nacom baxua exana xua waxainchi wanaca itacupaenexa xua waexanaewanexa tsane pocotsiwa Moisés itoroba pia peitorobi coyenewatha. Waxainchi naca itacupa xua waexanaewa pocotsiwa Moisés pia peitorobi coyenewatha itoroba, poxoru jopa apra exanaetsi xua wapepon peichichipaexae. Apra jame exainchi xua pocotsiwa Nacom pia Pejumope tñaxu tatsi wanaca itorobixae.

⁵ Pomonae exana dubenanaebiya pocotsiwa pia pepon ichichipa exana, saya barapomonae yabara nanta xeina xua abe peexanae coyenewa. Pomonae exana dubenanaebiya icha pocotsiwa Nacom pia Pejumope tñaxu tatsi ichichipa, barapomonae saya yabara nanta xeina xua xanepanaya peexanae coyenewa pocotsiwa Nacom nexa. ⁶ Jiwi ba yabara nanta xeina abe peexanae cuiru coyenewan pocotsiwa pia pepon tatsi ichichipa. Bapoxonae barapo jiwi werapaena peexanaexae barapo abe peexanae coyene. Iru icha jiwi ba yabara nanta xeina xanepanaya peexanae coyenewan xua pocotsiwan Nacom pia Pejumope tñaxu tatsi ichichipa, barapomonae xeinaena peajuntuyarusuwa po peajuntuyarusuwa xua bara ataya tsane. Matautano xeinaena juntema pejinompae coyenewa. ⁷ Pomonae saya peyabara nanta xeinaewi xua abe peexanae coyenewa xua pocotsiwa pia pepon tatsi ichichipa exana, barapomonae apra Nacom pia peaitafaetabi jiwichi. Barapomonae jopa ichipaeyo xua peexanaewa pocotsiwa Nacom itoroba pia peitorobi coyenewatha xuano xua jopa itacupaetsi xua peexanaewa barapo coyene. ⁸ Pomonae naitomatsiya exana pocotsiwa xua pia pepon tatsi itoroba xua abe peexanae coyenewa peexanaewa, barapomonae Nacom jopa tsita xanepanaetsi.

⁹ Ichitha nama paxam jopa paexanaem baxua po abe peexanae cuiru coyenewan painya pepon paca cana exana xua abe painya neexanaewa. Ichitha nama paxam pajinompame icha be pocotsi coyeneya Nacom pia Pejumope tñaxu tatsi ichichipa, icha barapo jumope yatsicaewa paca baru jinompa. Pon jopa Nacom pia Pejumope tñaxu tatsi baru poponaetsi, bapon jopa Cristo pijimonae tatsi. ¹⁰ Ichitha icha Cristo paca baru popona, Nacom pia Pejumope tñaxu tatsi paca cana exana xua jopa painya nenatsicuentsiwam xua abe painya neexanaexae Nacomtha. Baxua paca cana exana bara bequein painya pepon werapa exanatsi abe peexanae coyenewan. Baxua paca cana exana painya nejuntu coyene xanepanaexae Nacomtha. ¹¹ Nacom pia Pejumope tñaxu tatsi Jesús asu exanatsi petupae cuiru coyene weya. Icha Nacom pia Pejumope tñaxu tatsi paca baru popona, bapoxonae Nacom asu exanaena painya pepon, po pepon xua werapaena. Baxua Nacom pacata exanaena, icha Nacom pia Pejumope tñaxu tatsi ichi poxonae Cristo asu exanatsi petupae cuiru coyene weya. Baxua Nacom exanaena painya nepaca baru jinompaexae Nacom pia Pejumope tñaxu tatsi.

¹² Tamonae pam, paxam pomonae iru painya nejume cowuntsiwixae Jesucristo. Waxainchi jopa bewa exanaetsi pocotsiwan xua wapepon naca cana exana xua abe waexanaewa tsane. ¹³ Tsipei icha paxam paexana dubenanaebiyame xua pocotsiwa painya pepon ichichipa xua abe painya neexanaewa tsane, bapoxonae pawerapaename. Ichitha jame paexana dubenanaebiyama pocotsiwa Nacom pia Pejumoŋe t̄nax̄ tatsi paca cui itoroba xua painya neexanaewa tsane. Bapoxonae jopa paexanaem pocotsiwan xua painya pepon paca cana exana xua abe painya neexanaewa tsane. Bapoxonae bexa tsane ajunt̄s̄uya pajinompaename Nacom pia nacuatheicha.

¹⁴ Daxita pomonae Nacom pia Pejumoŋe t̄nax̄ tatsi itorobiya ewata, barapomonae bara Nacom pia pexui tatsi. ¹⁵ Nacom paca nacana jumope cata. Barapo pejumoŋe jopa paca cana exanaeyo pomonae be painya nepaca busi cui tatayebeibi jiji pam xua ichamonae amanaya painya netanacuichi jiji pam, xua daxota equeicha pajunuwame. Jame barapo Nacom pia Pejumoŋe t̄nax̄ tatsi paca cana exana xua Nacom pia pexui tatsi pam. Barapo Nacom pia Pejumoŋe t̄nax̄ tatsi naca exana xua barompaya wajeiwa: “Axa”, wajeiwa Nacomtha. ¹⁶ Nacom pia Pejumoŋe t̄nax̄ tatsi iru wajunt̄ coyenewa natsipaebabe xua pinae bara Nacom pia pexui tatsi wanaexanaewichiba. ¹⁷ Waxainchi Nacom pia pexui tatsi wanaexanaexae, daxota xeinatsi pocotsiwa Nacom wanaca j̄ntana jebiwa xua bexa tsane naca catsibina. Barapocotsiwa bayatha yabara naca tsiw̄nae muxu duba. Poxonae Nacom baxua naca catsibina, Cristo matha catsinchi xua waxainchi wajiwana xeinaenexa. Icha waxainchi ichamonae naca atene exana, icha poxonae Cristo ichichi xua matha atene exanatsi ichamonae, bapoxonae waxainchi Cristo baru xeinaeinchi pocotsiwa Nacom wanaca j̄ntana jebiwa. Nacom naca catsibebina po pexeinya peit̄panae coicha xua bayatha Cristo catatsi.

Meje yabara xua Nacom piamaetha catsicaena pia pexeinya peit̄panae coicha

¹⁸ Xan yaputan xua bequein ichamonae naca atene exana barapo cae pin nacuate, baxua jopa ainya cuiyo. Matautano yaputan xua Nacom cata pia pexeinya peit̄panae coicha Jesustha. Barichi naca catsibina barapo pexeinya peit̄panae coicha po pexeinya peit̄panae coicha xua jopa juniya w̄naeyo. ¹⁹ Daxita po jiji Nacom forota barapo cae pin nacuate, barapo jiji w̄nae weyataeya ewata po mataqueitha poxonae Nacom tsita itutsina piamae. Nacom tsita itutsina piamae xua daxita jiji peyaputaenexa tsane xua xaniwaicha barapomonae apara Nacom pia pexui. ²⁰ Daxita baxuan xua xuan Nacom exana po cae pin nacuate barapo coyenein abe naexanaena. Jopa apara barapo coyenein pia couthiyo xua peweraweracaewa tsane peabexae, saya apara poxoru Nacom baxua pecopatsixae poxoru Nacom namchi xua daxita bewa weraweracaena Adán abe peexanaexae. Ichitha Nacom yabara cana j̄ntu coyene weta exana xua pejopaewa tsane matakabi po mataqueitha xua barapo cae pin nacue pena naca naexanaena.

²¹ Barapo cae pin nacuate xua pena naca, jiji jopa bapana equeicha werapae tsane. Matautano daxita coyenein xua Nacom forota jopa bapana equeicha weraweracae tsane. Barapo mataqueitha daxita xua xuan Nacom forota Nacom w̄nae cana exanaena, icha pijimonaetha cana ichi tsane xua pijimonae tatsi bichocono w̄naeya xanepana naexanaena. ²² Waxainchi yaputainchi daxita baxuan xua pejinompaewan xua Nacom peforotsiwan caena bayatha atene xua beya anoxuae. Atene icha yab̄yo ichi xua bichocono atene poxonae imoxoyo pexuyo tanaexanatsi. ²³ Daxita baxuan meisa jopa ateneyo. Bara iru waxainchi daxitatsi atenetsi bequein Nacom pia Pejumoŋe t̄nax̄ tatsi naca yawa jinompa. Barapo pejumoŋe, apara pocotsiwa xua copiya matha Nacom naca cata xua pocotsiwa jiwana Nacom bexa naca catsibina. Bichocono ajunt̄coyenerewetsi xua j̄nth̄th̄ wecoyeichi, poxonae waxainchi ewatatsi po mataqueitha poxonae Nacom yatsicaewa naca cana exanaena pia pexuichi, xua barichino naca catsibinano pena pepon. ²⁴ Poxonae Nacom naca capanenebiya, Nacom naca tsipaeba pinae naca catsibina pena pepon. Barapo pepon cataunxuae ab̄ w̄nae ewatatsi. Icha waxainchi xeinaeinchi pocotsiwa xua w̄nae ewatatsi bapoxonae jopa nantawenonaetsi xua came w̄nae ewatatsi, tsipei bayatha xeinaeinhiba. Poxoru jiton ba jopa came w̄nae ewatsiyo

pocotsiwa xua bayatha xeinaba. ²⁵ Ichitha icha wūnae ewatatsi pocotsiwa xua came jopa xainaetsi bapoxonae bewa wūnae ewatichi xua jopa bepijawa aitaconaetsi.

²⁶ Barichi Nacom pia Pejumoŋe tūnaxū tatsi naca yawena tsipei waxainchi wajūntū coyene faefaenaewi. Waxainchi jopa yaputaetsi xua betiya cuitiya wūcatsi Nacom. Ichitha poxonae jūntū coyene bojeichi, poxoru jopa wanaca itacūpaewa xua po jumetha wacaunutsiwa, bapoxonae Nacom pia Pejumoŋe tūnaxū tatsi nacata wūca Nacomtha. ²⁷ Nacom, bapon yaputane pocotsiwa xua jiwi pia jūntū coyenewatha nanta xaina. Mataūtano barapon yaputane pocotsiwa Nacom pia Pejumoŋe tūnaxū tatsi ichichipa paeŋa jiwi nexa. Nacom pia Pejumoŋe tūnaxū tatsi Nacom wūcatsi icha be pocotsi coyeneya Nacom ichichipa pomonae xua Nacom piamonae tatsi nexa.

Meje yabara xua waxainchi amanayabatsi po coyenein xua bequein naca atene exana

²⁸ Waxainchi yaputainchi xua daxita po coyenein xua nacata exana bequein wūnae, ichacuitha bequein abe, daichitha Nacom equeicha daxita baxuan nacata xanepana exana. Baxua Nacom taexana pomonaetha pomonae pia peantobexaetsi. Barapomonae Nacom waba petaexanaewa tsainchi pocotsiwa bapon ichichipa. ²⁹ Caena bayatha poxonae aena nacua forota, Nacom tsiwana yaputane barapomonae pomonae pejume cowūntsiwichi tsainchi. Mataūtano Nacom itapeta xua pecana exanaenexa icha be pexanto tatsi ichi. Baxua Nacom exana xua Pexanto tatsi bapon Jesús, be matapin naexana xua daxita jiwi pentapin tatsi. ³⁰ Pomonae xua Nacom itapeta xua caena bayatha xua copiya poxonae aena nacua forota, bara yawano Nacom waba xua peexanaenexa pia pexui tatsi. Pomonae Nacom pewabixae bara yawano exana xua barapomonae jopa penatsicuentsiwa xua abe peexanaexae pecatsixae pejūntū coyene xanepanaewa bapontha. Pomonae xua Nacom pejūntū coyene xanepana exanaexae, bara yawano yabara tsiwūnae muxu duta xua barapomonae naexanaena icha be Nacom Pexanto tatsi ichi.

³¹ Anoxuae waxainchi yaputainchi xua Nacom naca yawena daxota dapon ajibi pon naca jūntū coyene amanayaba xua abe wanaca exanaenexa. ³² Poxoru Nacom Pexanto jopa asiwiyo daxota Nacom copata xua wanaca tsitūpaenexa. Daxita waxainchi yaputaeinchi xua daxota daxitan coyenein Nacom amanaya naca catsiba po coyenein canamatawenonatsi. ³³ Dapon ajibi xua itacūpatsi yabara paeŋa xua pinae Nacom tsita natsicuentatsi pomonae pia peitapetsiwixae tatsi xua abe petsita exanaexaetsi. Nacom yabara paeŋa xua pinae apara jopa barapomonae tatsi natsicuentisichi xua abe petsita exanaexaetsi bequein abe exana taetha. ³⁴ Mataūtano dapon ajibi xua itacūpatsi yabara paeŋa xua barapomonae bewa werapaena penatsicuentisixae xua abe peexanaexae Nacomtha. Barapomonae jopa bewa werapae tsane, tsipei Cristo Jesús tsitūpa barapomonae, abe peexanaexae Nacomtha. Bapon Cristo Jesús equeicha asū exanatsi. Anoxuae eca Nacom pia coxa weya tatsi. Bapon Cristo Jesús Paxatha wūca xua nacata wūca. ³⁵ Cristo naca antobe, daxota dapon ajibi pon itacūpatsi xua tsanayiya naca cana exana Cristo weya. Ichacuitha ichamonae atene wanaca exanaewichitha awiya Cristo naca antobe. Ichacuitha ichamonae daunwei wanacata exanaewichitha awiya naca antobe. Ichacuitha ichamonae abe wanacata exanaewichiwathatsi wayabara cueicueijeixae Jesús awiya bapon naca antobe. Ichacuitha wajainpaewichiwathatsi awiya naca antobe. Ichacuitha wanacata acoibichiwathatsi paparuwa awiya naca antobe. Ichacuitha wanapeipeichiwathatsi poxonae ichamonae abe nacata exana awiya naca antobe. Ichacuitha ichamonae wanaca jutebichiwathatsi awiya naca antobe. Daxita barapo coyenein jopa canaūpaetsi xua tsanayiya wanaca exanaewa Cristo weya. ³⁶ Icha naca ichi daxita barapo coyenein, barichirū Nacom Pejume Diwesitha bayatha baxua yabara naca tsiwūnae muxu duta, jeye:

“Nacom poxoru tapaca cajume cowūntsi

jiwixaetsi daxita matabin tsaibi

ichamonae ichichipa pana jutebeiba.

Barapomonae pana necana exaneiba icha jiwi

ichi xua poxonae daxita matakabin ovejan
capaneiba pon oveja pejutebeibin beya”,
jei Nacom Pejume Diwesitha, xua
yabara naca tsiwuna muxu duta.

³⁷ Ichitha bequein waxainchi daxita barapo coyenein naca atene exana, daichitha amanayabatsi barapo coyenein Cristo pia peayapusu itorobi coyenewatha pon wanaca antobein. ³⁸⁻³⁹ Daxota bara yatsicaewa yaputan, xua dapocotsi coyene ajibi po coyenetha xua tsanayiya naca exana Nacom pia peantobe coyene weya tatsi. Jopa tsanayiya naca exanaeyo bara bequein poxonae tupaethatsi, yawa bara bequein poxonae jinompaethatsi. Iru matatsunpiwi jopa canaupatsi xua tsanayiya wanaca cana exanaewa, bequein iru caurimonaeru, bequein iru pocotsiwan xua anoxuae exanaponaru, bequein iru xua pocotsiwan bexa tsaneru, bequein iru xua pocotsiwan wetsica patopaenano, bequein iru xua pocotsiwan ira wetsinano, bequein iru ichawano xua pocotsiwa Nacom forota. Bara bequein daxita barapo coyenein, ichitha jopa canaupatsi xua tsanayiya pewanaca exanaewa Nacom pia wanaca antobe coyene weya tatsi. Nacom naca cata barapo peantobewa xua Cristo Jesús xeina, pon Wanacanamataxeinaein.

9

Meje yabara xua Nacom itapeta judiomona

¹ Pocotsiwan paca tsipaebatsi barapocotsiwan pexainyei jumein. Tajume cowuntsixae Cristo, bara jopa naerabinyo. Tajuntu coyenetha Nacom pia Pejumope tunaxu tatsi neitoroba. Barapon jume daunweya netsipaeba xua pinae bara yatsicaewa xainyeya cueicueijan. ² Xainyan, wecoyan. Bichocono tamona siwa anthuthutanein tsaibi jopa pejume cowuntsixae Cristo. ³ Bichocono antobein barapomona pomona tanacupiwii. Daxota nayabara paeban, janje: Bena bequein siwa tupaetaein tamona xua bequein tsana tanaexanaewa Cristo weya, xua be poxonae Nacom tsita tanatsicuentisiwa xua barapomona abe pia peexanae coyenewan nexa. Bapoxona xua Nacom tamona pia pecapanenebiyaenexatsi, daxota Nacom copata xua ichamona nebexubina, najanje. ⁴ Pon Israel, pon caena bayatha tupa, bapon nawun cata tamonaetha. Daxota tamona “israelmona”, baraichi. Bapon pia pemomoxi susato jiwi tatsi pomona tamonaexae Nacom barapomona pia pexui exana. Barapomona bayatha Nacom yanta popona xua daxota barapomona tane Nacom pia pexeinya peitupanae coicha poxona xua beta exana barapomona nexa, Nacom tsipaeba barapomona pocotsiwa xua bapon peichichipaewa. Matautano Nacom yabara tsiwuna muxu duta pomonaetha pomona xua ataya yaweneibina barapomona peexanaenexa xua bapon ichichipa. Barapomonaetha Nacom cata Moisés pia peitorobi coyenewa tatsi. Matautano Nacom cata barapomona po coyene xua barapomona xaniwaicha wuna pejainchinexa bapontha. Matautano Nacom yabara tsiwuna muxu duta barapomona xua Cristo pepatopeicaewa tsane. ⁵ Barapomona wamo susato jiwi pia pemomoxi susato jiwi tatsi. Cristo be jiton coyeneya naexana barapomona jiwana pomona pia pemomoxi susatopiwi jiwana tatsi. Bapon Cristo apara bara Nacom. Barabu Nacom bara ataya wuna jainteibinchi pon xua daxita coyeneintha canamataxeina.

⁶ Ichitha barapomona bequein Nacom cata daxita barapo coyenein, daichitha anoxuae barapomona jopa Nacom xanapanaya beta tsita jinompaetsi jopa Cristo peyabara jume cowuntsixaetsi. Bequein ichamona nanta xeinaetsipa xua pinae Nacom Pejume Diwesi jopa ainya cuiyo xua barapomona jopa peexanaexae pocotsiwa Nacom itoroba, ichitha baraxua jopa xainyeyo pocotsiwa barapomona nanta xeina. Baraxua jame tsita itapeinya xeina xua apara jopa daxitiyo pomona Israel pia pemomoxi susato jiwi tatsi xua Nacom piamona tatsi. ⁷ Matautano Abraham pia pemomoxi susato jiwi tatsi apara jopa daxitiyo barapomona xua Nacom piamona tatsi. Nacom caena bayatha tsipaeba Abrahamtha, jeye: “Xam xeinaename pomona pepa jinya nemomoxi susato jiwi xua Isaac pon nexanto xua pia pexui jiwana tatsi”, jei Nacom. ⁸ Baxua

naca yaputane exana xua Nacom jopa exanaeyo daxita xua Abraham pia pemomoxi susato jiwi tatsi be Nacom pia pexui tatsi. Nacom meisa be pia pexui cana exana pomonaetha pomonae pejume cowantsixae xua Nacom pia peyabara tsiwūnae muxu dutsiwa. Barapomonae jume cowanta Nacom pia peyabara tsiwūnae muxu dutsiwa xua Cristo capanenebiyaena barapomonae. ⁹ Tsipei Nacom tsipaeba Abrahamtha poxonae yabara tsiwūnae muxu duta. Nacom jeye: “Barapo xometotha xua icha weitha taitorobi coyenewatha bapoxonae Sara pexanto pabetsina pebin wuto xua nexanto tsane”, jei Nacom.

¹⁰ Jopa meisa baxuiyo, ichawano Nacom exana. Sara pexanto tatsi naexana pewun Isaac. Poxonae Isaac pinyo, bapon nacueyoba piowa, pewun Rebeca. Rebeca tanama ecatsibe pebin wutobe. Barapo pexuyobe cae axa nantautabe bapon Isaac, pon wamo susatopin. ¹¹⁻¹³ Caena bayatha pewūnaeya poxonae barapoyobe jopa naexanaebe, xuano pewūnaeya xua poxonae barapoyobe jopa abe exanaeyobe matautano pewūnaeya xua poxonae jopa wūnae exanaebe, bapoxonae Nacom tsipaeba Rebeca tsipaebatsi. Nacom jeye: “Pon xua copiya naexanaena bapon peyapin canamataxeinaeinchi”, jei Nacom. Barapo jume bara nayaraba jume jupabe xua icha diwesitha Nacom Pejume Diwesitha xua Rebeca pexantobe tatsi yabara paebatsi xua ichaxota, jeye: “Cuita itapetan Jacob xuyapin, ichitha nama Esau naitematatan matapin”, jei Nacom Pejume Diwesitha. Baxua naca yaputane exana xua Nacom pia coya itapeta pomonaetha pomonae xua peichichipaewa, xua pewabiwa barapomonae. Nacom jopa yabara itapetsiyo barapomonae peexanaexae pocotsiwa Nacom peichichipaewa.

¹⁴ Ichamonae paeba, xua pinae Nacom jopa xapain exanaeyo poxonae caein jiwana itapeta, xua poxonae ichun naitematatsi. Aparajopa xapain wūnaeyo xua barapomonae Nacom yabara paebatsi. ¹⁵ Tsipei Nacom paeba Moisestha, jeye: “Pomonae wūnaeya yabara nanta xeinaein xua tayawenaenexa, barapomonae beta yawenaein”, jei Nacom. ¹⁶ Baxua naca cuiduba xua jopa jiton itapetichi poxoru wūnae peexanaexae. Matautano jopa itapetichi xua poxoru peichichipaexae xua peitapetsiwatsi. Saya jame pebiwi itapetatsi poxonae Nacom wūnaeya yabara nanta xeina xua peyawenaenexa tsane barapomonae. ¹⁷ Nacom cueicueije pejume diwesitha nacua peewatsintha pon Egipto nacuapiwi itorobiya pia pepa peewatsinchi. Nacom jeye bapontha: “Apara xan ponxaein tacoya cacana exanatsi pon Egipto nacuapiwi itorobiya pia pepa peewatsinchi. Painya xantha tapexeinya tsita itatsi coyenewa exanaein xua tsita itapeinya xeinaein xua xan xeinan bichocono peayapusu itorobi coyenewa. Matautano exanaein xua daxitan nacuan jiwi taneyabara jume taenexa”, jei Nacom. ¹⁸ Daxota yaputainchi xua Nacom itacupatsi xua wūnaeya yabara nanta xeina xua peyawenaenexa pontha pon ichichipa xua peyawenaewa. Matautano Nacom saya yabara copata xua ichun pejuntu coyenetha pexeinaewa po coyene pejumefebi coyenewa. Baxuan Nacom cana exana pomonaetha pomonae Nacom ichichipa xua xeinaena barapo coyenein.

¹⁹ Metha paxam pana nebaram xua barapomonae yabara xua pajam: “Poxonae Nacom atene exana pomonaetha pomonae petsita natsicuentisixatsi xua abe peexanaexae ¿baxua Nacom jopa xaniwaicha exanaeyo jampa? Nacom copata xua barapomonae xeina pejuntu coyeneintha pejumefebi coyenewan. ¿Barapomonae Nacom tsita natsicuentatsi jampa, poxonae Nacom bequein copata baxua jampa?” pajam. ²⁰ Ichitha paca jume notatsi, janje: “¡Paxam pebiwi tsobenae pam! ¿Eta po jiwi pam xua painya nejume matsontsonobiwi Nacom? Juruwato jopa itacupaetsi xua pejeiwa pontha pon peexanaexatsi: ‘¿Eta xua metha bara necanauta jutsiya exaname?’ xua pejeiwa juruwato. Bapana juruwato jopa itacupaetsi xua pepaebiwa baxua”, paca jeichi. ²¹ Pon xua juruwato peexanaein bapon itacupatsi xua cae tsorobotha jiwana exana ainya juruwaton xua seicayan be pocotsi coyeneya xua ichichipa. Bapon itacupatsi xua pexeinya juruwato exana xua bichocono ainya matoma. Matautano bapon itacupatsi xua bara cana exana xua jopa wūnaeyo xua saya pecasetsinexa.

²² Nacom barichi itacupatsi xua jiwi pecana exanaewatsi be pocotsi coyeneya xua ichichipa. Bequein Nacom ichichipa tsita ituta pia peanaepanaewa pomonaetha pomonae abe peexanaewi, ichitha jopa cataunxuae baxua exanaeyo. Matautano bequein ichichipa tsita ituta pia peayapusu itorobi coyenewa po coyene xua barapomonae tupa peexanaewatsi, ichitha Nacom jopa cataunxuae baxua cana exanaeyo barapomonaetha. Ichitha Nacom caena bayatha beitatemaya taetaepona xua barapomonae abe pia peexanae coyenewan, po abe coyenewan xua Nacom anaepana exanatsi. Barapomonae muxu peweraweracae exanaetsi abe peexanaexae. ²³ Nacom beitatemaya naca taetaepona wanaca tsita itutsinexa daxita waxainchi xua bichocono bara ichichipa xua wanaca yawenaewa tsane bayatha itapeta wanaca antobewaxae. Caena bayatha Nacom yabara naca tsiwunaeta xua iru waxeinaenexa Nacom pia pexeinya juntu coyenewa xua bichocono peantobewa. ²⁴ Nacom naca waba pomonaexaetsi pomonae judiomonae jiwanaetsi. Matautano Nacom naca waba pomonaexaetsi pomonae jopa judiomonae naexanaeyo jiwanaetsi. ²⁵ Baxua Nacom yabara paeba pejume diwesitha pomonae yabara, pomonae jopa judiomonae naexanaeyo po diwesitha ichaxota Oseas tina. Nacom jeye: “Pomonae copiya jopa tamonaeyo, barapomonae yabara jan tsane, ‘Apara tamona’, jan tsane. Matautano pomonae copiya jopa antobeinyo barapomonae yabara jan tsane: ‘Apara taantobe jiwi’, jan tsane.

²⁶ Matautano ichaxota ba jiwi yabara jan: ‘Paxam jopa tamona pam’, jan, baraxota barapomonae yabara jan tsane: ‘Apara paxam tapexui pam, po Nacomxaein ataya tsitecaeya jiwi asu jinompa taexanaein’, jan tsane”, jei Nacom, ichaxota po diwesitha Oseas tina pon caena bayatha tupa.

²⁷ Barichi iru Isaías yabara jeye judiomonae: “Bequein judiomonae bichocono jiwi ayaxa icha taetowan ichi xua bobena mar mene itapatha, daichitha saya be conotha barapo judiomonae jiwana pomonae xua Nacom capanenebiya. ²⁸ Saya conotha capanenebiya tsipei Nacom methaunxuae yabara paebina daxita jiwi barapo cae pin nacuathepiwi pia petsita natsicuentisixaetsi xua abe petsita exanaexaetsi. Yawano jiwi ayei weraweraca exanaeinchi xua Nacom exanaena”, jei Isaías. ²⁹ Isaías copiya yabara tsiwuna muxu duta, jeye:

“Nacom apara bapon pon xua itoroba daxita coyeneintha.
Bapon wunaeya naca yabara nanta xeina xua wanaca yawenaewa tsane xua awiya be conotha pejinompaenexa pomonae wamomoxi susato jiwi jiwana, xua daxita jopa peweraweracaewa tsane.
Icha Nacom jopa baxua exanaetsipae, bapoxonae waxainchi bara naca juta ichipae icha bayatha Sodomata tomarapiwi cana ichichi, matautano icha matha Gomorra tomarapiwi cana ichichi xua daxita weraweraca”, jei Isaías
Nacom Pejume Diwesitha.

Meje yabara xua judiomonae jopa jume cowuntsiyo Nacom pia pexeinya jume diwesi tatsi

³⁰ Barapo peyabara jutiya paebiwana naca yaputane exana xua apara pomonae jopa judiomonae naexanaeyo Nacom jopa tsitatsi xua barapomonae penatsicuentisiwa xua abe peexanaexae. Baxua Nacom cana exana barapomonaetha bequein barapomonae jopa tsaqueinaeyo xua pexeinaewa pejuntu coyene xanepanaewa Nacomtha. Barapomonae xeina pejuntu coyene xanepanaewa Nacomtha Cristo pejume cowuntsixaetsi.

³¹ Ichitha nama barapo judiomonae paeba, jeye: “Nacom naca jũntũ coyene xanepana exanaena xua jopa Nacom watsita natsicuentinexatsi xua abe waexanaexaetsi bapontha. Bapon baxua naca cana exanaena icha exanaeinchi pocotsiwa Moisés pia peitorobi coyenewatha itoroba”, jei barapomonae. Daichitha barapomonae judiomonae jopa itacũpaetsi xua daxita peyabara jume cuiya exanaewa pocotsiwa Moisés itoroba pia peitorobi coyenewatha. ³² ¿Eta xua metha jane xua barapomonae jopa itacũpaetsi xua exana pocotsiwa Moisés pia peitorobi coyenewatha itoroba? Metha poxoru barapomonae nanta xeina xua poxona beta exana bapoxona jopa pexeinaewa tsane penatsicuentiwa Nacomtha. Barapomonae jopa jume cowũntsiyo xua Nacom itorobica Cristo, daxota barapomonae Nacom tsita natsicuentatsi xua abe petsita exanaexaetsi. Barapomonae nacabeta exana, poxona jopa jume cowũntsiyo Nacom, atene peexanaexaetsi tsane icha jiton ichi poxona xuirapopa ibototha xua pia coutha nacabeta exana xua atene naexana. ³³ Nacom Cristo yabara paebatsi pejume diwesitha. Icha jiwi ichi poxona nacabeta poxona xuirabathopa ibototha, barichi jiwi nacabeta poxona Cristo jopa jume cowũntichi. Nacom jeye:

“Jerusalén tomaratha po tomara atororo
xua po tomara pewũn Sión
barapo tomaratha notsin pon
jiwi pecapanenebiyaenexa tsainchi.
Jiwi nacabeta exana poxoru barapo jiwi
jopa jume cowũntsiyo bapontha,
icha jiwi ichi xua nacabeta exana
poxona xuirabathopa ibototha.
Pon jume cowũntsina bapontha, jopa bapana
jũntũ natsepanayae tsane”, jei Nacom.

10

¹ Tamonae pam, paxam pomonae irũ painya nejume cowũntsiwixae Jesucristo. Maisa bichocono tajũntũ coyenewatha ichichipan daxota bichocono Nacomtha tsipaeban judiomonae nexa, xua barapomonae pecapanenebiyaenexa tsainchi abe pia peexanae cuiro coyenein weya. ² Barapomonae yabara paeban xua barapomonae judiomonae bequein ichichipa nawita xua Nacom petanacuichiwatsi, daichitha jopa yaputaeyo xua pocotsiwa Nacom xaniwaicha ichichipa xua barapomonae peexanaewa. ³ Barapomonae jopa yabara yaputaeyo xua pocotsiwa poxona Nacom jũntũ coyene xanepana exana jiwitha xua jopa xeinaeyo penatsicuentiwa Nacomtha xua abe peexanaexae. Barapomonae jũjũta xua icha barompaya pia cui coyeneyatha exanaena xua bapoxona pexeinaenexa tsane pejũntũ coyene xanepanaewa Nacomtha xua jopa penatsicuentiwa xua abe peexanaexae. Barapomonae jopa exanaeyo be pocotsi coyene Nacom itoroba jiwitha xua Cristo pejume cowũntsiwaetsi xua bapoxona jiwi pexeinaenexa pejũntũ coyene xanepanaewa Nacomtha. ⁴ Barapomonae jopa yabara yaputaeyo xua po coyene Cristo jopa ainya cui cana exanaeyo Moisés pia peitorobi coyenewa tatsi. Daxota anoxuae jiwi jopa cana matawenonaeyo barapo Moisés pia peitorobi coyenewa tatsi xua po peitorobi coyenewa bequein jiwi yabara nanta xeina xua pinae poxona yabara jume cuiya exanaena pinae xeinaena pejũntũ coyene xanepanaewa.

⁵ Caena bayatha Moisés yabara paeba xua pinae pia peitorobi coyene tatsi itacũpatsi xua jiwi jũntũ coyene xanepana exanatsi Nacomtha xua jopa petsita natsicuentiwa xua abe peexanaexae. Moisés jeye: “Pon daxita yabara jume cuiya eexanaponaena barapo taitorobi coyenewa xua tinan, bapoxona bapon bara ataya tsitecaeya poponaena peajũntũyapũũ coyenewatha”, jei Moisés. ⁶ Nacom Pejume Diwesitha yabara paeba pomonae jopa xeinaeyo penatsicuentiwa Nacomtha pejume cowũntsiwa Cristotha. Nacom jeye: “Jopa pananthũthũ yainyabinde, jopa pajande: ‘¿Jintam metha itaboco beicha ponaena xua Cristo pecatsicaenexa tsainchi barapo cae pin nacuathe tsique

xua wanaca yawenaenexa?’ jopa pajande. ⁷ Matautano jopa pajande: ‘¿Jintam metha ira bereca ponaena xua Cristo pecatsinaenexa tsainchi barapo cae pin nacuathe xua petupae cuiru coyene weya?’ jopa pajande”, jei Nacom. ⁸ Nacom equeicha pejume diwesitha pejuntũ coyene xanepanaewa yabara jeye: “Tajume diwesi bara imoxoyo dubena xua paca itacupa painya necueicueijeinexa barapo diwesi. Matautano paca itacupa xua painya neyabara nanta xeinaewa barapo diwesi”, jei Nacom xua pejume diwesitha. Barapo diwesi bara najupabe po diwesi xua yabara paca cuidubatsi xua painya nejume cowuntsiwa. ⁹ Icha paichichipame xua Nacom painya nepaca capanenebiwa bewa paexanaename barapo coyenewabe: Bewa ichamonaetha payabara paebim xua Jesús painya Nepacacanamataxeinaein. Matautano bewa pajume cowuntsim painya nejuntũ coyeneintha xua Nacom Jesús equeicha asũ exanatsi petupae cuiru coyene weya. Bapoxonae Nacom paca capanenebiyaena abe painya neexanae coyenewan weya. ¹⁰ Poxonae jiton jume cowũta pia juntũ coyenewatha Jesustha bapoxonae jopa Nacom tsita natsicuentisichi xua abe petsita exanaexaetsi. Poxonae jiton yabara cueicueijeji xua Jesucristo apara pia Pecanamataxeinaeinchi, bapoxonae Nacom capanepa bapon abe pia peexanae cuiru coyenewan weya.

¹¹ Nacom Pejume Diwesitha jeye: “Pon jume cowũta Cristotha, Cristo yawenaena xua daxota jopa bapana juntũ coyene natsepanayae tsane”, jei Nacom, xua pejume diwesitha. ¹² Nacom jopa tsita seicayatsi daxita jiwi, bara saya tsita najupatsi, bequein bara metha judiomonae tsipae irũno metha bequein jopa dapomonae tsipae pomonae jopa judiomonae naexanaeyo. Bapon Cristo Pecanamataxeinaein exanatsi daxita jiwi nexa. Yawano bapon Cristo Wanacanamataxeinaein jopa juniya catsiyo daxita piawan pomonaetha pomonae pewũcae jiwixaetsi. ¹³ Tsipei Nacom Pejume Diwesitha jeye: “Daxita pomonae wũca pontha pon jiwi Pecanamataxeinaein, pon Cristo, xua pecanenebiyaenexa tsainchi, barapomonae bara capanenebiya tsainchi”, jei Nacom. ¹⁴ Jiwi jopa itacupaetsi xua petsipaebiwa pontha pon jiwi Pecanamataxeinaein icha jopa jume cowuntsiyo bapontha. Matautano jopa itacupaetsi xua pejume cowuntsiwa pontha pon jiwi Pecanamataxeinaein icha jopa bapana yabara jume yaputae bapontha. Matautano jiwi jopa itacupaetsi xua peyabara jume yaputaewa bapon icha ichamonae jopa capanaeyo barapo diwesi xua pecueicueijeinexa barapo jiwitha, xua peyabara paebiwatsi pon jiwi Pecanamataxeinaein. ¹⁵ Matautano jiwi jopa itacupaetsi xua pecueicueijejiwa xua po diwesi pon jiwi Pecanamataxeinaein peyabara paebiwatsi icha dapomonae ajibi pomonae itoroba barapomonaetha xua barapomonaecueicueijeinexa. Nacom Pejume Diwesitha yabara jei baxua: “Maisa bichocono daxua wũnae xua poxonae jiwi pata xua pecueicueijeinexa Nacom pia pexeinya jume diwesi xua Cristo peyabara paebiwatsi”, jei Nacom Pejume Diwesitha.

¹⁶ Daichitha jopa daxita jiwiyo xua ichichipa pejume taewa barapo pexeinya jume diwesi. Baxua Isaías yabara jei Nacom Pejume Diwesitha: “Tanecanamataxeinaem ¿jintam jume cowũta pocotsiwa papaeban? Saya be conotha jiwi, pomonae jume cowũta xua pata tacayabara paebiwatsi”, jei Isaías. ¹⁷ Daxota jiwi jume cowũta poxonae jume tane barapo pexeinya jume diwesi. Po pexeinya jume diwesi jiwi jume cowũta apara po diwesi xua Cristo yabara.

¹⁸ Tacoya nayainyaban. Nabaran, janje: ¿Metha bara barapomonae judiomonae barapo pexeinya jume diwesi jopa jume taeyo jampa? ¿Jume apara, apara bara jume tane barapo pexeinya jume diwesi! najan. Nacom Pejume Diwesitha baxua yabara jeye:

“Nacom piamonae tatsi capona Nacom

Pejume Diwesi tajũ beya.

Po diwesin xua barapomonae paeba tajũ beya

jume pichapapona daxita barapo cae pin

nacuathe”, jei Nacom Pejume Diwesitha.

¹⁹ Equeicha nayainyaban, janje: ¿Metha bara barapomonae judiomonae jopa yaputaeyo xua barapo diwesi ichamonae jume cowuntsina? najan. ¿Jume! ¿Apara bara yaputane!

najan. Barapomonae yaputane tsipei Moisés baxua caena bayatha copiya yabara tsiwūnae muxu duta. Moisés tatina Nacom, xua Nacom jeye:

“Ichamonae capanenebiyan pomonae
jopa judiomonae naexanaeyo.

Paxam paca exanatsi xua barapomonae pauwame.

Ichamonae capanenebiyan pomonae
jopa bichocono peyaputae jiwi.

Paxam paca exanatsi xua baxua paca anaepana
exana, jei Nacom”, xua Moisés tatina.

²⁰ Bapoxonae irū pirapae Isaías atsaquiya yabara tsiwūnae muxu duta Nacom nexa xua Nacom jeye:

“Pomonae jopa nejeichiyo bara necaxiba.

Pomonae jopa neyabara yainyabiyo bara
barapomonae cana exanan xua barapomonae
neyaputane”, jei Nacom, xua Isaías tatina.

²¹ Equeicha Isaías yabara tsiwūnae muxu duta judiomonae Nacom nexa, xua Nacom jeye: “Daxita matacabi wabeiban barapomonae. Ichitha barapomonae jopa exaneibiyo pocotsiwa itorobeiban tsipei barapomonae tanejume torobabeibi jiwi xua jopa, tanejume cowūntsiwa”, jei Nacom, xua Isaías tatina.

11

Meje yabara xua Nacom itapeta judiomonaepiwi pomonae Israel pon caena bayatha tupa bapon piamonae tatsi

¹ Equeicha nayainyaban najan: ¿Metha bara Nacom torota daxita piamonae israelmonae jampa? najan. Jume apara, tsipei apara xan barapo israelmonae jiwānapin, daxota jopa netorotsiyo, Abraham pia saineiwimonae jiwana tatsin apara, matautano Benjamín pia pemomoxi susato jiwi jiwana tatsin apara. ² Nacom jopa torotsiyo piamonae pomonae xua caena bayatha peitapetsixae xua cana exana be piamonae tatsi. Paxam payaputaneme xua Nacom Pejume Diwesitha paeba, po diwesitha ichaxota Elías tsipaeba Nacomtha. Elías pon Nacom pia peitorobi jume pepaebin pon caena bayatha tupa. Elías anaya yabara paeba israelmonae, jeye: ³ “Nacom ponxaem Tanecanamataxeinaem, barapo israelmonae juteba, jutebatsi pomonae jinya neitorobi jume pepaebiwi. Matautano barapo israelmonae cayatsiya abe exana pocotsiwan iboton xua xuan xota duwei yubeibiya jutebathopeiba xua poxonae catsita tuxusi exana. Xan compan napae-ban xua pomonae beta necajume cowūntsiwi barapomonae jiwānan. Irūru barapomonae ichichipa nebexubarū”, jei Elías poxonae tsipaeba Nacomtha. ⁴ Ichitha Nacom Elías jume notatsi. Nacom jeye: “Awiya cataunxuae xeinan siete mil pebiwi xua tamonae, pomonae tanejume cowūntsi jiwi. Barapomonae jopa pentabocototha umenaeyo xua poxonae wūnae pejainchinexa ibo nacom, po ibo nacom pewūn Baal”, jei Nacom. ⁵ Nama anoxuae awiya barichi israelmonae be conotha pomonae jume cowūnta Nacomtha pomonae Nacom peitapetsiwi, pia peantobexae barapomonae. ⁶ Nacom itapeta barapomonae, pomonaetha pomonae peichichipaexae xua peyawenaewa barapomonaetha pia peantobexae. Baxua Nacom amanaya exana barapomonaetha. Nacom jopa itapetsiyo barapomonae, xua peyabara cui matomatsinexa xua peexanaexae pocotsiwa xanepana. Tsipei icha Nacom saya itapeta jiwi, xua peyabara cui matomatsinexa xua barapo jiwi peexanaexae barapoxonae Nacom be jopa bapana amanaya exanaeyo jiwi nexa.

⁷ Daxota yaputainchi xua pinmonae xua barapo israelmonae jiwana jopa catsibichi pejūntū coyene xanepanaewa xua bequein baxua tsiexana nawita po coyenein Moisés itoroba. Jame Nacom cata barapo coyene pomonaetha pomonae peitapetsiwixae, xua pomonae israelmonae jiwana. Barapomonae, pomonae israelmonae jiwana barapomonae Nacom jopa catsibiyo barapo pejūntū coyene xanepanaewa. Nacom copata xua barapomonae pejūntū coyenewatha xeina pejume torobabi coyenewa. ⁸ Nacom

Pejume Diwesitha Moisés yabara paeba barapomonae. Moisés jeye: “Nacom copata xua barapomonae xeinaena po juntu coyene jopa itacupaetsi xua peyaputaewa. Bequein barapomonae yoroba xua pejume xainyei coyenewa daichitha jopa yaputaeyo. Matauta bequein barapomonae jume tane pexainyei jume daichitha jopa jume cowuntsiyo. Barapo coyenein anoxuae cataunxuae baxuan eexanapona”, jei Moisés xua Nacom Pejume Diwesitha. ⁹ Iruru David yabara paeba israelmonae poxonae Nacom tapaebatsi. David jeye:

“Barapomonae beitatemaya juntu coyene
weiweinapona pin penabanaewantha.
Barapomonae nanta xeina xua jopa catsita
natsicuentisiyo xua abe peexanaexae.
Poxonae barapomonae cataunxuae eexanapona
baxua barabu xam Nacom jemeicha
atene cana exanaename barapomonae,
jopa pia necajume cowuntsixae.

¹⁰ Daxota barabu copatsiname xua barapomonae
israelmonae jopa yaputaeyo po coyene
xua barapomonae catsita natsicuenta
abe necatsita exanaexae.
Matautano barabu copatsiname xua barapomonae
xeinaena po peatene coyenewa anthuthurewe
cana exanatsi xua ataya, abe peexanaexae”,
jei David, israelmonae yabara,
Nacom Pejume Diwesitha.

Meje yabara xua pomonae jopa judiomonae naexanaeyo Nacom jume cowuntatsi

¹¹ Equeicha tacoya nayainyaban, najan: Poxonae judiomonae, pomonae israelmonaexae, Nacom nawepu tsabatsi, jopa pejume cowuntsixaetsi jmetha bara Nacom itawetsina barapomonae xua ataya tsane jampa? jJume apara! jBarapara Nacom jopa itawetsi tsane xua bara ataya tsane! Nacom capanenebiyaena icha judiomonae bexa tsane. Bequein anoxuae Nacom jopa capanenebiyaeyo barapomonae judiomonae, apara bara capanenebiya abe pia peexanae cuiru coyenein weya tatsi pomonae jopa judiomonae naexanaeyo. Nacom baxua exana xua judiomonae peuwinexa, xua uwatsi pomonae jopa judiomonae naexanaeyo xua barapomonae Nacom pecapanepaexae.

¹² Poxoru judiomonae Nacom nawepu tsabatsi daxota Nacom xanepana exana icha monaetha, xua daxita carepaya barapo cae pin nacuathe. Judiomonae jopa Nacom pejume cowuntsixaetsi daxota Nacom xanepana exana, pomonaetha pomonae jopa judiomonae naexanaeyo xua Cristo pejume cowuntsiwaxaetsi. Bexa tsane Nacom xanepana exanaena judiomonaetha pocotsiwa bichocono daxita nacuanpiwi tsita xanepanatsi, xua beyacaincha poxonae xanepana exana pomonaetha pomonae jopa judiomonae naexanaeyo. Baxua Nacom cana exanaena poxonae judiomonae iru Cristo jume cowuntsinchi.

¹³ Anoxuae paca tsipaebatsi pomonae pam pomonae jopa judiomonae naexanaeyo pam. Yaitama Nacom taneitorobixae pomonaetha pomonae jopa judiomonae naexanaeyo, pomonae icha paichim, daxota tsitsipaebaponan Nacom Pejume Diwesi. Barapo tatanacuichiwa Nacom bichocono netsita ainya cui. ¹⁴ Beexanaein xua tamonae judiomonae paca uwa, xua bapoxonae barapomonae pejume cowuntsinexa icha paichim. Yawano barapoxonae barapo tamonae jiwana Nacom capanenebiya tsane taexanaexae Nacom nexa. ¹⁵ Tsipei poxonae Nacom itaweta barapomonae judiomonae bapoxonae Nacom itapeta ichamonae pomonae barapo cae pin nacuapiwi jiwana xua pecanaexanaenexa pia jiwimonae tatsi. Poxonae judiomonae iru cana exanaeinchi Nacom pia jiwimonae tatsi Cristo pejume cowuntsixaetsi baxua bichocono wuna tsane be poxonae jiwu equeicha asu exanatsi petrae cuiru coyene weya. ¹⁶ Ainya pecayabara juta pepaebi

diwesiyo be paca tsipaebatsi. Poxonae jiwi ba pentubu tsequeta xua cae pan exana pecatsinexa Nacomtha barapo pan matabuyo bara Nacom piawa tatsi. Barichi pepa matabu barapara Nacom piawa tatsi. Barichi poxonae jiwi ba paeba xua pinae nae petabu opina catsina Nacomtha bara Nacom piawa tatsi. Barichi pepa maxuranan barapara Nacom piawa tatsi. Icha barapocotsi naxobe coyenewabe cana ichiya exana jiwi, barapocotsi juta coyeneya Nacom cana exana jiwitha. Poxoru Abraham iru pomonae Nacom peitorobi jume pepaebiwi barapomonae Nacom piamonae tatsi daxota iru pia pexui tatsi iru Nacom piamonae tatsi.

¹⁷ Equeicha pecayabara juta pepaebi diwesiyo paca tsipaebatsi. Jiwi itacupatsi xua olivo nae jiwana maxuranan weucuboba po nae ubanota pabitha xua bebai. Icha olivo nae maxuranan jiwana weucuboba, po nae untha uncua. Barapo maxuranan wantha japateita cutsiya duba po naetha po nae uncua pabitha, po nae copiya jiwana maxuranan bebai. Barapo nae tabu opinan aisa cana exana xua barapo maxuranan beta nacoita tsipei mene nota barapo nae tabu opina tsina. Bara juta coyeneya ichi, icha olivo naetha cana ichichi, Nacom jiwi barapocotsi coyeneya cana ichi. Nacom jiwana torota po judiomonae jopa pejume cowuntsixaetsi xua bapoxonae Nacom paca cana exana piamonae tatsi pam. Nacom paca cana exana xua peajuntu yapuswa painya nexainaewa painya nejume cowuntsixae Jesucristo. Barapo coyene icha be poxonae pemaxuranan cana ichichi poxonae aisa cana exainchi pemene notsixa petabu opinan tsina, xua beta xu xuwa exana pena maxuranatha. ¹⁸ Daxota jopa paatsaquiya aebiya nanta xeinaeinde xua ainya cui jiwi pam xua Nacom painya nepaca wabixae beyacaincha icha judiomonae pomonae Nacom torota. Payabara nanta xeinare barapo olivo nae xua pecayabara juta paebiwa. Barapo maxuranan jopa apara nacoita exanaeyo barapo nae tabu opina deca. Jame apara barapo nae tabu opina nacoita exaneina barapo maxuranantha.

¹⁹ Metha papaebichipame, pajam tsipae: “Nacom torota judiomonae xua wanaca exanaenexa piamonae tatsichi, xua icha jiwi cana ichi olivo naetha”, pajam tsipae. ²⁰ Metha moya bara xainyei tsipae. Bara Nacom torota barapomonae judiomonae jopa pejume cowuntsiwixaetsi Jesucristo. Paxam Nacom piamonae tatsi paca cana exana, tsipei saya apara pajume cowuntame Jesucristo, saya meisa baxuaxae. Jopa pana najuntu coyene yabara atsacande xua painya nexainaexae pocotsiwa Nacom paca cata. Jame saya dota pam xua jopa xanepanaeya pajume cowuntsim Jesucristo xua daxota Nacom painya nepaca torotsiwa tsane. Jiwi pemaxuranan ucubobiya bebai po nae pabitha uncua. ²¹ Bara juta coyene ichi, Nacom torota judiomonae pomonae copiya piamonaexae tatsi jopa pejume cowuntsixae Jesucristo. Nacom bara paca ichipae paca torotsipa icha jopa pajume cowuntsipaem. ²² Anoxuae waxainchi yaputainchi xua Nacom yawena jiwi, peantobexae. Yawano yaputainchi xua Nacom ayapube taexana ichamonae pomonaetha pomonae abe peexanae jiwixae. Nacom daunweya yabara paeba penatsicuentiwa pomonae xua jopa pejume cowuntsiwichi. Ichitha Nacom beta xanepanaya paca cana exana. Nacom baxua paca cana exanaena icha awiya pajume cowanta dubenanaebiyaename. Ichitha icha awiya jopa pajume cocowantaponaem tsane Nacom paca torotsina. ²³ Matautano Nacom itacupatsi xua equeicha caewa cana exana piamonae judiomonae, pomonae Nacom bayatha copiya bequein petorotsixae. Nacom baxua cana exanaena icha jame barapomonae Cristo jume cowuntsinchi. Nacom baxua cana exanaena icha jiton ichi xua equeicha caewa pecoutha japateita cutanota wantha pemaxurana, po maxurana bequein ucuibiya xuba. ²⁴ Paxam pomonae jopa judiomonae naexanaeyo pam, Nacom paca cana exana piamonae tatsi pam, bequein copiya jopa piamonae tatsi pam. Nacom bara paca cana ichi, icha be pocotsi coyeneya pebin ichi xua unupi olivo nae maxurana ucuiba. Equeicha barapo maxurana icha olivo nae maxurana wantha japateita cutsiya duta po olivo nae pabitha ubanota. Bapoxonae barapo unupi olivo nae maxuranatha pexeinya thei xuwa. Ichitha icha pebin equeicha pita po maxurana xua ucuiba pepa olivo nae weya yawa equeicha caewa pecoutha japateita cutanota wantha, barapo maxurana beta xuwa beyacaincha xua xuwa unupi

olivo nae maxurana poxonae japateita cutanota wantha. Icha pebin ichi, Nacom bara itacupatsi cana exana judiomonaetha. Nacom tayapu xanepanatsi xua equeicha exana piamonaе tatsi pomonaе copiya torota pomonaе judiomonaе.

Meje yabara xua Nacom bexa tsane israelmonae capanenebiya tsainchi

²⁵ Tamonaе pam, paxam pomonaе iru painya nejume cowuntsiwixae Jesucristotha. Maisa ichichipan xua paxam yabara painya neyaputaewa tsane xua moya peyawun xeinaewa po coyene xua Nacom yabara po coyene ichamonaе jopa yaputaeyo. Tsipei jopa ichipaeinyo xua painya coutha painya nenayabara nanta xeinaewam xua peyaputae jiwi pam. Meje baxue xua moya peyawun xeinaewan: Anoxuae israelmonae xeina pejuntu coyenewatha po coyene xua Nacom pejume torobabi coyenewatsi xua daxota Nacom jopa pejume cowuntsiwatsi. Ichitha jame bexa poxonaе abu daxita carepaya jume cowuntsina Nacom pomonaе jopa judiomonaе naexanaeyo pomonaе Nacom itapeta, bapoxonaе equeicha judiomonaе jume cowuntsina. ²⁶ Bapoxonaе daxita israelmonaexae pomonaе judiomonaexae pomonaе Nacom itapeta, capanenebiya tsainchi abe pia peexanae cuiru coyenewan weya tatsi. Nacom baxua yabara jeye pejume diwesitha:

“Pon jiwi Pecapanenebiyaein patopaena israelmonae jiwanaatha pomonaе Sion tomara wunmonae.

Bapon juntu coyene wepichina Jacob pia pemomoxi susato jiwi tatsi abe pia peexanae cuiru coyenewan tatsi, pomonaе israelmonaexae.

²⁷ Juntu coyene wepichin barapo judiomonaе abe pia peexanae cuiru coyenewan tatsi.

Barapoxonaе cayabara jume weta exanaein pocotsiwa caena bayatha yabara tsiwunaе muxu dutan barapomonaе pia pamo susato jitontha tatsi pon pewun Jacob, pon Israelxae”,
jei Nacom Pejume Diwesitha.

²⁸ Ichamonaе xua israelmonae jiwana anoxuae barapomonaе Nacom pia peaitafaetabi jiwichi tsipei barapomonaе jopa jume cowuntsiyo Nacom pia pexeinya jume diwesi tatsi po diwesi Cristo pepatopaewa yabara. Tsipei barapomonaе baxua exana, daxota paxam pomonaе jopa judiomonaе naexanaeyo pam, bara paca itacupa xua painya nejume cowuntsiwa Cristo. Ichitha barapo israelmonae Nacom caena bayatha copiya itapeta. Barapo israelmonae awiya Nacom antobe, pia pamo susato jiwi tatsi copiya peitapetsixaetsi. ²⁹ Tsipei Nacom jopa ichawa beya paebiyo. Pocotsiwa Nacom cata equeicha jopa caewa pichiyo. Pomonaе Nacom itapeta equeicha jopa itawetsiyo. ³⁰ Paxam pomonaе jopa judiomonaе painya nenaexanaewi pam, copiya paxam jopa painya neexanae jiwi pam pocotsiwa Nacom paca itoroba. Daichitha anoxuae judiomonaе jopa peexanaexae pocotsiwa Nacom itoroba, daxota Nacom wunaeya paca yabara nanta xeina pia nepaca cayawenaewa tsane. ³¹ Ichitha anoxuae bequein barapomonaе judiomonaе jopa exanaeyo pocotsiwa xua Nacom ichichipa, bexa tsane barapomonaе judiomonaе jume cowuntsina. Poxonaе baxua exanaena Nacom, xua wunaeya paca yabara nanta xeina pia nepaca cayawenaewa tsane iru wunaeya yabara nanta xeinaena peyawenaenexa tsane xua barapomonaе peyawenaenexatsi pia peantobewixae. Nacom baxua exanaena barapomonaetha icha bayatha pacata ichi xua poxonaе Nacom pacata exana. ³² Nacom bara copata xua daxita jiwi bara najupa xua penatsicuentsiwa xua jopa pejume cowuntsixaetsi. Nacom bara baxua copata, xua penanta jupiya yawenaenexa daxita jiwi, peantobexae.

³³ ¡Maisa jopa juniya Nacom yawenaeyo jiwitha! ¡Maisa Nacom jopa juniya xeinaeyo peyabara yaputae coyenewan po coyene xua xaniwaicha pecayabara exanaewa! ¡Maisa Nacom jopa juniya yabara tsiwunaе yaputaeyo peyaputae coyenein xua bexa exanaena! ¡Dapon ajibi pon itacupatsi xua pecayabara yaputaeya paebiwa pocotsiwa Nacom cuita

yabara exana! ꞑBarichi dapon ajibi pon itacupatsi xua peyaputaewa Nacom pia cui coyenewan tatsi! ³⁴ Nacom Pejume Diwesitha tatsi yabara jeye baxua: “Dapon ajibi, pon yaputane pocotsiwa Nacom nanta xeina pon jiwi Pecanamataxeinaeinxae. Matautano dapon ajibi, pon xua Nacom pecuidubiwatsi. ³⁵ Matautano dapon ajibi pon cata Nacomtha xua daxota xuya bewa Nacom matomatsina”, jei Nacom Pejume Diwesitha tatsi. ³⁶ Aparaxaxita coyenein Nacom forota. Nacom canamataxeina pia peyapusuꞑ itorobi coyenewatha daxitan pocotsiwan xua xuan exana. Daxitan bara piawa tatsi. ꞑBarabuꞑ Nacom wunaꞑ jainteibatsi xua ataya tsaibi tsane! ꞑJe, bara ichi tsane!

12

Meje yabara xua wajinompawea wataexanaenexa Nacom

¹ Tamonae pam, paxam pomonae iruꞑ painya nejume cowuntsiwixae Jesús. Paxam payaputaneme xua Nacom bichocono naca yawena pia wanaca antobexae. Daxota paca itorobatsi daxita pam. Pana najuntuꞑ coyene doure Nacomtha painya nenacuichinexa pocotsiwa Nacom paca itoroba. Baxua bara be poxonae jiton ovejiyo asuꞑ cata xua pebexubinexa Nacom nexa. Poxonae pana najuntuꞑ coyene doutame Nacomtha barapo coyene Nacom tsita xanepanatsi. Barapocotsi coyenewatha bewa wunaꞑ pajaintsiname Nacom painya juntuꞑ coyeneintha. ² Jopa bara paichiponaeinde xua abe paexanaponame po coyenewan icha ichi xua exana dubenanaebiya pomonae barapo cae pin nacuathe jinompa. Jame maisa bara pacopare xua Nacom paca necanaexanaenexa xua icha juntuꞑ coyene paxename xua beta painya nenanta xeinaponaenexam tsane. Bapoxonae payaputaename xua bara painya neexanaewa pocotsiwa Nacom ichichipa. Pocotsiwa Nacom peichichipaewa xua apara painya neexanaponaewa tsane xua meje: pocotsiwa bara wunaꞑ, matautano pocotsiwa Nacom pejuntuꞑ coyene weiweina exanaewatsi, matautano pocotsiwa daxita bichocono matapaeicha xanepana.

³ Nacom taneantobexae necata barapo peyapusuꞑ itorobi coyenewa xua tapaca itorobiwatsi pocotsiwa yabara bewa paexanaename. Daxota baxua paca tsipaebatsi xua paxam jopa bewa pana nayabara nanta xeinaem xua peainya cui jiwi pam beyacaincha poxonae Nacom pia coutha ainya cui paca cana exana. Nacom paca catsiba pejume cowuntsiwa daxita carepaya paxamtha. Daxota bewa daxita paxam xainyeya pana nayabara nanta xeinaem pocotsiwa painya neexanaexae xua icha be pocotsi coyeneya Nacom painya nepaca itorobixae pocotsiwa bewa paexanaename. ⁴ Wapepontha nawita xeinatsi xua wanaca cueyatsiwan, bara bequein cae pepontsi. Daxita barapo wanaca cueyatsiwan wapepontha jopa nanta jupae coyeneya exanaeyo. ⁵ Waxainchi bara ichichi bara bequein pinmonaetsi ichitha waxainchi be cae pepontsi Cristotha. Ichitha apara daxitatsi bara caemonae naexainchi wajume cowuntsixae Cristo. Caemonae wanaexanaexae Cristotha, daxota nantiya nayawenatsi.

⁶ Nacom daxita carepaya barompaya naca catsiba wajuntuꞑ coyeneya waexanae coyenewan, peichichipaexae xua naca yawenaena wanaca antobexae. Barapo juntuꞑ coyeneyatha waxainchi barompaya bewa beta taexanaetsi Nacom wanaca catsixae barapo coyene. Ichamonaetha Nacom naca jiwana catatsi po coyene xua peyabara yaputaeya cueicueijeꞑ coyenewa Nacom Pejume Diwesi. Bapoxonae barapomonae bewa cueicueijeꞑ barapo diwesi jiwitha. Bapomonae bewa exanae baxua daxita po pejume cowuntsiwatha Nacom bapomonaetha cata. ⁷ Ichamonaetha Nacom naca jiwana catatsi, po coyene xua ichamonae peyawenaewatsi. Barapomonae bewa moya ichamonae bara beta yawenaetsi. Ichamonae Nacom naca jiwana catatsi po coyene xua ichamonae pecuidubiwatsi. Pomonae yaputane xua pecuidubiwa ichamonaetha, bewa moya bara beta cuidubina ichamonaetha. ⁸ Ichamonaetha Nacom naca jiwana catatsi peyaputae coyenewa po coyenewa xua pejuntuꞑ cui coyene tsacabinexa pejume cowuntsiwi xua juntema pejinompaenexa. Pomonaetha Nacom cata barapo peyaputae coyenewa bapomonae bewa moya bara beta juntuꞑ cui coyene tsacabina ichamonae. Ichamonaetha Nacom naca jiwana catatsi peyaputae coyenewa po coyenewa xua piawan peroutsiwa

ichamonaetha. Bapomonaē bewa jopa asiwiyo, moya bara bewa amanaya doutsina ichamonaetha. Ichamonaetha Nacom naca jiwana catatsi peyaputae coyenewa po coyenewa xua piamonaē canamataxeinaeya itoroba. Bapomonaē bewa moya bara saya daunweya beta canamataxeinaeya itorobaponaē. Ichamonaetha Nacom naca jiwana catatsi peyaputae coyenewa po coyenewa xua yawena peacopeibi jiwī. Bapomonaē bewa moya jūntū coyene weiweinaeya yawenaē.

Meje yabara xua pocotsiwa bewa exanaē pomonaē pejume cowūntsiwi Cristo

⁹ Poxonaē pana naantobem xaniwaicha nantiya caemonaē pana naantobeinde. Panaitemare abe peexanaē coyenewan. Saya naitomatsiya paexanaponde pocotsiwa pexanepanaē coyenewan. ¹⁰ Bewa caemonaē nantiya pana naantobem, icha caepi jiwī ichi xua yatsicaewa naantobe xua cae peweicho jiwī. Bewa ichamonaē pabarū cui itura jinaem xua barapomonaē peainya cui jiwī beyacaincha paxam.

¹¹ Jūntū coyene daunweya patanacuire pon jiwī Pecanamataxeinaein. Jopa paa-coyenefaetabinde poxonaē pata nacuitame. Antūcoyenyapusuya bapon patanacuire, bichocono painya neichichipaexae.

¹² Painya newūnaē ewatsixae pocotsiwa xua Nacom paca catsibapaeba bexa daxota pa-jūntū coyene weiweinaeya jinompare. Poxonaē ichamonaē jopa xapain pacata exanaeyo, xua paca cana exana xua paa-jūntūcoyenetanem, bara saya jūntema pajinompare. Jopa paaitaconaeinde. Jopa pana cui barapentsinde xua painya tsipaebeibiwa Nacom.

¹³ Nacom piamonaē xua irū pomonaē Nacom pejume cowūntsiwixae tsi payawende pocotsiwa xua barapomonaē nantawenona. Pantenta weyataeya wabeibare painya bontha pomonaē painya nepaca casiwa poneibiwi, pomonaē pejume cowūntsiwi Nacom pomonaē jopa painya yaitaibi jiwī.

¹⁴ Pomonaē paca atene exana painya nejume cowūntsixae Jesucristo barapomonaē patawūcare Nacomtha xua Nacom peyawenaewa tsane barapomonaē. Nacom jopa patsipaebinde xua abe pecana exanaewa tsane barapomonaetha.

¹⁵ Irū pājūntū coyene weiweineibare poxonaē ichamonaē jūntū coyene weiweineiba. Ichacuitha pājūntū coyene wecoyeyi tsaibindeno poxonaē ichamonaē jūntū coyene wecoyeyi tsaibi.

¹⁶ Pebrūya nanta cui jūpaeya pajinompare xua jūntema nantiya pana nabarū dubenanaebiyame. Jopa ichamonaē paaebinde. Pacana exande painya jiwī xua be pomonaē pecui pawī jiwī. Jopa pana nayabara nanta xeinaeinde xua painya neyaputae jiwī pam.

¹⁷ Poxonaē ichamonaē abe pacata exana jopa xuya abe pata exanaeinde barapomonaetha. Jame maisa pananta xeinare xua daxita jiwī xaniwaicha painya netaexanaewa tsane pocotsiwa barapomonaē tsita cui xanepanatsi. ¹⁸ Paexanaponde daxita pocotsiwan paca itacūpa, xain bapoxonaē jūntema pana nabarū jinompame daxita jiwī. ¹⁹ Tamonaē pam paxam pomonaē tapaca caantobe jiwichi pam irū painya nejume cowūntsi jiwixae Jesucristo. Paxam jopa bewa xuya panayantomateibim tsane poxonaē ichamonaē abe pacata exaneiba. Jame bara saya pacopare xua bara Nacom peyantomatsiwa exanaena pomonaetha pomonaē abe pacata exana. Tsipei Nacom Pejume Diwesitha tatsi baxua yabara jeye: “Jame xan saya ba tacoyan xua jiwī atene exanan abe peexanaexae ichamonaetha. Xan peyantomatsiwa xuya exanaein pomonaetha pomonaē paca abe exana jei pon Pecanamataxeinaein jiwī”, jei Nacom Pejume Diwesitha. ²⁰ Jopa xuya payantomateibim tsane. Jame paexande xua Nacom Pejume Diwesitha tatsi jeye: “Icha painya nepaca caaitafaetabi jiton jainpa, paapare pexaewa. Yawano icha meratsipano, paapare pocotsiwa xua peapaewa. Poxonaē baxua pataexanaename, bapoxonaē barapon pin ura paca tsita xeinaena xua bayatha abe pia pacata exanaexae”, jei Nacom Pejume Diwesitha. ²¹ Jopa pacopatsinde xua ichamonaē abe pia paca exanaē coyenein tatsi paca jūntū coyene amanayaba xua daxota abe paexaname barapomonaetha pomonaē painya nepaca caaitafaetabi jiwī. Jame maisa beta exanaeya pata exande poxonaē bequein ichamonaē abe pacata exana. Bapoxonaē pacoyene amanayabame po coyenein abe peexanaē coyenewan.

13

¹ Daxita jiwi bewa exanae pocotsiwa itorobatsi pomonae itorobiya pecanamataxeinae jiwi pomonae peayapusu itorobi coyenewa xeina. Jiwi jopa itacupaetsi xua pecanamataxeinaewa ichamonae xua peitorobinexa icha Nacom jopa yabara copatsiyo baxua. Tsipei jiwi pomonae peayapusu itorobi coyenewa xeina xua pacanamataxeinaewatsi ichamonae saya meisa Nacom bara yabara cui copaba xua barapo jiwi bara pecanamataxeinaewa tsane ichamonae. ² Daxota icha ichun jume naitemata xua pocotsiwa itorobatsi xua itoroba pon piamonae itorobiya pecanamataxeinaein barapara bapon barichi jume naitemata po coyene xua Nacom exana xua poxonaе cana exana xua barapomonae pecanamataxeinaewa ichamonae. Pocotsimonae xua baxua exana xua pejume naitematsiwa, barapocotsimonae apara bara Nacom tsita natsicuentatsi xua barapo abe coyenewa peexanaexae. ³ Pomonae beta peexanae jiwi jopa bewa cuitaya junuwi tsane xua pecuitaya junuwiwatsi pomonae itorobiya pecanamataxeinaewi. Jame saya meisa pomonae abe peexanae jiwi bewa cuitaya junuwina xua pecuitaya junuwiwatsi pomonae itorobiya pecanamataxeinae jiwi. Icha jopa paichichipaem xua junuwa painya nepaca exanaewa pon itorobiya pecanamataxeinaein, moya jame beta patsita exande. Bapoxonaе bapon bara patsita xanepanaename. ⁴ Tsipei apara pon itorobiya pecanamataxeinaein jiwi tanacuita Nacom xua painya nepaca cayawenaewa tsane. Ichitha icha paxam abe paexaname moya bara bewa pajunuware, tsipei bapon pon itorobiya pecanamataxeinaein jiwi, xeina po peayapusu itorobi coyenewatha peitacupaewatsi xua atene paca exana. Bapon tanacuita Nacom. Daxota bapon Nacom taexainchi xua pomonae abe peexanaewi atene tsane xua penatsicuentatsi xua abe peexanaexae Nacomtha. ⁵ Daxota bewa paexanaename pocotsiwa paca itoroba pon itorobiya painya nepaca canamataxeinaein. Jopa apara bewa paexanaem tsane baxua xua poxoru Nacom atene painya nepaca exanaeyainwa, jame apara poxoru xua painya juntu coyenetha payabara yaputaneme xua bewa beta painya neexanaewa tsane. ⁶ Daxota xain barapomonae pacatsibame pematomatsi paratixi pocotsi paratixi jiwi bewa catsibina pomonaetha pomonae itorobiya pecanamataxeinae jiwi. Tsipei barapomonae nantawenona paratixi xua beta pe-eexanaponaewa tsane poxonaе Nacom tanacuitapoinchi.

⁷ Daxita barapomonae barompa paratixi pacatsibare po paratixi bewa pacatsibim barapomonae. Pomonae painya nepaca canamataxeinaewi pacatsibare daxita po coyenein peyabara matomatsiwan xua xuan paca wuca. Daxita pomonae pecanamataxeinae jiwi pabaruu cui itura jinare, xua daxota betiya painya nebaru cueicueijejiwa tsane.

⁸ Painya xoba ichamonae pantoma amanayabeibame. Jame saya cae coyene bewa paxeinaem po coyene xua nantiya painya nenaantobewam. Tsipei pon antobe ichamonae bapon jume cowuntsiya exana daxita pocotsiwa xua Moisés itoroba pia peitorobi coyenewatha. ⁹ Moisés pia peitorobi coyenewatha jeye: “Jopa pichinde ichun piseuri tatsi. Jopa bexubinde ichamonae. Jopa caibinde xua ichamonae piawan. Jopa yabara uwinde pocotsiwa ichun xeina”, jei barapo itorobi coyenewatha. Barapo coyenein xuaunxuae paeban, iruno daxita icha peitorobi coyenewano be cae peitorobi coyenewa jume naexanabe ichaxota xua po jumetha jeye: “Ichamonae antobeinde icha ichim xua jinya coutha naantobem”, jei barapo peitorobi coyenewatha. ¹⁰ Pon ba beta antobe tsaibi ichamonae bapana jopa abe taexanaeyo barapomonaetha. Daxota icha antobetsi ichamonae bapoxonaе barapara jume cowuntsiya exainchi daxita pocotsiwa Nacom itoroba Moisés pia peitorobi coyenewatha.

¹¹ Daxita baxuan bewa paexanaename tsipei payaputaneme xua anoxuae po dapaetha pajinompame bichocono peayapube dapae. Barapo dapaetha tsaca pajinompare, tsipei imoxoyo naca itiya pona po mataqueitha Nacom naca capanenebiyaena. Barapo matacabi imoxoyo beyacaincha xua poxonaе aena jume cowuntatsi Jesucristo. ¹² Pequireiwa ba bewayo caewanaya poxoru matacabi dawetsina. Bara juta coyeneya ichi poxonaе pomonae ba abe peexanaewi bara apara pequireitha abe exana. Barapomonae barapenta

xua abe exana poxona matacabi tsuxubi. Barichi waxainchi bewa barapentichi xua abe waexanae coyenewa icha barapomona ichi xua saya merawi abe exana ichitha mataqueitha jopa exanaeyo. Waxainchi bewa beta exanaetsi icha pomona ba ichi pomona jinompa mataqueitha xua beta exana. Baxua exanatsi poxonae najuntũ coyene wũnaetatsi xua najuntũ coyene ayapusũ exanatsi abe waexanaeyainwa. Baxua icha be poxona ba soldadopin ichi poxona matacabitha nacui wũnaeta penabinexa. Bapon penaintontha nayaitata xua daxita pepontha xua pebexotsiyainwatsi. ¹³ Barabũ beta xanepanaya dubenanaebiyatsi, icha jiwi ichi xua beta dubenanaebiya mataqueithaxae. Jopa bewa nacũpa exanae dubenanaebiyae tsainchi xua peamenetsaxawa. Mataũtano jopa bewa ponaeinchi po penabanaewan xua ichaxota pinmonae penacaetutsiwa yawa abe exana. Jopa bewa nasi cui exanae tsainchi. Mataũtano jopa bewa tanotsichi ichamonae piseuri jiwi tatsi. Yawano jopa bewa nantiya jume daunweya najume matsontsonobi tsainchi. Mataũtano jopa bewa nauwi tsainchi. ¹⁴ Jame ichawa bewa paexanaename. Bewa Jesucristo patsipaebiname xua painya nepaca yaitatsinexa pon jiwi Pecanamataxeinaein, xua abe painya exanaeyainwa tsane. Bapoxonae jopa paexanaeinde po coyene xua abe painya exanaewam pocotsiwa painya jũntũ coyenein ichichipa xua peexanaewa.

14

Meje yabara xua jopa bewa abeya yabara paebichi po coyene xua pejinompaewa pomonae irũ pejume cowũntsiwi

¹ Icha ichũn jũntũ coyene faefaena pejume cowũntsiwa Cristotha, bapon pacana exande be painyamonae jiwi jiwana pomona painya nejume cowũntsi jiwixae pam. Jopa bapon yabara pajume matsontsonobinde xua pia pecayabara nanta xeinaewatsi xua po coyeneya bapon bewa exanae xuano xua ichacuitha po coyeneya xua bapon jopa bewa exanae. ² Ichamonae ba nanta xeina xua itacũpatsi penabanaewa xua daxita coyenein pexaewan. Ichamonae ba pomona jũntũ coyene faefaena xua pejume cowũntsiwa Cristotha barapomonae ira pipexaewa xane jopa pewi xaeyo. ³ Pon penabanaein daxita coyeneya pexaewan, bapon jopa bewa paebi tsane ichũnthã pontha pon xua jopa penabanaeinxae pewi. Jopa bewa paebi tsane “Abe exaname jopa nenabanaexae pewi”, jopa bewa jei tsane. Barichi pon pewi jopa penabanaein, bapon jopa bewa paebi tsane pontha pon pewi penabanaeinxae: “Abe exaname nenabanaexae pewi”, jopa bewa jei tsane. Tsipei pon daxita coyeneya penabanaein pexaewa Nacom yabara nanta xeina xua bara irũ pexanto tatsi, icha ichi pon jopa penabanaein pewi. ⁴ Xam jopa bewa daxua paebim tsane xua pon ichũn tanacuitatsi xua bapon natsicuenta pontha pon pecanamataxeinaeinchi abe peexanaexae. Po pebin xua Nacom tanacuitatsi bapon nantãuta pon jiwi Pecanamataxeinaein. Bapon jopa nantawenonaeyo xua irũ xam canamataxeiname bapon. Saya meisa Nacom itacũpatsi xua yabara paeba poxonae po coyene icha bapon wũnae exana xuano xua icha jopa xapain exanaeyo. Ichitha bapon xanepanaya exanaena tsipei Nacom itacũpatsi xua cana exana, xua pia petanacuichi jiwi tatsi xanepanaya peexanaewa.

⁵ Ichamonae nanta xeina xua caentaqueitha bichocono peainya cui matacabi beyacaincha xua icha matacabi tsipei barapo matacabitha xua Nacom wũnae pejainchiwatsi. Ichamonae nanta xeina xua daxita matacabin bara najũpa xua peainya cui matacabin xua Nacom wũnae pejainchiwanexatsi barapo matacabintha. Daxita barapomonae bewa barompaya pia jũntũ coyenewatha yabara nanta xeinae xua barapara pexainyeiwa po coyenewa xua peyabara nanta xeinaexae. Jopa bewa nanta xeinae po coyenewa ichũn yabara nanta xeina. ⁶ Pon jopa nacuichiyo po mataqueitha xua peainya cui matacabi, bapon baxua exana xua Nacom wũnae pejainchinexatsi pon jiwi Pecanamataxeinaein. Barichi pon xua penabanaein daxita coyeneya pewi, apara xua Nacom wũnae pejainchinexatsi, pon jiwi Pecanamataxeinaein, tsipei bapon jeye: “Nacom maisa jũntũ coyene weiweinan xua tanecatsiwam daxita coyeneya pexaewan”, jei. Irũno

pon jopa pewi xaeyo, bapon barapara xua Nacom wūnae pejainchinexatsi pon jiwi Pecanamataxeinaein, tsipei bapon jeye: “Nacom maisa jūntu coyene weiweinan xua tanecatsiwam ira pipexaewa”, jei bapon.

⁷ Tsipei dapon ajibi pon waxainchi jiwanatsi pomonaexaetsi pomonae wajume cowūntsiwichi, xua pon pepoponaewa penacanaexanaewa xua be pocotsi coyeneya bapon ichichipa. Jame apara popona icha be pocotsi coyeneya bara Cristo pon jiwi Pecanamataxeinaein ichichipa xua pepoponaewa tsane. Barichi icha bapon tūpaetsipa apara saya poxoru Jesucristo pon jiwi Pecanamataxeinaein bara copata xua bapon petūpaewa tsane. ⁸ Icha Nacom pon jiwi Pecanamataxeinaein copata xua awiya wajinompaewatsi bewa beta jinompaetsi xua daxota jiwi Nacom wūnae pejainchinexatsi. Icha Nacom pon jiwi Pecanamataxeinaein copata xua bara watūpaewa tsane barapo coyene bewa cana exanaetsi xua jiwi wūnae pejainchiwa Nacom. Daxota bequein icha waxainchi jinompaetsipatsi, yawano poxona bequein icha tūpaetsipatsi bara barapara barapo coyeneinya waxainchi bewa cana exanaetsi xua jiwi Nacom wūnae pejainchinexatsi pon jiwi Pecanamataxeinaein poxoru waxainchi piamonae tatsichi. ⁹ Daxota Cristo tūpa, yawano equeicha asu popona xua penaexanaenexa tsane pon jiwi Pecanamataxeinaeinchi xua daxita jiwi nexa pomonae werapa irūno pomonae cataunxuae jinompano.

¹⁰ Daxota dapon ajibi pon paxam jiwana pam pon bewa yabara paebina pomonaetha pomonae irū pejume cowūntsiwi Cristo, xua pejeiwa: “Barapomonae Nacom tsita natsicuentatsi abe peexanaexae bapontha”, xua pejeiwa. Matautano ichamonae paxam jiwana jopa bewa yabara paebi tsane pomonaetha pomonae irū pejume cowūntsiwi, xua jei: “Maisa barapomonae jopa peyaputaewi xua jopa peainya cui jiwi”, jopa bewa jei. Tsipei poxoru daxita waxainchi bexa tsane umenaeinchi Cristo peitabaratha. Cristo daxita naca yabara paebina xua wanatsicuentsiwa xua abe waexanaexae Nacomtha.

¹¹ Tsipei Nacom Pejume Diwesitha jeye:

“Xan bara xaniwaicha yabara paca tsiwūnae
muxu dutatsi xua daxita jiwi patsina xua
pentabocototha peumenaenexa taitabaratha
tanewūnae jainchinexa.

Daxita jiwi neyabara paebina jei tsane:

‘Apara barapon yatsicaewa pepa Nacom’, jei
tsane”, jei Nacom pon jiwi

Pecanamataxeinaein xua Pejume Diwesitha.

¹² Bapoxonae barapo mataqueitha yabara cueicueijeji tsainchi Nacomtha pocotsiwa xua caena bayatha exanatsi xua barapo cae pin nacuathe icha bara metha wūnae exainchi yawano icha bara metha abe exainchi.

Meje yabara xua jopa bewa exanaetsi pocotsi coyeneya pomonae pejume cowūntsiwi abe peexanaewa tsane

¹³ Daxota waxainchi jopa bewa yabara nantiya namuxutainyabichi pocotsiwa waexanaexae. Jame bewa paexanaem xua meje: Painya xoba pacana exaname painyamonae pomonae irū pejume cowūntsiwi xua pocotsi coyeneya barapomonae peexanaewa tsane xua daxota jopa pejume cowūntsiwa tsane Nacom. ¹⁴ Tsipei xan tajume cowūntsixae Jesús pon jiwi Pecanamataxeinaein daxota bara yatsicaya yaputan, xua dapocotsiwa ajibi po pexaewa tanejūntu coyene taxobiwa xua icha taxaewa tsane. Ichitha icha ichūn yabara nanta xeina xua po pexaewa betaxobichipatsi icha xaetsipa bapoxonae bara tsita xainyeichi, betaxobichipatsi icha xaetsipa. ¹⁵ Ichitha icha paxaetsipame pocotsiwa xua painya jiton jopa ichichipaeyo xua pexaewa, pon irū pejume cowūntsin bapoxonae peantobe coyenewa jopa patsita xeinaem bapon. Painya xoba paexaname pocotsi coyenetha xua ichūn baraxuba Nacom xua poxoru pocotsiwa painya nexaexae. Tsipei apara Cristo bayatha tsitūpa bapon. ¹⁶ Paxam pananta xeiname xua bara wūnae paexaname po coyenein ichamonae tsita abetsi pejūntu coyenein taxobixaetsi. Bequein baxua

payabara nanta xeinaetham tsipae ichitha jopa paexanaemtsipae barapo coyenein. Tsipei icha paexanaetsipame barapo coyenein, ichamonaē yabara jei tsipae barapo coyenein: “Maisa po coyenein barapomonaē exana bichocono abe”, jei tsipae. ¹⁷ Nacom ichichipa xua waxainchi peburūya jūntema wajinompawea. Daxota poxonaē Nacom naca itoroba po coyene yabara po coyeneya bewa nabarū jinompaeinchi, jopa yabara paebi tsainchi xua po peitorobi coyenein xua waxaewa yawa waapaewa yabara. Jame po coyenein yabara naca itoroba xua apara jame pinae bewa Nacom tsita xeinaeinchi pejūntū coyene xanepanaewa. Matautano bewa pinae jūntema nabarū jinompaeinchi Nacom nexa. Matautano bewa jūntū coyene weiweinaeya jinompaeinchi. Daxita barapo coyenein xeinatsi wanaca catsibixae Nacom pia Pejumo pe tūnaxū tatsi. ¹⁸ Poxonaē barapo coyeneya Cristo taexainchi bapoxonaē Nacom tsita xanepanatsi pocotsiwa xua exainchi. Matauta jiwi naca yabara paeba xua pinae bara beta exainchi.

¹⁹ Daxota bewa waxainchi exaneibinchi pocotsi coyenein xua jūntema nabarū jinompatsi exanatsi. Yawano bewa exaneibinchi pocotsi coyeneintha xua nantiya jume cowūntaponatsi naexainchi. ²⁰ Jopa bewa paxaem ichūn peitabaratha pon painyamonaē jiwana pocotsiwa xua bapon yabara nanta xeina xua jopa bewa xae. Icha paxaetsipame bapon peitabaratha, bapon irū metha xaetsipa barapo pexaewa. Bapoxonaē bapon nanta xeinaetsipa xua bapon pomonaē jiwana pomonaē penatsicuentisiwa Nacomtha xua abe peexanaexae. Painya xaexae bapon pacana exaname xua jopa beta pejume cowūntsiwa Nacom. ²¹ Jame pocotsiwa xua xanepanaya painya neexanaewa tsane meje baxue: Jopa bewa paxaem pewi. Matautano jopa bewa paapaem peamenetsaxawa. Matautano jopa bewa paexanaem pocotsi coyenewatha painya jiton exanaena pon irū pejume cowūntsin Cristo xua abe peexanaewa tsane. ²² Icha paxam pajume cowūntame xua bara Nacom paca copata xua bara painya nenabanaewan daxita coyeneya pexaewan, po pexaewan jopa paca jūntū coyene taxobiyo saya jame meisa Nacomtha yabara patsipaebare baxua. Painya xoba ichamonaē yabara patsipaebame pexaewa po pexaewa barapomonaē jopa bapana xae. ¡Maisa jūntū coyene weiweina pon daxita coyeneya pexaewa penabanaein pon pia jūntū coyenewa jopa tsipaebichi xua pinae penatsicuentisiwa xua abe peexanaewaxae Nacomtha poxonaē barapo pexaewa xane! ²³ Pon yabara ainya ūnthūton xeina xua pocotsiwa penabanaewan, bapon barapara pia coya natsicuenta Nacomtha xua abe exana xua poxonaē daichitha xane barapo pexaewa. Daxota daxita pocotsiwan waxainchi exanatsi icha jopa beta yabara jume cowūntichi xua waexanaewa pocotsiwa Nacom ichichipa bapoxonaē barapara abe exanatsi, poxonaē baxuan exanatsi.

15

Meje yabara xua pocotsiwa bewa exanaetsi xua ichamonaē tsita xanepanatsi

¹ Waxainchi pomonaetsi pomonaē ajūntūcoyenesūtsi xua wajume cowūntsiwa Cristotha. Daxota bewa yawenaetsi pomonaē xua jūntū coyene faefaena xua pejume cowūntsiwa Cristotha xua barapomonaē awiya jume cowūntsina. Jopa meisa bewa exanaetsi pocotsiwa xua waxainchi wacoya ichichipatsi. ² Daxita waxainchi bewa exanaetsi pocotsi coyenewa tsita coyene xanepanatsi pomonaē ichamonaē pomonaē irū pejume cowūntsiwi pocotsi coyenetha xua barapomonaē yawenatsi xua pejume cocowūntaponaenexa. ³ Tsipei Cristo jopa exanaeyo xua pia coya ichichipa pocotsiwa tsita coyene xanepanatsi. Jame saya bapon yabara jume cui copatatsi xua jiwi bapon atene peexanaewatsi poxonaē abe yabara paebatsi. Jiwi Cristo bara barapo coyeneya cana exanatsi icha be pocotsi coyeneya caena bayatha Cristo yabara paebatsi Nacom Pejume Diwesitha xua Cristo jeye Nacomtha: “Poxonaē jinya necaaitafaetabi jiwi abeya cayabara paeba, barichi barapara xan berena abeya neyabara paeba”, jei Cristo Nacomtha. ⁴ Daxita xua pocotsiwan caena bayatha tina Nacom Pejume Diwesitha, baxuan yabara tina xua wanaca cuidubinexa Nacom yabara. Baxuan naca cuiduba xua Cristo wawūnaē ewatsinexa. Xeinatsi baxua poxoru Nacom Pejume Diwesi naca cana exana xua jopa dapō coyene xeinaetsi xua bepijawa aitaconatsi xua bequein

ichamonae abe nacata exana. Yawano barapo diwese naca cana exana xua najuntũ coyene tsacabatsi xua wajume cowũnta dubenanaebiyaewa. ⁵ Nacom bapon naca cana exana xua jopa bepijawa aitaconaetsi yawano xua naca jũntũ coyene tsacaba exana. Barabũ barapon Nacom paca yawena xua peburũya nanta jũpiya pananta xeiname xua painya nabarũ exanaewa tsane, icha be pocotsi coyeneya Cristo Jesús exana. ⁶ Barabũ be caemonae pana nabarũ wũnae jaintame Nacom, pon Jesucristo Paxa tatsi, pon Jesucristo Wanacanamataxeinaein.

Meje yabara xua po coyene pomonae jopa judiomonae naexanaeyo tsipaebatsi Nacom pia pecapanenebiyae diwesi jume

⁷ Daxota icha Cristo naca ichi xua naca matenta weyataeya waba, paxam bara paichinde. Nantiya pana nantenta weyataeya wabeibare xua bapoxonae jiwi wũnae pejainteibinexa Nacom painya neexanaewamxae baxua. ⁸ Xan paca tsipaebatsi xua Cristo patopa xua judiomonae peyawenaenexatsi. Cristo baxua exana xua tsita itapeinya xeina xua Nacom bara exana pocotsiwa bapon exanapaeba. Mataũtano Cristo baxua exana pia nayabara jume cui wetsinexa pocotsiwa bayatha Nacom yabara tsiwũnae muxu duta wamo susato jiwitha. ⁹ Yawano Cristo daxota patopa xua pomonae jopa judiomonae naexanaeyo wũnae pejainchinexa Nacom xua Nacom wũnaeya peyabara nanta xeinaexae xua peyawenaenexa barapomonae. Nacom Pejume Diwesitha baxua yabara jeye xua Cristo paeba paxatha:

“Wũnae cajaintatsi daxita nacuan jiwitha pomonae jopa judiomonae naexanaeyo pia xantha tatsi. Wũnae cajaintatsi xua poxonae cata naxũnatsi”, jei Nacom Pejume Diwesitha xua Cristo Paxatha paeba.

¹⁰ Equeicha Nacom Pejume Diwesitha jeye: “Barabũ daxita nacuan jiwi caemonae nabarũ jũntũ coyene weiweinaena pomonae Nacom itapeta xua pecana exanaenexa piamonae tatsi”, jei Nacom Pejume Diwesitha.

¹¹ Equeicha Nacom Pejume Diwesitha jeye: “Barabũ daxita pam pomonae jopa judiomonae naexanaeyo pam wũnae pajainchiname pontha pon jiwi Pecanamataxeinaein. Mataũtano barabũ daxita nacuanpiwi wũnae jainchina bapontha”, jei Nacom Pejume Diwesitha.

¹² Equeicha Nacom Pejume Diwesitha xua Isaías tatina, jeye: “Pebin patopaena pon Isaí pia pemomoxi susato jiwi jiwana tatsi, pon David paxa tatsi.

Bapon Nacom cana exana xua bapon itorobiya pecanamataxeinaenexa tsane pomonae jopa judiomonae naexanaeyo. Barapomonae jume cowũntsiya wũnae ewatsina xua barapon barapomonae pecapanenebiwa tsainchi abe pia peexanaexae cuiru coyenein weya tatsi”, jei Isaías Nacom Pejume Diwesitha.

¹³ Barabũ Nacom pon naca cana exana xua wawũnae ewatsiwa Cristo bichocono paca jũntũ coyene weiweina exanaena. Mataũtano barabũ Nacom jũntema jinompa paca cana exanaena. Nacom baxua pacata exana painya nejume cowũntsixae bapon. Bapoxonae barabũ Nacom paca cana exana xua jopa juniya painya newũnae eewataponawa tsane

Cristo. Nacom pia Pejumope t̄nax̄u tatsi baxua paca cana exana pia peayapus̄u itorobi coyenewatha.

¹⁴ Tamonae pam, paxam pomonae ir̄u painya nejume cow̄untsixae Jesucristo. Bara xaniwaicha beta yaputan, xua paxam beta painya neexanaewam po peantobewa xu-aunxuae yabara paca tsitinatsi. Matautano paxam payaputaneme daxita xua pocotsiwa bewa paexanaename. Matautano payaputaneme xua po coyene bewa nantiya pana namuxuwetsim. ¹⁵ Barapo cartathe pecono jumeyotha atsaquiya pacata tinatsi. Baxuan xua pocotsiwan pacata tinatsi jopa ichipaeinyo xua painya nej̄unt̄emainaewa. Daxota atsaquiya pacata tinatsi baxuan Nacom tanebar̄u cui itura jinaexae poxonae necata barapo tanacuichiwa. ¹⁶ Nacom neitoroba xua Jesucristo tatanacuichinexa tayawenaenexa pomonae jopa judiomonae naexanaeyo. Tanacuitan Nacom poxonae cueicueijan Nacom pia pecapanenebiyae diwesi jume pomonaetha pomonae jopa judiomonae naexanaeyo. Barapomonae pejume cow̄untsixae Cristo, Nacom pia Pejumope t̄nax̄u tatsi cana exana xua barapomonae pejūnt̄u coyene xanepanaewa Nacomtha. Po coyene exanan baxua be po coyene icha sacerdotemonaepin ichi. Poxonae bapon duwei jiwi tsitautatsi abe pia peexanae coyenein nexa tatsi bapoxonae barapo jiwi Nacom petsita jūnt̄u coyene xanepanaewichi.

¹⁷ Tajume cow̄untsixae Cristo Jesús daxota bichocono netsita xanepana xua tataexanaexae barapo penacuichiwa xua Nacom nexa. ¹⁸ Jopa yabara paebinyo xua Cristo exana ichamonae nexa. Saya meisa bichocono netsita xanepana pocotsiwa xua Cristo exana xan nexa. Cristo neyawena xua pomonae jopa judiomonae naexanaeyo pejume cow̄untsinexa Nacom. Barapomonae Nacom jume jejeichi poxonae jume tane pocotsiwa cueicueijan xuano xua tane pocotsiwan xua exananno. ¹⁹ Nacom neexana xua pia Pejumope t̄nax̄u tatsi pia peayapus̄u itorobi coyenewatha exanan pexeinya petsita it̄ubi coyenewan po coyene jiwi jūnt̄u coyene nabenaeca cana exainchi. Daxota poxonae Jerusalén tomara wewarapiyan daxita jiwitha cueicueijan tsoponae Nacom pia pecapanenebiyae diwesi jume xua Cristo yabara. Baxua exanan beya Iliria nacuatha yacui jopan. ²⁰ Daxota ichichipeiban xua tacueicueijeiwa Nacom pia pecapanenebiyae diwesi jume xua Cristo yabara ichaxota cataunxuae jiwi jopa yabara jume taeyo Cristo. Jopa becueicueijanyo Nacom Pejume Diwesi ichaxota ichamonae copiya bayatha cueicueijei barapo diwesi. ²¹ Poxonae xan baxua exanan, exanan be pocotsiwa bayatha Nacom Pejume Diwesitha pepaebixae, xua Cristo yabara jeichichi:

“Pomonae cataunxuae jopa tsipaebichi po diwesi xua bapon peyabara paebiwatsi, barapomonae jume taena, xua bapon yabara jume taeinchi. Bapoxonae barapomonae yaputaena po diwesi xua bapon peyabara paebiwatsi xua daxota bapon jume cow̄untsinchi”, jei Nacom Pejume Diwesitha tatsi.

Meje xua poxonae Pablo paeba xua pinae beponaena Roma tomara beya

²² Ichamonae tatsipaebaponaexae barapo diwesi jopa neitac̄upaeyo xua tapaca casiwa ponaewatsi. Bequein bayatha ichichipeiban xua tapaca casiwa poneibiwa tsainchi ichitha jopa neitac̄upeibiyo. ²³ Ichitha anoxuae wetan barapo penacuichiwa daxita barapo nacuanthe. Caena bayatha ainya wei ichichipeiban xua tapaca casiwa ponebiwatsi. ²⁴ Anoxuae ichichipan xua tapaca casiwa ponaewa tsainchi poxonae warapaein España nacua beya. Poxonae paxam panejūnt̄u coyene weiweina cana exanaenameba xua tapaca casiwa ponaexaetsi equeicha warapaein España nacua beya. Ichichipan xua tapana neyawenaewam tsane pocotsiwa nantawenonan tawarapaewanexa poxonae painya tomara weya ponaein. ²⁵ Ichitha anoxuaetha copiya ponaein Jerusalén tomara beya. Capanaein pocotsiwa xua barapo Jerusalén tomarathapiwi peyawenaewatsi, pomonae ir̄ur̄u pejume cow̄untsiwi Cristo. ²⁶ Macedonia nacuapiwi ir̄u Acaya nacuapiwi pomonae pejume cow̄untsiwixae Cristo daxita barapomonae pia coya juntucuru exana

po coyene tsita coyene xanepanatsi. Barapomonaē taitoroba paratixi Jerusalén tomara-piwi nexa, pomonaē peacopeibiwi pomonaē irū jume cowūnta Jesús icha paxam paichim. ²⁷ Barapo pejume cowūntsiwi pomonaē Macedonia nacuapiwi irū Acaya nacuapiwi barapomonaē juntucuru nanta xeina pia coya xua peexanaewa baxua. Barapomonaē jopa itorobichi ichūn. Ichitha barapomonaē bewa yawenaena pomonaetha pomonaē acopeibiwi. Barapomonaē pomonaē jopa judiomonaē naexanaeyo jume tane Nacom pia pecapanenebiyae diwesi jume poxoru bayatha judiomonaē yawena pecueicueijeixae barapo diwesi barapomonaetha. Daxota anoxuae pomonaē jopa judiomonaē naexanaeyo bewa xuya yawenaē barapomonaetha judiomonaetha pocotsiwantha xua barapomonaē pexeinaexae Nacom weya. ²⁸ Daxota poxonaē wetsin barapo penacuichiwa xua catsin daxita barapo paratixi Jerusalén tomarapiwitha, bapoxonaē ponaēin España nacua beya. Paca siwa ponaēinchi copiya, bapoxonaē bara beya warapaein España nacua beya. ²⁹ Bara xaniwaicha yaputan xua poxonaē paca siwa ponaēinchi, Cristo necatsina po diwesi paxam nexa po diwesi bichocono paca tsita jūntū coyene xanepana xua daxota painya nejūntū coyene weiweinaewa tsane.

³⁰ Tamonaē pam, paxam pomonaē irū painya nejume cowūntsiwixae Jesucristo. Paca wūcatsi xua be caemonaē panaexande xua ajumesūya daunweya painya pana nebaru tsipaebinxā Nacomtha xua bapon tana neyawenaewa tsane xua tatanacuichiwa bapon. Baxua paca wūcatsi irū painya jume cowūntsixae Jesucristo pon Wanacanamataxeinaēinxae. Barichi paca wūcatsi irū painya xeinaexae po peantobe coyenewa Nacom pia Pejumope tūnaxū tatsi naca cata. ³¹ Nacomtha painta tsipaebare xua jopa abe tana neexanaenexa pomonaē Judea nacuatha pejinompaewi, pomonaē jopa pejume cowūntsiwi. Mataūtano Nacomtha painta tsipaebare xua barapo Jerusalén tomarapiwi pomonaē pejume cowūntsi jiwi tanententa cobe wenotsinexa barapo paratixi. ³² Bapoxonaē icha Nacom ichichipaena jūntū coyene weiweinaya paca siwa patopaeinchi. Mataūtano nafifina caewatsin xua tapaca casiwa ponaewatsixae tsainchi. ³³ Barabū Nacom pon jūntema jinompa naca cana exana paca barū poponaena daxita. Je, bara ichi tsane.

16

Meje yabara poxonaē Pablo jacobā Roma tomarapiwi

¹ Anoxuae yabara paca tsipaebatsi powa pewūn Febe, powa beta peexanaewayo. Bapowa paca siwa ponaena. Bapowa be wamcho watsicotaewa irū pejume cowūntsixae Jesús. Barapowa Nacom tanacuitatsi xua yawenatsi pomonaē pejume cowūntsi jiwi Cencia tomaratha. ² Barapowa wūnaeya pantenta weyataeya wabare Jesucristo piamonaē jiwanaexae pon Wanacanamataxeinaēin. Baxua bewa paexanaem icha pomonaē pejume cowūntsiwi ichi xua bewa nantiya nantenta weyataeya wabeibina. Barapowa payawende xua pocotsiwa barapowa nantawenona, tsipei barapowa bayatha yawena nawita pin bicheitomonaē. Yawano barapowa bayatha irū neyawena.

³ Painta jacobare powa pewūn Prisca. Irū painta jacobare, pia pebin tatsi, Aquila, tsipei barū nacuitanbe barapo tanacuichiwa po coyenein exanan Cristo Jesús nexa. ⁴ Baraponbe bara muxu petūpaebe tana necapanepaenexabe poxonaē ichamonaē juntucuru muxu tana nebexubi. Daxota xan baranbe: “Maisa jūntū coyene weiweinan xua tapaneyawenaemxabe”, jan. Barichirū daxita pomonaē Nacom pejume cowūntsiwichi pomonaē jopa judiomonaē naexanaeyo pomonaē Nacom petsita nacaetuteibiwichi xua wūnaē pejainteibinexatsi, jeye: “Maisa pajūntū coyene weiweinan xua paxambe pana neyawename xua Pablo jopa petūpaeewa”, jei. ⁵ Irūno painta jacobare pomonaē nacaetuta Prisca pia pebinbe pia botha tatsibe. Mataūtano painta jacobare Epeneto pon tajiton, pon bichocono antobein. Bapon pon copiya jume cowūnta Cristo Asia nacuatha. ⁶ Mataūtano painta jacobare María. Barapowa powa bichocono pacata nacuita. ⁷ Mataūtano painta jacobarebe Andrónico irū Junias ponbe irū judiomonaēpinbe icha xan ichin. Baponbe neyawa barū muxuna etabe jiwi pecūbi botha. Mataūtano baponbe Jesucristo pia peitorobi jiwi tatsi jiwanaē. Jiwi beta yaputaena

xua baponbe bara Jesucristo pia peitorobi jiwi jiwanabe tatsi. Baponbe caena bayatha netsiwana jume cowuntabe Cristo.

⁸ Painta jacobare Ampliato pon tajiton, pon bichocono antobein, pon iru pejume cowuntsixae pontha pon jiwi Pecanamataxeinaein. ⁹ Painta jacobare Urbano, pon xua naca baru muxuna tanacuita Cristo. Matautano painta jacobare Estaquis, pon tajiton, pon bichocono antobein. ¹⁰ Painta jacobare Apeles, pon tsita itapeinya xeineiba xua bapon bara xaniwaicha Cristo pejume cowuntsiwatsi poxona bequein abe taexaneibatsi ichamona. Matautano painta jacobare Aristóbulo piamona tatsi. ¹¹ Matautano painta jacobare Herodión pon iru judiomonaepin icha xan ichin. Iru painta jacobare Narciso piamona tatsi pomona pejume cowuntsixaeru pontha pon jiwi Pecanamataxeinaein. ¹² Iru painta jacobare powa Trifena iruno powa Trifosa. Barapowayobe, powayobe iru tanacuitabe xua pon jiwi Pecanamataxeinaein tanacuitatsibe. Iru painta jacobare Pérsida powayo tajitowayo, powayo antobein iruru pejume cowuntsixaeru. Barapowa iruru nawita daunweya tanacuitaru xua pon jiwi Pecanamataxeinaein daunweya tanacuitatsi. ¹³ Iruno painta jacobare pon Rufo. Bapon pon jiwi Pecanamataxeinaein itapeta, Rufo itapetatsi xua xanepanaya petanacuitsinexatsi. Iruno painta jacobareno bapon Rufo pena tatsi, powa iru be taena tsicotan. ¹⁴ Iru painta jacobare pon Asíncrito, iruno pon Flegonte, iruno pon Hermes iruno pon Patrobas, iruno pon Hermas. Iruno painta jacobare daxita pomona iru pejume cowuntsiwixae Cristo pomona xua baru jinompatsi barapomona. ¹⁵ Matautano painta jacobare pon Filólogo. Iruno painta jacobare powa Julia. Iruno painta jacobare pon Nereo, iruno Nereo pamcho tatsi. Iruno painta jacobare pon Olimpas. Matautano painta jacobare daxita pomona iru pejume cowuntsiwixae Cristo, pomona baru jinompatsi barapomona.

¹⁶ Betiya painta nantiya pana nacobe najacobare painya neantobewaxae Cristo. Daxita barapomona pomona Cristo pejume cowuntsiwichi pomona xote jinompe, daxita barapomona paca jacob.

¹⁷ Tamona pam, paxam pomona iru painya nejume cowuntsiwixae Jesucristo. Paxam paca muxuwetatsi xua dota pam painya necui naitaewatsinexa pomona xua tsana paca necaexanae jiwi xua ainya bicheitobe paca cana exana. Barapomona pacata ayapube exana xua painya nejume cowuntsiwa Cristo. Barapomona catsawa yabara jume toxechiya exana xua Jesucristo pia pecuidubi coyenewa tatsi xua bayatha pocotsiwa pana nacuidubame. Maisa barapomonae tajū pajume cuitaya ponde. ¹⁸ Barapomonae jopa tanacuichiyo xua Jesucristo jopa tanacuichichi pon Wanacanamataxeinaein. Barapomonae saya nacuita xua saya pia coutha peexanaenexa xua pocotsiwa barapomonae ichichipa xua peexanaewa. Barapomonae muxujainyaba nawita pomonaetha pomona be conotha peyaputae jiwi xua abe peexanae coyene yabara. Baxua exana po jumeintha xua pexeinya jumein yawa po jumeintha itara mexeya bara jume xanepana, ichitha jopa pexainyei jume. ¹⁹ Daxita jiwi paca yaputane xua paxam paexaname pocotsiwa Nacom paca itoroba pejume diwesitha. Daxota bichocono juntu coyene weiweinan. Ichichipan xua painya nexainaewa tsane painya neyaputae coyenewan po coyenewan xua pexanepanae coyenein painya neexanaenexa. Matautano ichichipan xua jopa painya neexanaewa tsane icha be ichi xua poxonae exana pomona jopa peyaputaewi, xua jopa abe painya neexanaewa tsane. ²⁰ Nacom bapon apara pon juntea jinompa naca exana. Barapon aunxuae paca yawenaena xua painya neamanayabiwa tsane pon bichocono abe peexanaein, bapon Satanás. Barabu Jesús, pon Wanacanamataxeinaein, paca yawenaena pia paca necaantobexae.

²¹ Iruno Timoteo paca jacob pon nebaru nacuita Jesucristo nexa. Matautano pon Lucio, iruno pon Jasón, iruno pon Sosípater, barapoyobe paca jacob. Barapoyobe iru judiomonaepinbe, icha xan ichin.

²² Xan Tercio, barapo carte saya tatinan Pablo. Xan bapon iruru paca jacobatsi iruru taantobexae pon jiwi Pecanamataxeinaein.

²³ Iruru pon Gayo bapon paca jacobae. Xan Pablon bapon Gayo pia botha tatsi anoxuae poponan. Baxota pia botha tatsi tanacaetutatsi pomonae pejume cowantsi jiwi, Nacom wunae pejainchinexatsi. Iruno Erasto paca jacobaru pon paratixi peenaen Corinto tomaratha xua Corinto tomarapiwi pia paratixi tatsi. Iruno Cuarto bapon paca jacobae, pon iru pejume cowantsin Cristo.

²⁴ Barabu Jesucristo, pon Wanacanamataxeinaen, daxita paxam paca yawenaena pia paca necaantobexae. Je, bara ichi tsane.

Meje xua Pablo Nacom wunae jaintatsi poxonae najume opi duta exana barapo carte

²⁵ Barabu wunae jaintatsi Nacom. Nacom itacupatsi xua paca ajuntuyarusuya cana exana xua beta painya nejume cowantsinexa barapo pexeinya pecapanenebiyae diwesi jume coyenewathaxae. Barapo diwesi Jesucristo yabara cueicueijan. Caena bayatha poxonae Nacom aena nacula forota, barapo pexeinya pecapanenebiyae diwesi jume Nacom cataunxuae jopa tsita jume itapeinya xeinaeyo, tsipei abu be namicha jume yawun xeina xua jiwi jopa yaputaeyo. Ichitha anoxuae Nacom tsita jume itapeinya xeina barapo diwesi. ²⁶ Barapo pexeinya pecapanenebiyae diwesi jume, anoxuae jiwi barapo diwesi yaputane, Nacom pia peitorobi jume pepaebiwi peyabara tinaexae barapo pexainyei jume diwesi. Matautano jiwi yaputane poxoru Nacom peitorobixae, pon xua ataya tsitecaeya popona. Barapo diwesi Nacom jume tane exana daxita nacuanpiwitha, xua barapo jiwi pejume cowantsinexa Cristo. Matautano jume tane exana xua barapo jiwi peexanaewa tsane pocotsiwa Nacom itoroba.

²⁷ Barabu Nacom wunae jaintatsi, pon meisa compa yatsicaewa daxita peyaputaen. Jesucristo naca cana exana xua Nacom wunae wajainchiwa xua ataya nexa. Je, bara ichi tsane.

Baja Pablo.

Meje Po Carte Copiya Tatina Pablo Corinto Tomarapiwi Tatinatsi

Meje poxonae Pablo tatina Corinto tomarapiwi

¹ Xan, Pablon, pacata tinatsi Nacom peichichipaexae xua tana newabiwa xua tana neexanaewa Jesucristo pia peitorobi jiwi jiwana tatsin. Irño Sóstenes pon irũ pejume cowũntsin Jesucristo, baponbe panbe pacata tinatsi. ² Paxam pomonaе painya nejume cowũntsi jiwi pam Corinto tomaratha. Barapomonaе pam pacata tinatsi pomonaе Nacom piamonaе tatsi pam painya neyawa jinompaexae Cristo Jesús. Nacom paca waba painya nenajũntũ coyene wũnae exanaenexa Nacomtha. Pacata tinatsi daxita nacuapiwi pam, pomonaе irũ painya nejume cowũntsiwixae pam Jesucristo, xua pomonaе painya newũn ununeibiwi Jesús pewũn poxonaе pawũqueibame Nacomtha. Bapon Jesucristo Wanacanamataxeinaein irũrũ daxita nacuanthapiwi pomonaе pejume cowũntsiwi barapomonaе pia Pecanamataxeinaeinchi tatsi. ³ Barabũ Nacom Waxa, irũ Jesucristo pon jiwi Pecanamataxeinaein jũntema jinompa paca exanaena. Mataũtano barabũ baponbe paca yawenaena pia paca necaantobewaxae.

Meje poxonae Pablo tawũca Nacomtha Corinto tomarapiwi

⁴ Daxita matacabi tsaibi Nacomtha pacata tsipaеbeibatsi, jan tsaibin: “Nacom maisa jũntũ coyene weiweinan xua barapomonaе tana neyawenaewa xua Cristo Jesús pean-tobexae barapomonaetha”, jan tsaibin. ⁵ Painya neyawa muxuna jinompaexae Cristo, daxota Nacom peayapusũwa jopa juniya paca catsiyo xua xaniwaicha painya nepaеbiwa pejume diwesi. Barapon Nacom paca cata po coyene beta yabara painya neyaputaewa bapon. ⁶ Po diwesi paca tsipaеbatsi Cristo yabara xua bapon paca cana exana painya nejinompaewa bapon nexa baxua anoxuae xaniwaicha paexanaponame. ⁷ Paxam paxeiname pocotsiwa Nacom pia Pejumope tũnaxũ tatsi paca cata, daxita xua pocot-siwan panantawenoname xua betiya painya nejinompaewa tsane Nacom nexa. Daxita baxuan paxeina dubenanaеbiyaename poxonaе cataunxuae pawũnae ewatsiname xua poxonaе Jesucristo po mataqueitha equeicha patopeicaena pon Wanacanamataxeinaein. ⁸ Nacom paca yaweneibina xua paajũntũsũya jinompaename beya poxonaе Jesucristo equeicha patopaetsica. Dapon xain aibi tsane pon paca yabara paеba xua painya nenat-sicuentsiwa xua abe painya neexanaexae Nacomtha xua poxonaе equeicha patopaetsica pon Wanacanamataxeinaein Jesucristo. ⁹ Nacom bara ataya exaneiba pocotsiwa pia petsiwũnae muxu dutsiwan. Barapon Nacom paca waba painya neyawa muxuna jinompaenexa tsane Jesucristo pon Wanacanamataxeinaein, Nacom Pexanto tatsi.

Meje poxonaе Pablo yabara paеba po coyene pomonaе pejume cowũntsiwi Cristo xua natsaba nacana exana

¹⁰ Tamonaе pam, paxam pomonaе irũ painya nejume cowũntsiwixae Jesucristo. Jume daunweya paca tsipaеbatsi tajũntũ coyenetha tsipei daxita paxam Jesucristo piamonaе tatsi pam pon Wanacanamataxeinaein. Caemonaе pebũrũya cuita pacue-icueijan tsurubenanaеbiyama. Jopa pana najume matsontsonobinde xua daxota painya nenatsabiwam tsipaе. Jame maisa pebũrũya pananta xeinare xua be bara caemonaе pam. ¹¹ Tamonaе pam, pomonaе irũ painya nejume cowũntsiwixae Jesucristo. Daxota baxua paca tsipaеbatsi, yaitama yabũyo powa pewũn Cloé piamonaе tatsi netsipaеba pinaе paxam nantiya pana najume matsontsonoba dubenanaеbiyame. ¹² Jume tan xua paxam jiwana xua barompaya tsanaya paеba, jeye: “Pablo yabara jume cowũntan pocotsiwa cuiduba”, jei. Ichamonaе jeye: “Apolos yabara jume cowũntan pocotsiwa cuiduba”, jei. Ichamonaе jeye: “Pedro yabara jume cowũntan pocotsiwa cuiduba”, jei. Ichamonaе jeye: “Cristo yabara jume cowũntan pocotsiwa cuiduba”, jei. ¹³ Daxita paxam jopa bewa barapo coyene paexanaem xua ainyamonaein pana naexaname. Cristo

jopa pia coutha nanantarubiya exanaeyo tsipei Cristo apara bara caein. Xan, Pablon, jopa apara paca tsitupaetsi naetotha. Jopa apara paca bautisabichi tawuntha xua daxota tamona painya nenaexanaexam. ¹⁴ ¡Pai jaibo! ¿Incane metha barichipaein? ¿Incane metha bautisabichipan? Daxota Nacom tsipaeban janje: “Nacom maisa juntu coyene weiweinan xua barapomona jopa tabautisabiwa”, jan. Saya meisa bautisaban Crispo iruru Gayo. ¹⁵ Daxota dapon aibi pon itacupatsi xua pejeiwa: “Xan nebautisaba Pablo pewuntha”, xua pejeiwa. ¹⁶ Jaina iruru Estéfanos piamona tatsi bautisaban. Ichitha ichamona jopa yabara nanta xeinaeyo xua tabautisabiwa bayatha. ¹⁷ Cristo jopa neitorobiyo xua tabautisabinexa jiwi. Jame saya Cristo neitoroba xua yabara tacueicueijexa pecapanenebiyae diwesi. Ichitha jopa cueicueijanyo icha be ichi pon bichocono cueicueije poxoru bichocono peyaputaexae. Ichi baxua exanaetsipan jiwi jopa yabara yaputaetsipae Jesucristo pia pecapanenebiyae diwesi xua poxona Cristo naetotha tsitupa jiwi.

Meje poxona Pablo yabara paeba xua Cristo xeina Nacom pia peyapusuwa tatsi xuan Nacom pia peyaputae coyenewano tatsi

¹⁸ Ichamona jopa beta yabara nanta xeinaeyo po diwesi xua Cristo petsitupaewa naetotha jiwi. Barapomona yawa muxuna weraweracaena abe peexanaewan. Barapomona jopa pejume cowuntsixae Jesucristo daxota nanta xeina xua barapo diwesi be tsita penamitacueinchi diwesi jumetsi. Ichitha ichamona beta yabara nanta xeina barapo diwesi. Barapomona Nacom capanenebiyaena abe pia peexanae cuiru coyenein tatsi weya. Barapomona yaputane xua barapo diwesi bichocono peyapusu diwesi xua Nacom weya. ¹⁹ Nacom Pejume Diwesitha baxua yabara paeba. Nacom jeye:

“Weraweraca exanaein peyaputae coyenewan, po peyaputae coyenewan xeina pomona peyaputaewi.

Pecuidubi coyenewan beban tsane,

po pecuidubi coyenewan xeina pomona peyaputaewi”, jei Nacom.

²⁰ Pon xua peyaputaein iru pon xua pecuidubin, iru pon jume daunweya yabara cueicueije po nacuathe, barapomona Nacom jopa tsita ainya cuichi. Nacom cui capona peyaputae coyenewan, po peyaputae coyenewan xeina pomona peyaputae jiwi barapo cae pin nacuathe. ²¹ Nacom xainyeya xeina peyaputae coyenewa. Nacom jopa copatsiyo jiwi xua peyaputaewatsi bapon, peyaputae coyenewatha po peyaputae coyenewa xeina pomona jinompa barapo cae pin nacuathe. Jame Nacom ichichipa xua capanepa jiwi abe pia peexanae cuiru coyenein weya pejume cowuntsixaetsi poxonae pacueicueijan Nacom Pejume Diwesi. Barapo diwesi ichamona tsita penamitacueinchi diwesichi.

²² Judiomona ichichipa tane nawita Nacom pia pexeinya petsita itatsi coyenewan xua pejume cowuntsinexa tsane Nacom Pejume Diwesi. Seicaya nama griegomona yabara jeita nawita barapo irathe pia peyaputae coyenewan xua pejume cowuntsinexa tsane Nacom Pejume Diwesi.

²³ Ichitha paxan payabara cueicueijan Mesías pon naetotha tsitupa xua jiwi abe pia peexanae cuiru coyenein tatsi. Barapo diwesi judiomona jopa be jume jejeyo poxoru tsita ajumbetsi. Seicaya nama pomona jopa judiomona naexanaeyo tsita penamitacueinchi diwesichi barapo diwesi. ²⁴ Ichitha pomona Nacom waba pomona bara metha bequein judiomona tsipae iruru pomona metha bequein jopa judiomona naexanaeyo tsipae barapomona jame Jesucristo jume cowuntatsi.

Barapomona nanta xeina xua Mesías xeina Nacom pia peyapusu coyenewa tatsi matautano xua Nacom pia peyaputae coyenewa tatsi xua jiwi pecapanenebiyaenexa tsainchi. ²⁵ Pocotsiwa jiwi tsita penamitacueinchi diwesichi xua Nacom exana baxua apara bara jame Nacom bichocono tsita peyaputae coyenewatsi, beyacaincha po peyaputae coyenewa jiwi xeina barapo cae pin nacuathe. Matautano pocotsiwa jiwi jopa tsita peyapusutsi xua Nacom xeina baxua apara bara jame Nacom tsita peyapusu coyenewatsi bichocono, beyacaincha po peyapusu coyenewa jiwi xeina barapo cae pin nacuathe. ²⁶ Tamona pam, paxam pomona iru painya nejume cowuntsiwixae

Jesucristo. Paxam bewa pana nacayabara nanta xeinaem xua eta po jiwi pam xua poxonae Nacom aena paca waba. Bapoxonae pananta xeiname xua saya paxam caeyobe pam pomonae peyaputae jiwi pam. Barichi paxam saya caeyobe pam pomonae peayapusuaya itorobi jiwi pam. Matautano paxam saya caeyobe pam pomonae peainya cui jiwi pam. ²⁷ Nacom itapeta pomonae xua ichamonae yabara jeichi: “Barapomonae apara pomonae jopa peyaputae jiwi”, jei. Ichitha barapomonae Nacom pia peitapetsiwixae barapomonae aura exana pomonaetha pomonae abe peyabara paebixaetsi, pomonae bichocono peyaputaewi. Barapomonae pomonae pia coutha peyaputaewi penaexanaewixae aura tsane, tsipei yaputaena xua pomonae Nacom pia peitapetsiwixae tatsi xaniwaicha barapomonae peyaputaewi. Matautano Nacom itapeta pomonae xua ichamonae yabara jeichi: “Apara barapomonae pomonae pejuntũ coyene faefaenaewi pejume cowuntsiwatha”, jei. Ichitha barapomonae pomonae Nacom pia peitapetsiwixae barapomonae aura exana pomonaetha pomonae abe peyabara paebixaetsi pomonae pia coutha penayabara nanta xeinaewa xua bichocono pexeinaewa peajuntũcoyenesuwa. ²⁸ Nacom itapeta pomonae barapo cae pin nacuathepiwi jiwana, pomonae pecui pawi jiwi xua piamonae peexanaenexa. Barapomonae pomonae ichamonae abe peyabara paebiwichi, matautano xuano pomonae ichamonae jopa petsita ainya cui jiwichi. Nacom itapeta pomonae jopa peainya cui jiwi xua penajume tsita itapeinya xeinaenexa xua Nacom jopa peitapetsiwa pomonae pia coutha penacayabara nanta xeinaewa xua peainya cui jiwi. ²⁹ Daxota dapon aibi pon peitacupaewatsi xua Nacom peitabaratha atsaquiya penayabara paebiwa xua peainya cui jitonxae. ³⁰ Nacom paca exana xua painya neyawa jinompaewa Cristo Jesús pia peajuntũyapusuwa tatsi. Matautano Nacom naca exana xua xeinatsi Cristo Jesús pia peyaputae coyenewa tatsi wayaputaenexa Nacom. Matautano Cristo naca cana exana xua wajuntũ coyene xanepanaewa xua jopa wanatsicuentisiwa xua abe waexanaexae Nacomtha. Matautano Cristo naca exana xua watanacuichinexa Nacom, bapon piamonaexae tatsichi. Nacom naca yantomata xua Jesucristo naca tsitupa naetha wanaca capanenebiyaenexa abe waexanae cuiru coyenein weya. ³¹ Daxota Nacom Pejume Diwesitha paeba jeye: “Jiwi jopa bewa pia coutha atsaquiya nayabara paebi xua peainya cui jiwixae. Bũ jame moya barapo jiwi bewa saya atsaquiya yabara paebina po coyene Nacom pia peainya cui coyenewa tatsi pon jiwi Pecanamataxeinaeinchi”, jei Nacom Pejume Diwesitha.

2

Meje xua Cristo petupaewa diwesi yabara

¹ Tamonaе pam, paxam pomonae irũ painya nejume cowuntsiwixae Jesucristo. Patopan painya xantha tapaca catsipaebinxatsi Nacom pia pexainyei diwesi jume. Bapoxonaе jopa paca tsipaebichi po diwesi ayapube xua tacueicueijeіwa xua poxonaе icha ichi xua paeba pon peyaputaеin bichocono. ² Poxonaе poponan painya xantha, saya meisa Jesucristo yabara nanta xeinan xua tapaca catsipaebinxatsi. Matautano yabara tapaca catsipaebinxatsi po coyene poxonaе bapon naetha tupa. ³ Poxonaе paxamtha naitutan nayabara nanta xeinan xua neita coxana xua beta tacueicueijeіwa. Matautano tajunuwi unthuthu deideijan. ⁴ Poxonaе paca tsipaebatsi Nacom Pejume Diwesi jopa paca tsipaebichi po jumein ayapube xua icha ichi poxonaе cueicueijeі pon bichocono peyaputaеin. Ichitha seicaya nama paca tsipaebatsi tana neitorobixae Nacom pia Pejumope tunaxu tatsi yawano Nacom pia peayapusu itorobi coyenewathano. ⁵ Daxota poxonaе pajume cowuntame Jesucristo apara poxoru jopa painya nejume cowuntsixae jiwi pia peyaputae coyenewa. Apara jame poxoru Nacom painya nepaca yawenaexae pia peayapusu itorobi coyenewatha daxota pajume cowuntame.

Meje yabara xua Nacom naca yaputane exana pia Pejumope tunaxutha tatsi

⁶ Paxan pacueicueijan pomonaetha pomonaе bichocono pejume cowuntsiwi Nacomtha xua Nacom pia peyaputae coyenewa tatsi. Nacom pia peyaputae coyenewa tatsi jopa apara barapo cae pin nacuathe weya ponaeyo. Matautano jopa apara barapo coyene

xua po coyene jopa ponaeyo pomonae piamonae itorobiya pecanamataxeinaewi weya. Pomonae anoxuae piamonae itorobiya pecanamataxeinaewi werapaena, yawano weraweracaena pia peyaputae coyenewan tatsi. ⁷ Po coyene xua paca tsipaebatsi apara Nacom pia peyaputae coyenewa tatsi. Barapo coyene caena bayatha Nacom namicha yawan xeina xua jiwi jopa yabara yaputaeyo beya anoxuae Nacom najume tsita itapeinya xeina. Caena bayatha pewnaeya poxonae Nacom nacua forotsina bapon nanta xeina xua naca capanepaena. Baxua apara Nacom pia peyaputae coyenewa tatsi xua matapainya naitata. ⁸ Barapomonae pomonae piamonae itorobiya pecanamataxeinaewi jopa yabara yaputaeyo Nacom pia peyaputae coyenewa tatsi. Icha metha barapomonae yaputaetsipa metha jopa Jesucristo naetotha tupa exanaetsipaetsi, pon jiwi Pecanamataxeinaein, pon pexeinya peitupanae coicha pexeinaein. ⁹ Nacom Pejume Diwesitha baxua yabara jeye: “Nacom bayatha jiwi tsiwnaeta po jiwi peantobewixaetsi pocotsiwan xua bichocono pewnaewan xua exana barapo jiwi nexa. Barapocotsiwan jiwi jopa yabara yaputaeyo, matautano jopa yabara jume taeyo. Matautano Nacom tsiwnaeta pocotsiwa xua jiwi jopa bapana yabara nanta xeinae jopa juniya pewnaexae”, jei Nacom Pejume Diwesitha.

¹⁰ Nacom yabara naca yaputane exana baxuan pia Pejumope tñaxutha tatsi. Nacom pia Pejumope tñaxu tatsi daxita yaputaeya necota pocotsiwa naca yaputane exana, beya yawa muxunano naca yaputane exana pocotsiwa Nacom namicha yawan xeina.

¹¹ Jiton dapon aibi pon itacupatsi xua yaputane ichun pia pejuntu coyene tatsi. Saya jame meisa ichun itacupatsi xua pia coutha najuntu coyene yaputane. Bara juta ichi meisa Nacom pia Pejumope tñaxu tatsi yaputane xua Nacom pia pejuntu coyenewa tatsi. ¹² Nacom jopa naca copatsiyo xua bara wacoutha wayaputaewa tsane xua be pocotsi coyene Nacom pia penanta xeinaewa tsane. Aparajame seicaya naca cata pia Pejumope tñaxu tatsi, wanaca yaputane exanaenexa xua pocotsiwan yabara Nacom wanaca catsiwa wanaca antobexae. ¹³ Waxainchi diwesi cueicueijeichi pomonaetha pomonae Nacom pejume cowantsiwi po coyenetha Nacom pia Pejumope tñaxu tatsi naca yaputane exana. Jopa apara barapo diwesin cueicueijeichi xua saya barapo cae pin nacuathepiwi pia coyenetha tatsi xua saya ba wacoutha wananta xeinaewa. Daxota yabara paebatsi pocotsiwan xua Nacom pia Pejumope tñaxu tatsi ichichipa paeba pomonaetha pomonae Jesús pejume cowantsiwichixaetsi. Barapomonae yaputane barapocotsiwan.

¹⁴ Nama pon jopa pejume cowantsin Jesús jopa yaputaeyo pocotsiwan wacueicueijeija, pocotsiwan Nacom pia Pejumope tñaxu tatsi naca yaputane exana. Tsipei bapon tsita penamitacueinchi jumetsi. Bapon jopa yaputaeyo barapo diwesin tsipei jopa xeinaeyo Nacom pia Pejumope tñaxu tatsi xua peyawenaenexatsi xua peyaputaewanexa. ¹⁵ Jame pon pejume cowantsin Nacom, bapon yawenatsi Nacom pia Pejumope tñaxu tatsi xua yabara peyaputaewa daxitan. Ichamonae jopa itacupaetsi xua bapon peyabara paebiwatsi xua penatsicuentiwa xua abe peexanaexae. ¹⁶ Nacom Pejume Diwesitha barapo coyene yabara jeye: “¿Jintam yaputane Nacom pia penanta xeinaewa tatsi xua pecuidubinexa tsane Nacomtha pon jiwi Pecanamataxeinaein? Jume apara, apara dapon aibi”, jei Nacom Pejume Diwesitha. Waxainchi nanta xeinatsi icha be pocotsi coyeneya Cristo ichi xua penanta xeinaewa.

3

Meje xua Pablo yabara paeba pomonae penabar nacuichiwi Nacom nexa

¹ Tamonae pam, paxam pomonae iru painya nejume cowantsiwixae Jesucristo. Jopa neitacupaeyo xua tapaca catsipaebiwa tsainchi icha bichocono pajume cowantame Nacomtha icha be pocotsi jiwimonae ichi pomonae bichocono jume cowanta Nacom.

Ichitha daxota paca tsipaebatsi tsipei paxam be barapocotsi jiwimonaе pam pomonaе jopa bichocono Nacom yabara yaputaetsi. Paxam paca tsipaebatsi be pexui pam xua aena pajume cowantame Cristo. ² Pocotsi coyene xua ayapube jopa paca cuidubichi, icha be coxiwa ichi xua poxonaе apata mito pexuyo poxonaе cataunxuae jopa yaputaeyo xua xane pexaewa. Cataunxuae jopa neitacupaeyo xua tapaca cuidubinexatsi po diwesi bichocono daunwei poxoru awiya jopa payaputaem. Paxam be barapocotsi pexui pam xua po pexui cataunxuae jopa itacupaetsi xua pewito pexaewa. ³ Paxam cataunxuae painompame icha be ichi poxonaе jinompa pomonaе jopa pejume cowantsiwi Nacom. Poxonaе paxam nantiya pana nauwa dubenanaebiyame, yawa nantiya pana naba dubenanaebiyame, painompame icha be ichi xua jinompa xuano abe exana dubenanaebiya pomonaе jopa pejume cowantsiwi Nacom. ⁴ Ichamonaе pomonaе paxam jiwana pam, jeye: “Pablo yabara jume cowantan pocotsiwa cuiduba”, jei. Ichun jeye: “Apolos yabara jume cowantan pocotsiwa cuiduba”, jei. Poxonaе papaebame baxua bapoxonaе bara pajinompame icha jiwi ichi poxonaе jinompa pomonaе jopa pejume cowantsiwi Nacom.

⁵ Daxota paca tsipaebatsi: Xan Pablo jopa taainya cui jiton, barichiru Apolos. Apra paxanbe saya ponbe amanaya pata tanacuichinbe Nacom. Nacom Apolos pana neitorobabe xua pata cueicueijeinexabe Nacom Pejume Diwesi. Apolos baxua pata exanaexaеbe daxota pajume cowantame Jesucristo pon jiwi Pecanamataxeinaein. ⁶ Xan Pablon paca cuidubatsi Nacom Pejume Diwesi. Apolos xuya equeicha ichawa paca cuiduba Nacom yabara. Ichitha nama Nacom apra bapon, pon paca yawena xua painya nejume cocowantaponaenexa. Barapo coyene icha be nae ichi xua peubi nae. Ichun ubanota. Ichun mera mata epababapona. Ichitha nama Nacom, apra bapon, pon exana xua xaniwaicha xuwa. ⁷ Ichun copiya uba iru ichun xuya mata epababa meratha. Pon peubixae jopa ainya cui jitonyo. Iru pon xuya pemata epababaponaexae meratha, bapon jopa ainya cui jitonyo. Jame saya meisa Nacom ainya cui, tsipei Nacom daxita xuwa exana naewan. Daxota Nacom bichocono ainya cui beyacaincha xua barapo pebinbe. Barichi Apolos iru xan Pablon jopa ainya cui jitonyo panbe. Jame Nacom bichocono ainya cui beyacaincha paxanbe. ⁸ Pomonaе xua uba iru pomonaе xuya meratha mata epababapona barapomonaе Nacom tsita najupatsi. Nacom pentoma cata barapomonaetha be pocotsi coyeneya xua barapomonaе petanacuichiwa. Pon xua abeya petanacuichixae, be conotha matoma catsinchi. Pon xua wunaeya petanacuichixae, wunaeya matoma catsinchi. ⁹ Paxan pana naba ru yawa tanacuitan Nacom xua pata cueicueijeiwa Nacom Pejume Diwesi poxonaе paca cuidubatsi xua painya nejume cowantsiwa tsane Nacom. Barapocotsi juta coyeneya paexanan poxonaе Nacom Pejume Diwesi paca cuidubatsi icha pebin ichi poxonaе uba pabitha xua petanafortsinexatsi pexaewa. Nacom paca exana xua beta painya nejume cocowantaponaewa bapon xua beya bichocono painya nejuntu coyene xanepanaewa tsane. Baxua Nacom paca cana exana, icha be pocotsi juta coyeneya ichi poxonaе pebin bomuxu acabapona xua beya poxonaе bichocono pexeinya bo. ¹⁰ Nacom necopata xua ponxaein copiya matha tapaca cayawenaewatsi xua painya nejume cowantsinexa bapon. Nama bapoxonaе xuya ichamonaе paca cuidubapona Nacom Pejume Diwesi xua painya nejume cocowantaponaenexa. Barapocotsi juta coyeneya exanan poxonaе tapaca cayawenaewatsi, icha pebin ichi pon peyaputaеin xua bo peacabiwa poxonaе bo acaba po bo ibo bo. Bapon copiya matha tsicobe nobabareca po iboton beta petabu caumenaewa xua ichamonaе tsicobe nobabarecatsi. Athawetsica xuya ichamonaе exanapona. Daxita pomonaе acaba barapo ibo bo bewa beta xanepanaya exanaena icha jiwi ichi xua poxonaе bewa beta taexanaena xua pocotsiwa taexana Nacom nexa. ¹¹ Poxonaе jiton ibo bo acaba bapon copiya beta noba po iboton xua copiya nanta caumena. Bapoxonaе ichun bewa icha iboton beta cuaranobi barapo iboton pecoyoreca xua bo pexeinya bo petsuncuaenexa. Barapocotsi juta coyeneya ichi, poxonaе paca cuidubatsi Jesucristo pejume diwesi. Ichun bewa beta yabara paca cuidubina icha coyene xua baxua painya nejume cowantsinexa. ¹² Po pebin ibo bo acaba barapo pebin itacupatsi xua jebabapona ichawa barapo ibotontha,

po ibotontha copiya nanta caumena. Pocotsiwan bapon itacupatsi xua jebabapona bichocono ayapusu be pocotsiwa pewun oro nain, yawano pocotsiwa xua pewun plata nain yawa pocotsiwa be iboton po iboton xua bichocono ainya matoma. Ichacuitha barapo pebin itacupatsi xua barapo ibotontha jebabapona pocotsiwan xua pepawi be naepawa, yawa be naepanaewan yawa be musuriboton. Bara juta ichi, pebin itacupatsi xua yawenaena ichamonaetha. Ichacuitha beta cuidubina pomonae xua jume cowanta Jesucristotha pocotsiwa xua bichocono ayapusu. Ichacuitha cuidubina pocotsiwa xua pepawi pomonae xua jume cowanta Jesucristotha xua jopa ayapusayo. ¹³ Jopaena matabi po mataqueitha Nacom yabara paebina jiwi xua penatsicuentisiwa xua abe peexanaexae. Barapo mataqueitha Nacom taena po coyene xua jiwi taexana Nacom. Nacom bichocono tsita xanepanatsi pocotsiwa xua bichocono ayapusu po coyenein jiwi taexana bapon nexa. Ichitha nama Nacom naitemata po coyene jopa tsita xanepanaetsi xua pocotsiwa bequein jiwi taexana bapon nexa. ¹⁴ Icha pebin exana pocotsiwa xua bichocono ayapusu xua Nacom nexa, Nacom matoma catsina bapontha. ¹⁵ Ichitha icha ichun taexana Nacom pocotsiwa Nacom jopa tsita xanepanaetsi, daxita barapo coyenein Nacom naitemata po coyene bequein bapon Nacom taexanatsi. Ichitha bapon capanepatsi poxona Nacom naitemata po coyene bapon exana, icha pebin ichichi xua capanepatsi isoto weya bequein daxita tataxotsi xua pocotsiwa xeina.

¹⁶ Barapara paxam payaputaneme xua painya juntu coyene Nacom tsitatsi xua bara be Nacom pin pia bo tatsi tsipei Nacom pia Pejumope tunaxu tatsi popona painya juntu coyenetha. ¹⁷ Icha ichun saraboba Nacom pin pia bo, Nacom xuya weraweraca exanaena barapo jitontha. Nacom pin pia bo tatsi, bara po bo Nacom tsita xanepanatsi poxoru pia Pejumope tunaxu tatsi pepoponaexae barapo botha. Icha Nacom ichi xua weraweraca cana exana pontha pon petasarabobixaetsi pin pia bo tatsi, barichi xuya Nacom weraweraca cana exanaena pontha pon paca juntu coyene itoroba xua abe painya neexanaewa tsane. Nacom baxua exana tsipei Nacom pia Pejumope tunaxu tatsi popona painya juntu coyenetha.

¹⁸ Jopa pacopatsinde xua painya coutha pana namuxitorobame. Icha ichun pia coutha nacayabara nanta xeina xua bichocono peyaputaen icha barapo cae pin nacuathepiwi ichi, bewa bapon pia coutha equeicha caewa naexanae be pocotsin jopa peyaputaen. Bapoxona bapon bara Nacom tsita be pon pepa peyaputaenchi. ¹⁹ Nacom tsita penamitacueinchi jumetsi po peyaputae coyenewan yaputane jiwi pomonae barapo cae pin nacuathe jinompa. Nacom Pejume Diwesitha barapo jiwi yabara jeichi: “Nacom tsitatsi xua apara xeina penatsicuentisiwa xua abe peexanaexae pocotsi jiton peyaputaen, peexanaexae barompaya pia peyaputae coyenewatha”, jei Nacom Pejume Diwesitha. ²⁰ Matautano Nacom Pejume Diwesitha baxua yabara jeino: “Nacom yaputane po coyenein nanta xeina pomonae peyaputaewi. Barapocotsi coyenein Nacom tsita penamitacueinchi jumetsi”, jei Nacom Pejume Diwesitha. ²¹ Pomonae pejume cowantsiwi Jesucristo jopa bewa atsaquiya pana neyabara paebi tsane xua pejeiwa: “Pon jume cowantan pocotsiwa cuiduba bapon bichocono peyaputaen beyacaincha ichun pon peyaputaen”, xua pata taneyabara jeiwa pomonae pejume cowantsiwi. Tsipei paxan pomonae pecuidubiwi pan saya pebiwi pan xua jopa bichocono peyaputaewi pan. Dapocotsiwa aibi xua pocotsiwa payaweraweracame xua jopa paxeinaem. Daxita pomonae painya nepaca cuidubiwi, irano daxita coyenein pocotsiwa Nacom forota, bara Nacom exana paxam nexa painya nepaca cayawenaewa tsane. ²² Xan Pablon Nacom neitoroba, iru Apolos itorobatsi, iru Pedro itorobatsi xua pata paca cayawenaenexatsi. Nacom paca cata daxita xua barapo ira piawan, xua painya nepaca yawenaenexa. Matautano yabara paca yaputane exana xua peajuntuayapusuwa, po coyenewano petupae coyenewa, matautano po coyene anoxuae piawa yabara, po coyenewano bexa piawa yabara xua painya nepaca yawenaenexa. ²³ Baraxuan daxita paxeiname Cristo piamonae jiwi tatsi pamxaem. Barichi Cristo barapara Nacom Pexanto tatsi.

4

Meje xua Jesucristo pia peitorobi jiwi tatsi taexana, Nacom taexanatsi

¹ Paxam bewa pana neyabara nanta xeinaename xua paxan meisa saya barapomona pan xua pomona Cristo amanaya pata tanacuichi jiwi pan. Paxan yabara pacuiduban Nacom moya pia peyawun xeinaewa tatsi po coyene copiya bequein bayatha moya yawun xeina xua jiwi jopa yabara yaputaeyo. Barapo coyene xua moya peyawun xeinaewa, anoxuae Nacom najume yabara copata xua jiwi bara peyaputaenexa. ² Pon tanacuita pia pecanamataxeinaeinchi, barapon bewa bara xaniwaicha exanaena pocotsiwa pia pecanamataxeinaeinchi tsipaeba xua bepa exanaena pinae xua daxota pejume cowuntsinexatsi pia pecanamataxeinaeinchi xua bara xaniwaicha exana. ³ Jopa netsita ainya cuiyo xua paxam tapaneyabara paebiwam xua tacuidubiwa yabara xua icha metha bara exanan pocotsiwa Nacom neitoroba. Matautano jopa netsita ainya cuiyo xua jiwi taneyabara paebiwa xua barapo coyene xua icha metha bara exanan. Barichi tacoutha jopa nayabara nanta xeinaeinyo xua icha metha barapo coyene jopa exanaeinyo, xua daxota tanatsicuentisixae abe taexanaexae Nacomtha. ⁴ Tajuntũ coyene netsipaeba xua bara pinae xanepanaya taexanaewa. Bequein tajuntũ coyene baxua netsipaeba ichitha jopa nayaputaeinyo xua metha apara abe taexanaewa xua daxota Nacom tsita natsicuantan. Nacom pon jiwi Pecanamataxeinaein bapon apara pon taneyabara paebin xua tanatsicuentisiwa xua abe taexanaexae. Bapon meisa nejuntũ coyene yaputane icha bara metha tsita xeinan xua tanatsicuentisiwa xua abe taexanaexae. ⁵ Jopa bepijawa payabara paebinde ichamonae xua abe pia peexanaewa. Abũ tsane beya poxona patopaetsica pon jiwi Pecanamataxeinaein bapoxona payabara paebiname abe pia peexanaewa. Barapon Nacom tsita itutsina po coyene xua jiwi pia pejuntũ coyenewatha namicha xeina po coyene xua ichamonae jopa taeyo. Bapon Nacom pon jiwi Pecanamataxeinaein itutsina po coyenein jiwi namicha xeina pejuntũ coyeneintha xua penatsicuentisiwan po coyenein xua Nacom petsita exanaewatsi. Daxita barompaya jiwitha Nacom yabara paebina po coyene pia petaexanaewichi. Pontha pon xanepanaya petanacuitsinchi Nacom wunae jainchina bapontha. Nacom jopa wunae jainti tsane pon jopa xanepanaya petanacuitinchi.

⁶ Tamona pam, paxam pomona irũ painya nejume cowuntsiwixae Jesucristo. Yabara paca tsipaebatsi barapo coyenein po coyenein paexanan, xanepanaya painya nejinompaenexa. Barichi paca tsipaebatsi Apolos yabara irũ xua xan yabara painya nenacuidubinexam pocotsiwa paexanan. Bapoxona painya neexanaewa tsane icha paichin poxona xua paexanan. Pajinompa dubenanaebiyama icha be pocotsi coyeneya Nacom Pejume Diwesitha paeba. Jopa painya neexana dubenanaebiyaenexa pocotsiwa jopa paebiyo Nacom Pejume Diwesitha. Painya xoba atsaquiya pacayabara nanta xeiname ponbe Nacom petanacuichinchibe, xua ichun bichocono peainya cui jiton beyacaincha ichun. ⁷ Nacom jopa paca exanaeyo xua peainya cui jiwi pam beyacaincha xua ichamonae pomona irũ pejume cowuntsiwi Nacom. Pocotsiwa paxeiname jopa apara pana nacatsim painya coutha barapocotsiwa. Apra jame daxita baxuan paxeiname pocotsiwa Nacom paca catsiba. Daxota jopa bewa atsaquiya pana nayabara paebim painya coutha. Poxona baxua papaebame apra pajuntemainame pocotsiwa xua Nacom painya nepaca catsibiwa daxita.

⁸ Itara mexeya daxita painya nexeinea jiwi pam po coyenein xua paichichipame painya neyaputaewa Nacom yabara daichitha jopa barapomona pam. Pananta xeiname icha pomona copei pexeinaewi ichi irũ icha ichi pomona jiwi itorobiya pia pepa peewatsiwichi xua xeina daxita xua ichichipa yawa daxita xua xuan pocotsiwa pecanantawenonaewa. Paxan jopa nama bara paichinyo. Maisa anoxuae bequein pana ita cui jicha xua yatsicaewa paxam pomona painya neyaputae jiwi pam daxita xua Nacom Pejume Diwesi yabara xua bapoxona pata tana nebarũ yaputaewam tsane daxita Nacom Pejume Diwesi. ⁹ Paxan Jesucristo pia peitorobi jiwi tatsi pan. Xan nanta xeinan xua Nacom bara be copata pata tana cana exanaewa xua jiwi pata tana necui caponaewa xua poxoru

imoxoyo pata werapaewa tsane. Paxan be pocotsi jiwimonae pecui paw ijiwimonae pan xua daxota daxita nacuanpiwi iru matatsunpiwi pana ichichi xeica. ¹⁰ Jiwi pana neyabara nanta xeina xua paxan pata nemuxuxenae jiwi pan, yaitama paxan Cristo payabara cueicueijan. Jaina maisa paxam jiwi paca yabara nanta xeina xua paxam beta yabara painya neyaputae jiwi pam Cristo. Paxan nama jopa pana daichibenaeyno. Paxan jiwi pana yabara nanta xeina xua pajuntu coyene faefaenabenan. Jaina nama pana nayabara nanta xeiname xua pajuntu coyene daunwam Nacomtha. Jaina maisa jiwi paca baru cui itura jina, jopa pana daichibenaeyno. Nama atsaquiya abeya pana yabara paeba. ¹¹ Caena bayatha beya anoxuae, paxan bichocono pajainpan. Matautano pameratsipanno bichocono. Matautano painta paparuwan bichocono jonopa. Jiwi pana neba bichocono. Yawano jopa bo paxeinaeyno. ¹² Pana nacobe finatontan, patain pata nacuichixae bichocono. Bequein jiwi tsunu jumetha pana casebeiba daichitha barapomona Nacomtha patawnequeiban xua barapomona peyawenaenexa tsai tsainchi. Poxona jiwi pana atene exaneiba bara saya pacui copatan. ¹³ Bara bequein jiwi abeya pana neyabara paebeiba ichamonaetha, daichitha baxua jopa pajume naitawatsinyo. Saya jame xanepanaya patsipaeban barapomonaetha. Jiwi pana neyabara nanta xeina xua pinae peabe jiwi pan. Barapo jiwi pana itaweta icha be poxona jiton ichi poxona piawa basuratha xuba. Baxua jiwi painta exanapona beya anoxuae.

¹⁴ Jopa baxua pacata tinaetsi xua paca aura exanatsi. Jame pacata tinatsi xua pata cayawenaenexatsi xua painya neexanaenexa pocotsiwa bewa paexanaename. Paxam be tapexui pam, tsipei bichocono paca antobetsi. ¹⁵ Bequein icha bara metha paxeinaetsipame diez mil poyobe pomona painya cacuidubi jiwi po coyene xua Cristo yabara, ichitha saya pacata compa pon be painya axa natsicotane. Saya meisa xan compan copiyon pon be painya axa tapacata natsicotaeinchi, tsipei paxam copiya Cristo Jesús pajume cowuntame poxona paca cuidubatsi Nacom Pejume Diwesi. ¹⁶ Daxota bichocono paca muxu jeichi, paexanaponde icha xan ichin xua exanaponan.

¹⁷ Daxota pacata itorobatsi Timoteo pon bichocono antobein. Bapon bara be taxanto, tsipei yawenan xua pejume cowuntsiwa Jesucristo pon jiwi Pecanamataxeinaein. Bapon exaneiba pocotsiwa itorobeiban. Bapon Timoteo paca tsipaebina xua tana neyabara paebiwa tsane po coyene xua xanepanaya tapoponaewa tajume cowuntsixae Cristo Jesús. Barapo coyenein cuidubeiban ichaxota poneiban daxita i dapocotsi penacaetutsi bon jiwitha pomona Nacom pejume cowuntsiwichi. ¹⁸ Ichamona pomona paxam jiwana pam, bichocono juntu coyene yucatsi xua ichamona peabiwatsi. Baxua exana tsipei barapomona nanta xeina xua xan jopa tapaca siwa ponaewa tsainchi. ¹⁹ Icha Nacom pon jiwi Pecanamataxeinaein copatsina xua bara taponawa tsane aunxuae paca siwa ponaeinchi. Bapoxona taein pomona xua ichamona peabiwichi icha metha barapomona xeina Nacom pia peayapusu itorobi coyenewa tatsi. Ichacuitha metha tsipae apara metha saya paeba. ²⁰ Jiwi jopa patsi tsane Nacom pia peitorobi nacua beicha xua poxoru wanae pepaebixae tsane pia coutha. Apra jame jiwi patsina bara beicha pexeinaexae Nacom pia peayapusu itorobi coyenewa tatsi. ²¹ ¿Eta xua painyatsi? ¿Paca tsicapatinchi naewan xua xota paca beinchi? Jume apra. Ichacuitha metha tsipae ¿paichichipame xua tapaca casiwa ponaewatsi tapaca caantobexaetsi? ¿Matautano beta pacata exanaeinchi xua jopa taanaepanaexae? Aa jame baxua.

5

Meje xua poxona Pablo itaweta pon penowa tsiperu nacoyoba

¹ Ichun netsipaeba xua pinae caein pon paxam jiwana pam pinae bichocono abe exana. Pinae bapon penowa tsiperu nacoyoba pawa paxa tatsi bayatha baru popona. Barapo peexanae coyenewa bichocono abe. Pomona bequein jopa peyabara yaputaewa Nacom barapo coyene jopa copatsiyo xua jiwi peexanaewa tsane baxua. ² Paxam pomona painya nenanta xeinae jiwi pam xua peainya cui jiwi pam xua daxota jopa panantawenonaem xua painya neitawetsiwa bapon. Jame bewa baxua payabara

jũntũ coyene wecoyam. Pon painya xantha pita penowa powa paxa tatsi xeina bewa patorotsim painya xainya weya. ³ Bequein jopa yatsicaewa paca barũ ecaetsi ichitha paca yabara nanta xeineibatsi be poxonae paca barũ ecatsi yatsicaewa. Bara bapon yabara paeban xua penatsicuentisiwa xua abe peexanaexae tsipei yabara paeban Jesucristo pia peayapusũ itorobi coyenewatha tatsi, pon Wanacanamataxeinaein. Baxua exanan icha be poxonae yatsicaewa tapaca barũ ecaewatsi. ⁴ Poxonae panacaetutame daxita pam, pomonae painya nejume cowũntsi jiwi Jesús, paca yabara nanta xeineibinchi icha be poxonae tapaca barũ ecaewatsi yatsicaewa. Matautano Jesús pon jiwi Pecanamataxeinaein pia peitorobiwa tatsi xua peayapusũwa tatsi paxeina dubenanaebiyama. ⁵ Pon xua awiya abe exanapona barapo jiton bara pacopare Satanastha pon caurimonae pia pentacaponaeintha tatsi. Bapoxonae barapo caurimonae pia pentacaponaein tatsi atene cana exanaena bapontha xua saya pia pepontha tatsi poxoru barapo jiton ichichipa xua abe peexanaewa. Bapoxonae barapo pebin equeicha jume cowũntsina Nacom po pebin copiya abe peexanaexae. Pia pejumope tũnaxũ tatsi Nacom capanepaena po mataqueitha poxonae Jesús patopeicaena, pon jiwi Pecanamataxeinaein.

⁶ Paxam jopa bewa atsaquiya pajinompæm xua poxoru pocotsiwa painya neexana dubenanaebiyaexae. Icha caein payabara cui copatame xua bara abe exanapona painya xantha pon abe peexanaein bequein xua saya conotha exana, bapoxonae pinmonae painyamonae abe exanapona. Bara paxam payaputaneme pocotsi diwesiyo ba jiwi yabara canaũta jũtsiya paeba baxua yabara xua pejeiwa: “Levadura matawũn xoyo bequein peyauyo baxoyo daxita pantha cotowa exana”, xua pejeiwa. ⁷ Painya xainya weya patorore pon abe peexanaein abe peexanaeyainwa daxita painyamonae xua icha bapon ichi xua abe exana. Barapo coyene icha be ichi poxonae jiwi levadura bebai, po levadura peru levadura abe peexanaeyainwa pan matabũtha. Poxonae bapo pebin patorotame bapoxonae painyamonae pomonae pejume cowũntsiwi xanepanaya jinompaena. Caena bayatha judiomonae juteba oveja xua poxonae pewũnaeya tsane poxonae Egipto nacua weya pona. Bapoxonae Nacom yabara jũntemaina judiomonae abe pia peexanae cuiru coyenein tatsi poxonae cordero bexotsi xua oveja pebto penũn. Nacom tsitatsi xua Cristo bara be cordero poxonae tũpa naetotha. Cristo naca tsitũpa xua abe waexanae cuiru coyenein icha cordero ichi xua tsitũpa xua judiomonae abe pia peexanae cuiru coyenein tatsi. ⁸ Waxainchi jopa bewa peabe coyenewa exanaetsi. Jame bewa xaniwaicha jũntũ coyene xanepanaya jinompa dubenanaebiyaetsi Jesucristo pia pejume cowũntsiwichixaetsi.

⁹ Icha cartatha paca tsipaebatsi xua jopa bewa painyamonae jiwi pacana exanaem pomonae pesi cui weiweinae jiwi xua bequein jopa piseuri jiwi. ¹⁰ Barapomonae pomonae pesi cui weiweinae jiwi pomonae jopa pejume cowũntsiwi Jesús apara jopa paca tsipaebichi barapomonae yabara. Pomonae jimũn jiwi xua ichichipa copei xeinaewi naexana xua beyacaincha ichamonae pomonae jopa pejume cowũntsiwi Jesús apara jopa paca tsipaebichi barapomonae yabara. Pomonae jopa pejume cowũntsiwi Jesucristo pomonae pecaibi jiwi apara jopa paca tsipaebichi barapomonae yabara. Pomonae ibo nacomũn wũnae pejainchiwi apara jopa paca tsipaebichi barapomonae yabara. Barapomonae pexainya weya painya newarapaenexa maisa jame bewa pawarapaem barapo cae pin nacua weya, xua ichaxota po nacua jiwaibi beya xua bara beya painya newarapaenexa. ¹¹ Pocotsiwa aunxuae paca tsipaebatsi baraxua icha cartatha bayatha pacata tinatsi. Jan: “Jopa bewa payawa muxuna jinompaem pomonae abe peexanae jiwi bequein paeba xua pinae jume cowũnta Jesucristo. Barapomonae jopa bewa payawa muxuna jinompaem pomonae pesi cui weiweinae jiwi, irũno pomonae jimũn jiwi xua ichichipa copei xeinaewi naexana beyacaincha xua ichamonae irũno pomonae ibo nacomũn wũnae pejainchiwi, irũno pomonae nacũpa penaexanaewi, irũno pomonae jiwi pebiataewi, irũno pomonae pecaibi jiwi daxita barapomonae jopa bewa pabarũ xaem bequein paca wabitha tsipaeno xua painya nenanabanaewa tsane”, jan. ¹² Xan jopa neitacũpaeyo xua jiwi tayabara paebiwa xua penatsicuentisiwa Nacomtha xua abe

peexanaexae pomonae jopa jume cowũntsiyo. ¹³ Jame अपरा मेसा Nacom yabara paeba xua penatsicuentisiwa xua abe peexanaexae pomonae jopa Nacom pejume cowũntsiwichi. Ichitha bewa payabara paebim xua penatsicuentisiwa pomonae penacætutsi jiwi pomonae pejume cowũntsiwixae xua abe peexaneibixae poxonae. Daxota bewa paxam patorotsim pon abe exana painya xantha pon penowa tsiperu wenacoyoba xua awiya baru jijinapona.

6

Meje yabara pomonae pejume cowũntsiwi Jesucristo xua peponaewa pontha pon jiwi yabara paeba xua penatsicuentisiwa xua abe peexanaexae

¹ Poxonae ichamonae pomonae pejume cowũntsiwi jiwana pacata abe exana painya xoba paponame ichaxota eca pon jiwi yabara paeba xua penatsicuentisiwa xua abe peexanaexae. Jamaisa baxua paexaname xua pawncame pon jopa pejume cowũntsin pon jiwi yabara paeba xua penatsicuentisiwa xua bapon peitawetsinexa pomonae abe peexanaewi. Bapoxonae painya pia bapon paca tsipaebichi xua barapomonae paca tsita natsicuenta xua abe peexanaexae. Jame bewa paponaname ichaxota nacaetuta pomonae pejume cowũntsiwi Jesucristo. Bapoxonae barapomonae yabara paebina pomonae xua penatsicuentisiwi xua abe peexanaexae paxamtha. ² Paxam payaputaneme xua pomonae pejume cowũntsiwi Jesucristo, barapomonae yabara paebina pomonae xua penatsicuentisiwi xua abe peexanaexae pomonaetha pomonae barapo nacuathepiwi. Barichi bexa tsane poxonae Cristo patopeicaena payabara paebiname pomonae barapo nacuathepiwi xua penatsicuentisiwa xua abe peexanaexae. Daxota anoxuae bewa paexanaem xua payabara paebiname xua penatsicuentisiwa xua bequein bara conotha abe peexanaexae pomonaetha pomonae pejume cowũntsiwi Jesucristo po coyenein bara bequein bichocono jopa abeyo. ³ Waxainchi yaputainchi xua bexa tsane wayabara paebiwa matatsunpiwi penatsicuentisiwa xua abe peexanaexae Nacomtha. Baxua exanaeinchi poxonae Cristo patopeicaena. Daxota anoxuae paca itacupa xua painya neyabara paebiwa xua penatsicuentisiwa xua abe painya nepaca tsita exanaexae pomonaetha pomonae pejume cowũntsiwi xua wajinompawea yabara barapo cae pin nacuathe. ⁴ Icha paxename po coyenein xua abe pacata exana pomonae iruru pejume cowũntsiwi, jopa bewa paponame ichaxota pon jiwi peyabara paebin jiwi xua penatsicuentisiwa xua abe peexanaexae pon jopa pejume cowũntsin. ⁵ Baxua paca tsipaebatsi xua painya neauramnexa tsane. Pon ba peyaputaein bapon ba itacupatsi xua jiwi peyabara paebiwa pomonaetha pomonae xua penatsicuentisiwa xua abe peexanaexae, xua ichamonaetha abe peexanaexae pomonaetha pomonae iru pejume cowũntsiwixae Jesucristo. Ichitha poxonae paponame ichuntha pontha pon jiwi peyabara paebin xua penatsicuentisiwa xua abe peexanaexae, pon jopa pejume cowũntsin, अपरा jopa xapain paexanaem. ¿Metha bara painyamonae jiwana pin dapocotsin yatsicaewa aibi jampa pon jiwi peyabara paebin xua penatsicuentisiwa xua abe peexanaexae jampa? ⁶ Ponbe paxam jiwana pam, ponbe pejume cowũntsinbe Jesucristo, baponbe nababe. Ichun xua baponbe jiwana pona ichaxota pon jiwi peyabara paebin pon jopa pejume cowũntsin, xua peyabara paebinexatsi pon abe peexanaexae ichuntha.

⁷ Poxonae paxeineibame po coyenein xua pana nabeibame xua daxota paponeibame pontha pon jiwi peyabara paebin baxua abe paexaname. Poxonae ichamonae abe pacata exana saya bara pacui yabara copabare. Jame baxua pacata xanepana. Bapoxonae jopa painya nenantawenonaewa xua painya neponaewa pontha pon jiwi peyabara paebin xua penatsicuentisiwa xua abe peexanaexae. Barichino poxonae ichamonae paca caiba saya bara pacopare xua jopa abe painya neexanaenexa tsane bapomonaetha. ⁸ Payopitame xua pinae painyamonae pacata abe exana, yawa xua pinae paca caiba. Ichitha अपरा paxam bara paichim abe paexaname, xua poxonae paponame pomonaetha pomonae jopa pejume cowũntsiwi xua peyabara paebinexatsi pomonae abe pacata exana.

⁹⁻¹⁰ Paxam payaputaneme xua pomonae abe peexanaewi jopa patsi tsane Nacom pia peitorobi nacua beicha. Painya xoba pana nayabara cui copatame xua painya coutha painya nenamuxutorobiwa barapo coyene yabara xua daxota pananta xeiname xua barapomonae apara patsina Nacom pia nacua beicha. Pomonae jopa patsi tsane Nacom pia peitorobi nacua beya xua peexanaexae po coyenein xuaje: Pomonae pesi cui weiweinae jiwi, pomonae wūnae pejainchiwi ibo nacomūn, irū pomonae penotsiwi yabūxi powaxi bara bequein pia pebiwi xeina, irū po pebiwi cae pebiwi penaissa maichiwi, irū pomonae pecaibi jiwi, irū pomonae jimūn jiwi xua ichichipa copei xeinaewi naexana beyacaincha xua ichamonae, irūnū pomonae nacūpa penaexanaewi, peatsaxa meran, irūno pomonae jiwi pebiataewi, irūno pomonae peyabara muxutorobi jiwi pecaibinexa. ¹¹ Copiyatha paxam be barapocotsi jiwimonae pam xua poxona matha aena pajume cowūntame xua abe painya neexanae jiwi pam. Daichitha Nacom paca yabara jūntemaina abe painya neexanae cuiru coyenein. Mataūtano Nacom paca yabara caunuta jeye: “Tapexuimonae jiwi”, paca yabara jei. Mataūtano Nacom jopa painya tsita natsicuentsiwa xua abe painya neexanaexae. Nacom pia Pejumope tūnaxū tatsi irū Jesucristo pacata exana baxua xua poxona pajume cowūntame Jesucristo pon jiwi Pecanamataxeinaein.

Meje xua Pablo jei: “Wapepon Nacom piawa”, jei

¹² Jiwi ba jeye: “Xan necopata xua bara taexanaewanexa pocotsiwa xua ichichipan”, jei. Bara bequein xainyei jiwi xua pepaebiwa, ichitha ichacuiitha barapo jiwi jopa xapain pia coutha nata exanaetsipae. Bequein barichin bequein necopata xua bara daxita taexanaewa, daichitha ichacuiitha jopa xapain nata exanaeinchipae xua poxonae icha nanta xeinaetsipan xua jopa neitacūpaeyo xua bara tana necui copatsiwa. ¹³ Bara jiwi ba xainyeya paeba poxonae jeye: “Pexaewa wūnae xua pecotsoro nexa, irū pecotsoro wūnae xua pexaewa nexa”, jei. Ichitha bexa tsane Nacom weraweraca cana exanaena barapo naxobe jumebe. Nacom apara jopa nacata exanaeyo wapepon xua wapepon abe wanata exanaewa xua wanasi cui taetaewa. Wapepon Nacom exana xua pia coutha natsiexana, xua watanacuichinexa bapon, pon jiwi Pecanamataxeinaein. Nacom yawena xua wapepon yawenatsi xua pia wanaca capanepaenexa. ¹⁴ Icha Nacom ichi xua asū exana petūpae cuiru coyene weya pon jiwi Pecanamataxeinaein Jesucristo, Nacom bara naca ichi tsane, asū naca exanaena petūpae cuiru coyene weya pia peayapusū itorobi coyeneyatha.

¹⁵ Paxam Corinto tomarapiwi pam. Payaputaneme xua daxita carepaya paxam Cristo piamonae jiwana tatsi pam, pomonae pejūntū coyene xanepanae jiwi. Xan irū barapo pejūntū coyene xanepanae jiwi piamonae jiwanan tatsin. Daxota jopa benatsiperū jayababinyo powaxitha powaxi pesi cui weiweinaewaxi, tsipei tapepon apara Cristo tatanacuichinexa bapon. ¹⁶ Paxam payaputaneme icha pebin natsiperū jayababa powatha powa penasi cui matacaetsiwa baraponbe bara be caeinbe naexanabe. Nacom Pejume Diwesitha jeye: “Poxonae pebin piowa pita bara be caein naexanabe”, jei Nacom Pejume Diwesitha. ¹⁷ Poxonae ichūn cae jūntū coyene naexana Cristotha pon jiwi Pecanamataxeinaein, bapon bara apara caein naexana Cristotha pia pejūntū coyenewatha.

¹⁸ Painya xoba paexanaename icha pocotsi coyeneya ichi xua peexanaewa pomonae pesi cui weiweinaewi. Daxita po coyenein pebiwi exana xua abe peexanaewa apara jopa pia coutha abe nacana exanaeyo. Apara jame ichūnthā abe exana. Saya jame poxona pebiwi pesi cui weiweinaewi bapoxonae barapo pebiwi pia coutha abe nacana exana. ¹⁹ Paxam payaputaneme xua Nacom pia Pejumope tūnaxū tatsi paca barū jinompa pia paca nacana jumope tūnaxū catsixae paxamtha. Icha barapo Nacom pia Pejumope tūnaxū tatsi ichi xua paca barū jinompa, barichi barapo Nacom pia Pejumope tūnaxū tatsi popona Nacom pin pia botha tatsi. Tsipei anoxuae Nacom piamonaexae tatsi pam, apara paxam jopa painya coutha painya nenacanamataxeinaewi jiwi pam. ²⁰ Nacom bayatha pacata pematomatsiwa exana xua poxona Jesús naetotha painya

nepaca tsitupaewa xua abe painya neexana cuiru coyenein. Daxota beta pajume cowuntsiya jinompare ichamonae petitutha tatsi. Bapoxonae barapomonae Nacom baru cui itura jinatsi xua pon xanepanaya peexanaein poxonae paca cui tane xua xanepanaya pajinompame.

7

Meje xua Pablo yabara muxuweta xua jitha peenaewa yabara

¹ Anoxuae paca jume notatsi po peyainyabiwa pana yainyabame cartatha. Icha pebin jopa jitha beecaeyo bu bara moya jopa jitha ecae tsane, bequein bara baxua taxanepanatsi bapon. ² Ichacuitha poxonae pebin jopa jitha ecaeyo besi cui weiweinaena powatha xua bequein pia pebin xeina. Daxota pecuiyainwa barapo coyene bapon bewa jitha ecaena, xua barompaya piowa tatsi. Barichi daxita yabuxi bewa barompaya seicaya notsina pia pebiwi. ³ Pebin bewa bara exanaena piowatha xua poxonae peisa maitecae coyenewa. Barichiru yabuyo bewa bara exanaena pia pebintha xua poxonae petsicuara maitecae coyenewa. ⁴ Petsiriwa powa jitha eca, jopa bewa nayabara nanta xeinae xua penaperu xeinaewa xua saya pia coutha nexa. Jame bewa nanta xeinae xua apara bara pia pebin tatsi pia peruto tatsiru. Barichi pebin jopa bewa nayabara nanta xeinae xua penaperu xeinaewa xua saya pia coutha nexa. Jame bewa nanta xeinae xua apara bara piowa tatsi pia peruto tatsiru. ⁵ Petsiriwa jopa bewa aichaxaibi tsane xua isa maiteca pia pebin. Pebin iru jopa bewa aichaxaibi tsane xua piowa peisa maitecaewatsi. Poxonae pebin piowabe eenatsibe caentacabiyobetha xua Nacomtha wucauyabe bapoxonae baponbe itacupatsi xua itompa exanaenabe xua peexanaewa po coyene penaisa maitecae cui coyenewa. Saya caentacabiyobetha baxua bewa itompa exanaena po coyene xua penaisa maitecae cui coyenewa. Jame poxonae po mataqueitha najume wetsina xua Nacomtha pewucaewabe bapoxonae jame bara bewa exanaenabe equeicha penaisa maitecae cui coyenewa. Baxua bewa exanaenabe xua jopa pejuntu coyene jujutsinexa tsainchibe caurimonae pia pentacaponaein tatsi xua abe peexanaenexa tsanebe xua naitompa penaexanaexaebe.

⁶ Saya baxua paca muxuwetatsi apara xua jitha painya neenaewa xua daxota jopa abe painya neexanaewa tsane. Jopa apara paca itorobichi daxita pam xua jitha painya neenaewa. Bara moya jitha ecaena pon ichichipa. ⁷ Ichichipan xua daxita jiwi jinompa dubenanaebiyaena icha po coyeneya ichin xua poxonae poponan xua jeinya ecan. Daichitha Nacom cata daxita jiwitha xua daxita jiwi barompaya pia cui coyenewan xexeina tsiniya. Po coyenein xua Nacom cata daxita barompaya jiwitha jopa nacui coyene jupaeyo.

⁸ Pomonae pemisa dubenaewi pam iru powaxi painya seuriwi painya necacuenta werapaewaxichi pam, daxita barapomonae pam paca tsipaebatsi. Bara wuna tsipae icha jopa jitha paenaemtsipae icha be xan ichin xua jopa jitha taecaewa. ⁹ Ichitha icha jopa paca itacupaeyo xua painya nejeinya enaewa moya bara jitha bewa paenaem. Jame baxua pacata xanepana xua jitha paename xua daxota jopa painya nesi cui weiweinaewa.

¹⁰ Ichitha pomonae xua bayatha jitha painya neenaewi pam barapomonae pam paca itorobatsi. Jopa apara taitorobi coyeneya paca tsipaebichi. Jame apara Nacom taneitorobixae xua po coyeneya tapaca catsipaebinxatsi. Paca jeichi: “Yabuyo jopa bewa cuenta warapaena pia pebin xua pexubinexa”, paca jeichi. ¹¹ Powa punaxuba pia pebin, barapowa bara misa ecaena. Jopa pitsi tsane icha pebin equeicha. Metha jame xanepanaetsipa icha bapowa caewa pichapa pia pebin. Barichi pebin jopa bewa punaxubi tsane piowa.

¹² Anoxuae nama icha coyene paca tsipaebatsi po coyenewa jopa Nacom neitorobiyo saya xua tacoutha tananta xeinaewa. Icha pebin pon pejume cowuntsin xeina piseuri powa jopa pejume cowuntsiwayo bapon jopa bewa punaxubi tsane bapowa icha bapowa ichichipa xua bapon pebaru poponaewatsi. ¹³ Barichi icha yabuyo powa jume cowunta xeina pebin pon jopa pejume cowuntsin bapowa jopa bewa punaxubi tsane icha bapon

ichichipa xua bapowa pebaru poponaewatsi. ¹⁴ Po pebin bequein jopa jume cowuntsiyo, Nacom tsitatsi xua po coyene barapon penacoyobiwa bara xanepana, tsipei bapon piowa xeina powa pejume cowuntsiwayo. Barichi powa jopa bequein pejume cowuntsiwayo, Nacom tsitatsi xua po coyene barapowa jitha peecaewa bara xanepana, tsipei bapowa xeina pia pebin pon pejume cowuntsin. Icha Nacom barapocotsi coyeneya jopa exanaet-sipae nexata painya pexui be pomonae jopa Nacom pejume cowuntsiwi pia pexui tatsi tsipae. Ichitha poxoru barapo coyene painya netsita xeinaexae Nacom daxota Nacom yawa muxuna tsitatsi xua barapo painya pexui barapoxi juntu coyene xanepanena. ¹⁵ Ichacuitha pebin pon jopa pejume cowuntsin ichichipa punaxuba piowa powa pejume cowuntsiwayo. Bapoxonae bapowa bara copata xua pepunaxubiwatsi pia pebin. Barichi ichacuitha yabuyo powa jopa pejume cowuntsiwayo ichichipa punaxuba pia pebin pon pejume cowuntsin. Bapoxonae bapon bu bara copata xua pepunaxubiwatsi pia petsiriwa. Nacom copata barapomonae jopa pejume cowuntsiwixaetsi xua piseuriwi pepunapentsiwa tsipei ichichipa xua junte miya wanabarū jinompaewa tsane saya. ¹⁶ Yabuyom icha ewatsiwatham tsipae xua jinya pebin pejume cowuntsinexa, daichitha jopa jume cowuntsipae Nacom. Barichi pebin icha ewatsiwatham tsipae xua jinseuri pejume cowuntsinexa, daichitha jopa jume cowuntsipae Nacom.

¹⁷ Daxita paxam bewa xanepanaya pajinompaename icha pocotsi coyeneya Nacom painya nepaca catsixae tsane. Baxua bewa paexanaename xua po coyene Nacom paca yabara tsiwaba bara bequein painya seurixi paxename ichacuitha bara metha bequein jopa paxeinaem tsane painya seurixi. Baxuan cuiduban daxita carepaya penacaetutsi bontha pomonae Nacom pejume cowuntsiwichi. ¹⁸ Ichacuitha Nacom waba xua pebin wabatsi pejume cowuntsinexa tsane. Icha barapo pebin caena bayatha wi thabatsi bu saya barabu tsane baxua. Barichi ichacuitha Nacom waba xua pebin wabatsi pejume cowuntsinexa tsane. Barichi icha barapocotsi pebin caena bayatha jopa wi thabichi bu saya barabu tsane baxua xua jopa pewi thabinexatsi. ¹⁹ Bapana Nacom jopa tsita ainya cuichi, metha bequein pebin bayatha wi thabatsi, ichacuitha metha bequein jopa wi thabichi. Po coyene xua peainya cui coyene xua jiwu bewa exanaena, jame maisa bewa jiwu jume cowuntsiya exanaena pocotsiwa Nacom itoroba. ²⁰ Daxita paxam bewa jupa paexana dubenanaebiyaename icha copiya paichim xua paexana dubenanaebiyame poxonae copiya aena Nacom paca waba. ²¹ Poxonae Nacom waba pon paxam jiwana pam xua poxonaeru bapoxonae amanaya tanacuita pia pentacaponaein, bapon jopa bewa yabara nantu exabi baxuan xua pia saya poponaetsi. Ichitha icha bapon itacupatsi xua saya pepoponaewa bu moya saya popona xua jopa penantawenonaenexa tsane xua amanaya petanacuichiwa ichun. ²² Barichi ichacuitha pon bayatha exanatsi xua amanaya petanacuichinexa ichun bapon jume cowunta Jesús. Bapoxonae bapon naexana pon saya pepoponaein pia pentacaponaein weya, peexanaenexa pocotsiwa Cristo itoroba. Barichi ichacuitha pon saya pepoponaein xua jopa amanaya tanacuichiyo ichun bapon jume cowunta Jesucristo. Bapoxonae bapon naexana pon Jesús amanaya pia petanacuitinchi tatsi tsipei exana pocotsiwa Cristo itoroba. ²³ Nacom pin matomatha pacata matomata poxonae Jesús naetotha paca tsitupa abe painya neexanae cuiru coyenein nexa. Painya xoba pacopatame xua jiwu equeicha caewa painya nepaca itorobiwa xua abe painya neexanaewa. ²⁴ Tamonae pam daxota paca itorobatsi xua painya nejume cowunta dubenanaebiyaenexa Nacom, icha paichim xua pajume cowunta dubenanaebiyame poxonae copiya Nacom aena paca waba.

²⁵ Jopa xeinaeinyo po jumetha xua tacueicueijejiwa po coyenewa xua Nacom pon jiwu Pecanamataxeinaein neyaputane exana xua pomonae piseuriwi penotsiwi nexa. Saya apara paca tsipaebatsi po coyeneya xua saya tacoutha tananta xeinaewa. Ichitha paxam paca itacupa xua pata tana nejume cowuntsiwam tsipei Nacom necata barapo peyaputae coyenewa tana neantobexae. ²⁶ Xan tacoya nanta xeinan xuaje: Bara bewa saya jiwu jeinya enaena. Jopa jitha peenaewa tsane, tsipei anoxuae barapo dapaetha xeinatsi nawita po coyenein bichocono nacata ayapube tsounae xua wanapapechiwatsi. ²⁷ Icha

jitha paename painya xoba pana napunapentame. Barichi icha pajeynya ename painya xoba pasi cui weiweiname. ²⁸ Icha jitha paename jopa apara bara abe paexanaem. Irũ icha yabũyo jitha eca bapowa apara jopa abe exanaeyo. Daichitha pomonae jitha peenaewi bichocono taayapubetsi xua pejinompaewa nexa barapo cae pin nacuathe. Xan ichichipan paca yawenatsi daxota baxuan yabara paca tsipaebatsi xua pacata ayapubeyainwa xua jitha painya neenaewaxae tsipae.

²⁹ Tamonae pam, paxam pomonae irũ painya nejume cowũntsiwixae Jesucristo. Po coyenewa xua ichichipan tapaca tsipaebiwatsi tsainchi xua meje xua janje: “Waxainchi pin dapae jopa xeinae tsainchi po mataqueitha poxonae Jesús patopeicaena”, jan. Daxota pomonae jitha ena bewa jinompa dubenanaebiyae icha be poxonae ichi poxonae xua jinompa dubenanaebiya pomonae jeinya peenaewi xua xaniwaicha Nacom daunweya petanacuichiwatsi. ³⁰ Daxita jiwu bewa eenaetsi xua Nacom petanacuita dubenanaebiyawatsi. Daxota pomonae anthuthutane xua pewecoyeixae bũ barapomonae jinompa icha ichi xua jinompa pomonae jopa anthuthutaneyo xua jopa pewecoyeixae xua daunweya penacuichixae Nacom nexa. Barichi pomonae xua bichocono jũntũ coyene weiweina bũ barapomonae jinompa icha ichi xua jinompa pomonae jopa jũntũ coyene weiweinaeyo xua daunweya penacuichixae Nacom nexa. Barichi pomonae xua pecomoca dubenanaebiyawewi bũ barapomonae jinompa icha ichi xua jinompa pomonae jopa pecomoca dubenanaebiyawewi xua daunweya penacuichixae Nacom nexa. ³¹ Poxonae cataunxuae pajinompame barapo cae pin nacuathe jopa paichichipa dubenanaebiyaeinde pocotsiwan xua barapo cae pin nacuathe xeina. Tsipei pocotsiwa barapo cae pin nacuathe xeina daxita weraweracaena.

³² Ichichipan xua bichocono jopa painya neyabara nanta xeinaewa pocotsiwa barapo cae pin nacuathe xeina xua paca jũntũ deideijejei exana. Po pebin jeinya eca itacũpatsi xua penajũntũ coyene eena exanaewa xua petaexanaewatsi Nacom pon jiwu Pecanamataxeinaein. Barapo coyene Nacom jũntũ coyene weiweina exanatsi. ³³ Po pebin jitha eca bapon bichocono yabara eenatsi nawita xua yabara nanta xeina nawita xua po coyeneya piseuri peewatsiwa xua daxota bapowa piseuri peyabara baru jũntũ coyene weiweinaenexa. ³⁴ Barapon barapo naxobe coyenewabe muxuna yawa nanta xeina. Barichi yabũxi powaxi jeinya ena irũrũ powaxi jitha ena barompaya tsanaya piawan yabara nanta xeina. Powa xua bapana jopa jitha ecae bapowa itacũpatsi xua penajũntũ coyene eena exanaewa xua petaexanaewa po coyene Nacom ichichipa pon jiwu Pecanamataxeinaein. Barapowa ichichipa exana xua Nacom pejũntũ coyene weiweina exanaewatsi tsainchi pocotsiwa xua bapowa peexanaewaxae xuano bapowa pocotsiwa penanta xeinaewaxae. Ichitha nama powa jitha eca bapowa bichocono yabara eenatsi nawita xua yabara nanta xeina nawita xua po coyeneya pia piseuri peewatsinexa xua daxota bapon piseuri peyabara bara jũntũ coyene weiweinaenexa.

³⁵ Baxua paca tsipaebatsi tsipei ichichipan xua tapaca cayawenaewatsi. Apara jopa paca itorobichi xua jopa painya nenotsiwa tsane painya seuriwi. Ichichipan xua beta painya nejinompaewa xua painya netanacuita dubenanaebiyaeenexa Nacom daxita painya jũntũ coyeneintha.

³⁶ Pebin irũ yabũyo nanta xeinabe xua penapichinexa tsanebe. Ichitha cataunxuae ewatabe xua penapichiwa tsanebe. Bapon ichichipa nawita xua pepichiwa bapowa, irũ petsiriwa bayatha wei weta. Daxota moya bara bewa napichinabe. Baxua jopa abeyo po coyene baponbe exanabe. ³⁷ Ichitha icha pebin itacũpatsi xua jopa nantawenonaeyo xua pepichinexa pecotsiwa, xuano juntucuru jopa pichi tsane pecotsiwa, bara jemba tsane icha bapon pecotsiwa jopa pichi tsane. Bara saya jeinya ecaena. Bapoxonae bapon bara saya beta exana. ³⁸ Pon pecotsiwa pita beta exana bequein. Ichitha nama pon jopa jitha ecaeyo bapon jame bichocono beta exana beyacaincha pon pecotsiwa pita.

³⁹ Petsiriwa powa jitha eca powa pejume cowũntsiwa bewa piseuri cuicuinaena poxonae cataunxuae jopa tatũpaetsi piseuri. Icha pia pebin tatũpatsi barapowa itacũpatsi xua pichina icha pebin pon saya pejume cowũntsin. ⁴⁰ Jame metha bapowa bichocono

yatsicaewa jüntu coyene weiweinaetsipa icha jopa equeicha pichipae icha pebin. Bapoxonae bapowa bichocono jüntu coyene weiweinaetsipa beyacaincha poxonae pita icha pebin. Baxua nanta xeinan xua saya tananta xeinaewa. Matautano iruru barichin jume cowuntan xua Nacom pia Pejumoepo tunaxu tatsi tana nebaru poponaewa. Daxota neitacupa xua yabara tapaebiwa barapo coyenein.

8

Meje xua Pablo peyabara paebiwa pexaewa po pexaewa jiwi tajeba ibo nacomun

¹ Anoxuae ichichipan xua pexaewa yabara tapacata tinaewatsi po pexaewa jiwi tajeba ibo nacomun poxonae jiwi wunae jainteiba ibo nacomun. Bequein xainyei xua baxuan yabara yaputainchi, daichitha barapo peyaputae coyenewan naca atsaca exana. Ichitha jame po peantobe coyenewa xeinatsi apara naca yawena xua beta wanabaru jinompaewatsi. ² Pon xua nanta xeina xua pinae yaputane bichocono bapon apara taacoibichi pocotsiwa xua bapon bewa yaputaena. ³ Icha ichun Nacom antobetsi bara Nacom jüntu coyene yaputane bapontha.

⁴ Daxota equeicha pexaewa yabara paca tsipaebatsi, po pexaewa jiwi tajeba ibo nacomun. Barapo pexaewa xuya ichamonae xane cotacaya. Waxainchi yaputainchi xua ibo nacomun jopa xaniwaicha xeinaeyo peayapusuwa xua apara saya jiwi pecobetha forota. Jame nama yaputainchi pepa Nacom, pon compa. ⁵ Jiwi jume cowunta xua pinae pinmonae jinompa, pomonae nacomun, itabocotha, barapo cae pin nacuatheno. Barichino xua pinae pentacaponae jinompa itabocotha barapo cae pin nacuatheno. ⁶ Nama waxainchi yaputainchi xua compa popona Nacom, pon Waxa. Daxita coyenein Nacom pia xainya werena tapichipapoinchi, bara bequein daxita baxuan Cristo forota Waxa nexa. Matautano Nacom naca cana exana pia watanacuichinexa bapon. Barichi meisa compa popona pon pepa jiwi Pecanamataxeinaein, bapon Jesucristo. Bapon Jesucristo daxita forota Nacom nexa. Waxainchi xeinatsi peajuntucoyenesuwa, po peajuntucoyenesuwa xua bapon naca cata.

⁷ Ichamonae pomonae pejume cowuntsiwi Nacom, jopa yabara yaputaeyo xua ibo nacomun. Barapomonae awiya nanta xeina xua ibo nacom peayapusuwa xeina bequein anoxuae barapomonae jume cowunta Nacom. Barapomonae bayatha pia cui xeina xua pexaewa tajebeiba ibo nacomun poxonae wunae jainteiba barapo ibo nacomun. Barapomonae abetha nanta xeina jeye: “Icha xaetsipan pewi po pewi ichamonae tajeba ibo nacomun metha neajuntucoyenebe cana exanaetsipa poxoru barapo pewi ibo nacomun piawa”, jei xua abetha nanta xeina. Bequein barapomonae jume cowunta Nacom ichitha jopa yaputaeyo xua ibo nacomun pia pexaewa jopa itacupaetsi xua ajuntucoyenebe cana exanatsi barapomonae icha jiwana xaetsipa barapo ibo nacomun pia pexaewa. ⁸ Pexaewa jopa naca yawenaeyo xua wanajuntucoyene xanepana exanaewatsi xua daxota Nacom wanaca weyataewa tsane. Icha waxainchi nabunatsi pexaewa jopa naca yawenaeyo xua Nacom tsita jüntu coyene xanepanatsi beyacaincha xua poxonae jopa nabanaetsi. Barichi icha najainbotatsi baxua jopa naca yawenaeyo xua Nacom tsita jüntu coyene xanepanatsi beyacaincha xua poxonae nabunatsi. ⁹ Paca itacupa xua paxaneme xua pocotsiwa painya neichichipaewa. Icha pajiwana xaneme po pexaewa jiwi tajeba ibo nacomun, baxua jopa paca tsita abeyo. Ichitha poxonae paexaname baxua pomonae ainya unthuton pexeinaewi, aena pejume cowuntsiwixae, barapomonae tsita ayapubetsi. Icha barapomonae xaena barapo pexaewa painya neexanaewaxae bequein barapomonae tsitatsi xua abe peexanaewi poxonae xane barapo ibo nacomun pia pexaewa tatsi. Daxota painya xoba paexaname po coyene painya neichichipaewa. ¹⁰ Metha beya paca taetsipa pon pejume cowuntsin poxonae panabaname pexaewa po pexaewa jiwi tajebeiba ibo nacomun poxonae wunae jainteiba barapo ibo nacomun. Iruru metha beya tsipae bapon naxaetsipa barapo pexaewa poxonae bapon paca jain tane. Paxam pomonae painya neyabara yaputaewi pam barapo pexaewa. Payaputaneme xua barapo pexaewa apara jopa itacupaetsi xua jiwi ajuntucoyenebe cana exanatsi. Ichitha pomonae

ainya unthuton pexeinaewi aena pejume cowuntsiwixae jopa yaputaeyo baxua yabara icha paxam paichim. Barapomonaе awiya nanta xeina jeye: “Icha barapo pexaewa xaein neajuntucoyenebe exanaena”, jei. ¹¹ Ichacuitha paxaneme barapo pexaewa bequein payabara yaputaetham xua jopa abe paca cana exanaeyo. Painya neexanaexae baxua xua paxaneme barapo pexaewa daxota bichocono abe paexaname pontha pon ainya unthuton xeina, pon abetha nanta xeina, jeye: “Icha barapo pexaewa xaein neajuntucoyenebe exanaena”, jei. Daxota bapon payabara nanta xeinare xua apara iru Cristo tsitupa bapon icha ichi xua paca tsitupa. ¹² Pacata jopa abeyo xua poxonaе paxaneme barapo pexaewa. Jame apara abe paexaname poxonaе iruru xane barapo pexaewa pomonaе ainya unthuton xeina. Poxonaе abe paexaname barapomonaetha apara bara iru abe paexaname Cristotha, tsipei apara barapomonaе pomonaе iru pejume cowuntsiwixae Cristo. ¹³ Metha beya xaetsipan pewito pocotsi wito xua ichun, pon iru pejume cowuntsin yabara nanta xeineiba xua jopa bapana xae po pewi xua jiwi tajebeiba ibo nacomun. Poxonaе bapon nejain tane, bapon iru xane, najuntu coyene taxoba. Bapoxonaе abe exana cana exanan. Daxota metha xanepanaetsipa icha bapana jopa xaetsipaein equeicha barapocotsi wito xua jopa taexanaewanexa xua bapon abe peexanaewa tsane.

9

Meje po coyenein yabara pomonaе Jesús pia peitorobi jiwi tatsi itacupatsi xua peexanaewa

¹ Tajuntu coyene jopa netsipaеbiyo xua abe taexanaewa icha xaein barapo pexaewa xua jiwi tajebe ibo nacomun. Ichun jopa itacupaetsi xua yabara tana neitorobiwa barapo pexaewa tsipei xan Jesús pia peitorobi jiwi jiwana tatsin. Xan bara yatsicaewa tan Jesús, pon Wanacanamataxeinaein. Paxam pajume cowuntame Jesús daunweya tatanacuichixae pon jiwi Pecanamataxeinaein. ² Ichamonaе jopa neyabara tsaqueinaeyo xua xan Jesús pia peitorobi jiwi jiwana tatsin. Jame paxam pana neyabara yaputaneme xua xan Jesús pia peitorobi jiwi jiwana tatsin. Painya nejume cowuntsixae pon jiwi Pecanamataxeinaein ichamonaе patsita itapeinya xeiname xua xan bara ponxaein Jesús tana neitorobin.

³ Baraxua jume notan pomonaetha pomonaе yabara neyainyaba xua pinae icha bara metha yatsicaewa pon Jesús tana neitorobin. ⁴ Barapomonaetha janje: Bernabé iru xan bara pana neitacupabe xua pata wecobe notebiwabe pocotsiwa xua jiwi pata necatsibiwabe pexaewa. Matautano pana neitacupabe xua pata wecobe notebiwabe pocotsiwa paapan xua poxonaе patanacuita ducuaеbiyanbe Jesús. ⁵ Matautano icha jitha ecaetsipan bara neitacupaetsipa xua tabaru ponaewa taseuri icha Jesús pia peitorobi jiwi tatsi ichi xua itacupatsi xua peexanaewa baraxua xua piseuriwi baru warapa. Iruru barichi Jesucristo pon jiwi Pecanamataxeinaein pia peweicho jiwi tatsi baxua exana. Iru Pedro exana baxua xua piseuri baru pona. ⁶ Poxonaе ichamonaе paca tsipaeba Nacom Pejume Diwesi, payawename barapomonaе pocotsiwa penantawenonae. Paxanbe Bernabé iru xan panacuitanbe paxam nexa poxonaе Nacom Pejume Diwesi paca tsipaebatsi. Ichitha jopa pana neyawenaem pocotsiwa panantawenonanbe. Paxanbe bewa panacuichinbe icha penacuitsiwa yawa pata comocaenexa pocotsiwa panantawenonanbe. Meisa paxanbe baxua paexananbe, ichamonaе jopa daichiyo. ⁷ Soldadomonaepin poxonaе ba naba pia pentacaponaein nexa jopa ba natamatomatsiyo pia pexaewa. Pon ba jame itoroba apata pexaewa pia soldadomonaе. Barichi pon ba uva pabi nacuita itacupatsi xua yawa uva cuei xaexaepona. Barichiru pon ba vaca yapu eena bapon ba itacupatsi mipi yuyucapona vaca xua peapaponaenexa. ⁸ Saya jopa meisa jiwi yabara nanta xeinaeyo baxua xua pon tanacuita itacupatsi yawa xane. Apara iru Moisés pia peitorobi coyenewatha baxua yabara paebaru. ⁹ Moisés tina po diwesi pia peitorobi coyenewathaxae, xua jeye: “Poxonaе po duwein pon pewun buey nanacuitapona xua pexu xu taxunaunabapona, bapoxonaе pebin jopa copatsiyo xua pecoibo acatsiwa xua jopa pexaenexa. Saya bara copatsina xua yawa xaexaeponaena

poxonae nacuitapona”, jei. Nacom jopa yabara paebiyo baxua xua saya meisa poxoru peyabara nanta xeinaexae buey. Jame saya apra poxoru peyabara nanta xeinaexae jiwi. ¹⁰ Nacom pana necayabara jata paeba poxonae buey yabara paeba. Baxua painta exana xua pata taneyawenaenexa. Pon ba nacobe weta xua uba pabitha, irurū pon xuya nota poxonae naweta, baponbe xeinaenabe pexaewa xua penawetsiwa. ¹¹ Paxan paca cuidubatsi Nacom Pejume Diwesi. Tsipei paca yawenatsi daxota bewa xuya pana necatsibim pocotsiwa xua panantawenonan xua pata jinompaewanexa. ¹² Paxam pacatsibame pocotsiwa xua nantawenona ichamonae pomonae Nacom Pejume Diwesi paca cuiduba, ichitha paxan paca yawenatsi beyacaincha xua barapomonae paca yawena. Daxota bewa pana necatsibeibim icha paca wūqueibichipatsi beyacaincha xua pacatsibeibame ichamonae.

Ichitha baxua jopa paexanaeinyo xua pata cawūcaewatsi. Paxan bichocono paatanein xua jopa pata xeinaexae pocotsiwa xua pata nantawenonaewa pata jinompeibiwanexa bequein jopa paca wūqueibichi. Jopa paca wūcaetsi tsipei jopa paichipaeinyo xua jopa painya nejume cowūntsiwa Cristo pia pexeinya jume diwesi. Jopa paca wūcaetsi poxoru metha pananta xeinaetsipame xua paxan apra pata paratixichi paca tsipaebatsi Nacom Pejume Diwesi. ¹³ Paxam payaputaneme xua pomonae ba nacuita Nacom pin pia botha barapomonae ba apatūtsi pexaewa Nacom pin pia botha. Barichirū pomonae ba nacuita ichaxota iboto uncuwa po ibototha duwein bexuba xua tauta xua petuxusi exanaenexa Nacom nexa barapomonae ba itacūpatsi xua xuya penabanaewa barapo duwein xua saya jiwana xane. ¹⁴ Barichi Nacom pon jiwi Pecanamataxeinaein jeye: “Pomonae inta nacuita xua paeba dubenanaebiya tacapanenebiyae diwesi jume, barapomonae apatūtsi pexaewa xua poxonae ichamonae apateiba be pematomaqueibiwatsi tsipei barapomonae cueicueijeji tsurubenanaebiya tajume diwesi”, jei Nacom. ¹⁵ Ichitha jopa bapana wūcaeinyo jiwi xua tana apatsinexa pexaewa xua be tanamatomatsiwa. Pacata tinatsi xua jopa tapaca wūcaewatsi. Ichichipan xua tatupaewa tsane pewūnaeya xua poxonae tapaca wūcaewatsi tsainchi. Bichocono jūntū coyene weiweinan poxonae tapaca tsipaebi watsi Nacom Pejume Diwesi. Yaitama jopa pana necatsibeibim xua be pata tanematomaqueibi wam, daxota atsaquiya paca tsipaebatsi.

¹⁶ Jopa neitacūpaeyo xua atsacan xua tacueicueijeixae Nacom pia pecapanenebiyae diwesi jume. Nacom neitoroba xua bewa tacueicueijejiwa tsane barapo diwesi. ¡Ichitha xan tsocuaein tsipae icha jopa cueicueijan tsipae barapo diwesi! ¹⁷ Bequein icha Nacom jopa neitorobichipae xua saya xan tacoutha tsipaebaponaetsipan Jesucristo pia pexeinya diwesi nexata ewatsipan xua jiwi tanematomatsinexa tacueicueijeixae barapo diwesi. Ichitha jame tsipaebaponan pexeinya jume diwesi Nacom tana neitorobixae. Jume cowūntaponan be pocotsi coyeneya Nacom neitorobapona. ¹⁸ Daxota xua be tanematomatsiwa apra xua poxonae jūntū coyene weiweinan tapaca tsipaebixaetsi barapo Nacom Pejume Diwesi bequein metha jopa pana catsibeibichipaem xua patanematomatsiwam, matautano metha poxonae bara tapanecatsibeibichipaem pocotsiwa tapanematomatsiwam. Paxam jopa pana necatsim pocotsiwa be pata nematomatsiwam. Jopa paca wūcaetsi bequein bara neitacūpa xua tapaca wūcaewatsi pocotsi matoma bewa panecatsibeibim. Bara pocotsi matoma jiwi bewa catsina pomonaetha pomonae Nacom Pejume Diwesi tsipaebatsi xua pejinompeibiwa tsane.

¹⁹ Bequein jopa bewa amanaya tanacuichin tsane ichūn, ichitha tacoutha nacana exanan be pon amanaya tanacuichin daxita jiwi nexa. Barapo coyene exanan xua pinmonae pejume cowūntsinexa Cristo. ²⁰ Poxonae poponan judiomonae pia xantha tatsi, exana ducuaenabiyan icha be barapo judiomonae ichi xua exana dubenanaebiya pocotsiwa Moisés itoroba pia peitorobi coyenewatha. Bara pocotsi coyenein exanan xua Moisés itoroba, bara bequein jopa bewa exanaein tsane. Saya exanan tsipei ichichipan xua tayawenaewa xua barapomonae pejume cowūntsinexa Cristo Jesús. ²¹ Poxonae poponan pexantha tatsi pomonae jopa exanaeyo pocotsiwa Moisés pia peitorobi coyenewatha itoroba, bapoxonae popona ducuaenabiyan icha barapomonae

ichi xua jinompa dubenanaebiya. Bapoxonae jopa exanaeinyo pocotsiwa Moisés pia peitorobi coyenewatha itoroba, xua barapomonae tayawenaenexa, xua pejume cowuntsiwanexa Jesús. Jopa paca tsipaebichi xua tajume naitematsiwa Nacom xua tana neitorobiwa. Jame bara exanan pocotsiwa Cristo neitoroba. ²² Poxonae poponan pexantha tatsi pomonae juntu coyene faefaena Nacomtha xua pejume cowuntsiwa xua aena pejume cowuntsixae bapoxonae exana ducuaenaebiyen icha barapomonae ichi xua exana dubenanaebiya tayawenaenexa xua equeicha bichocono mataropeicha pejume cowuntsiwanexa Jesucristo. Daxita carepaya jiwitha peitutha poponeiban, poxonae be pocotsi coyeneya jinompeiba barapo jiwi tayawenaenexa xua equeicha bichocono mataropeicha pejume cowunteibinexa Jesucristo. ²³ Daxita baxuan exana ducuaenaebiban tacueicueije tsaibinexa Nacom pia pecapanenebiyae diwesi jume, matautano tsipei ichichipan xua tajantũ coyene weiweinaewa tsane poxonae barapomonae jume cowuntsina Jesucristo.

²⁴ Paxam payaputaneme poxonae jiwi ba namtotha cuinaepona saya caein meisa copiya patopa. Bapon ba catatsi pocotsiwa pematomatsiwatsi copiya pepatopaexae xua beta cuinaepona. Bara pocotsi jũta coyeneya ichi, beta pata exanaponde Jesucristo pia petanacuichiwa tatsi xua painya nepaca catsibinexa xua painya nepaca matomacaewan. ²⁵ Pomonae ba xua nacui wũnaeta xua penaxenacaenexa ichawa jopa exanaeyo pocotsiwa taayapubetsi poxonae pecuinaeponaenexa. Barapomonae ba baxua exana pia xeinaetsi pocotsiwa pecui yabara matomacaewatsi. Barapo pentoma noxu tepa pocotsiwa xua saya caena naxuba xua weraweraca. Nama waxainchi beta exanapoinchi Nacom pia petanacuichiwa tatsi, xua Nacom wanaca catsibiwa tsane pocotsiwa wanaca yabara cui matomacaewa, pocotsiwa xua ataya ayapusũ xua jopa weraweracaeyo. ²⁶ Daunweya exanaponeiban Nacom pia petanacuichiwa tatsi be poxonae xua bichoina cuinaeponan xua tatoxeincha patopaewa. Jopa exanaeinyo icha ichi xua pon naitacueinchiya jiraba. ²⁷ Ichitha nama seicayiya exanan xua tapepon daunweya tacoya naitoroban xua daxota jopa abe exanaeinyo. Tapepon itoroban xua tana nejume cowuntsiwa xua peexanaewa pocotsiwa itoroban. Antuyapusũya tanacuitan Nacom tajunuwixae xua jopa beta taexanaewa xua bequein bara ichamonae cuidubithan barapo coyenein. Icha jopa beta exanaeinchipae Nacom jopa tsita xanepanaeinchipae xua daxota taneitawetsiwa tsipae.

10

Meje xua Pablo muxuweta pomonae wũnae jainta ibo nacomũn

¹ Tamonae pam, paxam pomonae irũ painya nejume cowuntsiwixae Jesucristo. Ichichipan xua painya neyaputaewa tsane po coyene xua poxonae wamo susato jiwitha pecana exanaewatsi. Barapomonae Egipto nacua weya pona. Bapoxonae tsaquinaebowa matatsun dubenapoinchi. Barapo tsaquinaebowa barapomonae matacapoinchi xua ichaxota ichichipa peponaewa barapomonae. Daxita barapomonae icha muxunene beera uncababiya po pin pucua pewũn Mar Rojo wũn pucua. Barapo pin bicheito epataũta iyapona xua poxonae Nacom tsewa taexaniya xua be namto taexaniya. ² Barapomonae tsaquinaebowa be caemonae matatsun dubenapoinchi. Mataũta barapomonae be caemonae Mar Rojo wũn pucua epataũta iya pona. Barapoxonae be caemonae naexana Moiestha xua Moisés pematacapanaenexa barapomonae. Barapomonae barapocotsi jũta coyeneya exana icha be poxonae jiton ichi xua poxonae bautisabatsi mentha caemonae penaexanaenexa Cristotha, xua Cristo pecanamataxeinaenexa bapontha. ³ Daxita barapomonae xane po pexaewa Nacom taitorobica itaboco wetsica. ⁴ Yawano barapomonae apa po mera xua Cristo itoroba ira xuepana susato tsurucuae nacuatha. Barapo mera iboton weya mene pichapa. Cristo barapo mera apatapona poxonae yanta xua barapomonae yantatsi. ⁵ Daichitha pin bicheitomonae xua barapomonae jiwana jopa exanaeyo pocotsiwa Nacom ichichipa. Daxota Nacom copata xua barapomonae bara pejiwana werapaponaewa tsane barapo ira xuepana susato tsurucuae nacuatha.

⁶ Baxua exana xua nacata yabara canauta jũtsiya exana. Jopa bewa waichichipaewa tsainchi pocotsiwa jopa nacata wũnaeyo xua icha barapomonaē ichi poxonaē pia coutha abe nata exana. ⁷ Daxota jopa bewa wũnaē pajainchim ibo nacomũn icha be barapomonaē jiwana ichi. Barapomonaē wũnaē jainta ibo nacomũn. Nacom Pejume Diwesitha barapomonaē yabara jeichi: “Barapomonaē ena xua pexaenexa yawa xua peapaenexa. Bapoxonaē yatsicaewa barapomonaē nawiraba ibo nacom tsita nawirabatsi”, jei Nacom Pejume Diwesitha. ⁸ Waxainchi jopa bewa exanaetsi xua nasi cui weiweina exanatsi icha be barapomonaē jiwana ichi. Barapomonaē jiwana nasi cui exana yabũxitha xua jopa piseurixi. Daxota caentaqueitha veintitrés mil pebiwi werapa abe peexanaexaē. ⁹ Matautano jopa bewa najũntũ coyene jũjũta exanaetsi Nacomtha xua wanaca barũ anaepanaenexa, icha barapomonaē jiwana ichi. Barapomonaē najũntũ coyene jũjũta exana Nacomtha. Daxota Nacom copata xua barapomonaē werapa poxonaē jomon sinebatsi barapomonaē. ¹⁰ Jopa bewa Nacom anaepanaya barũ paebichi, icha be barapomonaē jiwana ichi. Barapomonaē Nacom anaepanaya barũ paebatsi, daxota Nacom copata xua barapomonaē weraweraca poxonaē matatsunpin juteba po matatsunpin jiwi pejutebin.

¹¹ Nacom exana daxita baxuan barapomonaetha, xua wanaca muxuweta exanaenexa xua jopa waraichiwanexa icha barapomonaē ichi. Moisés yabara tina barapomonaē xua yaputane wanaca exanaewa xua bara nama imoxoyo barapo nacue weraweracaena. ¹² Daxota tsipaeban pon paxam jiwana pam pon xua nayabara nanta xeina xua pinae bichocono pejume cowũntsixaē peajũntũcoyenesũwa xeina Nacomtha. Janje: “Dota jinya xoba abe exaname. Poxoru icha metha nanta xeinaetsipame xua jopa abe exanaem, bapoxonaē metha abe exanaetsipame”, jan. ¹³ Jopa meisa paxam caurimonaē pia pentacaponaein tatsi paca jũntũ coyene jũjũtsiyo. Barapara irũ ichamonaē pomonaē pejume cowũntsiwi barichichi jũntũ coyene jũjũtatsi abe peexanaenexa. Paxam paca itacũpa xua pajũntũ coyene amanayabame barapo caurimonaē pia pentacaponaein tatsi. Baraxua paexaname icha barapomonaē ichi xua jũntũ coyene amanayaba barapo caurimonaē pia pentacaponaeintha tatsi. Daichitha paca itacũpa xua payabara jume cowũntame Nacom xua bara bapon paca yawenaena. Nacom jopa copatsiyo xua caurimonaē pia pentacaponaein tatsi bichocono paca jũntũ coyene jũjũtsina xua pocotsiwa bichocono pacata ayapube xua daxota abe painya neexanaewa tsane. Ichitha poxonaē caurimonaē pia pentacaponaein tatsi paca jũntũ coyene jũjũta, Nacom paca yawenaena xua painya nerũcũpaewa bapon weya xua daxota jopa abe painya neexanaenexa.

¹⁴ Tamonaē pam paxam pomonaē irũ painya nejume cowũntsiwixae Jesucristo. Paxam pomonaē tapaca caantobe jiwichi pam. Painya xoba wũnaē pajaintame ibo nacomũn. ¹⁵ Paca tsipaebatsi paxam pomonaē painya neyaputae jiwi pam. Paxam payaputaneme xua painya neyabara nanta xeinaewa pocotsiwa paca tsipaebatsi icha metha bara xaniwaicha paeban. ¹⁶ Waxainchi nacaetutatsi wayabara jũntanainaenexa xua Cristo wanaca tsitũpaewa naetotha. Bapoxonaē apatsi vino mera yawa xainchi pan. Barapo vino mera Cristo pia pejana tatsi yabara caunutatsi. Matautano barapo pan Cristo pia pepon tatsi yabara caunutatsi. Poxonaē apatsi barapo vino mera Nacom tsipaebatsi barapo vino mera nexa po vino mera tsijunta eca corotiyotha. Jeichichi: “Maisa Nacom painta pexeinya coyene exaname”, jeichichi. Bapoxonaē be caemonaē naexainchi Cristotha waapaexaē barapo vino mera. Barichi poxonaē pan janacatsi be caemonaē naexainchi Cristotha waxaexaē barapo pan. ¹⁷ Bequein waxainchi pinmonaetsi xua cae pan nabarũ xainchi, ichitha waxainchi be caemonaetsi bapon Cristotha tsipei bara cae pan nabarũ xainchi.

¹⁸ Payabara nanta xeinare xua judiomonaē pomonaē Israel nacuamonaepiwi. Barapomonaē judiomonaē xane po duwein ichamonaē tauta xua petuxusi exanaewa Nacom nexa. Bapoxonaē barapomonaē be caemonaē naexana Nacomtha. ¹⁹ Jopa apara paca tsipaebichi xua ibo nacom xeina peajũntũyapusũwa. Matautano jopa paca tsipaebichi xua po wi jiwi tajeba ibo nacomũn ainya cui barapo wi beyacaincha xua icha pewi.

²⁰ Paca tsipaebatsi xua jiwi tajeba pewi ibo nacomun pomonae jopa yaputaeyo Nacom. Barapomonae tajeba barapo pewi caurimonae. Jopa apara tajebyo Nacom. Jopa ichichipaeinyo xua caemonae pana naexaname caurimonae pijimonaetha. Metha baraxua paexanaetsipame poxonae panabarũ xaneme pomonae nacaetuta pexaenexa po wi jiwi tajeba ibo nacomun. ²¹ Paxam panabaname pon jiwi Pecanamataxeinaein pia penabanaethopaewatha tatsi yawa xua paapameno. Jopa paca itacupaeyo xua panabaname yawa xua paapameno ichaxota exanempa cauri pia cui coyene pomonae jopa pejume cowuntsiwi.

²² Icha waxainchi wunae jaintatsi caurimonae poxonae xainchi po pewi jiwi tajeba ibo nacom bapoxonae waxainchi exanatsi xua pon jiwi Pecanamataxeinaein naca caseba pia wanaca asiwixae. Waxainchi jopa xeinaetsi po peyapuswa xua bichocono daunwei xua beyacaincha Nacom.

Meje xua Pablo yabara paeba xua bewa jiwi yabara nanta xeinae pewi poxonae xane

²³ Baraxua bequein xainyei poxonae jiton jeye: “Neitacupa xua taexanaewa pocotsiwa ichichipan”, jei bapon. Daichitha jopa daxita nacata wunaeyo xua pocotsiwa exanatsi. Bequein waxainchi naca itacupa xua waexana dubenanaebiyawa pocotsiwa xua waichichipaewatsi. Daichitha daxita baxuan jopa naca yawenaeyo xua wajume cowunta dubenanaebiyawa Jesús. ²⁴ Jopa bewa payabara nanta xeinaem xua saya painya coutha nexa xua painya nenayawenaenexam. Jame bewa payabara nanta xeinaem xua apara irũ ichamonae painya neyawenaenexarũ.

²⁵ Po pewi pacomoqueibame po wi jiwi caenaeta pecaenaetsi bontha, painya xoba matha payabara yainyabeibame barapo pewi. Jopa payainyabinde icha metha xua apara po wi bayatha jiwi tajeba ibo nacom. Jame bara saya itatemaya paxaibare. Xain bapoxonae painya juntu coyene jopa paca tsipaebiyo xua apara abe paexaname.

²⁶ Nacom Pejume Diwesitha jeye: “Barapo cae pin nacue yawa xua xuan xeina barapo cae pin nacuathe Nacom pon Pecanamataxeinaein bapon piawan”, jei Nacom Pejume Diwesitha. ²⁷ Poxonae jiton pon jopa pejume cowuntsin Jesús, paca tsiwaba pexaewa xua pia paca barũ xaetsi, icha paichichipame moya pana napuna xaema. Paxaema pocotsiwa xua pexaethopaewatha bobena. Jopa payabara yainyabinde barapo pexaewa icha metha barapo pewi ibo nacom werena capona. Xain bapoxonae painya juntu coyene jopa paca tsipaebiyo xua apara abe paexaname. ²⁸ Ichacuitha metha ichun paca tsipaebichipa, xua jeye: “Apara barapo pewi jiwi tajeba ibo nacom poxonae wunae jainta barapo ibo nacomtha”, jei bapon. Bapoxonae painya xoba paxaneme barapo pewito. Tsipei icha barapo pewi pajiwana xaename abe exana pacana exaname pontha pon xua yabara paca tsipaeba barapo pewi. Poxoru ichamonae pomonae pejume cowuntsiwi Nacom, yabara nanta xeina xua apara jiwi abe exana icha barapo wi xane. Daxota bapon junuwa xua abe exana icha pexaewa tsane barapo pewito. Icha jopa baxua peitũtha paexanaem tsane bapoxonae bapon juntu coyene xanepanaya poponaena Nacomtha. ²⁹ Yabara paca tsipaebatsi po coyene xua ichun yabara nanta xeina barapo pewi pejuntu coyenewatha. Jopa apara yabara paca tsipaebichi po coyene paxam xua payabara nanta xeiname barapo pewi painya juntu coyenewatha.

Ichitha metha ichun neyainyabichipa, jei tsipae: “¿Eta pocotsiwa metha nantawenonan xua taexanaewa pocotsiwa ichun yabara nanta xeina barapo pewi?” jei tsipae. ³⁰ Equeicha metha bapon jei tsipae: “Poxonae pexaewa nabanen Nacomtha tsipaeban barapo pexaewa nexa, janje: Nacom, maisa juntu coyene weiweinan xua barapo pexaewa tanecatsum, jan. Icha baxua exanan ¿eta pocotsiwa metha nexata ichamonae abe neyabara paeba poxonae xan barapo pexaewe?” jei tsipae. ³¹ Yabara paca tsipaebatsi baraxuan daxita xua xuan painya neapaewan yawa daxita xua xuan painya nenabanaewan yawa daxita icha coyeneinno xua xuan painya neexanaewan daxita bara pocotsi coyenein beta paexaneibare xua daxota poxonae jiwi paca cui taibina bapoxonae jiwi wunae jainteibina Nacom. ³² Jopa paexanaeinde pocotsiwa

xua abe paexaname xua pocotsiwa daxota ichamonaе jupa exanaena. Baraxua jopa paexanaeinde judiomonaetha, iru pomonaetha pomonaе jopa judiomonaе naexanaeyo, iru pomonaetha pomonaе Nacom pejume cowantsiwichi jiwanaмonaе. ³³ Xan ichichipan beta taexanaewa po coyene xua ichamonaе tsita xanepanatsi. Jopa exanaeinyo pocotsiwa xua tacoutha taichichipaewa. Saya meisa beta exanan po coyene ichamonaе tsita xanepanatsi xua po coyenewatha barapomonaе peyawenaenexatsi xua pecapanenebiyaenexatsi abe pia peexanae cuiru coyenein weya.

11

¹ Paexanaponde icha be pocotsi coyeneya ichin poxonaе exanaponan, tsipei exanan pocotsiwa Cristo exanapona.

Meje xua Pablo yabuxi yabara paeba powaxi poxonaе ena penacaetutsi botha xua poxonaе wunaе jainta Nacom

² Tamonaе pam paca weyatainchi tsipei paneyabara nanta xeinaponame xua daxita coyeneyatha. Paxam paexana dubenanaebiyame pocotsiwa xua paca cuidubatsi.

³ Ichitha ichichipan xua painya neyaputaewa xua Cristo canamataxeina daxita pebiwitha. Barichiru daxita pebiwi barompaya piseuriwi canamataxeina. Barichi Nacom Cristo canamataxeinatsi. ⁴ Icha pebin nantasipa acata poxonaе Nacomtha tsipaeba xuano poxonaе cueicueijeі Nacom Pejume Diwesi, barapon Cristo jopa baru cui itura jinaetsi. Saya pia coutha ainya cui nacana exana. ⁵ Jame icha yabuyo jopa nantasipa acatsiyo xua poxonaе cueicueijeі Nacom Pejume Diwesi, xuano poxonaе Nacomtha tsipaeba, bapowa pia pebin jopa baru cui itura jinaeyo poxonaе jopa nantasipa acatsiyo paparuwatha. Bapowa tsita itapeinya xeina xua jopa exanaeyo pocotsiwa pia pebin itorobatsi. Baraxua jupa icha be poxonaе ichi xua daxita matana sibatsi abe peexanaexae.

⁶ Icha jopa yabuyo nantasipa acatsiyo bewa barapowa daxita nanta sibina. Ichitha icha barapowa aura xua penanta sibiwa daxota bewa nanta acatsina. ⁷ Poxonaе Nacom exana pebin barapo pebin Nacom cui jupatsi. Daxota barapo pebiwi xeinaru barapo pecanamataxeinaе coyenewa po coyenewa Nacom xeina. Pebin jopa bewa nantasipa acatsina poxonaе Nacomtha tsipaeba, xuano poxonaе Nacom Pejume Diwesi cueicueijeі xua daxota pebaru cui itura jinaenexa xua Nacom pebaru cui itura jinaenexatsi. Ichitha yabuyo bewa baru cui itura jinae pia pebin, tsipei pia pebin canamataxeinatsi. ⁸ Poxonaе Nacom forota jopa Nacom exanaeyo pebin yabuyo weya. Saya jame Nacom exana yabuyo pebin pexainya weya tatsi. ⁹ Nacom jopa forotsiyo xua pebin yabuyo tsiexanatsi. Jame Nacom forota xua yabuyo pebin tsiexanatsi. ¹⁰ Daxota yabuyo bewa nanta acatsina penacaetutsi botha. Bapoxonaе bapowa tsita itapeinya xeina matatsunpiwimonaetha xua bapowa baru cui itura jinae pia pebin pecanamataxeinaexaetsi. ¹¹ Daichitha pomonaе Nacom pejume cowantsiwixae, pebin nantawenona yabuyo, iru yabuyo nantawenona pebin. ¹² Bequein Nacom exana yabuyo pebin peyene weya tatsi, ichitha pebiwi ba nowaеumenapona yabuxi weya. Barapo naxobe coyenewabe Nacom forota, pebin yawa yabuyo.

¹³ Pananta xeinare xua icha bara xaniwaicha xua yabuyo jopa nanta acatsiyo poxonaе Nacomtha tsipaeba penacaetutsi botha xua poxonaе wunaе pejainchinexa Nacom.

¹⁴ Wacui coyenewa ba naca yaputane exana xua pebiwichi jopa bewa antanapiya naexanaetsi. Baxota ba aura naca exana. ¹⁵ Barichiru wacui coyenewa ba naca yaputane exana xua yabuxi wunaе exana poxonaе nantana copaba xua antanapiyiya. Bapoxonaе yabuyo pia pentanantha nantasipa acata. ¹⁶ Pon ichichipa xua yabara pana nejume matsontsonoba baxuan, pajanje bapontha: “Barapo coyene pacuiduban. Matauta daxita penacaetutsi bonmonaе jiwі pomonaе Nacom pejume cowantsiwi peburuya pana nabaru jupaya nanta xeinan tsipei icha coyene jopa payaputaеinyo”, pajan.

Meje xua Pablo yabara paeba xua abe exana pomonaе pejume cowantsiwi Nacom poxonaе nainya xane po penabanaewa cayabara nanta xeina xua Jesús pia petsitupaewa jiwі

¹⁷ Pacata tinatsi anoxuae xua po coyenein yabara xua jopa tana neitacupaewa xua tapaca tsipaebiwatsi xua beta painya neexanaewa. Bequein pana nabaru nacaetutame ichitha painya juntu coyene jopa paca cana exanaeyo xua paayapusu tsoponaem. Maisa apara abe paexaname. ¹⁸ Copiya matha paca tsipaebatsi janje: “Ichun netsipaeba xua pinae poxonae pana nabaru nacaetutame, wuna painya nejainchinexa Nacom, pinae ainyamonaen tsanaya pana natsabame. Bapoxonae pinae pana najume matsontsonobame”, jan. Nanta xeinan xua apara xainyei po coyene ichamonaen netsipaeba xua paca yabara paeba. ¹⁹ ¡Moya ainya bicheiton pana naexande xain bapoxonaen pana najume matsontsonobame! ¡Xain bapoxonaen ichamonaen tane xua ichamonaen petaenexatsi pomonaen jopa iru najume matsontsonobiyo pomonaen xua beta peexanaewi! ²⁰ Bequein pana nabaru nacaetuteibame xua painya xaenexa pexaewa poxonaen pacayabara nanta xeiname xua pon jiwi Pecanamataxeinaen paca tsitupa, daichitha saya paxaneme. Apara jopa pacayabara nanta xeinaem barapo coyene. ²¹ Daxita paxam carepaya barompaya pia pexaewa nainya xane. Jopa pawuna ewateibim ichamonaen xua painya nenabaru xaenexa. Daxota ichamonaen jainpa pomonaen cotacaya pata. Ichamonaen bichocono tonsana beya poxonaen nacupa exana peatsaxa meran xua apa poxonaen muxuna xane pexaewa. ²² Apara paxeiname painya bon ichaxota paca itacupa xua pana napena jubame. Baraxua be paichaxaibim pomonaen Nacom pejume cowuntsiwichi pomonaen penacaetutsi bomonaen jiwi poxonaen baxua paexaname. Aura paexaname pomonaetha pomonaen peacopeibiwi pomonaen jopa itacupaetsi xua capana pexaewa, pomonaen cotacaya pepatsixae. ¿Eta paca yabara jumichicuae tsainchi? Paca yabara jei tsainchi: ¿Bara beta xanepanaya paexaname jan tsane? ¡Jume! Baxua jopa neitacupaeyo xua tapaca yabara paebiwatsi.

Meje xua Pablo yabara cuiduba pexaewa po pexaewa poxonaen jiwi cayabara nanta xeina Jesús (Mt 26.26-29; Mr 14.22-25; Lc 22.14-20)

²³ Po coyene xua paca cuidubatsi baxua copiya Nacom necuiduba. Paca jeichi: Po merawitha Jesús caenaetatsi pon jiwi Pecanamataxeinaen, barapo merawitha Jesús pan pita pecobetha. ²⁴ Poxonaen najume weta xua paxa tsipaeba xua jei: “Axa maisa juntu coyene weiweinan xua tanecatsiwam pan”, jei, bapoxonaen pan epa janaca. Bapon barai pijimonaen jeye: “Panore pan yawa paxaemano. Barapo pan neyabara caunuta xua tapepon. Tapepon inta atene exanaeinchi painya nepaca cayawenaenexa tsane xua painya tanejume cowuntsiwaxaem tsane. Poxonaen baxua paexaneibame xua paxaibame panecayabara juntanaineibare painya juntu coyenewatha”, jei Jesús xua pijimonaen tsipaeba. ²⁵ Barichiya exana poxonaen najain weta. Bapoxonaen corotiyopi pita pecobetha yawa jeye: “Pena petsiwunaen muxu dutsi coyenewa paca tsipaebatsi. Barapo uva mera po mera xua corotiyotha tsijunta eca, barapo uva mera yabara caunuta tajana xua jana othoparenaen poxonaen tupaen. Barapo jana tsita itapeinya xeinaena xua jiwi pinmonaen yabara junteinaen abe pia peexanaen cuiru coyenein tatsi. Daxita coyeneintha poxonaen baxua paexaneibame xua paapeibame barapo uva mera, bapoxonaen panecayabara juntanaineibare painya juntu coyenewatha xua tapaca catsitupaewaxaetsi”, jei Jesús, xua pijimonaen tsipaeba. ²⁶ Daxita tsaiibi poxonaen paxaibame pan yawa paapeibameno barapocotsi uva mera xua tsijunta eca corotiyotha, jiwi patsita itapeinya xeiname xua Cristo pacui yabara juntanainame xua painya nepaca tsitupaewa. Baxua paexaneibare beya poxonaen equeicha Jesús patopaetsica, pon jiwi Pecanamataxeinaen.

Meje yabara xua poxonaen jiwi bewa beta exanaen xua poxonaen xane po pexaewa poxonaen cayabara nanta xeinatsi Jesús

²⁷ Pon xane barapo pan xuano apa barapo uva mera xua tsijunta eca corotiyotha xua Jesucristo cayabara nanta xeinatsi icha bapon jopa juntu coyene xanepanaeyo Nacomtha, apara abe exana Cristotha. Bapoxonaen bapon Nacom tsita xeinatsi xua penatsicuentsiwa xua abe peexanaexae Cristo pepontha tatsi xuano xua pia pejanathano

tatsi tsipei bapon jopa barũ cui itura jinaeyo barapo coyene. ²⁸ Daxota daxita jiwi bewa barompaya matha pewũnaeya najũntũ coyene cayabara nanta xeinaena. Barapo jiwi bewa nanta xeinaena icha metha bara xanepanaya exana beya poxonae xaena barapo pan xuano poxonae apa barapo uva mera xua tsijunta eca corotiyotha. ²⁹ Pon xane barapo pan xuano xua apa barapo uva mera xua tsijunta eca corotiyotha xua Jesucristo peyabara xaenexa ichacuitha bapon natsicuenta Nacomtha abe peexanaexae. Bapon natsicuenta Nacomtha tsipei matha jopa yabara nanta xeinaeyo barapo pexaewa xua apara bichocono ainya cui coyenewa xeina beyacaincha icha pexaewa. ³⁰ Daxota pinmonae pajiwana atenem xuano jopa xeinaeyo peajũntũyapusuwa. Daxota ichamonae bayatha pajiwana werapame. ³¹ Poxonae apatsi uva mera xuano poxonae xainchi pan po pexaewa poxonae Cristo cayabara nanta xeinatsi, matha bewa najũntũ coyene cayabara nanta xeinaetsi, xua icha metha bara wũnae waexanaewa. Bapoxonae xain Nacom jopa naca atene exanaeyo xua wanatsicuentisiwaxae xua abe waexanaexae. ³² Bequein baxua Nacom nacata exana wanaca cuidubinexa xua equeicha xanepanaya waexanaenexa tsane. Nacom baxua nacata exanaena xua jopa wanaca yabara jeinexa: “Paxam abe paexaname icha ichi pomonae jinompa barapo cae pin nacuathe pomonae bichocono abe peexanaewi, pomonae jopa pejume cowũntsiwi”, xua jopa pewanaca yabara jeinexa.

³³ Daxota tamonae pam poxonae pana nacaetutame xua painya nabarũ xaenexa po pexaewa xua poxonae Jesucristo cayabara nanta xeinatsi, matha abũ ichamonae paewateibare. ³⁴ Icha ichũn jainpa bũ bapon matha pia botha xane pewũnaeya xua poxonae napatopaena penacaetutsi botha xua poxonae wũnae jainta Nacom. Bapoxonae itacũpatsi xua bapon penaxaewa po pexaewa poxonae Jesucristo cayabara nanta xeinatsi. Bapoxonae Nacom jopa peraxa jũbi tsane bapon xua abe peexanaexae poxonae nanacaetuta pomonaetha pomonae Nacom pejume cowũntsiwichi. Poxonae paca siwa ponaeinchi xua tapaca taenexa tsainchi, bapoxonae paca cuidubinchi pocotsiwan xua yabara pana neyainyabame.

12

Meje xua pejũntũ cui coyenein yabara po pejũntũ coyenein Nacom pia Pejumope tũnaxũ tatsi amanaya cata daxita carepaya pomonaetha pomonae Nacom pejume cowũntsiwichi

¹ Tamonae pam, paxam pomonae irũ painya nejume cowũntsiwixae Jesucristo. Yabara paca tsipaebatsi po coyene ichichipan xua painya neyaputaewa. Nacom pia Pejumope tũnaxũ tatsi cata pejũntũ cui coyenein daxita barompaya carepaya pomonaetha pomonae Nacom pejume cowũntsiwichi. ² Paxam payaputaneme xua abe paexaname pewũnaeya poxonae pajume cowũntame. Pacopatame xua bara ichamonae ichawa beya paca matacapona xua wũnae painya nejainchinexa ibo nacomũn, po ibo nacomũn jopa cueicueijeio. ³ Daxota ichichipan xua painya neyaputaewa tsane xua poxonae jeye: Dapocotsin aibi, pon itacũpatsi xua jeye: “Jesús apara jopa Nacom Pexanto tatsi”, xua poxonae jei, icha bapon xeina Nacom pia Pejumope tũnaxũ tatsi pia peayapusu itorobi coyenewa tatsi. Barichi dapocotsin aibi pon itacũpatsi xua poxonae jeye: “Bapon Jesús apara pon jiwi Pecanamataxeinaein”, xua poxonae jei, icha bapon jopa xeinaeyo Nacom pia Pejumope tũnaxũ tatsi pia peayapusu itorobi coyenewa tatsi.

⁴ Jiwi itacũpatsi xua daxita carepaya barompaya pexeinaewa ainya jũntũ cui coyenein pomonae pejume cowũntsiwixae Nacom. Barapo jũntũ cui coyenein jopa nacui coyene jũpaeyo. Bequein daxita jiwi xeina barapo coyenein daichitha bara saya compa pon pecatsixae apara bapon Nacom pia Pejumope tũnaxũ tatsi. ⁵ Jiwi pomonae pejume cowũntsiwixae Nacom, itacũpatsi xua daxita carepaya barompaya pexeinaewa ainya petanacuichi coyenewan Nacom nexa. Ichitha meisa saya bapon Nacom compa pon jiwi Pecanamataxeinaein daxitatsi waxainchi tanacuitatsi bapon. ⁶ Jiwi pomonae Nacom pejume cowũntsiwixae itacũpatsi xua pexeinaewa ainya cui coyenein po coyeneinya xua Nacom petanacuichiwatsi. Ichitha daxita barapo coyenein jopa nacui coyene

jupaeyo. Saya compa Nacom pon daxita barapo jiwu cana exanatsi xua peexanaewa daxitan barapo coyeneinyatha. ⁷ Nacom pia Pejumoŕe tũnaxũ tatsi tsita itapeinya xeina Nacom pia peyapusu itorobiwa tatsi. Baxua exana poxonaŕe Nacom barompaya naca cana exana xua beta waexanaewa wayawenaenexa tsane daxita jiwitha. ⁸ Ichamonaŕe jiwanaŕha, Nacom pia Pejumoŕe tũnaxũ tatsi cata pejuũtu cui coyenewa xua po coyene barapomonaŕe pejuũtu coyenetha beta yaputane xua peexanaenexa pocotsiwa pecueicueijejewa ichamonaetha. Barichi ichamonaŕe jiwanaŕha Nacom pia Pejumoŕe tũnaxũ tatsi cata pejuũtu cui coyenewa po coyene xua beta pecuidubiwa po coyene peyaputaewa xua daunwei yabara yaputane pecana exanaenexa xua ichamonaŕe yabara yaputane pecana exanaenexatsi. ⁹ Ichamonaŕe jiwanaŕha Nacom pia Pejumoŕe tũnaxũ tatsi cata peyabara jume cowũntsi coyenewa xua daxota bapomonaŕe nanta xeina xua bara itacũpatsi xua peexanaewa daxita coyenein xua Nacom itoroba xua bapomonaŕe peyawenaexatsi Nacom. Barichi ichamonaŕe jiwanaŕha Nacom pia Pejumoŕe tũnaxũ tatsi cata xua po coyenewatha peatenewi axaibi peexanaewatsi. ¹⁰ Ichamonaŕe jiwanaŕha, Nacom pia Pejumoŕe tũnaxũ tatsi cata po coyenewatha pexeinya petsita itatsi coyene peexanaewa. Ichamonaŕe jiwanaŕha, Nacom pia Pejumoŕe tũnaxũ tatsi cata po coyeneya xua pecueicueijejewa Nacom Pejume Diwesi. Ichamonaŕe jiwanaŕha Nacom pia Pejumoŕe tũnaxũ tatsi cata po coyeneya beta peyaputaewa xua po coyene poxonaŕe Nacom pia Pejumoŕe tũnaxũ tatsi jiwu cueicueijejewa exanatsi yawa po coyene poxonaŕe jiwu cueicueijejewa exanatsi caurimonaŕe. Ichamonaŕe jiwanaŕha Nacom pia Pejumoŕe tũnaxũ tatsi cata po coyeneya xua ichamonaŕe pecueicueijejewa icha jumeintha, po jumein bequein jopa nacuidubiyo. Ichamonaŕe jiwanaŕha Nacom pia Pejumoŕe tũnaxũ tatsi cata po coyeneya xua barapomonaŕe xuya jume yaputane exana po jumein xua ichamonaŕe paeba po jumein xua ichamonaŕe bequein jopa nacuidubiyo. ¹¹ Daxita barapo juũtu coyenein exana ducuaenaŕbiya pon Nacom pia Pejumoŕe tũnaxũ tatsi. Barapo jumope daxita coyenein meisa compa exana, po jumope Nacom pia Pejumoŕe tũnaxũ tatsi. Barapo pejumope daxita carepaya jiwitha cata icha be pocotsi coyeneya barapo jumope peichichipaexaŕe xua pecatsiwa.

Meje yabara xua daxitatsi be caemonaŕetsi Jesustha

¹² Pepon bequein caein ichitha nawita xeina xua pia pecueyabiwatsi, petaxube, pesitobeno, pemaxũbeno yawa ichawanno. Barapo pepon pecueyabiwatsi bequein ainyawan daichitha daxita bara caewa ompin naexana pepontha. Barapocotsi juũta coyeneya ichi, Cristo pinmonaŕe xeina pia pejume cowũntsiwichi bequein bara barapon Jesús caein. ¹³ Barapocotsi juũta coyeneya ichi, waxainchi seicaya jiwichi. Daichitha daxita waxainchi be caemonaŕe jiwichi wajume cowũntsixaŕe Jesús. Ichamonaŕe waxainchi jiwanaŕtsi judiomonaŕetsi. Ichamonaŕetsi pomonaŕe jopa judiomonaŕe naexanaeyo. Ichamonaŕetsi pomonaŕe amanaya tanacuitatsi ichamonaŕe nexa. Ichamonaŕetsi pomonaŕe saya wajinompaewi xua saya wawan wanata exanaŕe jiwu. Daichitha daxita waxainchichi naca bautisaba. Waxainchi be caemonaŕetsi naexanatsi Nacom pia Pejumoŕe tũnaxũ tatsi wanaca baru jinompaexaŕe. Nacom daxita waxainchi barompaya carepayatsi naca cata barapo pejumope tũnaxũ, pon bara saya meisa caein.

¹⁴ Pepon jopa xeinaeyo bara caewa xua pecueyatsiwatsi. Aparu nawita xeina xuan pecueyabiwatsi. ¹⁵ Metha petaxu jei tsipae: “Xan apara jopa pecobeinyo, daxota xan pepon nexa aibi”, jei tsipae. Bequein baxua paebichipa daichitha apara bara pepon cueyatatsi icha itacũpatsi xua paeba. ¹⁶ Metha pemuxuyoroto jei tsipae: “Xan apara jopa peitamaiqueitanyo daxota xan pepon nexa aibi”, jei tsipae. Bequein baxua paebichipa daichitha apara bara pepon cueyatatsi icha itacũpatsi xua paeba. ¹⁷ Icha daxita wapepon u peitacuereto tsipae, jopa naca itacũpaeyo xua wajume taewa tsipae. Barichi icha wapepon daxita u pemuxuyoroto tsipae, jopa naca itacũpaeyo xua watuxubiwa tsipae. ¹⁸ Ichitha Nacom pitacuiya duba xua ichaxota ichichipa duba daxita baxuan xua pocotsiwan pepon pecueyabiwatsi. ¹⁹ Icha daxita baxuan saya u najũpaetsipa,

bapoxonae jopa xapain xeinaetsipaetsi pepon. ²⁰ Bequein anoxuae nawita xeinatsi xuan wanaca cueyabiwan wapepontha, daichitha awiya bara cae pepontsi.

²¹ Peitacuereto jopa itacupaetsi xua pejeiwa pecobetha: “Xam jopa cacana-matawenonaetsi”, jopa pejeiwa. Barichi pentasipa jopa itacupaetsi xua pejeiwa petaxubetha: “Paxambe jopa paca canamatawenonaetsibe”, jopa pejeiwa. ²² Po wanaca cueyatsiwa wapepontha xua jopa naca tsita ainya cuiyo, apara bara baxua ainya cui wacanamatawenonaenexa. ²³ Wapepon xua wanaca cueyatsiwa xua jopa naca tsita ainya cuiyo, paparuwatha nama acatatsi xua wabarũ itura jinaenexatsi. Pocotsiwa wanaca cueyatsiwa xua wapepontha xua pocotsiwa jiwi jopa benaca taeyo, naacabatsi paparuwantha wapin uraxae. ²⁴ Po wanaca cueyatsiwa wapepontha pocotsiwa jiwi nacata tane baxuan jopa ainya cuiyo xua waacabinexa paparuwatha xua jopa waauraxaetsi. Nacom nacata exana pepon xua waxainchi beta nayaewatatsi paparuwatha, po wanaca cueyatsiwa wapepontha xua bichocono pecanantawenonaewa baxua. ²⁵ Nacom baxuan exana xua jopa baxuan penawepu tsabinexa pepon weya. Daxita baxuan xua wanaca cueyabiwan eenatsi xua nantiya penayawenaewa tsane icha pomonae Nacom pejume cowũntsiwichi ichi xua nantiya bewa nayawenaewa. ²⁶ Icha barapo wanaca cueyabiwan caewa jiwana wepu atene, bara barichi pepon daxita atenerũ. Mataũta icha baxuan caewa jiwana ainya cui cana exanatsi bara daxita nabarũ weiweinaya dubena pepontha.

²⁷ Paxam Jesucristo piamonae tatsi jiwana pamxaem, caemonae pananaexaname, icha Jesucristo ichi xua xeina pia pecueyabiwatsi pia pepontha. Bequein bara caemonae pananaexaname ichitha carepaya barompaya patanacuitame Cristo. ²⁸ Nacom itapeta xua pomonae pejume cowũntsiwichi xua pomonae pia petanacuichinexa tsainchi. Copiya itapetatsi pomonae Jesucristo pia peitorobi jiwi tatsi. Bapoxonae irũ itapetatsi pomonae Nacom pia peitorobi jume pepaebiwi. Equeicha bapoxonae irũ itapetatsi pomonae jiwi pecuidubiwi Nacom Pejume Diwesi. Bapoxonae irũ itapetatsi pomonae pexeinya petsita itutsi coyenewan exana. Bapoxonae irũ itapetatsi pomonae axaibi peexanaewi peatenewi. Irũno bapoxonae itapetatsi pomonae jiwi peyawenaewi. Bapoxonae irũ itapetatsi pomonae peitorobiwi pomonaetha pomonae pejume cowũntsiwi. Irũno bapoxonae itapetatsi pomonae cueicueijeji icha jumeintha, po jumein bequein jopa nacuidubiyo. ²⁹⁻³⁰ Nacom jopa apara daxita piamonae exanaeyo pomonae Jesús pia peitorobi jiwi tatsi. Mataũtano Nacom jopa apara daxita piamonae exanaeyo pomonae Nacom pia peitorobi jume pepaebiwi. Barichi Nacom jopa apara daxita piamonae exanaeyo pomonae jiwi pecuidubiwi Nacom Pejume Diwesi. Barichi jopa apara daxita jiwiyo pomonae exana pexeinya petsita itutsi coyenewan. Mataũtano jopa apara daxita jiwiyo pomonae axaibi peexanaewi peatenewi. Barichi jopa apara daxita jiwiyo pomonae cueicueijeji icha jumeintha po jumein bequein jopa nacuidubiyo. Barichi jopa apara daxita jiwiyo pomonae xuya piamonae yabara yaputane exana po jumein ichamonae cueicueijeji po jumein bequein jopa nacuidubiyo. ³¹ Ichitha paxam bewa paichichipaename po jũntũ cui coyenein xua bichocono wũnae po coyenein xua Nacom amanaya cata piamonaetha.

Meje xua Pablo yabara paeba peantobe coyenewa

Ichitha anoxuae yabara paca cuidubinchi icha jũntũ cui coyenewa po jũntũ cui coyenewa bichocono toxeinchiya wũnae beyacaincha xua po jũntũ cui coyenein aunxuae yabara paeban.

13

¹ Metha icha bequein neitacupaetsipa xua tacueicueijejiwa ainya jumein po jumein ichamonae cueicueijeji, xuan po jumein matatsunpiwi cueicueijeji. Bequein metha neitacupaetsipa daichitha icha jopa ichamonae tsita xeinaeinyo peantobe coyenewa, bapoxonae saya apara pin busi jumein exanan poxonae saya cueicueijan. ² Metha xan Nacom pia peitorobi jume tacueicueijan tsipae, mataũtano metha yaputaetsipan daxita po coyenein Nacom moya yawũn xeina xua bexa Nacom exanaena, mataũtano metha

yaputaetsipan daxita peyaputae coyenewan, matautano metha beta jume cowantsipan xua taneitacupaewa xua tsipaeban demxuwatha xua peponaenexa. Bequein metha xeinaetsipan daxita barapo coyenein ichitha came jopa xeinaeinchipae peantobe coyenewa barapoxonae jopa ainya cui jitonyo. ³ Icha peacopeibi jiwitha catan daxita pocotsiwa xeinan, yawano icha caenaetan tapepon xua tanetautsinexa tatupaein tajume cowantsixae, ichitha awiya came jopa xeinaeinchipae peantobe coyenewa daxita jiwi nexa, Nacom jopa tsita ainya cuiyonyo.

⁴ Jame pon xua peantobe coyenewa xeina daxita jiwi nexa bapon jame juntea popona poxonae bequein ichamonae abe taexanaetha xua bapon bequein abe taexanaethatsi. Barichi pon peantobe coyenewa xeina, bapon jame amanaya yabara nanta xeinaeya yawena ichamonae. Bapon jame jopa peyabara uwin pocotsiwa ichamonae xeina. Matautano bapon jame jopa pia coutha penayabara nanta xeinaein xua peainya cui jiton. Matautano jame bapon jopa peaebin jiwi. ⁵ Barichi bapon jame jopa atsaquiya pepaebin. Matautano bapon jame jopa peyabara nanta xeinaein xua saya u piawa nexa. Bapon jame jopa peanaepanaein ichamonaetha. Bapon jame xuya jopa peyantomateibin xua xuya peexanaenexa abe bapontha. ⁶ Barichi bapon jame jopa juntu coyene weiweinaeyo poxonae ichamonae abe exana. Saya bapon jame juntu coyene weiweina poxonae ichamonae bara xainyeya exana. ⁷ Pon ba jame peantobe coyenewa xeina ichamonae nexa, bapon jame exanapona beta bequein ichamonae daunweya ayapubeya taexanaetha xua bapon daunweya ayapubeya taexanaethatsi. Bapon ba jame yabara jume cowantapona ichamonae xua barapomonae pomonae ichamonaexae itacupatsi xua xanapanaya peexanaewa. Matautano bapon jame yabara jume cowantsiya ewatapona xua ichamonae bexa beta peexanaewa tsane bequein abe peexanaewi. Matautano bapon ba saya juntea popona bequein bapon abe taexanaethatsi ichamonae.

⁸ Po coyene xua jiwi antobe ichamonae barapo coyenewa bapana jopa weraweracae tsane. Jopaena matabi po matabitha jopa nantawenonae tsane xua pomonae pecueicueijeji jiwi Nacom nexa pocotsiwa Nacom yaputane exana. Barichino jopa cueicueijeji tsane icha jumeintha po jumein barapomonae jopa bequein nacuidubiyo. Matautano jopa nantawenonae tsainchi po coyene peyaputae coyenewa. ⁹ Anoxuae wayaputae coyenewa nacata seica daxota be conotha yaputainchi. Matautano Nacom yabara wacueicueijejiwa nacata seica daxota be conotha yabara cueicueijeichi Nacom. ¹⁰ Ichitha poxonae Cristo patopaetsica pon daxita coyenein peyaputaein bapoxonae bapon naca yaputane exanaena po coyene xua nacata seica xua wayabara cueicueijejiwa bapon, xuano xua bapon yabara yaputainchi. Barapo ainya coyenebe weraweracaena bapoxonae.

¹¹ Poxonae xan awiya pexuyon cueicueijan xua najume pexuinan. Yawano nanta xeinan icha pexuyo ichi. Matautano yaputan xua pexuyoxaein. Ichitha poxonae pinyonba nacui baraxuban pocotsiwa exanaponan poxonae pexuyon. ¹² Bara juta coyeneya ichi anoxuae. Saya be conotha Nacom yabara yaputainchi. Baraxua be icha be pocotsi juta coyeneya ichi poxonae tsabocototha nayatainchi xua dudu xua daichitha jopa nataetsi. Ichitha bexa tsane yatsicaewa Nacom pentha taeinchi peitabara. Anoxuae be conotha Nacom yabara yaputan. Ichitha bexa tsane xaniwaicha daxita beta yaputaein icha anoxuae Nacom neichi xua tanejuntu coyene yaputaewa. ¹³ Acoibi po coyenewabe ataya ayapusu tsane. Meje barapo acoibi po jume coyenewabe xuje: Pejume cowantsi coyenewaru Nacomtha, barichi peyabara jume cowantsiya ewatsi coyenewaru Nacomtha, matautano peantobe coyenewaru. Jame po jume coyenewa bichocono toxeinchiya ainya cui beyacaincha xua icha coyenewa barapo coyenewa jame apara xua peantobe coyenewa, xua ichamonae waantobe coyenewatsi. Barapo jume coyenewa bichocono toxeinchiya ainya cui.

nacuidubiyo

¹ Bewa paichichipaename xua painya nexainaewa peantobe coyenewa. Barapoxonae bewano paichichipaename icha jüntu coyenein pocotsi jüntu cui coyenein Nacom amanaya paca cata. Po jüntu cui coyene xua bichocono wnae beyacaincha xua icha jüntu cui coyenewa, अपाऱा barapo jüntu cui coyenetha pacueicueijam Nacom pia peitorobi diwesi. Baxua jame bewa paichichipaename. ² Pon ba icha jumetha cueicueijei po jumeintha xua bapon bequein jopa nacuidubiyo bapon अपाऱा tsipaeba Nacomtha. Bapon अपाऱा jopa tsipaebiyo jiwitha tsipei jiwi jopa yaputaeyo pocotsiwa paeba bapon. Pocotsiwa bapon paeba अपाऱा Nacom pia Pejumope tñaxu tatsi cueicueijei exana. Bapon अपाऱा paeba pocotsiwa Nacom moya yawan xeina, pocotsiwa xua bequein jiwi jopa yaputaeyo. ³ Ichitha nama seicaya pon jame Nacom Pejume Diwesi cueicueijei jiwitha, jiwi yaputane exanaeinchi Nacom yabara. Matautano bapon poxonae Nacom Pejume Diwesi cueicueijei yawena ichamonaetha xua barapomonae jüntu cui coyene tsacabatsi xua Nacom pejume cowñtsiwatsi. Barichi poxonae cueicueijei Nacom Pejume Diwesi jüntu coyene sadujei exana pomonae anthuthurewe xua anthuthutane. ⁴ Pon ba cueicueijei ainya jumeintha po jumeintha bequein bapon jopa nacuidubiyo, bapon ba saya pia coutha nayawena xua peyabara yaputaewa Nacom. Ichitha pon ba cueicueijei jiwitha Nacom nexa po coyene Nacom yaputane exana, bapon jiwi yaputane exainchi Nacom yabara pomonae xua Nacom pejume cowñtsiwichi.

⁵ Ichichipan xua daxita paxam painya necueicueijeiwa icha jumeintha, po jumein bequein jopa panacuidubim. Jame yatsicaewa bichocono ichichipan xua painya necueicueijeiwa Nacom Pejume Diwesi ichamonaetha. Pon ba xua Nacom Pejume Diwesi cueicueijei ichamonaetha, bapon ba jame wnae exana beyacaincha pon icha jumeintha cueicueijei. Ichacuitha bapon pon icha jumeintha paeba itacupaetsi xua yabara jume yaputane exana jiwitha po jumein xua pipato pepaebi jumein. Icha bapon barapo coyene exana bapoxonae bapon yawena pomonae pejume cowñtsiwi Nacom xua beta mataropeicha pejume cocowñtaponaenexa Cristo. ⁶ Tamonae pam, icha poxonae paca siwa ponaetsipatsi paca tsipaebichipatsi po jumeintha jopa nacuidubinyo tacoutha, bapoxonae अपाऱा jopa paca yawenaetsipaetsi. Ichitha icha paca tsipaebichipatsi po diwesi Nacom neyaputane exana, baxua jame paca yawenaetsipa xua beta painya nejume cowñtsiwa Nacom. Ichitha icha ichacuitha paca tsipaebichipatsi pocotsiwa xua nacuiduban baxua jame paca yawenaetsipa. Matautano icha ichacuitha paca tsipaebichipatsi pocotsiwa xua Nacom Pejume Diwesi paeba pocotsiwa bexa Nacom exanaena, baxua jame paca yawenaetsipa. Ichacuitha icha paca cuidubichipatsi Nacom Pejume Diwesi baxua paca yawenaetsipa.

⁷ Jiwi ba tanbaba po petanbabiwa arpa matawan, xuano ba oba po peobiwa pewun flauta. Ichitha icha barapo ainya pecajume exanaewan jopa xapain busi pichapaetsipae bapoxonae jiwi jopa xapain yaputaetsipae po wei xua icha jiwi wei tanbaba. ⁸ Barichi poxonae ba jiwi naba ichamonaetha bapoxonae ba oba xua penajunutsiwa. Ichitha icha barapo busi, busi caewa, jiwi jopa xapain busi taeyo. Bapoxonae jiwi jopa itacupaetsi xua penacui wñaetsiwa xua penabinexa. ⁹ Barichi paxamtha. Icha icha jumeintha papaebichipame jiwitha, po jumeintha bequein jopa panacuidubim, xuano iru barapo jiwi jopa nacuidubiyo bapoxonae jiwi jopa xapain paca yaputaetsipae. Baraxua अपाऱा be saya poxonae sito patsipaebame. ¹⁰ Metha beya tsipae xua barapo nacuathe ainya jumein xeinaetsipa xua jiwi barompaya tsanaya pijumeintha paeba. Daxita barompaya pia matabuxmonaein tsiniya xeina po jumein xua yaputane barapomonae. ¹¹ Ichitha icha xan jopa yaputaeyo po jumetha xua ichun netsipaeba bapoxonae xan be tsita tana nanapaincha poponaein xua be icha nacza werena taponaein iru bapondu be netsita penanapaincha poponaein xua be icha nacza werena peponaein. ¹² Paxam paichichipame po jüntu cui coyenein Nacom pia Pejumope tñaxu tatsi amanaya cata piamonaetha. Yaitama baxuan paichichipame daxota bichocono pawncare barapo Nacom pia Pejumope tñaxu tatsi xua painya nepaca catsibinexa po jüntu cui bichocono

wūnae. Baxua pawūcare xua painya neyawenaenexa pomonae pejume cowūntsiwi Nacom, xua beta pejume cocowūntaponaenexa Nacom.

¹³ Daxota pon icha cueicueijei icha jumetha po jumetha bequein bapon jopa nacuidubiyo, bapon bewa wūcaena Nacomtha xua Nacom bapontha yabara jume yaputane pecana exanaenexa barapo jume. Bapoxonae bapon itacūpatsi xua yabara yaputane exana barapo jume xua ichamonae yaputane exanatsi. ¹⁴ Icha icha jumetha tsipaeban Nacomtha po jume bequein jopa yaputaeyo saya apara tajumope tūnaxū tsipaeba Nacomtha. Tajūntū coyene jopa yaputaeyo xua tatsipaebiwa Nacom. Barichi ichamonae jopa yaputaeyo xua tatsipaebiwa Nacom. ¹⁵ ¿Eta xua bewa exanocuaein? Jame, bewa wūcaein Nacom tajumope tūnaxūtha po jumein jopa yaputaeyo. Mataūtano bewa wūcaein Nacom tajūntū coyenewatha po jumein yaputan. Barichi bewa naxūnaein Nacomtha tajumope tūnaxūtha po jumein jopa yaputaeyo. Mataūtano bewa naxūnaein tajūntū coyenewatha po jumein yaputan. ¹⁶ Ichacuitha metha icha jumetha wūnae jainchipame Nacom xua nejumope tūnaxū cueicueijei cacana exana. Pomonae xua cajume taetsipa jopa cajume yaputaetsipae. Daxota jopa itacūpaetsipaetsi xua pebūrya necajume notsiwa Nacom nexa, xua pejeinexa: “Bara ichi tsane”, xua pejeiwa. ¹⁷ Poxonae bequein Nacomtha wūcaetsipame icha jumetha bara bequein wūnae pocotsiwa xua paebame, daichitha ichūn jopa yawenaetsipaetsi xua beta pejume cowūntsiwa Nacom. ¹⁸ Nacomtha tsipaeban paxam yabara, janje: “Nacom maisa jūntū coyene weiweinan, xua icha jumeintha tacatsipaebi watsi, beyacaincha daxita barapomonae xua icha jumeintha catsipaeba”, jan. ¹⁹ Ichitha poxonae pomonae Nacom pejume cowūntsiwichi nacaetuta penacaetutsi botha bara saya wūnae tsipae xua icha saya cinco po jumebe tacuidubiwa tsipae xua jiwi peyaputaewa tsane. Baxua beyacaincha xua poxonae icha metha cueicueijan tsipae diez mil po jumebe, po jume xua jopa nacuidubinyo. Bequein barapo diez mil po jumebe paebichipan daichitha jiwi jopa yaputaetsipae xua tacueicueijeiwa.

²⁰ Tamonae pam, paxam pomonae irū painya nejume cowūntsiwixae Jesucristo. Painya xoba pananta xeiname icha pexui ichi poxonae nanta xeina. Jame pajinompa dubenanaebiyama icha pexui ichi poxi pencuetixi xua jopa abe exanaeyo. Maisa jame pananta xeina dubenanaebiyama icha pomonae pinyon ichi xua nanta xeina dubenanaebiya. ²¹ Nacom jeye pia peitorobi jume diwesitha: “Paebin barapo judiomonaetha poxonae cueicueijei cana exanaein pomonae penanapaincha jinompaewi xua icha nacuapiwi po jumein xua jopa yaputaeyo pomonae xua petsipaebixaetsi. Bequein baxua exanaein ichitha cataunxuae barapo judiomonae jopa nejume tae tsane”, jei pon jiwi Pecanamataxeinaein pia peitorobi jume diwesitha. ²² Daxota xua pecueicueijeiwa icha jumeintha tsita itapeinya xeina xua pomonaetha pomonae jopa pejume cowūntsiwi xua apara Nacom atene exanaena barapomonae jopa pejume cowūntsixae. Barapo jumein jopa apara nexiyo pomonae xua bayatha pejume cowūntsiwi, poxoru Nacom jopa atene exanae tsane barapomonae. Ichitha xua cueicueijei Nacom Pejume Diwesi, baxua tsita itapeinya xeina pomonaetha pomonae pejume cowūntsiwi xua apara Nacom yawenaena barapomonae peantobexae tsipei barapomonae Nacom jume cowūntatsi. Barapo Nacom Pejume Diwesi pecueicueijeiwa jopa apara nexiyo pomonae jopa pejume cowūntsiwi poxoru Nacom jopa yawenae tsane barapomonae jopa pejume cowūntsixae Nacom. ²³ Ichacuitha metha patsipa painya nenacaetutswatha xua poxonae Nacom wūnae pajaintame pomonae jopa yabara yaputaeyo poxonae ichamonae pecueicueijeiwa icha jumeintha, irūnū pomonae jopa pejume cowūntsiwi Nacom. Icha metha daxita paxam barompaya papaebichipame icha jumeintha barapomonae jopa paca yaputaetsipae. Bapoxonae barapomonae paca yabara nanta xeinaetsipa xua apara painya nepacamatajemabi jiwi pam. ²⁴ Ichitha metha pebiwi patsipa painya nenacaetutswatha xua poxonae Nacom wūnae pajaintame pomonae jopa yabara yaputaeyo poxonae ichamonae pecueicueijeiwa icha jumeintha, irū pomonae jopa pejume cowūntsiwi Nacom. Poxonae daxita paxam Nacom Pejume Diwesi papaebichipame barapomonae paca yaputaetsipa xua papaebame. Bapoxonae barapomonae najūntū coyene cayabara nanta xeinaet-

sipa xua abe peexanaewa. Matautano barapomonaе yaputaetsipa xua Nacom petsita natsicuentisiwatsi xua abe peexanaexae xua poxonaе painya necajume taexae poxonaе papaebame Nacom Pejume Diwesi. ²⁵ Nacom exana xua barapomonaе peyaputaewa po coyene xua Nacom daxita beta yabara yaputane po coyene xua barapomonaе nanta xeina pejuntũ coyenewatha. Bapoxonaе barapomonaе yaputaena xua bara Nacom juntemaina barapomonaе abe pia peexanaе cuiru coyenein tatsi. Bapoxonaе pentabocototha umenaena xua Nacom wũnae pejainchinexa tsainchi. Barapomonaе jei tsane paxamtha: “jJaina, maisa deta Nacom paca barũ jinompa!” paca jei tsane barapomonaе.

Meje xua Pablo jeye: “Beta xanepanaya paexanaponde penacaetutsi bontha poxonaе wũnae pajainteibame Nacom”, jei

²⁶ Tamonaе pam, paxam pomonaе irũ painya nejume cowũntsiwixae Jesucristo. Paca tsipaebatsi xuaje: Poxonaе pana nacaetutame, ichamonaе painyamonae jiwana barabũ naxũnaena peweixi xua wũnae pejainchinexa Nacom. Ichamonaе irũ barabũ cuidubina ichamonaetha. Ichamonaе irũ barabũ cuidubina po coyenein Nacom yaputane exana. Ichamonaе irũ barabũ icha jumeintha cueicueijeі tsane po jumein bequein jopa nacuidubiyo. Ichamonaе irũ barabũ xuya barapo jumein yabara jume yaputane exanaena daxita jiwitha po jumein ichamonaе paeba. Daxita po coyenein xua paexaname bara wũnae paexande poxonaе panacaetutame wũnae painya jaintsinexa Nacom xua daxota xanepanaya mataropeicha painya nejume cocowũnta dubenanaebiyaenexa Nacom. ²⁷ Poxonaе icha jumeintha pacueicueijam bewa saya cueicueijeі nacueyatabe poyobe ichacuitha poxonaе acoibi poyobe. Ichitha ichamonaе ajibi tsane. Barapo acoibi poyobe bewa xuya cotacaya barompaya tsana cueicueijeі tsoponaе tsane. Bewa bapoxonaе xuya ichũn cotacaya yabara jume yaputane exanae pocotsiwan xua barapo acoibi poyobe barompaya seicaya paeba. ²⁸ Ichũn dapocotsin aibi pon itacũpatsi xua xuya cotacaya peyabara jume yaputane exanaewa, jopa bewa barapo acoibi poyobe icha jumeintha paebi tsane penacaetutsi jiwitha xua poxonaе Nacom wũnae pejainchinexa. Saya bewa moya pia coutha cueicueijeі Nacomtha. ²⁹ Bara wũnae tsipae icha saya pacopatsipame nacueyatabe poyobe xua pecueicueijeіwa Nacom Pejume Diwesi xua ichacuitha poxonaе saya acoibi poyobe. Ichamonaе bewa jume taena icha metha bara xaniwaicha paeba barapo acoibi poyobe. ³⁰ Icha ichũn eca baxota pon Nacom yaputane exana po jumein bewa cueicueijeі tsane bapoxonaе pon xua copiya asiya uncuа bewa moya ecaena xua daxota barapon pon ichũn itacũpatsi xua cueicueijeі po jumein Nacom yaputane exana. ³¹ Daxita paxam paca itacũpa xua painya necueicueijeіwa Nacom Pejume Diwesi, painya necana exanaenexa xua daxita barapomonaе penacuidubinexa. Matautano paca itacũpa painya necueicueijeіwa painya nejuntũ cui tsacabinexa daxita jiwі pejume cowũntsinexa Nacom. Ichitha jame paxam barompaya tsanaya xuya patamropatsiya cueicueijam tsoponeibim tsane. ³² Pomonaе Nacom Pejume Diwesi pecueicueijeіwi barapomonaе itacũpatsi xua penajuntũ coyene itorobiwa. Daxota barapomonaе ewata xua ichũn matha pecueicueijeinexa, xua bapoxonaе bara pecueicueijeinexa tsane ichamonaetha. ³³ Tsipeі Nacom jopa ichipaeyo xua jiwі ajumeyaexa poxonaе daxita jiwі pebũrũya cueicueijeі Nacom Pejume Diwesi. Jame Nacom ichichipa xua pomonaе pejume cowũntsiwі junteма penabarũ jinompaewa poxonaе nacaetuteiba xua wũnae pejainchinexa Nacom.

Daxita pomonaе xua nacaetuta pejume cowũntsixae Jesucristo, exana xuaje: ³⁴ Yabũxi bewa saya moya poxonaе nacaetuta pomonaе Nacom pejume cowũntsiwі xua Nacom Pejume Diwesi pecueicueijeinexa. Nacom baxua jopa copatsiyo xua yabũxi pecueicueijeіwa baxota. Barapo yabũxi bewa jume cowũntsiwa pia seuriwі pocotsiwa itorobeibatsi icha be pocotsi coyeneya bayatha Moisés pia peitorobi coyenewatha paeba. ³⁵ Icha barapo yabũxi ichichipa xua peyaputaewa pocotsiwa ichamonaе paeba, bewa barapowaxi pia boxitha yainyabi pia seuriwі. Tsipeі jopa wũnae tsipae icha yabũyo cueicueijeі penacaetutsimonaetha pomonaе Nacom pejume cowũntsiwichi xua poxonaе yainyaba pia pebiwi.

³⁶ Paxam bewa payaputaename xua Nacom Pejume Diwesi jopa copiya matha tamropata pitabiyo painya xantha. Matautano jopa paxam compa pam pomonae meisa paxename Nacom Pejume Diwesi. ³⁷ Ichamonae pomonae paxam jiwana pam nanta xeina xua xeina po juntu coyenewatha pecueicueijejiwa Nacom Pejume Diwesi. Barapo juntu coyene xua Nacom pia Pejumope tunaxu tatsi amanaya cata. Matautano ichamonae pomonae paxam jiwana pam nanta xeina xua xeina icha juntu coyenewa po juntu coyene Nacom cata. Daxita paxam bewa payaputaename xua po coyenein yabara pacata tinatsi xua apara Nacom wanaca itorobiwa. ³⁸ Icha pebin jopa bejume cowantsiyo pocotsiwa paeban, bapoxonae painya xoba pajume cowantame pocotsiwa bapon paeba.

³⁹ Tamonae pam, paxam pomonae iru painya nejume cowantsiwixae Jesucristo. Bewa jame paichichipaename xua painya necueicueijejiwa Nacom Pejume Diwesi. Painya xoba pajume itawetame poxonae ichamonae cueicueijejiwa icha jumein po jumein bequein jopa nacuidubiyo. ⁴⁰ Daxita beta xanepanaya paexanaponde poxonae pana nacaetutame penacaetutsi botha xua poxonae wuna painya nejainchinexa Nacom, xua barompaya tsanaya patamropatsiya exanaponde.

15

Meje xua Pablo yabara paeba poxonae Cristo equeicha asu exainchi

¹ Tamonae pam, paxam pomonae iru painya nejume cowantsiwixae Jesucristo. Ichichipan xua pacayabara nanta xeiname po diwesi pecapanenebiyae diwesi jume, po diwesi paca tsipaebatsi. Barapo pecapanenebiyae diwesi pajume cowantame, xua daxota beta pajume cowantsiya jinompame Nacomtha. ² Painya nejume cowanta dubenanae-biyaexae barapo pecapanenebiyae diwesi, anoxuae painya nepaca capanenebiyae jiwi pam abe painya neexanae cuiru coyenein weya. Barapo coyene paxaina dubenanae-biyaename icha beta payabara jantanainame pocotsiwa paca cuidubatsi xuano icha xaniwaicha pajume cowantame baxuan. Icha copiya jopa pajume cowantsim tsane painya juntu coyenetha barapo pecapanenebiyae diwesi bapoxonae Nacom jopa paca capanenebiyae tsane.

³ Copiya paca cuidubatsi pocotsiwa xua ichun necuiduba xua Cristo yabara. Paca cuidubatsi xua Cristo naca tsitupa abe waexanae cuiru coyenein nexa icha be pocotsi coyeneya bayatha Nacom Pejume Diwesitha yabara paeba baxua. ⁴ Poxonae Jesucristo tupa bapoxonae muthutha xotsi. Ichitha poxonae acoibi po matabibibe jopa, barapo matabibitha equeicha asu exanatsi, icha be pocotsi coyeneya bayatha Nacom Pejume Diwesitha yabara paeba baxua. ⁵ Bapoxonae Pedro tsita naitutatsi Jesucristo. Bapoxonae equeicha Jesucristo tsita naituta pia peitorobi jiwi tatsitha pomonae doce poyobe. ⁶ Bapoxonae caena equeicha Jesucristo tsita naituta pomonaetha pomonae pia pejume cowantsi jiwixaetsi, pomonae beyacaincha quinientos poyobe jiwi. Awiya pinmonae barapo bicheito jiwamonae jinompa anoxuae pomonae xua Jesús tainchi bequein ichamonae werapa bayatha, pomonae barapomonae jiwana. ⁷ Bapoxonae equeicha Santiago tsita naitutatsi Jesucristo. Bapoxonae equeicha Jesús tsita naituta daxita pomonaetha pomonae pia peitorobi jiwi tatsi.

⁸ Bapoxonae nama matapainya xan Pablon netsita naituta Jesucristo. Nacom necana exana pon pia peitorobi jiwi jiwana tatsin, xua pon tabu ducuan. Xan be pon xua nainya jemeicha jume cowantan icha be pocotsi coyeneya ichi poxonae pexuyo pena nainya jemeicha tsiperu wenaexana. ⁹ Xan wepu be conotha ainya cuin pomonae Jesucristo pia peitorobi jiwi tatsi. Ichamonae pomonae Jesucristo pia peitorobi jiwi tatsi bichocono ainya cui beyacaincha xua xan. Bequein Nacom neyabara caunuta xua xan Jesucristo pia peitorobi jiwi tatsi jiwanan ichitha auran tsipei bichocono abeya exanan pomonaetha pomonae penacaetutsimonae jiwitha pomonae pejume cowantsiwi Nacom. Pebaraxuaxae jopa bewa neyabara caunutsi baxua. ¹⁰ Ichitha xan nama anoxuae seicaiya exanan Nacom taneyawenaexae. Bapon tana neantobexae jopa abeya taexanaeinyo. Jame nama seicaya bichocono ayapusya nacuitan Jesucristo nexa

beyacaincha ichamonae pomonaexae Jesucristo pia peitorobi jiwi tatsi. Ichitha xan jopa tacouthinyo xua tanacuichiwa, apara jame Nacom neyawena tana neantobexae. ¹¹ Jopa ainya cuiyiyo pomonae bayatha paca cuiduba Nacom Pejume Diwesi. Jopa ainya cuiyiyo icha ichamonae pomonae Jesús pia peitorobi jume pepaebi jiwi bayatha paca cuiduba. Matautano jopa ainya cuiyiyo icha xan bayatha paca cuidubatsi. Saya jame ainya cui xua daxita paxan nanta jupaya tapaca cuidubiwatsi barapo Nacom pia pecapanenebiyae diwesi jume xuano xua painya nejume cowuntsiwa baxua.

Meje xua Pablo yabara paeba pomonae xua equeicha asu exanatsi petupae cuiru coyene weya

¹² Paca cuidubatsi xua Cristo equeicha asu exanatsi petupae cuiru coyene weya. Daichitha pomonae paxam jiwana pam paeba xua pinae Nacom jopa equeicha asu exanaeyo jiwi petupae cuiru coyene weya. ¿Eta xua nexata metha baxua paeba painyamonae jiwana? Bara bayatha payabara yaputanemeba. ¹³ Icha jiwi jopa equeicha asu exanaetsipaetsi petupae cuiru coyene weya, bara nexata Cristo barichipaetsi, jopa equeicha asu exanaetsipaetsi petupae cuiru coyene weya. ¹⁴ Icha Cristo jopa equeicha asu exanaetsipaetsi petupae cuiru coyene weya, bapoxonae jopa ainya cui tsipae pocotsiwan paca cuidubatsi. Bapoxonae baxua be xua pejumexaei tsipae tsipei jopa paca yawenaetsipae. Matautano barichi painya nejume cowuntsiwa jopa ainya cui tsipae jopa painya nepaca yawenaexae tsipae. ¹⁵ Icha baxua xaniyei paxan be pomonae pemuxitorobi jiwi pan tsipaein pocotsiwa Nacom payabara paeban, tsipei paxan apara papaeban xua Cristo equeicha asu exanatsi petupae cuiru coyene weya. Papaeban xua Nacom equeicha Cristo asu exanatsi petupae cuiru coyene weya ichitha baxua jopa xainyeyo icha jiwi jopa equeicha asu exanaetsi petupae cuiru coyene weya. ¹⁶ Icha petupae jiwi jopa equeicha asu exanaetsipaetsi petupae cuiru coyene weya, barichi Cristo bayatha jopa equeicha asu exanaetsipaetsi petupae cuiru coyene weya. ¹⁷ Icha Cristo jopa equeicha asu exanaetsipaetsi petupae cuiru coyene weya bapoxonae jopa paca yawenaetsipae xua painya nejume cowuntsiwa. Daxota awiya paexana dubenanaebiyaetsipame abe painya neexanae cuiru coyenein. ¹⁸ Icha baxua xainyei tsipae xua Cristo jopa asu exanaetsipaetsi petupae cuiru coyene weya bapoxonae pomonae xua bayatha werapa bequein jume cowuntsitha tsipae Jesús, ichitha weraweracaetsipa xua abe peexanaexae. ¹⁹ Waxainchi jume cowuntsiya wunae ewatatsi xua bexa tsane Cristo naca asu exanaena poxonae werapaeinchi. Ichitha icha saya jume cowunta dubenanaebiyaetsipatsi xua Nacom wanaca yawenaewa tsane barapo cae pin nacuathe, bapoxonae wajume cowuntsiwa jopa naca yawenaetsipae xua po coyene Nacom bexa asu wanaca exanaewa tsane poxonae werapaeinchi. Bapoxonae jiwi pomonae jopa pejume cowuntsiwi naca yabara jei tsipae: “¡Pai barapomonae tsobenae beyacaincha ichamonae bequein jume cowuntsitha tsobenae!” xua wanaca yabara jeichiwa tsipae.

²⁰ Ichitha pocotsiwa xua yatsicaya jame xainyei, apara jame xua Cristo bara yatsicaya asu exanatsi petupae cuiru coyene weya. Bapon Cristo copiya jiwi asu canamata exanatsi xua petupae cuiru coyene weya pomonae xua ataya tsitecaeya peasunexa xua jopa weraweracaeyo. ²¹ Jiwi abe peexanae cuiru coyenein peexanaexae daxota werapa, tsipei jiton copiya abe canamata exana, bapon Adán. Nama jiwi equeicha asu exanatsi, tsipei jiton copiya asu canamata exanatsi, bapon Jesucristo. ²² Jiwi werapaena icha Adán ichi abe peexanaexae. Daxita pomonae Cristo piamonae tatsi equeicha asu exanaeinchi petupae cuiru coyene weya icha Cristo cana ichichi xua asu exanatsi xua petsitecaenexa. ²³ Nacom iche tsane xua poxonae exanaena xuaje: Copiya matha Cristo asu exanatsi. Bexa tsane pomonae Cristo piamonae tatsi asu exanaeinchi petupae cuiru coyene weya poxonae Cristo equeicha patopaetsica barapo irathe tsique. ²⁴ Cristo weraweraca exanaena daxita, xua peitorobi coyenewan. Matautano muxuna weraweraca exanaena xua nacuan peewatsi coyenewan. Matautano muxuna weraweraca exanaena peayapusya itorobi coyenewa po peayapusu itorobi coyenewa xua jopa Nacom pia coyenewa tatsi. Bapoxonae poxonae wetsina daxita, Cristo pia peayapusu itorobi coyenewa Paxa caewa

catsina, pon Nacom. ²⁵ Tsipei Cristo bewa tsiwanaya exanaponaena daxita jiwitha be pon jiwi itorobiya pia pepa peewatsinchi. Baxua bewa exanaena beya poxona Nacom weraweraca exanaena pomona Cristo pia peitafaetabi jiwichi. ²⁶ Po coyene Nacom cotacaya exanaena xua apara piamona asu cana exanaena xua bapana jopa peweraweracaewa tsane. ²⁷ Tsipei Nacom Pejume Diwesitha paeba xua pinae Nacom itorobina Pexanto pon Jesucristo xua itorobiya pecanamataxeinaenexa daxitantha. Bequein bara Jesucristo daxitantha itorobiya canamataxeinaena saya Paxatha meisa jopa itorobiyo tsane. ²⁸ Copiya Nacom exanaena xua Cristo itorobiya canamataxeinaena daxitantha. Bapoxona Cristo Nacom Pexanto tatsi pia coutha nacana exanaena xua Paxa itorobiya pecanamataxeinaenexa tsainchi. Bapoxona Nacom xaniwaicha itorobiya canamataxeinaena daxitantha.

²⁹ Ichacuitha ichamona bautisabatsi pomona pewerapaewi tsibautisabatsi xua barapomona equeicha peasunexa pepatsinexa Nacom pia nacuatha. Icha pewerapaewi jopa equeicha asu exanaetsi petupae cuiru coyene weya bapoxona barapomona pomona pewerapaewi jopa yawenaetsi bequein petsibautisabithatsi xua ichamona bautisabatsi xua peasunexa pomona werapa. ³⁰ Daxita matabi jinompeibatsi xua naca peipeita ichamona xua naca abe exana wajume cowuntsixae. Icha jopa equeicha asu naca exanaetsipae jopa ainya cui tsipae xua wacueicueije tsurubenaebiwa Nacom Pejume Diwesi. ³¹ Tamona pam, paxam pomona iru painya nejume cowuntsiwixae Jesucristo. Daxita matabi muxu tatupeibi xua ichamona tanepipeita exaneibixae. Baraxua xaniyei icha ichi xua xaniyei xua juntu coyene weiweinan xua Jesucristo pon Wanacanamataxeinaein xanepanaya peexanaexae painya xantha. ³² Xan bara imoxoyo tatupae poxona Efeso tomarapiwi inta abe exana. Barapomona baraxua necana exana icha neuthu ichi poxona ichun waetabatsi. Bequein barapomona baxua necana exana xua muxu tatupae ichitha jopa asu neexanaetsipae petupae cuiru coyene weya icha jiwi equeicha jopa asu exanaetsipaetsi. Icha jopa equeicha caewa asu naca exanaetsipae bara saya exana dubenanaebiyaetsipatsi pocotsiwa ichichipatsi. Poxona baraxua exanatsi jupa exanatsi icha ichamona ichi pomona jopa peyabara jume cowuntsiwa xua bara asu peexanaewatsi. Barapomona jeye: “Anoxuae nabanaeinchi yawa apaeinchi, tsipei baya werapaeinchi jopa naca tsita ainya cuiyo”, jei barapomona, pomona jopa pejume cowuntsiwi.

³³ Painya xoba pacopatame xua bara ichamona painya nepaca muxutorobeibiwa. Jiwi ba pia pecayabara juta pepaebi diwesiyo ba jei: “Pomona abe peexanaewi cuiduba ichamonaetha pomonaetha pomona ichipa beta exana, xua barapomona abe peexanaenexa”, ba jei barapo diwesiyo. ³⁴ Equeicha caewa paexande po juntu coyene xua bichocono Nacom tsita xanepanatsi. Painya xoba equeicha abe paexaname. Ichamona paxam jiwana pam jopa Nacom yaputaetsi. Baxua paca tsipaebatsi xua painya neauranexa.

Meje po coyeneya xua Nacom exanaena poxona jiwi equeicha asu exanaeinchi petupae cuiru coyene weya

³⁵ Metha ichun yainyabina, jei tsane: “¿Eta po coyeneya Nacom exanaena poxona pewerapaewi equeicha asu exanaeinchi? ¿Eta pocotsi pepon barapomona xeinaena?” jei tsane. ³⁶ Barapo peyainyabiwa saya pejumexaei. Poxona paubame peubi xuto, barapo xuto bupana bocareca iratha xua pexu nantafobabinexa poxona xua nae pexuwinexa. ³⁷ Poxona paubame jopa apara pepaboto paubim xua pepa nae pexuwinexa. Jame apara ba pexu paubame, metha beya xua trigo xuto tsipae, ichacuitha metha icha pexuton tsipaeno. ³⁸ Cotacaya Nacom exana xua barapo pexu xuwa icha be pocotsi coyeneya Nacom ichichipa. Daxita peubi xuton tsanaya seicaya pia cui barompa poxona xuwa. ³⁹ Barichi jiwi pepon daxita jopa najupaeyo. Jiwi pia pepon seicaya tsanaya barompa. Duwei unupiwi pia pepon seicaya tsanaya barompa. Duwei menepiwi seicaya pia pepon tsanaya barompa. Pepupunaewi seicaya pia pepon tsanaya barompa. ⁴⁰ Peitabocotha xeina ainya pepon po ainya pepon peitabocotha pejinompawei nexa.

Barichi barapo irathe xeina ainya pepon pomonae barapo irathe pejinompaewi nexa. Po pepon pexeinya peitupanae coicha xeina xua peitabocotha jinompa barapo pepon bichocono pexeinya pepon. Barichi wapepon pexeinya pepon po pepon xeinatsi po cae pin nacuathe. ⁴¹ Xometo poto atsato pia pexeinya peitupanae coicha barompa. Barichi jomocoichato pia peitupanae coicha barompa. Opiteino pia peitupanae coicha barompa. Icha opitei pia peitupanae coicha jopa nacoicha jupaeyo icha opiteitontha po opiteiton pia peitupanae coicha xeina. ⁴² Barapocotsi jata coyeneya ichi pomonae xua equeicha asu exanatsi petupae cuiru coyene weya. Poxonae pomonae pewerapaewi iratha muthucatsi equeicha caewa tsorobo naexana petsabanaexae. Bapoxonae equeicha Nacom asu exanaena pena pepon xua petsitecaenexa. Barapo pena pepon bapana jopa tupa tsane equeicha, jopa petsabanaexae tsane. ⁴³ Barapo peru pepon jopa xeinaeyo peitupanae coicha poxonae muthutha xotsi. Ichitha jame barapo pena pepon xeina pexeinya peitupanae coicha. Barapo peru pepon jopa xeinaeyo peasuwa poxonae muthutha boca. Ichitha jame barapo pena pepon xeina peasuwa. ⁴⁴ Barapo peru pepon saya barapo cae pin nacuathe nexa. Daxota poxonae tupa, tsabana naexana, tsorobo equeicha caewa penaexanaenexa. Ichitha poxonae barapo pepon asu exanaeinchi, bapoxonae pena pepon naexanaena pejumope tunaxu nexa xua Nacom pia nacuathe peponaenexa. Icha jiwu xeina peru pepon xua barapo cae pin nacuathe nexa, barichi pena pepon xeinaena xua Nacom pia nacuatheicha nexa.

⁴⁵ Nacom Pejume Diwesitha jeye: “Po jiton copiya Nacom forota, bapon Adán. Bapon peasuwa xeina xua pepoponaenexa barapo cae pin nacuathe”, jei Nacom. Ichitha Cristo Adán bichocono toxecha ainya cuichi equeicha caewa asu peexanaexaetsi. Daxota bapon Cristo itacupatsi xua ichamonaetha cana exana xua pexeinaewa peajuntuyapusuwa xua po peajuntuyapusuwa ataya tsiteca. ⁴⁶ Copiya jopa xeinaetsi po pepon Nacom pia nacuathe nexa. Saya copiya xeinatsi po pepon barapo cae pin nacuathe nexa. Ichitha cotacaya bexa tsane xeinaeinchi po pepon pena pepon Nacom pia nacuathe nexa. ⁴⁷ Po jiton copiya exanatsi, pon tsorobo weya exanatsi, bara bapon apara saya barapo cae pin nacuathe nexa. Po jiton xua cotacaya patopa bapon apara Cristo pon itaboco wepatopeica. ⁴⁸ Po jiwu xua barapo nacuathe jinompe pia pepon exanatsi icha Adán ichichi xua pia pepon tsorobo weya exanatsi. Ichitha pomonae Jesucristo piamonae tatsixae barapomonae xeinaena pepon icha ichi xua pocotsi pepon xeina Cristo, pon xua itaboco wetsica pona. ⁴⁹ Anoxuae wapepon werapaena icha Adán pia pepon tatsi ichi xua bayatha tupa. Ichitha poxonae Nacom pia nacuathe patinchi wapepon xeinaeinchi pocotsi pepon icha Cristo pia pepon tatsi ichi xua pexeinya peitupanae coicha xeina.

⁵⁰ Tamonae pam paxam pomonae iru painya nejume cowuntsiwixae Jesucristo, yabara paca tsipaebatsi po pepon yawa jinompatsi. Barapo pepon jopa naca itacupaeyo xua wayawa patsiwa Nacom pia peitorobi nacuatheicha xua ataya tsitecaeya wajinompaenexa tsane, tsipei barapo pepon tupa. ⁵¹ Paca tsipaebatsi pocotsiwa xua namicha xua jiwu jopa yabara yaputaeyo xua Nacom moya yawun xeina. Daxita pomonae waxainchi jiwantsi jopa weraweracae tsainchi xua ataya tsane. Ichitha daxita waxainchi xeinaeinchi icha pepon. ⁵² Poxonae trompeta matawun asiya obina xua poxonae Nacom daxita wetsina, bapoxonae Nacom jemeicha nainya asu exanaena pomonae pewerapaewi pomonae pejume cowuntsiwixae Cristo. Baxua nainya exanaena icha be pocotsi jata coyeneya ichi poxonae jiton nainya naichaquetabiya necotaba. Pewerapaewi asu exanaeinchi xua equeicha bapana jopa peweraweracaenexa tsane. Bapoxonae waxainchi pomonaetsi cataunxuae jinompatsi nainya icha pena pepon xeinaeinchi. ⁵³ Wapepon po pepon tsorobo weya naexana bewa naexanaena icha pepon xua jopa weraweraca exanaetsi. Wapepon xua itacupatsi xua pewerapaewa, bewa pepon naexanaena po pepon xua jopa werapaeyo. ⁵⁴⁻⁵⁵ Wapepon xua weraweracaena Nacom equeicha asu exanaena pena pepon po pepon jopa weraweracae tsane. Poxonae baxua exanaena jopa weraweracaeyo. Yawa barapo pepon itacupatsi xua werapa ichitha barapo pepon naexanaena po pepon xua jopa werapaeyo. Bapoxonae

baxua nayabara jume cui weta xua exana pocotsiwa bayatha Nacom Pejume Diwesitha tsiwūnae yabara muxu duta. Nacom Pejume Diwesitha jeye: “Poxonae Nacom pena pepon cana exanaena piamonae, bapoxonae Nacom amanayabina pontha pon jiwi tupa peexanaein”, jei Nacom Pejume Diwesitha. ⁵⁶ Pocotsiwa xua naca amanayaba, apara xua wawerapaewa abeya waexanaexae. Pomonae exanaetha pocotsiwa Moisés pia peitorobi coyenewatha itoroba, barapomonae awiya werapa poxoru barapomonae awiya abe peexanaexae. ⁵⁷ Paxan pajan Nacomtha: “Nacom, maisa pajuntū coyene weiweinan xua pata tanecatsiwam jinya neayapusū itorobi coyenewa pata amanayabinexa abe peexanae cuiru coyenein. Barapo coyene pana catame xua poxonae Jesucristo pon pata Necanamataxeinaein naetotha pata tana tsitupaexae”, pajan.

⁵⁸ Tamonae pam, paxam pomonae tapaca caantobe jiwichi pam. Painya neamanayabixae abe painya neexanae cuiru coyenein, pana najuntū ayapusū exande Nacomtha. Painya xoba payabara cui copatame xua bara ichamonae paca cana exanaena xua icha coyeneya painya neexanaewa tsane. Ataya beta panacuita dubenanaebiyama Nacom nexa. Tsipei paxam payaputaneme po penacuichiwa Nacom pata tanacuita dubenanaebiyame, bara Nacom tsita xanepanatsi.

16

Meje xua Pablo paratixi yabara paeba po paratixi jiwi catsiba ichamonaetha pomonaetha pomonae pejume cowuntsiwi Nacom

¹ Yabara paca tsipaebatsi paratixi po paratixi penacaetutsimonae jehebapona ichamonae nexa pomonae pejume cowuntsiwi Nacom. Paexande icha pomonae penacaetutsi jiwimonae ichi xua exana pocotsiwa itoroban pomonae Galacia nacuamonaepiwi. ² Daxita domingo wūn maticabintha paxam daxita barompaya painya paratixi pajiwana wetsabiya pajehebaponaename pocotsi matoma pana busi matoma xeineibame. Pomonae pin matoman nabusi matoma xeineiba bewa ainya paratixi jehebaponaena. Pomonae tsiqui matomaxi nabusi matoma xeineiba bewa cae paratixi jehebaponaena. Abū paratixi pajebare xua jopa painya neexanaewa tsane baraxua xua poxonae equeicha patopaein. ³ Poxonae patopaein bapoxonae paitapetsiname pebiwi po pebiwi pecaponaeenexa carta. Barapo pebiwi Jerusalén tomara beya caitorobin carta. Barapomonae carta caponaena yawa muxuna caponaena paratixi po paratixi pajehebaponaename Jerusalén tomarapiwi nexa pomonae pejume cowuntsiwi Nacom. ⁴ Icha nanta xeinaein xua yapu wūnaein paratixi penawichixae metha moya bara ponaetsipan Jerusalén tomara beya. Bapoxonae barapomonae nepuna ponaena.

Meje xua Pablo yabara nanta xeina, xua pewarapaewa tsane

⁵ Poxonae ponaein, bewa Macedonia nacua iyan tsane. Bapoxonae cotacaya paca siwa ponaeinchi Corinto tomaratha. ⁶ Metha beya paca barū ecaetsipatsi be caentacabiobetha. Ichacuihtha metha poxonae awūbo paca barū ecaetsipatsi. Bapoxonae poxonae weta xua awūbo, paca itacupa xua pata neyawenaewam pocotsiwa nantawenonan poxonae warapaein icha tomara beya. ⁷ Jopa ichipaeinyo xua saya bara caetotha tapaca siwa ponaewatsi. Jame ichichipan xua be pecono daepayobe tapaca barū ecaewatsi tsainchi poxonae patopaein. Baxua exanaein icha Nacom baxua inta copatsina. ⁸ Ecan xote Efeso tomaratha beya poxonae maticabi jopaena po maticabi pewūn Pentecostés. Barapo maticabi po maticabi jiwi yabara jūntanaina xua poxonae matha Nacom pia Pejumope tūnaxū tatsi patopa penacaetutsi jiwitha pomonaetha pomonae pejume cowuntsiwi. ⁹ Anoxuae neitacupa xua bichocono tatanacuichiwa Nacom xua jiwi pinmonae pejume cowuntsinexa barapo tomaratha. Ichitha ayei jiwi ichichipa abe necana exana xua jopa taexanaenexa tsane.

¹⁰ Icha Timoteo patopaena painya xantha, pantenta weyataema xua bapon jūntema pepoponaenexa painya xantha. Baxua pata exande poxoru bapon exana pocotsiwa Nacom ichichipa, icha xan ichin xua exanan pocotsiwa Nacom ichichipa. ¹¹ Daxita paxam jopa payabara jande: “Apara bapon Timoteo pewowin, jopa apara peyaputaein”,

jopa payabara jande. Jame maisa bapon payawende xua equeicha jũntema caewa peponaenexa taxainya berena. Baxua paexande tsipei xan irũ ichamonaẽ pomonaẽ irũ pejume cowũntsiwixae Jesucristo, panabarũ wũnaẽ ewatan bapon xua Timoteo paewatan.

¹² Apolos pon irũ pejume cowũntsin matowa tsipaeban xua painya nepaca cataenexa xua bapon pecueyabinexa tsainchi ichamonaẽ pomonaẽ irũ pejume cowũntsiwixae Jesucristo. Ichitha bapon nanta xeina xua anoxuae jopa yapu jũpaetsi xua peponaewa tsane xua painya nepaca siwa ponaewa. Bapon ponaena ichitha poxonaẽ tayapu jũpaeinchi.

Meje poxonaẽ Pablo najume wetsiya paeba

¹³ Dota pam, pomonaẽ xua abe pacata exana. Beta paajũntũsũya pajume cowũnta dubenanaebiyama. Paexana dubenanaebiyama icha pebiwi ichi xua jopa cunuwiya exana dubenanaebiyaeyo xua beta peexanaewa. ¹⁴ Daxita pocotsiwan xua paexaneibame, peantobe coyeneyatha paexaneibare ichamonaetha.

¹⁵ Tamonaẽ pam, paxam pomonaẽ irũ painya nejume cowũntsiwixae Jesucristo. Paxam payaputaneme xua Estẽfanas piadonaẽ tatsi copiya jume cowũnta Jesucristo Acaya nacuatha. Barapomonaẽ bichocono yawena ichamonaetha pomonaetha pomonaẽ irũ pejume cowũntsi jiwĩ Nacom. ¹⁶ Paca tsipaebatsi xua paxam xuya paexana dubenanaebiyama pocotsiwan barapomonaẽ paca itoroba. Pabarũ nacuire barapomonaẽ xuano ichamonaẽ irũ pabarũ nacuitame pomonaẽ jũpaeya exana icha barapomonaẽ ichi. ¹⁷ Maisa bichocono jũntũ coyene weiweinan xua Estẽfanas irũ Fortunato irũ Acaico xote pate. Barapomonaẽ inta exana pocotsiwa jopa paca itacũpaeyo xua painta exaname xua jopa xote tapaca barũ ecaexaetsi. ¹⁸ Barapomonaẽ nejũntũ cui coyene tsacaba exana xua xaniwaicha tapoponaenexa Nacom nexa. Barichi irũ baxua pacata exana. Beta paweyataename barapocotsi jiwimonaẽ.

¹⁹ Pomonaẽ penacaetutsimonaepiwi, pomonaẽ pejume cowũntsiwi Nacom, pomonaẽ Asia nacuatha jinompa, barapomonaẽ paca jacoba. Aquila irũ piowa tatsi Prisca, irũ pomonaẽ petanacaetutsi dubenanaebiyae jiwichi pia botha tatsi, barapomonaẽ bichocono paca jacoba peantobe jiwixae xua peantobexaetsi pon jiwĩ Pecanamataxeinaein. ²⁰ Daxita pomonaẽ pejume cowũntsiwixae Cristo pomonaẽ xote jinompe daxita paca jacoba. Betsiya painta nantiya pana najacobare painya neantobewaxae Cristo.

²¹ Xan Pablon pacata tinatsi po diwesiyo xua cotacaya opi ducua. Yatsicaya tacoutha tacobe couya pacata tinatsi tapaca jacobinexatsi.

²² Icha ichan jopa Jesucristo antobetsi pon jiwĩ Pecanamataxeinaein barabũ Nacom itawetsina pexainya weya, xua bapon be pon abe peexanaẽ jiton tsane. ¡Xam ponxaem Pata Necanamataxeinaem nainya antha patopare!

²³ Barabũ Jesucristo pon jiwĩ Pecanamataxeinaein paca yawenaena pia paca nepaca caantobewaxae xua xanepanaya painya nejinompaenexa. ²⁴ Daxita paxam pacata itorobatsi po coyene xua tapaca caantobe coyenewatsi taantobewaxae Cristo Jesús.

Baja Pablo.

Meje Po Carte Cotacaya Pablo Tatina, Corinto Tomarapiwi Tatinatsi

Meje poxonae Pablo tamropata pitaba xua tatina pomonaetha pomona Corinto tomarapiwi

¹ Xan Pablon pacata tinatsi. Nacom peichichipaexae bapon necana exana xua Jesucristo pia peitorobi jiwi jiwana tatsin. Xan iru Timoteo pon pejume cowuntsin baponbe panbe pacata tinatsi. Paxam pomona iru painya nejume cowuntsixae Jesucristo pana nacaetutame penacaetutsi botha Corinto tomaratha xua wnae painya nejainchinexa Nacom. Matautano pata tinanbe pomona iru Nacom piamona tatsi xua Acaya nacuatha jinompa. ² Barabu Nacom pon Waxa iru Jesucristo pon jiwi Pecanamataxeinaein baponbe paca yawenaena pia paca ncaantobexae. Matautano barabu baponbe paca cana exanaena xua juntea painya nejinompaewa tsane.

Meje yabara xua poxonae Pablo atene exanatsi

³ Bara Nacom wnae jointatsi pon Wanacanamataxeinaein Paxa tatsi xua Jesucristo Paxa tatsi. Bapon Nacom Waxa naca yabara nanta xeina xua wanaca yawenaewa tsane. Bapon Nacom naca itanuwe matateica wanaca antobexae. ⁴ Daxita xua xuan ichamona pana atene exana, xuan Nacom pana cui matateiqueiba, baxua Nacom painta exana xua xuya iru ichamona pata cui matateicaenexa tsaibi tsane pomona poxona atene exaneibatsi ichamona. Paxan ichamona pacui matateican icha Nacom pana ichi xua pana cui matateica. ⁵ Icha Cristo ichichi poxona atene exanatsi ichamona, barichi ichamona pana atene exana pata jume cowuntsixae Jesucristo. Nacom, Cristo cui matateicatsi poxona atene exanatsi ichamona. Bara pana ichi Nacom pana cui matateiqueiba poxona ichamona pana atene exaneiba. ⁶ Ichamona pana anthuthutane exana. Bequein baxua painta exana, daichitha awiya pana itacupa xua tapaca cayawenaewatsi poxona paca cui matateicatsi. Matautano pana atene exana pata paca cuidubixaetsi painya nepaca capanenebiyaenexa abe painya neexanae cuiru coyenein weya. Nacom pana cui matateica xua paxan xuya pata paca cui matateicaenexatsi. Baxua paca cana exanatsi poxona awiya juntea pajinompa dubenanaebiyame bequein poxona ichamona paca atene exana icha barapomona pana ichi xua pana atene exana. ⁷ Paxan ajuntusya paca cui yabara jume cowuntsiya ewatatsi xua paxam bara beta pajinompa dubenanaebiyaname poxona bequein ichamona paca atene exana. Paxan payaputan xua paxam iruru paajuntucoyenetanem poxona ichamona pana atene exana. Barichi Nacom paca cui matateica icha pana ichi xua pana necui matateica.

⁸ Tamona pam, paxam pomona iru painya nejume cowuntsiwixae Jesucristo. Paichichipan xua painya neyaputaewa xua ichamona bichocono painta ayapube exana Asia nacuatha. Baxua bichocono ayapusya pana juntu coyene jujuta, beya poxona awatha muxu jopa juntea pata dubenanaebiyawa. Ichacuitha pananta xeineiban xua jopa pana itacupaeyo xua pata panenebiwa xua pata aswa tsane. ⁹ Ichacuitha pananta xeinan xua bara metha pata werapaewa tsane. Ichitha baxua Nacom saya bara copata xua pata yabara jume cowuntsiwa tsane xua meisa Nacom bara compa pia coutha pata taneyawenaewa tsane xua jopa pata tana nayawenaewa tsane pata coutha. Nacom apara pon equeicha asu exana pewerapaewi petupae cuiru coyene weya. ¹⁰⁻¹¹ Nacom pana necapanenebiya ichamona weya poxona barapomona bichocono abe painta exana poxona awatha muxu pata werapae. Matautano awiya Nacom baxua painta exanapona. Yatsicaewa Nacom payabara jume cowuntan xua bexa tsane pana necapanenebiyaenano icha awiya painta wucaponame Nacomtha. Nacom pana neyawena poxona pinmonae painta tsipaebina Nacomtha. Bexa poxona Nacom pana necapanenebiyaena barapoxona pin bicheitomona jei tsane: "Nacom maisa pajuntu coyene weiweinan xua neyawenaewa Pablobaru xua jopa pewerapaewa neantobexae poxona jiwi pin bicheito cawca barapomona nexa", jei tsane barapo pin bicheitomona.

Meje poxona Pablo jopa yapu jupaetsi xua peponaewa Corinto tomara beya

¹² Pajüntu coyene weiweinan, daxota atsaquiya pata jeiwa pocotsiwe: Daxita pocotsiwa paexanan po cae pin nacuathe, xuano poxona pata paca baru jinompaewatsi, pata jüntu coyene bara pana tsipaeba xua pinae bara beta paexanan. Pajüntu coyene xanepanan Nacomtha. Matautano bara xainyeya paexanan daxita coyenein. Nacom pana neyawena xua beta pata jinompaewa tsane pata antobexae Nacom. Aparaxua jopa paexanaeinyo barompaya pata tayaputae coyenewatha. ¹³ Daxita xua pacata tinatsi jopa icha diwesi pacata yawa muxuna tinaetsi. Pocotsiwa pacata tinatsi saya pocotsiwa painya nepaca itacupaewa xua painya neyorobiwa tsane xuano xua painya nejume copi yaputaewa tsane. Ichichipan xua betiya painya neyaputaewa tsane daxita pocotsiwa xua pacata tinatsi. ¹⁴ Anoxuae daxita pam be conotha pana neyaputaneme. Poxonae Jesús pon Wanacanamataxeinaein equeicha patopaetsica, pana neyabara jüntu coyene weiweinaename icha paichin tsane xua paca yabara jüntu coyene weiweinaeinchi.

¹⁵ Poxoru pana neyabara jüntu coyene weiweiname daxota nanta xeinan xua tapaca siwa ponaewatsi tsainchi. Bapoxonae icha neitacupa equeicha bexa paca siwa ponaeinchi xua daxota ainya cuiyobetha paca siwa ponaeinchi tapaca cayawenaewa tsainchi. ¹⁶ Bayatha paca tsipaebatsi janje xuaje: “Poxonae ponaein Macedonia nacua beya copiya ichichipan xua matha tsiwanaeya tapaca siwa ponaewatsi tsainchi. Equeicha paca taeinchi poxonae caewa denan tsane Macedonia nacua werena. Bapoxonae paca itacupa xua tapana neyawenaewam poxonae warapaein Judea nacua beya”, paca jeichi. ¹⁷ Bequein baxua paeban, daichitha baxua jopa neitacupaeyo xua taexanaewa baxua. Poxonae baraxua paeban pana nejume cayabara cananta xeiname xua xan apara pon ichawa beya tapaebin xua be pocotsi jiton pon saya exana pocotsiwa bapon ichichipa xua ichawa beya ba paeba. Xan baxua jopa exanaeinyo. Jopa ba paca jeichi “Aja”, jopa paca jeichi. Ichacuitha jopa ba paca jeichi “Jume”, jopa paca jeichi xua poxonae cae coyene yabara paca tsipaebatsi. ¹⁸ Nacom bapon bara xaniwaicha tana neyabara paebin pocotsiwa taexanaewa. Bapon Nacom netane xua jopa ichawa beya tapaebiwa. Saya poxonae, ba “aja”, pejeinexa, ba “aja”, jan. Matautano saya poxonae ba “jume” pejeinexa, ba “jume”, jan. ¹⁹ Timoteo iru Silvano iru xan paca cuidubatsi Nacom Pejume Diwesi po coyene xua Cristo Jesús yabara, pon Nacom Pexanto tatsi. Bapon Cristo jopa bapana jei tsaibiyo bara caetotha: “Jume”, yawa “Aja”, jopa bapana jei tsaibiyo. Saya jame ba jei: “Aja”, ba jei tsaibi. ²⁰ Cristo bara daxita exana pocotsiwa Nacom Pexanto yabara tsiwuna muxu duta. Bara Cristo “Je” jei xua peexanaenexa pocotsiwa Paxa itorobatsi. Daxota waxainchi barichichi jei tsaibichi: “Je, barichi tsane bara Cristo Jesús exanaena baxua”, jei tsaibichi waxainchi poxonae Nacom wuna jainteibatsi. ²¹ Bapon Nacom pana ajüntucoyenesu exana xua beta pata jume cowuntsinexa Cristo. Matautano iru bara paca ichi Nacom, paca yawena. Bapon Nacom naca itapeta watanacuichinexa bapon. ²² Barapon Nacom naca cana exana xua wanaca baru jinompaewa pia Pejumope tunaxu tatsi wanaca yaputaenexa xua piamonae jiwichi. Baraxua Nacom naca tsita itapeinya xeina xua bexa tsane naca catsina ichawan.

²³ Nacom neyabara jüntu coyene yaputane xua xainyeya paeban. Bequein juntucuru nanta xeinan xua paca siwa ponaeinchi ichitha jopa ponaeinyo. Jopa paca siwa ponaetsi Corinto tomaratha tsipei jopa daunweya bepaca tsipaebichi xua paca jüntu coyene wecoyeyi exanaetsipatsi. ²⁴ Jopa bepaca yabara itorobichi xua pocotsiwa bewa painya nejume cowuntsiwa tsane. Tsipei barapara ayapusya pajume cowanta dubenanaebiyame. Pocotsiwa jame paichichipan apara xua pata paca baru nacuichiwatsi jame, painya nejüntu coyene weiweinaenexa.

2

¹ Daxota juntucuru nanta xeinan xua jopa equeicha tapaca siwa ponaewa tsainchi, tsipei jopa bepaca wecoyeyi exanaetsi. ² Icha paca jüntu wecoyeyi exanaetsipatsi, dapomonae aibi tsipae pomonae nejüntu coyene weiweina exana. Jame meisa paxam

paca itacupa xua tapana nejuntũ coyene weiweina exanaewam. Ichitha icha paxam saya pajuntũ coyene wecoyam tsipae jopa pana nejuntũ coyene weiweina exanaemtsipae. ³Daxota bayatha pacata tinatsi icha carta tsipei jopa bepaca siwa ponaetsi icha saya paca juntũ coyene wecoyei exanatsi poxonae yabara paca muxuwetatsi pocotsiwa paexaname xua abe paexaname. Apará jame paxam pomonae bewa pana nejuntũ coyene weiweina exanaem. Xan nanta xeinan icha juntũ coyene weiweinan paxam bara paichim tsane pajuntũ coyene weiweinaename. ⁴Poxonae bayatha po carta pacata tinatsi bichocono unthuthũ wecoyan, tsipei bichocono paca yabara najuntũ coyene eena exanatsi pocotsiwa painya neexanaexae beya poxonae yatsicaewa wecoyan xua yatsicaewa taitacuere mene jujuincaewa. Jopa ichipaeinyo xua tapaca wecoyei exanaewatsi. Jame ichichipan xua painya neyaputaewa xua tapaca caantobewichi bichocono.

Meje poxonae Pablo itoroba xua Corinto tomarapiwi peyabara jüntemainaewa tsane pocotsiwa exana pon penowa pita

⁵Caein pon paxam jiwana pam abe exana ichamonaetha. Bapon juntũ coyene wecoyei exana ichamonaetha. Bapon jopa meisa apara compa nejuntũ coyene wecoyei exanaeyo. Barichi bapon bara irũ paca juntũ coyene wecoyei exana daxita paxam bequein saya bapon abe exana pon painyamonae jiwana jiton. ⁶Pon yabara icha cartatha pacata tinatsi pon abe peexanaein, peburũya nanta jũpaya paitawetame bapon xua pepatopaeyainwa painya nenacaetutsiwatha poxonae wũnae pajaintame Nacom. Anoxuae bapon nacui baraxuba xua abe peexanaewa. Baraxua bara wũnae. Painya xoba equeicha paitawetame bapon. ⁷Anoxuae paxam bewa pacui yabara jüntemainaem abe pia peexanae cuiru coyene tatsi. Matautano bewa pacui matateicaename xua peurayainwa. Icha jopa baxua paexanaemtsipae, bapoxonae bapon metha jopa juniya bichocono juntũ coyene wecoyei tsipae, xua daxota anaya pia coutha penacabetsiwa xua pebaraxubixae xua pejume cowũntsiwa. ⁸Daxota paca tsipaebatsi, bapon patsita itapeinya xeinare xua peantobe coyenewa painya netsita xeinaewa bapon. ⁹Bayatha yabara pacata tinatsi xua bewa pamuxuwetsim bapon. Paca juntũ coyene jũjutatsi xua tayaputaenexa icha metha bara xaniwaicha pana nejume cowũntame daxita pocotsiwa paca itorobatsi, bara bayatha pamuxuwetame bapon. ¹⁰Icha paxam ichũn pacui yabara jüntemainame abe pia peexanae cuiru coyenein tatsi, barichin tsane irũ bapon cui yabara jüntemainaem abe pia peexanae cuiru coyenein tatsi. Tsipei icha ichũn cui yabara jüntemainan abe pia peexanae cuiru coyenein apara poxoru copiya painya necui yabara jüntemainaexae abe pia peexanae cuiru coyenein tatsi. Baxua exanan Cristo tana neitorobixae. Baxua Cristo necui tane xua exanan. ¹¹Waxainchi ichamonae abe pia peexanae cuiru coyenein tatsi yabara jüntemainatsi xua caurimonae pia pentacaponaein tatsi jopa wanaca cui amanayabinexa. Cui yaputainchi xua bapon bichocono daunweya jiwi juntũ coyene jũjutatsi xua abe peexanaenexa.

Meje poxonae Pablo Tito bichocono yabara najuntũ coyene exabatsi Troas tomaratha

¹²Poxonae Troas tomaratha patopan xua tacueicueijeinexa Cristo pejume diwesi bara inta yapu wũnae xua tanacuichinexa Nacom nexa, pon jiwi Pecanamataxeinaein poxoru barapo tomarapiwi bara beta nejume tane. ¹³Ichitha bichocono jopa jüntema poponaeyo poxoru bichocono yabara najuntũ exaban Tito pon irũ pejume cowũntsin Jesucristo, yaitama jopa caxinaeyo bapon. Daxota Troas tomarapiwi napeyaban. Bapoxonae ponan Macedonia nacua beya.

Meje yabara po coyeneya xua Cristo naca yawena xua waamanayabinexa caurimonae pia pentacaponaein tatsi

¹⁴Nacom patsipaeban, pajan: “Nacom maisa pajuntũ coyene weiweinan xua painta exaname”, pajan. Nacom pana cana exana xua Cristo betiya pana canamataxeina poxonae Nacom Pejume Diwesi pacueicueijan. Matautano Nacom pana cana exana xua pata amanayabiwa caurimonae pia pentacaponaein tatsi poxonae jiwi yaputane pacana exanan xua peyabara yaputaewatsi Cristo. Daxita nacuantha ichaxota paponeiban,

bapon payabara paebeiban. Barapo pexeinya jume diwesi xua papaebeiban tajũ beya pajume pichipaponan, icha be poxonae petuxuei tuxusi ichi xua tajũ tuxusi pona. ¹⁵ Nacom ichipa nawita poxonae beta patacucueijian xua Cristo payabara cueicueijan icha be poxonae ichi poxonae bichocono tuxusi ichichipa incienso tuxusi matawũn. Barichi po diwesi xua Cristo payabara cueicueijan, tajũ pajume pichipaponan pomonaetha pomonae Cristo capanenebiya ducuanabiya xuano pomonaetha pomonae weraweracaponna jopa pejume cowũntsixae Cristo. ¹⁶ Poxonae jiwi jopa jume cowũntsiyo barapo diwesi po diwesi pacucueijian be tsita tuxusichi xua po tuxusi tuxusi barapomonae tũpa peexanaewatsi. Ichitha poxonae jiwi jume cowũnta, bapoxonae barapo diwesi tsita muxu wũnaetsi icha xua jiwi ichi poxonae po tuxusi tuxune bichocono ponxo tuxusi wũnaetsi. Barapomonae pejuũntũ coyenetha yaputane xua barapo jume diwesixae Nacom cata barapomonaetha peajuũntũyapusũwa po peajuũntũyapusũwa ataya tsiteca. ¿Jintam metha itacũpatsi xua barapo Nacom pia petanacuichiwa tatsi peexanaewa xua pia coutha compa exana? Aparã dapon ajibi. ¹⁷ Paxan jopa paexanaeinyo icha be jopa ichamonae ichiyo xua poxonae barapomonae pia paratixichi paeba dubenanaebiya Nacom Pejume Diwesi. Paxan po pebiwi pan xua xaniwaicha pata tsipaebi jiwi pan ichamonaetha, Nacom pata taneitorobixae. Daxota Nacom Pejume Diwesi papaeban caemonae wanaexanaexaetsi Cristotha.

3

Meje poxonae Pablo yabara paeba Nacom pia pena petsiwũnae muxu dutsiwa tatsi

¹ Poxonae baxua pacata tinatsi, metha pana neyabara nanta xeinaetsipame xua paxan pomonae ainya cui jiwi pata naexanae jiwi pan. Nama ichamonae cartan capona po cartantha piamonae beta yabara tina barapomonae, xua painya necopatsiwa tsane xua bara pia paca tsipaebeibichi Nacom Pejume Diwesi poxonae barapomonae pateibina painya tomaratha. Metha paxam pana neyabara nanta xeinaetsipame xua xan irũ barichindũ icha ichamonae ichi xua poxonae barapo carta capona pia xua painya necopatsiwa tsane xua bara pia paca tsipaebeibichi Nacom Pejume Diwesi. Bequein metha pana neyabara nanta xeinaetsipame xua xuya painta tinaetsipame xua paxan yabara ichitha jopa apara paca wũcaetsi baxua. ² Poxonae daxita jiwi paca cui tane xua beta painya jinompaewa Nacom nexa, bapoxonae jiwi pana neyabara nanta xeina xua bara beta pata exanaewa xua pata paca yawenaexaetsi xua painya nejume cowũntsiwa. Pata juũntũ coyenewan pana tsipaeba xua bara pinae pajume cowũntame Cristo. Poxonae jiwi paca cui tane xua beta painya nejinompaewa Nacom nexa, barapo jiwi pana nejũntanaina xua beta pata paca cayawenaexaetsi. Baxua be poxonae jiwi yoroba pexeinya carta xua paxan yabara xua daxota jopa nantawenonaeyo xua xuya painta petinaenexa carta. ³ Cristo ichichipa xua jiwi tane xua bapon bichocono wũnae exana paxam nexa po jumein weya xua paxan paca tsipaebatsi. Ichitha bapon Cristo jopa tinaeyo carta peanaincuitontha xua jiwi petaenexa pejumein itaneton. Mataũtano jopa tinaeyo peitaneton xua ibo panawatha ichi Moisés ichi. Jame Nacom pia Pejumope tũnaxũ tatsi icha juũntũ coyene paca cata xua daxota jiwi tsita itapeinya xeinatsi xua Cristo beta exana paxam nexa.

⁴ Paxan pana itacũpa xua baxua papaeban Cristo pata neyawenaexae xua pata jume cowũntsiwa Nacom. ⁵ Ichitha jopa pana neitacũpaeyo xua pata coutha pata exanaewa baxua. Daxita pocotsiwan pana itacũpa xua pata exanaewa apara Nacom pata taneyawenaexae. ⁶ Nacom pana necana exana xua pomonae yatsicaewa pata yabara cueicueijei jiwi pan Nacom pia pena petsiwũnae muxu dutsiwa coyenewa. Nacom pia pena petsiwũnae muxu dutsi coyenewa jiwitha jopa xeinaeyo xua tina ainya coyenein xua jiwi peitorobi coyenewatsi xua jiwi bewa exanaena. Barapo Nacom pia pena petsiwũnae muxu dutsi coyenewa paeba xua saya meisa xua beta pejinompaenexa. Nacom pia Pejumope tũnaxũ tatsi itacũpatsi xua naca cata pena pejuũntũ coyenein. Nama Moisés pia peitorobi coyenewa seicaya paeba xua bequein jiwi exana xua Moisés itoroba,

barapomonaē awiya werapaena abe peexanaexae. Nama seicaya Nacom pia Pejumope t̄nax̄u tatsi peaj̄unt̄uyapus̄wa naca cata.

⁷ Moisés pia peitorobi coyenewa ibo panawantha tina. Barapo coyene jiwi cana exanatsi xua pewerapaewa abe peexanaexae. Poxonae barapo coyenewa Moisés cata israelmonaetha barapomonaē israelmonae jopa itac̄upaetsi xua Moisés peitabaratae-watsi tsipei Nacom pia pexeinya peit̄upanae coicha tatsi bichocono pentha Moisés peitabaratha. Ichitha barapo Nacom pia pexeinya peit̄upanae coicha tatsi Moisés pia xainya weya tatsi bewayo caewanaya. ⁸ Po pena j̄unt̄u coyene Nacom pia Pejumope t̄nax̄u tatsi naca cata bichocono w̄nae tsipei jiwi cana exanatsi xua pexeinaewa peaj̄unt̄uyapus̄wa po peaj̄unt̄uyapus̄wa ataya tsiteca. Barapo pena j̄unt̄u coyene bichocono w̄nae beyacaincha po peitorobi coyene Moisés itoroba. ⁹ Bequein Moisés pia peitorobi coyenewa w̄nae, barapo coyenewaxae Nacom tsitatsi xua jiwi penatsicuent̄siwa xeina xua abe peexanaexae. Nama bichocono w̄nae Nacom pia pena j̄unt̄u coyenewa po j̄unt̄u coyenewa jiwi catatsi beyacaincha Moisés pia peitorobi coyenewa. Barapo Nacom pia j̄unt̄u coyenewaxae, jopa tsitatsi xua p̄iamonaē tatsi pexeinaewa xua penatsicuent̄siwa xua abe peexanaexae. ¹⁰ Moisés pia peitorobi coyenewa tatsi copiya bichocono w̄nae, nama anoxuae jopa peraichiwa, tsipei jopa naca yawenaeyo. Nama Nacom pia pena petsiw̄nae muxu dutsi coyenewa tatsi jame barapo coyene jiwi bichocono yawenatsi. Daxota barapo coyene yatsicaewa w̄nae beyacaincha Moisés pia peitorobi coyenewa tatsi. ¹¹ Poxonae Moisés cata pia peitorobi coyenewa israelmonaetha bapoxonae barapomonaē tane Moisés peitabaratha tatsi Nacom pia pexeinya peit̄upanae coicha tatsi. Barapo pexeinya peit̄upanae coicha caewanaya. Nama Nacom pia pena petsiw̄nae muxu dutsi coyenewa jopa caewanayiyo. Nama ataya ayapus̄ya tsiteca barapo coyene.

¹² Tsipei pajume cow̄nt̄siya ewatan xua Nacom exanaena daxita pocotsiwa bayatha yabara pana netsiw̄nae muxu duta, daxota jopa paaurinyo xua pata yabara paebiwa daxitan. ¹³ Paxan jopa paexanaeinyo icha Moisés ichi. Bapon Moisés naitabara acata paparuwatha xua israelmonae jopa peyaputaenexa xua poxonae barapo pexeinya peit̄upanae coicha caewanaya. ¹⁴ Barapo israelmonae jopa yaputaeyo Moisés pia peitorobi coyenewa tatsi. Nacom copata xua barapomonaē jopa peyaputaewa pia j̄unt̄u coyeneintha barapo coyenewa. Barichi anoxuae poxonae barapo israelmonae yoroba Moisés pia peitorobi coyenewa tatsi, cataunxuae came jopa yabara yaputaeyo baxua. Baraxua icha poxonae Moisés ichi poxonae naitabara acata paparuwatha poxonae barapomonaē jopa yaputaeyo xua barapo coicha caewanaya. Matauta anoxuae barapomonaē jopa yaputaeyo xua icha jiwi jume cow̄ntsina Cristo saya meisa bapoxonae barapo jiwi itac̄upatsi xua peyaputaewa Moisés pia peitorobi coyenewa. ¹⁵ Israelmonae beya nama anoxuae, came jopa yaputaeyo Moisés pia peitorobi coyenewa tatsi poxonae yoroba. Barapomonaē jopa peyaputaewa Moisés pia peitorobi coyenewa tsipei naj̄unt̄u coyene ararana jopa be peyaputaewaxae. ¹⁶ Ichitha poxonae jiwi jume cow̄nt̄a Jesucristo pon jiwi Pecanamataxeinaein, bapoxonae Nacom cana exana xua pej̄unt̄u coyeneintha peyaputaewa Moisés pia peitorobi coyenewa tatsi. ¹⁷ Jesucristo pon jiwi Pecanamataxeinaein ir̄u Nacom pia Pejumope t̄nax̄u tatsi naj̄unt̄u coyene j̄upabe. Pomonaē ba Nacom pia Pejumope t̄nax̄u tatsi xeina jopa nantawenonaeyo xua peexanaewa pocotsiwa Moisés pia peitorobi coyenewatha itoroba xua daxota Nacom jopa atene peexanaewa tsane barapomonaetha. ¹⁸ Daxita waxainchi wajume cow̄nt̄sixae Jesucristo pon jiwi Pecanamataxeinaein, jiwi tsita it̄utatsi xua bara Nacom pia Pejumope t̄nax̄u tatsi jopa juniya naca yawenaeyo. Jopa daichichi icha Moisés ichi poxonae paparuwatha naitabara acata xua jopa peichichipaexae xua peitabarataewatsi ichamonaē, tsipei bichocono itabara daedaena xua Nacom pia peit̄upanae coicha tatsi. Jame waxainchi jinompatsi xua ichamonaē naca j̄unt̄u coyene tane, xua jiwi beta peyaputaenexa xua bara Nacom pon bichocono pexeinaein pej̄unt̄u coyene xanepanaewa. Nacom pia Pejumope t̄nax̄u tatsi naca yawena ducuaenaebiyaena bexa tsane xua waxeinaponaewa tsane pena j̄unt̄u

coyewewan. Icha Jesucristo ichi pia juntu coyewewatha, barichi tsainchi xua wajuntu coyewewantha xua poxonaе jinompatsi.

4

¹ Nacom pata tanaantobexae pana cata barapo penacuichiwa. Daxota paxan jopa bapana paajuntucoyenefaetabiya cueicueijanyo Nacom Pejume Diwesi. ² Jopa paexanaeinyo xua pata yabara cueicueijejewa po coyene ba jiwi aura exanatsi po coyene jiwi moya yawun xeina. Matautano jopa paexanaeinyo po coyene xua pata muxujainyabiya paebiwa. Barichi jopa payabara jume toxechiya exanaeinyo Nacom Pejume Diwesi xua poxonaе ichamonaе pata cana exanaenexa xua Jesús pejume cowuntsiwatsi. Nama apara seicaya papaeban pexainyei jume diwesi. Daxota poxonaе daxita jiwi pana nejume tane pia juntu coyenein tsipaebatsi xua bara xainyeya papaeban. Nacom pana jume tane daxita pocotsiwa papaeban. ³ Poxonaе Nacom pia pecapanenebiyae diwesi jume pacueicueijan, icha jiwi jopa yaputaeyo baxua, apara poxoru barapomonaе weraweracaena, jopa pejume cowuntsixae. ⁴ Jiton ba pon peitata quirein jopa itacupaetsi xua petaewa. Bara pocotsi juta coyeneya ichi pomonaе weraweracaena jopa itacupaetsi xua pejume cowuntsiwa Nacom. Caurimonaе pia pentacaponaein tatsi jiwi juntu coyene itorobatsi barapo cae pin nacuathe. Bapon barapomonaе cana exanatsi xua jopa peyaputaewa. Daxota jopa Cristo jume cowuntsichi. Matautano bapon jopa copatsiyo xua barapomonaе peyabara jume cowuntsiwa Nacom pia pecapanenebiyae diwesi tatsi. Barapo diwesi bichocono wunaе xua yabara caunuta xua Cristo pexeinya peitupanae coicha xeina. Bapon Cristo bara Nacom cui jupatsi. ⁵ Poxonaе pacueicueijan, apara jopa pata coutha pana nayabara cueicueijanyo. Apara Jesucristo payabara cueicueijan xua bapon yatsicaya pepa Wanacanamateinaein. Paxan amanaya panacuitan paxam nexa pata taantobexae Jesús. ⁶ Nacom pon xua jeye: “Barabu pecoicha ba pentha pequireiwatha”, jei. Bapon Nacom exana xua pepatopaewa pata juntu coyeneintha pia pexeinya jume diwesi tatsi, po diwesi copiya jopa pata yaputaewa. Pata juntu coyeneintha pata xeinaexae barapo diwesi pana itacupa xua pata yabara yaputaewa Nacom pia pexeinya peitupanae coicha xua paxan patan, xua Jesucristo pata itabara taewa.

Meje xua Pablo yabara paeba xua pejinompaeya coyewewa xua pejume cowuntsi coyeney-atha

⁷ Paxeinan pata juntu coyeneintha peyaputae coyewewa po peyaputae coyewewa pana cana exana xua pata yabara yaputaewa Nacom pia pexeinya peitupanae coicha. Pata pepon saya bichoina weraweraca icha juruwato ichi xua bichoina weraweraca. Pata xeinaexae Nacom pia peyaputae coyewewa, daxota ichamonaе patsita itapeinya xeinan xua peyapusu itorobi coyewewa paxeinan xua Nacom pana cata. Daxota apara Nacom piawa, jopa apara patawiyo. ⁸ Bequein jiwi ichawa beya pana juntu coyene jujuta xua abe pata exanaenexa poxonaе abe painta exana, ichitha awiya pana itacupa xua pata panenebiwa bara weya. Bequein bichocono yabara pana najuntu coyene exaban pocotsiwa jiwi painta exana, ichitha awiya jopa paajuntucoyenefaetabinyo. ⁹ Bequein jiwi pana nepu baraina pia abe pata neexanaetsi ichitha Nacom jopa pana copabiyo xua compa pan xua pata necuenta ponaewa. Bequein barapomonaе iratha pana bebai xua pata tanejutebiwa tsane, ichitha Nacom jopa pana copabiyo xua barapomonaе pata tanejutebiwa. ¹⁰ Daxita nacuantha ichaxota paponeiban jiwi abe pana exaneiba. Barapomonaе pana wan dubeiba pata tanejutebeibiwa tsane icha Jesús ichichi xua bexotsi. Poxonaе jopa pabobenaеinyo xua ichamonaе jopa pata tanejutebiwa, baxua patsita itapeinya xeinan jiwi xua apara Jesús asu pon pata taneyawenaexae pia peyapusu coyewewatha. ¹¹ Poxonaе cataunxuae pajinompan barapo cae pin nacuathe jiwi ichichipa pata tanejutebeibiwa pata yabara paebi dubenanaebiyaexae Jesús. Daxota baxua jiwitha patsita itapeinya xeinan xua xaniwaicha bara Jesús pana yantsiya popona poxonaе jiwi pana wan tane xua poxonaе bequein muxu pata bobeneibi. ¹² Pata

yabara paebixae Jesucristo jiwi muxu pata tanejutebeibi. Ichitha pata yabara paebixae Jesucristo daxota peajüntuyapusuwa paxeiname po peajüntuyapusuwa ataya tsiteca.

¹³ Nacom Pejume Diwesitha jeye: “Jume cowāntan daxota cueicueijan”, jei. Paxan pajume cowāntan icha David ichi xua poxonaē baxua paeba. Iruru paxandu pajume cowāntan daxota pacueicueijan. ¹⁴ Payaputan xua Nacom Jesús asu exanatsi xua petupae cuiru coyene weya pon jiwi Pecanamataxeinaein. Barichi tsane Nacom asu naca exanaena petupae cuiru coyene weya, caemonae waexanaexaetsi Jesustha. Paxan iru paxamdu Nacom naca caponaena pia xainya beicha. ¹⁵ Daxita pocotsiwan xua ichamonaē pana necana exana xua paatanein baxuan paca yawena xua painya nejume cowāntsinexa. Poxonaē jiwi equeicha mataropeicha jume cocowāntaponaena Cristo, bapoxonaē ayei jiwi Nacom wūnaē jainchinchī, jei tsane: “Nacom maisa pajūntu coyene weiweinan xua pata taneyawenaewam pata taneantobexaemxae”, jei tsane. Bapoxonaē jiwi bichocono wūnaē jainchina Nacom xua bapon bara beta peexanaexae.

¹⁶ Daxota jopa bapana paajūntucoyenefaetabiya jinompaein. Pata pepon fifinapona. Ichitha pata jūntu coyene equeicha mataropeichiya asuya ayapusu tso poneibi daxita matakabin. ¹⁷ Po coyenein xua barapo cae pin nacuathe ichamonaē atene pata tana neexanaewa jopa pana netsita ainya cuiyo tsipei saya bara caeto pana atene exana. Barapo atenewa pata tana neexanaewa pana neyabara nacui wūnaeta xua bexa tsane Nacom pata tana necatsibiwa tsane po coyenein xua bichocono wūnaē xua po coyene ataya pata xeinaewa tsane po coyene xua pexeinya peitupanaē coichaxae. ¹⁸ Jopa bichocono pacayabara nanta xeineibinyo po coyenein painta daunwei xua jiwi atene pata tana neexaneibixae barapo cae pin nacuathe. Jame maisa bichocono pacayabara nanta xeinan po coyenein xua Nacom pana jūntu coyene weiweina exanaena. Pocotsiwan xua jiwi pana necana exana barapo cae pin nacuathe weraweracaena. Nama xua pocotsiwan Nacom painta exanaena baxua ataya ayapusu tso ponein.

5

¹ Pata pepon xua saya pata yawa jinompaenexa barapo cae pin nacuathe nexa icha bouto ichi xua saya pecuenta werapaenexa barapo cae pin nacuathe. Poxonaē pawerapaēin pata pepon weraweracaena icha bouto ichi. Bapoxonaē payaputan xua Nacom icha pepon painta xeina xua pena pepon pia nacuatheicha. Barapo pepon ataya payawa jinompaein. Barapo pena pepon Nacom exana, jiwi jopa exanaeyo. ² Anoxuae bichocono pana najūntu coyene exaban tsipei bichocono bepaxeinaein icha pena pepon po pena pepon Nacom xeina pia nacuatheicha. ³ Barapo pena pepon Nacom pana cata xua jopa pata jinompaenexa athabeicha poxonaē jopa paxeinaein yō pepon. ⁴ Poxonaē cataunxuae barapo pepon payawa jinompan barapo cae pin nacuathe bichocono pana najūntu coyene exaban tsipei jiwi painta ayapube exana pata pepontha. Ichitha jopa paichichipaeinyo xua pata jinompaewa be poxonaē jopa paxeinaein yō barapo peru pepon xua pata bebeixae. Jame paichichipan xua pata yawa jinompaewa pena pepon. Po pepon anoxuae payawa jinompan saya werapaena. Paichichipan xua equeicha pata xeinaewa pena pepon po pena pepon xua ataya asuya pata yawa jinompaewa tsane. ⁵ Nacom pana necui yabara wūnaeta xua barapo pena pepon pana catsina. Nacom pana cata pia Pejumope tūnaxu tatsi xua pana netsita itapeinya xeina xua bexa tsane Nacom pena pepon xaniwaicha pana catsina.

⁶ Daxita matakabin ajūntusuya pajume cowānteiban Nacom pon jiwi Pecanamataxeinaein. Payaputan xua poxonaē cataunxuae barapo cae pin nacuathe payawa jinompan barapo peru pepon. Cataunxuae yatsicaya Jesucristo tajū tsana pana cuenta eca, jopa cataunxuae pata xeinaexae barapo pena pepon. ⁷ Pajinompan pata jume cowāntsiya coyenyatha Jesús, xua bapon exanaena pocotsiwan bapon paeba, bequein cataunxuae jopa pana nebaru jinompaeyo itabocotheicha. Aparā jopa pajinompaein yō xua pata tataewaxae ichawa. ⁸ Ajūntusuya pajume cowānteiban Nacom. Paichichipan pata bebeiwa barapo peru pepon xua po pepon anoxuae payawa jinompan pata jinompaenexa ichaxota Jesús popona pon jiwi Pecanamataxeinaein. ⁹ Bichocono paichichipan xua

pata exanaewa pocotsiwa bapon Jesús pon jiwi Pecanamataxeinaein ichichipa bequein barapo pepon payawa jinompan barapo cae pin nacuathe, matautano ichacuiitha metha bequein poxonaе painompan Nacom pia nacuathe. ¹⁰ Bexa tsane daxita waxainchi bewa umenaeinchi Cristo peitabaratha. Bapoxonaе barapo mataqueitha bapon yabara paebina jiwi xua penatsicuentsiwa xua abe peexanaexae Nacomtha. Daxita barompaya matoma xeinaena pocotsiwa pia peexanaexae poxonaе cataunxuae jinompa barapo cae pin nacuathe. Pomonaе w̄naeya tanacuita xuya w̄naeya matoma catsibinchi. Pomonaе jopa xapain tanacuichiyo xuya antomabeya catsibinchi.

Meje xua Pablo yabara paeba xua j̄ntema pejinompae coyenewa yabara

¹¹ Yaitama payaputan xua bewa pacunuwin Nacom pon jiwi Pecanamataxeinaein pata bar̄ cui itura jinaenexa bapon. Daxota pamuxuwetan jiwi xua bewa jume cow̄ntsina Jesús. Nacom pana j̄nt̄ coyene yaputane xua xainyeya bepataexanaein. Barichi paichichipan xua paxam pana j̄nt̄ coyene yaputaneme beta. ¹² Paxan jopa paichichipaeinyo xua pata coutha pata nayabara paebiwa xua pata paca catsipaebiwa tsainchi xua pata ainya cui jiwixae xua daxota pata tanebar̄ cui itura jinaewam tsane. Jame nama paca tsipaebatsi po coyene xua pana nayabara paeban xua painya pata taneweyataenexa. Matautano paca tsipaebatsi xua ichamonaе painya nejume noteibinexa poxonaе ichamonaе abeya pana neyabara paebeiba. Barapomonaе pia coutha atsaquiya nayabara paeba xua daxita xanepanaya peexanaexae po coyenein xua jiwi cui tane. Ichitha barapomonaе jopa naj̄nt̄ coyene yabara tsaqueinaeyo xua po j̄nt̄ coyenein xeina pia j̄nt̄ coyeneintha po j̄nt̄ coyene jopa w̄naeyo. ¹³ Barapomonaе pana neyabara nanta xeina xua paxan pomonaе pata tanentsiyabi jiwi pan xua poxonaе pata cueicueijeixae Nacom Pejume Diwesi. Icha barapomonaе baxua pana neyabara nanta xeina aparta poxoru Nacom pata taantobexae. Icha barapomonaе jopa pana yabara nanta xeinaeyo xua paxan pomonaе pata tanentsiyabi jiwi pan, aparta poxoru saya pata paca yawenaexaetsi. ¹⁴ Cristo pata tana neantobexae paichichipan xua pata tatanacuichiwanexa bapon. Bara xaniwaicha payaputan xua Cristo tsit̄pa daxita jiwi pomonaе pia pejume cow̄ntsiwichixaetsi. Daxota Nacom patsitan xua paxan be pomonaе pata werapaewi pan abe pata exanaexae. ¹⁵ Cristo tsit̄pa daxita jiwi, xua daxita jiwi pejinompaenexa Cristo nexa peexanaexae pocotsiwa bapon tsita xanepanatsi. Barapoxonaе jopa jinompae tsane po coyeneya poxonaе tsita xanepanatsi barapomonaе. Jame barapomonaе bewa jinompae Cristo nexa pon naetotha t̄pa xuano xua equeicha as̄ exanatsi. ¹⁶ Anoxuae jopa payabara nanta xeinaeinyyo xua pata yaputaewa jiwi pia pej̄nt̄ coyenein tatsi xua saya poxonaе pacui tan poxonaе po coyenein exana icha pomonaе jopa pejume cow̄ntsiwi ichi. Barapomonaе nanta xeineiba xua jiwi pej̄nt̄ coyene yaputaenexatsi xua saya poxonaе cui tainchi xua exaneiba. Bequein copiya bayatha Cristo jopa w̄naeya payabara nanta xeinaeinyyo, ichitha anoxuae jopa baxua paraichinyo poxoru anoxuae bara xaniwaicha payaputan bapon. ¹⁷ Pon caein naexana Cristotha pejume cow̄ntsixae bapon pena j̄nt̄ coyene xeina. Po coyenein xua bayatha exana xua peru j̄nt̄ coyenein weraweracaena. Anoxuae equeicha icha pena j̄nt̄ coyenein exanaena.

¹⁸ Daxita barapo pena j̄nt̄ coyenein Nacom werena pona. Nacom naca cana exana xua piamonaе jiwi tatsichi pomonaexaetsi bequein copiya Nacom pia peaitafaetabi jiwi tatsichi. Baxua Nacom naca cana exana Cristo wanaca tsit̄paexae. Matautano Nacom pana itoroba xua paxan xuya ichamonaetha pata cana exanaenexa Nacom piamonaе tatsi pomonaexae bequein copiya Nacom pia peaitafaetabi jiwichi. ¹⁹ Pocotsiwa xu-aunxuae paca tsipaebatsi xua aparta meje: Nacom j̄ntema jinompa cana exana barapo cae pin nacuathe pomonaе copiya pia peaitafaetabi jiwichi poxonaе barapomonaе yabara jume cow̄nta xua Cristo tsit̄pa barapo jiwi. Bapoxonaе Nacom jopa tsitatsi xua barapo jiwi penatsicuentsiwa xua abe peexanaexae. Matautano Nacom pana cata penacuichiwa po penacuichiwa xua pata cueicueijeinexa jiwitha. Po diwesi yabara xua Nacom piamonaе cana exana jiwi, pomonaе bequein copiya pia peaitafaetabi

jiwichi, barapo diwesi pacueicueijan. ²⁰ Paxan pomonae Cristo pata taneitorobi jiwi pan pata cueicueijeinexa bapon nexa. Bequein bara paxan paca tsipaebatsi, apara jame yatsicaewa Nacom paca tsipaeba poxonae paca tsipaebatsi. Cristo patacucueicueijan poxonae jume daunweya paca jeichi: “Pana nacui barapende abe painya neexanae cuiru coyenein. Pajume cowunde Cristo caemonae painya nenaexanaenexa Nacomtha”, paca jeichi. ²¹ Cristo bapana jopa abe exanae. Ichitha Nacom tsitatsi xua Cristo penatsicuentsiwa xua poxoru abe waexanaexae. Bapoxonae Nacom naca cana exana xua caemonae wanaexanaewa bapontha xua wajuntu coyenein xanepanaenexa Cristo pia peexanaexae poxonae naca tsitupa. Bapoxonae Nacom tsitatsi xua jopa watsita natsicuentsiwa bequein abe waexanaethatsi.

6

¹ Nacom pata tana nebaru nacuita dubenanaebiyaxae, jume daunweya paca muxu tsipaebiya jeichi: “Painya xoba panaitematame po diwesi xua Nacom paca cata paca necaantobexae. Barapo diwesi apara xua Nacom juntu coyene xanepana exana jiwi pomonae pejume cowuntsixae”, paca jeichi. ² Tsipei Nacom, pewunaeya poxonae xua jiwi yabara cui cananta xeinaeinchi peyawenaenexa tsainchi, Nacom Pejume Diwesitha namchi, jeye:

“Po matabi jiwi yabara cui cananta
xeinaein tayawenaenexa tsane, barapo
mataqueitha paca jume taeinchi.

Po matabitha jiwi capanenebiyaein
paxam yawa paca yawenaeinchi”,
jei Nacom Pejume Diwesitha.

Anoxuae apara barapo matabi jopa, po mataqueitha Nacom naca yabara cui cananta xeina wanaca yawenaenexa.

³ Poxonae Nacom patanacuita dubenanaebiyaxae paichichipan xua daxita jiwi xaniwaicha pata tatsita jinompaewa, xua daxota daxita jiwi pejume cowuntsiwanexa. Jopa abe paexanaeinwo bequein xua tsiwiyo xua abe pata exanaewa xua jiwi pata nejume aebiyainwa Nacom Pejume Diwesi poxonae patsipaeban. ⁴ Jame apara daxita beta paexana dubenanaebiyaxae jiwi pata tsita itapeinya xeinaewa xua apara jiwi pata taneyaputaenexa xua Nacom patanacuitan. Baxua paexanan poxonae awiya saya juntepa pajinompan poxonae bequein ichamonae atene pana exana, xuano bequein painta seica pocotsiwa panantawenonan, xuano bequein poxonae bichocono painta yapu daunwei tsaibi poxonae paexaneiban. ⁵ Ichacuitha jiwi pana beiba bichocono. Matautano ichacuitha jiwi pana cuaranobeiba jiwi pecubi bontha. Matautano ichacuitha jiwi ayei jiwi anaepanaya pana netsaquibabeiba poxonae jiwi ayei acucu. Poxonae panacuiteiban, bichocono ayapusya panacuiteiban. Ichacuitha merawitha jopa pamaiteibinyo tsipei saya paexaneiban Nacom pia penacuichiwa tatsi. Ichacuitha tsaibi bichocono pajainpeiban. ⁶ Jiwi patsita itapeinya xeinan xua paxan pomonae Nacom pia petanacuichi jiwi tatsi pan xua Nacom pata tsita juntu coyene xanepanaexae, matautano tsipei poxoru payaputan pocotsiwa pexainyei jume, matautano jopa pata casebixae pomonae bequein painta abe exana, xuano xua xanepanaya pata taexanaexae ichamonae, matautano Nacom pia Pejumope tunaxu tatsi pata tanebaru jinompaexae, xuano xua ichamonae xaniwaicha pata taantobexae. ⁷ Bara xaniwaicha payabara paeban po coyene pexainyeiwa. Paxan paxeinan Nacom pia peayapusu itorobi coyenewa tatsi. Pata Nacom pata tsita juntu coyene xanepanaexae, paxeinan pocotsi coyenewa xua panantawenonan xua pata tacueicueijeinexa Nacom. Paxan panacui wetan xua Nacom patanacuitan. ⁸ Ichacuitha jiwi pana nebaru cui itura jineiba, ichamonae jopa pana tsita daicheibiyo. Ichacuitha ichamonae wunaeya pana neyabara paebeiba. Ichacuitha ichamonae abeya pana neyabara paebeiba. Ichamonae pana neyabara paebeiba xua paxan pomonae jiwi pata muxuitorobi jiwi pan. Ichamonae pana neyabara paebeiba xua paxan pomonae apara xaniwaicha pata paebi jiwi pan. ⁹ Ichacuitha ichamonae jopa

ichipaeyo xua pata taneyabara yaputaewa xua paxan Jesús pia peitorobi jiwi tatsi pan. Pana yabara nanta xeina xua saya jiwi pan bequein daxita jiwi bara xaniwaicha pana neyaputane xua paxan Jesús pia peitorobi jiwi tatsi pan. Ichacuitha ichamonae pana neyabara nanta xeineiba xua paxan bara imoxoyo muxu pata bobeneibi, ichitha awiya asuya pajinompeiban. Jiwi pana neatene exaneiba, ichitha jopa pana nejutebeibiyo.¹⁰ Bequein ichacuitha bara pajuntũ coyene wecoyan pata painta exanaexae ichamonae, daichitha awiya pajuntũ coyene weiweinaya jinompeiban. Metha bequein paxan be pomonae peacopeibiwi pan tsipae ichitha paxeinan nawita Nacom weya pocotsiwan xua payawenan ichamonae. Bapoxonae barapo ichamonae be pomonae copei pexeinaewi naexana tsipei jume cowũnta Nacom Pejume Diwesi xua papaeban. Bequein bara be pomonae jopa pata xeinae jiwi pan pocotsiwa xeina po cae pin nacuathe, daichitha apara bara paxeinan daxita po coyenein Nacom pana cata po coyenein xua jopa peweraweracaewa.

¹¹ Tamonae pam, paxam pomonae Corinto tomarapiwi pam. Daxita xua po coyenein tajuntũ coyenewatha nanta xeinan baxuan paca tsipaebatsi. ¡Bichocono tajuntũ coyenewatha paca antobetsi! ¹² Amanaya bichocono jopa juniya paca antobetsi. Ichitha nama paxam barapomonae pam, pomonae pam jopa paichichipaem xua painyamonae jiwi tapana neexanaewam. ¹³ Xan paca tsipaebatsi xua be poxonae icha coxiyũn ichi xua tsipaeba pia pexuyotha. Paca jeichi: “Xuya daxita painya nejuntũ coyenewatha paneantobeinde icha paca ichichi xua tapaca antobewatsi bichocono”, paca jeichi.

Meje poxonae Pablo jeye: “Icha Nacom ichi xua popona pia pin botha barichi Nacom pana nebarũ jinompa”, jei

¹⁴ Jopa caemonae pana naexanaeinde pomonaetha pomonae jopa pejume cowũntsi jiwi. Tsipei pon pejuntũ coyene xanepanaein jopa itacũpaetsi xua pecueyatsiwa pontha pon peajuntũcoyenebein. Barichi xua pequireiwatha peyonoyoneiwa jopa itacũpaetsi xua quirei tsanaya baxota, awiya peyonoyoneixae. ¹⁵ Barichi Cristo pon xanepanaya peexaneibin jopa itacũpaetsi xua pecueyatsiwa caurimonae pia pentacaponaeinthata tatsi, pon abe peexaneibin. Barichi pon pejume cowũntsin jopa itacũpaetsi xua pecueyatsiwa pontha pon jopa pejume cowũntsin, poxoru jopa jũpaeyo xua nanta xeinabe. ¹⁶ Barichi Nacom pin pia botha jiwi jopa bewa wũnae jainchina ibo nacomũn. Saya meisa bewa wũnae jainchina Nacom barapo botha. Nacom patsitan xua paxan bara be Nacom pin pia bo tatsi. Icha Nacom ichi xua popona pia pin pia botha, barichi Nacom naca barũ jinompa, pon ataya asuya popona. Nacom caena bayatha baxua yabara jeye:

“Barapomonae barũ poponaein yawa
cueyata ducuaenaebiyaein.

Mataũtano barapomonae pia Nacomũn
tatsin tsane.

Barapomonae tamonae naexanaena”, jei Nacom.

¹⁷ Daxota Nacom pon Pecanamataxeinaein jiwi, equeicha yabara paeba pomonae jopa pejume cowũntsiwi. Nacom piamonaetha jeye:

“Barapomonae pia xainya weya paponare.

Jopa caemonae pana nayawa

exanaeinde barapomonae.

Jopa paexanaeinde peabe coyene po

coyene barapomonae exana.

Nexata xan paca matenta weyataeya wabinchi.

¹⁸ Xan naexanan xua xan painya Axan.

Mataũtano paxam taxanton jiwi pam tsane,

xuano irũ taxantixi jiwi pamdũ”,

jei Nacom piamonaetha pon daxita peayapusũ

itorobi coyenewan pexeinaein.

7

¹ Tamonae pam, paxam pomonae tapaca caantobe jiwichi pam. Xuaunxuae po diwesi paca tsipaebatsi baraxuan apra Nacom yabara naca tsiwunaē muxu duta xua pocotsiwa wanaca cana exanaewa. Daxota waxainchi bewa daxita abe waexanae cuiru coyenewan pentichi po coyenewan xua wapepon exana, xuano xua wajuntū coyene nanta xeinano. Matautano bewa xua Nacom junuwiya wabarū cui itura jinaewatsi tsainchi. Matautano bewa xanepanaya exanaponaetsi beya poxonaē bichocono Nacom watsita juntū coyene xanepanaewa tsane xua jopa wanatsicuentiwa xua abe waexanaexae bapontha.

Meje xua poxonaē Corinto tomarapiwi icha juntū coyene xeina xua Jesús pejume cowuntsixaetsi

² Equeicha caewa pana neantobeinde tsipei paxan jopa abe pacata exanaetsi. Paxan jopa abeya pamatacaponaēinyo ichamonae xua xuya abe peexanaenexa. Matautano ichamonae jopa pamuxujainyabeibinyo. ³ Jopa baraxua paca tsipaebichi xua paca yabara paebatsi xua abe painya neexanaewam. Bayatha copiya paca tsipaebatsi, paca jeichi: “Tajuntū coyenewatha bichocono paca antobetsi, bequein metha poxonaē paca barū werapaetsipatsi, xuano metha bequein poxonaē paca barū jinompaetsipatsino”, paca jeichi. ⁴ Bara bichocono paca yabara jume cowuntatsi xua po coyene tapaca catsipaebiwatsi tsainchi pocotsiwa tajuntū coyenewatha nanta xeinan xua pocotsiwa painya neexanaenexa tsane. Matautano paca yabara wunaē jaintatsi poxonaē ichamonae tsipaeban poxoru tapaca cui yabara paebixaetsi. Bequein ichamonae atene neexana, daichitha poxonaē jume tan pocotsiwa paexaname pana nejuntū coyene tsacaba exaname xua juntema tapoponaewa. Matautano barichi bichocono panejuntū coyene weiweina exaname.

⁵ Poxonaē po mataqueitha weya papatan Macedonia nacua weya jopa cuinaya juntema painompaēinyo xua jiwī abe pata tana necana exanaewa daxita coyeneintha. Pomonae jopa pejume cowuntsiwi bichocono pana casebeiba pata natsipei cueicueijeixae Jesús pejume diwesi. Barichi pomonae pejume cowuntsiwi junuwiya payabara najuntū coyene exabeiban nawita xua jopa xanepanaya pejinompaewa tsipae. ⁶ Daichitha Nacom pana juntū cui coyene tsacaba xua juntema pata jinompaewa poxonaē bequein paatanein tsaibi. Barapon Nacom apra pon jiwī cana exanatsi xua juntema pejinompaewa poxonaē bequein juntū coyene wecoyēi. Baxua Nacom pana necana exana poxonaē Tito patopa pata xantha. ⁷ Pajuntū coyene weiweinan xua bapon pepatopaexae. Ichitha jame yatsicaewa pana nejuntū coyene tsacabame xua poxonaē bapon pana netsipaeba xua pinae xanepanaya pata exaname bapon. Bapon pana netsipaeba paxam yabara xua pinae pajam: “Maisa Pablobarū bepataebenaēin. Bichocono pawecoyan yaitama Pablobarū abe exanatsi ichamonae. Daxota payabara najuntū coyene exaban bapon”, pinae pajam. Poxonaē baxua jume tan bichocono juntū coyene weiweinan.

⁸ Bequein xan paca juntū coyene wecoyēi exanatsi xua po cartatha copiya pacata tinatsi, daichitha anoxuae baxua jopa yabara auranyo bequein copiyatha yabara auran baxua. Barapo carta saya bara caeto paca juntū coyene wecoyēi exana. ⁹ Ichitha anoxuae juntū coyene weiweinan xua jopa apra poxoru painya nejuntū coyene wecoyēixae poxonaē payorobame barapo carta, saya apra jame poxoru Nacom icha juntū coyene painya netsita xeinaexae. Paxam pajuntū coyene wecoyam icha be pocotsi coyeneya Nacom peichichipaewa xua abe painya neexanaexae. Daxota paxan jopa abe pacata exanaetsi. ¹⁰ Poxonaē jiwī juntū coyene wecoyēi icha be pocotsi coyeneya Nacom ichichipa, barapo peitanuwetha jiwī cana exanatsi xua peurawa abe peexanaexae bapoxonaē barapo jiwī Nacom jume cowuntatsi. Bapoxonaē Nacom jopa tsita natsicuentichi xua abe peexanaexae. Barapomonae icha juntū coyenein xeina poxonaē barapomonae capanenebiyatsi abe pia peexanae cuiru coyenein weya tatsi. Bapoxonaē barapomonae jopa bewa aura tsane xua copiya juntū coyene wecoyēi. Ichamonae pomonae jopa pejume cowuntsiwi Nacom, poxonaē barapomonae wecoyēi xua jopa peuraxae poxonaē abe exana, ichitha barapo itanuwetha barapomonae jopa

yawenaetsi. Apra saya barapomonaē werapaena Nacom petsita abe exanaexaetsi. ¹¹ Po itanuwe Nacom pacata copata bayatha jame barapo itanuwe paca yawena. Barapo itanuwe paca exana xua paca jūntū coyene tsacaba xua beta painya neexanaenexa. Matautano paca exana xua pacui yabara nanta xeiname pon abe peexanaein. Bapoxonaē nainya paitawetame bapon, abe peexanaexae. Barichi be patsita itapeinya xeiname Nacom xua paxam jopa panatsicuentisim xua jopa be barapocotsi coyenewiyo pocotsi coyenewa xua bapon exana. Matautano paauram xua painya necopatsiwa bapon xua bara abe peexanaewa. Matautano pajunuwame xua Nacom atene paca exana poxoru bapon abe peexanaexae. Bapoxonaē be pabebam painya xainya weya po coyene xua bichocono abe. Daxota paitawetame bapon. Daxita beta paexaname. Painya netsita itapeinya xeinaewa Nacomtha xua apra daxita paxam jopa abe paexanaem. Saya meisa bapon abe peexanaexae. ¹² Bayatha pacata tinatsi po carta xua paca itanuwe exana xua Nacom painya tsita itapeinya xeinaenexa xua xaniwaicha bara pana neantobem painya neexanaexae pocotsiwa paca itorobatsi. Apra jopa pacata tinaetsi xua saya poxoru tayabara nanta xeinaexae pon abe exana, xuano irū pon coseuri pitatsi, xua tayawenaewa tsane. ¹³ Pata taneantobemxaem pana nejūntū coyene tsacabame xua tajūntū coyene weiweinaewa.

Barichirū daxita paxam Tito pajūntū coyene cui tsacabame daxita pocotsiwantha xua beta painya paebixaem bapontha. Jame yatsicaewa bapoxonaē bichocono pajūntū coyene weiweinan xua poxonaē Tito pacana exaname, beyacaincha poxonaē pana necana exaname xua poxonaē pajūntū coyene weiweinan. ¹⁴ Poxonaē Tito taxainya weya bara muxu peponaeba matha beta paca yabara paebatsi bapontha, janje: “Maisa Corinto tomarapiwi pomonaē pejume cowūntsiwi weyatan xua bichocono pejūntū coyene xanepanaexae Nacomtha”, jan. Paxam jopa panejūntū coyene aura exanaem. Xua ba paca tsipaebibatsi baraxua bara pexainyeiwa tsaibi. Matautano pocotsiwa paca yabara paebatsi Titotha baxua apra bara pexainyeiwano irū. ¹⁵ Bapon Tito bichocono paca antobe anoxuae beyacaincha poxonaē cataunxuae jopa paca siwa ponaeyo. Bapon paca yabara jūntanaina xua paxam pabarū jume jejam tsaibi pocotsiwa paca itorobeiba. Matautano bapon pantenta weyataeya wabame painya barū itura jinaexae bapon. Matautano pajunuweibame xua abe painya neexanaeyainwa bapon. ¹⁶ Maisa bichocono jūntū coyene weiweinan xua tapaca yabara jume cowūntsiwatsi xua daxita coyenewan painya neexanaewaxae po coyene xua wūnae.

8

Meje xua poxonaē Pablo yabara paeba xua Cristo piamonaē tatsi paratixi pecacomocae paratixi jehebapona pomonaē peacopeibiwi nexa

¹ Tamonaē pam, paichichipan xua painya neyabara yaputaewa xua Nacom pia peyawenaewa jiwi, pia peantobexae. Ichichipan xua tapaca tsipaebiwatsi po coyene Nacom tsita itapeinya xeina barapo pia peantobe coyenewa pomonaetha pomonaē pejume cowūntsiwichi, pomonaē penacaetutsi bonmonaē jiwi xua pomonaē wūnae pe-jainteibiwi Nacom pomonaē xua Macedonia nacuatha jinompa. ² Bequein barapomonaē bichocono daunweya jūntū coyene jūjūtsi poxonaē ichamonaē abe taexana barapomonaetha, daichitha awiya cataunxuae barapomonaē jūntū coyene weiweina. Bequein barapomonaē peacopeibi jiwi, daichitha barapomonaē catsibeiba nawita paratixi pecacomocae paratixi petaitorobinexa pomonaetha pomonaē peacopeibi jiwi Jerusalén tomarapiwi be poxonaē yatsicaewa pepa copei pexeinaewi. ³ Xan tan xua barapomonaē cata nawita be po coyeneya xua daxita itacūpatsi xua pecatsibiwa. Matautano ichawano catsiba beyacaincha xua poxonaē itacūpatsi xua pecatsibiwa. ⁴ Barapomonaē bichocono pana muxu fayacotsiya jeye: “Bara pana copare xua bara Jerusalén tomarapiwi pata-catsibinexa paratixi pecacomocae paratixi pomonaē irū pejume cowūntsiwi, pomonaē peacopeibi jiwi”, pana jei. ⁵ Barapomonaē baxua exana beyacaincha xua pocotsiwa pananta xeinan xua barapomonaē itacūpatsi xua pocotsi coyeneya pecatsibiwa tsane.

Matautano barapomonaе juntucuru nanta xeina xua bara petanacuichinexa tsane Nacom nexa daxita pejuṅtu coyeneinyatha. Bapoxonaе juntucuru nanta xeina xua barapomonaе bara pata taneyawenaenexa tsane be pocotsi coyeneya Nacom ichichipa. ⁶ Daxota Tito paitoroban xua nacui wetsina xua penonotaponaewa tsane paratixi pecacomocae paratixi, tsipei bapon bayatha caena tamropata pitaba xua penonotaponaewa paratixi painya xantha. Poxonaе barapo paratixi pacatsibaponame bara pexeinya coyene paexanaponame peacopeibiwitha painya neantobewaxae. ⁷ Paxam bichocono jopa juniya paxeinaem po coyenein xua painya neexanaewa. Bichocono pajume cowuntame Nacom. Matautano betiya pacueicueijam Nacom Pejume Diwesi, xuano bichocono payabara yaputaneme Nacom Pejume Diwesi. Matautano bichocono painya juṅtu coyenewatha paichichipame xua ichamonaе painya neyawenaewa. Matautano bichocono pana neantobem. Daxota bichocono jopa juniya toxinchiya paexanaeinde xua painya neyawenaewa xua poxonaе paratixi pacatsibame pomonaetha pomonaе iru pejume cowuntsiwixae. Baraxua paexande painya neantobexae barapomonaе.

⁸ Poxonaе baxua paca tsipaebatsi jopa paca itorobichi xua painya neexanaewanexa. Saya apara jame paca tsipaebatsi baxua xua tayaputaenexa icha bara metha paxam bichocono paantobem ichamonaе icha Macedonia nacuamonaepiwi ichi. Barapomonaе bichocono antobe ichamonaе daxota yawena nawita. ⁹ Paxam payaputaneme xua Jesucristo naca antobe pon Wanacanamataxeinaein. Jesucristo poxonaе Paxatha popona copiya daxita xeina be poxonaе yatsicaewa copei pexeinaein. Daichitha bapon pia coutha nacana exana be pocotsin jopa copei pexeinaein poxonaе paxa cuenta pona. Poxonaе jiton pia coyeneya nacana exana bapoxonaе acopeibi nacana exana pia paca necaantobewaxae. Daxota xuya nawita painya nexeinae jiwi pam tsane xua po coyenewa Jesucristo xeina.

¹⁰ Paca tsipaebatsi baxua painya tapaca cayawenonaexaetsi. Nanta xeinan xua paxam bewa panacui yabara wetsiname pocotsiwa xua bayatha icha weitha patamropata notarucupame xua paratixi painya nejehebaponaewa Jerusalén tomarapiwi nexa. Baxua bayatha paexaname painya juṅtu coyeneintha bichocono painya neichichipaexae xua painya neexanaewa baxua. ¹¹ Icha copiya paichim xua paichichipame nawita xua painya neexanaewa baxua, paexanaponde beya poxonaе panacui yabara wetsiname. Padodoutaponde xua be pocotsi coyene paca cui juṅpa xua pocotsi matoma paxeineibame xua pajiwana tsabeibiname paratixi. ¹² Icha pebin ichichipa xua pecatsiwa paratixi Nacomtha bapon bara nata jiwana wetsatsina paratixi xua catsina be pocotsi coyene xua cui juṅpatsi xua pecatsiwa. Pocotsiwa bapon cata bara Nacom wecobe pita. Saya poxoru Nacom jopa pewucaexae poxonaе pebin bequein jopa xeinaeyo taethatsi. Saya jame icha jiwi cui juṅpatsi xua pecatsiwa poxonaе xeina, bapoxonaе jame Nacom wecobe pita.

¹³ Jopa paca tsipaebichi xua ichamonaе bewa payawenaename xua painya necatsibiwa daxita xua paxeiname xua beya poxonaе daxota painya neacopeibiwa tsane. ¹⁴ Saya jame paca tsipaebatsi xua paxam copei pexeinaewi pam iru peacopeibiwi Jerusalén tomarapiwi bewa peburuya juṅpaeya paxeinaename. Metha anoxuae paxeiname nawita, ichitha barapomonaе jopa xeinaeyo. Daxota paxam pomonaе nawita painya nexeinae jiwi pam bewa pacatsibiname pomonaetha pomonaе jopa xeinaeyo pocotsiwa barapomonaе nantawenona. Metha bexa tsane barapomonaе xeinaena nawita ichitha paxam jopa paxeinaem tsane. Bapoxonaе bewa barapomonaе xuya paca catsibina pocotsiwa panantawenoname. Bapoxonaе daxita pam nanta juṅpaeya paxeinaename. ¹⁵ Nacom Pejume Diwesitha baxua yabara jeye: “Pon nawita pexeinaein copiya, beyacaincha xua pocotsiwa nantawenona, bapon jiwana wecata ichuntha pocotsiwa xua jopa pecanantawenonaexae. Pon xua tsiwiyo xeina copiya xua daxota taseicatsi pocotsiwa nantawenona, pirapae xeina pocotsiwa pecanantawenonaewa poxoru pon nawita xeina piawa jiwana wecata bapontha”, jei Nacom Pejume Diwesitha.

Meje xua Tito yabara iru pomonaе pia peyanabiwatsiru

¹⁶ Tsipaeban Nacom, janje: “Nacom maisa jüntu coyene weiweinan xua Tito pejuntu coyenewatha yabara nanta xeina ducuaenaebiya Corinto tomarapiwi xua peyawenaenexa barapomonaе icha xan ichin”, janje. ¹⁷ Bapon Tito jüntu coyene weiweina poxonaе patsipaeban xua pia paca necayawenonaewa tsane. Daxota anoxuae bapon pia coutha paca siwa ponaena peichichipaexae xua pia paca yawenaetsi.

¹⁸ Ichundu paitoroban pon pejume cowuntsindu xua Tito pepuna ponaenexatsi. Daxita pomonaе pejume cowuntsiwi pomonaе penacaetuteibi jiwi xua wunaе pejainteibiwi Nacom barapomonaе bapon beta yabara nanta xeinatsi, tsipei pinae bapon beta xanepanaya cuiduba Nacom pia pecapanenebiyaе diwesi jume. ¹⁹ Jopa meisa pebaxuaxae. Jame yawa matautano barapomonaе pomonaе pejume cowuntsiwi peitapetsixae barapo pebin xua bapon pata tanebaru ponaenexa poxonaе pacapanan paratixi peacopeibiwitha pata antobexae barapomonaе. Barapo penacuichiwa pata exanaexae pabarü cui itura jinan Nacom pata exanaexae pocotsiwa bapon pana itoroba. Matautano poxonaе baxua paexanan patsita itapeinya xeinan xua paichichipan xua nantiya pata tanayawenaewa. ²⁰ Paichichipan xua xaniwaicha beta paexanan poxonaе pin paratixi cun pacaponan xua jiwi abe pata neyabara paebiyainwa. ²¹ Paichichipan nawita xua xainyeya pata exanaewa Nacom peitabaratha tatsi xuano xua jiwi peitatha tatsino.

²² Barichino ichunno paitoroban pon pejume cowuntsindu xua baponbe Tito pepuna ponaenexa tsainchibe. Bapon pon cotacaya paitoroban, pajuntu coyene jujutan pata yaputaenexa icha bara metha beta nacuita Nacom nexa. Bara bapon beta jume cowunta ducuaenaebiya. Daxota bapon iru paitoroban. Bapon ichichipa nawita xua pia paca yawenaewa tsane pia paca yabara jume cowuntsixae xua bara beta paexaname. ²³ Icha ichun paca yabara yainyaba Tito pana nejume cayabara jume jande bapontha xua janje: “Bapon taneyantsin. Bapon neyanta xua penacuichiwa po penacuichiwa xua tapaca yawenaewatsi. Ponbe Tito puna poinchibe baponbe itorobatsibe pomonaе pejume cowuntsiwi. Baponbe tsita itapeinya xeinabe barapomonaetha xua bara xaniwaicha pejume cowuntsinbe Cristo, xua daxota barapomonaе wunaе pejainchinexa Nacom”, pana nejume cayabara jande. ²⁴ Barapo acoibi poyobe xaniwaicha pantenta weyataeya wabare poxonaе patsina painya xantha. Bapoxonaе poxonaе baxua paexaname patsita itapeinya xeinaename pomonaе pejume cowuntsiwi xua xaniwaicha bara paantobem barapo acoibi poyobe. Bapoxonaе barapomonaе paca yabara cui yaputaena, xua paxan xaniwaicha papaeban xua poxonaе juntu coyene weiweinaya atsaquiya tapaca yabara paebiwatsi xua painya nejume cowuntsixae.

9

Meje xua paratixi pejehebaponaewa yabara pomonaе pejume cowuntsi jiwi nexa, pomonaе peacopeibi jiwi xua pomonaе Jerusalén tomarapiwi

¹ Jopa nantawenonaeinyo xua equeicha tayabara tinaewa xua painya neyawenaenexa ichamonaе pomonaе iru jume cowunta xua painya necatsibinxaru paratixi pomonaе Jerusalén tomarapiwi. ² Bara yaputanba bayatha xua bichocono painya neichichipaewa xua painya necatsibiwa paratixi. Paca yabara paebeibatsi Macedonia nacuamonaepiwitha, janje: “Bayatha icha weitha Acaya nacuapiwi najuntu cui coyene wunaeta xua jehebaponaena paratixi peacopeibiwi nexa”, jan. Barapo Macedonia nacuapiwi, najuntu cui coyene tsacaba xua iru pebarichinxaru pejume taexae xua pinae paxam paichichipame nawita po coyene painya neyawenaewa. ³ Barapo acoibi poyobe itoroban xua ichamonaе jopa taneyabara paebinexa tsane xua tanaerabiwa xua bayatha tapaca yabara paebixae. Daxota bewa pana nacui wunaetsiname xua painya nejehebaponaewa paratixi xua painya necatsibinxea ichamonaetha. ⁴ Metha barapo Macedonia nacuamonaepiwi jiwana nebaru ponaena poxonaе paca siwa ponaeinchi. Metha barapomonaе paca taetsipa xua jopa pana nacui yabara wunaetsim xua painya nejehebaponaewa paratixi xua painya necatsibiwa ichamonaе. Bapoxonaе bichocono paauran tsipae tsipei bayatha paca yabara paebatsi xua paxam pacatame nawita. Iru paxam paauram tsipae. ⁵ Nanta

xeinan xua bewa copiya itorobin barapo acoibi poyobe xua bara poyobe copiya paca siwa ponaena beya poxonae xua paca siwa ponaeinchi. Barapoxonae barapoyobe painya nepaca yawenaenexa xua penotaponaewa paratixi. Bayatha pana nemuxu tsipaebame xua pinae paichichipame painya necatsibiwa ichamonae barapo paratixi. Po paratixi panotaponame panacui yabara wetsiname, baxua patsita itapeinya xeiname xua saya jopa apara poxoru bewa pacatsibim. Saya poxoru painya coutha painya neichichipaexae xua painya necatsibiwa.

⁶ Payabara nanta xeinare po diwesi ba xua jeye: Pon ba conotha ũba ba conotha jota pocotsiwan xua penawetsiwan. Pon ba jopa juniya ũbiyo ba jopa juniya jotsiyo pocotsiwan xua penawetsiwan. ⁷ Daxita pomonae pejume cowũntsiwi bewa catsibeibina be pocotsi coyeneya nanta xeina pejũntũ coyenewatha. Jopa bewa asiwiya catsibeibi icha aichaxaibi xua pecatsibiwa. Mataũtano jopa bewa catsibeibi poxoru ichũn pecui itorobixae xua pecatsibeibiwa tsane. Nacom tsita jũntũ coyene xanepanatsi nawita pon jũntũ coyene weiweinaya douteiba ichamonaetha. ⁸ Nacom bara itacũpatsi xua daxita painya nepaca catsibiwa pocotsiwan panantawenoname, mataũtano ichawano xua bichocono nawita beyacaincha pocotsiwa xua panantawenoname. Bapoxonae paxeinaename pocotsi coyeneya xua paca cui jũpa xua pajũntũ coyene weiweinaya catsibiname ichamonaetha. ⁹ Nacom Pejume Diwesitha pon nawita pecatsibin jiwi bapon yabara jeichichi, jeye:

“Pon catsibeiba poneiba nawita pomonaetha pomonae peacopeibi jiwi Nacom jopa juniya xuya catsibeibi tsane bapontha, xanepanaya peexanaexae”, jei Nacom Pejume Diwesitha.

¹⁰ Apara Nacom pon catsibeiba jiwi po pexu xua jiwi peũbinexa. Mataũtano apara Nacom pon catsibeiba pexaewa xua jiwi pexaenexa. Barichi Nacom paca catsibeibina beyacaincha xua pocotsiwa panantawenoname. Bapoxonae paca cui jũpaena xua ichamonae painya necatsiba dubenanaebiyawa tsane nawita, pocotsiwa jopa panantawenonaem.

¹¹ Nacom nawita paca catsibina xua daxota paca itacũpaena xua ichamonae pacatsiname nawita. Poxonae pacaponaein barapo paratixi xua pata itorobame peacopeibi jiwi nexa, Jerusalén tomaratha, bapoxonae barapomonae Nacomtha jeye tsane: “Nacom maisa pajũntũ coyene weiweinan xua painta exaname xua daxota barapo Corinto tomarapiwi painta itoroba paratixi”, jei tsane. ¹² Poxonae barapo paratixi pacatame barapo pejume cowũntsi jiwitha, bara barapomonae pacatame pocotsiwa barapomonae penantawenonae. Mataũtano painya neexanaexae baxua barapomonae wũnae jainteiba Nacom.

¹³ Barapomonae wũnae jainta Nacom painya nejejeixae xua paexaname po coyene Cristo pia pecapanenebiyae diwesitha paca itoroba. Mataũtano barapomonae Nacom wũnae jainchinchichi, painya neyawenaexae poxonae pacatame paratixi nawita barapomonaetha xuano xua daxita ichamonaetharũ. ¹⁴ Barapomonae Nacomtha pacata wũcaena pia paca necaantobewaxae poxoru barapomonae patsita itapeinya xeiname xua Nacom bichocono paca yawena pia paca necaantobewaxae. ¹⁵ Nacomtha patsipaeban, pajanje: “Nacom maisa pajũntũ coyene weiweinan xua nexanto painta amanaya itorobicame pata xantha. Baxua pocotsiwa xua painta exaname bichocono jopa juniya xanepanaeyo xua jopa pana itacũpaeyo xua po jumetha pata yabara paebiwa”, pajan.

10

Meje xua Pablo yabara paeba pia peitorobi coyenewa

¹ Xan Pablon paca jume fayacotatsi. Paca tsipaebatsi icha be pocotsi coyeneya Cristo ichi poxonae paeba. Bapon tsipaeba jiwitha pebarũ cui itura jinae coyenetha xuano peantobe coyeneyatha. Paxam pinae pana neyabara paebame pinae pajam: “Poxonae Pablo popona pata xantha saya jopa jume daunweyo poxonae pana netsipaeba. Ichitha poxonae tajũ wepainta tineibarena jume daunweya painta tineibarena”, pinae pana neyabara jam. ² Poxonae paca siwa ponaeinchi jopa paexanaeinde pocotsiwa xua

daxota bewa paca tsipaebinchi pocotsi jumeintha xua daxota jume daunweya tapaca catsipaebiwa tsainchi. Ichamonae paxam jiwana pana neyabara paeba xua pinae abe paexanan poxonae paexanan pocotsiwa Nacom pana itoroba icha pocotsi jiwimonae ichi pomonae jopa pejume cowantsiwi. Bewa jume daunweya tsipaebin barapomonaetha xua baxua yabara xua taneyabara paebiwa. ³ Bara xaniwaicha xua paxan apara saya jiwi pan. Bequein paxan pajinompan barapo cae pin nacuathe, ichitha poxonae pacuiduban Nacom Pejume Diwesi jopa paexanaeinyo icha barapo cae pin nacuathepiwi ichi poxonaeba yabara naba peexanaenexa pocotsiwa ichichipa. ⁴ Jopa paxeinaeinyo xua pesojeiwan xua pata nabinexa xua pocotsiwa barapo cae pin nacuathepiwi xeina. Daichitha paxeinan Nacom pia peayapusu itorobi coyenewa tatsi xua baraxota pata nayaewatsinexa. Barapon Nacom pia peayapusu itorobi coyenewa tatsi pana necana exana xua paamanayaban po peayapusuwa barapo cae pin nacuathepiwi xeina xua saya caurimonae pia pentacaponaein tatsi pia peayapusuwa tatsi. ⁵ Ichamonae najume matsontsonoba poxonae pacueicueijan Nacom Pejume Diwesi jopa peichichipaexae xua Nacom peyaputaewa tsainchi. Barapomonae pajume amanayaban poxonae najume matsontsonoba. Barichi pomonae atsaquiya penayabara paebiwi pia coutha poxoru jopa ichipaeyo xua Nacom peyaputaewa tsainchi, barapomonae pacui amanayabundu. Paxan pacopatan xua bara Cristo pata tanecanamataxeinaewa daxita pata tananta xeinaewatha, xua daxota pata exanaewa pocotsiwa Cristo pana itoroba. ⁶ Paxan panacui wunaetan xua pata muxuwetsiwa pomonae jumefeba Nacom pomonae painyamonae jiwana pamxaem. Baxua paexanaein barapomonaetha poxonae paxam matha tsiwanaya xaniwaicha pajume jejam tsurubenanaebiyam tsane xua paexana dubenanaebiyame pocotsiwa Cristo ichichipa.

⁷ Paxam paca tsitatsi xua paxan be pomonae jopa peainya cui jiwi pan poxonae saya pana taneme. Jopa pana nejuntu cui coyene yaputaem po coyene xua paxeinan pata juntu coyeneintha. Icha ichun xaniwaicha pia coutha nayabara nanta xeina xua bapon Cristo piamonae jiwana tatsi, bapon bewa barichi xua bewa pana yabara jantanainae xua paxan bara Cristo piamonae jiwana tatsi pan icha bapon ichi. ⁸ Jopa auranyo xua pata coutha pata nayabara paebiwa baxua bequein pata coutha atsaquiya pana nayabara paeban xua janje baxue: “Apara Nacom pana cata pia peayapusu itorobi coyenewa xua pata paca cayawenaenexa tsainchi xua painya nejuntu coyene xanepanaponaenexa. Apara jopa pana catsiyo barapo peayapusu itorobi coyenewa xua pata paca abe exanaewatsi tsainchi”, xua jan. ⁹ Jopa ichipaeinyo xua pata taneyabara nanta xeinaewam xua pana pata tanejume cunuwiwam xua pacata tinatsi cartan. ¹⁰ Ichamonae neyabara paeba, jeye: “Pablo pia cartantha xua tajun wenacata tineibarena bichocono ayapube xua wayabara jume cowantsiya exanaewa yawa bichocono jume daunwei tsaibi. Ichitha poxonae bapon patopa waxantha pia pepon saya pecui pawu xuanu poxonae cueicueijei jopa naca tsita ainya cuiyiyo”, jei barapomonae. ¹¹ Barapomonae apara bara bewa pana neyaputaena xua paexanaein pocotsiwa xua cartantha papaeban poxonae papatsin barapomonae pia tomaratha tatsi.

¹² Pata coutha jopa pana nayabara nanta xeinaeinyo xua paxan pacui jupan xua pomonae pia coutha penayabara nanta xeinaewi xua peainya cui jiwi naexana. Saya barapomonae pia coutha nayabara nanta xeina xua bara betiya exana daxita, beyacaincha ichamonae pomonae piamonae tatsi. Barapomonae apara jopa peyaputae jiwi, poxoru saya jeita nawita xua po coyene beyacaincha piamonae tatsi exana. ¹³ Paxan saya tsiwiyo atsaquiya yabara papaeban po coyene xua Nacom pata tanecui copatsiwa xua bara pata tanacuichiwa Nacom. Jopa toxechiya atsaquiya papaebinyo xua beyacaincha xua poxonae Nacom pana copata xua pata exanaewa tsane. Saya paexanan po penacuichiwa xua Nacom pana cata. Nacom pana copata xua papatan ichaxota paxam Corinto tomaratha xua pata paca cayawenaenexatsi Nacom Pejume Diwesi. ¹⁴ Jopa patoxechiya exanaeinyo po coyene Nacom pana itoroba poxonae paca siwa poinchi. Paxan pomonae pan pomonae copiya papatan painya xantha xua pata paca catsipaebinexatsi Cristo pia

pexeinya jume diwesi. ¹⁵ Ichamonae pomonae paxam jiwana pam jume cowanta Cristo pejume diwesi pecuidubixaetsi ichamonae. Barapomonae pomonae pejume cowantsiwi Cristo pejume diwesi, jopa atsaquiya bepayabara janyo: “Barapomonae jume cowanta apara poxoru barapomonae pata cuidubixae”, jopa bepajanyo. Jame xua paichichipan xua paxam bewa mataropeichiya pajume cowanta dubenanaebiyaename. Bapoxonae pana itacupa xua mataropeichiya pata nacuichiwa painya xantha. Saya meisa bewa paexanaein pocotsiwa Nacom pana itoroba. ¹⁶ Paichichipan pata cuidubiwa ichamonae Nacom Pejume Diwesi xua tajū beya xua painya tomara weya poxonae pawetan xua pata paca cuidubiwatsi Nacom Pejume Diwesi. Ichitha jopa paichipaeinyo xua pata cuidubiwa Nacom Pejume Diwesi ichaxota irū ichamonae cuidubarū barapo Nacom Pejume Diwesi yawano xua jiwi jume cowanta barapo diwesi. Tsipei barapo pejume cowantsiwi jopa paichichipaeinyo xua pata yabara jeinexa: “Barapomonae tajū weya jume cowanta barapo Nacom Pejume Diwesi pata cueicueijeixae barapo diwesi”, jopa bepayabara janyo.

¹⁷ Icha ichūn ichichipa atsaquiya penayabara paebiwa xua pinae beta exana, jame bara bewa moya bara atsaquiya yabara paebi po coyene Nacom pia peyaputae coyenewan tatsi yabara xua petsita itapeinya xeinaenexa xua apara Nacom beta peexanaein. ¹⁸ Pocotsiwa xua pebin pia coutha nayabara wūnae jainta xua beta peexanaexae baxua Nacom jopa tsita ainya cuichi. Pocotsiwa xua Nacom yabara nanta xeina xua barapo pebin yabara nanta xeinatsi baxua jame Nacom tsita ainya cuichi.

11

Meje xua Pablo yabara paeba pomonae xua muxuitorobiya pejeiwa: “Paxan Jesús pia peitorobi jiwi tatsi pan”, pomonae pejeiwa

¹ Ichichipan xua jopa painya neaitaconaewa xua tapana nejume yabara ewatsiwam xua tapaebiwa pocotsi jume xua po diwesiyo xan yabara. ² Tsipei yaitama bichocono paca asiwatsi icha Nacom pana ichi xua pana asiwa. Paxan paca doutatsi Nacomtha xua painya nejume cowantsinexa Cristo. Barapocotsi coyeneya paca cana exanatsi icha be pocotsi coyeneya pebin ichi poxonae ba pexantiyo douta xua ichūn pepichinexa powa bayatha ichūn jopa pichiyo. Bapowa antobe pia pebin. Paxam bewa bara paichim, bewa Cristo pantobem. ³ Caurimonae pia pentacaponaein tatsi pon pia coutha naexana be jomo, bapon Eva muxuitorobatsi peajūntūcoyenebewatha. Pajunuwan xua bapon paca muxuitorobina barapo jūntū coyenewatha. Bapon paca cana exanaena xua painya nenanta xeinaewa Cristo jopa beta peyabara nanta xeinaewatsi, xua equeicha jopa xanepanaya painya neantobewa tsane Cristo, meisa xua bapontha painya neantobenexa.

⁴ Paca yabara junuwatsi poxoru pajume naitaewatame pocotsi diwesi xua daxita jiwi paeba. Paxam itapeta pajume naitaewatame ichūnthā pontha pon peyabara paebin Jesús xua ichūn xua pon pepa Jesús aibi. Paxam payabara jume naitaewatame icha jumope xua po jumope jopa xapain Nacom pia Pejumope tūnaxū tatsi. Matautano yabara pajume naitaewatame icha diwesi po diwesi xua jopa xapain Nacom pia pecapanenebiyae diwesi jume xua po diwesi jume copiya pajume taneme. ⁵ Pomonae baxuan paca tsipaeba, barapomonae pia coutha nayabara nanta xeina, jeye: “Paxan Jesús pia peitorobi jiwi tatsi pan, xua pata peainya cui jiwi pan”, jei. Ichitha jopa yabara nanta xeinaeinyo xua barapomonae netoxeincha peainya cui jiwi beyacaincha xua xan. ⁶ Xan saya taepato cueicueijan Nacom Pejume Diwesi tatsi. Jopa bichocono wūnae tacueicueijeiwa jopa be bapocotsinyo be pocotsin xua beta pecueicueijeiwa. Daichitha bara yaputan xua yabara tacueicueijeiwa. Paca tsita itapeinya xeineibatsi xua bara tayaputaewa, xua poxonae daxita pocotsiwantha paca tsipaebiatsi.

⁷ ¿Metha bara abe exanan jampa poxonae jopa paca wūcaetsi pocotsiwa nantawenonan xua tacueicueijeixae Nacom pia pecapanenebiyae diwesi? Jume apara, apara jopa abe exanaeinyo. Tacoutha acopeibi naexanan xua tacui pawī naexanan xua saya meisa ainya cui paca cana exanatsi poxonae paca cuidubatsi Nacom Pejume Diwesi.

⁸ Ichamonae pomonae pejume cowantsiwi pomonae penacaetuteibi jiwi, xua pomonae

wūnae pejainteibiwi Nacom barapomonaē wecobe pitan paratixi tanecatsixae. Barapo paratixitha comocan pocotsiwa xua nantawenonan poxonaē tapaca barū ecaewatsi xua amanaya tapaca cayawenonaenexatsi. ⁹ Poxonaē cataunxuae paca barū ecatsi bapoxonaē inta acoibi pocotsiwa tacanantawenonaewa. Jopa wūcaeiŋyo painyamonaē jiton xua pocotsiwa daunweya pacata exainchi xua saya painya tana necatsibiwaxaem. Pomonaē Macedonia nacuamonaēpiwi pomonaē pejume cowūntsiwi barapomonaē inta carendena pocotsiwa xua tacanantawenonaewa. Bayatha jopa paca wūcaetsi xuano xua equeicha bexa jopa paca wūcae tsainchi xua daxota jopa pacata daunwei exanaē tsainchi xua daxita coyenewantha. ¹⁰ Tajūntū coyenewatha xeinan Cristo pia pexainyei coyenewa tatsi. Dapon aibi xua neexana xua taitompa exanaewa xua yabara tacueicueijeīwa baxua xua jopa paratixi paca wūcaetsi. Baxua cueicueijan daxita Acaya nacuatha. ¹¹ ¿Eta xua metha baxua paca tsipaebatsi? ¿Metha poxoru jopa tapaca antobewatsi? Ajibi apara, Nacom yaputane xua bichocono tapaca antobewatsi.

¹² Ichitha awiya exanaponaēin pocotsiwa xua anoxuae exanaponan xua jopa tapaca wūcaponaewatsi paratixi. Baxua exanan xua tajume cui matawentsinexa, pomonaē xua naerabiya atsaquiya paeba, xua jeye: “Paxan jūpa paexanan icha Pablobarū ichi xua paratixi nonotapona be pentoma xua pecueicueijeixae Cristo pejume diwesi”, jei. ¹³ Barapomonaē pemuxuitorobi jiwi xua pinaē barapomonaē Jesús pia peitorobi jiwi tatsi. Barapomonaē jiwi muxujainyaba pia penacuichiwa coyenewatha. Barapomonaē be natsicotane Jesús pia peitorobi jume pepaebi jiwi tatsi. ¹⁴ Pocotsi coyeneya xua barapomonaē nacana exana jopa yabara najūntū coyene cabenaecaēiŋyo. Payaputan xua barapomonaē apara Satanás piamonaē tatsi tsipei barapomonaē pia coutha nacana exana xua itara mexeya beta peexanaewi icha bapon ichi. Satanás pon caurimonaē pia pentacaponaein tatsi pia coutha nacana exana xua itara mexeya pon xanepanaya peexanaēin icha matatsunpin ichi xua pexeinya peitūpanae coicha xeina Nacom weya. ¹⁵ Daxota jopa bewa najūntū coyene cabenaecaetsi xua poxonaē Satanás pia petanacuichi jiwimonaē tatsi exana icha Satanás ichi poxonaē exana. Barapomonaē natsicotane be pocotsimonaē xua beta peexanaewi. Daxota poxonaē Nacom yabara paebina barapomonaē xua penatsicuentaēsiwa xua abe peexanaexae, barapomonaē bichocono atene exanebinchi xua be pocotsi coyeneya bichocono abe peexanaexae.

Meje xua poxonaē Pablo pia coya nayabara paeba xua atene exanatsi Jesús pia peitorobi jiwi jiwana tatsixae

¹⁶ Equeicha paca tsipaebatsi: Jopa paneyabara nanta xeinaēinde xua xan be pon tanentajemabin bequein cueicueijeithan barapo coyeneya. Ichitha icha panecayabara nanta xeiname baxua bara saya beitatemaya amuxuya pana nejume taema pocotsiwa xua cueicueijan icha be pocotsin pon pematajemabinchi ichi. Bapoxonaē xan tacoutha atsaquiya conotha nayabara paēbin icha ichamonaē ichi xua pia coutha atsaquiya nayabara paeba. ¹⁷ Apara jopa paēbinyo xua tana itorobixae Jesús pon jiwi Pecanamataxeinaēin. Apara saya tacoutha atsaquiya nayabara paēban icha pon matajemabatsi ichi xua pia coutha natsipaeba. ¹⁸ Tsipei ayei jiwi atsaquiya yabara paeba pocotsiwa barapo cae pin nacuathe xeina. Daxota xan barichin tacoutha atsaquiya nayabara paēban. ¹⁹ Pananta xeiname xua daxita pam painya neyaputae jiwi pam. Ichitha jopa peyaputaewi pam. Bara saya pacui yabara copatame xua pajume naitomatame pomonaētha pomonaē be pematajemabi jiwi pomonaē naerabiya paeba xua poxonaē jeye: “Paxan Jesús pia peitorobi jiwi pan”, jei. ²⁰ Mataūtano bara saya pacui yabara copatame xua bara amanaya painya netanacuichinexa tsane ichamonaē. Mataūtano saya pacui yabara copatame xua bara ichamonaē amanaya paratixi painya nepaca cobe wenoteibiwa xua saya barapomonaē nexa. Mataūtano saya pacui yabara copatame xua bara ichamonaē paca yabara muxuitoroba painyawan xua painya nepacata notsiwa. Barichi bara saya pacui yabara copatame xua bara ichamonaē painya nepaca aēbiwa xua barapomonaē ainya cui jiwi beyacaincha paxam. Mataūtano saya pacui yabara copatame xua bara

painya nepaca itabara cuainchiwa. ²¹ ¡Bequein auran xua paca tsipaebatsi baxua, ichitha jopa padaunwan tsobenaeyno icha paichim poxonae ichamonaey pacata abe exana!

Icha daxita jiwi ichi xua atsaquiya nayabara paeba, xan barichin iru atsaquiya nayabara papaeban tacoutha icha pon pematajemabinchi ichi xua poxonae nayabara paeba. ²² Barapomonaey atsaquiya nayabara paeba xua barapomonaey pinaey judiomonaey aepiwi. Xan iruru apara barichin judiomonaeyin. Matautano pinaey barapomonaey Israel pon bayatha tupa pia pemomoxi susato jiwi tatsi. Xan apara iruru barichin barapon Israel pia pemomoxi susato jiwi jiwana tatsin. Matautano barapomonaey atsaquiya nayabara paeba xua pinaey Abraham pia pemomoxi susato jiwi tatsi. Xan apara iruru barichin Abraham pia pemomoxi susato jiwi jiwana tatsin. ²³ Matautano barapomonaey atsaquiya nayabara paeba xua pinaey Cristo pia petanacuichi jiwichi tatsi. Nama apara xan iruru barichin Cristo pia petanacuichin tatsin beyacaincha barapomonaey. Poxonaey baxua paeban apara icha pocotsin ichi pon pematajemabinchi xua pia coutha nayabara paeba. Xan bichocono daunweya ayapusya nacuitan Cristo nexa beyacaincha barapomonaey. Jiwi matowa nejebeiba jiwi pecubi bontha beyacaincha barapomonaey. Ichamonaey bichocono nebeiba beyacaincha barapomonaey. Matowa muxu tatupeibi xua ichamonaey inta exana. ²⁴ Daxota cinco po coyenewathabe judiomonaey newaetaba pia tanecuainchinexa. Daxita coyenewatha necuainta barapomonaey treinta y nueve po cuiyobetha copabeiba xua nejuma cuainta xua xota cuainta xua duwein peru muto. ²⁵ Ichacuitha tsaibi acoibi po cuiyobetha necuainteiba iwatontha. Cae coyenewatha ibotontha necuinbabeiba. Acoibi po coyenewathabe jeratha ponaetha pin naetha payothopan poxonaey pawarapan xua jera bunareca. Cae merawitha yawa cae mataqueithano xoyopan pin mar mentha. ²⁶ Matowa warapeiban tacaponaenexa Cristo pejume diwesi xua jiwi tatsipaebinexa. Ichacuitha inta daunwei xua icha muxunene beya mene iya tapateibiwa tsane poxoru metha awubo tsipae. Ichacuitha inta daunwei poxonaey poneiban namtontha xua metha pomonaey pecaibi jiwi tawanaetha jinompeiba xua tanecaibiwa tsane pocotsiwa xeinan. Ichacuithano inta daunwei poxonaey tanacuamonaepiwi metha inta abe exaneibichipa. Ichacuitha inta daunwei poxonaey pomonaey jopa pejume cowuntsiwi metha abe tana neexanaewa tsipae. Ichacuitha inta daunwei poxonaey jiwi tomarantha metha abe tana neexanaewa tsipae. Ichacuitha inta daunwei poxonaey ira xuepana susato tsurucuae nacuatha taponeibiwa xua metha abe tana neexanaewa tsipae. Ichacuitha inta daunwei poxonaey pin mene mar mentha metha abe tana neexanaewa tsipae poxonaey jeratha ponan po nae pin naetha. Ichacuitha inta daunwei poxonaey metha abe tana neexanaewa tsipae pomonaey naerabiya pepaebiwi xua pinaey pejume cowuntsiwi. ²⁷ Xeinan penacuichiwa po penacuichiwa inta bichocono daunwei xua neatene exana. Matautano ainya merawin tsaibi xua jopa maiteibinyo. Matautano tain atenein tsaibi. Matautano bichocono tameratsi tsaibi. Matautano ainya matabin inta pexaewa ajibi tsaibi. Matautano bichocono aquein tsaibi poxonaey inta seiqueiba paparuwa.

²⁸ Matautano iru icha coyeneinno xua seica xua tapaca tsipaebiwatsi. Matautano xeinan icha coyene po coyene xua neajuntucoyenerewe exana xua poxonaey yabara nanta xeineiban pomonaey Nacom pejume cowuntsiwichi pomonaey penacaetutsi bonmonaepiwi poxonaey ne-eena xua tayawenaenexa barapomonaey. ²⁹ Icha ichun pon barapo penacaetutsi bonmonaey jiwana pin, icha bapon juntu cui coyene faefaena xua pejume cowuntsiwa Nacom, nantanuweya yabara nanta xeinan bapon. Icha ichun juntu coyene jujutatsi xua abe peexanaenexa auran bapon nexa, yawano caseban pontha pon pejuntu coyene jujutsixae. ³⁰ Icha bewa atsaquiya nayabara paebin, bapoxonaey atsaquiya yabara paebin pocotsiwa xua jiwi tsita itapeinya xeinan xua xan faefaenan xua jopa neitacupaeyo xua tacoutha tana nayawenaewa. ³¹ Nacom neyaputane xua xaniwaicha bara yabara paeban po coyenein xua inta daunwei. Nacom Jesucristo Paxa tatsi, pon Wanacanamataxeinaeyin. Barapon jiwi bewa wunaey jainteibina ataya. ³² Caena bayatha Damasco tomaratha poponan. Bapoxonaey pon canamataxeina barapo

tomaratha, bapon itoroba soldadomonaē xua tomara peyacaincha toxorotsi dutsiwa coibototha peumenaenexa. Barapo soldadomonaē tomara coibotontha umena xua pia tanewaetabichi poxonaē tomara wewarapiyan xua tanecaponaenexa jiwi pecubi botha. Barapon pon canamataxeina barapo tomaratha bapon tanacuitatsi pon yatsicaewa nacua peewatsin bapon tanacuitatsi, pon pewun Aretas. ³³ Bequein barapo soldadomonaē bepa newaetabei, ichitha jopa ponaeinyo tomara coiboto iya. Ichamonaē neyacote yoreca ventana wereca xua pepa tomara juma deca. Bara panepataban.

12

Meje xua Pablo yabara paeba xua petsita ita ubiwatsi xua abe poxonaē camaita pocotsiwan Nacom tsita itateiba bapontha

¹ Bewa tacoutha atsaquiya paca tsita nayabara paebichi, xua painya neyaputaenexa xua bara beta taexanaewa. Daichitha jopa xapain neyawenaeyo baxua. Jame apara awiya paca tsipaebatsi xua pocotsiwan Nacom netsita itata xua be poxonaē camaitan. Matautano paca tsipaebatsi pocotsiwan xua Nacom neyaputane exana xua bapon pia pyabaraxae. ²⁻³ Caena bayatha ainya wei xua poxonaē copiya tajume cowantsiwa Cristo. Caena bayatha catorce po weibe yapucaewa xua poxonaē necapona jemeicha peitaboco beicha po itaboco bichocono tajū beicha ichaxota Nacom popona. Jopa taeinyo icha metha pepon daxita necaicha ichacuitha saya metha moya nejumope caicha. Xan jopa baxua yaputaeneyo saya meisa compa Nacom yaputane. ⁴ Xan yaputan xua necaicha paraiso matawun nacua beicha. Poxonaē patopan barapo nacuatheicha jume tan baxoteicha po jume xua nameicha moya yawun xeina xua jiwi jopa yabara yaputaeyo. Nacom jopa yabara necopatsiyo xua bara barapo jume tatsipaebiwa tsane ichamonaetha. ⁵ Bequein neitacupa xua atsaquiya tayabara paebiwa xua pocotsiwan wunaē xua xuan tataexae, daichitha jopa barapo coyeneya exanaeneyo. Saya meisa atsaquiya yabara paeban pocotsiwan xua inta ayapube xua po coyene tatsita itapeinya xeinaewa xua apara nefaefaena exana xua daichitha Nacom neyawena. ⁶ Bara neyabara cui copata xua bara atsaquiya tanayabara paebian tsane pocotsiwan xua beta taexanaewan. Poxonaē baxua exanan jopa paebinyo icha be pocotsin pematajemabinchi ichi, xua nayabara paeba tsipei paeban pocotsiwan xua pexainyeiwan. Ichitha xan jopa baxua atsaquiya nayabara cui paebinyo, tsipei jopa ichipaeinyo xua ichamonaē taneyabara nanta xeinaewa xua xan bichocono taainya cuin, beyacaincha xua pocotsiwa barapomonaē necui tane xua exanan, xuano xua beyacaincha nejume tane xua cueicueijan. ⁷ Pocotsiwa xua Nacom neyaputane exana bichocono wunaē nawita. Nacom copata xua bara saya atenein tsaibi tsane xua atsaquiya tapaebiyainwa pocotsiwan xua Nacom yabara neyaputane exana. Barapo peatene coyenewa caurimonaē pia pentacaponaein tatsi, pon Satanás, itoroba xantha xua atene tana necana exanaenexa. Barapo peatenewa bichocono atenein tsaibi be poxonaē xua xane eto nexatempa. ⁸ Acoibi po jumeyothabe tsaibi Nacom jume fayacotsiya wunqueiban xua taneperaxa capanepaenexa barapo peatene coyenewa weya. ⁹ Ichitha Nacom netsipaeba, jeye: “Jume, jopa caaxaibi exanaetsi. Jame cata itorobatsi Tajumope tūnaxū jinya necayawenaenexa daxita tacaantobetsixaetsi. Saya meisa baxua nantawenoname. Po jiton ba axaibiya popona bara itacupatsi xua daxita pia coutha peexanaewa. Jopa ba canantawenonaeyo taayapusū coyenewa. Ichitha nama pon ba taayapubetsi xua pia coutha beta peexanaewa bapon jame canantawenona taayapusū coyenewa. Bara bapon yawenan”, jei Nacom. Daxota ichichipan poxonaē inta ayapube tsaibi xua jopa tana neitacupaewa xua daxita beta taexanaewa tacoutha. Bapoxonaē jiwi tanetaenexa xua bara Cristo neyawena pia peayapusū coyenewatha. ¹⁰ Daxota jūntū coyene weiweinan poxonaē inta ayapube tsaibi xua beta taexanaewa. Matautano jūntū coyene weiweinan poxonaē jiwi abe neyabara paebeiba. Matautano jūntū coyene weiweinan bequein jopa xeinaeneyo pocotsiwa xua tanantawenonaewa. Barichino jūntū coyene weiweinan poxonaē bequein jiwi neatene exaneiba tajume cowantsixae Cristo. Matautano jūntū coyene weiweinan poxonaē bequein jiwi inta ayapube exaneiba.

Daxita baxuan nejüntü coyene weiweina exana, poxonae inta ayapube tsaibi xua beta taexanaewa xua ichamonae inta daunwei peexanaexae. Bapoxonae bara xaniwaicha asun tsipei Cristo tana neyawenaexae.

Meje poxonae Pablo yabara najüntü coyene eena exana nawita Corinto tomarapiwi

¹¹ Cueicueijan icha ichi poxonae cueicueijeji pon pematajemabinchi xua atsaquiya nayabara paeba. Ichitha paxam pana necana exaname xua atsaquiya tanayabara cueicueijejiwa. Jame apara paxam barapomonaе pam pomonaе bequein bewa xanepanaya pana neyabara paebim. Bequein xan jopa peainya cuiyinyo, ichitha barapomonaе jopa peainya cui jiwi beyacaincha xua xan pomonaе pajume naitaewatame. Barapomonaе naerabiya paeba xua pinae barapomonaе bichocono peainya cui jiwi pomonaе Cristo pia peitorobi jiwi jiwana tatsi. Ichitha barapomonaе xainwaicha bichocono jopa peainya cui jiwi. ¹² Poxonaе cataunxuae paca baru popoinchi paca tsita itapeinya xeinatsi xua xan yatsicaya Jesucristo pia peitorobi jiwi jiwana tatsin. Matautano jopa aitaconaeyiya exanaeyinyo poxonaе bequein ichamonae inta daunwei exana poxonaе abe neyabara paeba. Jame saya jüntema exana ducuaenaebiyān petsita itütsi coyenewān painya xantha bequein ichamonae abe neyabara paeba. Matautano exana ducuaenaebiyān pocotsiwan jiwi nabenaeca exainchi. Daxita baxuan exanan Nacom pia peayapusu itorobi coyenewatha tatsi. ¹³ Paca yabara nanta xeinatsi xua paxam metha pananta xeiname xua paxam jopa peainya cui jiwi pam. Matautano metha pananta xeiname xua meisa icha penacaetütsi bonmonae jiwi pomonaе wānae pejume cowāntsiwi Nacom bichocono peainya cui jiwi beyacaincha paxam. Metha pananta xeiname baxua poxoru jopa paca wūcaetsi xua tapana neyawenaenexam tsane pocotsiwatha tanantawenonaewa pocotsiwatha xua ayapube pacata exainchi.

¹⁴ Anoxuae nacui yabara wūnaetan xua tapaca siwa ponaewatsi tsainchi equeicha xua nama acoibi po cuiyobetha tsane. Caena bayatha copiya nacueyatabe po cuiyobetha paca siwa poinchi. Ichitha jopa paca wūcaetsi xua pocotsiwatha tapana neyawenaenexam tsane xua pacata ayapube exainchi. Ichitha jopa paca yabara siwa ponaetsi taichichipaexae pocotsiwa xua paxeiname. Apara saya paxam cuita paca siwa poinchi. Pexui ba jopa nantawenonaeyo xua paxeiwi jüntana jeba paratixi, jame saya ba coxiyeiwi bewa pia pexui jüntana jebi paratixi. Barapocotsi jüta coyeneya ichin bewa paca yawenaeinchi. Jopa panantawenonaem xua tapana neyawenonaewam. ¹⁵ Jüntü coyene weiweinan xua paca catsinchi daxita xua xeinan. Barichi copatan xua bara ichamonae atene tana neexanaewa tapaca cayawenaenexatsi. Poxonaе bequein matowa toxeinchiya paca antobe tsoponaetsi daichitha be conotha xuya pana neantobem.

¹⁶ Ichamonae pomonaе painyamonaе jiwana pam naerabiya neyabara jei: “Bara xaniwaicha Pablo jopa painta ayapube exanaeyo xua pana newūca paratixi bapon nexa. Daichitha ichacuitha tsipae metha apara bapon naca muxuitorobiya wecobe notsipa paratixi”, jei. ¹⁷ ¿Metha paratixi paca yabara muxuitorobiya wecobe notsinchi poxonaе pebiwi itorobin painya xantha? ¡Jume apara! ¡Jopa baxua exanaeyinyo! ¹⁸ Tito itoroban xua painya nepaca siwa ponaewa tsane, irūno ichūnno itoroban pon irū pejume cowāntsin xua Tito pecueiyatsiwa tsainchi. ¿Metha Tito bara paca yabara muxuitorobiya wecobe notsina paratixi? ¡Jume apara! Paxam bara payaputaneme bara Tito betiya xaniwaicha pananta jūpaya paexananbe, xuano pana najüntü coyene jūpanbe.

¹⁹ Jopa payabara nanta xeinaeinde barapo jumein xua pata paca catsipaebiwatsi xua saya poxoru pata ichichipaexae xua paxam paca tsita xanepanatsi. Jopa baxua paexanaeyinyo. Jame po jume xua Cristo ichichipa xua patapaebiwa, apara barapo jume cui coyeneya papaeban. Daxita baxuan pacueicueijan Nacom peitütha xua xanepanaya mataropeicha beta Nacom painya nejume cocowāntaponaewa tsane. Baxua paexanan tsipei paxam tamonaе pam, pomonaе pata paca caantobe jiwichi pam. ²⁰ Junuwan xua poxonaе tapaca siwa ponaewa tsainchi xua metha pajinompatsipame be pocotsimonaе aichaxaibin tataewa poxoru metha aichaxaibin tsipae pocotsiwa xua

paexaname. Matautano metha paneyabara nanta xeinaetsipame xua xan jopa paca cui jupaetsi xua poxonae pocotsiwa exanan. Barichi junuwanno xua poxonae tapaca siwa ponaewa tsainchi xua metha nantiya pana najume matsontsonobame. Matautano junuwan xua nantiya pana yabara uwame pocotsiwan paxeiname, xuano xua nantiya pana nacasebame. Matautano junuwan xua nantiya pana naasiwam xua ichamonae jopa bepayawenaem. Matautano junuwan xua nantiya pana nabiatetsipame xuano xua nantiya tsamũ jumeya pana nacui yopitsipame pocotsiwan xua paexaname. Junuwanno xua nantiya pana naaebichipame painya neyaputaexae pocotsiwan xua paexaname, xuano xua nantiya pana natsaquibabame poxoru painya neanaepanaexae. ²¹ Matautano junuwan xua poxonae equeicha tapaca siwa ponaewatsi tsainchi, Tanacom neexana xua paca yabara auratsi. Bichocono unthuthu wecoyan tsane pomonae nexa pomonae xua caena bayatha abe peexanaexae. Barapomonae cataunxuae jopa acuiuriyo pocotsiwan xua abe eexanapona xua poxonae barapomonae yabuxi nata nota xua bequein jopa piseurixi xuano poxonae yabuxi nota pebiwi poxonae jopa piseuriyo. Matautano barapomonae atsaquiya abe eexanapona.

13

Meje poxonae Pablo napeyabiya najume weta

¹ Anoxuae equeicha paca siwa ponaeinchi xua nama acoibi po cuiyobetha tsane xua taponae wa tsane bara beya. Icha ichun ichichipa cui yopita xua ichun abe peexanaexae Nacom pia peitorobi coyenewa baxua yabara naca tsipaeba, naca jeye: “Poxonae jiwi cui yopita xua ichun abe peexanaexae bewa acoibi poyobe yabara paebina bapontha, xua abe peexanaexae bapon. Ichacuitha saya nacueyatabe poyobebe yabara paebichipa bapontha bapoxonae jiwi tsita itapeinya xeinatsi xua bara bapon abe peexanaein”, jei Nacom pia peitorobi coyenewatha tatsi. ² Bayatha poxonae paca siwa poinchi yabara paca tsipaebatsi pomonae xua abe peexanaewi pomonae painyamonaе jiwana pam xua iru ichamonae. Anoxuae bequein cataunxuae tajũ paca cuenta poponatsi, equeicha paca tsipaebatsi xua bayatha pocotsiwa paca muxuwetatsi, janje: “Poxonae equeicha paca siwa ponaeinchi ayapube taexanaein pomonaetha pomonae xua awiya abe peexanaponaewi”, jan. ³ Baxua paca cana exanaeinchi yaitama paichichipame xua paca tsita itapeinya xeinaeinchi xua pocotsiwa Cristo neitoroba tacueicueijeinexa bapon nexa. Paca muxuwetsinchi Cristo nexa tapaebixae bapon nexa. Cristo jopa jume faefaenaeyo poxonae yabara paca muxuwetatsi painya abe exanae cuiru coyenein. Jame apara bapon jume daunweya paca tsipaeba. ⁴ Poxonae Jesucristo tupa naetotha jiwi yabara nanta xeina xua bapon Cristo saya juntu coyene faefaena, tsipei jopa pia coutha nayawenaeyo. Ichitha anoxuae Jesucristo asu popona Nacom pia peayapusu itorobi coyenewatha tatsi. Bequein pajuntu coyene faefaenan anoxuae, daichitha poxonae paca itawetinchi bapoxonae jopa pajuntu coyene faefaenaein tsane. Jame asu pajinompaein. Bapoxonae Nacom pia peayapusu itorobi coyenewatha ayapusuya paca itawetsina.

⁵ Incane painya coutha pana najuntu coyenein jujure icha bara xaniwaicha metha beta pajume cowantsiya jinompame. Icha bara xaniwaicha pana nayaputaneme xua bara yatsicaewa Jesucristo piamonae tatsi pam, barapoxonae pana nayaputaename xua bara apara Jesucristo paca baru jinompa. Icha jopa Jesucristo piamonae tatsi pam, bapoxonae Jesucristo jopa paca baru jinompaeyo. ⁶ Ichichipan xua paxam payaputaneme xua paxan Cristo pana baru popona. Paxan jopa pemuxuitorobi jiwi pan xua poxonae pata jeiwa: “Paxan Jesucristo pia peitorobi jiwi tatsi pan”, poxonae pata jeiwa. ⁷ Pawacan Nacomtha xua jopa abe painya neexanaewa tsane. Jopa Nacomtha baxua payabara wucaeyo xua paca tsita itapeinya xeinaeinchi xua paxan Jesucristo pia peitorobi jiwi tatsi pan xua daxota beta painya neexanaewa tsane. Ichitha pacata wucatsi Nacom xua awiya u meisa pexeinya coyene painya neexanaponaewa tsane bequein metha pana neyabara nanta xeiname xua paxan jopa pomonae Jesucristo pia peitorobi jiwi tatsi panyo. Bequein paxan jopa paca tsita itapeinya xeinaetsi xua bara Cristo pia

peitorobi jiwi tatsi pan. ⁸Paxan jopa paichichipaeinyo xua pata yabara jume toxeinchiya exanaewa pocotsiwa itoroba barapo Nacom pia pexainyei diwesi jume. Jame apara itapeta paexanan pocotsiwa itoroba barapo pexainyei jume diwesitha. ⁹Daxota pajuntũ coyene weiweinan poxonaē ichamonaē pana neyabara paeba xua pinae jopa daunweya papaebinyo. Saya paichichipan xua beta painya nejume cowuntsiwa tsane. Awiya Nacomtha pacata wucatsi xua paxam xaniwaicha painya nejuntũ coyene xanepanapon-
aewa tsane Nacomtha xua jopa patsita natsicuentisim tsane abe painya neexanaexae bapontha. ¹⁰Pewunaeya xua poxonaē tapaca siwa ponaewa tsainchi, matha barapo carte pacata tinatsi. Daxota tinan xua jopa bewa paca tsipaebi tsainchi pocotsiwa pacata ayapube exanatsi poxonaē paca siwa ponaeinchi. Bapoxonaē jopa nantawenonaēin tsane xua tapaca itorobiwa tsainchi xua taxeinaexae Nacom pia peitorobi coyenewa tatsi po peitorobi coyenewa Nacom necata. Nacom necata barapo peitorobi coyenewa xua painya nejuntũ coyene xanepana ponaenexa Nacomtha. Apara jopa baxua necatsiyo xua abe tapaca exanaenexatsi.

¹¹Tamonae pam, bara wetan anoxuae barapo carte. Ichichipan xua painya nejuntũ coyene weiweinaya jinompaewam tsane. Itapeta pajume jejande pocotsiwa xua paca muxuwetatsi xua daxota beta mataropeicha painya neexanaponaewa tsane. Pana najuntũ coyene tsacabare xua daxota peburũya caemonaē pana nabarũ nanta xeinaeya jinompare. Juntema panabarũ jinompare. Bapoxonaē Nacom pon juntema pepo-
ponaein, xuano xua peantobe tsurucuaēbiyaēin, barapon paca barũ poponeibina. ¹²Betiya painta nantiya najacobare painya neantobewaxae Cristo. ¹³Daxita pomonaē xote jinompe pomonaē pejume cowuntsiwi Jesucristo barapomonaē paca jacobā.

¹⁴Barabũ Jesucristo pon jiwi Pecanamataxeinaēin paca yawenaena pia paca necaan-
tobexae. Barabũ Nacom pia peantobe coyenewatha tatsi pajinompaename. Matautano barabũ Nacom pia Pejumope tunaxũ tatsi daxita pam paca barũ jinompaena.

Baja Pablo.

Meje Po Carte Pablo Tatina, Galacia Nacuapiwi Tatinatsi

Meje yabara poxonae Pablo tamropata pitaba xua tatina pomonaetha pomona Galacia nacuapiwi

¹ Xan, Pablon, Jesucristo pia peitorobi jiwi jiwana tatsin. Apra ichun jopa neitapetsiyo yawa pebiwi jopa neitorobiyo. Apra jame Jesucristo bapon neitoroba, yawa Nacom, Waxa, neitoroba, pon Pexanto asu exana petupae coyene weya. ² Xan, iruru ichamona pomona pejume cowuntsiwi daxita barapomona pan paca jacobatsi. Barapo carte pacata tinatsi pomona Nacom piamona tatsi pam, painya nejume cowuntsixae Jesucristo pomona Galacia nacuatha painya nejinompaewa. ³ Barabu Nacom, pon Waxa, iru Jesucristo, pon jiwi Pecanamataxeinaein, baponbe amanaya paca yawenaena pia paca necaantobexae. Yawano barabu Nacom juntea jinompa paca exanaena. ⁴ Bapon Jesucristo naca tsitupa xua wanaca capanenebiya exanaenexa barapo abe waexanae coyene weya xua po abe exanae coyene exana pomona jinompa po cae pin nacuathe. Nacom pon Waxa ichichipa naca capanepa daxita barapo coyenein weya. ⁵ ¡Barabu Nacom wuna jaintatsi jiwi xua ataya tsane!

Meje yabara xua ajibi icha pecapanenebiyae coyenewa

⁶ Najuntu coyene benaegan xua nainya papentame Nacom, pon paca waba. Tsipei apra bapon paca yawena po peantobe coyenewatha Cristo iruru xeina waxainchi nexa. Yawa najuntu coyene benaegan xua pajume cowuntame icha jume diwesi xua be pecapanenebiyae diwesi jume xua saya jiwi paeba. ⁷ Bara xaniwaicha, xua icha pecapanenebiyae diwesi aibi. Pocotsiwa xua ichamona paca cana exana baxua paca juntu coyene tsacaba xua painya nejume cowuntsinexa icha diwesi, xua toxeinchiya painya nejume cowuntsinexa Cristo pia pecapanenebiyae diwesi jume tatsi. ⁸ Icha ichun toxeinchiya ichawiya yabara paca tsipaeba xua pocotsiwa bayatha paca tsipaebatsi pecapanenebiyae diwesi coyene barabu Nacom bapontha cabeta exanaena abe peexanaexae. Metha bara bequein xan tsipaein, ichitha Nacom necabetsipa. Ichacuitha metha bara bequein matatsunpin tsipae pon itaboco wetsica pona, ichitha Nacom cabetsipa bapontha. ⁹ Baxua bayatha paca tsipaebatsi ichitha equeicha baxua paca tsipaebatsi. Paca jeichi: Icha ichun toxeinchiya ichawiya yabara paca tsipaeba xua pocotsiwa bayatha paca tsipaebatsi pecapanenebiyae diwesi coyene barabu Nacom bapontha cabeta exanaena abe peexanaexae, paca jeichi.

¹⁰ Poxonae paeban baxua jopa cueicueijanyo pocotsiwa jiwi beta tana neyabara nanta xeinaewa. Apra jame cueicueijan Nacom wuna tana neyabara nanta xeinaexae. Icha saya nanta xeineibichipan xua exanan po coyeneyatha xua jiwi beta tana neyabara nanta xeineibiwa tsane bapoxonae xan jopa Cristo pia peitorobi jiwi jiwana tatsin tsipae.

Meje yabara xua poxonae Pablo Jesucristo pia peitorobi jiwi jiwana pinsi tatsi cana exainchi

¹¹ Tamona pam, pomona iru painya nejume cowuntsiwixae Jesucristo. Ichichipan xua painya neyaputaewa xua po diwesi pecapanenebiyae diwesi xua po diwesi cueicueijan, barapo diwesi apra jopa jiwi pia diwesiyo tatsi. ¹² Matauta barapo diwesi apra xua jopa jiton netsipaebiyo. Yawa matautano dapon aibi xua pon necuiduba barapo diwesi. Apra saya Jesucristo neyaputane exana poxonae netsita ituta pia coutha.

¹³ Paxam pajume taneme xua pocotsiwa bayatha exanan, xua poxonae cataunxuae eexanaponan xua po coyene judiomona exana pia pejume cowuntsiwa xua abe yabara, yawa pejinompae coyene yabara. Bayatha payaputaneme xua bichocono abe cana exanan pomonaetha pomona Nacom piamona tatsi daxita pomona pejume cowuntsiwixatsi Cristo. Ichichipan xua daxita weraweraca taexanaewa. ¹⁴ Xan bichocono yabara nacuidubaponan po coyene judiomona pia pejume cowuntsiwa tatsi. Yawa yabara nacuidubaponan po coyene pia pejinompae coyene tatsi. Bichocono nacuidubaponan

beyacaincha xua ichamonaē nacuidubapona pomonaē tanacuapiwi pomonaē tana newei jupaewi. Bichocono ichichipan xua taexanaewa po coyene tamo susato jiwi exana, beyacaincha xua ichamonaē exana. ¹⁵ Ichitha caena bayatha Nacom neitapeta xua tajume cowuntsiwa tsane bapon pewunaeya poxonaē beya tanaexanaewa tsane. Daxota Nacom newaba, bichocono petana neantobexae. ¹⁶ Bapon Nacom yabara neyaputane exana Pexanto tatsi, pon Jesucristo. Baxua Nacom inta exana Pexanto tatsi tayabara cueicueijeinexa tsane pomonaetha pomonaē jopa judiomonaē naexanaeyo. Poxonaē barapo coyeneya necana exana jopa baxua yabara paebinyo ichamonaetha. ¹⁷ Matautano jopa ponaeyo Jerusalén tomara beya xua baxua tayabara paebinexa Jesucristo pia peitorobi jiwitha tatsi pomonaē bayatha netsiwana cana exainchi Jesucristo pia peitorobi jiwi tatsi. Seicaya nama xan nainya ponan Arabia nacua beya. Bapoxonaē pirapaeyo Damasco tomara beya ponan.

¹⁸ Jopa nainya ponaeyo Jerusalén tomara beya. Saya bara beya ponan poxonaē acoibi po weiyobe yapucaewa. Bapoxonaē Pedro tan, yawa baxota naecan quince po matacabibe. ¹⁹ Jopa taeinyo daxita pomonaē Jesucristo pia peitorobi jiwi tatsi. Saya meisa Santiago tan pon Jesús pia peitorobi jiwi jiwana pin tatsi, pon jiwi Pecanamataxeinaein bapon peweicho tatsi. ²⁰ Bara xaniwaicha tinan. Nacom yaputane xua jopa naerabinyo pocotsiwa pacata tinatsi.

²¹ Nexata bapoxonaē Siria nacua beya ponan, yawano Cilicia nacua beya ponan. ²² Nama pomonaē jinompa Judea nacuaetha, pomonaē Cristo pejume cowuntsiwi, cataunxuae barapomonaē jopa xaniwaicha neyaitaeyo. ²³ Saya barapomonaē jume tane xua ichamonaē neyabara jeye: “Apara bapon, pon caena bayatha abe naca cana exana wajume cowuntsixae Cristo. Anoxuae bapon yabara cueicueije i tsurucuaēbiya Jesucristo pia pejume cowuntsi diwesi, bequein copiya ichichipa weraweraca cana exana ichamonaē pomonaē pejume cowuntsiwi Jesucristo”, neyabara jei. ²⁴ Barapomonaē wunaē jainteiba Nacom poxoru anoxuae wunaē exanan Nacom nexa.

2

Meje yabara poxonaē Jesús pia peitorobi jiwi tatsi Pablo caemonaē nabaru naexanatsi

¹ Jerusalén tomara weya ponan xua jiwi tatsipaebinexa Nacom Pejume Diwesi icha nacuantha. Poxonaē catorce po weibe yapucaewa bapoxonaē Bernabé equeicha paponanbe Jerusalén tomara beya. Yawa iru Tito baru ponan. ² Bara beya ponan tsipei Nacom netsita ituta xua bewa ponaēin. Baraxota Jerusalén tomaratha pomonaē pecanamataxeinaewi Nacom piamonaē tatsi daxita pomonaē pejume cowuntsixaetsi Cristo barapomonaē compa nebaru nacaetuta. Barapomonaetha yabara tsipaeban po diwesi pecapanenebiyae diwesi jume, xua po diwesi tsipaeban pomonaetha pomonaē jopa judiomonaē naexanaeyo. Baraxua exanan tsipei jopa ichipaeinyo xua barapo diwesi pejumexaei tsane po diwesi bayatha tsipaeba ducuaēteiban yawa xua anoxuae tsipaeban pomonaetha jopa judiomonaē naexanaeyo. ³ Tito baxota nabaru ecan. Bequein bara bapon griego nacuaēnaepin ichitha jopa itorobichi xua pewi thabiwatsi xua ichaxota pebiwi nareixacaena. Bequein ichamonaē baxua ichichipa xua baxua Tito pecana exanaewatsi, ichitha jopa baxua cana exanaetsi. ⁴ Ichamonaē pomonaē Cristo Jesús jopa xapain jume cowuntsichi, barapomonaē namicha pata poxonaē pana nacaetutan. Barapomonaē ichichipa xua Tito pewi thabiwatsi xua ichaxota pebiwi nareixacaena. Barapomonaē namicha pata poxoru ichichipa yaputane xua icha paxan jopa paexanaeyo pocotsiwa Moisés pia peitorobi coyenewatha itoroba xua anoxuae pata jume cowuntsixae Cristo Jesús. Barapomonaē ichichipa xua equeicha bewa paexanaēin pocotsiwa Moisés pia peitorobi coyenewatha yabara itoroba xua penawi thabi coyene. ⁵ Matautano bara caetono barapomonaē jopa pajume cowuntsiya taeinyo. Yawano jopa paexanaeyo pocotsiwa xua barapomonaē pana neitoroba xua jame saya poxoru apara painya neyaputaewa tsane pexainyeiwa xua po coyene Nacom pia pecapanenebiyae diwesi jume xeina.

⁶ Jerusalén tomaratha tsipaeban pomonae pecanamataxeinaewi Nacom piamonae tatsi daxita pomonae pejume cowantsixaetsi Cristo. Nayabara paeban barapomonaetha pomonae Nacom piamonae tatsi pecanamataxeinaewichi po coyene Nacom Pejume Diwesi tsipaeban pomonaetha pomonae jopa judiomonae naexanaeyo. Ichitha barapo matabitha barapomonaetha pomonae Nacom piamonae tatsi pecanamataxeinaewichi jopa neitorobiyo xua tamuxuna cueicueijejiwa xua icha diwesi xua Jesucristo yabara poxonae cueicueijeji ducuaenaebiyon po diwesi xua yabara paeban pomonaetha pomonae jopa judiomonae naexanaeyo. Jopa inta ainya cuiyo xua barapomonaetha bichocono peainya cui jiwi xua pecanamataxeinaewi xua nama xan jopa daichinyo, tsipei Nacom daxita tsitatsi xua xan iru barapomonaetha penajupa jiwi pan. ⁷ Barapomonaetha jopa necatsiyo pena pecuidubiwa xua tacueicueijeinexa. Barapomonaetha yaputane xua Nacom neitoroba tacueicueijeinexa pia pecapanenebiyae diwesi pomonaetha pomonae jopa judiomonae naexanaeyo pomonae jopa pewi thabiwichi. Icha Nacom ichi xua Pedro itorobatsi xua pecueicueijejiwa tsane barapo pecapanenebiyae diwesi judiomonaetha, barichi Nacom neitoroba xua tacueicueijejiwa tsane barapo diwesi pomonaetha pomonae jopa judiomonae naexanaeyo. ⁸ Nacom Pedro exainchi Jesucristo pia peitorobi jiwi jiwanaepin tatsi xua pomonae judiomonae nexa. Barichi Nacom neexana xua Jesucristo pia peitorobi jiwi jiwanaepin tatsin xua pomonae jopa judiomonae naexanaeyo nexa.

⁹ Santiago, iru Pedro iru Juan barapo acoibi poyobe jiwi yabara nanta xeina xua barapo acoibi poyobe pepa pecanamataxeinaewi xua canamataxeinatsi pomonae Nacom piamonae tatsi daxita pomonae pejume cowantsixaetsi Cristo. Barapo acoibi poyobe yaputane xua Nacom necata barapo penacuichiwa. Bapoxonae barapo acoibi poyobe necobe jayaba xua patsita itapeinya xeinan xua peburuya cuita pata nanta xeinaewa xua xan barapoyobe jiwanaepin poyobe xua Nacom Pejume Diwesi cueicueijeji jiwitha. Barapo acoibi poyobe iru Bernabé cobe jayabatsi. Barapomonaetha baxua exana poxoru pata jiwimonae pana naexanan, yawano poxoru barapomonaetha peburuya nanta xeina, xua paxanbe Bernabé panbe paponaeinbe ichaxota pomonae jopa judiomonae naexanaeyo xua iruru poxonae barapomonaetha nabaru nacuichina pomonae judiomonaetha. ¹⁰ Barapo acoibi poyobe pana itoroba, pana nejei: “Pananta xeinare xua painya neyawenaewa tsane peacopeibi jiwi Jerusalén tomaratha”, pana jei. Baxua bichocono ichichipan xua taexanaewa tsane.

Meje yabara poxonae Pablo muxutainyaba, Pedro muxutainyabatsi Antioquía tomaratha

¹¹ Nexata poxonae Pedro Antioquía tomaratha patopa, bapon itabara taeya muxutainyaban tsipei bapon bayatha abe exana. ¹² Pocotsiwa bapon exana baxue: Copiya bapon Pedro naxane pomonaetha pomonae jopa judiomonae naexanaeyo, pomonae xua jopa ba wi thabichi xua ichaxota pebiwi pia penareixacaenaewa bequein bapon judiomonaepin. Ichitha poxonae pata pebiwi, po pebiwi Santiago baru popona, bapoxonae Pedro tsana xane jopa equeicha naxaeyo pomonaetha pomonae jopa judiomonae naexanaeyo. Baxua Pedro exana poxoru Santiagobaru cunuwatsi xua poxoru Santiagobaru paeba xua pinae bewa daxita pebiwi wi thabichi, metha bequein tsipae pomonae pepa judiomonae, matautano metha bequein tsipae pomonae jopa judiomonae naexanaeyo. ¹³ Bapoxonae ichamonae icha judiomonae pomonae pejume cowantsiwi Jesucristo, barichi jupa exana icha Pedro ichi xua tsana xane. Bequein barapo ichamonae yaputane xua jopa bewa itorobi xua pewi thabiwatsi pomonae pejume cowantsiwi, ichitha awiya barapomonaetha paeba xua bewa pinae wi thabichi pomonae pejume cowantsiwi. Barichi Bernabé bara jutiya ichi iru exana xua tsana wepu xane pomonae jopa judiomonae naexanaeyo. ¹⁴ Ichitha poxonae tan xua barapomonaetha jopa xapain exanaeyo pocotsiwa xua Nacom pia pecapanenebiyae jume diwesitha paeba bapoxonae Pedro tsipaeban peitabaratha tatsi daxita pomonae Nacom piamonae tatsi pejume cowantsixaetsi Cristo pomonae nacaetuta. Janje: “Xam bequein judiomonaepim ichitha poponame icha ichi poxonae popona pon jopa judiomonae naexanaeyo. Jopa exanaem icha ichi

poxonae exana pon judiomonaepin. Xam jopa bewa itorobim pomonae jopa judiomonae naexanaeyo xua bewa exanaena icha judiomonae ichi xua poxonae exana”, jan.

Meje yabara xua judiomonae xuano pomonae jopa judiomonae naexanaeyo xua iru capanenebiya tsainchi xua Jesucristo pejume cowuntsiwixaetsi

¹⁵ Waxainchi judiomonae naexanatsi. Ichitha waxainchi jopa abe waexanae jiwichi xua jopa icha ichamonae ichiyo pomonae jopa judiomonae naexanaeyo, tsipei barapomonae abe peexanaewi. ¹⁶ Waxainchi yaputainchi xua bequein exanatsi pocotsiwa Moisés pia peitorobi coyenewatha itoroba, ichitha jopa juntu coyene xeicaetsi Nacomtha xua jopa Nacom watsita natsicuentiwa tsane abe waexanaexae bapontha. Jiwi ba juntu coyene xeica poxonae Jesucristo jume cowantatsi. Waxainchi juntu coyene xeicatsi poxoru jume cowantatsi Jesucristo xua poxoru jopa wajume cowuntsiya exanaexae pocotsiwa Moisés pia peitorobi coyenewatha itoroba. Dapon aibi pon pejuntu coyene xeicaein xua pejume cowuntsiya exanaexae pocotsiwa Moisés pia peitorobi coyenewatha itoroba.

¹⁷ Waxainchi ichichipatsi xua wajuntu coyene xeicae jiwichi wanaca yawenaexae Cristo. Ichitha icha waxainchi nacuidubaponatsi xua xeinatsi peajuntucoyenebewa xua bequein Cristo naca yawena, bapoxonae jopa naca yawenaeyo Cristo. Matautano bapoxonae bapon abe naca cana exana. ¡Jume, baxua apara Cristo jopa bapana nacata exanae! ¹⁸ Nacom tsitan xua tatsita natsicuentiwa abe taexanaexae bapontha icha equeicha jiwi caewa itoroban xua bewa exanaena pocotsiwa Moisés naca itoroba pia peitorobi coyenewatha wanaca capanenebiyaenexa abe waexanae coyenewa weya. ¹⁹ Barapo Moisés pia peitorobi coyene jopa neyawenaeyo xua necana exana xua tajuntu coyene xanepanaewa Nacomtha. Saya necana exana xua tatupaewa tsane, poxoru awiya tanatsicuentiwa xeinan. Ichitha anoxuae Cristo tana netsitupaexae neitacupa xua tapoponaewa Nacom nexa. Matauta anoxuae jopa neitorobiyo Moisés pia peitorobi coyenewa tatsi poxoru jopa xeinaeyo peayapusu itorobi coyenewa xua tana necapanepaewa tsane abe taexanae coyenewa weya. ²⁰ Poxonae Cristo tupa naetotha inta yawa muxuna tupa abe taexanae coyenewan. Daxota anoxuae xan be ichun, tsipei Cristo neyawa popona. Po peajuntuayapusuwatha poponan, barapo peajuntuayapusuwa Nacom necata tajume cowuntsixae Cristo. Bapon Cristo, pon Nacom Pexanto, bichocono neantobe, daxota inta tsitupa abe taexanae coyenewan. ²¹ Jopa benaitematsinyo Nacom pia peantobewa tatsi. Icha nanta xeinan xua jiwi najuntu coyene xeica exana Nacomtha peexanaexae pocotsiwa Moisés pia peitorobi coyenewa itoroba, xua daxota bapoxonae Cristo jopa nantawenonaeyo xua jiwi petsitupaewatsi bara be poxonae xuban Nacom pia peantobewa tatsi.

3

Meje yabara xua Moisés pia peitorobi coyenewa tatsi

¹ ¡Eta bichi tsobena Galacia nacuapiwi! ¿Jintam pon mara pexeinaein paca baru xujai xua jopa painya nejume cowuntsiwa Nacom pia pejume xainyeiwa tatsi? Poxonae paca tsipaebatsi paca yaputane exainchi xua Jesucristo tsitupa jiwi naetotha xua jiwi tsitupatsi. ² Baraxua pana nejume nore: ¿Nacom paca cata pia Pejumope tñaxu tatsi painya neexanaexae pocotsiwa Moisés pia peitorobi coyenewatha itoroba? Jume. Nacom paca cata pia Pejumope tñaxu tatsi painya nejume cowuntsixae po coyene xua yabara paca tsipaebatsi xua pejume cowuntsiwa Jesucristotha. ³ ¡Maisa bichoconocai! ¿Eta pomonae pam tsobenaem? Poxonae copiya pajume cowantame Nacom pia Pejumope tñaxu tatsi paca yawena xua Nacom painya netsita xeinaewa pejuntu coyene xeicaewa. ¿Anoxuae pananta xeiname xua bichocono pejuntu coyene xeicaewa paxeiname beyacaincha xua copiyatha paxeiname, xua Moisés pia peitorobi coyenewa painya exanaexae? Ajibi, jopa bewa baxua pananta xeinaem. ⁴ Ichamonae bichocono paca atene exana Jesucristo pexeinya jume diwesi painya nejume cowuntsixae. Jopa bewa pana nacui barapentsim xua painya nejume cowuntsiwa Jesucristo pejume diwesi, po diwesi yabara

xua ichamonaē atene paca exaneiba. Tsipei icha pana nacui barapentsipame xua painya nejume cowuntsiwa Jesucristo pejume diwesi jopa pexainyei jume tsipae pocotsiwa xua papaebame. ⁵ Nacom paca cata pia Pejumope t̄nax̄u tatsi. Matautano Nacom pexeinya petsita it̄ubi coyenewa exana painya xantha. ¿Eta pocotsiwa metha Nacom baxua exana? Baxua Nacom jopa pacata exanaeyo xua poxoru painya neexanaexae pocotsiwa Moisés pia peitorobi coyenewatha itoroba. Aparā jame baxua pacata exana poxoru painya nejume cowuntsixae po diwesi xua pajume taneme.

⁶ Abraham pon caena bayatha popona yabara jume cow̄nta xua Nacom exanaena pocotsiwa Abraham yabara tsiw̄nae muxu dutatsi. Daxota Nacom tsitatsi xua bapon Abraham bara pej̄nt̄u coyene xanepanaein xua jopa Nacom tsita xeinaetsi penatsicuent̄siwa xua abe peexanaexae. ⁷ Daxota paxam bewa payaputaename xua pomonaē xaniwaicha Jesucristo pejume cow̄ntsiwichi, Nacom tsitatsi xua barapomonaē bara be yatsicaewa Abraham pia pemomoxi susato jiwi tatsi bequein bara jopa yatsicaewa Abraham pia pemomoxi susato jiwiyo tatsi. ⁸ Caena bayatha Nacom Pejume Diwesi paeba, xua Nacom capanenebiya tsane pomonaē jopa judiomonaē naexanaeyo xua jopa peatenenexa tsane xua abe peexanaexae. Baxua Nacom exana, icha ichichi pomonaē judiomonaē xua capanenebiya tsainchi. Daxita pew̄naeya baxua Nacom paeba pia pexeinya jume diwesitha xua Abrahamtha jeye Nacom: “Daxita nacuanpiwi j̄nt̄u coyene weiweina exanaein tana nejume cow̄ntsixaemxae”, jei Nacom. ⁹ Daxota daxita pomonaē jume cow̄nta, j̄nt̄u coyene weiweina, xua Abraham muxuna, xua ir̄u Abraham pejume cow̄ntsixae.

¹⁰ Pomonaē bequein jume cow̄ntsiya eexanapona pocotsiwa Moisés pia peitorobi coyenewatha itoroba xua pecapanenebiyaewa tsainchi, barapomonaē bexa atene tsane xua Nacom exanaena abe peexanaexae. Tsipei Nacom Pejume Diwesitha jeye: “Pomonaē jopa exanaeyo daxita po coyene itoroba Moisés pia peitorobi coyenewatha, daxita barapomonaē atene tsane xua Nacom exanaena abe peexanaexae”, jei. ¹¹ Yaputainchi beta, dapon ajibi pon pexeinaein xua po coyene pej̄nt̄u coyene xanepanaewa, xua daxota Nacom tsitatsi xua jopa penatsicuent̄siwa abe peexanaexae. Tsipei bequein ichichipa xua peexanaewa xua po coyene Moisés pia peitorobi coyenewatha itoroba, daichitha jopa itac̄paetsi xua exana daxita xua Moisés itoroba. Ichitha Nacom Pejume Diwesitha jeye: “Pon xua Nacom j̄nt̄u coyene xanepana exana pon pejume cow̄ntsixaetsi, barapon bara ataya as̄u poponaena”, jei. ¹² Jiton jopa nantawenonaeyo xua Jesucristo jume cow̄ntatsi peexanaewa tsane daxita pocotsiwa Moisés pia peitorobi coyenewatha itoroba. Barapo peitorobi coyenetha jeye: “Bewa exanaename daxita pocotsiwa xua barapo peitorobi coyenewatha paeba ayapus̄ya nepoponaewa tsane”, jei.

¹³ Cristo naca capanepa poxonaē naetotha naca tsit̄pa wanaca yantomatsixae xua abe peexanaē coyene waexanaexae po peabe exanaē coyene Moisés pia peitorobi coyenewatha yabara paeba. Cristo baxua exanatsi xua t̄pa be pon xua bichocono abe peexanaein xua abe waexanaē cuiru coyene peyawa t̄paexae. Baxua yabara Nacom Pejume Diwesitha jeye: “Pon pet̄paēin naetotha ducua bapon Nacom tsita abetsi xua bapon abe peexanaexae”, jei. ¹⁴ Cristo Jesús naetotha pet̄paexae daxota Nacom catsina pomonaetha pomonaē jopa judiomonaē naexanaeyo po coyene xua bayatha Nacom Abraham tsiw̄nae yabara muxu dutatsi. Nacom Abraham tsiw̄nae yabara muxu dutatsi xua pecatsinexatsi peant̄yapus̄wa. Matautano Nacom Abraham tsiw̄nae yabara muxu dutatsi xua Nacom pia Pejumope t̄nax̄u tatsi naca yawa jinompaena poxonaē jume cow̄ntatsi Jesucristo.

Meje yabara xua Nacom pia petsiw̄nae yabara muxu dutsiwa tatsi

¹⁵ Tamonaē pam, pomonaē ir̄u painya nejume cow̄ntsiwixae Jesucristo. Paca tsipaebatsi tsica diwesiyo j̄ta coyeneyatha xua pocotsiwa jiwi ba exana. Poxonaē ba nacueyatabe pebinbe peb̄r̄ya nanta xeinabe xua nantiya penata exanaenexabe yawa daxota naw̄n dutabe paperatha, bara baponbe bewa exanaenabe po coyene baponbe tsiw̄nae yabara muxu dutabe. Ich̄n jopa itac̄paetsi xua ichawa equeicha mataropata

tina icha bayatha nawun tinabe. ¹⁶ Nacom exana pia petsiwuna yabara muxu dutsiwa Abrahamtha yawa iru Abraham pia pemomoxi susato jiwi jiwanapintha tatsi. Nacom Pejume Diwesitha jopa jeyo: “Pia pemomoxi susato jiwitha”, jopa jeyo. Jame meisa caeintha yabara jei: “Pia pemomoxi susato jiwi jiwanapintha”, jei. Baxua yabara paeba xua Cristo yabara caunutatsi. ¹⁷ Baxua paca tsipaebatsi meje: Poxonae Nacom yabara tsiwuna muxu duta Abrahamtha, bapoxonae poxonae cuatrocientos po weibe yapucaewa bapoxonae Moisés pia peitorobi coyenewa tatsi patopa. Moisés pia peitorobi coyenewa tatsi jopa ainya cuiyiyo beyacaincha Nacom pia peyabara tsiwuna muxu dutsiwa tatsi xua daxota jiwi jopa nantawenonaeyo barapo Nacom pia peyabara tsiwuna muxu dutsiwa tatsi. ¹⁸ Icha jiwi itacupaetsi xua panenebiya abe pia peexanae cuiru coyene weya xua peexanaexae pocotsiwa Moisés pia peitorobi coyenewatha itoroba, bapoxonae ainya cui aibi po peyabara tsiwuna muxu dutsiwa Nacom yabara tsiwuna muxu duta Abrahamtha. Ichitha poxoru jiwi jopa itacupaetsi xua pepanenebiwa abe pia peexanae cuiru coyene weya poxonae bequein exanaetha pocotsiwa Moisés pia peitorobi coyenewatha itoroba, daxota bichocono ainya cui po peyabara tsiwuna muxu dutsiwa, Nacom amanayiya yabara tsiwuna muxu duta Abrahamtha.

¹⁹ ¿Eta xua metha canamatawenonatsi Moisés pia peitorobi coyenewa? Nacom naca cata baxua abe waexanaexae beya poxonae Cristo patopa, pon Abraham pia pemomoxi susato jiwi jiwanapin tatsi pon yabara tsiwuna muxu duta Nacom. Nacom cata pia peitorobi coyenewa matatsunpiwitha xua barapomonae xuya Moisés catatsi jiwi nexa. ²⁰ Ichitha poxonae Nacom yabara tsiwuna muxu duta Abrahamtha, bapoxonae dapon aibi pon capona barapo peyabara tsiwuna muxu dutsiwa Abrahamtha Nacom weya. Jame saya meisa Nacom compa yabara tsiwuna muxu duta Abrahamtha.

Meje yabara xua daxota Nacom itoroba Moisés pia peitorobi coyenewa tatsi

²¹ Paca yainyabatsi: ¿Moisés pia peitorobi coyenewa abe cana exana Nacom pia peyabara tsiwuna muxu dutsiwa tatsi? Jume, apara tsipei Nacom jopa capanenebiyae tsane jiwi peexanaexae Moisés pia peitorobi coyenewa tatsi. Icha jiwi itacupaetsipatsi xua capanenebiyatsi abe pia peexanae coyenein weya peexanaexae po coyene Moisés pia peitorobi coyenewatha itoroba, bapoxonae jiwi juntu coyene xanepanaetsipa Nacomtha peexanaexae po coyene Moisés pia peitorobi coyenewatha itoroba. ²² Nacom Pejume Diwesitha jeye: “Daxita jiwi bewa atene tsane abe peexanae coyenein peexanaponaexae xua jopa itacupaetsi xua penacui barapentsiwa. Daxota daxita pomonae Jesucristo pejume cowuntsiwichi Nacom cana exanaena jiwi po coyene xua bayatha yabara tsiwuna muxu duta xua bepa pinae jiwi capanenebiya tsainchi Jesucristo pejume cowuntsixaetsi”, jei.

²³ Pewunaeya xua poxonae Cristo pepatopeicaewa tsane po peitorobi coyenewa Nacom Moisés catatsi naca yaputane exana xua poxonae Cristo patopeicaena bapoxonae waxainchi bara bewa jume cowuntichi Cristo. Barapo peitorobi coyenewa yabara naca yaputane exanano xua po coyenewa waxainchi wacoutha nata exainchi. Jopa naca exanaeyo xua Nacom wanaca capanenebiwa. Daxota po diwesi Nacom Moisés catatsi barapo diwesi naca juntu coyene yawenapona beya poxonae Cristo patopaetsica. ²⁴ Moisés pia peitorobi coyenewa naca yawena xua wayaputaewa Cristo. Barapo Moisés pia peitorobi coyenewa tatsi naca yawena xua najuntu coyene xanepana exainchi Nacomtha wajume cowuntsixae Cristo. ²⁵ Anoxuae jume cowuntatsi Cristo, daxota jopa nantawenonaetsi Moisés pia peitorobi coyenewa tatsi. ²⁶ Paxam painya nejume cowuntsixae Cristo Jesús, daxota daxita paxam Nacom pia pexui tatsi pam. ²⁷ Daxita paxam poxonae bayatha ichamonae paca bautisaba caemonae pana naexaname Cristo Jestha, Cristo pijimonae tatsi pamxaem. Daxota paxam pacoyene jupame Cristo. ²⁸ Nacom daxita jiwi tsita najupatsi. Daxota Nacom jopa tsita ainya cuichi metha bequein judiomonae pam tsipaem, iru metha bara bequein griegomonae pam tsipaem pomonae jopa judiomonae naexanaeyo. Matautano jopa tsita ainya cuichi metha

bequein pomonae amanaya painya nepaca busi cui tatayebeibiwi pam tsipaem, iru bara bequein pomonae jopa amanaya painya netanacuichi jiwi pam tsipaem. Matautano jopa tsita ainya cuichi metha bequein bara pebiwi pam tsipaem, iru metha bequein yabuxi pam tsipaem. Nacom tsitatsi xua paxam be caemonae jiwi pam xua caemonae pana nabaru exaname Cristo Jesustha. ²⁹ Icha paxam Cristo pijimonae pam, bara nexata paxam Abraham pia pemomoxi susato jiwi pam. Po coyene Nacom Abraham yabara tsiwuna muxu dutatsi bara baxua paxam nexa.

4

¹ Xua ichichipan xua tapaebiwa baxua meje: Icha pexuyo paxa cuenta tupatsi poxonae cataunxuae pexuyo tsecae barapoyo jopa bepijawa catichi ichamonae pocotsiwa xua coxiyũn pecopaniwa tatsi tsipei cataunxuae pexuyo tsecae. Barapo pexuyo bewa exaneibina pocotsiwa peitorobeibixaetsi pomonae wichitiya pebaru jinompaewichi icha ichi xua poxonae exana pomonae amanaya petanacuichiwi ichamonae nexa. ² Barapo pexuyo nantauta pomonae peyawenaewichi, pomonae bapon wichitiya pebaru jinompaewichi. Matautano pexuyo itorobatsi pocotsiwa barapo pexuyo bewa exanaena. Barapomonae ewata xua barapo pexuyo catsinchi poxonae pinyo tsane be po coyeneya bayatha coxiyũn paeba. ³ Waxainchi bara pocotsi juta coyeneya ichichi beya poxonae Cristo patopeica. Waxainchi be pexui natsicotainchi tsipei pemayainwa exanatsi pocotsiwa Moisés pia peitorobi coyenewatha naca itoroba. ⁴ Poxonae barapo matabi patopa, po mataqueitha xua Nacom ichichipa xua Pexanto itorobica, bapoxonae barapo mataqueitha Nacom Pexanto itorobica xua yabuyõ petsiperu wenaexanaenexatsi barapo cae pin nacuathe. Bapon yacuiya naexana judiomonaepin. Matautano bewa exanae pocotsiwa judiomonae ba itoroba xua pocotsiwa pepaebixae Moisés pia peitorobi coyenewa tatsi. ⁵ Bapon patopa xua jopa wanantawenonaenexa xua waexanaewa tsane pocotsiwa Moisés pia peitorobi coyenewatha naca itoroba, xua bapoxonae Nacom wanaca cana exanaewa tsane xua Nacom pia pexuichi. ⁶ Nacom pia pexui tatsi painya nenaexanaexae, daxota pacata itorobica pia Pejumope tunaxu tatsi pia painya nepaca cayawenaewa tsane poxonae paca juntu coyene tsipaeba. Barapo Nacom pia Pejumope tunaxu tatsi naca cana exana xua wajeiwa: “Axa”, xua wajeiwa Nacomtha. ⁷ Anoxuae paxam jopa barapocotsimonae pam pocotsimonae xua amanaya tanacuita caurimonae pia pentacaponaein tatsi nexa icha be pocotsimonae ichi xua pocotsimonae pebusi cui tatayebeibiwichi. Nacom paca exana pia pexui tatsi. Tsipei paxam Nacom pia pexui tatsi pam, daxota Nacom paca catsibina daxita po coyenein Nacom xeina pia pexui tatsi nexa.

Meje yabara poxonae Pablo yabara nanta xeineiba pomonae pejume cowũntsiwi Jesucristo

⁸ Pewunaeya xua poxonae payaputaeneme Nacom, copiya paxam be barapocotsimonae pam be pocotsimonae bewa exanae xua pia nacomũn itorobeibatsi, po nacomũn xua saya jiwi pia coya cana exana xua jopa pepa nacomũnyo. ⁹ Ichitha anoxuae Nacom payaputaneme, yawa paca tsipaebatsi xua Nacom paca yaputane. Jopa bewa equeicha caewa pana naexanaem xua paexaname pocotsiwa Moisés pia peitorobi coyenewatha paca itoroba xua pocotsiwa caena bayatha copiya paexaname poxonae cataunxuae jopa pajume cowũntsim Nacom. Barapo Moisés pia peitorobi coyenewa jopa paca yawenaeyo xua painya nepatsiwa Nacom beya. Bewa paexanaeneme po coyene barapo peitorobi coyene itoroba. Poxonae saya u painya neexaneibi barapo coyene barapoxonae be barapocotsimonae pam be pocotsimonae xua bewa amanaya exaneibina pocotsiwa itorobeibatsi pia pecanamataxeinaeinchi tatsi. ¹⁰ Paxam awiya cataunxuae paxename pocotsi coyenewan xua judiomonae itorobatsi Moisés pia peitorobi coyenewatha. Barapo coyenewa itoroba xua matabin yabara yawa xua xometon yabara yawa xua wei yabara, po coyene jiwi bewa exanaena penajainbotsi yabara, yawa xua pin penabanaewa peexanaewa matabin yabara. Barapocotsi coyenein paexaname painya nenanta xeinaexae xua painya nenajuntu coyene xanepana exanaenexa Nacomtha. ¹¹ Tsipei cataunxuae baxua paexaname, daxota juntu coyene wecoyan, poxoru pocotsiwa xua

paca cuidubatsi jopa paca yawenaeyo, tsipei paexanaponame pocotsiwa xua caena bayatha paexanaponame xua abe paexanaponame.

¹² Tamonae pam, pomonae iru painya nejume cowuntsiwixae Cristo. Paca itorobatsi xua painya coutha pana naexande xua jopa paexanaeinde pocotsiwa Moisés pia peitorobi coyenewatha paca itoroba, icha xan ichin xua tacoutha naexanan xua jopa exanaeinyo pocotsiwa Moisés pia peitorobi coyenewatha itoroba. Bara bequein xan judiomonaepin, ichitha Nacom necapanepa xua jopa tanantawenonaewa tsane xua jopa taexanaewa tsane pocotsiwa Moisés pia peitorobi coyenewatha itoroba, icha paxam paichim xua jopa panantawenonaem xua jopa paexanaem pocotsiwa Moisés pia peitorobi coyenewatha itoroba. Paxam pomonae jopa judiomonae panaexanaem. Bayatha paxam jopa painta abe exanaem, daxota nanta xeinan xua bara pana nejume taneme pocotsiwa paca itorobatsi. ¹³ Payaputaneme poxonae copiya paca tsipaebatsi Nacom pia pecapanenebiyae diwesi, tsipei atenein daxota jopa warapaeinyo. ¹⁴ Bequein pacata ayapube xua poxonae pana netaneme xua atenein, ichitha jopa pana necui capanaeya itawetsim. Seicaya paexaname, bara beta pana nententa weyataeya wabame icha be poxonae matatsunpintha paichipaem poxonae patopa po matatsunpin Nacom pia matatsunpin tatsi, pon peainya cuin, yawano xua icha be poxonae pacana ichipaem Jesucristo poxonae patopaetsipa. ¹⁵ Copiya bayatha bichocono pajuntu coyene weiweiname, anoxuae jopa paraichim. Bequein baxua paexaname daichitha awiya wunaem paca yabara paebatsi ichamonaetha xua paxam bichocono pana neantobem. Matautano bichocono jopa juniya pana neantobem pata tana neyawenaexaem tsane xua beya poxonaeno pana naitacuere jucame xua pata tana neantobexaem. ¹⁶ Anoxuae pana neexaname be pata tana neaitafaetabi jiwim, tsipei yabara paca tsipaebatsi pexainyei jume diwesi.

¹⁷ Po judiomonae jiwu pecuidubiwi barapomonae naemata wunaeya paca tsipaeba, ichitha peajuntucoyenebe jiwu. Daxota barapomonae baxua pacata exana pia painya tana nepenticham pia bapoxonae xuya painya ichichipaetsi barapomonae. ¹⁸ Baraxua bara bequein wunaem xua ichamonae paca ichichipa, daichitha saya jame poxonae juntu coyene wunaem. Barapomonae bewa daxita matabi paca yaweneibina jopa meisa metha poxoru ecaeinchipae. Matautano bara bewa paca yawenaena poxonae jopa ecaeinyo. ¹⁹ Tamonae pam, paxam be pomonae tapexui pam. Paxam nexa bichocono ajuntucoyenerewein xua anthuthutanein, icha be poxonae yabuyo ichi poxonae bichocono atene poxonae beya pexuyo pabeta. Baraxua cataunxuae exanaponaein beya poxonae pajuntu coyene wunaem tsane icha Cristo ichi xua juntu coyene wunaem. ²⁰ ¡Maisa ichichipan bichocono xua tapaca baru ecaeiwatsi anoxuae xua tapaca tsipaebinexatsi icha jumetha, xua jume wunaeya tapaca tsipaebinexatsi! Tajũ taecaexae xan jopa yaputaeyo xua eta bichin xua tapaca yabara nanta xeinaewatsi xua tapaca yawenaenexatsi.

Meje yabara xua yabuyobe Agar iru Sara

²¹ Paxam pomonae pam pomonae painya neichichipaewa xua painya neexanaewa pocotsiwa Moisés pia peitorobi coyenewatha itoroba. Pana nejume nore. ¿Paxam jopa pajume taem xua barapo peitorobi coyenewatha paeba? ²² Barapo peitorobi coyenewatha paeba jeye: Abraham xeina ainya pexantobe. Abraham icha pexanto exana powatha xua powa Abraham pia botha tanacuitatsi amanaya, powa pebusi cui taetaexae. Icha pexanto exana powatha powa yatsicaya Abraham piowa tatsi powa xua jopa amanaya petanacuichiwatsi. ²³ Powa Abraham tanacuitatsi amanaya, bapowa pexanto tanaexanatsi bara jupa icha be ichi xua poxonae ichamonae tanaexanatsi pexui. Powa Abraham pepa piowa tatsi, powa xua jopa pebusi cui taetaewatsi, Nacom cana exana xua bapowa pexanto tanaexanatsi tsipei bayatha Nacom Abraham yabara tsiwunaem muxu dutatsi. ²⁴ Baraxua be pacata exanatsi xua peyabara caunutsiwa. Barapo ainya petsiriwabe baraxua yabara caunuta xua Nacom pia ainya petsiwunaem muxu dutsiwabe tatsi. Agar pexanto tatsi bapon pia pemomoxi susato jiwu tatsi bewa exana xua Moisés itoroba pia peitorobi coyenewatha tatsi. Barapo peitorobi coyenewa Nacom

Moisés catatsi ichaxota demxuwa, po demxuwa pewun Sinaí. Barapon, Agar pexanto tatsi yacuiya naexana xua pon pebusi cui taetaeinchi. Barichi barapon pia pemomoxi susato jiwí tatsi barapo coyeneya yacuiya naexanumenapona. Daxota barapomonae bewa exanaponae po peitorobi coyene Moisés itoroba. ²⁵ Barapowa Agar caunuta po demxuwa pewun Sinaí xua Arabia nacuatha, po demxuwa Arabia nacuamonae pijumetha: “Agar”, jei. Barapowa Agar xaniwaicha yabara caunutatsi anoxuae po tomara Jerusalén tomara, poxoru barapo tomarapiwi nanta xeina xua bewa exanaena Moisés pia peitorobi coyenewa tatsi icha Agar ichi xua bewa exanae pocotsiwa Abraham itoroba xua powa pebusi cui taetaewatsi pecana exanaexaetsi. ²⁶ Icha Jerusalén tomara, po tomara seicaya Nacom pia nacuatheicha eca xua Nacom pia tomara, barapo tomara yabara caunuta pocotsiwa xua bichocono xanepana. Barapo Jerusalén tomarapiwi jopa bewa exanae tsane Moisés pia peitorobi coyenewa tatsi. Waxainchi apara barapo tomarapiwichi. ²⁷ Nacom Pejume Diwesitha Sara tsipaebatsi, jeichichi:

“Petsiriwa powa mawecowam, xam powa jopa xeinaem pexui, juntu coyene weiweinare. Juntu coyene weiweinaya najume tsebare, tsipei xam jopa xeinaem pocotsiwa peatenewa. Po petsiriwa jopa pexui xeinaeyo, barapo petsiriwa bichocono ayei jiwí xeinaena pexui beyacaincha po petsiriwa piseuri baru popona”, jei Nacom Pejume Diwesitha.

²⁸ Tamonae pam, paxam pomonae iru painya nejume cowuntsiwixae Jesucristo. Waxainchi Nacom naca cana exana icha Isaac ichichi pon Abraham pexanto tatsi, pon bayatha Nacom Abraham yabara tsiwunae muxu dutatsi. Waxainchi barapo pexuichi, po pexui Nacom yabara tsiwunae muxu duta wajume cowuntsixae. ²⁹ Po pexanto Agar tanaexanatsi xua pon naexana bara jupa icha be ichi xua poxonae ichamonae pexui tanaexanatsi be pon pewun Ismael. Bapon Isaac taayapube exainchi, pon naexana poxoru Nacom pia Pejumope tunaxu tatsi peitorobixae. Bara jutiya ichi anoxuae pomonae xua Nacom pia Pejumope tunaxu tatsi pexeinaewi taayapube exainchi xua ichamonae exana, pomonae peexanaponaewi po coyene Moisés pia peitorobi coyenewatha itoroba. ³⁰ Ichitha pajume taema xua Nacom Pejume Diwesitha paeba, jeye: “Powa amanaya jinya necatanacuichiwa powa nebusi cui taetaexae jinya botha itawere yawa muxuna itawere pia pexanto tatsi. Tsipei barapo pexanto tatsi jopa itacupaetsi xua pexeinaewa pocotsiwa coxiyun pecopaniwa tatsi xua saya cuita pepa pexanto tatsi nexa powa jopa pebusi cui taetaewatsi amanaya”, jei Nacom Pejume Diwesitha. ³¹ Tamonae pam, paxam pomonae iru painya nejume cowuntsiwixae Jesucristo. Jopa dapomonaetsi icha be ichi po pexui powa pebusi cui taetaewatsi amanaya pia pexui tatsi pomonae bewa exanaena pocotsiwa Moisés itoroba. Waxainchi jame barapomonaetsi icha be ichi po pexui powa jopa pebusi cui taetaewatsi amanaya pia pexuichi. Daxota waxainchi jopa nanta wenonaetsi xua waexanaewa po coyene Moisés itoroba.

5

Meje xua Pablo yabara paeba xua jopa bewa equeicha exanae Moisés pia peitorobi coyenewa

¹ Cristo naca yawena xua equeicha jopa wanantawenonaewa tsane xua waexanaewa pocotsi coyenewan Moisés pia peitorobi coyenewatha itoroba xua Nacom jopa watsita xeinaewa tsane xua watsita natsicuentisiwa xua abe waexanaexae. Beta ajuntuyapusuya pajume cowantaponde Nacom, xua bapoxonae jopa painya necopatsiwa tsane xua ichamonae paca itorobina xua painya neexanaewa pocotsiwa Moisés itoroba.

² Xan, Pablon, pana nejume taema. Jopa equeicha pacopatsinde xua bara judiomonae paca wi thabina, pomonae pebiwi pam, ichaxota panareixacaename. Tsipei icha baxua paexanaetsipame bapoxonae Cristo jopa paca yawenaetsipae po coyene bapon nepaca juntu coyene xanepana exanaewa tsane Nacomtha. ³ Equeicha ichichipan xua tapaca

tsipaebiwatsi. Po pebin xua wi thabatsi xua judiomonae exana, barapo pebin bara be judiomonaepin naexana. Bapoxonae bapon bewa daxita matapaeicha coyenein exanaena pocotsiwa Moisés pia peitorobi coyenewatha itoroba. ⁴Paxam pomonae pananta xeiname xua paca jüntu coyene xanepana exanaena Nacomtha painya neexanaexae pocotsiwa Moisés pia peitorobi coyenewatha itoroba, apara paxam Cristo papentame. Yawa panaitematame Nacom pia peantobewa tatsi. ⁵Nama jume cowuntsiya ewatatsi xua Nacom naca jüntu coyene xanepana exanaena xua jopa watsita xeinaewa tsane wanatsicuentisiwa xua abe waexanaexae. Nacom pia Pejumope tñaxu tatsi baxua nacata exana wajume cowuntsixae Nacom. ⁶Waxainchi caemonae peburuya Cristo Jesús piamonae wanaexanaexaetsi jopa naca yawenaeyo icha ichamonae naca wi thaba xua judiomonae wanaexanaewa tsane. Ichacuitha icha jopa naca wi thabiyo baxua iruru jopa naca yawenaeyo. Jame pocotsiwa xua wanaca yawenaewa bewa jame jume cowantichi Cristo Jesús. Barapo pejume cowuntsiwa naca exana xua antobeya wajinompawea.

⁷Bayatha copiya beta pajinompame painya nejume cowuntsiwatha. ¿Jintam metha pacata ayapube exana xua daxota jopa painya neexanaewa pocotsiwa Nacom pia pejume xainyeiwatha paeba? ⁸Apara Nacom jopa pacata exanaeyo baxua xua pacata ayapube exana pon paca waba. ⁹Payabara nanta xeinare po diwesiyo xua jeye: “Levadura ba peyauyo xoyo atsaxa tsecae daxita carepaya matapaeicha atsaxa exana pantha”, jei. Barapo coyene icha be ichi poxonae abe peexanae coyene po coyene bewayo painya xainya bejojopa tsiniya. ¹⁰Jume cowuntan Nacomtha pon jiwi Pecanamataxeinaein xua jopa painya neitapetsiwa tsane icha painya barompaya nenanta xeinaewa xua icha be jopa ichiyo pocotsiwa nanta xeinan. Icha ichun paca jüntu coyene tsacaba xua paca itoroba xua abe painya neexanaewa tsane Nacom atene exanaena bapontha. Jopa Nacom tsita ainya cuiyotsi metha bequein pon jopa peainya cuiyo, matautano metha bequein pon peainya cuin jiton, ichitha awiyo atene cana exanaena.

¹¹Tamonae pam, paxam pomonae iru painya nejume cowuntsiwixae Jesucristo. Icha cueicueijan tsipae xua bewa jiwi wi thabichi metha judiomonae jopa inta abe exanaetsipae. Yawa bapoxonae barapo judiomonae jopa aichaxaibi tsipae Nacom Pejume Diwesi, po diwesi xua Cristo yabara paebatsi po coyene xua naetotha tupa. ¹²Pomonae xua paca jüntu coyene cui tsacaba xua paca itoroba xua paca wi thaba barapomonae pin jumetha yabara janje: “Jame maisa bu moya bara pia coutha natobu jucaena xua daxota jopa ichamonae peitorobiwa tsainchi xua penawi thabiwa tsane”, jan.

¹³Tamonae pam, paxam pomonae iru painya nejume cowuntsiwixae Jesucristo. Nacom paca itapeta xua jopa painya nenantawenonaenexa tsane xua jopa equeicha painya neexanaewa tsane pocotsiwa Moisés pia peitorobi coyenetha itoroba xua Nacom jopa painya netsita xeinaewa tsane painya tsita natsicuentisiwa xua abe painya neexanaexae. Poxoru jopa painya nenantawenonaemxae xua painya exanaewa barapo Moisés pia peitorobi coyenewa tatsi painya nepaca capanenebiyaenexa tsane daxota jopa paexanaeinde pocotsiwa xua abe, pocotsiwa xua jiwi pia coutha ichichipa exana. Jame paexande pocotsi coyene xua ichamonae payawende xua nantiya caemonae painya nenaantobexae. ¹⁴Paxam paexaname daxita pocotsiwa Moisés pia peitorobi coyenewatha itoroba poxonae paexaname barapo cae coyenewa xua jeye: “Antobeinde jinya necatsicuarabu enaewi, icha ichim xua naantobem jinya coutha”, jei. ¹⁵Icha paxam bichocono nantiya atene pana naexaname, yawa icha bichocono nantiya daunwei pana nata exaname, dota pam pepu painya nenaaitafaetabi jiwi pam tsipae xua jopa beta painya nejume cowuntsiwa Nacom.

Meje xua Pablo yabara paeba pomonae yawa jinompa Nacom pia Pejumope tñaxu tatsi

¹⁶Xua pocotsiwa paca tsipaebatsi meje baxue: Nacom pia Pejumope tñaxu tatsi payawa jinompare. Bapoxonae jopa paexanaem tsane xua abe paexaname pocotsiwa xua saya jiwi ichichipa pia coutha exana. ¹⁷Po coyene xua wacoutha wajüntu coyenetha najüntu coyene xeinatsi xua abe waexanae coyenewa baraxua Nacom pia Pejumope tñaxu tatsi jopa ichichipaeyo. Po coyene Nacom pia Pejumope tñaxu tatsi naca

itorobeiba xua pexeinya coyene waexaneibinexa baraxua, barapo abe wananta xeinaewa jopa ichipaeyo barapo coyene, po coyene Nacom pia Pejumoŋe t̄nax̄u tatsi naca itoroba. Bapoxonae waj̄nt̄u coyene ir̄u Nacom pia Pejumoŋe t̄nax̄u tatsi pia pej̄nt̄u coyene tatsi jopa peb̄r̄uŋa j̄paeya nanta xeinaebe. Daxota bequein paichichipame xua painya neexanaewa xua pexeinya peexanaewan ichitha jopa paexaneibim po coyenein pexeinya coyenein. ¹⁸ Ichitha icha Nacom pia Pejumoŋe t̄nax̄u tatsi itorobiya paca mata cainompa bapoxonae jopa bewa pananta xeinaem xua Nacom paca capanenebiyaena abe painya neexanae coyenein weya painya neexanaexae po coyene Moisés paca itoroba pia peitorobi coyenewatha tatsi.

¹⁹ Pocotsiwan jiwi ichichipa pia coutha exana xua abe meje baxue: Ichamonae nata siwa xeina xua bequein jopa piseuri jiwi. Ichamonae bichocono nanta xeineiba pocotsiwa bichocono xua abe, yawa xua pecui tsacatsacapae coyenewa xua weiweina.

²⁰ Ichamonae w̄nae jainta ibo nacom̄n. Barichi ichamonae maratha cataerubenanaebiya xua icha jiwi maratha cataerubenanaebiyatsi. Ichamonae caemonae nantiya naita aenae-aenei. Ichamonae nantiya naba. Ichamonae nantiya nauwa. Ichamonae nantiya nacaseba. Ichamonae asiwa piawan. Ichamonae natsatabe exana. Ichamonae pia matab̄x̄monae nacana exana be pomonae seicaya barompaya penanta xeinaewi.

²¹ Ichamonae yabara uwa pocotsiwa xua ichamonae xeina. Ichamonae juteba xua icha jiwi pejutewiatsi. Ichamonae c̄upatsi. Ichamonae penajainj̄abi jiwi bichocono. Ichamonae ichawan exana xua peabe coyenewan. Yabara paca tsiw̄nae muxu dutatsi xua j̄pa be po coyeneya bayatha paca tsipaebatsi, po jiwi bapocotsiwan exana barapomonae jopa patsi tsane Nacom pia peitorobi nacua beicha tatsi.

²²⁻²³ Ichitha nama pocotsi coyenewan Nacom pia Pejumoŋe t̄nax̄u tatsi cana exanaewa jiwi pej̄nt̄u coyenetha tatsi baxuanje: Peantobewa ichamonaetha, yawa pej̄nt̄u coyene weiweinaewa pejume cow̄nt̄sixae Nacom, yawa xua j̄nt̄ema pejinompaewa, yawa xua j̄nt̄ema pejinompaewa xua bepijawa jopa aitaconaeyo poxonae bequein ichamonae abe exana, yawa xua beta peexanaewa ichamonaetha, yawano xua peyawaewa ichamonae pej̄nt̄u coyene xeicaewaxae, yawano xeina xua bichocono pejume cow̄nt̄siwa Nacom, yawa bichocono pia coutha jopa penayabara nanta xeinaewa, xua saya yabara nanta xeina ichamonaetha, yawa po coyene xua penaitorobiwa pia coutha. Icha peitorobi coyenewa aibi po peitorobi coyenewa xua yabara paeba xua daxita barapo coyenewan pinae abe. ²⁴ Waxainchi pomonaetsi xua Jesucristo piamonae tatsichi, jeichichi: “Poxonae Jesucristo naetha cobe matatabarutatsi, waj̄nt̄u coyene, po j̄nt̄u coyene jopa w̄naeyo, nacata yawa muxuna t̄pa. Bapoxonae nacata aichurubenae exana po coyene xua abe waexanaewa”, jeichichi waxainchi. ²⁵ Waxainchi jinompatsi wanaca yawanaexae Nacom pia Pejumoŋe t̄nax̄u tatsi. Daxota bewa bara copatichi xua Nacom pia Pejumoŋe t̄nax̄u tatsi bara naca maticarucua ducuaenebiyaena xua ichaxota daxita pocotsiwantha xua exaneibatsi.

²⁶ Jopa bewa waxainchi ichamonaetha aebichi. Matautano jopa bewa nantiya naanaepana exanaetsi. Matautano jopa bewa nantiya nauwichi.

6

Meje yabara poxonae Pablo jeye: “Nantiya pana nayawende”, jei

¹ Tamonae pam, paxam pomonae ir̄u painya nejume cow̄nt̄siwixae Jesucristo. Icha ich̄n pacui taneme xua abe exana, pon pejume cow̄nt̄sin Jesucristo, bapon payawende xua equeicha beta peponaewa tsane Nacomtha. Payawende bapon paxam jiwana pomonae pam Nacom pia Pejumoŋe t̄nax̄u tatsi pajume cow̄nt̄siya jinompame. Jopa anaya bichocono pamuxuconaeinde xua abe peexanaexae. Ichitha dota pam, xua ir̄u paca j̄nt̄u coyene cana exana xua abe painya neexanaewa tsane. ² Nantiya caemonae pana nayawende xua poxonae ichamonae aj̄nt̄ucoyenerewe tsaibi pocotsiwa xua aj̄nt̄ucoyenetane exanatsi. Poxonae nantiya caemonae pana nayawenae bapoxonae

bara paexanaename pocotsiwa Cristo itoroba xua poxonae jeye: “Nantiya caemonae pana naantobeinde”, jei.

³ Pon pia coutha nayabara nanta xeina xua jopa abe exanaeyo xua daxota jopa nantawenonaeyo xua peyawenaewatsi tsainchi, bapon pia coutha namuxuitoroba.

⁴ Jiton bewa pia coutha nacui yabara nanta xeinae xua exana, bapoxonae barapon juntu coyene weiweina icha piawa beta exana. Bapon jopa bewa yabara nanta xeinae pocotsiwa xua ichun exana xua bichocono wuna xua beyacaincha bapon exana. Daxita jiwi carepaya bewa barichi bewa pia coutha nacui yabara nanta xeinae icha metha bara wuna xua pocotsiwan exana. ⁵ Daxita jiwi carepaya barompaya bewa exanaena pia penacuichiwan Nacom nexa be pocotsi coyeneya xua Nacom itoroba.

⁶ Pon xua nacuiduba Nacom Pejume Diwesi, bapon bewa xuya catsina ichawa pocotsiwa xua penantawenonaewa pontha pon xua pecuidubinchixaetsi xua be pematomatsi coyenewa exana.

⁷ Jopa painya coutha pana namuxuitorobinde. Dapon ajibi pon itacupatsi xua Nacom muxuitorobatsi. Pocotsiwa xua pebin exana bara barapocotsi coyenetha cuita yabara cana exanatsi. Icha bapon abeya exana barichi bara abeya cuita yabara cana cui matomatatsi. Matautano icha bapon xanepanaya exana bara xanepanaya cuita yabara cana cui matomatatsi. ⁸ Icha ichun exana pocotsiwa xua pia coutha ichichipa exana pocotsiwa xua jopa xanepanaeyo, bapoxonae bapon xuya cuita xeinaena pocotsiwa xua abe xua jiwi tupa exanatsi. Ichitha icha bapon exana pocotsiwa xua Nacom pia Pejumope tunaxu tatsi ichichipa, bapoxonae barapo Nacom pia Pejumope tunaxu tatsi bapon catinchi peajuntuyapusuwa xua ataya tsiteca. ⁹ Jopa bewa ajuntucoyenefaetabi tsainchi po coyenewa xua beta waexanaewa Nacom nexa. Icha jopa ajuntucoyenefaetabiya jinompae tsainchi xua beta waexanaewa Nacom nexa, bapoxonae po mataqueitha Nacom daxita wetsina Nacom naca catsina pentoma pocotsiwa wuna xua xanepanaya waexanaexae. ¹⁰ Daxota poxonae daxita coyeneintha naca itacupa xua exanaeinchi pocotsiwa xanepana bara bewa exaneibinchi ichamonaetha pocotsiwan xanepana. Baraxua bewa exaneibinchi daxita jiwitha. Nacom tsitatsi xua bichocono ainya cui xua yawenatsi pomonae Jesucristo pejume cowuntsiwichi, beyacaincha poxonae yawenatsi pomonae jopa pejume cowuntsiwi.

Meje yabara xua Pablo najume wetsiya paeba

¹¹ Pataema xua matapainya tacoutha tinan, daxota pin itaneton tsica. ¹² Pomonae judiomona xua paca itoroba xua painya nepaca wi thabiwa tsane, barapomona saya baxua exana pia icha judiomona wuna yabara nanta xeinaetsi barapomonaetha. Yawa barapomona pomona xua paca itoroba pomona judiomonaexae naerabiya nanta xeinaeya jeye: “Poxonae Cristo Pejume Diwesi cueicueijeichi pomonaetha pomona jopa judiomona naexanaeyo, bara muxuna itorobatsi xua barapomona bara bewa pebiwi wi thabinchi ichaxota nareixacaena. Bapo coyenewa icha waxainchi exanatsi baxua wamonae pomona judiomona juntu coyene weiweinaena. Bapoxonae barapomona jopa nacata abe exanae tsane, bequein tsipaebatsi pomonaetha, pomona jopa judiomona naexanaeyo xua Cristo naca tsitupa naetotha”, jei xua naerabiya nanta xeina. ¹³ Bequein barapomona paca itoroba xua paca wi thaba ichitha jopa exanaeyo pocotsiwa Moisés pia peitorobi coyenewa itoroba. Barapomona ichichipa xua paca wi thaba ichamona, pia barapomona paca yabara paebichi ichamonaetha xua barapomona paca itoroba. Barapo judiomona ichichipa xua icha judiomona yabara nanta xeina xua pomona paca itoroba bara beta exana pia paca cui itorobixae barapo penawi thabi coyenewa. ¹⁴ Ichitha xan aichaxaibin xua tacoutha atsaquiya nayabara paeban ichamonaetha. Saya meisa bichocono atsaquiya yabara paeban xua Jesucristo petupaewa naetotha pon Wanacacanamateinaein. Cristo naetotha netsitupa daxota pocotsi coyenein xua xeina po irathe jopa netsita ainya cuiyiyo, xua taxeinaenexa yawa xan jopa tsita ainya cuiyinyo barapo cae pin nacuathepiwitha. ¹⁵ Jopa naca yawenaeyo icha naca wi thaba. Barichino jopa naca yawenaeyo icha jopa naca wi thabiyo. Jame pocotsiwa ainya cui xua bewa

Jesucristo tsita xeinaetsi pena jũntũ coyene. ¹⁶ Barabũ Nacom paca cata jũntema painya nejinompaewa. Matautano barabũ Nacom nantanuweya paca yabara nanta xeinaena pia painya nepaca yawenaenexa. Barabũ Nacom daxita paxamtha barapo coyenebe paca cana exanaena pomonae pam paexaname po coyenewa barapo peitorobi coyenewa paeba, po peitorobi coyenewa xua yabara paeba pena jũntũ coyenewa, yawano barabũ Nacom paca cana exanaena daxita paxamtha pomonae pam xaniwaicha painya nejume cowũntsiwi pam Nacom.

¹⁷ Anoxuae yawano xua bexa tsaneno jopa ichichipaeinyo xua ichũn inta ayapube exanaena xua poxona neyabara paeba xua po coyene pinae Nacom jopa neitorobiyo xua tacueicueijejewa tsane bapon nexa. Tsita itapeinya xeinan xua Nacom xaniwaicha bara neitoroba tsipei ichamonae newan duba taperũtotha tajume cowũntsixae Jesús.

¹⁸ Tamonae pam, paxam pomonae irũ painya nejume cowũntsiwixae Jesucristo. Barabũ bapon pon Wanacanamateinaein, paca jũntũ coyene weiweina exanaena pia painya nepaca antobexae. Je bara ichi tsane.

Baja Pablo.

Meje Po Carte Pablo Tatina, Efeso Tomarapiwi Tatinatsi

Meje yabara poxonae Pablo tamropata pitaba xua tatina pomonaetha pomonaefeso tomarapiwi

¹ Xan, Pablon, pacata tinatsi. Nacom necana exana xua Cristo Jesús pia peitorobi jiwu jiwana tatsin xua bapon peichichipaexae. Pacata tinatsi pomonaefeso tomarapiwi Nacom piamonaefeso tomarapiwi pam pomonaefeso tomarapiwi Nacom piamonaefeso tomarapiwi pamxaem, pomonaefeso tomarapiwi pajinompame Efeso tomarapiwi. Paxam beta xanepanaya pajume cowanteibame Cristo Jesús xua Nacom caemonaefeso tomarapiwi painya nepaca exanaexae Cristo Jesustha. ² Barabũ Nacom, pon Waxa irũ Jesucristo, pon jiwu Pecanamataxeinaefeso tomarapiwi, baponbe paca yawenaena pia paca necaantobexae. Matautano barabũ baponbe peburũya jũntema jinompa paca cana exanaena.

Meje yabara xua poxonaefeso tomarapiwi Nacom wanaca yawenaewa, wanaca antobexae

³ Barabũ waxainchi tsipaebatsi Nacomtha, Jesucristo Wanacanamataxeinaefeso tomarapiwi, pia Nacom tatsi xuano xua Paxa tatsi. Jeichichi: “Nacom maisa pajũntũ coyene weiweinan jinya pata taneyawenaewaxaem”, jeichichi. Daxita waxainchi Nacom caemonaefeso tomarapiwi wanaca cana exanaexae Cristotha, daxota Nacom naca yawena. Nacom bara tsitecaeya naca cata daxita carepaya pejũntũ coyenein po pejũntũ coyenein xeina pia nacuatheicha. Bapo jũntũ coyenein naca catsiba xua wanantawenonaewatsi xua wanaca ajũntũcoyenesũ exanaenexa beta xua Nacom watsita jinompaenexatsi. ⁴ Caena bayatha pewũnaeya xua poxonaefeso tomarapiwi nacua forotsina, Nacom naca wũn duba xua piamonaefeso tomarapiwi tatsi wanaca exanaenexa tsane poxoru Cristo caemonaefeso tomarapiwi wanaca exanaewa tsane bapontha. Matautano Nacom naca wũn duba xua bichocono watsita jũntũ coyene xanepanaenexa tsane bapon xua matauta jopa watsita natsicuentisiwatsi tsane xua abe waexanaexae bapontha. ⁵ Nacom pia wanaca antobewaxae caena bayatha naca yabara nanta cui yapu weta xua pia pexui tatsi wanaca cana exanaewa tsane. Baxua Nacom naca cana exana xua pocotsiwa Jesucristo pia wanacata exanaexae. Nacom ichichipa exana baxua petsita xanepanaexaetsi. ⁶ Daxota barabũ Nacom wũnae jainteibatsi pon bichocono pexeinya coyenewa exana poxonaefeso tomarapiwi naca yawena wanaca antobexae. Matautano Nacom bichocono wanaca antobexae amanaya daxitatsi caemonaefeso tomarapiwi naca cayawa exana Pexantotha, po Pexanto bichocono antobe. ⁷ Nacom pia pin wanaca antobexae naca capanenebiya exana abe waexanaefeso tomarapiwi cuiru coyenein weya. Nacom tsitatsi xua jopa watsita natsicuentisiwatsi xua abe waexanaexae, yawa naca cayabara cui jũntemaina barapo cui. Baxua exana poxoru Nacom Pexanto tatsi jana pichapabarena poxonaefeso tomarapiwi bexotsi, poxonaefeso tomarapiwi abe waexanaefeso tomarapiwi cuiru coyene naca yabara tsitũpa naetotha. ⁸ Nacom naca tsita itapeinya xeina xua bichocono jopa juniya naca antobeyo. Matautano naca cana exana xua wayabara yaputaewatsi bapon. ⁹ Nacom bayatha exana pocotsiwa xua caena bayatha juntuuru exana. Nacom naca yaputane exana xua wayaputaewa pocotsiwa bapon moya yawũn xeina xua jiwu jopa yabara yaputaeyo po coyene xua bapon ichichipa peexanaewa. Baxua xua pocotsiwa moya yawũn xeina caena bayatha Nacom juntuuru nanta xeina xua Pexanto peitorobiwa tsane po cae pin nacuathe tsique pon pewũn Jesucristo. ¹⁰ Caena bayatha Nacom cayabara nanta xeina pocotsiwa xua exanaena. Barapo coyene exanaena po coyene xua daxita caetutsina pocotsiwan Cristo pecanamataxeinaewa tsane picoya xua xuan peitabocotha piawan xuano xua xuan po irathe piawan. Baxuan exanaena poxonaefeso tomarapiwi jopaena barapo matakabi xua poxonaefeso tomarapiwi po mataqueitha Nacom ichichipa beexanaena baraxua.

¹¹ Daxita po coyenein Nacom exana, bapon exana po coyeneya xua ichichipa. Daxota caena bayatha Nacom pana wũn duba pata tanaexanaewa tsane piamonaefeso tomarapiwi tatsi poxoru Cristo caemonaefeso tomarapiwi wanaca exanaewa tsane bapontha. Daxita pocotsiwan xua Nacom pana cana exana caena bayatha bapon tsiwanaya juntuuru nanta xeina xua exanaena baxuan tsipei Nacom exana daxita xua pocotsiwan tsita wũnaetsi. ¹² Paxan,

judiomonae pan, pomonae pan xua copiya pawunaewatan xua Cristo pepatopaewa tsane. Barabu daxota Nacom bichocono wunaewajainchin pexeinya peitupanaewa peexanaeinxae. ¹³ Pocotsiwa xua pexainyei jume diwesi, barapo diwesi apara Nacom pia pecapanenebiyae diwesi tatsi. Poxonae barapo pexainyei jume diwesi pajume taneme Nacom paca cana exana piamonae tatsi painya nejume cowuntsixaem Cristo painya nepaca capanenebiyaenexa. Bapoxonae Nacom tsita itapeinya xeina xua paxam piamonae tatsi pam poxonae paca cata pia Pejumope tunaxu tatsi. Bayatha Nacom yabara paca tsiwunaewamuxu duta xua pinaewapaca catsina barapo pia Pejumope tunaxu tatsi. ¹⁴ Nacom pia Pejumope tunaxu tatsi naca cata wanacabarupoponaenexa. Baxua naca tsita itapeinya xeina xua daxota xaniwaicha yaputainchi xua bexa ichawan xua Nacom naca catsina pocotsiwan yabara naca tsiwunaewamuxu duta xua naca catsina. Nacom baxua exanaenapoxonae daxita cana exanaenapiamonae tatsi, pomonae daxita bewa jume cowuntsina Jesucristo. Bapoxonae jiwi wunaewajainchina Nacom bichocono pexeinya peitupanaewa peexanaeinxae.

Meje yabara poxonae Pablo Nacomtha tawuca pomonae pejume cowuntsi jiwi xua Nacom yaputane pecana exanaewa tsane barapomonae pomonae pejume cowuntsiwi

¹⁵ Paca yabara jume tainchi xua paxam pinaewabeta pajume cowuntame Jesús, pon jiwi Pecanamataxeinaein. Matautano paca yabara jume tainchi xua pinaewabeta paantobem pomonae iru pejume cowuntsiwi. ¹⁶ Daxota ataya pacata wuqueibatsi Nacom, janje: “Nacom maisa juntu coyene weiweinan xua Efeso tomarapiwi neyawenaewa, pomonae necajume cowuntsiwi”, jan. ¹⁷ Wucan Nacom, Jesucristo Wanacanmataxeinaein, pia Nacom tatsi, pon Waxa pon bichocono pexeinya peitupanaewa peexanaein. Wucan xua painya nepaca cacatsinexa pia Pejumope tunaxu tatsi painya neyaputaewa tsane pocotsiwan xua xainyei xua Nacom yabara. Matautano wucan xua painya beta neyaputaenexaenexa Nacom. ¹⁸ Nacom wucan xua painya neyaputaenexa painya juntu coyeneintha. Bapoxonae paca itacupaena xua payaputaenepocotsiwa Nacom yabara paca tsiwun duba xua painya nexeinexapocotsiwa yabara paca tsiwunaewamuxu duba. ¡Maisa bichocono jopa juniyiyo xua pocotsiwa Nacom catsina pomonaetha pomonae pia pejume cowuntsi jiwithaxaetsi pocotsiwa bapon juntana jeba barapomonae! ¹⁹ Matautano wucan xua painya neyabara yaputaewa tsane Nacom pia peayapusu itorobi coyenewa, po peayapusu coyenewa bichocono wunaewaxua jopa wetsiyo. Barapo peayapusu itorobi coyeneyatha Nacom naca yawenawajume cowuntsiwixae. ²⁰ Barapo peayapusu itorobi coyenewa jupa po peayapusu itorobi coyenewatha Cristo asu exainchi petupae cuiru coyene weya xua Nacom exana. Barapo pia peayapusu itorobi coyenewatha Nacom Pexanto cuareta pia pecoxa weya xua peitabocotha xua Pexanto ainya cui cana exana. ²¹ Nacom Pexanto cana exana xua Jesucristo toxeincha canamataxeina pomonaetha daxita pomonae ichamonae canamataxeinatsi itabocotha, matautano xua barapo cae pin nacuathe. Matautano bapon canamataxeina daxita pomonaetha pomonae nacuan peewatsiwi, barichino pomonaetha pomonae piamonae pematacaponaewichi. Cristo canamataxeina pia peayapusu itorobi coyenewatha, po peayapusu itorobi coyenewatha bichocono ayapusu beyacaincha ichamonae pia peitorobi coyenewan tatsi. Po wun xua Jesucristo xeina xua “Cristo”, jeichichi barapo wun yabara matawun dutatsi pia peexanaewa. Barapo wun bichocono peainya cui wun, beyacaincha ichamonae pewunxi, po wunxi xua yabara matawun dubatsi xua peexanaewa pomonae anoxuae jinompa iru pomonae bexa jinompaenano. ²² Nacom exana xua daxita coyenewantha Cristo itoroba pia peayapusu itorobi coyenewatha. Matautano Nacom exana xua Cristo daxita pepa pecanamataxeinaein piamonae daxita pomonae pejume cowuntsiwixaetsi. ²³ Pomonae pejume cowuntsiwi Cristo barapomonae be bara Cristo pia pepon tatsi tsipei Cristo cana exana xua barapomonae caemonae naexana bapontha. Dapocotsiwa ajibi pocotsiwa Cristo petaseicaewatsi tsipei nantauta pomonae pejume cowuntsiwichi. Barichi dapocotsiwa ajibi pocotsiwa petaseicaewatsi pomonae Cristo pejume cowuntsiwichi tsipei Cristo ataya tsitecaeya baru popona barapomonae daxita nacuantha.

2

Meje yabara poxona xua Nacom naca capanenebiya, wanaca antobexae

¹ Copiya bayatha poxona jopa pajume cowuntsim Nacom bichocono abe paexana dubenanaebiyame. Matauta pajumefebame Nacom poxoru paxam be pomonaewi pawerapaewi pam jopa painya yawa jinompaexae Nacom pia Pejumo pe tunaxu tatsi. ² Bayatha jopa xapain painompaem. Painompame icha barapo cae pin nacuathepiwi ichi xua bichocono abe exana dubenanaebiya. Paexaname bayatha xua caurimonae pia pentacaponaein tatsi painya nepaca cui itorobixae. Bapon canamataxeina caurimonae po caurimonae jinompa itabocotha barapo nacue matatsuntha xua beyano Nacom pia nacua beicha tatsino. Barapo caurimonae pia pentacaponaein tatsi, pomonaewi Nacom jumefebatsi, barapomonaewi juntu coyene itorobatsi xua abe peexanaewa tsane. ³ Caena bayatha waxainchi barichichi exana dubenanaebiyatsi barapocotsi coyenein xua abe. Exainchi pocotsiwa xua ichichipatsi xua wajuntu coyenewa naca cui itoroba xuano xua wapepon naca cui itoroba. Tsipei waxainchi jiwichi xua yacuiya naexanatsi xua abe waexanaewa, daxota bayatha Nacom anaya nanta xeina xua naca atene exana icha ichamonae ichichi xua atene exanatsi abe peexanaexae. ⁴ Daichitha Nacom jopa juniya naca matateicaeyo xua wanaca yawenaewa bichocono wanaca antobexae. ⁵ Bequein poxonaewi cataunxuae bichocono abe exana dubenanaebiyatsi waxainchi, xua daxota be petupaewi jinompatsi abe waexanaexae, bapoxonaewi Nacom naca yawena. Baraxua be bapon naca baru ajuntucoyenesu xua Cristo wanaca cana exanaexae xua caemonae naexainchi bapontha. Nacom naca capanenebiya saya apara poxoru wanaca antobexae. ⁶ Wajume cowuntsixae Jesucristo, waxainchi Nacom tsitatsi xua apara be bara bayatha bapon naca asu exana petupae coyene weya icha Cristo Jesús ichichi xua asu exanatsi petupae coyene weya. Matautano waxainchi tsitatsi xua apara be bara bayatha naca exana xua waenaewa ichaxota Cristo Jesús eca pia nacuatheicha. ⁷ Nacom juntucuru baxua exana petsita itapeinya xeinaenexa xua xeina pia pin peantobe coyenewa xua waxainchi nexa xua daxita matabintha tsoponae tsane. Nacom naca tsita itapeinya xeina xua bichocono naca antobe poxonaewi naca exana xua caemonae naexanaeinchi Cristo Jesustha. ⁸ Tsipei Nacom paca antobe daxota paca capanenebiya poxonaewi pajume cowuntame bapon. Apara jopa baxua painya coutha paexanaem, apara Nacom jame baxua amanaya paca cana exana. ⁹ Nacom apara jopa baxua paca cana exanaeyo xua painya nenacuichixae. Icha paca itacupa xua poxonaewi payabara nacuichipame xua painya nepaca capanenebiyaenexa bapoxonaewi be painya neatsacae jiwu pam tsipae xua poxonaewi ichuntha pajam: “Beta paexanan daxota Nacom pana capanenebiya”, pajam. ¹⁰ Nacom naca exana xua pena juntu coyenewatha jinompatsi Cristo Jesús nexa xua beta xanapanaya waexanebinexano bapon nexa poxonaewi jinompatsi. Caena bayatha baxuan Nacom yabara nanta xeina xua naca juntu coyene cana cui weta exana xua po coyeneya waxainchi beta wataexanaewa tsane ichamonae.

Meje yabara po juntu coyenetha Nacom naca cana exana xua junte ma wajinompaewa caemonae wanaexanaexae Cristotha

¹¹ Poxonaewi panaexaname jopa panaexanaem judiomonaewi. Paxam pomonaewi jopa judiomonaewi painya nanaexanaewi jiwixaem pana nacui yabara juntanainare xua eta po jiwu pamda caena bayatha poxonaewi jopa pajume cowuntsim. Judiomonaewi paca yabara jei: “Barapomonaewi jopa pewi thabiwichi xua ichaxota pia penareixacaenaewa xua petsita itapeinya xeinaewa tsane xua barapomonaewi Nacom piamonaewi”, paca yabara jei. Judiomonaewi pia coutha nayabara jei: “Waxainchi pomonaetsi, pomonaewi naca wi thaba xua ichaxota wanareixacaenaewa watsita itapeinya xeinaewa tsane xua Nacom piamonaetsi”, nayabara jei. Barapo pewi thabi coyene xua ichaxota pebiwi penareixacaenaewa saya jiwu pia coya nacanautsiya exana. ¹² Bayatha barapo dapaetha poxonaewi cataunxuae jopa pajume cowuntsim jopa Cristo payabara yaputaem. Matautano paxam be painya nenanapaincha jinompaewi pam xua icha nacua werena painya neponaewi xua jopa Israel nacuapiwi jiwana pam. Po petsiwunaewi yabara muxu dutsi coyenewan xua

Nacom juntucuru nanta xeina xua caemonae naexana piamonaetha, xua judiomonaetha, barapo coyenein apara jopa paxam nexa. Matautano pajinompage barapo cae pin nacuathe ichitha jopa pawnae ewatsim xua pocotsiwa xua wnae xua Nacom exanaena paxam nexa cataunxuae jopa painya nejume cowantsixae. Tsipei jopa painya neyabara yaputae jiwi pam Nacom. ¹³ Ichitha anoxuae Cristo Jesús paca exana xua caemonae pana naexaname bapontha. Paxam pomonae bayatha jopa Nacom painya nejume cowantsi jiwi pam xua jopa painya yabara yaputaexaem bapon. Ichitha anoxuae pajume cowantame painya neyabara yaputaexae Cristo Jesús, pon naetotha painya abewan paca yabara tsitupa, poxonae jana pichapabarena poxonae bexotsi. ¹⁴ Cristo meisa bapon naca cata po juntu coyenewatha xua ichamonaetha xuya juntea jinompa exanatsi. Cristo exana xua caemonae naexana pomonae xua judiomonae iru pomonae jopa judiomonae naexanaeyo. Cristo cui weraweraca exana po juntu coyenein xua judiomonae iru pomonae jopa judiomonae naexanaeyo penaitafaetabi jiwi naexana xua saya be caemonae penaexanaewa tsane. Baxua exana poxonae naetotha tsitupa jiwi. ¹⁵ Poxonae Cristo naetotha tupa bapoxonae bapon cana exana xua Moisés pia peitorobi coyenewa tatsi jopa equeicha xeinaeyo peayapusu itorobi coyenewa xua jiwi peitorobiwatsi pocotsi coyenein jiwi bewa exanae. Bapon Cristo cana exana xua barapomonae Cristo caemonae pebaru naexanaewa tsainchi pomonae xua copiya pia peaitafaetabi jiwixaetsi. Poxonae Cristo baxuan cana exana bapoxonae barapo bicheitomonaebe juntea nabaru jinompa cana exana. ¹⁶ Petupaexae naetotha Cristo exana xua equeicha barapomonaebe jopa nabiyo. Matautano bapoxonae Cristo naita coxone exana xua barapomonaebe juntea pejinompaewa Nacomtha xua icha be jopa ichiyo xua poxonae copiya jinompa xua Nacom pia peaitafaetabi jiwichi. Cristo exana xua barapomonaebe Nacom caemonae exainchi.

¹⁷ Cristo patopa po cae pin nacuathe tsique. Bapon daxita paxam paca tsipaeba Nacom pia pexeinya jume diwesi tatsi. Barapo juntu coyenewatha jiwi equeicha caewa Nacom ita coxonatsi xua Nacom juntea petsita jinompaewa tsainchi. Daxita paxamtha paca tsipaeba barapo diwesi pomonaetha iru pam pomonae copiya jopa Nacom payabara yaputaem, xua pomonae jopa judiomonae pam. Iru tsipaebatsi pomonae yatsicaya judiomonae pomonae Nacom yaputainchi pejume cowantsixae. ¹⁸ Cristo jiwi petsitupaexaetsi abe pia peexanae coyenewan tatsi daxota Nacom pia Pejumope tuxaxu tatsi yawena xua pomonae judiomonae iru pomonae jopa judiomonae naexanaeyo be caemonae naexanabe xua cae axa xeina, bapon Nacom. ¹⁹ Daxota anoxuae jopa be painya nenanapaincha jinompaewi pam xua be icha nacua werena painya neponaewi. Paxam iru ichamonaetha pomonae Nacom pejume cowantsiwiru be pomonae cae nacupiwu pam. Paxam Nacom piamonae jiwana tatsi pam. ²⁰ Poxonae ba jiwi Nacom pin pia bo acaba copiya matha beta noba po iboton xua iratha tabu caumena. Nexata beta nota po iboto xua ainya cui xua po iboto bo daunweya babatanota po iboto xua epatauta botabiya. Bapoxonae nanta cajejebabapona icha iboton, xua pepa bo exana. Icha pebiwi ichi poxonae bo acaba, Nacom piamonae bara cana jutsiya cana ichi. Pomonae Cristo pia peitorobi jiwi tatsi iru pomonae Nacom pia peitorobi jume pepaebiwi barapomonae be bara pocotsi iboton xua tabu caumena tsipei barapomonae copiya paca cuiduba Nacom Pejume Diwesi tatsi. Iru Jesucristo be barapocotsi ainya cui iboto po iboto daunweya babatanota po iboto epatauta botabiya, tsipei Cristo paca yawena xua painya nejume cowantsiwa bapon. Iru paxam be po iboton xua jiwi nanta cajejebabapona, pomonae penanta carubenaewi jiwi pam, tsipei cotacaya painya nejume cowantsixae. ²¹ Cristo piamonae bara cana jutsiya ichiya cana exana, icha po iboto ichi xua ainya cui xua bo daunweya babatanota exana. Cristo pon jiwi Pecanamataxeinaein, exana xua piamonae tatsi pinmonae tsoponae xua xanepanaya caemonae nabaru jijinapona, pomonae Nacom tsita juntu coyene xanepanatsi. ²² Poxonae jiwi weta barapo pin bo, bapoxonae cana exana xua barapo bo apara Nacom pia bo tatsi ichaxota Nacom popona. Nacom paca cana exana xua paxam iru daxita ichamonaetha pomonae iru pejume

cowũntsiwi Nacom, caemonae pana naexaname xua Nacom pia Pejumope tũnaxũ tatsi pia paca barũ jinompaenexa icha Nacom ichi xua pia pin botha popona.

3

Meje yabara poxonae Nacom Pablo itorobatsi xua pecueicueijeixa Nacom Pejume Diwesi pomonaetha pomonae jopa judiomonae naexanaeyo

¹ Xan, Pablon, jiwi pecũbi botha ecan yabara tanatsipei cueicueijeixae Cristo Jesús poxonae bapon yabara tapaca cuidubiwatsi pomonae pam jopa judiomonae panaexanaem. ² ¡Bara pajume taneme xua Nacom necata barapo tatanacuichiwa xua inta bichocono wũnae! ¡Nacom neitoroba tana neantobexae xua tapaca cuidubinexatsi tapaca yawenaenexatsi! ³ Nacom itũta xua po coyene xua moya yawũn xeina po coyene xua Nacom capanenebiyaena jiwi xua jiwi copiya jopa yabara yaputaeyo. Nacom neyaputane exana barapo coyene xua moya peyabara cui yawũn xeinaewa po coyene bexa exanaena xua jiwi jopa yabara yaputaeyo. Baxua bayatha yabara pacata tinatsi xua imoxoyo diwesi tsecae. ⁴ Poxonae barapo carte payorobiname payaputaename xua bara xan yaputan po coyene xua Cristo moya yabara cui yawũn xeinatsi po coyene xua bexa Nacom exanaena xua jiwi jopa yabara yaputaeyo. ⁵ Bayatha jiwi jopa yaputaeyo po coyene xua Nacom Cristo moya yabara cui yawũn xeinatsi po coyene xua Nacom exanaena. Ichitha anoxuae Nacom pia Pejumope tũnaxũ tatsi baxuan yaputane cana exana pomonaetha pomonae pia coya Nacomtha nacana exana xua Nacom petanacuichiwa tsainchi pomonae Cristo Jesús pia peitorobi jiwixae tatsi, mataũtano Nacom pia peitorobi jume pepaebi jiwitha tatsi. ⁶ Meje baxue xua pocotsiwa moya peyawũn xeinaewa: Pomonae jopa judiomonae naexanaeyo barapomonae irũ xeinaena po coyene xua Nacom cata judiomonaetha po coyene bichocono wũnae xua bayatha Nacom jũntana jeba. Barapomonae pomonae jopa judiomonae naexanaeyo Jesucristo pejume cowũntsixaetsi caemonae nanaexana pepa judiomonaetha pomonae irũrũ Cristo Jesús pejume cowũntsiwixaetsi. Barapomonae irũ xeinaena po coyene Nacom yabara tsiwũnae muxu duta judiomonaetha xua Cristo Jesús yabara. Barapomonae pomonae jopa judiomonae naexanaeyo daxita baxuan irũ xeinaena poxoru jume cowũntarũ Nacom pia pecapanenebiyae diwesi jume.

⁷ Nacom neitoroba xua tacueicueijeixa barapo pexeinya jume diwesi amanaya tatanacuichixae Cristo. Nacom necata barapo tatanacuichiwa pia tana neantobexae xua tayawenaewa tsane ichamonae. Mataũtano Nacom necata pia peyapusu itorobi coyenewa xua tacueicueijeixa tsane barapo pexeinya jume diwesi. ⁸ Pomonae xua be conotha ainya cui xua Cristo piamonae tatsi barapomonae ainya cui beyacaincha xua xan. Daichitha Nacom necata barapo tatanacuichiwa xua inta bichocono wũnae. Nacom neitoroba xua tacueicueijeixa tsane pia pexeinya jume diwesi pomonaetha pomonae jopa judiomonae naexanaeyo. Cueicueijan po pexeinya jume diwesi xua Cristo bichocono peantobexae jopa juniya yawenaeyo barapomonae pomonae jopa judiomonae naexanaeyo. ⁹ Mataũtano Nacom neitoroba xua daxita jiwitha yabara yaputane taexanaewa tsane po coyene xua Nacom exanaena bexa tsane, po coyene Nacom moya yawũn xeina. Barapo coyene Nacom pon daxita peforotsin, caena bayatha moya nayawũn xeina xua jiwi jopa peyaputaewa tsane xua pocotsiwa bapon exanaena. ¹⁰ Anoxuae Nacom yaputane exana matatsunpiwi, pomonae itoroba itabocotha, mataũtano pomonae pecanamataxeinaewa itabocotha. Barapomonae Nacom yaputane exana pocotsiwa bapon moya yawũn xeina caena bayatha xua jiwi jopa yabara yaputaeyo. Barapo itabocopiwi nacuiduba xua bara Nacom bichocono yaputane daxita carepaya coyenewan. Baraxua yaputane poxonae tane xua pomonae judiomonae mataũtano pomonae jopa judiomonae naexanaeyo daxita barapomonae caemonae naexana pejume cowũntsiwichixaetsi Cristo Jesús. ¹¹ Nacom exana baxua icha be pocotsi coyeneya caena bayatha yabara nanta xeineibapona. Bapon baxua exana Jesucristo pon Wanacanamataxeinaein petũpaexae naetotha. ¹² Naca itacũpa xua watsipaebiwatsi Nacom wajume cowũntsixae Cristo. Waxainchi yaputainchi xua bapon bara naca jume tane caemonae

wanaexanaexae Cristotha, daxota cui tsacatsacapiya watsipaebiwa Nacom. ¹³ Daxota jopa ichichipaeinyo xua paajüntucoyenerewiya jinompame xua ichamonaе atene tana neexanaexae paxam nexa. Ichitha jame bewa baxua paichichipaem tsipei baxua jame paca yawena.

Meje yabara xua Cristo jiwi peantobewatsi

¹⁴ Poxonae yabara nanta xeinan xua po coyenewa xua Nacom exana bapoxonae tantabocototha uncuan xua tatsita itapeinya xeinaewa tsane xua baru cui itura jinan Waxa pon itabocotha pepoponaein. ¹⁵ Daxita Nacom piamonae pomonae pejume cowuntsiwichi, pomonae itabocopiwi iru pomonae po irathepiwi, daxita barapomonae Nacom tsitatsi xua barapomonae be caemonae naexana. Bapon daxita barapomonae paxa tatsi. ¹⁶ Nacomtha pacata wucatsi. Tsipei Nacom pexeinaexae peitaboco be-icha pocotsiwa jopa juniyiyo xua bichocono wunaе daxota jan: “Nacom care Efeso tomarapiwi xua bichocono jinya neayapusu itorobi coyenewa. Barapomonae neju-mopetha juntu coyene daunweya jinompa exande. ¹⁷ Barabu Cristo baru poponeibina barapomonae pejume cowuntsixaetsi. Barabu barapomonae bichocono antobe jiwi bichocono pejuntu coyene yucaewaxaetsi peantobe coyenewa. ¹⁸ Barabu barapomonae beta yabara yaputaena Cristo pia peantobe coyenewa tatsi xua iruru daxita ichamonaeru yaputaena pomonae pejume cowuntsiwi. Barapon Cristo pia peantobe coyenewa tatsi bichocono ayei xainto juntu coyenewa. ¹⁹ Cawucatsi Nacom xua barapomonae barabu yaputaena barapo coyene po coyene Cristo pia peantobe coyenewa tatsi, xua po peantobe coyenewa ayei xainto juntu coyenewa xua jiwi jopa itacupaetsi xua peyabara yaputaewa. Cawucatsi xua barapomonae nejuntu coyene yuca exanaenexa daxita jinya nejuntu coyenewatha.

²⁰ “Wunaе cajaintatsi poxoru caitacupa xua bichocono pata tana neyawenaewam beyacaincha xua pata tacawucaewatsi, xuano beyacaincha pata nanta xeinaewa. Baxua painta exaname poxonae jinya neayapusu itorobi coyenewa nacuita pata juntu coyenewatha. ²¹ Barabu daxita pomonae pejume cowuntsiwi pomonae caemonae naexana Cristo Jesustha wunaе cajainchina xua ataya petsitecaeronaewa tsane. Je bara ichi tsane”, jan xua pacata wucatsi Nacomtha.

4

Meje yabara xua Nacom pia Pejumope tunaxu tatsi cana exana xua caemonae naexana Nacom piamonae tatsi

¹ Tatanacuichixae Jesucristo pon jiwi Pecanamataxeinaein daxota jiwi neeta jiwi pecubi botha. Pecono jumetha paca muxuwetatsi xua beta xanepanaya painya nejinompaewa xua Nacom itapeta painya nepaca wun dubixae painya nejume cowuntsixae bapon icha be pocotsi coyeneya xua Nacom tsita xanepanatsi. ² Ita ururanaya pajinomppeare xua jopa painya neatsacaewa tsane. Matautano jume xanepanaya nantiya pana natsipaebeibare xua jopa paantutsaxande. Matautano saya jopa paaitaconaeinde xua daxota junteма painompaename poxonae bequein ichamonaе abe pacata exana. Matautano patsita itapeinya xeinare xua nantiya pana nacui yabara antobem pocotsiwa bequein jopa pana nacui coyene jupaem. ³ Nacom pia Pejumope tunaxu tatsi paca cana exana xua caemonae painya nenaexanaewa tsane. Daxota peajuntucoyenesuwatha paexande daxita coyeneya xua caemonae junteма painya nenabaru jinompaewam tsane. ⁴ Paxam pomonae painya nejume cowuntsi jiwixae Cristo Jesús daxota caemonae paca exana. Bequein daxita carepaya paxam barompaya paxename Nacom pia Pejumope tunaxu tatsi, ichitha barapo pejumope saya bara caein. Nacom yabara paca wun duba xua daxita paxam painya nexainaewa tsane cae coyenewa xua po coyene peburuya pana nabaru wunaе ewatame pocotsiwa xua bexa Nacom exanaena. ⁵ Matautano bara caein pon jiwi Pecanamataxeinaein. Matautano cae coyenewa xeinatsi po coyenewa xua wajume cowuntsiwa Cristo. Matautano saya cae wuntha nabautisabatsi xua Cristo pewuntha tatsi. ⁶ Matautano bara caein Nacom pon Waxa xua daxitatsi waxainchi.

Bapon daxita jiwí canamataxeinatsi, matautano daxita carepaya nacuantha popona. Matautano daxita waxainchi carepaya naca baru popona.

⁷ Daxita waxainchitha seicaya cabarompaya naca cana juntu cui coyene duba exana pocotsi coyeneintha xua watsita exanaewa tsane bapon. Barapo coyenein Cristo naca catsiba po coyenein jiwana xua bapon nawita xeina icha bapon ichichipa. ⁸ Daxota Nacom Pejume Diwesitha jeye Cristo yabara:

“Bapon athabe juinya taju beicha.

Poxonae athabe juinya baru juinya pomonae

pia peaitafaetabi jiwichi petsita

itapeinya xeinaenexa xua amanayaba

barapo peaitafaetabi jiwichi.

Matautano bapon pia pejume cowuntsiwichi

catsiba po juntu cui coyenewantha xua

barapomonae Nacom petsita exanaenexatsi”,

jei Nacom Pejume Diwesitha.

⁹ ¿Eta xua metha baxua caunuta poxonae paeba xua “athabe juinya taju beicha”? jei. Baxua caunuta xua copiya matha Cristo po irathe patopeica xua bapoxonae equeicha caibe juinya athabeicha itaboco beicha. ¹⁰ Pon xua po irathe patopeica, barichi bapon athabe juinya taju beicha xua bapon pepoponaewa tsane daxita nacuantha xuano daxita itabocotha. ¹¹ Cristo catsiba jiwitha xua seicaya barompaya pejuntu cui coyenein. Ichamonaetha cana exana pomonae pia peitorobi jiwixae tatsi. Ichamonaetha cana exana pomonae pecueicueijeji jiwí pia peitorobi jume diwesi tatsi. Ichamonaetha cana exana pomonae xua pecueicueijeji dubenanoutsiji Nacom pia pexeinya jume diwesi tatsi xua pecapanenebiyae diwesi jume. Ichamonaetha cana exana pomonae eena jiwí pomonaetha pomonae pejume cowuntsi jiwí. Ichamonaetha cana exana pomonae xua pecuidubi jiwí pomonaetha pomonae pejume cowuntsiwi. ¹² Poxonae barapo coyene Cristo exana, piamonae cana juntu coyene wetsiya cana exana xua beta petaxanaewa tsainchi pia petanacuichiwa tatsi. Bapoxonae daxita piamonae tatsi mataropeichiya ajuntuyapusa jume cocowuntapona pomonae piamonaexae tatsi pomonae bara be Cristo pia pepon tatsi. ¹³ Baxua Cristo exana xua beya waxainchi caemonae wanaexanaewa tsainchi xua caemonae wanabaru jume cowuntsixaetsi Cristotha. Bapoxonae naexanatsi xua peburaya caemonae wanabaru yabara yaputaewa tsainchi Nacom Pexanto tatsi. Matautano bapoxonae yatsicaya beta jume cowuntatsi, bapoxonae jinompatsi be pomonae bayatha pinyontsi xua pocotsimonae itacupatsi xua Nacom beta petsita jinompaewatsi. Bapoxonae wajuntu coyene naca cayabara cui wetsiya exana xua wajuntu coyene xanepanaewa icha Cristo ichi xua bichocono pejuntu coyene xanepanaewa. ¹⁴ Bapoxonae jopa be pexui natsicotae tsainchi equeicha. Pexui ba ainya muxu xeina ichawa beya ba jume cowanta xua pocotsi coyenein xua poxonae nacuidubeiba xua poxonae cuiduba pomonae jiwí pemuxuitorobiwi. Barapo pemuxuitorobi jiwí yaputane nawita po juntu coyeneintha xua jiwí pemuxujainyabiwatsi. ¹⁵ Jame bewa pexainyei jume tsipaebichi ichamonaetha po coyeneya xua barapomonae yaputane xua waxainchi antobetsi barapomonae. Bapoxonae beta xanepanaya exanaeinchi wanajuntu coyene xanepana exanaponaenexatsi daxita coyenewantha xua icha be Cristo ichi. Bapon canamataxeina pomonae pia pejume cowuntsiwichi. Bapon bara be pentasipa pomonae pejume cowuntsiwichi be bapon pepon tatsi. ¹⁶ Cristo canamataxeina pia pejume cowuntsiwichi. Matautano cana exana xua barapomonae barompaya xeina pia petanacuichiwantsi. Bequein barapomonae piawan barompaya xeina ichitha Cristo cana exana xua caemonae nantiya nayawena be caemonae naexana. Poxonae barapomonae barompaya piawa beta exanapona pia penacuichiwan, bapoxonae be caemonae beta naajuntucoyenesu xanepana eexanapona, nantiya penaantobexae.

Meje yabara po pena juntu coyenewatha wajinompawa wajume cowuntsixae Cristo

¹⁷ Anoxuae paca tsipaebatsi xua painya tapaca muxuwetsinexatsi, Cristo pon jiwi Pecanamataxeinaein taneitorobixae: Jopa bewa pajinompam icha barapo cae pin nacuathepiwi ichi xua poxonae jinompa poxonae jopa Nacom yaputaetsi. Pocotsiwa xua barapomonaе pia penanta xeinae coyenewan tatsi, jopa ainya cuiyo. Jopa pejuntũ coyene yawenaexaetsi barapo penanta xeinae coyenewantha. ¹⁸ Barapomonaе pia peyaputae coyenewan tatsi jopa xapain pepa peyaputae coyenewiyo. Barapomonaе jopa xeinaeyo peajuntũcoyenesuwa pocotsi peajuntũcoyenesuwa Nacom cata piamonaе. Barapo coyene barapomonaе jopa xeinaeyo poxoru aichaxaibi xua Nacom peyabara peyaputaewatsi, xuano poxoru barapomonaе najuntũ coyene ararana xua jopa pe-ichichipaexae xua Nacom peyabara jume taewatsi. ¹⁹ Barapomonaе jopa ajuntũcoyeneuriyo poxonaе abe exana. Matautano barapomonaе atsaquiya abe eexanapona, xua pecuраewatsi atsaxa mera yawa weiweina ichamonaе piseurixitha tatsi. Barapomonaе cui xeica xua daxita coyenewan abe peexanaponaewa. ²⁰ Ichitha poxonaе ichamonaе yabara paca cuiduba Cristo, jopa apara paca cuidubiyo barapo coyene xua abe painya neexanaewa tsane. ²¹ Xaniwaicha yabara pajume taneme Cristo, xuano piamonaе tatsi painya nenaexanaewa poxonaе ichamonaе paca cuiduba po pexainyei jumein xua pexeinya jume diwesi xua Jesucristo yabara. ²² Pana nacui barapende po juntũ coyene xua bayatha paexaname poxonaе jopa cataunxuae pajume cowuntsim. Barapo juntũ cui coyene bichocono abe, tsipei paca cana exana xua paexaname pocotsiwan xua painya coya paichichipame poxonaе paca muxuitoroba exana xua daxota abe painya neexanaewam. ²³ Pacopare xua bara Nacom paca juntũ coyene xanepana exanaponaena, xua daxota pena coyene painya nenanta xeinaponaewa tsane. ²⁴ Painompare pena juntũ coyenetha, po juntũ coyene Nacom exana xua painya paca catsibinexa. Bapoxonaе paxeinaename be pocotsi juntũ coyene Nacom xeina. Poxonaе paxeiname barapo juntũ coyene po juntũ coyene xua pexainyeiwa, bapoxonaе beta nantiya pana nabarũ jinompame yawa xua bichocono paca tsita xanepana Nacomtha.

²⁵ Daxota anoxuae jopa nantiya bewa pana namuxuitorobim. Bewa daxita pam xanepanaya patsipaebim pomonaetha pomonaе irũ pejume cowuntsiwi, tsipei waxainchi daxitatsi caemonaе naexanatsi Cristotha.

²⁶ Icha paanaepaname jopa pacopatsinde xua painya juntũ coyene paca itoroba xua anaya anaepanaya abe painya neexanaewa ichuntha. Icha paanaepaname jopa abe paexanaeinde. Came jopa paanaepana dubenanaebiyaeinde xua beya quirei tsanaicha, saya jame bara caetha pande. ²⁷ Jopa pacopatsinde xua bara caurimonaе pia pentacaponaein tatsi paca juntũ coyene jujuta abe painya neexanaewa tsane.

²⁸ Pon xua pecaibin, bu jopa equeicha caibeibiyo. Bewa jame bapon tsinacuichina pocotsiwa xua xainyeya yabara nacuita xua jopa naerabiyo. Bapoxonaе bapon itacupatsi xua ichamonaetha xuya catsina pomonaetha xua acopeibiwi pomonaе jopa xeinaeyo xua pocotsiwa nantawenona.

²⁹ Jopa ajumebeya pacueicueijam tsurubenanaebiyaeinde. Jame maisa jume xanepanaya pacueicueijam tsurubenanaebiyama. Papaebare pocotsi jumeintha xua ichamonaе jume cocowantapona exanatsi po jumeintha xua jiwi muxu xeica exanatsi xuano xua yawenatsi po jumein xua paca jume tane. ³⁰ Nacom pia Pejumope tñaxũ tatsi jopa pajuntũ coyene wecoyei exanaeinde xua painya nepaca cui taexae xua paexaname. Tsipei paca barũ popona Nacom pia Pejumope tñaxũ tatsi, baraxua tsita itapeinya xeina xua bara xaniwaicha Nacom piamonaе tatsi pam. Nacom pia Pejumope tñaxũ tatsi naca juntũ coyene ararana wanaca yawenaenexa beya poxonaе po mataqueitha Jesucristo naca capanenebiya exanaena.

³¹ Jopa paxeinaeinde painya juntũ coyenein weya po coyenein xua ichamonaе payabara juntũ ajom xua came bichocono painya neyabara nanta xeinaexae xua ichamonaе abe pia pacata exanaexae. Matautano jopa paxeinaeinde po coyene xua jemeicha anaya paexaname. Matautano jopa paxeinaeinde po coyene xua saya bichocono panthũthũ anaepaneibame. Matautano jopa paxeinaeinde po coyene xua

tsūmū jume pabarū paebame ichamonaē. Barichi jopa paxeinaeinde po coyene xua ichamonaē pabiataneme. Matautano daxita jopa paxeinaeinde po coyenein xua bichocono paaitafaetabim ichamonaē. ³² Jame seicaya maisa nantiya caemonaē xanepanaya pana nata exande. Matautano nantiya pana naweyataema xua nantiya painya nenayawenaewam tsane. Matautano nantiya pana nacui yabara jūntemainare xua abe nantiya pana nata exaname, icha Nacom paca yabara ichi xua paca cayabara jūntemainaina abe painya neexanaē cuiru coyenein Cristo painya nepaca tsitūpaexae poxonaē naetotha tūpa exanadutatsi poxonaē bexotsi.

5

Meje yabara xua po jūntū coyenyatha bewa jinompaena Nacom pia pexui tatsi

¹ Tsipei paxam Nacom pia pexui tatsi pam xua bapon bichocono painya nepaca caantobe jiwi pam, daxota bewa pacui jontsiya jinompaename icha bapon ichi poxonaē popona. ² Nantiya pana naantobeya jinompare icha Cristo ichi xua naca antobe. Bapon Cristo pia pepon nacaenaeta xua naca tsitūpa xua abe waexanaē cuiru coyenein poxonaē bexotsi. Baxua be poxonaē icha duwei ichichi xua poxonaē jiwi tsibexotsi xua daxota barapo jiwi jopa penatsicuentsiwa xua abe peexanaexae Nacomtha. Bapoxonaē Nacom tsita xanepanatsi barapo jiwi. Barichi xua Cristo exana Nacom tsita xanepanatsi icha be pocotsi duwei tuxusi xeicaewa ichi xua poxonaē jiwi duwei tauta xua Nacom pecatsinexatsi.

³ Tsipei paxam Nacom pia pexui tatsi pam, daxota jopa bewa paexanaem po coyenein xua daxota ichamonaē pomonaē painyamonaē paca yabara paeba xua abe paexaname. Matautano jopa bewa pana nasi cui matacaetsim xua paweiweiname xua jopa bequein painya seuri jiwi. Jopa bewa payabara paebim po jume xua jiwi aura exanatsi. Matautano jopa bewa bichocono painya ita copeichi xua payabara uwame xua ichamonaē xeina.

⁴ Jopa nantiya pana nayabara yūyūjande. Matautano jopa nantiya pana najume cui caponaēinde po jumein xua jopa wūnaeyo. Matautano jopa nantiya tsūmū jume pana nayabara paebinde. Daxita barapo coyenein bichocono abe. Jame maisa bewa itapeta Nacom wūnaē pajainchim painya nepaca capanenebiyaexae barapo coyenein weya.

⁵ Tsipei paxam bayatha payaputaneme xua Nacom cana exanaena pomonaetha pomonaē meje: Pomonaē xua penasi cui matacaetsiwa xua jopa poxonaē piseuri jiwi, yawano pomonaē xua yabara paeba po jume xua jiwi aura exanatsi, yawano pomonaē bichocono pitacopeichi xua yabara uwa xua ichamonaē xeina. Nacom tsita abetsi barapo coyenein icha tsita ichichi xua poxonaē jiton bichocono beita cui jichatsi xua wūnaē jainta ibo nacom. Pomonaē barapo coyenein exana bapomonaē bapana jopa itacūpaetsi xua jiwi itorobiya peewatsiwatsi xua ichaxota Cristo itorobiya pecanamataxeinaewa jiwi xua irū ichaxota barichi Nacom. ⁶ Jopa pacopatsinde xua ichamonaē paca necamuxitorobiwa peyabara paebixae barapo coyenein, po jumeintha xua jopa xainyeyo. Poxoru jiwi peexanaexae barapo abe peexanaē coyenein daxota Nacom anaya peraxa exanaena barapomonaetha. Nacom anaya peraxa exanaena barapomonaetha tsipei jopa jume jejeyo pocotsiwa xua Nacom itoroba. ⁷ Barapomonaetha jopa imoxoyo pacuicuinaeinde, pomonaē Nacom jopa jume jejeichi.

⁸ Paxam copitha abe paexaname jopa painya yabara yaputaexaem Nacom. Baxua be poxonaē pomonaē pona pequireiwatha jopa beta ponaeyo jopa beta penecotsixaē. Ichitha anoxuae beta paexaname painya yabara yaputaexaem Nacom pon jiwi Pecanamataxeinaein. Baxua be poxonaē pomonaē pona, poxonaē pentha, beta pona beta pia petaexae. Pajinompare beta painya nejinompaenexa Nacom nexa icha pomonaē ichi poxonaē pona poxonaē pentha. ⁹ Pomonaē yawa jinompa Nacom barapomonaē beta jinompa icha pomonaē ichi xua poxonaē beta jinompa poxonaē pentha. Barapomonaē peyawa jinompaexae Nacom exaneiba pocotsiwa xua wūnaeya peexanaewa yawa xua pocotsiwa tsita xanepanatsi Nacom, yawa xua pocotsiwa pexainyeiwa. ¹⁰ Incane pana nacuidubare pocotsiwa xua Nacom pon jiwi Pecanamataxeinaein ichichipa pocotsiwa

Nacom tsita xanepanatsi. ¹¹ Jopa paexanaeinde pocotsiwa jopa ainya cuiyo pocotsiwa ichamonae exana pomonae xua be poxonae pequireiwatha jinompa poxoru Nacom jopa peyabara yaputaexaetsi. Jame maisa barapomonae patsita itapeinya xeinare pocotsiwan xua barapomonae abe peexanaewanxae. ¹² Icha payabara paebichipan po coyenein barapomonae abe peexanaewa, bichocono aura pana exanaetsipa pocotsiwa namicha peexanaewa barapomonae tsipei bichocono abe. ¹³ Poxonae pecoicha pentha exana poxonae quirei bapoxonae daxita pichiwan beta pataneme pentha perubenaexae. Barichi poxonae barapomonae jume tane po jumein xua yaputane exainchi, bapoxonae tsita itapeinya xinaeinchi xua pocotsiwa namicha exana, apara deta cou abe. Bapoxonae barapomonae itacupatsi xua naexanaena Nacom piamonae tatsi. ¹⁴ Daxota Nacom piamonae tatsi ichun yabara jeichi:

“Nacui cayabara cananta xeinatabare,
tsipei xam be pon abe neexanaein.
Natsixire pia xainya weya tatsi pomonae
be petupaewi pejinompaewi jopa
tana nejume cowuntsi jiwixae.
Cristo cacana exanaena xua yabara
neyaputaewa bapon pocotsiwa xua
pia pexainyei coyenewa tatsi”,
jei xua ichun yabara paebatsi.

¹⁵ Dota pam, xua abe painya neexanaewa. Jame maisa xanepanaya pajinompare. Jopa pajinompaeinde icha be ichi poxonae jinompa pomonae Nacom jopa jume cowuntsiya yaputaetsi. Barapomonae jopa peyaputaewi. Jame maisa pajinompare icha be ichi poxonae jinompa pomonae jume cowuntsiya peyaputaewi Nacom. Barapomonae peyaputaewi. ¹⁶ Beta pa-eexanaponde daxita coyeneya xua paca itacupa poxonae cataunxuae anoxuae pajinompame, tsipei barapo matacabintha jiwi abe bichocono peexanaewi. ¹⁷ Jopa pajinompaeinde icha be ichi poxonae jinompa pomonae amameibatsi jopa Nacom peyabara yaputaexaetsi. Jame maisa payaputaeya exanaponde pocotsiwa xua Cristo ichichipa, pon jiwi Pecanamataxeinaein. ¹⁸ Jopa pana nacupa exanaeinde peatsaxa meran xua jiton acoyenebeya exanaeya exainchi. Jame maisa Nacom pia Pejumo pe tuxaxu tatsi pacopabeibare xua daxita bara paca juntu coyene itorobeiba xua beta painya neexaneibiwa tsane. ¹⁹ Nantiya pana natsipaebare pocotsiwa xua Nacom paca juntu coyene weiweina exana. Nantiya pana naxunare David pia weixi, po weixi pewun salmos. Matautano panaxunare po wei pomonae pejume cowuntsiwi pia weixi tatsi xua pewunae jainchi weixi Jesucristo, pon jiwi Pecanamataxeinaein. Panaxunare painya juntu coyene weya po weixi xua Nacom wunae pejainchiwatsi. ²⁰ Nacom pon Waxa bapontha pajacobeibare, pajan tsaibinde: “Nacom maisa pajuntu coyene weiweinan xua pocotsiwa daxita pata tana necatsixaemxae. Paca wucatsi Jesucristo pata Tanecanamataxeinaein pabuxuna bobenounan”, pajan tsaibinde.

Meje yabara po coyene xua pebin piseuribe bewa naxunare poronaenabe ponbe pejume cowuntsinbe

²¹ Daxita pam bewa bara pacopatsim xua nantiya pana nacanamataxeiname xua painya neexaneibinexa pocotsiwa xua nantiya pana nacui itorobeibame. Bapoxonae xua painya itapeinya xinaenexa xua painya nebarun itura cui jinaewa pocotsiwa Cristo paca cui itoroba.

²² Yabuxi pam, bewa bara pacopatsim xua painya seuriwi paca canamataxeina xua painya neexaneibiwa pocotsiwa painya seuriwi paca cui itorobeiba. Baraxua paexande icha paichim poxonae Cristo pon jiwi Pecanamataxeinaein paca cui itoroba. ²³ Tsipei pebin canamataxeina piowa, icha Cristo ichi xua canamataxeina piamonae pomonae pia pejume cowuntsiwichixaetsi. Bapon Cristo barapomonae pia Pecapanenebiyaeinchi tatsi. Barapomonae pomonae pejume cowuntsiwi bara be Cristo pia pepon tatsi. Cristo bara be pentasipa pecanamataxeinaexae barapomonae. ²⁴ Icha barapomonae ichi

pomonae Cristo pejume cowuntsiwichi xua pichichi xua peexanaewa pocotsiwa Cristo itoroba, yabuxi bewa barichi. Bewa exanae daxita pocotsiwa piseuriwi itorobatsi.

²⁵ Pebiwi pam paantobeinde painya seuri jiwi, icha Cristo ichi xua antobe daxita xua i dapomonae pomonae pejume cowuntsiwichixaetsi. Cristo pia peantobexae barapomona tsitupa poxonae naetotha tupa exanadutatsi poxonae bexotsi. ²⁶ Cristo tsitupa barapomona xua daxita i dapomonae pomonae peyabara jume cowuntsiwixaetsi po coyene xua Cristo juntu coyene xanepana pecana exanaenexa Nacom nexa. Baxua exana xua barapomonae jopa pexeinaewa tsane xua penatsicuentisiwa xua abe peexanaexae. Baxua Cristo cana exana poxonae barapomonae tabautisabatsi meratha, xuano xua poxonae paeba xua pinae jume cowunta Nacom Pejume Diwesi. ²⁷ Cristo baxua exana daxita pomonaetha pomonae pia pejume cowuntsiwichi xua pecuaranobinexa tsane pia itabaratha, xua yawa pemuxuna cuaranobinexa pia pexeinya peitupanae coicha. Poxonae barapomonae umenaena Cristo peitabaratha jopa yawa umenae tsane peabe coyenewan. Matautano jopa yawa umenae tsane pocotsiwa xua barapomonae abe exanatsi. Barapomonae pejuntu coyene xanepanaewi tsane Nacomtha xua jopa xeinaeyo xua penatsicuentisiwa xua abe peexanaexae. ²⁸ Pebiwi bewa antobe pia seuriwi, pecui untabexae icha barapo pebiwi ichi xua pia pepon natsiuntabe. Pon pia coutha natsiuntabe bapon piowa antobe xua be caein penaexanaewa tsanebe. ²⁹ Dapon ba ajibi pon pia coutha naaitafaetabi. Saya jame naapatsina pexaewa yawano naewatsina beta. Cristo bara juta ichiya cana ichi pomonae Nacom piamonae tatsi daxita xua i dapomonae pomonae Cristo pejume cowuntsiwichixaetsi. ³⁰ Cristo beta eena barapomonae tsipei barapomonae be pia pepon tatsi. Waxainchi yaputainchi baxua tsipei barapomonae jiwanaetsi. Waxainchi pomonaetsi xua caemonae wanaexanae jiwichi Cristotha. ³¹ Xua pebin yawa piseuri caein naexanabe Nacom Pejume Diwesitha baxua yabara jeye: “Daxota pebin paxa wepu natsata, yawa pena wepu natsata xua piseuribe penaperu cuicuinaenexabe. Bapoxonae baponbe piseuribe be caein naexanabe”, jei Nacom Pejume Diwesitha. ³² Barapo Nacom Pejume Diwesi xua pebin piseuribe yabara baraxua bara be Nacom moya yawun xeina xua po coyene bichocono ainya cui xua jiwi jopa yabara yaputaeyo. Barapo diwesi yabara caunuta xua Cristo iru Nacom piamonae tatsi pomonae pejume cowuntsiwichi, daxita be caemonae naexana icha pebin piseuribe ichi xua be caeinbe naexanabe. ³³ Barichi barapo diwesi paca yabara caunuta. Daxita pebiwi pam bewa paantobem painya seuriwi, icha paichim xua painya coutha pana natsiuntabem. Barichi daxita yabuxi pam painya seuriwi bewa paca yabara baru cui itura jinaena.

6

¹ Pexui pam, paxam pomonae painya nejume cowuntsi jiwi pam Cristo. Painya neantobemxae pon jiwi Pecanamataxeinaein daxota paxam bewa pajume baru jejam pocotsiwa painya axeiwi paca itoroba, tsipei baxua pexeinya cui coyene. ²⁻³ Moisés pia peitorobi coyenewa ainya coyenewan xeina. Po peitorobi coyenewa copiya po peitorobi coyene xua ichaxota muxuna xeina xua peyabara tsiwuna muxu dutsiwa, barapo coyenewatha baxua jeye: “Axa cui baru itura jinare, yawa ena cui baru itura jinare, xua painya juntu coyene xanepanaya jinompaenexa, matautano xua painya nejinompaenexa ainya wei dapaen barapo cae pin nacuathe”, jei Moisés pia peitorobi coyenewatha.

⁴ Paxam pomonae coxiyei jiwi pam, jopa anaepanaya paitorobeibinde xua daxota painya pexui paca caseba. Jame maisa bewa antobeya pawichitim pocotsi coyeneya Jesucristo, pon jiwi Pecanamataxeinaein, tsita xanepanatsi. Pacuidubare painya pexui xua beta pejinompaenexa. Matautano pamuxuwere xua peexanaenexa pocotsiwa bewa exanae.

⁵ Pomonae amanaya painya nepaca cabusi tatayebeibi jiwi pam xua poxonae ichamona pata nacuitame pajume baru jejande pocotsiwa xua painya nepaca canamataxeinaewi paca itoroba barapo cae pin nacuathe. Barapomonae pabarū cui itura jinare, yawano pacui cunuware barapo painya nepaca canamataxeinaewi xua abe painya nepaca exanaeyainwa. Matautano yatsicaya jume xainyeya pata exande. Barapomonae

beta patanacuire icha poxona paichim poxona Cristo patanacuitame. ⁶ Daunweya patanacuire bequein painya nepaca canamataxeinaewi jopa paca taeyo. Jopa saya daunweya patanacuichinde xua barapomona painya nepaca taexae. Poxona baxua paexaname apara saya poxoru painya pia nepaca canamataxeinaewi xanepanaya paca yabara nanta xeinaetsi. Jame maisa patanacuire icha paichim poxona painya ichichi xua amanaya painya netanacuichiwa painya nepaca canamataxeinaein nexa Cristo. Bichocono daunweya panacuire pocotsiwa xua Nacom tsita xanepanatsi pocotsiwa xua bapon ichichipa. ⁷ Poxona pata nacuitame pomona painya nepaca canamataxeinaewi weiweinyaya panacuire icha be poxona paichim xua poxona pata nacuitame pon jiwi Pecanamataxeinaein, pon Cristo Jesús. Jopa bara paichinde xua poxona jopa xapain patanacuichim pomona xua poxoru saya jiwixae. ⁸ Paxam payaputaneme pocotsiwa xua daxita beta paexaname bara Nacom paca busi cui matomata. Baraxua Nacom pon jiwi Pecanamataxeinaein jupa barapocotsi matoma paca cata, poxona bequein amanaya painya nepaca busi cui tatayebeibi jiwi pam xua poxona ichun pata nacuitame, xuano xua saya poxona bequein paratixi patsinacuitame.

⁹ Paxam pomona pecanamataxeinaein jiwi pam, bewa beta pata exanaem xuya barapo amanaya painya nebusi cui tatayebeibi jiwi. Jopa yabara pamuxuwetsinde xua painya necuainchiwa tsane icha jopa xapain exanaeyo barapomona. Pananta xeinare xua barapomona bewa exanae pocotsiwa itoroba pon jiwi Pecanamataxeinaein icha paichim xua iru bewa paexanaename pocotsiwa bapon paca itoroba, pon eca itabocotha. Bapon daxita tsita najupatsi jiwi poxona yabara paeba peyaputaenexa icha barapomona natsicuenta xua abe peexanaexae.

Meje yabara xua pomona pejume cowantsiwi Cristo po coyeneintha bewa amanayabi caurimonaetha

¹⁰ Tamona pam, anoxuae wetan pocotsiwa xua tapaca tsipaebiwatsi. Ajuntusuya pajinompare pon Pecanamataxeinaein jiwi pia peyapusu itorobi coyenewatha tatsi caemona painya nenaexanaexae bapontha. ¹¹ Painya juntu coyene pana naewatsiya yawenare daxita po coyenewantha xua Nacom paca cata xua xota pana nayaewatame painya juntu coyenewa. Bapoxona paca itacupa xua caurimona pia pentacaponaein tatsi paamanayabame poxona paca juntu coyene jujuta xua abe painya neexanaenexa. ¹² Tsipei anoxuae jopa nabetsi xua pepa jiwitha. Jame apara anoxuae penabi coyene exanatsi pomonaetha pomona peinya pejinompaewi xua caurimonaetha. Barapo caurimona xaina pia peyapusuwa yawa peitorobi coyene xua jiwi canamataxeinatsi barapo cae pin nacuathe tsique, pomona abe peexanae jiwi. Matautano jinompa barapo cae pin nacia matatsunthe. ¹³ Daxota paxeinare daxita pocotsi juntu coyenein xua Nacom paca cata pocotsi coyeneintha xua pana nayaewatame. Anoxuae pana najuntu coyene wunaere xua painya juntu coyene amanayabi dubenanaebiyaenexa tsane barapo peinya pejinompaewi. Baxua paexande xain awiya bichocono pajuntu coyene daunwam poxona po mataqueitha paca juntu coyene jujutsina xua abe painya neexanaewa tsane. Bequein paca jujutsina, awiya ajuntucoyenesuya pajinompaename.

¹⁴ Pana nacui wunaere icha soldadomona ichi xua yabara nacui wunaeta penabinexa ichamonaetha. Painya juntu coyenewatha paxeinare Nacom pia pexainyei coyenewa painya tsita itapeinya xeinaenexa baraxua xua bara xainyeya pata exaname Nacom. Barapocotsi juta coyeneya paichinde icha be soldadomona ichi xua poxona yabara nacui wunaeta penabinexa ichamonaetha bapoxona naepa cataruba paparuwan xua tsita itapeinya xaina xua bapomona nacui wunaeta xua bara xainyeya penabinexa xua pon pentacaponaein peitorobixae. Matautano pejuntu coyene xanepanaewa Nacom patsita xeinare painya juntu coyenetha, painya nenayaewatsinexa icha be poxona soldadomona ichi xua xaina po penaintotha xua nantacari acaba poxona nacui wunaeta xua penabinexa. ¹⁵ Pana najuntu coyene wunaere xua painya necueicuei-jei tsurubenanaebiyaenexa Nacom pia pexeinya jume diwesi xua po diwesi yabara xua jiwi junte pejinompaewa. Barapocotsi juta coyeneya bara paichinde icha be

poxonae soldadomonae ichi, xua poxonae nataxu wunaetaduba sapaton xua penacui wunaetsinexa xua naba. ¹⁶ Matautano pamuxuna xeinare xua bichocono painya nejume cowuntsiwa Nacom, xua pana najuntũ coyene yawenae poxonae caurimonae pia pentacaponaein tatsi paca jũntũ coyene jũjũta. Barapocotsi jũta coyeneya bara paichinde icha be soldadomonae ichi xua pemaxũntha duba peperacae nain xua naita arababa. Poxonae pia peaitafaetabi jiwi cawababatsi pocotsiwantha xua peopi sojeiwantha xua iso itere xeina, bapoxonae barapo peperacae naintontha naita arababa barapomonae, yawano baxota itaxubaba iso itere. ¹⁷ Pacopare xua bara Nacom paca capanenebiyaena painya paca jũntũ coyene araranaenexa caurimonae pecuiyainwa. Barapocotsi jũta coyeneya bara paichinde icha be soldadomonae ichi xua penain yoreitha nanta acaba. Nacom Pejume Diwesi painya jũntũ coyenetha paxeinare xua po jume Nacom pia Pejumope tũnaxũ tatsi paca cata xua po jumetha painya nenayaewatsinexa painya nepaca caaitafaetabi jiwi pecuiyainwa. Barapocotsi jũta coyeneya bara paichinde icha be soldadomonae ichi xua capona cusi penayaewatsinexa pia peaitafaetabi jiwichi pecuiyainwa. ¹⁸ Nacomtha matowa patsipaebeibare daxita matakabintha be pocotsi coyeneya paca yawena Nacom pia Pejumope tũnaxũ tatsi. Nacomtha pawũqueibare daxita painya newũcae coyenewatha tsaibi pocotsiwan xua panantawenoname. Xain daxita matakabintha tsaibi tsaca painompeibame, mataũta bapana jopa paajũntũcoyene-faetabinde xua pawũcame Nacom. Bichocono matowa patawũcare daxita pomonae Nacom piamonae tatsi. ¹⁹ Barichi painta wũcare Nacomtha xua bapon tanecatsinexa po jume diwesitha xua tacueicueijeinexa. Matautano painta wũcare xua tana neitacũpaewa xua cui tsacatsacapiya tacueicueijeinexa, xua jiwi yabara yaputane taexanaenexa pocotsiwa xua Nacom moya yawũn xeina po coyene yabara xua Nacom capanepa exana pomonae jopa judiomonae naexanaeyo. ²⁰ Nacom neitoroba icha nacuantha xua tacueicueijeinexa Nacom Pejume Diwesi bapon nexa. Daxota anoxuae ichamonae neeta jiwi pecũbi botha tacueicueijeixae Nacom nexa. Painta Nacomtha wũcare xua cui tsacatsacapiya tacueicueijeinexa tsane poxonae icha bewa cueicueijan tsane.

Meje yabara poxonae Pablo najume wetsiya paeba barapo cartathe

²¹ Tĩquico pon paxan paantobein, pon irũ pejume cowuntsin Jesucristo bapon pacata itorobatsi. Bapon Tĩquico bara xainyeya exana poxonae pana neyawena Nacom pia petanacuichiwa tatsi pon jiwi Pecanamataxeinaein. Bapon daxita paca tsipaebina xua neyabara paebina, yawano pocotsiwa xua exanan baxua yabara paca tsipaebina. ²² Bapon Tĩquico pacata itorobatsi yaitama ichichipan xua bapon yabara paca tsipaebina xua pata jinompaewa. Bapoxonae bapon paca jũntũ coyene tsacabina, jũntũ coyene weiweinaya sadũjei painya nejinompaewa tsane xua bara beta tapoponaexae.

²³ Barabũ Nacom, pon Waxa, irũrũ Jesucristo, pon jiwi Pecanamataxeinaein, baponbe jũntema jinompa cana exanaenabe pomonaetha daxita pomonae pia pejume cowuntsiwixaetsi. Matautano barabũ exanaenabe xua barapomonae nantiya naantobe tsane. Matautano barabũ exanaenabe xua barapomonae ajũntũcoyenesũya jume cowũnta dubenanaebiyaena. ²⁴ Matautano barabũ Nacom peantobexae yawenaena daxita pomonaetha pomonae peantobewi Jesucristo pon Wanacanamataxeinaein. Bapoxonae barapomonae pexeinaenexa tsane po coyene antobe ichamonaetha po coyenewa xua ataya tsiteca.

Baja Pablo.

Meje Po Carte Pablo Tatina, Filipos Tomarapiwi Tatinatsi

Meje poxonae Pablo tamropata pitaba xua tatina, Filipos tomarapiwi tatinatsi

¹ Xan, Pablon, iru Timoteo, paxanbe ponbe amanaya pata tanacuichinbe Jesús pata taichichipaexaebe. Barapo carte patatinanbe pomonae jinompa Filipos tomaratha. Patatinanbe daxita pomonae Cristo Jesús pejume cowuntsiwichi, pomonae yatsicaewa Nacom piamonae tatsi. Matautano iru patatinanbe pomonae pecanamataxeinaewi pejume cowuntsi jiwi. Matautano iru patatinanbe pomonae peyawenaewi pejume cowuntsi jiwitha, poxonae yawena peatenewitha, xuano xua poxonae apata pexaewa peacopeibiwitha. Barapomonae Nacom piamonae tatsi, yawa barapomonae caemonae naexana Cristo Jesustha. ² Barabu Nacom, pon Waxa, amanaya paca yawenaena painya pia paca necaantobexae, yawa xua juntea jinompa paca exanaena. Iru barabu Jesucristo pon jiwi Pecanamataxeinaein baxua pacata exanaena.

Meje yabara poxonae Pablo tawuca Nacomtha pomonae Nacom pejume cowuntsiwi

³ Poxonae paca yabara nanta xeineibatsi Tanacom tsipaebeiban paxam yabara. Jan tsaibinje: “Nacom juntu coyene weiweinan xua barapomonae betiya necatsita dubenanaebiyaexae”, jan tsaibin. ⁴ Poxonae Nacom pacata wuqueibatsi bichocono juntu coyene weiweinaeya pacata wuqueibatsi xua daxita paxam. ⁵ Nacomtha yabara tsipaeiban xua paxam tapana nebaru nacuichiawam Nacom Pejume Diwesi xua poxonae aena pajume cowuntame xua beya anoxuae. ⁶ Bara xaniwaicha yaputan xua Nacom tamropata pitaba xua xanepanaya beta paca cana juntu coyene exana. Baxua Nacom paca cana juntu coyene exana ducuaenaebiyaena beya poxonae Nacom xanepanaya paca cana juntu coyene wetsina poxonae po mataqueitha Jesucristo patopaetsica. ⁷ Baxua jame inta xanepana xua tapaca yabara nanta xeinaewatsi, tsipei bichocono paca antobetsi. Poxonae bequein anoxuae jiwi pecubi botha neeta, yawano poxonae bequein caena bayatha pecapanenebiyae diwesi jume yabara jume yawenaeya cueicueijan jiwitha, yawano xua jiwitha tsita itapeinya xeinan xua barapo diwesi bara pexainyei diwesi jume, bapoxonae bara pana nebaru atenem. Daxota poxonae Nacom amanaya neyawena poxonae atene neexana ichamonae pia taneantobexae Nacom, iruru Nacom amanaya paca yawena pia paca necaantobexae poxonae paca atene exana ichamonae. ⁸ Nacom yaputane xua bichocono bara paca antobetsi daxita paxam, icha Jesucristo ichi xua daxita paca antobe. ⁹ Yawano Nacom paca tsiwucatsi xua equeicha matowa mataropeicha painya nepaca catsinexa peantobewa. Yawa muxuna wucan xua Nacom paca cana exanaena xua painya neyabara yaputaewa daxita coyenewan. Matautano muxuna wucan xua Nacom paca cana exanaena xua painya neitapetsiwa pocotsi coyene xua betiya paca cana exanaena. ¹⁰ Bapoxonae payaputaename xua itapetsiya paexanaename pocotsi coyene bichocono xanepana. Bapoxonae bichocono pajuntu coyene xanepanaya jinompaename. Yawano poxonae Cristo patopaetsica bapon jopa paca yabara paebi tsane xua panatsicuentame abe painya neexanaewan. ¹¹ Paca tsiwucatsino xua Jesucristo paca necajuntu coyene yuca exanaenexa, xua po juntu coyene bichocono xanepana, xua daxota painya neexanaenexa pocotsiwa xua bichocono Nacom tsita xanepanatsi. Poxonae jiwi baxua paca cui taena bapoxonae jiwi Nacom wuna jaintsinchi jei tsane: “Maisa Nacom paca baru cui itura jinatsi, xua jinya neexanaexae barapo jiwi pia juntu coyenetha tatsi”, jei tsane barapo jiwi.

Meje poxonae Pablo namchi: “Xua tapoponae coyenewa bara apara Cristo nexa”, jei

¹² Tamonae pam, pomonae iru painya nejume cowuntsixae Jesús, ichichipan xua painya neyaputaewa tsane xua po coyene poxonae necana exana ichamonae xua jiwi pecubi botha neeta tayabara cueicueijeixae Jesucristo. Baxua tana necana exanaexae ichamonae jiwi taju jume tane Nacom pia pecapanenebiyae diwesi jume tatsi. ¹³ Daxota

daxita soldadomonaē pomonaē xote umene pomonaē peyapu eenaewi pepa pentacaponaein pia bo tatsi irurū seicayano ichamonaerū, daxita barapomonaē yaputane xua xan jiwi pecūbi botha neeta tapaebi ducuaenaebiyaexae Cristo nexa. ¹⁴ Pin bicheito, pomonaē pejume cowūntsiwi Nacom, barapomonaē netane xua jiwi pecūbi botha ecan. Daxota barapomonaē bichocono ichichipa xua pecueicueijeīwa Nacom Pejume Diwesi. Barapomonaē jopa junuwiyo xua cui tsacatsacapiya pecueicueijeīwa Nacom Pejume Diwesi, tsipei bichocono jume cowūntatsi pon jiwi Pecanamataxeinaein.

¹⁵ Ichamonaē Cristo yabara cueicueijeichi apara poxoru saya tana neuwixae, tsipei ichichipa xua jiwi barū cui itura jinaena barapomonaetha, beyacaincha xua tana nebaru cui itura jinaewa tsane barapo jiwi. Ichitha jame, ichamonaē beta xaniwaicha yabara paebatsi Cristo, nejūntū coyene xanepanaexae. ¹⁶ Barapomonaē baxua exana taneantobexae peyaputaexae xua jiwi pecūbi botha ecan tayabara jume yawenaeya cueicueijeixae Cristo pia pexeinya jume diwesi tatsi poxonaē ichamonaē abe yabara paeba barapo diwesi. ¹⁷ Pomonaē Cristo yabara paebatsi tana neuwixae, saya apara poxoru peasiwixae xua ichamonaē tana nepuna ponaewa tsane. Baxua exana poxoru ichichipa inta bichocono ayapube exana tsipei anoxuae ecan jiwi pecūbi botha. ¹⁸ Bequein jiwi Cristo xainyeya yabara paebatsi poxoru tana neantobexae, ichacuitha metha tsipae poxoru tana neuwixae baxuan bapana jopa netsita ainya cuiyiyo. Saya jame poxonaē ba jiwi Cristo yabara paebatsi, baxua ba jame bichocono nejūntū coyene weiweina exana.

¹⁹ Yawa equeicha bichocono nejūntū coyene weiweina exanaponaena, tsipei yaputan xua painta wūcame nawita Nacomtha. Yawa yaputan xua Jesucristo pia Pejumope tūnaxū tatsi neyawena, pebaxuaxaēbe bara Nacom necapanepaena pomonaē tana neaitafaetabi jiwi weya. ²⁰ Pocotsiwa xua taichichipaewa yawano pocotsiwa xua tawūnaē ewatsiwa, xua bapana jopa tacoutha naacauran tsane tajunuwixae xua tayabara cueicueijeīwa Cristo. Jame bewa yabara cui tsacatsacapiya cueicueijan tsane Cristo, anoxuae, yawa xua bexa tsaneno. Ichichipan xua jiwi beta jume cowūntsina xua poxonaē netane xua beta tapoponaewa Cristo nexa. Bapoxonaē jiwi Cristo barū cui itura jinaeinchi poxonaē necui taena xua beta xanepanaya poponan Cristo nexa. Baxua jiwi exanaena poxonaē bequein asū poponaethan tsane, xua Cristo tatsita poponaewa yawa poxonaē bequein tūpaethan tsane xua Jesucristo tayabara cueicueijeixae. ²¹ Jame pocotsiwa netsita xanepana apara xua jiwi Cristo barū cui itura jinatsi, xua Cristo tatsita poponaewaxae. Ichitha icha tūpaēin Cristo taēin, baxua netsita xanepana bichocono, beyacaincha xua poxonaē abū cataunxuae poponan, tsipei Cristo taēin. ²² Awiya cataunxuae poponan daxota neitacūpa xua awiya tanacuichiwa pocotsiwa pexanepanaē coyenewa pon jiwi Pecanamataxeinaein nexa. Jopa yaputaēinyo xua barapo naxobe coyenewabe jiwana itapetocuaein. ²³ Inta bichocono ayapube xua barapo naxobe coyenewabe jiwana itapetan. Ichacuitha saya betūpaēin xua tapoponaenexa tsane ichaxota Cristo popona, tsipei baxua jame inta bichocono xanepana. ²⁴ Daichitha ichacuitha jame bichocono inta ainya cui xua awiya tapoponaewa tapaca cayawenaenexatsi. ²⁵ Ichitha yaputan bara, xua awiya poponan xua tapaca yawenaenexatsi xua awiya painya nejume cowūnta dubenanaebiyaenexa Cristo. Matautano yaputan xua bichocono equeicha matowa painya nejūntū coyene weiweina tsozonaenexa tsane. ²⁶ Daxota poxonaē paca siwa ponaeinchi Cristo Jesús wūnaē pajainchiname xua equeicha tapaca casiwa ponaexaetsi tsainchi.

²⁷ Saya beta xanepanaya painompare wanaca itorobixae Cristo pejume diwesi tatsitha. Daxota icha bequein paca siwa ponaeinchi, ichacuitha icha tajū ecan, maisa ichichipan xua ichūn yabara benetsipaebina xua beta painya nejinompaewa. Bejume taēin xua xanepanaya beta ajūntūyapusūya pajume cowūnta dubenanaebiyame Nacom. Matautano bejume taēin xua caemonaē peburūya jume daunweya pana nabarū cueicueijam painya nejume cowūntsiwa Cristo. ²⁸ Jopa pajunuwinde poxonaē imoxoyo abe paca exaneiba painya nepaca caaitafaetabi jiwi. Baxuan barapomonaē exana be tsita itapeinya xeina xua barapomonaē weraweracaena xua poxonaē po mataqueitha

poxonae Nacom yabara paebina jiwi xua penatsicuentisiwa abe peexanaexae xua iru Nacom paca capanenebiyaena barapo mataqueitha. ²⁹ Nacom pexeinya coyene paca cata painya netanacuichinexa Cristo xua poxonae pajume cowuntame bapon, matautano xua poxonae ichamonae paca atene exana poxonae ichamonae abe paca yabara paeba painya nejume cowantsixae bapon. ³⁰ Waxainchi bara nanta jupaya jume cowuntsiya daunweya paebatsi Nacom Pejume Diwesi. Baxua exanatsi icha be pocotsi coyeneya ichi poxonae bayatha pana netaneme xua poxonae jume daunweya paeban Nacom Pejume Diwesi, matauta xua poxonae bara pana neyabara jume taneme xua awiya cataunxuae exanaponan barapo coyeneya.

2

Meje yabara xua Cristo peacopeibin pia coutha naexana, xua jopa peainya cui jitonyo

¹ Payaputaneme xua Cristo paca juntu coyene tsacaba xua beta painya nejinom-paenexa. Matautano payaputaneme xua Cristo paca matateica pia painya nepaca caantobexae poxonae ichamonae abe pacata exana. Matautano payaputaneme xua Nacom pia Pejumope tñaxu tatsi paca baru jinompa. Matautano payaputaneme xua bapon paca antobe. Matautano payaputaneme xua Cristo nantanuweya paca yabara nanta xeina pia paca necayawenaenexa. ² Icha daxita barapo pexainyei coyenein payaputaneme, bichocono pana nejuntu coyene weiweina exande. Baxua painta exanaename poxonae caemonae juntema pajinompame, xua caemonae nantiya pana naantobem. Matautano baxua painta exanaename poxonae xua caemonae nanta jupaya pana nabaru nanta xeiname yawano poxonae nanta jupaya ichipaeya paexaname. ³ Jopa paexanaeinde xua pocotsiwa be paasiwam xua saya meisa painya coutha nexa. Jopa paxeinaeinde po cui coyene xua jiwi peabi coyene. Jame maisa painya coutha pana nayabara nanta xeinare xua pomonae pecui pawi jiwi pam. Jame maisa sayano ichamonae pacui yabara nanta xeinare xua pepa peainya cuimonae xua beyacaincha paxam. ⁴ Jopa bewa panantausim painyamonaе jiton pon saya ichichipa nawita xua saya meisa penata exanaewa pexanepanae coyene. Jame bewa muxuna bapon taexanae ichamonae pocotsiwa xua ichamonae tsita pexeinya coyenetsi. ⁵ Paxam beta peburuya pananta jupaya nanta xeinare icha Cristo Jesús ichi xua poxonae beta ba nanta xeina. Bapon bara iche:

⁶ Bapon Cristo peyacuiya jinaein Nacom.

Bapon bequein barapara Nacom, daichitha

bapon jopa pia coutha ichichipaeya

daunweya botsiyo barapo coyenewa xua

peyacuiya jupae jinaein icha Nacom

ichi poxonae patopeica po cae

pin nacuathe tsique.

⁷ Daichitha barapo coyene naitematsiya cuenta pona.

Bapon Cristo be jiton yacuiya naexana po

cae pin nacuathe tsique xua Nacom amanaya

petanacuichinexatsi xua pia coya peichichipaexae.

⁸ Poxonae bapon naexana po cae pin nacuathe

tsique bara yatsicaya be jiton coyene.

Bapoxonae pia coutha nacana exana be pon

peacopeibin xua jopa peainya cui jitonyo.

Bapon exana pocotsiwa Nacom itoroba poxonae

jejei xua tupa pecana exanaewatsi ichamonae,

bequein barapo petupaewa bichocono

pin ura exanatsi xua tupa naetotha.

⁹ Daxota Nacom, Cristo bichocono baru cui itura jinatsi poxonae Nacom athabe juinya exana xua

Cristo athabe juinya exanatsi.

Matautano Nacom barũ cui itura jina,

Cristo barũ cui itura jinatsi poxonae

Nacom bapontha wũn duta, po wũn xua jei:

“Pepa Pecanamataxeinaein”, jei.

Barapo wũntha Jesús copatatsi xua bara

pecanamataxeinaenexa pia peayapusũ itorobi

coyenewatha daxita carepaya jiwi, matatsunpiwithano.

¹⁰ Nacom barapo wũn cata xua daxota daxita jiwi

poxonae jume taena barapo wũn pentabocotontha

umenaena, xua Jesús wũnae pejainchinexa tsainchi,

pepa Pecanamataxeinaeinxae itabocopiwi,

irũrũ po irathepiwi, irũrũ pomonae

jinompa ira bũxũpana wetsina.

¹¹ Daxita barapomonae Nacom wũnae

jainchinchi pon Nacom, Waxa, jei tsane:

“Maisa, Nacom paca barũ cui itura jinatsi,

tsipei bapon Jesucristo bara yatsicaya

pon pepa Pecanamataxeinaein jiwi”,

jei tsane daxita barapomonae.

Meje yabara xua ichamona, Nacom pejume cowũntsiwi beta cui yaputainchi

¹² Tamona pam paxam pomonae bichocono tapaca caantobewichi pam. Tsipei bay-atha pana nejume cowũnteibame pocotsiwa paca itorobeibatsi poxonae paca barũ ecatsi, daxota anoxuae nama bichocono pana nejume cowũnde beyacaincha xua poxonae imoxoyo paca barũ ecatsi bequein tajũ ecan. Awiya cataunxuae carepaya daxita paxam barompaya paexana dubenanaebiyama pocotsiwa xanepana xua pocotsiwa Nacom ichichipa xua Nacom painya nepaca capanepaexae. Pana najũntũ coyene aura exande xua jopa paatsacande. Yawano pana najũntũ coyene junuwa exande Nacomtha, abe painya neexanaeyainwa. ¹³ Bapon Nacom paca cana jũntũ coyene yawena xua painya jũntũ coyene, jume barũ jejei pocotsiwa Nacom paca itoroba. Matautano Nacom paca yawena xua painya neexanaewam pocotsiwa Nacom ichichipa.

¹⁴ Daxita coyenewan poxonae paexaneibame jopa paexanaeinde pocotsiwa anaya painya jũntũ coyenewatha payabara paebame ichamona. Matautano jopa payabara najume matsontsonobinde baxua poxonae Nacom pata exaneibame. ¹⁵ Bapoxona poxonae jiwi paca cui taena, barapo jiwi jopa abeya paca cui yabara paebi tsane xua painya nenatsicuentiwa xua abe painya neexanaexae. Matautano paca cui taena xua jopa ajũntũcoyenebeya pajinompam. Jame maisa painompare be Nacom piamona tatsi coyeneya. Matauta jopa abe paexanaeinde xua icha pomonae anoxuae paca barũ jinompa pomonae pemuxuitorobiwi xua pomonae peantũcuiuyapubewi xua poxonae abe exana dubenanaebiya. Icha paxam beta pajinompame barapomona peitũtha tatsi, bara paca tane xua bara beta pajinompame bequein abe peexanae jiwi nataetha, icha be pocotsi jũta coyeneya ichi xua opitei ba poton pentha tsurubena poxonae quirei tsuncuae, bara ba jiwi tane barapo opiteiton bequein quirei tsuncuae taetha.

¹⁶ Daunweya pajume cowũnta dubenanaebiyama po diwesi jiwi ajũntũyapusũ exanatsi. Daxota poxonae Cristo patopaetsica bichocono paca weyataeinchi tajũntũ coyenewatha beta xaniwaichiya painya nejinompaexae Nacom nexa. Bapoxona yaputaein xua xaniwaicha bara beta paca yawenatsi xua painya nejume cowũntsiwam. ¹⁷ Bequein metha jiwi nebexubina xua tapaca cayawenaexaetsi, xua painya nejume cowũntsinexa, daichitha awiya jũntũ coyene weiweinan, irũrũ paxam paca cayawa jũntũ coyene weiweinaeinchi. ¹⁸ Daxota paxam bewa pana nebarũ jũntũ coyene weiweinaename, bequein tũpaein xua tapaca cayawenaexaetsi xua painya nejume cowũntsinexa.

Meje Timoteo yabara iru xua Epafrodito yabara

¹⁹ Icha Jesús pon jiwi Pecanamataxeinaein ichichipaena, methaunxuae itorobin Timoteo painya nepaca cataenexa tsane. Bapoxonae juntu coyene weiweinaein xua poxonae paca yabara jume taeinchi xua netsipaebina Timoteo. ²⁰ Tsipei ichun ajibi pon paca siwa yabara nanta xeina icha xan ichin. Saya meisa bapon Timoteo bichocono paca siwa yabara nanta xeina xua beta painya nejinompae coyenewa icha xan ichin xua bichocono paca siwa yabara nanta xeinatsi. ²¹ Ichamonae saya itapetsiya yabara nanta xeineiba barompaya pia peexanae coyenewan. Barapomonae jopa nanta xeinaeyo xua pocotsiwa Jesucristo pia petaexanaewatsi coyenewan tatsi. ²² Paxam pataneme xua Timoteo neyawena xua pecueicueijiwa Nacom Pejume Diwesi, icha be coxiyun ichichi xua poxonae pexanto yawenatsi. ²³ Xua poxonae yaputaein xua ichamonae necana exanaena, bapoxonae beitorobin Timoteo xua pia paca necataenexa. ²⁴ Jume cowantan pon jiwi Pecanamataxeinaein xua necopata xua iru methaunxuae paca siwa ponaeinchi.

²⁵ Matautano nanta xeinan xua bewa pacata itorobinchi Epafrodito, pon be taeweicho tatsicotaein, iru pejume cowantsixae Jesús, pon taneyawenaein xua cueicueijan Nacom Pejume Diwesi. Bapon jume daunweya pacuidubanbe poxonae bequein ichamonae abe yabara paeba Nacom Pejume Diwesi. Bapon Epafrodito, pon bayatha painta itorobame xua taneyawenaewa tsane pocotsiwa nantawenonan. ²⁶ Maisa bichocono bapon bepaca taena daxita paxam. Bapon bichocono juntu coyene wecoyei tsipei pinae paxam payabara nanta xeiname, pinae pajam: “Maisa bichocono Epafrodito nacata atene tsocuae”, pinae pajam. ²⁷ Bara xainyei, bapon bayatha bichocono atene bara muxu petupa. Daichitha Nacom nantanuweya yabara nanta xeina xua Epafrodito axaibi peexanaewa tsainchi. Matautano Nacom iru nantanuweya neyabara nanta xeina xua jopa bichocono tajuntu coyene wecoyeiwa tsane icha bapon petupaexae tsipae, xua beyacaincha juntu coyene wecoyan poxonae xua copiya, xua poxonae saya atene. ²⁸ Daxota bichocono ichichipan xua bapon nainya pacata itorobinchi. Bapoxonae pajuntu coyene weiweinaename xua equeicha painya netaexae tsane bapon. Matautano bapon itorobin xua jopa tapaca yabara juntu coyene wecoyeinexatsi. ²⁹ Moya bara bichocono pantenta juntu coyene weiweinaeya jacobare Epafrodito xua pepatopaexae, pon jiwi Pecanamataxeinaein peitorobixae. Epafrodito beta pabarui cui itura jinare. Bara paichinde ichamonaetha, pabarui cui itura jinare pocotsimonae icha bapon ichi. ³⁰ Bapon bara muxu pebexubichi xua Cristo petanacuichixaetsi. Bapon penapepechiwatha naexana, inta pewetsinexa pocotsiwa xua jopa paca itacupaeyo xua painta exaname.

3

Meje yabara xua po coyene pepa pejuntu coyene xanepanaewa

¹ Tamonae pam, pomonae iru painya nejume cowantsixae Jesús, pajuntu coyene weiweinare pon jiwi Pecanamataxeinaein pia pacata exanaexae. Jopa afaetabinyo xua equeicha jupa matowa tapacata tinaewatsi pocotsiwa bayatha pacata tinatsi. Bara apara baxua paca yawena xua beta painya netsita jinompaenexa Nacom. ² Dota pam pomonae peantucoyenebe jiwi yawano xua abe peexanaewi. Matauta dota pam pomonae judiomonae pia cui coyeneyatha tatsi paca itoroba xua painya nenawi thabiwam po coyene xua pawu thabame pebiwi xua ichaxota nareixacaena. Barapomonae nanta xeina xua icha baxua exanaena Nacom capanenebiya exanaena. ³ Waxainchi xaniwaicha barapomonaetsi pomonae yatsicaewa Nacom watsita juntu coyene xanepanaewichi, tsipei Nacom pia Pejumope tunaxu tatsi naca yawena xua jume cowantatsi watanacuichinexa Nacom. Matautano wajume cowantsixae Cristo Jesús, daxota bapontha wuna jaintatsi pia wanacata exanaexae. Waxainchi jopa nanta xeinaetsi xua poxonae ichamonae naca wi thaba, barapo coyene naca juntu coyene xanepana exana Nacomtha. ⁴ Icha pebiwi itacupaetsipatsi xua jume cowanta xua pia coutha nacapanenebiya, barapoxonae iru xan neitacupaetsipa xua jume cowantan xua tacoutha tanacapanepaewa beyacaincha

xua barapo pebiwi. Ichitha pebiwi iru xan, jopa pana neitacupaeyo xua pana nacapanenebiyan pata coutha. ⁵ Caena bayatha tacoutha nanta xeinan xua tacoutha tana nacapanepaewa pocotsiwe taexanaexae. Poxonae naexanan ocho po matabitha newi thaba. Matautano xan bara israelmonae pia saineiwi jiwanan. Matautano Benjamín piamonae tatsi jiwanan tsipei pia pemomoxi susato jiwi jiwana pin tatsin. Matautano yacuiya naexanan xua hebreo jume tacueicueijeiya, taxa iru taena hebreo jume pepae-biwixae. Matautano bayatha fariseomonaepin naexanan, xua daxota daxita coyeneya beta xanepanaya exanan be pocotsi coyeneya Moisés pia peitorobi coyenewatha itoroba. ⁶ Bichocono jume cowantan pocotsiwan fariseomonaepin pia pecuidubi coyenewan tatsi. Daxota abe exanan pomonaetha pomonae Jesús pejume cowantsiwichi. Tsipei daxita coyenein exanan pocotsiwa Moisés pia peitorobi coyenewa itoroba, daxota nanta xeinan xua yatsicaewa juntu coyene xanepanan Nacomtha xua jopa xeiaineyo tanatsicuentiwa xua abe taexanae coyenewa. ⁷ Daxita po coyenein xua bayatha inta netsita ainya cui, porucae jopa daichiyo. Anoxuae netsita acoyenebe barapo coyenein, tajume cowantsinexa Cristo. ⁸ Matautano daxita inta newepu napuxana pocotsiwa xua bayatha nanta xeinan. Xua yaputan Cristo Jesús Tanecanamataxeinaein, baxua jame inta wunae bichocono beyacaincha xua daxita pocotsi coyenewan copiya bayatha xeinan. Cristo Pejume Diwesi tacueicueijeixae daxita newepu napuxana pocotsi coyenewan bayatha xeinan. Barapo coyenein yabara nanta xeinan, xua barapo coyenein abe, be pocotsiwa jiwi xuba pocotsiwa abe. Po coyenein xua copitha xeinan barapo coyenein pentan tanantausinexa Cristo pon Tanecanamataxeinaein. ⁹ Ichichipan xua be caein naexanan Cristotha xua tajuntu coyene Nacom petsita xanepanaenexatsi bapon pia tana necana exanaexae barapo coyene. Barapo coyene necana exana Nacom, jopa poxoruyo xua tajume cowantsixae Moisés pia peitorobi coyenewa xua daxota tajuntu coyene xanepana Nacomtha. Jame barapo coyene necana exana Nacom xua be caein naexanan Cristotha, poxonae jume cowantan, poxoru Nacom tanecatsixae pejuntu coyene xanepanaewa. Barapocotsi coyenewa ba Nacom cata jiwitha pomonaetha pomonae pejume cowantsiwixaetsi. ¹⁰ Pocotsiwa taichichipaewa baraxua xua apara jame tayaputaewa Cristo. Matautano be yaputaepin peayapusu itorobiwa, po peayapusu itorobi coyenewatha Jesús asu exainchi barapo petupae cuiru coyene weya. Bequein ichamonae atene neexanaena, icha Cristo ichichi xua poxonae atene exanatsi ichamonae, daichitha awiya cataunxuae ichichipan xua taexanaewa pocotsiwa xua Nacom ichichipa. Poxonae Jesús tsitupa jiwi, barapara exana pocotsiwa Nacom ichichipa, jopa exanaeyo xua pocotsiwa bapon pia coutha ichichipa. Xan bara juta ichiya ichichipa exanan xua pocotsiwa Nacom ichichipa. ¹¹ Yawano ichichipan xua baxuan exanaein beya poxonae Nacom asu neexanaena po mataqueitha Nacom asu exanaena petupae cuiru coyene weya pomonae iru pejume cowantsiwixaetsi.

Meje yabara xua po pentoma Nacom pia wanaca catsiwa, junte ma beta waexanaexae

¹² Jopa paebinyo xua xeinan barapo coyene, po coyenyatha xua Nacom asu neexana petupae cuiru coyene weya. Matautano jopa paebinyo xua Nacom bayatha xaniwaicha juntu coyene xanepana neexana xua jopa daxota abe taexanaewa. Daichitha awiya yabara nacuichiya exana ducuaebiyon xua taxeiainexa barapo coyenewa tsipei Cristo Jesús copiya neexana be piamonae jiton tatsin. ¹³ Tamonae pam, pomonae iru painya nejume cowantsixae Jesús, paca tsipaebatsi xua jopa cataunxuae baxua wetsinyo xua tajuntu coyene bara xaniwaicha bayatha nejuntu coyene xanepana exana xua jopa xeiaineyo peabe coyenewiyo. Ichitha bara saya cae coyene exanan. Junte mainan xua pocotsiwan bayatha exanan, saya meisa bichocono yabara nacuitan pocotsiwa bexa tsane xeiain. ¹⁴ Bichocono ajuntuyapusu exana ducuaebiyon xua pocotsiwa Nacom ichichipa, beya taxeiainexa po pentoma pocotsiwa Nacom naca catsina poxonae naca wabina pia nacua beicha caemonae wayawa jinompaexae Cristo Jesús.

¹⁵ Daxita waxainchi, pomonaetsi xua bayatha beta yabara yaputaetaepinchi wajume cowantsiwa Nacom, waxainchi bewa yabara nanta xeiainetsi po coyene xua waxainchi

cataunxuae abũ jopa xeinaetsi po jũntũ coyene xua yatsicaya xanepana xua daxota jopa abe exanaetsi. Daichitha icha paxam, icha coyeneya payabara nanta xeiname pocotsiwa xuaunxuae paca tsipaebatsi, bapoxonae Nacom yabara paca yaputane exanaena baxua. ¹⁶ Daichitha waxainchi bewa awiya jume cowũnta dubenanaebiyatsi pocotsiwa bayatha Nacom naca yaputane exana.

¹⁷ Tamonae pam, pomonae irũ painya nejume cowũntsixae Cristo Jesús, paexanaponde icha ichin pocotsiwa xua exanaponan. Beta pacui taema poxonae pomonae xua jinompa xua poxonae exanapona, icha pocotsi coyeneya paichin poxonae paca cuidubatsi. ¹⁸ Bayatha matowa paca tsipaebatsi. Anoxuae equeicha paca tsipaebatsi, beya nama wecoyeya paca tsipaebatsi. Paca jeichi: “Pinmonae jinompa pomonae aichaxaibi po diwesi po coyene xua Cristo naetotha tsitũpa jiwi”, paca jeichi. ¹⁹ Nacom barapomonae weraweraca exanaena. Barapomonae saya yabara nanta xeineiba penabanaewa xua mataũtano pocotsiwa Moisés pia peitorobi coyenewatha itoroba xua barapo pexaewa yabara. Barapomonae yabara atsaca pocotsi coyene bequein barapomonae bewa ita aura tsane baxua. Daichitha barapomonae jopa yabara ita auriyo baxua. Saya barapomonae yabara nanta xeina nawita pocotsiwan xua xeina po irathe. Jopa yabara nanta xeinaeyo pocotsiwan xua Nacom nexa. ²⁰ Ichitha nama waxainchi Nacom pia nacia tatsipiwichi. Anoxuae waxainchi ewatatsi xua patopaetsica itaboco wetsica pon jiwi Pecapanenebiyaein, pon jiwi Pecanamataxeinaein, bapon Jesucristo. ²¹ Wapepon, po pepon jopa wũnaetsi, po pepon atene yawa xua tũpaena bapon equeicha icha pepon naca exanaena, pocotsi pepon icha Cristo ichi xua po pia pepon tatsi bichocono xeina pexeinya peitũpanae coicha, xua po pia pepon tatsi jopa ateneyo, yawa xua jopa tũpaeyo. Baxuan Cristo nacata exanaena pia peayapusũ itorobi coyenewatha, po peayapusũ itorobi coyenewatha itacũpatsi xua daxita pecanamataxeinaewa.

4

Meje yabara xua Pablo jei: “Ataya pajũntũ coyene weiweineibare pon jiwi Pecanamataxeinaeintha”, jei

¹ Tamonae pam, pomonae irũ painya nejume cowũntsixae Cristo Jesús, paxam pomonae bichocono tapaca caantobewichi pam. Bichocono ichichipan xua tapaca cataewa tsainchi. Paxam pomonae bichocono pana nejũntũ coyene weiweina exaname. Mataũtano paxam pomonae Nacom necata painya nejume cowũntsinexa Jesustha xua be tana nematomatsiwa, xua neyaputane exana xua bara exanan pocotsiwa xanepana poxonae tanacuitan bapon. Tamonae pam, paxam pomonae tapaca caantobewichi pam. Awiya beta pajume cowũnta dubenanaebiyama pon jiwi Pecanamataxeinaein.

² Itoroban powa pewũn Evodia, ichawayono xua powa pewũn Síntique xua barapowayobe equeicha penaita coxonaenexabe xua be yatsicaewa caemonae jitowayo penaexanaenexabe pon jiwi Pecanamataxeinaein piamonae jitowayobexae tatsi. ³ Xam ponxaem yatsicaewa tanebarũ nacuichim Nacom Pejume Diwesi, caitorobatsi xua barapowayobe neyawenaenexa tsane. Barapowayobe bayatha neyawenabe poxonae cueicueijan Nacom pia pecapanenebiyae diwesi. Barapoxonae barapowayobe, irũ Clemente irũ ichamonaeno daxita barapomonae daunweya nebarũ nacuita. Daxita barapomonae wũn dubatsi diborotha po diborotha xua Nacom capanenebiya tsaibi jiwi xua jiwi pecatsibeibinexatsi peajũntũyapusũwa poxonae wũn dubeiba barapo diborotha, xua Nacom pia diboro tatsi.

⁴ Paca jeichi: “Ataya patsita jũntũ coyene weiweineibare pon jiwi Pecanamataxeinaein”, paca jeichi. Equeicha paca jeichi: “Ataya patsita jũntũ coyene weiweineibare”, paca jeichi. ⁵ Barabũ beta pajinompaname xua daxita jiwi painya pia paca yabara yaputaenexa xua bara paxam pomonae pejũntũ coyene xanepanaewi pam, tsipei imoxoyo patopaetsica pon jiwi Pecanamataxeinaein.

⁶ Jopa payabara nanta xeinaeinde nawita pocotsiwa ba paca jũntũ deideije exana. Jame maisa Nacom patsipaebare daxita coyenein yabara. Nacom yabara

pawuqueibare daxita coyenein. Matautano payabara jacobebare Nacom poxonae pocotsiwan paca catsibeiba pocotsiwan xua panantawenoname. ⁷ Barapoxonae Nacom paca juntu coyene junte miya jinompa exanaena. Barapo junte miya jinompae coyenewa jiwi ba jopa yabara yaputaeyo, tsipei bichocono pexeinya coyenewa. Barapo junte miya jinompae coyenewa paca juntu coyene eenaena. Matautano paca eenaena xua daxota beta painya nenanta xeinaewa tsane. Baxua paca cana exana paca necayawa jinompaexae Cristo Jesús.

Meje yabara poxonae Pablo jei: “Payabara nanta xeinare daxitan pocotsiwan xua wnae”,
jei

⁸ Tamonae pam, pomonae iru painya nejume cowuntsixae Jesús, paca tsipaebatsi nama anoxuae pocotsiwa xua tabu ducua paca tsipaebatsi pocotsiwa xua nama wetan. Payabara nanta xeinare daxitan meje xuaje po coyenein: po coyenein xua pexainyewian, matautano po coyenein xua jiwi yabara nanta xeina xua pexanepanawian, matautano po coyenein xua xaniwaichiya pecana exanawian, matautano po coyenein xua Nacom petsita exanawatsi pexeinya juntu coyenein, matautano xua po coyenein pexeinya peitupanae coyenewian, matautano po coyenein xua jiwi peyabara baru cui itura jinaewian. Matapainya payabara nanta xeinare daxita coyenein po coyenein Nacom tsita coyene xanepanatsi, matautano daxita po coyenein jiwi bewa wnae jainchina xua barapo coyenein pexanepanaxae.

⁹ Paexanaponde po coyene xua paca cuidubatsi xua daxota panejume jejum. Paexanaponde po coyene xua panejume taneme xua cueicueijan. Matautano paexanaponde po coyene xua pana necui taneme xua exanan. Bara baxuan paexanaponde bapoxonae Nacom pon peyawa jinaein junte ma pepoponae juntu coyenewa, bara bapon paca yawa poponaena.

Meje yabara paratixi po paratixi jiwi cata Pablo nexa

¹⁰ Tsita juntu coyene weiweinan pon jiwi Pecanamataxeinaein xua matapainya equeicha tapana neyabara nanta xeinaewam. Bayatha bequein pana neyabara nanta xeiname, daichitha jopa paca itacupaeyo xua tapana neyawenaenexam. ¹¹ Jopa paca tsipaebichi xua ichawa yabara pocotsiwa tanantawenonaewa, tsipei bayatha tacoutha yabara nacuiduban xua junte ma tapoponaewa pocotsiwa xua xeinan bequein inta acoibi ichawa. ¹² Yaputan xua beta poponan poxonae bequein be pon taacopeibin. Matautano yaputan xua beta poponan poxonae nawita taxeinain. Bayatha nacuiduban xua junte ma tapoponae coyenewanexa tsane bequein tonsanan, yawano bequein ichacuitha jainpeiban. Nacuiduban xua junte ma tapoponae coyenewanexa tsane bara bequein xeineiban beyacaincha pocotsiwa tanantawenonaewa, yawano ichacuitha bequein inta aibi pocotsiwa xua tanantawenonaewa. ¹³ Neitacupa xua daxita taexanaewa tsipei Cristo necata pia peantuyapuswa. ¹⁴ Daichitha paxam bichocono wnae painta exaname poxonae pana neyawenama tapana nesiwanxae poxonae ichamonae jopa xanepanaya necana exanaeyo.

¹⁵ Paxam Filipos tomarapiwi pam, payaputaneme poxonae copiya tamropata pitaban xua cueicueijan Nacom Pejume Diwesi, barapoxonae meisa paxam paratixi pana necataponame poxonae Macedonia nacua weya ponan. Icha tomarapiwi pomonae pejume cowuntsiwi jopa necatsiyo paratixi. Barapo paratixi pana necataponame be pentoma painta exaname yabara tapana netsipaebinxam po coyene xua tapaca cayawenaewatsi painya nejume cowuntsiwanexa Nacom. ¹⁶ Poxonae cataunxae Tesalónica tomaratha poponan, paxam painta itorobame paratixi. Bapoxonae equeicha cotacaya painta itorobame icha paratixi xua tacana nantawenonaenexa. ¹⁷ Paca tsipaebatsi baxua jopa poxoruyo xua saya taichichipaexae equeicha xua tapanecatsiwam tsane icha paratixi. Jame apara poxoru ichichipan xua paxam bexa paxeinaename po pentoma xua Nacom paca catsina tapana neyawenaemxaem. ¹⁸ Bayatha matowa pana necatame beyacaincha pocotsiwa xua nantawenonan. Pocotsi paratixi painta itorobame xua inta capona Epafrodito, baxua inta bichocono nawita beyacaincha xua pocotsiwa nantawenonan.

Barapocotsiwa pocotsiwa painta itorobame, Nacom bichocono ichichipa. Nacom baxua ichichipa icha ichi poxonae bichocono ichichipa po petuxusi tuxueiwa jiwi tuxusi exana Nacom nexa, yawa xua poxonae po duwei petautsiwa xua tuxusi exana Nacom nexa. Barapo pecana exanae coyenewabe Nacom tsita coyene xanepanatsi, yawa jũntũ coyene weiweina exanatsi. ¹⁹ Tanacom daxita paca catsina pocotsiwa xua panantawenoname, tsipei bapon bichocono copei pexeinaein pocotsiwa xua bichocono peitũpanaewa. Paca catsina baxua painya neyawa jinompaexae Cristo Jesús. ²⁰ ¡Barabũ jiwi, Nacom pon Waxa, ataya wũnae jainchinchí! Je, bara ichi tsane.

Meje yabara xua Pablo najume weta barapo carte

²¹ Painta jacobare pomonaе baxotiya jinompa pomonaе Jesucristo pejume cowũntsiwichi pomonaе yatsicaewa Nacom piamonaе tatsi. Irũ pomonaе nebarũ jinompa xote pomonaе xua irũ pejume cowũntsiwichi Cristo Jesús, barapomonaе paca jacoba. ²² Irũrũ daxita pomonaе Jesús pejume cowũntsiwichi pomonaе yatsicaewa Nacom piamonaе tatsi, pomonaе po tomarathepiwi, barapomonaе paca jacobarũ. Irũrũ paca jacoba pomonaе romanomonaе itorobiya pia pepa peewatsinchi pia botha tatsi tanacuitatsi. Barapomonaе bichocono paca jacoba, beyacaincha ichamonaе poxonaе paca jacoba.

²³ Barabũ Jesucristo, pon Wanacanamataxeinaein, daxita paxam paca jũntũ coyene yawenaena pia paca necaantobexae.

Baja Pablo.

Meje Po Carte Pablo Tatina, Colosas Tomarapiwi Tatinatsi

Meje yabara poxonae Pablo tamropata pitaba xua tatina pomona Colosas tomarapiwi tatinatsi

¹ Xan, Pablon, iru Timoteono, pon be painya neyapin jiton patsicotaneme xua xanno iru pon be tayapin tsicotan. Baponbe, panbe, paca jacobatsi. Xan, Pablon, Cristo Jesús pia peitorobiwi tatsi jiwanan xua Nacom peichichipaewaxae. ² Barapo carte pacata tinatsi pomona painya neenaewi Colosas tomaratha, pomona Cristo pajume cowuntame, iru pomonaeno yatsicaewa xanepanaya Cristo peitabaratha painya nejinompaewino. Barabu Nacom pon Waxa, paca yawenaena pia paca necaantobexae, yawano juntema jinompa paca exanaena.

Meje yabara poxonae Pablo Nacomtha tawuca pomona Jesús pejume cowuntsiwi

³ Poxona Timoteo panbe pacata wuqueibatsi Nacomtha, pon Jesucristo Paxa tatsi, pon Wanacanamateaxinaein, pajan tsaibinbe: “Nacom maisa pajuntu coyene weiweinanbe xua barapomonaecajume cowuntsixae”, pajan tsaibinbe. ⁴ Baxua papaebeibanbe tsipei bayatha Timoteo panbe Epafras pana netsipaeba. Epafras namchi: “Colosas tomaramona Cristo Jesús jume cowanta, —jei— yawa antobe ichamonaeno pomona pejume cowuntsiwi Jesucristo”, jei Epafras. ⁵ Paantobem ichamona, pomona pejume cowuntsiwi Jesús, yawa xua pajume cowanta dubenanaebiyame. Baxua paexaname tsipei payaputaneme xua bexa tsane Nacom paca catsina xua pia nacuatheicha xeina, xua peantuyarusuwa po peantuyarusuwa jopa weraweracaeyo. Caena bayatha yabara paca tsiwunaeya muxu duta poxona Nacom Pejume Diwesi pajume taneme. Baxua anoxuae cataunxuae paewatame. ⁶ Po diwesi xua pajume taneme Nacom pia pecapanenebiyae diwesi, barapo diwesi pejume xainyeiwa. Matautano barapo diwesi jiji foforotapoinchi xua jume cocowantapona, daxita carepaya tomarantha barapo cae pin nacuathe. Icha paxam paichim bayatha, barapo diwesi paca foforotapona xua pajume cocowantaponame poxonae aena pajume taneme barapo diwesi. Barichi payaputanemeno xua Nacom paca necaantobewa xua awiya cataunxuae paexanaponame. ⁷ Barapo Nacom pia pecapanenebiyae diwesi xaniwaicha caena bayatha Epafras paca tsipaeba. Bapon Epafras paantobein. Bapon Epafras xaniwaicha Cristo yabara cueicueijeichi. Bapon baxua painta exanapona xua pana yawenapona xua Timoteo panbe pata ecaexaebe jiji pecubi botha. ⁸ Epafras xote patopa. Bapon Epafras Timoteobe, pana netsipaebabe xua pinae paxam paantobem daxita pomona Jesús pejume cowuntsiwi Nacom pia Pejumope tunaxu tatsi painya nepaca yawenaexae.

⁹ Bara caena poxonae aena, poxonae pajume tanbe xua pinae Jesucristo pajume cowuntame, pomona Colosas tomarapiwi pam, Nacomtha pacata wuqueibatsi. Jopa seica paexaneibinyobe xua pacata wuqueibatsi Nacomtha, pajan tsaibinbe: “Nacom, yawende Colosas tomarapiwi yabara neyaputae exanaenexa xua peexanaewa tsane pocotsiwa ichichipame. Yawa care barapomonaecajume daxita peyaputae coyenewan po coyenewan nejumope tunaxu cata jiwitha”, pajan tsaibinbe Nacomtha. ¹⁰ Icha paxam payaputaneme po coyene xua pocotsiwa Nacom ichichipa pon jiji Pecanamamateaxinaein xua pocotsiwa painya neexanaewa, bapoxonae beta pajjinaponaename Nacom pia paca necayawenaenexa. Bara be Nacom pia pexui pana natsicotaneme tsipei baxua Nacom unthuthu jopa xua unthuthu weiweina. Jiji pafoforotaponame xua Jesucristo jume cocowantapoinchi. Daxota baxua Nacom unthuthu jopa xua unthuthu weiweina. Paca anthuthuyarusuwa exana. Matautano yabara paca yaputane exana xua painya neexanaewa tsane pocotsiwa Nacom ichichipa. ¹¹ Timoteo iru xanno Nacomtha patsipaebibeibanbe xua Nacom pia paca catsinexa tsane pia peitupanaewa xua peayarusuwa, icha Nacom ichi xua xeina barapo peitupanaewa xua peayarusuwa. Barapo peayarusuwa paca yawena xua pajumefebame xua poxonae ichamona paca itoroba xua abe painya neexanaewa.

Yawa paca yawena xua jũntũ coyene weiweinaya paexaname xua jopa paaitaconaem, xua poxonae bequein ichamonaē abe pacata exana. ¹² Poxonaē Nacom patsipaebame, jũntũ coyene weiweinaya pajacobare tsipei bapon Nacom paca yabara jũntemaina abe painya neexanaē cuiru coyenein. Bapoxonaē Nacom tsita xanepanatsi painya jũntũ coyenein barompaya painyawan painya nexainaenexa pocotsiwa Nacom paca jũntana jeba pia nacuatheicha xua painya nejume cowũntsixae bapon. Paca catsibina poxonaē paxam bara xoteicha papatsiname. ¹³ Waxa, Nacom, wanaca capanepaexae Satanás pia peayapusũ itorobi coyene weya tatsi, daxota anoxuae cauri pia pentacaponaein tatsi jopa equeicha cana exanaetsi xua wanaca canamataxeinaewa tsane. Apra jame Nacom yatsicaewa naca cana exana xua bapon piamonaē tatsi naexainchi pomonaexaetsi xua Pexanto tatsi pon Jesús itorobiya naca ewata, po Pexantoxae bichocono antobe. ¹⁴ Nacom Pexanto tatsi naca capanepa, naetotha wanaca tsitũpaexae. Daxota daxita abe waexanaē cuiru coyenein Nacom naca cayabara jũntemaina.

Meje yabara xua waxainchi pomonaetsi jũntema jinompatsi Cristo wanaca tsitũpaexae naetotha

¹⁵ Nacom bapon peinya pepoponaēin, pon jopa pataeinyo. Ichitha Jesucristo bapon paxa yatsi itapeinya xeina, pon yatsicaewa patan. Caena bayatha poxonaē aena bapon Jesucristo popona xua pewũnaeya poxonaē Nacom daxita forota barapo cae pin nacuathe. ¹⁶ Nacom daxita forota barapo cae pin nacuathe poxonaē Jesucristo saya paxa taexana. Yawa daxita forota itabocotha. Mataũtano forotano xua jopa penatsita itapeinya xeinaewa, xuano xua penatsita itapeinya xeinaewa. Nacom exana daxita peitorobi coyenewan xua pomonaē pentacaponaei nexa. Ichamonaē jiwi itoroba nawita, ichamonaē be conotha itoroba jiwi, daichitha daxita barapo coyenein Nacom exana xua barapo peitorobi coyenein. Jesucristo penacui yaputaexae xua ichichipa daxota daxita forota yawa bapon nata exana. ¹⁷ Caena bayatha bapon Cristo ataya popona poxonaē cataunxuae jopa bapon foforotaponaeyo daxita. Cristo canamataxeina daxita daxota nacua xanepanaya wũnaeya ducua. ¹⁸ Daxita pomonaē Cristo jume cowũnta be caein naexana. Bapon Cristo barapomonaē pia Pecanamataxeinaēinchi tatsi. Baxua caunuta xua Cristo canamataxeina barapomonaetha pomonaē pia pejume cowũntsiwixaetsi. Bapon Cristo antũjumopeyapusũ exana pomonaē pejume cowũntsiwichi. Bapon Jesucristo copiya asũ nanta canaexanatsi petũpaewatha. Daxota bapon canamata exanatsi xua canamataxeina daxita coyenein. ¹⁹ Nacom, Waxa, unthũthũ weiweina bichocono poxonaē Pexanto cui tane xua cui jũpatsi Pexanto tsipei daxita xeina icha bapon ichi xua daxita xeina. ²⁰ Daxita pomonaē jinompa po cae pin nacuathe ita coxanatsi Nacomtha. Irũrũ pomonaē jinompa athabeicha ita coxanatsi Nacomtha. Daxota Nacom Pexanto itoroba xua petsitũpaenexa naetotha pomonaē po cae pin nacuathepiwi, irũrũ pomonaē athabeicha jinompa nexa, xua bapoxonaē Nacom peita coxonaewa tsainchi yawa petsita najũntũ coyene xanepana exanaewa tsainchi.

²¹ Paxam copiya Nacom jopa paita coxonaem, be pomonaē penanapaincha jinompaewi patsita naexaname Nacomtha. Yawa Nacom pia peaitafaetabi jiwichi pam, abe painya neexanaē dubenanaebiyaexae painya jũntũ coyenewatha. ²² Ichitha nama anoxuae payaputaneme xua Cristo bayatha tũpa naetotha xua poxonaē bara jiton cuiru coyeneya. Daxota anoxuae Cristo paca cana exana xua Nacom paita coxoname pomonaē pam pomonaē copiya Nacom pia peaitafaetabi jiwichi pam. Poxonaē Cristo tũpa pia paca exanaenexa pomonaē pam pomonaē Nacom peitũtha tatsi penthũthũ cui xanepanaē jiwi pam. Mataũta paca cana exana xua ichamonaē painya jopa nepaca yabara paēbiwa xua abe painya neexanaewa. ²³ Cristo paca exana xua xanepanaya painya nejinompaewa tsane Nacom peitabaratha. Baxua paca cana exana icha beta pajume cowũnta dubenanaebiyaeneme Nacom pia pexeinya pecapanenebiyae diwesi jume. Yawa jopa papentsinde xua paewatame xua pinaē Nacom paca catsibapaēba, xua bayatha pajume taneme. Nacom paca catsina pocotsiwa pia nacua beicha xeina xua peantũyapusũwa xua jopa weraweracaeyo xua caena bayatha yabara paca tsiwũnaē muxu duta Nacom.

Barapo pexeinya pecapanenebiyae diwesi bayatha Jesucristo pia pejume cowuntsiwi tatsi cueicueijeji xua daxita nacuan yajupaya. Iru xan, Pablon, paebaponandu barapo diwesi.

Meje yabara poxonae Pablo Nacom Pejume Diwesi tsipaeba pomonaetha pomonaes Jesucristo pejume cowuntsiwichi

²⁴ Xan, Pablon, anoxuae juntema weiweinaya poponan bequein neperaxa exana paxam nexa. Icha Cristo ichi poxonaes peraxa exanatsi jiwi nexa, barichin xan neperaxa eexanaponaena paxam nexa pomonaes Cristo pijimonaes pamxaem. Atenein beya poxonaes wetsin pocotsi coyene cuiru Cristo bewa ajuntucoyenetane tsoxonaes tsane pomonaes pia pejume cowuntsiwichinexa. Bapoxonaes Cristo pia coutha paebina xua xan equeicha jopa atenein tsane. ²⁵ Xan, Pablon, Nacom Pejume Diwesi tacueicueijeji jiton tana neitorobixae Nacom tapaca cayawenaenexatsi xua iru daxita carepaya jiwi pejume taetaeponaewa tsane barapo Nacom Pejume Diwesi. ²⁶ Barapo diwesi caena bayatha Nacom moya yawun xeina xua jiwi jopa yabara yaputaeyo. Ichitha anoxuae barapo diwesi matapainya Nacom yabara yaputane exana pomonaetha pomonaes pejume cowuntsi jiwixaetsi. ²⁷ Barapo pexeinya jume diwesi Nacom caena bayatha moya yawun xeina xua jiwi jopa yabara yaputaeyo, ichitha anoxuae ichichipa iru yabara yaputane exana barapo pexeinya jume diwesi pomonaetha pomonaes jopa judiomonaes naexanaeyo. Barapo Nacom moya peyawun xeinaewa xua apara Cristo paca yanaba. Daxota paewatame xua bexa Cristo paca catsina, xua caena bayatha yabara paca tsiwunaes muxu duta Nacom.

²⁸ Daxota pacueicueijan barapo diwesi po diwesi xua Cristo yabara. Daxita jiwi pamuxu jan. Daxita jiwi pacuiduban Nacom pia peyaputae coyenetha tatsi, tsipei paichichipan xua Nacomtha xaniwaicha jajuntu coyene xanepanaya patsina xua be caemonaes penaexanaewa tsane Cristotha. ²⁹ Daxota daunweya nacuitan Cristo tana necatsixae pia peayapusawa xua bichocono ayapusu tacueicueijejinexa tsane Nacom Pejume Diwesi poxonaes barapomonaes tsipaeban. Barapo peayapusawa jiwi tsita itutan poxonaes daunweya nacuitan.

2

¹ Baxua paca tsipaebatsi pomonaes painya nejume cowuntsiwa Jesucristo tsipei ichichipan xua painya neyaputaewa xua bichocono tapaca antobewatsi. Daxota bichocono pacata wawucaponeibatsi Nacomtha. Iruno pomonaes Jesucristo jume cowunta, pomonaes jinompa Laodicea tomaratha, barapomonaes iru tawucan. Iruru daxita ichamonaes pomonaes jopa netaeyo, tawucan. ² Antuyapusuya Nacomtha pacata wucatsi, xua painya nepaca cajuntu coyene tsacarabi exanaenexa xua juntema painya nejinompaenexa xua caemonaes nantiya painya nenaantobenexa. Matautano pacata wucatsi xua painya neyaputaenexa xua daxita peyaputae coyene xua daxota painya neyaputaewa tsane po coyene xua copiya Nacom moya yawun xeina po coyene xua Cristo yabara. ³ Cristo pon peyaputaein, pon daxita coyenein yaputane. Icha caein jiwana paxam, icha bapon ichichipa xua pexeinaewa barapo peyaputae coyene, bu jame wuca. ⁴ Baxua paca muxu jeichi, tsipei jopa ichipaeinyo xua ichamonaes paca cui caranababa xua naerabiya paca muxujainyaba po jumeintha xua naemata beta paeba. ⁵ Paca yabara cananta xeineibatsi, be natsicotan xua be paca baru popoinchi bequein taju ecan. Juntu coyene weiweinan xanepanaya jume cowuntsiya painya nejinompaexae Cristo, yawa juntu coyene weiweinanno xua painya nenacui xainwaetsiya jinompaexae Cristotha.

Meje yabara xua jiwi pena juntu coyene xeina Cristotha

⁶ Mexeya poxoru painya neyabara jume cowuntsixae xua pinaes Jesucristo pon painya Nepacacanamataxeinaein, daxota bewa bara paraichim bewa caemonaes pana naexanaem Cristotha xua xaniwaicha painya nejinompaenexa bapontha. ⁷ Paitacoxonaya yaputaeponde Cristo painya rewunaein jiton. Matowa yabara pana nacuidudubaponde Cristo pocotsiwa bayatha exana. Matowa paexande xua pocotsiwa bapon paca itoroba.

Mataropeicha payaputaeponde xua pexainyeiwa jume, icha matha ichi xua ichun paca cuiduba poxonae pajume cowuntame Jesucristo. Yawa matowa pajande: “Nacom, maisa pajantũ coyene weiweinan xua painta exaname”, pajan tsaibinde.

⁸ Dota pam tsipei jopa ichipaeinyo xua ichamonaе paca cui caranababa xua naerabiya paca muxujainyaba xua painya neexanaewa tsane xua naemata beta paeba. Pomonaе xua paca cuiduba pia peitorobi coyenein, baraxua apara jopa Cristo pia peitorobi coyenewa tatsi. Apara saya pon pepawi, bapon pia peitorobi coyenein tatsi, apara saya nacua pia peitorobi coyenein tatsi.

⁹ Nacom Pexanto cana nayawa exana xua Cristo xeina daxita i dapo coyenein, po coyenein Nacom xeina. Barapo coyenein bapon Cristo xeina pon pepa pebin naexana Nacom Pexanto tatsi. ¹⁰ Apara Cristo piamonaе tatsi pam. Cristo, bapon compa yatsicaya Pecanamataxeinaein cana exanatsi xua daxita canamataxeinatsi pomonaе itabocotha peitorobiwi pia peayapuswatha. Poxonaе Cristo panantautame, jopa ichauyo pacata seicaeyo xua paxeiname xua pocotsiwa Cristo junteма popona paca exana. ¹¹ Paxam anoxuae icha junte coyene paxeiname Cristo painya nejume cowuntsixaemxae, yawano poxoru painya nenantũ cui barapentsixaemxae xua abe paexaname. Icha judiomonaе ichi xua nawi thaba ichaxota pebiwi nareixacaena bapana baxua jopa paca junte coyene capanepae abe painya neexanae cuiru coyenein weya. Jame xua Jesucristo naetotha tupa, baxua jame paca unthuthu coyene capanepa abe painya neexanae cuiru coyenein weya. ¹² Poxonaе ichun paca bautisaba, be paca muthutha penta, icha Cristo ichichi poxonaе muthutha xotsi. Bara paca juta ichi. Yawa poxonaе xua pamatawunname be equeicha asu pajinompame, icha Cristo ichichi poxonaе Nacom asu exana Pexanto poxonaе equeicha itowan popona. Bara paca juta ichi painya nejume cowuntsixae Nacom. ¹³ Caena bayatha paxam jopa paichichipaem xua painya neexanaewa pocotsiwa Nacom paca itoroba poxoru saya abe painya neexanae jiwi pam. Daxota Nacom be pomonaе pewerapae jiwi patsita jinompame. Saya u abe peexanae cuiru coyenein painya nenanta xeina dubenanaebiyaexaemxae, poxoru saya abe painya neexanaewi. Baxua paexaname poxoru barapo peabewa paca itata cadopiteiba xua abe painya neexanaewa tsaibi tsane. Jopa Nacom pajeichim poxoru paxam barapocotsimonaе pam, pomonaе jopa judiomonaе naexanaeyo pam po judiomonaе nawi thaba ichaxota pebiwi nareixacaena, Nacom paca exana xua anthuthucoyenesuya painya nejinompaewa xua Cristo painya neyawa jinompaewa. Bapon Nacom nacata juntemaina xua daxita abe waexanae cuiru coyenein. ¹⁴ Nacom jopa naca yabara paebiyo xua abe exainchi poxonaе bara bequein jopa exanaetsi po peitorobi coyenein judiomonaе exana xuano xua naca cui itoroba xua po peitorobi coyenein bequein Nacom itoroba. Daxota Nacom jopa naca yabara paebiyo xua abe exainchi tsipei Cristo naetotha cobe matatabarutatsi xua pentoma nacata exana xua wanaca capanenebiya exanaenexa abe waexanae cuiru coyenein weya. ¹⁵ Poxonaе Cristo naetotha tupa, Cristo pecui pawi cana exana po pentacaponae wi xua abe peexanaewi xua barapomonaе peamanayabixaetsi. Daxota barapomonaе jopa xeinaeyo peitorobi coyene xua peayapusu coyene. Pin bicheito itabaratha Cristo aura exana pentacaponae wi. Anoxuae Cristo pentacaponaein exanatsi xua daxita barapo jiwi pecanamataxeinaenexatsi.

Meje yabara xua jei: “Itapeta payabara nanta xeinare xua pocotsiwa Nacom juntana jeba jiwi, pia nacuatheicha”, jei

¹⁶ Daxota dapon ajibi pon itacupatsi xua painya nepaca yabara paebiwa xua abe painya neexanaewa xua pocotsiwa painya nexaexae, xuano xua pocotsiwa painya neapaexae. Matautano bapon jopa itacupaetsi xua painya nepaca yabara paebiwa xua abe painya neexanaewa po matacabitha poxonaе jiwi tsinacaetuta pin pexaewa xua penabanaewa tsane, matautano xua paexaname po mataqueitha poxonaе jomocoichato aena equeica, matautano po matacabintha poxonaе pentaquei seicaе matacabin poxonaе jiwi jopa nacuichiyo. ¹⁷ Caena bayatha barapo peitorobi coyenein judiomonaе cuidubatsi Nacom, xua saya u pejume. Barapo jumeintha judiomonaе cuidubatsi Nacom, xua yabara

yaputane peexanaenexa tsainchi pocotsiwa bexa Cristo exanaena. Apará bayatha Cristo patopeica. Icha paxam paichichipame xua painya nenaexanaewa tsane Nacom piamonae tatsi bewa paexanaem pocotsiwa Cristo paca itoroba. ¹⁸ Jopa pacopatsinde xua ichamonae paca yabara paeba xua pana natsiaenae cuentame xua jopa painya neexanaexae icha barapomonae ichi. Barapomonae paca aeba poxoru tane petsita itubi coyenewan po coyenewan xua ichamonae jopa taeyo. Barapomonae paca itoroba xua pepawi jiwi painya nenaexanaewa tsane painya coutha icha barapomonae ichi xua bequein jumexaeya paeba xua pinae pecui pawí jiwi. Matautano barapomonae paca itoroba xua matatsunpiwi wunae painya nejainchiwa tsane icha bapomonae ichi. ¹⁹ Barapomonae jopa Cristo peyawa jinompaewichi, pon Wanacanamataxeinaein xuano xua pon asu jinompa naca exana. Matautano bapon caemonae naca cana exana bapontha wajume cowuntsixae. Nacom naca cana exana xua beta wajume cocowuntaponaewa, icha be pocotsi coyeneya xua pejume diwesitha paeba, icha poxonae jiwi ichi xua poxonae pia pexui wihatapona pexaewa peapatsixae.

²⁰ Tsipei Cristo bayatha paca cayawa tupa. ¿Eta xua came awiya payabara nanta xeiname? Poxonae Cristo tupa bapon paca cana exana xua pana nacapanenebiyam abe painya neexanae cuiru coyenein weya. Matautano paca capanenebiya exana po peitorobi coyene weya xua jiwi exana pia nacapanenebiyaetsi. Poxonae baxua paca cana exana, Nacom tsitatsi xua bara be Cristo payawa werapame. Daichitha awiya paichichipame xua paexaname barapo peitorobi coyene, bequein barapo peitorobi coyenein jopa paca capanepaeyo abe painya neexanae cuiru coyenein weya. Apará saya jame Cristo paca capanepa, naetotha petupaexae. ²¹ Judiomonae ainya peitorobi coyenewan xeina xua pia peitorobi coyenewanxae pocotsiwa be iche: “Jopa jayabinde baxua. Jinya ebato opitha jopa panaeinde baxua. Jopa baxua necobetha pichinde”, jei.

²² Barapocotsi coyenein po coyenein xua jopa bewa pinae paexanaem tsane barapo coyenein, bapana jopa paca yawenae xua beta painya neexanaewa pocotsiwa Cristo paca itoroba. Barapocotsiwa jopa pajume naitaewatsinde, poxoru barapo pecuidubi coyenein apará pia peitorobi coyenein tatsi pomonae saya jiwi. Apará barapo peitorobi coyenewan saya nainya weraweraca icha pexaewa ichi xua nainya weraweraca poxonae jiwi xane.

²³ Paxam pananta xeiname xua barapo peitorobi coyenewa xeina peantuyapusuwa poxoru be paca exana xua xanepanaya pajinompame, yawa be paca exana xua Nacom wunae pajaintame. Barapomonae judiomonae pia abe exaneibi pia coutha naperaxa exaneiba pia junteinaetsi xua abe exana. Ichitha awiya yabara nanta xeina pocotsiwa abe exana poxoru barapo peabewa ita cui dopitatsi xua baxua peexanaewa tsane. Barapomonae saya u pepaebeibi, ichitha cataunxuae jopa xanepanaya jinompaeyo.

3

¹ Tsipei Cristo bayatha paca cayawa asu, daxota panaitomare xua painya neexanaewa xua Cristo pocotsiwa ichichipa. Bapon Cristo eca Nacom pia nacuatheicha tatsi. Paxa pecoxa weya eca bapon. ² Saya panaitomtsiya nanta xeinare Jesucristo pia peitorobi coyenewan tatsi. Jopa payabara nanta xeinaeinde xua copei pexeinae coyenein pocotsiwa barapo cae pin nacuathe xeina. ³ Tsipei bayatha paxam paca cayawa tupa Cristo, daxota jopa paexanaeinde pocotsiwa barapo cae pin nacuathe xeina. Painya neantujumopeyapusuwan jiwi jopa taeyo tsipei Nacom Cristo paca cayawa itacafetsiya xeina pia nacuatheicha. Mexeya poxoru Cristo peyawa poponaexae Nacom, daxota waxainchi poxonae yawa jinompatsi Cristo barapara iruru yawa jinompatsi Nacom. Baxua jiwi jopa paca cui yaputaeyo. ⁴ Bapon Cristo naca jumope antujumopeyapusu exana. Poxonae Cristo equeicha patopaetsica paca cayawa baru naitutsina jiwitha pexeinya peitupanae coichatha.

Meje yabara xua peru juntu coyene, xuano xua pena juntu coyene

⁵ Po coyenein xua jiwi exana pia pepontha bara pana cui barapende. Painya xoba pana nasi cui matacaetame xua paweiweiname. Painya xoba paexaname po coyene abe po

coyene ba aura exana poxonae paexaname. Painya xoba pacui yabara nanta xeiname xua abe painya neexanaewa tsane. Painya xoba paichicha xeicame xua ichamonaе xeina. B̄ bichocono pacui yabara nanta xeiname beyacaincha xua poxonae pacui yabara nanta xeiname Nacom. Baxua icha be poxonae paichim poxonae ibo nacom paantobem beyacaincha xua Nacom paantobem. ⁶ Pomonaе xua barapocotsiwa exana, Nacom casebina barapomonaetha. Bexa tsane Nacom itawetsina xua jopa petapatsiwa tsainchi pia nacuatheicha, poxoru barapomonaе saya jumefeba nawita pocotsiwa Nacom itoroba. ⁷ Icha barapomonaе ichi, xua abe exana, paxam bara paichim caena bayatha barapocotsiwa paexaname poxonaе jopa cataunxuae Jesucristo pajume cowuntsim. ⁸ Ichitha anoxuae daxita pana cui barapende xua daxita peabe coyenein: xua peanaepanae coyenewan, xua juniya pejei coyenewan, xua jopa xanepanaya peexanae coyenein, xua saya abeya peyabara cueicueijejiwa coyenewan, xua peȳȳjejiwa coyenewan. ⁹ Jopa caemonaе nantiya pana namuxuitorobeibinde, anoxuae pena j̄nt̄ coyenein painya nexainaexae tsipei peru j̄nt̄ coyenein bayatha papentame. Tsipei barapo peru j̄nt̄ coyenein jiwi ba ajumebeya cui itorobatsi xua abe exana. ¹⁰ Tsipei anoxuae pena j̄nt̄ coyenein paxeiname tsipei Nacom exana barapo pena j̄nt̄ coyenein. Barapo pena j̄nt̄ coyenein paca ita coxone exanapona Nacomtha. ¹¹ Poxonaе jiwi pena j̄nt̄ coyenein xeina pejume cowuntsixae, bapoxonaе Nacom tsita naj̄patsi, metha bara bequein griegomonaepin tsipae, ir̄ metha bequein judiomonaepin tsipae, ir̄ metha bequein pon xua pewi thabinchi tsipae xua ichaxota pebiwi nareixacaena, ir̄ metha bequein pon jopa pewi thabinchi tsipae xua ichaxota pebiwi nareixacaena, ir̄ metha bequein pon penanapaincha poponaеin tsipae, ir̄ metha bequein pon unupin tsipae, ir̄ metha bequein pon pebusi cui taetaeinchi tsipae, ir̄ metha bequein pon pepu copatinchi tsipae xua bara piawa penata exanaewa tsane. Aparajame meisa bapon Cristo ainya cui peexanaeinchi. Matautano Cristo bar̄ popona pomonaе peantobewixaetsi.

¹² Nacom paca itapeta xua piamonaе tatsi pia paca necaexanaenexa pia paca necaantobexae. Daxota nantanuweya pacui yabara cananta xeinare ichamonaе xua painya neyawenaewa tsane. Yawa betiya payawende ichamonaе. Yawa jopa ichamonaе patsita atsacande xua icha coyene painya neexanaenexa. Yawa jopa paaebinde ichamonaе. Yawa jopa paaitaconae tsaibinde poxonaе bequein ichamonaе abe pacata exaneiba. ¹³ Nantiya pana natsita xeinare po j̄nt̄ coyene xua jopa painya neaitaconaewa xua poxonaе bequein ichamonaе abe pacata exana. Pacui yabara j̄ntemainare poxonaе ichamonaе pacata abe exana, icha Cristo ichi pon jiwi Pecanamataxeinaein exanatsi xua daxita paca cui yabara j̄ntemainare xua abe paexaname. Bara paichinde pana nacui yabara j̄ntemainare daxita pocotsiwa abe pana nata exaname. ¹⁴ Barapo coyenein paexande, yawa mataropeichiya paexandeno xua bichocono nantiya pana naantobeinde. Poxonaе baxua paexanaenexa xua painya nenaantobewam, bapoxonaе xaniwaicha paexaname pocotsiwa bayatha paca itorobatsi xua bewa paexanaem icha paxeiname pexanepanae cui unth̄th̄n. Ichitha poxoru painya nenaantobexae daxota bapo coyenein paexaname. ¹⁵ Saya pacopare xua bara Cristo painya j̄nt̄ coyeneintha pacata itorobina j̄ntema pia pepoponaewa tatsi xua daxota j̄ntema painya nejinompaewa tsane. Tsipei Nacom paca necajainchixae: “Caemonaе painya nenaexanaewi pam”, paca necajainchixae. Paxeinare po coyene xua pajam tsaibi: “Nacom, maisa paj̄nt̄ coyene weiweinan xua painta exaname”, xua po coyene pajam tsaibi.

¹⁶ Po diwesi Cristo paca tsipaeba xua yawa paca itoroba, moya paexaneibare. Icha Cristo ichi xua paca cuiduba pejume diwesitha, barichi xuya ichamonaе pacuidudubaponde. Matautano nantiya pana nacui tsacarabare xua xanepanaya painya nejinompaewa tsane xua poxonaе pajume taneme Cristo pejume diwesi. Nacom patanaxunare daxita weixi. J̄nt̄ coyene weiweinaya patsita naxunare Nacom. ¹⁷ Pocotsiwa paichichipame xua painya nepaebiwa tsane, moya papaebare pocotsi pepaebiwa ichichipa Jesús. Yawano pocotsiwa paichichipame xua painya neexanaewa tsane, moya paexande xua pocotsi peexanaewa ichichipa Jesús pon jiwi Pecanamatax-

einaeinxae. Bapontha pajande: “Jesús inta Axatha jande: ‘Maisa jũntũ coyene weiweinan xua bapon yawename’, inta, jande”, pajande Jesustha.

Meje yabara xua pocotsiwa bewa exanae pomonae Jesucristo pejume cowũntsiwi

¹⁸ Yabuxi pamxaem paca tsipaebatsi. Pajume taema. Painya seuriwi pajume jejan tsaibinde xua paca itorobeiba. Baxua paexaneibare tsipei pejume cowũntsi jiwi pam Jesús pon jiwi Pecanamataxeinaein. ¹⁹ Pebiwi pamxaem paca tsipaebatsi. Pajume taema. Painya seuriwi paantobe tsaibinde. Baxua paexaneibare. Poxonae paitorobeibame, bichocono jopa pajan tsaibinde.

²⁰ Pexui pamxaem paca tsipaebatsi. Painya axa jiwi xua irũ painya ena jiwi beta pajume naitaewateibiya exaneibare pocotsiwa paca itorobeiba tsipei baxua Jesús pon jiwi Pecanamataxeinaein tsita ita cui xanepanatsi. ²¹ Coxiyei jiwi pam, xua saya pebiwi jiwi pam paca tsipaebatsi. Painya xoba painya pexui pamuxutainyabame xua jopa beta exanaeyo. Icha baxua paexaname pexui jopa beta jinompaetsipae.

²² Pomonae amanaya pebusi cui taetaewichi pam, beta pajume naitaeware painya nepacacanamataxeinaewi, pomonae paca itoroba, pomonae xua po cae pin nacuathe jinompa. Jopa metha bepa meisa beta pajume naitaewatsipaem poxonae paca tane pomonae painya nepacacanamataxeinaewi. Apra jame beta painya nejume naitaewatsinexa poxonae pomonae painya nepacacanamataxeinaewi jopa imoxoyo paca taeyo. Jopa metha bepa meisa painya wũnae taexanaetsi pomonae painya nepacacanamataxeinaewi. Apra jame painya wũnae taexanaetsi irũ Jesús pon jiwi Pecanamataxeinaein, tsipei paxam pomonae Jesucristo painya nejume cowũntsi jiwi pam. ²³ Daxita i daxuan xua paexaname xanepanaya paexanare. Saya Ʃ pacananta xeinaeya exaneibare xua Cristo nexa, pon jiwi Pecanamataxeinaein. Jopa meisa saya pananta xeinaeya taexaneibinde xua pon painya nepacacanamataxeinaein, pon saya pepawi, xua saya jiton. ²⁴ Bayatha payaputaneme xua bexa Cristo pon jiwi Pecanamataxeinaein paca catsibina xua paca jũntana jeba pia nacuatheicha xua painya newetsixae pocotsiwa bapon paca itoroba. Paxam Cristo pia petanacuichi jiwichi pam pon yatsicaya jiwi pepa Pecanamataxeinaein. ²⁵ Ichitha pon jopa xanepanaya exanaeyo, bapon xeinaena pentoma xua jopa pexanepanae matoma. Nacom jiwi jopa natoxeincha necotsiyo. Pomonae pebusi cui taetaewichi, barapomonae Nacom nanta jũpaya tane, icha pomonae pentacaponae iwi xua poxonae Nacom nanta jũpaya tane. Daxota pon jopa xanepanaya exanaeyo, bapon xeinaena pentoma xua jopa pexanepanae matoma.

4

¹ Pomonae pentacaponae iwi pam, xanepanaya pacana exande pomonae painya nebusi cui taetaeibi jiwi, tsipei paxam paxeiname painya pepa Nepacacanamataxeinaein itabocatheicha.

² Nacomtha cuitiya pana cui babatsiya wũca dubenanaebiyama. Poxonae Nacomtha pawũqueibame, pajan tsaibinde: “Nacom, maisa pajũntũ coyene weiweinan xua pata tanecatxiwaxaem yawa xua painta exaname beta”, pajan tsaibinde. ³ Yawano painta wũcare Nacom xua Jesús pon jiwi Pecanamataxeinaein pata tana neyawenaewa tsane xua pata cueicueijeinexa bapon pejume diwesi tatsi daxita coyeneintha xua ichaxota pata ichipaewa xua pata paebeibiwa tsane. Barapo diwesi caena bayatha jiwi jopa yaputaeyo tsipei Nacom moya yawũn xeina xua jiwi jopa yabara yaputaeyo. Ichitha anoxuae Nacom ichichipa xua jiwi yaputaena barapo diwesi. Barapo diwesi xua anoxuae apra xua Cristo naca yanaba. Jiwi pecubi botha neeta tana natsipei cueicueijeixae barapo diwesi. ⁴ Painta wũcare Nacom, xua xanepanaya tacaununaya cueicueijeinexa tsane Cristo pijume diwesi xua jiwi beta tana nejume taewa tsane pocotsiwa xua bewa cueicueijan tsane, pocotsiwa Nacom ichichipa.

⁵ Dota pam, xanepanaya beta jume wũnaeya pajinompare, tsipei paca tane pomonae jopa jume cowũntsiyo Jesucristo. Barapomonae patsipaebare xua pocotsiwa Nacom

ichichipa xua poxonaē po mataqueitha cataunxuae paca itacūpa xua painya netsipae-biwa. ⁶Poxonaē ichamonaē patsipaebame, beta xanepanaya patsipaebare. Yawano bewa xanepanaya pajume notsim daxita jiwi.

Meje yabara poxonaē Pablo najume weta po carte

⁷Daxita Tíquico neyabara diwesi paebina xua paca tsipaebina. Bapon be wayapin watsicotaein tsipei Jesucristo pejume cowantsin. Bapon paantobein. Irū bapon Tíquico Jesús pon jiwi Pecanamataxeinaein pia petanacuichin tatsi. Bapon Tíquico neyaweneiba xua Jesucristo pijume diwesi cueicueijejei tsaibi. ⁸Daxota Tíquico painya xainya beya itoroban painya neyaputaenexa xua paxan xanepanaya bara jūntema pajinompan. Yawa bapon paca necacui tsacarabinexa xua jūntema painya nejinompaewa tsane. ⁹Tíquico bara beya pona irū ichūn naponā, pon pewūn Onésimo, pon be pata tayapin patsicotan pejume cowantsixaerū Jesucristo, yawano bapon paantobein. Barapon beta xanepanaya pepoponaein Nacomtha. Tíquico irūno Onésimo, baponbe daxita yabara paca tsipaebina xua pocotsiwa xote exananje.

¹⁰Irū Aristarco tajiton, pon jiwi pecūbi botha paecanbe, bapon paca jacobā. Irū Marcos paca jacobā, pon Bernabé pamoyo tatsi. Tsipei bayatha payaputaneme xua Marcos pepatopaewa tsane. Paca itorobatsi bapon yabara. Icha patopaena bara beya, bapon pantenta weyataeya wabare. ¹¹Irūrū Jesús paca jacobā, pon icha wūnno, Justo. Po acobi poyobe, poyobe xuaunxuae paca jacobā meisa saya barapoyobe neyawena xote poyobe xua jiwana judiomonaē, po judiomonaē Jesucristo pejume cowantsiwichi jiwana. Barapo acobi poyobe neyawenabe xua yabara cueicueijeibe Nacom Pejume Diwesi po diwesi xua Nacom waba jiwi xua petanaexanaenexatsi piamonaē tatsi petajume cowantsixaetsi Pexantotha. Barapoyobe nejūntū cui tsacarababe xua jūntema tapoponaewa tsane. ¹²Irūrū Epafraē paca jacobā, pon painyamonāē jiwana. Bapon Epafraē Cristo Jesús pia petanacuichin tatsi. Bapon jume daunweya pacata wūqueiba Nacomtha, xua Nacom xanepanaya paca necaantūyapusūya daunweya exanaenexa tsane. Xaniwaicha painya neyaputaenexa pocotsiwa painya neexanaenexa, pocotsiwa Nacom ichichipa. ¹³Xan bara yatsicaewa tacui taewa xua Epafraē pacata jume daunweya wūqueiba Nacomtha. Po coyene xua bapon baxua exana xaniwaicha, apara paxam nexa, irū Laodicea tomaramonaepiwi nexa, irū Hierápolis tomaramonaepiwi nexa. ¹⁴Irūrū Lucas paca jacobā, pon jiwi peyawūbin, pon bichocono antobetsi xua jiwi antobe. Irūrū Demas paca jacobā.

¹⁵Painta jacobare Jesucristo pejume cowantsiwichi, pomonaē Laodicea tomaratha ena. Irū painta jacobare powa pewūn Ninfa. Irūrū painta jacobareno pomonaē pejume cowantsiwi, pomonaē nacaetuteiba Ninfa pia botha tatsi. ¹⁶Poxonaē barapo carte payorobame equeicha ichūn pacare xua pecaponaenexa Laodicea tomara beya, xua xuya peyorobinexa barapo carte pomonaetha pomonaē pejume cowantsiwi poxonaē nacaetuta. Yawa poxonaē Laodicea tomaramonaē pia carta tatsi papitame painya xainya berena barapo carta xuya payorobare painya penacaetutsi botha xua Colosas tomaratha. ¹⁷Paxam Arquipo pabarande: “Taema Arquipo, xaniwaicha baxua exande xua bayatha Jesucristo pon jiwi Pecanamataxeinaein pocotsiwa caitoroba xua wūnaeya xanepanaya nacui yabara jume wetsiname xua exaname”, pajande.

¹⁸Xan, Pablon, paca jacobatsi. Baxoyo tacobe couyeje, xoyo tinaxuban. Jopa pajūntemainaeinde xua jiwi pecūbi botha taecaewa. Nacomtha painta wūqueibare. Barabū Nacom jūntema jinompa paca exana pia paca necaantobexae.

Baja Pablo.

Meje Po Carte Copiya Pablo Tatina, Tesalonica Tomarapiwi Tatinatsi

Meje yabara poxonae Pablo tamropata pitaba xua tatina pomonaetha pomonaes Tesalónica tomarapiwi

¹ Xan, Pablon, iru Silvano, iru Timoteo, barapoyobe pan, barapo carte pacata tinatsi. Pacata tinatsi paxam pomonaes Tesalónica tomarapiwi pamxaem pomonaes painya nejume cowuntsiwixae Jesucristo. Paxam pomonaes pam pomonaes painya neyawa jinompaewi Nacom, pon Waxa, xua matautano Jesucristo, pon jiwi Pecanamataxeinaein. Barabu Nacom, Waxa, iru Jesucristo, pon jiwi Pecanamataxeinaein, paca yawena xua juntu coyene weiweinaya painya nejinompaewa tsane xuano beta xanepanaya juntea painya nejinompaenexa.

Meje yabara xua Pablo yabara paeba xua Tesalónica tomarapiwi pinae beta jume cowunta

² Pacata tsipaebeibatsi Nacomtha, pajan tsaibi Nacomtha: “Nacom maisa pajuntu coyene weiweinan xua daxita Tesalónica tomarapiwi beta jinompa, pomonaes pecajume cowuntsiwi”, pajan tsaibi Nacomtha. ³ Pajan tsaibi Nacomtha: “Pata Taxam, Nacom, maisa barapo Tesalónica tomarapiwi bichocono cajume cowuntsiya cata exana dubenanaebiya. Matautano, bichocono necaantobexae daxota ayapusya cata nacuita dubenanaebiya. Maisa bichocono barapomonaes wunaes ewateiba xua Jesucristo pia pepatopeicaewanexa tsane, pon Pata Tanecanamataxeinaein”, pajan tsaibi Nacomtha. ⁴ Paxam pomonaes painya nejume cowuntsiwi pam Nacom. Bara payaputan xua Nacom bichocono paca antobe, yawa caena bayatha paca itapeta pia piamonaes paca exanaetsi. ⁵ Poxonaes Nacom pia pecapanenebiyae diwesi jume paca tsipaebatsi jopa saya meisa u pata jume. Jame apara Nacom pia Pejumope tunaxu tatsi pia peayapusu itorobi coyenewatha tatsi pana yawena, xua pata cueicueijiwa. Barapo diwesi bara xaniwaicha jume cowuntatsi xua barapo diwesi bara pexainyei jume. Bara beta payaputaneme xua bara beta pajinompan painya itutha xua pata paca ajuntucoyenesu exanaenexatsi xua iru juntu coyene xanepanaya painya nejinompaenexa.

⁶ Paxam paexanaponame icha paichin xua pocotsiwa paexanaponan. Matautano beta paexanaponame icha ichi poxonaes beta exanapona pon jiwi Pecanamataxeinaein. Bequein ichamonaes atene paca exana painya nejume cowuntsixae Jesucristo, ichitha barapo diwesi awiya juntu coyene weiweinaya pajume cowuntame. Barapo pejuntu weiweinaes coyene Nacom pia Pejumope tunaxu tatsi paca cata. ⁷ Baxuan painya neexanaexae daxota ichamonaes pomonaes pejume cowuntsiwi Jesucristo, pomonaes Macedonia nacuariwi, barapomonaes exana pocotsiwa paexaname. Iruu baxuan exana pomonaes Acaya nacuariwi. ⁸ Jesucristo, pon jiwi Pecanamataxeinaein, pia pecapanenebiyae diwesi jume pacueicueijam ichamonaetha. Barapo diwesi Macedonia nacuariwi iru Acaya nacuariwi jume tane. Jopa meisa barapo nacuaepiwi bara apara daxita nacuariwi iruu jume taneu. Daxita barapo jiwi paca yabara yaputane xua painya nejume cowuntsiwa Nacom. Daxota jopa panantawenonaeyo xua paca yabara paebatsi ichamonaetha. ⁹ Nama barapomonaes pana neyabara paeba xua paxam panententa weyataeya wabame. Matautano barapomonaes paca yabara paeba xua pinae paxam ibo nacomu po ibo nacomu copiya wunaes pajainteibame pabebam painya nejume cowuntsixae Nacom. Matautano paca yabara paeba xua bapoxonaes patamropatarucupame xua pata taexaname Nacom pia petanacuichiwa tatsi, pon yatsicaewa pepa Nacom, pon ataya tsitecaeya asu pepoponaein. ¹⁰ Matautano barapomonaes pana netsipaeba xua pinae paxam Jesús pawunaes ewatame xua pepatopeicaewa peitaboco wetsica. Barapon Jesús Nacom Pexanto tatsi, po Pexantoxae Nacom asu exana petupae coyene cuiru weya. Barapon Jesús naca napaeaba exanaena Nacom beya, poxonaes Nacom copatsina xua jiwi bichocono peraxa jubebinchi abe peexanaexae.

2

Meje yabara po coyeneya Pablo tanacuita Tesalónica tomarapiwi

¹ Patamonae paxam pomonae pam pomonae iru painya nejume cowuntsiwi Jesucristo icha paxan paichin. Payaputaneme xua tapaca siwa ponaewatsi baxua wuna pata cayawenaexaetsi. ² Poxonae Filipos tomaratha paponan, barapomonae abe pana exana. Yawa tsamu jumeya pana tsipaeba. Bequein barapomonae baxua pana cana exana ichitha payaputaneme xua Nacom pana yawena tapata catsipaebinxatsi barapo Nacom pia pecapanenebiyae diwesi jume. Baxua paexanan xua jopa juntu deideijeya paca tsipaebichi barapo diwesi bequein barapomonae pana jume matawenta. ³ Poxonae paca tsipaebatsi Nacom Pejume Diwesi jopa apara paca tsipaebichi po jume xua jopa xainyeyo xua po jume pejumexaei. Matautano jopa paca tsipaebichi po juntu coyene wajuntu coyene abeya naca tsipaeba. Matautano jopa paca muxujainyabichi xua daxota abe painya neexanaenexa. ⁴ Nama Nacom patsita juntu coyene xanepanan xua xainyeya pata tacueicueijeixae. Daxota Nacom pana neitoroba xua pata tapaebinxea pia pecapanenebiyae diwesi jume. Apara jopa baxua paexanaeinyo xua daxota jiwi pata taneweyataenexa. Jame apara baxua paexanan xua Nacom pata taneweyataenexa. Barapon pana nejuntu coyene yaputane xua poxonae paexaneiban. ⁵ Paxam bayatha payaputaneme xua jopa paca tsipaebichi po jume ba jiwi piraichi jume wunaeya paeba xua bepa pia weyataetsi. Matautano payaputaneme xua jopa pacueicueijanyo pata paratixichi. Nacom bara pana tane xua jopa baxua bara paexanaeinyo. ⁶ Jopa bapana paichichipaeinyo xua jiwi wuna pata tanejainchiwa, xua poxonae metha bequein bara barapomonae pam, ichacuitha xua poxonae bequein ichamonae iru. ⁷ Bequein paxan pana itacupa xua pata caitorobiwatsi, bequein bara Cristo pia peitorobi jiwi tatsi pan, daichitha jopa paexanaeinyo barapo coyene. Nama apara saya bewayo paca yayawenaponatsi, icha be pocotsi coyeneya petsiriwa ichi poxonae pia pexui bewayo wichitiya yayawenapona. ⁸ Bichocono paca antobetsi, daxota paichichipan xua pata paca catsiwatsi Nacom Pejume Diwesi. Jopa meisa xua poxonae daxota barapo coyenewa, bara yawa daxita muxuna paca yawenatsi daxita pata juntu coyeneintha. ¡Bara jopa juniya pata paca antobewatsi! ⁹ Patamonae pam, paxam pomonae iru painya nejume cowuntsixae Jesucristo. Paxam payaputaneme xua bichocono panacuitan pata xeinaenexa pocotsiwa panantawenonan xua pata nabanaewanexa. Jopa juniya panacuiteibinyo matababintha, yawa merawinthano. Daxota jopa panantawenonaem xua pana catame xua pocotsiwa pata nantawenonaewa pata jinompaewanexa. Jopa paichipaeinyo xua paca naci matowa xeina exanatsi poxonae paca cuidubatsi Nacom Pejume Diwesi.

¹⁰ Paxam pomonae painya nejume cowuntsixaemxae Jesucristo pana yaputaneme iru Nacom pana yaputane xua juntu coyene xanepanaya pata jinompaewa painya xantha daxita carepaya paxamtha. Matautano Nacom patsita juntu coyene xanepanan, xua penatsicuentiwa jopa bapon patsita xeinaeinyo. Daxota ichamonae jopa pana neyabara paebiyo xua abe pata pacata exanaewatsi. ¹¹ Matautano payaputaneme xua paca itorobatsi xua beta pajinompame. Matautano yawa payaputaneme xua paca juntu tsacabatsi xua xanepanaya painya nejinompaenexa. Matautano bara payaputaneme xua daxita paxam paca cui matateicatsi xua poxonae bichocono paanthuthutanem tsaibi xua abe painya nepacata exanaexae ichamonae. Daxita barapo coyenein bara paexanan icha be pocotsi coyeneya coxian cana ichiya exana pia pexuitha. ¹² Paca itorobatsi xua bewa beta pajinompae, icha pomonae Nacom pejume cowuntsiwi ichi xua bewa beta jinompaem. Baraxua paexande poxoru Nacom paca wun duba piamonae painya paca exanaenexa xua painya nebaru itorobinxea tsane jiwi Nacom pia peitorobi nacia beicha tatsi. Nacom pia peitorobi coyenewa xua jiwi peitorobi coyenewatsi bichocono peitupanae coyenewa.

¹³ Matautano paxan Nacomtha patsipaeban pajanje: “Nacom maisa pajuntu coyene weiweinan xua Tesalónica tomarapiwi cajume cowunta poxonae patsipaeban jinya

jume diwesi. Barapomonaе nanta xeina xua po diwesi patsipaeban barapara jinya jume diwesi. Jopa nanta xeinaeyo xua barapo diwesi apara saya jiwi pia diwesi”, pajan Nacomtha. Xaniwaicha barapo diwesi apara Nacom Pejume Diwesi painya paca cana exanaexae xua icha jũntũ coyene painya nexeiñawa pomonaе painya nejume cowũntsixae Jesucristo. ¹⁴ Patamonaе pam. Ichamonaе atene paca exana pomonaе painyamaexae. Baxua paca cana exana, icha Judea nacuapiwi ichichi pomonaе pejume cowũntsiwi Cristo Jesús. Daxita barapomonaе ajũntũcoyenetane exainchi pomonaе piamonaexae pomonaе judiomonaexae. ¹⁵ Caena bayatha judiomonaе pia pamo susato jiwi tatsi juteba, pomonaе Nacom pia peitorobi jume pepaebiwi tatsi jutebatsi. Cotacaya icha judiomonaе Jesús pon jiwi Pecanamataxeinaein tũpa exanadutatsi naetotha. Mata-painya anoxuae icha judiomonaе pana yotaba pata penacaetutsi bo weya. Pocotsiwan barapomonaе exana Nacom baxuan jopa tsita xanepanaetsi. Barapomonaе nacana exana pomonaе daxita jiwi pia peitafaetabi jiwichi. ¹⁶ Paichichipan xua patsipaeban Nacom Pejume Diwesi pomonaetha pomonaе jopa judiomonaе naexanaeyo xua irũ Nacom pecapanenebiyaenexa tsane bequein judiomonaе pata tanejume itawetsiwatha tsane poxonaе patsipaeban Nacom Pejume Diwesi. Poxonaе judiomonaе barapo abe peexanaе coyene pana tsixana bapoxonaе opi duta wetsiya exana daxita po peabe coyenewan xua bayatha itacũpatsi xua eexanapona. Daxota anoxuae nama matapainya Nacom bichocono anaepana barapomonaetha. Nacom juntucuru peraxa jũba exanaena barapomonaе, penatsicuentsixae abe peexanaexae bapontha.

Meje yabara xua equeicha Pablo besiwa ponaena Tesalónica tomarapiwi

¹⁷ Paxam pomonaе patamonaе pam, poxonaе bequein paxan tajũ paca cuenta enatsi, xua saya bara caetotha jopa imoxoyo paca taetsi, ichitha paca yabara nanta xeineibatsi pata paca itaxaneibixaetsi. Bichocono paichichipan xua pata paca cataewatsi. ¹⁸ Paxan matowa paichichipan xua caewa pata paca siwa ponaewatsi. Xan, Pablon, ichacuitha matowa nanta xeineiban xua paca siwa poneibinchi. Ichitha caurimonaе pia pentacaponaein tatsi, Satanás, pana necui yancababeiba. ¹⁹ Ichichipan paca siwa ponatsi poxoru paxam pana necana exaname xua pajũntũ coyene weiweinan. Barichi paxam pomonaе pana necana exaname xua pawũnaе ewatan. Barichi paxam pomonaе pana necana exaname xua matowa payabara paeban pocotsiwa xua paexanan poxonaе paca cuidubatsi. Poxonaе Jesucristo pon jiwi Pecanamataxeinaein equeicha caewa patope-icaena bapontha paca yabara paebinchi po coyene xua paxam pana necana exaname. ²⁰ Xaniwaicha paxam pomonaе pam pana nejũntũ coyene weiweina cana exaname. Mataũtano paxan pomonaе pana necana exaname xua paca yabara wũnaе jainchinchi Jesucristo peitabaratha poxonaе bapon peitabaratha tatsi paca barũ umenaeinchi beta painya neexanaexae.

3

¹⁻² Jopa pana itacũpaeyo xua awiya equeicha pata ewatsiwa xua pata paca yabara yaputaewa tsainchi. Daxota juntucuru pananta xeinan xua paitoroban Timoteo pon jume cowũnta Nacom painya pia paca necataenexa tsanebe. Mataũtano juntucuru pananta xeinan xua Silvano compa paecaeinbe Atenas tomaratha. Timoteo paitoroban, tsipei bapon beta tanacuita Nacom nexa. Barapon Timoteo pana yawena poxonaе pacueicueijan Cristo pia pexeinya jume diwesi tatsi. Bapon Timoteo itacũpatsi xua ajũntũcoyenyapũsũ paca cana exana. Mataũtano itacũpatsi xua paca jũntũ cui tsacaba exana xua awiya mataropeichiya painya nejume cowũntaponaenexam Nacom. ³ Bapoxonaе dapon aibi tsane paxam jiwana pon ajũntũcoyenefaetabiya jume cowũnta xua ichamonaе abe peexanaexae bapontha. Paxam bayatha payaputaneme xua daxota bewa ichamonaе atene naca exanaena wajume cowũntsixae Jesucristo. ⁴ Mataũtano poxonaе cataunxuae paca barũ enatsi, paca tsipaebatsi xua daxota bewa ichamonaе naca atene exanaena poxonaе nacata abe exana. Bara baxua bayatha exana barapomonaе icha be pocotsi coyeneya bayatha paca tsipaebatsi, xuano payaputanemeno. ⁵ Tsipei

xan jopa neitacupaeyo xua equeicha taewatsiwa xua tapaca yabara yaputaewa tsainchi, daxota Timoteo itoroban. Bapon inta paca yainyabiya jei: “¿Bara awiya pajume cowunta dubenanaebiyame Jesucristo?” jei. Baxua beyaputaein tajunuwixae xua caurimonae pia pentacaponaein tatsi pon jiwi pejuntu coyene jujutsin paca cui jujutsipa xua abe painya neexanaewa tsane. Bapoxonae pocotsiwa xua pata tapacata nacuichiwatsi jopa paca yawenaetsipae xua jopa xapain painya nejume cowuntsixaem tsipae.

⁶ Ichitha bayatha bapon Timoteo caewa patopa xua bara werena xua painya tomara werena. Bapon yabara pana tsipaeba, bichocono jume xanepana xua pinae awiya pajume cowunta dubenanaebiyame Jesucristo. Matautano yabara pana tsipaeba xua pinae nantiya pana naantobe tsurubenanaebiyam. Matautano yabara pana tsipaeba xua pinae pana neyabara antobeya nanta xeiname matauta xua pinae bepana netaename, icha paichin xua bena tapaca taewatsi tsainchi. ⁷ Patamonae pam, paca tsipaebatsi bequein ichamonae painta ayapube exana yawa pana atene exana, ichitha pajuntu coyene sadujan poxonae pajume tan xua pinae beta pajume cowunta dubenanaebiyame Jesucristo. ⁸ Poxonae paxam awiya beta pajume cowunta dubenanaebiyame Jesucristo, pon jiwi Pecanamataxeinaein, baxua pajuntu coyene sadujan pata jinompaewatha Nacom nexa. ⁹ Anoxuae pana itacupa xua pata jeiwa: “Nacom maisa pajuntu coyene weiweinan Tesalónica tomarapiwi beta necajume cowuntsixae”, pata jeiwa. Paxam pomonae pana nejuntu coyene weiweina cana exaname poxonae Nacom patsipaeban. ¹⁰ Maticabintha, merawinthano Nacomtha pacata wuqueibatsi. Nacom pawuqueiban xua bara pata necopatsinexa xua pata tapaca casiwa ponaenexa tsainchi. Paichichipan xua pata paca yawenaewatsi xua beta painya nejume cowuntsiwa Jesucristo pocotsiwa yabara pacata seica xua painya yabara neyaputaewa Jesucristo.

¹¹ Paichichipan xua Nacom pon Waxa iru Jesús pon jiwi Pecanamataxeinaein pana yawenaena xua pata paca casiwa ponaenexatsi. ¹² Matautano paichichipan xua Jesús, pon jiwi Pecanamataxeinaein, paca cana exanaena xua equeicha bichocono toxechiya paxeinaponaename peantobe coyenewa xua nantiya painya nenaantobexaem tsane. Matautano paichichipan xua barapo peantobe coyenewa daxita jiwi painya tsita xeinaenexa icha paca ichichi xua bichocono paca antobetsi. ¹³ Matautano paichichipan xua Nacom pon Waxa, painya nepaca cana exanaenexa xua bichocono painya nejuntu coyene xanepanaewa. Matautano paichichipan xua Nacom pon Waxa bichocono ajuntu yapusya paca cana exanaena. Bapoxonae paxam bichocono Nacom tsita juntu coyene xanepanaeinchi. Bapoxonaeno jopa patsita natsicuentisim tsane abe painya neexanaexae bapontha. Barapocotsi juta coyene awiya paexanaponaename beya poxonae Jesús pon Wanacanamataxeinaein, piamonae baru patopeicaena daxita.

4

Meje yabara po juntu coyeneya bewa jiwi tajinompae Nacom po coyene xua Nacom tsita xanepanatsi

¹ Patamonae pam anoxuae jume daunweya paca jeichi, yawa paca itorobiya jeichi: “Tsipei Jesús pon jiwi Pecanamataxeinaein, pana necayawa popona daxota paca itorbatsi. Pocotsiwa paca cuidubatsi paxam bara paichinde. Bayatha paca cuidubatsi xua bewa equeicha mataropeichiya payajuntu coyene jinompaem po juntu coyene xua Nacom tsita xanepanatsi. Matautano anoxuae equeicha matowa paexanaponde barapo coyenein, po coyenein xua anoxuae paexanaponaename”, paca jeichi.

² Paxam payaputaneme po pecuidubiwana paca cuidubatsi apara barapo pecuidubiwana Jesús pana itoroba, pon jiwi Pecanamataxeinaein. ³ Xua jame Nacom pocotsiwa ichichipa xua paxam bewa bichocono juntu coyene xanepanaya pajinompae Nacom peitabaratha xua daxota ichamonae patsita itapeinya xeiname xua bara Nacom painya neantobe jiwi pam. Jopa panasi cui exana dubenanaebiyaeinde ichamonae pia seurixitha tatsi. ⁴ Pebin bewa yaputaena xua beta cuicuinaena piseuritha po coyeneya xua Nacom tsita xanepanatsi xuano xua jiwi tsita xanepanatsi. Matautano bapon bewa baru cui itura

jinaena piowa pia peantobexae. Daxita barompaya pebiwi pam bewa iru bara paichim tsane. ⁵ Barichi barapo pebin jopa bewa exanae tsane barapowatha po coyene xua saya pia penaquenta exanaetsi. Tsipei ichamonaе pomonaе jopa Nacom yaputaeyo, barapomonaе abe nanta xeina nawita xua yabuxi yabara xua penaquentsiwa yabara. Barapo coyene painya xoba paexaname. ⁶ Jopa paexanaeinde barapo abe peexanae coyenewatha pontha pon iruru pejume cowantsin Nacom. Jopa bewa papichim barapon piowa tatsi. Icha baxua paexanaetsipame pon jiwi Pecanamataxeinaein bichocono atene paca cana exanaetsipa abe painya neexanaexae. Bayatha barapocotsiwa paca muxuwetatsi. ⁷ Nacom jopa naca wun dubiyo piamonaе wanaca exanaenexa xua abe waexanaponaewa tsane. Jame apara Nacom naca wun duba xua juntu coyene wunaeya wajinompaenexa Nacom peitabaratha tatsi xua daxota ichamonaе tsita itapeinya xeinatsi xua bara Nacom pijimonaе tatsi wanaexanaenexatsi. ⁸ Pon jume itaweta po coyene xua ichun pepichiwa yabara xua ichun piowa tatsi, apara bara bapon jume itaweta Nacom pia pecuidubi coyenewa tatsi. Jopa apara jume itawetsiyo pebin pia pecuidubi coyenewa tatsi. Barapon Nacom paca cata pia Pejumope tunaxu tatsi xua painya yawa jinompaenexa.

⁹ Po peantobewa xeina pomonaе pejume cowantsiwi Nacom, xua nantiya caemonaе penaantobewa, xan jopa nantawenonaеinyo xua yabara tapacata tinaewatsi barapo coyene. Tsipei Nacom pia coya paca cuiduba po coyene xua nantiya painya nenaantobewam tsane. ¹⁰ Bara baxua paexaneibame xua paantobe tsurubenanaebiyam daxita pomonaе jinompa Macedonia nacuatha, pomonaе pejume cowantsiwi Nacom. Ichitha paxam patamonaе pam painya nejume cowantsiwixae Nacom, paca itorobatsi xua awiya mataropeicha paantobe tsurubenanaebiyama equeicha matowa. ¹¹ Bichocono paichichipare xua painya neexanaewa xua po coyene meje: Junteма parubenanaebiyama, xua jopa pana najume matsontsonoba dubenanaebiyam. Matautano painya xoba patsipaeibame ichamonaetha po coyenein barapomonaе bewa exanae. Matautano barompaya painya penacuichiwan pana natsiexana dubenanaebiyama icha be pocotsi coyeneya bayatha paca tsipaebatsi. ¹² Icha barapocotsiwa paexanaename ichamonaе pomonaе jopa Nacom pejume cowantsiwi paca baru cui itura jinaena xua bara beta painya neexanaexaem. Matautano jopa panantawenonaem xua ichamonaе pawcame pocotsiwa xua panantawenoname.

Meje yabara poxonaе Jesucristo pon jiwi Pecanamataxeinaein equeicha caewa patopaetsica

¹³ Patamonaе pam, paichichipan xua painya neyaputaewa po coyene pexainyei coyene, xua petupaewi yabara. Matautano jopa paichichipaeinyo xua be wecoyeya pajinompame icha be ichamonaе ichi pomonaе jopa pejume cowantsiwi Nacom. Barapomonaе be wecoyeya jinompa jopa xanepanaya pewunaе ewatsixae po coyene xua poxonaе petupaewi equeicha asu tsane. ¹⁴ Waxainchi jume cowantatsi xua Jesús tupa naetotha xuano equeicha Nacom asu juina exana. Icha Nacom pexanto cana ichi, waxainchi jume cowantatsi xua Nacom bara cana ichi tsane pomonaetha pomonaе bayatha werapa. Barapomonaе pejume cowantsixae Jesús, poxonaе werapa asu jujuina exanaeinchi xua Nacom exanaena. Nacom barapomonaе baru jujuinya exanaeinchi Jesús, xua Jesús pemuxuna caponaenexatsi Nacom pexainya beicha.

¹⁵ Daxota paca tsipaebatsi pocotsiwa xua Jesús pana netsipaeba pon jiwi Pecanamataxeinaein. Yabara paca tsipaebatsi xua pomonaе cataunxuae asu jinompa poxonaе patopaena pon jiwi Pecanamataxeinaein barapomonaе copiya jopa jujuinya exanae tsainchi xua Jesús pecaxibinexa tsainchi athabeicha. Jame copiya matha asu jujuina exanaeinchi pomonaе bayatha werapa. ¹⁶ Jesús pon jiwi Pecanamataxeinaein patopaetsica peitaboco wetsica. Barapo mataqueitha jiwi jume taena peajumeyapusu itorobi wawaiwa, xuano xua cueicueije matatsunpiwi pia pentacaponaein tatsi, xuano xua trompeta jume busi xubina Nacom pia trompeta tatsi. Bapoxonaе pomonaе Cristo jume cowantatsi xua pomonaе bayatha yacui werapaeya othopa bapomonaе copiya asu jujuina exanaeinchi. ¹⁷ Bapoxonaе cotacaya waxainchi pomonaе cataunxuae asu jinompatsi, pomonaе wajume cowantsiwi Jesús naca cayawa muxuna caetucaetutsiya

caponaena pomonae copiya pewerapaewi. Daxita barapomonaetsi Nacom naca caponaena xua naca caponaena tsaquinaebowatha xua Jesús pon jiwi Pecanamataxeinaein waxaxibiyaenexa tsainchi athabeicha. Baxoteicha ataya tsitecaeya daxita waxainchi Jesús pon jiwi Pecanamataxeinaein, naca baru jinompeibina. ¹⁸ Daxota barapo jumetha caemonae nantiya pana najuntu coyene tsacabare xua painya neyaputaewa tsane, po coyene xua pewerapaewi yabara.

5

¹ Patamonae pam, jopa nantawenonaeyino xua yabara pacata tinatsi matacabi, yawa dapae yabara xua poxonae Jesucristo pepatopeicaewa tsane. ² Bayatha payaputaneme xua equeicha patopeicaena pon jiwi Pecanamataxeinaein. Matautano payaputaneme xua bapon patopaetsica poxonae xapain jopa nanta xeinae tsainchi, icha pon pecaibin ichi xua jemeicha patopa merawitha. ³ Poxonae jiwi jei tsane: “Maisa juntea jinompatsi tsipei daxita wuna tsurucuae”, jei tsane, bapoxonae patopaena jemeicha po dapaetha poxonae jiwi bichocono atene exanaeinchi. Jiwi jopa itacupa tsainchi xua panenebiyaena barapo peatenewa weya. Jiwi atene exanaeinchi icha yabuyo ichi xua bichocono bewa atene tsane xua pexuyo poxonae naexanaena. ⁴ Patamonae pam, paxam jopa dapocotsimonae pam, pocotsimonae jopa jume cowuntsiyo Nacom. Poxonae equeicha patopaetsica, pon jiwi Pecanamataxeinaein jopa pana nabenaecaem tsane, icha jopa be ichiyo poxonae jiwi nabenaeca xua pecaibin jemeicha patopa. ⁵ Paxam pomonae Nacom payabara yaputaneme. Daxota beta painompame icha be ichamonae ichi, xua mataqueitha beta taeya jinompa xua pentha petsuncuaexae. Waxainchi jopa dapomonaetsi xua icha be ichi pomonae abeya jinompa jopa pejume cowuntsi jiwixae Nacom. Barapocotsimonae be pomonae poxonae jinompa pequireiwatha, jopa beta jinompaeyo pequirei tsuncuaexae. ⁶ Pomonae jopa pejume cowuntsiwichi Jesucristo barapomonaes jopa tsaca jinompaeyo xua pewuna ewatsinexa Jesucristo pia pepatopeicaewa tsica tsane. Barapomonaes be pocotsimonae xua maita, xua jopa itacupaetsi xua penacosabiwa. Ichitha jame bewa waxainchi wacoutha barompaya juntu coyene coxonaetsi xua tsaca wajinompaewa poxonae wuna ewatatsi Jesucristo pia pepatopeicaewa tsica tsane. ⁷ Pomonae ba xua maita, bara merawi maita. Iruru pomonae ba cupatsi peatsaxa mera, bara merawi cupatsi. Daxita barapomonaes jopa xapain Jesucristo wuna ewatichi. ⁸ Ichitha waxainchi wajume cowuntsixaetsi Jesucristo, daxota bewa juntu coyene coxonaetsi xua tsaca jinompatsi xua wawuna ewatsiwa Jesucristo. Waxainchi xanepanaya bewa beta jume cowuntichi Nacom. Matautano bewa beta nantiya naantobetsi. Barapo coyenebe naca juntu coyene yaitata xua jopa abe exanaetsi, icha soldadomonaepin ichi xua nayaitata penaintotha xua nantacari xatata xua pecawatsiyainwatsi dejonatha. Barichi waxainchi bewa jume cowuntsiya wuna ewatichi xua Nacom naca capanenebiya tsane. Barapo coyeneya naca yaitata xua abe waexanaeyainwa icha soldadomonaepin ichi xua nantasipa yaitata penain yoreitha xua peantasipabe exanaeyainwatsi. ⁹ Nacom jopa naca itapetsiyo xua wanaca atene exanaenexa wanatsicuentiwaxae abe waexanaexae bapontha. Saya apara naca itapeta wanaca capanenebiyaenexa xua Jesucristo wanaca tsitupaexae naetha pon Wanacanamataxeinaein. ¹⁰ Jesucristo naca tsitupa naetha wanaca baru jinompaewa tsane pia nacuatheicha, bequein waxainchi bayatha werapatsi, yawano ichacuitha bequein waxainchi awiya asu jinompatsi, poxonae bapon patopaetsica. ¹¹ Daxota paxam bewa awiya daxita nantiya pana najuntu coyene tsacabim. Matauta bewa nantiya pana najuntucoyenesu exanaem beta painya nejume cowuntsinexa icha paichiponaem xua anoxuae paexanapname.

Meje yabara xua Pablo muxuweta pomonae Jesucristo pejume cowuntsiwichi

¹² Patamonae pam, paca muxuwetatsi xua pabarui cui itura jinare pomonae painya xantha Nacom tanacuitatsi xua pomonae paca matacapona. Barapomonaes paca muxuweta xua Jesucristo pon jiwi Pecanamataxeinaein pecui itorobixae abe painya

neexanaeyainwa. ¹³ Bewa barapomonaē beta pabarū cui itura jinaem peainya cui jiwixae. Matautano bewa bichocono paantobem xua barapomonaē betiya painya nepaca mataxeinaexae. Daxita pam nantiya jūntema jinompa pana naexande.

¹⁴ Patamonaē pam, paca itorobatsi xua jume daunweya pamuxuwere pomonaē afaetabi xua penacuichiwa. Pajūntū coyene cui tsacabare pomonaē jūntū coyene junuwiya jinompa ichamonaē atene peexanaexae barapomonaetha. Matautano payawende pomonaē jopa ajūntūcoyenesūya jinompaeyo Nacomtha. Bewayo payawende barapomonaē xua jopa painya neaitaconaewam.

¹⁵ Painya xoba ichamonaetha abe pata exaname, xua copiya abe pia pacata exanaexae. Seicaya jame incane beta xanepanaya daunweya pajūjūteibare xua nantiya painya nenata exaneibinexa, xuano irū daxita jiwino.

¹⁶ Barabū tsitecaeya pajūntū coyene weiweina dubenanaebiyama. ¹⁷ Daxita matabi Nacomtha patsipaebeibare matowa. ¹⁸ Daxita pocotsiwa pacata exana bequein jopa pacata wūnaeyo, ichitha awiya barapocotsiwan yabara Nacomtha patsipaebeibare, pajam tsaibinde: “Nacom maisa pajūntū coyene weiweinān xua pata tana neyawenaewam poxonaē bequein painta daunwei tsaibi”, pajam tsaibinde. Poxonaē baxuan papaebame bichocono Nacom tsita xanepanatsi painya neexanaexae pocotsiwa Nacom ichichipa Cristo Jesús pia paca barū jinompaexae.

¹⁹ Jopa paitawetsinde Nacom pia Pejumo pe tūnaxū tatsi poxonaē paca itoroba pocotsiwa bewa paexanaem. ²⁰ Jopa pajume itawetsinde po diwesi xua ichamonaē paeba pomonaē Nacom Pejume Diwesi pepaebiwi. ²¹ Incane pajume taema daxita po diwesin xua barapomonaē paeba icha bara metha xaniwaicha po diwesin pona Nacom weya. Saya paitapere po coyene xua pexainyeiwa. ²² Daxita po coyenein peabe coyenein panaitemare xua jopa painya neexanaewam abe peexanaē coyenein.

²³ Bara Nacom, pon jūntema jinompa naca exana, barabū barapon paca jūntū coyene ayarusū exanaena xua jūpa paca cana exanaena icha bapon ichi xua jūntū coyene xanepana. Matautano barabū Nacom paca jūntū coyene xanepana exanaena painya nejinompaewa tsane bapon nexa xua jopa painya nexainaewam penatsicuentsiwa xua abe painya neexanaexae bapontha. Barabū Nacom beta paca jumope eenaena, yawano xua painya jūntū coyenewa, matautano xua painya pepon xua Jesucristo nexa pon Wanacanamataxeinaein xua beya poxonaē bapon patopaetsica. ²⁴ Nacom ponxae xua paca wūn duba pia paca exanaenexa piamonaē tatsi, bapon xainyeya pepaebin. Matautano bapon exanaena pocotsiwa xua bayatha yabara paca tsiwūnaē muxu duta.

Meje yabara xua Pablo najume wetsiya paeba

²⁵ Patamonaē pam, painta Nacomtha wūqueibare.

²⁶ Antobeya painta jacobare daxita pomonaē patamonaē pomonaē Jesucristo pejume cowūntsiwichi.

²⁷ Xan paca itorobatsi tsipei Jesucristo, pon jiwi Pecanamataxeinaein neitoroba. Paca jeichi: “Barapo carte painta yorobare daxita pomonaetha pomonaē Jesucristo pejume cowūntsiwichi”, paca jeichi.

²⁸ Jesucristo, pon Wanacanamataxeinaein, barabū paca yawena pia paca necaantobewaxae.

Baja Pablo, irū Silvano, irū Timoteono ponbe necueyatabe.

Meje Po Carte Cotacaya Pablo Tatina, Tesalonica Tomarapiwi Tatinatsi

Meje yabara poxona Pablo tamropata pitaba xua tatina pomonaetha pomona Tesalónica tomarapiwi

¹ Xan Pablon, iru Silvano, iru Timoteo, bara poyobe pan, barapo carte pacata tinatsi. Pacata tinatsi pomona Tesalónica tomarapiwi pam, pomona panacaetutame xua wuna painya nejainchinexa Nacom. Paxam iru pomona pejume cowuntsi jiwi pam, pomona painya neyawa jinompaewi Nacom, pon Waxa. Matauta paxam pomona xua painya neyawa jinompaewi Jesucristo, pon jiwi Pecanamataxeinaein. ² Barabu Nacom, Waxa, iru Jesucristo, pon jiwi Pecanamataxeinaein, paca yawenaena pia paca necaantobewaxae xua juntu coyene weiweinaya painya nejinompaewa tsane. Matautano barabu betiya xanepanaya junte miya jinompa paca cana exanaena.

Meje yabara xua poxona Nacom yabara paebina jiwi xua penatsicuentisiwa xua abe peexanaexae poxona Cristo equeicha patopaetsica

³ Patamona pam paxam pomona iru painya nejume cowuntsi jiwixae Jesucristo. Bewa pacata wucaponeibinchi Nacom, xua pata jei tsaibiwa: “Nacom maisa pajuntu weiweinan xua Tesalónica tomarapiwi beta xanepanaya cajume cowanta”, xua pata jei tsaibiwa tsane Nacomtha. Baxua painta wuna xua paexanan, tsipei equeicha matowa mataropeichiya pajume cocowantaponame. Matautano equeicha matowa nantiya pana naantobem tsozonaem xua daxita paxam. ⁴ Daxota juntu coyene weiweinaya paca yabara paebatsi Nacom piamonaetha xua ichamona matabuxu. Paca yabara jeichi: “Maisa Tesalónica tomarapiwi jume cowanta beta, yawa saya beta dubenanaebiya poxona bequein atene exanatsi abeya peyabara paebibixaetsi ichamona. Matautano barapomona beta exana dubenanaebiya xua bequein atene exanatsi xua poxona ichamona abe peexaneibixaetsi”, paca yabara jeichi barapomonaetha. ⁵ Baxuan tsita itapeinya xeina xua poxona bequein Nacom yabara paeba jiwi xua penatsicuentisiwa yawa peraxa jubitha barapo jiwi, barapara xanepanaya exana. Tsipei barapo jiwi natsicuenta Nacomtha abe peexanaexae. Daxota Nacom bara paca yabara cui copata xua painya patsinexa pia peitorobi nacua beicha tatsi, tsipei bichocono paatenem painya nejume cowuntsixaem bapon.

⁶ Pomona xua paca atene exana, bexa tsane Nacom xuya cana exanaena xua barapomona peraxa jubinchi. Barapara Nacom baxua beta exana pia abe pacata exanaexae barapomona. ⁷ Nacom paca nafifina capanenebiya exanaena xua paca yabara cui opi ducua exanaena xua ichamona atene paca exana. Iruru paxantha barichi tsane Nacom, xua poxona Jesús patopaetsica, pon jiwi Pecanamataxeinaein. Bapon Jesús baru patopeicaena pia matatsunpiwi, xua matatsunpiwi peayapuswatha patsicaena. Matautano Jesús muxuna patopeicaena pexeinya peitupanae coicha xua be isoto. ⁸ Jesús patopaetsica xua atene peexanaenexa jiwitha abe peexanaexae pomona jopa yaputaeyo Nacom, penaitematsixaetsi. Matautano atene exanaeinchi pomona jopa jume cowuntsiyo Jesús pia pecapanenebiyae jume diwesi tatsi, pon Wanacanmataxeinaein. ⁹ Barapo jiwi ataya tsitecaeya ajuntucoyenetane tsane tsana penobixae tsainchi taju beya xua bapon pon jiwi Pecanamataxeinaein pia xainya weya tatsi. Matautano barapo jiwi jopa tae tsane pon jiwi Pecanamataxeinaein pia pexeinya peitupanae coicha tatsi, xuano xua pia peayapusu itorobiwa tatsi xua bichocono pexeinya coyene. ¹⁰ Baxuan Nacom exanaena po matabitha abu poxona patopeicaena pon jiwi Pecanamataxeinaein, xua daxita piamona pebaru cui itura jinaenexa tsainchi. Matautano bapon daxita piamona nabenaecaeya wuna jainchinchi pomona pejume cowuntsiwichixaetsi. Paxam bara

paichim tsane barapo matakabitha painya nejume cowuntsixaemxae po diwesi jume bayatha paca tsipaebatsi.

¹¹ Daxota ataya paca yabara wuqueibatsi Nacomtha. Pajan: “Nacom yawende barapomonaе xua jinompaena po coyeneya icha xua xam ichichipame poxonaе wun dubame barapomonaе xua penaexanaenexa jinyamonaе. Matautano yawende barapomonaе pewetsinexa tsane jinya neayapusu itorobi coyenewatha po coyene xua wunaе, po coyene barapomonaе ichichipa xua peexanaewa. Matautano yawende barapomonaе pewetsinexa po penacuichiwa exana necajume cowuntsixae”, pajan Nacomtha. ¹² Icha beta pajinompage, jiwi wunaе jainchina Jesús, pon Wanacanamataxeinaein, painya nejume cowuntsixae tsane bapontha. Matautano Jesús cana exana xua barapo jiwi wunaе paca jainchina painya paca cataexae tsane xua Nacom paca yawena, pia paca necaantobewaxae, xuano xua Jesucristo paca yawenaru pia paca necaantobewaxae pon jiwi Pecanamataxeinaein.

2

Meje yabara xua equeicha patopaetsica pon jiwi Pecanamataxeinaein

¹ Patamonaе pam, anoxuae nama yabara bepaca tsipaebinchi xua Jesucristo, pon Wanacanamataxeinaein, equeicha pepatopaewa tsica. Matautano ichichipan yabara xua tapaca tsipaebiwatsi xua wanaca baru nacaetutsiwa bapon. Daxota jume daunweya paca tsipaebatsi baxua. ² Icha ichamonaе paca tsipaeba xua pinaе anoxuae matakabi jopa, po mataqueitha xua Jesucristo, pon jiwi Pecanamataxeinaein bayatha patopa, painya xoba bepajawa payabara najuntu coyene cabenaecaename xua daxota jopa beta pananta xeinaem. Jopa bichoina payabara jume cowuntsinde bequein paebitha tsane xua pinaе baxua barapomonaе tsipaebatsi Nacom pia Pejumope tunaxu tatsi. Matautano painya xoba payabara jume cowuntame bequein paebitha tsane xua pinaе baraxua yabara paebandu. Matautano painya xoba payabara jume cowuntame bequein paebitha tsane xua pinaе barapomonaetha baraxua payabara tinandu. ³ Jopa pacopatsinde xua ichamonaе yabara paca muxuitoroba baxua bequein pinmonaе paca tsipaebitha tsane baxua. Tsipei baxua pewunaeya tsane xua poxonaе barapo matakabi jopaena, bewa matha patopaena xua po coyene jiwi Nacom naitematinchi. Bapoxonaе pebin patopaena pon bichocono jopa juniya abe exanaeyo. Bapon apara pon Nacom weraweraca exana isototha po isototha bapana cuinaya jopa ataya tsitecaeya itacounayiyo. ⁴ Bapon Nacom abe yabara paebinchi. Bapon jopa tsita ainya cuiyo tsainchi daxita pocotsiwa jiwi wunaе jainta. Matautano bapon jopa tsita ainya cuiyo tsainchi bequein po nacomun jiwi exana. Bapon pia coutha penacanamataxeinaein naexana xua peewatsiwa daxita pocotsiwan Nacom piawa, xua pia wunaе jaintichi, xua jiwi wunaе jainchina. Matauta bapon ecaena Nacom pin pia botha xua pia coya Nacom najainta.

⁵ ¡Bara baxuan yabara caena bayatha paca tsipaebatsiba poxonaе cataunxuae paca baru popoinchi! ¿Bara pajuntemainame jampa? ⁶ Anoxuae paxam payabara yaputaneme po coyene xua peayapusu itorobi coyenewa bapon cui matawentatsi xua pepatopaewa. Saya beya jame patopaetsica poxonaе barapo matakabi tsane xua bapon copatinchi xua pepatopaewa tsica tsane. ⁷ Pinmonaе anoxuae bichocono abe exanapona. Saya waxainchi yabara yaputaеinchi baxua Nacom pia wanaca yaputane exanaexae wajume cowuntsixae. Nama pomonaе jopa jume cowuntsiyo jopa yabara yaputaeyo baxua. Saya meisa acoibi xua pitinchi pon xeina barapo peayapusu itorobi coyenewa xua pecui matawentsiwatsi pontha pon bichocono abe peexanaein. ⁸ Saya bapoxonaе naitutsina bapon pon bichocono abe peexanaein. Ichitha poxonaе Jesús, pon jiwi Pecanamataxeinaein patopaetsica, bapon bexubina pon bichocono abe peexanaein bexubinchi poxonaе ofutarabina, xua ataya weraweraca pecana exanaenexa pexeinya peitupanae coicha peyawa naitutsiya patopeicaexae tsane. ⁹ Pewunaeya tsane xua poxonaе Jesús bexubina pontha pon bichocono abe peexanaein, Satanás pon caurimonaе pia pentacaponaein tatsi, bapontha catsina pia peayapusu itorobi coyenewa xua catinchi

pon abe peexanaein. Bapon pon bichocono abe peexanaein bichocono peayapusŭwa yawa patopaena. Matautano bapon daxita coyeneintha pexeinya petsita itabiwan exanaena peayapusŭwatha xua jopa xainyeyo xua jiwi pemuxujainyabinexatsi. ¹⁰ Bapon exanaena daxita peabe coyenewan xua daxita jiwi pemuxujainyabinexa tsainchi. Nacom exanaena xua barapo jiwi weraweracaena jopa peichichaexae xua pejume cowuntsiwa pexainyei jume diwesi po diwesi xua barapomonaecapapanenebiyaenexa tsainchi. ¹¹ Daxita barapo coyeneinxae daxota Nacom bara saya yabara cui copata xua barapo jiwi bara muxujainyabinchi xua daxota jume cowuntsina barapo penaerabi diwesi jume. ¹² Pomonaecapapanenebiyaenexa jopa bejume cowuntsiyo pexainyei diwesi jume barapomonaecapapanenebiyaenexa saya ichichipana nawita xua peabe coyenewan exana. Barapomonaecapapanenebiyaenexa Nacom caununaya itawetsina poxonae yabara paebina xua barapomonaecapapanenebiyaenexa Nacom tsita natsicuentatsi xua abe peexanaexae.

Meje yabara pomonaecapapanenebiyaenexa Nacom itapeta pecapanenebiyaenexa tsane

¹³ Patamonaecapapanenebiyaenexa pam, paxam pomonaecapapanenebiyaenexa pam pomonaecapapanenebiyaenexa paca antobe pon jiwi Pecanamataxeinaein. Paxam bewa daxita matabi pacata wŭqueibinchi Nacomtha. Bewa pajan tsaibin tsane: “Nacom maisa pajuntŭ coyene weiweinan beta necajume cowuntsixae Tesalónica tomarapiwi”, bewa pajan tsaibin tsane. Daxota baxua papaeban Nacomtha tsipei bayatha caena paca itapeta painya nepaca capanenebiyaenexa xua tsiwanaya poxonae aena Nacom forota barapo cae pin nacuathe. Nacom baxua exana pia peayapusŭwatha po peayapusŭwa pia Pejumopecapapanenebiyaenexa tŭnaxŭ tatsi xeina ponxae paca juntŭ coyene xanepana exana Nacom nexa. Matautano baxua exana poxoru painya nejume cowuntsixae pexainyei diwesi jume. ¹⁴ Daxota Nacom bayatha paca waba bapon painya nejume cowuntsinexa poxonae paca cuidubatsi Nacom pia pecapanenebiyaenexa diwesi jume. Daxotano paca waba xua Jesucristo pon Wanacanamataxeinaein painya nenabarŭ xeinaenexa pia pexeinya peitupanaecapapanenebiyaenexa coyenewan.

¹⁵ Patamonaecapapanenebiyaenexa, daxota pajume cowunta dubenanaebiyama equeicha matowa. Painya xoba pajuntemainame po peuidubiwan xua ichamonaecapapanenebiyaenexa pana cuiduba xua xuya anoxuae yatsicaewa paca cuidubatsi, xua yawa cartano pacata tinatsi. ¹⁶⁻¹⁷ Nacom Waxa, pia wanaca antobexae naca yawena. Bapon ataya tsitecaeya naca matateica pia pexeinya juntŭ coyenewatha. Matautano Nacom naca cata xua wawŭnae ewatsiwa pocotsiwa xua bapon naca catapaeba, pocotsiwa xua wŭnae. Paca yabara paebatsi bapontha. Matautano paca yabara paebatsi Jesucristo pon Wanacanamataxeinaein. Pajan baponbetha: “Barabŭ payawenaenamebe Tesalónica tomarapiwi. Barabŭ pajuntŭ coyene cui tsacabinamebe barapomonaecapapanenebiyaenexa. Matautano barabŭ juntŭ coyene jume cowuntsiyo ayapusŭya pacana exanaenamebe barapomonaecapapanenebiyaenexa, xua pia pepaebibinexa pocotsiwa wŭnae xuano pia peexaneibinexa pocotsiwa xanepana”, pajan baponbetha.

3

Meje yabara poxonae Pablo namchi: “Painta Nacomtha wŭcare”, jei

¹ Patamonaecapapanenebiyaenexa, paxam pomonaecapapanenebiyaenexa pam pomonaecapapanenebiyaenexa irŭ painya nejume cowuntsixae Nacom. Anoxuae paca tsipaebatsi pocotsiwa xua pawetan xua pata paca tsipaebiwatsi. Paca jeichi xua painta Nacomtha wŭcare xua xain pon jiwi Pecanamataxeinaein pejume diwesi tatsi awiya nainya tajŭ patsipaebaponaecapapanenebiyaenexa daxita nacuantha. Matautano painta wŭcare xua xain ichaxota patsipaeban barapo diwesi daxita jiwi beta jume barŭ jejei peainya cui diwesixae, icha paichim poxonae pajume taneme barapo diwesi. ² Matautano Nacom painta wŭcare xua xain Nacom jopa copatsiyo xua painta abe exana pomonaecapapanenebiyaenexa bichocono ajuntŭcoyenebe. Tsipei jopa daxita jiwiyo pomonaecapapanenebiyaenexa beta jume cowunta po diwesi patsipaeban. ³ Ichitha jame bara ita coxoinchi xua wajume cowuntsiwa pon jiwi Pecanamataxeinaein tsipei bara bapon xainyeya naca yawena. Matautano bapon paca juntŭ ayapusŭya exanaena. Matautano bapon paca ita ararana xua abe paca exanaeyainwa pon bichocono abe peexaneibin. Paca yawenaena xua jopa painya neexanaenexa abe peexanaecapapanenebiyaenexa cuiru coyenewan. ⁴ Bara paca yabara jume cowuntatsi xua bara bapon pon jiwi Pecanamataxeinaein paca yawena. Bapon paca yawenaena xua

paexaname, xuano xua paexana dubenanaebiyaename pocotsiwan xua paca itorobatsi. ⁵ Barabũ bapon pon jiwi Pecanamataxeinaein, paca yawenaena xua bichocono painya neyabara yaputaenexa Nacom pia paca antobe coyenewa tatsi. Matautano barabũ paca yawenaena xua awiya antucoyenesũya painya nejume cowũnta dubenanaebiyaenexa tsane. Bapoxonae bequein ichamonae abe pacata exanaetha tsane jopa paaitaconaem tsane. Bara paichim tsane icha Cristo ichi xua poxonae jiwi barapocotsi coyene exana jopa aitaconaeyo.

Meje yabara poxonae Pablo yabara paeba xua jiwi bewa nacuichina

⁶ Patamonae pam, paca itorobatsi tsipei Jesucristo Wanacanamataxeinaein pana cata pia peitorobi coyenewa. Painya xoba imoxoyo pabarũ jinompame peafaetabi jiwi pomonae aichaxaibi nacuita, xua pomonae irũ pejume cowũntsiwixae. Barapomonae jopa yabara jume cuiya exanaeyo po pecuidubi coyenein xua Jesucristo weya bayatha, xuano xuya barapomonaetha pacuiduban. ⁷ Paxam payaputaneme, xua bewa xanepanaya betiya pajinompae, icha bayatha paichin. Poxonae paca barũ jinompatsi jopa paacoyenefaetabinyo, apara panacuitan nawita. ⁸ Poxonae paxaiban painya xantha bara pentoma paexaneiban pexaewa nexa. Jopa amanaya panabaneibinyo. Jame apara daunweya panacuiteiban merawintha matacabinthano xua jopa daunweya pata pacata exanaewatsi tsainchi. Jopa panantawenonaem xua painta comocame pexaewa. ⁹ Bequein pana yabara cui copata xua pata paca wũcaewatsi pata neyawenaenexam tsane, ichitha bara pana netaneme xua pexaewa pana natsiũpain nacuitan, xua irũ bara painya neichinexarũ. ¹⁰ Tsipei poxonae paca barũ enatsi baxua yabara paca tsipaebatsi xua barapo peitorobiwe paca jeiche: “Pon jopa benacuichiyo bũ jopa xae tsane”, paca jeiche. ¹¹ Ichamonae pana tsipaeba xua painyamonae jiwana yabara, xua pinae painyamonae jiwana jopa natsiũpain nacuichiyo pexaewa. Saya pinae dubenanaebiya. Barapomonae saya pinae ichamonae yabara yũyũjeichi. Barapomonae jopa pinae exanaeyo piawa. Saya pinae penabarũ yũyũjei poxonae ichamonae eneibatsi poxonae nacuiteiba. ¹² Barapomonae pomonae saya dubenanaebiya, paitoroban pajanje: “Tsipei Jesucristo pana cata pia peitorobi coyenewa pon jiwi Pecanamataxeinaein, daxota pecono jumeyotha paca tsipaebatsi. Bara panacuire painya nenacuichiwa xua pexaewa painya natsiũpain nacuichinexa. Jopa ichamonae payabara nabarũ yũyũjande”, pajanje. ¹³ Ichitha paxam patamonae pam, pomonae pam irũ pajume cowũntame jopa paaũntucoyenefaetabinde xua xanepanaya painya neexanaewam. Awiya xanepanaya paexanaponde. ¹⁴ Icha ichũn painyamonae jiwana jiton jopa exanaeyo pocotsiwa paca tsipaebiya tinatsi barapo cartathe barapo pebin pacui naitaeware painya necui yaputaenexa. Barapo pebin jopa pabarũ jinompaeinde, xain bapoxonae aura xua jopa peexanaexae xua barapo cartathe papaeban. ¹⁵ Ichitha jopa bapon pacana exanaeinde be pon painya nepaca caaitafaetabi jiton. Saya jame maisa pamuxuwere xua bapon maisa penacuichinexa. Matauta maisa bapon patsipaebare icha paichim poxonae patsipaebame pontha pon pejume cowũntsin.

Meje yabara xua Pablo najume wetsiya paeba

¹⁶ Jesucristo pon jiwi Pecanamataxeinaein xua jũntema popona peyacuiya jinaein, bũ bara barapo jũntema pejinompae coyene paca catsina daxita matacabin tsaibi poxonae bequein ichamonae abe pacata exaneiba. Barabũ bapon pon jiwi Pecanamataxeinaeinxae daxita paxam paca barũ jinompaena.

¹⁷ Xan Pablon saya meisa barapo couye tacoutha bara tinan, po jumeyo xua paca jacobatsi. Baxua tsita itapeinya xeinan xua barapo carte apara bara tacarta. Daxita tacartantha barapo jume couxi wetsiya tineiban icha barapo carte ichi. ¹⁸ Pon Wanacanamataxeinaein, Jesucristo, barabũ daxita paxam bichocono paca yawenaena pia paca antobexae.

Baja Pablo, irũ Silvano, irũ Timoteono ponbe necueyatabe.

Meje Po Carte Copiya Pablo Tatina, Timoteo Tatinatsi

Meje yabara poxonae Pablo tamropata pitaba xua tatina, Timoteo tatinatsi

¹ Jaco Timoteo. Xan, Pablon, Jesucristo pia peitorobi jiwi jiwana tatsin. Nacom pon Wanacacapanenebiyaein neitoroba. Matautano Jesucristo, pon Pecanamataxeinaein jiwi, pon wunaewatatsi iruru neitoroba. ² Timoteo, xam cata tinatsi barapo carte, xam bara xaniwaicha be taxantom canatsicotainchi, tsipei cayawenatsi xua nejume cowantsiwa Nacom. Ichichipan xua Nacom pon Waxa, iru Cristo Jesús, pon Wanacanamataxeinaein, baponbe bara amanaya cayawenaena pia necaantobexaebe. Matautano ichichipan xua baponbe nantanuweya cayabara nanta xeinaenabe pia necayawenaenexabe. Matautano ichichipan xua jantema popona jinya necaexanaenexabe.

Meje yabara xua Pablo yabara muxuweta pomona abeya pecuidubiwi pia pecuidubi coyenewa tatsi pecuiyainwa

³ Poxonae matha cain muxu taponae Macedonia nacua beya, bapoxonae jume daunweya cajeichi, janje: “Ecare Efeso tomaratha jinya necui itorobinexa tsane pomona abeya pecuidubiwi pia pecuidubi coyenewatha. Barapomona seicayiia cuiduba ichi be jopa paxan ichiyo pomona Jesucristo pia peitorobi jiwi tatsi panxaein. Itorobare xua barapomona jopa cuidubi tsane ichamonaetha barapo coyene po coyene xua jopa xainyeyo. ⁴ Matautano barapomona jopa bewa juntu coyene enae tsainchi po diwesin xua pia pamo susato jiwi tatsi paeba po diwesin xua pejema diwesin, matautano po ayei diwesinno, xua pia pamo susato jiwi tatsi yabara”, cajeichi. Barapo diwesin saya jiwi najume matsontsonoba exana. Barapo diwesin jopa naca yawenaeyo xua beta wacanamataxeinaewa Nacom piamonaewajume cowantsixae Nacom.

⁵ Xua tapaebixae xua barapo peitorobi coyenewatha paeba apara xua daxita jiwi nantiya caemona penaantobenexa tsane. Barapo peantobe coyenewa jiwi pia juntu coyene wetsina pona poxonae pia juntu coyenein xanepana xua jopa xeinaeyo peabe coyenewa yawa poxonae barapo jiwi pia coutha najuntu coyene tsipaeba xua jopa peexanaenexa peabe coyenewa Nacomtha. Yawa barapo peantobewa jiwi pia juntu coyene wetsina pona poxonae barapo jiwi xaniwaicha jume cowanta Nacomtha. ⁶ Ichamona jopa xeinaeyo barapo peantobe coyenewa poxoru jume itaweta, matautano poxoru najuntu coyene eena exana penajume matsontsonobi diwesin. ⁷ Barapomona ichichipa becuidubina Nacom pia peitorobi diwesi jume. Bequein barapomona baxua exana, ichitha jopa beta exanaeyo tsipei jopa yabara yaputaeyo Nacom pia peitorobi diwesi jume. Matautano barapomona jopa yabara yaputaeyo po coyeneya xua atsaquiya yabara cuiduba ichamona Moisés pia peitorobi diwesi jume.

⁸ Bara yaputainchi xua Moisés pia peitorobi diwesi wunaewajiwi nexa, icha po jiwi cuiduba barapo diwesi, bara xaniwaicha cuiduba icha be pocotsi coyeneya xua Nacom ichichipa. ⁹⁻¹⁰ Waxainchi matautano yaputainchi xua Nacom pia peitorobi diwesi jume jopa barapomona nexiyo pomona bayatha pejuntu coyene xeicaewi tsipei daxita coyenein ba beta peexanaewi. Jame barapo Nacom pia peitorobi jume, barapomona nexa pomona meje: pomona jopa exanaeyo pocotsiwa Nacom pia peitorobi diwesi jumetha itoroba; pomona jopa jume cowantsiyo Nacom; pomona jopa ichipaeyo Nacom; pomona abe peexanaewi; pomona jopa juntu coyene xanepanaeyo Nacomtha; pomona aichaxaibi Nacom pia peitorobi diwesi jume; pomona pia paxeiwi pebewi; pomona pia pena jiwi pebewi; pomona jiwi pejutebiwi; pomona penata siwa xeinaewi yabuxitha xua jopa piseuri jiwi; pomona cae pebiwi penaisamaichi jiwi xua be yabuxi penatsicotae jiwi; pomona paratixi xeineiba xua ichamona pejiwana noteibixaetsi poxona equeicha caewa pejiwana canawibeibixaetsi; pomona jiwi pemuxitorobiwi;

pomonae naerabiya jume daunweya paeba xua ichamonae naerabiya peyabara paebi-watsi. Barapo peitorobi jume irurū barapomonae nexa daxita pomonae seicayiya yabara jume toxeinchiya exana po coyene xua Jesucristo pia pexeinya pecuidubi coyenewa. ¹¹ Barapo pexeinya pecuidubi coyenewa, bara najume jupabe Nacom pia pexeinya jume diwesi tatsi, po diwesi yabara po coyene xua Nacom bara bichocono pexanepanaein, xuano bichocono pejuntū coyene weiweinaein. Barapo diwesibe Nacom itoroba xua tacueicueijiwa tsane.

Meje yabara poxonae Pablo juntū coyene weiweina Jesucristo

¹² “Juntū coyene weiweinan tanecatsixaemxae peantuyapusūwa”, jan Jesucristo, pon Wanacanamataxeinaein. Bapon necata peantuyapusūwa tacueicueijiwa tsane jiwitha Nacom pia Pexeinya jume diwesi tatsi. Bapon neyabara nanta xeina xua bara beta jume cowūntan, daxota necana exana xua xan pia petanacuichin tatsin. ¹³ Bapon baxua inta exana bequein bara bayatha bapon abeya yabara paeban. Matautano bapon piamonaetha tatsi abeya tacana exanan. Matautano abeya tayabara paeban barapo pijimonaetha tatsitha pomonaetha pomonae pia pejume cowūntsi jiwixaetsi. Ichitha Nacom nantanuweya neyabara nanta xeina pia tana neyawenaenexa, tsipei bapoxonae jopa jume cowūntsiyo Jesucristo poxonae abe exanan. Matautano jopa yaputaeinyo pocotsiwa xua bayatha exanan. ¹⁴ Daxota Nacom pon Wanacanamataxeinaein bichocono amanaya neyawena taneantobexae. Nacom nejuntū coyene yūca exana po pejume cowūntsiwa xuano xua po peantobewa tsita xeinatsi Cristo Jesús.

¹⁵ Cristo Jesús patopeica po cae pin nacuathe tsique pecapanenebiyaenexa tsainchi pomonae abe peexanae jiwi, xua capanenebiyatsi abe pia peexanae cuiru coyenein weya. Pomonae abe peexanae jiwi barapomonae jiwanan xua bichocono abe taexanaein beyacaincha barapomonae poxonae abe exana. Baxuan apara xainyei pocotsiwa xua yabara paeban. Jiwi bewa jume cowūntsiwa baxuan. ¹⁶ Bequein bichocono abe taexanaein, daichitha Nacom nantanuweya neyabara nanta xeina pia tana neyawenaewa tsane. Tsipei xan pon Jesucristo nenaitūta exana jiwitha, xua bayatha tana necui yabara ewatsixae xua tajume cowūntsiwa tsane Jesucristo xua poxonae jopa aitaconaeyo. Daxota ichamonae poxonae netaena Nacom exanaena xua barapomonae Jesucristo pejume cowūntsiwa tsainchi, pexeinaenexa peantuyapusūwa po peantuyapusūwa xua ataya tsiteca. ¹⁷ Nacom, wūnae paca jaintatsi: “¡Xam Nacom pon ataya jiwi itorobiya pepa Neewatsin! ¡Xam Nacom pon bapana jopa tūpaem tsane! ¡Xam pon xua jiwi jopa itacūpaetsi xua necataewa! ¡Xam yatsicaewa compam pepa Nacomūm! ¡Ataya paca tsita barū cui itura jinatsi! ¡Barabū ataya jiwi wūnae cajainchina! Je bara ichi tsane”, paca jeichi Nacom.

¹⁸⁻¹⁹ Xam, Timoteom, bara xaniwaicha be taxantom canatsicotainchi. Caitorobatsi ichi be pocotsi coyeneya bayatha Nacom pia peitorobi jume pepaebiwi caitoroba poxonae cayabara tsiwūnae muxu duta xua bexa cuidubiname jiwitha Nacom pia pexeinya jume diwesi. Xan caitorobatsi icha be pocotsi coyeneya bayatha barapomonae caitoroba. Cajechi: Jume daunweya antuyapusūya beta exande Nacom pia petanacuichiwa tatsi. Poxonae baxua exaname, beta jume cowūntsiya exande, yawa pexeinya juntū coyene xeinare po juntū coyene xua xainyeya natsipaebame, xua jopa abe exanaem Nacomtha, cajeichi. Ichamonae bequein beta natsipaeba pijuntū coyeneintha, ichitha barapomonae najuntū coyene barapenta po coyene Jesucristo pejume cowūntsiwatsi tsipei jopa jume cowūntsiyo pocotsiwa pia juntū coyene tsipaebatsi. ²⁰ Barapocotsi coyene Himeneo exana irurū Alejandro exanarū. Baponbe caenaetanbe pon caurimonaetha pia pentacaponaeintha tatsi pon Satanás beya poxonae baraponbe nacuidubinabe xua jopa bewa abe yabara paebi tsanebe Nacomtha.

¹ Copiya caitorobatsi baxuanje xua exanaename: Nacomtha tsipaebare daxita jiwi nexa; Nacomtha wūcare xua Nacom peyawenaenexa daxita jiwi; yawa jande Nacomtha: “Nacom, maisa jūntū coyene weiweinan xua daxita xanepanaya jinya netaexanaewam jiwi”, jande. ² Bewa Nacomtha tawūcaename daxita nacua peewatsiwimonae. Matautano bewa Nacomtha tawūcaename daxita pentacaponawimonae. Baxua bewa exanaename xua jūntema beta wajume cowūnta dubenanaebiyaenexa Nacomtha, yawa jūntema wajinompāenexa jiwi peitūtha. Barapo jūntema wajinompāewa bara bewa Nacom tsita xeinaeinchi barapo coyene, yawa bara jiwi xaniwaicha naca cui tane xua bara beta xaniwaicha jinompatsi daxita carepaya coyene cūnthā. ³ Barapo coyenein jame Nacom tsita wūnaetsi pon Wanacapanenebiyaēin. ⁴ Nacom bichocono ichipa xua daxita jiwi pecapanenebiwa tsainchi abe pia peexanae cuiru coyenein weya. Matautano Nacom ichichipa xua jiwi yaputaena pocotsiwa xua pexainyei coyenewa. ⁵ Meisa compa Nacom pon pepa Nacom, bapon meisa popona. Barichi saya meisa caein pon itacūpatsi xua jiwi yabara jume yawenatsi Nacomtha, apara barapon Jesucristo. ⁶ Jesucristo copata xua bara naetotha tsitūpa xua daxita jiwi yantomatatsi xua jiwi pecapanenebiyaenexa tsainchi abe pia peexanae cuiru coyenein weya tatsi. Poxonae Jesús tūpa naetotha, baxua tsita itapeinya xeina xua Nacom Pexanto itoroba po mataqueitha Nacom peichichipaexae xua daxita jiwi pecapanenebiwa tsainchi. ⁷ Daxota Nacom newūn duta, jeye: “Bapon apara pon tajume diwesi pecaponaēin yawa bapon taitorobi jiwi jiwanapin”, jei Nacom. Bara xaniyeya pāeban, jopa naerabinyo. Daxota Nacom neitoroba tacuidubinexa pomonaetha pomonae jopa judiomonae naexanaeyo xua Nacomtha pejume cowūntsiwa yabara yawano xua Nacom pia pexainyeiwa yabarano tatsi.

⁸ Daxota ichichipan xua daxita nacuanpiwi Nacom pewūcaewa tsainchi. Poxonae wūcaena Nacomtha bewa namaxū yoichaena xua yatsicaewa pexeinaexae tsane pejūntū coyene xanepanaewa. Matautano jopa bewa yajūntū coyeneya pāebi tsane xua peita aenae-aeniwa ichūnthā. Matautano jopa bewa yajūntū coyeneya pāebi tsane xua penajume matsontsonobi coyenewa. ⁹ Ichichipan xua yabūxi nama xatabina pocotsi paparuwa be conotha wūnae. Saya uuranaya jinompaena xua bichocono jopa atsaqui tsane xua pebarū yūyūjeiwa pebiwitha. Jopa bichocono wūnaeya nantana fabi tsane. Jopa bichocono nantana pepena exanae tsane pocotsiwatha xua bichocono ainya matoman, pocotsiwa pewūn oro, matautano pocotsiwa pewūn perlan. Matautano jopa namaxatabi tsane pocotsi paparuwa bichocono ainya matoma. ¹⁰ Jame yabūxi bewa exanaena pocotsiwa jiwi tsita coyene xanepanatsi, xua pocotsi coyene jiwi yawenatsi. Baxuan jame bichocono wūnae xua yabūxi exana, po yabūxi xaniwaicha jume cowūntsiya jinompa xua Nacom pejume cowūntsiwatsi. ¹¹ Yabūxi bewa saya moya jume naitawatsiya jume taena pocotsiwa xua nacuiduba. Saya bewa moya jume jejei tsane. ¹² Tsipei yabūxi jopa copatsinyo xua cuidubina Nacom Pejume Diwesi pin bicheito itabaratha. Matautano jopa copatsinyo xua yabūxi pentacaponawēi penaexanaewa tsane pebiwi nexa. Jame bewa yabūxi saya moya enaena poxonae pejume cowūntsiwi nacaetuta xua Nacom wūnae pejainchinexatsi. ¹³ Tsipei Nacom copiya exana pebin pon pewūn Adán, bapoxonae yabūyo exainchi powa pewūn Eva. ¹⁴ Caena bayatha Adán jopa muxujainyabichi pon caurimonae pia pentacaponaein tatsi xua abe peexanaewa tsane. Apara jame bapowa Eva muxujainyabatsi, daxota bapowa abe exana. ¹⁵ Bequein yabūyo atene poxonae tanaexanatsi pexuyo, ichitha Nacom capanepaena bapowa icha bapowa jume cowūntsiya poponaena Nacomtha, yawa icha antobeya poponaena, yawa icha betiya poponaena xua yatsicaewa Nacom nexa, yawa icha ita uuranaya poponaena Nacomtha.

3

Meje yabara xua bewa exanaena pomonae pecanamataxeinaewi pejume cowūntsiwi

¹ Baraxua bara xainyei xua paca tsipaebatsi. Icha pebin ichichipa naexanaena xua pomonae Nacom pejume cowūntsiwichi pecanamataxeinaewatsi, bara baxua bara xanepana. ² Daxota pon pomonae Nacom pejume cowūntsiwi canamataxeinatsi, bapon

bewa xanepanaya beta poponaena xua bapon jopa abe peyabara paebinexa tsainchi ichamona. Bapon bewa saya cae piseuri baru jijinaena. Matautano bapon jopa bewa bichocono apae tsane xua vino mera pia beta penanta xeinaenexa. Bapon bewa beta nayaputane exanaena, xua daxota xanepanaya peexanaewa tsane, xua bapoxonae ichamona bapon xanepanaya peyabara nanta xeinaewa tsainchi. Bapon bewa matenta weiweinaya wabeibina pomonae petapateibeibixaetsi pia botha. Bapon ba pia cui xeina xua beta cuidubina ichamonaetha. ³ Bapon jopa bewa nacupa exanae tsane peatsaxae mera. Yawano jopa bewa bapon naba exanae tsane, saya jame bewa juntea poponaena. Bapon jopa bewa najume matsontsonoba exanae tsane. Yawano bapon jopa bewa pitaparaxichi xua paraxi peasiwiwa. ⁴ Bapon bewa beta itorobiya canamataxeinaena pia bomonae matabuxuyo. Matautano bapon bewa pia pexui jume naitawatchi poxonae itorobeiba pia pexui. Yawa pia pexui bewa tsita xeinaetsi pebaru itura jinae coyenewa. ⁵ Icha barapocotsi jiton ita coxanatsi xua beta itorobiya canamataxeina pia bomonae matabuxuyo, bapon nexata jopa itacupaetsi xua canamataxeina Nacom nexa pomonae Nacom pejume cowuntsiwixaetsi. ⁶ Pebin jopa bewa naexanae tsane xua pomonae Nacom pejume cowuntsiwichi pecanamataxeinaewatsi poxonae cataunxuae abu pena pejume cowuntsin Jesucristo. Icha bapon pena pejume cowuntsin tsipae Jesucristo, metha bapon aebichipa nawita jiwitha, bapoxonae Nacom cana exanaetsipa bapontha, icha be pocotsi coyeneya ichi poxonae caurimonae pia pentacaponaein tatsi itawetatsi, xua Nacom itaweta pia nacua weya, xua Nacom peabixaetsi. ⁷ Matautano bapon bewa beta poponaena, xua pomonae jopa pejume cowuntsiwi Nacom bapon beta peyabara nanta xeinaenexa tsainchi. Icha bapon jopa beta poponae tsane, bapoxonae jiwi abeya yabara paebina, bapon abeya yabara paebinchi. Yawano metha bapon exanaetsipa pocotsiwa caurimonae pia pentacaponaein tatsi cui jujuta xua po cui coyeneyatha bapon peexanaenexa.

Meje yabara pomonae jiwi peyawenaewi pomonaetha pomonae pejume cowuntsiwi

⁸ Barichiru pomonae jiwi peyawenaewi pomonaetha pomonae pejume cowuntsiwi, xua peyawenaewi peatenewitha, xua muxunano peapatsiwano peacopeibiwatha, barapomonae bewa beta jinompae, xua jiwi pebaru cui itura jinaenexa barapomonaetha. Matautano barapomonae jopa bewa icha caununaya paebi tsane. Jopa barapomonae nacupa exanae tsane peatsaxae meran. Matautano jopa bewa pitaparaxichi tsane xua paraxi peasiwiwa. ⁹ Barapomonae bewa beta jume cowuntsi Jesucristo po coyene xua Nacom yabara tsita ituta xua wajume cowuntsiwa, yawano barapomonae bewa muxuna xeinae po juntu coyenetha beta xaniwaicha natsipaebatsi xua jopa abe exanaetsi Nacomtha. ¹⁰ Bara matha bu ichamona cui jujutsina barapomonaetha icha beta xaniwaicha jinompa yawa icha ichamona jopa abeya yabara paebiyo barapomonaetha. Bapoxonae barapomonae cana exanaeinchi pomonae jiwi peyawenaewi pomonaetha pomonae pejume cowuntsiwi, xua peyawenaewi peatenewitha, xua muxunano peapatsiwano peacopeibiwatha. ¹¹ Barichi yabuxi bewa beta jinompaena xua barapowaxi pebaru cui itura jinaewa tsainchi jiwi. Jopa bewa bapowaxi abe yabara paebi tsane ichamonaetha, xua ichamona abe peexanaexae. Matautano bapowaxi jopa bewa bichocono apae tsane vino meran. Matautano bapowaxi bewa beta jinompae, xua ichamona peyabara jume cowuntsiya nanta xeinaenexa xua pocotsiwa bapowaxi daxitan exana pocotsiwan bayatha exanapaebeiba. ¹² Barapocotsi jiwi jiwana jiton pomonae peyawenaewi pomonaetha pomonae pejume cowuntsiwi, bapon bewa saya cae piseuri baru jijinaena. Matautano bapon bewa beta itorobiya canamataxeinaena pomonae pia bomonae matabuxuyo xua daxota bewa beta itorobiya canamataxeinaena pia pexui. ¹³ Tsipei barapocotsi jiwi pomonae peyawenaewi pomonaetha pomonae pejume cowuntsiwi poxonae barapomonae beta exana pia petanacuichiwa, bapoxonae ichamona barapomonae wanae jaintatsi beta pia petanacuichiwaxae. Matautano barapomonae ichamonaetha cui tsacatsacapiya yabara paeba xua pia pejume cowuntsiwa xua Cristo Jesús pejume cowuntsiwatsi.

Meje yabara po coyene xua naituta xua po coyene copiya moya peyawun xeinaewa po coyene xua wajume cowuntsiwa

¹⁴⁻¹⁵ Bequein ichichipan xua methaunxuae cataeinchi, daichitha daxota cata tinatsi xua icha pirapaeyo tapatopaewa tsane, bapoxonae yaputaename po coyene xua jiwi bewa exanaena. Barapo coyene beta xanepanaya penabarũ jinompae coyenewa Nacom peitabaratha tatsi, pomonae Nacom piamonae tatsi. Aparã yabara paeban pomonae Nacom piamonae tatsi, pomonae Jesucristo pejume cowuntsiwichi, pomonae nacaetuta xua Nacom wũnae pejainchiwa tsainchi, po Nacom ataya asũ pepoponaein. Barapomonae yajũntũ coyeneya jinompa Nacom pia pexainyei coyenewa tatsi. Mataũtano barapomonae yabara jume yawena Nacom pia pexainyei jume diwesi poxonae ichamonae abeya yabara paeba barapo pexainyei jume diwesi. ¹⁶ Waxainchi paebatsi jeichichi: “Pocotsiwa jume cowũntatsi Jesucristo, maisa bichocono xanepana bara be po coyenewa xua moya peyawun xeinaewa, po coyenewa jiwi jopa yaputaeyo”, jeichichi. Wayabara jume cowuntsiwa baxua meje:

Nacom naexana be jiton pia jũntũ coyeneya tatsi, xua barapara bapon Cristo.

Nacom pia Pejumope tũnaxũ tatsi yabara paeba, xua bapon yabara paebatsi, xua bara bapon yatsicaewa bara Nacom.

Irũ matatsunpiwi tane, xua bapon tainchi.

Bapon yabara cueicueijeichi jiwi yabara cueicueijeichi daxita nacuanpiwitha.

Daxita nacuanpiwi jiwanaomonae, bapon yabara jume cowũntatsi.

Yawano equeicha bapon peitaboco becaichatsi.

4

Meje yabara xua pomonae naerabiya pecuidubi jiwi pomonae seicayiia cuiduba xua ichi be jopa paxan ichiyo

¹ Nacom pia Pejumope tũnaxũ tatsi beta xaniwaichiya jeye xua poxonae po dapaetabũ ducuaena xua poxonae po dapaetha Nacom daxita wetsina, bapoxonae pomonae pejume cowũntsi jiwi jiwana Nacom pentinchi xua Nacom pejume cowũntsiwatsi. Yawa barapomonae napuna ponaena caurimonae po caurimonae jiwi muxuitorobiya muxujainyabatsi. Mataũtano barapomonae exanaponaena po pecuidubiwa caurimonae pia pecuidubiwa tatsi. ² Mataũtano barapomonae jume naitaewatsiya jume taena pocotsiwa paeba pomonae jiwi pemuxuitorobi jiwi. Barapo pemuxuitorobi jiwi cui nacopata xua bara abe exana nawita, po pejũntũ coyenetha xanepanaya natsipaeba poxonae abe exana. Daxota barapomonae jopa yaputaeyo po jũntũ coyene xanepana. ³ Barapomonae pomonae pemuxuitorobi jiwi, jiwi cui matawentatsi xua jitha peenaewa. Mataũtano jiwi jain matawentatsi xua jopa xae tsane icha penabanaewan, bequein taetha xua barapo penabanaewan Nacom tsijain exana jiwi. Pomonae pejume cowũntsiwi xuanõ pomonae peyaputaewi Nacom pia pexainyei coyenewa tatsi, poxonae barapomonae najume weteiba xua natsijain jacobeiba Nacomtha, jei tsaibi: “Nacom maisa jũntũ coyene weiweinan xua tana necatsiwaxaem pexaewa”, jei tsaibi, bapoxonae barapomonae bara xane barapo penabanaewan. ⁴ Daxita xua pocotsiwanõ Nacom forota baxuan wũnae. Jopa bewa naitematsi tsainchi pocotsiwa xua Nacom naca cata. Saya jame bewa noteibichi, yawano bewa Nacom natsijain jacobebichi xua jei tsaibichi: “Maisa Nacom jũntũ coyene weiweinan xua tana necatsiwaxaem pexaewa”, xua jei tsaibi tsainchi. ⁵ Nacom naca tsijain betsina barapo penabanaewan, matha wayorobixae Nacom Pejume Diwesi, yawa wanatsijain jacobebixae Nacomtha xua jei tsaibichi: “Nacom maisa jũntũ coyene weiweinan xua tana necatsiwaxaem pexaewa”, wajei tsaibixaetsi.

Meje yabara xua pon Jesucristo beta tanacuitatsi

⁶ Daxita barapo coyenein xuaunxuae catsipaebatsi, icha barapo coyenein tsipaebiya cuidubame ichamonaetha pomonae iru pejume cowuntsi jiwi Cristo, bapoxonae xam pon beta netanacuichim tsane Jesucristo. Bapoxonae ichamonae cacui taena xua xam bara bichocono jinya coutha jume cowanta na-eexanaponame, yawano xua neexanaexaeno pocotsiwan cacuidubatsi po pecuidubiwa bichocono pexeinya coyene. ⁷ Jume naitemare po diwesin xua saya jiwi cueicueiei xua jopa Nacom pia diwesiyo tatsi, po diwesin xua pejemai diwesin xua jopa xapain wunaeyo. Jinya coutha nacuidubare, xua nenajuntu coyene cana exanaenexam tsane icha be Nacom pia juntu coyene ichi. ⁸ Bequein penacui jujutsiwa xanepana xua pepon daunwei penaexanaenexa, ichitha jame xua penajuntu coyene xanepana exanaewa Nacomtha, baxua jame bichocono xanepana beyacaincha xua penacui jujutsiwa. Tsipei barapo penajuntu coyene xanepana exanaewa Nacomtha naca yawena anoxuae poxonae cataunxuae awiya jinompatsi po cae pin nacuathe, yawa xua bexa tsaneno naca yawenaena Nacom pia nacuatheicha. ⁹ Baraxua yatsicaya apara xainyei. Daxota daxita jiwi bewa yabara jume cowuntsina po coyene xua penajuntu coyene xanepana exanaewa Nacomtha. ¹⁰ Barapocotsi coyene waxainchi ajuntuyapusya daunweya exanatsi. Ichamonae naca atene exaneiba xua poxonae abe naca yabara paebeiba, tsipei waxainchi jume cowuntsiya wunae ewatatsi Nacom, pon ataya pepoponaein. Barapon Nacom ichichipa xua daxita jiwi pecapanenebiwa tsainchi abe pia peexanae cuiru coyenein weya tatsi. Bapon jiwi Pecapanenebiyaen abe pia peexanae cuiru coyene weya tatsi xua pomonae pia pejume cowuntsi jiwixaetsi.

¹¹ Barapo coyenein bewa ichamonae cui itorobiname, xua necuidubiwam pocotsiwa barapomonae peexanaewa tsane. ¹² Jopa jume naitawatsinde xua ichamonae cayabara paeba xua poxonae jopa cabaru cui itura jinaeyo xua poxoru nepewowixaem. Jame bewa beta exanaponaem xua necacui taeponaenexa pomonae pejume cowuntsiwi Jesucristo. Xua barapomonae tsita exaname, xua iru barapocotsi coyeneya peexanaenexaru. Beta cueicueijande, matautano beta poponde, yawa matautano antobe tsurucuaenabiyama jiwi xua ichamonae necacui taenexa. Yawa matauta beta poponde xua bichocono jume cowuntame Jesucristo xua ichamonae necacui taenexa. Yawa beta poponde xua nejuntu coyene bichocono xanepana Nacomtha xua ichamonae necacui taenexa. ¹³ Poxonae cataunxuae jopa patopaein tsane, jiwi peitabaratha yorobeibare Nacom pia pexeinya jume diwesi tatsi. Barapo diwesin yabara cueicueijande, matautano cuidubareno pomonae pejume cowuntsiwi Jesucristo. ¹⁴ Caena bayatha pitiri jiwi, po pitiri jiwi pejume cowuntsiwi jiwanamonaenae, canta jayabiya caitoroba xua necueicueiwiwa tsane Nacom pia pexeinya jume diwesi tatsi. Barapo pitiri jiwi canta jayaba Nacom peitorobixae. Barompaya jinya neexanae coyenewatha jopa yabara toxechiya exanaeinde po cui coyenewa Nacom bayatha cacata poxonae barapo pitiri jiwi canta jayaba, po cui coyeneyatha neexanaewa tsane pocotsiwa Nacom ichichipa.

¹⁵ Daxita barapo coyenein naitematsiya eexanaponde xua ichamonae necacui taenexa xua bara xanepanaya jume cocowuntaponame. ¹⁶ Dotam xua nejuntu coyenewa cananta xeiname. Matautano dotam xua pocotsiwa necuidubiwam. Awiya beta ajuntuyapusya jume cowanta ducuaenabiyama. Icha baxua exanaename jinya coutha nacapanepa exanaename xua Nacom cacapanepaena petupae cuiru coyene weya. Iru barichim tsane capanenebiya exanaename xua Nacom capanenebiyaena pomonae necajume naitawatsiwi.

5

Meje yabara xua pocotsiwa Timoteo bewa cuidubina pomonae Jesucristo pejume cowuntsiwichi

¹ Jopa jume itawetsinde pon pitirin. Jame saya bewayo muxuwere icha be ichim xua poxonae axa bewayo muxuwetame. Barichinde pewowi saya bewayo muxuwere icha be ichim xua poxonae eweicho jiwi saya bewayo muxuwetame. ² Pitiriwaxi saya

bewayo cuidubare icha be ichim xua poxonae ena saya bewayo cuidubame. Matautano saya bewayo cuidubare penawaxi icha be ichim xua poxonae amcho jiwi saya bewayo cuidubame xua tsita auram. Juntũ coyene xanepanaya yabara nanta xeinare barapowaxi, xua jopa abe neexanaewam.

³ Nacom piamonae, pomonae pejume cowũntsiwi, barapomonae bewa yawenaena powaxi pecuenta werapaewaxichi piseuriwi, saya jame poxonae barapowaxi jopa xeinaeyo piamonae tatsi, pomonae peyawenaewichi. ⁴ Icha ichawayo powayo pecuenta tũpaewayotsi piseuri, icha bapowa pipexui xeina yawa ichacuiitha icha xeina pia pemomo jiwi, barapomonae bewa yawenaena barapowatha. Barapomonae copiya bewa nacuidubina xua Nacom cui itoroba xua bewa ba tsita barũ cui itura jinaena bapowatha. Barapo coyene tsita exaneibina xua poxonae yaweneibina bapowatha. Barapomonae bewa yawenaena bapowatha xua bapowa piamonaexae tatsi. Bapoxonae bapowa jopa nantawenonae tsane xua ichamonae bapowa peyawenaewatsi. Barapomonae bewa antobeya apatsina xua bapowa antobeya apatsinchi be pentoma xua caena bayatha copiya pia peantobeya apatsixaetsi poxonae pexui. Jame barapo coyene Nacom tsita coyene xanepanatsi, matautano barapo coyene Nacom juntũ coyene weiweina exanatsi. ⁵ Powa bara xaniwaicha pecuenta tũpaewayotsi piseuri, powa xaniwaicha compa, powa jopa xeinaeyo piamonae matabũxũ pomonae peyawenaewichi, bapowa jume cowũntsiya wũnae ewata xua Nacom yawenaena xua bapowa yawenaeinchi. Pebaxuanexa tsane bapowa wũqueiba Nacomtha merawintha, yawa matakabintha. ⁶ Ichitha nama powa pecuenta tũpaewayotsi piseuri, powa saya pia coutha nayabara nanta xeina nawita xua penasiwaimeinchiwa pebiwitha, bapowa saya jopa nanta xeinaeyo xua jume cowũntsiya wũnae ewatsina Nacomtha, xua peyawenaewa tsainchi. Daxota bapowa pia juntũ coyene tatsi be tũpa, xua Nacom be tsita tũpatsi bara bequein bapowa popona. ⁷ Daxota xua ichamonae jopa abeya peyabara paebinexa pomonaetha pomonae pejume cowũntsiwi, cuidubare barapo peyawenaeyo coyenewa barapomonaetha pomonae pejume cowũntsiwi. ⁸ Meje xua pocotsiwe baxue: Icha pon jopa yabara nanta xeinaeyo xua piamonae peyawenaewa tsane, bapon apara bara exana be poxonae jopa jume cowũntsiyo. Bapon apara bichocono ajuntũcoyenyapubeya exana, beyacaincha pon jopa jume cowũntsiyo, pon daichitha piamonae yawena.

⁹⁻¹⁰ Barapo paperatha, po paperatha ichaxota saya wũn dubatsi powaxi pecuenta werapaewaxichi piseuriwi, barapo paperatha wũn tinadubare. Saya wũn tinadubare powaxi xua beyacaincha sesenta po weibe xeina, powaxi xua caena bayatha cae pebintha cuicuina, matautano wũn tinare powaxi xua ichamonae yabara paeba xua pinae bapowaxi xanepanaya exana. Pocotsi coyenein xua poxonae barapowaxi xua xanepanaya exana baxue meje: Bapowaxi beta wichita pia pexui; yawa bapowaxi beta matenta weiweinaya apateiba pomonae petapateibiwichi pia bontha; yawa bapowaxi taxu quiateiba pomonae pejume cowũntsiwi Cristo pomonae petapateibiwichi pia bontha; yawa bapowaxi yaweneiba pomonae peacopeibi jiwi; yawa bapowaxi daxita carepaya coyeneintha exaneiba po coyenein bichocono jiwi tsita xanepanatsi.

¹¹ Ichitha jopa wũn tinaeinde powaxi cataunxuae taacoibichi xua xeina sesenta po weibe. Tsipei ichacuiitha bapowaxi juntemainetsipa pocotsiwa bayatha Cristo yabara tsiwũnae muxu duta xua jopa equeicha penotsiwa icha pebiwi. Bexa barapowaxi equeicha icha pebiwi benotsipa. ¹² Barapowaxi Nacom yabara paeba xua pinae barapowaxi barapara natsicuenta xua abe peexanaexae, poxoru jopa exanaeyo pocotsiwa bayatha yabara tsiwũnae muxu duba Cristotha pocotsiwa xua exanapaebeiba. ¹³ Matautano barapowaxi fifina, jopa ichichipaeyo xua penacuichiwa daxota saya daxita bontha siwa poneiba, matauta saya cueicueijejei tsurubenanaebiya xua ichamonae peyabara paebiwatsi pocotsiwa xua jopa xapain pexeinya diwesiyo. Matautano barapowaxi fayacota dubenanaebiya ichamonaetha. ¹⁴ Daxota powaxi piseuriwi pecuenta werapaewaxichi, powaxi xua penawaxi, xan saya nanta xeinan xua barapowaxi barabũ moya jitha enaena equeicha. Barabũ moya equeicha xexeinaponaena pexui, yawa moya barabũ xua pia boxi

bara beta ewatsina. Matautano barapowaxi jopa bewa abe exanae xua daxota ichamonae pomonae jiwi peaitafaetabi jiwi abe yabara paebina xua abe yabara paebinchi pomonae pejume cowuntsiwi. ¹⁵ Barapowaxi jiwana powaxi penawaxi powaxi pecuenta werapawaxichi piseuriwi, barapowaxi bayatha bara apra exana dubenanaebiya pocotsiwa xua caurimonae pia pentacaponaein tatsi cui itoroba, pon Satanás.

¹⁶ Icha petsiriwa, powa pejume cowuntsiwayo Jesucristo, icha bapowa tapopoinchi pia botha pijimonae jiwana wayo tatsi powayo pecuenta tupaewayotsi piseuri, barapo pejume cowuntsiwayo bewa yawenaena bapowatha. Barapo pejume cowuntsiwayo jopa bewa copatsi tsane xua pomonae pejume cowuntsiwi apatsina pexaewa bapowatha, powa pecuenta tupaewayotsi piseuri. Bapoxonae pejume cowuntsiwi itacupatsi xua yawenaena powaxi xua xaniwaicha pecuenta werapawaxichi piseuriwi xua powaxi jopa pexeinaexae piamonae matabaxu jiwi tatsi pomonae peyawenae jiwichi.

¹⁷ Pomonae pejume cowuntsiwi bewa bichocono xanepanaya baru cui itura jinaena xua pitiri jiwi baru cui itura jinaeinchi, po pitiri jiwi betiya xanepanaya canamataxeinatsi pomonae pejume cowuntsiwi. Po pitiri jiwi cueicueijejei Nacom Pejume Diwesi, matautano xua cuiduba barapo diwesi, barapo pitiri jiwi bewa bichocono xanepanaya baru cui itura jinaetsi yawa bewa pentoma catsibichi beyacaincha icha pitiri jiwi. ¹⁸ Nacom Pejume Diwesitha jeye: “Duwein pon pewun buey, pon pexu xu tanacaponae xua poxonae nacuitapona jopa wano atsinde pocotsiwa bapon taayapubetsi poxonae nabusi matoma xaexaepona pentacona”, jei. Equeicha Nacom jeye: “Ponba tanacuita ichan bapon nantawenona xua xeina pia petanacuichiwa matoma”, jei Nacom.

¹⁹ Jopa cui yopichinde pitirin xua abe exana pon pomonae pejume cowuntsiwi canamataxeinatsi icha jopa xeinaem dos poyobe xua iruru cui taneru xua ichacuitha tres poyobe xua iruru cui taneru pocotsiwa barapo pitirin xua baxua bara exana.

²⁰ Ichitha pitirin pon cataunxuae abe exanapona, bewa cui yopichiya itawetsim bapon xua daxita pomonae pejume cowuntsiwi peitabaratha tatsi, xua bapoxonae iru ichamonae pejunuwinexa xua abe peexanaewa, icha be poxonae xua bapon ichi.

²¹ Caitorobatsi Nacom peitabaratha tatsi yawa Jesucristo peitabaratha tatsi. Matautano caitorobatsi matatsunpiwi peitabaratha tatsi, po matatsunpiwi Nacom itapeta. Exanaponde barapo tacaitorobi coyenewantsi ichitha jopa xeinaeinde po juntu coyenewatha xua nanta xeiname xua caein pebin bichocono peainya cuin beyacaincha ichan. Icha barapocotsi juntu coyenewatha cayabara nanta xeinaeya exanaetsipame jopa xainyeya exanaetsipaem. ²² Abu bepijawa jopa mata jayabinde pitirin, xua pecanamataxeinaenexatsi pomonae pejume cowuntsiwi, tsipei icha bapon abe exanaetsipa apra baxua be iru xam yawename xua bapon abe peexanaewa. Dotam jinya coutha beta xanepanaya najuntu coyene eenare xua abe neexanaeyainwa.

²³ Bichocono necotsoroxaewa, yawa bichocono neparaxaewa, jopa saya u meisa apaeinde mera. Jame moya tsiwiyo yawa muxuna apare vino merayo.

²⁴ Ichamonae cui taneme abe pia peexanae cuiru coyenewan tatsi, pewunaeya xua po mataqueitha poxonae Nacom yabara paebina xua jiwi penatsicuentiwa xua abe peexanaexae. Ichitha nama anoxuae jopa ichamonae cui taem abe pia peexanae cuiru coyenewan tatsi, apra jame bexa yaputaename po mataqueitha poxonae Nacom yabara paebina jiwi xua penatsicuentiwa xua abe peexanaexae. ²⁵ Barichi pocotsiwa jiwi xanepanaya exana ichamonae nexa, baxua ba jiwi anoxuae cui tane. Bequein ichacuitha barapocotsi xanepanaya peexanae coyenewan jiwi jopa cui taeyo anoxuae, ichitha bexa tsane jiwi taena barapo coyenewan, tsipei poxoru barapo coyenein jopa bapana ataya tsitecaeya moya peyawun xeinaewa.

6

¹ Pomonae ba pebusi cui tatayebeibiwichi, pomonae pejume cowuntsiwi Jesucristo, xua pomonae amanaya tanacuita pia pecanamataxeinaewichi, po pecanamataxeinaewichi jopa jume cowuntsiyo Jesucristo, barapomonae ba bewa baru cui itura jinae

pia pecanamataxeinaewichi. Bewa baxua exanaena xua barapomonae pomonae pecanamataxeinaewi jopa abe peyabara paebinexa Nacom pia cui coyenewa tatsi, matautano xain jopa abe peyabara paebinexa pata pecuidubiwa xua pocotsiwa pacuiduban Jesús yabara. ² Ichamonae pomonae pebusi cui tatayebeibiwichi, pomonae pejume cowantsiwi Jesús, barapomonae xeina pia pecanamataxeinaewichi, pomonae iru jume cowanta Jesucristo. Barapo pebusi cui tatayebeibiwichi jopa bewa exanae po coyene xua poxonae jopa xeinaeyo pebaru cui itura jinae coyenewa pia pecanamataxeinaewitha, xua be cae peweicho penatsicotae jiwixae xua pejume cowantsixae Cristo. Jame barapo pebusi cui tatayebeibiwichi bewa baru cui itura jinae pia pecanamataxeinaewichi. Matautano bewa beta tanacuichi barapocotsimonae, beyacaincha ichamonae pomonae jopa jume cowantsiyo Jesucristo pomonae pebusi cui tatayebeibiwichiru pia pecanamataxeinaewichi. Barapo pebusi cui tatayebeibiwichi bewa beta tanacuichina pia pecanamataxeinaewichi, peyawenaenexa barapomonae pomonae iru jume cowuntaru Jesucristo. Matautano bewa beta tanacuichina tsipei Nacom antobe barapomonae, xua antobetsi barapomonae pomonae pia pecanamataxeinaewichixaetsi.

Meje yabara xua waxeinaewa pepa pexainyei coyenewa xua apra wajume cowantsiwa

Barapo cui coyene cuidubare jiwitha xua jiwi beta peexanaewa tsane: ³ Ichacuitha ichan cuiduba pocotsi coyenewa xua penaerabiwa. Matautano jopa yabara baru jume jejeyo po pexeinya pecuidubi coyenewa Jesucristo pia pecuidubi coyenewa tatsi, pon Wanacanamataxeinaein. Matautano bapon pon ichan jopa yabara baru jume jejeyo po pecuidubi coyenewa xua Nacom juntu coyene xanepana exana jiwitha. ⁴ Pon ba bara pocotsi coyeneya exana bara apra pon jiwi peabin xua peyaputaenxae. Bapon apra ichitha jopa peyaputaein. Bapon naemata yainyaba nawita ichamonaetha pia xua jiwi penjume matsontsonobinexa bapontha. Daxota barapomonae nantiya nauwa. Matautano barapo jiwi nantiya naba. Matautano barapo jiwi nantiya abeya nayabara paeba. Matautano nantiya abeya nayabara nanta xeina. ⁵ Po pebiwi jopa xanepanaya nanta xeinaeyo, barapo pebiwi najume matsontsonoba nawita. Barapomonae jopa yaputaeyo pocotsiwa pexainyei coyenewa. Bapomonae najei pia coutha: "Icha jan tsane: 'Jume cowantan Jesucristo', jan tsane bapoxonae xain copei nawita xeinaein", najei barapomonae pia coutha. ⁶ Bara xaniyei, poxonae Jesucristo jume cowuntatsi baxua bara bichocono naca yawena. Ichitha saya naca yawena icha waxainchi muxuna xeinatsi wajuntu coyeneintha xua beta juntea wajinompawa bequein xua naacopeibi taethatsi. ⁷ Tsipei poxonae naexanatsi jopa cayawa naexanaetsi barapo copei po cae pin nacuathe. Matautano tsipei poxonae werapaeinchi jopa barapo copei cawerapae tsainchi. ⁸ Ichitha icha xeinatsi pexaewa, yawa paparuwan bara bapoxonae bewa juntea jinompaeinchi. ⁹ Seicaya nama pomonae bichocono ichichipa xua copei pexeinaewa, barapomonae exana pocotsiwa caurimonae pia pentacaponaein tatsi juntu coyene jujuta. Daxota barapomonae exana pocotsiwa xua ichichipa, xua jopa wunaeyo, xua pocotsi coyenewatha abeya pia coutha nacana exana. Baxuan exana pocotsi coyenewatha xua barapomonae peweraweracaewa tsane. ¹⁰ Poxonae jiwi bichocono ichichipa paratixi, bapoxonae tamropata notarucupa xua bichocono abe peexanapon- aewa. Barapo peichichipae coyenewa paratixi, jiwi cana exanatsi xua pepentsiwa po coyene xua Jesucristo pejume cowuntsiwatsi. Daxota barapomonae be pia coutha najuntu coyene jopojopei exana xua saya peyabara nanta xeinaexae paratixi, xua peichichipaexae paratixi.

Meje yabara xua bewa Timoteo beta ajuntuyapusya jume cowanta ducuaenaebiyana

¹¹ Tsipei xam Timoteom Nacom piamonae tatsi jiwanam, baxuan cuitaya naetsiriware, pocotsiwa po coyenewatha weraweraca necaexanaewa. Beta poponde Nacom nexa xua nejuntu coyene xanepanaewa tsane Nacomtha. Eexanaponde pocotsiwa Nacom ichichipa. Jume cowanta ducuaenaebiyama Nacom, yawano antobe tsurucuaenaebiyama Nacom, yawa jiwithano. Matautano saya juntea poponaeya exana ducuaenaebiyama

pocotsiwa Nacom caitoroba poxonae ichamonae bequein cata abe exana. ¹² Xanepanaya antuyapusuwa jume cowuntsiya exana ducuaenaebiyama pocotsiwa Nacom ichipa. Peantuyapusuwa po peantuyapusuwa ataya tsiteca, barapo peantuyapusuwa jopa copatsinde xua necajuntu coyene weaichurucuaewa. Barapo peantuyapusuwa Nacom cacata. Xam baxua xanepanaya yabara paebame pin bicheitha. ¹³ Catsipaebatsi Nacom peitabaratha, pon pia peantuyapusuwa cata daxitan coyeneintha. Matautano catsipaebatsi Jesucristo peitabaratha, pon beta jume nota, xua pon Poncio Pilato beta jume notatsi. ¹⁴ Caitorobatsi xua neexanaewa tsane pocotsiwa catsipaebatsi. Beta xeinare Nacom pia peitorobi coyenewa xua jopa icha coyeneya yabara cuiya exanaem tsane. Exande barapo peitorobiwa xua jopa Nacom abeya necayabara paebiwa tsane xua abe neexanaewam. Baxua eexanaponde, beya poxonae Jesucristo equeicha patopeicaena pon Wanacanamateinaein. ¹⁵ Poxonae po mataqueitha Nacom ichichipaena bapoxonae barapo mataqueitha Jesucristo naitutsina jiwitha. Jiwi yaputaena xua bapon Nacom meisa compa xeina daxita peayapusu itorobi coyenewan. Bapon meisa compa peyawa jinaein pejuntu coyene weiweinae coyenewa. Bapon pon jiwi itorobiya pia pepa Peewatsinchi tatsi pia peayapusu itorobi coyenewa xeina beyacaincha xua ichamonae xeina pomonae jiwi itorobiya pia pepa peewatsiwichi xua iru xeina pia peayapusu itorobi coyenewa. Matautano bapon pon jiwi pia pepa Pecanamamateinaeinchi pia peayapusu itorobi coyenewa xeina beyacaincha xua ichamonae xeina pomonae jiwi pecanamamateinaewichi. ¹⁶ Barapon Nacom meisa compa peyacuiya jinaein peantuyapusuwa po peantuyapusuwa xua ataya jopa peweraweracaewa. Barapo Nacom pecoicha yawa popona po pecoicha bichocono daunweya pentha. Baxota jiwi jopa itacupaetsi xua imoxoyo peponaewa xua bichocono pecoicha pexeinaexae. Dapon aibi, pon bayatha tainchi Nacom. Matautano dapon aibi pon itacupaetsi xua Nacom petaewatsi tsainchi. Barabu jiwi Nacom baru cui itura jinaeinchi, xua ataya tsane. Matautano barabu Nacom itorobina jiwitha pia peayapusu itorobiwatha xua bara ataya tsane. Je bara ichi tsane.

¹⁷ Pomonae xua bichocono copei pexeinae jiwi itorobare xua jopa ichamonae aebi tsainchi. Matautano itorobare xua jiwi jopa pecayabara nanta xeinaewa tsane paratixi xua barapo paratixitha peyawenaenexa tsainchi xua daxota barapomonae jopa Nacom canantawenonae tsainchi. Tsipei paratixi saya bichoina nacaewita daxota barapomonae bewa jume cowuntsina Nacom, pon jopa juniya naca cataponaeyo daxita pocotsiwa xua po coyenein nantawenonatsi xua wanaca juntu coyene weiweina exanaenexa. ¹⁸ Cui itorobare barapomonae pomonae copei pexeinaewi xua xanepanaya peexanaewa tsane. Matautano barapomonae itorobare xua nawita pexeinaewa tsane pocotsiwan xua xanepanaya peexanae coyenewan, icha be juta coyeneya ichi poxonae copei nawita xeina. Barapomonae bewa piawa jiwana wecaenaetsina xua ichamonae pecatsibiwa tsainchi pomonaetha pomonae xua jopa xeinaeyo xua pocotsiwan nantawenona. Matautano barapomonae bewa yawenaena piamonae. ¹⁹ Icha barapomonae barapo coyenein exana, bapoxonae barapomonae pia coutha nayawena xua nacui wunaeta pocotsi coyenewa xua bexa tsane, xua daxota bapoxonae pexeinaewa tsane peajuntuyapusuwa, po peantuyapusuwa xua ataya tsiteca.

Meje yabara xua Pablo najume wetsiya paeba

²⁰ Xam Timoteom, xaniwaicha xeinaeya capoponde po pecuidubiwa Nacom cacata. Jopa jume naitaewatsinde po jumein xua bapana jiwi jopa yawenaetsi. Matautano jopa jume matsontsonoba exanaeinde ichamonaetha pomonae yabara cueicueijej pocotsiwa xua peyaputae coyenewa, po peyaputae coyenewa jopa xaniwaicha peyaputae coyenewiyo. ²¹ Pomonae jume cowunta pocotsiwa poxonae yabara cueicueijej peyaputae coyenewa, barapomonae jiwana nacui barapenta po coyene xua Jesucristo pejume cowuntsiwatsi.

Barabu Nacom pon jiwi Pecanamamateinaein, bichocono cayawenaena pia necaantobexae.

Baja Pablo.

Meje Po Carte Cotacaya Pablo Tatina, Timoteo Tatinatsi

Meje yabara poxonae Pablo tamropata pitaba xua tatina, Timoteo tatinatsi

¹ Jaco Timoteo, xan Pablon, Cristo Jesús pia peitorobi jiwi jiwana tatsin. Nacom neitoroba poxoru bapon baxua peichichipaewa. Xan Cristo Jesús pia peitorobi jiwi jiwana tatsin, tsipei Nacom bayatha peexanaexae pocotsiwa bayatha tsiyabara wūnae muxu duta jiwitha. Po peyabara tsiwūnae muxu dutsiwa, xua Nacom catsina jiwitha peajuntuyapusūwa, po peajuntuyapusūwa ataya tsiteca. Barapo peajuntuyapusūwa jiwi catsibeibinchi poxonae jiwi jume cowūnteibina Cristo Jesús. ² Xam, Timoteom, barapo carte cata tinatsi, xam be taxantom catsicotainchi. Xam bichocono caantobetsi. Ichichipan xua Nacom pon Waxa, irū Jesucristo, pon Wanacanamataxeinaein, baraponbe barabū amanayiya cayawenaenabe pia necaantobexaebe. Matautano baponbe nantanuweya cayabara nanta xeinaenabe pia necayawenaenexa tsanebe. Matautano ichichipan xua baponbe jūntema popona caexanaena.

Meje yabara xua Pablo yabara paeba xua Timoteo bewa jume cowūnta ducuaenaebiyaena

³ Poxonae Nacom tsipaebiban jan tsaibinje: “Nacom, maisa jūntū coyene weiweinan xua Timoteo neyawenaewam”, jan tsaibin. Barapon Nacom tanacuitan, tsipei tajūntū coyene netsipaeba xua pinae bara beta exanan. Barichi tamo susato jiwi tanacuita barapon Nacom. ⁴ Xam cayabara nanta xeineibatsi xua poxonae matha cain bichocono nesiwa wecoyam poxonae cacuenta warapatsi. Maisa be cataeinchi merawintha, yawa matacabintha xua bichocono tajūntū coyene weiweinaewa tsane. ⁵ Xan nanta xeineiban xua xam bara xaniwaicha beta jume cowūntsiya poponame Nacom. Po pejume cowūntsiwa xam Nacom tsita xeiname, barapo pejume cowūntsiwa copiya matha acue Loida, irū ena Eunice Nacomtha tsita xeinabe, beya poxonae xam irū jume cowūntame. Bara beta yaputan xua xam irū barapo pejume cowūntsi coyenewa Nacom tsita xeiname anoxuae.

⁶ Daxota catsipaebatsi, beta najūntū coyene tsacabare, xua yabara nanta xeiname po cui coyenewa Nacom cacata xua po cui coyenyatha xua xanepanaya neexanae ducuaenaebiyaenexa pocotsiwa Nacom caitoroba. Barapo cui coyene bayatha Nacom cacata poxonae canta jayabatsi. ⁷ Tsipei Nacom poxonae naca cata pia Pejumope tūnaxū tatsi, barapo pejumope tūnaxū tatsi jopa jiwi junuwa cana exanaetsi. Jame Nacom naca cata barapo pejumope tūnaxū tatsi, xua waxeinaewa tsane peayapusū itorobi coyenewa. Matautano Nacom naca cata barapo pejumope xua waxeinaewa tsane po cui coyene peantobe coyenewa xua watsita xeinaewa tsane Nacom matautano xuano jiwithano. Matautano Nacom naca cata barapo jumope xua waxeinaewa tsane po cui coyene beta penayabara nanta xeinae coyenewa xua beta peexanaewa tsane. ⁸ Jopa aurande poxonae yabara cueicueijam Jesucristo, pon Wanacanamataxeinaein, xua poxonae bequein ichamonae cacui capona. Matautano jopa neyabara aurande xua jiwi pecūbi botha taecaewa. Baxua necana exana tayabara cueicueijeixae Jesucristo, xua jiwi catsawiya taneyabara nanta xeinaexae xua pinae abe exanan. Cui barū jejande xua ichamonae bara canthūthū jopojopeya atene exana, icha xan ichin xua yabara cui copatan xua bara ichamonae atene tana neexanaewa tsane. Baxua cacana exana neyabara cueicueijeixae Nacom pia pexeinya diwesi jume. Nacom cacata peayapusūwa baxua nexa, xua jopa nejunuwiwa tsane poxonae caatene exana. ⁹ Nacom naca capanepa abe waexanae cuiru coyenein weya. Matautano Nacom naca waba xua Nacom watsita najūntū coyene xanepana exanaewa tsainchi. Aparā jopa naca wabiyo poxoru xanepanaya waexanaexaetsi. Aparā jame naca waba, tsipei caena bayatha yabara nanta xeina baxua, beya poxonae forota barapo cae pin nacue xua amanayiya pia wanaca yawenaetsi pia wanaca antobexae. Nacom naca yawena caemonae peburūya wanabarū jinompaexae Cristo Jesustha. ¹⁰ Nacom naca tsita itūta pia peantobewa poxonae itorobicatsi Jesucristo, pon

Wanacacapanenebiyaein. Bapon weraweraca cana exana po peayapusuwa xua xota jiwi tupa exanatsi. Matautano naca tsita itata po coyenewatha xeinatsi peantuyapusuwa, po peantuyapusuwa ataya tsiteca wajume cowantsixae Nacom pia pexeinya jume diwesi tatsi, po diwesi xua Jesucristo yabara.

¹¹ Nacom newaba xua tacueicueijeinexa barapo pia pexeinya diwesi jume tatsi. Matautano neitorobano xua tana necana exanaenexa Jesucristo pia peitorobi jiwi jiwana tatsin xua tacuidubinexa pomonae jopa judiomonae naexanaeyo. ¹² Taexanaexae baxua, daxota atene neexana ichamonae. Daichitha jopa aurinyo xua tayabara cueicueijejwa Cristo, poxonae bequein ichamonae atene neexana, tsipei yaputan pontha pon tajume cowantsixae xua peitacupaewatsi xua tana neyawenaewa. Bara beta yaputan xua bapon xeina peayapusuwa xua tana neyawenaewa. Bapon neyawena xua tacueicueijej tsurucuaenabiyaenexa tsane pocotsiwa bayatha bapon neitoroba, beya poxonae barapo matabi tsane, po matabitha poxonae patopeicaena Jesucristo.

¹³ Necui coyene jupaeya exana ducuaenabiya, po pecuidubiwa bichocono xanepana xua bayatha catsipaebatsi. Jume cowantsiya poponare, matautano antobeya poponde Nacom, iru jiwithano, caemonaeya peburuya wanabaru jinompaexae Cristo Jesustha. ¹⁴ Cateiteichiya yawa muxuna poponde pexainyei coyenewa, po pexainyei coyenewa Nacom pia Pejumope tunaxu tatsi cacata, po pejumope tunaxu tatsi naca baru jinompa.

¹⁵ Bayatha yaputaneme pomonae Asia nacuatha jinompa daxita barapomonae nepunapenta. Pomonae nepunapenta, barapomonae jiwana ichun pewun Figelo, ichun pewun Hermógenes. ¹⁶ Barabu Nacom pon jiwi Pecanamataxeinaein yabara nantanuweya nanta xeinaena pomonae Onesiforo piamonae tatsi, xua Nacom peyawenaewa tsane barapomonae. Bapon Onesiforo nejuntu tsacaba poxonae beta xanepanaya neyaweneiba. Bapon jopa neacauriyo xua jiwi pecubi botha taecaewa. ¹⁷ Poxonae bapon patopa Roma tomaratha bapon matowa newenawenei tsurucuaenabiya beya poxonae matapainya necaxina. ¹⁸ Barabu Nacom pon jiwi Pecanamataxeinaein, bapontha nantanuweya yabara nanta xeinaena peyawenaenexa tsane, poxonae po mataqueitha Nacom yabara paebina jiwi xua penatsicuenta xua abe peexanaexae. Xam yaputaneme bara, xua bapon neyawena nawita Efeso tomaratha.

2

Meje yabara xua Pablo yabara paeba xua ponba beta tanacuita pia pecanamataxeinaeinchi

¹ Xam Timoteom, be taxantom catsicotainchi. Najuntu coyene cui tsacabare xua nenanta xeinaenexa xua Nacom amanaiya jinya necayawenaewa tsane pia necaantobexae. Nacom baxua cata exana caemonaeya peburuya jinya nenaexanaexae Cristo Jesustha. ² Pocotsiwa xua bayatha nejume taneme xua cueicueijan pin bicheito itabaratha, bapocotsiwa xuya cuidubare pebiwitha, po pebiwi xua xuya jume cowantsiya xaniwaicha cuidubina ichamonaetha pocotsiwa xua cueicueijan.

³⁻⁴ Yabara baru cui copare xua bara ichamonae atene necaexanaewa tsane, nejume cowantsixae Jesucristo icha xan ichin xua yabara cui copatan xua bara ichamonae atene tana neexanaewa tsane. Poxonae baxua exaname, xam bara juta coyene ichim icha be soldadomonaepin ichi. Bapon ba atene exanatsi poxonae naba, xua peexanaexae pocotsiwa itorobatsi pia pentacaponaein. Soldadomonaepin ba dapocotsin aibi pon natsixana piawa poxonae cataunxuae awiya naba exana ichamonaetha, tsipei bapon bewa baxua exanaena xua pon pentacaponaein peitorobixae. ⁵ Barapocotsi juta coyeneya ichi, pon ba xua penaxenacaewa. Bapon jopa itacupaetsi xua xeinaena pocotsiwa pematomatsiwatsi xua poxonae bichoina cuinaepona icha jopa beta yabara exanaeyo pocotsi coyene xua peitorobi coyenewa barapo penaxenacaewa. ⁶ Pon ba bichocono nacuita pabitha bapon ba copiya bewa xeinaena xua pocotsiwa copiya penawetsiwa. ⁷ Beta yabara nanta xeinare xuaunxuae catsipaebatsi. Pon jiwi Pecanamataxeinaein cayawenaena xua yaputaename daxita.

⁸ Jesucristo yabara nanta xeinare. Bapon Jesucristo pon naexana xua David pia pemomoxi susato jiwi jiwana tatsi, po David Israel nacuapiwi itorobiya pia pepa peewatsinchi. Bapon Jesucristo equeicha Nacom Pexanto asu exana petupaе cuiru coyene weya. Nacom pia pexeinya jume diwesi tatsi, po diwesi xua Cristo yabara, barapo diwesi cueicueijan jiwitha. ⁹ Barapo diwesi tacueicueijeixae daxota ichamonaе atene neexana, beya poxonaе penaintotha necuba. Xan be pocotsin xua abe bichocono taexanaein nenatsicotane. Ichitha jopa itacupaetsi xua jume yancataba Nacom Pejume Diwesi xua ajumetsurucuae pecana exanaewa tsane xua poxonaе jiwi pecubi botha tana neetsixae. Tsipei awiya cataunxuae jiwi jume tane barapo diwesi. ¹⁰ Daxota jopa junuwinyo xua ichamonaе atene tana neexanaewa, matautano bara copatan xua bara moya necana exanaena baxua. Daxota baxua bara copatan pomonaе Nacom pia peitapetsi jiwi tatsi barapomonaе nexa, xua barapomonaе iru pecapanenebiyaenexa tsainchi xua Cristo Jesús capanenebiyaena. Poxonaе barapomonaе barapo diwesi xeinaena, po diwesi pecapanenebiyaе coyenewa, bapoxonaе muxuna xeinaena pexeinya peajuntuyapusuwa, po peajuntuyapusuwa ataya tsiteca xua Nacom pia nacuatheicha tatsi.

¹¹ Baraxue bara xainyei xua jei:

Icha copatatsi xua bara ichamonaе naca atene exana wajume cowantsixae Cristo beya poxonaе naca tupa exana, icha poxonaе Cristo cana ichichi, bapoxonaе yawa muxuna jinompaeinchi Cristo xua pia nacuatheicha.

¹² Icha waxainchi awiya jume cowanta dubenanaebiyatsi xua poxonaе bequein ichamonaе naca atene exana, icha Cristo cana ichichi, bapoxonaе barapo coyenewa yawa muxuna waxainchi Cristo, baru canamataxeinaeinchi jiwitha, waitorobiya ewatsinexa tsane barapo jiwi.

Icha waxainchi itawetsiya yabara jeichichi Cristo: “Bapon jopa yaputaeinyo”, jeichichi, bapon xuya itawetsiya naca yabara jei tsane: “Bapomonaе jopa yaputaeinyo”, naca yabara jei tsane Cristo.

¹³ Icha jopa beta xaniwaicha jume cowantsiya jinompaetsi, daichitha bapon cataunxuae exana ducunaebiyaena pocotsiwa xua bayatha jiwi yabara paebatsi.

Baxua exana, tsipei Nacom jopa itacupaetsi xua exana pocotsiwa jopa be pia cuiyiyo tatsi.

Meje yabara xua pon beta petanacuichin xua ichun beta petanacuichiwatsi

¹⁴ Xuaunxuae catsipaebatsi baraxua paebare ichamonaetha yawano cui itorobare baraxua barapomonaе Nacom peitabaratha tatsi. Jande barapomonaetha: “Jopa yabara pana najume matsontsonoba exanaeinde xua po diwesi ichamonaе pepaebixae”, jande. Barapo penajume matsontsonobiwa barapo coyenewatha bapana jopa naca yawenaе. Barapo coyenewa saya abe cana exana pomonaetha pomonaе jume tane.

¹⁵ Exande daxita pocotsiwan pexanepanaе coyenewa xua Nacom nexa, xua Nacom jinya necacui taenexa xua bara beta tanacuitame Nacom. Bapoxonaе xam jopa nayabara acauram tsane pocotsiwa xua beta xaniwaicha necaunutsiya paebixaem Nacom Pejume Diwesi, po diwesi pejume xainyei jume. ¹⁶ Jopa yabara najume matsontsonoba exanaeinde po jumein xua pejumexaei, po jumein xua saya yabara cueicueijei pocotsiwa xeina barapo cae pin nacuathe, po jumein xua bapana jiwi jopa yawenaetsi. Tsipei pomonaе bapocotsiwan paeba, eexanapona pocotsiwan abe peexanaе cuiru coyenewan.

¹⁷ Barapomonaē abeya pia pecuidubi coyenewan tatsi taju nayoyotapona, icha be ichi xua tsuweto xua bupana putsuna xua beya taju putsuna pona. Barapocotsi coyene xua taju nayoyotapona, exanabe pon pewun Himeneo iru pon pewun Fileto. ¹⁸ Baraponbe jume naitematabe pocotsiwa pexainyei coyenewa. Baponbe naerabiya jeibe: “Bayatha Nacom nacui weta xua asu exana, xua jiwi equeicha jopa asu peexanaewa tsainchi pomonaē bayatha werapa”, jei baponbe xua naeraba paebabe. Baponbe ainya muxu cana exanabe ichamonaetha xua barapomonaē jopa xapain pejume cowuntsiwa tsane Nacomtha. ¹⁹ Nacom pia pexainyei coyenewa, peayapusuwa, xua icha cui coyeneya jopa naexanaeyo. Barapon Nacom pia pexainyei coyenewa tatsi jeye: “Nacom pon jiwi Pecanamataxeinaein yaputane pomonaē piamonaexae tatsi”, jei. Matautano equeicha jeye: “Daxita pomonaē xua nawun duba xua jei: ‘Paxan Cristobaru pan, pon jiwi Pecanamataxeinaein’, jei, bewa barapomonaē naitematsina abe peexanaē cuiru coyenewan”, jei Nacom pia pexainyei coyenewatha.

²⁰ Botha ba ichaxota pin bo, barapo bo xeina penain coroton pocotsiwa pewun oro nain, yawano icha penainwan pocotsiwa pewun plata nain. Matautano ba muxuna xeina napae coroton. Matautano ba xeina tso robo coroton pocotsiwan be juruwaton. Po coroton xua pexeinya coroton, barapo coroton pecanamatawenonaenexa penabarū itata weiweinaē matabintha. Po coroton xua saya pexeinya coroton aibi, barapo coroton pecanamatawenonaenexa daxita matabintha. ²¹ Bara jutiya ichi, icha pebin ichichipa exana xua pocotsiwa pexanepanaē coyenewa pon jiwi Pecanamataxeinaein nexa, bapon bewa naitematsina abe peexanaē cuiru coyenewa xua Nacom pejuntu coyene xanepana exanaenexa bapontha. Bapoxonaē bapon itacupatsi xua peexanaewa daxita carepaya coyenein pocotsi coyenein Nacom tsita xanepanatsi.

²² Xam naitemare pocotsi coyenewan pewowi exana xua poxonaē abe exana. Exana ducuaenaebiyama pocotsiwa pexeinya juntu coyenewa. Matautano beta jume cowunta ducuaenaebiyama. Matautano antobe tsurucuaenaebiyama Nacom, matautano jiwithano. Matautano junte ma popona ducuaenaebiyama. Xam itapeta napuna ponde pomonaē pejuntu coyene xanepanaewi poxonaē Nacomtha tsipaeba pon jiwi Pecanamataxeinaein.

²³ Naitemare po peyabara najume matsontsonobiwa jopa xapain wunaeyo xua jopa xapain peyaputae coyenewiyo, tsipei xam yaputaneme xua jiwi barapocotsi jumetha ba yabara naba. ²⁴ Pon nama Nacom pon jiwi Pecanamataxeinaein, amanaya tanacuitatsi jopa bewa bapon jume matsontsonobi tsane. Jame bewa bapon xanepanaya wunaeya exanaena xua daxita carepaya coyene cuinta daxita jiwitha. Matautano bewa bapon beta cuidubina ichamonaē. Matautano bapon bewa saya junte ma poponaena poxonaē bequein abe taexanatsi ichamonaē. ²⁵ Matautano bapon bewa saya bewayo juntu coyene wunaeya muxuwetsina pomonaetha pomonaē peacuiitafaetabiwichi xua bapon xainyeya pia pecuidubiwa ichamonaetha. Matautano bapon bewa abu ewatsina xua icha metha Nacom copatsina xua barapomonaē icha juntu coyene pexeinaenexa xua peauraxae xua abe exana. Matautano barapon bewa abu ewatsina xua barapomonaē peyaputaewa tsane pocotsiwa xua Nacom pia pexainyei coyenewa tatsi. ²⁶ Poxonaē baxua yaputaena, bapoxonaē barapomonaē, pomonaē copiya pemuxufebiwi itacupaeinchi xua beta nanta xeinaena pejuntu coyenewatha. Barapomonaē yaputaena xua deta cou eexanapona pocotsiwa caurimonaē pia pentacaponaein tatsi jujata, xua pocotsiwa abe peexanaewa, pocotsiwa bapon peitorobixae. Bapoxonaē barapomonaē itacupaeinchi xua panenebiyaena bapon weya, matautano xua tamropata notarucupaena xua exana pocotsiwa Nacom ichichipa.

3

Meje yabara xua po coyeneya jiwi exanaena poxonaē po matabintha opi ducuaena

¹ Ichichipan xua neyaputaewa tsane xua poxonaē po matabintha opi dubenaena barapo matabin jiwi taayapube tsainchi. ² Jiwi barapo matabintha bichocono pia coutha naantobe tsane. Barapo jiwi bichocono u pitaparatiwichi tsane. Yawano

matautano aebina ichamonaetha. Matautano bichocono atsaca tsaneno. Matautano biataenano ichamonaetha, matautano Nacom biataeinchi. Matautano barapomonaе jopa jume jejei tsaibi tsane paxeiwi. Matautano barapomonaе jopa wecobe jacobiya notebiyo tsane poxonaе ichamonaе catsibeiba. Matautano abe yabara nanta xeineibina pocotsiwa Nacom piawa tatsi. ³ Matautano piamonaе jopa tsita xeinaе tsane peantobe coyenewa. Matautano ita aenaе-aenei tsurubenaеbiyaе tsane ichamonaetha. Matautano yopita dubenanaеbiyaena xua ichamonaе pocotsiwa abe peexanaewa. Matautano jopa itacupaе tsainchi xua najuntu coyene itorobina xua xanepanaya peexanaewa tsane. Matauta barapomonaе bichocono anaepanaena xua ichamonaе beinchi. Matautano barapomonaе bichocono aichaxaibi tsane pocotsiwan xanepana. ⁴ Barapomonaе pomonaе jiwi pecaenaetsi jiwi tsane. Jopa matha copiya yabara nanta xeineibi tsane pocotsiwan xua exana. Barapomonaе pia coya nacayabara nanta xeinaena xua peainya cui jiwi tsane. Saya barapomonaе itapetsiya naitomatsina xua pocotsiwa cui xeica penaexanaewa. Barapomonaе naitematsina pocotsiwa Nacom pia pexainyei coyene tatsi. ⁵ Bequein barapomonaе xanepanaya exana dubenanaеbiyaena icha be ichi xua poxonaе pomonaе xaniwaicha pejume cowuntsiwi, daichitha barapomonaе jopa xaniwaicha jume cowuntsiyo xua icha juntu coyene pexeinaewa tsane.

Jopa bewa bara pocotsimonaе imoxoyo napuna ponaem xua barapomonaе necuiyainwam. ⁶ Barapomonaе jiwana pomonaе bomuxuntha pateibina muxujainyabeibinchi yabuxi, po yabuxi jinompa barapo bomuxuntha, po yabuxi xua anacaura xua penacui yaputaexae xua abe exana bayatha. Barapowaxi awiya came jopa xanepanaya exanaeyo, poxoru saya exana pocotsiwa pia coutha ichichipa exana. ⁷ Barapo yabuxi jume naitaewata nawita, daxita carepaya po coyenein xua jiwi paeba, bara bequein jopa xanepanaya paеbiyo. Daxota barapo yabuxi jopa itacupaetsi xua peyaputaewa pocotsiwa xua Nacom pia pexainyei coyenewa tatsi. ⁸ Caena bayatha pon pewun Janes, iru ichun pewun Jambres, baponbe mara pexeinaeinbe, baponbe cui matawentabe Moisestha, xua Moisés pia peexanae coyenewatha. Icha baponbe ichi, barichi barapomonaе yabara jume matawenta Nacom pia pexainyei coyenewa tatsi. Barapomonaе saya yabara nanta xeina nawita pocotsiwa peabe coyenewa. Barapomonaе taseicatsi pejume cowuntsiwa, po pejume cowuntsiwa pexainyei jume. ⁹ Barapomonaе jopa beta dubenanaеbiyaе tsane, tsipei daxita nacuanpiwi cui yaputaena xua barapomonaе apara pomonaе jopa xanepanaya peexanaewi, icha be ichi poxonaе caena bayatha jiwi cui tane xua Janes iru Jambres jopa beta exanaeyobe.

Meje yabara po diwesi xua Pablo najume wetsiya paeba poxonaе Timoteo itorobatsi

¹⁰ Ichitha xam bara beta exanaponaе pocotsiwa tacuidubiwa. Matautano necui taneme xua bara beta poponan. Matautano necui taneme xua tacoutha yaputan pocotsiwa taexanaewa tsane Nacom nexa. Matautano necui taneme xua bara beta jume cowuntsiya poponan Nacomtha. Matautano necui taneme xua saya awiya beta junteма poponan poxonaе bequein ichamonaе jopa xapain necana exanaeyo. Matautano necui taneme xua bara antobeya poponan jiwi, matautano Nacomtha. Matautano necui taneme xua bara awiya Nacom tanacuitan. ¹¹ Xam yaputaneme xua jiwi bichocono abe necana exana tajume cowuntsixae Cristo. Matautano neyaputaneme xua jiwi bichocono atene neexana Antioquia tomaratha, Iconio tomarathano, Listra tomarathano. Ichitha pon jiwi Pia Pecanamataxeinaeinchi neyawena xua necapanepa barapomonaе pia xainya weya. ¹² Bara xaniwaicha, daxita pomonaе ichichipa xua najuntu coyene xanepana exana dubenanaеbiya Cristo Jesthа, barapomonaе iru atene exanaeinchi ichamonaе. ¹³ Ichitha pomonaе peajuntucoyenebe jiwi, iruru pomonaе pemuxujainyabi jiwi, daxita barapomonaе bichocono abe eexanaponaena beyacaincha xua copiya. Barapomonaе muxujainyabiya canamataxeina ichamonaе, xua abe peexanaenexaru, matautano xua barapo ichamonaе iru xuya pemuxujainyabiya canamataxeinaenexa ichamonaе, xua abe peexanaenexaru.

¹⁴ Ichitha xam awiya beta exana ducuaenaebiyama pocotsiwa xua nacuidubame, xuano xua bichocono nejume cowuntsiwa. Xam bayatha yaputaneme pomonae xua cacuiduba barapo coyenein, pomonae pejuntũ coyene xanepanaewi. ¹⁵ Poxonae pexuyotham yaputaneme Nacom Pejume Diwesi. Barapo diwesi itacũpatsi xua necacuidubiwa xua necacapanepaewanexa abe jinya neexanae cuiru coyene weya nejume cowuntsixae Cristo Jesús. ¹⁶ Daxita carepaya Nacom Pejume Diwesiin tatsi, barapo diwesiin Nacom ayapusũ diwesiin exana. Daxita barapo diwesiin xanepana xua jiwi pecuidubiwa tsainchi. Mataũtano daxita barapo diwesiin xanepana xua jiwi yaputane peexanaenexatsi poxonae abe exana. Mataũtano daxita barapo diwesi xanepana xua jiwi pemuxuwetsinexatsi xua xanepanaya peexanaewa tsane. Mataũtano daxita barapo diwesiin xanepana xua jiwi peyawenaenexatsi xua pejuntũ coyene xanepana dubenanaebiyenexa Nacomtha. ¹⁷ Barapo diwesiin jiton xanepanaya canacui weta exanatsi xua beta peexanaewa tsane pon Nacom piamonae jiwana jiton tatsi. Barapo diwesiintha daxita coyenein xeina xua barapon nantawenona, pocotsi coyeneintha xua bapon Nacom petanacuitsinexatsi, daxita carepaya po penacuichiwan xanepana.

4

¹ Nacom peitabaratha tatsi yawa Cristo Jesús peitabaratha tatsi, baponbe peitabaratha tatsi caitorobatsi. Bapon Cristo Jesús patopaetsica be pon jiwi itorobiya pia pepa Peewatsinchi. Mataũtano bapon yabara paebina jiwi xua penatsicuentiwa xua abe peexanaexae, pomonae xua anoxuae cataunxuae asũ jinompa, irũno pomonae xua bayatha werapa. ² Caitorobatsi xua cueicueijande Nacom Pejume Diwesi. Beta jume daunweya cueicueijam tsaibinde Nacom Pejume Diwesi poxonae jiwi ichichipa cajume taibina, mataũtano poxonae bequein jiwi jopa ichichipaeyo xua necajume taewa. Barapomonae jũntũ coyene yaputane exande xua barapomonae petaseicaewatsi pejuntũ coyene xanepanaewa Nacomtha. Mataũtano barapomonae yabara muxuwere abe pia peexanae cuiru coyenein tatsi. Mataũtano barapomonae jũntũ coyene cui tsacabare xua Jesucristo pejume cowuntsiwa tsainchi. Mataũtano bapana barapomonae jopa tsita xeinaeinde peaitaconaewa. Mataũtano bapana jopa nacui copatsim tsane xua necuidubaponaewa barapomonae, xua bequein barapomonae jopa Jesucristo pejume cowuntsiwichi taetham tsane. ³ Tsipei jopaena matabi poxonae po matabitha jiwi jopa jume cowuntsi tsane barapo pexainyei cuidubi jume. Barapomonae saya Ʃ jeichina po pecuidubiwi saya cuiduba pocotsiwa xua jiwi ichichipa jume tane. ⁴ Barapomonae saya naitemapenta xua aichaxaibi pejume taewa pocotsiwa pexainyei jume. Saya barapomonae Ʃ jume naitaewatsina ainya diwesiin, po diwesiin xua saya pejemai diwesiin. ⁵ Ichitha xam dotam. Najũntũ coyene babare xua neexanaeyainwa pocotsiwa barapomonae exana. Jopa junuwinde xua ichamonae poxonae caatene exanaena nejume cowuntsixae Jesucristo. Ichitha xam exana ducuaenere jinya nenacuichiwa xua Nacom pia pexeinya jume diwesi necueicueijei ducuaenetsiwa. Daxita wetsiya exanare pocotsiwa jinya netanacuichiwa Nacom.

⁶ Bara nama imoxoyo nebexubina tajume cowuntsixae Cristo. Mataũtano bara nama imoxoyo xua po mataqueitha tsane ponaein Nacom pia nacuatheicha. ⁷ Ajũntũcuiyapusũya amanayaban caurimonaetha Jesucristo nexa, icha soldadomonae ichi xua poxonae amanayaba pia peaitafaetabiwichi. Bayatha nacui wetan pocotsiwa xua bayatha Nacom neitoroba, icha jiton ichi xua patopa poxonae penaxenacaewa. Mataũtano jume cowuntsiya poponan Jesús, icha be pocotsi coyeneya ichi poxonae jiton beta yapu eena pocotsiwa itorobatsi pia pecanamataxeinaeinchi. ⁸ Anoxuae ewatan po pentoma Nacom necatsina xua tajũntũ coyene xanepanaexae bapontha. Pon jiwi Pecanamataxeinaein, pon xua yatsicaewa xainyeya jiwi yabara paebatsi xua penatsicuentiwa xua abe peexanaexae, bapon pentoma necatsina po mataqueitha poxonae bapon patopeicaena. Saya meisa jopa compa necatsi tsane, irũ barichi tsainchi baxua catsibinchi pomonae wũnae ewatsiya ichichipa xua pia pepatopaewa tsane bapon.

Meje yabara xua Pablo waba xua Timoteo wabatsi

⁹ Nainya nesiwa ponde poxonaē caitacupa. ¹⁰ Pon Demas, bapon nepunaxuba, tsipei bapon saya copei yabara cananta xeina nawita pocotsiwa po cae pin nacuathe xeina. Bapon Tesalónica tomara beya pona. Pon Crescente, bapon Galacia nacua beya pona. Pon Tito, bapon Dalmacia nacua beya pona. ¹¹ Meisa pon Lucas, bapon xote baru ecan. Wenawenande Marcos, cabaru dena tsane, tsipei bapon itacupatsi xua tana neyawenaewa tsane. ¹² Pon Tíquico bapon Efeso tomara beitorobiyan. ¹³ Poxonaē nesiwa denam, inta carenande po paparuwa aitiyu, po paparuwa cuentan pon Carpo, bapon pia botha tatsi Troas tomaratha. Diboronno inta carenande, yawa paperanno inta carenande xua inta ainya cui pocotsiwa.

¹⁴ Pon Alejandro, pon penain penacuichin, bapon inta abe exana. Pon jiwi Pecanamataxeinaein, bapon Alejandro pentoma catsinchi po pentoma po pecayabara matomatsiwatsi xua abe peexanaexae. ¹⁵ Dotam xua bapon, tsipei bapon aichaxaibi pocotsiwa po diwesin cueicueijeichi.

¹⁶ Poxonaē tacoutha nayabara jume yawenaeya cueicueijan pentacaponawewi peitabaratha, dapon aibi pon tana neyabara jume yawenaewa tsane. Daxita nepunapenta. Ichichipan xua Nacom bu jopa cabetsi tsane barapomonaetha xua tana nepunapentsixae. ¹⁷ Daichitha Nacom pon jiwi Pecanamataxeinaein, neyawena poxonaē bequein ichamonaē nepunapenta. Bapon peantuyapuswa necata xua beta tacueicueijeinexa pijume diwesi xua pejume taewa tsane daxita pomonaē jopa judiomonaē naexanaeyo. Bapoxonaē Nacom neyawena xua jiwi jopa necabetsiyo xua tatupaewa. ¹⁸ Bapon pon jiwi Pecanamataxeinaein, bapon necana exana xua tapanepaewa daxita carepaya abe peexanaē cuiru coyenein weya, xua daxota patopaein pia peitorobi nacua beicha. Barabu jiwi ataya wunaē jainchina Nacomtha. Je bara ichi tsane.

Meje yabara xua Pablo najume wetsiya paeba

¹⁹ Inta jacobare powa Prisca, iru pia pebin tatsi, bapon Aquila. Iruru inta jacobare pon Onesíforo piamonaē matabuxuyo tatsi. ²⁰ Pon Erasto bapon eca Corinto tomaratha. Pon Trófimo, bapon cuenta ponan Mileto tomaratha yaitama atene. ²¹ Jujure xua patopare xua pewunaeya poxonaē beya awabo tsane. Pon Eubulo, iru pon Pudente, iru pon Lino, iru powa Claudia, iruru daxita pomonaē pejume cowantsiwi, daxita barapomonaē cajacoba.

²² Barabu Jesucristo, pon jiwi Pecanamataxeinaein cabaru poponaena. Barabu Nacom amanayiya cayawenaena jinya necaantobexae.

Baja Pablo.

Meje Po Carte Pablo Tatina, Tito Tatinatsi

Meje yabara poxonae Pablo tamropata pitaba xua tatina, Tito tatinatsi

¹ Xan, Pablon, pon Nacom tatanacuichin matautano Jesucristo pia peitorobi jiton tatsin. Jesucristo neitoroba xua tayawenaewa tsane jiwi xua barapomonaе pejume cowantsinexa Nacom. Pewnaeya copiya Nacom itapeta barapomonaе, xua pejume cowantsiwa tsainchi. Matautano neitoroba xua barapomonaе yaputane taexanaenexa Nacom pia pexainyei jume diwesi xua daxota barapomonaе Nacom peitabaratha xanepanaya pejinompaewa tsane. ² Poxonaе barapomonaе jume cowanta Nacom, barapomonaе ewata xua Nacom catsina pia peajuntuyapuswa po peajuntuyapuswa ataya tsiteca. Bapon Nacom bapana jopa penaerabin. Barapo peajuntuyapuswa po peajuntuyapuswa ataya tsiteca, caena bayatha Nacom yabara tsiwunaе muxu duta jiwi poxonaе cataunxuae jopa nacia forotsiyo. ³ Ichitha anoxuae nama Nacom peichichipaexae barapo matabitha daxota jiwi yabara yaputane exainchi xua pia pexeinya jume diwesi tatsi. Nacom necopata xua bara tacueicuejeiwa tsane barapo diwesi daxita jiwitha. Nacom pon xua jiwi Pecapanenebiyaеin neitoroba xua tacueicuejeiwa barapo diwesi poxonaе necata barapo pia penacuichiwa tatsi xua tatanacuichinexa bapon. ⁴ Barapo carte cata tinatsi Titom, ponxaem be yatsicaewa taxantom catsicotainchi iru nejume cowantsixae Jesucristo. Barabu Nacom pon Waxa, iru Jesucristo pon Wanacacapanenebiyaеin petupae cuiru coyene weya, cayawenaenabe pia necaantobewaxaеbe. Matautano junteма popona caexanaenabe.

Meje yabara xua Tito Creta tunaeto nacuatha nacuita

⁵ Caena bayatha Creta nacia tunaetha cacuentapoinchi xua neyawenaenexa Jesucristo pejume cowantsiwi pocotsiwa xua nacata seicabe. Daxota cacuentapoinchi xua neitapetsinexa pitiri jiwi xua barapomonaе pecanamataxeinaenexa pomonaе pejume cowantsi jiwi Nacom. Baxua eexanaponde daxita i dapo tomarantha icha be pocotsi coyeneya bayatha caitorobatsi. ⁶ Bayatha catsipaebatsi xua pon barapocotsi pitiri jiwi jiwana pin bewa poxonaе poponaena bewa iche: Bapon bewa xanepanaya poponaе xua ichamonaе jopa petsita natsicuentinexa tsainchi xua abe peexanaexae bapon. Matautano bapon saya bewa cae petsiriwa xeinae. Matautano pia pexui tatsi bewa jume cowantsi Nacom. Matautano pia pexui tatsi xanepanaya bewa jinompae xua daxota ichamonaе jopa peyabara paеbiwa tsane xua abe exana barapo pexui. Barichi matautano xua ichamonaе jopa peyabara paеbiwa tsane xua barapo pexui jopa jume jejeyo pocotsiwa coxiyun itoroba. ⁷ Po pitiri jiwi canamataxeina pomonaе pejume cowantsiwi Nacom, barapomonaе tanacuita Nacom piawa. Daxota ainya cui xua barapomonaе xanepanaya bewa jinompae. Barapomonaе jopa bewa jumefebi pocotsiwa xua Nacom itoroba. Matautano jopa bewa exanae pocotsiwa jiwi nainya bichoina anaepanaya jume nota. Yawano jopa bewa nacupa exanae, yawano jopa bewa nacayatsi. Yawano jopa bewa pitaparaxixichi poxonaе jopa xapain exanaeyo penacuichiwa. ⁸ Jame bewa barapomonaе matenta weiweinaya wabeibi pomonaе pesiwa ponebiwichi pia bontha. Yawa bewa ichichipae pocotsiwa xua wunaе. Yawa bewa xanepanaya cayabara nanta xeinae. Yawa bewa beta exanae ichamonaetha. Yawa bewa exanae pocotsiwa Nacom itoroba. Yawa bewa yaputae xua pia coutha najuntu coyene itoroba xua beta peexanaewa. ⁹ Bewa ajuntucoyenesya jume cowantsina Nacom pia pexainyei jume diwesi tatsi po diwesi barapomonaе cuidubatsi. Bapoxonaе barapomonaе itacupatsi xua xuya ichamonaе juntu coyene tsacaba xua pejume cowantsiwa tsainchi poxonaе cuiduba barapo pexainyei jume diwesi. Matautano barapomonaе itacupatsi xua jume jejei cana exana pomonaetha pomonaе bequein copiya pejume itawetsixaetsi pocotsiwa xua barapomonaе cuiduba.

¹⁰ Tsipei judiomonae jiwanapiwi bichocono pinmonae pomonae pejume febiwi xua Nacom itoroba. Bichocono pinmonae pomonae jiwi peitorobiwi xua pebiwi bewa wi thabinchi ichaxota penareixacaenaewa. Pocotsiwa barapomonae cuiduba ichamon-aetha saya pejumexaei. Yawano jiwi muxuitorobatsi nawitano. ¹¹ Barapomonae bewa pajume matawentsim xua jopa pepaebiwa tsane barapo jumein, yaitama barapomonae cana exana xua jopa jume cowantsiyo pomonae xua daxita matabuxumonaein tsiniya. Baxua exana poxonae cuiduba pejimai diwesin po diwesin jopa bewa cuidubi, jiwi peyamuxujainyabiya wucaenexatsi paratixi.

¹² Caena bayatha popona pon Creta tunaetopiwi jiwanapin, pon piamonae yabara jeichi: “Wanacom pia peitorobi jume pepaebin tatsi”, jei. Barapon yabara cueicueijei Creta tunaetopiwi pomonae piamonaexae. Bapon yabara jeye piamonae: “Maisa Creta tunaetomonae, barapomonae jiwi muxuitorobeiba, yawa be unupiwi pomonae peaitoisa jiwi yawa napenajuba nawita yawa fifina nawita”, jei bapon. ¹³ Poxonae bapon baxua paeba barapara jume xainyeya paeba. Daxota xam Titom barapomonae bichocono jume matawende xua barapomonae xaniwaicha juntea pejinompaewa tsane xua Jesucristo pejume cowantsiwatsi. ¹⁴ Matautano cui matawende barapomonae xua jopa equeicha pejume naitaewatsinexa judiomonae pia pejimai diwesin tatsi. Matautano cui matawende xua jopa pejume naitaewatsinexa pomonaetha pomonae xua jiwi peitorobiwatsi xua jiwi pejume itawetsiwa tsane Nacom pia pexainyei jume diwesi tatsi.

¹⁵ Pomonae yabara jume cowanta xua Cristo tsitupa barapomonae, barapomonae jame pejuntũ coyene xanepanaewi. Barapomonae daxita po coyenein xua tane tsita xanepanatsi. Seicaya nama pomonae jopa yabara jume cowantsiyo xua Cristo tsitupa xua barapomonae tsitupatsi, barapomonae apara peajuntũcoyenebewi. Barapomonae daxita po coyenein xua tane tsita abetsi. Barapomonae pia penanta xeinaewan jopa xaexaenaecaeyo, yawa pia juntũ coyenein tatsi po juntũ coyenein itorobeibatsi xua poxonae peexaneibinexa, bichocono jopa xaexaenaecaeyo. ¹⁶ Barapomonae jei: “Nacom pajume cowantan”, jei. Daichitha poxonae exaneiba, icha coyene exaneiba icha ichi pomonae jopa pejume cowantsiwi Nacom. Bara barapomonae Nacom tsita abetsi pejume febixaetsi pocotsiwa itoroba. Matautano jopa itacupaetsi xua exana pocotsiwa xua pexeinya penacuichiwa.

2

Meje yabara pocotsiwa Nacom pia pexainyei jume diwesi tatsi

¹ Ichitha xam Titom pocotsiwa cuidubame bewa cayabara cuita cananta xeineibim xua ƚ pocotsiwa Nacom pia pexainyei jume diwesi tatsi. ² Pitiri jiwi muxuwere xua jopa bewa nacupa naexanae peatsaxa meran. Matautano muxuwere xua xaniwaichiya pejinompaewa tsane xua daxota ichamonae pebarũ cui itura jinaewa tsane, xua barapo pitiri jiwi pebarũ cui itura jinaewa tsainchi. Matautano muxuwere xua penajuntũ coyene itorobeibinexa xua peexaneibinexa po coyenein xua wũnae. Matautano muxuwere xua xaniwaichiya pejume cowanta dubenanaebiyaewa tsane xua Nacom xaniwaicha pejume cowanta dubenanaebiyaewa tsainchi. Yawano muxuwere xua piamonae peantobe tsurubenanaebiyaenexa. Yawano muxuwere xua ayapusũya jume cowantsina poxonae bequein ichamonae abe taexanatsi. ³⁻⁴ Barichi pitiriwaxi muxuwere xua xanepanaya pejinompaewa tsane, icha be ichi poxonae jinompa powaxi jume cowanta Nacom. Matautano barapowaxi jopa bewa cueicueijei tsane po jumein xua abe xua ichamonae yabara paebatsi. Yawa jopa bewa nacupa naexanae peatsaxa meran. Matautano barapo pitiriwaxi muxuwere xua piseuriwi peantobe nexa tsaibi tsane, xua daxota irũ xuya penawaxi pebarichinexa xua peexanaenexa po coyene wũnae xua peantobe nexa tsaibi tsane piseuriwi yawa pia pexuithano. ⁵ Matautano muxuwere barapo pitiriwaxi xua penajuntũ coyene itorobeibinexa xua peexaneibinexa po coyenein xua wũnae. Matautano muxuwere xua penajuntũ coyene xanepana exanaenexa. Matautano muxuwere xua

xanepanaya peewatsinexa pia boxi. Matautano muxuwere xua peyabara cui cananta xeinaenexa xua peyawenaenexa pomonaetha pomonae pia botha petajinompaewichi. Yawa muxuwere barapo pitiriwaxi xua jume jejei tsaibi tsane poxonae itorobeibatsi piseurixi xua ichamonae jopa abe peyabara paebinexa Nacom Pejume Diwesi.

⁶ Matautano barichi pewowi muxuwere xua penajuntũ coyene itorobeibinexa xua peexaneibinexa po coyenein xua wũnae. ⁷ Xam Titom barapo pewowi peitũtha tatsi xanepanaya eexanaponde daxita coyenein poxonae exaneibame. Barapoxonae barapo pewowi xua pebarichinexa xanepanaya peexanaenexa po coyenein wũnae. Poxonae pewowi cuidubame xainyeya cuidubare nejuntũ coyene wetsina. Matautano xanepanaya beta cuidubare. ⁸ Xanepanaya betiya cueicueijande xua ichamonae jopa abe necayabara paebiwa tsane. Daxota barapomonae aura tsaibi tsane xua abe necayabara paebiwiwa beta neexanaexae. Bapoxonae barapomonae jopa itacũpae tsainchi xua abe wanaca yabara paebiwa.

⁹ Tsipaebare pomonaetha pomonae pebusi cui tatayebeibiwichi xua amanaya tanacuita xua poxonae ichamonae tanacuitatsi, jande: “Paexande daxita xua painya nepaca canamataxeinaewi paca itoroba. Matautano xanepanaya patsita exande painya nepaca canamataxeinaewi. Jopa pin jumetha pajume noteibinde poxonae paca itorobeiba painya nepaca canamataxeinaewi”, jande. ¹⁰ Yawa jande: “Jopa pacaibinde, jame saya beta pata exande painya nepaca canamataxeinaewi, xua daxita jiwi painya nepaca cui yaputaenexa xua bara paexaname pocotsiwa Nacom paca cuiduba pia pexeinya jume diwesi tatsi, pon Wanacacapanenebiyaein abe waexanae cuiru coyene weya”, jande.

¹¹ Nacom bayatha naca yaputane exana xua bara naca yawena pia wanaca antobexae. Naca yawena poxonae naca capanenebiya. Barapo pecapanenebiyae coyene daxita nacuanpiwi nexa. ¹² Barapo coyene xua Nacom pia peyawenae coyene jiwitha pia peantobewaxae, naca cuiduba xua wanacui barapentsiwa tsane abe waexanae cuiru coyenein. Yawano naca cuiduba xua wapentsinexa xua po coyenein cayabara cananta xeinatsi po coyenein exana pomonae jopa pejume cowũntsiwi, xua pomonae jinompa po cae pin nacuathe. Matautano naca cuiduba xua najuntũ coyene itorobeibinchi xua waexaneibinexa po coyenein xua wũnae barapo cae pin nacuathe yawa xanepanaya wajinompa dubenanaebiyaenexa xuano xua xainyeya waexana dubenanaebiyaenexa pocotsiwa Nacom itoroba. ¹³ Yawa naca cuiduba xua wawũnae ewatsiya jinompaewa xua equeicha caewa patopaetsica pon xua bayatha Nacom yabara naca tsiwũnae muxu duta. Waxainchi ewatatsi xua Jesucristo pia pepatopaewa pexeinya peitũpanae coichatha. Bapon barapara wapepa Nacom xuano xua Wanacacapanenebiyaein. ¹⁴ Jesucristo nacaenaeta xua naca tsitũpa wanaca capanenebiyaenexa daxita coyenein weya xua abe waexanae cuiru coyenein. Matautano nacaenaeta wanaca jũntũ coyene xanepana exanaenexa poxonae naca yabara jũntemaina abe waexanae cuiru coyenein. Baxua Jesucristo exana xua piamonae tatsi pia wanaca exanaenexa, xua pomonaetsi xua waichichipaewatsi xua waexanaewa pocotsiwa wũnae.

¹⁵ Xam Titom barapo coyenein bewa cuidubim. Jũntũ cui coyene tsacabare xua barapomonae jũntema pejinompaewa tsane. Matautano muxuwere daxita barapo Creta tunaetopiwi xua bara xanepanaya peexanaewa tsane daxita peitorobi coyenyatha po peitorobi coyene xua Nacom cacata. Jinxoba barapomonae peitũtha exaname po coyenewa xua daxota barapomonae tsita pecui pawĩ nenaexanaewa.

3

Meje yabara po coyene bewa exanae pomonae Nacom pejume cowũntsiwichi

¹ Xam Titom barapo Creta tunaeto nacupapiwi equeicha caewa yabara nanta xeina exanare xua bewa barapomonae jume jejei xua peexanaewa tsane pocotsiwa barapomonae itorobeibatsi pomonae barapomonae pia peyanacua ewatsiwichi xuano pocotsiwa barapomonae itorobeibatsi pomonae pia pentacaponawewichi. Matautano muxuwere xua

bewa barapomonaē najūntū cui wūnaetsiya exaneibina xua peexanaenexa tsaibi tsane pocotsiwa xua wūnae. ² Mataūtano muxuwere xua bewa barapomonaē jopa abe paebi tsane xua ichamonaē abe peyabara paebiwatsi. Mataūtano muxuwere xua barapomonaē jopa bewa jume matsontsonobi ichamonaetha. Mataūtano muxuwere xua barapomonaē bewa jūntū coyene xanepanaya cueicueijeī ichamonaetha. Mataūtano muxuwere xua bewa barapomonaē barū cui itura jina dubenanaebiyaena daxita jiwi.

³ Caena bayatha copiya waxainchi jopa wajume cowūntsiwi, jopa Nacom wayaputaexae. Yawa jopa wajume jejei jiwi pocotsiwa Nacom naca itoroba. Yawa waxainchi naca itaxanumena. Waxainchi wajūntū coyene naca itoroba xua waexanaewa pocotsiwa waichichipaewa pocotsiwa xua abe. Mataūtano naca itoroba xua bewa exanaetsi po peabe coyene naca weiweina exana icha ichi pomonaē jinompa po nacuathepiwi. Mataūtano abe peexanaē cuiru coyenein exana dubenanaebiyatsi, xuano xua peuwi jūntū coyeneya jinompa dubenanaebiyatsi. Mataūtano ichamonaē naca ita aenae-aenei tsurubenanaebiya, yawano xua waxainchi nantiya naita aenae-aenei tsurubenanaebiyatsi. ⁴ Ichitha Nacom pon Wanacacapanenebiyaēin yabara naca yaputane exana xua po coyene bapon naca jūntū coyene xanepana exana, xuano xua wanaca antobewa poxonaē naca capanenebiya abe waexanaē cuiru coyenein weya. ⁵ Naca capanenebiya, apara jopa poxoruyo xua xanepanaya waexanaexae bapon nexa, apara poxoru nantanuweya naca yabara nanthū coyene xeina pia wanaca yawenaenexa. Poxonaē naca bautisaba meratha baraxua saya yabara caunuta xua Nacom pia Pejumope tūnaxū tatsi naca jūntū coyene xanepana exana. Poxonaē baxua naca cana exana bapoxonaē pena jūntū coyene xeinatsi, xua poxonaē Nacom pia Pejumope tūnaxū tatsi naca jūntū cui coyene yabara cajūntemaina abe waexanaewan. ⁶ Jesucristo pon Wanacacapanenebiyaēin nacata itorobica Nacom pia Pejumope tūnaxū tatsi pia jopa juniya wanaca yawenaenexa. ⁷ Poxonaē Nacom naca jūntū coyene xanepana exana, bapoxonaē naca cana exana xua jopa wanatsiaenae cuentsinexatsi bapontha. Bapon naca yawena pia wanaca antobexae. Daxota waxainchi ewatatsi xua Nacom wanaca catsibiwa tsane peajūntūyapusūwa, po peajūntūyapusūwa ataya tsiteca, tsipei bapon pia pexuichi.

⁸ Baxua jame xainyeya pepaebiwa. Ichichipan xua xam jume daunweya tsipaebiname barapomonaē xua bewa barapomonaē barapo coyene exanaena pomonaē xua pejume cowūntsiwixae Nacom. Bapoxonaē barapomonaē cui enatsi xua peyabara nanta xeinaewa po penacuichi coyenein xua ichamonaē tsita xanepanatsi. Barapo petanacuichi coyenein jame xanepana, yawa barapo coyenein jiwi yawenatsi. ⁹ Dotande xua necuiyainwande xua ichamonaē yabara necabarū najume matsontsonobiwa tsane po diwesin xua pejemai diwesin. Mataūtano cuiyainwande xua yabara necabarū cueicueijeīwa judiomonaē pia pamo susatopiwi tatsi pia wūnxi tatsi. Mataūtano cuiyainwande xua penajume matsontsonobiwa xuano xua anaya peyabara pepaebiwa Moisés pia peitorobi coyene tatsi. Tsipei ba poxonaē barapo coyene exana jiwi, jopa yawenaetsi xua xaniwaichiya pejinompaewa xua jiwi jopa pexainyewanxae.

¹⁰ Icha ichūn cana exana xua pomonaē Nacom pejume cowūntsiwichi, cana exanatsi xua barapomonaē pomonaē Nacom pejume cowūntsiwi be pomonaē jopa penayaitae jiwi penaexanaewa tsane xua penaita aenae-aeneiwa, bara bapon muxuwere. Icha equeicha jopa xapain exanaeyo equeicha muxuwere. Icha equeicha jopa beta exanaeyo bapoxonaē bapon itawere painya xainya weya. ¹¹ Yaputaneme xua barapon pia coutha najūntū coyene matanonoxuba xua abe peexanaē cuiru coyene peexanaewa. Daxota abe peexanaexae pia coutha natsicuenta exana Nacomtha.

Meje yabara xua Pablo muxu tsipaeba pocotsiwa bewa Tito exanaena

¹² Poxonaē nexainya beya cata itorobatsi Artemas, ichacuitha tsipae icha cata itorobatsi Tíquico, nexata bapoxonaē yacuinaya ponare Nicópolis tomara beya. Nexata barapo tomarathiya netaename, tsipei bayatha nanta xeinan xua baxotiya taecaewa tsane awūbotha. ¹³ Zenas pon jiwi yaweneibatsi peyabara yaputaeinxae peitorobi coyenein, irūnū pon pewūn Apolos pon xua casiwa ponabe baponbe yawendebe. Bara

exande be pocotsi coyeneya xua caitacupa xua yawename. Baponbe carebe pocotsiwa xua canantawenonabe poxonaewarapaenexabe xua jopa petaseicaenexa tsainchibe.
¹⁴ Barabũ wajiwimonae xanepanaya exanaponaena xua daxota peyawenaenexa xua peyawenaenexatsi pomonaewarapeibiwi pocotsiwa xua canantawenona. Bapoxonaewarapia jantũ coyenein tatsi Nacom tsita xanepanatsi.

Meje yabara xua Pablo najume wetsiya paeba

¹⁵ Pomonaewarataxantha ena barapomonaewaracajacoba. Painta jacobare pomonaewarajesucristo rejume cowantsiwichi, pomonaewarabichocono paantobein rejume cowantsixae. Barabũ Nacom paca yawenaena daxita paxam pia paca necaantobexae.
Baja Pablo.

Meje Po Carte Pablo Tatina, Filemon Tatinatsi

Meje poxonae Pablo tamropata pitaba xua tatina, Filemón tatinatsi

¹ Xan Pablon, ponxaein jiwi pecubi botha taneetsin xua tanatsipei cueicueijeixae Cristo Jesús yabara. Iru Timoteo, pon iru pejume cowuntsin Jesús, baponbe panbe barapo carte pacata tinatsi. Xam Filemón ponxaein bichocono paca antobetsi tsipei pana yantame xua cueicueijam Nacom Pejume Diwesi. ² Iru pata tinanbe pomonaetha pomona pejume cowuntsiwi Jesús pomona jinya botha nacaetuteiba. Iru barapo carte yabayo nexa powa pewun Apia, powa be wamcho watsicotaewa pejume cowuntsixaeru Jesús. Iru barapo carte pebin nexa pon pewun Arquipo, pon daunweya pana nebaru nacuita xua poxona pata cueicueijeixa Nacom Pejume Diwesi. ³ Barabu Nacom Waxa iru Jesucristo pon jiwi Pecanamataxeinaein paca yawenaena pia paca nacaantobexae, xuano xua juntema jinompa paca exanaena.

Meje yabara xua Filemón Cristo antobetsi xuano xua jume cowuntano

⁴ Poxona Nacomtha tsipaebeiban cayabara nanta xeineibatsi jan tsaibin: “Axa, Nacom cawanae jaintatsi tsipei Filemón nejuntu coyene weiweina exana”, jan tsaibin. ⁵ Daxota baxua caunuteiban, yaitama jume tan xua pinae jume cowuntame Jesús pon jiwi Pecanamataxeinaein. Matautano jume tan xua pinae antobem Jesús xua iruno pinae antobem daxita pomona pejume cowuntsiwi. ⁶ Nacomtha tawucan xua pomona Jesús pejume cowuntsiwi xua barapomona taena xua waxainchi be nacaemonaetsi wajume cowuntsixae. Matautano Nacomtha tawucan xua barapomona xanepanaya peyaputaenexa xua Nacom naca cana exana pocotsiwa bichocono nacata xanepana poxoru be nacaemonaetsi wajume cowuntsixae Cristo Jesús. ⁷ Taneantobemxae nejuntu coyene tsacarabame yawa nejuntu coyene weiweina exaname xua xaniwaicha juntema tapoponaewa tsane. Xam ponxaein be tayapin canatsicotainchi iru nejume cowuntsixae Jesús. Beta nepoponaexae daxota beta jinompa daxita pomona pejume cowuntsiwi Cristo Jesús.

Meje xua Pablo Filemón wucatsi xua Onésimo tawucatsi, pon Filemón pia pebusi cui taetaeinchi

⁸⁻⁹ Bequein bara taitorobi coyene xeinan xua po coyeneya bewa exanaename xua xan Cristo pia peitorobi jiwi jiwana tatsixaein, ichitha ichichipan xua xam neexanaewa tsane xua tacaantobexaetsi. Xan Pablon bara nama bichocono perun tsecaein matautano anoxuae jiwi pecubi botha neeta tanatsipei cueicueijeixae Cristo Jesús yabara. ¹⁰ Cacui itorobatsi xua neyawenaenexa Onésimo. Bapon taxanto be tatsicotaein taneyawenaexae xua cueicueijeixa Jesús yabara poxona cataunxae xote ecanje jiwi pecubi botha. Bapon bayatha nexainya weya nametaba, pon bayatha amanaya necata nacuichin.

¹¹ Bequein caena bayatha Onésimo amanaya jinya nebusi cui taetaeinchi, daichitha jopa xanepanaya cata nacuichiyo. Ichitha anoxuae bara xanepanaya penacuichin xam nexa yawa xan nexano Jesucristo pejume cowuntsixaetsi. ¹² Caewa cata itorobatsi bapon. Poxona bapon Onésimo patopiya, weyataeya jacobare tsipei bapon bichocono antobein. ¹³ Xan ichichipan xua bapon taxantha eca xua barapon tana neyawenaenexa po penacuichiwa inta exaname xua iru poxona cataunxae jiwi pecubi botha neeta tanatsipei cueicueijeixae Jesucristo pejume diwesi. ¹⁴ Ichitha jopa ichipaeinyo xua Onésimo tana neyawenaewa tsane icha jopa becopsim. Saya ichichipan xua xam exanaename pocotsiwa jinya coutha ichichipame xua jopa neexanaenexa pocotsiwa tacaitorobiwatsi. ¹⁵ Metha bayatha Onésimo nametaba nexainya werena saya be caetha nexa xua anoxuae bara tsitecaeya nebaru poponaenexa tsane. ¹⁶ Anoxuae nama bapon jopa bewa yabara nanta xeinaem xua bapon be pon pebusi cui taetaeinchi jitonsti. Anoxuae nama bewa catsita tsane xua bapon peainya cui jiton, beyacaincha be pon

pebusi cui taetaeinchi. Baxua jei pon bichocono peantobe jitontsi pejume cowuntsixae Cristo Jesús. Xan bapon Onésimo bichocono antobein. Ichitha xam nama bapon bewa bichocono antobem jinya necata nacuichixae jame yawano be neyapin tsicotaema iru pejume cowuntsixae Jesucristo, pon jiwi Pecanamataxeinaein.

¹⁷ Jinya eweicho tana necana exanaemxaem iru tajume cowuntsixae Jesús, daxota moya beta weyataeya matenta wabare Onésimo, icha be neichim poxona nententa weiweinaya wabame. ¹⁸ Icha bapon cata abe exana, icha ichauyo cantoma amanayaba moya newucare xua barapo matoma tacacatsinexatsi. ¹⁹ Xan Pablon cata tinatsi xua barompaya tacobetha yawano xua tacobe cou itaneto, xuaje: Bexa tsane pentoma cacatsinchi. Bequein jopa cawucaetsi pentoma po matoma xua tanematoma amanayabiwam xua bayatha tacayawenaexatsi xua nejume cowuntsiwa Jesús. ²⁰ Bara barichinde, be pon taeweicho tacanatsicotaeinchi nejume cowuntsixaeru Cristo. Inta exande xua caitorobatsi Jesús, pon jiwi Pecanamataxeinaein, pia pejume cowuntsiwi pia rejuntu cui coyeneya. Nejuntu coyene tsacarabare xua juntema xaniwaicha tapoponaewa tsane.

²¹ Daxota cata tinatsi tsipei yaputan xua jume jejam pocotsiwa caitorobatsi xuano xua equeicha nawita exanaename beyacaincha xua tacacui itorobiwatsi. ²² Bapoxonae inta bo tutu netsiwunaere. Tsipei bexa tsane paca taeyopiyaeinchi xua bayatha Nacom painya newucaexae xua tapaca taeyopiyaewatsi tsainchi.

Meje yabara xua ichamonae Filemón jacobatsi

²³ Epafras cajacoba pon iru xota eque jiwi pecubi botha penatsipei cueicueijeixae Cristo Jesús yabara. ²⁴ Matautano iru Marcos, iruno Aristarco, iruno Demas, iruno Lucas, daxita barapomonae matabuxuyo neyawena xua tacueicueijeijiwa Jesucristo yabara.

²⁵ Barabu Jesucristo pon jiwi Pecanamataxeinaein, paca yawenaena daxita paxam pia paca necaantobexae.

Baja Pablo.

Meje Po Carte Po Carta Nacom Pia Jiton Tatsi Tatina, Hebreomonae Tatinatsi

Meje yabara xua Nacom Pexanto itoroba jiwitha petacueicueijeinexatsi

¹ Caena bayatha Nacom itoroba pia peitorobi jume diwesi petacueicueijeji jiwichi. Barapomonae Nacom tacueicueijeichi xua poxona tsipaebatsi wamo susato jiwichi. Barapomonae matowa tacueicueijeji tsaibi xua Nacom tacueicueijeji tsaibichi matautano ainya coyeneintha tsipaeba xua Nacom tatsipaebatsi. ² Ichitha nama anoxuae matapainya barapo matabinthe po matabin opi dubena Nacom itorobica Pexanto wanacata cueicueijeinexa, yawa wayabara yaputaenexa Nacom. Barapon Nacom Pexantoxae tatsi caena bayatha barapo nacue forota. Matautano Nacom Pexanto caena barapoxona cana exana xua Pexanto tatsi pecanamataxeinaenexa daxita coyeneintha. ³ Nacom Pexanto tatsi pexeinya peitupanae juntu coyenein xeina po juntu coyenein Nacom xeina. Bapon Nacom Pexanto cui coyene jontatsi. Matautano bapon Nacom Pexanto tatsi pia pejume ayapusu itorobiwatha babatiya exana daxita carepaya nacuan. Nacom Pexanto tatsi nacui yabara jume weta xua Nacom Pexanto peyabara paebixae pejume diwesitha. Baxua exana poxonae naca tsitupa xua wanaca juntu coyene xanepana exanaenexa. Bapon naca capanepa abe waexanae cuiru coyenein weya. Bapoxonae bapon itaboco beicha pona penacuaretsinexa pexeinya peecaethopeibiwatha Nacom pia coxa weya tatsi xua itaboco beicha xua Nacom pia peecaethopeibiwatha tatsi beicha.

Meje yabara xua Nacom Pexanto tatsi peainya cuin beyacaincha matatsunpiwi

⁴ Nacom Pexanto ainya cui cana exana beyacaincha matatsunpiwi. Nacom baxua tsita itapeinya xeina xua poxonae wun duta Pexanto xua po wun jei: “Nacom Pexanto”, jei, po wun bichocono ainya cui beyacaincha matatsunpiwi pewun. ⁵ Tsipei Nacom bapana jopa jeiyo matatsunpintha:

“Xam Taxantom, anoxuae jiwit tsita itapeinya
xeinan xua xan jinya axan”,

jopa bapana jei Nacom matatsunpintha.

Matautano bapana jopa jei matatsunpin yabara:

“Xan bapon pia paxa tatsin tsane,
bapon bara taxanto tsane”, jopa
bapana jei Nacom xua matatsunpin
peyabara paebiwatsi.

Saya ba meisa Nacom Pexantotha
yabara paeba barapo jume.

⁶ Matautano poxonae Pexanto itorobica po cae pin nacuamonaepiwitha tsique, pon yatsicaya compa tatsi, Pexanto yabara jei:

“Barabu daxita tamatatsunpiwimonae
Taxanto wuna jaintinchi”, jei Nacom.

⁷ Nacom yabara jei matatsunpiwi:

“Tamatatsunpiwi itoroban xua nainya inta
nacuita icha joibo ichi xua nainya pona
poxonae itoroban barapo joibo.
Barichi barapomonae itoroban xua inta
daunweya nacuita icha nawa coicha ichi xua
daunweya taxua poxonae itoroban barapo nawa”,
jei Nacom.

⁸ Ichitha nama Nacom Pexantotha jei:

“Jaina, xam ponxaem Nacom, ataya tsitecaeya
itorobiya ewatsiname xua

itorobathopequeibame jiwi.

Jinya neitorobiya ewatsi coyenewa

bara ataya pexainyei coyenewa.

⁹ Xam ichichipame pocotsiwa exana pomonae xanepanaya peexanaewi.

Matautano bichocono aitaetaetim pocotsiwa exana pomonae abe peexaneibiwi.

Daxota xan Nacom ponxaein, jinya Nacom

bichocono cajuntũ coyene weiweina

exanatsi, beyacaincha xua jinya jiwimonae

juntũ coyene weiweina exanan”,

jei Nacom Pexantotha.

¹⁰ Equeicha Nacom Pexantotha jei:

“Xam pon pepa Necanamataxeinaem jiwi,

caena bayatha forotame barapo cae

pin nacua poxonae aena.

Jinya coya exaname peitaboco.

¹¹ Daxita baxuan pocotsiwan xua jinya

neexanaewam weraweracaena.

Tsipei daxita baxuan saya peruwan tsane,

icha be poxonae paparuwa ichi xua

peruwa tsane xua tsapatsapaca.

Ichitha xam nama ataya

tsitecaeya poponaename.

¹² Barapo cae pin nacua irũ barapo itaboco

poxoru peruwa tsane pichiname xua

nexubinexa, xua pena ira equeicha

neexanaenexa yawa xua itaboco.

Barapocotsi jũta coyeneya exanaename

icha be poxonae pebin ichi xua peruwa

nama xuena xua xuba, xua

penawa penamaxatatsinexa.

Ichitha xam nama ataya tsitecaeya poponame.

Matautano jinya nepoponae coyenewa

ataya jopa weraweracae tsane”,

jei Nacom Pexantotha.

¹³ Nacom bapana jopa jeiyo matatsunpintha:

“Xam tacoxa weya ecare, beya poxonae abũ

caexanaeinchi xua itorobiname jinya

necaaitaetaebi jiwi”, bapana jopa jeiyo

Nacom matatsunpintha.

Saya meisa Pexantotha baxua paeba.

¹⁴ Daxita matatsunpiwi peinya pejinompaewi jiwitha. Barapo matatsunpiwi exana

dubenanaebiya pocotsiwa Nacom itoroba. Nacom itoroba barapomonae xua petayawe-

naenexa tsainchi pomonaetha pomonae bexa Nacom capanenebiyaena pomonae pe-

jume cowuntsi jiwixaetsi.

2

Meje yabara xua poxonae naca muxuweta xua jopa bewa pepawi cana exanaetsi Nacom pia pecapanenebiyae coyenewa tatsi

¹ Nacom Pexanto ainya cui cana exana beyacaincha matatsunpiwi. Daxota bewa matowa itapeta jume naitaewatichi pocotsiwa bapon yabara xua jume tainchi. Bapoxonae jopa wayabara juntemainaponae tsainchi po coyene xua Nacom pia pecapanenebiyae

coyenewa tatsi. ² Po peitorobi coyenein caena bayatha matatsunpiwi Nacom tacue-icueijeichi, barapo coyenein bara xainyei. Pomonae jopa jume cowantsiyo barapo peitorobi coyenein xuano xua abe exanaponano, barapomonae atene exanaeinchi xua canacui matajupiya cana exanatsi. ³ Cristo naca cana exana xua panenebiyatsi abe waexanae cuiru coyenein weya. Cristo pia pecapanenebiyae coyenewa bichocono ainya cui coyenewa. Icha Cristo pia pecapanenebiyae coyenewa cayabara nanta xeinatsi xua pepawi xua jopa ainya cuiyiyo, waxainchi bapana jopa naca capanenebiyae tsane xua poxonae jiwi atene exanaeinchi abe peexanaexae. Barapon Cristo pon jiwi Pecanamataxeinaein barapo pecapanenebiyae coyenewa yabara tsipaeba copiya. Bapoxonae xuya barapo pecapanenebiyae coyenewa naca tsipaeba pomonae jume tane pocotsiwa xua bapon paeba pon jiwi Pecanamataxeinaein. ⁴ Nacom tsita itapeinya xeina xua barapomonae bara xaniwaicha yabara paeba Nacom pia pecapanenebiyae coyenewa. Baxua exana poxonae Nacom cana exana xua barapomonae pexeinya petsita itubi coyenewan muxuna exana poxonae cueicuejei. Matautano baxua exana poxonae cana exana xua barapomonae muxuna exana pocotsiwa bichocono wunae xua jiwi nabenaeca cana exanatsi. Matautano baxua exana poxonae cana exana xua barapomonae pexeinya peayapusu itorobi coyenewan muxuna cueicuejei. Matautano Nacom tsita itapeinya xeina xua bara barapomonae xaniwaicha cueicuejei poxonae Nacom pia Pejumope tunaxu tatsi itoroba barapomonae pia juntu coyeneintha tatsi xua pecatsibinexa po cui coyeneya peexanaenexa daxita barompaya tsiniya. Baxua exana barapo Nacom pia Pejumope tunaxu tatsi icha be pocotsi coyenewa Nacom ichichipa xua barapomonae barapo cui coyeneya exanaena.

Meje yabara xua Jesucristo be jiton coyeneya naexana

⁵ Nacom jopa copatsi tsane xua matatsunpiwi canamataxeinaena barapo pena nacuatha po nacua yabara xuaunxuae pacata tinatsi. ⁶ Jame nama Nacom Pejume Diwesitha ichun yabara jeye xua pomonae barapo pena nacua pecanamataxeinaewa tsane, jeye:

“Nacom xam jiwi toxeincha bichocono pin juntu coyene xeiname.

¿Eta xua metha yabara nanta xeiname jiwi xua ainya cui exaname xua

pecanamataxeinaenexa tsane ichamonae?

⁷ Nacom copiya saya caetotha exaname xua jiwi be conotha ainya cui.

Baxua exaname poxonae matatsunpiwi toxeinchiya ainya cui exaname beyacaincha jiwi.

Ichitha cotacaya exaname xua jiwi ainya cui naexana.

Jiwi cana exaname xua pexeinya peitupanae coicha xeina

yawa catame barapomonae peayapusu itorobi coyenewa xua icha jiwi

pecanamataxeinaewa tsainchi.

⁸ Po jiwi cajume cowanta barapo jiwitha catame peayapusu itorobi coyenewa daxita xua pecanamataxeinaenexa xuantha xua forotame”, jei xua ichun tsipaeba Nacomtha.

Poxonae Nacom cana exana jiwi xua canamataxeinaena daxita xua xuan forota, dapocotsi coyenewa aibi xua jiwi jopa itacupaetsi xua pecanamataxeinaewa. Daichitha awiya cataunxuae jopa jiwi cui taetsi xua daxita pecanamataxeinaewa. ⁹ Ichitha waxainchi Jesús yaputainchi pontha pon Nacom saya caetotha cana exana xua jopa ainya cuiyo.

Matatsunpiwi conotha ainya cui beyacaincha xua Jesús xua poxonae caetha cana exanatsi xua jopa ainya cuiyo xua poxonae popona be jiton. Nacom bichocono peantobexae daxita jiwi daxota bapon copata xua Cristo tsitupaena daxita jiwi abe pia peexanaexae. Anoxuae equeicha Nacom ainya cui cana exana xua Jesús ainya cui cana exanatsi. Matautano Nacom cana exana xua Jesús jopa juniya ainya cuiyiyo xua jiwi itorobiya peewatsiwatsi. Matautano Nacom Jesús catatsi pexeinya peitupanae coicha. Nacom baxua exana xua Jesús pia petsitupaexae jiwi.

¹⁰ Nacom forota daxita coyenein. Matautano daxita baxuan Nacom nata exana. Matautano Nacom ichichipa xua daxita piamonae tatsi pexeinaewa tsane pia pexeinya peitupanae coicha tatsi peponaenexa tsane pia nacuatheicha tatsi. Daxota Nacom tsita xanepanatsi xua poxonae Jesucristo atene exanatsi beta yatsicaewa pejuntũ coyene wũnaetsinexatsi xua jiwi pecanamataxeinaenexatsi Nacom pia nacuatheicha. Baxua Nacom exana poxonae Jesucristo atene exanatsi poxonae tsitupa xua jiwi pecapanenebiyaenexatsi abe pia peexanae cuiru coyenein weya tatsi. ¹¹ Tsipei daxita pomonae juntũ coyene xanepana exanatsi Nacomtha, irũrũ Jesús pon cana exana baxua barapomonaetha, daxita barapomonaenanta caein Paxa pon Nacom. Daxota Nacom Pexanto tatsi jopa auriyo poxonae naca yabara jei: “Tayapin jiwi pam”, poxonae jei. ¹² Nacom Pexanto tatsi pon Jesucristo, caena bayatha Nacom Pejume Diwesitha xua salmos penaxũnae weixi diwesintha jeye Nacomtha:

“Cayabara paebinchi tayapinmonae jiwitha.

Cata naxũnaeinchi pewei xua wũnae
tacajainchinexa poxonae nanabarũ
nanacaetutsin jinya botha pomonae cajume
cowũnta”, jei Jesucristo Nacomtha.

¹³ Ichacuitha caena bayatha Jesucristo jeye xua Isaías pia diborotha:

“Xan jume cowũntsiya wũnae ewatsin

Nacom xua tana neyawenaewa”, jei.

Equeicha Jesucristo jeye:

“Xote ecan, barũ ecan tapexui pomonae tana

nejume cowũntsiwi pomonae Nacom

necata”, jei Jesucristo.

¹⁴ Pexui ba bara xeina pejana yawa pewito icha be coxiyeiwi ichi tsipei jiwixae. Barichi Jesús xeina jiton pia pepon tatsi pexeinaexae jiwi pia pewito tatsi xuano xua jiwi pia pejana tatsi. Jesús baxua xeina xua petsitupaenexa jiwi. Daxota itacũpatsi xua peamanayabiwa pontha pon xua peayapusũ itorobi coyenewa xeina xua jiwi pejutewiwatsi. Bapon apara pon caurimonae pia pentacaponaein tatsi. ¹⁵ Jesús baxua nacata exana wanaca capanenebiyaenexa wajunuwi coyene weya xua poxonae yabara junuwatsi xua wawerapaewa tsane. Jiwi daxita matacabin junuwiya jinompeiba xua pewerapaewayainwa. ¹⁶ Bara xaniyei Jesús jopa tsipatopeicaeyo xua peyawenaenexa tsane matatsunpiwi. Apara jame Jesús tsipatopeica peyawenaenexa tsane Abraham pia pemomoxi susato jiwi tatsi xua yatsicaewa jiwi. ¹⁷ Daxota Jesús poxonae naexana bewa yawa naexanaena daxita coyeneya icha jiwi pia pepon tatsi ichi. Bapon bewa baxua yawa naexanaena pia penaexanaenexa pepa wasacerdotepin pocotsin nacata paebeiba Nacom beicha. Matautano bapon Jesús pon pepa wasacerdotepin xainyeya taexana po coyene xua ba sacerdotemonae pia petaexanae coyenewa xua Nacom tsita exanatsi. Bapon Jesús naca weyatane xua wanaca yawenaenexa, xua jiwi petsitupaenexatsi xua Nacom jiwi pejuntũ coyene yabara jũntemainaenexa tsai bi tsainchi abe pia peexanae cuiru coyenein tatsi. ¹⁸ Jesús atene exanatsi poxonae caurimonae pia pentacaponaein tatsi jũntũ coyene jũjutatsi petaenexa tsainchi icha abe exana. Daxota anoxuae bapon Jesús itacũpatsi xua peyawenaewa pomonaetha pomonae irũrũ jũntũ coyene jũjutatsi caurimonae xua abe peexanaewa tsane.

3

Meje yabara xua Jesús peainya cuin beyacaincha Moisés

¹ Nacom iru paca wun duba poxonae itapeta pomonaepatsinexa tsane pia nacuatheicha tatsi. Tamonaepam, paxam jiwana pam pomonaepajume cowuntsiwi Jesucristo, pomonaepam Nacom paca juntu coyene xanepana exana xua piamonaetatsi painya paca cana exanaenexa. Daxota Cristo Jesús pacayabara nanta xeinare. Bapon Jesús Nacom pia peitorobin tatsi pon naca tsipaeba Nacom nexa. Matautano bapon wapepa sacerdotepin pon wanacata paebeibin Nacom beicha. Bapon payabara cueicueijan ichamonaetha wajume cowuntsixae bapon. ² Jesús bara xainyeya exana Nacom pia petanacuichiwa tatsi Nacom peyabara tsiwunaemuxu dutsixae bapon barapo penacuichiwanexa xua Nacom pia peitorobin tatsi tsane yawa wapepa sacerdotepin tsane. Jesús beta xainyeya taexana, icha matha Moisés ichi xua poxonaedaxita coyene beta xainyeya taexana Nacom piamonaetha xua Nacom nexa. ³ Jesús pecapanepaexae jiwi bewa bichocono toxeincha baru cui itara jinaetsi bapon beyacaincha xua baru cui itara jinatsi Moisés. Barapocotsi juta coyeneyachi, bewa Jesús cana exanaetsi icha be poxonaejiton ichi xua bewa baru cui itura jinaeinchi xua ainya cui exanatsipeacabixae bo beyacaincha xua bo xua ainya cui tsuncuae. ⁴ Daxita ba bon tsoponaepoxoru apara jiton peexanaexae. Ichitha jame pon yatsicaewa nama daxita coyenewan exana apara bapon Nacom. ⁵ Bayatha Moisés apara pon petanacuichinchi Nacom. Bapon xainyeya daxita exana Nacom pia botha pocotsiwa Nacom itoroba. Bapon Moisés pia penacuichiwa tatsi saya xua yabara tsiwunaecaunuta pocotsiwan xua bexa Nacom exanaena. ⁶ Ichitha nama Cristo Nacom Pexantoxae tatsi xainyeya daxita exana Nacom nexa tsipei cana exana xua bapon canamataxeina daxita pomonaepam piamonaetatsi. Waxainchi Nacom piamonaetsi icha ajuntuyapusuya jume cowuntapoinchi Cristo beya xua poxonaetupaeinchi. Matautano waxainchi Nacom piamonaetsi icha juntu coyene weiweinaya wunaewatatsi pocotsiwa bexa Nacom wanaca tsixanaewa tsane.

Meje yabara xua nafifina caewata Nacom piamonaetatsi

⁷ Cristo ainya cui peexanaexaetsi beyacaincha xua Moisés ainya cui exanatsi daxota Nacom pia Pejumope tñaxu tatsi naca itoroba xua bewa jume taetsi Cristo. Baxua paeba Nacom pia Pejumope tñaxu tatsi. Nacom Pejume Diwesitha, jeye:

“Anoxuae pana nejume taema pocotsiwa paca tsipaebatsi ponxaein Nacomxaein.

⁸ Painya xoba pana nejumefebame painya juntu coyenewatha xua daxota jopa painya tana nejume cowuntsiwam.

Jopa bara paichinde icha pomonaechi xua poxonaebayatha nejume matawenta xua exanan poxonaejinompa ichaxota ira xuepana susato tsurucuae nacuatha.

Barapomonaenefayacoteiba poxonaenejuntu coyene jujuteiba beya poxonaeanapanan barapomonaetha poxonaejopa xapain exaneibiyo.

⁹ Barapomonaepomonaenejuntu coyene jujuta, apara painya amo susato jiwi.

Barapomonaebaxua inta exana poxonaejopa nejume cowuntsiyo.

Baxua exaneiba beya poxonaecuarenta po weibe tsuxubi bequein taiba pocotsiwa xua taexaneiban barapomonaexua beya cuarenta po weibetha.

¹⁰ Daxota barapomonaecaseban yawa yabara

jan barapomonaē: ‘Barapomonaē jopa benejume
cowuntsiyo pejuntū coyeneintha yawa
jopa beyaputaeyo pocotsiwa ichichipan
taexanan barapomonaē’, jan.

¹¹ Barapomonaē caseban.

Tacoutha jume daunweya najan:
‘Barapomonaē bapana jopa patsi tsane
tanacuatha ichaxota po nacuatheicha
nafifinacaewatsina pomonaē tana nejume
cowuntsiwi’, najan”, jei Nacom
pia Pejumope t̄nax̄ tatsi,
Nacom Pejume Diwesitha.

¹² Tamonaē pam, pomonaē irū painya nejume cowuntsi jiwixae Jesucristo. Painya xoba paxename po j̄untū coyene bichocono abe, po j̄untū coyene jopa ichipaeyo xua pejume cowuntsiwa Nacom, pon xua asū popona. ¹³ Jame maisa daxita matacabin nantiya pana naj̄untū coyene tsacabare xua aj̄untūyapus̄ya painya nejinompaewa tsane. Daxita pam baxua paexande anoxuae poxonaē cataunxuae po dapaetha anoxuae petain paca itac̄pa xua paexaname baxua. Matautano baxua paexande xua jopa pata tana nejumefebiwam painya j̄untū coyenewatha. Icha pana nejumefebame painya coutha pana namuxujainyabichipame xua daxota abe painya neexanaewa tsane. ¹⁴ Bewa xanepanaya ayapus̄ya jume cow̄nta dubenanaebiyaeinchi Nacom xua beya poxonaē t̄p̄aeinchi. Icha baxua betiya ayapus̄ya jume cow̄nta dubenanaebiyaeinchi icha ichichi poxonaē aena jume cow̄ntatsi, bapoxonaē nayawa muxuna xeinaeinchi Nacom pia nacuatheicha pocotsiwa Cristo xeina.

¹⁵ Daxota equeicha paca tsipaebatsi xuaunxuae po diwesi paca tsipaebatsi xua Nacom Pia Pejumope t̄nax̄ tatsi cueicueije, jeye:
“Anoxuae pana nejume taema pocotsiwa paca tsipaebatsi, ponxaein Nacomxaein.

Icha pana nejume taneme bapoxonaē painya xoba
pana nejumefebame painya j̄untū coyenewatha
xua daxota jopa pata tana nejume
cowuntsiwam tsane.

Jopa bara paichinde icha pomonaē ichi xua
poxonaē nejume matawenta poxonaē jinompa
ichaxota ira xuepana susato tsurucuae nacuatha”,
jei Nacom pia Pejumope t̄nax̄ tatsi.

¹⁶ Payabara nanta xeinare pomonaē jume tane xua Nacom pejume tatsi xua bapoxonaē Nacom jume matawentatsi. Daxita bapomonaē apara pomonaē Moisés mata cawarapa Egipto nacua weya. ¹⁷ Payabara nanta xeinare Nacom xua caseba xua beya cuarenta po weibetha tsuxubi. Bapomonaē apara israelmonaē pomonaē xua abe exana poxonaē jinompa ichaxota ira xuepana susato tsurucuae nacua beya, xuano xua baxota werapano. ¹⁸ Payabara nanta xeinare pomonaē Nacom daunweya yabara paeba, xua jei: “Barapomonaē bapana jopa patsi tsane tanacuatha ichaxota po nacuatheicha nafifinacaewatsina pomonaē tana nejume cowuntsiwi”, jei. Bapomonaē apara israelmonaē pomonaē xua jopa exanaeyo pocotsiwa Nacom itoroba. ¹⁹ Bara yaputainchi xua barapomonaē jopa itac̄paetsi xua pepatsiwa Nacom pia nacuatheicha tsipei jopa Nacom jume cowuntsichi.

4

¹ Waxainchi yabara jume cow̄nta dubenanaebiyatsi xua Nacom naca tsiw̄nae muxu duta. Nacom naca tsiw̄nae muxu duta xua bara wanaca itac̄paewa tsane xua wapatsiwa pia nacuatheicha po nacua xua Nacom pia penafifinacaewatsi nacua. Daxota poxonaē cataunxuae naca itac̄pa xua wapatsiwa tsane barapo nacuatha bewa yabara

najuntũ coyene exabichi xua paxam jiwana jopa itacũpaetsipaetsi xua pepatopaewa Nacom pia nacuatha. ² Waxainchi barichichi jume tainchi barapo Nacom pia pecapanenebiyae diwesi, icha bayatha barapomonaе ichi xua jume tane barapo diwesi. Ichitha barapo diwesi jopa yawenaetsi barapomonaе xua pejume cowũntsinexa Nacom, tsipei jopa jume cowũntsiyo barapo diwesi. ³ Waxainchi nama barapomonaetsi xua wajume cowũntsiwi barapo pecapanenebiyae diwesi. Daxota naca itacũpa xua wapat-siwa Nacom pia nacuatheicha ichaxota bapon naca barũ nafifinacaewatsina baxoteicha. Nacom wamo susato jiwi yabara paebatsi xuaunxuae paca tsipaebatsi. Jeye:

“Barapomonaе caseban.

Tacoutha jume daunweya najan:

‘Barapomonaе bapana jopa patsi tsane tanacuatha ichaxota po nacuatheicha nafifinacaewatsina pomonaе tana nejume cowũntsiwi’, najan”,
 jei Nacom Pia Pejumope tunaxũ tatsi.

Bequein baxua Nacom paeba ichitha caena bayatha weta barapo nacia ichaxota jiwi nafifinacaewatsina poxonaе nacobe weta xua daxita forota barapo cae pin nacuathe. ⁴ Po matabi pewũn “siete matabi”, jei, barapo matabi Nacom Pejume Diwesitha yabara paeba. Bapon jeye:

“Nacom nacuita seis po matabibe.

Bapoxonaе nafifinacaeca po mataqueitha pewũn ‘siete matabi’, jei”,
 jei Nacom Pejume Diwesitha.

⁵ Equeicha Nacom Pejume Diwesitha jeye:

“Barapomonaе bapana jopa patsi tsane tanacuatha ichaxota po nacuatheicha nafifinacaewatsina pomonaе tana nejume cowũntsiwi”, jei Nacom.

⁶ Ichitha cataunxuae acoibi ichamonaе pomonaе xua bexa tsane Nacom copatsina xua nafifinacaewatsina ichaxota bapon nafifinacaewata. Barapomonaе jume cowũntsinexa xua Nacom paeba. Pomonaе copiya bequein jume taetha Nacom pia pecapanenebiyae jume barapomonaе Nacom caena bayatha jopa copatsiyo xua barapomonaе nafifinacaewata tsipei jopa jume cowũntsiyo pocotsiwa Nacom paeba. ⁷ Daxota Nacom nanta xeina xua equeicha pena matabi exana. Barapo matabi xua wũn duta “anoxuae” jei xua pena coyene. Barapo matabitha xua piamonaе tatsi petaitacũpaewatsi tsainchi xua nafifinacaewatsina. Baxua Nacom exana caena bayatha poxonaе David popona xua ainya wei pirapae poxonaе jinompa pomonaе jopa copatsichi xua nafifinacaewata. Anoxuae Nacom bapocotsiwa naca tsipaeba pocotsiwa bayatha tsipaeba piamonaе jiwitha, poxonaе David popona, pon jeye:

“Icha anoxuae pajume naitaewatame pocotsiwa Nacom paca tsipaeba jopa pajumefebinde painya jũntũ coyenewatha xua daxota jopa Nacom painya nejume cowũntsiwam”, jei David caena bayatha Nacom nexa.

⁸ Josuэ caena bayatha wamo susato jiwi matabapoinchi Canaán nacia berena pomonaе Israel piamonaexae tatsi. Apra jopa matabaponaeyo ichaxota po nacia Nacom yabara paeba xua barapomonaе nafifinacaewatsina. Icha Josuэ bayatha matabaponaetsipa barapomonaе barapo nacuatheicha bapoxonaе Nacom jopa nantawenonaetsipae xua exanaena icha matabi po matabitha poxonaе barapomonaе itacũpatsi xua pepatsiwa tsane barapo nacuatheicha, po nacia ichaxota Nacom yabara paeba. ⁹ Daxota cataunxuae awiya barapo matabi tsoxonaе po matabitha poxonaе Nacom piamonaе tatsi nafifinacaewatsina Nacom pia nacuatheicha. ¹⁰ Tsipei pon weta pia penacuichiwa pocotsiwa

Nacom itoroba bara itacupatsi xua nafifinacaewata ichaxota Nacom nafifinacaewata. Bapon baxua exanaena icha Nacom ichi poxonae nafifinacaeca, poxonae nacobe weta pia penacuichiwa xua poxonae forota daxitan. ¹¹ Daxota bewa ajuntusuya jume cowanta dubenanaebiyaeinchi xua wanafinacaewatsinexa tsane ichaxota Nacom nafifinacaewata. Baxua exanaeinchi xua ichamonae waxainchi jiwanatsi jopa peyaseicaewa tsane xua nafifinacaewata. Waxainchi jopa ichipaetsi xua icha ichamonae ichi xua jopa nafifinacaewatsiyo jopa pejume cowuntsixae pocotsiwa Nacom paeba.

¹² Nacom Pejume Diwesi peajuntuyapusu diwesi xuano peayapusu itorobi coyene xeina. Barapo Nacom Pejume Diwesi barapocotsi jata coyeneya ichi xua icha ba cusi ichi xua po wato nantiya baru ducuabe. Barapo cusi taju uncuiya pebaruwa xua pepontha. Barapoxonae barapo cusi itapeinya xeina daxita pocotsiwan xeina wan iya xua matha iya dubeinya bupaniya. Ichitha Nacom Pejume Diwesi ayapusu beyacaincha cusi tsipei barapo Nacom Pejume Diwesi itacupatsi taju bereca pona wajuntu coyenewatha ichaxota nanta xeinatsi. Barapo diwesi naca yaputane exana po coyenein xua wajuntu coyenewatha xeinatsi. Naca yaputane exanano po coyenein yabara nanta xeinatsi wajuntu coyeneintha. ¹³ Dapocotsiwan aibi barapo cae pin nacuathe xua Nacom forota pocotsiwan xua xuan nantiyatarubena Nacom peitabaratha pocotsiwan xua bapon jopa taeyo. Daxitan naitutarubena xuano xua Nacom itacupatsi xua beta petaewa daxita coyenein. Nacomtha bexa yabara tsipaebinchi xua pocotsiwan bayatha exainchi.

Meje yabara xua Jesús pepa sacerdotepin

¹⁴ Jesús apara Nacom Pexanto tatsi. Bapon wasacerdotepin, pon pepa sacerdotepin, pon bichocono yatsicaya peainya cuin. Bapon bayatha patopa Nacom peitabaratheicha tatsi. Daxota bewa ajuntuyapusuya jume cowanta dubenanaebiyaetsi bapon, pon yabara cueicueijeichi ichamonaetha. ¹⁵ Barapo wasacerdotepin pon pepa sacerdotepin, naca weyatane xua wanaca yawenaenexa poxonae juntu coyene faefaenouneibatsi abe waexanaexae. Bapon baxua nacata exana, tsipei bapon barichichi juntu coyene jujutatsi xua abe peexanaenexa. Caurimonae pia pentacaponaein tatsi juntu coyene jujuta icha naca ichi. Daichitha nama bapon Jesús bapana jopa abe exanae. ¹⁶ Daxota bewa ajuntuyapusuya wucaetsi Nacom pon bichocono naca antobe. Jopa bewa junuwi tsainchi xua wacueicuejeiwa Nacomtha. Bapoxonae Nacom naca weyataena wanaca yabara junteinaenexa xua abe waexanae cuiru coyenein. Matautano bapon wanaca antobexae naca yawenaena poxonae po matabaratha canantawenoneibatsi, poxonae naca juntu coyene jujuta.

5

¹ Jiwi ba barompaya pia xantha tatsi jiwana taitapetatsi pomonae xua daxita cana exanatsi pepa sacerdotepiwi. Barapo sacerdotepiwi itorobatsi xua barapo sacerdotepiwi caunuta jiwi yabara poxonae cueicuejei Nacom peitabaratha xua jiwi nexa. Matautano barapo sacerdotepiwi yabara tsiwan dubatsi po coyene jiwi petaexaneibiwa tsainchi Nacomtha pocotsiwan xua jiwi amanaya pecatsiwa Nacomtha abe peexanaexae. Matautano barapo sacerdotepiwi yabara tsiwan dubatsi po coyene xua jiwi petaexaneibiwa tsaibi tsainchi xua poxonae duwei pejutebiwa pocotsi duwein xua jiwi amanaya pecatsiwa Nacomtha abe peexanaexae. ² Barapo sacerdotepiwi ichacuihata juntu coyene faefaenouneiba, poxonae juntu coyene jujuteibatsi caurimonae pia pentacaponaein tatsi xua abe peexanaenexa. Tsipei barapomonae nacui yaputane xua poxonae juntu coyene jujuteibatsi, daxota bara itacupatsi xua peyawenaewa ichamonaetha. Itacupatsi xua peyawenaewa pomonaetha pomonae abe peexanaewi xua bequein jopa yputaeyo xua abe exana, iruru pomonae yatsicaewa nacui yaputane xua abe exana. ³ Barapo sacerdotepiwi iruru abe exaneiba xua pejuntu coyene faefaenaexae poxonae juntu coyene jujuteibatsi caurimonae pia pentacaponaein tatsi. Daxota bewa iruru pia coutha nata exanae po coyene xua duwei penata tautsinexa Nacom nexa icha poxonae jiwi tacana ichichi poxonae abe peexanaexae. ⁴ Dapon ajibi xua pia coutha naexana pon pepa

sacerdotepin. Jame ba Nacom bapocotsin yabara tsiwun duta xua penaexanaenexa pepa sacerdotepin. Matautano bapontha Nacom cata barapo peainya cui yabara matawun dutsiwa icha bayatha Nacom cana ichi pon pewun Aaron pon copiya pepa sacerdotepin naexana. ⁵ Cristo bara cana ichichi. Bapon Cristo pia coutha jopa naexanaeyo pon pepa sacerdotepin xua peainya cuin penaexanaenexa. Apra jame Nacom cata barapo peainya cui yabara matawun dutsiwa xua pepa sacerdotepin penaexanaenexa. Bayatha Nacom yabara paeba Pexanto pejume diwesitha, barapo peainya cui yabara matawun dutsiwa xua penaexanaenexa pepa sacerdotepin, xua jeye:

“Xam apra taxantom.

Anoxuae xan jinya axaxaein.

Yabara catsiwan dutatsi barapo jinya

nenacuichiwanexa”, jei Nacom.

⁶ Equeicha Nacom Pejume Diwesitha xua Pexanto yabara paeba, jeye:

“Xam pon sacerdotepim, xua bara ataya

tsitecaeya tsane, icha Melquisedec matha

ichi pon caena bayatha popona.

Bapon pepa sacerdotepin naexana xua

ataya tsitecaeya pepoponaein”,

jei Nacom.

⁷ Poxonae cataunxae Cristo popona po cae pin nacuathe bichocono jume daunweya tsipaebiba Nacomtha xuano jume daunweya waqueibano beya poxonae bichocono wecoyei. Cristo waqueiba Nacomtha, pon bequein itacupatsi xua Cristo peyawenaewatsi xua jopa petupaewa. Mexeya poxoru bapon itapetsiya peexanaexae pocotsiwa Nacom ichichipa daxota bara Nacom jume tane pocotsiwa Cristo waca. ⁸ Bequein Cristo Nacom Pexanto tatsi, ichitha nacuiduba xua Paxa jume jejei xua exana pocotsiwa Paxa itorobatsi xua poxonae atene exanatsi xua ichamonae exana. ⁹ Bapon pia coutha daxita najuntu cui yabara wunaeta poxonae atene xua penaexanaenexa pepa sacerdotepin. Daxota bapon Cristo exana xua jiwi capanenebiyatsi abe pia peexanae cuiru coyenein weya xua ataya tsitecaeya tsane daxita pomonae pia pejume cowuntsiwichixaetsi. ¹⁰ Nacom yabara tsiwun duta xua Cristo pepa sacerdotepin naexana, icha matha Melquisedec ichichi xua yabara tsiwun dutatsi xua pepa sacerdotepin naexana, pon caena bayatha popona.

Meje yabara xua poxonae muxuwetatsi pomonae Nacom pejume cowuntsiwi xua pebara-pentsiyainwa po coyene xua pejume cowuntsiwa Nacom

¹¹ Waxainchi xeinatsi nawita xua po coyene wayabara natsipaebinexa Cristo xuaunxae anoxuae paca tsipaebatsi. Daichitha bichocono ayapube xua paca yaputane exainchi tsipei painya coutha jopa pana nayabara copatsim xua bara painya neyabara yaputaewa tsane baxuan. ¹² Caena bayatha bewa pana naexanaem pomonae jiwi painya necuidubi jiwi pam. Daichitha cataunxae panantawenoname xua ichamonae equeicha caewa yabara paca cuiduba Nacom Pejume Diwesi pocotsiwan xua jiwi nantawenona copiya nacuiduba poxonae aena jume cowunta. Paxam pomonae equeicha caewa pajuntu coyene faefaename, xua painya nejume cowuntsiwa. Barapo coyene icha be poxonae pexui ichi xua nantawenona mito, jopa peitacupaexaetsi xua pexaewa pewito. ¹³ Pexui poxi isainatsi ba nantawenona mito poxoru pewito jopa xaeyo. Barapocotsi juta coyeneya paichim. Paxam jopa paca itacupaeyo xua painya neyabara yaputaewa Cristo pia pecuidubiwa xua po coyene xanepanaya painya nejinompaewa. ¹⁴ Nama pewi jopa apra pexui nexiyo poxi isainatsi, jame apra ba pomonae pinyon nexa. Barapocotsi juta coyeneya ichi pomonae ba xaniwaicha jume cowunta pia juntu coyeneintha barapomonae jopa abe exanaeyo. Barapomonae nacuiduba xua yabara yaputane po coyene abe yawano po coyene wuna.

6

¹ Barabũ nacui barapentatsi xua nayabara cueicueijeichi pocotsi coyenein xua copiya naca cuiduba xua Cristo yabara poxonae aena jume cowũntatsi. Jame barabũ nanta xeinatsi, po coyene pepa pena coyene icha pomonaе pinyon ichi xua pocotsiwan nanta xeina pomonaе beta jume cowũnta. Po coyenein xua bayatha copiya naca cuiduba xua Cristo yabara, jopa nantawenonaetsi xua equeicha wanacuidubiwatsi po coyenein xua abe waexanaexae bewa aura tsainchi xua daxota nacui barapentatsi po coyenein abe, po coyenein xua ba naca wepu tsana exana Nacom weya. Mataũtano jopa nantawenonaetsi xua jume cowũntsinchi Nacom. ² Barapocotsiwanje jopa nantawenonaetsi xua equeicha caewa nayabara cueicueijeichi tsainchi tsipei bayatha payaputaneme. Mataũtano jopa equeicha nantawenonaetsi xua caewa nayabara cueicueijeichi tsainchi xua bewa bautisabinchi. Mataũtano jopa nantawenonaetsi xua equeicha caewa nayabara cueicueijeichi tsainchi xua poxonaе Nacom pejume cowũntsiwi pecobetha pemataboco jayabiwatsi xua pexeinaenexa pejuũtũ cui coyenein po pejuũtũ coyene Nacom pia Pejumope tũnaxũ tatsi cata. Mataũtano jopa nantawenonaetsi xua equeicha caewa nayabara cueicueijeichi tsainchi xua equeicha jiwi asũ peexanaewatsi petũpae cuiru coyene weya. Barichi jopa nantawenonaetsi xua equeicha caewa nayabara cueicueijeichi tsainchi xua poxonaе Nacom yabara paebina jiwi xua penatsicuentisiwa xua abe peexanaexae Nacomtha. Barapoxonaе Nacom itawetsina xua bara ataya tsitecaeya tsane abe peexanaexae. ³ Jame barabũ nayabara cueicueijeichi tsoponaе tsainchi icha coyenein xua pena coyene icha Nacom bara naca cui yabara copatsina.

⁴ Ichamonaе penta xua Cristo pejume cowũntsiwatsi. Daxota jopa neyapucũpaeyo xua equeicha tacuidubiwa Nacom Pejume Diwesi barapomonaetha. Barapomonaе Nacom pia pejume xainyeiwa nacuiduba, xuano yaputane Cristo pon Nacom itoroba po cae pin nacuathe tsique. Mataũtano barapomonaе xeina po pejuũtũ coyenein Nacom pia Pejumope tũnaxũ tatsi cata. ⁵ Mataũtano barapomonaе yabara jume cui jujuata Nacom Pejume Diwesi xua daxota yaputane xua barapo diwesi bara xanepana. Mataũtano barapomonaе tane po peayapusũ itorobi coyenewa Nacom pia Pejumope tũnaxũ tatsi cata jiwitha xua barapo jiwi barapo coyenewatha exana pexeinya petsita itũbi coyenewan beya poxonaе Cristo equeicha patopaena. ⁶ Icha daxita barapo coyenein barapomonaе equeicha nacui barapenta xua jopa Nacom pejume cowũntsixaetsi, barapoxonaе nama jopa itacũpaetsi xua equeicha caewa pejume cowũntsiwa Nacom. Poxonaе Nacom equeicha pentatsi baxua be barapomonaе equeicha Jesús caewa bexotsi naetha. Barapomonaе exana xua jiwi Nacom Pexanto tatsi yabara jume cui caponatsi tsipei jopa Nacom jume cowũntsiwi. Baxua icha be poxonaе ichamonaе ichi poxonaе matha Jesús naetha bexotsi xua daxota daxita jiwi Jesús cui caponatsi. ⁷ Pabi ba po iratha ema mũ jojoneca poxonaе ema duneiba barapo iratha, barapo pabitha jiwi pexaewa ũba. Nacom exana barapo iratha xua pexaewa xaniwaicha taxainwaetsina xua pomonaе peubimonaе taxainwaetatsi. ⁸ Ichitha icha icha pabi saya ũ pesoiwan xuwa, barapo pabi jopa wũnaeyo poxoru jiwi jopa yawenaetsi poxonaе ũba barapo pabitha. Daxota Nacom exana xua barapo pabi jiwi tautsina xua pesoiwan daxita tũpa peexanaenexa. Icha Nacom cana ichi pabintha bara juata cana ichiya exana jiwitha. Icha jiwi Nacom jume cowũnta dubenanaebiya, bara Nacom beta exanaena barapo jiwi. Ichitha icha barapo jiwi Nacom pentatsi, Nacom jopa yawenaе tsane barapo jiwi. Saya jame Nacom itoroba xua barapo jiwi petautsiwa tsainchi po isototha xua bapana jopa itacounaiyo.

Meje yabara xua wawũnae ewatsiwa xua pocotsiwa Nacom yabara wanaca tsiwũnae muxu dutsiwa

⁹ Tamonaе pam, paxam pomonaе tapaca caantobe jiwichi pam. Bequein baxuan yabara paca tsipaebatsi, xua jiwi petautsiwatsi ichitha paca yabara yaputainchi xua jopa papentsim Nacom. Yaputan xua bara beta paexaname Nacom painya nepaca

capanenebiyaexae. ¹⁰ Tsipei Nacom bara xainyeya exana. Nacom jopa paca yabara junte-mainae tsane pocotsiwan xua bayatha paexaname. Matautano jopa paca yabara junte-mainae tsane xua ichamonae painya neyawenaewa pomonae iru pejume cowantsiwi Nacom. Baxua patsita itapeinya xeiname xua painya neantobexae Nacom. Baxuan caena bayatha paexanaponame, awiya cataunxuae baxuan paexanaponame. ¹¹ Bequein baxua paexaname daichitha paichichipan xua daxita paxam awiya payawenaponaename ichamonae. Ajuntayapusya pawunae ewataponare pocotsiwa Nacom yabara paca tsiwunae muxu duta xua beya payacuiya werapaeya othopaename. ¹² Jopa paichichipaeinyo xua payabara ajuntacoyenefaetabim xua pawunae ewatame baxua tsipei jopa pana nayabara copatsim xua painya neyabara yaputaewa tsane baxua. Jame maisa bara jatiya paichiponaende, icha ichamonae ichi xua poxonae bichocono jume cowanta Nacom. Matautano barapomonae jopa bepijawa aitaconaeyo xua wunae ewata pocotsiwa Nacom yabara tsiwunae muxu duta.

¹³ Poxonae Nacom yabara tsiwunae muxu duta Abrahamtha, Nacom pia wuntha yabara tsiwunae muxu duta Abrahamtha. Baxua Nacom pia wuntha paeba tsipei dapon aibi pon bichocono ainya cui xua beyacaincha Nacom. Nacom ataya jume xainyei paeba daxota Nacom jopa icha wuntha paebiyo. ¹⁴ Nacom jeye Abrahamtha: “Bara xaniwaicha bichocono cayawenaeinchi. Jinya nemomoxi jiwi pia pemomoxi susato jiwi tatsi pinmonae exanaein”, jei Nacom. ¹⁵ Abraham abu saya beitatemaya wunae ewataponae pocotsiwa Nacom yabara tsiwunae muxu duta, jopa aitaconaeyo. Bapoxonae pirapae Abraham catatsi pocotsiwa Nacom bayatha yabara tsiwunae muxu duta bapontha. ¹⁶ Poxonae jiwi ba yabara natsiwunae muxu duta xua pocotsiwa bepa pinae exaneibina, pewuntha paeba, po wun xua ichun pewun tatsi pon xua bichocono ainya cui beyacaincha xua barapomonae. Barapomonae baxua exana xua ichamonae peyaputaenexa xua bara xaniwaicha xainyeya peexaneibinexa pocotsiwa xua penayabara tsiwunae muxu dubeibixae. Bapoxonae ichamonae jopa itacupaetsi xua baxua yabara jume matsontsonoba barapomonaetha. ¹⁷ Nacom ichichipa xua tsita itapeinya xeina piamonaetha, pomonaetha pomonae pecatsixae tsane pia petsiwunae muxu dutsiwa xua jopa equeicha ichawa nanta xeinae tsane xua pocotsiwa exanaena. Nacom ichichipa xua barapomonae peyaputaewa tsane xua bapon xaniwaicha exanaena pocotsiwa bayatha yabara tsiwunae muxu duta Abrahamtha. Daxota Nacom yabara tsiwunae muxu duta pia wuntha. ¹⁸ Ainya coyenewabe Nacom exana po coyenewabe xua jopa itacupaetsi xua ichawa yabara jume toxeinchiya exana. Meje baxue: Icha coyenewa Nacom yabara tsiwunae muxu duta; icha coyenewano xua Nacom pia wuntha yabara paeba xua pocotsiwa exanaena. Nacom jopa itacupaetsi xua peyabara naerabiwa barapo naxobe coyenebe. Waxainchi pomonaetsi xua pentatsi po coyenein barapo nacie pia coyenein, po coyenein xua abe exanatsi naca cana exana. Matautano jume cowantsiya wunae ewatatsi xua Nacom wanaca yawenaewa tsane xua naca capanenebiya abe waexanae coyenewa weya. Barapocotsiwa bayatha naca yabara tsiwunae muxu duta. ¹⁹ Waxainchi wunae ewatatsi xua Nacom bexa naca capanenebiya tsane. Wajume cowantsixae baxua daxota naca juntu coyene ayapusu exana. Naca itacupa xua wayabara jume cowantsiwa. Wawunae ewatsixae baxua naca yawena xua beta jinompatsi Nacom nexa. Baraxua icha be poxonae jera ichi xua tuwuntha babatabaruta pocotsiwa xua xota bichocono arewe xua jera beta perucuaenexa. Tsipei xaniwaicha wunae ewatatsi pocotsiwa Nacom exanapaeba, baxua naca cana exana xua nacaewabatsi Nacomtha xua caemonae nanaexanatsi bapontha. Nacom itaboco beequiya, paparuwa peuma werena pia botha eca xua tututhiya xua pin botha ichaxota wapatsiwa tsane. ²⁰ Jesús itaboco beicha naca tsiwunae patopiya Nacom pexainya beicha tatsi. Bapon copiya bewa bara bepatopiyaena xua wanaca matabaponaenexa xua iru wanaca itacupaewa tsane xua wapatsiwa tsane bara beicha Nacomtha. Daxota poxonae baxua exana Jesús naexana pepa sacerdotepin icha matha Melquisedec ichi pon caena bayatha popona.

7

Meje yabara xua Jesús pepa sacerdotepin naexana, icha matha Melquisedec ichi

¹ Bapon Melquisedec caena bayatha Salem tomarapiwi itorobiya pia pepa peewatsinchi. Matautano bapon sacerdotepin pon petsipaebin Nacomtha jiwi nexa, pon Nacom xua itaboco beequiya. Abraham caibe nawirena xua poxonae nawabchuta xua poxonae yotaba ainya nacuanpiwi pomonae jiwi itorobiya pia pepa peewatsiwichi xuano xua poxonae Abraham juteba barapomonae. Bapoxonae Melquisedec matenta iya, Abraham matenta iyatsi. Melquisedec Abraham jeichichi: “Barabũ Nacom beta cayawenaena”, jei Melquisedec. ² Abraham nota pocotsiwan xeina pomonae jiwi itorobiya pia pepa peewatsiwichi xua peamanayabixae poxonae juteba. Abraham ainyawan capana, xua diez xuanbe. Jiwana wetsatsaba tsiniya xua Melquisedec pecatsinexatsi sacerdotepinxae. Bapon Melquisedec hebreomonae pijumetha yabara wun caunuta xua jei: “Bapon jiwi itorobiya pia pepa peewatsinchi pon xua beta peexanaein”, jei. Bapon Melquisedec Salem tomarapiwi itorobiya pia pepa peewatsinchi. Barichi barapo Salem wun hebreomonae pijumetha yabara wun caunuta xua jei: “Jũntema popona”, jei. Daxota barapo naxobe wunbe yabara wun caunutatsi xua jeye: “Pon jiwi itorobiya pia pepa peewatsinchi xua beta peexanaein xuano xua jũntema popona”, jei xua hebreo jumetha. ³ Nacom Pejume Diwesitha Melquisedec paxa tatsi pewun jopa yabara yopitichi. Matautano pena tatsi jopa yabara yopitichi. Barichi jopa yabara yopitichi pia pamo susato jiwi tatsi. Matautano bapon jopa yabara paebichi ichaxota naexana. Matautano jopa yabara yopitichi ichaxota bapon naxuba. Bapon apara sacerdotepin xua ataya tsitecaeya pon petsipaebin Nacomtha jiwi nexa. Bapon sacerdotepin xua ataya tsitecaeya icha ichi pon Nacom Pexanto tatsi pon pepa sacerdotepin.

⁴ Payabara nanta xeinare xua bapon Melquisedec bichocono Abraham tsita ainya cuichi. Abraham pon wamo susatopin bapontha cata xua bayatha diez xuanbetha caewan jiwana wetsatsaba tsiniya. Baxua xua xuan Abraham cata apara xua bayatha yabara amanayaba pomonaetha pomonae jiwi itorobiya pia pepa peewatsiwichi xua poxonae Abraham juteba. ⁵ Moisés pia peitorobi coyenewatha jeye: “Sacerdotepiwi pomonae Leví pia pemomoxi susato jiwi tatsi, itacupatsi xua bara nota caewan pocotsiwa xua jiwi catsiba xua poxonae jiwi diez xuanbe caewan jiwana wetsaba pocotsiwan xua xuan xeina”, jei Moisés pia peitorobi coyenewatha. Barapo sacerdotepiwi baxuan exana barapo jiwitha yaitama piamonae tatsi. Matautano exaneiba yaitama barapo jiwi Abraham pia pemomo susato jiwi tatsi icha barapo sacerdotepiwi ichi. ⁶ Ichitha Melquisedec jopa Leví pia pemomoxi susato jiwi tatsi. Bequein bapon jopa dapomonaeyo daichitha Abraham catsiba bapontha poxonae caewan jiwana wetsaba tsitsiniya daxita xua diez xuanbetha jiwanan. Abraham xeina peyabara tsiwunae muxu dutsiwan, po peyabara tsiwunae muxu dutsiwan bayatha Nacom yabara tsiwunae muxu duta. Bequein Abraham xeina po peitorobi coyenewa xua itacupatsi xua jeye ichamonaetha: “Barabũ Nacom beta cayawenaena”, xua jei, ichitha Melquisedec baxua Abraham tsipaebatsi. ⁷ Jiwi ba yaputane xua ba bichocono ainya cui pon xua jeye: “Barabũ Nacom beta cayawenaena”, pon jei. Bapon bichocono ainya cui beyacaincha pon xua pebaraunchixaetsi. Daxota yaputainchi xua Melquisedec bichocono ainya cui beyacaincha xua Abraham tsipei Melquisedec tsipaeba Abraham xua Abraham tsipaebatsi. ⁸ Anoxuae po dapaethe sacerdotepiwi pomonae pomonaetha xua jiwi catsibeiba xua poxonae diez jiwana wetsabeiba, barapo sacerdotepiwi saya jiwi xua saya pewerapaewa tsane. Ichitha nama Nacom Pejume Diwesitha Melquisedec yabara paebatsi pon xua ataya tsitecaeya pepoponaein xua jopa petupaewa. ⁹⁻¹⁰ Metha jame be icha iche: Poxonae Abraham cata Melquisedectha poxonae caewan jiwana wetsaba diez xuanbe jiwana, bapoxonae cataunxuae abũ Leví jopa naexanaeyo. Matautano Leví pia pexui tatsi cataunxuae jopa naexanaeyo. Barichi cataunxuae pia pemomoxi susato jiwi tatsi cataunxuae jopa naexanaeyo. Bapon Leví pon matapainya pepa sacerdotepin canamata

canaexana poxonae cotacaya ichamonae iru sacerdotemonae naexana. Bapoxonae sacerdotepiwi naexanumenapona. Bapon tsipaebeiba Nacomtha jiwi nexa. Poxonae Abraham catsiba Melquisedectha xua poxonae caewan jiwana wetsaba diez xuanbe Nacom be tsitatsi xua apara be Leví iru cata xua iruru be bara Leví pia pemomoxi susato jiwi tatsi catsiba. Poxonae Abraham cata Melquisedectha xua diez xuanbe caewan jiwana wetsaba, bapoxonae yawa muxuna cata pia pemomoxi susato jiwi tatsi nexa bequein barapomonae jopa cataunxuae naexanaeyo.

¹¹ Sacerdotepiwi po sacerdotepiwi Leví canamata canaexana sacerdotepin, barapo sacerdotepiwi israelmonae catatsi Moisés pia peitorobi coyenewa tatsi. Daxita barapo sacerdotepiwi Aarón pia pemomoxi susato jiwi tatsi. Barapo sacerdotepiwi jopa itacupaetsi xua jiwi cana exanatsi xua penajuntu coyene xanepana exanaewa Nacomtha xua penatsicuentisiwa yabara xua abe peexanaexae Nacomtha. Bequein sacerdotepiwi exanapona pocotsiwa itoroba barapo Moisés pia peitorobi coyenewatha ichitha awiya jopa itacupaetsi xua jiwi yawenatsi. Daxota jiwi equeicha canamatawenona icha sacerdotepin. Barapo sacerdotepin jopa bewa exanae icha Aarón pia pemomoxi susato jiwi tatsi jiwana ichi. Jame barapo sacerdotepin bewa exanaena icha Melquisedec ichi.

¹² Poxonae Nacom icha sacerdotepin cana exana be pocotsin icha Melquisedec ichi bapoxonae yawa muxuna bewa exanaena pena peitorobi coyenewa. ¹³ Barapo pena sacerdotepin pon Wanacanamataxeinaein, bapon baxua yabara paebatsi Nacom Pejume Diwesitha. Bapon apara Israel pemomoxi susato jiwi jiwana pin pomonae jiwana xua doce po bicheitobe. Ichitha bapon naexana icha bicheito dena xua Judas pia bicheito dena po bicheito dena bayatha bapana jopa jiwana naexanaeyo sacerdotepin. ¹⁴ Daxita jiwi yaputane xua barapon pon Wanacanamataxeinaein naexana Judá barompaya pia pemomoxi susato jiwi dena tatsi. Poxonae Moisés yabara paeba sacerdotepiwi Moisés jopa yabara paebiyo xua Judá pia pemomoxi susato jiwi jiwana tatsi naexanaena sacerdotepin.

¹⁵ Daxota waxainchi xaniwaicha bara yaputainchi xua barapo pena sacerdotepin naexana icha sacerdotepiwi yaiwi, icha Melquisedec ichi pon pepa sacerdotepin. ¹⁶ Bapon Cristo jopa naexanaeyo sacerdotepin xua poxoru Moisés pia peitorobi coyenewatha pepaebixae xua Leví pia pemomoxi susato jiwi jiwana tatsi bewa naexanaena sacerdotepin. Jame apara Cristo sacerdotepin naexana Nacom pia peayapusu itorobi coyenewatha xua pexeinaexae peajuntucoyenesuwa po peajuntucoyenesuwa ataya tsiteca xua jopa itacupaetsi xua peweraweracaewa. ¹⁷ Nacom Pejume Diwesitha Cristo baxua yabara jeichichi:

“Xam sacerdotepim naexaname ataya xua petsitecaenexa, barapo sacerdote yajiwim icha Melquisedec ichi xua sacerdotepin”,
jei Nacom Pejume Diwesitha,
xua Cristo yabara paebatsi.

¹⁸ Nacom cana exana xua Moisés pia peitorobi coyenewa tatsi jiwi jopa canantawenon- aeyo tsipei barapo coyenewa jopa xeinaeyo peayapusuwa xua jiwi cana exanatsi xua jopa pexeinaewa penatsicuentisiwa xua abe peexanaexae Nacomtha. Matautano jopa itacupaetsi xua jiwi pecanaexanaewatsi xua pecapanenebiwatsi abe pia peexanae cuiru coyene weya. ¹⁹ Barapo Moisés pia peitorobi coyenewa tatsi bapana jopa itacupaetsi xua jiwi juntu coyene xanepana exanatsi Nacomtha. Daxota anoxuae pena coyenewa xeinatsi xua ainya cui beyacaincha po coyene xua copiya. Barapo pena coyenewa naca cana exana xua wunaewatatsi pocotsiwa Nacom exanapaeba xua barapo pena coyenewaxae daxota anoxuae Nacom naca yaputane xua piamonaexae tatsichi.

²⁰ Nacom xainyeya yabara tsiwunaewatatsi muxu duta pia pewuntha xua Cristo naexanaena sacerdotepin xua ataya tsitecaeya. Jopa nama Nacom pia pewuntha yabara tsiwunaewatatsi muxu dutsiyo xua sacerdotepiwi penaexanaenexa pomonae Leví pia pemomoxi

susatopiwi tatsi. ²¹ Ichitha poxonae Cristo pon jiwi Pecanamataxeinaein sacerdotepin naexana, bapoxonae ichun, Cristo yabara paebatsi Nacom Pejume Diwesitha, jeye:

“Nacom pia pewuntha yabara tsiwuna
muxu duta, ichawa jopa toxeincha
yabara exanae tsane.

Poxonae Nacom yabara tsiwuna muxu duta,
bapon jeye Pexantotha: ‘Xam sacerdotepim
xua ataya petsitecaenexa’, jei Nacom”,
jei ichun xua Nacom tapaebatsi
Nacom Pejume Diwesi.

²² Poxoru Nacom tsiwuna muxu duta xua Jesús naexanapaeba sacerdotepin daxota Nacom tsita itapeinya xeina xua exanaena xua bayatha paeba barapo pena coyenewatha.

²³ Bayatha sacerdotepiwi pinmonae tsoponae. Ichitha barapo sacerdotepiwi naitapataya werapouneiba, yawa ichamona naexana sacerdotepiwi. Dapon aibi barapo sacerdotepiwi jiwana pon itacupatsi xua pewetsiwa pia peexanae coyenewan tsipei daxita werapouneiba. ²⁴ Ichitha poxoru Jesús ataya asu pepoponaexae daxota ataya tsitecaeya exanaena pia peexanae coyenewa icha pepa sacerdotepin ichi. Jopa nantawenonaeyo xua ichun Jesús pecoutha tanacuitatsi pon xuya sacerdotepin naexana. ²⁵ Daxota bapon ataya tsitecaeya itacupatsi xua jiwi ataya pecapanenebiwatsi pomona xua pepatsiwa tsane Nacomtha pomona xua Nacom peyaputaewi pejume cowantsi jiwixae Jesús. Jesús baxua exana ataya tsitecaeya asu pepoponaexae xua pewucaenexa Nacomtha xua barapo jiwi peyawenaenexatsi.

²⁶ Nacom tsita xanepanatsi xua Jesús pepa sacerdotepin naexana xaniwaicha, po sacerdotepin wacanamatawenonaexae. Yatsicaewa bapon bichocono pejuntu coyene xanepanaein Nacomtha. Bapon Jesús jopa abe exanaeyo ichamonaetha. Nacom tsitatsi xua Jesús jopa natsicuentiyo poxoru abe jopa exanaeyo Nacomtha. Bapon Jesús seicaya exana ducuaenaebiya. Jopa exanaeyo icha be ichi pomona abe peexana dubenanaebiyaewi. Bapon Jesús Paxa capoinchi po itaboco tajü beicha po itaboco beyacaincha xua necoichatsi xua Jesús barapo itaboco beicha Paxa ainya cui exanatsi. ²⁷ Pepa sacerdotepiwi ba bewa exaneibina po coyene xua duwei jutebeiba iboto matatsuntha xua tuxusi exaneiba Nacom nexa, daxita matabintha tsaibi. Baxuan nata exaneiba copiya abe pia peexanae coyenewan nexa. Bapoxona cotacaya jiwi taexaneibatsi abe pia peexanae coyenewan nexa. Nama Jesús jopa barichiyo. Nama seicayiya icha coyeneya exana. Bapon Jesús pia pepon nata caenaeta xua tupa exanatsi saya bara cae cui coyenetha daxita carepaya jiwi nexa xua jiwi abe pia peexanae cuiru coyenewan tatsi nexa. ²⁸ Moisés pia peitorobi coyenewa tatsi canacui coyene exanatsi xua bara saya jiwi naexana pepa sacerdotepiwi. Barapo pepa sacerdotepiwi abe exana xua saya pecui pawi. Barapomona jopa pejuntu cui coyene xanepanae jiwi Nacomtha. Ichitha Nacom yabara tsiwuna muxu duta pia wuntha xua Pexanto cana exana pepa sacerdotepin, po sacerdotepin yatsicaewa ataya tsitecaeya bichocono pejuntu coyene xanepanaein xae Nacomtha. Baxua Nacom exana xua yabara tsiwuna muxu duta xua pepuya weya tatsi poxonae Moisés catatsi peitorobi coyenewa.

8

Meje yabara xua Jesús pon pejume yawenaein jiwi Nacomtha

¹ Anoxuae xua pocotsiwa xua bichocono peainya cui coyenewa meje baxue: Waxainchi xinatsi yatsicaya pepa wasacerdotepin, pon yatsicaewa bichocono pejuntu coyene xanepanaein Nacomtha xuaunxuae yabara paca tsipaebatsi. Bapon eca pia peitupanae ecaethopaewatha Nacom pia pecoxa weya tatsi, peitabocotha. ² Anoxuae Jesús nacuita Nacom pia xantheicha tatsi po penacuichi coyeneya sacerdotepiwi exana Nacom pia botha tatsi xua itabocotha. Barapo bo yatsicaewa Nacom pia pexainyei bo tatsi

ichaxota popona xua itabocotheicha. Nacom pon jiwi Pecanamataxeinaein exana barapo bo. Jiwi jopa exanaeyo barapo bo.

³ Nacom daxita carepaya pepa sacerdotepiwi yabara tsiwun dubatsi xua jiwi petaexanaenexa tsaibi tsainchi po coyene pocotsiwa xua jiwi amanaya pecatsiwa Nacomtha. Matautano barapo pepa sacerdotepiwi yabara tsiwun dubatsi xua jiwi petaexanaenexa tsaibi tsainchi po coyene xua duwei pejutebiwa pocotsi duwein xua jiwi amanaya pecatsiwa Nacomtha xua abe peexanaexae. Daxota Jesús iru bewa bara ichiya exanae xua Nacom taexanatsi ichi sacerdotepiwi ichi poxonae Nacom taexanatsi. ⁴ Icha metha barapo dapaetha Jesús poponaetsipa barapo irathe poxonae iruru jinompa barapo sacerdotepiwi po sacerdote Aarón yaiwi jopa itacupaetsipaetsi xua cana exainchi pepa sacerdotepin. Tsipei cataunxuae barapo irathe sacerdotepiwi yaiwi exanapona pocotsiwa Nacom nexa xua Moisés pia peitorobi coyenewatha pecui itorobixae. ⁵ Ichitha barapo sacerdotepiwi tanacuita be pocotsiwa xua saya penajupae coyenewa xua jopa pexainyei coyenewa. Pocotsiwa jame xua pexainyei coyenewa, baxua jame Jesús exana peitabocotha. Pocotsiwa xua barapo sacerdotepiwi tanacuita saya be penajupae coyenewa ichitha xaniwaicha jopa najupaeyo xua be pocotsiwa Jesús exana peitabocotha. Baxua yaputainchi poxonae Nacom Moisés tsipaebatsi. Poxonae Moisés muxu pecuaranotsi anseraboco xua ichaxota jiwi wuna jainteibina Nacomtha bapoxonae Nacom Moisés tsipaebatsi. Nacom jeye: “Yabara nanta xeinare xaniwaicha xua daxita beta neexanaenexa anseraboco xua bayatha pocotsiwa yabara catsita itapeinya xeinatsi demxuwa. Barapocotsi anserabocotontha seicaya jiwi newuna jainchina”, jei Nacom. ⁶ Nama Cristo, yatsicaya pon wasacerdotepin, bapon exana itaboco beicha pocotsiwa xua yatsicaewa bichocono peainya cui coyenewa. Barapo coyene bichocono ainya cui beyacaincha po coyenewa xua peru coyenewa xua po coyeneya icha sacerdotepiwi exaneiba barapo irathe. Cristo jiwi yabara jume yawenatsi Nacom beicha xua jiwi pepatsinexa Nacomtha. Barapo pena coyenewa Nacom yabara tsiwuna muxu duta xua bichocono wuna beyacaincha barapo peru coyenewa po coyenewa pocotsiwa sacerdotepiwi exaneiba. Barapo pena coyenewa jiwi juntu coyene xanepana exanatsi Nacomtha. Ichitha barapo peru coyenewa jopa daichiyo.

⁷ Bayatha peru petsiwnae yabara muxu dutsiwa Nacom Moisés yabara tsiwuna muxu dutatsi. Icha barapo coyenewa xainaetsipa peayapuswa xua daxota jiwi beta juntu coyene xanepana exanatsi Nacomtha, metha jopa nantawenonaetsipae icha pena petsiwnae muxu dutsiwa. ⁸ Ichitha Nacom tane xua barapo jiwi jopa pejuntu coyene xanepanae jiwi bapontha poxonae barapo peru peyabara tsiwuna muxu dutsiwa xaina. Daxota ichun Nacom Pejume Diwesitha jeye:

“Nacom jeye: Maticabin othopaena, po maticabintha
pena petsiwnae muxu dutsiwa exanaein Israel
nacuapiwi pia pemomoxi susato jiwitha tatsi
iru Judea nacuapiwi pia pemomoxi
susato jiwitha tatsiru.

⁹ Jopa bara juta coyeneya ichin tsane poxonae matha icha ichin painya amo susato jiwitha. Barapo coyene barapomonaetha catan poxonae maticaponan Egipto nacua weya. Daichitha barapomonae jopa nacui yabara wunaetsiyo xua peexanaenexa pocotsiwa itoroban poxonae catan barapo peyabara tsiwuna muxu dutsiwa barapomonaetha. Daxota barapomonae punapentan, xua jopa tayawenaewa tsane, jei Nacom”, jei ichun.

¹⁰ Equeicha ichun jeye:

“Nacom jeye: Barapo peyabara tsiwuna muxu

dutsiwa Israel nacuamonaetha, poxonaē barapo
matababin wetsina bara baxua exanaein.

Janje: Jiwi pejuṅtu coyenewatha ichaxota
nanta xeina taitorobi coyenewa baxota dubin.

Barapoxonaē barapomonaē neyaputaena yawa
nejume cowṅntsiya jejei tsane.

Tacoutha barapomonaē pia Nacom
tatsi naexanaein.

Barapomonaē tamonaē naexanaena.

¹¹ Dapon aibi pon bewa cuidubina ichṅntha xua

xan yabara, xuano xua cuidubina pia jitontha

xua xan yabara, mataṅtano xua cuidubina

peweicho xua xan yabara

petana neyaputaewanexa tsane.

Jopa bewa cuidubi tsane barapomonaē tsipei

daxita jiwi neyaputaena pomonaē pecui pawī

jiwi, irṅno pomonaē peainya cui jiwi.

¹² Xan barapomonaē cui yabara juṅtemainein

abe pia peexanaē cuiru coyenein tatsi, xua

jopa pexeinaewa tsane xua tana netsita

natsicuentsiwa xua abe peexanaewaxae.

Bapana ataya equeicha jopa yabara nanta

xeinaein tsane barapo abe peexanaē

cuiru coyenein, jei Nacom”, jei ichṅn

Nacom Pejume Diwesitha xua saya

Nacom tapaebatsi.

¹³ Nacom yabara paeba pena peyabara tsiwṅnaē muxu dutsiwa tsipei po peyabara

tsiwṅnaē muxu dutsiwa copiya Moisés yabara tsiwṅnaē muxu dutatsi saya peru jume.

Pocotsiwa ba peru coyenewa ba saya weraweraca. Daxota barapo peru peyabara

tsiwṅnaē muxu dutsiwa saya irṅ weraweraca.

9

Meje yabara xua Nacom pin pia bo tatsi po bo xua itabocotheicha uncuā xuano irṅn po bo
xua po irathe tsique uncuā

¹ Nacom copiya Moisés yabara tsiwṅnaē muxu dutatsi. Barapo peyabara tsiwṅnaē
muxu dutsiwa peitorobi coyenein xeina xua pocotsi coyeneya israelmonaē bewa ex-

anaena poxonaē nacaetuta xua wṅnaē pejainchinexatsi Nacom. Mataṅtano barapo

peyabara tsiwṅnaē muxu dutsiwa itoroba xua jiwi xeina po bo xua Nacom pia bo tatsi

xua po irathe. ² Barapo Nacom pia bo jiwi exana duwein pebocoton xua be anseraboco.

Barapo anseraboco ainya tutube xeina. Po tutu copiya dena pewṅn: “Nacom pia tutu

po tutu ainya cui tutu xua jopa pexeinaewa peabe cuiru”, jei. Barapo tututha uncuā

penainto po penaintoṅta itanatanota penasiwa. Mataṅtano barapo tututha uncuā xua

pexaethopaewa po pexaethopaewatha xua baxota jeba pan, po pan xua Nacom catatsi.

³ Paparuwa xua dutsica barapo paparuwa peṅma werena icha tutu xeina po tutu pewṅn:

“Yatsicaewa Nacom pia tutu po tutu bichocono pepa peainya cui tutu xua jopa xeinaeyo

peabe cuiru”, jei. ⁴ Barapo tututha uncuā xua be pecaxaethopaewa xua ṅ penainto xua

oro wṅn nainto. Baraxota yṅbeibiya tauteibathopa petuxueiwa po petuxueiwa tuxusi

tuxuei benata poxonaē tauta. Mataṅtano barapo tututha uncuā xua be caja po caja

pewṅn: “Nacom pia peyabara tsiwṅnaē muxu dutsi caja”, jei. Barapo caja peṅma weya

daxita matapaēicha caxueba oro naintontha. Barapo caja juntututha eca coroto xua

oro nainto. Barapo corotoṅta tsijuntutu boca po pexaewa pewṅn maná matawṅn xua

itaboco pia pexaewa. Mataṅtano barapo caja juntututha boca penacobenababi naewa po

penacobenababi naewa bayatha Aarṅn xeina. Barapo naewa bayatha Nacom xuwa exana

xua tsiwixi pirururujei poxonae pexeinya petsita itutsi coyene exana pia peayapusu itorobi coyeneyatha. Matautano barapo caja juntututha bobena iboton po ibotontha mata tinaduba Moisés pia peitorobi coyenewa. ⁵ Barapo caja pemata xatatsiwa jumatha nacueyatabe ecabe ainya querubinbe matawunbe xua jumope canaxobiya exana oro naintotha, ponbe be matatsunpinbe. Barapo ainya querubinbe matawunbe yabara caunuta xua Nacom baxota eca. Barapo ainya querubinbe matawunbe naitama taecabe yawa nacuarafe yeyetecabe xua itata barapo caja pemata xatatsiwa. Matautano irabe tayecarecabe ichaxoya pejana nunubabareca po jana duwein jana. Barapo duwein sacerdotepin bexuba jiwi abe pia peexanae cuiru coyenein tatsi nexa. Anoxuae baxua yabara equeicha jopa bepaca tsipaebichi.

⁶ Daxita nacui wunaeta pocotsiwa xua barapo tutubetha nexa. Bapoxonae sacerdotepiwi joneibeibiya daxita matacabi po tututha xua copiya dena. Barapo sacerdotepiwi barapo tututha exaneiba pia penacuichiwa. ⁷ Ichitha nama po tutu dabeya saya meisa joniyeiba pon pepa sacerdotepin xua saya caetha tsaibi xua daxita weithan tsaibi. Poxonae barapo pepa sacerdotepin barapo tutu iya joniya bewa nata cajoniyaena duwein jana. Barapo jana nunubaba ichaxota querubinbe matawunbe itabarayo deca xua bapon abe pia peexanae cuiru coyenewan tatsi nexa xuano xua iru jiwi abe pia peexanae cuiru coyenewan tatsi nexa xua poxonae jiwi jopa nacui yabara yaputaeyo. ⁸ Peyabara exanaewa daxita baxuan Nacom pia Pejumope tunaxu tatsi naca cuiduba xuaje: Poxonae cataunxuae sacerdotepiwi taexana dubenanaebiya Nacom po tututha xua copiya dena, jiwi jopa copatsichi xua pata po tutu dabeya ichaxota Nacom popona. ⁹ Daxita pocotsiwan barapo anserabocototha caena bayatha exana yabara caunuta xua anoxuae wayabara yaputaenexa baxua xua pocotsiwa anoxuae exana. Jiwi Nacom wunae jainteibatsi poxonae sacerdotepin exaneiba pocotsiwa xua jiwi pecatsiwa Nacomtha xuano xua poxonae exaneibano xua duwei pejutebiwa xua tuxusi exana Nacom nexa. Bara bequein jiwi baxua exaneiba ichitha cataunxuae pia juntu coyenein tatsi cana exanatsi xua awiya yabara nanta xeina dubenanaebiya abe pia peexanae cuiru coyenein tatsi. Barapo coyene po coyene jiwi exana jopa beta juntu coyene xanepana exanaetsi xua jopa penatsicuentisiwa tsane Nacomtha xua abe peexanaexae. ¹⁰ Barapo peru peitorobi coyenewa xua Moisés pia peitorobi coyenewa tatsi jiwi jopa yawenaetsi xua penajuntu coyene xanepana exanaewa Nacomtha. Saya apara yabara paeba xua jiwi bewa pocotsiwa xaibina poxonae nabaneiba, matautano xua xuan pocotsiwa bewa apeibina. Matautano jiwi itorobatsi xua po coyenein yabara xua jiwi beta penaperu xainwaetsiya nowaewa yabara pia wunae jainteibichi Nacom. Barapo coyenein xua saya jiwi bewa cana exanae pia pepontha beya xua anoxuae Nacom pena coyenewa equeicha exana.

¹¹ Nama Cristo patopa pon pepa sacerdotepin. Bichocono yatsicaewa pexeinya coyenewa xua pena coyenewa nacata capatopa po coyenewa xua anoxuae waxainchi xeinatsi. Po tutu ichaxota bapon nacuiteiba icha pepa sacerdotepin ichi xua itabocotha icha bichocono wunae tsipei Nacom daxita matapaeicha wetsiya exana. Barapo tutu bichocono wunae beyacaincha po tutu ichaxota sacerdotepiwi tanacuita Nacom xua barapo cae pin nacuathe. Jiwi jopa acabiyo barapo tutu xua itabocotha tsipei barapo tutu jopa apara po cae pin nacuathe tsique nexiyo. ¹² Cristo joniya ichaxota yatsicaewa Nacom pia xantha. Bara xoteicha Cristo jopa caponaeyo duwein jana po duwein pewun chivo, xuano xua vaca jana jopa caponaeyo xua penun jana, xua pebto jana. Saya jame Cristo Nacom tsita itutatsi xua bapon jiwi tsitupatsi xua abe pia peexanae coyenewan tatsi. Bapon Cristo saya bara cae coyenewatha joniya baxoteicha xua daxita carepaya jiwi nexa. Daxota bapon Cristo bara ataya tsitecaeya naca capanepa. ¹³ Sacerdotepiwi ba nota vaca pebton pia pejanan, yawa chivo pia pejana xuano ipuna xua poxonae tautatsi vaca pesowatiyo peweyo. Sacerdotepiwi mata wenunubaba jiwi daxita baxuantha pomonaetha pomonae xua abe peexanae cuiru coyenein peexanaewixae. Bara bapoxonae barapo coyene jiwi itacupatsi xua cana exanatsi xua jopa penataxobiwa

pia pepontha bequein awiya xeina penatsicuentiwa. ¹⁴ Bequein bara baxuan barapo jiwi tsiwiyo yawenatsi xua jopa petaxobiwatsi pia pepontha ichitha nama Cristo pia pejana tatsi barapomona bichocono yawenatsi. Cristo pejana bichocono peayapusu coyenewa xeina beyacaincha xua duwein pejana. Nacom pia Pejumope tñaxu tatsi po jumope ataya tsitecaeya popona barapo pejumope tñaxu tatsi Cristo yawenatsi poxona saya Cristo nayabara cui copata xua bara pebexubinexatsi poxona pejana pichapabarena pewan weya petupaewatha. Bapon Cristo jopa bapana exanaeyo peacoyenebewa. Cristo wanaca tsitupaexae Nacom naca juntu coyene xanepana exana. Daxota Nacom jopa tsita natsicuentichi abe waexanaexae. Wajuntu coyene equeicha jopa yabara wanaca tsipaebinexa abe waexanae coyene. Daxota jopa bewa ponae tsainchi ichaxota ataya atene tsaibi pomona jopa pejume cowantsiwi. Anoxuae jame naca itacupa xua ajuntusya taexana dubenanaebiyatsi Nacom pon xua ataya tsitecaeya asu pepoponaein.

¹⁵ Daxota bapon Cristo naexana pon nacata paeba Nacomtha yawa pon naca tsipaeba Nacom nexa. Bapon Cristo nacata catsica Nacom pia pena peyabara tsiwuna muxu dutsiwa tatsi. Bapon naca cana exana xua daxitatsi caemona naexanatsi Nacomtha. Poxona naca tsitupa Nacom yabara junteina abe peexanae cuiru coyene po peabe exanae cuiru coyenein xua jiwi caena bayatha exana poxona cataunxuae exanapona po coyene bayatha Nacom Moisés yabara tsiwuna muxu dutatsi xua peru peyabara tsiwuna muxu dutsiwa. Daxita pomona Nacom pewabixae barapomona catsibinchi peajuntuyapusuwa po peajuntuyapusuwa xua ataya tsitecaeya tsane xua bayatha Nacom peyabara tsiwuna muxu dutsixae barapomonaetha. ¹⁶ Poxona pebin ba ichichipa cata pia pecopiniwa ichamonaetha xua poxona tupaena, copiya matha yabara caununaya wan tinaduba paperatha pomona xua pecopiniwa xeinaewa tsainchi. Pomona xua pecopiniwa xeinaewa tsainchi barapomona bewa tsita itapeinya xeinaena xua barapo pebin xaniwaicha bara tupa xua poxona beya pewunaeya tsane xua pecopiniwa notsinexatsi pon xua tupa. Bapoxona barapomona bara itacupatsi xua pexeinaewa pocotsiwa xua bapon xeina pon tupa. ¹⁷ Barapo papera, po paperatha bayatha pebin nacopiniwa yabara jume tinaduba cataunxuae jopa ainya cuiyiyo poxona abu cataunxuae bapon popona tsipei jopa copiniwa notichi barapomona. Saya jame poxona bapon yatsicaewa tupa bapoxona jame ainya cui barapo papera, tsipei barapomona itacupatsi xua pexeinaewa tsane pocotsiwa bapon xeina. ¹⁸ Barichi barapo copiya peyabara tsiwuna muxu dutsiwa. Pewunaeya tsane xua poxona jiwi xeinaena pocotsiwa bayatha Nacom Moisés yabara tsiwuna muxu dutatsi sacerdotepin bewa matha duwein bexubina xua bapoxona barapo coyene jiwi pexeinaewa tsane. ¹⁹ Moisés daxita pia peitorobi coyenewan yabara paeba daxita jiwitha. Nexata bapon pena xua oveja na xua tsobia naewiyotha opi yarabaxuba, po naewiyotha pewun hisopo naeyo. Bapon mene muxunaxuba vaca jana poyo peweinyo pebtiyo xuano xua muxunaxuba chivo jana. Bapoxona baxuan bapon Moisés nunubaba Nacom Pejume Diwesitha. Matautano daxita jiwitha mata wenunubaba. ²⁰ Bapoxona Moisés daxita jiwitha jeye: “Barapo jana po janatha paca mata wenunubabatsi apara Nacom itoroba xua tapacata exanaewatsi tsainchi. Baxua paca tsita itapeinya xeina xua Nacom xaniwaicha bara pacata exanaena pocotsiwa pia peyabara tsiwuna muxu dutsiwa”, jei Moisés. ²¹ Barichino Moisés exana xua anseraboco mata wenunubaba pejanatha. Matautano muxuna mata wenunubaba xua xuan barapo anserabocototha tututha umena pocotsiwan sacerdotepiwi canacuiteiba poxona jiwi nacaetuteiba xua Nacom wuna pejainchinexatsi. ²² Moisés pia peitorobi coyenewantha tatsi itoroba xua bara imoxoyo daxita coyeneintha bewa pejanantha mata wenunubabi xua daxita baxuan Nacom jopa petsita nataxobinexatsi. Nacom jopa yabara junteinaeyo jiwi abe pia peexanae cuiru coyenein tatsi icha jopa pejana epa-epacaeyo xua barapo jiwi nexa.

Meje yabara xua Cristo tsitupa jiwi abe pia peexanae cuiru coyenewan tatsi

²³ Sacerdotepiwi bewa jutebina duwei pemata wenunubabinexa pejanatha anseraboco. Bapoxona Nacom petsita xanepanaenexatsi xua jopa nataxobiyo barapo

anseraboco xuano xua xuan tututha umena. Barapo coyene saya yabara caunuta xua yatsicaewa pepa coyenewa Cristo exana peitabocotha. Ichitha nama barapo yatsicaewa pepa coyenewatha peexanaenexa peitabocotha jame bewa pejana epa-epacae pejana pon pejuntu coyene xanepanaein pon peainya cuin pia pejana tatsi xua Nacom tsita jiwi xanepanatsi xua jopa penatsicuentisiwa xua abe peexanaexae Nacomtha. Barapo jana bichocono ainya cui beyacaincha duwein jana po jana xua sacerdotepiwi n̄n̄ubaba po cae pin nacuathe. ²⁴ Poxonae Cristo joniya Nacom pin pia botha tatsi xua itabocotha jopa joniyaeyo po bo saya jiwi exana po cae pin nacuathe xua Nacom pin pia bo tatsi. Barapo bo xua Nacom pin pia bo saya yabara caunuta xua yatsicaewa peitabocotha xeina pepa Nacom pin pia bo tatsi. Jame Cristo joniya Nacom pin pia botha tatsi, xua Nacom pia nacuatheichatsi xua itabocotha. Baxoteicha anoxuae Cristo naituta Nacomtha xua wanacata tsipaebinxae Nacom peitabaratha. ²⁵ Pon pepa sacerdotepin bewa joniyaena bara saya caetotha tsaibi xua daxitan weithan tsaibi ichaxota po tutu yatsicaewa Nacom pia tutu xua po tutu bichocono yatsicaewa peainya cui tutu xua barapo anserabocotha. Barapon pejana capaneiba barapo tututha xua duwein jana xua jopa barompaya pia pejana tatsi. Nama Cristo jopa nantawenonaeyo xua nayabara cui copata xua matowa tupa pecana exanaewatsi xua jiwi abe peexanae cuiru coyenein tatsi nexa. ²⁶ Icha baxua tsipae bapoxonae bapon matowa tupa exaneibichipatsi xua bexubeibatsi xua poxonae Nacom aena barapo cae pin nacue forota xua beya anoxuae. Ichitha nama anoxuae weta xua peru dapae tsipei bapon Cristo patopeica barapo cae pin nacuathe petupaenexa xua saya bara cae coyenewatha ataya petsitecaenexa tsane. Bapon Cristo naetotha tsitupa jiwi xua Nacom jiwi peyabara cui junteinaenexatsi abe pia peexanae cuiru coyenein tatsi. ²⁷ Daxita jiwi ba werapouneibina saya caetotha. Bapoxonae pirapae Nacom yabara paebina daxita jiwi xua penatsicuentisiwa xua abe peexanaexae. ²⁸ Barichiru, icha jiwi ichi Cristo saya caetotha tsitupa jiwi pinmonae, xua Nacom jiwi abe pia peexanae cuiru coyenein tatsi pecayabara junteinaenexa tsainchi. Equeicha bexa tsane patopeicaena po cae pin nacuathe. Jopa tsipatopeicae tsane xua equeicha petsitupaewa tsane jiwi abe pia peexanae cuiru coyenein tatsi. Jame tsipatopeicaena xua pecapanenebiyaenexa pomonaetha pomonae pia pewnae ewatsi jiwixaetsi xua bapon pepatopaewa po cae pin nacuathe tsique.

10

¹ Moisés pia peitorobi coyene tatsi, baxua saya yabara caunuta xua yaputane wanaca exanaenexa po coyene xua wnae po coyene xua bexa Nacom exanaena itabocotha. Barapo coyene, jopa pepa coyenewiyo poxoru jopa jupaeyo po coyene xua Nacom yatsicaewa xeina itabocotha. Moisés pia peitorobi coyenewa tatsi jopa itacupaetsi xua jiwi pejuntu coyene xanepana exanaewatsi Nacomtha pomonae wnae jainteiba Nacom. Bequein pepa sacerdotepiwi daxita weitha exaneiba xua duwei jutebeiba jiwi abe pia peexanae cuiru coyenein tatsi nexa daichitha cataunxae jopa itacupaetsi xua jiwi juntu coyene xanepana exanatsi xua jopa pexeinaenexa xua penatsicuentisiwa xua abe peexanaexae Nacomtha. ² Icha Moisés pia peitorobi coyene tatsi jiwi juntu coyene xanepana exanaetsipatsi Nacomtha bapoxonae sacerdotepiwi jopa equeicha nantawenonaetsipae xua equeicha pejutebeibiwa duwei jiwi abe pia peexanae cuiru coyenein tatsi nexa. Icha jiwi caetotha juntu coyene xanepanaetsipa Nacomtha, bapoxonae jiwi jopa natsicuentisipae xua abe peexanaexae Nacomtha. ³ Ichitha poxonae barapo sacerdotepiwi jutebeiba duwei jiwi abe pia peexanae cuiru coyenein tatsi nexa bequein baxua exana cataunxae jiwi cana exanatsi xua yabara juntanaina barapo abe pia peexanae cuiru coyenein tatsi. Jiwi yabara juntanaineiba baxuan daxita weitha poxonae duwein jutebeibatsi barapo jiwi nexa. ⁴ Vaca pebto pia pejana tatsi yawa chivo pia pejana tatsi jopa bapana jiwi juntu coyene wenotichi abe pia peexanae cuiru coyenein tatsi xua jopa penatsicuentisiwa nexa Nacomtha xua abe peexanaexae.

⁵ Daxota poxonae Cristo patopa po cae pin nacuathe tsique, Cristo jeye Nacomtha:

“Xam jopa ichichipaem po coyene xua duwein pebexubiwa jiwi abe pia peexanae cuiru coyenein tatsi nexa.

Matautano jopa ichichipaem xua po coyenein xua jiwi amanaya necacatsiwa.

Jame pebaxuanexa yatsicaewa pepa jiton necana exaname xua naexanan, tatsitupaenexa jiwi abe pia peexanae cuiru coyenein tatsi nexa.

⁶ Xam jopa cajuntũ coyene weiweina exanaeyo poxonae duwein ompin tautatsi xuano xua pexaewa tauta petuxusi exanaenexano xua xam neyabara junteinaenexa jiwi abe pia peexanae cuiru coyenein tatsi.

⁷ Bapoxonae xan Cristo, janje:

‘Xam Tanacom.

Xan xote po nacuathe patopeicanje taexanaenexa xua pocotsiwa ichichipame be pocotsi coyeneya necui yabara tina jinya diwesitha’, jan”, jei Cristo.

⁸ Copiya Cristo paeba xua jeye: “Xam jopa ichichipaem yawa jopa cajuntũ coyene weiweina exanaeyo po coyene xua poxonae jiwi bexuba duwein xuano poxonae exaneiba po coyene poxonae jiwi amanaya cacatsibeiba. Matautano jopa ichichipaem poxonae duwein ompin tautatsi xua jiwi abe pia peexanae cuiru coyenein tatsi nexa”, jei Cristo. Baxua Cristo paeba tsipei Moisés pia peitorobi coyenewatha itoroba xua jiwi bewa exanaena barapo coyenein Nacom nexa. ⁹ Equeicha bapoxonae Cristo cotacaya jeye: “Xan xote po cae pin nacuathe patopeicanje taexanaenexa pocotsiwa ichichipame”, jei. Poxonae Cristo baxua caunutsiya paeba copiducua cana exana po coyene peru coyene. Cristo anoxuae equeicha pecoutha pena coyene exana poxonae naetotha tsitupa jiwi abe pia peexanae cuiru coyenein tatsi. ¹⁰ Nacom naca juntũ coyene xanepana exana wanaca cana exanaenexa piamonae tatsi poxoru Jesucristo exana pocotsiwa Nacom peichichipaexae. Jesucristo pia pepon nacaenaeta Nacomtha xua naetotha petsitupaenexa daxita jiwi abe pia peexanae cuiru coyenein tatsi xua bara cae coyenewatha xua ataya petsitecaenexa tsane.

¹¹ Daxita sacerdotepiwi pomonae judiomonae daxita matabi exaneiba xua duwein pebexubiwa, bequein barapo coyenewa jopa itacupaetsi xua jiwi juntũ coyene wenotatsi abe pia peexanae cuiru coyenein tatsi. ¹² Nama Jesucristo bara cae coyenewatha exana poxonae naetotha tsitupa jiwi abe pia peexanae cuiru coyenein tatsi, xua bara ataya tsane. Poxonae Cristo baxua nacui weta Nacom pia pecoxatheicha tatsi equiya xua itabocotheicha. ¹³ Baxoteicha Cristo abũ ewata beya poxonae abũ tsane poxonae Nacom cana exanaena xua Cristo cana exanaeinchi xua pecanamataxeinaenexa pia peaitafaetabi jiwichi. ¹⁴ Cristo piamonae juntũ coyene xanepana exana xua ataya tsane poxonae naetotha tsitupa cae coyenewatha. Barapomonae pomonae xua Nacom tsitatsi xua jopa xeinaeyo penatsicuentiwa pomonae piamonaexae tatsi. ¹⁵ Nacom Pia Pejumo pe tũnaxũ tatsi baxua yabara irũ naca tsipaeba bayatha Nacom Pejume Diwesitha, jeye:

¹⁶ “Matacabin othopaena po matacabintha xan tayabara tsiwũnae muxu dutsiwa xua pena coyenewa exanaein barapomonaetha.

Jiwi pia juntũ coyenewantha xua ichaxota nanta xeina taitorobi coyenewa baxota dubin”, jei Nacom pia Pejumo pe tũnaxũ tatsi.

¹⁷ Bapoxonae equeicha Nacom pia Pejumo pe tũnaxũ tatsi jeye: “Bapana ataya equeicha jopa yabara

juntanainaein tsane jiwi abe pia peexanae cuiru coyenein tatsi”, jei Nacom pia Pejumope tunaxu tatsi, Nacom Pejume Diwesitha.

¹⁸ Daxota poxona Nacom yabara junteina jiwi abe pia peexanae cuiru coyenein tatsi, equeicha jopa nantawenonaeyo xua jiwi duwein pebexubiwa xua tuxusi exana Nacom nexa xuano xua po coyene exaneiba xua po coyene Nacom amanaya pecatsibeibiwatsi.

Meje yabara xua waxainchi bewa wajuntu coyenyatha nanta xeinaetsi xua bara aparta imoxoyo itiya jinompatsi Nacom

¹⁹ Tamonae pam, daxota anoxuae naca itacupa xua jopa junuwiya patsi tsainchi itabocotha ichaxota yatsicaewa Nacom pia tutu, po tutu bichocono peainya cui tutu. Daxota baxua naca itacupa tsipei Nacom yabara copata xua bara Jesucristo naca tsiwanaya patopa barapo tututha pejana pichapabarenaexae poxona naetotha naca tsitupa. ²⁰ Anoxuae naca itacupa xua wapatsiwa Nacomtheicha pena juntu coyene waxeinaexae po pena juntu coyene ataya ayapusu xua poxonae Cristo wanaca tsitupaexae. Baraxua be poxonae metha Cristo nacata pataxubichipa paparuwa po paparuwa yacaincha ducua Nacom pia tutu po tutu yatsicaewa peainya cui tutu. Daxota joniyaenchi wajinompaeina Nacomtha. ²¹ Bapon Jesús, yatsicaewa wasacerdotepin, pon canamataxeina Nacom pia bo tatsi xua itabocotha. ²² Daxota bewa wajuntu coyenyatha nanta xeinaetsi xua bara aparta imoxoyo itiya jinompatsi Nacom, xua yatsicaewa xainyeya wajuntu coyene xanepanaexae bapontha. Matautano bewa wajuntu coyenyatha nanta xeinaetsi xua bara aparta imoxoyo itiya jinompatsi Nacom xanepanaya wajume cowuntsiya jinompaeina. Matautano bewa wajuntu coyenyatha nanta xeinaetsi xua bara aparta imoxoyo itiya jinompatsi Nacom tsipei jopa juntu coyene auratsi xua jopa watsita natsicuentisixae xua abe waexanaexae. Matautano bewa wajuntu coyenyatha nanta xeinaetsi xua bara aparta imoxoyo itiya jinompatsi Nacom tsipei poxonae ichamonae naca bautisaba meratha tsita itapeinya xeinatsi xua Nacom bayatha naca juntu coyene xanepana exana. ²³ Barabu naajuntucoyenesu exainchi xua jopa junuwiya wayabara paebiwa tsainchi wawuna ewatsiwa. Baxua exanaponaenchi tsipei bara yaputainchi xua Nacom bara exanaena pocotsiwa bayatha yabara naca tsiwana muxu duta xua jopa yabara ainya unthontsi. ²⁴ Barabu yabara nanta xeinaenchi po coyenewa xua nantiya nacui tsacabinchi xua wanayawenaewatsi. Bapoxona nantiya naantobe tsainchi, matautano xua xanepanaya beta nantiya nata exanaenchi. ²⁵ Jopa bewa bara juta coyeneya ichiya exanaetsi be pocotsimona waxainchi jiwantsi pomona jopa pateibiyo poxonae nacaetuteibatsi xua poxonae Nacom wawuna jainchinexa. Ichitha jame bewa nantiya najuntu coyene tsacabichi xua junteina wajinompaeinatsi. Barapo coyene bewa exanaponaetsi beyacaincha xua po cui coyene copiya bayatha. Baxua exanatsi tsipei anoxuae yaputainchi xua matabi jopana, po mataqueitha pon jiwi Pecanamataxeinaein patopaetsica.

²⁶ Tsipei icha ichamonae waxainchi jiwantsi icha barapomona awiya abe exanapona xua pocotsiwa peichichipaexae xua abe exana xua poxonae bequein peyaputaewatha po coyene pexainyei jume, nama icha coyenewa ajibi, xua ichun equeicha petsitupaenexa barapo peabe coyenewa. ²⁷ Saya jame meisa tanacopatatsi pomona awiya abe exanapona xua matabi cunuwa po mataqueitha poxonae Nacom yabara paebina jiwi xua penatsicuentisawa xua abe peexanaexae. Matautano tanacopatatsi xua isoto yabara cunuwa, po isoto bichocono atou, po isototha Nacom weraweraca cana exanaena daxita pomona pia peaitafaetabi jiwichi. ²⁸ Po pebin jumefeba po coyene Moisés itoroba pia peitorobi coyenewatha, xua poxonae nacueyatabe pebinbe ichacuitha poxonae acoibi poyobe baponbe yabara paebabe: “Bapon pajume tan poxonae jumefeba”, jei, bapoxona bapon bewa tupaena. Tsipei pomona bapon yabara paebatsi xua penatsicuentisawa xua abe peexanaexae, barapomona tsita itapeinya xeinatsi xua bara bapon xainyeya abe exana. Daxota bapon bewa tupaena tsipei barapomona jopa yabara nanta xeinaeyo

xua bapon peyawenaewatsi. ²⁹ Xuaje payabara nanta xeinare: Nacom bichocono atene exana pomonaetha pomonae Pexanto tatsi itaweta. Matautano atene exana pomonaetha pomonae abe yabara paeba xua pinae Jesús pejana jopa ainya cuiyo bequein Jesús tsitupa jiwí. Jesús petsitupaexae daxota Nacom yabara tsiwuna muxu duta xua jiwí pejuntú coyene xanepana exanaenexatsi Nacom. Matautano barapomonae jopa natsicuenti tsane xua abe peexanaexae. Matautano Nacom atene exana pomonaetha pomonae Nacom pia Pejumope tñaxú tatsi tsumú jumeya barú paebatsi po pejumope jiwí yawenatsi pia peantobexaetsi. Barapomonae nama bichocono atene exanaeinchi beyacaincha xua ichamonae atene exanaeinchi pomonae jopa exanaeyo pocotsiwa Moisés itoroba. ³⁰ Waxainchi yaputainchi xua Nacom bayatha jeye: “Xan tacoya exanaein pentoma xua jiwí atene tsane abe peexanaexae”, jei Nacom. Equeicha Nacom Pejume Diwesitha jeye: “Nacom yabara paebina piamonae xua penatsicuentiwa xua abe peexanaexae”, jei. ³¹ Po pebin abe exana bichocono junuwa cana exanatsi poxonae Nacom yabara paebina bapon tsipei barapo pebin Nacom tsitatsi xua bapon bara penatsicuentiwa xua abe peexanaexae. Bapoxonae Nacom, pon ataya asú pepoponaein, bichocono jopa juniya atene cana exanae tsane bapontha.

³² Bara ataya payabara jñtanainare po dapaetha poxonae bequein aena pajume cowñtame Nacom, xua ichitha beta paexaname. Bapoxonae awiya ichitha jñntema parubenanaebiyame poxonae bequein ichamonae pacata abe exana. ³³ Ichamonae xua paxam jiwana pam barapomonae tsumú jumeya biatainchi xuano jiwí itútha atene exaneibatsi. Irurú ichamonaerú pomonae paxam jiwana pam barapomonae nacayabara nanta xeina xua barapara irurú atene exaneibatsi poxonae ichamonae atene exaneibatsi. ³⁴ Paxam painya antobexae pacayabara nanta xeiname pomonae jiwí pecubi botha jebatsi xua painya neyawenaenexa. Bequein bara ichamonae daunweya pacata nota xua xuan daxita paxeiname, daichitha awiya cataunxuae pajuntú coyene weiweiname. Bara payaputaneme xua paxeiname itabocothaicha pocotsiwa bichocono yatsicaewa wñnae beyacaincha pocotsiwa po cae pin nacuathe paxeiname. Baxua xua pocotsiwa paxeiname itabocothaicha ataya tsitecaeya paxeinaename baxua. ³⁵ Jopa pana nacui barapentsinde xua payabara jume cowñnta dubenanaebiyame xua painya nepaca catsinexa pocotsiwa bayatha Nacom yabara paca tsiwuna muxu duta. Tsipei wajume cowñnta dubenanaebiyaxae tsane Nacom, baxua nexa Nacom pentoma naca catsibina xua bichocono nawita xua pia nacuatheicha. ³⁶ Paxam panantawenoname xua ajñntúyapushya parubenanaebiyama awiya xua jopa paaitaconaem bequein ichamonae pacata abe exana xua painya neexanaenexa pocotsiwa Nacom ichichipa. Bapoxonae Nacom paca catsibina pocotsiwa xua bayatha yabara paca tsiwuna muxu duta. ³⁷ Nacom Pejume Diwesitha jeye:

“Methaunxuae patopaetsica, pon

bewa patopeicaena.

Jopa bayathiyo tsane.

³⁸ Pon bara netsita pejuntú coyene

xanepanaein, bapon bara ataya poponaena

tana nejume cowñnta ducuaenaebiyaxae.

Ichitha icha bapon equeicha caewa jopa

nejume cowñntsiyo jopa xanepanaya beyabara

jñntú coyene weiweinaein, pocotsiwa

bapon peexanaexae”, jei Nacom.

³⁹ Ichitha nama waxainchi jopa be barapomonaetsi, pocotsimonae equeicha caewa jopa jume cowñntsiyo Nacom. Barapomonae Nacom weraweraca exanaena. Nama waxainchi pomonaetsi awiya jume cowñnta dubenanaebiyatsi Nacom beya poxonae wajñntú coyenewa nacata capanepa exanaeinchi.

11

Meje yabara xua Nacom pejume cowantsiwatsi

¹ Pon jume cowanta ducuaenaebiya Nacom, bapon bara xaniwaicha yaputane xua xeinaena pocotsiwa wnae ewata. Matautano pejuntu coyene tsita najume itapeinya xeinatsi xua barapara xainyei po coyene xua barapon yabara jume cowanta bequein cataunxuae yatsicaewa jopa taeyo. ² Wamo susato jiwi xanepanaya beta yabara paebatsi xua Nacom beta yabara paeba ayapusya pejume cowantsiwaxaetsi.

³ Waxainchi wayabara jume cowantsixae xua Nacom naca yawenapaeba daxota yaputainchi xua barapo cae pin nacue iru barapo itaboco susato forotatsi, Nacom peitorobixae. Pocotsiwan xua anoxuae tainchi, Nacom forota pocotsiwan weya xua bapana jopa taetsi, pocotsiwan xua peinyaxae.

⁴ Abel pon caena bayatha popona yabara jume cowanta xua Nacom yawenapaeba. Daxota bapon duwein bexuba xua tuxusi exana Nacom nexa. Nacom tsita xanepanatsi pocotsiwa Abel exana. Daxota Nacom yabara paeba xua bara bapon pon pejuntu coyene wnaein. Iruru Cain Abel pentapin tatsi, bapon iruru bequein pexaewa exana po coyene xua Nacom pecatsiwatsi. Daichitha barapo coyene Nacom jopa tsita xanepanaetsi. Nacom bichocono beita cui jichatsi pocotsiwa Abel exana, beyacaincha xua pocotsiwa Cain exana. Nacom baxua beita cui jichatsi tsipei Abel peyabara jume cowantsixae pocotsiwa Nacom exanapaeba. Bequein Abel bayatha tupa ichitha naca itacupa xua awiya wayabara nacuidubaponaewatsi pocotsiwa Nacom exanapaeba poxonae yabara yorobatsi Abel pia pejume cowantsiwa tatsi.

⁵ Enoc pon caena bayatha popona yabara jume cowanta xua Nacom yawenapaeba. Daxota bapon Enoc pichicatsi. Nacom pichica xua bapon pecapanaenexatsi itabocothicha, xua bapon Enoc jopa petupaenexa bara po cae pin nacuathe. Enoc piamonae jopa caxinaetsi, poxoru Nacom pichica. Nacom Pejume Diwesitha paeba xua poxonae pewnaeya tsane xua pichicaeinchi Enoc, Nacom tsita xanepanatsi pocotsiwa Enoc peexanaexae. ⁶ Jopa itacupaetsi xua jiwi Nacom tsita xanepanatsi icha barapo jiwi jopa beta jume cowantsiyo Nacom. Pon xua ichichipa imoxoyo itiya popona Nacomtha jame bewa matha yabara jume cowantsina xua Nacom bara xaniwaicha popona. Matautano jame bewa yabara jume cowantsina xua Nacom bara cata pocotsiwa bayatha yabara tsiwnae muxu duta pomonaetha pomonae pia pejeichiwichi xua pejume cowantsinexatsi. Barapomonae Nacom yaputainchi.

⁷ Noé pon caena bayatha popona yabara jume cowanta xua Nacom yawenapaeba. Daxota Noé piamonae tsixana pin jera nae xua piamonae matabuxuyo pebaru nacapanepaenexa. Nacom Noé pewnaeya yabara muxuwetatsi xua pocotsiwa bexa exanaena pocotsiwa Noé bapana bayatha jopa taeyo, xua pin awubo tsane xua Nacom itorobina. Noé bara jume cowantsiya exana pocotsiwa Nacom itoroba poxonae pin jera nae exana xua piamonae matabuxuyo pebaru nacapanepaenexa. Noé pejume cowantsixae Nacom, bapon tsita itapeinya xeina xua pomonae barapo cae pin nacuepiwi apara abe exana poxonae jopa yabara jume cowantsiyo xua Nacom itorobapaeba pin awubo. Nacom tsitatsi xua barapo jiwi atene tsane penatsicuentiswaxae jopa pejume cowantsixaetsi. Jame Noé Nacom juntu tsita coyene xanepanatsi pejume cowantsixaetsi bapon. Daxota Nacom Noé piamonae matabuxuyo baru capanepatsi.

⁸ Abraham pon caena bayatha popona yabara jume cowanta xua Nacom yawenapaeba. Daxota poxonae Nacom pewabixae, bapon bara exana pocotsiwa Nacom itoroba. Bapon Abraham pia nacua weya pona xua peponaenexa icha nacuatha, po nacua bayatha Nacom yabara tsiwnae muxu duta, xua bapon catapaebatsi. Bapon Abraham pia ira weya pona xua icha nacua beya pona po nacua bequein jopa yaputaeyo ichaxota pona. ⁹ Abraham peyabara jume cowantsixae Nacom, bapon popona po iratha xua bayatha Nacom yabara tsiwnae muxu duta. Bapon Abraham be pon penanapaincha poponaein xua icha nacua werena poponaexae xua poxonae icha nacuatha popona. Bapon Abraham poponeiba anserabocun botuxuxitha icha Isaac ichi iru icha Jacob

ichi poxonae poponeibabe anserabocon bomuxuxitha. Abraham, iru Isaac, iru Jacob barapoyobe Nacom tsiwunaee yabara muxu duta barapo ira xua Nacom pecatsinexa.

¹⁰ Abraham nacui yabara wunaee ewata xua patopaena po tomaratha ichaxota xua pepu umenae bon xua Nacom pia nacuatheicha. Apra Nacom bapon pon yabara nanta xeina xua forotsina barapo tomara po tomara xua Nacom pia coya bara exana.

¹¹ Barichi Sara Abraham piseuri tatsi yabara jume cowunta xua Nacom yawenapaeba. Bequein bapowa acue xua jopa peitacupaewatsi xua pexeinaewa pexui awiya jume cowunta Nacom. Sara pejume cowuntsixae, Nacom cata barapowa catatsi peajuntuyarusawa, xua barapowa pepabetsinexa pexuyo. Baxua barapowa taexanatsi tsipei barapowa jume cowunta pocotsiwa Nacom taexanaena bapowatha xua bayatha Nacom yabara tsiwunaee muxu duta. ¹² Bara barichi Abraham. Bapon bichocono amo tsecae xua bara imoxoyo petupaewaba tsane xua jopa itacupaetsi xua peexanaewa pexui. Daichitha Nacom copata xua bapon pexanto xeina xua daxota bapoxonae bapon pia pemomoxi jiji tatsi bichocono pinmonae naenaexanapona. Barapo bicheito bichocono pinmonae icha opiteimonae ichi xua bichocono nawita. Matautano barapomonae icha taetowa beno ichi xua bichocono beno cuscujei xua mar mene itapatha. Jopa itacupaetsi xua barapo jiji peununaewatsi icha taetowa beno ichi.

¹³ Daxita pomonae jume cowunta Nacom barapomonae yajume cowuntsiya werapa. Abu cataunxuae jopa catsibichi pocotsiwa bayatha Nacom yabara tsiwunaee muxu duta xua pocotsiwa bapomonae catsibapaebatsi. Daichitha barapomonae yabara jume cowunta xua pocotsiwan bexa xeinaena xua Nacom bexa catsibina. Barapomonae baxuan yabara jume cowuntsiya tsita xanepanatsi. Barapomonae nantiya nayabara nanta xeina, jeye: “Waxainchi pomonae be wananapaincha jinompaewichi barapo pena nacuathe xua be icha nacua werena waponae wi, pomonaetsi xua awiya jeita dubenanaebiyatsi po nacua yatsicaewa pepa wanacua”, jei daxita barapomonae. ¹⁴ Tsipei barapomonae baxua paeba, naca yaputane exana xua awiya jeitapona po nacua yatsicaewa pia nacua tatsi. ¹⁵ Barapomonae jopa apra yabara caunutsiyo ichaxota copiya po nacua weya Abraham pona. Icha metha baxua yabara paebichipa metha bara itacupaetsipatsi xua caewa pewarapaewa pia nacuathe ichaxota copiya bayatha jinompa. ¹⁶ Ichitha barapomonae ichichipa po nacua xua bichocono wunaee beyacaincha xua icha nacuan. Baraxua xua po nacua ichichipa, apra Nacom pia nacua tatsi. Daxota Nacom jopa auriyo xua barapomonae yabara paebatsi xua pinae Nacom barapomonae pia Nacom tatsi. Daxota Nacom barapomonae tsiwunaetatsi tomara.

¹⁷ Nacom Abraham juntu coyene jujutatsi peyaputaenexa icha bara metha yatsicaya jume cowuntatsi. Daxota Nacom Abraham itorobatsi xua pexanto pebexubiwa tsane icha be pocotsi coyeneya ichi xua poxonae duwein bexuba Nacom nexa. Abraham pejume cowuntsixae Nacom daxota pexanto capana atororo beya pon yatsicaewa compa tatsi pon pewun Isaac. Abraham muxu pexanto pebexubi icha be pocotsi coyeneya ichi xua poxonae duwein bexuba Nacom nexa. Bapon baxua exana bequein Nacom yabara tsiwunaee muxu duta barapo Abraham pexanto tatsi, jeye: ¹⁸ “Barapo nexanto Isaacxae nantauntsiname nemomoxi susato jiji”, jei Nacom. ¹⁹ Abraham jume cowunta xua icha Isaac tupaetsipa Nacom itacupaetsi xua equeicha Isaac caewa asu exanatsi poxonae bequein pexanto bexubichipa. Poxonae Abraham muxu pexanto pebexubi, apra bara be xua bayatha tupa, matautano apra be xua Abraham pexanto equeicha caewa asu taexainchi.

²⁰ Barichi Isaac yabara jume cowunta xua Nacom yawenapaeba. Daxota bapon Isaac pexantobe tsipaeba, jeye: “Barabu Nacom paca yawenaena pia paca necaantobexaebe”, jei Isaac pexantobetha, Jacob iru Esau.

²¹ Barichi Jacob yabara jume cowunta xua Nacom yawenapaeba. Daxota poxonae bapon juntucuru imoxoyo tupaenaba barompaya tsipaebabe José pia pexantobetha tatsi xua pia pemomobexae tatsi. Bapon jeye: “Barabu Nacom paca yawenaenabe pia paca necaantobexaebe”, jei Jacob José pia pexantobetha tatsi. Bapoxonae bapon Nacom

wūnae jaintatsi poxonae naewatha nabuxu babatanotsiya yuyutanota tsipei bichocono amo tsecae.

²² Irū José yabara jume cowūnta xua Nacom yawenapaeba. Daxota poxonae bara imoxoyo tūpaenaba yabara paeba israelmonae. José yabara paeba xua bexa tsane Israel pia pemomoxi susato jiwi tatsi warapaena Egipto nacua weya, xua po nacuatha beya po nacua bayatha Nacom yabara tsiwūnae muxu duta xua Nacom catapaeba. Matautano José pia pexui cui itoroba, xua José pia pexui piwa capanaeinchi Egipto nacua weya po nacua beya ichaxota israelmonae warapaena po nacua xua Nacom yabara tsiwūnae muxu duta xua Nacom catapaeba.

²³ Moisés pena tatsi irū paxa tatsi yabara jume cowūnta xua Nacom yawenapaeba. Daxota Moisés matsiyatatsi botha acoibi po xometobe poxonae aena naexana. Moisés pena yabara nanta xeinatsi yawa paxa yabara nanta xeinatsi xua Moisés itūbūn tsecae. Baponbe jopa yabara jume cuitaya junuwiyobe xua po coyene cui itoroba Faraón pon Egipto nacuapiwi itorobiya pia pepa peewatsinchi xua pinae daxita pexui pebin wūtixi bewa jutebinchi.

²⁴ Irurū Moisés yabara jume cowūnta xua Nacom yawenapaeba. Daxota poxonae bayatha pinyoba Moisés jume aichaxaibiya naitemata, jeye: “Xan barapowa jopa pexanton tatsin powa Faraón pexantiyo tatsi”, jei Moisés. ²⁵ Saya jame bapon Moisés itapetatsi xua irū yawa muxuna atene exanaeinchi Nacom piamonae tatsi xua poxonae barapomonae atene exanaeinchi xua ichamonae atene exanaena pomonae Egipto nacuamonaexae. Moisés ichichipa xua pecana exanaewa tsainchi icha piamonae tatsi tacana ichichi. Moisés jopa benaexanaeyo xua daxitan pexeinaewa tsane pecoutha pocotsiwan xua Faraón xeina. Icha baxuan xeinaetsipa Moisés jūntū coyene weiweina exanaetsipatsi barapo nacuatha xua saya caepatiyo nexa tsipae po coyene xua jiwi weiweina exanatsi xua abe peexanaponaewa. Moisés piamonae jopa benaitematsiyo daxota jopa benotsiyo Faraón pecopiniwa tatsi. ²⁶ Ichamonae Moisés tsūmū jumetha biatainchi xua ajūntūcoyenetane exanatsi icha Mesías ichichi pon Nacom itoroba. Poxonae Moisés nayabara jume tane baxua tsita coyene xanepanatsi, beyacaincha xua poxonae barapo copei pexeinaewa tsane Egipto nacuatha. Baxua Moisés itapeta tsipei ichichipa xua pexeinaewa po pentoma bexa tsane Nacom catsina bapontha peatenexae po pentoma bayatha Nacom yabara tsiwūnae muxu duta.

²⁷ Moisés yabara jume cowūnta xua Nacom Moisés yawenapaebatsi. Daxota najūntū coyene weta xua pewarapaewa tsane Egipto nacua weya. Moisés jopa junuwiyō bequein yaputane xua Faraón bara casebina. Bapon Moisés bara saya amsiya pona bara be xaniwaicha tane Nacom xua be yatsicaewa barū poinchi pon peinya peponaein xua jiwi jopa itacūpaetsi xua petaewa. ²⁸ Moisés pejume cowūntsixae Nacom, piamonae cui itoroba xua peexanaenexa penabanaewa xua Pascua wūn matakabi nexa. Matautano bapon cui itoroba piamonae xua pejanantha pecapibinexa daxita bomūxū pecoibotontha. Barapo Moisés piamonae tatsi pomonae Israel pia pemomoxi susato jiwixae tatsi baxuan exana xua daxota matatsunpin jopa tūpa exanaeyo piamonae. Barapo matatsunpin merawi patopaena xua pejutebiwa tsane matapin jiwi pomonae pia bontha jopa xeinaeinyo po jana xua Moisés cui itoroba xua jiwi bomūxū pecoibotontha pecapibiwa tsane.

²⁹ Barapo Israel pia pemomoxi susato jiwi tatsi yabara jume cowūnta xua Nacom yawenapaeba. Daxota Mar Rojo mene mentha icha muxunene beya panenebiya xua epatauta iya pona be poxonae xua ira tsewa iya peponaewa. Ichitha poxonae Egipto nacuamonae baraxoya iyia daxita bunothopa.

³⁰ Israel pia pemomoxi susatopiwi tatsi yabara jume cowūnta xua Nacom yawenapaeba. Daxota matawacaicha tocuecueniya enaponeiba pemūxūbūru iya siete po matakabibe xua barapo Jericó tomara peyacaincha toxorotsi dutsiwa xua be iboton. Barapoxonae barapo Jericó tomara peyatoxorotsiya yacaincha dutsiwa baxua iratha jopiya. ³¹ Bayatha yabūyo powa Jericó tomarapiwayo Rahab yabara jume cowūnta Nacom pon Israel pia pemomoxi susato jiwi tatsi pia Nacom tatsi. Daxota bapowa

jopa barũ tũpaeyo piamonae xua pia tomarapiwixae poxonae tomarapiwi werapa jopa pejume cowũntsixae Nacom pon Israel pia pemomoxi susato jiwi tatsi pia Nacom tatsi. Bapowa Rahab powa copiya bayatha pesi cui weiweinaewa pebiwitha. Poxonae Israel pia pemomoxi jiwamonae namicha pata xua pecui amanayabiya taenexa Jericó tomaratha, bapoxonae barapowa Rahab matenta weyataeya waba, xua barapo israelmonae jiwamonae wabatsi pia botha tatsi.

³² Jopa equeicha paebinyo xua equeicha pinmonae tayabara paebiwa pomonae pejume cowũntsiwi Nacom. Jopa neyapu jũpaeyo xua jopa taxeinaewa matakabi xua tacueicueijeinexa Gedeón yabara, irũno Barac yabara, irũno Sansón yabara, irũno Jefte yabara, irũno David yabara, irũno xua Samuel yabara, irũno pomonae Nacom pia peitorobi jume petapaebiwi tatsi yabara. ³³ Daxita barapomonae jume cowũnta Nacom. Ichamonae barapomonae jiwana, amanayaba ainya nacuanpiwitha, pejume cowũntsixae xua Nacom yawenaena. Ichamonae pejume cowũntsixae Nacom daxota jiwitha beta xaniwaicha canamata itoroba. Ichamonae pejume cowũntsixae Nacom barapomonae catsibatsi pocotsiwan xua bayatha Nacom yabara tsiwũnae muxu duta. Ichamonae pejume cowũntsixae Nacom, Nacom exana xua coibo acaba neũthũn, xua barapomonae jopa atene peexanaenexatsi barapo neũthũn. ³⁴ Mataũtano ichamonae pejume cowũntsixae, daxota Nacom yawena barapomonae poxonae Nacom itaxutaba exana po isoto bichocono pin isoto xua barapomonae po isototha tautatsi. Barichi ichamonae pejume cowũntsixae daxota Nacom capanenebiya tsaibi barapomonae poxonae muxu pejutebeibichi peopi sojeiwantha xua be cusi. Mataũtano pomonae faefaena, equeicha Nacom daunwei exana. Daxota barapomonae daunwei poxonae naba. Ichamonae Nacom peyawenaexae amanayaba pia peaitafaetabi jiwichi xua ainya soldadomonaein bicheitontha. ³⁵ Barichi ichamonae yabũxi pejume cowũntsixae equeicha caewa piamonae xeina, pomonae equeicha caewa taasutsi petũpaewa weya.

Ichamonae itacũpatsi xua panenebiya xua jopa werapae tsane xua icha poxonae Nacom itawetatsina. Nama barapomonae jopa bepaebiyo baxua daxota barapomonae werapa poxonae bichocono caitacueintatsi ichamonae. Barapomonae, pomonae pewerapaewi yaputane xua pejume cowũntsixae Nacom, daxota Nacom equeicha asũ exanaena xua barapomonae pepatsiwa tsane Nacom pia nacuatheicha. ³⁶ Ichamonae pejume cowũntsixae Nacom, bichocono ajũntũcuicoyenetane tsipei bichocono cui capanebatsi ichamonae. Mataũtano ichamonaerũ cuaintebatsi. Ichamonaerũ penain mũntontha cũbebatsi. Ichamonaerũ jiwi pecũbi bontha cuaranobatsi. ³⁷ Ichamonae pejume cowũntsixae Nacom, ibotontha tũpa exanatsi poxonae cuinbabatsi. Mataũtano ichamonae werapa poxonae epa nantarabobiya thabebatsi seruchotha. Irũrũ ichamonae pejume cowũntsixae jutebatsi peopi sojeiwantha xua cusin. Ichamonaerũ pejume cowũntsixae Nacom, taseicatsi pexaewa, yawa taseicatsi bon, xua daxota saya dubenanaebiya, yawa naxataba oveja bocoton xuano xua cabra bocoton. Barapomonae acopeibiwi tsobenae, barainebatsino abe taexanebatsino. ³⁸ Pomonae barapo cae pin nacuathepiwi Nacom pejume cowũntsiwi yabara paebatsi, yabara jeichiche: “Jopa be cui copatichi xua barapomonae pejinompaewa tsane watomaratha”, yabara jeichichi. Ichitha barapomonae Nacom tsita ainya cuichi beyacaincha barapomonae pomonae barapo cae pin nacuathepiwixae. Barapo Nacom pejume cowũntsiwi dubenanaebiya ichaxota ira xuepana susato tsurucuae nacuatha. Mataũtano barapomonae demxuanthana dubenanaebiya, mũthũnthano jinompa, xuano xua duwei pia mũthũnthana jinompano.

³⁹ Bequein Nacom yabara paeba barapomonae xua beta peexanaexae pejume cowũntsixaetsi, daichitha cataunxuae abũ barapomonae jopa catsibichi pocotsiwa Nacom bayatha yabara tsiwũnae muxu duta barapomonae, mataũtano xua caeinthano. ⁴⁰ Barapomonae cataunxuae abũ jopa catsibichi baxua tsipei Nacom naca yabara nanta xeina xua bexa tsane irũ naca catsibina pocotsiwa bapon tsita xanepanatsi. Pocotsiwa

bapon catsibina xua apara barapomonaē Nacom naca cayawa muxuna jũntũ coyene xanepana exanaena.

12

Meje yabara xua waxainchi bewa exanaponaetsi icha Jesús ichi poxonaē exanapona

¹ Pomonaē xuaunxuae yabara pacata tinatsi barapomonaē bichocono pin bicheit-omonaē, pomonaē pejume cowũntsiwi po coyene xua Nacom yawenapaeba. Barapomonaē naca tsita itapeinya xeina xua awiya xanepanaya jume cowũnta dubenanaē-biya bequein atene exanatsi ichamonaē. Baxua naca cuiduba xua irũ bewa xanepanaya jume cowũnta dubenanaēbiyaeinchi bequein naca atene exana ichamonaē. Barabũ waxainchi daxita nacui barapentinchi abe waexanaē cuiru coyenein pocotsi coyenein xua jopa naca yawenaeyo xua Nacom beta wataexanaewatsi. Barabũ waxainchi beitatemaya ajũntũsũya awiya exanapoinchi pocotsiwa Nacom naca cui itoroba. ² Saya meisa Jesús jũntanainaeya jinompatsi wanaca yawenaenexa. Bapon copiya bichocono pejume cowũntsixaē Nacom daxota bapon wanaca canamataxeinaein xua wajume cowũntsinexa. Mataũtano bapon betiya naca exana xua beta wajume cowũntsiwa poxonaē cataunxuae awiya wajinompawewa barapo cae pin nacuathe. Jesús bara saya copata xua atene exanadutatsi naetotha ichamonaē poxonaē tũpa exanatsi. Bapon jopa auriyo bequein naetotha tũpa exanatsi jiwi peitũtha tatsi. Ichamonaē ba bichocono aura xua poxonaē petũpae exanaewatsi naetotha. Nama bapon Jesús jopa auriyo poxoru nayabara yaputane xua pirapae poxonaē nacana cui wetinchi xua atene exanatsi, xuano xua poxonaē tũpa exanatsi naetotha, bapoxonaē bichocono jũntũ coyene weiweinaena. Anoxuae bapon Jesús eca pia pexeinya peecaethopeibiwatha xua Nacom pia pecoxa weya tatsi xua itabocotheicha ichaxota Nacom eca pia pexeinya peecaethopeibiwatha.

³ Jesús pacayabara jũntanainaponde xua bayatha po coyene Jesús abeya exanatsi pomonaē abe peexanaē jiwi. Jesús awiya beitatemaya saya popona poxonaē bequein bichocono atene exanatsi barapomonaē pomonaē abe peexanaewi. Daxota jopa paraichinde xua poxonaē jopa pana najũntũ coyene tsacabim. Mataũtano jopa paaũntũcoyenefaetabinde xua poxonaē daxota jopa beta painya taexanaewa Nacom.

⁴ Painya jũntũ coyenewatha pajume torobabame abe peexanaē cuiru coyenein xua painya neexanaeyainwa barapo coyenein. Bapoxonaē jopa panaitematsim xua painya nejume cowũntsiwa Nacom. Bequein bara baxua daunwei paexaname ichitha awiya cataunxuae jopa pawerapaem xua barapo coyene painya neexanaexaē icha bayatha Cristo ichi xua tũpa xua bichocono daunweya peexanaexaē barapo coyene. ⁵ Paxam pajũntemainame xua bayatha Nacom paca muxuweta xua paxam bara Nacom pia pexui tatsi pam. Baxua yabara Nacom Pejume Diwesitha paca jeye:

“Tapexui pam, jopa amsiya payabara nanta xeinaeinde pocotsiwa yabara paca muxuwetatsi tapaca cuidubinexatsi.

Poxonaē atene paca exanatsi jopa ajũntũcoyenefaetabiya pajinompaeinde xua yabara tapana nejume cowũntsiwam.

⁶ Tsipei muxuwetsiya cuiduban pomonaetha pomonaē antobein.

Mataũtano atene exananno pomonaetha pomonaē tapexui tsicotan”, jei Nacom Pejume Diwesitha.

⁷ Awiya jũntema pajinompare poxonaē bequein Nacom paca atene exana xua paca necacuidubixae. Baxua Nacom pacata exana tsipei paca nacana exana pia pexui tatsi pam. Dapo pexuyo ajibi, po pexuyo jopa paxa muxuwetsiya cuidubichi xua poxonaē icha bichocono antobetsi paxa. ⁸ Nacom pia pexui muxuwetsiya cuiduba. Icha Nacom jopa paca muxuwetsiya cuidubichipae, bapoxonaē paxam jopa Nacom pia pexui tatsi pam tsipae. Saya be catsa pexui pam tsipae icha be pocotsi pexui ichi po pexui seicaya icha

paxa barompa. ⁹ Matautano caena bayatha poxonae cataunxuae pexuichi waxeiwi naca atene exana wanaca muxuwetsiya cuidubixae. Daichitha waxeiwi baru cui itura jinatsi. Waxainchi bewa ichichipaetsi xua waexanaewatsi pocotsiwa naca cui itoroba pon Waxa Nacom, pon itabocothaicha popona. Barapocotsiwa bewa exanaeinchi beyacaincha pocotsiwa exanatsi xua poxonae waxeiwi naca cui itoroba poxonae jinompatsi barapo cae pin nacuathe. Baxua bewa exanaeinchi Waxa Nacom pon itabocothaicha popona wanaca catsinexa peajuntuyapusu coyenewa. ¹⁰ Waxeiwi poxonae pexuichi barapo cae pin nacuathe saya caepatiyo naca muxuwetsiya cuiduba. Baxua nacata exana icha be pocotsi coyeneya xua ichichipa xua tsita xanepanatsi. Ichitha nama Nacom naca muxuwetsiya cuiduba wanaca yawenaewa tsane. Matautano baxua nacata exana xua wanaca cana exanaewa tsane xua bichocono wajuntu coyene xanepanaewichi, icha Nacom ichi xua bichocono pejuntu coyene xanepanaein. ¹¹ Poxonae naca atene exana bara bapoxonae nanta xeinatsi xua jopa nacata xaexaenaecaeyo, tsipei bara xaniwaicha naca atene exana. Ichamonae yabara cui copaba xua bara nacuiduba xua poxonae bequein Nacom atene exana, pemuxuwetsiya cuidubixae. Barapomonae jame jopa natsicuenti tsane xua abe peexanaexae bapontha. Barapomonae xeinaena pejuntu coyene xanepanaewa Nacomtha xuano junte ma dubenanaebiyaena.

Meje yabara xua poxonae Nacom naca muxuweta xua jopa bewa Nacom itawetichi

¹² Yaitama pajuntu coyene faefaename, xua painya nejume cowuntsiwa daxota painya coutha pana najuntu coyene tsacabare xua beta painya nejume cowuntsiwa tsane Nacom. Matautano xua payabara ajuntucoyenerewem tsaibi ichawan. Pana najuntu coyene itorobare xua awiya ayapusya painya neexanaponaewa tsane. ¹³ Painya xoba icha diwesi pajume cowuntame po diwesi xua jopa Nacom Pejume Diwesi tatsi. U meisa paexanare pocotsiwa Nacom Pejume Diwesi xua yabara paeba xua beta painya nejume cowuntsiwa. Icha baxua paexanaetsipame iru ichamonae barichipae. Bequein barapomonae copiya juntu coyene faefaenaetsipa pejume cowuntsiwatha ichitha bapoxonae beta exanaponaetsipa xua pejume cowuntsiwa pia paca cui taexae.

¹⁴ Nantiya daxita jiwi ajuntuyapusya betiya pana nabaru junte miya jinompare. Bichocono pana najuntu coyene xanepana exande Nacomtha xua jopa painya nenatsicuentinexa xua abe painya neexanaexae bapontha, xua painya netaenexa bapon. Tsipei pomonae jopa xeinaeyo barapo coyene jopa itacupaetsi xua Nacom petaewatsi tsainchi. ¹⁵ Dota pam xua ichamonae pomonae paxam jiwana pam pia xoba jopa ichipaeyo po coyenewa Nacom yawena barapomonaetha pia peantobewaxae. Matautano barapo ichamonae pomonae painyamonae jiwanaxae pia xoba abe exana ichamonae peitutha tatsi xua daxota iru ichamonae pebarichinexa xua abe peexanaewa. ¹⁶ Ichamonae pomonae paxam jiwana pam, pia xoba nota icha yabuxitha, powaxi jopa xapain barompaya pia seurixi. Matautano dota pam xua ichamonae paxam jiwana pam jopa tsita pecui pawu tsainchi po coyenewan xua Nacom piawan tatsi. Barapo coyene Esaú exana pon caena bayatha tupa. Bapon Esaú jopa tsita ainya jume cuiyotsi pocotsiwa bayatha Nacom yabara tsiwanae muxu duta xua bepa pinae Nacom Esaú yaweneibichi. Barapon Esaú piyainxae peyapintha Jacobtha cata po coyene xua pia coya pecanamataxeinae coyenewa po coyene matapin ba xeina. Tsipei Esaú jopa jume cowuntsiyo Nacom daxota nata caenaeta barapo coyenewa xua nata matomata pexaewa xua saya cae penabanaewiyo. ¹⁷ Paxam payaputaneme xua bapon Esaú pirapaeyo ichichipa xua equeicha caewa pexeinaewa tsane xua po coyene peainya cui coyene po coyene matapin ba xeinaena xua paxa catatsi. Barapo coyene po coyene xua coxiyun tawuca pexanto pon matapin xua Nacom peyawenaewa tsane. Ichitha bapon Esaú peyapin cata barapo coyene xua matomata pupara. Bequein bara bapon auranaya caunutsiya wecoyeya paeba, ichitha jopa itacupaetsi xua caewa xeinaena barapo coyene po coyene xua ba matapin xeina.

¹⁸ Caena bayatha pia Nacom caquita ponaetsi Israel pia pemomoxi susato jiwi tatsi demxuwa itabaratha umena poxonae Nacom Moisés catatsi pia peitorobi coyenewa. Barapomonaе jume tane pocotsiwa Nacom paeba yawa tane demxuwa. Ichitha nama paxam jopa beparaichim. Jopa panantawenonaem xua paumenaename demxuwa itabaratha xua painya necaquita ponaenexa Nacom. Poxonae Israel pia pemomoxi susato jiwi tatsi umena barapo demxuwa itabaratha, baxoyo pin isoto uncueica barapo demxuwatha. Matautano bapoxonae bichocono quirei, yawano nobonno. Matautano pin joibo baxoyo uncueica. Ichitha jopa bara paichim, jopa pataem baxuan. ¹⁹ Paxam jopa pajume taem peobiwa jume po peobiwa pewun trompeta nain matawun, icha poxonae barapo Israel pia pemomoxi susato jiwi tatsi ichi xua jume tane barapo trompeta jume. Paxam jopa pajume taem Nacom pejume poxonae Nacom cueicueijei barapo Israel pia pemomoxi susato jiwitha tatsi barapo demxuwatha. Pomonaе jume tane barapo jume, barapo israelmonaexae Moisés jume itorobatsi xua bepa pinae Nacom equeicha jopa pepaebiwa tsane. ²⁰ Barapomonaе baxua Nacom jume matawentatsi tsipei bichocono pijunuwi xua pocotsiwa Nacom itorobina. Poxonae itoroba Nacom jeye: “Pon nataxuna jayata barapo demxuwa bewa bapon pabexubim ibotontha. Jopa ainya cuiyo bequein icha metha duwein tsipae, xuano icha metha bequein jiton tsipae”, jei Nacom. ²¹ Barapomonaе bichocono junuwa pocotsiwa xua tane barapo demxuwatha iru Moisés bichocono junuwa. Daxota paeba, jeye: “Bichocono tajunuwi jijiyán”, jei Moisés.

²² Jame anoxuae painya nejume cowuntsixae Nacom, bapon paca yabara cui copata xua painya nepatsiwa tsane bapon pia tomaratha tatsi, po tomara pewun Jerusalén tomara. Barapo tomara eca ichaxota po demxuwa pewun Sión. Barapo tomara Nacom pia tomara tatsi pon ataya tsitecaeya asya pepoponaein. Barapo tomara xua pepa Jerusalén tomara Nacom pia nacuatheicha tatsi eca. Matautano papatsiname baxoteicha ichaxota jinompa ayeimonaе matatsunpiwi, xua weiweinaeya nanacaetutsina xua pia nanabarun wunaе jainchinexa Nacom. ²³ Matautano pajume cowuntame Jesús xua painya nepatsinexa ichaxota Nacom piamonaе tatsi nacaetuta pomonaе Nacom pia diborotha wun dubena xua itabocothaе. Barichi papatsiname Nacomtha, pon yabara paebina daxita jiwi xua penatsicuentisiwa xua abe peexanaexae. Matautano papatsiname ichaxota jiwi pia jumopein tunaxu tatsi jinompa pomonaе xua beta exana xuano xua Nacom beta cana juntu coyene wetsiya xanepanaya exana. ²⁴ Matauta papatsiname ichaxota Jesús popona pon jiwi peyabara jume yawenaein Nacomtha xua jiwi pepatsiwa tsane Nacomtheicha. Matautano bapon nacata catsica Nacom pia pena peyabara tsiwunaе muxu dutsiwa tatsi. Bapon pia pejana tatsi xua barapo jana pepichapabarenaexae Nacom naca yabara juntu coyene junteinae abe waexanae cuiru coyenein. Barapon pia pejana tatsi jiwi beta cana exanatsi beyacaincha Abel pia pejana tatsi. Tsipei poxonae bapon bexotsi, jopa nantawenonaeyo xua bapon peyantomatsiwatsi. Ichitha poxonae Abel bexotsi, nantawenona xua peyantomatsiwatsi.

²⁵ Dota pam. Jopa bewa pajume itawetsim Cristo pon wanaca tsipaebixae Nacom yabara. Pomonaе bayatha Nacom jume itawetatsi poxonaе bequein Moisés muxuweta jiwi barapo irathe Nacom nexa, barapomonaе jopa Nacom capanenebiyaeyo xua atene abe pia peexanaexae. Waxainchi jopa naca itacupaeyo xua panenebiyatsi xua atenetsi abe waexanae coyenewantha icha jopa Nacom jume naitawatichi xua itaboco wetsica wanaca tsipaebiwa. Waxainchi bichocono nama atenetsi, beyacaincha barapomonaе xua atene abe pia peexanae coyenewantha pomonaе Moisés baru popona. ²⁶ Caena bayatha Nacom tsipaeba barapo irathepiwi tsique poxonaе Moisés popona, Nacom pia jumetha ira jijiyata exana. Ichitha anoxuae Nacom tsiwanaya jeye: “Abu equeicha bara caeto tsane ira jijitsin yawano itabocothaichano jijitsin”, jei Nacom. ²⁷ Poxonaе Nacom jei: “Abu equeicha bara caeto tsane”, jei, naca yaputane exana xua Nacom aichurucuae exanaena pocotsiwan xua barapo cae pin nacuathe xeina pocotsiwan itacupatsi xua pejijiyatsiwatsi. Saya meisa jopa aichurucuae exanae tsainchi pocotsiwan xua jopa itacupaetsi xua pejijiyatsiwatsi xua pocotsiwan Nacom piamonaetha peyabara tsiwunaе

muxu dutsi coyenewa. ²⁸ Nacom pia nacua, ichaxota Nacom itoroba, yawano xua waxainchi baxota itorobatsi, barapo nacua jopa itacupaetsi xua jijiyatatsi xua aichurucuae peexanaenexatsi. Daxota bewa jeichichi Nacomtha: “Nacom, maisa pajuntũ coyene weiweinan pebaxuaxae”, bewa jeichichi. Poxonae Nacom wũnae jaintinchi waxainchi bewa yabara nanta xeinaetsi pia pejuntũ coyene xanepanae coyenewa tatsi. Matautano bewa bapon cunuwiya wũnae jaintichi pia peayapusũwa pexeinaexae. ²⁹ Wanacom weraweraca cana exana jiwi, pomonaetha pomonae jopa pejume cowantsiwichi. Nacom baxua exanaena icha be poxonae nawa ichi xua poxonae daxita topowa poxonae taxua.

13

Meje yabara xua pocotsiwa bewa exanaetsi xua pocotsiwa Nacom tsita xanepanatsi

¹ Jopa pana nacui barapentsinde xua caemonae nantiya painya nenaantobewam pomonae be painya eweicho jiwi painya nenatsicotae jiwi pam painya nejume cowantsixae Jesucristo. ² Jopa pajuntemainaeinde xua beta painya netaexaneibiwa tsane pomonae pateiba painya bontha pomonae irũ pejume cowantsiwi Nacom tsipei metha beya jemeicha barapomonae tsipae pomonae Nacom itoroba xua beta painya nepacata exanaenexa. Caena bayatha ichamonae pexaewa apata poxonae matha jemeicha pia botha tapatatsi, xua poxonae jopa xapain yaputaeyo xua deta cou apara matatsunpiwi.

³ Payabara nantũ coyene xeinare pomonae jiwi pecubi botha cuaranobebatsi painya neyawenaenexa barapomonae icha be poxonae paichim xua irũ jiwi pecubi botha paca cuaranobarũ. Payabara nantũ coyene xeinare pomonae peraxa jubebatsi xua ichamonae exana painya neyawenaenexa barapomonae. Tsipei paxam irũ jiwi pam, paca yabara itacupaetsi xua ichamonae paca necaperaxa jubwiwa.

⁴ Paxam bewa beta pananta xeinaem poxonae jitha paename xua barapo coyene paca tsita ainya cui. Daxota jopa bewa ichawa beya panasi cui weiweina exanaem poxoru painya seurixi bayatha paxeiname. Tsipei Nacom yabara paebina jiwi xua penatsicuentiwa xua abe peexanaexae pomonaetha pomonae jopa xapain exanaeyo xua be poxonae yabuxi jeita xua po coyene jiwi jopa yabara copatsiyo. Matautano barichi Nacom yabara paebina jiwi xua penatsicuentiwa xua abe peexanaexae pomonaetha pomonae nasi cui weiweina exana poxonae bequein pia seurixi xeina.

⁵ Jopa bichocono paichichipaeinde paratixi. Jame maisa pajuntũ coyene weiweinare painya nexainaexae pocotsiwa Nacom paca catsiba. Baxua paexande tsipei Nacom jeye: “Bapana jopa compa capopona exanae tsainchi. Bapana jopa cacuenta ponae tsainchi”, jei Nacom. ⁶ Daxota naca itacupa xua jume cowantsiya jeichichi:

“Nacom, pon jiwi Pecanamataxeinaein,
bapon pon xua tana neyawenaein.
Jopa junuwinyo poxonae jiton xua
abe tana exanaewa”, jeichichi.

⁷ Payabara cui jantanainare painya nepaca canamataxeinaewi pomonae bayatha paca cuiduba Nacom Pejume Diwesi. Barapomonae pacui taema, tsipei barapomonae beta jume cowantsiya jinompa beya poxonae barapomonae yacuiya werapa. Paxam beta pajume cowantsiya jinompare icha barapomonae ichi xua beta jume cowantsiya jinompa.

⁸ Jesucristo saya tsitecaeya pepu jupa exanaponae. Baxua exana caena bayatha, anoxuaeno, xuano xua bara ataya tsitecaenano xua jiwi beta peyawenaewatsi. ⁹ Daxota jopa pacopatsinde xua ichamonae painya nepaca cuidubiwa icha pecuidubi diwesi po diwesi pia diwesi barompa, po diwesi jopa Cristo pia diwesi tatsi. Jame ainya cui xua naajuntuyapusũ exainchi Nacom pia peantobe coyenewatha. Po coyenein xua itoroba xua penabanaewa yabara barapo coyenein jopa naca ajuntuyapusũ exanaeyo Nacomtha. Barapo peitorobi coyenewan bapana jopa yawenaetsi pomonae bequein xua exanapona barapo coyenewan.

¹⁰ Waxainchi xeinatsi barompaya wacoyene po coyene be poxonae xua tuxusi exanatsi Nacom nexa poxonae caein naetotha naca tsitupa xua daxota Nacom jopa tsitatsi xua penatsicuentisiwa xeinatsi xua abe waexanaexae. Baxua apara xua poxonae Cristo tupa naetotha abe waexanae cuiru coyenein nexa. Po sacerdotepiwi xua nacuita Nacom pia tututha anserabocototha xua caena bayatha barapocotsi coyene jopa itacupaetsi xua pexeinaewa barapo coyene tsipei barapo sacerdotemonae cataunxuae jutebeiba duwei jiwi abe pia peexanae cuiru coyenein tatsi nexa. ¹¹ Caena bayatha pon pepa sacerdotepin, duwein jana capaneiba ichaxota po tutu yatsicaewa Nacom pia tutu tatsi po tutu bichocono peainya cui tutu. Bapon baxua exana xua Nacom peyabara jantemainaenexa jiwi abe pia peexanae coyenewan tatsi. Bapoxonae barapo duwein ompin tautatsi tomara cuariya beya. ¹² Cristo barichichi. Tomara cuariya beya tupa exanadutatsi naetotha, xua daxita jiwi pejuntu coyene xanepana exanaenexa tsainchi Nacom. Cristo pejana pichapabarenaexae poxonae tupa, Nacom jopa tsitatsi xua jiwi penatsicuentisiwa xua abe peexanaexae. ¹³ Ichamonae Jesús aura exanatsi poxonae tomara cuariyatha tupa exanadutatsi naetotha. Barabu copatatsi xua ichamonae iru naca aura exana wajume cowuntsixae Jesús xua daxota naca atene exana icha Jesús ichichi. ¹⁴ Barapo cae pin nacuathe jopa xeinaetsi tomara, po tomara ataya tsitecaeya ayapusu tsuncuae. Jame wunaeya ewatatsi, po tomara xua bexa patopaetsica Nacom pia nacua wetsica tatsi. ¹⁵ Daxota waxainchi bewa wunae jainteibichi Nacom tsipei Jesucristo naca tsitupa. Poxonae Nacom wunae jaintatsi wajumetha baxua icha be poxonae ichi poxonae duwein tautatsi poxonae tuxusi exanatsi Nacom nexa. Nacom wunae jaintatsi jeichichi: “Nacom maisa bichocono nejuntu coyene xanepanaein”, jeichichi. ¹⁶ Jopa pajantemainaende po coyene xua beta painya taexanaewa ichamonae. Painyawan panata jiwana wetsabare pocotsiwan xua paxename xua painya necatsibinexa pomonae xua jopa xeinaeyo. Tsipei poxonae baxua paexaname, bichocono xanepana icha be ichi poxonae paexaname poxonae duwein patautame xua patuxusi exaname Nacom nexa pocotsiwa Nacom tsita xanepanatsi.

¹⁷ Paexande pocotsiwa paca cui itoroba pomonae painya nepacacanamataxeinaewi. Matautano saya barapomonaetha pajume naitaeware. Pabarú cui itura jinare barapomona tsipei barapomona paca juntu coyene eeniya ewata. Barapomona yaputane xua bexa tsane Nacom barapomona yabara paebina xua penatsicuentisiwa xua abe peexanaexae icha barapomona jopa beta paca juntu coyene eeniya ewatsiyo. Bara pacopare xua barapomona juntu coyene weiweina exanatsi poxona paca juntu coyene eeniya ewata xua jopa pejuntu coyene wecoyeyinexa xua abe painya neexanaexae. Tsipei icha barapomona juntu coyene wecoyeyi baxua xapain jopa paca yawenaeyo.

¹⁸ Nacomtha painta wucare. Bara payaputan xua pata juntu coyene pana netsipaeba xua pinae bara beta paexanan. Paxan paichichipan xua awiya beta pata exanaewa daxita coyenewan. ¹⁹ Paca wucatsi xua painya inta wucaenexam tsane Nacomtha xua Nacom bara inta pecopatsinexa xua methaunxuae tapaca siwa ponaewa tsainchi equeicha.

Meje yabara xua najume wetsiya paeba pon tina

²⁰ Nacom, barapon peyajuntu coyene jinaein xua jantema pepoponaewa. Barapon Nacom Jesús caewa asu exanatsi petupaewa weya pon Wanacanamataxeinaein. Bapon Jesucristo pon pepa Peewatsin xua daxita carepaya jiwi peewatsinchi icha be pocotsin oveja beta peewatsin ichi. Bapon Jesucristo pejana pichapabarenaexae poxona tupa, canacui wetsiya exana po coyene xua bayatha Nacom yabara tsiwunae muxu duta po coyene xua ataya tsitecaeya tsane. ²¹ Barabu barapon Nacom paca juntu coyene xanepana exanaena xua jopa painya nenatsicuentisinexa xua abe painya neexanaexae. Matautano bu bara paca catsina xua daxita pocotsiwan panantawenoname xua xuan xanepanaya painya exanaenexa po coyenein Nacom ichichipa. Barichi barabu Jesucristo pia peayapusuwa naca cana exanaena xua exanaeinchi po coyene Nacom tsita xanepanatsi. ¡Barabu jiwi Cristo ataya wunae jaintinchi pexeinaexae peayapusu coyenewan! Je, bara ichi tsane.

²² Tamonaē pam, pomonaē pam irū painya nejume cowuntsixae paca itorobatsi xua bepijawa jopa payabara jume cui aitaconaeinde po jumein paca muxuwetatsi, barapo tsica cartiyo po cartiyo imoxoyo jume tsecae. ²³ Maisa ichichipan xua painya neyaputaewa tsane xua Timoteo bayatha copatatsi jiwi pecūbi bo weya. Barapon be wayapin watsicotaein pejume cowuntsixaerū Jesucristo. Ichaunxuae bapon taxantha patopaena bapon methaunxuae nebarū iya tsane painya xainya beya xua equeicha tapaca siwa ponaewa tsainchi.

²⁴ Painta jacobare daxita pomonaē painya nepaca canamataxeinaewi. Irūno painta daxita jacobare pomonaē pejume cowuntsiwirū Jesucristo. Italia nacuamonaepiwi barapomonaē paca jacobā, pomonaē irū pejume cowuntsiwi.

²⁵ Barabū Nacom daxita pam bichocono paca yawenaena pia painya nepaca caantobewaxae.

Meje Po Carte Santiago Tatina, Pomonae Jesucristo Pejume Cowuntsiwi Tatinatsi

Meje yabara poxonae Santiago tamropata pitaba xua tatina pomonaetha pomonae pejume cowuntsiwi pomonae xua taju jinompa

¹ Xan, Santiago ponxaein Nacom amanaya pia petanacuichin tatsin iru Jesucristo pon jiwi Pecanamataxeinaein amanaya pia petanacuichin tatsinno. Paca jacobatsi pomonae Israel pia saineiwi tatsi pam, pon caena bayatha tupa. Israel doce po pexantobe xeina, pomonae caena bayatha werapa.

Paxam barapo doce po bicheito matabuxumonaebe pia sainei jiwi tatsi pam, pomonae pam xua anoxuae taju nacayayatsiya pajinompame daxita nacuantha xua painya pepa nacua weya.

Meje yabara xua po peyaputae coyene Nacom pia peyaputae coyenewa tatsi

² Tamonae pam pomonae iru painya nejume cowuntsi jiwi pam Cristo, bewa juntu coyene weiweinaya pajinompam poxonae bequein pacata ayapube tsaibi tsane ichauxi. ³ Poxonae pacata ayapube tsouneibi ichauxi ichitha beitatemaya awiya ayapusuya pajume cocowuntaroname, bapoxonae payaputaneme xua paantuyapusuya amanayabame pocotsiwa xua paca atene exana. ⁴ Bara saya beitatemaya payabara cui copare barapo coyene xua ayapusuya jume cocowuntarona paca necana exanaenexa beya poxonae painya juntu coyene Nacom petsita xanepanaenexatsi. Bapoxonae painya juntu coyeneintha jopa paxeinaem tsane pocotsiwa pacata seica. ⁵ Icha caein paxam jiwana pam taseicatsi peyaputae coyene xua jopa yaputaeyo pocotsiwa Nacom ichichipa bapon bewa Nacomtha tsipaebina xua pecatsinexatsi peyaputae coyene pocotsiwa bapon ichichipa. Nacom amanaya catsina nawita barapo peyaputae coyene. Matautano Nacom jopa aenae-aeneya itawetsiyo poxonae cata. ⁶ Daichitha jame bewa jume cowuntsiya pawucaename. Matauta jopa bubujeya pawucaeinde Nacomtha. Tsipei pon bubujeya wuca Nacomtha, bapon ichawa beya tamropata nanta xeinapenteiba icha be pocotsi coyene juta ichi poxonae ba maratsaca joibo ichawa beya caya tsaibi icha muxunene beya. ⁷ Pon barapocotsi coyeneya exana, Nacom ba jopa catsiyo bapocotsi jitontha, tsipei jopa jume cowuntsiya wucaeyo Nacom pon jiwi Pecanamataxeinaein. ⁸ Bapon jopa xeinaeyo pocotsiwa Nacom cata tsipei bapon anoxuae caewa yabara nanta xeina. Baya equeicha ichawa yabara nanta xeina. Jopa itacupaetsi xua xanepanaya pepoponaewa.

⁹ Pon xua Jesucristo pejume cowuntsin, bapon bequein saya tsiwiyo copei xeina, bapon bewa junte miya juntu coyene weiweinaeya poponaena tsipei bapon Nacom peitabaratha ainya cui penaexanaein. ¹⁰⁻¹¹ Matautano pon copiya copei pexeinaein pontha pon bequein Nacom cui yabara copata xua bapon peacopeibin naexana, bewa junte ma poponaena pejume cowuntsixae Nacom. Poxonae bapon tupaena, bapana jopa cuenta tupa po coyene xua bapon pejume cowuntsiwa. Ichitha icha bapon jopa jume cowuntsiyo copei pexeinaexae, bapon saya caeto nacuita ducuaenaebiya bapoxonae cuenta tupa copei poxonae nacuita ducuaenaebiya. Barapo coyene icha be pocotsi juta coyeneya ichi xua pentono. Bara caeto matono weiweinaeya umena. Cotacaya xometo ecoina yawano atsa bichocono, naepanaewan tsaquiwa, pentononno othopeica. Weraweraca xua matono itupana. Pon copei pexeinaein bapon tupaena, saya weraweracaena icha pentono ichi xua weraweraca.

Meje yabara poxonae jiwi pemuxujainyabiwatsi xua abe peexanaewa tsane

¹² Nacom jujuta pomonaetha pomonae pejume cowuntsiwichi pia yaputaetsi icha barapomonae xaniwaicha antobetsi. Pon xua acuiyapusuya jume cowuntsiya popona

poxonae bara bequein Nacom jũntũ coyene jũjũta, jame bapon jũntũ coyene wei-weinaeya popona. Poxonae yapucaewa xua bapon jũntũ coyene jũjũtatsi bapoxonae Nacom yabara wũnae muxu dutsina xua bexa bapon Nacom pia nacua beicha peajũntũcoyenyapũswatha ponaena. Barapo peyabara tsiwũnae muxu dutsiwa Nacom cata pomonaetha pomonae peantobewixaetsi. ¹³ Poxonae ichũn matowa jũntũ coyene jũjũtatsi xua abe peexanaenexa, bapon jopa bewa nanta xeinae xua metha baxua Nacom cana exana bapontha. Tsipei Nacom bapana jopa jichipae xua abe peexanaewa tsane. Mataũta Nacom ichamonaetha jopa bapana cana exanaeyo xua pejũntũ coyene jũjũtsiwa xua barapomonae abe peexanaewa tsane. ¹⁴ Aparã jame nama pon jũntũ coyene jũjũtatsi abe peexanaenexa, bapon copiya pejũntũ coyenetha nanta xeinaeya popona xua abe peexanaenexa. Bapoxonae poxonae xaniwaicha jũntũ coyene jũjũtatsi xua abe peexanaenexa bara bapon exana xua abe exana. ¹⁵ Pon xua abe exana bapon exana po peabe exanae cuiru coyene copiya yabara nanta xeina. Icha bapon awiya abe exana ducuaebiya matapainya tũpa abe peexanae cuiru coyene peexanaexae bichocono.

¹⁶ Tamonae pam paxam pomonae tapaca caantobewichi pam. Jopa painya coutha pananta xeinaeinde xua pajam: “Nacom nemuxujainyaba xua abe taexanaewa tsane”, jopa pajande. ¹⁷ Daxita xua wũnae, saya meisa baxuan Nacom nacata itorobica peitaboco wetsica. Bapon Nacom exanaduba daxitan xua pocotsiwa yonoyonojei tsurubena peitabocotha. Nacom jopa bapana ichawa beya pepaebiya exanaein. Bapon peyapenthiya jinaein mataqueitha yawa merawithano. Jopa exanaeyo icha barapo pecoichan ichi xua pentha tsaibi yawa quirei tsaibi. Dapon aibi pon itacũpatsi xua itorobatsi Nacom xua icha coyeneya peexanaewa xua pocotsiwa bapon pia coya ichichipa exana. ¹⁸ Poxoru saya Nacom pia coutha ichichipa daxota naca cata peantũyapũswa po peantũyapũswa ataya tsiteca. Baxua naca cata poxonae jume cowũntsiya jume tainchi Nacom pia pexainyei jume diwesi tatsi. Poxonae Nacom baxua naca cana exana bara waxainchi piamonae jiwi tatsichi xua waxainchi ichamonae toxeinchiya jume cowũntatsi. Xua copiya wajume cowũntsixae, Nacom naca cana exana xua pomonaetsi pomonae wajũntũ coyene xanepanae jiwichi Nacom nexa. Daxota Nacom tsita be peainya cui jiwichi beyacaincha ichamonae.

Meje yabara pomonae xaniyeya pepa pejume cowũntsiwi Nacom

¹⁹ Tamonae pam pomonae bichocono tapaca caantobe jiwichi pam pacayabara nanta xeinare barapo diwesi xua jeye: Daxita paxam bewa pewũnaeya pana najũntũ coyene wũnaeteibim painya nenamnaewateibinexa Nacom Pejume Diwesi. Jopa bewa paxainxainyam xua painya cueicueijeinexa barapo diwese ichamonaetha poxonae cataunxuae jopa paexanaem pocotsiwa barapo diwesi itoroba. Yawa jopa bichocono anaepanaya pacueicueijande. ²⁰ Tsipei pon anaepana, Nacom jopa taexanaetsi pexeinya coyene po coyene xua Nacom tsita xanepanatsi. ²¹ Barã pabarapende po coyene abe peexanae cuiru coyene pocotsiwa pananta xeiname, xuano xua pocotsiwa ichamonaetha pata exaname. Mataũtano pana cui barapende po peabe exanae cuiru coyene bichocono nawita pocotsiwa ichamonaetha pata exaname. Mataũtano painya jũntũ coyeneinthã ita ururaquiya pajume cowũnde Nacom pia pexainyei jume diwesi tatsi. Tsipei barapo pexainyei jume diwesi xeina peayapũswa xua paca cana exana xua pajũntũ coyene panenebiyam abe painya neexanae cuiru coyenein weya.

²² Itapeta paexande, pocotsiwa Nacom Pejume Diwesitha paeba. Jopa metha bepa saya pajume taemtsipae. Tsipei paxam painya coutha pana namuxuitorobeibichipame icha jopa paexaneibim pocotsiwa xua pajume taibame. ²³ Pon xua saya jume tane Nacom Pejume Diwesi yawa jopa exanaeyo pocotsiwa Nacom paeba, bapon be pocotsi jiton tsabocototha nayaitane. ²⁴ Barã nayaitane. Poxonae bapon pona caena bapon yacuinaya naitabara itaxananaya. ²⁵ Nacom Pejume Diwesi bichocono xanepana. Barapo peitorobi diwesi naca jũntũ coyene capanepa exana abe waexanae cuiru coyene weya. Ichitha pon jopa jũntemainaeyo xua pocotsiwa Nacom Pejume Diwesitha paeba, xuano xanepanaya

exana ducuaenaebiya pocotsiwa barapo diwesi itoroba, bapon jũntũ coyene weiweina xua pocotsiwa peexanaexae.

²⁶ Icha pebin nanta xeina xua daxita jume cowũntsiya exana Nacom nexa, xua daichitha jopa naebato yatacutsiyo poxonae ichamonaе catsawiya yabara paebatsi, bapon pia coutha namuxuitoroba. Mataũtano pocotsiwa jume cowũntsiya exanapona Nacom nexa saya pejumexaei. ²⁷ Pomonaе xainyeya pepa pejume cowũntsiwi Nacom, barapomonaе jopa abe exanaeyo Nacom peitabaratha, pon Waxa. Pomonaе xanepanaya exana bewa iche: Bewa yawenaе pomonaе peacoibi jiwi, yawa bewa yawenaeno powaxi pecuenta werapaewaxichi piseurixi. Mataũta jopa bewa exanae pocotsi coyene exana pomonaе jopa pejume cowũntsiwi Nacom.

2

Meje yabara xua poxonaе jiwi bewa daxita tsita najũpaetsi

¹ Tamonaе pam, pomonaе irũ painya nejume cowũntsixae Jesucristo pon Wanacana-mataxeinaein. Bapon Jesucristo pon bichocono pejũntũ coyene xanepanaein. Jopa bewa paexanaem painya xantha painya nejume cowũntsixae xua ichũn bichocono peainya cuin wũnae penaexanaeinxae beyacaincha ichũn xua jopa wũnae penaexanaeinxae xua daxota bapon catsapin pacana exaname. ² Ichacuitha metha be pocotsi coyeneya tsipae, xua meje: Metha poxonaе paxam panacaetutsipame, bapoxonaе irũrũ pebinbe patopaetsipabe. Metha baponbe joniyaetsipabe baxota. Ichũn nacobesi xataba aniyon pocotsiwan daedaena. Mataũtano paparuwa nama xatata xua mũ daedaena. Nama irũ ichũn acopeibi, nama dapon saya pia penama xatatsiwa taabetsi. ³ Metha pon copei pexeinaein pantenta weyataeya wabichipame. Metha pajam tsipaem bapontha: “Xote ecare ichaxota pexeinya peecaewatha”, pajam tsipaem. Ichitha nama pontha acopeibi, jopa pantenta weyataeya wabichipaem. Bapontha pajam tsipae: “Bara beuncuiyama, ichacuitha bara saya iratha ecare”, pajam tsipaem. ⁴ Icha metha baxua paexanaetsipame bapoxonaе abeya pananta xeinaetsipame xua jiwi jopa najũpaeyo. Bapoxonaе paxam pana nacana exaname be pomonaе jiwi painya neyabara paebi jiwi pam xua penatsicuentsiwa yabara xua abe peexanaexae.

⁵ Tamonaе pam pomonaе irũ painya nejume cowũntsixae Jesucristo, bichocono paca antobetsi. Incane pajume taema, xuaje: Nacom itapeta pomonaе peacopeibiwi xua barapomonaе bichocono pejume cowũntsinexa. Mataũtano Nacom catsibina barapomonaetha pocotsiwa bayatha jũntana jeba pia peitorobi nacuatheicha pia peantobewixaetsi. ⁶ Ichitha nama jopa paweyataem pon barapo peacopeibin. ¿Eta xua metha baxua paraichim? Pomonaе ba copei pexeinaewi pomonaе paweyataneme barapomonaе ba daunweya paca itoroba nama. Mataũtano barapomonaе ba pentacaponawewi peitabaratha paca capona xua abeya pia paca necayabara paebinexa. ⁷ Barapomonaе pomonaе copei pexeinaewi apara Jesucristo abe yabara paebatsi, pontha pon waxainchi wajume cowũnta dubenanaebiyaexaetsi, naca jei, “Cristobarũmonaе”, naca jei.

⁸ Icha ichichipa paexaname Nacom peitorobi jume coyenewa, moya pejume coya paexande xua Nacom Pejume Diwesitha jeye: “Paantobeinde ichamonaе, pomonaе painya nepaca tsicuarabũ enaewi icha paichim xua painya coutha pana naantobem”, jei xua barapo diwesitha. Moya bara beta paexanaename. ⁹ Poxonaе ichamonaе ainya cui pacana exaname xua beyacaincha ichamonaе, bapoxonaе paxam apara abe paexaname. Mataũtano apara paxam pomonaе abe painya neexanaewi, tsipei jopa paexanaem pocotsiwa Nacom penajume caitorobi coyenewatha paeba. ¹⁰ Icha ichũn jume jejei xua peexanaewa tsane pocotsiwa Nacom penajume caitorobi coyenewatha paeba, daichitha bara caewiyo seicanaya xua peexanaewa tsane, bapon Nacom tsita natsicuentatsi xua abe peexanaexae. Bara bequein saya caewiyo seicanaya, barapara Nacom tane xua daxita tsita abetsi. ¹¹ Nacom namchi: “Jopa panasi cui wainmeinchiinde poxonaе jitha painya neenaewatha”, jei Nacom. Yawa namchino: “Jopa bexubinde ichũn”, jei Nacom. Ichitha icha bequein jopa panasi cui wainmeinchim, daichitha pabexubame ichũn baraxua

be poxonae daxita abe pacayabara exaname Nacom penajume caitorobi coyenewa.¹² Paxam bewa beta xanepanaya papaebim. Matautano bewa beta pajinompae. Tsipei bexa tsane Nacom paca yabara paebina painya nenatsicuentisiwa abe painya neexanaexae bapontha. Paxam jopa payabara jume cuiya exanaem pocotsiwa Nacom itoroba penajume caitorobi coyenewatha. Icha barapo coyene exanatsi naca cana exana xua wapanenebiwatsi Nacom beya.¹³ Pomonae jopa yabara nantanuweya nanta xeinaeyo xua ichamonae peyawenaenexa tsainchi xuya Nacom bara jutiya ichane barapomonaetha. Ichitha pomonae xua yabara nantanuweya nanta xeina xua ichamonae peyawenaenexa tsainchi, xuya Nacom bara jutiya ichane po matabitha jiwi yabara paebinchi xua penatsicuentisiwa xua abe peexanaexae.

Meje yabara xua Nacom pejume cowuntsiwichi pia pexeinya peexanae coyenewan tatsi

¹⁴ Tamonae pam, iru pomonae painya nejume cowuntsixae Jesucristo. ¿Eta xua metha tsipae? Metha ichun jei: Xan Nacom Pejume Diwesi jume cowuntan, jei, ichitha jopa betiya xanepanaya exanaeyo. ¿Bara metha bapon najuntu coyene capanepaetsipa Nacom beya? Aparajume tsipae, jopa najuntu coyene capanepaetsipae.¹⁵⁻¹⁶ Ichacuitha metha tsipae, metha panantaupsipame pomonae pejume cowuntsiwi Jesucristo painya xantha. Barapomonae metha taaibichipaetsi paparuwan xua pocotsiwa aque nexa, yawa xua taseicatsi pexaewa penabanaewanexa. Metha ichun pon painyamonae jiwana jiton bapomonaetha jeye: “Bara juntepanawibiyama, paparuwa panama xatabareno, bara beta panabanareno”, jei. Daichitha bapon jopa catsiyo barapomonaetha pocotsiwa barapomonae nantawenona xua pejinompaewa nexa. Baxua bapana ba ichamonae jopa yawenaetsi icha saya ba u xua paebatsi.¹⁷ Barichi xua pon pejume cowuntsin Nacom Pejume Diwesi. Icha bapon jopa yawenaeyo ichuntha pontha pon nantawenona ichawa xua pia peponaewa nexa, bapoxonae bapon pia pejume cowuntsiwa Nacomtha be cayabara juntepana.

¹⁸ Ichacuitha jiton jeye: “Ichamonae bichocono jume cowunta pocotsiwa Nacom itoroba bequein jopa yawenaeyo ichamonae. Seicaya ichamonae bichocono beta yawena ichamonae bequein jopa beta jume cowuntsiyo pocotsiwa Nacom itoroba”, jei. Xan ponxaein Santiago jume notsin bapontha: “Pon beta jume cowunta jopa itacupaetsi xua netsita exana xua bapon xaniwaicha jume cowunta pocotsiwa Nacom itoroba poxonae bequein jopa beta yawenaeyo ichamonae. Bapoxonae xan tsita exanan bapontha xua xaniwaicha jume cowuntan pocotsiwan Nacom itoroba poxonae exanan pocotsiwa Nacom neitoroba xua poxonae yawenan ichamonae”, jan tsane.¹⁹ Xam jume cowuntame xua bara compa pepa Nacom popona, xua ichun bapocotsin aibi. Baraxua bara beta nanta xeiname. Ichitha baxua iru caurimonae jume cowunta yawa bichocono pijunuwi jijiyei.²⁰ Xam bapocotsim pocotsin ba jopa peyaputaen, incane jume taema. Pon paeba xua pinae jume cowunta pocotsiwa xua Nacom itoroba, xua daichitha jopa beta exanaeyo ichamonae nexa, bapon pia pejume cowuntsiwa bara be cayabara juntepana.²¹ Nacom tsita juntu coyene xanepanatsi Abraham, pon wamo susatopin, pon caena bayatha tupa. Bapon Abraham Nacom jopa tsita natsicuentisichi xua abe peexanaexae, ichitha yabara jume cowuntsiya peexanaexae pocotsiwa Nacom itoroba. Bapon pexanto isoto beya capona, petautsinexa xua petuxusi exanaenexa Nacomtha, po pexanto tatsi pewun Isaac.²² Anoxuae payaputaneme xua Abraham jume cowuntsiya exana pocotsiwa Nacom itoroba. Daxota bapon tsita itapeinya xeina xua poxonae exana baxua xua yatsicaewa bara xeina pepa pejume cowuntsi coyenewa.²³ Nacom exana xua caena bayatha Pejume Diwesitha jeye: “Abraham jume cowuntsiya exana pocotsiwa Nacom itoroba. Daxota Nacom tsita juntu coyene xanepanatsi jopa penatsicuentisixae xua abe peexanaexae bapontha”, jei Nacom Pejume Diwesi. Barapo Nacom Pejume Diwesi tatsi xainyei, tsipei Nacom exana baxua. Daxota caena bayatha Abraham yabara jeichichi: “Apara Abraham Nacom pia jiton tatsi”, jeichichi.

²⁴ Anoxuae bara payaputaneme pocotsiwa Nacom tsita juntu coyene xanepanatsi xua jopa tsita natsicuentisichi xua abe peexanaexae pon exana pocotsiwa Nacom itoroba, jopa meisa metha poxoru pejume cowuntsixae. ²⁵ Bara cana ichiru Nacom petsiriwatha powa nasi cui matacaeta pebiwitha, pia paratixichi, powa pewun Rahab, powa caena bayatha popona. Nacom tsita juntu coyene xanepanatsi barapowatha xua poxona peyawenaexae icha pebinbetha ponbe peitorobinchibe xua poxona peyantabinexabe tomara. Barapowa barapo pebinbe bupana etatsibe pia botha poxonae baponbe jeitompatsibe ichamona. Bapoxonae pirapaeyo bapowa baponbe capanepatsibe icha namto iya xua tomara weya. ²⁶ Daxota anoxuae paca tsipaebatsi, icha pepon ba jopa xeinaeyo pejumope, ba pepon tupa. Barichi icha pebin jume cowunta Nacom daichitha jopa exanaeyo pocotsiwa Nacom itoroba bapoxonae pia pejume cowuntsiwa bara be cayabara jantemaina.

3

Meje yabara pocotsiwa xua peebatotha pepaebiwa

¹ Tamona pam pomona iru painya nejume cowuntsixae Jesucristo. Paxan pajume tan xua pinmonae painyamonae jiwana ichichipa xua penaexanaewa pomonae jiwi pecuidubiwi Nacom Pejume Diwesi. Daichitha pinmonae jopa bewa naexanae pomonae jiwi pecuidubiwi. Bayatha daxita paxam payaputaneme xua paxan pacueicueijan tsurubenanaebiyon Nacom Pejume Diwesi xua jiwi jopa bewa abe exanaena. Daxota poxonae baxua pacueicueijan xua daichitha abe paexanan bapoxonae Nacom bichocono pana peraxa jubina beyacaincha xua poxonae bapon cana exanaena ichamonaetha. ² Daxita waxainchi ichichipatsi nawita xua abe waexanaewa. Anoxuae payaputaema, icha ichun jopa abe exanaeyo xua poxonae paeba bapon jame penthuthu yapu xanepanaein. Matautano bapon itacupatsi xua najuntu coyene itoroba daxita pia pepontha xua xanepanaya peexanaewa abe peexanaeyainwa. ³ Poxonae waxainchi cawayu wano atatsi penainto xua wanaca cui jejeinexa baraxua apara xua wacafebabinexa daxita pepon ichaxota waponawa. ⁴ Barichi payabara nanta xeinare jera po nae pin nae. Bara bequein bichocono pin nae yawano bara bequein po joibo pin joibo capubabiya tsaibi, daichitha pon tafecaeca bapon cafebabecapona ichawa beya xua ichaxota ichichipa peponawa xua xoyotha tsiwiyo tsecae xoyo ira werucueina. ⁵ Icha jera ichi po nae pin nae xua dapocotsiwiyotha cafebabecapona, barichi peebato xua dapocotsi ebatiyo tsecae pepon nexa. Daichitha barapo ebatiyotha itacupatsi xua yabara eetaponaeya paeba pia peexanaewa poxonae ichamonae aebatsi. Barichi unu itacupatsi xua petaxuiwa dacotsi iteretiyotha. ⁶ Icha nawa iteretiyo cana ichi unu, peebato bara ichiya exana daxita coyeneintha. Bequein waebato peyauyo tsecae xua wapepon jiwana xua pin xaintotsi, ichitha bara itacupatsi xua bichocono abe exanatsi naca cana exana. Waebato naca cana exana xua waexanaewa daxita abe waexanae cuiru coyenein xua poxonae wacueicueijeixae waebatotha xua caurimonae pia pentacaponaein tatsi wanaca cui itorobixae. ⁷ Jiton ba itacupatsi xua ita coxone exana daxita duweimonae, pepupunaewi, jomon yawa menepipichiwanno. Daxita baxua i daxua jiton ba ita coxone exana. ⁸ Nama peebato jopa be baraichichi. Jopa wanaca yapu xanepanaewa xua waebato cuidubatsi xua jopa abe jume pepaebiwa tsane. Waebato bichocono abe tsecae. Itacupatsi xua jiwi cana exanatsi xua ichamona pejumetaya anthuthutanewa, icha jomo ichi xua jiwi ba atene exanatsi pewanatha xua ichacuitha ba jiwi tupa exanatsi xua pewano tsapa pexeinaexae. ⁹ Barapo ebatotha wuna jaintatsi Nacom pon Waxa. Matautano abe yabara paebatsi pebiwi barapo ebatotha. Ichitha barapo pebiwitha Nacom caena bayatha forota daxota barapo jiwi pia juntu coyene tatsi jupa icha Nacom pia juntu coyene tatsi ichi. ¹⁰ Matautano barapo coibototha jume pichapa xua wuna pejainchiwa Nacomtha, xuano xua abeya pepaebiwa. Tamona pam pomona iru painya nejume cowuntsixae Jesucristo. Jopa bewa barapocotsi coyenewa paexanaem xua poxonae Nacom wuna pajaintame xuano xua jiwi abe payabara paebame. ¹¹ Po

mera natsibotarucua ira baxupana wetsina, poxonae mene jujuina barapoxonae caena yawa jopa muxuna jujuinaeyo po mera xeica yawa po mera atsaxa. ¹² Tamonae pam bara pocotsi juta coyeneya ichi poxonae waxainchi ubatsi. Higuera nae jopa ba nacoichiyo olivo nae thei, po pethei aceituna thei matawun. Yawano uva unbototha jopa ba nacoichiyo higuera nae thei. Barichi barapo mene po mera mene natsibotarucua poxonae mene jujuina barapoxonae caena yawa jopa muxuna jujunaeyo po mera xeica yawa po mera atae. Barichi waebatotha jopa bewa xeinaetsi ainya jume coyenewabe po jume wunae yawa po jume abe.

Meje yabara xua pepa pexainyeiwa xua peyaputae coyenewa

¹³ Icha painya xantha popona pon bichocono peyaputaein xua yawa pecoxonaein bapon bara bewa moya xanepanaya beta poponae yawa bara bewa moya ita ururaquiya poponae. Beta peexanaexae jiwi peitutha, bapoxonae jiwi tane xua bara bapon pon bichocono pepa peyaputaein. ¹⁴ Metha painya juntu coyenetha paxeiname peuwiwa xua paca juntu coyene atsaca exana ichamonaetha. Yawa metha painya coutha pana nata exaname painyawan pia jiwi wunae paca yabara paebichi xua pia ainya cui paca exanaetsi xua beyacaincha ichamonae. Icha paxeiname barapo peyaputae coyenebe bapoxonae painya xoba paaebame ichamonae painya pepa neyaputae jiwi pamxaem. Poxonae baxua papaebame apara saya panaerabame xua jopa paxainyam. ¹⁵ Aparapa barapo peyaputae coyene xuaunxuae po peyaputae coyene yabara paca tsipaebatsi barapo coyene apara jiwi nanta xeina barapo cae pin nacuathe pomonae jopa pejume cowuntsiwi Nacom. Barichi barapo peyaputae coyene cauri nanta xeina. Aparapa barapo peyaputae coyene Nacom werena jopa ponaeyo. ¹⁶ Daxota poxonae ba jiwi pejume uwiwa xeina ichamonaetha yawa u penata exanae coyene piawan bapoxonae ba jiwi jopa xanepanaya penanta xeinaewa yawa exana daxita abe peexanae cuiru coyenein. ¹⁷ Nama pomonae xua peyaputae coyene xeina xua po peyaputae coyene Nacom werena pona, barapomonae copiya juntu coyene xanepanaya jinompa yawano barapomonae jopa naita aenae-aeneyo saya juntema pejinompaexae. Yawa barapomonae yabara jume baru cui itura jina pocotsiwa ichamonae paeba. Yawa jume jejei xua peexanaewa pocotsiwa ichamonae itoroba. Matautano nantanuweya yabara najuntu coyene xeina peyawenaenexa tsaiibi tsane ichamonae. Matautano barapomonae wunaeya xanepanaya exaneiba ichamonae nexa xua jopa ichawa beya nanta xeinaeyo xua saya xaniwaichiya exana. ¹⁸ Pomonae xua bichocono ichichipa xua juntema pejinompaewa barapomonae cana exana ichamonaetha, xua ichamonae juntema jinompa xua daxota barapo ichamonae bichocono xanepanaya betiya exana dubenanaebiya.

4

Meje yabara pomonae ichichipa naexana pomonae jopa pejume cowuntsiwi piamonae tatsi

¹ ¿Eta werena pona barapo coyene xua pana najume matsontsonobame? ¿Yawano eta werena pona barapo coyene xua pana nabame? Aparapa barapo coyenebe naforoba painya juntu coyeneintha ichaxota paichichipame xua abe painya nenanta xeinaewa. ² Ichawa paichichipame ichitha jopa paxeinaem daxota ichun anaya pabexubame. Ichawa payabara cui uwame, ichitha jopa paca itacupaeyo xua paxeiname daxota anaya pana nayabara bame. Jopa paxeinaem pocotsiwa paichichipame tsipei Nacomtha jopa pawucaem. ³ Poxonae Nacomtha payabara wucame pocotsiwa paichichipame, jopa Nacom paca catsiyo tsipei jopa xanepanaya pawucaem, saya painya nata wucaexae pocotsiwa xua abe painya neexanaewa tsane. ⁴ ¡Maisa paxam caurimonae pia pepuna jinompaewichi pam! Payaputaneme xua pomonae ichichipa naexana pomonae jopa pejume cowuntsiwi Nacom piamonae tatsi, barapomonae apara ba Nacom peaitafaetabiwichi. Daxota poxonae paichichipame xua panaexaname barapo cae pin nacuamonae piwi piamonae tatsi, apara panaexaname Nacom pia peaitafaetabiwichi tatsi pam. ⁵ Daxota Nacom Pejume Diwesi jeye: “Nacom asiwiya antobe po jumope tunaxu naca

cayawa exanaeya jinompa exana”, jei. ⁶ Ichitha Nacom pia peantuyapusuwatha naca yawena xua jopa abe waexanaewa tsainchi. Nacom Pejume Diwesitha jeye: “Nacom jopa yawenaeyo pomonaetha pomonae jiwi peaebiwi. Ichitha pia peajuntuyapusuwatha yawena pomonaetha pomonae ita ururanaya jinompa xua jopa atsaquiyo”, jei. ⁷ Pajume jejande xua Nacom paca itoroba yawa paexande. Jopa pamuxu jejande cauri pia pentacaponaein tatsi xua paca tsipaeba. Bapoxonae bapon naetsiricuaena painya xainya weya. ⁸ Nacomtha patsipaebare, bapoxonae Nacom paca yawenaena. Paxam pomonae abe peexanae jiwi pam, tsipei Nacom paantobem yawa pamuxuna antobem po peabe exanae coyenewa barapo cae pin nacuathepiwi exana. Bara panacui barapende barapo abe painya exanae coyene. Yawano Nacom patsita najuntũ coyene xanepana exande. ⁹ Abe painya neexanaexae, pana najuntũ coyene acaurande, pawecoyande, yawa panantũ exabare. Poxonae pajuntũ coyene weiweiname xua painya neexanaexae pocotsiwa barapo cae pin nacuathepiwi exana, bara equeicha caewa pajuntũ coyene wecoyande xua painya neauraxae. ¹⁰ Nacom pon jiwi Pecanamataxeinaein pabarũ cui itura jinare xua jopa ainya cui pana nacana exanaem. Bapoxonae Nacom ainya cui paca cana exanaena.

Meje yabara xua jopa bewa ichamonae yabara paebichi tsainchi xua penatsicuentiwa xua abe peexanaexae

¹¹ Pomonae painya nejume cowuntsi jiwi pam Jesucristo, jopa bewa ichamonae yabara paebichi tsainchi xua penatsicuentiwa xua abe peexanaexae. Pon abe yabara paeba pontha pon Cristo pejume cowuntsindũ, bapon muxuna abe yabara paeba Nacom pia peitorobi diwesi. Bapon jopa jume cowuntsiyo pocotsiwa xua barapo diwesi itoroba xua pinae jopa bewa abe yabara paebichi ichũn xua xeina penatsicuentiwa xua abe peexanaexae. Bapoxonae bapon natsicuenta Nacomtha barapo coyenetha tsipei abe paeba nawita. Poxonae bapon abe yabara paeba Nacom pia peitorobi diwesi bapoxonae bapon be jopa exanaeyo po coyene Nacom pia peitorobi coyenewatha itoroba. ¹² Apara meisa bapon Nacom pon naca cata pia peitorobi coyenewa. Matautano bapon compa pon jiwi peyabara paebin xua penatsicuentiwa xua abe peexanaexae. Meisa saya bapon itacũpatsi xua jiwi capanepatsi pia nacuatheicha, xua ichacuitha ba jiwi itawetatsi pia nacia weya xua abe peexanaexae. Nama paxam apra jopa paca itacũpaeyo xua payabara paebame xua ichamonae pia peexanae coyenewa tatsi. Matautano jopa paca itacũpaeyo xua jiwi pacapanepame Nacom pia nacia beicha tatsi, xuano xua jiwi ba ichacuitha paitawetame Nacom pia nacia weya tatsi abe peexanaexae.

Meje yabara xua cataunxuae jopa nayaputaeyo pocotsiwa xua baya nexa tsane

¹³ Anoxuae pajume taema xuaje, xua paxam ba pajam: “Anoxuae, ichacuitha icha jopa anoxuae tsipae, baya tsane paponaein icha tomaratha. Ichacuitha icha jopa barapo tomaratha tsipae, paponaein icha tomaratha. Baxota pata tha cae wei yapu othopaetsi, pata caenaeta dubenanaebiyaetsi, yawa pata paratixi caetuba dubenanaebiyaetsi”, xua pajam. ¹⁴ Jopa baxua pananta xeinaeinde tsipei jopa payabara yaputaem pocotsiwa baya painya nejinompaewa tsane. Barapocotsi jũta coyeneya pana natsicotaneme, icha nobo ichi, xua ba caeto nobo tsuncuae equeicha caewanaya. Barichi jiwi bara caeto jinompa, equeicha werapa. ¹⁵ Jame bewa pocotsiwa papaebim xua jeye: “Icha Nacom pon jiwi Pecanamataxeinaein ichichipa xua wajinompaewa, moya jinompaeinchi, yawa exanaeinchi pocotsiwa xuaje, ichacuitha xua ichawano”, xua bewa jei. ¹⁶ Ichitha nama paxam, jopa baxua papaebim pocotsiwa icha Nacom ichichipa. Saya paaebame poxorũ paichichipame xua painya neexanaewa pocotsiwa painya coutha paichichipame. Icha poxonae paichimje xua poxonae paaebame bapoxonae bara apra abe peexanae cuirũ coyene paexaname. ¹⁷ Pon xua yaputane xua beta peexanaewa, xua daichitha jopa baxua exanaeyo, apra bapon bara abe peexanae cuirũ coyene exana.

¹ Pomonaē copei pexeinaewi pam, pajume taema xuaje: Payabara siwa wecoyande yawa pana nantanuweya namtsebare xua painya nepaca tsita jopaexae pocotsiwa xua jopa xaexaenaecaeyo, pocotsiwa xua paca atene exana. ² Daxita xua xuan paxeiname baxuan daxita tsabana, yawa painya pexeinya pabūbūrn xua pemū itane wūnaewan baxuan daxita ofon xane. ³ Painyawan xua pocotsiwa pewūn oro nain yawa xuano pocotsiwa pewūn plata nain, daxita baxuan tasibounatsi. Baxua paca tsita naitapeinya xeina xua paxam jopa pacatsim ichamonaē saya asiwiya pantaropeicha xexeinaponame barapo copei. Barapo copei pajebame anoxuae. Ichitha po mataqueitha poxonaē Nacom yabara paebina jiwi xua penatsicuentisiwa xua abe peexanaexae bapontha, barapo matabi imoxoyo tsane. Nacom weraweraca exana barapo copei xua painya copei, icha isoto ichi xua tauta exana xua topowa. Bichocono copei pacaetubame bequein jopa baxua paca yawenaeyo painya nepanenebiyaewa po mataqueitha nexa po mataqueitha Nacom yabara paebina pocotsiwa jiwi pia peexanae coyenewan ichacuitha xua metha wūnae, ichacuitha xua metha abe. ⁴ Jopa pantomatsim pomonaetha pomonaē pacata nacuita poxonaē pacata naweta pexaewa. Painya caibixae barapo pentoma barapomonaē paca yabara namtsebiya wawai. Yawa Nacom pon jiwi Pecanamataxeinaein, pon daxita pia peitorobi coyene pexeinaein bapon daxita baxua jume tane xua barapomonaē namtsebiya wawai. ⁵ Barapo irathe bichocono copei paxeina dubenanaebiyame, matautano paexana dubenanaebiyame pocotsiwa xua paca jūntū coyene weiweina exana. Bichocono copei paacabem po mataqueitha poxonaē Nacom paca jutebina, icha jiwi ichi xua natsixuruwei naxinyaba exana vaca xua bexa pebexubinexa tsane. ⁶ Paxam pomonaē copei pexeinae jiwi pam abe payabara paebame pomonaē pejūntū coyene xeicae jiwi. Yawano pajutebame barapomonaē, bequein jopa itacūpaetsi xua pia coutha penayawenaewa.

Meje yabara poxonaē Santiago jei: “Jopa paaitaconaeinde poxonaē bequein ichamonaē abe pacata exana”, jei

⁷ Tamonaē pam pomonaē irū Jesucristo painya nejume cowūntsixae. Beitemaya pawūnae eware pon jiwi Pecanamataxeinaein, pon Cristo. Jopa paaitaconaeinde poxonaē pawūnae ewatame xua poxonaē bequein ichamonaē abe pacata exana. Barapo coyene baxua bara paichinde, icha pon pabi pexeinaein ichi poxonaē beitemaya ewata xua naweta xua naxainwaeta. Bapon jopa aitaconaeyo poxonaē beitemaya ewata xua ema taatsanaeinchi pia pabi. ⁸ Paxam irū bara paichinde. Jopa paaitaconaeinde poxonaē pawūnae ewatame pon jiwi Pecanamataxeinaein. Pana najūntū coyene tsacabare xua jūntema painya nejinompaewa tsane, tsipei pon jiwi Pecanamataxeinaein bara nama imoxoyo pewūnaeyo tatsōponaetsi xua pepatopaewa.

⁹ Tamonaē pam pomonaē irū Jesús painya nejume cowūntsixae. Jopa caemonaē nantiya aitaconaeya pana nayabara paebinde xua abe painya nenata exana dubenanaebiyaexae. Icha baxua paexaname paxam panatsicuentame Nacomtha tsipei Nacom pon jiwi peyabara paebin xua penatsicuentisiwa xua abe peexanaexae. Nama imoxoyo tsoponaē poxonaē Nacom itorobina xua jiwi peraxa jūbebinchi pomonaē abe peexanaewi. ¹⁰ Tamonaē pam matha pataema po diwesi yabare: Pomonaē Nacom peitorobi jume pepaebiwi pomonaē caena bayatha jinompa, barapomonaē bichocono atene exanatsi ichamonaē. Bequein bara barapomonaē atene, daichitha awiya jopa aitaconaeyo poxonaē abe taexanatsi ichamonaē. Awiya barapomonaē pomonaē Nacom peitorobi jume pepaebi jiwi ba cueicueijeji tsaibi Nacom nexa, pon jiwi Pecanamataxeinaein. ¹¹ Waxainchi ba yabara nanta xeinatsi barapomonaē, xua bichocono jūntū coyene weiweina poxonaē beitemaya awiya jume cowūntsiya exana dubenanaebiya poxonaē bequein abe taexanatsi ichamonaē. Bayatha caena pajume taneme xua pinae pon pewūn Job jopa aitaconaeyo Nacomtha poxonaē bequein Nacom yaperaxaeya jume cowūnta ducuaenaebiyatsi. Matautano payaputaneme xua Job equeicha matapainya beta taexainchi Nacom, pon jiwi Pecanamataxeinaein tsipei Nacom jiwi nantanuweya peyabara nantū coyene xeinaeinchi xua jiwi peyawenaenexatsi.

¹² Jame xuaje ainya cui: Jopa Nacom pawun caunutsinde xua bapon painya nepaca taewa tsane xua xaniwaicha painya nepaebiwa poxonae yabara pana natsiwana wnae paebame ichamonaetha pocotsiwa bexa painya exanaetsi. Poxonae pajam: “Je”, pam, bara bara paichinde. Poxonae pajam: “Bara”, pam, bara moya bara jopa paexanaeinde. Bapoxonae jopa Nacomtha panatsicuentisim tsane abe painya neexanaexae. Barichi jopa itaboco pawun caunutsinde, yawa irano jopa pawun caunutsinde, matautano jopa icha wunno pawun caunutsinde.

¹³ Icha ichun pon painyamonaе jiwana jiton ajuntucoyenetane xua abe petaexanaexaetsi ichamonaе, barabun bewa bapon Nacomtha wucaena xua peyawenaewa tsainchi. Icha ichun juntu coyene weiweina, barabun bewa bapon peweixi naxunaе xua Nacom wnae jainchiya peyabara naxunaewatsi. ¹⁴ Icha ichun atene, bewa pawabim penapatae jiwi, pomonaе pecanamataxeinaewi xua canamataxeinatsi pomonaе Nacom pejume cowuntsiwi. Bapoxonaе barapomonaе bewa tawucaena xua pon peatenein petawucaewatsi xua Nacom axaibi peexanaenexa. Bapoxonaе barapomonaе bewa juinya penasiwatha mata caxuebina Cristo pewuntha pon jiwi Pecanamataxeinaein. ¹⁵ Poxonaе barapomonaе Nacomtha wuca bewa yabara jume cowuntsiya wucaena xua bara Nacom pon jiwi Pecanamataxeinaein axaibi exana bapontha. Bapoxonaе pon atene jume tsane. Matautano pon Wanacanamataxeinaein, bapon pon atene axaibi exanaeinchi. Icha pon atene abe peexanae cuiru coyene exana baxua Nacom cayabara junteinaena.

¹⁶ Daxota paxam, caemonaе nantiya pana natsipaеbeibare xua poxonaе abe nantiya pana nata exaneibame, pajam tsaibinde: “Pin uran, yaitama jopa xapain cata exanaetsi necayabara junteinane”, pajam tsaibinde. Pon Nacom peitabaratha tatsi juntu coyene xanepanaya popona, poxonaе bapon Nacomtha wuca bichocono peayapuswa xeina xua daxota Nacom beta cana exana bapontha. ¹⁷ Nacom peitorobi jume pepaеbin Elías, bapon bara jiton bara wanaca cui jupaеin, pon caena bayatha popona. Poxonaе bapon Nacomtha matowa wuca xua jopa peruneicaewa tsane, bapoxonaе jopa duneicaeyo tres po weibe yawa equeicha bara caeto nama. Bapoxonaе barapo nacuatha pin jainbo nacua tsurucuae. ¹⁸ Bapoxonaе, poxonaе equeicha Nacomtha wuca, bapoxonaе equeicha duneica yawa pexuwiwan xanepanaya nawetsiya xuwa.

¹⁹ Tamonaе pam metha ichun pon paxam jiwana abe exanapona bequein yaputane xua bewa exanaena pocotsiwa pexainyeiwan. Icha ichun yawena bapontha xua equeicha caewa beta peexanaewa tsane bapon, pon yawena, bara beta exana. ²⁰ Pon yawena bewa yaputaena xuaje: Po jiton xua cana exana ichamonaе xua penacui barapentsiwa abe peexanae cuiru coyenein, xua equeicha pejume cowuntsinexa Nacom, barapon juntu coyene capanepa exana barapomonaе petupaе cuiru coyene weya. Matautano bapon juntu coyene yawena xua Nacom peyabara junteinaewa xua barapomonaе abe pia peexanae cuiru coyenein tatsi xua bequein bichocono nawita.

Baja Santiago.

Meje Po Carte Copiya Pedro Tatina, Pomonae Jesucristo Pejume Cowuntsiwi Tatinatsi

Meje yabara poxonae Pedro tamropata pitaba xua tatina pomonaetha pomonae Jesucristo pejume cowuntsiwichi

¹ Xan, Pedron, Jesucristo pia peitorobi jiwi jiwana tatsin. Daxita barapomonae pam pacata tinatsi pomonae painya nacua nacayayatsiya pawu jinompame xua ichamonae painya nepaca yotabixae. Pomonae painya nejinompaewi pam Ponto nacuatha, iruru pomonae painya nejinompaewi pam Galacia nacuatha, iruru Capadocia nacuatha painya nejinompaemdu, iruru Asia nacuatha painya nejinompaewi pamdu, iruru Bitinia nacuatha painya nejinompaewi pamdu. ² Caena bayatha poxonae aena, bapoxonae Nacom paca itapeta. Barapon Nacom, pon Waxa, paca yaputane xua pia pexui tatsi pana naexaname. Nacom pia Pejumope tunaxu tatsi paca exana xua bichocono pajuntu coyene xanepaname Nacomtha painya neexanaenexa pocotsiwa Nacom paca itoroba. Poxonae Jesucristo paca tsitupa naetotha jana pichapabarena painya nejume cowuntsinexa Jesucristo pocotsiwa bapon paca itoroba. Bapoxonae pajuntu coyene xanepaname Nacomtha. Barabu Nacom bichocono paca yawenaena pia paca necaantobewaxae. Matautano barabu barapon juntema jinompa paca exana.

Meje yabara xua po coyeneya bewa beta jinompaetsi Jesucristo nexa

³ Nacom wuna jaintatsi pon Jesucristo Paxa tatsi. Jesucristo bapon pon Wanacana-mataxeinaein. Nacom jeichichi: “Nacom maisa pajuntu coyene weiweinan xua pena juntu coyenein patanecatsibiwam xua poxoru bichocono nantanuweya pana yabara nanta xeiname. Baxua painta exaname poxonae Jesucristo equeicha asu exaname petupae cuiru coyene weya”, jeichichi. Jesucristo naca cana exana xua wunaeya jume cowuntsiya ewatatsi xua Nacom naca catsina peajuntuyparuswa. ⁴ Bara Nacom paca catsibina pocotsiwa paca juntana jeba pia nacuatheicha pocotsiwa xua jopa itacupaetsi xua peweraweracaewa xua matauta jopa abe caquiyo. Matauta jopa abe tsoponaeyo xua jopa daichiyo icha pentono ichi. ⁵ Nacom paca yapu eena pia peayapuswatha painya neyabara jume cowuntsixae bapon. Barapon Nacom paca capanepa xua jopa painya neatenenexa xua abe painya neexanaexae xua poxonae daxita barapo nacue weraweracaena.

⁶ Daxota pajuntu coyene weiweiname, bara bequein saya cae dapaeyobetha paca ajuntucoyenerewe exana xua ichamonae abe painya nepacata exanaexae matowa. ⁷ Barapo painya nepaca caajuntucoyenerewe exanaewan piraichi pacata exana baxua xua pia yaputaetsi icha xaniwaicha bara metha pajume cowuntame Jesucristo. Po penainto pewan oro nainto, jiwi ba piraichi isototha tauta peyaputaenexa icha bara metha pepa oro nainto. Po pejume cowuntsiwa jiwi xeina bichocono daunwei beyacaincha oro nainto bequein ichamonae juntu coyene jujuta xua abe peexanaenexa. Barapo oro nainto weraweraca. Barapoxonae poxonae Jesucristo patopaetsica xua awiya beta painya nejume cowunta dubenanaebiyaexae daxota Nacom wuna paca jainchina. Matautano paca cana exanaena xua peainya cui jiwi pam. Matautano paca cana exanaena xua jiwi paca baru cui itura jinaena painya nejume cowuntsiwixae.

⁸ Paxam paantobem Jesucristo bara bequein jopa bapon pataem. Matautano anoxuae pajume cowuntame bequein jopa bapon anoxuae pataem. Paxam bichocono pajuntu coyene weiweiname. Bara bequein barapo pexeinya pejuntu coyene weiweinae coyenewa bayatha payabara paebame daichitha awiya pacata seica xua po jumetha beta payabara paebame barapo peajuntucoyeneswa. Daxota bichocono pajuntu coyene weiweiname tsipei pananta xeiname xua painya nexainaewa tsane pebaru cui itura

jinaewa Nacom pia nacuatheicha. ⁹ Painya nejume cowuntsixae Jesucristo, Nacom paca juntu coyene capanepaena xua jopa painya neatenenexa xua abe painya neexanaexae.

¹⁰ Caena bayatha pomonae Nacom pia peitorobi jume pepaebiwi yabara jejeitaponeiba nawita barapo pecapanenebiyae diwesi, xuano yabara yainyabeiba nawita. Barapomonae yabara paeba pecapanenebiyae diwesi, xua Nacom paca catsibina barapo diwesi pia paca necaantobexae. ¹¹ Nacom pia Pejumo pe tunaxu tatsi, po jumope Cristo weya pona, barapo jumope cueicueijei barapomonae pejuntu coyenewatha tatsi. Nacom pia Pejumo pe tunaxu tatsi cueicueijei barapomonaetha, jeye: “Payabara tinare xua bexa tsane Cristo, pon Nacom itorobina, atene tsane. Matautano bapon Cristo xeinaena pexeinya peitupanae coicha”, jei. Barapomonae nayainyaba, jeye: “¿Eta bichi tsane jiwitha poxona baxua exanaena? ¿Yawa eta poxona metha baxua exanaena?” najei barapomonae. ¹² Ichitha Nacom, barapomonae yabara yaputane exainchi xua po diwesi barapomonae xua Jesucristo yabara tsiwuna peabatsi apara jopa barapomonae nexa. Apara jame barapo diwesi paxam nexa. Po diwesi xua caena bayatha barapomonae yabara paeba barapo diwesi jupa po diwesi xua anoxuae ichamonae yabara paca tsipaeba. Barapo diwesi xua pecapanenebiyae diwesi barapomonae paca tsipaeba Nacom pia Pejumo pe tunaxu tatsi pia peayapusu itorobi coyenyatha tatsi po jumope itorobatsi itaboco wetsica. Barapomonae yabara paeba barapo pecapanenebiyae diwesi po diwesi matatsunpiwi bequein iru ichichipa yabara yaputane.

Meje yabara xua Nacom naca itoroba xua bewa xeinaetsi pepa pejuntu coyene xanepanaewa

¹³ Daxota pana najuntu coyene wunaere Nacom nexa xua pana najuntu coyene itorobare xua barompaya painya nenanta xeinaewatha. Ajuntu yapusuya payabara jume cowuntsiya eware pocotsiwa Nacom paca catsibina pia paca necaantobewaxae xua poxona Jesucristo patopaetsica. ¹⁴ Paexande icha pexui ichi xua ba exana pocotsiwa coxiyün itoroba. Jopa paichichipaeinde xua abe paexaname po coyenewa icha be paichim copiya xua abe paexaname poxona cataunxuae jopa payabara yaputaem Nacom. ¹⁵ Seicaya pajinompere pepa painya nejuntu coyene xanepanaewatha, tsipei Nacom pon paca waba bichocono pepa pejuntu coyene xanepanaein. ¹⁶ Baxua paexande poxoru Nacom Pejume Diwesitha jeye: “Paxam daxita bichocono pajuntu coyene xanepande, tsipei bichocono tajuntu coyene xanepanaein”, jei.

¹⁷ Nacom Waxa, pon jiwi peyabara paebin xua penatsicuentsiwa xua abe peexanaexae, barapon Nacom jopa nanta xeinaeyo xua ichun bichocono peainya cuin beyacaincha ichun. Icha paxam barapo Nacomtha pajam: “Axa”, pajam, xua pia painya nepaca yawenaenexa bapoxona pajunuware xua abe painya neexanaeyainwa Nacomtha. Matautano barapon Nacom bichocono paantobeinde daxita matabin poxona pajinompame po irathe. ¹⁸ Jesucristo paca capanepa painya abeya nejinompaewa weya. Poxona Jesucristo paca yantomata xua paca capanenebiya, jopa catsiyo po penainto pewun oro nainto. Matautano jopa catsiyo po penainto pewun plata nainto. Barapo naxobe penaintobe saya weraweraca. Barichino payaputaneme xua Jesucristo jopa paca capanepaeyo tsipei bara paichim xua paexaname icha painya amo susato jiwi ichi xua barapo abeya juntu coyenewatha jinompa. Baxua paca yawena aibi. ¹⁹ Saya meisa Cristo naca yantomata abe waexanae cuiru coyenein weya. Baxua apara xua poxona Jesucristo naca tsitupa naetotha, icha caena bayatha oveja ichichi xua poxona bexotsi xua tupa exanatsi xua Nacom peyabara junte mainaenexa jiwi abe pia peexanae cuiru coyenein tatsi. Barapo oveja pexeinya oveja xua jopa matauta xeinaeyo wanyo, icha Cristo ichi xua jopa xeinaeyo peabe coyenewa tsipei pejuntu coyene xanepanaein. ²⁰ Nacom itapeta xua Cristo itapetatsi petupaenexa tsane naetotha caena bayatha poxona cataunxuae jopa forotsiyo po cae pin nacue. Nacom paca tsita ituta bapon Cristo barapo petabu ducuae matabitha. ²¹ Cristo painya nepaca tsitupaexae naetotha xua abe painya neexanae cuiru coyenein daxota Nacom pajume cowuntame. Nacom equeicha Cristo asu exanatsi petupae cuiru coyene weya. Matautano Nacom pia nacuatheicha cana exana

bapontha xua xeina pepa peainya cui coyenewa. Daxota anoxuae pajume cowuntame Nacom. Matautano pajume cowuntsiya ewatame Nacomtha xua bexa Nacom paca catsina pocotsiwa xua bayatha yabara paca tsiwuna muxu duta.

²² Anoxuae pajume cowuntame Nacom pia pexainyei diwesi jume xua Nacom pia Pejumo pe tunaxu tatsi paca tsipaeba. Daxota paca itacupa xua pana najuntu coyene wuna exaname Nacomtha xua xaniwaicha painya neantobenexa ichamona pomona iru pejume cowuntsiwi Nacom. Daxota bewa bichocono nantiya pana naantobem daxita painya nejuntu coyene daunweyatha. ²³ Paxam icha juntu coyene paxeiname tsipei be pena jiwi pana naexaname, xua pajuntu coyene xanepaname. Jopa panaexanaem xua pocotsiwa peweraweracaewa werena. Anoxuae nama panaexaname pocotsiwa xua jopa peweraweracaewiyo werena. Ichitha pena jiwi pana naexaname painya nejume cowuntsixae Nacom Pejume Diwesi, po jume diwesi jopa weraweracaeyo, xua ataya tsitecapona. ²⁴ Nacom Pejume Diwesi jeye:

“Naepanaewa ba tsewa tsoponae

yawa pentono ba othopeica.

Ichha naepanaewa ichi jiwi ba barichi,

ba werapa.

Matautano pocotsiwa jiwi exana xua bequein

tsita ainya cuichi ichitha weraweracaena.

²⁵ Ichitha nama Nacom Pejume Diwesi ataya

ayapusu tsoponae”, jei Nacom Pejume Diwesitha.

Barapo diwesi apara pecapanenebiyae diwesi xua po diwesi paca tsipaebatsi.

2

¹ Daxota daxita pana nacui barapende daxita abe peexanae cuiru coyenein, yawano xua pemuxuitorobi coyenewan, yawano xua naerabiya peexanae coyenewan xua naemata wuna pepaebiwa, yawano xua peyabara uwi coyenewan xua ichun xeina, yawano xua abe peyabara paebiwa ichamonaetha xua ichun peyabara paewiatsi. ² Pexui ba poxi anoxuaetha naexana ba jeita mito pia apaetsi xua pewichibinexa peapaexae mito. Ichha pexui ichi, barapocotsi juta coyeneya paichinde. Saya u meisa Nacom Pejume Diwesi payorobare nawita xua painya nejume cowunta dubenanaebiyaenexa tsane, matautano xua painya nepaca capanenebiyaenexa tsane Nacom. ³ Ichha paita coxoneme Nacom, painya juntu coyenetha bara payaputaneme xua pon jiwi Pecanamataxeinaein bichocono bara pewunaein.

Meje yabara iboto, po iboto peainya cui iboto

⁴ Jesucristo pajume cocowuntaponde, pon jiwi Pecanamataxeinaeinchi, pon xua ataya tsitecaeya ajuntuyapusuya pepoponaein. Barapon Jesucristo yabara caunutatsi be pocotsi iboto xua copiya boca xua poxonae bomuxu exana. Ichha jiwi ichi xua barapo iboto xuba jiwi barichi Jesucristo pentatsi. Ichitha Nacom itapeta xua Jesucristo itapetatsi, tsipei bapon Jesucristo Nacom tsita ainya cuichi. ⁵ Poxona jiton ibo bo exana xua Nacom pin pia bo nexa, itapeta po iboton wuna. Bara jutiya ichi Nacom itapeta jiwi, xua pomona piamae tatsi cana exana pomona pejume cowuntsi jiwichixaetsi. Painya coutha pana najuntu coyene doure Nacomtha beta painya netanacuichinexa icha sacerdotemona ichi xua najuntu coyene douda Nacomtha poxona beta tanacuita. Poxona baxua paexaname bara baxua Nacom tsita xanepanatsi xua Jesucristo painya nejume cowuntsixae. ⁶ Nacom Pejume Diwesitha jeye:

“Pajume taema, itorobarecan Jesucristo

Si6n tomaratha tana nejume

cowuntsiwi taitorobarecan.

Bapon itapetan xua bichocono peainya

cuixae, icha iboto ichi, po iboto

babatanota bomuxu.

Pon Jesucristo jume cowuntatsi bapon jopa aura tsane xua bapon Jesucristo pejume cowuntsixaetsi”, jei Nacom Pejume Diwesitha.

⁷ Painya nejume cowuntsixae bapontha, daxota payaputaneme xua bapon bichocono asiwiya paantobem. Ichitha pomonae jopa bapon jume cowuntsichi barapomonae canacui yabara jume wetatsi be pocotsi coyeneya bayatha Nacom Pejume Diwesi paeba, xua Jesucristo yabara caunutatsi, jeye:

“Po iboto xua jiwi naitemata xua pomonae ibo bon peacabiwi, barapo iboto pecanamatawenonae ibotatsi naexana”, jei Nacom Pejume Diwesi, xua Jesucristo yabara caunutatsi.

⁸ Nacom Pejume Diwesitha equeicha jeye:

“Barapo ibotiyotha jiton taxu autabatsi.

Matautano barapo iboto, ichacuitha jiton xuirapopa exainchi”, jei Nacom Pejume Diwesi.

Jiton ba xuirapopa poxoru jopa taeyo barapo iboto. Po iboto Nacom yabara paeba barapo iboto Jesucristo yabara jutsiya canautapaebatsi. Jiwi jopa beta exanaeyo poxoru jopa jume cowuntsiyo xua Nacom Pejume diwesitha Jesucristo yabara paebatsi. Caena bayatha Nacom pewnaeya yabara cui yaputane xua barapomonae peexanaewa tsane baxua.

⁹ Paxam Nacom painya nepaca itapetsi jiwi pam. Paxam po sacerdotemonae pam xua pata nacuitame Nacom pon jiwi itorobiya pia pepa Peewatsinchi. Matautano paxam pomonae Nacom patsita juntu coyene xanepaname jopa painya tsita natsicuentisixae bapon. Matautano Nacom pia pepa piamonae tatsi pam. Nacom baxuan pacata exana pia painya yabara netacueicueijeinexa xua pia pexeinya petsita itubi coyenewan tatsi. Barapon Nacom paca waba abe painya neexanae cuiru coyenein weya. Paca waba pia painya yabara neyaputaenexa Nacom xua xeina pexeinya peitupanae coicha. ¹⁰ Copiya paxam jopa Nacom piamonae tatsi pam, ichitha anoxuae nama Nacom piamonae tatsi pam. Matautano copiyatha jiwi jopa paca yabara nantanuweya nanta xeinaeyo xua pia paca necayawenaewa tsane. Ichitha anoxuae Nacom paca yabara nantanuweya nanta xeina xua pia paca necayawenaewa tsane.

Meje yabara xua jiwi bewa beta jinompae xua Nacom petanacuita dubenanaebiyaenexatsi

¹¹ Tamonae pam, pomonae tapaca caantobe jiwichi pam. Paxam pomonae be penanapaincha jinompae wi pam xua icha nacua werena painya neponaewi. Daxota paca itorobatsi xua jopa painya neexanaewa tsane pocotsiwa abe pocotsiwa xua painya juntu coyenewatha ichichipa xua peexanaewa. Barapo abe peexanae cuiru coyenein paca juntu coyene itoroba bichocono xua painya neexanaenexa po coyenein abe peexanae cuiru coyenein. ¹² Beta pajinompare Nacom nexa xua peitutha tatsi pomonae Nacom jopa jume cowuntsichi. Icha barapomonae abe paca yabara paebichipa be pomonae abe painya neexanae jiwi pam tsipae bichocono daichitha barapomonae taena xua beta painya neexanaewa. Bapoxonae barapomonae Nacom wuna jaintinchi wuna painya neexanaexae xua po mataqueitha Nacom yabara paebina jiwi xua penatsicuentisiwa xua abe peexanaexae.

¹³ Painya nejume cowuntsixae pon jiwi pepa Pecanamataxeinaeinchi bara paexande pocotsiwa paca itoroba daxita pomonae pecanamataxeinaewi painya nacua. Matauta paexande pocotsiwa paca itoroba pon romanomonae itorobiya pepa peewatsinchi. Jame Nacom ichichipa xua waexanaewa baxua. ¹⁴ Paexande pocotsiwa paca itoroba pomonae nacuan peewatsiwi pomonae xua tanacuitatsi pon romanomonae itorobiya pepa peewatsinchi. Nacom itoroba barapomonaetha pomonae nacua peewatsiwi xua barapomonae cuainchina pomonaetha pomonae abe peexanaewi. Matautano Nacom

itoroba barapomonaetha xua wūnae jainchina pomonaetha pomonae beta peexanaewi. ¹⁵ Nacom ichichipa xua beta painya neexanaewa tsane pomonaetha pomonae xua jopa Nacom yabara yaputaetsi xua barapomonae pemoyanexa xua jopa abe painya nepaca yabara paebinexa.

¹⁶ Pajinompare, icha be ichi pomonae jopa nantawenonaeyo xua ichamonae amanaya petanacuichiwatsi. Ichitha jopa abe paexanaeinde xua poxoru saya painya nejinompaexae. Beta pajinompare, icha be ichi pomonae Nacom amanaya tanacuita dubenanaebiyatsi. ¹⁷ Beta payabara nanta xeinare daxita jiwi. Matautano paantobeinde ichamonae pomonae irū pejume cowūntsiwi Jesucristo. Nacom pacunuware xua abe painya nepaca exanaeyainwa, xua abe painya neexanaexae. Pabarū cui itura jinareno pon romanomonae itorobiya pepa peewatsinchi.

Meje yabara po coyene xua Cristo atene peexanaewatsi

¹⁸ Paxam pomonae amanaya painya netanacuichi jiwi pam ichamonae barapomonae pam paca tsipaebatsi. Bewa pajume barū cui jejam tsaibim tsane pomonae xua paca itorobeiba pomonae painya nepaca canamataxeinaewi. Baxua paexande poxonae bequein ichamonae wūnae peexaneibiwi, matautano xua poxonae ichamonae bequein abe peexaneibiwi poxonae paca itoroba. ¹⁹ Baxua Nacom tsita wūnaetsi xua pabarū cui itura jiname barapomonae pomonae painya nepaca canamataxeinaewi xua poxonae bequein paca cuainta barapomonae xua xaniwaicha painya neexanaexae painya nejume cowūntsixae Nacom. ²⁰ Icha abe paexaname xua daxota paca cuainta, baxua Nacom jopa tsita coyene xanepanaetsi xua bequein saya beitatemaya moya paumename poxonae paca cuainta. Ichitha icha jame paca cuainta xua wūnae painya neexanaexae xuano xua icha beitatemaya moya paumename baxuan jame Nacom tsita coyene xanepanatsi. ²¹ Xua ichamonae atene painya nepaca caexanaexae daxota Nacom itapeta paca waba. Ichamonae Jesucristo atene exainchi waxainchi nexa. Jesucristo cana caunutsiya exanatsi xua waxainchi bewa exanaetsi icha bapon ichi xua pocotsiwa exana. ²² Bapon Jesucristo bapana jopa abe exanae. Matautano bapana jopa muxuitorobi ichamonaetha. ²³ Poxonae ichamonae Jesucristo biatainchi jopa xuya jume barabotsiyo Jesucristo. Poxonae Jesucristo bātsi, jopa Jesucristo jeyo, “Aunxuae xuya paca cuaintinchi”, jopa jeyo. Ichitha Jesucristo jume cowūnta Nacom xua pocotsiwa poxonae Nacom exanaena barapomonaetha pocotsiwa xua be Jesucristo peyantomatsiwatsi. Tsipei Nacom xaniwaicha beta yabara paeba jiwi, xua penatsicuentsiwa xua abe peexanaexae. ²⁴ Cristo pia pepontha yawa muxuna tūpa abe waexanae cuiru coyenein poxonae tūpa naetotha. Poxonae bapon Jesucristo nacata exana barapo coyene, waxainchi abe waexanae cuiru coyenein weya panenebiyatsi xua jopa equeicha waexanaewa tsane abe waexanae cuiru coyenein, yawano xua beta jūntū coyene xanepanaya jinompaeinchi Nacomtha. Daxota Cristo wan exanatsi xua equeicha jopa abe painya neexanaenexa tsane. ²⁵ Ichacuitha oveja itaxanuncuatsi, pipato pepoponaexae jopa penantauntsixae pon peanaein ovejan. Icha oveja ichi paxam bara pocotsi jūta coyeneya paichim. Copiya jopa xanepanaya painompaem, jopa painya nenantauntsixae Jesucristo. Ichitha anoxuae xanepanaya pajinompame, tsipei anoxuae Jesucristo panantaūtame pon paca yawena. Bapon nepaca eenaein, icha be ichi pon oveja peanaein. Yawano bapon Cristo paca jūntū coyene canamataxeina.

3

Meje yabara xua po coyeneya bewa jinompae pomonae jitha peenaewi

¹ Paxam powaxi jitha painya neenaewaxi pam, paexande pocotsiwa painya seuriwi paca itoroba. Painya pebiwi ichacuitha jopa jume cowūntsiyo Nacom. Painya neexanaexae pocotsiwa painya seuriwi paca itoroba barapo painya seuriwi jume cowūntsiyo Nacom painya nepaca cui taexae bara bequein Jesucristo jopa payabara paebim. ² Barapo painya seuriwi paca taena xua Nacom paantobem. Yawano xua paca taena xua jūntū coyene xanepanaya painompaem. ³ Jopa metha meisa painya pepon pexeinyowa pana

naexanaemtsipaem, xua daxota jiwi painya nepaca yabara paebeibiwa, xua pexeinyowaxi pam. Jopa matowa pana mata cachetsinde xua bichocono pexeinyowa pana naexaname. Jopa pana napepenaeinde po penaintotha pewan oro nainto. Matautano jopa pana nama xatabinde po paparuwan bichocono ainya matoman xua bichocono pexeinyowaxi pana naexaname. ⁴ Icha pexeinyowaxi ichichipa pana naexaname moya maisa pana najuntũ coyene wunae exande. Barapo pexeinyowa coyenewa bũpana xeina jiwi pejuntũ coyenewatha. Barapo pexeinyowa coyenewa jopa itacũpaetsi xua peweraweracaewa. Painya pexeinyowa coyenewa bewa payabara ita ururanaya pajinompam, yawano jũntema pajinompam. Baxuan jame bichocono tsita coyene xanepanatsi Nacom. ⁵ Barapo pexeinyowa coyenewa caena bayatha xeina po yabũxi xua bichocono pepa pejuntũ coyene xanepanaewaxi. Barapo yabũxi jume cowũntsiya ewata Nacomtha, xua Nacom exanaena pocotsiwa yabara tsiwunae muxu duta. Matautano barapo yabũxi exana pocotsiwa piseuriwi itorobatsi. ⁶ Petsiriwa powa pewan Sara bara jũtiya ichiya exana. Barapowa exaneiba pocotsiwa piseuri itorobeibatsi pon pewan Abraham. Barapowa piseuritha jeye: “Tanecanamataxeinaem”, jei bapowa. Paxam bara paichim tsane icha barapowa Sara ichi icha beta paexanaename, yawano xua jopa pajunuwim, bequein painya seurixi jopa xanepanaya paca itorobeibiyo.

⁷ Barichi pam pebiwi pam, po pebiwi painya seuriwi painya nexeinea jiwi pam. Beta payabara cui yaputaema painya seuriwi. Yawano painya seuriwi pabarũ cui itura jinare tsipei yabũxi jopa acuicoyenesũyo icha jopa be pebiwi ichiyo. Pananta xeinare xua pebin piseuribe xeinabe po peajũntũyapusũwa jopa bapana weraweracae, po peajũntũyapusũwa Nacom cata piamonaetha pomonae pia peantobewixaetsi. Baxua paexande painya seuriwitha xua wunae painya neexanaewa xua Nacom bara beta painya nepaca jume taenexa poxonae pawũcame.

Meje yabara xua jiwi atene pomonae xua beta peexanaewixae

⁸ Matapainya paca tsipaebatsi nantiya beta jinompa pana naexande. Yawano nantiya beta pana nayabara nanta xeinare xua painya nenayawenaexaem tsane. Nantiya pana naantobeinde painya nejume cowũntsixae Nacom, icha be ichi poxonae barompaya painya eweicho jiwi nantiya pana naantobem. Pomonae jiwi peyawenae jiwi pana naexande xua painya neantobexae barapo jiwi. Matautano jopa bichocono painya coutha pana nayabara nanta xeinaeinde. Jame maisa ichamonae itapeta bichocono payabara nanta xeinare. ⁹ Poxonae ichamonae abe pacata exana xuya jopa paexanaeinde. Yawano poxonae ichamonae paca biatane jopa xuya pabiataeinde. Seicaya nama paexande. Jame Nacomtha patawũcare barapomonae xua Nacom pecana exanaenexa xua barapomonae pejuntũ coyene weiweinaenexa. Daxota Nacom paca waba xua xuya pacata exana tsipei barapomonae beta pacana exaname. ¹⁰ Tsipei Nacom Pejume Diwesitha jeye:

“Pon xua antobe xua po coyene cataunxuae
pepoponaewa, xuano xua daxita matabi
jũntũ coyene weiweina poneiba, bapon bewa
peebatotha jopa paebi tsane peabe jumeyo.
Matautano peopiratotha jopa bewa paebi tsane
xua ichamonae naerabiya peyabara paebiwatsi.

¹¹ Bewa taju beya paponam xua peabe
coyewan weya.

Yawano saya bewa beta paexanaem.
Itapeta paexande pocotsiwa xua jiwi
jũntema jinompa exainchi.

Bara ajũntũyapusũya paexanaponde baxua.

¹² Tsipei Nacom, pon jiwi Pecanamataxeinaein,
yawena pomonaetha pomonae pejuntũ
coyene xanepanaewi.

Yawano Nacom jume tane xua pewæcaewatsi. Ichitha Nacom jopa yawenaeyo pomonae abe peexanaewi”, jei Nacom Pejume Diwesitha.

¹³ Dapon aibi pon itacupatsi xua abe pacata exana icha saya paexaneibame pocotsiwa xua wuna. ¹⁴ Bequein icha ichamonae pacata abe exanaena juntu coyene xanepanaya painya nejinompaexae, daichitha Nacom paca cana exana xua pajuntu coyene weiweinyaya jinompame. Jopa ichamonae pacunuwinde, yawano jopa pacuitaya juntu deideijande. ¹⁵ Jame maisa Cristo bichocono payabara nanta xeinare painya juntu coyenetha xua bapon bichocono ainya cui. Pajande: “Pon jiwi Necanamataxeinaem”, pajande. Pana najuntu coyene wunaeteibare xua painya nejume noteibinexa pomonae paca yainyabiya jeye: “¿Eta pocotsiwa pajume cowuntsiya ewatame xua Jesucristo bexa paca capanepaena?” paca jei. ¹⁶ Ichitha saya ita ururaquiya pajume noteibare, jopa paaebeibinde. Yawano pajunuware Nacomtha xua abe painya nepaca exanaeyainwa Nacom, abe painya neexanaexae. Pajinompame xua painya juntu coyenewa paca tsipaeba xua wuna bara paexaname. Bapoxonae icha ichamonae abe paca yabara paeba, barapomonae aura tsane xanepanaya painya nejume cowuntsiya jinompaexae Cristo.

¹⁷ Icha Nacom ichichipa xua ichamonae atene paca exana, beta painya neexanaexae, baxua jame wuna, beyacaincha xua poxonae atene paca exana poxoru abe paexaname. ¹⁸ Tsipei Cristo atene exanatsi poxonae tsitupa abe waexanae cui ru coyenein daxita xua poxonae cae coyenetha tupa. Cristo bapana jopa abe exanae. Ichitha bapon Cristo naca tsitupa pomonae abe waexanae jiwichi. Baxua Cristo nacata exana, xua wanaca exanaenexa xua wapatsiwa tsane Nacom beicha. Bapon Cristo bequein tupa pepon ichitha equeicha asu exanatsi pia pejumope tunaxu tatsi. ¹⁹ Bapoxonae Jesucristo pia pejumope tunaxu tatsi pona ichaxota jiwi pia pejumopein tatsi be cubathopeibatsi pomonae xua caena bayatha werapa. Barapon Jesucristo pia jumope tunaxu tatsi yabara cueicueije barapo jumopeintha xua Nacom pia pecapanenebiyae diwesi tatsi. ²⁰ Caena bayatha barapomonae jopa jume cowuntsiyo Nacom poxonae po mataqueitha Noé popona po irathe. Nacom beitatemaya ewateiba barapomonae, ainya dapaein xua pejume cowuntsinexatsi poxonae xua cataunxuae Noé cobe naemata xua pin jera nae exana. Ichitha saya ocho poyobe jiwi panenebiya poxonae bichocono awubo xua butuxuba po cae pin nacie. ²¹ Barapo awubo caunuta xua be naca bautisaba. Poxonae naca bautisaba apara jopa wanaca peru iquicaenexa tsane xua tsoreichi, apara jame daxota naca bautisaba Nacom, wanaca capanepaexae abe waexanae cui ru coyenein weya. Yawano Nacom wucatsi xua wanaca juntu coyene xanepana exanaewa tsane. Bapoxonae wajuntu coyene naca tsipaeba xua bara beta exanatsi. Waxainchi naca itacupa xua wanaca bautisabiwa tsipei Jesucristo equeicha asu exanatsi petupae cui ru coyene weya. ²² Jesucristo peitaboco beicha pona. Bapon Jesucristo eca Nacomtha, xua Nacom pia pecoxa weya tatsi. Matatsunpiwi, iruru pomonae itoroba itabocotha barapomonae exana pocotsiwa Jesucristo itoroba.

4

Meje yabara xua jiwi bewa beta tanacuichi Nacom icha be po coyeneya Nacom cata jiwi barompaya pia peexanae coyenewan tatsi

¹ Yaitama copiya Cristo atene exanatsi ichamonae, waxainchi daxota bewa nanta xainaetsi xua iru naca atene exanaena ichamonae. Pon atene exanatsi ichamonae bapon abe pia peexanae cui ru coyenein wepu pona xua bichocono pejume cowuntsixae Jesucristo. ² Paxam jopa bewa paexanaem pocotsiwa xua paichichipame xua abe painya neexanaewa poxonae cataunxuae pajinompame. Ichitha cataunxuae paexanaponde pocotsiwa Nacom ichichipa poxonae cataunxuae pajinompame barapo cae pin nacuathe. ³ Caena bayatha paexaname pocotsiwa xua ichamonae exana pomonae jopa yaputaeyo Nacom. Barapomonae abe exaneiba xua nasi cui exana icha yabuxitha xua jopa piseuriwi. Yawano exaneiba xua pocotsiwa abe yabara nanta xaina pejuntu coyeneintha.

Yawano nacupa exaneiba peatsaxae meran. Yawano pin penabanaewan exaneiba po penabanaewantha jiwi weiweinaya abe exana xua napenajuba yawa bichocono cupatsi. Yawano ibo nacomun wnae jainteibatsi. ⁴ Pomonae jopa yaputaeyo Nacom, barapomonae paca cui yabara nanta xeina, jeye: “¿Eta xua metha jopa naca baru exanaeyo xua waxainchi abe exanatsi?” najei barapomonae. Barapomonae paca cui capana yawa daxota abe paca yabara paeba. ⁵ Payabara nanta xeinare pomonae abe exana. Barapomonae bewa yabara caununaya jume notsina Nacomtha pocotsiwa xua abe exana. Nacom yabara paebina pomonaetha pomonae xua cataunxuae jinompa yawa pomonaetha pomonae bayatha werapa xua penatsicuentisiwa xua abe peexanaexae. ⁶ Daxota Nacom Pejume Diwesi bayatha cueicueijeji pomonaetha pomonae bequein bayatha werapa xua barapo pewerapae jiwi pejumope tunaxun pejinompaenexa tsane icha Nacom ichi xua popona. Bayatha Nacom yabara paeba barapomonae xua penatsicuentisiwa xua abe peexanaexae barapo cae pin nacuathe xua daxota pia pepon tatsi werapa icha daxita jiwi ichouneibi.

⁷ Bara nama imoxoyo po dapaetha poxonae Nacom daxita weraweraca exanaena barapo cae pin nacue. Daxota painya coutha pana najuntu coyene itorobare xua xanepanaya paexaname Nacomtha beta painya wnaenexa tsane. ⁸ Pocotsiwa xua ainya cui xua jame bewa bichocono nantiya pana naantobeinde. Poxonae ichun paantobem, pajuntemainame poxonae bequein xua bapon abe pacata exana. ⁹ Paxam nantiya pana nantenta weyataeya wabeibare painya boxitha xua painya nenaapateibinexa tsane, xua jopa pana naita aenae-aenande. ¹⁰ Daxita barompaya paxam Nacom paca cana exana xua painya nexainaewa barompaya painya neexanae coyenewan. Paxam nantiya pana nayawende barapo cui coyenetha, bapoxonae paxam pomonae beta painya neexanae jiwi pam tsane pocotsi coyenewatha xua Nacom paca cana exana. ¹¹ Icha ichun cueicueijeji, bu bara cueicueijeji pocotsiwa Nacom cueicueijeji exana bapon. Icha pebin yawena xua ichun yawenatsi bu bara barapo pebin yawena ichuntha po peayapusuwatha xua Nacom cata. Daxita pocotsiwan xua paexaname bara beta paexande xua jiwi wnae pejainchinexa Nacom xua beta painya neexanaexae xua Jesucristo peyabaraxae. Bu bara Jesucristo ataya xeinaena peainya cui coyenewa, yawano xeinaena xua peayapusu itorobi coyenewa. Je bara ichi tsane.

Meje yabara po coyeneya xua bewa exanaetsi wajume cowuntsixae Cristo xua poxonae bequein ichamonae atene naca exana

¹² Tamonae pam painya tapaca caantobetsi jiwichi pam iru painya nejume cowuntsixae Jesucristo. Jopa yabara pana nabenaecaeinde poxonae bichocono atene paca cana exana ichamonae painya nejume cowuntsixae Jesucristo. Jopa pananta xeinaeinde xua baxua pocotsiwa jopa bewa pacata exanae tsane. ¹³ Jame seicaya pajuntu coyene weiweinare xua painya nepaca itacupaewa xua ichamonae atene paca exana icha Cristo ichichi xua atene exanatsi. Yawano bexa pajuntu coyene weiweinaename poxonae Jesucristo yawa patopaetsica pia peainya cui coyenewa. ¹⁴ Icha ichamonae paca muxucona painya nejume cowuntsixae Cristo saya pajuntu coyene weiweinare, tsipei Nacom pia Pejumo pe jumope tunaxu tatsi, po jumope pexeinya peitupanae coicha yawa popona, barapo pejumope paca yawa popona. ¹⁵ Jopa bewa paexanaem tsane xua ichamonae pajutebame xua daxota ichamonae paca atene exana. Matautano jopa bewa paexanaem tsane xua ichamonae piawan tatsi pacaibame xua daxota ichamonae paca atene exana. Matautano jopa bewa paexanaem tsane xua ichamonae pajuntu coyene anaepana exaname xua daxota ichamonae paca atene exana. Matautano jopa bewa paexanaem tsane xua ichun pajuntu coyene itorobame xua abe peexanaewa tsane xua daxota ichamonae atene paca exana. ¹⁶ Icha ichun atene exanatsi ichamonae, pejume cowuntsixae Jesucristo jopa bewa bapon aura tsane. Ichitha jame bapon bewa wnae jainchina Nacom tsipei atene exanatsi pejume cowuntsixae Jesucristo.

¹⁷ Po matabitha aena Nacom tamropata pitaba xua Nacom yabara paebina daxita jiwi xua penatsicuentisiwa xua abe peexanaexae, apara barapo matabi bayatha

patopa. Barapo matacabitha Jesucristo piamonae tatsi umenaena Nacom peitabaratha xua Nacom peyabara paebinexa tsane xua penatsicuentsiwa xua barapomonae abe peexanaexae. Yaitama Nacom baxua nacata exana nama yatsicaya jopa Nacom juniya exanaeyo pomonaetha pomonae jopa pejume cowuntsiwi Nacom pia pecapanenebiyae diwesi tatsi. ¹⁸ Daunwei nawita pon capanepatsi abe pia peexanae cuiru coyenein weya pon wuna peexanaein. Ichitha nama bichocono tadaunweichi xua pon capanepatsi abe pia peexanae cuiru coyene weya pon bichocono abe peexanaein. ¹⁹ Poxonae ichamonae paca atene exana, bara awiya beta paexande icha bara baraxua xua pocotsiwa Nacom cuita jichipa. Bewa pajume baru jejam tsane Nacom xua paexaname bara bequein paayapube taetham. Nacom paca necaforotsixae yawa peexanaexae xua pocotsiwa yabara paca tsiwuna muxu dubeiba xua exana paebeiba, daxota Nacom pia coya canamataxeina painya juntu coyene.

5

Meje yabara xua Pedro muxuweta pomonaetha pomonae pejume cowuntsi jiwi

¹ Ichichipan xua tamuxu wetsiwa penapatae jiwi pomonae paxam jiwana pam pomonae painya nejume cowuntsi jiwi pam. Xan iru bichocono penapataein icha barapomonae ichi. Xan natan poxonae Cristo naetotha tparucua exanatsi. Xan iru yawa xeinaein po peainya cui coyenewa Cristo xeina poxonae patopaetsica. ² Beta paenare pomonaetha xua Nacom paca cana exana xua pamatacaponame, icha pon oveja peyapu eenaein ichi xua beta yapu eena ovejamonae. Jopa meisa baxua paexanaeinde xua poxoru Nacom pia paca necaitorobixae. Jame maisa baxua paexande xua poxoru painya coutha painya neichichipaexae. Baxua jame Nacom ichichipa. Matautano jopa baxua paexanaeinde xua poxoru paratixi painya neichichipaexae, ichitha poxoru Nacom painya neantobexae bichocono. ³ Jopa atsaquiya pamatacaponaeinde pomonae xua pamatacaponame. Jame saya maisa beta pamatacaponde xua painya necacui taenexa xua bara juta ichiya peexanaenexa. ⁴ Nexata poxonae patopaetsica pon jiwi itorobiya pepa Peewatsin, bapon Jesucristo paca catsina po pematomatsiwa peainya cui coyenewa, po peainya cui coyenewa xua bapana jopa weraweracaeyo.

⁵ Barichi pomonae pewowi jiwi pam, bewa paexanaem pocotsiwa xua penapatae jiwi paca itoroba. Daxita paxam bewa nantiya pana naantobem, yawa bewa nantiya pana nayabara ita ururanaya jinompaem. Baxua paexande tsipei Nacom Pejume Diwesitha jeye:

“Nacom aichaxaibi pomonae peabiwi ichamonaetha.

Ichitha Nacom yawena xua peantobexae pomonae baru ita ururanaya jina ichamonaetha”, jei.

⁶ Daxota papende po coyene xua paaebame ichamonaetha. Paexande pocotsiwa xua Nacom pecobetha paca ita cowai pia peayapusu itorobiwatha xua Nacom ainya cui paca necaexanaenexa tsane poxonae Jesucristo equeicha patopaetsica. ⁷ Bara pacopare xua Nacom bara daxita paca wepichina daxitan po coyenein xua juntu coyene natsepa paca cana exana tsipei Nacom paca yabara nanta xeina nawita xua painya nepaca cayawenaewa tsane.

⁸ Painya coutha pana najuntu coyene itorobare xua beta pajinompare. Tsaca pajinompare poxoru caurimonae pia pentacaponaein tatsi ichichipa paca abe exana. Bapon pacata exana icha neuthu ichi xua ba piyain fiba poxonae jeita ducuaeta pon ichichipa bexaena. ⁹ Dota pam panaitemare bapon xua beta painya nejume cowuntsiwatha. Pananta xeinare xua daxita nacuanpiwi jiwana pomonae pejume cowuntsiwi Jesucristo barapomonae atene exanatsi icha paca ichi. ¹⁰ Ichitha bexa tsane xua caeto poxonae paca atene exanaena ichamonaetha, bapoxonae Nacom paca juntu coyene xanepana exanaena. Yawano Nacom paca exanaena xua beta painya nejume cowuntsiwa tsane. Yawano paca exanaenano xua bichocono painya neajuntucoyenesuwam tsane. Barapon Nacom painya nepaca antobexae paca waba pia paca catichi po peainya cui coyenewa xua ataya

tsiteca xua Jesucristo xeina. ¹¹ B̄ bara Jesucristo ataya xeinaena peainya cui coyenewa, yawano xua peayapus̄ itorobi coyenewa. Je bara ichi tsane.

Meje yabara poxonaē Pedro najume wetsiya paeba

¹² Pon pew̄n Silvano, pon be tayapin tatsicotaein ir̄r̄ pejume cow̄ntsixae Jesucristo, bapon cobe itoroban xua inta tina barapo peya cartiyo xua bapoxonaē tapacata itorobinexatsi xua tapaca muxuwetsinexatsi. Barapo cartatha paca j̄nt̄ coyene tsacaba exanatsi xua Nacom xaniwaicha painya nepaca cayawenaewa tsane painya nepaca caantobexae. Daxota baxua awiya pajume cow̄ntsiya jinompare.

¹³ Pomonaē Babilonia tomaratha jinompa pomonaē Nacom pejume cow̄ntsiwichi, barapomonaē paca jacobae. Barapomonaē pomonaē Babilonia tomarapiwi Nacom itapeta icha paca ichi xua paca itapeta. Ir̄ Marcos paca jacobae be pon taxanto tatsicotaein tsipei yawenan xua pejume cow̄ntsiwa Jesucristo. ¹⁴ Paxam nantiya pana najacobare painya nenaantobexae.

Paxam pomonaē Cristo piamonaē tatsi pam barapomonaē pam bara Nacom j̄ntema jinompa paca exana. Je bara ichi tsane.

Baja Pedro.

Meje Po Carte Cotacaya Pedro Tatina, Pomonae Jesucristo Pejume Cowantsiwi Tatinatsi

*Meje yabara poxonae Pedro tamropata pitaba xua tatina pomonaetha pomonae Jesucristo
pejume cowantsiwichi*

¹ Xan, Simón Pedro, pon Jesucristo amanaya tanacuitan. Xan ponxaein Jesucristo pia peitorobi jiwi jiwana tatsin. Pacata tinatsi barapo carte painya nexainaexae xua pejume cowantsiwa Jesucristo xua bichocono wnae icha paxan paichin. Barapo pejume cowantsi coyenewa Nacom werena pichapa, pon bichocono pejuntū coyene xanepanaewa pexeinaein. Yawano barapo pejume cowantsi coyenewa Jesucristo werena pichapa pon irū bichocono pejuntū coyene xanepanaewa pexeinaein. Bapon jiwi Papanenebiyaein abe pia peexanae cuiru coyenein weya. ² Barabū Nacom paca yawenaena pia paca necaantobexae. Yawano barabū Nacom paca catsina jūntema pejinompae coyenewa. Barabū barapo naxobe coyenewabe bichocono paxeinaponaename xua poxonae payabara yaputaeponaename Nacom xuano xua payabara yaputaeponaename Jesucristo pon Wanacanamataxeinaein.

Meje yabara pocotsi coyenewano bewa exanaena Cristo piamonae tatsi

³ Nacom naca cata daxita pocotsiwa nantawenonatsi xua jūntema wajinompawanaxa yawa xua xanepanaya wajinompawanaxa Nacom nexa. Daxita baxuan Nacom naca cata pia peayapusū itorobi coyenewatha. Poxonae yabara yaputaeponaeinchi Nacom, nacuidubatsi xua bapon naca waba xua irū waxeinaenexa peainya cui coyenewa, xuano xua irū waxeinaenexa Nacom pia pexeinya peexanae coyenewa. ⁴ Poxonae Nacom naca cata pia peainya cui coyenewa, yawano pia pexeinya peexanae coyenewa bapoxonae nama naca cata pia peyabara naca tsiwūnae muxu dutsiwan. Nacom pia peyabara naca tsiwūnae muxu dutsiwan bichocono ainya cui xua jiwi jopa itacūpaetsi xua pecomotsiwa. Barapo peyabara naca tsiwūnae muxu dutsiwan painya necacatsixae anoxuae paxeiname xua Nacom pia peajūntūyapusūwa xua jopa weraweracaeyo. Yawano barapo peyabara naca tsiwūnae muxu dutsiwan painya nexainaexae paca itacūpa xua papanenebiyam abe painya neexanae cuiru coyenewa weya xua barapo cae pin nacuathepiwi po coyene ichichipa abe exana. ⁵⁻⁷ Bequein pajume cowantame ichitha panantawenoname xua muxuna paexaname xua beta painya nejinompae coyenewan. Poxonae beta pajinompame, bapoxonae panantawenoname xua muxuna paexaname xua Nacom payabara yaputaneme. Poxonae Nacom payabara yaputaneme, bapoxonae panantawenoname xua muxuna paexaname xua painya coutha pana nenajūntū coyene itorobiwam. Poxonae painya coutha pana najūntū coyene itorobame, bapoxonae panantawenoname xua muxuna paexaname xua jūntema pajinompame bequein ichamonae abe pacata exana. Poxonae jūntema pajinompame xua bequein ichamonae abe pacata exana, bapoxonae panantawenoname xua muxuna paexaname xua paantobeya jinompame Nacom. Poxonae paantobeya jinompame Nacom bapoxonae panantawenoname xua muxuna paexaname xua paantobem pomonae pejume cowantsiwi Jesucristo. Poxonae paantobem pomonae pejume cowantsiwi Jesucristo, bapoxonae panantawenoname xua muxuna paexaname xua paantobem daxita jiwi.

⁸ Icha paxeiname daxita barapo coyenewan yawa xua paexanaponaename daxita baxuan bapoxonae beta painya neexanae jiwi pam tsane Nacom nexa. Yawano beta payabara yaputaneme Jesucristo pon Wanacanamataxeinaein. ⁹ Ichitha icha pebin jopa yabara exanaeyo barapo coyenein, bapon be pon naita tsaqueta poxoru jopa ichipaeyo xua peyabara yaputaewa barapo coyene. Daxota bapon jūntemainā xua bayatha wejūntemainā exanatsi abe pia peexanae cuiru coyenewan tatsi xua Nacom wejūntemainā exana. ¹⁰ Tamonae pam paxam pomonae be tayapin jiwi tapaca canatsicotae jiwichi pam

iruru painya nejume cowuntsixae Jesucristo. Daxota paca tsipaebatsi xua xaniwaicha pana naexande xua daxota patsita itutsiname xua paxam pomonae Nacom pia pewabiwi tatsi jiwana pam. Yawano paxam pomonae Nacom pia peitapetsiwi tatsi jiwana pam. Poxonae baxuan paexanaponaename jopa equeicha abe paexanaem tsane po coyene xua daxota paitawetame Nacom. ¹¹ Bapoxonae Nacom bara paca matenta weiweinaya copata xua painya nepatsinexa tsane Nacom pia peitorobi nacua beicha tatsi. Nacom pia peitorobi nacua ataya ayapusu tsoponae ichaxota Jesucristo jiwi itorobiya ewatatsi, pon Wanacanamataxeinaein, xua pon Pecapanenebiyaein jiwi.

¹² Bequein baxua bayatha payaputaneme, ichitha equeicha paca tsipaebatsi xua jopa painya junteinaenexa. Anoxuae paxam ajuntuyapusu pajume cowuntame pexainyei jume Jesucristo yabara. ¹³ Poxonae cataunxuae poponan yabara nanta xeinan xua ainya cui xua baxuan yabara tapata catsipaebiwa tsainchi. ¹⁴ Yaputan tsipei Jesucristo, pon Wanacanamataxeinaein, netsipaeba xua bara nama imoxoyo tupaen. ¹⁵ Daxota xaniwaicha pacata tinatsi xua baxuan jopa yabara painya nejunteinaewa tsane poxonae tupaen. Bapoxonae bexa tsane pana necui yabara jantanainaname pocotsiwan yabara paca tsiwanae muxu dutatsi.

Meje yabara xua pomonae tane Cristo pia peainya cui coyenewa tatsi

¹⁶ Poxonae paxan paca tsipaebatsi Jesucristo pia peayapusu itorobi coyenewatha yawano xua pepatopeicaewa yabara pon Wanacanamataxeinaein, apra jopa paca tsipaebichi po diwesi pejema diwesi po diwesi xua saya jiwi paeba. Bara pana natan Jesucristo pia pexeinya peitupanae coicha tatsi pon jiwi Pecanamataxeinaein. ¹⁷ Pana natan poxonae Jesucristo ainya cui exanatsi xua Nacom Pexanto ainya cui exana, pon Jesucristo Paxa tatsi. Yawa pana natan xua Nacom Pexanto cata pexeinya peitupanae coicha. Bapoxonae Nacom pejume pajume tan pexeinya peayapusu jume, jeye: “Bapon apra Taxanto, pon bichocono antobein, pon itapetan. Bapon bichocono nejuntu coyene weiweina exana”, jei Nacom. ¹⁸ Paxan baxua pajume tan xua Nacom cueicueijei peitaboco wetsica poxonae Jesucristo pon jiwi Pecanamataxeinaein demxuwatha pana nebaru pona po demxuwa ichaxota Nacom cueicueijei itaboco wetsica.

¹⁹ Daxita baxuan naca yawena po diwesi xua Nacom pia peitorobi jume pepaebiwi tina xua barapo diwesi pexainyei jume diwesi. Pajume naitaeware pocotsiwan xua barapomonae paeba, beya poxonae yatsicaewa payaputaename pocotsiwa barapomonae paeba. Barapo pejumein jume xanepana. Bichocono naca yawena icha pecoicha ichi xua pentha exana poxonae quirei xua ba naca yawena. Barapo pecoicha waxainchi jopa nantawenonaetsi poxonae jarawato ecoina xuano poxonae matacabi pentha tsina. Barichi poxonae Jesucristo patopaetsica jopa cana matawenonae tsainchi barapo diwesi tsipei bayatha patopeicaena Jesucristo. ²⁰ Matha copiya bewa payaputaem xua meje: Nacom pia peitorobi jume diwesi dapo jumein aibi pocotsiwa pia coya ichichipa paeba barapo Nacom pia peitorobi jume pepaebiwi. ²¹ Tsipei Nacom pia peitorobi jume pepaebiwi jopa cueicueijeyo pocotsiwa ichichipa pia coutha paeba xua poxonae tina Nacom Pejume Diwesi. Ichitha barapomonae tatina pocotsiwa Nacom ichichipa, xua Nacom pia Pejumope tunaxu tatsi peitorobixae.

2

Meje yabara xua pomonae naerabiya pecuidubi jiwi

¹ Caena bayatha israelmonae jiwana jinompa pomonae naerabiya peitorobi jume diwesi pepaebiwi. Barichi painya xantha patsina pomonae naerabiya pecuidubi jiwi. Barapomonae cuidubina po diwesi xua paca weraweraca exanaena. Barapomonae nameicha nacuita xua naerabiya paca cuiduba. Pon jiwi pia Pecanamataxeinaeinchi pon Jesucristo, barapomonae itawetsinchi xua Jesucristo itawetsina, pon xua bayatha barapomonae tsitupatsi. Nacom nainya weraweraca exanaena barapomonae, abe peexanaexae. ² Pin bicheitomonae exanaena xua abe exana pocotsiwa xua barapomonae cuiduba pomonae naerabiya pecuidubi jiwi. Barapomonae pomonae naerabiya

pecuidubi jiwi naerabiya pecuidubixae tsane pin bicheito abe yabara paebiya exanaena pocotsiwa Nacom pia pexainyei jume diwesi tatsi. ³ Barapomonaē paca muxuitorobina nawita, yawano paca itorobina xua painyamonae amanaya paitorobiname pedoutsinexa paratixi barapomonaetha pomonaē naerabiya pecuidubi jiwi. Ichitha caena bayatha Nacom yabara paeba barapomonaē, jeye: “Barapomonaē bichocono abe peexanaē jiwi, daxota bewa werapaena tsipei bichocono abe peexanaēxae”, jei Nacom.

⁴ Nacom bayatha jopa yabara jūntemainaeyo po peabe coyenewan matatsunpiwi exana. Ichitha Nacom bebai ichaxota be pucua xua isoto xua jopa itacounayiyo. Yawano Nacom napenta exana peita quirei nacuatha beya poxonaē barapo matatsunpiwi umenaena Nacom peitabaratha poxonaē po mataqueitha Nacom yabara paebina daxita jiwi xua penatsicuentsiwa xua abe peexanaēxae. ⁵ Barichi Nacom jopa bayatha yabara jūntemainaeyo po peabe coyenewa jiwi exana pomonaē caena bayatha jinompa. Barapo matabaratha Nacom itoroba pin awūbo xua bunothopa peexanaenexa pomonaē abe peexanaē jiwi. Meisa saya Noé irūno piamonaē tatsi xua siete poyobe tatsi daxita barapoyobe capanenebiyatsi barapo awūbotha. Barapon Noé cuiduba jiwitha xua jiwi bewa jūntū coyene xanepanaya jinompaena Nacomtha. ⁶ Pomonaē Sodoma tomarapiwi irūno Gomorra tomarapiwino, barapomonaē abe peexanaēwi. Barapo tomarabemonaē yawa tomarabe Nacom yabara paeba xua pinaē abe exana daxota Nacom weraweraca exana isototha beya poxonaē daxita saya ũ ipunan naexana. Barapo coyenein Nacom tsita itūta xua bapon bexa jūpa exanaena pomonaēintha pomonaē abe exana dubenanaebiya. ⁷ Ichitha meisa saya Nacom capanepa barapo pin isoto weya pon pewūn Lot. Bapon Lot pejūntū coyene xanepanaēin Nacomtha. Lot cuitaya ũnthūthū deideijeji pocotsiwa jiwi abe exana.

⁸ Bapon Lot, pon pejūntū coyene xanepanaēin Nacomtha, barū popona pomonaē peajūntūcoyenebe jiwi. Daxita matabaratha bapon bichocono anthūthūthane xua pejūntū coyene xanepanaēxae Nacomtha xua poxonaē bapon taiba yawano xua poxonaē jume taiba xua jiwi abe exaneiba. ⁹ Ichitha Nacom pon jiwi Pecanamataxeinaēin yaputane xua peyawenaewa pomonaē peantobewixaetsi poxonaē barapomonaē bichocono jūntū coyene jūjūteibatsi caurimonaē pia pentacaponaein tatsi. Yawano Nacom yaputane xua atene peexanaewa pomonaetha pomonaē jopa pejume cowūntsiwichi. Nacom baxua exanaena beya abū poxonaē barapomonaē umenaena Nacom peitabaratha poxonaē Nacom yabara paebina daxita jiwi xua penatsicuentsiwa xua abe peexanaēxae. ¹⁰ Pomonaē xua abe exana pocotsiwa xua saya jiwi ichichipa exana yawano aichaxaibi exana pocotsiwa pon jiwi Pecanamataxeinaēin itoroba daxita barapomonaē Nacom atene exanaena. Barapomonaē bichocono atsaca yawa ichamonaē aebatsino. Jopa junuwiyo xua abe peyabara paebiwa xua matatsunpiwi abe peyabara paebiwatsi. ¹¹ Matatsunpiwi xeina peayapusūwa yawano xeina peitorobi coyenewa xua beyacaincha pomonaē naerabiya pecuidubi jiwi. Ichitha barapo matatsunpiwi jopa abe yabara paebiyo xua barapomonaē pomonaē naerabiya pecuidubi jiwi poxonaē barapo matatsunpiwi cueicueijeji tsumenaē Nacom peitabara tatsi, pon jiwi Pecanamataxeinaēin.

¹² Barapomonaē pomonaē abe peyabara paebi jiwi, barapomonaē exana xua icha duwei ichi, xua duwei ba jopa beta nanta xeinaeyo, xua ba saya jiwi tsicobe naexanatsi xua jiwi peteicaenexa yawa pebexubinexa pexaenexa. Barapo pebiwi abe yabara paeba pocotsiwa jopa yaputaeyo. Barapomonaē werapaena pia abewantha icha duwei icha xua werapa. ¹³ Barapomonaē xuya atene tsane abe peexanaēxae ichamonaetha. Barapomonaē jopa auriyo xua abe peexanaewa mataqueitha. Barapomonaē paca muxuitoroba abe peexanaēxae bequein naxaiba poxonaē pin penabanaewan paexaneibame. Ichamonaē paca abe yabara paeba abe peexanaēxae barapomonaē yawa aura paca necaexanaēxae.

¹⁴ Barapomonaē ichichipa nawita xua peyacaibiwa yabūxi daxita xua powaxi taiba. Jopa juniya abe eexanaponaeyo xua abe exana. Barapomonaē nantaūta pia pepuna pon-aewichi pomonaē pejūntū coyene faefaenaēwi Nacomtha. Barapomonaē ichichi xeica

nawita pocotsiwan xua tane daxita. Barapomonae yacuiya naexana xua abe peexanaewa. Daxota barapomonae Nacom bichocono atene cana exanaena. ¹⁵ Barapomonae jopa Nacom yabara yaputaetsi pejume naitematsixae po coyene xua Nacom pejuntu coyene xanepana exanaewa barapomonae. Barapomonae barapo canaŋta juŋtsiya eexanapona icha Balaam ichi xua pocotsiwa exana. Bapon caena bayatha popona. Bapon Balaam, Beor pexanto tatsi. Bapon Balaam abe exana pexeinaenexa paratixi. ¹⁶ Balaam pon naerabiya peitorobi jume diwesi pepaebin, poxonae ichichipa abe peexanaewa, cui matawentatsi xua abe exana. Po duwein pewun burra, bapon cui matawenta, Balaam cui matawentatsi. Burra cueicueijeji icha jiton ichi, xua saya jiton cueicueijeji. Barapo duwein jopa copatsiyo xua Balaam abe peexanaponaewa xua exanapona icha be ichi xua exanapona pon pematajemabinchi. Daxota Balaam cui matawentatsi poxonae ichichipa abe peexanaponaewa.

¹⁷ Barapo pebiwi po pebiwi naerabiya pecuidubi jiwi, jopa yawenaeyo ichamonaetha, icha be fetu mene ichi xua weitha bichocono ameneibi xua ba jiwi jopa yawenaetsi. Yawano barapomonae icha be tsaquinaebowa ichi xua ba saya dubenapona xua joibo capana, xua ba cuinaya jopa duneicaeyo, yawano xua ba jiwi jopa yawenaetsi xua peruneicaenexa. Nacom itaweta barapomonae xua barapomonae itawetatsi ichaxota ataya pejinompaenexa peita quirei nacuatha. ¹⁸ Barapomonae bichocono atsaca poxonae cueicueijeji. Yawano barapomonae pia jume, barapo jume jopa jiwi yawenaetsi. Yawano barapomonae naemata jume wunaeya tsipaeba pomonaetha pomonae aena pejume cowuntsi jiwi Jesucristo xua barapomonae iru abe peexanaenexa pocotsiwa bequein barapomonae aichaxaibi exana xua jiwi pia cui coyenewa tatsi xua pocotsiwa bayatha copiya exana xua abe. ¹⁹ Barapomonae wunaeyo tsimumu duta ichamonaetha xua ichamonaetha beta pejinompaenexa. Ichitha barapomonae pia coutha exana be pomonae xua caurimonae pia pentacaponaein tatsi amanaya petanacuitsiwatsi. Tsipei daxita jiwi pia cui xaina xua barompaya amanaya tanacuita pontha xua bara copata xua bara juntu coyene itorobatsi. ²⁰ Barapo cae pin nacuathe ichamonaetha jinompa pomonae capanenebiyatsi abe pia peexanae cuiru coyenein weya xua po abe peexanae cuiru coyene po cae pin nacuathepiwi exana. Barapomonae baxua exana poxonae jume cowunta Jesucristo, pon jiwi Pecanamataxeinaein, xuano xua pon jiwi Pecapanenebiyaein. Ichitha icha barapomonae equeicha abe exana xuano xua icha awiya exana dubenanaebiya baxuan, bapoxonae barapomonae bichocono abe beyacaincha xua poxonae copiya exana xua pewunaeya poxonae jume cowunta Jesucristo. ²¹ Icha barapomonae jume cowunta yawano icha penta Nacom peitorobi coyenewa, bapoxonae barapomonae bichocono abe exana Nacomtha. Ichitha icha barapomonae copiyatha jopa jume taetsipae barapo peitorobi coyenewa, bapoxonae barapomonae saya be conotha abe exanaetsipa Nacomtha. Ichitha poxoru barapomonae pejume taexae barapo peitorobi jume yawa pejume cowuntsixae, daxota barapomonae Nacom bichocono atene cana exana, beyacaincha xua poxonae jopa jume taeyo barapo diwesi. ²² Barapomonae equeicha caewa yabara jume cuiya exana xua abe exana po coyenein bequein copitha nacui barapenta. Bara barapomonae nacui yabara jume weta xua po tsica diwesiyotha jeye: “Auri ba xua nacabeta iratha equeicha caewa xane. Bequein marrano ba matawainchi pemene itaranae meratha ichitha equeicha caewa nairainyaba xota tsorei”, jei tsica diwesiyo xua Nacom Pejume Diwesitha paeba.

3

Meje yabara xua Jesucristo equeicha pia pepatopeicaewa tsica tsane

¹ Tamonae pam, pomonae tapaca caantobewichi pam, iru painya nejume cowuntsixae Jesucristo. Ainya cartabe pacata tinatsi. Barapo carte, po carte cotacaya tinan xua barapo ainya cartabe. Barapo ainya cartabetha ichipan xua beta painya neyabara nanta xeinaewa tsane pocotsiwan xua paca tsipaebatsi. ² Pananta xeinare pocotsiwa xua Nacom pia peitorobi jume pepaebiwi paeba poxonae caena bayatha. Yawano jopa

pajüntemainaende po peitorobi coyenewa naca cuiduba Jesucristo pia peitorobi jiwi tatsi. Barapo peitorobi coyenewa Cristo pon jiwi Pecanamataxeinaein xuano xua pon jiwi Pecapanenebiyaein pia peitorobi coyenewa tatsi.

³ Copiya matha pananta xeinare xua meje: Pewunaeya poxona po matacabitha Nacom ira weraweraca exanaena, barapo matacabitha patsina jiwi xua po jiwi cui capanaena pocotsiwa Nacom pia pejume xainyeiwa tatsi. Barapomona exanaena pocotsiwa saya ichichipa xua abe exana. ⁴ Barapomona yainyabiya jei tsane xua Cristo yabara: “Bapon bayatha paca tsiwuna muxu duta xua equeicha patopaetsica. ¿Eta xua metha awiya bapon pawuna ewatame bara jopa patopeicaeyoba? ¿Incane bapon? Bequein wamo susato jiwi jume cowanta xua pinae bapon patopaetsica ichitha jopa daichiyo beya nama poxona barapomona werapa cataunxuae bapon jopa patopaeyo. Bara saya juprapona wanacuatha xua bapon jopa patopeicaeyo xua poxona Nacom nacua forota beya anoxuae”, jei tsane barapomona. ⁵ Ichitha barapomona jopa ichipaeyo xua yabara jume jantanaina xua caena bayatha Nacom pepaebixae daxota itaboco ducua xua caena bayatha yawa xua ira exana poxona mene buxupana weyotsina. Barapo ira Nacom mentha exana. ⁶ Yawano barapomona jopa ichipaeyo xua jantanaina xua caena bayatha xua poxona Noé popona Nacom itoroba pin awabo xua equeicha ira mene buxupana boca yawa xua daxita pocotsiwa barapo iratha weraweraca. ⁷ Ichitha barapo itaboco xua anoxuae tainchi yawa ira xua ichaxota anoxuae jinompatsi Nacom dubena exana daxita baxuan poxona Nacom cueicueijej pia peayapusu itorobi coyenewatha. Nacom baxuan duba beya abu poxona weraweraca exanaena daxita baxuan pin isototha barapo pia peayapusu itorobi coyenewatha. Baraxuan Nacom weraweraca exanaena daxita poxona po mataqueitha Nacom yabara paebina daxita jiwi xua penatsicuentisiwa xua abe peexanaexae.

⁸ Tamona pam pomona tapaca caantobewichi pam, iru painya nejume cowuntsi jiwixae Jesucristo. Jopa pajüntemainaende po coyene xua daxita bara Nacom tsita najupatsi pon jiwi Pecanamataxeinaein. Caentacabi tsita najupatsi xua mil po weibe. Matautano mil po weibe Nacom tsita najupatsi xua caentacabi. Bequein mil po weibe bichocono ainya wei ichitha Nacom saya be tsita caetotsi. ⁹ Nacom jopa apara bewayo exanaeyo pocotsiwa yabara naca tsiwuna muxu duta bequein ichamona nanta xaina xua Nacom jopa nainya exaneibiyo. Ichitha Nacom jopa aitaconaeyo daxota paca ewata painya nejume cowuntsinexa. Bapon ichichipa xua dapon aibi tsane pon weraweracaena. Jame Nacom ichichipa xua maisa daxita jiwi peauranexa tsane abe peexanaexae xua icha juntu coyene pexeinaenexa tsane po juntu coyenein xua Nacom tsita xanepanatsi.

¹⁰ Ichitha po mataqueitha pon jiwi Pecanamataxeinaein patopaetsica barapo matcabitha jiwi jopa wuna ewatsi tsane. Bapon pon Wanacanamataxeinaein jemeicha patopeicaena icha be ichi pon pecaibin xua poxona namicha patopa. Peitaboco weraweracaena poxona pin busi tsurucuae tsane. Jomocoichato, xometono, opiteino, daxita baxuan tautinchi isototha. Yawa barapo ira tautinchi, yawano muxuna tautinchi xua barapo iratha xaina.

¹¹ Tsipei daxita baxuan tautinchi daxota bewa pajinompam be pomona pejuntu coyene xanepanaewi Nacomtha pomona jopa Nacom tsita xeinaetsi penatsicuentisiwa xua abe peexanaexae. Beta pajinompam icha Nacom ichi xua beta popona. ¹² Paeware xua po mataqueitha daxita Nacom wetsina. Yawano paexande pocotsiwa xua yawenatsi xua pepatopeicaewa tsane bichoina barapo matacabi. Barapo mataqueitha itaboco tautsina isototha. Jomocoichato, xometono, opiteino, daxita baxuan tautsina pin isototha. ¹³ Ichitha waxainchi ewatatsi xua Nacom nacata exanaena pena ira yawa pena itaboco xua bayatha Nacom yabara naca tsiwuna muxu duta. Barapo pena ira yawa barapo pena itaboco daxita wuna exanaena pocotsiwa pexainyewanexa tsane.

¹⁴ Tamona pam, pomona tapaca caantobewichi pam, iru painya nejume cowuntsixae Jesucristo. Paca tsipaebatsi baxua xua daxota poxona cataunxuae paewatame baxuan,

xua pocotsiwa Nacom exanaena bara beta paexande. Bapoxonae Nacom paca caxinaena xua jũntema pajinompame, matautano xua jopa paxeinaem peabe coyenewa painya jũntũ coyenewatha, yawano xua ichamonae jopa paca yabara paebi tsane xua abe painya neexanaewa. ¹⁵ Yawano payaputaneme xua caena bayatha Nacom pon Wanacana-mataxeinaein beitatemaya naca ewata xua wajume cowũntsinexa xua pia wanaca capanenebiyaewa tsane. Yawano irũ Pablo baxua yabara pacata tina. Bapon Pablo, pon waantobein, pon irũ jume cowũntarũ Jesucristo. Pablo yaputane exainchi baxuan yabara xua Nacom yaputane exana. ¹⁶ Bapon Pablo daxita pia cartantha baxuan yabara paca tsipaeba. Ichitha ichawan daunwei xua painya neyaputaewa. Ichitha pomonae jopa beta peyaputae jiwi irũ pomonae pejũntũ coyene faefaenaewi Nacomtha, barapomonae seicaya toxeinchiya exana pocotsiwan xua Pablo paeba. Barichi yabara jume toxeinchiya exana ichawa pocotsiwa Nacom Pejume Diwesitha paeba. Barapomonae pia coutha nanatsiexana xua abe exana xua peweraweracaewa tsane, xua Nacom exanaena.

¹⁷ Tamonae pam, pomonae tapaca caantobewichi pam, irũ painya nejume cowũntsixae Jesucristo. Painya neyaputaexae baxuan pewũnaeya xua Nacom exanaena baxuan, daxota dota pam pomonae abe pacata necaexanae jiwi xua jopa paca necantacapanawa tsane. Jopa pacopatsinde xua barapomonae baxua pacata exana xua jopa painya nepentsiwa tsane Nacom. ¹⁸ Bichocono pana najũntũ wũnae exanaponde Wanacana-mataxeinaein pia peantobewathaxae. Jesucristo beta payabara yaputaeponde, pon Wanacacapanenebiyaein. ¡Barabũ bapon ataya xeinaena peainya cui coyenewa anoxuae yawa xua bexa tsaneno! Je bara ichi tsane.

Baja Pedro

Meje Po Carte Juan Copiya Tatina, Pomonae Jesucristo Pejume Cowuntsiwi Tatinatsi. Barapo Carte Peopi Carucuae Carta.

Meje yabara po diwesi xua pon naca ajuntuyapusuya exana

¹ Pacata yabara tinatsi pon pewun “Pejume”, baraichi, pon jiwi ajuntuyapusuya exainchi. Bapon asu caena bayatha poxonae Nacom abu cataunxuae jopa exanaeyo wanacua. Poxonae bapon naexana wanacuatha, bapoxonae bexa poxonae bapon cueicueije diwesi bara bapoxonae barapon pajume tan. Barapon bara yatsicaya patan. Yawa bapon bara pacobe jayabeiban. ² Barapo peajuntuyapusuwa Nacom exana, po peajuntuyapusuwa xua ataya tsiteca, xua pata yabara yapuraewa baxua. Barapon Nacom Pexanto tatsi xeina barapo peajuntuyapusuwa, matautano patan barapon. Daxota yabara paca tsipaebatsi bapon. Yawano daxota yabara paca tsipaebatsi barapo peajuntuyapusuwa xua bapon xeina, pon Paxatha peecaexae. ³ Paca tsipaebatsi xua bayatha patan yawa xua pajume tanno, caemonae painya naexanaenexa paxantha, peburuya wajume cowuntsixae Jesucristo. Icha paxan paichin xua Nacomtha Waxatha caemonae panaexanan yawa Pexantotha pon Jesucristo, bara paichinderu. ⁴ Daxota bara po coyenein pacata tinatsi xua bichocono pata tajuntu coyene weiweinaewa tsane.

Meje yabara xua Nacom pexainyei juntu coyene peyacuiya jinaein

⁵ Po diwesi Jesucristo pana cuiduba barapo diwesi xuya paca tsipaebatsi xua Nacom pexainyei juntu coyene peyacuiya jinaein. Bapon jopa xeinaeyo peacuirube coyenewa pejuntu coyenewatha, tsipei bapon bichocono pejuntu coyene xeicaein. ⁶ Icha jeichichi: “Waxainchi Nacom yawa jinompatsi, be caemonae peburuya nacayawa jinompatsi Nacomtha”, jeichichi, daichitha caena poxonae saya abe exanatsi, bapoxonae saya apara naerabatsi xua pocotsiwa wapaebiwa baxua, yawa naerabatsi xua exanatsi. Matautano jopa yawa muxuna jinompaetsi Nacom pia pexainyei coyenewa tatsi. ⁷ Ichitha icha cajinompatsipatsi Nacom Pejume Diwesi wajuntu coyeneintha yawa xua exanaetsipatsi pocotsiwa xua Nacom ichichipa bara nexata peburuya caemonae naexanatsi. Jesucristo jana pichapabarena poxonae tupa, pon Nacom Pexanto tatsi. Barapon pon Nacom Pexanto tatsi petupaexae naetotha, daxota Nacom naca juntu coyene wejuntemaina exana daxita abe waexanae cuiru coyenein.

⁸ Icha jeichichi: “Jopa abe taexanaewa”, jeichichi, apara bara wacoutha namuxujainyabatsi pocotsiwa wapaebixae. Matautano wajuntu coyeneintha jopa xeinaetsi pexainyei coyenewa. ⁹ Ichitha icha Nacomtha yabara tsipaebatsi xua abe waexanaewa, xua jeichichi: “Nacom auran yaitama abe exanan”, jeichichi, bapoxonae Nacom naca juntu coyene wejuntemaina exana abe waexanae cuiru coyenein xua daxita naca wexuba. Baxua Nacom exana, tsipei bapon yabara baru jume cui cowuntatsi xua peexanaewa tsane pocotsiwa pepaebiwa. Matautano tsipei bapon bara xaniwaichiya peexanaein. ¹⁰ Icha jeichichi: “Jopa abe exanaetsi”, jeichichi, apara bara yabara jume cuiya exanatsi xua Nacom pon jiwi pemuxitorobin, tsipei Nacom naca yabara jei: “Barapomonae abe peexanaewi”, naca yabara jei. Yawano Nacom Pejume Diwesi jopa xeinaetsi wajuntu coyeneintha.

2

Meje yabara xua Cristo pon wanaca yabara jume yawenaein Nacomtha

¹ Pomonae be tamonae tapaca canatsicotawewichi pam, iru painya nejume cowuntsixae Jesucristo, yabara pacata tinatsi barapo coyene xua abe painya neexanaeyainwa. Daichitha icha waxainchi abe exanatsi barapara waxainchi nantautatsi Jesucristo pon wanaca yabara jume yawenaein Nacomtha xua Paxathaxae. Bapon matauta juntu coyene xanepanaya peexanaein. ² Barapon Jesucristo petupaexae naca yantomata daxota

Nacom naca capanepa abe waexanae cuiru coyenein weya. Jopa meisa waxainchi nexa apara bara iru daxita barapo cae pin nacuanthapiwi tatsitupatsi abe pia peexanae cuiru coyenein tatsi.

³ Icha jume cowuntsiya exanatsi pocotsiwa Nacom pia peitorobi jume diwesitha paeba, nexata bara yaputainchi, xua bara xaniwaicha wayaputaewaba Nacom. ⁴ Icha ichun jei: “Xan Nacom yaputan”, jei, xua daichitha jopa exanaeyo pocotsiwa Nacom pia peitorobi jume diwesi paeba, apara bapon pon jiwi pemuxuitorobin, yawa pejuntu coyenewatha jopa xeinaeyo pexainyei coyenewa. ⁵ Seicaya nama pon exana pocotsiwa xua Nacom itoroba pon waxainchi jiwanatsi, nexata bara yaputainchi xua bapon xanepanaya antobe Nacom. Daxota waxainchi nayaputainchi xua bara peburaya caemonae nacayawa jinompatsi Nacomtha. ⁶ Pon xua jei: “Nacom yawa poponan, caemonae peburaya nacayawa poponan Nacom”, jei, bapon bewa yajuntu coyene wunaeya poponae, icha bayatha Jesucristo ichi xua bapon beta xanepanaya yajuntu coyeneya popona.

Meje yabara xua Nacom pia pena peitorobi diwesi jume

⁷ Tamonae pam pomonae bichocono tapaca caantobewichi pam, iru painya nejume cowuntsixae Jesucristo, anoxuae pacata tinatsi barapo peitorobi diwesi xua jopa pena diwesiyo, tsipei caena bayatha barapo diwesi paxeiname poxonae aena pajume cowuntame. Barapo peru itorobi diwesi jume caena bayatha pajume taneme. ⁸ Ichitha po diwesi xua anoxuae pacata tinatsi, barapo diwesi be pena diwesi naexana. Barapo peitorobi diwesi Cristo bara tsita pexainyei diwesichi, iruru paxam paca tsita pexainyei diwesi jume. Tsipei jiwi, copitha jopa yaputaeyo barapo Nacom pia pena peitorobi coyenewa tatsi ichaxota xua jei: “Nantiya pana naantobeinde”, jei. Icha be pocotsi coyeneya juta ichi poxonae jiwi jopa beta taeyo poxonae quirei. Ichitha anoxuae jiwi yaputane barapo Nacom pia pena peitorobi coyenewa tatsi daxota bara itacupatsi xua xanepanaya pejinompaewa, icha be pocotsi coyeneya juta ichi poxonae jiwi beta jinompa mataqueitha.

⁹ Icha ichun jei: “Xan Nacom yaputan”, jei, xua daichitha ita aenae-aeneya caseba nawita pontha xua iru jume cowuntaru Cristo, bapon apara cataunxuae jopa yaputaeyo Nacom. ¹⁰ Pon antobe pontha xua iru jume cowuntaru Cristo, bapon apara jame yaputane Nacom. Daxota bapon jopa exanaeyo po coyenein xua abe peexanaewa xua iru ichamonae peexanaewa tsane. ¹¹ Ichitha pon ita aenae-aenei pontha xua iru jume cowunta Cristo, bapon acuicoyenebeya popona be pocotsin jopa yaputaeyo Nacom. Bapon jopa xanepanaya poponaeyo, icha be pocotsi coyene juta ichi poxonae pon peitata nacutsin catsawa pona poxoru jopa xapain taeyo.

¹² Pomonae pexui pam, pacata tinatsi tsipei Nacom paca juntu wejuntemaina exana abe painya neexanae cuiru coyenewan xua Jesucristo painya nejume cowuntsixae. ¹³ Pomonae pinyon pam, pacata tinatsi tsipei payaputaneme Nacom, pon Waxa, pon ataya pepoponaein, pon copiya popona poxonae aena daxita forota. Pomonae pewowi jiwi pam, pacata tinatsi, tsipei caurimonae pia pentacaponaein tatsi paamanayabame poxonae paca juntu coyene jujuta xua abe painya neexanaewam tsane.

¹⁴ Pomonae pexui pam, pacata tinatsi, tsipei payaputaneme Nacom, pon Waxa. Pomonae pinyon pam, pacata tinatsi tsipei payaputaneme Nacom, pon ataya popona, pon copiya popona poxonae aena daxita forota. Matautano pewowi jiwi pam, pacata tinatsi tsipei bichocono paajuntucoyenesum, yawano xanepanaya pajume cowuntame Nacom Pejume Diwesi, matautano tsipei pajuntu coyene amanayabame caurimonae pia pentacaponaein tatsi.

¹⁵ Jopa bichocono paichichipaeinde pocotsiwa xua abe po cae pin nacuathe. Matautano jopa bichocono pacayabara nanta xeinaeya ichichipaeinde xuan pocotsiwan xeina pomonae jopa pejume cowuntsiwi pomonae jinompa po cae pin nacuathe. Icha ichun saya ichichipa bichocono xua xuan xeina pomonae jopa pejume cowuntsiwi bapon jopa apara antobeyo Nacom, pon Waxa. ¹⁶ Penasi cui tatae coyene Nacom jopa itorobiyo xua barapo cae pin nacuathe tsique nexa. Apara pomonae jopa pejume cowuntsiwi pia

coutha exana barapo penasi cui tatae coyene. Matautano Nacom jopa itorobiyo xua abeya peichichipae coyene xua peuwiya tae coyene. Matautano Nacom jopa itorobiyo po coyenein xua peabi coyenein ichamonaetha, xua pexeinaexae copei. Barapocotsi coyenein Waxa Nacom werena jopa pichipaeyo. Saya apara pomonae jopa pejume cowantsiwi pia coyene tatsi. ¹⁷ Barapo cae pin nacue weraweracaena, yawano muxuna weraweracaena xua xuan abe peexanae cuiru coyenein. Ichitha pon exana pocotsiwa Nacom ichichipa bapon jame ataya poponaena Nacomtha.

Meje xua pexainyeiwa yabara, yawa xua penaerabiwa yabara

¹⁸ Pomonae pexui pam, bara nama imoxoyo tsane po matacabi Nacom daxita weraweraca exanaena barapo cae pin nacua. Bayatha pajume taneme xua jei: “Imoxoyo patopaena pon Cristo pia peitafaetabinchi”, jei. Ichitha bayatha pata pinmonae, pomonae Cristo pia peitafaetabiwichi. Daxota yaputainchi xua bara nama imoxoyo tsane po mataqueitha Nacom weraweraca exanaena barapo cae pin nacue. ¹⁹ Barapomonae pomonae Cristo pia peitafaetabiwichi copiya naca baru nacaetuta poxonae nacaetuteibatsi, ichitha anoxuae bara weya naca wepu pona. Icha xaniwaicha barapomonae waxainchi jiwana tsipaetsi metha awiya cataunxuae naca baru nacaetuta dubenanaebiyaetsipa. Barapomonae waxainya weya pona, xua daxota jiwi taena xua barapomonae bara jopa wamonae jiwiyoy xua jopa pejume cowantsi jiwixae Cristo.

²⁰ Ichitha paxam Cristo paca cata Nacom pia Pejumope tñaxũ tatsi pia painya nepaca baru jinompaenexa. Daxota paxam daxita yabara paca yaputane exana pexainyei coyenewa. ²¹ Paxam pacata tinatsi tsipei payaputaneme xua pexainyeiwa. Icha jopa payaputaetsipaem baxua, jopa pacata tinaetsipaetsi. Paxam payaputaneme pon ba xua xaniwaicha pepaebin jopa ba naerabiya paebiyo. ²² ¿Jintam pon pemuxuitorobinda? Pon xua jei: “Jesús apara Mesías aibi, pon Nacom itoroba”, jei, bapon apara pon pemuxuitorobin. Bapon Cristo pia peitafaetabi jitonsi tsipei jume matawenta poxonae jiwi paeba xua pinae Cristo Nacom Pexanto tatsi xuano xua Nacom Cristo Paxa tatsi. ²³ Pomonae xua Nacom Pexanto tatsi jume itawetatsi xua pejume cowantsiwa, barapomonae jopa nantauntsiyo Nacomtha xua be Paxa tatsi. Ichitha pon Nacom Pexanto tatsi xanepanaya yabara paebatsi, xua jei: “Jesús apara Mesías pon Nacom itoroba”, jei, jame bapon nantaũta Nacom be Paxa tatsi.

²⁴ Daxota painya jũntũ coyeneintha pajume xeinare Nacom Pejume Diwesi xua bayatha pajume taneme poxonae aena pajume cowantame. Icha painya jũntũ coyeneintha pajume xeiname xua pajume taneme bayatha, nexata bapoxonae peburũya caemonae pana naexanaename Pexanto tatsitha yawa coxiyũntha, xua Nacomtha. ²⁵ Matautano Jesucristo yabara naca tsiwũnae muxu duta, naca jei: “Peajũntũyapusũwa paca catinchi po peajũntũyapusũwa xua ataya tsiteca”, naca jei.

²⁶ Yabara pacata tinatsi barapo coyenein pomonae xua painya nepaca muxujainyabiwa. ²⁷ Ichitha paxam Nacom pia Pejumope tñaxũ tatsi paxeiname, po pejumope tñaxũ tatsi paca cata Jesucristo. Bapoxonae jopa nantawenonaeyo xua ichamona paca cuiduba poxoru barapo Nacom pia Pejumope tñaxũ tatsi paca cuiduba daxita coyenein. Po coyenein Nacom pia Pejumope tñaxũ tatsi paca cuiduba baraxua pexainyeiwa, matautano jopa pemuxuitorobiwa. Bara paichinde caemonae peburũya pana naexande Cristotha, icha Nacom pia Pejumope tñaxũ tatsi ichi xua yabara paca cuiduba xua po coyene painya neexanaewa tsane.

²⁸ Pomonae pexui pam, antũbusũya caemonae peburũya pana naexande Cristotha xua jopa wajunuwinexa xua poxonae bapon patopaetsica barapo cae pin nacuathe. Yawa caemonae pana naexande Cristotha xua jopa waaura tsane barapon peitabaratha xua abe waexanaexae poxonae patopaetsica. ²⁹ Bayatha payaputaneme xua Jesucristo pon jũntũ coyene xanepanaya peexanaein. Barichi bewa payaputaename pomonae jũntũ coyene xanepanaya peexanaewi, barapomonae barapara Nacom pia pexui tatsi.

3

Meje yabara xua Nacom pia pexuimonaе tatsi

¹ Maisa Nacom Waxa jopa juniya naca antobeyo. Daxota Nacom copata xua naca yabara jei: “Nacom pia pexui tatsi”, naca yabara jei. Jopa jume, bara barapomonaetsi. Daxota barapo cae pin nacuepiwi jopa naca yaputaeyo xua Nacom pia pexuimonaetsi, tsipei barapomonaе jopa bayatha yaputaeyo Nacom. ² Pomonaе tapaca caantobewichi pam xua iru painya nejume cowuntsixae Nacom, waxainchi bara Nacom pia pexuimon-aetsi. Anoxuae cataunxuae jopa nayaputaetsi xua bexa tsane eta po coyeneya naca cana exanaena. Ichitha yaputainchi xua poxonaе Jesucristo patopaetsica, waxainchi naexanaeinchi icha barapon jata coyeneya ichi. Tsipei bapon bara yatsicaewa taeinchi. ³ Pomonaе Jesucristo wunaе ewatatsi xua pepatopae wunaе, barapomonaе najuntu coyene xanepana exana, xua jopa xeinaeyo peabe coyenewa, icha Jesucristo ichi xua bichocono pejuntu coyene xanepanaein xua jopa xeinaeyo peabe coyenewa.

⁴ Daxita pomonaе abe peexanaewi, barapomonaе Nacom yabara paebina xua penat-sicuentsiwa abe peexanaexae bapontha. Tsipei poxonaе abe exana taacoibichi xua exana pocotsiwa Nacom pia peitorobi diwesi jume paeba. ⁵ Paxam payaputaneme xua Jesu-cristo patopeica barapo cae pin nacuathe, wanaca juntu coyene junteina exanaenexa abe waexanae cuiru coyenein. Matautano payaputaneme xua bapon jopa abe exanaeyo. ⁶ Daxita pomonaе peburuya caemonaе naexana Cristotha, barapomonaе jopa abe exana dubenanaebiyaeyo. Ichitha nama pomonaе abe exana dubenanaebiya, barapomonaе jopa Jesucristo yaputaetsi, matautano jopa pijimonaе tatsichi. ⁷ Pomonaе pexui pam, jopa pacopatsinde xua bara ichamonaе paca muxujainyabina. Pon ba xanepana exana bapon ba bichocono pejuntu coyene xanepanaein, icha Jesucristo ichi xua bichocono pejuntu coyene xanepanaya exanaein. ⁸ Ichitha pon ba xua abe exana ducuaebiya, apara bapon ba caurimonaе pia pentacaponaein tatsi pijimonaе jiwana pin tatsi. Tsipei caena bayatha, poxonaе aena Nacom daxita forota, caurimonaе pia pentacaponaein tatsi bapon abe peexanaein. Nacom Pexanto tatsi patopeica xua cana coyene weraweraca peexanaenexa caurimonaе pia pentacaponaein tatsi pia coyenewan tatsi.

⁹ Pomonaе Nacom pia pexui tatsi barapomonaе jiwana dapon ba aibi pon ba abe exana ducuaebiya, tsipei bapon yajuntu cui coyeneya popona Nacom pia cui coyenewa tatsi. Bapon jopa itacupaetsi xua abe exana ducuaebiya tsipei Nacom pia pexui tatsi jiwana pin tatsi. ¹⁰ Daxota yaputainchi pomonaе Nacom pia pexui tatsi, matautano yaputainchi pomonaе caurimonaе pia pentacaponaein tatsi pia pexui tatsi. Yabara yaputainchi pomonaе jopa xanepanaya exanaeyo, barapomonaе jopa Nacom pia pexui tatsi. Matautano yabara yaputainchi pomonaе jopa antobeyo ichamonaе pomonaetha pomonaе iru pejume cowuntsiwi, barapomonaе jopa Nacom pia pexui tatsi.

Meje yabara xua poxonaе jei: “Caemonaе peburuya bara nantiya naantobe tsainchi”, jei

¹¹ Poxonaе aena pajume cowuntame, xua beya anoxuae, pajume taneme Nacom Pejume Diwesi. Barapo diwesitha jeye: “Caemonaе peburuya bara nantiya naantobe tsainchi”, jei barapo diwesitha. ¹² Waxainchi jopa bewa naexanaetsi icha ichi pon pewun Caín, pon caena bayatha tupa. Bapon Caín caurimonaе pia pentacaponaein tatsi pia jiton tatsi. Bapon peweicho bexuba. ¿Eta xua metha Caín peweicho bexuba? Caín peweicho uwiya bexuba, tsipei pocotsiwa Caín exana Nacom nexa, Nacom tsita abetsi. Ichitha nama pocotsiwa Caín peweicho tatsi exana Nacom nexa baxua jame Nacom tsita xanepanatsi.

¹³ Tamonaе pam, pomonaе iru painya nejume cowuntsixae Jesucristo. Painya xoba panantu exabame icha ichamonaе paca ita aenae-aenei pomonaе jinompa po cae pin nacuathe, pomonaе jopa pejume cowuntsiwi. ¹⁴ Waxainchi yaputainchi xua bewa wera-paeinchi abe waexanaexae. Ichitha anoxuae peajuntu yapusawa xeinatsi, po peajuntu ya-pusawa ataya tsiteca waantobexae pomonaetha pomonaе iru pejume cowuntsixae. Pon xua jopa antobeyo piamonaе jiwana pin tatsi, pon iru pejume cowuntsin Nacom, bapon

bequein popona ichitha jopa xeinae tsane peajuntuyapusuwa. ¹⁵ Pon ita aenae-aeneya caseba ichamonae pomonaetha pomonae iru pejume cowuntsiwiru Nacom, bapon Nacom tsitatsi be pon jiwi pejutebin. Payaputaneme xua pon jiwi pejutebin bapana jopa xeinae peajuntuyapusuwa pejuntu coyenewatha, po peajuntuyapusuwa ataya tsiteca. ¹⁶ Waxainchi yabara yaputainchi xua Nacom wanaca antobewa, tsipei Jesucristo naca tsitupa naetotha wanaca antobexae. Daxota bewa copatinchi xua bara ichamonae naca atene exanaena, xua bequein beya poxonae tupa naca exanaena ichamonae nexa pomonae iru pejume cowuntsiwiru. ¹⁷ Pebin ba xeina nawita xuan pocotsiwa ba nantawenona xua juntea popona penaexanaewa tsane. Bapon cui tane pia jiton pon iru pejume cowuntsindu Nacom xua pon jopa xeinaeyo pocotsiwa nantawenona. Icha bapo pebin jopa pia jiton yabara nantanuweya nanta xeinaeyo xua peyawenaenexa, barapo pebin apara jopa Nacomtha tsita xeinaeyo peantobewa, po peantobewa Nacom xeina jiwi nexa. ¹⁸ Tamonae pam, pomonae iru painya nejume cowuntsixae Jesucristo. Jopa bewa saya ichamonaetha jeichi: “Paca antobetsi”, jopa bewa saya jeichi, poxonae jopa yawenaetsi barapomonae. Jame bewa xaniwaicha yawenaetsi barapomonae, bapoxonae jame yatsicaewa antobe tsainchi barapomonae.

Meje yabara xua wajume cowuntsiya jinompaewa Nacomtha

¹⁹⁻²⁰ Poxonae yawenatsi ichamonae bapoxonae yaputainchi xua bara xeinatsi po coyene pexainyei coyenewa. Xaniwaicha yaputainchi xua Nacom ichichipa pocotsiwa waxainchi exanatsi, bara bequein wajuntu coyene naca jei: “Jamaisa jopa beta exanaem”, bequein naca yabara jei. Waxainchi yaputainchi xua Nacom bichocono ainya cui, beyacaincha wajuntu coyene poxonae abe naca yabara paeba, tsipei Nacom daxita yaputane. ²¹ Tamonae pam, paxam pomonae tapaca caantobe jiwichi pam, painya nejume cowuntsixae Jesucristo. Bequein wajuntu coyene jopa abeya naca yabara jeiyo: “Jamaisa jopa beta exanaem”, jopa jeiyo, daxota awiya Nacom jume cowuntatsi xua waexanaewa pocotsiwa Nacom ichichipa. ²² Yawa Nacom naca cata pocotsiwa wacatsi wajume cowuntsixaetsi pia peitorobi diwesi jumein tatsi, yawano poxoru waexanaexae pocotsiwa Nacom ichichipa. ²³ Yawa Nacom pia peitorobi diwesi jume naca itorobiya jeye: “Taxanto Jesucristo pajume cowunde, yawa nantiya pana naantobeinde”, naca jei. ²⁴ Daxita pomonae ba exana pocotsiwa Nacom pia peitorobi diwesitha paeba, barapomonae Jesucristo yawa jinompa, barichi barapomonae Jesucristo baru jinompatsi. Waxainchi yaputainchi xua bapon naca yawena ducunaebiya, tsipei nanajumope cata waxantha wanaca cuidubinexa barapo coyene.

4

Meje yabara xua Nacom pia Pejumope tunaxu tatsi, iru pomonae Jesucristo abe peyabara paebiwichi

¹ Tamonae pam, pomonae tapaca caantobe jiwichi pam, iru painya nejume cowuntsixae Jesucristo. Jopa pajume cowuntsinde xua daxita pomonae paca jei: “Paxan Nacom peitorobi jume pata paebiw pan”, paca jei. Jame maisa pajujure saya barapomonae painya neyaputaenexa barapomonae icha metha bara Nacom itoroba barapomonae. Tsipei barapo cae pin nacuathepiwi jiwi ayei pomonae penaerabiwi, pomonae jei: “Paxan Nacom peitorobi jume pata paebiw pan”, jei. ² Ichitha paca itacupa xua payaputaneme pomonae xeina Nacom pia Pejumope tunaxu tatsi. Icha barapomonae paca jei: “Nacom Pexanto tatsi, pon Jesucristo, pepa jiton naexana barapo cae pin nacuathe”, jei, bapoxonae payaputaneme xua barapomonae apara Nacom pia Pejumope tunaxu tatsi yawa jinompa. ³ Icha ichamonae paca jei: “Nacom jopa itorobiyo Pexanto barapo cae pin nacuathe xua penaexanaenexa pepa jiton pewan Jesus”, paca jei, bapoxonae paxam payaputaneme xua barapomonae ba jopa yawa jinompaeyo Nacom pia Pejumope tunaxu tatsi. Barapomonae ba seicaya xeina icha pejumope tunaxu po jumope tunaxu Cristo ita aenae-aeneichi. Paxam bayatha pajume taneme xua barapo

pejumope t̄nax̄ bewa patopaetsica po cae pin nacuathe tsique. Bara xainyei bara bayatha barapo jumope t̄nax̄ patopa po cae pin nacuathe tsique.

⁴ Tamonae pam, paxam Nacom pijimonaе tatsi pam. Paxam pacui coyene amanayabame barapo penaerabi jiwitha. Tsipei po pejumope t̄nax̄ paca yawa popona xua Nacom pia Pejumope t̄nax̄ tatsi, barapo pejumope t̄nax̄ bichocono peayapus̄ itorobiya coyenewa pexeinaein, beyacaincha po pejumope t̄nax̄ po cae pin nacuathepiwi j̄nt̄ coyene itoroba dubenanaebiyatsi xua abe peexanaenexa. ⁵ Barapo jiwi apara barapo cae pin nacuathepiwi, daxota barapomonaе yabara cueicueijeі pocotsiwan barapo cae pin nacuathe xeina. Ichamonaе ir̄ pomonaе po cae pin nacuathepiwixae barapo coyene baxuan jume naitaewatsiya exana. ⁶ Ichitha waxainchi Nacom piamonaetsi. Pomonaе Nacom yaputainchi, barapomonaе bara naca jume naitaewata. Ichitha nama pomonaе jopa Nacom yaputaetsi, barapomonaе jopa naca jume naitaewatsiyo. Daxota naca itac̄pa xua wayaputaewa pomonaе cueicueijeі pexainyei jume. Matautano naca itac̄pa xua wayaputaewa pomonaе cueicueijeі pemuxuitorobi jume.

Meje yabara xua Nacom peyawa cui jinaein xua bichocono peantobe coyenewa

⁷ Tamonaе pomonaе tapaca caantobewichi pam, ir̄ painya nejume cow̄ntsixae Nacom. Bewa waxainchi nantiya naantobe tsainchi. Tsipei barapo peantobe coyenewatha Nacom naca cana exana xua waxeinaewa waantobe coyenewa. Daxita pomonaе xua antobe ichamonaе apara barapomonaе bara Nacom pia pexui tatsi naexana. Matautano barapomonaе bara Nacom yaputainchi. ⁸ Nacom ba peyacuiya jinaein peantobe coyenewa. Daxota pon jopa tsita xeinaeyo ichamonaе peantobe coyenewa apara poxoru jopa yaputaeyo Nacom, tsipei Nacom peyacuiya jinaein peantobe coyenewa. ⁹ Poxonaе Nacom Pexanto itoroba Nacom naca tsita ituta pia peantobe coyenewa. Nacom Pexanto itoroba pon yatsicaya compa tatsi, barapo cae pin nacuathe tsique waxeinaenexa tsane peantuyapus̄wa, po peantuyapus̄wa ataya tsiteca. ¹⁰ Barapo yatsicaewa pepa peantobe coyenewa meje baxue: Poxonaе ba Nacom antobetsi, baraxua ba jopa pepa peantobe coyenewiyo. Jame ba Nacom naca antobe baraxua ba jame yatsicaewa pepa peantobe coyenewa. Poxoru Nacom itorobica Pexanto wanaca wej̄ntemaina exanaenexa abe waexanae cuiru coyenein. Barapo coyene jame yatsicaewa pepa peantobe coyenewa.

¹¹ Tamonaе, pomonaе tapaca caantobe jiwichi pam, ir̄ painya nejume cow̄ntsixae Nacom. Tsipei Nacom bichocono naca antobe, daxota xuya waxainchi bewa nantiya naantobe tsainchi. ¹² Dapon ba aibi pon bayatha Nacom tainchi. Ichitha icha waxainchi nantiya naantobe tsainchi, bapoxonaе Nacom naca yawa poponaena. Nacom beta xaniwaichiya cana exana pia peantobe coyene waj̄nt̄ coyene berena. ¹³ Waxainchi natsita itapeinya xeinatsi, xua bara Nacom yawa jinompatsi, yawa xua Nacom naca yawa popona, tsipei Nacom nanajumope t̄nax̄ cata waxantha. ¹⁴ Paxan patan Jesucristo poxonaе Nacom Pexanto itorobica. Daxota pajan: “Bara xainyei xua Nacom Pexanto itorobica, xua barapon pecapanenebiyaenexa po cae pin nacuathepiwi xua abe pia peexanae cuiru coyenein weya tatsi”, pajan. ¹⁵ Pon ba xua jeye: “Bapon Jesús Nacom Pexanto tatsi”, jei, bapon apara bara yawa popona Nacom, ir̄ Nacom yawa popona bapon.

¹⁶ Daxota waxainchi Nacom yaputainchi, yawa jume cow̄nttatsi xua xaniwaicha bara Nacom naca antobe. Nacom apara pon peyanth̄th̄ya jinaein xua pocotsiwa bichocono peantobe coyenewa. Pon xua bichocono antobe ichamonaе, bapon apara bara yawa popona Nacom, ir̄ Nacom yawa popona bapon. ¹⁷ Daxota waxainchi yabara nacuiduba dubenanaebiyatsi xua bichocono peantobe coyenewa. Poxonaе matacabi tsuxubi tsane po mataqueitha Nacom jiwi yabara paebina xua penatsicuentsiwa Nacomtha, barapo matacabitha jopa junuwi tsainchi. Jume cow̄ntinchi xua Nacom jopa wanaca yabara paebiwa tsane xua abe waexanaexae. Icha Jesucristo ichi xua jopa abe exana ducunaebiyaeyo poxonaе popona po cae pin nacuathe, waxainchi barapocotsi coyeneya ichichi poxonaе jinompatsi po cae pin nacuathe. ¹⁸ Poxonaе antobetsi ichamonaе barapo j̄nt̄ coyenewatha ba jopa cunuwichi barapomonaе. Tsipei barapo peantobe

coyewatha torotatsi pocotsiwa xua pejunuwiwa xua wajuntũ coyene weya. Tsipei pon junuwa nayaputane xua atene tsaneba, penayaputaexae xua abe exana. Pon ba junuwa jopa xeinaeyo peantobe coyenewa, po peantobe coyenewa Nacom weya.

¹⁹ Waxainchi daxota Nacom antobetsi tsipei bapon copiya pewunaeya naca antobe.

²⁰ Icha pebin jei: “Xan Nacom antobein”, jei, xua daichitha caena ita aenae-aeneya caseba pia jiton pontha xua irũ jume cowuntarũ Nacom, apara barapo pebin pon jiwi pemuxitorobin. Icha jopa antobeyo pia jiton pon peyaitaexae, barichi bapon jopa antobeyo Nacom pontha xua jopa yaitaeyo. ²¹ Nacom nacata itoroba pia peitorobi diwesi jume. Barapo diwesitha naca jeye: “Pon ba xua Nacom antobetsi, bapon ba bewa muxuna antobe tsane pia jiton pontha xua irũ jume cowuntarũ Nacom”, naca jei barapo diwesitha.

5

Meje yabara poxonae xua waxainchi juntũ coyene amanayabatsi pomonae jopa pejume cowantsiwi

¹ Pon ba bichocono tsita xeina pejume cowantsiwa Jesús pon xua jei: “Jesús apara bara bapon pon Nacom itorobica, pon Mesías jeichichi”, jei, bapon jame Nacom Pexanto tatsi naexana. Daxita pomonae antobe Nacom xua paxatha, barichi barapomonae muxuna antobe Nacom pia pexui tatsi pomonae irurũ pejume cowantsixae. ² Poxonae waxainchi Nacom antobetsi xuano exainchi pocotsiwa Nacom pia peitorobi coyewantha itoroba, bapoxonae yaputainchi xua bara antobetsirũ Nacom pia pexui tatsi. ³ Poxonae Nacom antobetsi, bapoxonae jume cowantsiya exanatsi pocotsiwa paeba Nacom pia peitorobi diwesi jumeintha. Nacom pia peitorobi diwesi jumein jopa ayapubeyo xua yabara jume cui cana exana. ⁴ Daxita pomonae Nacom piamonae tatsi, barapomonae juntũ coyene amanayaba pontha pon jiwi juntũ coyene itorobatsi po cae pin nacuathepiwi xua abe peexanaewa tsane. Wajume cowantsi coyenewa Nacomtha, barapo coyewatha naca yawena xua wajuntũ coyene amanayabiwa pontha pon jiwi juntũ coyene itorobeibatsi po cae pin nacuathepiwi xua abe peexanaewa tsane. ⁵ Saya pomonae jame jume cowanta, xua pejeiwa: “Jesús apara Nacom Pexanto tatsi”, jei, jame barapomonae juntũ coyene amanayaba bapontha pontha pon jiwi juntũ coyene itorobeibatsi po cae pin nacuathepiwi xua abe peexanaewa tsane.

Meje yabara xua po diwesi Nacom Pexanto tatsi yabara

⁶ Bapon Jesucristo patopeica po cae pin nacuathe tsique. Poxonae bapon bautisabatsi, yawa poxonae naetotha tupa exanatsi, xua poxonae jana pichapabarena, barapo naxobe cui coyenebe naca yaputane exana xua bapon Jesucristo, apara bara Nacom Pexanto tatsi. Saya meisa jopa naca yaputane exanaeyo xua poxonae bautisabatsi, bara yawa irũ naca yaputane exana xua poxonae naetotha tupa exanatsi, yawa xua poxonae jana pichapabarena. Nacom pia Pejumope tunaxũ tatsi yabara paeba daxita baxua. Barapo Nacom pia Pejumope tunaxũ tatsi bara xaniyeya pepaebin. ⁷ Nacom naca yaputane exana xua Jesucristo bara Nacom Pexanto tatsi poxonae cueicueijeji acoibi po jumeyobe peitaboco wetsica. ⁸ Barapo jume apara poxonae Nacom naca tsipaeba wajuntũ coyewatha. Yawano barapo jume po jume xua cueicueijeji poxonae Jesús bautisabatsi. Yawano barapo jume po jume xua cueicueijeji poxonae bara nama imoxoyo tupaena Jesús. Barapo acoibi jumeyobe peburũya cuita caunuta xua jei: “Bapon Jesús apara Nacom Pexanto tatsi”, jei. ⁹ Ba jume cowantatsi po jumein jiwi paeba. Ichitha po jume nama Nacom Pexanto yabara paeba, barapo jume jame bichocono peainya cui jume, beyacaincha po jumein xua jiwi paeba. Daxota bewa jume cowantichi po coyene xua Nacom Pexanto yabara paeba. ¹⁰ Pon ba Nacom Pexanto tatsi jume cowantatsi, bapon ba pia juntũ coyenewa tsipaebatsi xua bara bapon ba Jesucristo yatsicaewa Nacom Pexanto tatsi. Pon jopa Nacom jume cowantichi, bapon nanta xeina xua Nacom naeraba xua pon jiwi pemuxitorobin, tsipei bapon jopa jume cowantsiyo po coyene Nacom Pexanto yabara paeba. ¹¹ Barapo jume, po jume Nacom Pexanto yabara paeba, barapo jume

wajuntũ coyenewatha jume tainchi, naca jeye: “Nacom peajuntũyapusũwa naca cata po peajuntũyapusũwa ataya tsiteca, po peajuntũyapusũwa Nacom Pexanto tatsi pia xainya werena tapichapatsi”, jei barapo jume. ¹² Pon ba Nacom Pexanto tatsi yawa popoinchi, bapon xeina barapo peajuntũyapusũwa. Ichitha pon Nacom Pexanto tatsi, jopa yawa poponaetsi, bapon jopa xeinaeyo barapo peajuntũyapusũwa, po peajuntũyapusũwa ataya tsiteca.

Meje yabara poxonaẽ Juan muxu tsipaeba, poxonaẽ imoxoyo nacobe weta xua tina

¹³ Pacata tinatsi paxam, pomonaẽ pajume cowũntame, Nacom Pexanto tatsi. Po coyenein xua pacata tinatsi, apara xua painya neyaputaenexa xua bara paxename peantũyapusũwa, po peantũyapusũwa xua ataya tsiteca.

¹⁴ Waxainchi bichocono yabara jume cowũntatsi Nacom xua wanaca yawenaewa tsane. Tsipei yaputainchi poxonaẽ wũcatsi pocotsiwa Nacom ichichipa, bapoxonaẽ Nacom bara naca jume tane pocotsiwa yabara xua wawũcaexaẽ. ¹⁵ Tsipei yaputainchi xua Nacom naca jume tane poxonaẽ wũcatsi, daxota yaputainchi xua bara xeinatsi pocotsiwa wũcatsi Nacom.

¹⁶ Icha taneme xua ichũn abe exana pon irũ jume cowũnta, xua ichitha pocotsiwa bapon exana jopa tũpa naexanaeyo, bapoxonaẽ Nacomtha tawũcare bapon. Bapoxonaẽ Nacom cana exana xua bapon xeina peantũyapusũwa. Ichitha icha jiton abe exana pocotsiwa xua tũpa naexana jopa catsipaebichi xua Nacomtha tawũcame bapon. ¹⁷ Daxita pocotsiwan jiwi abe exana daxita baxuan Nacom tsita abetsi. Daichitha barapo abe peexanaẽ coyene jiwana xua icha abe peexanaẽ coyenewa barapo abe peexanaẽ coyene jopa tũpa naca cana exanaeyo.

¹⁸ Yaputainchi pon yawa popona Nacom xua pia Paxaxaẽ, bapon jopa exanaẽ ducua-naebiyayo abe peexanaẽ cuiru coyenein, tsipei Nacom Pexanto tatsi yawena xua bapon yawenatsi. Mataũtano caurimonaẽ pia pentacaponaein tatsi jopa itacũpaetsi xua bapon peitorobiwatsi xua abe peexanaewa tsane. ¹⁹ Yaputainchi xua bara Nacom piamonaẽ tatsichi, yawa yaputainchi xua caurimonaẽ pia pentacaponaein tatsi itoroba daxita po cae pin nacuathepiwi xua abe peexanaewa tsane. ²⁰ Yaputainchino xua Nacom Pexanto tatsi bayatha patopeica barapo cae pin nacuathe, yawa naca tsipaeba Nacom Pejume Diwesi wayaputaenexa Nacom, pon pexainyein. Mataũtano yawa jinompatsi Nacom Pexanto tatsi, pon pexainyein, pon Jesucristo. Barapo Nacom pexainyein pon naca cata peantũyapusũwa, po peantũyapusũwa xua ataya tsiteca. ²¹ Tamonaẽ pam, jopa pajume cowũntsinde ibo nacomũn.

Baja Juan.

Meje Po Carte Juan Epatotha Tatina, Pomonae Jesucristo Pejume COWuntsiwi Tatinatsi. Barapo Carte Epatowa Carta.

Meje xua pexainyei diwesi yabara, yawano peantobe diwesi yabara

¹ Xan Juan, pon bayatha pitirin naexanan, pacata tinatsi barapo carte pomonae pam pomonae panacaetutame Nacom painya nejume cowuntsixaem. Nacom paca itapeta painya paca exanaenexa piamonae. Irũ tatinan pomonae paca barũ nacaetuta pomonae be painya pexui natsicotane. Xaniwaicha betiya paca antobetsi painya neyaputaexae pexainyeiwa. Matautano ichamonae paca antobe pomonae yaputane pexainyei jumein. ² Xan bichocono paca antobetsi poxoru painya nejume cowuntsixae Nacom pia pexainyei diwesi tatsi. Barapo pexainyei diwesi wajũntũ coyenewantha cajinompeibatsi anoxuae, matautano xua ataya tsane. ³ Cajinompatsi Nacom pia pexainyei coyenewa tatsi pia peantobe coyenewa tatsino. Daxota Nacom Waxa irũ Jesucristo Wanacanamataxeinaein pon Nacom Pexanto tatsi baponbe naca yawenabe. Baponbe naca yawenaena, matautano amanayiya baponbe naca yabara nantanuweya nanta xeinaena pia wanaca yawenaenexa. Matautano baponbe jũntema jinompa naca exanaena.

⁴ Jũntũ coyene weiweinan tsipei painyamonae jiwana cui tan, xua beta pejinompaewa. Barapo painyamonae exana po coyenewa xua pexainyei coyenewa, icha be pocotsi coyeneya xua Nacom Waxa naca cui itoroba. ⁵ Paxam, irũ painya nejume cowuntsixae Nacom, paca tsipaebatsi bewa waxainchi nantiya naantobe tsainchi. Po peitorobi coyenewa pacata tinatsi jopa pena peitorobi coyenewiyo. Barapo peitorobi coyenewa copiya xeinatsi poxonae aena jume cowũntatsi. ⁶ Icha waxainchi Nacom antobetsi, barapoxonae bewa jume cowũntsiya jinompaeinchi icha be pocotsi coyeneya Nacom naca itoroba pia peitorobi diwesi jumetha. Barapo peitorobi diwesi jume pajume taneme poxonae aena pajume cowũntame. Barapo peitorobi diwesi jume naca jeye: “Nantiya pana naantobeinde”, jei.

Meje yabara pomonae jiwi pemuxujainyabi jiwi

⁷ Po cae pin nacuathe jiwi ayei jinompa, pomonae jiwi pemuxujainyabi jiwi. Barapomonae jeye: “Nacom jopa itorobiyo Pexanto barapo cae pin nacuathe, pon pewũn Jesucristo xua pepa jiton naexana”, jei barapomonae. Pomonae xua bapocotsiwa paeba, bapomonae apara pomonae jiwi pemuxujainyabi jiwi yawa bapomonae Cristo abe peyabara paebiwichi. ⁸ Dota pam bũ caurimonae paca jũntũ coyene jũjũta, abe painya neexanaewa tsane, xua daxota Nacom painya nepaca catsinexa pentoma xua abe painya neexanaexae. Maisa jame beta xanepanaya paexande, xua Nacom painya nepaca catsinexa daxita barapo pentoma xua beta painya neexanaexae.

⁹ Pon xua equeicha ichichipa icha coyenewa xua pecuidubiwa beyacaincha xua Cristo pia pecuidubi coyenewa tatsi, bapon jopa nantaũtsiyo Nacom xua be Paxa. Ichitha jame pon exana ducuaenaebiya pocotsiwa xua Jesucristo pia pecuidubi coyenewatha paeba, bapon jame nantaũta Nacom be Paxa, matautano nantaũta Jesucristo pon Nacom Pexanto tatsi. ¹⁰ Icha ichũn paca siwa pona pia nepaca cuidubinexa icha coyenewa xua pecuidubiwa xua Nacom yabara, po pecuidubi coyenewa xua jopa Jesús pia pecuidubi coyenewa tatsi bapoxonae bapon jopa matenta weiweinaya pajacobinde painya bo berena. ¹¹ Tsipei pon matenta weiweinaya waba pontha pon pecuidubinexatsi icha pecuidubi coyenewatha, bapon apara irũrũ abe exanarũ icha be bapon ichi pon ichũn pon pia botha petapatopaexaetsi.

Meje yabara poxonae xua Juan opi wetaba po carte

¹² Ainya diwesi bequein cataunxuae xeinan xua tapaca camuxu tsipaebiwa tsainchi, ichitha jopa beyabara tinaeinyo paperatha barapo diwesi. Daichitha ewatan xua tapaca

cataewa tsainchi bexa, matautano xua tapaca catsipaebiwa tsainchi. Bapoxonae wajuntu
coyene weiweinaenexa tsainchi bichocono.

¹³ Pomonae iru Nacom pejume cowuntsiwi icha paxam paichim, pomonae iru Nacom
itapeta, barapomonae paca jacobae.

Baja Juan.

Meje Po Carte Juan Cotacaya Tatina, Pomonae Jesucristo Pejume Cowuntsiwi Tatinatsi. Barapo Carte Petabu Carucuae Carta.

Meje yabara poxonae Juan juntu weiweinaya tatina, Gayo tatinatsi

¹ Jaco Gayo, pon tacaantobetsi jitom. Xan, pon bayatha pitirin naexanan. Barapo carte cata tinatsi, yaitama bichocono xaniwaicha caantobetsi, jinya nejume cowuntsixae Nacom pia pexainyei diwesi jume tatsi.

² Pon tacaantobetsim, pon be tayapin tacanatsicotaeinchi iru nejume cowuntsixae Nacom. Nacomtha cata wucatsi xua juntea nepoponaewa tsane xuano xua axaibiya nepoponaewa tsane, icha be ichim xua beta xaniwaicha poponame Nacom peitabaratha tatsi. ³ Bichocono juntu coyene weiweinan poxonae ichamonae pomonae pejume cowuntsiwi jiwana taxantha pata yawa netsipaeba. Barapomonae cayabara paeba xua pinae yajuntu coyeneya popona ducuaanaebiyame Nacom pia pexainyei coyenewa tatsi. Bara xainyei bara barapo coyenewa exaname. ⁴ Dapocotsiwa aibi pocotsiwa jume tan pocotsiwa xua nejuntu coyene weiweina exana beyacaincha xua poxonae jume tan xua tajiwimonae xaniwaicha beta jinompa Nacom peitabaratha tatsi pejume cowuntsixae Jesucristo.

⁵ Pon tacaantobetsim, pon be tayapin tacanatsicotaeinchi iru nejume cowuntsixae Jesucristo. Bichocono xanepanaya exaname xua Nacom nexa xua poxonae yawename pomonae Jesucristo pejume cowuntsiwichi, matautano poxonae yawename pomonae icha nacuan werena pepatsiwi, pomonae bequein jopa neyaitae jiw. ⁶ Barapomonae pomonae icha nacuan werena pepatsiwi pomonae Jesucristo pejume cowuntsiwichi jeichichi: “Maisa bichocono pana antobe Gayo tsipei pana yawena”, jei barapomonae. Cawucatsi xua barapomonae equeicha neyawenaenexa xua pocotsiwa barapomonae nantawenona xua poxonae warapaena jinya neexanaenexa po coyenewa Nacom ichichipa bichocono. ⁷ Barapomonae ponarucupa xua Jesucristo petanacuichiwa tsainchi. Barapomonae jopa wucaeyo pomonaetha pomonae jopa pejume cowuntsiwi Nacom xua peyawenaenexatsi pocotsiwa penantawenonaewa. ⁸ Daxota bewa barapomonae yawenaetsi xua bapoxonae barapara iru barapomonae nanabarucueicueijeichi pexainyei jume diwesi.

Meje yabara po diwesi xua Diótfefes abe exana xuano iruru Demetrio beta exana

⁹ Xan caena bayatha icha coyenewiyo tatinan Jesucristo pejume cowuntsiwichi. Daichitha Diótfefes jopa jume cowuntsiyo taitorobi coyenewa, tsipei barapomonae pomonae Jesucristo pejume cowuntsiwichi pia xantha tatsi Diótfefes ichichipa naexana be pon pecanamataxeinaein. ¹⁰ Daxota icha ponaein nexainya beya, yabara catsipaebinchi bapon tsipei bapon catsawa neyabara paeba, peabe jumetha. Barapon jopa beta exanaeyo tsipei jopa wunae weyataeya wabeibiyo pomonaetha pomonae Jesucristo pejume cowuntsiwichi. Iruru pomonae jiw pententa weyataibiya wabeibiwi, baxuan cui matawentatsi, yawa bapon barapomonae itaweta pomonae Jesucristo pejume cowuntsiwichi itawetatsi.

¹¹ Pon tacaantobetsim, pon be tayapin tacanatsicotaeinchi iru nejume cowuntsixae Jesucristo jopa acuicoyenebeya poponaeinde icha poxonae ichun ichi xua acuicoyenebeya popona. Saya jame maisa beta exanaponde icha poxonae ichun ichi xua beta exanapona. Pon ba beta exana pocotsiwa Nacom itoroba apara bara Nacom piamonae jiw jiwana tatsi. Ichitha pon ba abeya popona, apara jopa poxoru yaputaeyo Nacom.

¹² Daxita jiw Demetrio xanepanaya yabara paebatsi. Pocotsiwa xua bapon exana, naca yaputane exana xua bara bapon xainyeya peexanaein. Iruru xan xanepanaya yabara paeban Demetrio. Matautano yaputaneme xua pocotsiwa paeban bara xainyei.

Meje yabara xua Juan opi wetaba po carte

¹³ Xam Gayo ainya diwesin bequein cataunxuae xeinan xua tacamuxu tsipaebiwa tsainchi, daichitha jopa beyabara tinaeinyo paperatha barapo diwesin. ¹⁴ Bara nama methaunxuae catayopiyaeinchi nexata bapoxonae wanatsipaebiwa tsanebe.

¹⁵ Bara Nacom jantema popona caexanaena. Pomonae xote jinompa pomonae be jinya jiwimonae, barapomonae cajacoba. Inta jacobare daxita wajiwimonae.
Baja Juan.

Meje Po Carte Judas Tatina Pomonaetha Pomonae Jesus Pia Pejume Cowuntsiwichi

Meje poxonae Judas tamropata pitaba xua tatina pomonaetha pomonae bayatha Nacom waba xua pia pejume cowuntsinexatsi

¹ Xan, Judas, ponxaein tanacuitan amanaya Jesucristo tacoya taichichipaexae. Xan Santiago peweicho tatsin. Barapo carte pacata tinatsi pomonae pam, pomonae bayatha Nacom Waxa itapetsiya paca waba, xua painya nejume cowuntsinexa. Nacom bichocono paca antobe. Nacom Pexanto tatsi pon Jesucristo beta paca yapu eena xua beta painya nejume cowuntsinexa Nacom. ² Barabũ Nacom jopa juniya paca yabara nanta xeinae tsane xua nantanuweya paca yabara nanta xeineibina pia paca cayawenaenexa. Mataũtano barabũ Nacom bichocono jũntema jinompa paca exanaena. Mataũtano barabũ Nacom paca catsibina pia peantobe coyenewa painya neyawa muxuna jinompaenexa.

Meje yabara xua pomonae pemuxujainyabiya cuidubi jiwi

³ Paxam pomonae bichocono tapaca caantobewichi pam. Maisa bichocono ichichipan xua yabara tapacata tinaewatsi pecapanenebiyae coyenewa xua po coyenewatha Nacom paca capanepa abe painya neexanae cuiro coyenein weya. Barapo coyenewatha Nacom necapaneparũ barapo coyene weya. Bequein ichichipan yabara pacata tinatsi baxua, daichitha anoxuae jopa neitacupaeyo. Jame bewa copiya yabara pacata tinaeinchi xua painya nejume cowuntsiwa. Paca itorobatsi xua naitomatsiya jume daunweya yabara painya paebinexa painya nejume cowuntsiwa, bequein ichamonae paca atene exana painya nejume cowuntsixae Jesús. Barapo pejume cowuntsiwa Nacom caena bayatha caetotha nacui coyene cata pijimonae, xua barapomonae xuya penacui coyene cacataponenexa ichamonaetha. ⁴ Bara barapocotsiwa paca tsipaebatsi, tsipei jiwi namichiya jinompa painya xantha pomonae pemuxujainyabiya cuidubi jiwi xua jopa pacui yaputaem pocotsiwa barapomonae exana. Caena bayatha barapomonae Nacom Pejume Diwesitha yabara tinatsi xua barapomonae pinae bewa atene tsane abe peexanaexae. Barapomonae peajũntacoyenebe jiwi. Mataũtano barapomonae jiwi muxujainyabiya cuidubatsi xua pinae Nacom amanayiya capanepa jiwi pia peantobexae. Nacom peantobexae jiwi, daxota pinae Nacom copata xua jiwi bara abe peexanaenexa. Barapomonae yabara jume itaweta, poxonae po jumetha ba jiwi jeye: “Jesucristo, bapon yatsicaya compa pon Wanacaitorobin xvano Wanacanamateaxeinaein”, jei.

⁵ Bequein payaputaneme xua bayatha Nacom, pon jiwi Pecanamataxeinaein exana, daichitha ichichipan xua equeicha yabara tapaca tsipaebiwatsi baxuan. Nacom exana xua piamonae tatsi Egipto nacua wepanenebiya xua Israel nacua bepanenebiya. Bequein Nacom baxua cana exana daichitha pirapaeyo Nacom cana exana xua barapo israelmonae jiwamonae jutebatsi pomonae jopa pejume cowuntsiwixaetsi. ⁶ Mataũtano payaputaneme xua Nacom cana exana matatsunpiwitha. Barapo matatsunpiwi nacui barapenta pia peitorobi coyenewan bequein Nacom cata. Mataũtano barapomonae Nacom pia nacua weya tatsi pona xua nacou tomara cuenta warapa xua itaboco weyaxae. Daxota Nacom itoroba xua barapo matatsunpiwi peyamaxũ cũbiya jebinxatsi pequirei nacuatha beya, beya abũ poxonae po matabi tsane poxonae atene tsane poxonae Nacom yabara paebina daxita jiwi xua penatsicuentisiwa xua abe peexanaexae. Barapo matatsunpiwi penaintontha maxũ cubebatsi, po penainton jopa weraweracaeyo. ⁷ Pacayabara nanta xeinare xua poxonae po tomarabetha Nacom cana exana, po tomara pewũn Sodoma yawa xua Gomorra, yawano xua poxonae ichaxota po tomarantha xua cuariyatha ena. Barapo tomaranpiwi abe exana xua poxonae cana siwainyameinta exana pebiwitha xua jopa be ichiyo xua pocotsi coyenewatha ba pebiwi cana exana yabũxitha. Nacom caunutsiya yabara paeba barapomonae xua barapomonae ataya

tsitecaeya peraxa exainchi abe peexanaexae. Barapomonaē naca tsita itapeinya xeina xua Nacom bara cana ichi tsane daxita jiwitha icha barapo tomarabepiwi cana ichichi.

⁸ Ichitha pomonaē anoxuae yabara paca tsipaebatsi, pomonaē pemuxujainyabiya cuidubi jwi, barapomonaē abeya nanta xeina dubenanaebiya, xua poxonaē baxua yabara amachinaē tsurubenanaebiya. Daxota barapomonaē pia pepon abeya taxoba exana dubenanaebiya. Barapomonaē itaweta Nacom pia peitorobi coyenewa pon jwi Pecanamataxeinaein. Matautano barapomonaē abe yabara paeba Nacom pia matatsunpiwi. ⁹ Nacom pia matatsunpin, po matatsunpin matakapanā icha matatsunpiwi, bapon pew̄n Miguel. Bapon Miguel najume matsontsonobabe caurimonaē pia pentacaponaein tatsi. Yabara najume matsontsonobabe xua Moisés pia pepon xua jintam metha pinaē xeinaena. Miguel jopa nanta xeinaeyo xua xuya anaepanaya jume nota xua pejeiwa: “Maisa abe exaname daxota Nacom pon jwi Pecanamataxeinaein atene cacana exanaena”, jopa jeyo, bara bequein itacupatsi xua pepaebiwa baxua. Saya jame Miguel jei: “Barab̄ Nacom caitawetsina”, jei Miguel. ¹⁰ Ichitha barapomonaē pomonaē pemuxujainyabiya cuidubi jwi abe yabara paeba pocotsiwa barapomonaē jopa yaputaeyo. Matautano barapomonaē exana icha be pocotsi coyeneya ichichipa xua abe peexanaewa. Barapomonaē baxua exana bequein jopa pexanepanaeyo taetha, icha duweimonaē ichi xua poxonaē exana be pocotsi coyeneya ichichipa. Daxota barapomonaē pia coutha naajunt̄coyenebe cana exana.

¹¹ J̄aibo, barapomonaē tsobenaē! Tsipei barapomonaē Nacom jopa bejume cow̄ntichi icha be ichi pon pew̄n Caín, pon caena bayatha peweicho bexuba, peweicho peuwixae. Matautano barapomonaē catsibatsi paratixi xua ichamonaē catsiba xua barapomonaē abeya coyeneya pecuidubixae. Tsipei barapomonaē bichocono pitaparatixichi icha be poxonaē ichi pon pew̄n Balaam poxonaē paratixi catsibatsi xua ichamonaē catsiba xua Balaam abeya coyeneya pecuidubixae. Matautano barapomonaē jwi j̄unt̄ coyene tsacabatsi xua jwi naba peexanaenexa Nacomtha daxota barapomonaē werapaena. Baxua exana icha be poxonaē pon pew̄n Coré ichi poxonaē jwi j̄unt̄ coyene tsacabatsi xua jwi naba peexanaenexa Moiestha, xua bapoxonaē Coré t̄pa xua bexotsi. ¹² Poxonaē paxam paexaname xua jwi nacaetuta painya nenabanaenexa painya nenaantobexaem, barapomonaē pomonaē pemuxujainyabiya cuidubi jwi paca caxinta pia peexanaē coyeneintha. Barapomonaē atsaquiya nabane, yawa atsaquiya apa. Saya jopa yabara nanta xeinaeyo ichamonaē. Saya meisa barapomonaē nayabara nanta xeina nawita. Poxonaē barapo coyene exana, barapomonaē abe paca cana exana. Po tsaquinaebowan ba xua jopa jwi catichi mera, xua equeicha pin joibo tab̄ torota peira tsewi weya xua jopa peruneicaenexa tsane, barapo tsaquinaebowan ba jwi jopa catichi mera, jwi jopa yawenaetsi. Bara j̄uta ichi barapomonaē pomonaē pemuxujainyabiya cuidubi jwi. Bequein barapomonaē pia coutha beta nayabara paeba, daichitha jwi jopa yawenaetsi. Po naein ba xua jopa nacoichiyo pia matakabintha xua poxonaē nacoiteiba barapo naein jwi ba yatabaca jona tsipei jopa naein penacoichixae. Bara j̄uta ichi barapomonaē pomonaē pemuxujainyabiya cuidubi jwi, jwi jopa beta xapain jinompa cana exanaetsi. Daxota jwi itaweta barapomonaē. ¹³ Ichamonaē aura exanatsi poxonaē barapomonaē abeya cuiduba xua jopa jwi peyawenaexaetsi. Barapomonaē bichocono abe exana icha pin maratsaca doriton ichi xua pitapa beya bebeya xua thamthamei xua bichocono petsoreixae. Bara j̄uta ichi barapomonaē saya jwi aura exanatsi abe peexanaexae daxota jwi cuenta pona barapomonaē. Poxonaē opiteiton ba poton pia namton weya itaxanumeinyatsi saya pipato dubenanaebiya ataya ichaxota pequireiwatha. Bara j̄uta ichi barapo pemuxujainyabiya cuidubi jwi, jopa xapain jinompaeyo po cae pin nacuathe. Daxota Nacom bebai tsane barapomonaē pia xainya weya ichaxota pequireiwatha xua bara ataya tsitecaeya tsane abe peexanaexae.

¹⁴ Barapomonaē pomonaē pemuxujainyabiya cuidubi jwi yabara paebatsi, xua ich̄n yabara paeba pon pew̄n Enoc. Adán xeina seis poyobe pia pemomo susatopiwi xua napuna naexanapona beya poxonaē bapon naexana pon Enoc. Bapon Enoc pon caena

bayatha Nacom pia nacua beicha caichatsi. Bapon Enoc yabara paeba barapomonaе pomonaе pemuxujainyabiya cuidubi jiwi, poxonaе cueicueijeі pocotsiwa Nacom ya-putane exana. Bapon Enoc jeye: “Tan pon jiwi Pecanamataxeinaein. Bapon tan xua pia matatsunpiwi baru patopeica, bichocono pin bicheito matatsunpiwi. ¹⁵ Bapon baru patopeica matatsunpiwi xua jiwi atene peexanaewa tsainchi. Bapon yabara paebina daxita jiwi xua penatsicuentaіwa xua abe peexanaexae. Matautano bapon yabara paebina xua pocotsiwa bapomonaе abe exana Nacomtha. Matautano bapon yabara paebina pocotsiwa barapomonaе Nacom abe peyabara paebiwatsi”, jei Enoc. ¹⁶ Barapomonaе pomonaе pemuxujainyabiya cuidubi jiwi ichawa beya daxita coyeneintha abeya yabara paeba. Xua daxita coyenein petsita aitacoyenebexaetsi daxota barapomonaе jopa juntu coyene weiweinaya jinompaeyo. Matautano meisa yabara nanta xeina xua piawan meisa penata exanaewan. Barapomonaе peatsacae jiwi bichocono. Bara bequein barapomonaе beta paeba ichamonaetha, saya poxoru xua peyabara muxujainyabinexa xua ichamonaе peyabara muxujainyabinexatsi pocotsiwa xeina.

Meje yabara xua Judas muxuweta pomonaetha pomonaе pejume cowuntsiwi xua pejume cowuntsiyainwa pemuxuitorobi diwesi

¹⁷ Equeicha paca tsipaebatsi pomonaе bichocono tapaca caantobewichi pam. Paxam bewa payabara jantanainaem pocotsiwa bayatha paeba pomonaе Jesucristo pon jiwi Pecanamataxeinaein pia peitorobi jiwi tatsi. ¹⁸ Barapomonaе paca jeye: “Pewunaeya tsane poxonaе po dapaetha Nacom yabara paebina jiwi xua penatsicuentaіwa xua abe peexanaexae copiya patsina pomonaе cui caponaena, pocotsiwa Nacom piawa tatsi baxua cui caponaeinchi. Matautano barapomonaе ichichipaeya exana dubenanaebiyaena icha be pocotsi coyeneya ichichipa xua abe peexanaewa”, jei barapomonaе pomonaе Jesús pia peitorobi jiwi tatsi. ¹⁹ Pocotsimonaе baxua exana xua abe exana, bapocotsimonaе tsaba exana piamonaetha xua barapo bicheitobe nacasebabe. Barapomonaе pomonaе abe peexanaewi exana xua pocotsiwan ichichipa peexanaewa. Barapomonaе jopa exanaeyo pocotsiwa Nacom ichichipa, tsipei jopa yawa jinompaeyo Nacom pia Pejumope tunaxu tatsi.

²⁰ Ichitha nama paxam pomonaе bichocono tapaca caantobewichi pam. Bayatha painya nejume cowuntsixaem Nacom, daxota awiya pana najuntu coyene tsacabare. Awiya mataropeichiya painya nejume cocowuntaponaenexa po pejume cowuntsi coyeneya Nacom weya pona. Nacom pia Pejumope tunaxu tatsi pia peayapusuwatha tatsi pawucare Nacom. ²¹ Beta payajuntu coyeneya jinompare Nacom pia peantobe coyenewa tatsi. Pawunaе eware po matabitha poxonaе Jesucristo Wanacanamataxeinaein naca catsina peajuntuypusawa, po peajuntuypusawa ataya tsiteca. Baxua naca catsina tsipei Nacom nantanuweya naca yabara nanta xeina pia wanaca yawenaenexa tsane.

²² Ichamonaе pomonaе yabara ainya muxu pexeinaewi pemuxujainyabi diwesi barapomonaе payabara nantanuweya yawende painya neantobexae xua jopa pejume cowuntsinexa barapo pemuxujainyabi diwesi. ²³ Ichamonaе muxu pejume cowuntsi barapo pemuxujainyabi diwesi. Nainya payawende barapomonaе painya neantobexae xua Nacom pecapanenebiyaenexa bapo abe peexanae cuiru coyene weya pejume cowuntsixae tsane Nacomtha. Panantanuweya yabara nanta xeinde ichamonaе, painya neyawenaenexa tsane painya neantobexae xua iru pejume cowuntsinexa tsane Nacom. Ichitha dota pam xua abe painya neexanaeyainwa icha poxonaе xua barapomonaе ichi xua poxonaе abe exana.

Meje yabara xua Judas najume wetsiya wunaе jainta Nacom

²⁴⁻²⁵ Anoxuae nama yabara paca tsipaebatsi Nacom pon pepa Nacom pon nacata compa. Bapon bichocono peyaputaеin. Barapon Nacom Wanacacapanenebiyaеin. Barapon pia peayapusu itorobiya coyenewatha paca yapu eenaena xua jopa abe painya neexanaewa tsane. Matauta Nacom paca cana exanaena xua juntu coyene xanepanaeya painya neumenaenexa tsane bapon peitabaratha tatsi. Matautano bapon paca cana exanaena xua bichocono painya nejuntu coyene weiweinaya neumenaenexa tsane

bapon pia pexeinya peitupanae coicha itabaratha tatsi. Barapon Nacom waxainchi wanae jaintatsi Jesucristo pon Wanacanamataxeinaein petupaexae. Waxainchi jeichichi Nacomtha: “Barabũ ataya tsitecaeya xeinaeya poponaename jinya pexeinya itupanae coicha yawa jinya neainya cui coyenewa. Matautano barabũ ataya xeinaeya poponaename jinya neayapusũ itorobi coyenewa, xuano xua jinya neayapusũ exanae coyenewa. Daxita baxuan caena bayatha xeiname poxonae aena, xuano xua anoxuaeno xeiname yawano xua bexa tsane bara ataya xeinaename”, jeichichi Nacomtha. Je, bara ichi tsane. Baja Judas.

Meje Po Diboro Juan Tina Xua Yabara Tsiwanaya Tsita

Itutatsi Pocotsiwa Exanaena Po Cae Pin Nacuathe

Meje yabara po diwesi pocotsiwan xua Jesucristo Paxa tsita itutatsi xua pocotsiwan xuya Juan tsita itutatsi

¹ Barapo diboroje xan Juan tinan. Pocotsiwan yabara tinan xua Nacom Jesucristo tsita itutatsi. Bara pocotsiwan Jesucristo xuya pijimonaetha tsiwanaeya tsita ituta pocotsiwan xua imoxoyo bara exanaenaba. Jesucristo pia matatsunpin inta itoroba xua xan Juan xuya tatsita itutsinexa daxita baxuan xua imoxoyo bara exanaenaba. ² Daxota xan xuya xainwaichiya yabara tinan daxita xua pocotsiwa tan. Matautano tinanno xua jume tan xua Nacom paeba iruno xua Jesucristo paeba.

³ Pon xua yorobina jiwitha po diwese pomonaetha pomonae Nacom pejume cowantsiwichi tatsi, bapon juntu coyene weiweina exanaeinchi xua Nacom juntu coyene weiweina exanaena. Iruno pomonae jume tane barapo diwese yawano xua exanano xua pepaebixae barapo diwese, barapomonae juntu coyene weiweina exanaeinchiru. Daxota barapomonae juntu coyene weiweina tsipei baxuan imoxoyo exanaenaba.

Meje yabara xua Juan tatina pomonae pejume cowantsiwi, pomonae siete po matabuxumonaebe, pomonae nacaetuta xua Nacom wnae pejainchinexatsi

⁴ Xan, Juan, pacata tinatsi pomonae painya nejume cowantsiwi pam pomonae siete po matabuxumonaebe pam xua painya nenacaetutsi jiwi pam, xua wnae painya nejainchinexa Nacom. Paxam pomonae Asia nacuatha pajinompame. Paca tsipaebatsi xua Nacom anoxuae popona yawa caena bayatha popona yawa bexa ataya poponaena. Pacata wucatsi Nacomtha xua painya nepaca juntu coyene weiweina exanaenexa tsane. Yawa pacata wucatsi xua Nacom paca yawenaena pia painya nepaca caantobexae. Yawa pacata wucatsi Nacom pia Pejumope tunaxu tatsi beya xua bapon baxuan pacata exanaena tsipei Nacom pia Pejumope tunaxu tatsi siete po pexeinya juntu coyenebe pexeinaein. Barapo Pejumope tunaxu Nacom peitabaratha tauncuatsi ichaxota Nacom eca pia pexeinya peecaethopaewatha. ⁵ Yawano pacata wucatsi Jesucristo xua bapon baxuan pacata exanaena. Barapon Jesucristo ataya xaniwaicha pepaebin. Bapon copiya equeicha asu naexana. Bapon asu canamata canaexana jiwi petupaey coyene weya. Yawa bapon itoroba pomonaetha pomonae itorobiya pepa peewatsiwi ichamonae po cae pin nacuathe. Cristo naca antobe daxota naca tsitupa naetotha wanaca juntu coyene jumentainaenexa abe waexanae cuiru coyenewan. ⁶ Matautano Jesucristo naca exana xua piamonae tatsichi. Yawano sacerdotemonae naca cana exana watanacuichinexa tsainchi Nacom, pon Jesucristo Paxa tatsi. ¡Barabu Nacom ataya xeinaena xua pexeinya juntu coyene xua peainya cui coyenewa! ¡Yawano barabu Nacom ataya xeinaena xua pia peayapusu itorobi coyenewa! Je, bara ichi tsane.

⁷ ¡Matha pataema!

Cristo patopeicaena tsaquinaebowatha.

Daxita jiwi taena bapon

xua bapon taeinchi.

Iruru pomonae bapon cobe matatabarutatsi

naetotha bapon taeinchi.

Daxita nacuanpiwi, pomonae bapon jopa jume

cowantichi, daxita barapomonae juntu coyene

wecoyei tsane poxonae bapon taeinchi.

Je bara ichi tsane.

⁸ Nacom jeye: “Xan ponxaein apara ataya tsitecaeya tapoponaein xua poxonae aena daxita tamropata pitaban. Matautano bexano daxita coyenein wetsin tsipei ataya

tsitecaeya bara tapoponaewa tsane”, jei Nacom pon jiwi Pecanamataxeinaein, pon itoroba pia peayapusu itorobi coyenewatha daxita nacuanmonae jiwitha. Bapon Nacom anoxuae popona, caena bayatha popona, yawa bexa tsane ataya poponaena.

Meje yabara poxonae Cristo pia peitupanae tsita itutsi coyenewatha tatsi Juan tsita itutatsi

⁹ Xan Juan ponxaein be pon painya eweicho nanatsicotan Jesús pijimonaexaetsi. Icha jiwi paca ichi xua paca anthuthurewe exana xua poxonae jopa xapain pacata exanaeyo, anoxuae bara neichi. Jiwi anthuthurewe neexana tsipei waxainchi Nacom piamonaetsi jiwanatsi pomona Nacom itorobiya ewata. Tsipei Jesucristo paca yawena daxota cataunxuae pajume cowunta dubenanaebiyame Nacom, iru xandu barichin. Jiwi pecubi botha Patmos tunaetotha neeta tapaebixae Nacom Pejume Diwesi yawano Jesús pejume diwesino tapaebixae. ¹⁰ Caentaqueitha, po mataqueitha peseicae mataqueitha bichocono Nacom pia Pejumope tunaxu tatsi nejuntu coyene yuca exana. Tamma werena jume tan pejume xua bichocono jume daunweya ajumetsaca be poxonae icha xua oba po peobiwa pewun trompeta. ¹¹ Nejei xua netsipaeba: “Xam yabara tinare diborotha daxita xua taneme. Barapo diboro bapoxonae caitorobare pomonaetha pomona tana nejume cowuntsiwitha pomonae siete po matabuxumonaebe pomonae nacaetuta xua Nacom wuna pejainchinexatsi. Barapomona jinompa Asia nacuatha. Barapo siete po matabuxumonaebe nacaetuta barompaya pia tomarantha tsiniya. Barapomona meje: Efeso tomarapiwi, iru Esmirna tomarapiwi, iru Pergamo tomarapiwi, iru Tiatira tomarapiwi, iru Sardis tomarapiwi, iru Filadelfia tomarapiwi, iru Laodicea tomarapiwi”, nejei Jesucristo.

¹² Bapoxonae napatomeicha necotaban tayaputaenexa pon xua netsipaeba. Poxonae necoyan bapoxona tan siete xoyobe penainwan xua po nain pewun oro nain xua pentatutuntha itanacanoba. ¹³ Barapo siete xoyobe xua ichaxota pentatutuntha itanacanoba baxoyo pia xainya deca pon be pebin taenotan. Pon uncuapa para ponxae itaboco wetsica pona, pon Nacom itapeta. Bapon naxatata paparuwa, po paparuwa apiya deca bichocono yawa taxu jayarecatsi. Yawa naepa cuta paparuwa po paparuwa bichocono pereca yawa juntacari jayatsinatsi yawa bichocono daedaena icha be oro nain ichi. ¹⁴ Pentanan tatsi bichocono inyapana icha be paru ichi, yawa icha be main axuto ichi. Yawano peitamaiqueitobe be isoto itareto. ¹⁵ Petaxu bichocono taxu daedaena icha be bronze nainto ichi xua bichocono nain daedaena poxonae cataunxuae isototha nain boquiya. Pejume bichocono ajumetsa be poxonae xua ainya menein busin. ¹⁶ Pemaxu coxa iya xeina siete po opiteitobe. Yawa pecoiboto tsina pichapeina cusi xua nantiya baru ducuabe. Peitabara bichocono daedaena icha be poxonae xometo ichi poxonae xua pentha xua poxonae atsa.

¹⁷ Poxonae bapon Jesucristo tan, imoxoyo iratha nabotaban bapon peitabaratha. Bara be tatupaeyo nabotaban. Bapoxona bapon pecobetha nejayaba po cobe pecoxa weya. Yawa Jesucristo nejei: “Jopa junuwinde. Xan ponxaein xua daxita taforotsin xua poxonae aena. Yawano xan ponxaein xua tawetsin tsane daxita xua bexa tsane. ¹⁸ Xan ponxaein xua copiya bayatha tapoponaein. Bequein bayatha tupan ichitha equeicha anoxuae asu poponan xua ataya petsitecaenexa. Nacom necata taitorobi coyenewa xua petupaewi taitorobeibinexa petupae coyene nacua beya. ¹⁹ Daxota yabara tinare xuaunxuae pocotsiwa taneme. Yawano yabara tinare xua aunxuae taeponaename. ²⁰ Barapo siete opiteitobe xua taneme tacobe coxa weya yabara caunutatsi xua pomona Nacom Pejume Diwesi pepaebiwi, pomona Nacom pejume cowuntsiwichi pecanamataxeinaewichi. Yawa barapo siete xoyobe xua pentatutuntha itanacanoba xua baxoyo pia xainya deca uncuan baxua yabara caunutatsi pomona siete po tomarabe matabuxu jiwi, pomona Nacom pejume cowuntsiwichi”, jei Jesucristo pon xua uncuapa.

2

Meje yabara xua po diwesi Juan tatina Efeso tomarapiwi

¹ Jesucristo, pon xua uncua nejei: “Tatinare pon Nacom Pejume Diwesi pepaebin pomonaetha tana nejume cowuntsiwi pomonae Efeso tomaramonae xua bapon petayorobinexa xua barapomonae petayorobinexatsi. Jande: ‘Meje xua paeba pon pecobe coxa weya tatsi siete po opiteitobe tauncuatsi xuano xua uncua siete xoyobe pia xainya deca xua ichaxota pentatutuntha itanacanoba. ² Bapon jeye: Yaputan xua painta exaname po penacuichiwa xua daunwei xua jopa pabarapentsim. Yawano paca cui yaputainchi xua paaichaxaibim xua exana pomonae peajuntucoyenebewi. Yawano bara yaputan xua jopa paca itata cui xainyei tsaibiyo poxonae xua ichamonae atsaquiya paca jei: Paxan Jesús pia peitorobiwi tatsi pan, jei. Bara paxam payaputaneme xua barapomonae pemuxitorobiwi. ³ Beta pana najuntũ wũnaetame. Mataũta jopa paacoyenefaetabim, bequein ichamonae bichocono abe paca exana painya inta nacuichixaem. ⁴ Ichitha paca cui yaputainchi xua cae coyene paexaname xua po coyene aichaxaibin. Anoxuae be conotha pana neantobem. Jopa be ichiyo poxonae copiya matha pana neantobem nawita. ⁵ Payabara nanta xeinare xua poxonae copiya pana nejume cowuntame xua poxonae bichocono pana neantobem. Icha juntũ coyene paxeinare. Painta exanare icha paichim xua poxonae matha copiya beta painta exaname. Icha jopa pana neantobem tsane, nainya patopaein, yawa pichin painyawa xua pocotsiwa ichaxota pentatutuntha paitanacanobame, xua pichin painya tomara weya. Apra xua jan, daxita painya nenacaetutsi jiwi pam pana nenepentaponaename xua pata tana nejume cowuntsiwam xua daxota jopa pana nejume cowuntsim tsane jan. ⁶ Daichitha cae coyenewa ichichipan xua paexaname. Juntũ coyene weiweinan tsipei pananta xeiname icha ichin xua pocotsiwa nanta xeinan. Paxam paaichaxaibim pocotsiwa nicolaitamonae xua exana, pomonae bichocono abe peexanaewi. Xan irũrũ aichaxaibin xua pocotsiwa exana barapomonae. ⁷ Paxam pomonae painya nejume cowuntsi jiwi pam. Icha pamuxu dubename, pajume naitaeware xua pocotsiwa Nacom pia Pejumope tũnaxũ tatsi paca tsipaeba. Bapon jeye: Pomonae xua Jesucristo jume cowũnta dubenanaebiyaeinchi beya xua yacuiya werapaeya othopaena barapomonae catsin Nacom pia peitorobi nacua beicha peajuntũyapusũwa, po peajuntũyapusũwa xua jopa weraweracaeyo, jei Nacom pia Pejumope tũnaxũ tatsi, jei Nacom Pexantõ’, jande”, nejei Jesucristo pon xua uncua barapo siete xoyobe xua pentatutuntha itanacanoba xua baxoyo pia xainya deca tatsi.

Meje yabara po diwesi Juan tatina Esmirna tomarapiwi

⁸ Pon Jesucristo xua uncua equeicha nejei: “Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Esmirna tomaramonae, xua bapon petayorobinexa xua barapomonae petayorobinexatsi. Jande: ‘Meje xua paeba pon xua daxita forota poxonae aena. Yawano bapon daxita wetsina xua bexa tsane. Bequein bapon bayatha tũpa ichitha equeicha asũ popona xua ataya tsitecaeya tsane. ⁹ Bapon jeye: Yaputan daxita xua pocotsiwan paexaname. Bara paca tainchi xua paanthũthũtanem poxonae xua ichamonae pacata abe exana. Bequein paca tainchi xua paacopeibim ichitha apra bara paxeinaename pocotsiwa bexa Nacom paca catsibina. Daxota paxam be copei pexeinae jiwi pam. Yaputan pomonae atsaquiya najei: Paxan judiomonae pan, jei. Barapomonae abe paca yabara paeba. Daichitha barapomonae ¼ caurimonae pia pentacaponaein tatsi bapon piamonae tatsi. ¹⁰ Jopa pajunuwinda xua pocotsiwa ichamonae paca anthũthũtane exanaena xua tsipei pacata abe exanaena. Caurimonae pia pentacaponaein tatsi itorobina ichũnthũ xua piraichi paca jiwana capanaena jiwi pecũbi bo beya xua daxota daxita paxam painya nenacui barapentsiwa tsane xua painya nejume cowuntsiwa Nacom. Paxam paanthũthũtanem tsane diez po matacabibe. Daichitha pana najuntũ coyene daunweya wũnaere beya poxonae payacuiya werapaeya othopaename. Bapoxonae paxam paca catsibinchi xua be pentoma xua peantũyapusũwa po peantũyapusũwa xua jopa weraweracaeyo. ¹¹ Paxam pomonae painya nejume cowuntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tũnaxũ tatsi paca tsipaeba. Bapon jeye:

Pomonae xua Jesucristo jume cowunta dubenanaebiyaeinchi beya xua yacui werapaeya othopaena, Nacom jopa copatsi tsane xua barapomonae equeicha jopa ateneya werapae tsane, jei Nacom pia Pejumoŋe t̄nax̄u tatsi, jei Nacom Pexanto', jande", nejei Jesucristo pon xua uncuā.

Meje yabara xua po diwesi Juan tatina Pérqamo tomarapiwi

¹² Pon Jesucristo xua uncuā equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Pérqamo tomaramonaē xua barapon petayorobinexa xua barapomonaē peyorobinexatsi. Jande: 'Meje xua paeba pon pecoiboto tsina tapichapeinatsi cusi po wato nantiya bar̄u ducuabe. ¹³ Bapon jeye: Bara yaputan xua daxita paexaname. Yawano yaputan xua painompame ichaxota caurimonaē pia pentacaponaein tatsi itorobeiba xua barapo tomarapiwi itorobeibatsi. Daichitha awiya pana nejume cowunta dubenanaebiyame. Jopa pabarapentsinde xua pata tana nejume cowuntsiwam. Antipas bichocono nejume cowunta. Bequein bapon bexotsi painya xantha, daichitha awiya pana nejume cowunta dubenanaebiyame. Pomonaē barapo tomaratha jinompa pomonaē xua caurimonaē pia pentacaponaein tatsi itorobeiba barapomonaē Antipas bexotsi. ¹⁴ Daichitha paca cui yaputainchi xua icha coyenein paexaname, po coyenein xua jopa ichichipaeinyo. Paxeiname Pérqamo tomaratha pomonaē xua painyamonaē jiwana, pomonaē barichi xua abe exana xua daxota jopa ichichipaeayo xua pepentsiwa xua pecuidubiwa pocotsiwa Balaam pia pecuidubi coyenewa tatsi. Bapon Balaam cuiduba, Balac cuidubatsi xua xuya Balac pecuidubinexa xua israelmonaē pecuidubinexatsi xua israelmonaē abe peexanaenexa. Po peabe coyene Balac cuiduba xua pinaē israelmonaē itac̄upatsi xua xane duwein po duwein poxonaē bexuba ibo nacom nexa. Yawano Balac cuiduba xua pinaē barapo israelmonaē jopa abe exanaeyo poxonaē nata siwa xeina dubenanaebiya yab̄xi. ¹⁵ Barichi pomonaē painyamonaē jiwana pomonaē abe exana, barapomonaē ichichipa po pecuidubiwa pocotsiwa nicolaitamonaē pia pecuidubi coyenewa tatsi. Barapo nicolaitamonaē pia pecuidubi coyenewa tatsi bichocono aichaxaibin. ¹⁶ Daxota icha j̄nt̄u coyene paxeinare. Icha jopa icha j̄nt̄u coyene paxeinaem, nainya jemeicha baxota patopaein yawa paca beinchi cusitha, po watotha xua tacoiboto pichapeina. ¹⁷ Paxam pomonaē painya nejume cowuntsi jiwī pam. Icha pamuxu dubename, moya pajume naitaeware xua pocotsiwa Nacom pia Pejumoŋe t̄nax̄u tatsi paca tsipaeba. Bapon jeye: Pomonaē xua Jesucristo jume cowunta dubenanaebiyaeinchi beya xua yacui werapaeya othopaena, barapomonaē catsin po pexaewa pew̄n maná, po pexaewa namicha boca xua ichamonaē jopa yabara yaputaeyo. Yawa barapomonaē catsin iboto, po iboto inyapana, barapo ibototha tinaena pena w̄n xua ichamonaē jopa w̄n taeyo. Saya meisa w̄n yaputaena pon xua catsin barapo iboto, jei Nacom pia Pejumoŋe t̄nax̄u tatsi, jei Nacom Pexanto', jande", nejei Jesús pon xua uncuā.

Meje yabara po diwesi Juan tatina Tiatira tomarapiwi

¹⁸ Jesucristo pon uncuā equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonaē Tiatira tomaramonaē xua bapon petayorobinexa xua barapomonaē petayorobinexatsi. Jande: 'Meje xua paeba Nacom Pexanto tatsi, pon peitamaiqueitobetha be isoto itareto tarucuatsi. Yawano bapon bichocono taxu daedaena be penainto, pocotsi nainto pew̄n bronce. ¹⁹ Bapon jeye: Yaputan daxita xua po coyene paexaname, yawano yaputan xua paxam pana neantobem. Yawano yaputan pocotsiwa painya tana nejume cowuntsiwam. Yawano yaputan xua pocotsiwa payaweneme ichamonaē. Yawano yaputan xua saya beitatemaya j̄nt̄ema painompame poxonaē bequein ichamonaē pacata abe exana. Yawano yaputan xua anoxuae nawita paexanaponame beyacaincha xua poxonaē copiya paexaname. ²⁰ Daichitha paca cui yaputainchi xua pocotsiwa paexaname xua pocotsiwa aichaxaibin, xua jopa paitawetsim powa pew̄n Jezabel. Powa jei: Nacom nexa tapaebiwayon, jei. Daichitha tana nejume cowuntsi jiwī muxuitorobatsi. Barapowa Jezabel tamonaē

cuidubatsi xua bara nata siwa xeineibina yabuxi. Yawa bapowa cuidubano po coyene aichaxaibin xua tamonaen jain itorobatsi xua tamonaen xaena duwein, po duwein poxonaen bexuba ibo nacom nexa. Barapo duwein jiwi cata ibo nacomtha poxonaen wunaen jainta pia ibo nacom. ²¹ Caena bayatha ewatan xua bapowa icha juntu coyene pexeinaenexa, ichitha bapowa baxua jopa beexanaeyo. Bapowa jopa juniya exanaeyo xua abe exanaponeiba. ²² Xan exanaein xua nainya bapowa atene tsanaya tsane, xua camatha pebocaenexa, abe peexanaexae. Iruru pomonaen xua bapowa abe nanabaruru exainchi barapomonaen atene tsane exanaein xua icha barapomonaen jopa nacui barapentsi tsane pocotsiwa bapowa cuiduba. ²³ Yawano bapowa pia pexui tatsi tajutebin. Bapoxonaen daxita pomonaen Nacom pejume cowuntsiwichi neyaputaena po coyene xua xan deta cou jiwi tanthuthu yaputaen daxita xua poxonaen exaneiba yawa daxita poxonaen xua nanta xeineiba. Bapoxonaen daxita paxam barompaya paca catsibinchi be xua pentoma. Pomonaen xua xanepanaya paexaname, xua wunaen paca catsibinchi. Pomonaen xua abe paexaname, xua peatenewa paca catsibinchi. ²⁴ Paca tsipaebatsi daxita pam pomonaen Tiatira tomarapiwi jiwana pam, xua pomonaen jopa paexanaem pocotsiwa xua Jezabel paca cuiduba, saya ichamonaen paxam jiwana pam, baxua exana. Paca tsipaebatsi pomonaen pam pomonaen jopa pananabaruru nacuidubim pocotsiwa caurimonaen pia pentacaponaein tatsi pia coyenewan tatsi. Tsipei jopa paexanaem barapo coyenewa daxota jopa paca itorobi tsainchi icha coyene xua painya neexanaewa tsane, po coyene bichocono ayapube. ²⁵ Daichitha awiya pana nejume cowunta dubenanaebiyama beya poxonaen equeicha patopeicaein. ²⁶ Awiya pajume cowunta dubenanaebiyama Nacom painya amanayabinexa tsane caurimonaen. Yawa awiya paexana dubenanaebiyama pocotsiwa xua xan ichichipan xua beya payacui werapaeya othopaenane. Pomonaen baxua exanaena, barapomonaen catsin taayapuru itorobi coyenewa xua peitorobeibinexa tsane po cae pin nacuathepiwi. ²⁷ Paca catsibinchi taitorobi coyenewa icha Taxa neichi xua necata pia peitorobi coyenewa. Icha pebin ichi xua poxonaen barapon daunweya wacataxuba juruwato penaintotha xua peexanaenexa pepurawixi, bara juta ichi tsane pomonaen nejume cowunta. Barapomonaen daunweya itorobina barapo cae pin nacuathepiwi beya poxonaen daxita weraweracaena abe peexanaexae. ²⁸ Bapoxonaen yawa paca catsibinchi po coyene xua tapaca baru poponaewatsi. Barapo coyene bichocono wunaen tsane, icha jarawato ichi xua jiwi bichocono tsita wunaetsi poto mataquei pewunaeya ecoina. ²⁹ Paxam pomonaen painya nejume cowuntsi jiwi pam. Icha pamuxu dubenane, moya pajume naitaeware xua pocotsiwa Nacom pia Pejumope tunaxu tatsi paca tsipaeba, jei Nacom Pexanto', jande", nejei Jesús, pon xua uncua.

3

Meje yabara po diwesi Juan tatina Sardis tomarapiwi

¹ Jesucristo, pon xua uncua siete xoyobe pia xainya deca xua ichaxota pentatutuntha itanacanoba, equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonaen Sardis tomaramonaen xua bapon petayorobinexa xua barapomonaen petayorobinexa. Jande: 'Meje xua paeba Jesucristo pon xua xeina siete po pexeinya juntu coyenebe, po coyenebe xua Nacom pia Pejumope tunaxu tatsi Jesucristo catatsi. Yawa bapon xeina siete po opiteitobe pecobe weya, po cobe pecoxa weya. Bapon jeye: Yaputan daxita xua paxam paexaname. Bequein jiwi paca yabara nanta xeina xua paxam painta beta exaname, daichitha apara jopa painta beta exanaem. Daxota paxam netsita be pomonaen pewerapae jiwi pam. ² Pana najuntu coyene tsacabare. Payawende pomonaen tana nejume cowuntsiwi xua pejuntu coyene wunaen nexa, tsipei barapomonaen be pewerapae wi pejuntu coyene natsepaexae. Paca tainchi xua pocotsiwa paexaname. Baxua jopa Nacom tsita wunaetsi. ³ Daxota pananta xeinare xua pocotsiwa bayatha paca cuiduba. Bapoxonaen bapocotsiwa paexande yawano bapoxonaen icha juntu coyene paxeinare Nacomtha xua equeicha caewa painya nejume cowuntsiwa tsane. Icha jopa baxua paexanaem tsane, bapoxonaen nainya

jemeicha patopaein paxamtha poxonae jopa payaputaem xua patopaein. Exanaein icha be pocotsin pon pecaibin ichi xua jemeicha patopa. ⁴ Daichitha paxeiname barapo tomaratha, Sardis tomaratha, pomonae tana nejume cowuntsiwi. Barapomonae penthuthu xeicae jiwi. Jopa xeinaeyo po coyene xua peajuntucoyenebewa tsipei jopa abe exanaeyo. Barapomonae nebaru jinompaena. Yawa nama xatabina paparuwan, po paparuwan inyapana tsipei barapomonae exana dubenanaebiya pocotsiwa xua itoroban. ⁵ Pomonae xua nejume cowanta dubenanaebiyaena xua beya yacui werapaeya othopaena barapomonae nama xatabina po paparuwan inyapana. Yawa pomonae wun dubena Nacom pia diborotha xua pomonae ataya pejinompaenexa tsane xua jopa weraweracaeyo, barapomonae jopa wun iquicaein tsane. Yawano wun yaputane exanaein Taxa Nacomtha yawano Nacom pia matatsunpiwi tatsi peitabarathano. ⁶ Paxam pomonae painya nejume cowuntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumoepo tunaxu tatsi paca tsipaeba, jei Nacom Pexanto', jande", nejei Jesús pon xua uncua.

Meje yabara po diwesi Juan tatina Filadelfia tomarapiwi

⁷ Equeicha Jesucristo pon xua uncua nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Filadelfia tomarapiwi xua bapon petayorobinexa xua barapomonae petayorobinexatsi. Jande: 'Nacom Pexanto tatsi, bapon bichocono pejuntucoyene xanepanaein Nacomtha xua jopa penatsicuentiwa Nacomtha xua abe peexanaexae. Yawa bapon bara xaniwaicha pepaebin. Yawa bapon pon naca yawena xua patinchi Nacom pia peitorobi nacua beicha. Bapon naca yawenaena icha matha pon peboupa peewatsin ichi xua poxonae David yawenatsi. Bapon pon peboupa peewatsin David taewatatsi pia pexeinya peecaethopeibi bo tatsi. Bapon David pon caena bayatha Israel nacuamonae itorobiya pia pepa peewatsinchi. Bapon pon peboupa peewatsin pia peitorobi coyenewa xeina xua poxonae bapon peboupa saranaxuba ichun jopa itacupaetsi xua peboupa xatataba. Yawa poxonae bapon peboupa xatataba ichun jopa itacupaetsi xua saranaxuba. Icha bapon ichi, barichi Nacom Pexanto tatsi pia peitorobi coyenewa xeina. Bapon copata xua pijimonae tatsi patsina Nacom pia nacua beicha. Yawano jopa copatsiyo xua ichamonae patsina Nacom pia nacua tatsi beicha. Ichun jopa itacupaetsi xua ichawa paeba Nacom Pexanto tatsi beya. Anoxuae nama Nacom Pexanto paca tsipaeba, jeye: ⁸ Yaputan xua daxita paexaname. Xan copatan xua tajume diwesi pacaponame ichamonaetha. Ichun jopa itacupaetsi xua paca jume itaweta xua daxota jopa painya necaponaewa barapo diwesi. Bequein saya tsiwiyo paajuntucuyenesum, daichitha awiya tajume diwesi pacueicueijam yawa jopa pana nepentsim xua painya tana nejume cowuntsiwam. ⁹ Ichitha pomonae naerabiya jei: Paxan, judiomonae pan, jei, barapomonae, Satanás, caurimonae pia pentacaponaein tatsi bapon piamonae tatsi tsipei jopa benejume cowuntsiyo. Xan exanaein xua barapomonae patsina paxamtha pentabocototha peumenaenexa tsane painya itabaratha wunae painya nepaca jainchinexa tsane. Bapoxonae barapomonae yaputaena xua xan tapaca caantobewichi pam. ¹⁰ Pajume cowuntsiya exana dubenanaebiyama po coyene xua paca itorobatsi xua beitatemaya painompame xua jopa painya neaitaconaewa poxonae bequein ichamonae paca yabara abe exana. Daxota barapo matacabi, po mataqueitha poxonae caurimonae pia pentacaponaein tatsi daxita barapo cae pin nacuathe jiwi juntu coyene jujutinchi, poxonae jiwi bichocono atene exanaeinchi bara paca capanenebiya exanaeinchi. Caurimonae pia pentacaponaein tatsi juntu coyene jujutsina pomonaetha pomonae Nacom pejume cowuntsiwichi poxonae bichocono atene exanaeinchi xua daxota Nacom jopa pejume cowuntsiwa tsainchi. ¹¹ Imoxoyo patopeicaein. Xaniwaicha beta paxeinare pocotsiwa xua tapana nejume cowuntsiwam xua bexa Nacom paca catsina pocotsiwa paca juntana jeba pia nacuatheicha beta painya tana nejume cowanta dubenanaebiyaexaemxae. Jopa pacopatsinde xua ichun paca exanaena xua abe painya neexanaewa tsane xua daxota jopa painya nexainaewa tsane

pocotsiwa paca jũntana jeba pia nacuatheicha. ¹² Pomonaē xua nejume cowũnta dubenanaēbiyaēna barapomonaē bichocono jũntũ coyene ayapũsũya daunweya exanaēin xua pepatsinexa tsane Nacom pia nacua beicha. Bapoxonaē bapana jopa ponaē tsane Nacom pia nacua weya. Bapoxonaē barapomonaētha catsin po wũn Taxa Nacom pewũn, xua jiwi peyaputaenexa xua barapomonaē apara Nacom piamonaē tatsi. Yawa catsin po wũn pena Jerusalén tomara pewũn, po tomara Nacom pia tomara tatsi ichaxota jinompa pomonaē peantobewichi Nacom. Barapo Jerusalén tomara itaboco wetsica pona ichaxoteicha xua Tanacom popona. Yawano catsin barapomonaētha tawũn, po wũn pena wũn. ¹³ Paxam pomonaē painya nejume cowũntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tũnaxũ tatsi paca tsipaeba, jei Nacom Pexantó, jande”, nejei Jesús pon xua uncua.

Meje yabara po diwesi Juan tatina Laodicea tomarapiwi

¹⁴ Jesucristo, pon xua uncua siete xoyobe pia xainya deca xua ichaxota pentatutuntha itanacanoba, equeicha nejei: “Barichinde tatinare pon Nacom Pejume Diwesi pepaēbin pomonaētha tana nejume cowũntsiwi, pomonaē Laodicea tomarapiwi xua bapon petayorobinexa xua barapomonaē petayorobinexa. Jande: ‘Meje xua paeba pon xaniwaicha pepaēbin pon xua xaniwaicha beta naca yabara caunutsiya paeba Nacomtha. Pon xua caena bayatha daxita forota. ¹⁵⁻¹⁶ Yaputan daxita pocotsiwa paxam paexaname. Paxam paca tsipaebatsi xua be paichimje: Ichamonaē ba aichaxaibi xua apa poxonaē po mera mene tũna xuano xua poxonaē aque aibi yawa poxonaē atou aibi. Bapoxonaē mene sutabina. Paxam be barapocotsi mera pana nacayabara tsicotaneme. Paxam conotha pana nejume cowũntame. Jopa panepentsim xua pata tana nejume cowũntsiwam. Mataũtano jopa bichocono paichichipaem xua painya neexanaewa pocotsiwa paca itorobatsi. Daxota anaya paca xubinchi tsipei conotha pana nejume cowũntame icha xua pebin ichi xua anaya mene sutabina tsipei mene tũna. ¹⁷ Payabara paebame po coyene xua copei painya nexenaēwi pam. Yawa payabara paebame po coyene xua painya coutha pana nayaweneibame xua jopa pacata acoibi tsaibiyo xua pocotsiwan panantawenoname. Ichitha jopa payaputaēbenaem xua pocotsiwa paca yabara nanta xeinatsi xua pebiwi tsobenaē, paca yabara jeichi. Mataũtano jopa payaputaem xua paxam be pomonaē peacopeibiwi pana natsicotaneme. Yawano be pomonaē peitata nacũtsi jiwi pana natsicotaneme. Yawano be pomonaē tamasaina pana natsicotaneme. Apra xua jan: Paxam be barapomonaē pam tsipei jopa beta painya jũntũ coyenewatha pana nejume cowũntsim. Yawa jopa beta painta nacuichim, jan. ¹⁸ Daxota paca tsipaebatsi. Pana necomocare po penainwan pewũn oro nain po nain xua daunwei xua poxoru isototha pesetsixae xua pexubinexa pocotsiwa abe. Bapoxonaē xaniwaicha bara copei painya nexenaēwi pam tsane. Yawano pana necomocare po paparuwan inyapana tha tapaca cajuma xatabinexa tsane, tha tapaca cajuma acabinexatsi xua pajumasainame xua painya neauraxae. Mataũtano pana necomocare pewũwa tabotsinexa painya itamaiqueitha bapoxonaē beta pataeneme. Apra xua jan: Pana newũcare xua poxonaē po coyene xua beta paca jũntũ coyene exanaēinchi xua jopa painya nexenaēwam tsane painya jũntũ coyeneintha, pocotsiwa xua abe, jan. ¹⁹ Pomonaē xua antobein cui itawetan xua abe exana. Equeicha cuiduban xua jopa peexanaenexa baxuan. Yawano bichocono pana nejume cowũnde yawano icha jũntũ coyene paxeinare. ²⁰ Pataema bo coibototha uncuan yawa wawan. Icha pebin nejume tane yawa inta coibo sarana xorena bara joniyan yawa bara pana nabarũ xanbe pia bothaxae. ²¹ Taxa jume cowũnta ducuaēbiyan xua neitoroba beya xua poxonaē bayatha tũpan. Daxota Taxa necopata xua taēcaenexa imoxoyo ichaxota Taxa pia pexeinya peēcaēthopeibiwa tatsi tauncuatsi. Icha Taxa neichi baxua, barichin tsane pomonaētha pomonaē tana nejume cowũntsiwi. Pomonaē nejume cowũnta dubenanaēbiyaēna xua itoroban, xua beya yacui werapaēya othopaēna, barapomonaē copatsin xua peēnaēnaxa ichaxota imoxoyo pexeinya taequeibithopeibiwa inta uncua. ²² Paxam pomonaē painya nejume cowũntsi jiwi pam. Icha pamuxu dubename, moya pajume naitaeware xua pocotsiwa Nacom pia

Pejumope t̄nax̄u tatsi paca tsipaeba, jei Nacom Pexanto', jande", nejei Jesús pon xua uncua.

4

Meje yabara po diwesi xua xuan Juan tsita nait̄tatsi peitabocotha

¹ Poxonae baxua weta, tan peitabocotha be bo boupa xua boupa yeyetanota. Yawano jume tan pejume, po jume xua copiya jume tan, po jume xua bichocono jume daunweya ajumetsaca be poxonae xua oba po peobiwa pew̄n trompeta. Bapon Jesús nejei: "Anetha tsinande taxainya betsina. Catsita it̄tsinchi xua pocotsiwa bexa tsane exanaena", nejei Jesús.

² Bapoxonae nama bichocono Nacom pia Pejumope t̄nax̄u tatsi nej̄nt̄u ȳca exana. Peitabocotha tan xua ducua pocotsiwa pexeinya peenaethopeibiwa, yawano tan pon xua equiya baxota. ³ Pon xua equiya baxoteicha bichocono itabara daedaena icha iboto ichi pocotsi iboto xua bichocono daedaena pocotsi iboto xua bichocono ainya matoma, po iboto pew̄n jaspe, yawa be pocotsi iboto pew̄n cornalina. Yawano matawacaicha matatsun uncueicati coinwawa. Barapo coinwawa bichocono s̄jeya pentha exana icha iboto ichi pocotsi iboto pew̄n esmeralda. ⁴ Barapo pexeinya pecaethopeibiwa pia matawacaicha tatsi, tan icha peenaethopeibiw̄an veinticuatro po peenaethopeibiw̄an xoyobe. Barapo peenaethopeibiw̄antha ena pitiri jiwi xua matāta veinticuatro poyobe. Yawano barapo pitiri jiwi nama xataba paparuwan, po paparuwan inyapana yawano nanta xataba pocotsiwa be tepa xua penainwan, po penainwan pew̄n oro nain. ⁵ Barapo pexeinya pecaethopeibiwa weya be yam̄x̄u busi xua jurujurei. Yawano jerajerei. Yawano barapo pecaethopeibiwa peitabaratha tatsi umena pecoicha be xua pocotsiwa banaxu. Barapo siete banaxutobe coichabe yabara caunuta xua Nacom pia Pejumope t̄nax̄u tatsi xeina siete po pexeinya j̄nt̄u coyenebe. ⁶ Barapo pecaethopeibiwa peitabaratha ducua xua pocotsiwa pentha pocotsiwa icha pin mene mar ichi xua mene itarana yawa icha bosib̄a muxupawa ichi xua penthiya.

Barapo pecaethopeibiwa baxota imoxoyo umena cuatro poyobe pocotsiwa xua as̄u. Barapo cuatro poyobe nantian itamaiquei dubena peitabara weyano yawa pēma werenano. ⁷ Barapo cuatro poyobe jiwana xua xuan as̄u, pon copiya be nēth̄u itabara, ir̄u ich̄n be vaca pebto itabara, ir̄u ich̄n be jiton itabara, ir̄u ich̄n be cotsara itabara, pon pepupunaein. ⁸ Barapo cuatro poyobe daxita barompaya xeina seis po cuarafeinbe. Matātano barompaya ainya itamaiquei xeina daxita matapaeicha pepontha yawano matha iya itamaiquei dubeinya. Mataqueitha, merawithano jopa cuinaya najume copababiyo xua cueicueije Nacomtha pon xua eca barapo pia pecaethopeibiw̄atha, jeye:

"¡Xam pon bichocono nej̄nt̄u coyene xanepanaem,
xua bapana jopa nexainaewa abe peexanaewa!

¡Xam pon jiwi Necanamataxeinaem!

¡Xam Nacom, pon neayapus̄u itorobi
coyenewa xeiname!

¡Xam pon caena bayatha poponeibame xuano
xua anoxuae poponeibame xuano xua bexa
ataya tsitecaeya poponaename!"

jei barapo cuatro poyobe poxonae
cueicueije Nacomtha.

⁹ Pon xua pexeinya pia pecaethopeibiw̄atha eca, pon xua ataya popona, bapon w̄nae jaintatsi, barapo cuatro poyobe w̄nae jainta. Baxua exana tsipei bapon pexeinya j̄nt̄u coyene pexeinaein, matātano tsipei bapon ainya cui coyenewan peexanaein. Matātano bapon jeichichi: "Maisa paj̄nt̄u coyene weiweinan pocotsiw̄an pata tana necatsixaemxae", jeichichi bapon. ¹⁰ Poxonae barapo cuatro poyobe w̄nae jainta,

bapoxonaeru pitiri jiwi xua veinticuatro poyobe xua barompaya pia peenaethopeibi-watha ena, barapomonaer iru pentabocototha umena xua wunaer pejainchinexatsi pon ataya pepoponeibin. Yawa barapo veinticuatro poyobe nanta tepa wejonapenta. Bapoxonaer jeba pon ataya pepoponaer peitabaratha tatsi. Bapoxonaer jeye:

¹¹ “Pata Tanecanamataxeinaer,
yawano xam pata Nacom.

Maisa wunaer xua paexana dubenanaerbiyan
ichamonaertha pata yabara cueicueijeinexa
jinya pexeinya juntu coyene yawa jinya
pexeinya ainya cui coyenewan, yawano
jinya neayapusu itorobi coyenewa.

Baxuan paexanan tsipei xam daxita forotame.
Tsipei xam neichichipaexaer daxota baxuan
forotame”, jei barapo pitiri jiwi.

5

Meje yabara po diwesi xua poxonaer Juan tane Nacom pia diboro

¹ Bapoxonaer tan diboro pecobe weya, po cobe pecoxa weya xua pon xua eca peecaethopeibi-watha. Barapo diboro quiyontsiya matuba yawano barapo diboro nantiyabe muxunene tina yawa catsababa siete xoyobe xua pocotsiwa pecatsababiwa.

² Yawano tan matatsunpin pon peitorobi coyenewa xeina. Yawano jume daunweya yainyaba jeye: “Jintam Nacom tsitatsi pon pejuntu coyene xanepanaer pontha pon xua Nacom daxota copatsina xua barapo pecatsatabiwa petsitsinaxubiwa tsane xua pepataxubiwa tsane barapo diboro?” jei bapon.

³ Ichitha dapocotsin aibi pon itabocototha popona, iru pon xua popona po irathe, iruru pon popona po ire peuma bereca. Tsipei dapon aibi pon bichocono pejuntu coyene xanepanaer xua pontha pon Nacom copata xua peitacupaewatsi xua pepataxubiwa tsane yawa xua peyorobiwa tsane barapo diboro.

⁴ Bapoxonaer bichocono wecoyan tsipei dapon aibi pon xua bichocono pejuntu coyene xeicaer xua pon itacupatsi pepataxubiwa tsane yawa xua peyorobiwa tsane barapo diboro. ⁵ Bapoxonaer caer barapo pitiri jiwi, nejey: “Jopa equeicha wecoyander. Tsipei pon uncu pon wun dutatsi: ‘León’, jei xua po wun jei: ‘neuthu’, jei bapontha Nacom copata xua exana baxua tsipei pia peayapusu itorobiwa canamataxeina. Apra bapon Judá piamonaer jiwi jiwana tatsi, pon Judá caena bayatha tupa. Barichi bapon apra David pia pemomoxi susato jiwana tatsi, pon David Judea nacuapiwi itorobiya pia pepa peewatsinchi caena bayatha. Saya meisa bapontha Nacom copata xua itacupatsi xua tsitacutsina barapo siete xoyobe xua catsataba barapo diboro peamanayabixae xua poxonaer equeicha caewa asu poxonaer tupa naetotha”, jei pitirin.

⁶ Bapoxonaer tan Cordero xua oveja pebto penun, pon uncu Nacom pia pexeinya peecaethopeibi-watha peitabaratha tatsi yawa xua barapo cuatro poyobe peitabaratha tatsi xua xuan asu, yawano pitiri jiwi pia xainya deca tatsi. Barapo Cordero uncu bequein wan xeina xua poxonaer bayatha tsibexotsi jiwi abe pia peexanaer cuiru coyenein tatsi. Barapo Cordero siete po itamaiqueitobe xeina matautano siete pontetobe xeina. Barapo siete itamaiqueitobe yabara caunuta siete po pexeinya juntu coyenebe xua Nacom pia Pejumope tunaxu tatsi xeina. Nacom najumope itoroba daxita iranther. ⁷ Barapo Cordero wecobe pita barapo diboro pecobe weya, po cobe pecoxa weya tatsi pon xua eca pia pexeinya peecaethopeibi-watha. ⁸ Poxonaer Cordero pita barapo diboro, bapoxonaer barapo veinticuatro pitiri jiwi, iru cuatro poyobe xua xuan asu daxita barapomonaer pentabocototha umena barapo Cordero peitabaratha tatsi. Daxita barapo pitiri jiwi barompaya xeina xua pocotsiwan pexeinya petaubabiwan pocotsiwan pewun arpa. Yawano barompaya xeina pocotsiwan pecaapaewan xua pocotsiwan pewun oro nain. Yawa barapo pecaapaewixitha wunba xua pocotsiwan petuxueiwan pocotsiwa tuxusi benata poxonaer tauta. Barapo petuxueiwa yabara caunuta xua pocotsiwa poxonaer

pewæcaewa Nacomtha pomonae xua Nacom piamonae, pomonae pia peantobewichi tatsi. ⁹ Barapomonae pena wei naxuna, jeye:

“Xam maisa pon bichocono nejuntu coyene xanepanaein xua netsitsinaxubiwa barapo siete xoyobe xua catsataba barapo diboro.

Tsipei bayatha pana netsitupame poxonae painta pentoma exaname pata naexanaenexa tsane Nacom piamonae tatsi.

Yawano jiwana itapetame, pomonae tsicamonaexi xua daxita carepaya tsicamonaexitha xua necajume cowuntsiwa tsane.

Matautano jiwana itapetame daxita i dapomonae, pomonae barompaya icha jume penatsipaebiwa.

Matautano daxita carepaya tomaranpiwi jiwana itapetame.

Matautano daxita carepaya nacuanpiwi jiwana itapetame.

¹⁰ Pana necana exaname be pomonae jiwi itorobiya pia pepa peewatsiwichi tatsi pan.

Yawa pana exanameno be pomonae sacerdotemonaepiwi pan xua Nacom pata tanacuichinexa.

Yawano pana exaname pata itorobiya ewatsinexa po cae pin nacuathepiwi”, jei barapomonae poxonae naxuna.

¹¹ Bapoxonae necotan, yawan jume tan xua bichocono pinmonae juinya pomonae Nacom pia matatsunpiwi, xua juinya barapo pexeinya peecaethopeibiwatha matawacaicha umena, yawa xua juinya barapo pitiri jiwi matawacaicha umeinchi, yawa xua juinya matawacaicha umeinchi barapo cuatro poyobe xua xuan asu. Pomonae jume tan bichocono ayei jiwi cacujei. ¹² Bapoxonae barapomonae bichocono jume daunweya paeba, jeye:

“¡Cordero, po Cordero bayatha jiwi tsibexotsi abe pia peexanae coyenewan tatsi, maisa barapo Cordero Nacom tsita juntu coyene xanepanatsi!

Daxota Nacom copata xua bapon xeina pia peayapusu itorobi coyenewa.

Matautano Nacom copata xua bapon xeina daxita pocotsiwan xua Nacom xeina.

Yawano xeina pia peyaputae coyenewan.

Yawano xeina pia peayapusuwa xua daunweya peexanaewa.

Matautano jiwi bewa baru cui

itura jinaena barapon pon Cordero.

Matautano jiwi bewa wuna jainchina barapon pon Cordero.

Matautano jiwi bewa beta exanae juntu

coyene weiweina peexanaenexatsi bapon xua

petsitupaexae jiwi abe pia peexanae cuiru

coyenein tatsi”, jei barapo matatsunpiwi.

¹³ Yawano equeicha jume tan daxita pomonae caena bayatha Nacom forota: pomonae peitabocotha forotatsi, iruno pomonae po cae pin nacuathe forotatsi, iruno pomonae po

ire peuma wetsina forotatsi. Yawano jume tan xua pocotsiwan pin mene mar mentha jinompa. Daxita baxuan carepaya Nacom forota. Jume tan xua jeye:

“Xam Nacom, pon ecame jinya pexeinya neecaethopeibiwatha irano xam Corderom, barabu ataya juntu coyene weiweina paca exanaenabe xua jiwi juntu coyene weiweina paca exanaenabe xua pocotsiwa painya neexanaexaebe. Barabu daxita jiwi paca baru cui itura jineibinabe.

Yawano barabu daxita jiwi wanae paca jainteibinabe.

Yawano barabu paxeineibinamebe peayapuswa xua daunweya painya neexaneibiwabe.

Daxita barapo coyenein ataya tsitecaeya paxeineibinamebe”, jei daxita barapomona, pomona Nacom forota.

¹⁴ Barapo cuatro poyobe xua xuan asu, jeye: “¡Bara bara, bara baxua exanaena!” jei. Pitiri jiwi, pomona veinticuatro poyobe, pentabocototha umena, xua Nacom wanae pejainchinexatsi, pon ataya tsitecaeya pozona.

6

Meje yabara po diwesi xua siete xoyobe xua xuan pecatsababiwan

¹ Bapoxona tan poxona Cordero tsitsinaxuba caewa xua catsataba. Bapoxona caein jiwana pomona cuatro poyobe xua xuan asu jume tan xua daunweya paeba xua be yamuxu busi, nejei: “¡Anetha, taema!” jei. ² Bapoxona tan cawayu pemaingan. Pon cawayutha equeica, bapon bicheibi caequeica. Bapon pexeinya tepa catatsi penamata xatatsinexa. Bapon cawayutha ponataba xua beta penabinexa. Bapon amanayaba pia peaitafaetabiwichi.

³ Poxona Cordero equeicha tsitsinaxuba icha pecatsatabiwa, bapoxona barapo cuatro poyobe jiwana xua xuan asu jume tan, nejei: “¡Anetha, taema!” jei. ⁴ Equeicha patopa ichun cawayu petsobian. Pon tsijuma equeica, bapon catatsi peayapusu itorobi coyenewa xua jiwi pejuntu coyene wepuxana exanaenexatsi po coyene xua juntea pejinompaewa. Yawano peexanaenexa xua pebiwi penajutebinexa. Matautano bapon pin dejona catatsi.

⁵ Poxona Cordero equeicha tsitsinaxuba icha pecatsatabiwa, bapoxona equeicha barapo cuatro poyobe jiwana xua xuan asu jume tan, nejei: “¡Anetha, taema!” jei. Equeicha cawayu tan petsaebian. Pon tsijuma equeica, bapon comaequeica pocotsiwa pepesabiwa. ⁶ Bapoxona barapo cuatro poyobe pia xantha jume tan xua nejei: “Saya cae kilo trigo xu cae denario nantomatsina, pocotsi paratixi xua nantomata caentaqueitha poxona nacuita. Yawano tres po kilobe cebada beno cae denario nantomatsina pocotsi paratixi xua nantomata caentaqueitha poxona nacuita. Ichitha jopa copatsin tsane xua abe exanaena aceite mera yawano vino mera”, jei pon jume tan.

⁷ Barapoxona barapo cuatro poyobe xua opi ducuanaya jume tan yawa nejei: “¡Anetha, taema!” jei. ⁸ Bapoxona cawayu ichun tan pon na daena. Pon tsijuma equeica wan dutatsi: “Pon Petupaen”, jei. Barapo cawayu peputha tapoinchi ichun cawayu. Pon tsijuma equeica wan dutatsi: “Petupaewa Nacua”, jei. Pon tsijuma equeicabe baponbe catatsibe Cordero pia peayapusu itorobi coyenewa tatsi xua baponbe pejiwana bexubinexabe poxona cuatro poyobe necotabe pomona po cae pin nacuathe jinompe, yawano xua pejutebinexabe poxona jiwi naba, yawano pejutebinexabe poxona jiwi piyain poxoru pexaewa aibi tsane, yawano pejutebinexabe poxona jiwi atene, yawano pejutebinexabe unupiwi xua xuan bichocono anaepana.

⁹ Poxonae Cordero tsitsinaxuba ichaxota xua cinco po cuiyobe xua pecatsatabiwa, bapoxonae tan xua be pexaethopaewa ichaxota tauteiba duwei xua tuxusi exaneiba Nacom nexa. Baraxua xua be pexaethopaewa juma bereca tan pomonae bayatha jutebatsi ichamonae, pecaponaexae Nacom Pejume Diwesi xua amsiya awiya pecueicueijeixae. ¹⁰ Pomonae xua bayatha jutebatsi ichamonae, barapomonae jume daunweya paeba, jeye: “Nacom ponxaem pepa Necanamataxeinaem daxita jiwi, Nacom ponxaem bichocono nejuntũ coyene xeicaem. Xam ponxaem pocotsiwan yabara tsiwũnae muxu dubame baxuan xaniwaicha exaname. ¿Eta poxonae exanaename xua poxonae jiwi yabara paebiname xua penatsicuentsiwa xua abe peexanaexae, xuano xua pana yantomatsiname xua nejutebinexa pomonae jinompa po cae pin nacuathe copiya pata tana nejutebixae?” jei barapomonae. ¹¹ Bapoxonae barapomonae juma xatabatsi paparuwan, po paparuwan inyapana. Yawano barapomonae baraichichi: “Abũ cataunxuae paeware beya poxonae yacui opi ducuiya weraweracaena xua cataunxuae jujutebaponaeinchi pomonae irũ Cristo pejume cowũntsiwi. Barapomonae jujutebaponaeinchi pecueicueijeixae Cristo pejume diwesi, icha xua poxonae paichim”, jei Nacom.

¹² Poxonae Cordero tsitsinaxuba pecatsatabiwa xua seis po cuiyobetha, bapoxonae tan xua bichocono ira jijiyata. Xometo bichocono tsaebia tsanaya icha paparuwa ichi, pocotsi paparuwa bichocono tsaebia. Jomocoichato bichocono tsobia tsanaya icha pejana ichi. ¹³ Opitei xua peitabocotha dubena othopeica po irathe tsique, icha be joibo ichi xua jũbaba higuera nae xua pethei othothopeica. ¹⁴ Peitaboco aichurucuae icha be poxonae ichũn ichi xua poxonae mata quiyontaba papera. Matautano demxuwan, petunaetonno equeicha ichawa bepoinya poxonae ira jijiyata. ¹⁵ Bapoxonae daxita pomonae jiwi itorobiya pia pepa peewatsiwichi tatsi xua barapo cae pin nacuathe, barapomonae nantsiyaba. Irũ pomonae pentacaponaewi irũ pomonae copei pexeinaewi, irũ pomonae soldadomonae pia pentacaponaewi xua pomonae jiwi peamanayabeibi jiwi daxita barapomonae nantsiyaba. Daxitarũ pomonae pebusi cui tatayebebiwichi irũ pomonae xua saya penata exanaewi piawan nantsiyabarũ. Ichamonae barapomonae jiwana ibo mũthũntha nantsiyaba. Ichamonae barapomonae jiwana nantsiyaba po ibotontha xua saya bobena xua demxuwan itapatororon tsica. ¹⁶ Barapomonae demxuwan beya yawa iboton beya jeye: “Pana mataperababare xua pata werapaewa tsane xua daxota pon xua eca pia pexeinya peecaethopeibiwatha jopa pata tana netaewa tsane, yawa xua barapo Cordero pecuiyainwa xua pata neperaxa jũbiya exanaeyainwa xua abe pata exanaexae. ¹⁷ Tsipei barapo matacabi patopa po mataqueitha daxita jiwi peraxa jũbebinchi. Dapon aibi pon panepa barapo mataqueitha”, jei pomonae nantsiyaba.

7

Meje yabara po diwesi xua Nacom itapa tina Israel pia pexui tatsi pia pemomoxi susato jiwana piwi tatsi xua peyaitaenexa

¹ Bapoxonae cuatro poyobe tan matatsunpiwi xua iratha umena. Ichũn uncuwa ichaxota pocotsiwa xometo weecoina, ichũn uncuwa ichaxota pocotsiwa xometo bejopiya, ichũnbe epataũtiya uncuabe. Barapo matatsunpiwi jopa copatsiyo xua joibo pejojondenaewa barapo iratha dena, yawa xua pin mar menein dena, yawano naeintha denano. ² Barichi ichũn tan ichũn matatsunpin pon pocotsiwa wetsina pona ichaxota pocotsiwa xometo weecoina. Barapo matatsunpin capona Nacom piawa xua pocotsiwa peyaputaewa piawaxae, pocotsiwa pecatinaewa pon Nacom peayapusũ itorobi coyenewa pexeinaein. Barapo matatsunpin jume daunweya wawai icha matatsunpiwi beya xua cuatro poyobe, po cuatro poyobe pia peayapusũ itorobi coyenewa xeina xua itacũpatsi xua abe exanaena pin mene mar mentha yawa iratha. ³ Barapo matatsunpin jeye: “Jopa abe paexanaeinde iratha yawa pin mene mar mentha, paeware abũ beya poxonae jiwi paitapa tinaein Nacom pia pejume cowũntsiwichi, pon pata Nacom”, jei barapo matatsunpin.

⁴ Jume tan barapomonae yabara, xua ichũn jeye: “Ciento cuarenta y cuatro po jiwimonaebe paitapa tinan xua Israel pia pemomoxi susatomonae jiwana tatsi”, jei.

⁵ Barapo Israel pon icha wun Jacob. Bapon xeina doce po pexantobe tatsi pomonae caena bayatha werapa. Israel pia pexanton tatsi pia pemomoxi susato jiwi tatsi xeina. Pon Judá, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Rubén, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Gad, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. ⁶ Pon Aser, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Neftalí, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Manasés, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. ⁷ Pon Simeón, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Leví, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Isacar, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. ⁸ Pon Zabulón, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon José, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Benjamín, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe.

Meje yabara po diwesi xua pomonae juma xatabatsi pemainya paparuwan

⁹ Bapoxonae equeicha tan ichamonae pomonae bichocono jiwi ayei. Daxita nacuanpiwi jiwanamonae, yawano daxita carepaya tsicamonaexi jiwanamonae, yawano daxita carepaya icha jumexitha pepaebiwi jiwanamonae, yawano daxita carepaya tomaran jiwanamonae. Daxita barapomonae umena ichaxota imoxoyo Nacom pia pexeinya peecaethopeibiwa, yawa xua Cordero peitabaratha tatsi. Barapomonae bichocono pin bicheito xua ichamonae jopa itacupaetsi peununaewa. Daxita barapomonae juma xatabatsi pemainya paparuwan. Yawano barapomonae pecobetha cajjinca xua be coichaxu axu. ¹⁰ Daxita barapomonae jume daunweya jeye:

“¡Wanacom pon xua eca pia pexeinya
peecaethopeiwatha yawano Cordero pon uncua,
naca capanepa xua jopa waatenewa tsane
xua abe waexanaexael!” jei barapomonae.

¹¹ Barapo matatsunpiwi matawacaicha yatoxoroto umena xua pitiri jiwi matawacaicha yatoxoroto umeinchi. Yawa pitiri jiwi matawacaicha yatoxoroto umena xua xuan cuatro poyobe xua xuan asu matawacaicha yatoxoroto umeinchi. Yawano cuatro poyobe xua xuan asu matawacaicha yatoxoroto umena xua Nacom pia pexeinya peecaethopeibiwa matawacaicha yatoxoyoroto umeinchi. Bapoxonae barapo matatsunpiwi irabe taeumendeca barapo pexeinya peecaethopeibiwa peitabaratha. Yawano Nacom wunae jaintatsi. ¹² Barapo matatsunpiwi jeye:

“¡Barabu Nacom juntu coyene weiweina
exaneibatsi pocotsiwa xua beta waexanaewa!
¡Bara ichi tsane!
¡Barabu daxita jiwi wunae jainteibina Nacom!
¡Matautano barabu Nacom xeineibina
pia peyaputae coyenewa!
¡Matautano barabu jiwi jei tsaibi:
‘Nacom maisa pajuntu coyene weiweinan
xua amanaya pata tana neyawenaemxae’,
jei tsaibi jiwi!
¡Barabu daxita jiwi cayabara
baru cui itura jineibina!
¡Matautano barabu xeineibiname jinya neyapusu

itorobi coyenewa, xuano xua xeinaename jinya
 neayapusuwa xua daunweya neexanae coyene!
 ¡Baxuan barabũ ataya xeinaename!
 ¡Je bara ichi tsane!” jei barapo matatsunpiwi.

¹³ Barapo pitiri jiwi jiwana caein neyainyaba, nejei: “¿Jintam barure pomonae
 pemainya paparuwa nama xataba? ¿Eta werena pona?” nejei pitirin. ¹⁴ Jume notan,
 janje: “¡Pon pentacaponae, apara xam yaputaneme jame!” jan. Barapoxonae nejei:
 “Barapomonae apara pomonae werena pona ichaxota poxonae po mataqueitha jiwi
 bichocono atene exaneibatsi. Barapomonae abe pia peexanae coyenewan tatsi Nacom
 tajantemaina, tsipei barapomonae jume cowantatsi xua pon tsitupa barapomonae,
 pon ‘Cordero’ baraichichi. Barapomonae jantũ coyene wuna exanatsi Nacom. Yawa
 pemainya paparuwa jume xatabatsi”, nejei pitirin.

¹⁵ Equeicha nejei pitirin:

“Daxota barapomonae umena ichaxota imoxoyo
 Nacom pia pexeinya peecaethopeibiwa.
 Barapomonae tanacuita dubenanaebiya Nacom
 mataqueitha, yawa merawithano Nacom pia
 pin botha tatsi xua pia nacuatheicha tatsi.
 Pon xua eca pia pexeinya
 peecaethopeiwatha bapon eenequeibina
 barapomonae, tsipei barũ popona.

¹⁶ Bapoxonae barapomonae jopa piyainyo,
 yawa jopa pia meratsino,
 yawa jopa tsaquiwichi xometotha
 xua bichocono jainchi.

¹⁷ Barapo coyene jopa abe exanaeyo
 barapomonaetha, tsipei Cordero Nacom
 Pexanto tatsi, pon uncua ichaxota
 imoxoyo Nacom pia pexeinya
 peecaethopeiwatha, bapon yawena
 xua barapomonae yawenatsi.
 Barapon Cordero barapomonae beta yapu
 eenaechi, icha be poxonae
 pon ovejan peewatsin ichi
 poxonae pia ovejan matabona beta
 ichaxota penaton mene, po meran
 mene xeica, xua peasuwa tsane.
 Bapoxonae barapomonae Nacom itacuere
 mene tsewa exanaena xua pewecoyeixa”,
 nejei pitirin.

8

Meje yabara po diwesi xua siete po pecatsatabiwa xua tabũ ducua

¹ Poxonae Cordero tsitsinaxuba siete po cuiyobetha xua barapo diboro catsataba,
 bapoxonae peitaboco moya ducua saya be ainya dapaeyobe. ² Bapoxonae tan si-
 ete poyobe matatsunpiwi, pomonae xua umena Nacom peitabaratha tatsi. Barapo
 matatsunpiwi daxita barompaya catsibatsi siete xoyobe xua pocotsiwan pecaobiwan,
 po pecaobiwan pewun trompeta. ³ Bapoxonae pirapaeyo patopa ichun matatsun-
 pin. Barapo matatsunpin capatopa xua be coroto xua pocotsiwa oro nain coroto.
 Barapo oro nain corototha boca petuxuei tsapato xua petautsinexa Nacom nexa.
 Barapoxonae barapo matatsunpin yutabotsiya tautabota xua ichaxota pocotsiwa be
 pexaethopaewa, bichocono tuxuei tsurucuae. Barapo matatsunpin uncua ichaxota
 pocotsiwa be pexaethopaewa ichaxota tauteiba petuxueiwan, po petuxueiwan xua

tuxusi exaneiba Nacom nexa. Bapoxonae barapo matatsunpin catatsi nawita xua petuxueiwan. Pomonae Nacom peantobewixaetsi poxonae tsipaebeiba Nacom, barapo jumein yawa muxuna jujuinya Nacom beicha barapo petuxueiwa xua poxonae tauta. Baraxua xua be pexaethopaewa ichaxota xua tauteiba petuxueiwan, baxua Nacom pia pexeinya peecaethopaewa itabaratha tatsi uncua. ⁴ Barapo petuxuei tuxusi mureiwa matatsunpin pia maxu wetajuinyatsi Nacom peitabara beya yawa athabe muxuna jujuinya pejume, po jume xua jiwi poxonae tsipaeba Nacom. ⁵ Bapoxonae barapo matatsunpin barapo oro nain coroto pita, yawa barapo corototha bichocono wunca exana iso itere, po itereton xua taxua barapo petuxusi exanathopeibiwatha. Bapoxonae daxita baxua po irathe xuba, bapoxonae yamuxu busi, yawa jerajerei, yawa ira jijiyatano po cae pin nacuatha tsique.

Meje yabara po diwesi xua trompeta xua pecaobiwan

⁶ Barapo siete poyobe matatsunpiwi daxita barompaya nacui wunaeta pia trompetan xua peobinexa.

⁷ Pon xua copiya, bapon oba pia trompeta. Bapoxonae othopeica be ibotixi, pocotsiwa xua benata ichaxota po eman bichocono aque. Yawano muxuna iso itere othopeica. Yawa muxuna othopeica pocotsiwa be pejanan. Daxita baxuan matatsunpin iratha bebaichica. Bapoxonae ichaxota acoibi po iranbe tsitsiniya, cae iran jiwana wetataxua tsiniya ainya irabe jopa daichiyo. Matautano taxua ichaxota acoibi po unube tsitsiniya, cae unun jiwana wetataxua tsiniya ainya unube jopa daichiyo. Matautano naepanaewan ichaxota acoibi po wexuabe tsitsiniya, cae wexua jiwana wetataxua tsiniya ainya wexuabe jopa daichiyo.

⁸ Bapoxonae equeicha ichun matatsunpin oba pia trompeta. Bapoxonae pocotsiwa be demxuwa taxuapona. Barapo demxuwa xubatsi pin mar mentha, yawano pin mene mar pejana mene tsanaya. Dos po pin mar menebe jopa daichiyo. ⁹ Po pin mar mentha pejana tsanaya baxota duwei werapa, po duwei jinompa baxota. Matautano jeran fobaba pocotsi naein bichocono pin naein.

¹⁰ Bapoxonae equeicha icha matatsunpin xua tres poyobetha, bapon pia trompeta oba. Bapoxonae opiteito, poto pinto jopeica itaboco wetsica po irathe tsique, yawa taxuayecapona icha banaxuto ichi. Barapo pin opiteito jopeica mentha xua yawa jopeica ichaxota ira buxupana mene mene natsibotarucua. Saya xua daxita mentha aibi. Saya poxonae tres po menebe bara cae mentha jopeica, yawa jopeica xua cae ira buxupana mentha. Icha ira buxupana menthabe jopa daichiyo. ¹¹ Barapo pin opiteito wun dutatsi "Amargura", jei, po jume xua "Atsu", jei. Daxota poxonae jopeica barapo mentha mene atsu tsanaya. Pinmonae jiwi werapa poxoru apa barapo peatsu mera.

¹² Bapoxonae equeicha icha matatsunpin xua cuatro poyobetha pia trompeta oba. Bapoxonae jiwana muxunene weabe exana xometo. Ainya muxunenepabe jopa daichiyo. Yawa jiwana muxunene weabe exana jomocoichato. Ainya muxunenepabe jopa daichiyo. Yawa jiwana weabe exana opitei. Icha opitei nacopaba. Poxonae acoibi po opiteibe dudubena tsiniya, bapoxonae cae opiteito jiwana weabe eexana tsiniya. Yawa ainya opiteitobe jopa abe eexana tsiniyaeyo. Po opitei abe exanatsi jopa xanepanaya pentha tsurubenaeyo. Yawano jomocoichato muxunenepa, po muxunenepa abe exanatsi, jopa pentha tsurucuaeyo. Yawa xometo muxunenepa, po muxunenepa abe exanatsi, barapo muxunenepa jopa xanepanaya pentha tsurucuaeyo. Daxota mataqueitha tsiwiyo quiriquirica, yawa merawi bichocono nama.

¹³ Bapoxonae pirapaeyo tan matatsunpin pon be cuiyausi xua juinya pupuna ducua-naebiya itabocotha. Bapon jume daunweya jeye: "¡Pai jiwi tsobenae xua barapo jiwi abe exanaeinchi pomonae jinompa po iratha deque xua poxonae jume taena xua poxonae matatsunpiwi obina trompetan, tsipei acoibi poyobe matatsunpiwi cataunxuae jopa obiyobe anoxuae!" jei bapon, pon be cuiyausi.

9

¹ Bapoxonae equeicha icha matatsunpin xua cinco poyobetha oba pia trompeta. Bapoxonae tan pon xua be opiteito jopeica iratha bayatha, xua peitaboco wejopeica. Bapon catatsi po coyenetha itacupatsi xua pecoibo saranaxubiwa tsane barapo pin mũthũ deca xua ira bereca. ² Bapoxonae bapon coibo saranaxuba. Barapo mũthũ coiboto tsina be pin tsũxũ jujuina, po tsũxũ icha pabi coicha tsũxũ ichi poxonae pin pabi. Barapo tsũxũ po irathe naquitaba exana yawa xometo naquitaba exanano. ³ Barapo tsũxũ weya pupuna sure, xua daxita iranthe pupuna. Barapo sure catatsi, pocotsi coyene icha pũto ichi xua poxonae naca cawata. ⁴ Barapo sure itorobatsi xua jopa abe peexanaewa tsane naepanaewatha xua wexotha xuwa yawa xua tsica naexi. Yawano xua jopa abe peexanaewa tsane naeintha. Saya jame itorobatsi xua abe peexanaewa tsane jiwitha pomonae Nacom jopa itapa tinaeyo. ⁵ Ichitha jopa copatsiyo xua jiwi pejutebiwa tsainchi. Saya jame copata xua saya jiwi atene exanaeinchi beya poxonae cinco po xometiyobe tsane. Barapo peatenewa bichocono atene icha be poxonae ichi xua poxonae ichũn cawatatsi pũto.

⁶ Barapo mataqueitha, po mataqueitha jiwi bichocono atene tsane, cuinaya bewera-pabenaena ichitha jopa cuinaya werapabena tsane.

⁷ Sure be cawayumonaen nacui wũnaeta xua penabinexa. Barapo suremonaen mataina pocotsiwan be tepan be pocotsiwan penainton xuan pewũn oro nain. Mataũta peitabaran be jiwi itabaran. ⁸ Pentanan bichocono antanapiya be yabũxi, pewanon awanoyei be neũthũ wanon. ⁹ Pia pepon tsebocon dubena be penain xuan baxota penayaewatsinexa, po penain pewũn hierro nain matawũn. Pecuarafein busin be cawayu busin poxonae cawayu cacuinaejjinca ainya naein xua cawayu pecaponae naexi xua penabiwa tsane. ¹⁰ Pebosoton be pũton bosoton xua e dubena. Pia pebosotonha itacupatsi xua abe peexanaewa jiwitha xua beya poxonae cinco po xometobe. ¹¹ Barapo suremonaen xeina pia pentacaponaein, po pentacaponaein peewatsin barapo pia pin mũthũ, po mũthũ ira bemũthũ taerucuaeca. Barapo matatsunpin pon suremonaen pia pentacaponaein tatsi hebreo jume wũntha “Abadón”, jei. Seicaya griego jume wũntha “Apolión”, jei. Barapo jume wũntha jeye: “Pon Pecaewitaxubin daxita”, jei.

¹² Baxua weta xua copiya abe peexanaewan, ichitha awiya seica ainya peabe coyenewabe.

¹³ Bapoxonae equeicha icha matatsunpin xua seis poyobetha oba pia trompeta. Bapoxonae jume tan xua cueicueijei cuatro po pentetobe weya. Barapo cuatro po pentetobe umena pemũxũbũrũthũ xua be pexaethopaewa xua ichaxota tauteiba petuxueiwa xua tuxusi exaneiba Nacom nexa. Baraxua xua be pexaethopaewa daxita matapaeicha juma catsababa oro nain. Baraxua Nacom pia pexeinya peecaethopeibiwa itabaratha tatsi uncua. ¹⁴ Barapo matatsunpin xua pon seis poyobetha xua pon pia trompeta xeina barapo jumetha tsipaebatsi barapon. Barapo matatsunpin jeichichi: “Barapo cuatro poyobe matatsunpiwi pomonae maxũ cũbebatsi maxũ isacapende xua pomonae umena ichaxota po mene pin mene, po mene pewũn Eufates”, jei. ¹⁵ Bapoxonae barapo cuatro poyobe sorobabatsi, xua jiwi pejutebiwa tsainchi. Icha bicheito jutebatsi. Dos po bicheitobe jopa jutebichi. Barapo cuatro poyobe bayatha cui wũnaetatsi xua po horathe nexa, yawa xua po matakabithe nexa yawa xua po xometothe nexa yawa po weithe nexa xua poxonae pesorobabiwatsi tsainchi. ¹⁶ Jume tan xua pia soldadomonaen yabara paeba xua pomonae bichocono ayei xainto bicheiton, jeye: “Bapon doscientos millones xeina po soldadomonaen cawayutha pona”, jei.

¹⁷ Xua xuan tan cawayumonaen iche: Pomonaen cawayutha eneica pentacaritha cajjinca penain bocoton, petsobiwanno, yawa pesũjeiwanno, yawa pedaedaenawanno. Barapo cawayumonaen peitabaran be neũthũ itabaran. Barapo cawayumonaen pecoiboton tsina iso itereton tajujinatsi xua tsũxũ tsobia, yawano icha tsũxũno xua coicha sũjei. Yawano icha coicha po tsũxũ coicha daena. ¹⁸ Pin bicheitomonaen werapa tsipei barapo cawayumonaen pecoiboton tsina tajujinatsi iso itere, petsũxũno xua sũjei,

yawa icha tsuxu po coicha bichocono coicha daena. Dos po bicheito cuntiyobe jopa daichiyo. ¹⁹ Barapo cawayumonaein pecoiboton tajujuinatsi pia peayapuswan tatsi yawano pebosoton tsinano. Barapo cawayumonaein bosoton be jomon matanaein. Barapo jomo matanaeintha jiwi abe exainchi.

²⁰ Ichitha ichamonaе pomonaе jopa werapaeyo barapo pewerapaewantha, barapomonaе jopa pentsiyo abe pia peexanae coyenewan. Matautano jopa barapentsiyo xua antobeya wunaе pejainchiwa caurimonaetha. Matautano jopa barapentsiyo po nacom oro nainto nacom, yawa plata nainto nacom, yawa bronze nainto nacom. Yawano wunaе jainta ibo nacom. Yawano wunaе jainta nae nacom. Barapo nacomunmonaе jopa itacupaetsi xua penecotsiwa. Yawa jopa itacupaetsi xua pejume taewa. Yawa jopa itacupaetsi xua peponaewa. ²¹ Matautano jopa barapentsiyo xua ichamonaе pejutebiwatsi. Yawano matauta jopa barapentsiyo po coyene xua mara peexanaewa pia coyenewan tatsi. Yawano jopa barapentsiyo xua penata siwa xeinaewa yabuxitha. Matautano jopa barapentsiyo pecaibi coyenewan.

10

Meje yabara po diwesi xua matatsunpin capona tsica dibiriyo

¹ Xan ponxaein Juan, bapoxonaе equeicha tan icha matatsunpin pon bichocono peayapusun xua peitaboco wetsica pona po irathe tsique. Barapo matatsunpin tsaquinaebowa muxuna deraquiya duneica. Yawano matatsun uncueicatsi coinwawa. Peitabara bichocono itabara pentha icha xometo ichi poxonaе pentha. Yawa pesitobe be isoto coicha xua bichocono coicha tsobia. ² Tsica dibiriyo pecobetha capona xua itutaduta. Po sito xua pecoxa weya pin mar mentha uncua, yawa po sito petsocona werena iratha uncua. ³ Bapoxonaе bapon jume daunweya wawai be poxonaе neuthu jume daunweya fiba. Poxonaе bapon wawai, bapoxonaе jume tan xua be jurujurei yamuxu siete po jumeyobe xua paeba. ⁴ Poxonaе baxua najume weta xua be jurujurei yamuxu siete po jumeyobe xua paeba, pontaban xua tatinaenexa xua baxua paeba. Ichitha jume tan pon peitaboco wenetsipaebica. Nejei: “Moya yawan xeinare yawa jopa tinaeinde xua barapo siete jumeyobe xua be jurujurei yamuxu”, nejei.

⁵ Bapoxonaе barapo matatsunpin pon xua po sito pecoxa weya uncua pin mar mentha yawa xua po sito petsocona weya uncua iratha, bapon namaxu yoicha peitaboco beicha po maxu xua pecoxa weya. ⁶ Matatsunpin pon namaxu yoicha peitaboco beicha po maxu pecoxa weya, bapon jeye: “Nacom, pon ataya popona, bapon itaboco forota. Bapon irano forota, pin mar meneno forota. Daxita ichawan muxuna forotano, pocotsiwa itabocotha dubena yawa pocotsiwa irathano xeina yawa pocotsiwa pin mar menthano jinompa. Barapon peitabaratha tatsi uncuan. Bara xaniwaicha paeban bapon peitabaratha tatsi. Yabara tsiwunaе muxu dutan: ‘Equeicha daxua aibi xua peewatsiwa’, jan”, jei matatsunpin. ⁷ Equeicha barapo matatsunpin jeye: “Poxonaе matabi patopaena po mataqueitha icha matatsunpin obina pia trompeta xua siete poyobetha, bapoxonaе Nacom nacui jatsina xua daxita wetsina. Nacom wetsina xuan pocotsiwan caena bayatha Nacom yabara tsiwunaе muxu duta piamonaе tatsitha, pomonaе Nacom peitorobi jume pepaebiwi. Barapocotsiwan xua Nacom yabara tsiwunaе muxu duta, baxuan jiwi jopa yaputaeyo poxoru jopa Nacom yatsicaewa tsita itutsiyo jiwitha”, jei barapo matatsunpin.

⁸ Barapo jume pon xua itaboco wenetsipaebica, bapon equeicha netsipaeba, nejei: “Ponare yawa pire barapo dibiriyo xua po dibiriyo naitutarucua. Barapo dibiriyo pire, po dibiriyo barapo matatsunpin comauncua. Barapo matatsunpin pon po sito pecoxa weya uncua pin mar mentha, yawa uncua iratha po sito petsocona weya”, nejei. ⁹ Bapoxonaе matatsunpin beya ponan yawa wacan barapo dibiriyo, janje: “Necare barapo dibiriyo”, jan. Nejume nota, jeye: “Moya pire, moya yawa xaema barapo dibiriyo. Poxonaе barapo dibiriyo xaename necoibotha catsjain xeicaena be banto tsane. Ichitha necotsorotha atsu tsane”, nejei matatsunpin.

¹⁰ Bapoxonae barapo matatsunpin wecobe pitan barapo dibiriyo yawa xan. Poxonae xan netsicoibo xeica be banto ichitha tacotsorotha bichocono atsu tsanaya. ¹¹ Bapoxonae netsipaeba, nejei: “Xam bewa equeicha yabara tsiwɔnae muxu dutsiya paebiname po coyene bayatha Nacom yabara paeba jiwi, xua ainya nacuanpiwi, yawa pomonae barompaya pijume pepaebiwi, yawano pomonae jiwi itorobiya pia pepa peewatsiwichi”, jei xua pon netsipaeba.

11

Meje yabara po diwesi xua dos ponbe, ponbe yatsicaewa Nacom pia petapaebinchibe xua petaexaebe pocotsiwa Nacom exana

¹ Bapoxonae necata naeto pocotsiwa xua peepa canaɔbiwa. Yawano matatsunpin nejei xua Nacom tapaebatsi: “Asiya uncuare yawano pire barapo naetiyo. Bapoxonae Nacom pin pia bo beya ponare, yawa bara po bo epa canaɔbare. Yawano epa canaɔbare xua be pexaethopaewa ichaxota tauteiba xua petuxueiwa xua tuxusi exaneiba Nacom nexa. Yawano ununare pomonae baxota Nacom wɔnae jaintatsi, pomonae yatsicaewa Nacom peantobewichi. ² Ichitha jopa pana epa canaɔbinde, po pana pesato beya boca ichaxota Nacom pia pepa pin pia bo tatsi uncua. Tsipei barapo pana ichamonae catatsi pomonae penanapaincha jinompaewi xua icha nacuan werena peponaewi, pomonae Nacom jopa pejume cowɔntsiwichi. Barapomonae abe exanaena Nacom pia pexeinya tomara tatsi po tomara xua barapo cae pin nacuathe xua beya cuarenta y dos po xometobe yacui nacui wetsiya jopaena. ³ Xan itorobin dos poyobe, ponbe xua inta yatsicaewa paebinate xua petaexaebe xua pocotsiwa exanan. Baponbe inta yabara tsiwɔnae muxu dutsiya paebinate jiwitha xua beya un mil doscientos sesenta po matabinbethe tsane. Baponbe jume xatatsinbe pocotsi paparuwa xua axɔn, xua jiwi nama xatabeiba poxoruwecoyei”, nejei matatsunpin xua Nacom tapaebatsi.

⁴ Barapo pebinbe ponbe xua inta paebabe, baponbe ichawa yabara caunutatsibe. Caena bayatha Nacom pia peitorobi jume pepaebin, pon pewɔn Zacarías yabara tina olivo naebe, yawa yabara tina ainyawabe pocotsiwa petabuyubeibiwa pecoichan. Barapocotsiwanbe caunuta xua ponbe inta paebabe. Barapo ainya olivo naebe yawa barapo ainyawabe xua pecoichan petabuyubeibiwa umena pentacaponaein peitabaratha tatsi, pon po cae pin nacuepiwi pia Pecanamataxeinaeinchi tatsi. ⁵ Icha ichamonae ichichipa xua baponbe abe peexanaewatsibe baponbe itacɔpatsibe xua weraweraca peexanaewabe barapomonae pecoiboto tsina icha be pocotsi coyeneya metha ichipabe xua poxonae daxita weraweraca exanabe poxonae be isoto tajuinatsibe. Barapo isototha baponbe omeicha tautabe pia peitafaetabiwichi jiwitha. Barichi werapaena pomonae ichichipa xua baponbe abe peexanaewatsibe. ⁶ Baraponbe xeinate pia peitorobi coyenewa xua itacɔpatsibe peitaboco acatsiwa tsanebe xua jopa ema peruneicaewa tsane. Baxua itacɔpatsibe xua exanabe poxonae baponbe po matabitha cataunxuae Nacom tapaebi ducuaebiyatsibe. Matauta baponbe pia peitorobi coyene xeinate xua meratha equeicha pejana tsanaya exanabe. Matautano baponbe itacɔpatsibe xua exanabe poxi xua abe exana iratha. Ainya coyenein baponbe exanabe xua xuan be pocotsi coyeneya ichichipabe xua peexanaewabe.

⁷ Poxonae baponbe nacui wetsinabe xua tapaeba ducuaebiyabe xua Nacom tapaeba ducuaebiyatsibe, bapoxonae juinaena po muthɔ pin muthɔ tsina pon ayei pon bichocono abe peexanaein. Baraponbe be xua bɔtsibe natsicotainchi yawa amanayabinchibe xua tupa peexanaenexatsibe. ⁸ Petɔpaeinbe saya pesatotha bocaenabe tomara namtotha, po pepa tomaratha ichaxota matha naetotha tupa exanadutatsi pon jiwi Pecanamataxeinaein xua baponbe pia Pecanamataxeinaeinchibe tatsi. Jiwi barapo pepa tomara yabara jeichiya jeye: “Barapo Jerusalén tomarapiwi apara be ‘Sodoma tomarapiwi’, jei, yawa barichi be ‘Egipto nacuapiwi’, jei”, jei jiwi. Jiwi barapo Jerusalén tomarapiwi yabara caunutsiya paeba tsipei caena bayatha Sodoma tomarapiwi abe peexanaewimonae. Yawa irɔ Egipto nacuamonaepiwi abe peexanaewimonae,

icha barapo pepa tomaramonae ichi xua Jerusalén tomara xua abe exana. ⁹ Daxita pomonae tomarapiwi jiwana, iruno tsicamonaeyo jiwana, iruno pomonae barompaya icha jumexitha pecueicueijeji jiwi jiwana, iruno daxita pomonae nacuanpiwi jiwana, daxita barapo jiwimonae taeumenaena barapo petupaeinbe. Baponbe petupaeinbe bocaenabe acoibi po matabibibe yawa xua equeicha bara caetono. Daxita barapomonae pomonae taeumena, jopa copatsi tsane xua ichamonae bara petupaeinbe pemuthuthu xubiwa tsainchibe. ¹⁰ Pomonae xua jinompaena po irathe junte miya jinompaena xua petupaexaebe baponbe. Daxota daxita barapomonae juntu coyene weiweinaena, yawano daxota barapomonae nantiya nacatsibina pocotsiwan amanaya penacatsiwan. Barapomonae baxua exanaena tsipei ajumeitafaetabi tsane pocotsiwa paebabe Nacom nexa, ponbe Nacom peitorobi jume pepaeinbe.

¹¹ Ichitha poxonaе yapu caewinaba acoibi po matabibibe yawa xua equeicha bara caeto bocaenabe, bapoxonae equeicha Nacom asu exanaenabe. Bapoxonae asiya uncuaenabe. Daxita pomonae xua poxonaе baponbe taeinchibe, bichocono junuwina. ¹² Bapoxonae baponbe jume taenabe xua pon itaboco wetsica jume daunweya baraunchi tsainchibe, jeji tsainchibe: “¡Bara wepajuinamebe!” jeji tsainchibe. Bapoxonae baponbe itaboco beicha juinyaenabe tsaquinaebowatha yawa pu taeumenaеinchibe pia peaitafaetabi jiwichi. ¹³ Barapoxonae caena ira jijiyatsina bichocono. Ichaxota diez po bonbe uumena tsiniya cae bon jiwana othopa jujuincaena, nueve po bonbe tsiniya jopa daichi tsane. Siete mil po pebiwi matabuxumonaеbe werapaena ira pejijiyatsixae tsane. Pomonae jopa werapae tsane bichocono junuwina daxota Nacom wunaе jainchinchichi, po Nacom itaboco beequiya.

¹⁴ Bayatha nacui weta xua dos xoyobe xua daxita jiwi atene tsane bichocono. Ichitha imoxoyo equeicha methaunxuae tsane ichawa pocotsiwa acoibi po cuiyobe nexa pocotsiwa xua jiwi bichocono atene tsane.

Meje yabara po diwesi poxonaе xua matatsunpin xua pon siete poyobetha oba pia trompeta

¹⁵ Barapo matatsunpin xua pon siete poyobetha pia trompeta oba. Bapoxonae pejume itaboco wetsica jume daunweya jeye:

“Po coyene xua jiwi itorobiya peewatsiwatsi
barapo cae pin nacuathe, anoxuae barapo peitorobi
coyenewa Nacom pon Wanacanamataxeinaein
piawa iruno Mesías pon Nacom pia
peitorobarecaein, bapon piawa tatsi.
Baponbe daxita jiwi itorobiya ewatsinchi
barapo cae pin nacuathe xua ataya tsane”,
jeji pomonae xua itabocotha jume
daunweya wawai.

¹⁶ Bapoxonae tan barapo pitiri jiwi, po pitiri jiwi veinticuatro poyobe. Barapo pitiri jiwi ena pia pexeinya peenaethopeibiwatha, Nacom peitabaratha tatsi. Barapo pitiri jiwi pentabocototha irabe taeumendeca xua Nacom wunaе pejainchinexatsi. ¹⁷ Barapo pitiri jiwi jeye Nacomtha:

“Xam pata Nacom, ponxaem jiwi
Necanamataxeinaem pajuntu coyene
weiweinan xua pocotsiwa painta neexanaexae.
Xam barapo pata Nacom, pon
neayapusu itorobi coyenewantha neexanaein.
Xam pon anoxuae ataya poponeibiname yawa
xua caena bayatha ataya poponeibameno,
yawano xua bexa tsane ataya poponeibinameno.
Tsipei anoxuae po mataqueithe nama tamropata
pitabame jinya neayapusu itorobi coyenewa
xua tsita itutame xua poxonaе daxita

carepaya nacuanpiwi itorobiname.
¹⁸ Daxita nacuanpiwi cacaseba, ichitha
 anoxuae matabi patopa, po mataqueitha
 bichocono anaya atene exanaename
 barapomona abe peexanaexae.
 Yawano barapo mataqueitha daxita jiwi
 yabara paebiname xua
 penatsicuentiwa pomona xua wuna
 peexanaewi iru pomona xua abe peexanaewi.
 Daxita barapomona bayatha werapa.
 Barapo mataqueitha iru pomona xua cata
 nacuita, pomona jinya neitorobi jume pepaebiwi,
 iru pomona xua pejuntu coyene xanepanaewi,
 barapomona matabuxumonaebe catsibiname
 pocotsiwan xua bayatha juntana jebame
 xua nematomatsiwan.
 Barichi catsibiname pomonaetha pomona jopa
 judiomona naexanaeyo pomona bequein bara
 ichamona saya pecui pawimona, matautano
 bequein bara ichamona peainya cui jiwimona.
 Ichitha xam saya bara catsita najura.
 Matautano barapo mataqueitha daxita omeicha
 atene exanaename pomona abe peexanaewi
 barapo cae pin nacuathe”,
 jei barapo pitiri jiwi.

¹⁹ Bapoxonae Nacom pin pia bo tatsi nacoibo saranaxuba xua itabocotha. Barapo Nacom pin pia botha jiwi tane pocotsiwa xua ichawa yanta xatatababota xua be caja. Barapo cajatha boca Nacom petinae diwesi, pocotsiwa xua Nacom yabara tsiwuna muxu duta pomonaetha pomona pia petanacuichiwichi pocotsiwa bexa Nacom taexanaena xua barapomona taexanaeinchi. Bapoxonae yamuxu busi xua be jurujurei yawa jerajerei. Matautano ira jijiyata, yawano nawita othopeica xua dederawa, pocotsiwan benata poxonae po eman ichaxota bichocono aque.

12

Meje yabara po diwesi xua petsiriwa yawa pon pinyo, pon be jomowabi, bapon pon be Joyoinya

¹ Bapoxonae itabocotha naituta xua pocotsiwa bexa exanaena po cae pin nacuathe tsique. Tan petsiriwa powa nama xatata po paparuwa bichocono wuna, icha be xometo ichi poxonae pentha. Bapowa nataxu yutuuncua jomocoichatoha. Barapowa mataina tepa, po tepatha doce xoyobe xeina opitei. ² Bapowa yaporowa jina pexuyo. Bapowa wawai tsipei atene, poxoru pexuyo naexana imoxoyo. ³ Bapoxonae itabocotha equeicha naituta ichawa. Tan pon pinyo, pon be jomowabi, pon be Joyoinya. Bapon pon be Joyoinya bichocono tsobia yawa siete po pentasipabe xeina yawa diez po pentetobe xeina. Daxita carepaya pentasipantha mataina tepan. ⁴ Pebosototha ira bereca bebaireca opitei. Ichaxota acoibi po opiteitonbe dudubena tsiniya cae opiteiton jiwanan abe eexana tsiniya. Barapon pon be Joyoinya ewatuncua, yabuyo ewatuncuatsi, powa xua imoxoyo exanaena pexuyo. Bapon pon be Joyoinya ichichipa xane pexuyo poxonae naexanaena. ⁵ Barapo petsiriwa tanaexanatsi pexuyo pebin wato. Barapo pexuyo, po pexuyo poxonae wichaba itorobiya ewata pomona jinompa po cae pin irathe xua daxita carepaya nacuantha. Bapon daunweya beta ewata barapomona icha pon oveja peewatsin ichi xua poxonae daunweya beta ewata ovejan. Bapon exana baxua naewa xua be naebarupato. Poxonae barapo pexuyo naexana, pitatsi yawa capoinchi Nacom pia pexeinya peecaethopaewatha beicha. ⁶ Bapoxonae barapo petsiriwa naetsiriwa ira

xuepana susato tsurucuae nacua beya. Baxotiya Nacom tsiwunaeta xua pia ira nexa yawa xua bapowa pexaewa peapatsinexatsi mil doscientos sesenta matabibetha.

⁷ Bapoxonae itabocotha matatsunpiwi naba. Matatsunpin pon pewun Miguel, bapon matabapona pia matatsunpiwi. Iruru pon be Joyoinya, bapon pia matatsunpiwi matabapona. Daxita barapo bicheito nantiya naba. ⁸ Ichitha pon be Joyoinya iru pia matatsunpiwi tatsi jopa cui jupaetsi xua Miguel peamanayabaxubiwatsi yawa xua pia matatsunpiwi tatsithano. Daxota pon be Joyoinya yawa pia matatsunpiwi tatsino jopa cui jupaetsi xua peitabocotha pejinompaewa tsipei amanayabapentatsi. ⁹ Bapon pon be Joyoinya yawa pia matatsunpiwi tatsino itawetsicatsi po irathe tsique. Bapon pon be Joyoinya pon caena bayatha yabara paebatsi xua jeye: “Bapon apara jomo”, jei. Bapon caurimonae pia pentacaponaein tatsi xua icha wun pewun Satanás. Bapon pon jiwi pemuxujainyabeibin pomonaetha pomonae jinompa daxita po cae pin irathe tsique.

¹⁰ Bapoxonae itabocotha pejume jume tan pon xua jume daunweya wawai, jeye:

“Anoxuae Nacom naca capanepa exana pia peayapusu itorobi coyenewatha xua pon be Joyoinya jopa wanacanamataxeinaenexa.

Yawano anoxuae Wanacom itorobiya ewata daxita carepaya nacuantha pomonae jinompa po cae pin irathe tsique.

Yawano anoxuae Nacom Mesías catatsi pia peayapusu itorobi coyenewa pon Nacom pia peitorobin tatsin.

Daxita barapo coyenein anoxuae pata, tsipei pon be Joyoinya itawetsicatsi po cae pin irathe tsique.

Pon Nacom itawetsica, bapon wajiwimonaetha, pomonae jume cowunta Nacom, abeya muxujainyabeibatsi merawitha yawa matabaqueithano xua Nacom peitutha tatsi.

¹¹ Wajiwimonaetha pomonae iru xua pejume cowuntsiwi Nacom, barapomonae amanayaba bapontha pejume cowuntsixae xua Mesías tsitupa barapomonae.

Bapon pon Cordero, xua pon oveja pebto penun. Yawano amanayaba bapomonae tsipei Mesías yabara paeba dubenanaebiyatsi pocotsiwa bapon barapomonae taexainchi.

Barapomonae amanayaba, tsipei najei: ‘Bequein bapon pon be Joyoinya ichichipa naca juteba ichitha jopa junuwichi xua werapaeinchi. Awiya jume cowunta dubenanaebiyaeinchi Nacom’, najei.

¹² ¡Pajuntu coyene weiweinare pomonae itabocotha painya nejinompaexae!
¡Daichitha tsobenae pomonae jinompa po cae pin nacuathe deque, yawano xua xuan pin mar mentha jinompa, tsipei Satanás bara bereca bichocono anaepanaya patopareca!
Bapon Satanás yaputane xua jopa bayatha tsaibi tsane poxonae abe exaneibina po cae pin nacuathe deque”, jei.

¹³ Poxonae barapon pon be Joyoinya, pon Satanás itawetsicatsi po cae pin irathe tsique, bapoxonae yabũyo barainatsi, powa xua bayatha pexuyo exana pebin wũto. ¹⁴ Ichitha Nacom, barapowa pecuarafe catatsi, ainya cuarafebe xua cuiyausi piawan. Daxota Nacom cata xua bapowa tajũ beya pepupunaenexa ichaxota po ira beya xua Nacom bayatha tsiwũnaeta, xua pepupunaenexa pon be Joyoinya weya. Barapowa pupuna barapo ira xuepana susato tsurucuae nacua beya. Nacom apata bapowatha pexaewa tres po weibetha yawa xua seis po xometobetha. ¹⁵ Bapon pon be Joyoinya pecoiboto tsina mene sutaba xua peawũbonexa xua bapowa pemonoxubinexa tsainchi awũbotha. ¹⁶ Ichitha ira bapowa yaweinchi. Barapo ira, naira yetaxuba yawa mene apaxoreca, po mene bayatha sutaba bapon pon be Joyoinya. ¹⁷ Bapoxonae bapon pon be Joyoinya bichocono anaepana bapowatha. Daxota bapon nainya pona bapowa piamonae tatsi beya tatsi xua penabinexa. Bapon ba xua bũtsi pomonae jume cowũnta Nacom penajume caitorobi diwesi xuano xua paeba dubenanaebiya Jesús pejume diwesi. ¹⁸ Bapoxonae bapon pon be Joyoinya, pon be jomowabi, pin mar mene itapa taetabotha uncuu xua pewabinexa ichamonae xua peyawenaenexatsi.

13

Meje yabara po diwesi pon ayei, pon be Corei, irũno xua ichũn pon ayei, pon be Metsametsawa

¹ Bapoxonae ichũn tan pon pin mar mene juina pon ayei, pon be Corei. Bapon xeina siete po pentasipabe yawa diez po pentetobe. Daxita carepaya pentetontha mataina tepan. Daxita carepaya pentasipantha tinaduba pewũnxi, po wũnxi xua Nacom abe yabara paebatsi. ² Barapon pon be Corei be neuthũ xua yaquiquibia. Petaxu be tson taxu. Pecoiboto be neuthũ coiboto. Pon petsobian, bapon pon be Joyoinya cata pia peayapusũ coyenewa, pon be Corei catatsi. Yawano muxuna catatsi pia pexeinya peecaethopaewa. Yawano catatsi pia peayapusũ itorobi coyenewa. ³ Cae matasipatha xua pon be Corei matasipa, wan ducua be poxonae xua pocotsin tũpaena. Ichitha barapo matasipa naawanxaebi exana. Daxita barapo irathe nacuanpiwi nabenaeca, tsipei naawanxaebi exana barapo matasipa. Daxota po irathe nacuanthepiwi jume cowũnta bapon, pon be Corei jume cowũntatsi. ⁴ Barapon pon be Joyoinya wũnae jaintatsi, jiwi wũnae jainta, tsipei barapon cata pia peayapusũ itorobi coyenewa pontha pon be Corei. Barichi pon be Corei wũnae jaintatsi, jiwi wũnae jainta. Jiwi jeye: “Maisa barapon, pon be Corei ainya cui, peayapusũ itorobi coyenewa pexeinaein. Dapon aibi pon pecui jũpaewatsi xua bapon peamanayabixubiwatsi”, jei jiwi.

⁵ Yawano barapon, pon be Corei copatatsi xua Nacom abe peyabara paebinexatsi. Yawano barapon, pon be Corei copatatsi xua jiwitha peitorobinexa cuarenta y dos po xometobetha. ⁶ Bapoxonae barapon, pon be Corei bara baxua exana, xua copatatsi. Bapon Nacom abe yabara paebatsi. Mataũtano Nacom pin pia bo tatsi abe yabara paebatsi. Mataũtano Nacom piamonae tatsi, pomonae jinompa itabocotha abe yabara paebatsi. ⁷ Yawano barapon, pon be Corei copatatsi, xua bena xua beinchi pomonae Nacom pejume cowũntsiwichi, beya xua poxonae barapomonae amanayabapentsinchi. Yawano barapon, pon be Corei catatsi peitorobi coyenewa, xua daxita jiwi peitorobiwatsi xua pomonae daxita carepaya tsicamonaexi peitorobiwatsi. Mataũtano catatsi xua daxita carepaya tomaranpiwi peitorobiwatsi. Mataũtano catatsi xua daxita carepaya pomonae icha jumeintha pecueicueijeijiwi peitorobiwatsi. Mataũtano catatsi xua daxita carepaya nacuanpiwi peitorobiwatsi. ⁸ Barapon, pon be Corei wũnae jaintatsi xua daxita carepaya po cae pin irathe nacuanpiwi wũnae jainta. Barapomonae jopa wũn dubenaeyo diborotha, po diboro pon Cordero xeina pecobetha, pon Mesías pon naetotha tũpa. Barapo diborotha Nacom wũn duba pejume cowũntsiwichi caena bayatha poxonae Nacom aena forota nacua. Pomonae wũn dubena barapo diborotha jopa weweracaeyo.

⁹ Paxam pomonae painya nejume cowuntsi jiwi pam. Icha pamuxu dubename, moyo pajume naitaeware xua pocotsiwa Nacom pia Pejumope t̄nax̄u tatsi paca tsipaeba xua meje:

¹⁰ “Pomonae xua ich̄un waetabatsi xua atene peexanaenexatsi barapomonae xuya bara teicaeinchi ichamonae atene peexanaenexatsi tsane.

Pon xua cusitha namawainta xua ich̄un bexubatsi, bapon xuya cusitha bexubinchi”, paca jei Nacom pia Pejumope t̄nax̄u tatsi.

Daxota pomonae pejume cowuntsiwi Nacom bewa saya j̄nt̄u coyene daunweya jinompae xua xuya jopa taexanae tsane ichamonaetha xua bequein abe taexanaeinchi ichamonae. Yawano bewa jume cowanta dubenanaebiyaena Nacomtha.

¹¹ Bapoxonae tan ich̄un pon ayei pon be Metsametsawa. Bapon ira wejuina. Yawa mate ducua icha Cordero ichi pon oveja pebto pen̄n. Daichitha poxonae cueicueije, be poxonae cueicueije pon be Joyoinya. ¹² Bapon xeina peayapus̄u itorobi coyenewa, po peayapus̄u itorobi coyenewa xeina pon be Corei. Bapon pon be Metsametsawa, daxita jiwi itorobatsi xua w̄nae pejainchinexatsi pon be Corei, pon pia coutha nantasipa awanxaeibi exana. ¹³ Yawano pon be Metsametsawa exana nawita xua pexeinya petsita it̄tsi coyenewa. Yawano bapon exana xua itorobica itaboco wetsica xua pocotsiwa be isoto xua po cae pin iratha tsique xua jiwi petaenexa. ¹⁴ Barapon pon be Metsametsawa petsita it̄tsi coyenewa exana pon be Corei peitabaratha tatsi. Barapo petsita it̄tsi coyenewantha bapon muxujainyaba xua muxujainyabatsi pomonae jinompa daxita carepaya nacuantha xua barapo cae pin nacuathe. Bapon pon be Metsametsawa itoroba jiwitha xua peexanaenexa ibo nacom xua canaxobiya exana pon be Corei, pon xua xeina pentasipatha xua dejona wan, pon bequein wan ducua, ichitha jopa t̄paeyo. ¹⁵ Barapon pon be Metsametsawa peitorobi coyene catatsi xua as̄u exana barapo ibo nacom pon be Corei. Poxonae barapo ibo nacom as̄u tsane, cueicueije tsane yawa jutebina daxita pomonae jopa w̄nae jainchichi. ¹⁶ Yawano bapon itoroba ich̄untha xua daxita cobe juma tinaeinchi po cobein pecoxa weya, yawa xua ichacuitha itapa tinaeinchi, xua pomonae jopa ainya cuiyiyo, ir̄ur̄u pomonae xua peainya cui jiwi, ir̄u pomonae xua copei pexeinae jiwi, ir̄u pomonae peacopeibi jiwino, yawano pomonae pia coutha penata exanae jiwi, ir̄no pomonae xua pebusi tatayebebiwichi. ¹⁷ Dapon aibi pon itac̄upatsi xua piawan comoca yawa xua caenaeta piawan icha jopa xeinaeyo barapo pecobe juma tinaewa. Barapo pecatinaewa pon be Corei pew̄n tatsi, ichacuitha barapo pecatinaewa saya número xua pew̄n tatsi pia número tatsi.

¹⁸ Beta pananta xeinare xua yabara painya neyaputaenexa baxuan. Pon xua yaputane baxua b̄u bapon yabara nanta xeina xua pon be Corei pia número tatsi. Barapo número j̄pa xua pebin pew̄n. Barapon pon be Corei pia número tatsi baxue: seiscientos sesenta y seis.

14

Meje yabara po diwesi xua pomonae nax̄na 144, 000 po bicheitomonae matab̄x̄ube

¹ Bapoxonae tan Cordero xua oveja pebto pen̄n xua uncua demxuwatha, po demxuwa pew̄n Sión. Barapo Cordero bar̄u uncua ciento cuarenta y cuatro mil po bicheitomonae matab̄x̄ube. Barapo ciento cuarenta y cuatro mil po bicheitomonae matab̄x̄ube daxita carepaya itapa tinatsi barapo Cordero pia w̄n tatsi, yawano xua Paxa tatsi pia w̄n tatsino. ² Bapoxonae jume tan pejume itaboco wetsica. Barapo pejume bichocono jume daunwei be poxonae xua ainya pin menein busin xua poxonae taj̄u wemene othopeica. Yawano be poxonae xua yam̄x̄u nameta, yawa be poxonae ainya busin xua pinmonae tanbaba. ³ Barapomonae pomonae tanbaba pexeinya wei nax̄na Nacom pia pexeinya peecaethopaewa itabaratha tatsi, xuano xua barapo cuatro poyobe peitabaratha tatsi xua xuan as̄u, yawano xua pitiri jiwi pia peitabaratha tatsi.

Ichamonae jopa itacupaetsi barapo wei xua peyaputaewa xua po wei naxuna barapomona. Saya jame barapomona, pomona ciento cuarenta y cuatro mil po bicheitomonae matabuxabe yaputane barapo wei xua pomona po irathepiwi jiwamonae, pomona bayatha Cordero capanenebiya abe pia peexanaewan weya poxona tsitupa barapomona. ⁴ Barapomona jopa nataxobiyo xua penasi cui exanaewa xua yabuxitha pejeinya enaexae. Yawano barapomona exaneiba daxita xua pocotsiwan Cordero itoroba xua poxona barapomona napuna poneiba ichaxota Cordero poneiba. Barapomona capanenebiyatsi, Nacom capanenebiya xua daxita carepaya jwi jiwamonae tatsi xua bapomona pecana exanaenexatsi pomona bichocono pepa pejuntá coyene xanepanaewi Nacomtha iruno Corderotha pomona xua copiya, pomona xua Nacom pejume cowuntsiwichi. ⁵ Barapomona jopa penaerabiwi tsipei barapomona bichocono pepa pejuntá coyene xanepanae jwi, Nacom peitabaratha tatsi. Barapomona jopa xeinaeyo xua penatsicuentsiwa Nacom peitabaratha tatsi xua abe peexanaexae.

Meje yabara po diwesin xua cueicueijei acoibi poyobe matatsunpiwi

⁶ Bapoxona tan ichun matatsunpin xua pupuna itabocotha. Barapo matatsunpin capana pexeinya jume diwesi po diwesi xua ataya tsiteca, po diwesi xua jwi pecapanenebiwatsi abe pia peexanaewan weya. Barapo diwesi daxita carepayan jwi nexa: pomona daxita nacuanmonaepiwi nexa, iruno pomona tsicamonaexipiwi nexa, iruno pomona barompaya icha jumein pecueicueijeiwi nexa, iruru daxita tomaranpiwi nexano. ⁷ Barapon jume daunweya paeba, jeye: “Pacunuwiya jinompare Nacom xua beta painya nejume cowuntsiwa. Yawano Nacom wuna pajainde. Tsipei anoxuae nama barapo matacabi patopa po mataqueitha Nacom yabara paebina jwi xua penatsicuentsiwa xua abe peexanaexae. Wuna pajainde pon exana itaboco, xuano xua exana pin mar mene, yawa exana ira buxupana mene”, jei barapon pon jume daunweya paeba.

⁸ Ichun matatsunpin cotacaya patopa, bapon jeye: “¡Bayatha Babilonia tomarapiwi wetaxotsi po tomara pepa tomara, tsipei barapo tomarapiwi bichocono abe exana! ¡Barapomona cuiduba ichamonae xua ichamonae abe peexanae coyene peexanaenexa xua penasi cui exanaewa tsane yabuxitha, xua iru pebiwitha!” jei matatsunpin.

⁹ Bapoxona ichun matatsunpin patopa, bapon jume daunweya jeye: “Icha ichun wuna jainta ibo Corei nacomtha xua saya canaxoba yawa icha itapa tinatsi, yawa ichacuitha xua icha cobe juma tinatsi, bapoxona Nacom bichocono casebina bapon xua bapon casebinchi. ¹⁰ Bapoxona Nacom bichocono abe exanaena bapon. Baxua Nacom exanaena xua bayatha bapon peyabara nacui wunaetsixaetsi. Jopa juniya exanae tsane poxoru bichocono Nacom yabara anaepana. Barapon bichocono atene tsane poxona Nacom tautsina barapon isototha, yawa xua po tsuxu, tsuxu daena, po tsuxu pewun azufre matawun. Nacom baxua exanaena pia matatsunpiwi peitabaratha tatsi yawa Cordero peitabaratha tatsi. ¹¹ Po isototha Nacom tautsina bapon, barapo iso tsuxu athabe jujuneibiyaena ataya. Barapo petautsiwa jopa itacupae tsainchi xua pewetsiwa mataqueithano, yawa merawithano. Barapo isototha tautinchi pomona pon be Corei wuna jaintatsi xuano xua barapo ibo Corei nacom wuna jaintatsi, yawano xua barapomona itapa tinatsi barapo Corei pia wuntha tatsi”, jei matatsunpin.

¹² Pomona exana dubenanaebiya po coyene Nacom itoroba pia peitorobi coyenewantha, yawano xua Jesús beta jume cowanta dubenanaebiyatsi, barapomona apara xaniwaicha Nacom piamona tatsi. Barapomona tsita itapeinya xena xua Nacom piamonaetsi tsipei barapomona bepijawa jopa aitaconaeyo xua peewatsiwa pocotsiwa bexa Nacom exanaena pomonaetha, pomona abe exana Nacom piamonaetha tatsi.

¹³ Bapoxona jume tan pejume xua peitaboco wenebaraichica. Nejei: “Baxua tinare: ‘Bu bara juntu coyene weiweina pomona jume cowuntsiya werapaena Jesthath, pon jwi Pecanamataxeinaein’, jei”, nejei.

Nacom pia Pejumo pe tuxaxu tatsi jeye: “Aa baxua. Yawa wetsina pia penacuichiwan po penacuichiwan Nacom taexainchi yawa nafifina ewatsina Nacom pia nacuatheicha.

Po coyene xua barapomonaē jūntū coyene xanepana dubenanaēbiya, yawa po coyene xua barapomonaē beta taexana dubenanaēbiya xua ichamonae taexana dubenanaēbiyatsi, barapo jūntū coyene barapomonaē yawa ponaena Nacom pia nacua beicha tatsi”, jei Nacom pia Pejumoŋe tūnaxū tatsi.

Meje yabara po diwesi xua matatsunpiwi cusin caucuboba po cae pin irathe tsique

¹⁴ Bapoxonae equeicha tan tsaquinaebowa xua inyapana. Barapo tsaquinaebo jumatha eca ponxae itaboco wetsica pona, ponxae Nacom peitapetsinxae. Bapon mataina tepa, yawa comaeca pocotsiwa be cusi xua xuiyoi. ¹⁵ Bapoxonae icha matatsunpin Nacom pin pia bo weya pona. Bapon jume daunweya wawai pon tsaquinaebo jumatha eca beya, jeye: “jBarapo cusi caucubobare yawa jore pocotsiwa xua naweta tsipei barapo matacabi patopa, po mataqueitha naweta po cae pin irathe deque!” jei matatsunpin. ¹⁶ Bapoxonae pon tsaquinaebowatha eca yawa xua cusi comaeca, barapo cusi caucuboba po cae pin irathe, daxita canacui wetsiya exana.

¹⁷ Bapoxonae equeicha ichūn matatsunpin Nacom pin pia bo weya pona xua itaboco weya. Barapo matatsunpin cusi capona, po wato bichocono xuiyoi. ¹⁸ Bapoxonae equeicha icha matatsunpin pocotsiwa be pexaethopaewa weya pona ichaxota duwei tauteiba xua tuxusi exaneiba Nacom nexa. Barapo matatsunpin canamataxeina xua tauta pecana exanaewa. Barapo matatsunpin irū cusi xeina, po wato xuiyoi. Yawa bapon jume daunweya wawai icha matatsunpin beya pon irū pia wato xeina cusi. Bapon jeye: “jBarapo cusi caucubobare yawa nore uva peparun xua po cae pin irathe deque dubena tsipei bayatha naweta!” jei barapo matatsunpin. ¹⁹ Nexata barapoxonae barapo matatsunpin cusi caucuboba yawa nota uva peparun. Yawa barapo uva peparun bebaireca pin pecacubi fetotha xua pemene yucaenexa barapo uva cuei. Icha jiton ichi xua bichocono daunweya cuba uva cuei, bara jūta ichi Nacom jiwitha, xua poxonae bichocono atene exanaena jiwitha xua abe peexanaexae jiwi. ²⁰ Barapo uva cuei tomara juma beya cuba. Barapo pecacubi feto wetsina jujuina petsobia mera, be pocotsiwa pejana, beya xua cawayu ponxo jayeichatsi yawa xua iratha iya xua tajū beya xua trescientos po kilómetrobe. Icha jiton ichi uva cuei xua tomara juma beya cuba Nacom jiwitha barichi tsane bichocono atene exanaena pomonaetha pomonaē abe peexanaewitha, beya poxonae pejanan tajū ayei tsoponae tsane.

15

Meje yabara po diwesi xua matatsunpiwi capana siete po coyenewabe xua po coyenewa peabe cui coyenewa

¹ Bapoxonae equeicha tan peitabocotha icha pin petsita itūtsi coyenewa xua nebe-naeca. Tan siete poyobe matatsunpiwi yawa xua cajjinca siete po cui coyenewabe xua po coyenewa peabe coyenewan. Poxonae weta xua exana barapo matatsunpiwi barapo siete po peabe cui coyenewabetha bapoxonae Nacom nacui weta xua poxonae anaya bichocono atene exana jiwi abe peexanaexae.

² Bapoxonae tan pocotsiwa be pin mene mar, po pin mene mar copiya tan. Barapo pin mene mar icha be bosibū muxupawa ichi xua penthiya. Yawa tan xua muxunaxuba pocotsiwa be isoto xua itadudubiya. Yawa tan pomonaē amanayaba xua pon be Corei amanayabatsi. Barapomonaē jopa wūnaē jainchiyo pon be Corei yawa pon be ibo Corei nacom, yawano jopa itapa tinaetsi pon be Corei pewūnthā. Barapomonaē imoxoyo caquita umena barapo pin mar mene. Yawano barapomonaē caumena arpa matawūn xua pocotsiwa pecatanbabiwan xua Nacom catsiba. ³ Barapomonaē naxūna Moisés pia wei tatsi, pon Nacom pia penacuichiwa tatsi taexainchi. Yawano barapomonaē naxūna Cordero pia wei tatsi, barapo naxobe weibe jeye:

“Pata Nacom, pon jiwi Necanamataxeinaein,
daxita xam exaname bichocono peainya cui
coyenewa yawano bichocono wūnaē.
Xam pon, daxita neayapusū

itorobiya coyenewan xeiname.
 Jinya coyenewan bara pexainyeiwan
 poxoru beta exaname.
 Xam itorobiya neewatsin daxita
 carepaya nacuanpiwi.

⁴ Xam pon jiwi Necanamataxeinaein.
 Daxita jiwi junuwiya cabarũ cui itura jinaena.
 Yawano daxita jiwi wũnae cajainchina tsipei
 saya meisa xam nejũntũ coyene xeicaem.
 Daxita carepaya nacuanpiwi patsina xua wũnae
 necajainchinexa tsipei barapomona bayatha tane
 pocotsiwa xua betiya xanepanaya exaname”,
 jei barapomona.

⁵ Bapoxona equeicha tan peitabocotha Nacom pin pia bo. Po boyo tututha uncua barapo Nacom pin pia botha tatsi po boyotha ichaxota Nacom popona, barapo tutu nacoibo saranaxuba. ⁶ Barapo tutu weya matatsunpiwi pona pomona xua siete poyobe yawa capona siete po coyenewabe xua peabe cui coyenewan. Yawano nama xataba paparuwan, po paparuwan bichocono inyapana yawano daedaena. Yawa naepa paba pocotsiwan be coreinya bocoton xua beya jũntacari jayabeinatsi. ⁷ Bapoxona tan caein, xua jiwana barapo cuatro poyobe xua xuan asũ. Bapon barapo siete poyobe matatsunpiwi catsibatsi coroton xua wũnba po coyenewan peabe cui coyenewan pocotsiwan Nacom exanaena, pon ataya popona. ⁸ Bapoxona barapo tututha, bichocono petsũxũ wũnca. Barapo tsũxũ Nacom pia xainya weya tatsi tapichapatsi pon peainya cuin yawa xua peayapusũ itorobi coyenewa pexeinaein. Dapon aibi pon pecopatsiwatsi xua pejoniyaewa barapo tututha poxona cataunxuae jopa wetsiyo barapo siete po coyenewabe po coyenewan peabe cui coyenewan xua matatsunpiwi capona.

16

Meje yabara po diwesi xua barapo corototha xeina siete po coyenewabe po coyenewa xua peabe cui coyenewan

¹ Bapoxona jume tan xua jume daunweya wawai barapo tutu weya, xua wawai barapo siete poyobe matatsunpiwi beya, jeye: “Paponare po cae pin irathe deque, yawa barapo siete po coyenewabe po coyenewan xua peabe cui coyenewan xua xeina barapo coroton juntututha baxua paepababare bara bereca. Po coyenewan xua corotontha tsijuntutha xeina baraxuan po coyenein xua Nacom bichocono atene exanaena jiwi penatsicuentisixae xua abe peexanaexae Nacomtha”, jei.

² Matatsunpin pon xua ichaxota ba “uno”, jei, bapon copiya piawa epataba. Bapoxona pomona itapa tinatsi xua pon be Corei pewũn tatsi, xuano xua wũnae jainta ibo Corei nacom, bapomona barapoxona nainya xeina xua peaperũbewan xua bichocono aperũtane.

³ Bapoxona equeicha icha matatsunpin pon ichaxota ba jei “dos”, jei, bapon piawa epataba pin mar mentha. Bapoxona barapo pin mar mene bichocono mene janowanaya be poxona xua petũpaein boca. Barapo pin mar mentha daxita werapa xua xuan baxota jinompa.

⁴ Bapoxona equeicha ichũn matatsunpin pon xua ichaxota ba jei: “tres”, jei, bapon piawa epataba meneintha yawa ira bũxũpana meneintha, bapoxona barapo menein be pejanan tsanaya. ⁵ Bapoxona jume tan barapo matatsunpin xua yapucauncua barapo menein. Bapon jeye:

“Nacom maisa xaniwaicha betiya yabara
 paebame poxona atene exaname jiwi xua
 penatsicuentisixae xua barapomona
 bichocono abe peexanaewi.
 Bapana jopa abe exanaem.

Xam nejuntũ coyene xeicaem,
yawa xua pon anoxuae nepoponaem,
yawa xua pon caena bayatha nepoponaemno.

⁶ Tsipei barapomonaē jinyamonae jutebatsi,
yawano tsipei jutebatsi pomonaē
neitorobi jume pepaebiwi.

Daxota barapomonaē xuya werapa exaname,
peyantomatsiwa exaname abe peexanaexae copiya”,
jei barapo matatsunpin Nacomtha.

⁷ Equeicha ichũn jume tan pon cueicueijeji pon uncuā ichaxota pocotsiwa be pex-
aethopaewa xua ichaxota tauteiba duwei xua tuxusi exaneiba Nacom nexa, bara weya
jeye: “Xam, Nacom pon jiwi Necanamataxeinaem daxita peayapusũ itorobi coyenewan
nexeinaem. Tsipei xam yabara paebame xua jiwi penatsicuentisiwa xua abe peexanaexae
daxota bewa atene tsane. Pocotsiwa xua exaname bara xaniwaicha betiya exaname,
tsipei bapana jopa abe exanaem”, jei pon xua paeba.

⁸ Bapoxonaē equeicha icha matatsunpin pon ichaxota ba jei “cuatro”, jei, bapon
piawa epataraba xometotha. Barapo matatsunpin xometo catatsi po coyene xua
xometo exanaena xua jiwi petautsinexatsi xua xota bichocono atsa. ⁹ Bichocono daxita
carepaya jiwi taxuatsi. Ichitha barapomonaē icha jũntũ coyene jopa xeinaeyo mataũtano
Nacom jopa wũnaē jainchichi, yawa barapomonaē Nacom abe yabara paebatsi yaitama
Nacom xeina peayapusũwa xua itoroba barapo coyenewan po coyenewan xua peabe cui
coyenewa.

¹⁰ Bapoxonaē equeicha icha matatsunpin pon ichaxota ba jei: “cinco”, jei, bapon piawa
epataraba pon be Corei pia peecaethopaewatha tatsi. Yawano barapon pon be Corei
po coyene xua itoroba piamonaē jopa xapain piamonaē matacaponaeyo be pon xua
pona poxonaē quireitha. Daxota piamonaē tatsi jũntũ coyene deideijeji. Barapomonaē
peparaxaewa nawano sine. ¹¹ Jopa juniya exanaponaeyo barapo coyenewan po coye-
newan xua peabe cui coyenewan, yawano cataunxuae barapomonaē exanapona xua
Nacom abe yabara paebatsi po Nacom itabocotha eca. Daxota barapomonaē Nacom
abe yabara paebatsi yaitama Nacom barapo peatene cui coyenewa itoroba yawano xua
itoroba peperũtanewan.

¹² Bapoxonaē equeicha icha matatsunpin pon ichaxota ba jei “seis”, jei, bapon piawa
epataraba po pin mene mentha pewũn Eufrates. Barapo Eufrates mene namto naexaniya
xua pepatsinexa pomonaē pocotsiwa werenepiwi pomonaē jiwi itorobiya pia pepa
peewatsiwichi.

¹³ Nexata bapoxonaē tan xua pon be jomowabi, pon Joyoinya. Irũ tan pon ayei,
pon be Corei. Irũ tan pon xua naerabiya jeye: “Xan Nacom peitorobi jume tapaebin”,
pon jei. Daxita barapomonaē barompaya pia coiboton tsina tajujuinatsi acoibi poyobe
cauri xua xuan be pocotsiwan cuei. ¹⁴ Barapo caurimonaē exana pexeinya petsita
itũtsi coyenewan. Barapo caurimonaē ponarũcũpa xua penacaetuta exanaenexa daxita
pomonaē jiwi itorobiya pia pepa peewatsiwichi. Baxua exana xua naba peexanaenexa
po mataqueitha Nacom nabenabe pon jomowabi pon Joyoinya. Barapon Nacom daxita
peayapusũ itorobi coyenewan pexeinaein.

¹⁵ Nacom jeye: “Taema, jemeicha patopaēin icha be pon pecaibin ichi poxonaē
jemeicha patopa. Jũntũ coyene weiweina pon xua yoyoca tsipei nama xatata paparuwa
xua jopa petamsa ponaenexa jiwi itũtha xua bapon petaewatsi daxita pia pepon”, jei
Nacom.

¹⁶ Daxita pomonaē jiwi itorobiya pia pepa pecanamataxeinaewichi, barapomonaē
nacaetuta ichaxota po iratha pewũn Armagedón xua hebreo jumetha. Barapo iratha
nacaetuta xua naba peexanaenexa xua po mataqueitha Nacom nabenabe pon be
jomowabi, pon Joyoinya.

¹⁷ Bapoxonae equeicha ichan matatsunpin pon ichaxota ba jei “siete”, jei, bapon piawa epataba barapo irathe matatsun susatotha. Bapoxonae itabocotha xua tutu wetsica ichaxota Nacom pia pexeinya pecaethopaewatha baxota jume tan pon xua jume daunweya cueicueiyeiya jeye: “Bara bayatha nacui xainwaetaba”, jei pon xua paeba. ¹⁸ Bapoxonae bichocono jerajerei itabocotha, yawa pejumein, yawa bichocono jurujerei. Matautano bichocono ira jijiyata beyacaincha xua poxonae ira jijiyateiba poxonae copiya jiwi aena naexana po cae pin nacuathe xua beya anoxuae. ¹⁹ Po tomara, pepa tomara barapo tomara ainya wanbe exanabe poxonae baxua ira jijiyata. Icha iranthe barichi baxota tomaran abe exana. Nacom yabara nanta xeina Babilonia tomara tsipei barapo tomarapiwi abe peexanaewi. Daxota Nacom barapo pepa tomara abe exana poxoru bichocono anaepana barapomonaetha. ²⁰ Daxita petunaeton yawano daxita demxuwan aichurubena xua ira pejijiyatsixae. ²¹ Barichino itaboco weothopeica xua jiwi matatsun othopeicatsi pocotsiwan dederawa xua xuan benata ichaxota po eman bichocono aque. Barapo pedederawiwān bichocono arewe. Bapoxonae barapo jiwi Nacom bichocono abe yabara paebatsi yaitama Nacom itoroba barapo pedederawiwān pocotsiwa bichocono abe barapomona nexa.

17

Meje yabara po diwesi xua Nacom itaweta powa xua bichocono penasi cui matacaetsiwa xua weiweina pia paratixichi powa xua yabara caunutatsi Babilonia tomara

¹ Nexata bapoxonae taxantha patopa caein matatsunpin jiwana, po matatsunpiwi siete poyobe yawa xua siete xoyobe matauta capona coroton. Bapon nejei: “Anetha catsita itutinchi xua yabayo powa bichocono penasi cui matacaetsiwa xua weiweina. Barapowa eca ichaxota pin mar mene, powaxae xua yabara caunutatsi Babilonia tomara. ² Pomona xua jiwi itorobiya pia pepa peewatsinchi barapo cae pin nacuathe barapomona xua yawa muxuna abe nanabarū exana bapowa. Matautano daxita carepaya pomona po cae pin irathe jinompa barapo coyene exana bara jupa, icha barapomona ichi. Barapowa cana exana xua barapo jiwi abe exana, tsipei barapo jiwi ichichipa po penasi cui matacaetsiwa bapowa exana”, nejei matatsunpin.

³ Poxonae cataunxuae Nacom pia Pejumo xua tatsi netsita ituta baxua, bapoxonae matatsunpin necapana ira xuepana susato tsurucuae nacua beya. Baxotiwa petsiriwa tan xua eca pon ayei pon be Corei bapon pejumatha, xua pon tsobia. Bapon daxita carepaya pepontha tinaduba po jumein xua Nacom abe yabara paebatsi. Yawano bapon siete po matasipabe xeina yawa diez po pentetobe xeina. ⁴ Bapowa nama xatata paparuwa, po paparuwa mū sūjei yawa mū tsobia. Bapowa yawa napepena xua pocotsiwan pewūn oro nain, yawano be ibotixi xua pocotsiwan ainya matoman, yawano po warowa xū inyapana xua po warowa xū pewūn perla. Barapowa pecobetha xeina coroto penain coroto xua oro nain yawa wūnta pocotsiwan xua be mara, yawa barapowa pia penasi cui matacaetsi coyene xua weiweina. ⁵ Powa xua yabara caunutatsi Babilonia tomara, barapowa peitapatha tinaduta pewūn, po wūn jiwi jopa yabara yaputaeyo. Barapo wūn jeye: “Powa xua yabara caunutatsi pepa Babilonia tomara, bapowa be coxiwa natsicotane, xua powaxi nasi cui matacaeta xua weiweina barapowaxi pena tatsi. Matauta bapowa daxita pomona xua bichocono abe peexanaewi barapomona pena tatsi”, jei xua tinaduta. ⁶ Pirapaeyo jume tan xua barapo Babilonia tomarapiwi yabara jeichi: “Icha pebin ichi xua peatsaxae mera bichocono cūpatsi, barapo Babilonia tomarapiwi barapocotsi coyeneya jūta ichiya exana. Baxua exana, tsipei barapo Babilonia tomarapiwi juteba pinmonae pomona Nacom pijimonae tatsi, irū pomona Jesús pejume diwesi pepaebiwi”, yabara jeichi barapo Babilonia tomarapiwi.

Poxonae tan xua barapo tomarapiwi be cūpatsi bichocono, yabara nabenaecan bapoxonae. ⁷ Bapoxonae matatsunpin nejei: “¿Eta xua metha nabenaecame? Yabara cayaputane exanaeinchi bapowa xua pocotsiwa jopa yaputaem. Yawano yabara caya-putane exanaeinchi barapon pon be Corei, ponthe xua bapowa eca peumatha. Bapon

siete po pentasipabe xeina xuano xua diez po pentetobe xeina. ⁸ Barapon pon be Corei pon taneme caena bayatha popona barapo cae pin nacuathe. Anoxuae jopa poponaeyo. Ichitha bexa tsane juinaena po mutha bichocono pin mutha tsina. Bapoxonae nama yatsicaewa weweracaena. Bapoxonae jinompaena jiwi barapo cae pin irathe. Barapomonae jopa wun dubenaeyo Nacom pia diborotha tatsi, po diborotha xua jei: ‘Pomonae wun dubena barapo diborothe jopa weweracae tsane’, jei. Barapo jiwi caena bayatha jopa wun tinaetsi barapo diborotha. Barapo jiwi poxonae taena barapon xua taeinchi pon be Corei bichocono najuntu coyene cabenaecaena. Daxota najuntu coyene cabenaecaena tsipei caena bayatha popona, xua anoxuae ajibi ichitha equeicha bexa patopaena xua peponaewa tsane barapo cae pin irathe”, nejei matatsunpin.

⁹ Equeicha matatsunpin nejei: “Meje tha xua paebichi xua ichamonae itacupatsi peyabara yaputaewa baxua: Barapo siete po pentasipabe xua pon be Corei, barapo siete matasipabe demxuwana yabara caunuta xua po matasipantha ichaxota barapowa peumatha eca, powa xua Babilonia tomara yabara caunutatsi. Barichi barapo siete po pentasipabe xua pon be Corei, yabara caunutatsi pomonae jiwi itorobiya pia pepa peewatsiwichi. ¹⁰ Cinco poyobe barapomonae pomonae jiwi itorobiya pia pepa peewatsiwichi bayatha naitapataya werapoinca. Caein anoxuae barapo siete poyobe jiwana matacapona po cae pin irathepiwi, ichun bexa tsane patopaena xua matacaponaena barapo cae pin irathepiwi. Ichitha poxonae bapon patopaena jopa ainya dapaein matacapopona tsane po cae pin irathepiwi. ¹¹ Bapon pon be Corei pon caena bayatha popona xua anoxuae jopa poponaeyo, bapon ichaxota ba jei: ‘ocho’, jei, bapon pon jiwi itorobiya pia pepa peewatsinchi naexanaena po cae pin irathepiwi nexa, bequein bapon caena bayatha tupa xua barapo siete poyobe jiwana. Bapoxonae nama equeicha weweracaena poxonae tupaena”, nejei matatsunpin.

¹² Equeicha matatsunpin nejei: “Barapo diez po pentetobe xua taneme xua po penteton yabara caunutatsi pomonae jiwi itorobiya pia pepa peewatsiwichi, barapomonae cataunxuae jopa patsiyo xua itorobiya peewatsinexatsi po cae pin irathepiwi. Ichitha po peitorobi coyenewa barapomonae catsibinchi xua saya bara caeto itorobiya ewatsinchi po cae pin irathepiwi xua iru barapon pon be Corei itorobiya ewatsina. ¹³ Barapo diez poyobe pomonae piamonae itorobiya pepa peewatsiwi peburuya nanta xeinarcupa. Matautano barapo diez poyobe pomonae piamonae itorobiya pepa peewatsiwi pia peayapusya exanaewan pon be Corei catatsi, yawano peayapusu itorobi coyenewa catatsi. ¹⁴ Daxita barapomonae pomonae diez poyobe, pomonae piamonae itorobiya pepa peewatsiwi iru pon be Corei, Cordero butsi. Ichitha barapo Cordero amanayabina daxita barapomonaetha. Tsipei barapon pon jiwi pia pepa Pecanamataxeinaeinchi pia peayapusu itorobi coyenewa xeina beyacaincha xua ichamonae xeina pomonae jiwi pecanamataxeinaewichi. Matautano bapon pon Corderoxae jiwi itorobiya pia pepa Peewatsinchi tatsi pia peayapusu itorobi coyenewa xeina beyacaincha xua ichamonae xeina pomonae jiwi itorobiya pia pepa peewatsiwichi xua iru xeina pia peayapusu itorobi coyenewa. Pomonae Cordero nabaru yawenatsi xua poxonae amanayaba barapomonaetha, Nacom waba barapomonae poxoru Nacom pia peitapetsiwichi tatsi, matautano tsipei exana pocotsiwa Nacom itoroba”, nejei matatsunpin.

¹⁵ Equeicha barapo matatsunpin nejei: “Xua xam po menein taneme mar menein xua ichaxota yabuyo eca pon be Corei peumatha, barapo mar menein yabara caunutatsi be tomaramonaepiwi, xua yabara caunutatsi tsicamonaexipiwi, yawano yabara caunutatsi pomonae icha jumeintha pecueicueijejiwi, yawano yabara caunutatsi daxita nacuanpiwi. ¹⁶ Bayatha taneme barapon pon be Corei diez po pentetobe, po penteton yabara caunutatsi diez poyobe pomonae jiwi itorobiya pia pepa peewatsiwichi. Barapomonae pomonae jiwi itorobiya pia pepa peewatsiwichi barapowa bichocono casebinchi powa pesi cui weiweinaewa. Yawano wecobe pitinchi xua bapowa pia peitorobi coyenewa tatsi yawano jumasa xubinchi. Yawano barapomonae wi xaena, xua bapowa wi xaeinchi. Bapoxonae bapowa pia pepon tautinchi isototha. ¹⁷ Nacom itoroba xua barapomonae

pia pejuṅtu coyenetha peexanaewa tsane xua pocotsiwan Nacom ichichipa. Daxota barapomonaē pomonaē jiwi itorobiya pia pepa peewatsiwichi pomonaē diez poyobe, peburuṅya nanta xeinaruṅupa xua barapomonaē pia peayapusu itorobi coyenewanxae tatsi pon be Corei catsinchi. Baxuan catsina beya abu poxonaē wetsina pocotsiwa Nacom bayatha paeba. ¹⁸ Petsiriwa powa taneme xua powa nasi cui matacaeta xua weiweina, bapowa cayabara caunutatsi: ‘Po tomara pepa tomara’, jei. Pon itorobiya pepa peewatsin xua barapo pepa tomaratha, bapon itoroba daxita ichamonaē pomonaē jiwi itorobiya pia pepa peewatsiwichi pomonaē barapo cae pin nacuathepiwi itorobiya ewatatsi”, nejei matatsunpin.

18

Meje yabara po diwesi xua daxita omeicha cayabara wetapentatsi Babilonia tomarapiwi xua muxuna tomarano

¹ Bapoxonaē equeicha tan ichun matatsunpin xua pon peitaboco wetsica pona po cae pin irathe tsique. Barapo matatsunpin xeina ainya peayapusu itorobi coyenewan. Bapoxonaē bapon exana xua ira bichocono pentha tsurucuae xua pia pepon weya cueicha pona. ² Yawano bapon jume daunweya wawai, jeye:

“;Bayatha Babilonia tomarapiwi
wetapentatsi yawa tomara abe
exanatsi, po tomara pepa tomara!
;Yawano anoxuae caurimonaē baxota jinompa!

³ Tsipei daxita carepaya nacuanthapiwi
bichocono abe exana, po abe peexanaē
coyenewa pocotsiwa xua barapo
Babilonia tomarapiwi exana.
Yawano pomonaē jiwi itorobiya pia pepa
peewatsiwichi barapomonaē cuiduba piamonaē
xua abe peexanaewa tsane icha barapo
Babilonia tomarapiwi ichi xua abe exana.
Yawano pomonaē pecaenaetsiwi piawan, bapomonaē
xuya copei pexeinaewi naexana, tsipei barapo
tomarapiwi copei ayei ichichipa xua beta
pejinompaewa tsane”, jei matatsunpin.

⁴ Bapoxonaē equeicha ichawa jume tan xua wawai itabocotha, jeye:

“Pomonaē tamonaepiwi pam, barapo tomara weya
raponarucupare, xua jopa abe painya
neexanaenexaru icha barapo tomarapiwi
ichi xua bichocono abe peexanaewi.
Bapoxonaē Nacom jopa paca atene exanaē tsane
icha bayatha ichichi xua atene exainchi
barapo Babilonia tomarapiwi.

⁵ Tsipei barapo abe peexanaē coyenewan
xua barapo tomarapiwi exana bichocono
ayeḱ xua daxota Nacom pon itabocotha
peecaein tane baxuan.

Daxota Nacom yabara nanta xeina
xua atene exana barapomonaetha.

⁶ Barabu ichamonaē jupa exanaena
barapomonaetha, icha be pocotsi coyeneya
xua bapomonaē abe taexana ichamonaetha.
Barabu barapomonaē pentoma catsibinchi
xua po pentoma equeicha mataropataba
xua peatenewa.

Barabũ barapomonaē bichocono atene tsane,
 icha be pocotsi coyeneya xua poxonaē
 barapomonaē atene taexana ichamonaetha.

⁷ Pocotsiwa xua bapomonaē exana xua atsaca
 naexana xua penasi cui matacaetsi jiwi naexana,
 barabũ barapomonaē bichocono atene tsane,
 yawa wecoyei tsane.

Tsipei bapomonaē pia coutha natsipaeba, jeye:
 ‘Waxainchi xote enatsi.

Waxainchi jopa dapomonaetsi pomonaetsi pomonaē
 waseuri jiwi wanaca cuenta werapaewi.

Matautano waxainchi pomonaē jiwi
 itorobiya pia pepa peewatsi jiwichi, jopa
 bichocono atene tsainchi’, jei bapomonaē.

⁸ Daxota saya caentaqueitha tsane jopaena po
 coyene xua abe peexanaewa tsainchi bapomonaē,
 xua bichocono peperaxa jũbiwa tsainchi,
 matautano xua pejainpaewa tsane bichocono,
 yawano xua petautsiwa tsainchi xua werapaena.
 Tsipei Nacom pon pepa Pecanamataxeinaein jiwi
 peayapusũ itorobi coyenewa xeina, yawano
 bapon pia coutha yabara paebina po coyene xua
 tsitatsi xua bapomonaē natsiaenaē cuenta
 abe peexanaexae”, jei matatsunpin.

⁹ Pomonaē jiwi itorobiya pia pepa peewatsiwichi xua po cae pin irathe, pomonaē xua
 bayatha irũũ abe exana poxonaē barapo Babilonia tomarapiwi abe exana, barapomonaē
 bichocono wecoyei tsane poxonaē xua taena iso tsũxũ xua poxonaē barapo Babilonia
 tomarapiwi tautsinchi. ¹⁰ Barapomonaē tajũ wetaeumeinyaena poxoru cunuwa xua
 pocotsiwa Nacom cana exanaena barapo Babilonia tomarapiwi. Barapomonaē pomonaē
 jiwi itorobiya pia pepa peewatsiwichi najei tsane:

“¡Pai jaibo Babilonia tomarapiwi pam tsobenae!
 ¡Babilonia tomara tsocuaem!

Bequein pepa tomara tsocuaem, ichitha saya
 bara cae horatha barapo tomaram omeicha
 Nacom cawetaxubina”, najei tsane barapomonaē.

¹¹ Daxita pomonaē caenaeta piawan barapomonaē bichocono wecoyei tsane xua
 barapo Babilonia tomara siwa wecoyeichi tsainchi tsipei barapomonaē jopa xeinaē
 tsane xua comocaeinchi xua pia pecaenaetsiwan. ¹²⁻¹³ Barapomonaē xua pocotsiwan
 caenaeta dubenanaebiya baxue: xua pocotsiwan pewũn oro nain matawũn, yawano
 xua pocotsiwan penainwan xua plata nain matawũn, yawano xua ira bũxũpana iboton
 xua bichocono ainya matoman, yawano xua pocotsiwan be warowaxu pocotsiwan perla
 matawũn, yawano papabũrũ pocotsiwan bichocono ainya matoman pocotsiwan seda
 matawũn, yawano po paparuwan mũ sũjei, yawa xua xuan mũ tsobia; yawano napaewan,
 po naein xua bichocono tuxuei; yawano xua ichawan weya forobano xua pocotsiwan
 marfil matawũn, yawano xua ichawan weya forobano xua naewan xua po naewan
 bichocono ainya matoman, yawano xua ichawan weya forobano xua pocotsiwa bronze
 nain matawũn, yawano xua ichawan weya foroba xua penainton, po penainton hierro
 nain matawũn, yawano xua ichawan weya foroba xua iboton, po iboton mármol ibo
 matawũn; yawano capana po petuxueiwan canela tseboco matawũn, yawano ichawanno
 capana xua ichawan xua petuxueiwan; yawano capana icha petuxueiwan xua incienso
 xua po tuxusi tuxueiwa benata poxonaē taxua exana, yawano icha petuxueiwa pocotsi-
 wan be mauto xua jiwi tauta petuxusi tuxuei exanaenexa, yawano icha petuxueiwanno;
 yawano vino meran, yawano penasiwan, yawano pebenon xua trigo xu benon, yawano

pepa xu xua trigo xu; yawano jota duweimonaein, ovejamonaein, cawayumonaein, yawa caronaemonaein, xua cawayu pecaponae naexi, yawano jiwino capoinchi pecae-naetsinexatsi xua pomonae jiwi pebusi cui tatayebeibiwichi peexanaenexa tsainchi.

¹⁴ Barapomonae jei tsane xua barapo Babilonia tomarapiwi yabara jei tsainchi:

“¡Anoxuae jopa paxeinaem pethei, po pethei ainya matoman po pethei paichichipame bichocono! ¡Anoxuae nama pacata aichurubena xua copei xeina painya nenaexanaewam xua bara ataya tsane!” jei tsane.

¹⁵ Pomonae xua caenaeta dubenanaebiya pocotsiwan xua ainya matoman yawa xua cobe caewita paratixi xua barapo tomarapiwi cobe caewitatsi, barapomonae tajü wenewatumendena xua abe peexanaeyainwatsi xua Nacom exanaena. Barapomonae bichocono wecoyei tsane. ¹⁶ Barapomonae jei tsane:

“¡Pai jaibo pepa Babilonia tomara tsobena! Xam Babilonia tomaram bichocono pexeinya tomaram, icha yabꞑyo ichi xua pexeinyawayo poxona paparuwa nama xatata po paparuwa bichocono sꞑjei yawa bichocono tsobia. Yawano bapowa napepena xua pocotsiwa pewꞑn oro nain yawa xua be ibotixi xua pocotsiwan ainya matoman yawano po warowa xu xua inyapana xua pewꞑn perla.

¹⁷ ¡Saya bara cae horatha daxita aichurubena xua xuan barapo tomara xeina!” jei tsane barapomonae.

Pomonae jera pecanamataxeinaewi, yawano pomonae xua napona xua warapa icha tomaratha nexa, irꞑ pomonae petanacuichiwi barapo jera naeintha, irꞑno pomonae nacuita jeratha, daxita barapomonae tajü wenecotumendena. ¹⁸ Poxona barapomonae tane xua iso tsꞑꞑꞑ xua barapo Babilonia tomara tautatsi, barapomonae jume daunweya wawai, jeye: “Icha pepa tomara aibi po tomara wꞑnae pocotsi tomara icha Babilonia tomara ichi”, jei. ¹⁹ Barapomonae pia cui xeina xua tsorobotha nantatsaeba poxoru bichocono wecoyei. Wawaya jeye:

“¡Pai pepa Babilonia tomara tsocuae! ¡Anoxuae jopa peraichiwa xua pocotsiwan bayatha jera wꞑnbatsi xua copei xeina naexainchi xua poxonae naca comoca barapo tomarapiwi! ¡Daxita baxuan caayawachurucuae exainchi tomara!” jei barapomonae.

²⁰ Ichitha paxam pomonae itabocotha painya nejinompaewi pam irꞑ pomonae tamona pam, irꞑ pomonae Jesús pia peitorobiwi tatsi pam, irꞑ pomonae Nacom peitorobi jume pepaewi pam. Daxita barapomonae pam, pajꞑntꞑ coyene weiweinare xua pacata peaichurucuaexae barapo Babilonia tomara.

Nacom xuya abe exana barapo Babilonia tomara tsipei bayatha barapo tomarapiwi pacata abe exana.

²¹ Bapoxona matatsunpin pon bichocono pia peayapusꞑ itorobiwa xeina, bapon pita iboto, po iboto bichocono pin iboto xua be pocotsi ibototha jiwi cuba trigo xu. Bapoxona barapo matatsunpin xuba barapo iboto pin mar mentha. Bapon jeye:

“Icha barapo iboto ichin xua xuban barapo pin mar mentha, Nacom barichi wetaxuba barapo Babilonia tomara xua equeicha jiwi jopa petaewa tsane.

²² Yawano bapana equeicha jiwi jopa jume tae tsane xua petanbabiwan busin xuan pewun arpa matawun, yawano xuan po peobiwa jumein pewun flauta matawun, yawano icha peobiwan jumein xuan pewun trompeta matawun.

Matautano jopa tae tsane pomonae xua barompaya piawan penata exanae jiwi.

Matautano jopa busi tae tsane barapo pin tomaratha xua busi

xu yacatoyeraba trigo xu xua pin ibototha.

²³ Matautano jopa yonoyonei tsane pecoichan.

Matautano jopa jume tae tsane xua pin

penabanaewa exana xua poxonae

pebin pecotsiwa pita.

Pomonae pecaenaetsiwi barapo pin tomaratha

bichocono copei pexeinaewi xua daxota

daxita nacuanpiwi yabara cui yaputane

xua barapomonae peainya cui jiwi.

Barapomonae pomonae Babilonia tomarapiwi

itacupatsi xua daxita nacuanpiwi

muxuitorobatsi mara peexanaewi pia

coyenyatha xua daxota iru abe

peexanaenexa tsane, icha barapo Babilonia

tomarapiwi ichi xua abe exana”,

jei matatsunpin.

²⁴ Nacom weraweraca exanaena barapo tomara. Barapo tomarapiwi Nacom tsitatsi xua barapomonae penatsicuentiwa xeina xua ichamonae pejutebixaetsi, pomonae Nacom pia peitorobi jume pepaebiwi, iru pomonae Nacom pejume cowuntsiwichi tatsi yawano daxita pomonae bayatha jutebatsi po cae pin nacuanthepiwi xua ichamonae juteba icha tomarantha.

19

¹ Bapoxonae peitabocotha jume tan xua juinya pinmonae jeye:

“;Barabu Nacom wunae jainatsi, Nacom naca

capanepa abe waexanae coyenewan weya!

;Maisa Nacom pexeinya juntu coyene pexeinaein!

;Maisa Nacom bepa juniya xeinae

peayapusu itorobi coyenewa!

² Nacom wunae jaintatsi tsipei bapon Wanacom.

Poxonae yabara paeba jiwi xua

penatsicuentiwa xua abe peexanaexae,

bara beta xaniwaicha exana.

Yawano bapon bichocono atene exana

barapowa powa xua penatsicuentiwa

xeina xua abe peexanaexae.

Bapowa penasi cui matacaetsiwa xua

weiweina pebiwitha pia paratixichi.

Barapowa yabara caunutatsi Babilonia tomara

po tomaramonae xua penatsicuentiwa xeina xua

abe peexanaexae icha bapowa ichi.
Bapowa bayatha cuiduba barapo cae pin
nacuapiwi xua iru abe exana icha
xua barapowa ichi.

Tsipei bapowa Nacom pijimonae tatsi
jutebatsi daxota xuya Nacom pijimonae
yantomata xua poxonaе bapowa bexotsi powa
peyabara caunutsixaetsi Babilonia
tomarapiwi”, jei xua juinya pinmonae.

³ Barapo pin ayei jiwi jeye:

“¡Barabu Nacom wuнаe jaintatsi!

¡Iso tsuxu xua bapomonae tautatsi barabu
barana jopa athabe jujuinae tsane xua pepu
ataya tsane!” jei barapomonae xua juinya pinmonae.

⁴ Bapoxonaе veinticuatro poyobe pomonaе pitiri jiwi, iruru cuatro poyobe xua
xuan asu daxita barapomonae irabe taeumenareca xua Nacom wuнаe pejainchinexa
tsainchi, jeye: “¡Je bara ichi tsane! ¡Barabu Nacom wuнаe jaintatsi!” jei daxita barapo
matabuxumonaеbe. ⁵ Bapoxonaе Nacom pia pexeinya pecaethopeibiwatha, jume tan
pejume, xua jeye:

“¡Daxita pam, pomonaе Nacom pata exaname,

Nacom pon pata Nacom, wuнаe pajainde!

¡Iru pomonaе paexaname pocotsiwa Nacom

paca itoroba, Nacom wuнаe pajainde!

¡Iru pomonaе peacopeibi jiwi iruru

pomonaе copei pexeinae jiwi, daxita

paxam Nacom wuнаe pajainde!”

jei pejume xua paeba.

*Meje yabara po diwesi xua poxonaе jiwi tsinacaetuta pexaewa penabanaenexa poxonaе Cristo,
pon Cordero, pecotsiwa nacueyaba*

⁶ Yawano jume tan peitabocotha xua pejumein be pin bicheitomonae be poxonaе xua
ainya pin mar menein busin, yawano be xua xuan yamuxu jurujurei. Barapo jumein jeye:
“¡Barabu Nacom wuнаe jaintatsi

pon jiwi Pecanamataxeinaein!

Bapon nama anoxuae tamropata pitaba

xua daxita carepaya nacuanthapiwi

itorobiya ewatsinchi.

Bapon xeina daxita coyenewan xua pia

peayarusu itorobi coyenewan.

⁷ ¡Juntu coyene weiweinatsi yawano

jacobatsi, jeichichi: ‘Maisa pexeinya

juntu coyene pexeinaein’, jeichichi!

Baxua bewa exanaetsi tsipei patopa matabi

poxonaе po matabitha jiwi tsinacaetuta

pexaewa penabanaenexa poxonaе pon

Cordero, piowa nacueyaba.

Barapon pon Cordero, pecotsiwa tatsi nacui

xainwaeta, poxonaе po matabitha jiwi

pin penabanaewa tsinacaetuta xua

penabanaewa tsane.

⁸ Barapowa copatatsi xua penama xatatsinexa

paparuwa, po paparuwa bichocono

pexeinya paparuwa.

Barapo paparuwa bichocono inyapana yawa xua bichocono m̄ daedaena.

Barapo pexeinya paparuwa caunuta xua po coyenein Nacom pia peantobewichi tatsi exana xua po coyenein Nacom tsita xanepanatsi.

Barapo yab̄nyo yabara caunutatsi Nacom pijimona tatsi, pomona Nacom pejume cow̄ntsixaetsi”, jei barapo pin bicheitomona.

⁹ Bapoxona matatsunpin nejei: “Tinare xuaje: ‘Bichocono j̄nt̄u coyene weiweina pomona Nacom waba poxona pin penabanaewa tsinacaetuta xua penabanaewa tsane poxona pon Cordero, nacueyaba pecotsiwa’, jande poxona xua tiname”, nejei barapo matatsunpin. Equeicha nejei: “Daxita po jumein xua catsipaebatsi barapo jumein xaniwaicha Nacom paeba”, nejei barapo matatsunpin.

¹⁰ Bapoxona barapo matatsunpin petaxutha irabe taeuncuarecan xua w̄nae ta-jainchinexa. Ichitha bapon nejei: “¡Bara! Jopa baxua neexanaeinde. Apara xan ir̄u ponxaein Nacom piawa taexanaein, icha xam ichim xuano xua icha jinya jiwimona ichi pomona Nacom pejume cow̄ntsiwichi, xuano xua jume cow̄nta dubenanaebiya pocotsiwan xuan Jesús paeba. Jame Nacom bapon w̄nae jainde”, nejei matatsunpin.

Baxuan xuan pocotsiwan Jesús paeba xua xuan pexainyeiwan, baxuantha yawenatsi nawita pomona Nacom peitorobi jume pepaebiwi.

Meje yabara po diwesi xua pebin equeica cawayutha, pon pmainyan

¹¹ Bapoxona peitabocotha tan xua naitaboco yausanaxuba. Baxota naituta cawayu, pon pmainyan. Pon xua cawayutha equeica, w̄n dutatsi, jeichichi: “Pon xua pejume cow̄nta ducuaenaebiyaein, yawano xua xaniwaicha pepaebin”, jeichichi. Bapon xainyeya betiya yabara paeba jiwi xua penatsicuentsiwa xua abe peexanaexae.

Matautano bapon xainyeya betiya exana poxona naba ichamonaetha. ¹² Bapon peitamaiqueito be isoto itareto xua yonoyonei. Yawano bapon nantatsun etounya pentasipatha ainya tepan. Yawano bapon tinaduta pew̄n po w̄n xua saya meisa bapon w̄n yaputane. ¹³ Yawano nama xatata paparuwa, po paparuwa pejanan dubena be poxona xua jautuxuba pejanatha. Bapontha Nacom w̄n duta: “Nacom Pejume”, jei.

¹⁴ Bapon puna poinchi soldadomona itabocopi soldadomona, pomona Nacom pia soldadomona tatsi. Barapo soldadomona pexeinya paparuwan nama xataba xua xuan m̄ inyapana, yawa xua axuirubi. Yawano barapomona eneica cawayumonaeintha xua xuantha pmainyawantha. ¹⁵ Barapon pon mata capana pia soldadomona pecoiboto tsina tapichapeinatsi cusi, po wato bichocono xuiyoi. Bapon barapo watotha ucuboba xua jiwi ucubobatsi, pomona po irathe jinompe. Yawano bapon ajumeyapus̄ya itorobi ewatsina jiwi. Yawano bapon daunweya yabara paebina jiwi xua penatsicuentsiwa xua abe peexanaexae, icha jiton ichi xua daunweya nataxu tsapabatouba uva cuei xua vino mera pia exanaetsi. Bapon bichocono atene cana exanaena pomonaetha pomona jopa pejume cow̄ntsiwichi, tsipei bichocono Nacom caseba barapomona. Barapon Nacom pia peayapus̄ itorobi coyenewan xeina xua jiwi peperaxa exanaewatsi. ¹⁶ Bapon naw̄n tinaduta pia pejumainaewatha, yawa naw̄n duta peth̄totha xua po w̄n jeye: “Pon Corderoxae jiwi itorobiya pia pepa Peewatsinchi tatsi, pia peayapus̄ itorobi coyenewa xeina beyacaincha xua ichamona xeina pomona jiwi itorobiya pia pepa peewatsiwichi xua ir̄u xeina pia peayapus̄ itorobi coyenewa. Matautano bapon pon jiwi pia pepa Pecanamataxeinaeinchi pia peayapus̄ itorobi coyenewa xeina beyacaincha xua ichamona xeina pomona jiwi pia pepa pecanamataxeinaewichi”, jei barapo w̄n.

¹⁷ Bapoxona matatsunpin tan xua xometo coichatha uncuca, bapon jume daunweya wawai peyapupunaewi beya xuan jinompa itabocotha, jeye: “Anetha xua painya nexaewa tsane Nacom pin pia penabanaewa. ¹⁸ Barapo penabanaewan paxaema, xua pomona jiwi itorobiya pia pepa peewatsiwichi pewi, yawano soldadomona pia pentacaponawewi tatsi barapomona pewi, yawa pomona peamanayabeibi jiwi barapomona

pewi, yawa cawayu pewi, yawa pomonae xua eneica pewi. Daxita xua irurū ichamonaeno barapomonae pewi. Irū pomonae penata exanaewi pia coutha barapomonae pewi, ichacuiitha xua irū pomonae amanaya petanacuichi jiwi barapomonae pewi. Irūno pomonae jiwi pebusi cui tatayebeibiwichi barapomonae pewi, irūno pomonae copei pexeinaewi barapomonae pewi”, jei matatsunpin.

¹⁹ Bapoxonae tan pon ayei pon be Corei, yawano tan pomonae jiwi itorobiya pia pepa peewatsiwichi xua barū pona pia soldadomonaein. Daxita barapomonae nacaetuta xua nantiya penabinexa tsane pontha pon pia soldadomonaenata tati petanabinexa tsainchi. ²⁰ Barapon pon ayei, pon be Corei, bapon maxū cūbiya waetabatsi irū maxū cūbiya waetabatsi pon naerabiya jeye: “Xan Nacom peitorobi jume tapaebin”, jei, pon xua petsita itatsi coyenewan exana xua pon be Corei taexanatsi xua pon be Joyoinya pia peayapusū itorobi coyenewatha tati. Barapo petsita itūbiwantha bapon jiwi muxuitorobatsi xua barapo jiwi peitapa tinaewa tsainchi barapon pon be Corei pewuntha tati. Yawano jiwi itorobatsi xua wūnae pejainchiwa tsane ibo Corei nacom. Barapon pon be Corei irurū pon xua naerabiya jeye: “Xan pon Nacom peitorobi jume tapaebin”, jei baponbe Nacom cana exana xua itowa pexubiwa tsainchibe ichaxota isoto pucuatha. Barapo pucua ataya tsitecaeya taxuncua bichocono aitareyapusū tsuncuae po peitare pewun azufre matawun. ²¹ Irurū daxita ichamonaerū jutebatsi cusitha, po watotha xua pecoibototha tapichapeinatsi pon xua matacapona pia soldadomonaenata. Daxita pepupunaewi bichocono tonsana pewi xaexaetsi pomonae xua jutebatsi.

20

Meje yabara po diwesi xua Cristo itorobiya ewatsina jiwi mil po weibetha

¹ Bapoxonae tan matatsunpin xua peitaboco wetsica pona, bapon catatsi po coyenetha xua itacūpatsi xua pecoibo saranaxubiwa tsane barapo pin mūthū deca xua ira bereca. Yawa bapon capona pecobetha penainto, po penainto xua pewun cadena xua bichocono pin nainto. ² Barapo matatsunpin waetaba, pon be Joyoinya waetabatsi, pon po jomo xua poxonae copiya jiwi muxu jainyabatsi. Bapon apara caurimonae pia pentacaponaein tati. Bapon icha wun Satanás. Barapon Satanás maxū cūbiya waetabatsi cadenatha xua mil po weibe nexa. ³ Yawano barapon Satanás xorecatsi barapo pin mūthū deca. Bichocono yauxatatabotatsi mūthūtha. Yaucateitabotatsino bichocono, xua jopa equeicha pemuxujainyabeibiwa tsane xua jopa equeicha pemuxujainyabeibiwa tsainchi po irathepiwi xua beya poxonae abū yapu caewina mil po weibe. Bapoxonae isanaxubinchi xua saya bara caeto tsane.

⁴ Bapoxonae tan xua pexeinya peenaethopeibiwan. Baxota ena pomonae xua bayatha catsibatsi peitorobi coyenewan xua jiwi peyabara paebiwa tsainchi daxita xua penatsicuentsiwa xua abe peexanaexae. Bapomonae pomonae xua bayatha wisi ucubobebatsi xua ichamonaenata namawainta, apara xua barapomonae peyabara cueicueijeixae Nacom Pejume Diwesi, xua peyabara cueicueijeixaeno po coyene xua Jesús pejume cowuntsi-watsi. Barapomonae bayatha jopa wūnae jainchiyo pon be Corei. Matautano jopa wūnae jainchiyo barapo ibo Corei nacom. Matautano barapomonae jopa copatsiyo xua peitapa tinaewatsi tsainchi pon be Corei pia wuntha tati ichacuitha xua pecobe juma tinaewatsi. Barapomonae tan xua equeicha asū exainchi. Barapomonae irū Cristo, nabarū caemonae xua barapomonaebe barapo cae pin nacuepiwi itorobiya ewatatsi xua cien po weibetha tsane. ⁵ Ichitha nama ichamonaenata pomonae xua caena bayatha werapa cataunxuae jopa asū exanaetsi. Barapomonae asū exanaeinchi beya abū poxonae yapu caewina mil po weibe. Barapo peasū coyenewa xua apara copiya nanta carucua xua copiya matha Nacom exana xua jiwi asū exaneibatsi petūpaewa weya. ⁶ Maisa bichocono jūntū coyene weiweina pomonae equeicha Nacom asū exana petūpaee coyene weya po peasū coyenewa xua copiya! Barapomonae Nacom piamonae tati. Barapomonae jopa werapae tsane poxonae equeicha jiwi caewa werapaena po jiwi jopa pejume cowuntsiwi.

Saya barapomonaē exanaeinchi Nacom pia sacerdotemonaēpiwi tatsi xua irū Cristo pia sacerdotepiwi tatsi. Matautano barapomonaē nabarū caemonaē xua barapomonaē barapo cae pin nacuepiwi itorobiya ewatatsi mil po weibetha tsane.

Meje yabara poxonaē caurimonaē pia pentacaponaein tatsi xotsi

⁷ Poxonaē yapu caewina mil po weibe bapoxonaē barapo Satanás isanaxubinchi xua peponaewa tsane mūthū weya. ⁸ Poxonaē bara weya pona jiwi muxujainyabinchi nawita daxita nacuantha. Yawano muxujainyabinchi nawita Gog nacuamonaēpiwi, irūno muxujainyabinchi nawita Magog nacuapiwi. Barapo Satanás cana exana xua barapo naxobe nacuapiwi penacaetutsiwa tsane pia soldadomonaē tatsi xua penabinexa pomonaetha pomonaē Nacom piamonaē tatsi. Barapo naxobe nacuapiwi pomonaē soldadomonaēxae barapomonaē bichocono pin bicheitonmonaein icha taetowa pūwūn ichi xuan taetabotha bobena xuan acūcū xua mar mentha bobena.

⁹ Barapo pin bicheiton pomonaē soldadomonaēxae, pana beiyiya daxita yaira jūpa beya poxonaē yacaincha matawacaicha umeinchi ichaxota Nacom piamonaē tatsi jinompa, yawano xua po tomarapiwi Nacom jume cowūntatsi. Ichitha bapoxonaē Nacom pin isoto itoroba deca peitaboco wereca, daxita barapo soldadomonaēin taxuatsi omeicha. ¹⁰ Barapon Satanás, pon be Joyoinya, pon caurimonaē pia pentacaponaein tatsi, pon xua barapo soldadomonaēin muxujainyabatsi, bapon Nacom xuba isoto pucuatha, po pucuatha ichaxota ataya tsitecaeya taxuncua xua bichocono aitareyapusū tsuncuae po peitare pewūn azufre matawūn. Barapo pucuatha caena bayatha xotsi pon be Corei irū pon xua naerabiya jeye: “Xan Nacom peitorobi jume tapaebin”, jei. Barapomonaē baxota bichocono atene tsaibi tsane, mataqueitha yawa merawithano tsaibi tsane xua bara ataya tsane.

Meje yabara po diwesi xua Nacom yabara paeba jiwi xua penatsicuentsiwa poxonaē eca pia pexeinya ecaethopeibiwatha, po pexeinya ecaethopeibiwa xua pemainyawa

¹¹ Bapoxonaē tan xua pexeinya peecaethopeibiwa xua pemainyawa. Muxuna tan xua pon eca barapo pexeinya peecaethopeibiwatha. Bapon peitabaratha tan ira xua po ire yawa itaboco, baxua daxita aichurubenaē, equeicha jopa naitūtsiyo. ¹² Bapon Nacom peitabaratha tatsi umena pomonaē xua caena bayatha werapa xua pomonaē peacopeibi jiwi irūno pomonaē copei pexeinaē jiwi. Bapoxonaē diboron patapenta, yawano pataxuba po diborotha ba nacapanenebiya tsaibi pomonaē Nacom pia peantobewichi poxonaē wūn tinadubatsi barapo diborotha. Pomonaē xua caena bayatha werapa daxita itawetatsi. Barapomonaē yabara cui jūpiya exanatsi be po coyeneya bayatha abe exana xua barapo diborotha pecui yabara tinaexaetsi xua poxonaē barapomonaē abe exana. Daxota barapomonaē atene tsane. ¹³ Barichi pomonaē irū pin mar mentha notatsi, barapomonaē Nacomtha pata. Irū pomonaē iratha bobena ira wejujuina xua Nacomtha pepatsinexa. Daxita barapomonaē Nacom peitabaratha tatsi umena xua baxota peyabara paebinexatsi xua Nacom yabara paebina xua penatsicuentsiwa xua abe peexanaēxae Nacomtha. Barapomonaē atene exanaeinchi xua Nacom bayatha pecui yabara tinaēxae po coyene xua abe exana. ¹⁴ Nacom cana exana po coyenewa xua jiwi tūpa pecana exanaewatsi, xua barapo coyenewa isoto pucuatha xotsi xua nacaewita cana exanatsi. Barichi Nacom cana exana xua po nacua pomonaē pewerapeibiwi pia nacua tatsi xua barapo nacua xotsi isoto pucuatha xua nacaewita cana exanatsi po pucuatha ichaxota ataya tsitecaeya taxuncua. Barapo petūpae coyenewa apara xua jiwi caewa werapaena po jiwi jopa pejume cowūntsiwi. ¹⁵ Irūno pomonaē xua jopa wūn dubenaeyo barapo diborotha po diborotha ba jiwi nacapanenebiya tsaibi poxonaē wūn dubeibatsi, barapomonaē irū barapo isoto pucuatha bebaichi, Nacom bebai.

¹ Bapoxonae tan pena itaboco yawano pena irano, tsipei po itaboco copiya ducua yawa po ira copiya ducua aichurubena, equeicha jopa naitutsiyo. Yawano pin mar mene aichurucuae. ² Xan, pon Juan tsocuaein, tan Nacom pia pepa pexeinya tomara tatsi ichaxota jinompa pomonae peantobewichi Nacom. Barapo tomara pena Jerusalén tomara, po tomara Nacom pia xainya wetsica tatsi pona xua itaboco wetsica. Barapo tomara nacui xaxainchiya weta, icha yabũyo ichi xua poxonae nacui xaxainchiya weta xua poxonae pecotsiwa perũ nacoyobina. ³ Jume tan pejume xua peitaboco wetsica jume daunweya jeye: “Taema anoxuae Nacom popona pebiwitha. Nacom baru poponaena, bara barapomonae Nacom pijimonae tatsi tsane. Nacom ataya tsitecaeya baru poponaena barapomonae penacana exanaexae xua piamonae tatsi pia Nacom tatsi. ⁴ Barapomonae Nacom itacuere mene canotsina xua pewecoyeixae, xua barapomonae equeicha jopa peatenewa tsane. Equeicha jiwi jopa werapae tsane barapo petũpae coyenewatha. Mataũtano jopa pewecoyeinexa tsane, tsipei xua xuan copiya exana po irathe bayatha aichurucuae xua nacaewita”, jei po jume xua itaboco wetsica paeba.

⁵ Bapon Nacom pon eca pia pexeinya peecaethopaewatha nejei: “Taema daxita exanan xua xuan penawan”, nejei Nacom. Equeicha nejei: “Baxuan tinare, tsipei barapo jumein pexainyei jumein, daxota ichamonae itacũpatsi xua tana neyabara jume cowũntsiwa xua bara exanaein pocotsiwa xua taneme”, nejei Nacom.

⁶ Bapoxonae equeicha nejei: “Bara baxuan bayatha nacui weta. Xan ponxaein apara ataya tsitecaeya tapoponaein xua poxonae aena daxita tamropata pitaban. Mataũtano bexano ataya tsitecaeya bara tapoponaewa tsane. Po pebin xua bichocono meratsipa xua daxota bara amanaya mera neapatsiwa barapo coyenewa icha be ichin poxonae jiwi yawenan. Pon xua bejũntũ coyene jichatsi xua ajũntũcoyeneyapusũ peexanaewatsi bara bapon amanaya catsin peajũntũcoyeneyapusũwa, po peajũntũcoyeneyapusũwa xua ataya tsiteca. ⁷ Pon xua jũntũ coyene amanayaba caurimonae poxonae caurimonae bequein abe exana bapontha, bapon xeinaena pocotsiwa be pentoma pocotsiwa xua bayatha jũntana jeban bapon. Barapon pia Nacom tatsin tsane yawa barapon apara bara taxanto tsane. ⁸ Ichitha pomonae pijunuwi jopa nejume cowũntsiyo xua ichamonae abe peexanaewa tsane barapomonaetha irũrũ pomonae jopa benejume cowũntsiyo, irũrũ pomonae peajũntũcoyenebewi, irũrũ pomonae jiwi pejutebiwi, irũrũ pomonae xua penasi cui exanaewi xua peweiweinaewa, irũrũ pomonae mara pexeinaewi irũrũ pomonae wũnae pejainchiwi ibo nacom, irũno pomonae naerabiya pepaebiwi, daxita barapomonae bebai tsainchi isoto pucuatha po pucuatha ichaxota ataya tsitecaeya taxuncua xua bichocono aitareyapusũ tsuncuae po peitare pewũn azufre matawũn. Barapo petũpae coyenewa apara xua poxonae equeicha jiwi caewa werapaena pomonae pejume cowũntsiwi”, jei Nacom pon eca pia pexeinya peecaethopaewatha.

Meje yabara po diwesi xua pena Jerusalén tomara

⁹ Bapoxonae matatsunpin patopa pon xua siete poyobe jiwana, po siete poyobe matatsunpiwi xua xeina coroton siete xoyobe xua wũnba peabe cuiru coyenewan xua bara nama opi ducua pocotsiwa Nacom exanaena. Bapon nejei: “Anetha catsita itũtsinchi Cordero pecotsiwa tatsi xua bara yatsicaya piowa tatsi”, jei matatsunpin. ¹⁰ Tananetsita itũtsiwatha xua poxonae Nacom pia Pejumo pe tũnaxũ tatsi netsita itũta bapoxonae matatsunpin necapona pin demxuwa beya po demxuwa xua bichocono taũcha. Yawano baxotiya matatsunpin netsita itũta Nacom pia pepa pexeinya tomara tatsi ichaxota jinompa pomonae peantobewichi Nacom. Barapo tomara pena Jerusalén tomara, po tomara Nacom pia xainya wetsica tatsi pona xua itaboco wetsica. ¹¹ Barapo tomara bichocono wũnae xua pentha exanuncua Nacom pia pexeinya itũpanae coicha tatsi, tsipei Nacom baxota popona. Barapo pepentha tsuncuae coichawa bichocono daedaena icha iboto ichi xua po iboto itũpana po iboto ira bũxũpana iboto. Bara pocotsi itũpanae iboto jaspe matawũn, po iboto xua epa nasaba. ¹² Barapo Jerusalén tomara yacaincha matawacaichiya uncuatsi xua pocotsiwa be curara xua ƚ ibo xua bichocono amũxũbũrũtiyũ xuanu xua bichocono taũcha. Yawano xeina doce po coibotobe.

Daxita barapo coibotontha tsiniya umena matatsunpiwi, xua be caein tsiniya. Barapo coibotontha tsitsiniya wun dudubenapoinya Israel pia pemomoxi susato bicheiton tatsi.

¹³ Matautano acoibi po coibotobe ducua ichaxota pocotsiwa xometo weecoina. Icha acoibi coibotobe ducua ichaxota pocotsiwa xometo bejopiya. Yawano epatauta dena ainya acoibibe po coibotobe nantiya ducube. ¹⁴ Yawano barapo curaratha ira wetsina umena iboton. Barapo iboton doce po ibotonbe xua barapo ibotontha tsiniya wun dubena pewunxi xua doce poyobe pomonae Cordero pia peitorobi jiwi tatsi.

¹⁵ Barapo matatsunpin, po matatsunpin netsipaeba, bapon capatopa pocotsiwa xua pecacanaubiwa xua be naewa xua oro nainto peepa canaubinexa tomara yawa pecoiboton yawa curara. ¹⁶ Tomara nantiya namuxuburu jurabe xua apiya dena. Barapo matatsunpin epa canabarena barapo tomara dos mil doscientos po kilómetrobe xeina xua apiya dena yawa xua taucha xua asiyeicha daxita baxuan nantiya naepa jurpa. ¹⁷ Baroxonae epa canauba curara muxuburu sesenta y cinco po metrobe xeina xua pemuxuburu xua aitiya. Baxuan matatsunpin exana be jiwi pia pecanaubiya coyenewa tatsi.

¹⁸ Curara iboton u xuan pexeinya iboton, xua ira buxupana iboton xuan jaspe matawun. Tomara acaba u xuan pocotsiwan oro matawun be xuan peepa nasabiwan. ¹⁹ Po iboton ira weumeina xua doce po ibotonbe, daxita mata pepena xua mata wunae exana icha be iboton ichi pocotsi iboton ainya matoman. Po iboto copiya barapo iboto mata pepena xua jaspe iboton matawun. Po iboto ichaxota ba “dos”, jei, barapo iboto mata pepena xua zafiro ibo matawun. Po iboto ichaxota ba “tres”, jei, barapo iboto mata pepena ágata ibo matawun. Po iboto ichaxota ba “cuatro”, jei, barapo iboto mata pepena esmeralda ibo matawun. ²⁰ Po iboto ichaxota ba “cinco”, jei, barapo iboto mata pepena ónice ibo matawun. Po iboto ichaxota ba “seis”, jei, barapo iboto mata pepena cornalina ibo matawun. Po iboto ichaxota ba “siete”, jei, barapo iboto mata pepena crisólito ibo matawun. Po iboto ichaxota ba “ocho”, jei, barapo iboto mata pepena berilo ibo matawun. Po iboto ichaxota ba “nueve”, jei, barapo iboto mata pepena topacio ibo matawun. Po iboto ichaxota ba “diez”, jei, barapo iboto mata pepena crisoprasa ibo matawun. Po iboto ichaxota ba “once”, jei, barapo iboto mata pepena jacinto ibo matawun. Po iboto ichaxota ba “doce”, jei, barapo iboto mata pepena amatista ibo matawun. ²¹ Barapo doce po boupanbe exana u xuan be perla matawun xua daxita barompaya peboupan tsiniya. Barapo pepa namto xua tomaratha exana u pocotsiwa xua xuan be oro nainton xua xuan peepa nasabiwan poxoru xua be pepa oro nainton.

²² Barapo tomaratha jopa taeinyo Nacom pin pia bo tatsi tsipei bara Nacom baxota pepoponaexae po Nacom daxita pia peayapusu itorobi coyenewan xeina. Iruru xua baxota pepoponaexae Cordero daxota jopa nantawenonaeyo Nacom pin pia bo tatsi. ²³ Barapo tomara jopa nantawenonaeyo xometo xua tomara pentha peexanaewa tsane yawano xua jomocoichatono, tsipei Nacom baxota popona peyacoicha jinaexae xua barompaya pia pexeinya pecoichaxae tatsi, xuano iruru xeina Cordero barapo coicha. ²⁴ Pomonae xua bayatha Nacom capanenebiya, barapomonae barapo coichatha ponaena barapo tomaratha po coicha Nacom pia coicha. Daxita pomonae jiwi itorobiya pia pepa peewatsiwichi barapomonae Nacom catsibinchi barapo tomaratha po coyene xua Nacom wunae pejainchiwatsi po coyene xua tsita exanatsi xua bayatha jiwi tsita exana barapomonaetha. ²⁵ Peboupan jopa bapana coibo xatababanobi mataqueitha, xua baxota jopa ataya tsitecaeya pequirei tsaibi tsouneibixae. ²⁶ Daxita nacuanpiwi Nacom capona barapo tomaratha xua Nacom pecatsibiwa tsainchi pocotsiwan pewunaewan xua be copei. Matautano Nacom catatsi po coyene xua Nacom wunae pejainchiwatsi. ²⁷ Ichitha xua xuan peabe coyenein bapana jopa patsi tsane barapo tomaratha. Matautano jopa patsi tsane baxota pomonae abe peexanaewi iruru pomonae pemuxuitorobiwi. Saya meisa patsina baxota pomonae wun dubena po diborotha ba jiwi nacapanenebiya tsaibi poxonae wun dubeibatsi baxota, xua po diboro xeina Cordero.

22

¹ Nexata matatsunpin netsita ituta mene, po mene xua mene itarana, po mene xua jiwi axumerasū exanatsi, xua icha Nacom ichi xua jiwi ajuntucoyeneyapusū exanatsi. Barapo mene bichocono mene itarana icha bosibū ichi xua epa nasaba, baxua xua Nacom pia pexeinya peecaethopeibiwa werena pona, yawano xua Cordero pia pexeinya peecaethopeibiwa tatsi werena pona. ² Barapo mene, mene ducuaaponarena pepa namto dena tomaratha. Barapo mene dena nantiya ainya muxunene denabe naein xuwa xua po naein jiwi ajuntucoyeneyapusū exainchi. Barapo naein nacoiteiba doce po cuiyobe xua cae weitha. Daxita xometontha nawetouneiba. Barapo naein noxuton jiwi yawenatsi xua jantema pejinompaewa xua jopa peatenewa. ³ Barapo tomaratha jopa xeinae tsane xua peabe coyenein. Barapo tomaratha uncuaena Nacom pia pexeinya peecaethopeibiwa tatsi irū baxota uncuaena Cordero pia pexeinya peecaethopeibiwa tatsi. Pomonae Nacom pia petanacuichiwichixaetsi barapo tomaratha barapomonae Nacom wūnae jainchinchī. ⁴ Bapoxonae jiwi Nacom itabara taeya cueicueijeī tsainchi. Barapomonae peitapatha cainompaena Nacom pewūn tatsi. ⁵ Barapo tomaratha ataya tsitecaeya jopa quirei tsounae tsaibi tsane. Pomonae baxota jinompa jopa nantawenonae tsane pecoicha xua lámpara coicha xuano xua xometo coichano. Daxota jopa nantawenonaeyo tsipei Nacom pon jiwi Pecanamataxeinaein baxota popona, barompaya pia pecoicha peyacoicha jinaexae xua pia pepontha. Irū pomonae baxota jinompa jiwi itorobiya ewatsinchī xua ataya tsitecaeya tsane.

Meje yabara po diwesi xua Jesucristo poxonae patopeicaena xua imoxoyo bara nama

⁶ Bapoxonae equeicha matatsunpin nejei: “Barapo jumein pexainyei jumein. Daxota ichamonae itacūpatsi xua tana neyabara jume cowūntsiwa xua bara exanaein pocotsiwa xua taneme. Pon jiwi Pecanamataxeinaein bapon Nacom itoroba pia Pejumope tūnaxū tatsi xua jiwi peyawenaewa tsainchi xua poxonae jiwi cueicueijeī Nacom nexa. Yawano Nacom itoroba pia matatsunpin xua petsita itūtsinexa pomonae pia penacajume caitorobi diwesi tatsi petacueicueijeichiwichi xua barapo matatsunpin barapomonae yabara petsipaebinexatsi po coyene Nacom imoxoyo exanaenaba”, nejei.

⁷ Equeicha matatsunpin nejei xua saya Jesús tapaebatsi, jeye: “¡Bara nama imoxoyo patopeican! ¡Juntū coyene weiweinaena pon xua exana xuan pocotsiwan Nacom ichichipa xuan pocotsiwan paeba po diborothe!” jeī barapo matatsunpin xua Jesús tapaebatsi.

⁸ Xan, pon Juan tsocuaein, tan daxita baxuan yawano jume tan. Poxonae bayatha jume tan, yawa xua bayatha tan xua pocotsiwan matatsunpin netsita ituta, bapoxonae bapon petaxutha irabe taeuncuarecan xua wūnae tajainchinexa bapon. ⁹ Ichitha bapon nejei: “¡Bara! Jopa baxua neexanaeinde. Apra xan ponxaein taexanaein Nacom piawa tatsi, icha xam ichim yawa icha pomonae jinya jiwimonae ichi, pomonae Nacom peitorobi jume pepaebiwi, irūno pomonae xua jume cowūnta dubenanaebiya daxita po coyenein xua po diborothe tinan. Jame Nacom bapon wūnae jainde”, nejei matatsunpin.

¹⁰ Yawano nejei: “Jopa moya yawūn xeinaeinde Nacom Pejume Diwesi, xua xuan pocotsiwan paeba po diborothe. Tsipei imoxoyo nama Nacom exanaena xua pocotsiwan po diborothe pepaebixae. ¹¹ Poxonae cataunxuae Nacom jopa wetsiyo, pon xua abe peexanaein, bū moya bara abe exana ducuaanaebiya. Irū pon xua nanthū coyene xeina peacuirucoyenebewan, bū moya bara baxuan nanta xeina ducuaanaebiyaena. Ichitha pon wūnae exana Nacom nexa, bū moya exana ducuaanaebiya. Pon xua Nacom petsita naexanaewatsi xua penthūthū xeicaein penaexanaewa, bū moya bara Nacom jume cowūnta ducuaanaebiyatsi”, nejei.

¹² Bapoxonae Jesús jeye: “Aa, bara nama imoxoyo patopeicaein. Capatopeicaein pocotsiwan be pentoman, xua caeintha barompaya piawan catsibin. Pon xua nawita inta exana xuya nawita catsin. Pon xua be conohta inta exana xuya be conohta catsin. ¹³ Xan ponxaein apra ataya tsitecaeya tapoponaein xua poxonae aena daxita

tamropata pitaban. Matautano bexano daxita coyenein wetsin tsipei ataya tsitecaeya bara tapoponaewa tsane”, jei Jesús.

¹⁴ Jüntu coyene weiweinaena pomonae najüntu coyene cui barapenta peabe coyenewan. Baxuan be poxonae barapomonae pia paparuwan matanaca xua jopa tsoreiyo. Bapoxonae barapomonae itacupaeinchi xua joniyaena tomara coiboto iya tsipei pia paparuwan inyapana yawa jüntu coyene wuna. Yawa barapomonae itacupaeinchi xua tomaratha iya xaena po pethei pexaewa, po pethei jiwi ajüntucoyenesu exainchi.

¹⁵ Ichitha nama aisowatha xua tomara jumatha umenaena pomonae peajüntucuirucoyenebewi iruru pomonae mara pexeinaewi. Yawano pesatotha umena pomonae penata siwa xeinaewi yabuxitha, iruno pomonae jiwi pejutewiwino, iruno pomonae ibo nacom wuna pejainchiwi. Daxitano pomonae becu jichatsi xua naerabiya pepaebiwi xua naerabiya exanano, barapomonae pesatotha umenaena.

¹⁶ Equeicha Jesús nejei: “Xan, pon Jesús, itoroban tamatatsunpin xua daxita baxuan pepaebinexa pomonaetha pomonae pejume cowuntsiwi. Xan bara yatsicaya David pia pemomoxi susato jiwi jiwanapin tatsin, pon David Israel nacuapiwi itorobiya pia pepa peewatsinchi tatsi. Icha be jarawato ichi poto xua bichocono wuna xua poto baya ecoina poxonae icha matabi patopa, xan barichin. Patopan tacapatopaenexa jiwitha po coyene xua bichocono wuna po coyene xua Nacom tsiexana, xua jiwi tsiexanatsi”, nejei Jesús.

¹⁷ Nacom pia Pejumope tunaxu tatsi, iru Cordero pia pecotsiwa tatsi, pomonae Nacom pia pejume cowuntsiwichixaetsi, jeye Jesustha: “Anetha”, jei Nacom pia Pejumope tunaxu tatsi iru Cordero pia pecotsiwa tatsi. Pomonae xua iruru jume tane, jeye: “Anetha”, jei. “Xan Juan paeban pon xua meratsipa yawa beapaena, moya antha, bu po mera jiwi ajüntuyapusu exainchi xua saya amanaya nexa”, jan.

¹⁸ Daxita pomonae xua jume tane barapo diwesi xua Nacom Pejume Diwesi xua barapo diborothe tinan barapomonae tsipaeban, meje baxue: Icha ichun mataropeicha paeba icha diwesi xua jopa xainyeyo xua po diwesithe, bapoxonae bapontha Nacom itorobina peabe coyenewan be pocotsi coyene cuirun yabara caunuta po diborothe. ¹⁹ Icha ichun jiwana jume wexuba xua po diborothe paeba, xuya Nacom pia diborothe wan xubina, po diborothe jiwi nacapanenebiya tsaibi poxonae wan dubeibatsi baxota. Yawano Nacom jopa copatsiyo xua bapon pepatopaewa Nacom pia pepa pexeinya tomaratha tatsi po tomara pena tomara ichaxota jinompa pomonae peantobewichi Nacom. Barapo pecapanenebiya coyenewa iru barapo tomarano barapo diborothe yabara tina.

²⁰ Jesús pon pia matatsunpin peitorobixae xua barapo matatsunpin yabara tana netsipaebiwa pocotsiwa xua bexa exanaena, bapon nejei: “Aa, bara nama imoxoyo patopeicaein”, jei.

Je, moya anetha patopeinca xam, Jesús, ponxaem Tanecanamataxeinaem, jan.

²¹ Jesucristo, pon jiwi Pecanamataxeinaein, barabu paca yawenaena pia painya nepaca caantobexae daxita paxam. Je bara ichi tsane.

Baja Juan.